


Kotimo Kawe Someaka Masane Oyapo



The New Testament in the Fasu Language of Papua New Guinea

Kotimo Kawe Someaka Masane Oyapo
The New Testament in the Fasu Language of Papua New Guinea
Nupela Testamen long tokples Fasu long Niugini

copyright © 2011 Wycliffe Bible Translators, Inc.

Language: Fasu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.
For other uses, please contact the respective copyright owners.

2015-01-02

PDF generated using Haiola and XeLaTeX on 4 Mar 2019 from source files dated 22 Dec 2018
e56f9062-586b-51c4-85a0-29d4f916a414

Contents

FRT	1
Matiu	3
Maka	70
Ruki	110
Yone	177
Tarira Aporo	223
Rome	282
1 Korini	320
2 Korini	349
Karesia	371
Efesase	383
Firipai	394
Korosi	402
1 Tesaronaeka	410
2 Tesaronaeka	417
1 Timoti	421
2 Timoti	431
Taetase	438
Fairimone	443
Hipuru	445
Yamese	470
1 Pita	479
2 Pita	489
1 Yone	495
2 Yone	503
3 Yone	505
Yuti	507
SFT	510
.	542
.	554

Kotimo Kawe Someaka Masane Oyapo

The New Testament in the Fasu language of Papua New Guinea

Nupela Testamen long tokples Fasu long Niugini

Kotimo Kawe Someaka Masane Oyapo

The New Testament in the Fasu language of Papua New Guinea
[faa]

Translation by Wycliffe Bible Translators

© 2011 Wycliffe Bible Translators, Inc.

Print publication 2011 by Wycliffe Bible Translators

Web version
2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremt samting i no orait long dispela tok orait, stremt tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

Nu Tesetamane sawi yano motosane oyapo.

Matiu Matiu sawi one mahemakapukusa someane oyapo.

Yasumo aporo hakāsa pura metane Matiupo. Matiu yano motosa meta Rífaipo. Fana Matiumo Rome kamanipoko makata rakisiapo. Epo makata rakirane, ipi takese mora aporopo.

Yasu ipi Kotimo unihaeaka rekeasimo murikimasa aporo Keresoane ipipo. Yu aporo hinamomo ayiáka hemakapusimo Matiumo sawi one popasapo. Fana Yu aporo porofete aporomo Kereso peraka makata ayiakakosane sawia popasapo. Asiamo ipu popasane fasereperakano asekea Matiumo popasapo. Yasu hepene yapura hisiapoko keremisi 30 faraka Matiumo sawi one popasapo.

Matiu sawia some kepo parakuraka popasane oyapo.

1:1-17 Eparahamemo wainepe pesa aeyaka Yasu takapesapo.

1:18-25 Yasu takapesapo.

1:18-2:23 Yasu takapesa maiya amo aporo metakiramo kekerehoko pesapo.

3:1-12 Yone he tapukumareramo aporo hinamo hea tapukumurisiapo.

3:13-17 Yonemo Yasuane hea tapukumaresapo.

4:1-11 Satanemo Yasuane mokopipiraka somesa nine Yasumo kaisiafapo.

4:12-18:35 Kariri hauaka á Yasu koraka reke makata rakisiapo.

19:1-20:34 Yasumo Kariri hauakane metakarikia Yarusarame sitia hisiapo.

21:1-27:66 Yasu Yarusarame sitia rea maiya amo Yutasemo eane parakesapo. Paraker-akano Yasu waseremaka hukurukua rusua kusuapo.

28:1-20 Yasu turikia purakano aporo hinamo metakiramo eane asesapo.

Eparahamemo aporo wainepe pesane oyapo.

Ruki 3:23-38

¹ Éparahamemo aporo ira wainepe pesa á Yasu faserepesane oyapo. Yasu Keresomo makasa kaua kekemané Téfetepo. Téfetemo makasa kaua kekemané Éparahamepo.

² Éparahamemo ipi maeyane Aísakepo. Aísakemo ipi maeyane Yákopepo. Yákopemo aporo hokosa hokono murisiapo. Hokono murisiane meta Yútapo.*

³ Yútamo ipi hinamo Téma arumaka aporo hokosa teta hokono maresane meta Sérapo, meta Péresepó. Péresemo ipi maeyane Héseronepo. Héseronemo ipi maeyane Rámepo.

⁴ Rámemo ipi maeyane Amínatapepo. Amínatapemo ipi maeyane Násonepo. Násonemo ipi maeyane Saómonepo.

⁵ Saómonemo ipi hinamo Réhape arumaka aporo hokosa hokono maresane Póasepo. Póasemo hinamo Rúte arumaka aporo hokosa hokono maresane Opetepo. Opetemo ipi maeyane Yésepo.

⁶ Yésemo ipi maeyane Téfetepo. Téfete ane ipi unihaeaka reapo. Téfetemo Yurayamo hinamo yaroane arumaka hokosa hokono maresane Sóromonepo.

⁷ Sóromonemo ipi maeyane Ríapomepo. Ríapomemo ipi maeyane Apaísapo. Apaísamo ipi maeyane Ésapo.

⁸ Ésamo ipi maeyane Yihósafatepo. Yihósafatemo ipi maeyane Yóramepo. Yóramemo ipi maeyane Usáyapo.

⁹ Usáyamo ipi maeyane Yótamepo. Yótamemo ipi maeyane Éhasepo. Éhasemo ipi maeyane Hesekáyapo.

¹⁰ Hesekáyamo ipi maeyane Manásapo. Manásamo ipi maeyane Émonepo. Émonemo ipi maeyane Yosáyapo.

* 1:2: Yákopemo aporo hokosa kenosu hokono murisia amo Yu aporo ira keno suane kepomaresapo.

¹¹ Yosáyamo ipi maeyane Yakóyakinipo.[†] Arirakano Yosáyamo aporo hokosa metakira soko hokono murisiapo. Yosáyamo hokosa hokono murisia maiya amo Isiraya aporo ane tipura keako Pápirone hauaka á karikia pusuapo.

¹² Karikia pusuakipoko Yakóyakinimo ipi maeya hokono maresane Siátiopo. Siátiomo ipi maeyane Serápapeopo.

¹³ Serápapeomo ipi maeyane Apiútepo. Apiútemo ipi maeyane Eraýakimepo. Eraýakimemo ipi maeyane Ésopo.

¹⁴ Ésomo ipi maeyane Sétokepo. Sétokemo ipi maeyane Ékimepo. Ékimemo ipi maeyane Eriútepo.

¹⁵ Eriútemo ipi maeyane Ereásapo. Ereásamo ipi maeyane Mátanepo. Mátanemo ipi maeyane Yákopepo.

¹⁶ Yákopemo ipi maeyane Yósefepo. Yósefemo ipi hinamoane Maríapo. Maríamo hokosa takapesane Yasupo. Yasu ipi unihaeaka rekeasimo Kotimo máfaraka maresasamo ipi yano motosa Keresopo.

¹⁷ Asiamo Eparahamemo aporo ira wainepe pusuane menorape pukua, senakiane (14) Tefetepo. Tefetemo aporo ira wainepe pusuane menorape pukua, senakiane (14) Pápirone hauaka á tipura keako pusua maiya amo aporo hokosa hokono maresa ayapo. Pápirone hauaka á tipura keako pusua aeyaka kepomarekea menorape pukua, senakiane (14) Keresopo.

Yasu Kereso takapesane oyapo.

Ruki 2:1-7

¹⁸ Yasu Kereso takapesane oyapo. Ipi kaýia Maria ane Yosefemo arumakasiraka fairaka rea maiya amo, Maria tua Ho Kotesamo hokosa makerakano umisapo.

¹⁹ Umirakano asekea Maria faisa aporo Yosefeane ipi tau reke, somemane motosane kekemaraka tau keneamo reasasamo epo hemakapuraka, “Maria aporo metayaki purakanareapo. Asiamo eaki kára hukuruane aporo suamo e makaiyanapaka faisane tau metakariakosapo.” ²⁰ Aýaka hemakapukua reakipoko, kituamo Unihae Kotimo hepene aporo peraka Yosefeaki someraka, “Tefetemo aporo ira Yosefeo. Ní hinamo Mariane arumako karekekea metakariakopo. Ni apea Mariane karikia punie. Ipi umisa akayane Ho Kotesamo hokosa eaki makesapo. ²¹ Hokosane aporo hokosa takapeakosapo. Takaperakano e yano motoraka Yasu yano motoanie. Yasu yano motosa kepoamo Isiraya aporo hinamomo makata watikisane rakiraka risikino, i fanasinapaka epo mafasiakosapo.”

²²⁻²⁵ Airakano Yosefe turikia puraka Unihae Kotimo hepene aporomo somesane kakimaka, Mariane ipi apea karikia pusuapo. Pukua Maria hokosa takapeasiraka kaya maiya amo, Yosefe eyaki hakása yao pusufapo. Maria umiraka kayane aporo hokosa takaperakano asekea hokosane yano motoraka Yasu yano motosapo. Yasu pesane, makata ane su ayikasiraka, wate fana porofete aporomo Kotimo someane kaikia sawia popasapo.

Sawia popasane oyapo. “Kaisie, hinamo sakora umiraka kakakosapo. Umiraka kaina aporo hokosa takapeakosapo. Takaperakano e yano motoraka Emánio yano motoanie,” aýaka Unihae Kotimo somerakano porofete aporomo kaikia popahoareapo. (*Aisaia 7:14*)

Popasane faserepesa ayareapo. Arirakano namo meaka Emánio yano motosa kepoane, Kotiane isuyaki rekenapo. Aýaka yano motosapo.

Maiya apera taku aeyaka aporo pesane oyapo.

¹ Herote unihaeaka rea maiya amo, Yutía hauaka á Petereheme taonea Yasu takape-sapo. Takapesa maiya amo, maiya apera taku aeyaka ti makata asera aporo Yarusarame sitia pesapo. ² Pekea ipu someraka, “Hokosa kawe takapesane Yu aporo unihaeaka

[†] 1:11: Yahóyakinimo yano meta yano motosa Yakonaeapo.

rekeakosane mayare? Maiya apera takua ti makata haku kumuku fasereperakano asekea isiapo hemakapuraka, ‘Yu aporomo unihaeane takapereapo.’ Aíyaka hemakapukua eaki kekerehoko isu perakayiapo.”

³ Airakano Herotemo kaikia unihae metamo e hurutapirapaka mahisisapo. Mahisisane Yarusarame aporomo kairaka fofasapo. ⁴ Arirakano Herotemo mahisiraka reke, pirisiti aporo kárane soko, Kotimo somemané tisa aporoane soko, e rea sarimahoko peaesapo. Perakano asekea Herotemo someraka, “Kotimo unihaeaka rekeasimo murikimasa aporo Kereso pusiehokosaposane, hauaka ma takapeakosaposare?” ⁵ Airakano ipu someraka, “Yutía hauaka á Petereheme taonea takapeakosaposapo.” Aíyaka takapeakosaposane wate fana porofete aporomo poparaka,

⁶ “Yutía hauaka á Petereheme taonea kisiane ape wakasemapo. Wakasema nina apea Unihae takapeakosasamo apeane fanahokosapo. Unihae amo Isiraya aporo hinamo su Kotimo murikimasane epo asekea rekeakosapo.” Aíyaka porofete aporomo popahoareapo.

^{5:2)}

Aíyaka ipu Heroteaki somesapo.

⁷ Someaka farakano Herotemo kaikia i pusiesapo. I pusuakipoko Herote ipi haku reke, ti makata asera aporoane peaesapo. Perakano iaki someraka, “Repo ti makatane sere mamo asesare?” ⁸ Airakano ipu ti makata asesa sereane somesapo. Somerakan Herotemo kaikia someraka, “Petereheme taonea hokosa takapesane kope pusie. Pukua hokosa takapesane kokoa aseraka, anoaki somehoko popariepeanie. Nōmo soko hokosane kekerehoko pukusakipoko, anoaki somehoko popariepeanie.”

⁹ Aíyaka Herotemo somerakan ipu kaikia pusuapo. Puraka fana i maiya apera takua risike ti makata asesane ti makata hakása nine eféra hunia rekeno asesapo. Aseane ti makatane fanaraka purakano ipu asepe pusuapo. Ti makatane hokosa takapesa apea erekeraka rekeno ¹⁰ aseraka kára sesasapo. ¹¹ Seseraka pukua apea yorokoa aseane, hokosa ipi kaíyia Mariayaki kakeno asesapo. Aseraka i kakuna porokoa toke hokosaki kekeresapo. Ipu makata mahimuraka taesane mokoa pekea, hokosaki yaku kasapo. Karaka eke koróto soko,* ira pi wape yamona yano motosa ferekese soko, ira pi meta wape yamona yano motosa mua soko makatane mokoa pesane yaku kasapo. ¹² Kaka marekea i namina apea poparipuraka, Heroteaki somehoko pusuafapo. Asiamo kituamo “Herote aseako pukupo.” Airakano kaikia, Herotemo apeane koaraka ikia kara meta aeyaka i namina apea pusuapo.

Yasu Iyipi hauaka karikia pusuane oyapo.

¹³ Aporo pesane pusuakipoko, Yosefemo kituamo Unihae Kotimo ipi hepene aporomo Yosefeaki someraka, “Ne takahikia pusie. Hokosane rusua kukusakipoko Herotemo kokoa aseakosapo. Aserapaka hokosane soko, hokosamo ipi kaíyiane soko, karikia, Iyipi hauaka tekatarikia pusie. Pukua hauaka á risike nōmo popariepeaerakano peanie.”

¹⁴ Aíyaka hepene aporomo makokorotaerakano kaikia, ere yiamo Yosefe takahikia hokosa soko, ipi kaíyia soko, karikia, Iyipi hauaka á risikiako tekatarikia pusuapo.

¹⁵ Pukua Herote kukusiraka hitafe rea maiya amo i Iyipi hauaka á risiapo. Iyipi hauaka á risikiako pusiraka, wate fana Kotimo somerakan porofete aporomo kaikia poparaka, “Iyipi hauaka aeyaka nōmo hokosa peaerakano peakosapo.” Aíyaka Kotimo somerakan porofete aporomo kaikia popasane faserepesa ayareapo.

Aporo hokosa rusua kukusimo Herotemo somesane oyapo.

¹⁶ Asiamo ti makata asera aporoane Herote rea popariepeanafonorakano Herotemo hemakapuraka, “Aporoamo anoaki kotafe hokoa rureapo.” Aíyaka hemakapuraka ipi kára sapeasapo. Saperaka reke epo hemakapuraka, “Aporo kimisi pesamo ti makata asesa sere ane, somesa sere hakasa yiamo Isiraya aporomo unihaeane takapereapo.

* ^{2:11:} Koróto soko, ira pi wape yamonane soko mone karamo roponapo. Asiamo aporo pesamo Yasuaki karaka, ipu hemakapuraka Yasuane aporo unihae kára rekeakosapo.

Takapesa sere ane menorape pekea, sere o pauanane hokosa kapokararakasiapo.” Aíyaka Herotemo hemakapuraka someraka, “Hokosa kapokarasane soko, apapusane soko suane rukua fahoanie. Petereheme taoneá soko, Petereheme taone makeraka á risiane soko, aporo hokosa suane rukua fahoanie.” Airakano kaikia aporo hokosa suane rukua fasapo. ¹⁷ Rusuane rusiraka wate fana porofete aporo Yaremayamo popasane yaiya faserepesa ayareapo. Porofete aporoamo popasane oyapo.

¹⁸ “Aporomo kaiyiáne Rama apea hinamomo kára hiripurakano kaiyakosapo. Hinamo ipi yano motosa Reseremo ipi hokosapoko kára hiripurakano kaiyakosapo. Hokosa su rukua fasakipoko e mauwaraka somehoane soko epo kakipayarakano aseakosapo.” Aíyaka porofete aporomo wate fana popasane kakaro yaiya faserepesa ayareapo. (*Jeremaia 31:15*)

Yosefemo Iyipi hauaka metakarikia, hokosa soko, ipi kaiyia soko karikia, Kariri hauaka á poparipesapo.

¹⁹ Keseke Herote kurakano asekea, Yosefe Iyipi hauaka reakipoko kituamo Unihae Kotimo hepene aporo pekea Yosefeaki someraka, ²⁰ “Ne takahisie. Aporo hokosa kukusimo rukusapoko hemakapukua rea aporoane kusuapo. Kusuasamo hokosa soko, hokosamo ipi kaiyia soko, karikia hisie. Hikia Isiraya hauaka á risikiako poparihisie.”

²¹ Airakano Yosefe turikia pukua, takahikia hokosa soko, hokosamo ipi kaiyia soko, karikia, Isiraya[†] hauaka á poparihisiaipo. ²² Poparihinaka kaiyiáne Herotemo maeya Akerease ipi ata finihaoa reke, Yutía hauaka á unihaeaka rekenapakano kaisiapo. Kaikia Yosefe Yutía hauaka á pukusane karekekeea reapo. Karekekeea reakipoko kituamo Yutía hauaka á hiakoporakano, Kariri hauaka á pusuapo. ²³ Pukua Nasare apea risikiako pusuapo. Risikiako pusuane pusiraka, wate fana porofete aporo metakiramo somesane oyapo. “E Nasare aporopo, aíyaka aporo suamo aihokosapo.” Aíyaka porofete aporomo somesane faserepesa ayareapo.

3

Yone he tapukumareramo some kasane oyapo.

Maka 1:1-8; Ruki 3:1-18; Yone 1:19-28

¹ Wakasema risina keseke, Yutía hauaka ima yaoa Yone he tapukumarerane pekea aporo hinamoaki some karáka, ² “Kotimo unihaeaka asekea rekeakosa maiyane makasasamo, repo makata watikisane metakarikia eaki risikiako parihoanie. Epo re asekea rekeasimo eaki risikiako parihoanie,” aisapo.

³ Aisa aporoane wate fana porofete aporo Aesayamo poparaka, “Aporo ima yaoa rekeakosapo. Reke epo sakepamo someraka, ‘Unihae peakosane ikia kára makotehoanie. Ikia kárane hahaesekeno maereketaehoanie.’ Aíyaka ima yaoa aporoamo somehokosapo.” Aíyaka Aesayamo popasane Yone ane popasapo. (*Aisaia 40:3*)

⁴ Ima yaoa Yone rea maiya amo saro kamo iti pasu pesa osoraka, saro kau terakae hikia, kitaro kesé asia nekea, sao he wapesa asia nekea ayíáka reapo. ⁵ E rea hauaka á aporo hinamo Yarusarame siti aeyaka soko, Yutía hauaka aeyaka soko, he Yotane makeraka aeyaka soko, aporo hinamo yakai pesapo. ⁶ Pekea ipu makata watikisane hufitaerakano, Yonemo iane he Yotanea tapukumurisiapo.

⁷ Yonemo hea tapukumuriraka reke aseane Fereze aporo soko, Satusi aporo soko, i metakira hea tapukumuriasimo perakanre asekea, Yonemo iaki someraka, “Re su heseke ayireapo.* Kotimo reaki kára saperaka fanasinapaka epamo reaki somerakano, re teketerikia perakanre? ⁸ Arirakano ira kotesamo wate koteaka perapo. Aina ayíáka repo himu watikisane metakarikia risikiako parisane asekeasimo koteaka susu risikianie. ⁹ Ayíáka risikiafunusa nine repo hemakapuraka, ‘Isu Eparahamemo aporo irasasamo Kotimo aporoane isupo. Asiamo isu siaraka risikinapo.’ Aíyaka hemakapukupo.

[†] 2:21: Isiraya hauaka kára á hauaka kekepo fete feteraka asekea reane meta Yutía hauakapo. Meta Kariri hauakapo. Meta Sameria hauakapo. * 3:7: Kotimo re fanasinapaka kaumó hea tapukumuriasimo apere, aíyaka epo somesapo.

Eparahamemo aporo ira parihoasimo Kotimo eke ane maka, aporomano parihoane sia aporomano maparihokosapo. ¹⁰ Asiamo aporomo ira tokorakosakipoko kapi máfaraka area ayíáka, maiya omo Kotimo fanasina motoakosane ayíáka makeraka rekenapo. Ira wate koteaka peanafonona ira ane tokoraka mokoateraka iramo inakasimo paiyakosapo.

¹¹ Repo himu watikisane metakarikia risikiako parirakano, nōmo reane he hákasa tapukumurirakanapo. Ano reakipoko keseke aporo kára meta peakosapo. Peraka epo Ho Kotesa soko, ira rufi soko re muriakosapo. E aporo kárasasamo aporo raipamo epo tamaka ososane fisiraka maka apura ayíáka nōmo maka puane siahoasifareapo. E aporo kárasasamo nōmo epoko raiparaka rakiako ayiane, ano wakasemasasamo nōmo rakiane siahoasifareapo. Ano eyaki siasafapo. ¹² Aporo kára ane peraka epo sipete asia foke maka peakosapo. Maka peraka hauaka moroa witi hae taesane fokemo fauhoane, witi namo ane ereketae hurupeperakano, ane mokoa apea taehokosapo. Witi kau ane fofomo mokoa pukua takua hurupeperakano, ane mokoateraka ira rufi kopakapunafonona á paiyakosapo.” Aíyaka Yonemo somesapo.

Yonemo Yasuane hea tapukumaresane oyapo.

Maka 1:9-11; Ruki 3:21-22; Yone 1:29-34

¹³ Yone ima yaoa rea maiya amo, Yasu Kariri hauaka metakarikia Yonemo e hea tapukumareasimo he Yotanea pesapo. ¹⁴ Perakano Yonemo waeraka someraka, “Nómo ano hea tapukumareane siahoasireapo. Nōmo ne hea tapukumareane siahoasifareapo.”

¹⁵ Airakano Yasumo someraka, “Wae. Nōmo someane nōmo kakimasie. Kotimo makata koteaka rakiniesane etapo makata su koteaka rakikia rosaka taehoko yumo nōmo ano hea tapukumaresie.” Airakano Yonemo aoraka Yasuane hea tapukumaresapo. ¹⁶ Hea tapukumareraka hea sokoperaka ima yapura hianine, tiane kikisi aka kikisi rorakano aseane, Kotimo Ho Kotesa mena nume asia apera ayíáka pekea, Yasua karaporakano asesapo. ¹⁷ Asekea risia maiya amo hepene aeyaka someraka, “Eane nōmo nī hokosapo. E nōmo himu tumurumo kára hemakapukua seserakanapo.” Aíyaka somerakano kaisiapo.

4

Yasumo watikiaka rakisimo Satanemo eaki mokopipisane oyapo.

Maka 1:12-13; Ruki 4:1-13

¹ Yasu hea tapukumarekea faraka reakipoko Satanemo Yasuaki mokopipihoasimo Ho Kotesamo Yasu ima yaoa karikia pusuapo. ² Pukua sere foti (40) su reámo, sere soko ereamo soko Yasumo makata nesafapo. Nena himu raru reke sere foti ane (40) fahoane e namo kakaro kára meamosapo. ³ Meamoraka reakipoko Satanemo Yasu kau aseakosakipoko mokopipiraka someraka, “Ne Kotimo hokosasamo, nōmo eke atoane maka ní nakosakipoko farawa maparisie.” ⁴ Airakano Yasumo someraka, “Wae. Kotimo sawia popasane oyapo. ‘Aporomano koteaka rekeako, farawa hákasa nenaka koteaka rerafapo. Koteaka rekeako Kotimo somesane kakimarakan koteaka rerapo.’ Aíyaka Kotimo sawia popahoareapo.” ^(Lo 8:3)

⁵ Aíyaka somerakano Satanemo Yasuane Yarusarame sitia karikia hikia Kotimo ape kopo yapura karikia hikia risike someraka, ⁶ “Ne Kotimo hokosasamo, ní yia hauaka atura hurupesie. Huruperakano Kotimo hepene aporoaki ‘E arareracie,’ airakano ne korakea ekemo kareakohoamo hepene aporomo hokonomo ne máfaraka maka rekeakosapo.” Aíyaka Kotimo sawia popahoareapo. ^(Buk Song 91:11-12)

⁷ Airakano Yasumo someraka, “Wae. Kotimo some meta Kotimo sawia popasane oyapo. ‘Ni Unihae Kotiane kau aseakosakipoko ayiakakopo.’ Aíyaka Kotimo sawia popahoareapo.” ^(Lo 6:16)

⁸ Aíyaka somerakano Satanemo Yasu karikia ūri kára teraya hisiapo. Hikia risike kamani kekepomo hauaka kekepoa unihaeaka asekea risiane soko, hauaka sua makata namo kakaro kotesa suane soko, Yasuaki tarisiapo. ⁹ Tariraka Yasuaki someraka, “Nómo ano rea kako pekea kake kakuna porokoa anoaki kekererakano, makata su aserane nōmo unihaeaka asekea rekeasimo né mareakosapo.” ¹⁰ Airakano Yasumo someraka, “Satane

ne pusie. Kotimo sawia popasane oyapo. ‘Nómo Unihaeane Kotipo. Koti ipiaki hákasa kekerehoanie. Epoko hákasa rakinie.’ Aíyaka Kotimo sawia popahoareapo.” [\(Lo 6:13\)](#)

[11](#) Aíyaka Yasumo somerakano Satane pusuapo. Pusuakipoko hepene aporo peraka Yasuane arareraka asekeea risiapo.

Kariri hauaka á Yasumo makata rakira kepomaresane oyapo.

Maka 1:14-15; Ruki 4:14-15; Yone 4:1-3

[12](#) Yonemo unihae Heroteaki ayiakakopo, airakano Herotemo Yoneane tipura make-sapo. Yone tipura makesapakano kairaka Yasu hauaka ane metakarikia, Kariri hauaka á pusuapo. [13](#) Pukua Nasare apea waka reane metakarikia pukua, Kapaneame taonea waka reapo. Arirakano he Kariri he fua Sépuru aporo iramo hauaka soko, Nafatari aporo iramo hauaka soko hauaka á Kapaneame taone kisiapo. Taone kisia á Yasu waka reapo. [14](#) Waka rekeasiraka wate fana porofete aporo Aesayamo popasane faserepesa ayareapo. Aesayamo popasane oyapo.

[15](#) “Sépuru aporo iramo hauaka á soko, Nafatari aporo iramo hauaka á soko, he Yotane yaoraka á soko, he Kariri makeraka hauaka á soko, Yu aporo akiyaki Yu aporohoanafonosa [16](#) ane ereraka risiapo. Ereraka risia aporo hinamoamo Kotimo faesane aseakosapo. Arirakano kurámo mataisa hauaka á aporomano risiane, sere maiyamo faena ayíáka faehokosapo.” Aíyaka popasane faserepesa ayareapo. [\(Aisia 9:1-2\)](#)

[17](#) Yasu Kapaneame taonea pusua maiya amo epo makata rakirane kepomaresapo. Kepomarekea some karaka, “Koti unihaeaka rekeakosa maiyane faserepesapo. Faserepesasamo repo himu watikisane metakarikia eaki risikiako parirasie,” aisapo.

Aporo kitafasuaki Yasumo someraka, “Anoyaki peae,” aisane oyapo.

Maka 1:16-20; Ruki 5:1-11

[18](#) Yasu he Kariri fua pukua aseane Saemone ipi mamanea Enitu tetá asesapo. Arirakano Saemone ipi yano motosa meta Pitapo. Ipi soko, ipi mamanea Enitu soko tetapō makata rakirane pokoa pisinisi rakirapo. Rakiraka risike, tetapō pokoa mokoako hea kasipu kokomarerakano, asesapo. [19](#) Asiamo Yasumo tetáki someraka, “Ano patera asesie. Ano patera aserakano tetápo pokoa amora ayíáka aporo hinamo anoa paohokosane pasimokoasimo, nōmo teto murikimarakapano.” [20](#) Aíyaka somerakano tati kasipuane wate foakaya metakarikia, Yasuyaki hakása pusuapo.

[21](#) Wakasema pukua Yasumo aseane aporo tetá meta risikino asesapo. Asesane Sepetemo hokosa tetá, meta Yamese meta ipi mamanea Yone, tetá wafayayaki kasua risike, kasipu potakahesa petokoraka risikino asesapo. Aseraka tetáne peasimo Yasumo wásapo. [22](#) Wárakano wate foaka tetapō wafayane soko, kasuane soko, metakarikia, tati Yasuyaki hakása pusuapo.

Aporomano makata tasa Yasumo mafasane oyapo.

Maka 3:7-12; Ruki 6:17-19

[23](#) Kariri hauaka ape sumu sua Yasu koraka reke, Yu aporomo sarimana ape sua Kotimo some kotesane some karáka, Koti unihaeaka reane some kasapo. Some karáka aporomano makata kára tasane soko makata wakasema tasane soko, makata tasa kekepo suane Yasumo mafasapo. [24](#) Yasumo aporo makata tasane mafasapakano Siria aporomo kairaka Yasu rea aporomano makata tasa su karikia pesapo. Aporomano makata tasa kekepo tape pusuane karikia pesapo. Karikia pesane metakira kau teraka, metakira yatafumo ho mokoa, metakira masuaraka, metakira kau soko, hokono soko, nariraka korosakataesa aporo su ayíáka makata tape pusuane Yasumo mafasapo.

[25](#) Ayíáka mafarakano asekeea aporo hinamo yakaimo Yasu asekehaerape pusuapo. Pusuane Kariri hauaka aeyaka soko, Tekáporisi hauaka aeyaka soko, Yarusarame siti aeyaka soko, Yutía hauaka aeyaka soko, he Yotane yaoraka hauaka taku aeyaka soko, aporo hinamo yakai pekea Yasu asekehaerape pusuapo.

Kotimo makotenane oyapo.

Ruki 6:20-23

¹ Aporo hinamo yakai pesane Yasumo asekea, ūri terayia hikia kayapo. Kayakipoko ipi aporo hakāsa pura pekea eyaki hakāsa toke ² Yasumo iaki someraka, ³ “Aporo hinamo metakiramo someraka, ‘Kotimo menane ano forokoa reasasamo, Kotimo hemakapusua ayiáka nōmo hemakapukusakipoko seseripo.’ Aisa aporo hinamoane Kotimo unihaeaka asekea rerapo. Asekea reke Kotimo aporo hinamoane makoterakano i seseraka risirapo.

⁴ Arirakano aporo hinamo metakiramo hihiripuraka risikino Kotimo iane kuku-nameaka mauanapo. Mauaraka ayiáka makoterakano i seseraka risirapo.

⁵ Arirakano aporo hinamomo naminane makáraraka rupiaka somehoanafonoraka, naminane mawakasemaraka auaraka risikino, namina hauaka wo makatane asekea risikiasimo Kotimo i murikimaka marerapo. Murikimaka ayiáka makoterakano i seseraka risirapo.

⁶ Arirakano aporo hinamo metakiramo meamoraka risike makata nakosa soko, he soko nako seséna ayiáka, Kotimo ereketae hemakapurane ayiáka seseraka risikino, seséna aporo hinamoaki Kotimo ereketae hemakapurane siaraka karápo. Kaka ayiáka makoterakano i seseraka risirapo.

⁷ Arirakano aporo hinamo metakiramo, aporo hinamo metaki kamenakaraka hemakapurakano, kamenakana aporo hinamoane, Kotimo kamenakaraka hemakapurapo. Kamenakaraka hemakapukua ayiáka makoterakano, i seseraka risirapo.

⁸ Arirakano aporo hinamomo makata watikiaka hemakapusuane kosoraka, koteaka susu hemakapura aporo hinamoamo Kotiane aseakosapo. Aseakosa aporo hinamoane Kotimo ayiáka makoterakano i seseraka risirapo.

⁹ Arirakano metamo metaki saperaka rekeno, sapesane mafahoasimo aporo hinamo metamo maroporakano, eaki Kotimo someraka, ‘Ne nōmo hokosapo.’ Áírapo. Asiamo aporo hinamoane Kotimo ayiáka makoterakano i seseraka risirapo.

¹⁰ Arirakano aporo hinamo metakiramo Kotiane kekemarakaka, ereketae susu rakisisamo, iane aporo metamo mokoatikirakano, iane Kotimo unihaeaka asekea rerapo. Asekea reke Kotimo iane ayiáka makoterakano, i seseraka risirapo.

¹¹ Asiamo repo ano patera asesasamo reaki aporo metakiramo ekeneraka, rukua mokoatikiraka, kotafe topakamarakano, reane Kotimo makoterakano seséraka risikianie. ¹² Seséraka risike hepene yapura repo makata ropo kotesa kára toasasamo, kakaro kára seseraka risikianie. Asiamo wate fana aporomo Kotimo some kará porofete aporoane mokoatikisa ayiáka, re soko ayiáka mokoatikihokosapo.” Aíyaka Yasumo somesapo.

Yasumo kifiri soko, faenane soko, takumeaka somesane oyapo.

Maka 4:21; Maka 9:50; Ruki 14:34-35; Ruki 11:33

¹³ Yasumo someraka, “Makata torenapaka kifiri rukua taesa atoa ayiáka, aporomo makata watikisane hauaka sua suakataehokohoamo kifirimo* rusua pórasa asiane repo. Arirakano kifiri wapesane farakano, efera hunia mawapenafapo. Kifiri wape fasa néna taehoane siahoasifasekeno, kifiriane mokoatenapo. Mokoatesane aporo puraka korakemo fininapo.

¹⁴ Arirakano hauaka wo katorakano sere maiyamo faena ayiáka faena asíane repo. Arirakano ape ūri terayia kisiane kakamasakipoko makata metamo matainafapo.

¹⁵ Arirakano aporomo nafa pakimaka motokoa taramomo karotapirafapo. Nafa pakimaka apea waremaresa faerakano aporo hinamo suamo aserapo. ¹⁶ Nafa pakimaka waremaresa kára faeraka area ayiáka, repo ayiáka koteaka rakiraka risikino aporo hinamo suamo aseraka, repo Ata hepene yapura areaki kekerehokosapo,” aíyaka Yasumo somesapo.

* 5:13: Makata nakosa kifiri rusua wapenapo. Ayiáka kifiri wapena asiane repo.

Kotimo somemane motosane Yasumo somesane oyapo.

¹⁷ Yasumo someraka, “Repo hemakapuraka, ‘Fana Kotimo somemane motosane soko, Kotimo some kará porofete aporoamo somesane soko, Yasumo rukupateraka metakari-akosapo.’ Aíyaka hemakapukupo. Kotimo somemane motosane soko, porofete aporomo somesane soko, rukupateraka metakariakosakipoko, ano pesafapo. Kotimo somemane motosane soko, porofete aporomo somesane soko hakásia nine siaraka ayiakakosakipoko, ano pesapo.

¹⁸ Hao, kaisie. Nōmo some one kakaro somerakaripo. Hepene yapurane soko, hauaka kára one soko, fahoasiraka area maiya amo, Kotimo somemane ane soko rekeakosapo. Somemane popasane hakásia meta soko metakariakosafapo. Ayiakakosapo aíyaka popasane, su kakaro yaiyakakosapo. ¹⁹ Asiamo aporo metamo hemakapuraka, ‘Kotimo somemane metane fanapo. Metane kesekepo. Kesekeane metakariane sia-hoasireapo.’ Aíyaka hemakapuraka, aporo metakiramo soko, Kotimo somemane wakasemane metakarisimo, epo some karakano, some akara aporoane Kotimo unihaeaka asekea rea aporo kesekeane epo. Arirakano aporomo Kotimo somemane suane kakimaka, aporo metakiramo soko kakimakasimo some karakano, some akara aporoane Kotimo unihaeaka asekea rea aporo fanane epo.

²⁰ Hao, kaisie. Nōmo some one kakaro somerakaripo. Fere se aporomo soko, Kotimo somemane tisa aporomo soko, ipu namina ereketaeraka[†] hemakapukua rakiraka risiane, repo marokeraka ereketaeraka hemakapunafonorakanone re Kotimo unihaeaka rea hauaka á hiakosafapo.” Aíyaka Yasumo somesapo.

Aporoaki sapenane Yasumo somesane oyapo.

²¹ Yasumo someraka, “Wate fana repo makasa kaua kekemaki somesane somepe pekea repo soko kaisiapo. Kaisiane oyapo. ‘Aporo kuku simo rukupo. Aporo meta nōmo rusua kurakanone, né hukurukua fanasihokosapo.’ Aíyaka somehoareapo. (*Kisim Bek 20:13; Kisim Bek 21:12*)

²² Somesa nine nōmo reaki some meta one somerakanapo. Aporo metamo ipi aporo tákemaki saperakano, e fanasihoasimo hukurura apea hukurukusapo. Arirakano aporo metamo ipi aporo tákemaki saperaka hikumisia ekenerakano, Yarusarame sitia hukurura kepo kaira aporo káramo maropohoasimo karikia pukusapo. Arirakano aporo metamo ipi aporo tákemaki mokoatikiraka saperaka someraka, ‘Ne himu rekerifapo.’ Aíyaka yakasa ho mareraka mokoatikarakaka somesa kasá aporoane heao hauaka ira rufia pusiehokosapo.

²³ Asiamo maiya metamo Kotiaki makata yaku akaramo nōmo hemakapuraka, ‘Nōmo aporo tákemo anoaki mahisiraka rekenapo.’ Aíyaka hemakapukua ²⁴ Kotiaki makata yaku kakakosane haru karafaraka fore teporoa taeraka nōmo ní tákemo neaki mahisisane fana hokono mokoa mafahoko punie. Pukua titi hokono mokoa mafaraka pariperaka makata yaku kakakosapoko taesane kakanie.

²⁵ Arirakano aporo metamo neaki someraka, ‘Nōmo ano apihoanie.’ Aíyaka ne hukuruko ikia kara puraka risike, nōmo eaki mahisisane metakarinie. Metakarikia api kaka, tetápo titi makata watikisane mafahoanie. Mafahoanafonorakanone hukuarura maiya amo hukurura kepo kaira aporomo terakaiyamosaki ne tarikia someraka, ‘Aporoane tipura makeanie.’ ²⁶ Airakano neaki api kakaniesane siaraka kakanafonorakanone, ne tipura makesane tonotaehokosafapo.” Aíyaka Yasumo somesapo.

Aporomo hinamo hakimarane Yasumo some kasane oyapo.

²⁷ Yasumo someraka, “Makata fana somesesuane repo kaisiapo. Kaisiane oyapo ‘Hinamo hakimakopo.’ Aíyaka somesesupo. (*Kisim Bek 20:14*)

²⁸ Somesa nine nōmo some meta one somerakanapo. Aporomo hinamo aseraka himu puraka, ‘Hinamo ane hakimakaripi,’ aíyaka hemaka apura yiamo hinamoane himumo hakimarakanapo.

[†] 5:20: Aporomo asekeasimo Fere se aporomo ereketaeraka sikiraka risia nine i aporo himu tetáraka risike, i namina makáraraka hemakapukua risiapo.

²⁹ Asiamo ne hi tumurumo makata watikisane rakisimo kirimarakano, hiane pokomaka mamakatehoanie. Hi wakasema hakásamo ne kau suane heao hauaka á karikia purapaka, hi wakasema hakásane pokomayane siahoasireapo. ³⁰ Arirakano ne hokino tumurumo watikiaka rakirakano hokinoane patekemaka mamakatehoanie. Hokono tumuruamo kau su kirimaraka heao hauaka á karikia purapaka, hokino hakásane patekemaka mamakatehoane siahoasireapo.” Aíyaka Yasumo somesapo.

Aporomo hinamo fimarererane Yasumo somesane oyapo.

Matiu 19:9; Maka 10:11-12; Ruki 16:18

³¹ Yasumo someraka, “Makata fana some kasesuane oyapo. ‘Aporomo ipi asea fimaresane aporo suamo asekea hemakapusimo hinamoaki sawi poparaka karáka, “Ne fimarerakanapo.” Aíyaka sawi poparaka kakanie.’ Aíyaka some kasesupo. *(Lo 24:1)*

³² Some kasa nine nōmo reaki some meta one somerakanapo. Aporomo ipi hinamo arumasane aporo metayaki mokome punafonorakano yia, fimarerakanone aporoamo raraporakanapo. Hinamo fimaresane aporo metamo arumarakano Kotimo asekea hemakapuraka, ‘Hinamoane aporo rea pura hinamoreapo. Arirakano aporoamo hinamoane hakimarakapano.’ Aíyaka Kotimo hemakapurapo. Asiamo rarapo kepoane hinamo fimaresa aporo ayapo.” Aíyaka Yasumo somesapo.

“Aumaraka somehokopo,” aíyaka Yasumo somesane oyapo.

³³ Yasumo someraka, “Wate fana repo makasa kaua kekemaki somesane somepe pekea repo soko kaisiapo. Kaisiane oyapo. ‘Nómo makata rakiakosapo, aíyaka aumaraka somesane metakariakopo. Unihaemo asekeasimo nōmo aumaraka someraka ayiakakos-aposane kakaro ayiakanie,’ aíyaka somehoareapo. *(Wok Pris 19:12; Namba 30:2; Lo 23:21)*

³⁴ Makasa kaua kekemamo somesa nine, nōmo reaki some meta one somerakanapo. Makata meta yano hokoa aumahokopo. Hepene yapura Koti unihaeaka sea kára kayasasamo, hepene yapurane yano hokoa aumahokopo. ³⁵ Arirakano Koti ipi hepene yapura kake, hauaka kára one epo korakemo finiraka kayasasamo, hauaka kara one soko, yano hokoa aumahokopo. Arirakano Yarusarame sitiane soko yano hokoa aumahokopo. Yarusarame sitiane Unihae Káramo sitipo. ³⁶ Arirakano repo wamoane soko yano hokoa aumahokopo. Wamoae uni itiane hakesane soko, eresane soko, repo aporomanomo marerafapo. ³⁷ Asiamo some kakarorakae aihoasimo oroko makata aumarane soko, yátafu aumarane soko, Kotiaki hokino soneraka aumarane soko, su kepoane Satanepo. Asiamo makata ane yano hokoa aumaraka aumahokopo. Aohoko hemakapuraka kakaro aohoanie. Waehoko hemakapuraka kakaro waehoanie.” Aíyaka Yasumo somesapo.

Rukuronané Yasumo somesane oyapo.

Ruki 6:29-30

³⁸ Yasumo someraka, “Makata fana somesesuane repo kaisiapo. Kaisiane oyapo. ‘Aporomo ne hi rukua faurakano, e soko hi fauhoasimo rukua ropohoanie. Aporomo ne akaia ruraka mere rukurokorakano, e soko mere rukurokohoasimo nōmo rukuropo-hoanie.’ Aíyaka somesesuane repo kaisiapo. *(Kisim Bek 21:24; Wok Pris 24:20; Lo 19:21)*

³⁹ Ipu somesa nine nōmo reaki some meta one somerakanapo. Aporo watikisamo ne mokoatikirakano nōmo eaki ropo mokoatikihokopo. Aporomo ne akai pare tumrua rurakano, nōmo rukuronafaraka akai pare kasakai takua soko rusimo tarinie.

⁴⁰ Arirakano hukurura kepo kaira aporomo kaiyisimo aporo watikisamo neaki hukurukua someraka, ‘Nómo pasu ososane ano makasie.’ Airakano pasu ososane e karaka, pasu ososa metane soko e kakanie. ⁴¹ Arirakano kamani aporomo neaki paroaka someraka, ‘Nōmo makata fato tame yia yaku maka pusie.’ Airakano nōmo seseraka e arareraka yamenoa soko yaku maka punie. ⁴² Asiamo aporomo neaki makasierakano nōmo kakanie. Aporomo neaki makata fore makasierakano kakanie. Waehokopo.” Aíyaka Yasumo somesapo.

"Aporomo ne mokoatikirakano nōmo eaki himu tumurumo hemakapunie." Aíyaka Yasumo somesane oyapo.

Ruki 6:27-28; Ruki 6:32-36

⁴³ Yasumo someraka, "Makata fana somesesuane repo kaisiapo. Kaisiane oyapo. 'Aporo tákemo neaki himu tumurumo hemakapurakano nōmo soko eaki himu tumurumo hemakapunie. Aporomo neaki hisirakano nōmo soko eane hisihoanie.' Aíyaka fana somesesupo. (Wok Pris 19:18)

⁴⁴ Somesa nine nōmo reaki some meta one somerakanpo. Aporo metamo né mokoatikirakano, nōmo eaki himu tumurumo hemakapunie. Eane Kotimo ararehoasimo kurikurihoanie. ⁴⁵ Eane hemakapukua kurikuriraka reke, repo Ata hepene yapura reamo makata rakira ayíáka, reane ipi hokosa pariraka ayíáka rakirakanapo. Asiamo aporo watikisamo hauaka á soko, aporo kotesamo hauaka á soko, ipu suamo hauaka á sere maiyamo faehoasimo, Kotimo sere maiyane makarapo. Arirakano kotafe somera aporo soko, kakaro somera aporo soko, ipu suamo hauaka á yao peasimo Kotimo makarapo.

⁴⁶ Aporo tákemo ne himu tumurumo hemakapurakano, nōmo soko eane ropo himu tumurumo hemakapusuakipoko, 'Kotimo anoaki makata ropo kakakosapo.' Aíyaka hemakapurane siahoasireare? Wae, siahoasifareapo. Nōmo ropo himu tumurumo hemakapukua rekeno, ne takese mora aporo area ayíáka rekenapo. Aporo watikisamo hemaka apura ayíáka repo ayíáka hemakapurakanapo. Arirakano repo aporo tákeme soko hemakapuraka yia, aporo metakirane soko himu tumurumo hemakapunie.

⁴⁷ Nōmo ni aporo ira ane hákasa makoteraka, aporo metane asekepayaraka makefehoane siahoasireare? Wae, ane siahoasifareapo. Nōmo ní aporo ira hákasaki makoteraka, aporo metane asekepayaraka makeferaka rekeno, ne nena aporo area ayíáka rekenapo. ⁴⁸ Asiamo nōmo Ata hepene yapura reamo koteaka reke aporo hinamo suane himu tumurumo hemaka apura ayíáka, ne soko koteaka reke, aporo hinamo suane himu tumurumo hemakapunie." Aíyaka Yasumo somesapo.

6

"Aporo himu tetáraka arisia ayíáka re risikiakopo." Aíyaka Yasumo somesane oyapo.

¹ Yasumo someraka, "Nōmo Kotiaki patera asekea rakirane aporo suamo asekea ne makáraraka kekerehoasimo rakiakopo. Nōmo ní yia makáraraka rupiraka sikiraka rakiakopo. Nōmo Kotiaki patera asekea rakiraka, aporo suamo asekea ne makáraraka kekerehoasimo rakirakano, nōmo Ata hepene yapura reamo neaki makata ropo kakakosapoko asiane, nōmo ní yiamo aiyanamo, nōmo makata ropoane huruperakanapo.

² Asiamo aporo makata forokoa reane nōmo asekea makata akara maiya amo, tau kakanie. Aporo suamo asekea ne makáraraka kekerehoasimo, aporo su hikumisia kakakopo. Aporo su hikumisia akará ayíáka, aporo himu tetáraka hemakapukua reamo* ayíáka makata karápo. Ipu makata karáne Yu aporomo sarimana apea soko, ikia kára soko, makata karápo. Ayíáka makata karakano, aporomo asekea kekereraka, 'Epo makata kára akare.' Airakanone, aporoamo makata ropoane sia amara ayapo. Asiamo nōmo reaki kakaro somerakaripo.

³ Arirakano aporo makata forokoa reane nōmo makata karáka, tau kakanie.[†] Aporo metakiramo asekohoamo, i hikumisia kakakopo. Arirakano aporo metakiramo kaiyako-hoamo, somehokopo. ⁴ Faremarekea kakakosakipoko ayíáka kakanie. Akara maiya amo titi haku toke karakano, nōmo faremarekea rakisiane nōmo Ata hepene yapura reamo aseraka epo ne makotehokosapo." Aíyaka Yasumo somesapo.

Kurikurinane oyapo.

Ruki 11:2-4

* 6:2: Aporo himu tetá reane metakira Fereze aporopo. † 6:3: Tau kayane pisini meaka uyáka popasapo. Nōmo ní hokono kasakaimo, ní hokono tumurumo makata karáne asekohoamo tau kakanie, aíyaka popasapo.

⁵ Yasumo someraka, “Nómo kurikuriraka aporo himu tetáraka reamo kurikurisane kaikia, ayiáka kekemaraka kurikurihokopo. Aporo metamo ikia kara reke kurikuriraka, anakano aporo metamo Yu aporomo sarimana apea aporo suamo kaiyisimo kurikuriraka anapo. Arirakano, aporo suamo aseraka someraka, ‘E aporo kotesapo.’ Airakanone aporoamo makata ropoane sia amara ayapo. Asiamo nōmo reaki kakaro somerakaripo.

⁶ Arirakano nōmo kurikuriraka nōmo ní apea ní haku pukua ikia koro mapirikia reke, kurikurihoanie. Nōmo ní haku kurikuriraka reke, ní Ata aporomanomo asekeanafonosane fararekeno eaki kurikurihoanie. Kurikurinane ní Atamo kaikia ne makotehokosapo. ⁷ Nena aporomo hemakapuraka, ‘Kára kurikurirakano Kotimo kaiyakosapo.’ Aiyaka hemakapuraka, ipu some kára waseremaka some nokone pukua kurikurinapo. ⁸ Ipu kurikurina ayiáka, nōmo kekemaraka kurikurihokopo. Nōmo makata siaraka tokoanafonosane soko, himu siaraka rekeanafonosane soko, nōmo kurikurihoasiraka, ní Ata hepene yapura reamo fana hemakapurakayapo.

⁹ Asiamo repo kurikuriraka úyaka kurikurihoanie. ‘Atao. Ne isiapo Ata hepene yapura rekenapo. Ne yano motosa kakaro kára haku kotesa susuane makama fanahoasimoripo.

¹⁰ Aporo sumo himua ne unihaeaka rekeasimo hemakapurakaripo. Hepene yapura nōmo ní hemakapusua aina ayiáka, hauaka wo soko ayikasimo hemakapurakaripo.

¹¹ Pipu makata nakosane pipu yia nasimo, siaraka makanie. ¹² Aporo metamo isuaki mokoatikirakano, isiapo ropo mokoatikinane mafaraka mamerarurakano asekea, isiapo watikisane soko, nōmo mafaraka mameraruhoanie. ¹³ Isu kau asekosane peakohoamo nōmo isu asekea rekeanie. Satanemo isu mokopipihokohoamo isu mafasinie.’ Aiyaka kurikurihoanie.

¹⁴ Asiamo aporomo neaki watikiaka rakisiane, nōmo ropo mokoatikihoanafonoraka metakarirakano, nōmo Ata hepene yapura reamo nōmo watikisane soko metakariakosapo. ¹⁵ Arirakano aporomo neaki watikiaka rakisiane, nōmo ropo mokoatikinane metakarianafonorakano, nōmo watikisane soko, nōmo Ata hepene yapura reamo metakariakosafapo.” Aiyaka Yasumo somesapo.

Kotimo seséhoasimo makata nakosa sokoainane oyapo.

¹⁶ Yasumo someraka, “Makata nakosa sokoairaka‡ aporo himu tetáraka risiamo sokoaiana ayiáka, nōmo ayiáka sokoaihokopo. Ipu hi kumisi yuyukuraka risike, ipu makata nakosa sokoaisane, aporo suamo hemakapusimo, meamoraka koraka risirapo. Meamoraka koraka risiane aporo suamo asekea kekererakano, ipu makata ropoane sia amara ayapo. ¹⁷ Arirakano nōmo Kotimo seséhoasimo makata nakosa sokoairaka aporo suamo hemakapukohoamo, ní hi kumisi kusuraka, uni iti unisakemo rakinie. ¹⁸ Rakikia aporo suamo asekohoamo tau makata nakosa sokoairakano, nōmo faremarekea sokoaisane nōmo Ata ipi hákasamo aserakanapo. Aseraka epo ne makotehokosapo.” Aiyaka Yasumo somesapo.

Hepene yapura makata mahimuna ane taehoasimo Yasumo somesane oyapo.

Ruki 12:33-36

¹⁹ Yasumo someraka, “Hauaka wo makata mahimuraka taesane metane mopenapo. Metane surisurimo nenapo. Metane hakimora aporomo ape ikia koro mapirisiane soko, roparaka hakimorapo. Anapaka hauaka wo makatane mahimuraka taehokopo. ²⁰ Nōmo makata mahimuna ane hepene yapura taehoasimo rakinie. Hepene yapura makata taesane aporo metamo hakimorafapo. Surisurimo soko nenafapo. Moperaka soko mopenafapo.

²¹ Asiamo nōmo hauaka wo makatane mahimuraka sarimaraka taeraka rekeno hauaka wo makatane hákasa hemakapukusapo. Arirakano hepene yapura makata mahimuna ane sarimaraka taeraka rekeno hepene yapura makata taesane hákasa hemakapukua rekeakosapo.” Aiyaka Yasumo somesapo.

‡ 6:16: Maiya metakiramo aporomo Kotiaki kurikurihoko makata nakosa sokoairaka ayiáka kurikurinapo.

“Ní kaumo nafa ásiáne ní hipo,” aisane oyapo.

Ruki 11:34-36

²² Yasumo someraka, “Ní kaumo nafa ásiáne ní hipo. Ní himo makata su koteaka asekea takékea rekeno ní kauane faeraka rekeakosapo. ²³ Ásiáne ne hi meraka reke, ne kauane soko, katoraka rekeakosapo. Katosakipoko faesa reane katosamo suaka taehokosapo. Suaka taerakano katosane kárahokosapo.” Aíyaka Yasumo somesapo.

“Hauaka wo makatane hemakapukupo.” Aíyaka Yasumo somesane oyapo.

Ruki 16:13; Ruki 12:22-31

²⁴ Yasumo someraka, “Aporo posesa tetápoko aporo raipa hakásamo rakirafapo. Aporo raipa hakásamo aporo posesa tetápoko rakiraka, metaki seseraka rakiraka, metaki hisiraka rakiakosapo. Aina ayiáka aporomo Kotipoko hemakapukua rakirane soko, monepoko hemakapukua rakirane soko, tetáraka rakiane siahoasifareapo.

²⁵ Asiamo nōmo some one neaki somerakanapo. Ne hitaferaka rekeako he soko, makata nakosane soko, makata akipoko kára himu nekea hemakapukupo. Patera yase risirapaka pasu osohokosane, kára himu nekea hemakapukupo. Hitafe areamo makata nená hákasa ayare? Kaua pasu osohokosa hákasa ayare? Wae, hákasa ayafapo. Kotimo neaki himu ha kasasamo makata nakosane soko, neaki kakasifareare? Ao, epo neaki sia kakakosapo. Neaki kauane kasasamo pasu osohokosane soko, epo neaki kakasifareare? Ao, epo sia kakakosapo.

²⁶ Mená koraka torane asekeanie. Menámo makata nakosa pororafapo. Witi hae surakano menámo popatenafapo. Witi hae keseke nakosakipoko apea taenafapo. Tae-hoanafonorakano menáki nōmo Ata hepene yapura reamo makata nakosa karakanapo. Menáki karásasamo aporomanoaki kakasifareare? Ao. Aporomanoane ipi kará hemakapukua kakakosapo. ²⁷ Arirakano aporomanomo ipi himu hemakapuramo, ‘Ano kukusane hisiripo.’ Aíyaka himu nekea rekeno, e kukusa sere motosane marokehokosare? Wae, marokehokosafapo. ²⁸ Arirakano pasu makosakipoko himu nekea rekeakopo. Sako wemeane hemakapunie. Sako wemeane taneheakosakipoko sako wememo namina yia makata rakirare? Wae, makata rakirafapo. Sako weme suhoasimo sako wememo pasu susane maka irinare? Wae, sako wememo ipi hemakapukua wateane sunapo. ²⁹ Hao, kaisie. Wate fana Soromone aporo kára unihaeaka reke, ipi pasu kotesa ososapo. Soromonemo pasu ososane kotesa nine, sako weme wateane namo kakaro kotesapo.

³⁰ Arirakano asane tanehekea risiane Kotimo makoteraka wate karápo. Karakano asane pipu tanehekea risiane, wakasema keseke iramo paiyiane kukua kerapo. Kukua kesane, maiya wakasemamo tanehekea risia nine, Kotimo asekea rerapo. Kotimo asane asekea area ayiáka, nōmo pasuane fahokohoamo, Kotimo neane ayiáka asekea rekenapo. Kotimo ne asekea rekeno yia, nōmo Kotiaki himumo hakásá wakasemaraka hemakapurakanapo.

³¹ Kotimo reane asekea rerasamo úyaka hemakapukupo, ‘Makata nakosa ma mokoakosare? He ma takamakosare? Pasu fasenko ma mokoakosare?’ Aíyaka himu nekea kára hemakapukupo. ³² Arirakano nena aporomo maiya suamo makata nakosane soko, pasuane soko, kára himu tumurumo hemakapurapo. Arirakano makata nakosane soko, pasu osohokosane soko, farakano mokoakosane nōmo Ata hepene yapura reamo hemakapurapo. ³³ Asiamo Kotimo ne unihaeaka asekea rekeasimo matumuruhoanie. Kotiane ereketaeraka area ayiáka ereketaeraka rekeako himu tumurumo ayiáka hemakapunie. Ayiáka hemakapukua rekeno makata nakosa soko, pasu soko, siaraka mokoakosapo. ³⁴ Asiamo rau ayiakakosane rau yia hemakapunie. Pipu hemakapukupo. Pipu waforohokosane pipu sere ayapo. Rau waforohokosane rau sere ayapo.” Aíyaka Yasumo somesapo.

“Aporo metane hokomaka somehokopo,” aisane oyapo.

Ruki 6:37-38; Ruki 6:41-42

¹ Yasumo someraka, “Nómo aporo metane mawakasemahoasimo hokomaka someraka, ‘E watikiaka are. Ano koteaka rekenapo. E area ayíáka ano rekenafapo.’ Aihokopo. Aihoanafonorakano aporo metakiramo soko, Kotimo soko, neaki ayíáka somehokosafapo. ² Nómo aporo meta ayíáka mawakasemaraka hokomaka somerakano, aporo metakiramo soko, neaki ayíáka mawakasemaraka hokomaka somehokosapo. Arirakano nómo someane parakuraka akara ayíáka, neaki aporo metakiramo soko, ayíáka parakuraka neaki kakakosapo.

³ Nómo ní maemo hia makata pepeno wakasema akayane nómo aseraka yia, nómo ní hia makata pepeno kára akayane, marirakano asekepayarakanare? ⁴⁻⁵ Asekepayarakia yia ní maeaki someraka, ‘Ne hia makata pepeno wakasema akayane, nōmo maka mamakatehokosapo.’ Aíyaka somerakanone ne aporo himu tetáraka rekenapo. Fana nómo ní hia makata pepeno kára akayane maka mamakatehoanie. Mamakateraka faraka, ní maemo hia makata pepeno wakasema akayane maka mamakatehokosakipoko koane nómo ní himo sia koteaka aseakosapo.

⁶ Arirakano Kotiaki makata yaku kakakosane kásaki kakakopo. Arirakano saro perakano saro hikumisi neneme yia, sekete kokomareakopo. Kokomarerakano seketeane saromo finiraka reke, oropatea kenetapikia marekea, neane kekemaraka rukua motokoa nakosapo.” Aíyaka Yasumo somesapo.

Kurikurinane oyapo.

Ruki 11:9-13

⁷ Yasumo someraka, “Makata makosakipoko Kotiaki kurikurihoanie. Kurikurirakano Kotimo neaki makakosapo. Himo aseako koanie. Korakano kokoa aseraka makosapo. Ikia koro ropakamakasimo paroparohoanie. Paroparorakano Kotimo ropakamakosapo.

⁸ Asiamo makata mako Kotiaki kurikurirakano makosapo. Makata aseako himo korakano kokoa aseakosapo. Nómo ikia koroa paroparorakano, Kotimo ropakamakosapo.

⁹ Arirakano nómo ní hokosamo someraka, ‘Atao, ano asipa makasie.’ Airakano nómo ní hokosaki eke kakakosare? Wae, eke kakakosafapo. ¹⁰ Arirakano hokosamo someraka, ‘Ano pokoa makasie.’ Airakano nómo eaki yapakā kakakosare? Wae, yapakā kakakosafapo. ¹¹ Asiamo ne himu watikisa yiamo nómo hokosaki makata kotesa karápo. Akara ayíáka, nómo Ata hepene yapura reamo soko, repo makata makasie aisa aporo hinamoaki Atamo makata namo kakaro kotesane kakakosapo. ¹² Asiamo aporo metamo ne ayikasimo nómo hemakapuraka, nómo soko aporo metaki ayikanie. Asiamo ropo aina someane Mosesemo somemanane soko, porofete aporomo somesane soko, some kepoane hakása yiylareapo.” Aíyaka Yasumo somesapo.

Ikia kara Yasumo takumeaka somesane oyapo.

Ruki 13:24

¹³ Yasumo someraka, “Fanasina hauaka ikia kara kuru parauasakipoko aporo pukusane mawetenafapo. Mawetehoanafonorakano aporo yakai ikia kara á purapo. Arirakano ne yaiya rera hauaka á hiakosakipoko ikia kara makoropasa á hinie. ¹⁴ Makoropasasamo maweteraka wafororaka yorokoa yaiya rera hauaka á hiakosapo. Ikia karane wakasemasasamo aporo hukusimo kokoa asekea hirapo.” Aíyaka Yasumo somesapo.

Ira wate Yasumo takumeaka somesane oyapo.

Ruki 6:43-44

¹⁵ Yasumo someraka, “Kotafe porofete aporomo Kotimo some kará porofete aporo pariraka some karápo. Ipu someane repo kakimarakarihoamo, kotafe hookekeea somehokosapo. Asiamo kotafe porofete aporo ayarihoamo, koteaka asekeanie. Saro wofe irirasane kotafe saro pipi pariraka risikirihoamo, koteaka asekea takeanie. ¹⁶ ‘Kotimo some kará apore? Kotimo some kará apororakapo.’ Aíyaka takekea hemakapusakipoko, epo makata rakirane asekea takeanie. Aporomo makata rakirane, sako wate asiapo. Sako utumua sako karepe wate pekerisia tumarafapo. Arirakano kiāne ira foke wate pekerisia tumarafapo. ¹⁷ Ira kotesamo wate kotesa susu perapo. Ira watikisamo wate

watikisa susu perapo. ¹⁸ Ira kotesamo wate watikisa perafapo. Ira watikisamo wate kotesa perafapo. ¹⁹ Iramo wate kotesa peanafononane, aporomo tokoraka mamakateraka, iramo inakasimo pairapo. ²⁰ Asiamo kotafe Kotimo some kará aporo pariraka rakirakano asekeanie. Asekeha hemakapuraka, ‘E Kotimo some kará aporofapo.’ Aíyaka hemakapunie.” Aíyaka Yasumo somesapo.

Aporoaki Yasumo someraka, “Ano metakarikia pusie,” aihokosane oyapo.

Ruki 13:25-27

²¹ Yasumo someraka, “Aporo metakiramo anoaki someraka, ‘Unihae, Hokopusuo,’ aíyaka kaumo wára aporoane Kotimo ipi unihaeaka asekeha rea aporomano akiyaki paohokosafapo. Asiāne nōmo Ata hepene yapura reamo hemakapusua kekemaraka rakira aporo hinamoane, i hákasa paohokosapo. ²² Hukurura sere amo aporo hinamo yakaimo anoaki someraka, ‘Unihae, Hokopusuo, ne yano motosa makárahoasimo, Kotimo someane isiapo kaikia someane some kasapo. Ne yano hokoa yatafuaki metakarikia pusierakano, i pusuapo. Ne yano motosa kárasasamo isiapo wakapuaka rakirakano, aporo metakiramo asekeha fofasapo.’ ²³ Airakano nōmo someraka, ‘Reane nōmo aserafapo. Re aporo watikisasamo ano metakarikia re pusie,’ aihokosapo.” Aíyaka Yasumo somesapo.

Aporo tetámo ape tetá kisiane Yasumo takumeaka somesane oyapo.

Ruki 6:47-49

²⁴ Yasumo someraka, “Aporomo koteaka hemakapukua hauaka parosakipoko ape kisia paroaka area aiyáka, nōmo some kakimasa aporoane aiyáka rerapo. ²⁵ Ape kisiakipoko atifo yaoyaki kára peraka, he huku puraka, hauaka parosa á ape kisiasamo rakarimaka purafapo. ²⁶ Arirakano aporo koteaka hemakapurafaraka hauaka sakipua ape kisia area aiyáka, nōmo some kakipayasa aporoane aiyáka rerapo. ²⁷ Ape kisiakipoko yao kára atifoyaki kára peraka, he huku purapo. Puraka ape hauaka sakipua kisiane rakarimaka puraka anu airapo,” aíyaka Yasumo somesapo.

²⁸ Someane some kaka farakano aporo hinamo yakaimo kaikia himu faraka fofasapo.

²⁹ Kotimo somemanane tisa aporomo some akara aiyáka Yasumo aiyáka some kasafapo. Epo wakapuaka some karakano kairaka, “Someane enahoasifareapo.” Aíyaka aporo hinamo fofasapo.

8

Aporo toropakesa Yasumo mafasane oyapo.

Maka 1:40-45; Ruki 5:12-16

¹ Yasu ūri teraya hikia kayane pariperakano, aporo yakaimo epo makata rakirane asekehaerape pusuapo. ² Asekehaerape puraka aporo toropakesa Yasu rea peraka, Yasu ipi yano motosa káraro, aíyaka hemakapukua kakuna porokoa kake someraka, “Unihaeo, nōmo ano mafahoko seseraka soko metao, seserire?” ³ Airakano Yasumo ipi hokono máfaraka aporoane sakairaka someraka, “Ao, ano seseripo. Ne makata takamasane farasie.” Aihoanine aporo toropakesane wate foaka fasapo. ⁴ Farakano asekeha Yasumo someraka, “Ne fasane aporo metakiraki somehokopo. Pirisiti aporo rea pukua, ne kau toropakesa fasane pirisiti aporoaki tarinie. Tarikia, Mosesemo somemanemo ayiakanie aisane kekemaraka, makata yaku Kotiaki aiyáka kakanie.* Ne fasane aporo hinamo suamo asekeha hemakapusimo aiyáka kakanie.” Aíyaka Yasumo somesapo.

Aporo terakaiyamosa satinimo aporo raipa makata takamasa Yasumo mafasane oyapo.

Ruki 7:1-10

⁵ Yasu pukua Kapaneame taonea perakano, Rome aporo terakaiyamosa satini peraka Yasuaki someraka, ⁶ “Nōmo aporo raipa makata kára takamaraka, kau nariraka korosakataeraka apea warekenapo.” ⁷ Airakano Yasumo someraka, “Ano nī peraka e

* ^{8:4:} “Aporo ipi kau toropakesane fasasamo mena soko metao, saro sipi mano soko metao, rukua paikia Kotiaki kakanie.” Aíyaka Mosesemo somesapo.

mafahokosapo.” ⁸ Airakano aporo terakaiyamosa satinimo someraka, “Unihaeo, ano aporo wakasemasamo ne aporo kárasasamo iti siasafapo. Asiasamo nōmo apea ne peane siahoasifareapo. Ne aporo makata takamasa warea punafonoraka o reke, aporo makata takamasane farasie aisie. Nōmo farasie airakano nōmo aporo raipa makata takamasane fahokosapo. ⁹ Arirakano ano asekea rea aporoamo anoaki rakisierakano nōmo rakirapo. Arirakano nōmo aporo asekea reaki pusierakano ipi purapo. Peaerakano ipi perapo. Nōmo aporo raipaki rakisierakano, epo rakirapo. Nōmo aira ayíáka, nōmo soko aporo makata takamasane farasierakano, e fahokosapo.”

¹⁰ Airakano someane Yasumo kaikia sesesapo. Sesaraka asekehaerape pesa aporoaki someraka, “Nōmo reaki kakaro somerakaripo. Rome aporo terakaiyamosa satini ane Yu aporofapo. Yu aporo hoanafonosa reamo anoaki himu hakásaraka hemaka apura ayíáka, Isiraya hauaka Yu aporo metamo anoaki ayíáka himu hakásaraka hemakapurafareapo.

¹¹ Hao, kaisie. Koti unihaeaka rea hauaka á Eparahame soko, Aisake soko, Yakope soko, iyaki hakāsa toke makata nakosakipoko, Yu aporo hoanafonosane yakai hiakosapo. Arirakano maiya apera hauaka taku aeyaka soko, maiya apura hauaka taku aeyaka soko, i yakai hiakosapo. ¹² Arirakano Yu aporo hinamo Koti unihaeaka rea hauaka á hiakosapoko asiāne, ipu anoaki himu hakásaraka hemakapunafonorakano, iane Kotimo kakaro metakariakosapo. Katosa hauaka á pusiehokosapo. Pusierakano pukua á risike, i hihiripuraka saperaka akai kirishihokosapo.” Aiyaka Yasumo somesapo.

¹³ Asiamo Rome aporo terakaiyamosa satiniaki Yasumo someraka, “Ní apea paripusie. Nōmo anoaki himu hakásaraka hemaka apura yaiya nōmo rakirakanapo.” Aiyaka somehoanine aporo raipa makata takamasane fasapo.

Aporo hinamo yakai makata tasa Yasumo mafasane oyapo.

Maka 1:29-34; Ruki 4:38-41

¹⁴ Yasu pukua Pitamo apea yorokoa aseane, Pitamo ipi aseamo kaíyia makata takamasa kau sisipuraka warekeno asesapo. ¹⁵ Aseraka hinamoamo hokonoa Yasumo sakaihoane, makata takamaraka kau sisipusane fasapo. Farakano asekea, hinamoane takahikia makata nakosa paikia Yasuaki kasapo.

¹⁶ Arirakano wakasema nina samapu yao nene horamo, aporo hinamo yakai yatafumo ho mosane Yasu rea aporo metakiramo karikia pesapo. Karikia perakano yatafuaki Yasumo ipi akaimo hákasa some hora yiamo yatafuane metakarikia pusuapo. Arirakano aporo hinamo makata tasane soko suane Yasumo mafasapo. ¹⁷ Mafasane mafahoasiraka wate fana porofete aporo Aesayamo popasapo. Popasane oyapo, “Isiapo makata tasane wakasema soko kára soko epo mafanapo.” Aiyaka popasane faserepesa ayareapo. (*Aisia 53:4*)

Aporomo himu tetáraka risike Yasuaki someraka, “Ne patera aseakosapo,” aisane oyapo.

¹⁸ Aporo hinamo yakai Yasu yaki sarimasane Yasumo asekea, ipi aporo hakāsa puraki someraka, “Isu kasua ripaka he Kariri taku ra purakapo.” ¹⁹ Airakano e rea Kotimo somemané tisa aporo meta peraka Yasuaki someraka, “Tisao, ne taku ra purakano soko, taku ro purakano soko, sapeaka hinakano soko, ano neyaki hakāsa koraka rekeakosapo.”

²⁰ Airakano aporoane kau aseakosakipoko Yasumo eaki someraka, “Yákasa ipi hauaka rapia warápo. Mena ipi usia warápo. Ipu ape waráne risikinapo. Arirakano Ano Aporomanomo Tákeane ape wará uni katane rekenafapo.” ²¹ Airakano aporo hakāsa meta Yasuyaki hakāsa puraka ipi someraka, “Unihaeo, ano neyaki peakosapoko asiāne, fana nōmo ní ata kurakano hauaka marekeea faraka, neyaki peakosapo.” ²² Airakano Yasumo someraka, “Ní ata metakarikia, anoyaki peanie. Aporo ano patera asekeanafonosamo aporo kusuane hauaka mareakosapo. Aporo ano patera asekeanafonosane i aporo kusua asiapo. Aporo kusua asiasamo ipu aporo kusuane hauaka muriane siahokosapo,” aisapo.

Atifoyaki he kupayaki kára pesane Yasumo mafasane oyapo.

Maka 4:35-41; Ruki 8:22-25

²³ Yasu kasua ripaka ipi aporo hakāsa pura soko, eyaki hakāsa kasua ripaka pusuapo. ²⁴ Ripaka puraka Yasuane kasua wasápo. Wasakipoko yao foaka peraka atifoyaki he kupayaki kára pesapo. He kupa kára peraka, kasu tua he wakekeraka, kasu kenepe-sahopo. ²⁵ Kenepeakorakano asekea, aporo hakāsa puramo Yasu maturikia someraka, “Unihaeo, isu araresie. Kasu keneperaka isu he nasireapo.” ²⁶ Airakano Yasumo iaki someraka, “Repo marirakano namorakanare? Anoaki kakaro himu hakásaraka kára hemakapurakanafareapo. Wakasemaraka hemakapureapo.” Aíyaka Yasu takahikia atifoaki soko, he kupaki soko, “Farasie,” airakano, atifo soko, he kupa kára pesane soko, foaka fasapo. Faraka he auasapo. ²⁷ He auarakano asekea, aporo hakāsa puramo fofaraka someraka, “Yasumo someane atifomo soko, he kupamo soko, kakimaraka fane. Fasasamo aporoane eparakapo,” aisapo.

Aporo tetá yatafumo ho mosa Yasumo mafasane oyapo.

Maka 5:1-20; Ruki 8:26-39

²⁸ He kekeia kaya kasu rokoia hikia, Katára hauaka á kasu karimarekea hikia aseane, aporo tetá yatafumo ho mosa aporo kusua taena kunikia aeyaka perakano asesapo. Aporo tetane iriratasamo tetapō kunikia makeraka aporo meta purafapo. ²⁹ Asiamo Yasu kasua ripaka pekea kasu matapea karikimarerakano asekea, aporo tetane Yasu rea pesapo. Peraka Yasuaki poaeraka someraka, “Ne Kotimo hokosapo. Nómo eto mayiakakosare? Fanasihokosa maiyane haru faserepeasiraka nómo etoaki fanasiraka kau teraka yaiya rerane kakako perakayiare?”

³⁰ Aíyaka aseane saro yakai makeraka makata nenaka risikino asesapo. ³¹ Asekea yatafumo Yasuaki someraka, “Nómo isu pusierakane saro tua risikiako pusiesie.” ³² Airakano iaki Yasumo someraka, “Re pusie,” airakano yatafu pukua saro tua risiapo. Saro tua risikirakano saro su ūri kakafae aeyaka foaka sosenoraka peraka, he fesere mosakipoko aeyaka eteraka he numua hurupeperaka saro suane he nekea kukua kesapo.

³³ Kukua kerakano asekea, saro asekea risia aporoane apea tekatarikia hisiapo. Hinaka aporo yatafumo ho mosa mafasane soko, saro kukua kesane soko, makata asesane su somesapo. ³⁴ Somerakano ape aeyaka aporo suamo Yasu aseako pesapo. Peraka himu faraka Yasuaki someraka, “Isiapo hauakane ne metakarikia pusie,” aisapo.

9

Aporo korosakataesane Yasumo mafasane oyapo.

Maka 2:1-12; Ruki 5:17-26

¹ Yasumo Katára hauakane metakarikia, kasu ripaka poparipekea ipi taonea* fosāpo. ² Fókoia risike aseane, aporo korosakataesane fefeneakua makekea ira paka maka perakano asesapo. Maka pesa aporoamo aporo korosakataesane Yasumo mafahoasimo Yasuaki himu hakásaraka hemakapukua maka perakano asekea, Yasumo aporo korosakataesaki someraka, “Hameo, mapiraraka hemakapunie. Nómo himu watikisane nōmo mafarakanapo.”

³ Airakano Kotimo somemane tisa aporo metakiramo namina susu hemakapuraka, “Aporo himu watikisa mafarakanapo airakane Kotimo airaka sikirakae. Epo Kotiane mawakasemarakae.” ⁴ Aíyaka hemakapurakano ipu hemakapusuane Yasumo aseraka someraka, “Repo marirakano ano mahokoparirakanare? ⁵ Aporomo himu watikisa mafanane kárare? Aporo makata takamasa mafanane wakasemare? Meta mane kárare? Meta mane wakasemare? Wae, tati siasapo. ⁶ Aporomanomo Tákeane anopo. Hauaka wo aporo himu watikisane nōmo mafahoasimo Kotimo ano murikimaka maresapo. Maresasamo repo asekeasimo aporo korosakataesaki nōmo takahisierakanapo.” Aíyaka aporo korosakataesaki Yasumo someraka, “Ne takahisie. Takahikia ní asakapuane maweroraka maka nōmo ní apea pusie.” ⁷ Airakano aporoane takahikia ipi apea pusuapo. ⁸ Purakano aporo hinamo sarimasamo aseraka fofasapo. Fofaraka ipu hemakapuraka, “Makata

* 9:1: Yasu sisimaraka reke, Kotimo makata rakirane rakiraka rea maiya amo, Kapaneame taonea reapo.

watikisa mafana wakapuane Kotimo aporoaki kayereapo.” Aíyaka hemakapuraka ipu Kotiaki kekeresapo.

Yasumo Matiuaki peae, aisane oyapo.

Maka 2:13-17; Ruki 5:27-32

⁹ Yasumo hauakane metakarikia puraka aseane, takese mora aporo yano motosa Matiu,[†] takese mora oposea kakeno asesapo. Aseraka Matiuaki Yasumo someraka, “Ne ano patera aseako peae.” Airakano Matiu takahikia Yasuyaki hakāsa pusuapo.

¹⁰ Pukua Matiumo apea pauraka ape namoa yorokoa toke, Yasu soko ipi aporo hakāsa pura soko toke, iyaki takese mora aporo metakira soko, aporo himu watikisa soko, sarimaraka toke, makata nesapo. ¹¹ I suane hakāsa toke makata nenakano, Fere se aporomo aseraka, Yasumo aporo hakāsa puraki someraka, “Marirakano repo tisane takese mora[‡] aporoyaki aporo himu watikisayaki hakāsa toke makata nenakanare?”

¹² Aíyaka ipu somerakano Yasumo kairaka iaki someraka, “Aporo koteaka reane mitikoromo mafahoko purafapo. Aporo makata takamasane mitikoromo mafahoko purapo.

¹³ Asiamo aporo himu watikiaka risiamo watikisane metakarikia risikiako parihoasimo iaki peahoko ano perakayiapo. Aporo kotesane peahoko ano perakayiafapo. Asiamo Kotimo sawia popasane enomako hemakapunie. Kotimo someraka, ‘Anoaki makata rukua paikia yaku karakano asekea nōmo wakasema sesenapo. Arirakano aporo metaki kamenakaraka himu purakano asekea nōmo kára sesenapo.’ Aíyaka popasamo kepoane hemakapusakipoko koanie.” Aíyaka Yasumo somesapo. *(Hosea 6:6)*

Kotimo asekeasimo makata nakosa sokoainane Yasumo somesane oyapo.

Maka 2:18-22; Ruki 5:33-39

¹⁴ Yasu rea Yone he tapukumareramo aporo hakāsa pura peraka Yasuaki someraka, “Kotimo asekeasimo isiapo soko, Fere se aporomo soko, maiya metakiramo makata nakosa nekea, maiya metakiramo makata nakosa sokoainapo. Nōmo aporo hakāsa puramo maiya suamo makata nakosa nenaka risikinapo. Ipu makata nakosa sokoai-hoanafononane mainakanonare?” ¹⁵ Airakano Yasumo ipiane takumeaka someraka, “Aporomo hinamo arumarakano aporo suamo hokono keraka seseaka makata nenapo. Makata nenaka aporo hinamo kawe apia iyaki hakāsa rekeno, i himu hisihoanafonoraka seseraka risike, makata nakosa sokoainafapo. Arirakano aporo hinamo kawe apiane[§] aporo metakiramo waseremaka apura maiya amo, ipu himu hisiraka makata nakosane sokoaihokosapo.

¹⁶ Arirakano pasu paté koasakipoko pasu kawe paremarekea irisane, pasu kaweane kuruhenaka pasu patéane fe taku aeyaka hatirirurapo. Hatiriruraka kára koahokosapo. Anapaka pasu patéyaki pasu kaweyaki sarimaraka irinafapo.

¹⁷ Arirakano nanikose kau aporomo maka petoro irinapo. Waene he kawe metekesane petoro patéa takamanafapo. Takamarakano waene he kaweamo ponoponoraka petoro patéane faurakosapo. Fauraka petoro kakeraka waene he sakuriakosapo. Sakuriraka waene he soko petoro soko tetákara fahokosapo. Arirakano waene he kawe metekesane petoro kawea takamarakano petoro faunafapo. Fauhoanafonoraka, tetákara tati siaraka risikiakosapo.” Aíyaka Yasumo somesapo.

Hinamo hokosa kusua Yasumo maturikia taesane oyapo. Arirakano hinamo meta makata takamasamo Yasumo pasua sakaihoane mafasane soko oyapo.

Maka 5:21-43; Ruki 8:40-56

¹⁸ Yone he tapukumareramo aporo hakāsa puraki Yasumo someraka rea maiya amo, Yu aporomo sarimana ape asekea rea aporo metane pesapo. Pekea kakuna porokoa kake Yasuaki someraka, “Nōmo hinamo hokosa kawe kusuapo. Kusua nine ne peraka,

[†] 9:9: Matiu ane yano motosa meta Rífaipo. [‡] 9:11: Takese mora aporoamo mone sapeane hakimosapo. Anakano asekea aporomo iaki sesesafapo. [§] 9:15: Takume someamo kepoane aporo hinamo kawe apia asíane Yasu ipipo.

e sakaihoane turikia pukua hitaferaka kakakosapo.” ¹⁹ Airakano Yasu takahikia eyaki hakāsa pusuapo. Puraka ipi aporo hakāsa pura soko, eyaki hakāsa pusuapo.

²⁰⁻²¹ Purakano asekea hinamo meta patera aeyaka pekea, ipi himumo hemakapuraka, “Ano keremisi keno sumo wake apea makama yiaraka kayapo. Kayasasamo, Yasumo pasua nōmo sakaihoane ano wake apea makama yiaraka kayane fahokosapo.” Aíyaka hemakapukua Yasu purakano asekea, e patera aeyaka pekea Yasumo pasu ke huhua sakaisapo. ²² Sakairakarakano Yasumo kaikia rekeako pariraka, hinamoaki someraka, “Hinamo ne karekekeka kakakopo. Mapiraraka kakanie. Nōmo anoaki himu hakásaraka hemaka apura yiamo, ne makata takamasane mafarakayiapo.” Aihoanine hinamoane makata takamasane wate foaka fasapo.

²³ Farakano i pukua Yu aporomo sarimana ape asekea rea aporomo apea pauraka, ape namoa yorokoa pukua aseane, hokosa kusuakipoko hinamomo hihiripuraka, metakiramo kamenakaraka hihiripurakano asekea, ²⁴ Yasumo iaki someraka, “Re su yaoa pusie. Hinamo hokosane kusuaafapo. E wayereapo.” Airakano aporo hinamo suamo Yasuaki hokomarekea keasapo. ²⁵ Kearaka i yaoa purakano asekea, hokosa kusua warea apea Yasu yorokoa pukua, hokosa hokonoa maka máfaraka maturikia taesapo. ²⁶ Maturikia taerakano asekea, hokosa ane maturikia taesane hauaka makea aporo hinamo suaki somepe pusuapo.

Aporo tetá hi fausane Yasumo mafasane oyapo.

²⁷ Yasu puraka kaiyiáne aporo tetá hi fausamo Yasu kekemarape peraka Yasuaki wáraka, “Tefetemo** aporo ira Yasuo, nōmo eto kamenakaraka araresie.”

²⁸ Airakano Yasu apea pekea yorokoa reke aseane, aporo tetá hi fausane perakano asekea, Yasumo tetáki someraka, “Tetápo hemakapuraka, ‘Eto hi fausane nōmo mafahoasimosapo,’ aíyaka hemakapurakanare?” Airakano tetapō someraka, “Ao, Unihaeo, nōmo eto mafahoasimo hemakapurakaripo.”

²⁹ Airakano tetá hia epo sakairaka someraka, “Tetápo hemakapuraka eto mafahoasimosapo, aíyaka hemakapusuasamo teto mafarkanapo.” ³⁰ Aihoanine tetá hi fausane faraka koteaka asesapo. Farakano asekea Yasumo tetáki paroaka someraka, “Tetápo hi fausa mafasane aporo hinamo metaki somehokopo,” aisapo. ³¹ Airakano yia tetapō Yasumo rakisiane aporo hinamo suaki somepe pusuapo.

Aporo me fasane Yasumo mafasane oyapo.

³² Aporo tetá hi fausa mafasane pusuakipoko, aporo meta yatafumo ho masa me fasane aporo metakiramo karikia pesapo. ³³ Karikia perakano Yasumo yatafuaki someraka, “Ne metakarikia pusie.” Airakano yatafuane pusuapo. Purakano aporo me fasamo koteaka somesapo. Somerakano aporo sarimasamo kaikia fofaraka someraka, “Epo rakirane hakureapo. Isiraya hauaka wo isiapo aporo metamo ayíáka rakirakano fana isiapo asesafapo.” ³⁴ Aíyaka somerakano Fere se aporomo someraka, “Wae, yatafu metakarikia pusiehoasimo, yatafumo unihae Satanemo wakapuane Yasumo maka yatafu pusierakano apure,” aisapo.

Aporo hinamo suane Yasumo kamenakaraka hemakapusuane oyapo.

³⁵ Taone sua soko, ape sumu wakasema á soko, Yasu koraka reke, Yu aporomo sarimana ape sua Yasumo some kotesa some kape pusuapo. Epo some karáka, “Koti unihaeaka rekenapo,” aíyaka some kotesane some kasapo. Some karáka rea maiya amo, aporo metakira makata kára tasane soko, wakasema tasane soko, suane Yasumo mafasapo.

³⁶ Mafaraka reke aporo hinamo suane Yasumo asekea hemakapuraka, “Saro sipi wafaya fasekeno saro sipi mokome pusua, hasaka korapo. Arirakano saro sipi metakira fafaoraka risirapo. Aina ayíáka aporo hinamo arisiane ayíáka risikinapo.” Aíyaka Yasumo aporo hinamo supoko kamenakaraka hemakapusuapo.

** ^{9:27:} Wate fana Yu aporo hinamoane Tefetemo unihaeaka asekea reapo. Tefetemo aporo ira wainepe pusuane Yasu faserepesapo.

³⁷ Kamenakaraka hemakapukua aporo yakaiane, aporo hakāsa metamo ararehoanafonosakipoko, Yasumo ipi aporo hakāsa puraki takumeaka someraka, “Ira wate sūsane kárareapo. Asiāne ira wateane tuakosane aporo hukusireapo. ³⁸ Asiamo ira wate sūsane aporo raipamo tuako pusiehoasimo hemo wafayaki kurikurihoanie.” Aýaka Yasumo somesapo.

10

Aporo hakāsa pura kenosu yano taesane oyapo.

Maka 3:13-19; Ruki 6:12-16

¹ Yasumo ipi aporo hakāsa pura keno suaki peaerakano pesapo. Perakano ipu yatafuane metakarikia pusiehoasimo, i murikimaka wakapu kasapo. Ipu aporo makata kára tasane soko, wakasema tasane soko, ipu mafahoasimo, iaki Yasumo wakapu kasapo.

² Ayíáka Yasumo aporo kenosu murikimaka iaki tarira aporo* yano motosapo. Ipu yano taesane oyapo. Saemone ipi yano motosa meta Pita, arirakano meta Saemonemo ipi mamanea Enitu, arirakano meta Sepetemo maeya Yamese, arirakano meta Yamesemo ipi mamanea Yone, ³ arirakano meta Firipi, arirakano meta Patóromiu, arirakano meta Tomase, arirakano meta takese mora aporo Matiu, arirakano meta Afiasemo maeya Yamese, arirakano meta Tátiese, ⁴ arirakano meta Rome kamanimo Yu aporo asekea reane metakariakosakipoko hemakapura aporo Saemone, arirakano meta Yasu parakehokosa aporo Yutase Isekerio, ayíáka Yasumo aporo kenosuane murikimasapo. Murikimasane tarira aporo ayapo.

Aporo keno sumo makata rakiako pusiesane oyapo.

Maka 6:7-13; Ruki 9:1-6

⁵ Aporo keno suaki Yasumo someraka, “Re uyáka punie. Puraka Yu aporohoanafonosamo apea pukupo. Sameria aporomo apea pukupo. ⁶ Saro sipi rosaka tarikia arisia ayíáka Isiraya aporo hinamoane ayíáka risikinapo. Iaki somehoko pusie. ⁷ Pukua some karáka, ‘Koti unihaeaka rekeakosa maiyane faserepesapo.’ Aýaka somehoanie.

⁸ Aporo hinamo makata takamasane mafahoanie. Arirakano aporo hinamo kusuane maturikia taehoanie. Arirakano aporo hinamo toropakesane mafahoanie. Arirakano yatafumo aporo hinamo ho mosane yatafuane metakarikia pusiehoanie. Aýaka mafana wakapuane repo yaku mosasamo, repo aporo hinamo suane yaku mafahoanie.

⁹ Asiamo re puraka, mone sawi soko, siufa mone hae soko, mone kusua soko, mone suane pausia kesane mokoa pukupo. ¹⁰ Re kimisi puraka aku soko, pasu meta soko, mokoa pukupo. Tamaka soko, tatia soko, makata suane mokoa pukupo. Asiamo repo makata rakirane rakisiakipoko repo araresa aporomo reaki makata nakosa kayane siahoasireapo.

¹¹ Re kimisi pukua apea pauraka repo kairaka, ‘Koteaka rera aporo epare?’ Aýaka kaiyinie. Kaiyiáne tarirakano, apea yorokoa ape hakāsa yia waka risikianie. Ape sumu meta pukusakipoko ape ne wasa aeyaka punie. ¹² Ape wará tarirakano á pukua, ape wafaya hokono maka eaki someraka, ‘Ano perakayiapo. Kotimo ne makoterakano ne auaraka rekeasimo hemakapurakaripo.’ Aýaka some kakanie. ¹³ Some kasane ape wafayamo kaikia peaerakano, puraka auaraka rerane eaki some kakanie. Arirakano ape wafayamo peakoporakano auaraka rerane apea some kakakopo. Apeane metakarikia punie.

¹⁴ Arirakano aporo metakiramo reaki terehoanafonoraka, repo someane kakipayarakano, taoneane metakarikia punie. Puraka namina hisisasamo aporoaki Kotimo seserakanafapo. Aýaka ipu hemakapusimo yapakeraka korakea kokotonomosane rerakatapikia marekea metakarikia punie. ¹⁵ Hao, kaisie. Nōmo reaki kakaro somerakaripo. Hukuarura maiya amo aporo hinamo Sotome taonea soko Komora taonea soko watikiaka rakiraka risiane fanasihokosane kárahokosapo. Arirakano repo some kayane

* ^{10:2:} Tarira aporoane pisini meaka aposo, aýaka yano motosapo. Tarira aporoane Yasumo aporo hakāsa pura ayapo.

kakipayasa taonea aporo hinamo risiane fanasihokosane namo kakaro kárahokosapo." Aíyaka Yasumo somesapo.

Mokoatikhokosa maiya faserepeakosane oyapo.

Maka 13:9-13; Ruki 21:12-17

¹⁶ Aporo hakása puraki Yasumo someraka, "Kaisie. Reane saro sipi auasa asíapo. Aporo watikisane saro wofe irirasa asía risiakipoko nōmo re saro sipi asíane pusierakanapo. Arirakano kuyare tau apura ayiáka re tau punie. Aporomo re mokoatikinapaka tau punie. Arirakano mena numemo makata meta mokoatikihoanafonona ayiáka, repo soko ayiáka aporo meta mokoatikhokopo. ¹⁷ Aporomo re mokoatikinapaka asekeanie. Re aporo metakiramo waseremokoa hukurura apea hukurukua, ayiáka Yu aporomo sarimana apea ira faimo reane rukusapo. ¹⁸ Arirakano repo ano patera asesasamo, kamani aporomo soko, aporo unihemo soko, reane hukurusimo aporo metakiramo reane waseremokoakosapo. Waseremokoa hukururakano repo iaki soko, Yu aporohoanafonosaki soko, anoane makáraraka somehokosapo. ¹⁹ Reane hukururakano repo somehokosane karekeakopo. Asiamo re somehokosane repo himura mahemakapurarakano repo somehokosapo. ²⁰ Repo namina metamo hemakapusua somehokosafapo. Atamo Ho Kotesamo reaki some karakano, epo some kasa hakása nine, repo somehokosapo. Repo siaraka somehokosapo.

²¹ Arirakano aporomo ipi mamaneane aporo metamo rusimo parakehokosapo. Arirakano wafayamo ipi hokosane aporo metamo rusimo parakehokosapo. Arirakano hokosamo ipi wafaya kaíyia tetáne aporo metamo rusimo parakehokosapo. ²² Re ano patera asesasamo reane aporo suamo hisihokosapo. Hisirakano yia aporo hinamomo anoaki patera asesane metakarirafaraka yaiya anoaki hemakapuraka risikino, aporo hinamoane Kotimo mafasiakosapo. ²³ Taone meta á re mokoatikirakano takaripukua taone meta á punie. Taonea soko ipu reane mokoatikirakano yaiya takaripukua taone meta á punie. Nōmo some one kakaro somerakaripo. Aporomanomo Tákeane anopo. Repo Isiraya hauaka taone sua nōmo someane some kape pukua, some kaka fahoasiraka, taone hukusi metakira some karaka arisiamo ano paripeakosapo." Aíyaka Yasumo somesapo.

"Anoa paosa aporo hinamo uyáka risikiakosapo." Aíyaka Yasumo somesane oyapo.

Ruki 12:2-7

²⁴ Yasumo someraka, "Sukuru aporomo ipi tisane marokenafapo. Arirakano aporo raipamo ipi wafayane marokenafapo. ²⁵ Tisa area yaiya sukuru hokosa soko yaiya kekemaraka risike siahoasireapo. Arirakano makata rakira wafaya area yaiya aporo raipa soko, yaiya kekemaraka risike siahoasireapo. Arirakano ape wafaya asíane anopo. Aporo metakiramo anoaki mokoatikiraka someraka, 'Ne Satane Piaósipupo,' airakasupo. Aísa ayiáka anoa paosa aporo hinamoaki soko, ayiáka kára mokoatikiraka aihokosapo.

²⁶ Asiamo reane mokoatikhokosa aporoaki namohokopo. Makata faremaresane mafekemahokosapo. Makata mahamesane hufitaehokosapo. ²⁷ Nōmo reaki hákasa somerakano, re katosa arisia, ayiaka risiane keseke someamo kepoane repo hemakapuraka, faeana ayiáka faehokosapo. Faesane aporo suamo kaiyisimo nōmo somesane iaki somehoanie. Nōmo reaki tau somesane aporo suamo kaiyisimo ape kára á sakepamo somehoanie.

²⁸ Aporomo ne kau kukusimo rurakano aporoaki namohokopo. Arura aporoamo ne hoane makurafapo. Arirakano ne kau soko, ho soko, mokoatikiraka heao hauaka á pusie, aira Kotiaki namohoanie.

²⁹ Arirakano maketea mena muri asia aporomo roponapo. Roporaka mena muri asiane tetá mone hae kusua hakásamo (1 toe) roponapo. Mena muri asiane hakása kurakanone, repo Atamo aserapo. Repo Atamo aohoanafonorakano mena muri asiane hakása huruperaka kurafapo. ³⁰⁻³¹ Mena muri wakasemané Kotimo asekea rerapó. Mena muri wakasemané asekea rerasasamo, re aporomanoane Kotimo namo kakaro kára hemakapurua asekea rekenapo. Asekea reke re uni iti suane epo hakása hakásaraka

menoaka hemakapukua fasapo. Uni iti menoraka asekea rerasasamo re namohokopo.” Aíyaka Yasumo somesapo.

Yasu patera asesa aporoane soko, Yasu patera asekeanafonosa aporoane soko, Yasumo somesane oyapo.

Ruki 12:8, 9

³² Yasumo someraka, “Aporo hinamo suamo kaiyisimo aporo metamo someraka, ‘Ano Yasu patera aserakanapo.’ Aíyaka somerakano, nōmo Ata hepene yapura reamo kaiyisimo nōmo someraka, ‘Ano patera asesa aporo ane ayapo,’ aihokosapo. ³³ Arirakano aporo hinamo suamo kaiyisimo aporo metamo someraka, ‘Ano Yasu patera aseako hisiripo.’ Aíyaka somerakano, aporoane nōmo Ata hepene yapura reamo kaiyisimo nōmo someraka, ‘Aporoane ano patera asesafapo. Ano patera asekeanafonosasamo eane nōmo metakarirakanapo,’ aihokosapo.” Aíyaka Yasumo somesapo.

“Aporo fasikia risikiasimo ano pesapo.” Aíyaka Yasumo somesane oyapo.

Ruki 12:51-53; 14:26-27

³⁴ Yasumo someraka, “Repo hemakapuraka, ‘Yasu pesasamo hauaka wo aporo su tákera tau auaraka risikiakosapo,’ aíyaka hemakapukupo. Ano pesasamo aporo hinamo su tákera tau auaraka risikiakosafapo. Aporo hinamo metakiramo anoaki himu hakásaraka hemakapukua, arirakano aporo hinamo metakiramo anoaki himu hakásaraka hemakapunafonosasamo tau auaraka risikiakosafapo. Ano wo pesasamo aporo hinamo namina yia fasikia yunuraka risikiakosapo. ³⁵ Asiamo ano pesasamo aporomo ipi wafaya tati rakumarekea risikiakosapo. Arirakano hinamomo ipi kaýia tati rakumarekea risikiakosapo. Arirakano hinamomo ipi apiamo kaýia tati rakumarekea risikiakosapo. ³⁶ Arirakano aporomo ipi aporo ira hakásayaki, ipi ape hakása risia namina rakumarekea yunuraka risikiakosapo.

³⁷ Arirakano aporomo ipi wafaya soko metao, ipi kaýia soko metao, himu matumururaka hemakapuraka ano makama kesekearaka hemakapurakano, aporoane anoyaki siaraka rekenafapo. Arirakano aporo metamo ipi aporo hokosa soko metao, ipi hinamo hokosa soko metao, matumururaka hemakapuraka ano makama kesekearaka hemakapurakano, aporoane anoyaki siaraka rekenafapo. ³⁸ Ano ira matopesa paremareraka kukusakipoko ira matopesane nōmo nī maka pura ayiáka, repo soko, hauaka wo makatane su makama kesekearaka ira matopesa maka,† ano finihaoa fini kafo kepe peanafonorakano, re anoyaki siaraka rekenafapo. ³⁹ Aporomanomo hauaka wo areamo hitaferaka rekeakosane hákasa hemakapurakano, aporoamo Kotiyaki yaiya rerane kokoa makosafapo. Arirakano aporomo anoaki hemakapuraka, hauaka wo kau hitaferaka rekeakosane makama kesekearaka hemakapurakano, aporoamo Kotiyaki yaiya rerane kokoa makosapo.” Aíyaka Yasumo somesapo.

Makata ropo kakakosaposane oyapo.

Maka 9:41

⁴⁰ Aporo kenosu kimisi pukorakano Yasumo someraka, “Re apea peane aporomo re tereraka pasimorakano ane, ano pasimarakanapo. Ano pasimarakano ane, ano pusiesa Kotiane soko pasimarakanapo. ⁴¹ Arirakano porofete aporoane Kotimo some kará aporopo. Kotimo some kará aporosasamo, some kará aporoane aporo metamo tereraka pasimarakano some kará aporo kimisi pesaki Kotimo makata ropo akara yaiya, aporo meroaki soko, makata ropo hakása nineraka kakakosapo. Arirakano aporo ereketaeraka rerasasamo aporo metamo e pasimarakano, aporo ereketaeraka reraki Kotimo makata ropo akara yaiya, pasimasa aporoaki soko, makata ropo hakása nineraka kakakosapo.

⁴² Arirakano anoa paosa aporo wakasemaki aporo metamo someraka, ‘Ne Yasu patera asesasamo nōmo ne he nasimo karakanapo.’ Aisa aporoaki Kotimo makata ropo kakakosapo. Nōmo some one kakaro somerakaripo.” Aíyaka Yasumo somesapo.

† 10:38: Repo ira matopesa maka pura someamo kepoane oyapo. Aporo Keresoa paosasamo aporo metamo hisiraka eane rusua kukusimo rakirakanone, Keresoa paosa aporoamo hemakapuraka, “Ano Yasupoko kukusapo,” aíyaka hemakapurapo.

11

Yone he tapukumareramo ipi aporo hakāsa puraki someraka, “Yasu rea pukua, ‘Ne Keresore?’ aiyaka kaiyinie,” aisane oyapo.

Ruki 7:18-35

¹ Aporo hakāsa puraki Yasumo some kaka faraka, apeane metakarikia ape sumu metakira ape makeraka risia á Yasumo some kakako pusuapo.

² Yone tipura reke kaijiane, “Keresomo Kotimo wakapuyaki rakirakanapo.” Airakano epo kairaka ipi aporo hakāsa pura metakiraki someraka, “Yasu rea kaiyako pusie,” aisapo. ³ Pusierakano i pukua Yasuaki kairaka, “Kotimo aporo pusierakano peakosapo airakasuane nere? Aporo metare? Aporo meta perakarihoamo isu kau risikiaere?”

⁴ Airakano iaki Yasumo someraka, “Re pukua repo makata kaisiane soko, makata asesane soko, Yoneaki somehoanie. ⁵ Amano hi fausane mafasa koteaka aserakanapo. Arirakano amano korake matipusane maraesaa koteaka purakanapo. Arirakano amano toropakesane mafasa koteaka risikinapo. Arirakano amano senaki tisane mafasa koteaka kairakanapo. Arirakano amano kusuane mafareasa turikia tarikia risikinapo. Arirakano amano makata forokoa risiaki soko, Kotimo some kaiyanafonosa aporo hinamoaki soko, Kotimo some kotesa some karakanapo. ⁶ Asiamo anoaki himu hakásaraka hemakapurane metakarirafaraka yaiya hemakapuraka risikino, aporo hinamoane Kotimo makotenapo. Aiyaka makata suane repo Yoneaki somehoanie.” Aiyaka aporo pesaki Yasumo some kasapo.

⁷ Some kaka faraka aporoane paripurakano asekea Yasumo aporo yakai sarimasaki someraka, “Yonemo ima yaoa some karakano, repo ima yaoa yakapa aseako pusuare? Fofako atifomo mahohoanane aseako pusuare? Wae, fofako atifomo mahohoanane aseako pusuafapo. ⁸ Repo fofako aseako punafonoraka yakapa aseako pusuare? Aporo kau rakisiane aseako pusuare? Wae, aporo kau rakisiane unihaemo apea rerapo. Aporo kau rakikia ima yaoa rerafapo. ⁹ Asiane repo yakapa aseako pusuare? Kotimo some kará porofete aporo aseako pusuare? Ao, repo Kotimo some kará porofete aporo kárane asesapo.

¹⁰ Wate fana Kotimo sawia Kotimo some kará porofete aporo metamo popasane oyapo. Mafasira aporoaki Kotimo someraka, ‘Ne pusiraka aporo metamo fana some kakako nōmo pusiehokosapo. Aporoamo ne ikia kara pukusane makotehokosapo.’ Aiyaka Kotimo somerakano Kotimo some kará porofete aporomo kaikia popasapo. (*Malakai 3:1*)

Arirakano Kotimo aporo fana pusiehokosane Yoneane popasapo.

¹¹ Nōmo some one kakaro somerakaripo. Nōmo some kakasiraka aporo su wainepe pusuamo aporo makama fanasane Yone he tapukumarera ipipo. Arirakano ano perakano aporo metamo someraka, ‘Ano aporo wakasemané Unihae Yasumo ano asekea rekenapo,’ Aira aporoamo ‘Unihae peakosapo,’ aiyaka somesa aporoane makama kesekenapo.

¹² Aporo hinamo ape kakarua hiakosakipoko ikia koro mapirisikino rukuropaka taeana ayíáka, Koti unihaeaka rea hauaka hiakosakipoko aporo hinamomo ikia koro rukuropakataehokosakipoko wakapurakanapo. Yone he tapukumarera rea maiyamo asia ayíáka, yumo soko anakanapo. ¹³ Yone he tapukumareramo some kakasiraka, Unihae peakosane Kotimo some kará porofete aporomo popasapo. Arirakano Kotimo somemane popasane hakásá nineraka popasapo. ¹⁴ Asiamo ipu somesane repo kairakanone nōmo someane soko kaiyinie. Iraíya paripeakosapo aisane Yonepo. ¹⁵ Re senaki risiamo kairaka koteaka kaisie.

¹⁶ Maiya omo aporo hinamo risiane nōmo mayíáka somehokosare? Nōmo takumeaka somerakanapo. Hokosamo hauaka moroa enaraka namina yia hokosa metakiramo hokosa metakiraki someraka, ¹⁷ ‘Isiapo wirotakiane repo seseaka paoraka hakásá kesarakarifapo. Isiapo hiripuhoane repo soko paoraka hiripurakarifapo,’ aisapo. Asiamo i arisia ayíáka, re soko ayíáka risikinapo. ¹⁸ Ayíáka risiamo kepoane oyapo. Yone he

tapukumarerane peraka makata nakosa sokoairaka, waene he soko nesafapo. Nanafonorakano asekea, repo someraka, 'Yoneane yatafumo ho mayereapo,' aisapo. Aíyaka re Yonea paosafapo.

¹⁹ Arirakano Aporomanomo Táke ano peraka, makata nakosa soko waene he soko nenapo. Nenakano asekea repo someraka, 'Yasumo nako fitiraka sapekeamo nenareapo. Waene he soko kára nenareapo. Arirakano aporo takese morane soko, aporo metakira himu watikisane soko ipi tákereapo.' Aíyaka someraka re anoa paosafapo. Paohoanafona nine Kotimo hemakapusuane nōmo kekemaraka rakirakano, aporomo asekea hemakapuraka, 'Kotimo hemakapusuane ereketaehoareapo,' aíyaka hemakapukusapo." Aíyaka Yasumo somesapo.

Yasumo wakapuaka rakisiane asesa aporomo namina himu watikisane metakarikia risikiako parihoanafonorakano fanashikosane oyapo.

Ruki 10:13-15

²⁰ Korasini taonea soko, Pesaita taonea soko, Kapaneame taonea soko, Kotimo wakapumo hemakapukua rakira Yasumo makata yakai rakirakano, aporo hinamo risiamo asesapo. Asekea yia ipu himu watikisane metakarikia risikiako parisafapo. Risikiako parihoanafonorakano Yasumo iaki hukurukua someraka, "Re yaiya watikiaka risikinapo.

²¹ Uao. Enahoasifareapo. Korasini aporo hinamo reo, Pesaita aporo hinamo reo, repo aseraka yia repo makata watikisane metakarianafonorakano, re kára fanashikosapo. Repo taonea Kotimo wakapumo hemakapukua rakirane nōmo rakisiapo. Rakisiane Yu aporo hoanafonosamo Taia taonea soko, Saetone* taonea soko, nōmo rakisia satiki, ipu makata watikisane wate fana metakariafunupo. Metakarikia ipu makata watikiaka rakisiasamo i kaýyaraka risike, kaua ororomo paikia pasu pitikini makafirikia arupekeaa yiáka tokoafunupo. Ayiáka toke ipu makata watikisane metakarikia risikiako parihoafunupo. Asiâne nōmo rakisiane ipu asesafapo.

²² Kaisie. Takekeia hukurukua fanasina maiya amo Taia aporo hinamoane soko, Saetone aporo hinamoane soko, wakasema kára fanashikosapo. Repo aseraka yia risikiako parihoanafonosakipoko re kára fanashikosapo. ²³ Kapaneame aporo, repo hemakapuraka, 'Isu hokopukua risikiakoripo.' Aíyaka hemakapukua hepene taone yapurane máfana ayiáka repo namina yano motosa máfahoko hemaka apure. Asiamo keseke heao hauaka atura re mokoasuhokosapo. Asiamo Kapaneame aporo, repo taonea nōmo makata wakapuaka rakisia ayiáka, Sotome taonea Kotimo some kará porofete aporomo wakapuaka rakisia satiki Sotome aporomo ipu makata watikisane metakarikia risikiako parihoafunupo. Asiamo Kotiaki risikiako parisa satiki, Sotome taoneane Kotimo pakimareafunufapo. ²⁴ Kaisie. Kotimo hukuarura maiya amo Sotome aporo hinamoane Kotimo wakasema kára fanasinane motoakosapo. Repo asekea yia makata watikisa metakarikia risikiako parihoanafonosakipoko, re namo kakaro kára fanasinane motoakosapo." Aíyaka Yasumo somesapo.

Yasumo kurikurisane oyapo.

Ruki 10:21-22

²⁵ Maiya amo Yasumo Kotiaki seseraka someraka, "Atao, hepene yapura soko, hauaka wo soko, nōmo unihaeaka asekea rekenapo. Asekea reamo aporomo makata su enomasaki† nōmo ní faremaresa makata ane mafekeamaraka tarirakanafapo. Asiâne nōmo ní hokosa asiáki‡ nōmo makata faremaresane mafekeamaraka tarirakanapo. Tarirakano nōmo neaki suserakanapo. ²⁶ Atao, nōmo ní hemakapusua aporoaki tarirakanapo." Aíyaka Yasumo kurikurisapo.

* 11:21: Wate fana Taia taonea soko Saetone taonea soko aporo hinamomo kára watikiaka rakisiapo. † 11:25: Aporomo makata su enomasane metakira Fereze aporopo. Metakira Satusi aporopo. Metakira Kotimo somemanane tisa aporopo. Aporoamo makata enomasasamo ipu hemakapuraka, namina siaraka risikinapo, aíyaka hemakapusuapo.

‡ 11:25: Hokosa asiâne Yasumo aporo hakâsa pura aporopo.

²⁷ Kurikuriraka faraka aporoaki Yasumo someraka, “Makata kepo suane nōmo Atamo anoaki tarisiapo. Arirakano nōmo hemakapusuane soko, nōmo ainane soko, nōmo Atamo ipi hákasamo aseraka hemakapurapo. Arirakano nōmo Atamo hemakapusuane soko epo ainane soko, nōmo nī hákasamo aseraka hemakapurapo. Hemakapukua nōmo nī aporo hinamo hemakapusuaki Atamo ainane soko, hemakapurane soko tarirakano, aporo hinamoamo aseraka hemakapukusapo.

²⁸ Repo makata rakikia hisiraka yoferaka, makata umisa kára maka pukua hisiraka, wakapu faraka yoferakano, ano area fenekea kakako peanie. Perakano né koteaka auamaka rekeakosapo. ²⁹ Arirakano saro ponomakau tetámo makata hakásá rakipe pusimo kesoa ira motokoa taponapo. Ira motokoa tapoana ayíáka repo anoaki someraka, ‘Nómo irane ano kinua motokoa taporasie,’ aihoanie. Arirakano nōmo makata atarirane repo enomakanie. Ano auaraka keneamo reasasamo nōmo ainane repo enomakanie. Enomarakano repo hoane yofenafaraka wakapuaka rekeakosapo. Yasumo someamo kepoane oyapo. Fere se aporomo somemaneane umisapo. Asiāne Yasumo somemaneane ofosapo. ³⁰ Asiamo anoyaki makata rakipe pusimo ne kinua nōmo irane motokoa taponane siasapo. Makata rakira umisane nōmo maofonapo.” Aíyaka Yasumo somesapo.

12

Fenena maiya kepoane Yasumo somesane oyapo.

Maka 2:23-28; Ruki 6:1-5

¹ Fenena maiya hakásá metamo witi hemoa Yasu soko, ipi aporo hakásá pura soko pusupo. Puraka aporo hakásá purane meamorakano, witi hae sūsane tukua nesapo.

² Nenakano Fere se aporomo aseraka, Yasuaki someraka, “Nómo aporo hakásá puramo makata arakirane asesie. Ipu makata rakiraka, fenena maiya yaposane mamosoane.”

³⁻⁴ Airakano Yasumo someraka, “Wate fana Tefete soko epo ipi aporo hakásá pura soko kára meamorakano, Tefeteane Kotimo apea yorokoa Kotipoko farawa taesane maka nesapo. Arirakano Kotipoko farawa taesane Tefetemo soko, ipi aporo hakásá puramo soko nakohoamo yaposapo. Asiamo pirisiti aporomo namina hákasamo nenane yaposafapo. Asiane Tefete ipi pirisiti aporohoanafonosa yiamo farawa yaposane nesapo.* Aíyaka Kotimo sawia popahoareapo. Popasane repo menoraka kepo hemakapurakarire? Wae, repo hemakapurakarifapo. ⁵ Arirakano fenena maiyamo Kotimo apea pirisiti aporomo Kotiaki makata kakaya rukua paikia kaka, ayíáka ipu makata rakirapo. Ayíáka rakirakano, Kotimo iane hukururafapo. Aíyaka Kotimo sawia somemane popasane repo menoraka kepo hemakapurakarifapo. ⁶ Hao, kaisie. Repo hemakapuraka, ‘Kotimo apeane fanareapo.’† Aíyaka hemakapusua nine, Kotimo apeane kesekeraka rekenapo. Ano wo areane fanaraka rekenapo.

⁷ Asiamo nōmo aporo hakásá puramo watikiaka rakianafonosa nine, repo iane hukuruwuapo. Asiamo Kotimo sawia popasane oyapo. Kotimo someraka, ‘Nómo somemane maresane repo kaumo kekemaraka, anoaki makata yaku karakano nōmo seserakanafapo. Asiamo aporo hinamo metakirane repo kamenakaraka ararehoasimoripo.’ Aíyaka Kotimo somerakano popasane kepoane repo hemakapurakarifapo. Repo hemakapusua satiki ane repo nōmo aporo hakásá purane hukurufunufareapo. *(Hosea 6:6)*

⁸ Aporomanomo Tákeane anopo. Yape fenena maiyamo makata ayiakanie aíyaka marerane, nōmo unihaeaka asekea rekenapo.” Aíyaka Yasumo somesapo.

Aporo hokono narisa Yasumo mafasane oyapo.

Maka 3:1-6; Ruki 6:6-11

* 12:3-4: “Tefetemo neane siahoasisekeno, nōmo aporo hakásá purane meamoraka risiasamo ipu soko neane siahoasireapo.” Aíyaka Yasumo somesapo. † 12:6: Kotimo fenena maiya yaposane kesekepo.

⁹ Yasumo someaka faraka, Yasu pukua Yu aporomo sarimana apea yorokoa aseane
¹⁰ aporo hokino narisa rekeno asesapo. Yasumo hasaka somerakarihoamo huku-
rusakipoko, Fere se aporomo someraka, “Fenena maiya amo aporo hinamo makata
tasane, aporo metamo mafarakanone, aporo amo Kotimo somemanane mamosorakanare?”

¹¹ Airakano iaki Yasumo someraka, “Fenena maiya amo repo namina aporo metamo
saro sipi hauaka kutua huruperakano, saro sipiane nómo ketaka maka máfahokosare?
Ao, máfahokosapo. ¹² Asiamo saro sipiane aporomo hakása wakasemaraka hemakapu-
rapo. Anakano aporo hinamoane Kotimo namo kakaro kára hemakapukua ararenapo.
Asiamo fenena maiyamo aporo hinamo arareana amo, Kotimo somemanane mamoso-
rakanafapo.”

¹³ Aíyaka Yasumo Fere se aporoaki someaka faraka, aporo hokino narisaki someraka,
“Ne hokino raerasie.” Airakano epo hokinoane raesapo. Raeraka hokino taku meta
koteaka area ayíáka, hokino narisane soko faraka koteaka reapo. ¹⁴ Koteaka rekeno
asekeea Fere se aporoane pukua namina susu someaka maraká, “Yasuane kukusimo isiapo
rukusapo. Asiamo mayíáka runarakapo.” Aíyaka Fere se aporomo someaka masapo.

Kotimo aporo raipa murikimasa aporo, Yasuane oyapo.

¹⁵ Fere se aporomo hemakapusuane Yasumo aseraka, taoneane metakarikia pusuapo.
Puraka aporo hinamo yakai eyaki hakása pusuapo. Pukua aporo hinamo makata tasa
suane Yasumo mafasapo. ¹⁶ Mafaraka iaki someraka, “Anoane aporo hinamo suaki
somehokopo,” aisapo. ¹⁷ Aisane aihoasiraka Kotimo some kará porofete aporo Aesayamo
Kotimo sawia Yasuane popasapo. Popasane oyapo. Kotimo eane someraka,

¹⁸ “Nómo aporo raipane epo. Eane nómo murikimasapo. Murikimaka nómo eaki
himu tumurumo kára hemakapukua seserakanapo. Eaki nómo Ho Kotesa mareakos-
apo. Marerakano, nómo ereketae maroponane Yu aporo hinamohoanafonosaki epo
somehokosapo. ¹⁹ Epo tafatafahokosafapo. Epo kára me rukusafapo. Ikia kara á aporo
hinamo suamo kaiyisimo, epo sapekeamo wáhokosafapo. ²⁰ Fofako kokomesa‡ hakása
soko, epo pateketaehokosafapo. Nafa pakimaka kokoraka kopakapuko makerakano, epo
kopakataehokosafapo. Aporo hinamo suane epo arareraka rakipe pukua, ayíáka ereketae
maroponane epo makama fanahokosapo.

²¹ Makama fanahokosasamo eaki Yu aporo hoanafonosamo hemakapukusapo. Hemaka-
pukua Kotimo ayiakakosaposane asekakipoko, kau riskinapo.” Aíyaka Kotimo
somerakano Aesayamo popasapo. (Aisaia 42:1-4)

“Yasupe Satane tati hakása yiyereapo.” Aíyaka Fere se aporomo somesane oyapo.

Maka 3:20-30; Ruki 11:14-23

²² Maiya amo aporo meta yatafumo ho maraka, hi fauraka, mé fasane aporo
metakiramo Yasu rea karikia pesapo. Karikia pesane Yasumo aporoane mafarakanano,
ipi mé fasane faraka koteaka someaka, anakano ipi hi fausane soko faraka koteaka
asekeea ásiapo. ²³ Anakano aporo hinamo suamo asekeea fofaraka someraka, “Mafana
aporoeane Tefetemo aporo ira wainepe pesa aporo meta fasere peakosaporakasue, érakanareapo.” ²⁴ Aíyaka somesane Fere se aporomo kairaka someraka, “Yatafumo
unihae yano motosa Piaósipu§ e Yasuyaki rekenapo. Reasasamo Piaósipumo wakapuamo
yatafu pusierakano apure.”

²⁵ Aíyaka somerakano ipu hemakapusuane Yasumo aseraka takumeaka someraka,
“Aporo namina hauaka hakása risia yamo parakuraka weraka, aporoane koaka tarikia,
kekepo kekeporaka risike, hauakane kauanehokosapo. Arirakano aporo ape sumu hakása
namina parakuraka weraka arupukusapo. Arirakano aporo ira hakása namina soko
parakuraka weraka arupukusapo.”

²⁶ Aina ayíáka Satanemo yatafuaki pusie satiki, ane ipi téke tati awera ayíáka wea-
funupo. Satanemo ipi aporo tékeyaki parakuraka wera satiki i arupufunupo. ²⁷ Asiamo

‡ 12:20: Fofako soko, nafa soko, takumeaka somesamo kepoane aporo hinamomo Kotiaki wakasemaraka himu
hemakapusuane Kotimo metakariakosafapo. § 12:24: Piaósipuane Satanemo yano motosa metane ayapo.

repo someraka, ‘Piaósipu anoyaki reasasamo epo wakapumo yatafuaki pusierakano pusuapo,’ aýaka repo somerakanapo. Arirakano repo namina aporo metakiramo yatafuaki pusiehokosakipoko, epa iyaki paoraka reare? Epamo wakapumo yatafuaki pusiesare? Repo someraka, ‘Piaósipumo wakapumo ásiapo.’ Aýaka repo some pari-peakosafapo. ‘Kotimo wakapumo ásiapo.’ Aýaka repo somehokosapo. Asiamo nōmo rakisimo wakapuamo kepoane hemakapukusakipoko, repo namina aporoamo ainane hemakapunie.²⁸ Arirakano yatafu pusiehoasimo Kotimo Ho Kotesa anoyaki reasasamo, epo wakapumo pusierapo. Yatafu purakano asekea, repo úyaka hemakapunie. ‘Kotimo unihaeaka asekea rekeakosa maiyane faserepesapo.’ Aýaka hemakapunie.

²⁹ Arirakano aporo metamo aporo waremo makata kemoane hakimokoariraka, fana aporo wareane sakomo taporaka motokoa marekea, epo apea yorokoa makata haki-morapo. Aporo wareane tapohoasiraka, e yaiya wareraka rekeno asekea, epo apea hakimokoako yororafapo.

³⁰ Arirakano ano patera asekeanafonoraka risia aporo hinamoamo, anoaki yunuraka rekenapo. Arirakano anoa paosa aporo hinamo repo, aporo hinamo metakira pasimokoanafonorakanone, aporo hinamoane repo mapakataerakanapo. ³¹ Asiamo nōmo reaki kakaro somerakaripo. Aporo hinamomo watikiaka rakirane soko, aporo hinamo meta mawakasemarako somerane soko, Kotimo mafahoasireapo. Arirakano Ho Kotesane aporo hinamo metamo mawakasemarakano, Kotimo mafahokosafapo.

³² Arirakano Aporomanomo Tákeane anopo. Anoaki aporo hinamo metamo himeteraka mawakasemarako somerakano, Kotimo eane mafahoasireapo. Arirakano Ho Kotesamo wakapuane metamo aseraka someraka, ‘Ane Satanemo wakapupo.’ Aýaka Ho Kotesane mawakasemarakano, aporo hinamo ane, yumo hauaka wo areamo soko, keseke maturikia taena maiya amo soko, Kotimo mafahokosafapo.” Aýaka Yasumo somesapo.

Ira wateane Yasumo takumeaka somesane oyapo.

Ruki 6:43-45

³³ Yasumo someraka, “Ira kotesamo ira wate kotesa perapo. Arirakano ira watikisamo ira wate watikisa perapo. Ira wate aseraka ira namoane hemakapurapo. ³⁴ Asiamo re heseke ayireapo. Re watikiaka risike repo mayiáka koteaka somehokosare? Aporo hinamomo himua makesane akai aeyaka tonoherapo. ³⁵ Mahimura makatane himumo hemakapurapo. Aporo kotesamo himumo koteaka hemakapuraka akaimo kekemaraka koteaka somerapo. Aporo watikisamo himumo watikiaka hemakapuraka, akaimo kekemaraka watikiaka somerapo. ³⁶ Asiamo hukurukua takekepa parakuna maiya amo, aporo hinamomo nenakamaka somesa akipoko Kotimo aporo hinamoaki kaiyakosapo. Kaikia iane parakuhokosapo. ³⁷ Parakuanamo aporo hinamo metakiramo ipi some ana yiamo, eaki fanasina hauaka á pusiehokosapo. Arirakano aporo hinamo metakiramo soko ipi akaimo some ana yiamo, hepene yapura hisiehokosapo.” Aýaka Yasumo somesapo.

“Kotimo wakapumo hemakapukua rakirane isuaki tarinie.” Aisane oyapo.

Maka 8:11-12; Ruki 11:29-32

³⁸ Kotimo somemane tisa aporomo soko, Fereze aporomo soko, Yasuaki someraka, “Tisao, ne Koti aeyaka pesarihoamo isiapo hemakapukusakipoko, Kotimo wakapumo hemakapukua rakirane nōmo rakinie. Rakirakano isiapo aseakoripo.”

³⁹ Airakano Yasumo someraka, “Maiya omo aporo hinamo watikiaka risike Kotiaki himu hakásaraka hemakapurafaraka metaki mokome hemakapuraka someraka, ‘Isiapo aseako Kotimo wakapumo hemakapukua rakirane nōmo rakikitakae.’ Airakano repo someane nōmo kakimaka rakiakosafapo. Yonaki makata tarisiane hákasa reaki tariakosapo. ⁴⁰ Asiamo Kotimo some kará porofete aporo Yona pokoa kára tūa, sere isiamo soko, ere isiamo soko, kayapo. Yona pokoa tua kaya ayiáka Aporomanomo Táke anoane hauaka atura sere isiamo soko, ere isiamo soko, ayiáka rekeakosapo.

⁴¹ Arirakano Yonamo Kotimo someane some karakano, Ninefa aporo hinamomo namina watikisane metakarikia risikiako parisapo. Asiakipoko Kotimo hukuarura maiyamo,

Ninefa aporo hinamoamo, aporo hinamo maiya omo watikiaka risiasamo ipu watikisane tarikia somehokosapo. Asiamo repo makata watikisane metakarianafonosakipoko, ipu reane hukurukusapo. Arirakano Yona makama kesekesane anopo. Ano pekea some karakano, maiya omo aporo hinamomo makata watikisane metakarirakarifapo.

⁴² Arirakano Soromonemo koteaka hemakapukua somesane kaiyako, ketaya takua hauaka yameno aeyaka hinamo kuini ane pesapo. Asiakipoko Kotimo hukuarura maiya amo, aporo hinamo maiya omo risiamo nōmo someane kakimakanafonosa aki, hinamo kuiniamo iane hukurukusapo. Arirakano Soromone makama kesekesane anopo. Ano maiya yumo aporo hinamoyaki hakāsa reke, Kotimo someane some kayane repo kairakarifapo." Aíyaka Yasumo somesapo.

Yatafu pariperane oyapo.

Ruki 11:24-26

⁴³ Yasumo someraka, "Yatafumo aporo ho masane metakarikia pukua hauaka porrasakipoko á koraka rerapo. Koraka reke e ape wakakosa soko, e fenekea kakakosa soko, koane fasekeno ⁴⁴ ipi hemakapuraka, 'Aporo tūra ape ayiáka waka reane metakarikia pusuasamo, á rekeako paripurakapo.' Aíyaka paripekea aseane aporo tūra ape ayiáka feaosa kakamasa makata su kotesekeno aserapo. ⁴⁵ Asekea ipi yatafu táke yatipinusu pasimorapo. Yatafu yatipinusu pasimosa amo, yatafu fana reamo watikisane marokeraka, ipu namo kakaro kára watikiaka rakirapo. Iane pasimokoa pekea, aporoamo tūra apea ayorora ayiáka yorokoa risirapo. Risikirakano aporoane namo kakaro watikiaka rerapo. Fana yatafu hakāsa rea maiya amo, aporoamo watikisane wakasemanapo. Arirakano kari suane pekea risikirakano, aporoamo watikisane káranapo. Aina ayiáka maiya omo aporo hinamo risiamo watikiaka rakirakano iaki ayiakakosapo." Aíyaka Yasumo somesapo.

Yasumo ipi kaīyia soko ipi mamanea soko pesane oyapo.

Maka 3:31-35; Ruki 8:19-21

⁴⁶ Yasumo aporo suaki some karaka rea maiya amo, ipi kaīyia soko, ipi mamanea soko pesapo. Pekea hauaka moroa risike ipu someraka, "Isiapo Yasuaki makata somehokoripo." ⁴⁷ Aíyaka somerakano aporo metamo kaikia Yasu ape kakarua reakipoko someraka, "Nōmo ní amamo soko, ní maemo soko, neaki makata somehoko pekea, hauaka moro atura arisie." ⁴⁸ Airakano Yasumo eaki someraka, "Nōmo ama epare? Nōmo mae epare?" ⁴⁹ Aíyaka Yasu ipia paosa aporo hinamo sarimasaki hokonomo tariraka someraka, "Nōmo ama soko, nōmo mae soko, re atoa ayapo. ⁵⁰ Asiamo aporo hinamomo nōmo Ata hepene yapura reamo hemakapusuane kekemaraka rakirakano aporo hinamoane nōmo mae, nōmo papā, nōmo ama ayapo." Aíyaka Yasumo somesapo.

13

Makata mano potesa Yasumo takumeaka somesane oyapo.

Maka 4:1-9; Ruki 8:4-8

¹ Sere amo Yasu apeane metakarikia pukua he fua kayapo. ² Kayakipoko, aporo hinamo yakai sarimaraka hauaka taperakano, Yasu takahikia pukua kasua kake, aporo he fua risiaki makata somesapo.

³ Some yakai takumeaka epo somesapo. Epo someraka, "Aporomo makata mano poterape pusuapo. ⁴ Poterape pusua maiya amo, makata mano metakira ikia kara hurupepesapo. Hurupepesane menamo nesapo. ⁵ Arirakano makata mano metakira eke kima hauaka wakasemasakipoko hurupepesane, foaka tanehekea pikinu koteaka pusuafapo.

⁶ Pikinu koteaka punafonoraka, maíyamo ruraka sisipuraka yoferaka kukua kesapo.

⁷ Arirakano makata mano metakira, makata mano keta risia arakarua hurupepesapo. Hurupepesane makata mano keta risia akiyaki hakāsa tanehesapo. Tanehenaka makata keta risiane popakeraka makata manoane karotapiraka serekесапо.

⁸ Arirakano makata mano metakira hauaka kotesakipoko hurupepesane tanehekea wate pesapo. Wate peraka, metakira wate wane harote su (100) pekea, metakira wate

sekeseti su (60) pekea, metakira wate teti su (30) pekea, ayíáka pesapo. ⁹ Re senaki risiamo kairaka koteaka kaisie.” Aíyaka Yasumo somesapo.

Maiya suamo Yasumo takumeaka susu somesane oyapo.

Maka 4:10-12; Ruki 8:9-10

¹⁰ Aporo hakása pura pekea Yasuaki kairaka, “Marirakano nómó aporo suaki takume susu somerakanare?” ¹¹ Airakano Yasumo someraka, “Repo kaiyisimo Koti unihaeaka rea mahamesane some kepoane yumo reaki hufitaeaka somerakanapo. Arirakano aporo suaki some kepoane hufitaeaka somerakanafapo. ¹² Koti unihaeaka reane some kepoane repo hemakapurakanapo. Hemakapurakano reaki makata meta soko tariakosapo. Tarirakano repo hemakapusuane karahokosapo. Arirakano aporomo kepo hemakapunafonoraka, fana kaisiane soko meraruhokosapo. ¹³ Ipu himo aseraka asekeea, kepoane koteaka hemakapurafapo. Ipu senakimo kairaka kaikia, himumo koteaka hemakapurafapo. Asiamo iaki takume susu somerakanapo. ¹⁴ Ipu hemakapunafonoraka kakipayasane kakipayahoasiraka wate fana Kotimo some kará porofete aporo Aesayamo someraka, ‘Ipu kairaka kaiyakosapo. Kaisia nine kepoane hemakapukusafapo. Ipu aseraka aseakosapo. Asesa nine kepoane koteaka hemakapukusafapo. ¹⁵ Asiamo aporo hinamo suane himu mahimeteraka risikinapo. Ipu himo aserapaka hikumisiapo. Ipu senakimo kairane kaiyako hisiraka senaki tisapo. Ipu himumo hemakapuko hisiraka koteaka hemakapurakanafapo. Ipu himu watikisane nómó mafahoasimo i anoaki risikiako parirakanafapo.’ Aíyaka Aesayamo somesane faserepesa ayareapo. *(Aisaia 6:9-10)*

¹⁶ Arirakano repo himo aseraka asekeea hemakapurakanapo. Repo senakimo kairaka kaikia hemakapurakanapo. Asiasamo seseraka risikianie. ¹⁷ Nómó reaki kakaro somer-akaripo. Repo makata asesane Kotimo some kará porofete aporo yakaimo soko, Koti hemakapura aporo ereketaeraka risiamo soko, ipu aseakoripo aisa nine, ipu asesafapo. Repo makata kaisiane ipu kaiyakoripo aisa nine, ipu kaisiafapo.” Aíyaka Yasumo somesapo.

Makata mano potesa takume kepoane oyapo.

Maka 4:13-20; Ruki 8:11-15

¹⁸ Yasumo someraka, “Repo hemakapusimo makata mano potesa takume kepoane oyapo. ¹⁹ Makata mano ikia kara hurupepesa ásiáne oyapo. Aporo hinamoane Kotimo unihaeaka asekeea rekenapo, aisane aporomo kaikia kepoane koteaka hemakapunafonorakano, some kaisiane Satanemo foaka hakimarapo. ²⁰ Arirakano makata mano eke kima hurupepesa pikinu ²¹ koteaka punafonona ásiáne oyapo. Aporo hinamomo Kotimo someane wate foaka kaikia seserakao ayíáka, namo kakaro kakimarafapo. Kakimakanafonoraka maiya wakasemamo kakimaka risiakipoko, keseke makata watikisa fasereperakano soko metao, aporo metakiramo Kotimo some kakimasa aporo hinamoaki mokoatikirakano soko metao, arirakano asekeea Kotimo some kaisiane foaka metakarirapo.

²² Arirakano makata mano keta risiakipoko arakarua makata mano hurupepesa, wate koteaka peanafonosa ásiáne oyapo. Aporo hinamomo Kotimo someane kairaka yia, hauaka wo makata tomekesa hemakapuramo soko, makata kemo kára mokoa seseraka hemakapuramo soko, tetá amo Kotimo someane karotapirapo.

²³ Arirakano makata mano hauaka kotesakipoko hurupepesa wate sakepamo pesa ásiáne oyapo. Aporo hinamomo Kotimo someane kakimaka namo kakaro himu hakásaraka hemakapukua risikino, ira wate wane harote su (100) apera ayíáka risirapo. Arirakano metakira sekeseti su (60), arirakano metakira teti su (30) ayíáka apera ayíáka, aporo hinamoane ayíáka risirapo.” Aíyaka Yasumo somesapo.

Koane soko kerewa soko sarimaraka tanehesane Yasumo takumeaka somesane oyapo.

²⁴ Yasumo aporo hinamo suaki takumeaka someraka, “Kotimo unihaeaka asekeea rea ásiáne oyapo. Aporomo koane mano kotesa hemoa potesapo. ²⁵ Poteraka marekeea ereamo aporo su wasakipoko yunu aporo peraka koane potesakipoko kerewa hae

poteraka marekea pusuapo. ²⁶ Pusuakipoko makata mano potesane tanehekeea wate apera maiya amo aseane, kerewa soko koaneyaki hakāsa tanehekeea wate perakano asesapo.

²⁷ Aseraka aporo raipamo pekea hemo wafayaki someraka, ‘Unihaeo, nōmo hemoa koane mano hakasa potesare? Koane mano hakasa potesakipoko mayiáka kerewane hakāsa tanehesare?’ ²⁸ Airakano hemo wafayamo someraka, ‘Yunu aporomo tau pekea kerewa hae ane, koane hemoa potehoareapo.’ Airakano aporo raipamo hemo wafayaki kairaka, ‘Kerewane fikia mokoatehoare? Kerewane mayiakaere?’

²⁹ Airakano hemo wafayamo someraka, ‘Wae, repo kerewane fikia mokoateraka, koane ane hasaka rakare mokoatenapaka kerewane fiakopo. ³⁰ Hakāsa su yaiya risikiasimo metakarinie. Keseke namosekeno nako tuamora maiya amo, aporo raipaki nōmo someraka, “Kerewane fana popateraka faturaka ira paityako taeraka marekea, koane namoane tukua apea taerasie,”’ aihokosapo.” Aíyaka Yasumo takumeaka somesapo.

Ira máseta hae maposa Yasumo takumeaka somesane oyapo.

Maka 4:30-32; Ruki 13:18-19

³¹ Aporo hinamo suaki Yasumo takume meta someraka, “Aporo hinamo Kotimo unihaeaka asekea reane, ira maseta hae aporo metamo ipi hemoa maposa asíapo. ³² Maseta hae kakaro wakasema yiamo, pauaka henaka hemoa makata porosane marokeraka ira pariraka káranapo. Káraraka reakipoko ira eya mena koraka torane pekea, menamo ape kirapo. Aina ayiáka aporo hinamo Kotimo unihaeaka asekea reane asíapo.” Aíyaka Yasumo somesapo.

Farawa pirirane Yasumo takumeaka somesane oyapo.

Ruki 13:20-21

³³ Yasumo takume meta someraka, “Aporo hinamo Kotimo unihaeaka asekea reane, farawa pirira asíapo. Hinamomo farawa paityakosakipoko farawa tarámo hakāsa maka makata pirirayaki sarimaraka kekerorakano, makata piriramo farawane hemakapuka pirirapo.” Aíyaka Yasumo somesapo.

Aporo hinamo suaki Yasumo takumeaka somesane oyapo.

Maka 4:33-34

³⁴ Yasumo somesa maiya amo aporo hinamo yakai sarimasaki Yasumo takumeaka someraka, kakaro hufitaeraka somesafapo. Takumeaka susu somesapo.

³⁵ Somehoasiraka wate fana Kotimo some kará porofete aporomo Yasuane somesane oyapo. Unihaemo ipi someraka, “Aporo suaki nōmo takumeaka somehokosapo. Hauaka kepomaresa maiya amo makata mahamesane, yumo some kepo su kakaro feakataeraka somerakanapo,” Aisane faserepesa ayareapo. *(Buk Song 78:2)*

Koane soko kerewa soko sarimaraka tanehesane takume someamo kepoane oyapo.

³⁶ Aporo hinamo yakai sarimasane, Yasumo metakarikia pukua apea yorosapo. Yorarakano aporo hakāsa pura pekea Yasuaki someraka, “Hemoa kerewa soko, koaneyaki hakāsa tanehesa takume someamo kepoane isuaki hufitaeraka somesie.”

³⁷ Airakano Yasumo someraka, “Koane mano kotesa hemoa potena aporoane anopo. Aporomanomo Tákeane anopo. ³⁸ Asiamo hemo asíane hauaka kára oyapo. Koane mano kotesa asíane Koti unihaea paosa aporo hinamopo. Kerewa hae asíane Satanea paosa aporo hinamopo. ³⁹ Yunu aporomo kerewa hae potesa asíane Satanepo. Wate namosekeno tuamora ayiáka, hauaka one fa ana sere amo ayiakakosa ayapo. Aporo raipamo kerewane popateraka, koane namoane tukua apea taehokosa aporoane hepene aporopo.

⁴⁰ Kerewa faturaka iramo apaira ayiáka, keseke hauaka one fa ana maiya amo ayiáka paityakosapo. ⁴¹ Aporomanomo Tákeane anopo. Nōmo hepene aporo pusierakano peraka, aporomo watikiaka rakisimo kirimana aporoane soko, watikiaka rakira aporoane soko, su mokoa iramo inakasimo ira á mokoasuhokosapo. ⁴² Mokoasusa á i fanasiraka risike hihiripuraka akai kirisiraka risikiakosapo. ⁴³ Maiya amo sere maiya sesakereraka

faeana ayíáka ereketaeraka risia aporo hinamoane Ata unihaeaka reamo hauaka á ayíáka faehokosapo. Re senaki risiamo kairaka koteaka kaisie.” Aíyaka Yasumo somesapo.

Yasumo takume metakira somesane oyapo.

⁴⁴ Yasumo takume meta someraka, “Kotimo aporo unihaeaka asekea reane, makata namo kakaro kotesa mahimuna makatane maua kekeea, hemoa kokomaresa ásiapo. Aporo meraruamo peane, makata namo kakaro mahimuna makatane asekea, himu faraka epo yia mokosekesapo. Mokosekeraka marekea pukua, kára seseraka ipi makata kemo su mokoa aporo metaki roporaka mone mosapo. Mone mokoa moneamo hemoane roposapo,” aíyaka Yasumo somesapo.

⁴⁵ Arirakano Yasumo takume meta soko someraka, “Kotimo unihaeaka asekea reane, pisinisi aporomo sekete kotesa ropohoko kope pura ásiapo. ⁴⁶ Pisinisi aporoamo sekete kope pukua sekete namo kakaro kotesa aseraka ropohoko, ipi makata kemo su mokoa aporo metaki roporaka mone mosapo. Mone mokoa moneamo seketeane roposapo.” Aíyaka Yasumo takumeaka somesapo.

Kasipu pokoa morane Yasumo takumeaka somesane oyapo.

⁴⁷ Yasumo takume meta someraka, “Kotimo unihaeaka asekea reane kasipu pokoa mora ásiapo. Pokoa mokoakosakipoko kasipu hea kokomaresapo. Kokomaresa á pokoa kekepo kekepo suane kesekeno mosapo. ⁴⁸ Mosane komarusekeno aporomo kasipuane maka, he fea motokoa marekea toke, pokoaane parakusapo. Parakuraka pokoa kotesane mokoa kasu tisia taeraka, pokoa watikisa nanafononane mokoatesapo. ⁴⁹ Asia ayíáka keseke hauaka one fa ana maiya amo ayiakosapo. Aporo kotesayaki watikisayaki suasuaraka risiane hepene aporomo parakuhokosapo. Aporo hinamo watikisane parakuraka mokoa, iramo inakasimo mokoasuhokosapo. ⁵⁰ Mokoasusane fanasina hauaka á risike hihiripuraka akai kirisiraka risikiakosapo,” aíyaka Yasumo somesapo.

⁵¹ Asiamo Yasumo ipi aporo hakása puraki someraka, “Nōmo reaki somesane su hemakapurakarire?” Airakano ipu “Ao, hemakapurakaripo,” aisapo. ⁵² Airakano Yasumo some meta someraka, “Nōmo Koti unihaeaka asekea reane somerakano, Kotimo somemane tisa aporomo kakimaka anoa paosa aporoane ape wafaya ásiapo. Asiamo ape wafayamo makata kemo kotesa taesane mokoa, kawe taesane soko, fana taesane soko, mokoa aporoaki karápo. Akara ayíáka Kotimo somemane tisa aporomo kakaro some kawe kaisiane soko, fana kaisiane soko some karápo.” Aíyaka Yasumo somesapo.

Yasumo ipi Nasare apea some karakano aporomo kakipayasane oyapo.

Maka 6:1-6; Ruki 4:16-30

⁵³ Yasumo aíyaka takumeaka someaka faraka Kapaneame taoneane metakarikia, ⁵⁴ Nasare apea ipi pusuapo. Pukua á reke Yu aporomo sarimana apea makata some karakano, aporo hinamomo kairaka fofasapo. Fofaraka ipu someraka, “Kotimo hemakapura some kotesane epo ma kaisiarakapo. Epo Kotimo wakapumo hemakapukua arakirane ma enomasarakapo. ⁵⁵ Aporoane ipi kapenetamo hokosapo. Ipu kaíyiane Mariapo. Arirakano ipi mamaneane Yameise soko, Yosefe soko, Saemone soko, Yutase soko ipo. ⁵⁶ Ipi ifia isuyaki hakása tokenapo. Ipu tako ayíáka rakirakarifapo. Epo hákasa wakapuaka arakirane ma enomasarakapo,” aisapo.

⁵⁷ Aíyaka ipu Yasuaki himu hakásaraka hemakapunafonoraka fasikia risiapo. Fasikia risikino Yasumo iaki someraka, “Kotimo some kará porofete aporomo ipi ape sumu aporo hakása risia amo soko, ipi ape wará aporo hakása risia amo soko, eane makama fanaraka hemakapurafapo. Hemakapunafonorakano yia, ape sumu meta á aporo hinamo metakiramo Kotimo some kará porofete aporoane makama fanaraka hemakapurapo.” Aíyaka Yasumo somesapo. ⁵⁸ Someraka ipi apea aporo hinamomo eaki himu hakásaraka hemakapunafonosasamo Yasumo Kotimo wakapumo hemakapukua rakirane kára rak-isiafapo.

14

Yasumo wakapuaka rakisiane Herotemo kaikia himeteraka reane oyapo.

Maka 6:14-16; Ruki 9:7-9

¹ Yasu ipi Kariri hauaka á some karaka rea maiya amo, Kariri hauaka asekea rea aporoane Herotepo.* ² Arirakano Yasumo wakapuaka rakiraporakano, Herotemo kairaka, ipi aporo raipaki someraka, “Aporo wakapuaka rakirane Yone he tapukumarera ayarakanareapo. E rusua kusuane maturikia taerakanareapo. Maturikia taesasamo wakapuaka arakirane Yonemo wakapuaka rakirakanareapo,” aisapo.

Yone he tapukumarerane Herotemo uyáka rusua kusuane oyapo.

Maka 6:14-29; Ruki 3:19-20

³⁻⁴ Herote Kariri hauaka asekea rea aporomo ipi mamanea Firipipo. Firipimo asea Herótiasane Herotemo hakimaraka rekeno asekea, Yonemo Heroteaki hukurukua someraka, “Hinamoane nōmo hakimaraka areane somemane motosane mamosoane.” Airakano Herotemo Yoneane tipura makeako aporo terakaiyamosaki someraka, “Yoneane waseremasie.” Airakano aporo terakaiyamosamo Yoneane wasere-maka hokonoa taporaka tipura makesapo.

⁵ Tipura makekea, Yone kukusimo rukusapoko asiante, Yu aporo metakiramo somer-aka, “Yoneane Kotimo some kará porofete apororeapo.” Airakano kaikia Herotemo hemakapuraka, “Nōmo Yone rusua kurakanone, aporo yakaimo anoaki sapehoasireapo.” Aíyaka hemakapuraka aporomo eaki sapenapaka namoraka reke, Yone rukusapoko asiāne, metakarisiapo.

⁶ Metakarikia Heroteane ipi takapesa serea paurakano hemakapuko hokono keraka, aporo suamo asekeasimo Herótiasemo ipi faraya hinamo sakoramo taneseraka kesasapo.

⁷ Taneseraka kesarakano asekea, Herotemo seseraka hinamo sakoraki someraka, “Nōmo makata makasierakano, nōmo neaki makakosapo. Nōmo kakaro somehoanafonorakano soko Kotimo aseakosapo.” Aíyaka aumaraka somesapo. ⁸ Somerakano Herótiasemo ipi farayaki hkokaka someraka, “Yone he tapukumarerane wamo patekemaka, mer-akia motokoa, anoaki makasiehoanie. E kakaro rusua kusuane aseako ipi wamoane makasiehoanie.” Airakano someane ipi farayamo kakimaka Heroteaki yaiya somesapo.

⁹ Somerakano unihae Herotemo kaikia mahisiraka reapo. Mahisiraka reke epo hemakapuraka, nōmo makakosapo aíyaka aumaraka somesane, aporo hokono akera sarimasa suamo kaisiasamo, wamo patekemakaniesane metakariane, kaíyanapaka epo somesane metakarisiapapo. ¹⁰ Metakarirafaraka aporo terakaiyamosamo Yone wamo pateketaehoasimo tipura apea pusiesapo. ¹¹ Airakano tipura apea pukua Yone wamo pateketaeraka merakia motokoa maka pekea hinamo sakoraki kasapo. Karakano maka ipi kaíyia Herótiasaki kasapo.

¹² Arirakano Yonemo ipi aporo hakāsa pura peraka Yone oto susuane maka pukua hauaka marekea Yasuaki Yone rusua kusuane somehoko pusuapo.

Aporo fae taoseneaki (5,000) Yasumo farawa kasane oyapo.

Maka 6:30-44; Ruki 9:10-17; Yone 6:1-14

¹³ Yone he tapukumarerane rusua kusuaporakano Yasumo kairaka, Yasu kasua ripaka pukua, ima yaoa aporo fasakipoko ipi hāku fore rekeako pusuapo. Pusuaporakano kairaka aporo hinamo yakai ipu namina apeane metakarikia, Yasu kekemarape he fe ikia pusuapo. ¹⁴ Pukua sarimasakipoko Yasu pekea kasu karimarekea aseane aporo hinamo su sarimasekeno asesapo. Aseraka iane kamenakasapo. Kamenakaraka hemakapukua, aporo hinamo makata tasane epo mafasapo.

¹⁵ Mafaraka reke samapu maiya tuakeramo Yasuaki ipi aporo hakāsa puramo somer-aka, “Hauaka wo ima yaosakipoko aporo hinamo risikinapapo. Maiya tukesasamo aporo hinamo sarimasaki ipu namina makata nakosa ropohoko apea poparipusiesie.”

¹⁶ Airakano Yasumo someraka, “I pusierakane marirakanore? Repo namina iaki makata

* 14:1: Yasu takapesa maiya amo Herote rea ayafapo.

nakosa kakanie.” ¹⁷ Airakano aporo hakāsa puramo someraka, “Makata nakosa farawa kakoreasu, pokoa tetá ayiáka tokenapo. Makata meta kakenafapo.”

¹⁸ Airakano Yasumo someraka, “Makata nakosane anoaki makasie.” ¹⁹ Aiyaka aporo hinamo suaki Yasumo someraka, “Re su asanea toae.” Aiyaka i toakipoko farawa kakoreasu pokoa tetá mokoa reke, hepene yapura asekea, Kotiaki suseraka kurikuriraka faraka, farawa mosoraka aporo hakāsa puraki karakano, aporo hakāsa puramo aporo hinamo suaki kasapo. ²⁰ Karakano aporo hinamo suamo siaraka nesapo. Nekea faraka farawa soko pokoa soko momo yia tokeno, aporo hakāsa puramo mate kenosua kekea komarusuapo. ²¹ Aporo makata nesa susuane menoraka fae taosenepo (5,000). Hinamo soko hokosa soko i suane menosafapo. I menohoa nafonosamo soko, ipu suamo nesapo.

Yasu he kima finiraka pusuane oyapo.

Maka 6:45-52; Yone 6:16-21

²² Aporo hinamo suamo makata nekea farakano, Yasumo ipi aporo hakāsa puraki someraka, “Re fana kasua ripaka he fe taku ra hisie. Arirakano aporo hinamo sarimasane ipu namina apea poparipusie, aihoko ano fore o rekenapo.” Airakano i kasua ripaka hisiapo. ²³ Hisiakipoko aporo hinamo su sarimasane soko namina apea poparipusuapo. Poparipusuakipoko Yasu ipi haku ūria kurikurihoko hisiapo. Hikia ereamo Yasu ipi haku kurikuriraka reapo.

²⁴ Kurikuriraka reakipoko aporo hakāsa pura kasua ripaka he numua puane, he kupamo kasu unia ruraka he kupa atifoyaki kára peraka kasu maka paripurakanoraka kasu roane pusuafapo. ²⁵ Kasu roraka risike, yao fia makehoramo Yasu ane kasu tapukurea makeraka he kima finirape pesapo. ²⁶ Perakano aporo hakāsa puramo asekea namo kakaro himu faraka toke kokoaeraka wáraka, “Yakasa ho apere.”

²⁷ Aiyaka namoraka wárakano iaki Yasumo wate foaka someraka, “Anopo. Re namohokopo. Namoraka himu haruhokopo. Paroaka riskianie.” ²⁸ Airakano Pitamo someraka, “Unihaeo, nere? Nesekeño nómō anoaki he kima finirape peaiesie.” ²⁹ Airakano Yasumo someraka, “Ne peae.” Aiyaka somerakano Pitamo kasu metakarikia, Yasu rea he kima finirape puraka ³⁰ kaiyíane, atifomo e kaua rurakarakano kaisiapo. Kairaka namoraka e hea keneperakarakano wáraka, “Unihaeo, ano masie.”

³¹ Airakano wate foaka Yasumo hokonomo Pita maka someraka, “Nómō anoaki himumo hakasa wakasemaraka hemakapureapo. Nómō hemakapuraka, ‘Sia puraka soko metao, hea keneperaka soko metao ayakanarakapo.’ Aiyaka marirakano himu tetáraka hemakapurakanare?”

³² Aiyaka tetá kasua parohoane atifo fasapo. ³³ Farakano asekea aporo kasua toamo Yasuaki kekereraka someraka, “Né kakaro Kotimo hokosapo.” Aiyaka kekereraka somesapo.

Kenésare hauaka á aporo hinamo risia makata tasane Yasumo mafasane oyapo.

Maka 6:53-56

³⁴ He kekeia kaya kasu rokoia teraporaka, Yasu soko, Yasumo ipi aporo hakāsa pura soko, kasu rokoia pukua, Kenésare hauaka á pausapo. ³⁵ Paurakano aporomo aseraka hemakapuraka, “Ane Yasureapo.” Aiyaka hemakapukua some mareraka, “Yasu pesane hauaka makea somehoko pusie.” Aiyaka some marerakano pukua somesapo. Somerakano kaikia aporo hinamo su makata tasane Yasumo mafahoasimo karikia pesapo.

³⁶ Karikia pesa aporoamo Yasuaki someraka, “Aporo hinamo makata tasamo nómō pasu ke huhua sakaihoane siahoasiskeno aosie.” Airakano Yasumo aosapo. Aoraka epo pasu huhuane aporo hinamo makata tasamo sakaihoane ipu makata tasane fasapo.

Makasa kaua kekemamo someamo Kotimo someane matekeamenane oyapo.

Maka 7:1-13

¹ Ferese aporomo soko, some mane tisa aporomo soko, Yarusarame sitiane metakarikia Yasu rea pekea kairaka, ² “Marirakano nómō aporo hakāsa puramo isiapo makasa

kauamo ayakanie, aíyaka somepe pesane koaretaeraka risikinare? Koaretaeraka, ipu makata nakosakipoko hokono kusurakarifapo. Hokono kusunafaraka makata maka anene.”

³ Airakano Yasumo iaki kairaka, “Marirakano repo makasa kaua kekemamo ayikanie, aíyaka somepe pesane mafanahokosakipoko, repo Kotimo somemane koaretaeraka risikinare? ⁴ Kaisie. Kotimo somemane motosane oyapo. Kotimo someraka, ‘Ni Atape ama tetāne koteaka hemakapukua makotehoanie,’ aisapo. (*Kisim Bek 20:12; Lo 5:16*)

Kotimo somemane meta soko someraka, ‘Aporomanomo ipi atane soko metao, ipi amane soko metao, yakasa ho mareraka ekenerakano e kakaro kukusimo runie.’ (*Kisim Bek 21:17; Wok Pris 20:9*)

Aíyaka Kotimo somesa nine ⁵ repo someraka, ‘Aporomo ipi ataki soko metao, ipi amaki soko metao, someraka, “Nōmo tetoaki makata yaku kakakosapoko asiāne, nōmo metakarikia Kotiaki karakanapo.” Aisa aporoamo ipi ata ama tetāne makotehoanie aíyaka Kotimo somemane motosane metakarikia koaretaenane siareapo.’ Aíyaka repo Kotimo somemane ane mawakasemarakanapo.

⁶ Aíyaka repo namina makasa kaua kekemamo ayikanie, aíyaka somepe pesane mafanahokosakipoko, Kotimo somemaneane repo some sesekeraka akaye. Some sesekeraka kake, repo atape ama tetāne asekeea rekeakosane metakarirakanapo. ⁷ Re himu tetáraka arisie. Wate fana Kotimo some kará porofete aporo Aesayamo reane kakaro somesapo. Somesane oyapo.

⁸ Kotimo someraka, ‘Aporoamo anoaki akaimo kekereraka yia himumo anoaki hemakapurakanafapo. ⁹ Himumo anoaki hemakapunafonoraka, nena akai susuamo anoaki kekerenapo. Ipu namina aporomanomo hemakapusuane some karakanapo. Some karakayia nōmo somemaneane ipu some karakanafapo.’ Aíyaka Kotimo somerakano Aesayamo popasapo.” Aíyaka Yasumo somesapo. (*Aisaia 29:13*)

Aporo hinamo himu mawatikinamo kepoane oyapo.

Maka 7:14-23

¹⁰ Aporo hinamo su sarimahoasimo Yasumo peaeaka perakano iaki someraka, “Kaisie. Kaikia hemakapunie. ¹¹ Aporomo soko, hinamomo soko ipi akaimo makata anenamo ipi yia mawatikinafapo. Arirakano akai aeyaka some watikisa tonoaheramo ipi yia mawatikinapo.” Aíyaka Yasumo somesapo.

¹² Keseke e rea ipi aporo hakāsa pura pekea eaki someraka, “Nōmo some karakasuane, Fere se aporomo kaikia mahisisapakae. Nōmo kaisiare?” ¹³ Airakano Yasumo someraka, “Makata mano porosane nōmo Ata hepene yapura reamo poroanafonosane su fiakosapo.

¹⁴ Asiamo aporo hi taku tetákara fausamo ikia kara atarira aiyáka, Fere se aporomo aiyáka tarirakanapo. Aporo hi taku tetákara fausamo aporo hi taku tetákara fausa metane karikia purakano, tetā tetákara kutua etehokosapo. Anapaka re Fere se aporoyaki paohokopo.”

¹⁵ Airakano Pitamo someraka, “Takume kepoane isuaki somesie.” ¹⁶ Airakano Yasumo someraka, “Repo kepoane yaiya hemakapurakarifare? ¹⁷ Makata nesane katukunu pukua katukunu aeyaka fako otoa pukua fakonapo. ¹⁸ Arirakano himumo watikiaka hemakapusuane akaimo soko watikiaka someanamo, ipi yia mawatikinapo. ¹⁹ Asiamo aporo hinamo himua makata watikiaka hemakapukua risirane oyapo. Watikiaka hemakapurane soko, aporomano rusua kukuko hemakapurane soko, hinamo hakimako hemakapurane soko, aporo rea puko hemakapurane soko, makata kemo hakimako hemakapurane soko, kotafe topakamaraka somehoko hemakapurane soko, aporomano hokomaka somehoko hemakapurane soko, makata ane himua risiane akaimo somerapo. ²⁰ Makata amo aporomano ipiane mawatikinapo. Asiamo makata nako hokono kusuhoanafononamo aporomano ipiane mawatikinafapo.” Aíyaka Yasumo somesapo.

Yu aporohoanafonosa hinamomo Yasuaki himu hakásaraka hemakapusuane oyapo.

Maka 7:24-30

²¹ Yasumo soko ipi aporo hakāsa puramo soko, apeane metakarikia puraka, Yu aporo-hoanafonosamo hauaka á, pukua Taia taoneane soko, Saetone taoneane soko, makeraka pusuapo. ²² Pukua á reakipoko Yu aporo-hoanafonosa hinamo, Kenane aporo ira wainepe pesa hinamo ane kayapo. Hinamoane Yasu rea peraka paroaka someraka, “Tefetemo aporo ira Unihaeo, nómō ano kamenakaraka ararerasesie. Nómō hinamo hokosa yatafumo ho masa mokoatikisane kárapo.” Aíyaka hinamoamo somesapo. ²³ Aíyaka somerakano yia Yasumo eaki makata meta somesafapo. Somehoanafonoraka Yasu purakano, ipi aporo hakāsa pura pekea eaki efera hunia soko, efera hunia soko paroaka someraka, “Hinamoane isu kekemerape peraka wáka kikirape apere. Hinamoamo hokosane ararerasesie airakane nómō ararerasesie. Arareraka ipi paripusiesie.” ²⁴ Airakano Yasumo someraka, “Yu aporo suane saro sipi rosaka tarisia asíapo. Asiasamo Yu aporo hinamo hákasa ararehoko Kotimo ano pusierakasupo. Yu aporo-hoanafonosane ararehoko ano pusierakasufapo.” Aíyaka Yasumo somesapo. ²⁵ Somerakano Yasu rea hinamoane pekea kakuna porokoa kake someraka, “Unihaeo, ano ararerasesie.” ²⁶ Airakano Yasumo someraka, “Hókosamo makata nakosane kásamo nasimo mamakatehoane siahoasisfareapo.” ²⁷ Airakano hinamoamo someraka, “Unihaeo, kakarorakae. Asiāne ape wafayamo ape teporo aeyaka makata nenaka momo hurupeperakano, kásamo soko nenapo.” ²⁸ Airakano Yasumo someraka, “Hinamo, nómō anoaki himu hakásaraka hemakapurane kárapo. Nómō hemaka apura ayiáka nómō ayiakakosapo.” Aihoanine hinamo hokosa yatafumo ho masane fasapo.

Aporomano yakai makata tasane Yasumo mafasane oyapo.

²⁹ Yasumo Yu aporo-hoanafonosamo hauakane metakarikia pukua, he Kariri he fua pusuapo. Pukua ūria hikia kayapo. ³⁰ Kayakipoko aporomano yakai peraka, aporomano korake matipusa soko, aporomano hokono narisa soko, aporomano hi fausa soko, aporomano me fasa soko, aporomano metakira makata tasane soko mokoa pesapo. Mokoa pekea Yasu rea kumisi nenemea mokoa pekea taerakano, Yasumo asekeea aporo hinamo makata tasa suane epo mafasapo. ³¹ Asiamo aporomano me fasa mafasamo koteaka somesapo. Hokono narisa mafasane hokono koteaka raesapo. Korake matipusa mafasane koteaka koraka risiapo. Hi fausa mafasamo koteaka asesapo. Ayiáka aporomano suane Yasumo mafasapo. Mafrakanano aporomano sarimasamo asekeea fofarakia yia sesesapo. Seseraka Isiraya aporo hinamomo Kotiane kekeresapo.

Aporo fo taoseneaki (4,000) Yasumo makata nakosa kasane oyapo.

Maka 8:1-10

³² Yasumo ipi aporo hakāsa puraki makata somehoko peaeraka perakano, iaki someraka, “Sere isiamo aporo hinamo yakai anoyaki sarimaraka risike, makata nakosane fapo. Fasasamo nómō iane kamenakaripo. Iane himu raru ikia kara meamoraka yofenapaka pusiehoko hisiripo.” ³³ Airakano aporo hakāsa puramo someraka, “Isu arisia one ima yaosasamo aporomano sarimasaki farawa siaraka nasimo kakakosane ma mokoakosare?”

³⁴ Airakano Yasumo iaki kairaka, “Repo farawa yakapusu tokenare?” Airakano ipu someraka, “Farawa yatipinusu pokoa fete hukusi tokenapo.” Aíyaka ipu somesapo.

³⁵ Aíyaka somerakano aporo hinamo suaki Yasumo someraka, “Re su hauaka á toae.” ³⁶ Aíyaka i tokeno, farawa yatipinusu, pokoa hukusi soko Yasumo mokoa, Kotiaki suseaka kurikuriraka faraka, farawa mosoraka aporo hakāsa puraki karaka rekeno, ipu aporo hinamo su sarimasaki takupe pusuapo. ³⁷ Takupe pukua faraka aporomano su sarimasamo siaraka nesapo. Nekea siarakano farawa momoane aporo hakāsa puramo mokoa, mate yatipinusua kekea komarusuapo. ³⁸ Arirakano aporo farawa nesa susuane menosane fo taoseneapo (4,000). Arirakano hinamo soko, hokosa fete soko, iane menosafapo. I menohoanafonosamo soko makata ane nesapo. ³⁹ Nekea faraka aporomano yakai sarimasane Yasumo pusiesapo. I purakano Yasu kasua ripaka kasu rokua Mákatane hauaka á pusuapo.

16

Ferese aporo Satusi aporo ipu Yasu kau aseakosakipoko Yasumo rakisimo somesane oyapo.

Maka 8:11-13; Ruki 12:54-56

¹ Yasu reakipoko Ferese aporo soko, Satusi aporo soko pekea, ipu Yasu kau aseakosakipoko Yasuaki mokopipiraka somesapo. Ipu someraka, “Kotimo murikimasane nereapo aihoko nómo rakirane isiapo aseako nómo rakikitakae. Kotimo hepene yapura makata ainane isiapo aseako nómo rakikitakae.” ² Airakano Yasumo someraka, “Samapu maiya tuakeramo ti surakano aseraka repo someraka, ‘Kupa kakasireapo,’ airapo. Arirakano sere metamo mituru fiarakano aseane ti kokorasakipoko katorakano aseraka repo someraka, ‘Pipu yao peasireapo,’ airapo.

³ Aíyaka repo ti aseraka yao peakosane soko, yao kotehokosane soko, repo aseraka takekeea hemakapurapo. Ane aseraka hemakapura yaiya maiya omo Kotimo wakapumo hemakapukua rakirane rakirakano asekea, ‘Kotimo murikimasa aporoane ereapo.’ Aíyaka repo hemakapurakarifapo. ⁴ Aporomanomo someraka, “Kotimo murikimasa aporoane nesekenone, isiapo aseako Kotimo wakapumo hemakapukua rakirane rakikitakae. Ayíáka rakirane aseako kope apura maiya amo aporo hinamo risiane watikiaka risikinapo. Aporo hinamoamo Kotiaki hemakapurakanafapo. Arirakano Yonamo Kotimo rakira rakisimo Kotimo murikimasapo. Murikimasane aporo hinamo suamo asekea hemakapusimo Yonaki asia ayíáka anoaki soko ayiakakosapo.* Ayiakakosa hákasane repo asekeasimo tariakosapo. Makata meta reaki tariakosafapo.” Aíyaka someaka faraka Yasu rukunekeraka pusuapo.

“Ferese aporope Satusi aporo iane makata pirira asiapo. Ipu himu tetáraka hemakapusuane repo mokoakopo.” Aíyaka Yasumo somesane oyapo.

Maka 8:14-21; Ruki 12:1

⁵ Yasu soko, ipi aporo hakása pura soko, kasua ripaka rokoa teraporaka hikia, he fe taku ra risike someraka, “Isiapo farawa mokoa pesafapo. Isiapo merarusapo.” ⁶ Airakano iaki Yasumo someraka, “Ferese aporomo soko, Satusi aporomo soko, ipu makata pirira asíane repo mokoakohoamo asekeanie.” ⁷ Aíyaka Yasumo takumeaka somerakano some kepoane ipu himeteraka me rukua someraka, “Isiapo farawa mokoa peanafonosekeno airakae.”

⁸ Airakano ipu hemakapusuane Yasumo aseraka someraka, “Repo anoaki himumo hákasa wakasemaraka hemaka apure. Marirakano repo namina susu me rukua someraka, farawa fareaporakanare? ⁹ Nōmo some kepoane repo yaiya mahimeterire? Aporo fae taosene (5,000) sarimasaki farawa kakoreasu kaka faraka, farawa momo yia tokeno mate kenosua kekeea komarusuane, repo hemakapurakarifare?

¹⁰ Arirakano aporo fo taosene (4,000) sarimasaki farawa yatipinusu kaka faraka, farawa momo yia tokeno mate yatipinusua kekeea komarusuane repo hemakapurakarifare? ¹¹ Nōmo reaki namo kakaro farawa ane somehoanafonosasamo, nōmo someamo kepoane repo hemakapurakarifapo. Nōmo some kepoane úyaka somerakanapo. Ferese aporomo soko, Satusi aporomo soko, ipu makata pirira asíane mokoakohoamo asekeanie.”

¹² Airakano Yasumo someamo kepoane aporo hakása puramo hemakapuraka, “Ferese aporope Satusi aporo ipu someane makata pirira asíapo. Ipu someane isiapo kakimakohoamo Yasumo airakae. Kakaro farawa makata pirirane mokoakohoamo epo somerakarifapo,” aisapo.

“Yasu, ne Keresopo.” Aíyaka Pitamo somesane oyapo.

Maka 8:27-30; Ruki 9:18-21

* ^{16:4:} Koaretaena aporoaki Yonamo some kakako pusua ayíáka Yasuane soko, hauaka wo koaretaena aporoaki somehoko pesapo. Yonane sere isiamo pokoa tua kaya ayíáka, Yasu soko, kunikia motosane sere isiamo wareapo. Pokoamo Yona yokotaesa ayíáka Yasu soko kunikia motosane maturikia taesapo.

¹³ Yasu Sisaría Firipai taone makea peraka, ipi aporo hakāsa puraki someraka, “Aporomanomo Táke anoane aporo metakiramo epapakasure?” ¹⁴ Airakano ipu someraka, “Aporo metakiramo someraka, ‘Ne Yone he tapukumarerane turikia pureapo.’ Airakano aporo metakiramo someraka, ‘Ne Irafyareapo.’ Airakano aporo metakiramo someraka, ‘Ne Yaremayaareapo.’ Airakano aporo metakiramo someraka, ‘Ne porofete aporo metareapo.’ airakasupo.”

¹⁵ Airakano Yasumo someraka, “Repo namina hemakapusuane ano epapaka hemakapurakanare?” ¹⁶ Airakano Saemone Pitamo someraka, “Koti yaiya reramo hokusane nepo. Kotimo Unihaeaka rekeasimo murikimasa aporo Keresoane nereapo.”

¹⁷ Airakano Yasumo someraka, “Yonemo hokosa Saemoneo, Kotimo ne makoterakanapo. Makoterakano seseaka rekeanie. Nōmo hemakapukua somesane aporomanomo neaki some kasane nōmo somerakanafapo. Nōmo Ata hepene yapura reamo neaki tarirakano, nōmo aiyaka somerakae. ¹⁸ Hao, kaisie. Pita, nōmo yano motosa amo kepoane ekepo. Arirakano nōmo anoane somesane eke asiapo. Nōmo anoane somesa ayiáka, aporo hinamo metakiramo ayiáka kakimaka somerakanone, iane nōmo pasimokoakosapo. Aporo hinamoane anoa paosa aporo hinamo ayapo. Asiamo Hetisi hauaka aeyaka, kuramo wakapumo anoa paosa aporo hinamoane marutaehokosafapo. ¹⁹ Arirakano aporo hinamo Kotimo asekea reane ipu hemakapusimo, nōmo ikia koro ropakamakosapo. Ikia koro kimo ropaka amara ayiáka, nōmo anoane some kakasimo nōmo ne murikimarakanapo. Asiamo hauaka wo aporomo watikiaka rakirakano, nōmo asekea maroporaka, ‘Metakarisie,’ airakano, hepene yapura soko Kotimo ‘Metakarisie,’ airakanapo. Arirakano hauaka wo aporomo koteaka rakirakano, nōmo asekea, ‘Kotehoareapo,’ airakano, hepene yapura soko Kotimo, ‘Kotehoareapo,’ airakanapo.”

²⁰ Aiyaka Yasumo ipi aporo hakāsa puraki me paroaka someraka, “Ano Keresoane aporo suaki somehokopo.” Aisapo.

Yape menomo Yasumo someraka, “Aporomo ano kukusimo rukusapo,” aiyaka somesane oyapo.

Maka 8:31-9:1; Ruki 9:22-27

²¹ Maiya amo ipi aporo hakāsa puraki Yasumo someraka, “Ano ayikaniesasamo, Yarusarame sitia hinaka, Yu aporo sisimamo soko, pirisiti aporo káramo soko, Kotimo somemane tisa aporomo soko, ano mokoatikirakano, himu nekea kau teraka ayiáka rusua kukusapo. Rusua kusuane sere isiamo ano maturikia taehokosapo.” ²² Airakano aporo hakāsa pura sarimaraka risiane metakarikia, Pitamo Yasuane karikia wakasema pukua Yasuaki matasoraka sikiraka someraka, “Unihaeo, Neane rusua kukusapo, aiyaka somehokopo. Kotimo ne ararehoasimoripo. Nōmo airakane ayiakakohoamoripo.” ²³ Airakano Yasumo rekeako pariraka Pitaki someraka, “Sataneo. Né ano patera takua pusie. Satanemo somera aiyaka nōmo somehokopo. Kotimo hemakapusuane kekemaraka hemakapunafonoraka, aporomanomo hemakapurane nōmo kekemaraka hemaka apure. Aiyaka hemakapuraka ikia kara pukusa matasona kepoane nepo.”

²⁴ Airakano aporo hakāsa puraki Yasumo someraka, “Repo ano patera aseako ano ira paremareraka kukusimo ira matopesa nōmo nī makatiraka apura ayiáka, re soko, repo hemakapusuane metakarikia ira matopesa makatiraka puraka, ano finisa re soko fini kafo kepe punie. ²⁵ Aporomanomo hauaka wo areamo hitaferaka rekeakosane hákasa hemakapukua rakiraka rekeno, aporoane Kotiyaki yaiya rekeakosafapo. Arirakano aporomanomo metamo someraka, ‘Yasupoko ano kuane soko siahoasireapo. Epoko hákasa rakikia rekeakosapo.’ Aiyaka hemakapuraka, kurane namonafaraka rekeno, aporoane Kotiyaki yaiya rekeakosapo.

²⁶ Arirakano aporomanomo hauaka kára wo makata kemo suane mokoa sarimaraka reke, Kotiyaki yaiya rerane epo metakarikia rekeno, akura maiya amo makata yakapamo e ararehokosare? Yaiya rerane ropohoko yakapamo roponare? Wae. Yaiya rerane roponafapo. ²⁷ Atamo faesayaki hepene aporoyaki ayiáka Aporomanomo Táke anoane

paripeakosapo. Pariapera maiya amo aporo suamo makata rakisiante asekeia takeakosapo. Takekeia aporo koteaka rakisiaki makata ropo kotesa kakakosapo. Aporo watikiaka rakisiaki makata ropo watikisa kakakosapo.²⁸ Nōmo reaki kakaro somerakaripo. Re metakira yumo risiane kukusiraka aseane, Aporomanomo Táke anoane peraka unihaeaka rekeno aseakosapo.” Aíyaka Yasumo somesapo.

17

Yasu kau hakuraka faesane oyapo.

Maka 9:2-13; Ruki 9:28-36

¹ Sere namasu faraka Yasumo Pita soko, Yamese soko, Yamesemo ipi mamanea Yone soko, i karikia ūri terayia hisiapo. Hikia namina hakāsa risike² aseane Yasu kau hakuraka reke sere maíyamo faeana ayiáka, Yasumo hikumisiane faeraka reke, ipi pasu ososane soko namo kakaro pakaeraka faesapo.³ Faeraka rekeno ipu aseane, Moseseppe Iraíya tetā Yasuyaki hakāsa risike somerakano asesapo.⁴ Aseraka Pitamo Yasuaki someraka, “Unihaeo, Isu o pesane kotesapo. Nōmo, ‘Ao, seseripo,’ airakanone nōmo ape mano isia kiakosapo. Meta nepoko, meta Mosesepoko, meta Iraíyapoko ayiáka kiakosapo. Ne seserire?”

⁵ Aíyaka Pitamo someraka rea yiamo, ako kára faesamo wate foaka iane karotapisiapo. Ako karotapisia arakaru aeyaka someraka, “Eane nōmo nī hokosapo. E nōmo himu tumurumo kára hemakapukua seserakanapo. Epo someane kaikia hemakapukua risikianie.” Aíyaka somesapo.

⁶ Aíyaka somerakano aporo hakāsa puramo kaikia, hauaka uaka peperaka fofaraka namosapo.⁷ Namorakano i warisia Yasu pekea i kaua sakairaka someraka, “Re turikitirirasie. Namohokopo.”⁸ Aíyaka somerakano, i turikitiriraka himo kokoa, ra asekeia, ro asekeia aseane, aporo meta rekeanafonoraka Yasu hakāsa rekeno asesapo.

⁹ Arirakano i ūri terayia aeyaka peraka risike Yasumo paroaka someraka, “Aporomanomo Tákeane anopo. Ano kukua maturikia taehoasiraka repo kituamo asera ayiáka asesane aporo hinamo metaki somehokopo.”

¹⁰ Airakano aporo hakāsa puramo someraka, “Kotimo somemane tisa aporomo someraka, ‘Kereso peasiraka Iraíya fana peakosapo.’ Aisane marirakano ipu aisare?”

¹¹ Airakano Yasumo someraka, “Kotimo somemane tisa aporomo someraka, ‘Iraíya fana peraka makata su makotehokosapo.’ Aisane kakaro aisapo.

¹² Arirakano nōmo some one kakaroripo. Iraíya peakosaposane fana pesapo. Pesane ipu asekeia hemakapuraka, ‘Iraíya peakosaposane ereapo.’ Aíyaka hemakapusuafapo. Hemakapurafaraka ipu hemakapusua rakiraka eane mokoatikisapo. Mokoatikisa ayiáka Aporomanomo Táke anoane soko kau tehoasimo mokoatikihokosapo.”¹³ Airakano aporo hakāsa puramo hemakapuraka, “Iraíya peakosaposane, Yone he tapukumarera ayareapo, aiyaka Yasumo somerakae.” Aiyaka ipu hemakapusuapo.

Yatafumo hokosa ho masane Yasumo mafasane oyapo.

Maka 9:14-29; Ruki 9:37-42

¹⁴ Yasu soko, ipi aporo hakāsa pura Pita soko, Yamese soko, Yone soko i pukua, aporo hinamo yakai sarimaraka risiakipoko á pausapo. Pauraka Yasu rea aporo meta peraka, kakuna porokoa kake someraka,¹⁵ “Unihaeo, nōmo aporo hokosane efera hunia masuaraka rukumotoraka káranapo. Maiya metamo ira paisia huruperapo. Maiya metamo hea huruperapo. Anasasamo nōmo e kamenakaraka arareriasie.¹⁶ Asiamo nōmo aporo hakāsa pura risiakipoko, nōmo hokosane karikia peane ipu mafarakasafapo.”

¹⁷ Airakano Yasumo someraka, “Aporo hinamo maiya yumo risiromo Kotiaki himu hakásaraka hemakapukua riskianafonoraka watikiaka risikinapo. Maiya suamo repo hasaka hemakapukua risikino, nōmo repoko maiya suamo yaiya wafororaka rakiraka rekeakosare? Reyaki ano maiya káramo rekeno yia, repo anoaki himu hakásaraka hemakapukua risikirifapo. Ano rea wo hokosane karikia peae.”¹⁸ Airakano hokosa karikia pesapo. Karikia perakano yatafuaki Yasumo paroaka someraka, “Ne metakarikia

pusie.” Aihoanine yatafu metakarikia pusuapo. Yatafu purakano hokosane fasapo. ¹⁹ Yasumo hokosa mafarakano aporo hakāsa puramo asekea, keseke i Yasu rea pekea hakāsa toke Yasuaki someraka, “Isiapo yatafuane metakarikia pusierakano punafonosane marirakanonare?”

²⁰ Airakano Yasumo someraka, “Repo Kotiaki hemakapusuane namo kakaro wakase-masasamo yatafuaki someraka, ‘Ne metakirikia pusie,’ airakano pusufapo. Nōmo some one kakaro somerakaripo. Repo Kotiaki himu hakásaraka hemakapusuane ira maseta hae* tati siasekenone, ūriaki someraka, ‘Ūri ne hauaka one metakarikia, hauaka meta rekeako pusie,’ airakano pukusapo. Makata rakira hakāsa meta repo rakiane siahoasi-fapo, aisa meta kakenafapo. ²¹ [Asiamo yatafu one metakarikia pusie, airakano yatafu pusimo makata nakosa sokoairaka kake Kotiaki kurikurihoanie. Kurikuriraka makata nakosa sokoaihoanafonoraka, yatafu one metakarikia pusierakano pukusafapo.]” Aíyaka Yasumo somesapo.

Yape tetámo Yasumo someraka, “Aporomo ano kukusimo rukusapo,” aisane oyapo.

Maka 9:30-32; Ruki 9:43-45

²² Yasu soko, ipi aporo hakāsa pura soko, i Kariri hauaka risiakipoko Yasumo iaki someraka, “Aporomanomo Tákeane anopo. Ano rusua kukusimo aporomo ano parake-hokosapo. ²³ Parakeraka ano waseremaka kukusimo rukusapo. Ano rusua kusuane sere isia faraka maturikia taehokosapo.” Airakano aporo hakāsa puramo kairaka himu fasapo.

“Yasumo Kotimo apepoko takese mone motorare?” Aisane oyapo.

²⁴ Yasu soko, ipi aporo hakāsa pura soko, Kapaneame taonea pesapo. Pekea Pita rea Kotimo apepoko takese mora aporo pekea, Pitaki kairaka, “Nōmo tisamo Kotimo apepoko takese mone motorare?” ²⁵ Airakano Pitamo aosapo. Aoraka Pita apea pariperakano, Pitamo somehoasiraka Yasumo Pitaki fana somesapo. Yasumo someraka, “Saemoneo, hauaka wo aporo unihaeemo aporo epaki takese mone makasierakanare? Unihaeemo ipi hokosaki takese mone makasierakanare? Aporo hinamo metakiraki takese mone makasierakanare? Nōmo hemakapusuane yakapare?”

²⁶ Airakano Pitamo someraka, “Aporo hinamo metakiraki takese mone makasie, airapo.” Airakano Yasumo someraka, “Ao, Unihae Kotimo soko ipi hokosaki takese mone motosie, airafapo. ²⁷ Aina ayíáka nōmo metakariafununine, takese mora aporomo mahisihokohoamo, nōmo takese mone motoakosapo. Pita, ne pukua kímamo he motokoa pokoa makosapo. Pokoa fana masa á kíma fatirimaraka, mone hae pokoa akai matoa kesaka rekeno aseakosapo. Asekea mone haeanne maka, eto itiaki Kotimo apepoko takese taehoaniesasamo, moneane takese mora aporoaki kakanie.” Aíyaka Yasumo somesapo.

18

Aporo fanaraka reamo kepoane oyapo.

Maka 9:33-37; Ruki 9:46-48

¹ Maiya amo aporo hakāsa puramo Yasuaki someraka, “Kotimo unihaeaka asekea rea paosa aporoane epa fanāreare?” ² Airakano i risiakipoko hokosa mano Yasumo peaueraka perakano Yasumo hokosaki someraka, “Isu hikumisi erekea reae.” Aíyaka ipi aporo hakāsa puraki someraka, ³ “Nōmo some one kakaro somerakaripo. Hokosa manomo e ipiane makáraraka hemakapurafapo. Repo namina ane makáraraka hemakapurane rukupateraka metakarikia, hokosa mano ayíáka risikianie. Hokosa mano ayíáka risikianafonorakanone, Kotimo unihaeaka asekea rea hauaka á hiakosafapo. ⁴ Hokosa e ipiane makárahoanafonoraka area ayíáka, aporomano e ipiane makárahoanafonoraka ayíáka rekeno asekea, eane Kotimo unihaeaka asekea rea paosa aporo fana ane épo.

⁵ Aporomanomo e ipiane makárahoanafonoraka anoaki hemakapukua rea aporoamo hokosa ásiáne ararerakanone ane, ano soko ararerakanapo.” Aíyaka Yasumo somesapo.

* 17:20: Ira maseta hae wakasema yiamo ira namo kára rekeako purapo.

Makata watikiaka rakisimo aporomo mokopipina kepoane oyapo.

Maka 9:42-48; Ruki 17:1-2

⁶ Yasumo someraka, “E ipi makárahoanafonoraka rea aporomo watikiaka rakisimo, aporomo mokopipirakano, mokopipina aporoane mawia eke kára kita humarekea maka, he tawara numua he nasimo makasuhoane siahoasireapo.

⁷ Aporomo watikiaka rakisimo kirimana aporo hinamo ane fanasihokosane enahoasi-fareapo. Makata watikisane fasereperapo. Mataka watikisa faserepeasimo kirimana aporo hinamo ane fanasihokosane enahoasifareapo. ⁸ Arirakano nōmo hokonomo watikiaka rakiraka nōmo ní himuane mawatikinapo. Mawatikinapaka hokono takuane patekemaka mamakatehoanie. Hokono tetákara reke ira kopakapunafonona hauaka á makasuhoohoamo, hokono hakásá takuane patekemaka mamakateraka, hokono hakásá reke, yaiya rerane kepomarekea rakiraka reke siahoasireapo. Arirakano nōmo korakemo watikiaka rakiraka, nōmo ní himuane mawatikinapo. Mawatikinapaka korake takuane patekemaka mamakatehoanie. Korake tetákara reke ira kopakapunafonona hauaka á makasuhoohoamo, korake takuane patekemaka mamakateraka, korake hakásá reke yaiya rerane kepomarekea rakiraka reke siahoasireapo.

⁹ Nōmo himo makata asekea watikiaka rakiraka, ni himuane mawatikinapaka, hi takuane pokomaka mamakatehoanie. Hi tetákara reke heao hauaka á ira rufia makasuhoohoamo, hi takuane pokomaka mamakateraka, yaiya rerane kepomarekea rakiraka reke siahoasireapo.

¹⁰ E ipi makárahoanafonoraka rea aporoane hokomakopo. Aporoane hepene aporomo asekea risikinapo. Asekea risike nōmo Ata hepene yapura rea á, Atamo hikumisi nenemea risikinapo. ¹¹ [Aporomanomo Tákeane anopo. Aporo himu watikisane nōmo mafasiako ano pesapo.”] Aiyaka Yasumo somesapo.

“Saro sipi hasaka kosapo.” Aiyaka takumeaka somesane oyapo.

Ruki 15:3-7

¹² Yasumo someraka, “Reaki nōmo takume one somerakano repo mayiáka hemakapukusare? Aporo metamo ipi saro sipi risiane menoraka wane harote (100) ayiáka risiapo. Risiane hakásá meta ipi haku rosaka pusua hasaka kosapo. Hasaka kosane aporoamo metakarisiare? Wae. Metakarisafapo. Saro sipi sarimaraka risiakipoko menoraka naeneti naene (99) risiapo. Naeneti naene (99) risikino aseraka naeneti naeneane ūria yia risikiasimo metakarikia, hakásá rosaka pusuane koako hisiapo.

¹³ Koako hikia kokoa aseraka kára sesesapo. Asiamo nōmo kakaro somerakaripo. Saro sipi naeneti naene (99) risiane saro sipi wafayamo aseraka sesenapo. Saro sipi hakásá meta rosaka pusuane kokoa aseraka namo kakaro kára sesenapo. ¹⁴ Aina ayiáka nōmo Ata hepene yapura reamo hemakapuraka, ‘E ipi makárahoanafonosa aporo hakásá meta hasaka koane siahoasifareapo.’ Aiyaka Atamo hemakapurapo.” Aiyaka Yasumo somesapo.

“Kakimara aporo ni maemo neaki mokoatikirakanone uyáka maropohoanie.” Aiyaka Yasumo somesane oyapo.

¹⁵ Yasumo someraka, “Kakimara aporo ni maemo neaki mokoatikirakanone, mokoatikisane metakarisimo titi hakásá risike eaki somehoanie. Somehoane epo kakimaka, epo neaki mokoatikisane metakarikia, teto titi koteaka maeaka risikiakosapo. ¹⁶ Asiāne aporoamo nōmo someane kakipayarakano, nōmo aporo metakira pasimokoa somehoko punie. Aporo hakásá soko metao, aporo tetá soko metao pasimokoa somehoko punie. Pukua eaki hukururaka somerakano kairaka, someane kakarorakae aihoasimo, aporo tetámo soko metao, aporo isiamo soko metao, ayiáka somehoane siahoasireapo.

¹⁷ Asiane ipu someane aporoamo yaiya kakipayarakano anoa paosa aporo suaki somehoanie. Somehoane taka someane koarellaerakano, eane metakarikia kikisiraka risikianie. Metakarikia Yu aporoanafonosa soko, takese mora aporo soko, re kikisiraka kekeporaka arisia ayiáka, aporoane ayiáka kikisiraka risikianie.

¹⁸ Nōmo someraka one kakaro somerakaripo. Hauaka wo aporomo watikiaka rakirakano, nōmo asekea maroporaka, ‘Metakarisie,’ airakano, hepene yapura soko Kotimo, ‘Metakarisie,’ airakanapo. Arirakano hauaka wo aporomo koteaka rakirakano, nōmo asekea, ‘Kotehoareapo,’ airakano, hepene yapura soko Kotimo, ‘Kotehoareapo,’ airakanapo.

¹⁹ Nōmo some meta one soko somerakanapo. Kakimara aporo tetámo himu hakásaraka someaka maka hemakapukua aíyaka Kotiaki kurikurirakano, nōmo Ata hepene yapura reamo kairaka makata aiyakaniesane, hakásá nineraka rakiakosapo. ²⁰ Repo aporo tetámo soko metao, aporo isiamo soko metao, ano yano motosane hemakapukua sarimarakanano ano soko pekea reyaki hakāsa rekeakosapo.” Aíyaka Yasumo somesapo.

*“Kakimara aporo ni maemo mokoatikirakano ropo eaki paripurafaraka mameraruhoanie.”
Aíyaka Yasumo somesane oyapo.*

²¹ Yasu reakipoko Pita pekea kairaka, “Unihaeo, kakimara aporo nōmo maemo maiya suamo ano mokoatikirakano, ropo eaki paripurafaraka yape yakapusumo nōmo mameraruhokosare? Yape yatipinusumo mameraruhoane siahoasireare?” ²² Airakano Yasumo someraka, “Yape yatipinusumo mameraruhoane siahoasifareapo. Nōmo menonafaraka epo neaki mokoatikisane nōmo kára mameraruhoanie. Mameraruhokosane hokono u susuane u senaki sumo mameraruhoanie.” Aíyaka Yasumo somesapo.

Aporomo neaki mokoatikirakano mameraruhokosa kepoane Yasumo takumeaka somesane oyapo.

²³ Yasumo someraka, “Kotimo aporo hinamo unihaeaka asekea rea asíane oyapo. Aporo unihaeaka reamo ipi aporo raipaki someraka, ‘Nōmo reaki mone ropo mako kasane pipu mone ropo mokoa peae.’ ²⁴ Airakano aporo raipa metamo mone kára tene mirione kina (K10,000,000) ropo kakasimo aporo metakiramo karikia pesapo. Aporo raipa karikia pesamo mone ropo kakasimo namo kakaro kara ropo kakafunusa nine ²⁵ mone fareapo, aisapo. Airakano aporo unihaeemo someaka mareraka, ‘Aporo raipa mone kakanafonosamo ipi makata kemoane ropohoanie. Roporaka e ipi soko, epo ipi asea soko, epo ipi hokosa soko su ropohoanie. Ipu suamo nena raiparaka rakisimo aporo metamo iane roporaka mone mosane anoaki mokoa peanie.’

²⁶ Aíyaka someaka marerakanano aporo raipa amo kaikia kakuna porokoa kake kuku-nameaka someraka, ‘Unihaeo, haru ayiakakopo. Wakasema nina keseke mone suane nōmo néaki kakakosapo.’ ²⁷ Airakano aporo unihaeemo kamenakaraka hemakapukua someraka, ‘Mone namo kakaro kára ane nōmo anoaki kakafunusa nine, nōmo metakirakanapo. Keseke nōmo soko neaki makasie, aihokosafapo. Pipu nōmo mamerarukanapo.’

²⁸ Aíyaka somerakanano kaikia, aporo raipane pukua aporo raipa meta mawia mokoteneraka someraka, ‘Fana nōmo neaki tene kina (K10) ropo mako kasane pipu ní makasie.’ ²⁹ Airakano ipi aporo raipa tákane kakuna porokoa kake kuku-nameaka someraka, ‘Wakasema nina keseke nōmo neaki kakakosapo.’ ³⁰ Airakano aporo raipa amo waesapo. Waeraka ipi aporo raipa tákane hukurukua tipura makesapo. Makerakanano asekea someraka, ‘Fana neaki mone kasá akipoko, nōmo mone ropo kakanafonarakano né tipura yaiya rekeakosapo.’ Aíyaka ipi aporo raipa tákane tipura makerakanano, ³¹ aporo raipa metakiramo asesapo. Aseraka kára mahisiraka ipu makata asesane aporo unihaeaki somesapo.

³² Somerakanano aporo unihaeemo ipi aporo raipa peaesapo. Perakanano aporo unihaeemo someraka, ‘Né aporo raipa watikisapo. Nōmo anoaki, “Haru ayiakakopo,” aisasamo nōmo anoaki mone ropo kakafunusa nine nōmo mamerarusapo. ³³ Mameraruraka nōmo néaki kamenakaraka hemaka apura ayiáka, nōmo soko ní aporo raipa tákaki ayiáka kamenakaraka hemakapufunureapo.’ ³⁴ Aíyaka aporo unihaeemo epo aporo raipaki saperaka tipura makesapo. Makekea someraka, ‘Ne kau tehoasimo tipura asekea rea

aporomo né ruraka kau tehokosapo. Anoaki mone ropo kakanafonorakano tipura yaiya rekeakosapo. Anoaki mone karakano ne tonotaehokosapo,’ aisapo.”

³⁵ Aíyaka Yasumo takumeaka someaka faraka, ipi aporo hakāsa puraki someraka, “Repo namina aporo tákemo re mokoatikirakano, repo himu mahisisane fana mafaraka mameraruhoanafonorakano, ane unihaemo ipi aporo raipaki rakisia ayiáka, nōmo Ata hepene yapura reamo reaki ayiáka rakiakosopo.” Aíyaka Yasumo somesapo.

19

Aporomo hinamo fimarerane Yasumo somesane oyapo.

Maka 10:1-12; Ruki 16:18

¹ Yasumo someaka faraka Kariri hauakane metakarikia pukua, he Yotane yaoraka taku ra Yutía hauaka á reapo. ² Reakipoko aporo hinamo yakai Yasu kekemarape perakano asekea aporo hinamo makata tasane Yasumo mafasapo.

³ Mafaraka Yasu reakipoko Fere se aporo peraka, Yasu kau aseakosakipoko ipi hasaka somehoasimo, ipu mokopipiraka someraka, “Aporomo ipi hinamo fimareakosane kepo kakeno fimareane siahoadisireare? Kepo kakeno fimareane somemananeane mamoso-hoadisireare?”

⁴⁻⁵ Airakano Yasumo someraka, “Wate fana kepomaresa maiya amo Kotimo aporo soko hinamo soko tetákara rakisiapo. Rakiraka Kotimo someraka, ‘Aporomo ipi kaíyia ipi wafaya metakarikia hinamo arumaraka, ipi hinamoyaki hakāsa paoraka tati kau hakásaraka risikinapo.’ Aíyaka Kotimo somerakano Kotimo sawia popasane repo asesare? Ao, repo asesapo. *(Stat 1:27; 2:24)*

⁶ Asiamo aporomo hinamo arumaka tati kau hakásaraka risirasamo tetáraka risikinafapo. Tati hakásapo. Asiamo aporo hinamo tati Kotimo masarimasane aporo metamo maparakuhoane siahoadisifareapo.”

⁷ Airakano Fere se aporomo Yasuaki someraka, “Fana Mosesemo someraka, ‘Hinamo arumasa fimareako hinamoaki sawi poparaka kakanie.’ Aisane marirakano Mosesemo aoraka fimareane siareapo aisare?” ⁸ Airakano Yasumo someraka, “Aporomo Kotimo someane koaretaesasamo Mosesemo aporoaki, ‘Hinamo fimareane siahoadisireapo,’ aisapo. Asiáne Kotimo kepomarekeea rakisia maiya amo Kotimo aisafapo. ⁹ Nōmo reaki some one somerakanapo. Aporomo hinamo arumasane, hinamoane ipi aporo metayaki punafonoraka koteaka kakeno yia, ipi apiamo hisiraka e fimarekeea hinamo meta arumarakano, aporo amo hinamo metane hakimarakanapo.”

¹⁰ Aíyaka Yasumo somerakano, ipi aporo hakāsa puramo Yasuaki someraka, “Nómo aporomo hinamo arumara someane kakaro hosekenone aporomo hinamo arumara-faraka nena risike siahoadisireapo.”

¹¹ Airakano Yasumo someraka, “Repo airaka ane aporo suamo kakimakasifareapo. Kotimo aporo metakira nena risikiasimo ararerakano hinamo arumako hemakapurane fasapo. ¹² Kaisie. Aporo suamo hinamo arumarafapo. Aporo metakira haku hakusa risirapo. Arirakano aporo metakira makeposa hinamo arumakasifa asia takaperapo. Ipi kaiyiamo takaperaka yia anapo. Arirakano aporo metakirane aporo metakiramo mokoatikiraka maropakeraka risike hinamo arumarafapo. Arirakano aporo metakiramo hemakapuraka, ‘Koti unihaemo makata rakirane rakiakosakipoko nōmo hinamo arumakosafapo.’ Aíyaka hemakapurane himura siarakano hinamo metakarinie.” Aíyaka Yasumo somesapo.

Aporo hinamomo Yasu rea hokosa karikia pesane oyapo.

Maka 10:13-16; Ruki 18:15-17

¹³ Yasu reakipoko hokosa karikia pesapo. Hokosa karikia pesane Yasumo hokonomo sakairaka Kotiaki kurikurihoasimo karikia pesapo. Karikia pesa aporo hinamoaki Yasumo aporo hakāsa puramo himu mahisiraka someraka, “Hokosa karikia peakopo.”

¹⁴ Airakano Yasumo someraka, “Ano rea hokosa peane siahoasireapo. Perakano mata-sohokopo. Hao, kaisie. Aporo hinamo e ipiane makáranafaraka hokosa mano ayíáka risiane, Kotimo unihaeaka asekea rekenapo.” ¹⁵ Aiyaka someaka hokosane Yasumo hokonomo sakaisapo. Sakairaka faraka Yasumo i metakarikia pusuapo.

*Makata kemo káraraka rea aporoane Koti unihaeaka rea paoraka waforonapo, aisane oyapo.
Maka 10:17-31; Ruki 18:18-30*

¹⁶ Yasu reakipoko aporo meta peraka someraka, “Tisao, ano Kotiyaki yaiya rekeakosakipoko, nōmo makata kotesa yakapa rakiakosare?” ¹⁷ Airakano Yasumo someraka, “Makata kotesane anoaki marirakano kairakanare? Koti ipi hákasa kotesapo. Ne Kotiyaki yaiya rekeakosakipoko, pipu paohoko hemakapuraka Kotimo somemane kakimaka rekeanie.”

¹⁸ Airakano aporoamo someraka, “Somemane meta mane kakimaka rekeakosare?” Airakano Yasumo someraka, “Aporo kukusimo rukupo. Hinamo hakimakopo. Makata meta hakimakopo. Aporo metaki kotafe topakamahokopo. (*Kisim Bek 20:12-16; Lo 5:16-20*)

¹⁹ Ní ata soko ní ama soko koteaka hemakapukua makotehoanie. Nómo níane himu tumurumo hemaka apura ayíáka, ní aporo táke metane ayíáka himu tumurumo hemakapunie.” (*Wok Pris 19:18*)

²⁰ Airakano aporoamo someraka, “Somemaneane nōmo kakimaka yaiya reapo. Makata meta yakapa rakiakosare?”

²¹ Airakano Yasumo someraka, “Ne sia koteaka susu rekeako nōmo makata kemo suane ropohoko pusie. Pukua makata kemoane roporaka marekea, mone mosane aporo makata forokoa risiaki kakanie. Kaka farakano nōmo makata mahimunane hepene yapura tokoakosapo. Asiamo nōmo ní makata kemo kaka faraka ano patera aseako peanie.”

²² Airakano aporo raua amo kairaka ipi makata kemoane kárasasamo aporo metakiraki kakako hisiraka, Yasuane metakarikia pusuapo. ²³ Purakano asekea Yasumo ipi aporo hakásā puraki someraka, “Nōmo reaki kakaro somerakaripo. Makata kemo káraraka rea aporoane Koti unihaeaka rea paohokosane namo kakaro waforonapo. ²⁴ Some one nōmo kakaro somerakaripo. Pasu irina nitoro kakarua saro kamo kokoro puane tapenapo. Aina ayíáka makata kemo káraraka rea aporoane Koti unihaeaka rea paohokosane namo kakaro waforonapo.”

²⁵ Airakano aporo hakásā puramo kairaka fofaraka someraka, “Aporo makata kemo kárasane Koti unihaeaka rea paohokosane, namo kakaro waforonapo, airakae. Asiamo aporo epa Kotimo unihaeaka asekea rekeako mafasiakosare?”

²⁶ Airakano Yasumo ipi aporo hakásā purane asekea someraka, “Aporoane Kotimo unihaeaka asekea rekeasimo, aporomo ipi yiamo mafasirafapo. Mafasirane Koti ipi hákasa siapo.”

²⁷ Airakano Pitamo someraka, “Isiapo makata kemo su metakarikia, ne patera aseako pesapo. Asiasamo isiapo makata yakapa mokoakosare?”

²⁸ Airakano Yasumo someraka, “Hao, kaisie. Some one kakaroripo. Aporomanomo Tákeane anopo. Keseke makata su makawena maiya amo ano unihaeaka rekeakosapo. Uniheaka reke sea kára faesa susu á kakakosapo. Kakeno re soko anoyaki sarimaraka sea metakira keno sua re tokoakosapo. Toke, Isiraya aporo ira keno suane repo koteaka asekea risikiakosapo. ²⁹ Aporo hinamo suamo hakásā hakásaraka anoaki hemakapuraka nōmo rakirane rakiakosakipoko, ipi ape metakarikia, mae metakarikia, papā metakarikia, apu metakarikia, ata metakarikia, ama metakarikia, hokosa metakarikia, hauaka metakarikia, ayíáka makata su metakarikia rea aporo hinamoamo makata ropo kára mokoa Kotiyaki yaiya rekeakosapo. ³⁰ Asiamo yumo aporo hinamo yakai fanaraka risiane kesekehokosapo. Aporo hinamo yakai yumo kesekea risiane fanahokosapo.” Aiyaka Yasumo somesapo.

20

“Hemo wafayamo makata rakira aporo pasimosapo.” Aiyaka Yasumo takumeaka somesane oyapo.

¹ Yasumo someraka, “Aporo hinamoane Kotimo unihaeaka asekea rea asíane oyapo. Mituru fiarakano hemo wafaya koraka reke, sako karepe hemoa aporomo rakisimo, aporo pasimokoako koraka reapo. ² Koraka reke makata rakira aporoane aseraka iaki someraka, “Repo sere hakásamo rakirakano reaki yokotae wane kina (K1) hakása hakásaraka kakakosapo.” Aiyaka somehoane ipu aorakano hemo wafayamo kaikia iaki someraka, “Re makata rakiako pusie,” aisapo. ³ Pusiesakipoko maiya tokonamo hemo wafaya efera hunia koraka reke, hauaka moroa aseane aporo metakira nena risikino asesapo. ⁴ Aseraka iaki someraka, “Re hemoa rakiako pusie. Nōmo hemakapusuane makata ropo siahoasisekeno reaki kakakosapo.” Airakano i makata rakiako pusuapo.

⁵ Pusuakipoko maiya tipi maiya kenomo soko, samapu maiya isiammo soko, hemo wafayamo aporo metakiramo hemoa rakisimo makata ropo fana somesa hakása yaiya somesapo. Somerakano i makata rakiako pusuapo.

⁶ Samapu maiya kakoreamo hemo wafaya efera hunia pukua hauaka moroa aporo nena risikino aseraka iaki someraka, “Repo maiya suamo marirakano nenakamaka risikinare?” ⁷ Airakano ipu someraka, “Hemo asekea rea aporoamo isuaki rakinie, aisafapo.” Airakano hemo wafayamo someraka, “Re pukua sako hemoa rakinie,” aisapo. Aiyaka somerakano i makata rakiako pusuapo. ⁸ Ererakano hemo wafayamo hemo asekea rea aporoaki someraka, “Hemoa rakiraka risia aporoane su peahoanie. Perakano asekea iaki makata ropo kakanie. Karaka aporo samapu pesane fana kakanie. Amo patera aporo mituru maíyamo pesane kakanie. Amo patera aporo fiarakano pesane kesekeea kakanie.” ⁹ Aiyaka hemo wafayamo somerakano aporo maiya kakoreamo pesaki yokotae wane kina (K1) hakása hakásaraka kasapo.

¹⁰ Ayiáka karakano asekea aporo mituru fiarakano pesamo hemakapuraka, ‘Iaki yokotae wane kina (K1) akarane, isuaki yokotae wane kina (K1) kakakosaposane meta ripakamarekea kakakosapo.’ Aiyaka hemakapusuane iaki soko, yaiya yokotae wane kina (K1) kasapo. ¹¹ Karakano ipu hemo wafayaki mahisiraka someraka, ¹² ‘Aporo maiya kakoreamo pesamo wakasema rakisiapo. Isu mituru fiarakano pekea rakipe pukua samapu metakarisiapo. Isu maiyamo sisipuraka kikipuraka rakikia hisiraka kára waforosapo. Aporo maiya kakoreamo pesaki soko isuaki soko hakasa yineraka kayane siahoasifareapo.’

¹³ Airakano aporo mituru fiarakano pesa metaki hemo wafayamo someraka, ‘Hao, kaisie. Nōmo reane pasimosa maiya amo nōmo reaki makata ropo yokotae wane kina (K1) kakakosapo. Aihoane nōmo aorakano kaisiapo. Asiamo etapo iti someaka masane nōmo mamosorakanafapo. ¹⁴ Yokotae wane kina (K1) hakása nine maka pusie. Yokotae wane kina (K1) one nōmo ní makata ropo ayapo. Nōmo hemakapusuane aporo fana pesane soko, aporo keseke pesane soko, makata ropo hakása yineraka kakakosapo. ¹⁵ Nōmo ní menane nōmo ní hemakapuraka kayane siahoasireapo. Asiamo aporo metakiraki nōmo hemakapuraka mone kára karakano nōmo anoaki mahisirakanare?’ Aiyaka hemo wafayamo somesapo.” ¹⁶ Somesamo kepoane oyapo. “Aporo kesekeraka risiane fanahokosapo. Aporo fanaraka risiane keshokosapo.” Aiyaka Yasumo someapo.

Yape isiammo Yasumo someraka, “Aporomo ano kukusimo rukusapo.” Aiyaka somesane oyapo. Maka 10:32-34; Ruki 18:31-33

¹⁷ Yasu Yarusarame sitia hinaka aporo su metakarikia ipi aporo hakása pura keno suyaki wakasema hikia iaki hakása someraka, ¹⁸ “Hao, kaisie. Isu Yarusarame sitia hinakanapo. Yarusarame sitia aporo metakiramo, Aporomanomo Táke anoane hukurusimo parakeraka wasere maka karikia pukusapo. Pirisiti aporo káramo soko, Kotimo somemane tisa aporomo soko, hukurusimo ano karikia pukusapo. Karikia pukua

ipu ano kukusimo ira paremaresie, aihokosapo. ¹⁹ Aíyaka ano kukusimo Yu aporo hoanafonosamo ano ira paremareakosakipoko karikia pukusapo. Karikia purakano Yu aporohoanafonosamo ano mokoatikiraka mahokoparihokosapo. Ano kaua rukua ira matoperaka paremareakosapo. Paremarerakano ano kukusapo. Kurakano sere isiamo Kotimo ano maturikia taehokosapo.” Aíyaka Yasumo somesapo.

Sepetemo maeya tetá Yasumo hokono tumuru takua soko kasakai takua soko kakasimo somesane oyapo.

Maka 10:35-45

²⁰ Sepetemo aseamo ipi hokosa Yamesepe Yone tetáyaki hakása Yasu rea pekea, hinamoamo kakuna porokoa kake Yasuaki someraka, “Nómo someane nómo kakimaka ayiáka rakisimoripo.” ²¹ Airakano Yasumo someraka, “Nómo ayiáka yakapa rakisimore?” Airakano hinamoamo someraka, “Ne unihaeaka area maiya amo, nómo hokosa meta ne hokono tumuru takua kayae, anakano hokosa meta ne hokono kasakai takua kayae, aihoasimoripo.”

²² Airakano Yasumo someraka, “Nómo somerakane kepoane nómo ní hemakapurakarifapo. Mokome somerakae.” Aíyaka Yasumo tetáki someraka, “Nómo kapo* he nena tetápo soko nasireare?” Airakano tetapō someraka, “Ao, etapo nakosapo.” ²³ Airakano Yasumo someraka, “Nómo kapo he nena hakása yia tetápo kakaro nakosapo. Arirakano ano hokono tumuru takua kakakosane soko, hokono kasakai takua kakakosane soko, nómo kayae aihokosafapo. Nómo ní hemakapusua aeyaka murikimakosafapo. Nómo ní Atamo ipi hemakapusua aeyaka sia maroporaka murikimasapo,” aisapo.

²⁴ Arirakano aporo hakása pura kaeyakosumo kairaka mamanea tetáki hisisapo.

²⁵ Hisirakano aporo hakása pura suaki Yasumo peaesapo. Perakano asekeea Yasumo iaki someraka, “Yu aporo hoanafonosamo namina aporo unihaeamo aporo metakiraki kára masamasarapo. Aporo unihaeane ipi káraraka reasasamo, aporoaki masamasarapo.

²⁶ Aina ayiáka re ayiáka risikiakopo. Repo namina aporo metamo hemakapuraka, ‘Ano aporo káraraka rekeariripo.’ Aíyaka hemakapuraka aporo wakasemamo arakira ayiáka repo aporo supoko arareraka rakinie.

²⁷ Asiamo aporo metamo hemakapuraka, ‘Ano aporo fanaraka rekeariripo.’ Aiyaka hemakapuraka aporo amo aporo raipamo arakira ayiáka rakinie. ²⁸ Aporomanomo Tákeane anopo. Asiamo aporo raipamo arakira ayiáka aporomo anopoko ayiáka rakisimo ano pesafapo. Aporomanomo namina watikisapoko fanasihokohoamo nómo farimaka ano kukuko pesapo.” Aiyaka Yasumo somesapo.

Aporo tetá hi mesa Yasumo mafasane oyapo.

Maka 10:46-52; Ruki 18:35-43

²⁹ Yariko taoneane i metakarikia purakano, aporo hinamo yakai Yasuyaki hakasa puraka ikia kara asekehaerape pusuapo. ³⁰ Pusua maiya amo aporo tetá hi taku tetákara mesa, ikia kara fea toke Yasu perakarakano kairaka, sakepamo wáraka, “Tefetemo aporo irao, Unihaeo, nómo etoane kamenakaraka ararererasie.” ³¹ Airakano aporo yakaimo paroaka someraka, “Wáhokopo. Me fasie.” Airakano tetapō eféra hunia sakepamo wáraka, “Unihaeo, ne Tefetemo aporo irao, etoane kamenakaraka ararererasie.”

³² Airakano Yasumo kairaka e pesane wasuaka rukua asekeea reapo. Asekeea reke tetáki Yasumo someraka, “Tetápo sesehoasimo nómo mayikasimore?” ³³ Airakano tetapō someraka, “Unihaeo, etapo himo koteaka aseako seseripo.” ³⁴ Airakano Yasumo tetáne kamenakaraka tetá hia sakaihoane wate foaka faraka tetapō himo koteaka asekeea Yasuyaki hakása pusuapo.

* ^{20:22:} Yasumo kapo takumeaka somesane ipi mokoatikiraka rusua kukusane somesapo. “Ano mokoatikirakanókuksa ayiáka teto soko kukusare?” Aíyaka somesapo.

21

Yasu saro toki matia ripaka Yarusarame sitia hisiane oyapo.

Maka 11:1-11; Ruki 19:28-40; Yone 12:12-19

¹ Aporo hinamo yakai Yasuyaki hakāsa ikia kara hisiapo. Hikia Yarusarame siti makeraka pesapo. Yarusarame sitiane makeraka ūri Orofe rekenapo. Ūri Orofe makeraka Péfasi ape kisia á i pausapo. Pauraka Yasumo aporo hakāsa pura tetáki ² someraka, “Teto ape tameyia pusie. Pukua aseane ape fari yia saro toki kaīya humaresa, manoyaki risikino asekosapo. Aseraka saro tokiane kaīya manoyaki tetákara fatarimaka ano rea wo karikia peanie.

³ Arirakano aporo metamo tetoaki someraka, ‘Tetápo marirakanonare?’ Airakano tetápo eaki someraka, ‘Saro toki aeyaka Unihaemo makata rakiacosapo. Epo aisasamo saro one etapo karikia purakanapo.’ Airakano aporoamo tetoaki, ‘Ao, siareapo. Maka pusie,’ aihokosapo.” Aiyaka Yasumo somesapo. ⁴ Yasumo aiyaka somehoasiraka wate fana Kotimo some kará porofete aporomo somesane oyapo.

⁵ “Aporo hinamo Saeone* sitia risiaki someraka, ‘Asesie. Repo Unihae kárane apere. Repo Unihae auaraka reane saro toki matia ripaka apere. Saro toki matia ripasane saro tokiane manopo.’ aihokosapo.” Aisane fasere apera ayareapo. *(Sekaraia 9:9)*

⁶ Asiamo tetā pukua Yasumo somesa hakāsa yine kakimaka rakisiapo. ⁷ Rakiraka saro toki kaīya manoyaki tetákara karikia pesapo. Karikia perakano aporo yakaimo ipu pasuane saro toki matia furumurikia marekea, Yasu á ripasapo.

⁸ Ripaka kakeno aporo hinamo yakai ipu suamo ikia kara á ipu pasu ifunusapo. Arirakano aporo hinamo metakiramo makata ku popateraka ikia kara á ifunusapo.

⁹ Ifunusakipoko Yasu peraka aporo hinamo metakira fanaraka, metakira kesekeraka ayiáka pesapo. Ipu wárape peraka, “Tefetemo aporo ira wainepe pesa aporo né káraro. Unihae Kotimo né pusierakano pesane, Kotimo makoterakanapo. Né namo kakaro fanaraka rekenapo.” Aiyaka ipu Yasuane kekeresapo.

¹⁰ Kekereraka i su Yarusarame sitia wárape perakano aporo hinamo á risiamo asekeea himu faraka someraka, “Aporo aperane epape?” ¹¹ Airakano aporo hinamo yakaimo someraka, “Aporo aperane porofete aporopo. Kotimo some kará aporo Yasupo. Kariri hauaka Nasare apea reane epo.” Aiyaka aporo hinamo yakaimo Yasuane kekeresapo.

Kotimo apea aporomo makata roporaka risane Yasumo pusiesane oyapo.

Maka 11:15-19; Ruki 19:45-48; Yone 2:13-22

¹² Kotimo ape makeraka, rurusa tua Yasu yorokoa puraka aseane, aporomo makata roporaka risikino asekeea, i suane Yasumo rukuhoaeraka pusiesapo. Arirakano aporo metakiramo teporoa mone taeraka sanasiraka risiakipoko, Yasu peraka ipu teboro suane maparitaesapo. Arirakano mena nume asia roporaka risia aporoamo sea ane soko Yasumo maparitaesapo.

¹³ Maparitaeraka iaki Yasumo someraka, “Kotimo sawia Kotimo somesane porofete aporomo popasane oyapo. Nōmo apeane aporo hinamomo someraka, ‘Kotimo apeane Kotiaki wára kurikuri aepo,’ airapo. Aira nine Kotimo ape one repo hakimora aporomo kunikia pariraka amarere.” *(Aisaia 56:7)*

Aiyaka Yasumo somesapo.

Kotimo apea hokosa fetemo Yasuaki kekeresane oyapo.

¹⁴ Kotimo apea Yasu reakipoko aporo hinamo hi fausa soko, korake matipusa soko, perakano Yasumo mafasapo. ¹⁵ Arirakano hokosa fetemo Yasuaki kekereraka wáraka, “Tefetemo aporo ira wainepe pesa aporo, né káraro,” aiyaka wásapo. Wárakano kaikia pirisiti aporo káramo soko, Kotimo somemane tisa aporomo soko mahisiraka sapesapo. Arirakano Kotimo wakapumo hemakapukua rakirane Yasumo rakirakano asekeea ipu mahisiraka sapesapo.

* 21:5: Saeone sitiane yano motosa metane Yarusarame sitipo.

¹⁶ Saperaka Yasuaki ipu kairaka, “Hokosa fetemo wárakane nōmo kairakarire?” Airakano Yasumo someraka, “Ao, nōmo kairakaripo. Hokosa fetemo wárakane Kotimo sawia popasane repo menosafare? Kotimo sawia popasane oyapo. ‘Hokosa fete suamo anoaki seseraka kekerehoasimo, sesenane iaki Kotimo kakakosapo.’ Aíyaka popasapo.” (*Buk Song 8:2*)

¹⁷ Aíyaka Yasumo someraka faraka aporo hinamo Kotimo apea sarimasane soko, Yarusarame sitiane soko, epo metakarikia pukua Petene apea wasápo.

Himu hakásaraka kurikurinane Yasumo somesane oyapo.

Maka 11:12-14, 20-24

¹⁸ Mituru Yasu Yarusarame sitia hinaka meamosapo. ¹⁹ Meamorakano ira foke ikia kara rekeno, foke wate nakosakipoko tumako peraka, aseane ira foke namo ku susu rekeno asesapo. Asekeia Yasumo someraka, “Ira foke one watē efera hunia peakosafapo.” Aihora yiamo ira fokeane wate foaka porasapo. ²⁰ Porarakano aporo hakāsa puramo asekeia fofaraka someraka, “Ira fokeane mayíáka wáte foaka porarakanare?” ²¹ Airakano Yasumo someraka, “Nōmo reaki some one kakaro somerakaripo. Repo himu tetáraka hemakapukua risikianafonoraka Kotiaki himu hakásaraka hemakapukua risikianie. Ayíáka risikino, nōmo ira fokeaki somesa ayíáka repo ira fokeaki soko, ūriaki soko, ayíáka somerakano ayiakakosapo. Repo ūri aseraka someraka, ‘Ūri ne takahikia he tawara sokoperasie.’ Airakano ayiakakosapo. ²² Asiamo repo Kotiaki himu hakásaraka hemakapukua risike, makata metapoko hemakapukua Kotiaki kurikurirakano Kotimo ayíáka rakiakosapo.” Aíyaka Yasumo somesapo.

“Yasumo arakirane epamo maresare?” Aisane oyapo.

Maka 11:27-33; Ruki 20:1-8

²³ Kotimo ape rurusa tua Yasu yorokoa pukua some karaka rea maiya amo pirisiti aporo káramo soko, Yu aporo sisimamo soko, e rea pekea someraka, “Nōmo arakirane epamo maresare? Neaki epamo ayíáka rakinie aisare?” ²⁴ Airakano Yasumo iaki someraka, “Nōmo soko, reaki makata hakása meta akai kairakanapo. Kaiyiáne repo anoaki some pariperakano, kaikia anoaki rakiniesane nōmo reaki somehokosapo.

²⁵ Yonemo aporo hinamo hea tapukumurianiesane epamo ayikaniesare? Kotimo ayikaniesare? Aporomo ayikaniesare? Repo anoaki somesie.” Airakano aporo ipu namina susu tafatafaraka someraka, “Isiapo Yasuaki yakapa somehoanarakapo. Isiapo someraka, ‘Kotimo ayikaniesapo,’ aíyaka somerakanone, Yasumo isuaki someraka, ‘Marirakano Yonemo someane kakipayasare?’ aihokosapo. ²⁶ Arirakano isiapo someraka, ‘Aporomo ayikaniesapo,’ aiyaka somerakanone, aporo hinamo suamo isuaki mahisiraka sapehokosapo. Asiamo aporo hinamo suamo hemakapuraka, ‘Yone ipi porofete aporopo. Ipi Kotimo some kará aporopo.’ Aíyaka ipu hemakapusasamo iaki namorakanapo. Asiamo aporo hinamo suamo isuaki sapehokohoamo isiapo Yasuaki some paripukusafapo.” ²⁷ Aíyaka namina tafatafaraka Yasuaki someraka, “Yonemo aporo hinamo hea tapukumurianiesane epamo ayikaniesarakapo. Isu himeteripo.” Airakano Yasumo someraka, “Repo anoaki some paripeanafonosasamo anoaki rakiniesa kepoane nōmo reaki somerakanafapo.” Aíyaka Yasumo somesapo.

“Wafayamo hokosa tetáki makata rakinie,” aíyaka Yasumo takumeaka somesane oyapo.

²⁸ Pirisiti aporo kára soko, Yu aporo sisima soko risiaki Yasumo takumeaka someraka, “Aporo hakásamo aporo hokosa tetá reapo. Asiamo hokosa fanaki wafayamo someraka, ‘Hokosao, pipu ne sako karepe hemoa makata rakiako pusie.’ ²⁹ Airakano hokosa amo someraka, ‘Ano hisiripo. Pukusafapo.’ Aisa nine keseke ipi hemakapuraka, ‘Nōmo fana hisisane metakarikia, efera makata rakiako pukusapo,’ Aíyaka hemakapukua rekeako parisapo.

³⁰ Arirakano hokosa kesekeaki wafayamo someraka, ‘Hokosao, pipu ne sako karepe hemoa makata rakiako pusie.’ Airakano hokosa amo someraka, ‘Ao, ano pukusapo.’ Aisa nine e pusuafapo.” ³¹ Aíyaka Yasumo iaki akai kairaka, “Hokosa meta mamo ipi wafayamo

someane kakimasare? Repo mayíáka hemakapurakanare?” Airakano ipu someraka, “Hokosa fanamo kakimasapo.” Airakano Yasumo iaki someraka, “Some one kakaroripo. Koti unihaeaka rea paonane, takese mora aporo soko, aporo rea pura hinamo soko fana paorakanapo. Re kesekenapo. ³² Asiamo re ereketaeraka risikiasimo, Yonemo reaki some karakano repo kakimasafapo. Arirakano takese mora aporomo soko, aporo rea pura hinamomo soko kakimasapo. Kakimaka risikino repo aseraka yia, Yonemo someane repo kakimakosakipoko asiāne himu hakásaraka hemakapukua risikisufapo.” Aiyaka Yasumo somesapo.

Sako karepe hemo aporomo asekea risia Yasumo takumeaka somesane oyapo.

Maka 12:1-12; Ruki 20:9-19

³³ Yasumo pirisiti aporo káraki soko, aporo sisimaki soko, someraka, “Kaisie. Nōmo reaki takume meta somerakanapo. Hemo wafayamo sako karepe hemoa porokoa rurusapo. Rurusa tua sako wate nenekeaneraka he pusimo eke karoraka maua asia rakisiapo. Arirakano aporomo hemoane koteaka asekea rekeasimo huturu ape kisiapo. Kikimarekea hemoane aporo metakiramo asekea risikasimo epo murikimasapo. Murikimaka faraka hemo wafayamo ipi hemoane metakarikia hauaka meta á pusuapo. ³⁴ Pusuakipoko sako karepe wateane ikia ahera maiya amo, hemo asekea risia aporomo sako karepe wateane parakuraka, metakira hemo wafayaki kakasimo, hemo wafayamo aporo raipa metakiraki mokoako pusiesapo. ³⁵ Pusiesane hemoa perakano hemo asekea risia aporomo aporo raipa metane ira faimo rukua, anakano aporo raipa metane namo kakaro rusua kukua, anakano aporo raipa metane ekemo karekea asiapo.

³⁶ Arirakano fana hemo wafayamo aporo raipaki sako wate mokoako pusiesane aporo hukusipo. Efera hunia mokoako pusiesane aporo yakai pusiesapo. Pusierakano pusuane aporo fana pusiesane hemo asekea risia aporomo mokoatikisa ayíáka, aporo kesekeea pusiesane soko, ayíáka mokoatikisapo.

³⁷ Arirakano keseke hemo wafayamo hemakapuraka, ‘Hemo asekea risia aporomo nōmo hokosane mokoatikihokosafapo. Eane ipu hemakapukua makotehokosapo.’ Aiyaka hemakapukua reasasamo hemo wafayamo ipi hokosane pusiesapo. ³⁸ Pusiesane hemoa perakano aseraka, hemo asekea risia aporomo namina susu someraka, ‘Hemo wafayamo hokosa apere. Asiamo keseke ipi wafayane kusuakipoko finihaoe e reke, hemo one epo asekea rekeasireapo. Anapaka isiapo eane rukusapo. Rusua kurakano hemo one isiapo isina wafayaraka asekea risikiakosapo.’ ³⁹ Aiyaka hokosane waseremaka ruru tapikia tama takua makasuraka rusua kusuapo.” Aiyaka Yasumo takumeaka somesapo.

⁴⁰ Aiyaka someraka faraka epo aporo suaki akai kairaka, “Hemo wafaya perakano hemo asekea risia aporoane mayiakakosare?”

⁴¹ Airakano aporo suamo Yasuaki someraka, “Hemo wafayamo hemo asekea risia aporo watikisane kakaro mokoatikiraka rusua kukusapo. Rusua kurakano, aporo metakiramo hemoane koteaka asekea risikiasimo muriakosapo. Murisiamo sako karepe wate ikia aheramo sako wate mokoa hemo wafayaki kakakosapo.”

⁴² Airakano iaki Yasumo someraka, “Some one Kotimo sawia popasane repo menosafare? Kotimo sawia popasane oyapo.

‘Ape kira aporomo ira warupi mamakatesane aporo metamo maka pekea tipia mapohareapo. Mapohoareane Kotimo ipi ayíáka rakireapo. Ayíáka rakisikeno isiapo aseraka, “Ane kotehoareapo,” airapo.’ Aiyaka Kotimo sawia popahoareapo. (*Buk Song 118:22-23*)

⁴³ Asiamo nōmo reaki kakaro somerakaripo. Koti unihaeaka asekea reane Yu aporomo hisisasamo Kotimo iane metakariakosapo. Metakirakano aporo hinamo suamo Kotiaki himu hakásaraka hemakapukua risikiakosane Kotimo unihaeaka rekeakosapo. ⁴⁴ Asiamo ira warupia aporo hinamo metakira terafaka ruraka kakaro etehokosapo. Arirakano ira warupi maposane huruperaka ruraka kakaro rukutaihokosapo.” Aiyaka Yasumo ipi yine ira warupi ayíáka takumeaka somesapo.

⁴⁵ Arirakano pirisiti aporo káramo soko Fere se aporomo soko Yasumo takumeaka somerakano kairaka hemakapuraka, “Yasumo someraka ane isuane somerakae.”

⁴⁶ Aíyaka hemakapuraka Yasu waseremakosapoko asiāne metakarisiapo. Asiamo aporo hinamo suamo hemakapuraka, “Yasu porofete aporo Kotimo some kará apororeapo.” Aíyaka hemakapusuasamo ipu Yasu waseremayane, aporo hinamo suamo iaki mahisiraka sapenapaka metakarisiapo.

22

Hokono akeramo aporo hinamo peaniesane peanafonorakano Yasumo takumeaka somesane oyapo.

Ruki 14:16-24

¹ Yasumo aporoaki efera hunia takumeaka someraka, ² “Kotimo unihaeaka asekea rea asíane oyapo. Aporo unihaeaka reamo ipi hokosamo hinamo arumara maiya amo hokono keakosakipoko, makata nakosa sarimaraka taesapo. ³ Taeraka aporo fana murikimasaki* yumo peaniehoko, pusie aíyaka ipi aporo raipaki somesapo. Somerakano i pukua, aporo fana murikimasaki peaesapo. Peahoane aporoane namina hisiraka pesafapo.

⁴ Peanafonorakano asekea, aporo unihaeemo aporo raipa metakiraki someraka, ‘Aporo peaesaki efera hunia someraka, “Yumo peae. Makata nakosa su sarimaraka taesapo. Saro ponomakau soko, saro ponomakau mano kaniamo soko rukua taeraka, makata su sarimaraka taesapo.” Aíyaka somehoko pusie.’

⁵ Airakano aporo raipa pukua peaehoane, aporo peaesa amo kakipayaraka, aporo metamo ipi hemoa rakiako pukua, arirakano aporo metamo ipi pisinisi rakiako pusuapo. ⁶ Arirakano aporo peaesa metakiramo aporo raipane waseremokoa mokoatikiraka rusua kusuapo. ⁷ Rusua kurakano aporo unihaeemo kaikia saperaka ipi ame aporoaki peaesapo. Perakano asekea aporo unihaeemo iaki someraka, ‘Aporo rusua kusua aporoane kukusimo runie. Ipu apeane soko inakasimo paiyinie.’ Airakano aporo unihaeemo ame aporo puraka aporo unihaeemo somesa hakása nine ipu ásiapo.

⁸ Arirakano aporo raipa metakiraki aporo unihaeemo someraka, ‘Makata nako makata su sarimasapo. Sarimaraka aporo peaesane i watikiaka risike i siaraka risikianafonosasamo, iane nōmo metakarirakanapo. ⁹ Asiasamo re pukua ikia akoa aporo hinamo metakira soko perakano aseraka hokono akera peaehoanie.’

¹⁰ Airakano aporo raipa ikia akoa puraka, aporo hinamo su watikisa soko, kotesa soko, aseraka peaesapo. Peaeraka karikia pekea, makata pakinakosa apea yorokoa sarimahoane apeane tapesapo. ¹¹ Ape taperakano aporo hinamo apea kesane, aporo unihaeemo aseako pesapo. Pekea aseane hinamo aruamara a sarimaraka, aporo hinamo suamo hinamo arumara pasu kotesa osoraka, aporo hakása meta hinamo arumara pasu kotesane osohoanafonosekeno asesapo.

¹² Aseraka aporoaki aporo unihaeemo someraka, ‘Ne hinamo arumara pasu kotesa metakarikia osohoafareapo. Ne kaíyanafaraka, manakano mapiraraka pesare?’ Airakano aporoane me kauraka reapo. ¹³ Asiamo aporo raipaki aporo unihaeemo someraka, ‘Aporoane korakea soko hokona soko taporaka katosa hauaka takua makasuhoanie. Arirakano katosa hauaka á aporo hinamo arisiamo hiripuraka saperaka akai kikitihokosapo,’ aisapo.

¹⁴ Hao, kaisie. Aporo hinamo yakai peaesa nine aporo hinamo hukusiane takekeea pasimorakanapo.” Aíyaka Yasumo somesapo.

Takese mone kakakosane Yasumo somesane oyapo.

Maka 12:13-17; Ruki 20:20-26

¹⁵ Fere se aporomo sarimaraka someraka, “Yasumo hasaka somehoasimo isiapo e makosakipoko isu mahoperape pukua, úyaka somehokosapo.” Aíyaka ipu tau me rukua someaka masapo. ¹⁶ Me rukua someaka maka faraka, Fere se aporo metakira soko Heroteaki patera asesa aporo metakira soko, Yasu rea pusie, aisapo. Airakano pukua Yasu rea pekea, Yasuaki ipu someraka, “Tisao, nōmo someane namo kakaro somerakae,

* 22:3: Aporo fana murikimasane Yu aporopo.

aíyaka isiapo hemakapurakaripo. Aporo koteaka risikiasimo kakaro Kotimo ainane nómó some karakarakae. Aporomo neaki mokoatikihokosane nómó hemakapurafaraka kakaro somerakae. Aporo kárane sesehoasimo nómó some karakarifapo.

¹⁷ Asiamo isiapo neaki makata hakása kairakanapo. Isiapo Yu aporomo Rome aporo unihaeaki takese mone kayane siahoasirare? Kayane Kotimo somemaneane mamosohoasireare?”

¹⁸ Airakano ipu yapake someane Yasumo kaisiapo. Arirakano ipu Yasu mokoatikihokosakipoko mahoperape pesane Yasumo aseraka, iaki someraka, “Re aporo himu tetáraka arisie. Nómó hasaka somerakano nómó ní some yiamo kakinumo maká arura aiyáka, ano níane rusimo repo aíyaka somerakae. ¹⁹ Takese mone hae motoakosane nómó aseako maka peae.” Airakano mone hae maka perakano asekea

²⁰ Yasumo someraka, “Epa hikumisi mone haea rekerire? Epa yano motosa popahoareare?” Airakano ipu someraka, “Rome aporo unihae Sisa hikumisireapo. Ipi yano motosa popahoareapo.” ²¹ Airakano Yasumo someraka, “Rome aporo unihae menane ipiaki kakanie. Kotimo menane Koti ipiaki kakanie.” ²² Airakano ipu kaikia fofaraka Yasu metakarikia pusuapo.

Aporo kusua maturikia taehokosane Yasumo somesane oyapo.

Maka 12:18-27; Ruki 20:27-40

²³ Sereamo Yasu rea Satusi aporo peraka, Yasuaki makata akai kaiyako pesapo. Arirakano ipu hemakapusuane aporo kusua ipi kauyaki hoyaki kakaro kusuane maturikia taenafapo. Aíyaka hemakapukua ipu Yasuaki someraka, ²⁴ “Tisao, Mosesemo somesane oyapo. ‘Aporomo hokosa hokono mareanafonoraka kurakano, epo hinamo yaroane ipi mamaneamo arumarapo. Aporo kusua amo hokosa wainenaka sikiraka wainasimo, hinamo yaroane ipi mamaneamo arumarapo.’ Aíyaka Mosesemo somesesupo.

²⁵ Asiamo hauaka wo mamanea yatipinusu risiapo. Mamanea fanamo hinamo arumasane hokosa hokono mareanafonoraka kurakano, ²⁶ mamanea kusuamo patera yiamo hinamo yaroane arumasapo. Epo hokosa hokono mareanafonoraka e soko kusuapo. Kurakano epo patera yiamo hinamo yaroane arumasapo. Arumasane epo hokosa hokono mareanafonoraka kurakano, ayipe pukua mamanea yatipinu suamo hinamo yaro hakásane arumaraka hokosa hokono maresafapo. ²⁷ Keseke hinamo manokonomasane kusuapo. ²⁸ Kusuane maturikia taeana maiya amo hinamoane epamo hinamore? Eane aporo yatipinusumo arumasapo.”

²⁹ Airakano Yasumo someraka, “Kotimo some sawia popasane soko, Kotimo wakapuanne soko repo himeteraka hasaka hemaka apure. ³⁰ Aporo kusua maturikia taerakano, hepene aporo arisia aiyáka risikiakosapo. Ayíyaka arisia maiya amo aporo kusua maturikia taesamo hinamo kusua maturikia taesane arumarafapo.

³¹ Arirakano aporo kusua maturikia taena amo kepoane nómó reaki somerakanapo. ³² Kotimo sawia popasane Kotimo someraka, ‘Eparahamemo Kotiane anopo. Aisakemo Kotiane soko anopo. Yakopemo Kotiane soko anopo.’ Aíyaka popasane repo menoraka kepoane re himeteane. Kepoane oyapo. Kotiane aporo kusua maturikia taeraka hitafe arisiamo Kotipo. Eparahame soko Aiske soko Yakope soko kakaro kukua hitaferaka risikianafonorakanone, ‘Ipu Kotiane anopo,’ aíyaka Kotimo aihoafunufareapo.” (*Kisim Bek 3:6*)

³³ Aíyaka Yasumo somerakano aporo yakaimo kairaka himu faraka fofasapo.

Kotimo somemane fanane oyapo.

Maka 12:28-34; Ruki 10:25-28

³⁴ Satusi aporomo somesane, Yasumo someamo hurutapikia somesapo. Somerakano ipu kaikia me kauraka risiapo. Me kauraka risikino asekea, Fereze aporomo sarimaraka someraka, “Isiapo mayíáka Yasu hurutapiakosare?” Aíyaka me rusuapo. ³⁵ Me rukua faraka, ipu aporo hakása somemane kaira aporoamo, Yasumo hasaka somehoasimo mahoperaka someraka, ³⁶ “Tisao, Kotimo somemane meta mane fanare?”

³⁷ Airakano Yasumo someraka, “Koti ane nōmo unihaepo. Unihaeaki nōmo himu tumurumo hemakapunie. Nōmo homo soko eaki hemakapunie. Nōmo himu hemakapuramo soko eaki hemakapunie.

(Lo 6:5)

³⁸ Ane somemane namo kakaro fanapo. ³⁹ Arirakano somemane metāne soko hakásá yinesane oyapo. Nōmo níane himu tumurumo hemaka apura ayíáka nōmo aporo tákéane ayíáka himu tumurumo hemakapunie.

(Wok Pris 19:18)

⁴⁰ Asiamo somemane tetáne nōmo reaki somerakane porofete aporomo somesane soko, Mosesemo somemane popasane soko kepoane hakásá yiyapo.” Aíyaka Yasumo somesapo.

“*Keresoane mayíáka hemakapurakarire?*” Aíyaka Yasumo Fere se aporoaki akai kaisiane oyapo.

Maka 12:35-37; Ruki 20:41-44

⁴¹ Fere se aporo sarimaraka risia maiya amo, Yasumo iaki makata akai kairaka, ⁴² “*Keresoane† repo mayíáka hemakapurakarire?* Epamo wainepe pekea Keresoane faserepeakosare?” Airakano ipu someraka, “Tefetemo wainepe pesa aporo ira á Keresoane faserepeakosapo.” ⁴³ Airakano Yasumo someraka, “Keresoaki Tefetemo someraka, ‘Nōmo Unihaepo.’ Aíyaka Ho Kotesamo tarirakano somesapo. Somesane wate fana Kotimo sawia popasane oyapo. ⁴⁴ Tefetemo someraka, ‘Nōmo Unihaeaki, Unihae Kotimo someraka, “Ne ano hokono tumuru takua kayae. Hokono tumuru takua aporo hokopusua akaya ayíáka kayae. Kakeno nōmo yunuane nōmo rukumosakatapiakosapo,” aisapo.’ Aíyaka Kotimo somesane Tefetemo popahoareapo.

(Buk Song 110:1)

⁴⁵ Asiamo Tefetemo Keresoaki ‘Ne nōmo Unihaepo,’ aisane marirakano aisare? Arirakano makasa kauamo ipi hokosa wainepe pukusaki Unihaepo, airafapo. Asiamo Tefetemo Keresoaki Unihaepo, aisasamo, Tetefe takapeasiraka keresoane wate fana yaiya reapo. Asiāne repo someraka, ‘Tefetemo wainepe pesa á Kereso faserepeakosapo,’ airakae.” ⁴⁶ Airakano ipu kaikia some paripesafapo. Maiya amo aporo hakásá metamo Yasuaki eféra hunia makata akai kaisiafapo. Ipu someane Yasumo hurutapirakano asekeia ipu makata meta eféra hunia akai kaisiafapo.

23

“*Kotimo somemane tisa aporomo soko Fere se aporomo soko arakira ayíáka repo soko ayíáka rakiakopo,*” aíyaka Yasumo somesane oyapo.

Maka 12:38-40; Ruki 11:43, 46; Ruki 20:45-47

¹ Sereamo aporo hinamo yakai sarimasaki soko ipi aporo hakásá puraki soko Yasumo someraka, ² “Somemane Mosesemo some kasane Kotimo somemane tisa aporomo soko Fere se aporomo soko some kepoane some karápo. Some karáka tisa aporomo wakapuaka some akara ayíáka, ipu ayíáka some karápo.

³ Ipu some akarane repo kakimakanie. Asiamo i arisia ayíáka re risikiakopo. Asiamo ipu aporo metakiraki some karakano yia someane ipu namina kekemarakaka rakirafapo.

⁴ Aporo metakiramo makata fato umisa makatihoasimo ipu taporaka aporoamo kinua makatiraka marerapo. Makatiraka marekea ipu wakasema soko ararenafapo.

⁵ Ararenafaraka namina yiamo aporomo asekeasimo mafekemarakaka rakirapo. Asiamo Kotimo some sawia, popasane weroraka hokona soko taporaka, hikumisia soko taeraka, wakasema popake tumuraka taenapo. Arirakano ipu pasu ososane, pasu ke huhu hohoroposa osonapo.*

⁶ Ipu makata sesenane oyapo. Hokono akera maiya amo aporomo i makáraraka hohopusuamo sea i tokoako seane iaki tarisimo sesenapo. Arirakano Yu aporomo

† 22:42: Kereso yano motosa amo kepoane oyapo. Kotimo unihaeaka rekeasimo murikimasa aporo ayapo.

* 23:5: Pasu ke huhu hohoroposa osona amo kepoane oyapo. Kotimo Moseseaki someraka, “Nōmo somemane repo meraruhokohoamo repo pasu ke huhusa osohoanie,” aisapo. Asiamo aporomo asekeia Fere se aporo makárahoasimo ipu pasu ke huhu hohoroposa ososapo.

sarimana apea pukua aporo hinamo su sarimaraka toakipoko, i kumisi neneme sapea sea tokoako sesenapo. ⁷ Arirakano aporo hinamo sarimaraka risiakipoko i purakano, aporomo i hokono mokoasimo sesenapo. Hokono moraka iaki makáraraka someraka, ‘Tisao,’ aihoasimo Fere se aporomo kára sesenapo.

⁸ Arirakano aporo metamo reane makáraraka someraka, ‘Tisao,’ aihoasimo rakiakopo. Asiamo repo tisane ano hákasapo. Re su kakimara aporo hinamo hakásá yineraka risikinapo. ⁹ Isiapo Ata Koti hákasa hepene yapura rekenapo. Asiasamo hauaka wo aporo meta makáraraka repo Ata Koti area ayíáka rekeasimo makárahokopo. ¹⁰ Aporo metamo reane makáraraka someraka, ‘Unihaeo,’ aihoasimo rakiakopo. Repo unihae hakásá rekenapo. Eane Keresopo. Kotimo eane unihaeaka rekeasimo murikimasapo.

¹¹ Arirakano re namina aporo meta fanaraka reke aporoamo aporo wakase-mamo arakira ayíáka aporo supoko arareraka rakinie. ¹² Asiamo aporomo e ipiane makárarakan aporoane Kotimo mawakasemahokosapo. Arirakano aporomo ipiane mawakasemarakano aporoane Kotimo makárahokosapo.” Aiyaka Yasumo somesapo.

Kotimo somemane tisa aporo soko Fere se aporo soko himu tetáraka risiane oyapo.

Maka 12:40; Ruki 11:39-42, 44, 52; Ruki 20:47

¹³ Yasumo someraka, “Kotimo somemane tisa aporo re soko, Fere se aporo re soko enahoasifareapo. Re asekeanie. Re su aporo himu tetaraka arisie. Aporo hinamo Koti unihaeaka asekeea rea paohokohoamo iane repo matasonapo. Asiamo re Koti unihaeaka asekeea rea paohoanafonoraka hisiraka risikinapo. Aporo hinamo metakira Kotiaki paohoko sesesane repo matasoraka risikinapo. ¹⁴ Kotimo somemane tisa aporo re soko, Fere se aporo re soko enahoasifareapo. Re asekeanie. Re su aporo himu tetaraka arisie. Repo hinamo yaromo ape soko, makata kemo soko hakimorapo. Hakimoraka yia, Kotiaki kurikuriana maiya amo some nokone pukua kurikurinapo. Aporomo aseraka, ‘E kotehoareapo,’ aihoasimo aiyaka kurikurinapo. Ana akipoko re fanasihokosane kárahokosapo.

¹⁵ Kotimo somemane tisa aporo re soko, Fere se aporo re soko enahoasifareapo. Re asekeanie. Re su aporo himu tetaraka arisie. Fere se aporo hoanafonosa hakásá Fere se aporohoasimo repo pasimako kimisi kára purapo. Pukua hauaka kára koraka nina, hea soko yaoraka ayíáka koraka risirapo. Koraka risike aporo hakásá pasimarakano, aporoane Fere se aporo pariraka, aporoane repo yiamo heao hauaka pusierakanapo. Asiamo aporoamo watikiaka rakirakan, ipi watikiaka arakiramo repo watikisane marokehokosapo. Asiamo aporoamo watikiaka rakisimo, tarira kepoane repo.

¹⁶ Aporo hi taku tetákara fausamo aporo metakiraki ikia kara atarira ayíáka repo ayíáka atarire. Re asekeanie. Aporo reo, enahoasifareapo. Repo someraka, ‘Aporomo aumaraka someraka, “Kotimo apepo.”’ Aiyaka yano hokoa ipi aumaraka somesane metakariane sihoasireapo. Arirakano Kotimo apea koróto taesane aporomo aumaraka someraka, “Korótopo.” Aiyaka yano hokoa ipi aumaraka somesane parosa yaiya kakakosapo.’ Aiyaka repo somerapo. ¹⁷ Aporo hi taku tetákara fausane himu maparitaesa arisia ayíáka, re ayíáka risikinapo. Asiamo meta mane fanare? Koróto fanare? Kotimo ape fanare? Asiamo koróto Kotimo apea taesasamo Kotimo apeane namo kakaro kotesapo.

¹⁸ Arirakano repo someraka, ‘Aporomo aumaraka someraka, “Eke karoraka taesapo.”’ Aiyaka yano hokoa ipi aumaraka somesane metakariane sihoasireapo. Arirakano eke karosa kima Kotiaki makata yaku kakakosakipoko taesane, aporomo aumaraka someraka, “Makata taesa ayapo.” Aiyaka yano hokoa ipi aumaraka somesane parosa yaiya kakakosapo.’ Aiyaka repo somerapo. ¹⁹ Aporo hi taku tetákara fausane himu maparitaesa arisia ayíáka re ayíáka risikinapo. Asiamo meta mane fanare? Eke karosa kima Kotiaki makata yaku kakakosakipoko makata taesane fanare? Ekeane fanare? Asiamo eke taehoanafonosa Kotiaki makata yaku kakakosane mayíáka paiyakosare? Paiyanafonoraka mayíáka Kotiaki kakakosare? Pairakano makata yakuane haku kotesa susu parihokosapo. Kotesa susu parihokosamo ekeane fanare?

²⁰ Asiamo aporomo aumaraka someraka, ‘Eke karoraka taesapo.’ Aíyaka someraka eke karoraka taesane soko, eke karosa kima makata taesane soko, suane aumarapo.

²¹ Arirakano aporomo aumaraka someraka, ‘Kotimo apepo.’ Aíyaka aumaraka somerakano, Kotimo apeane soko, Kotimo apea makata risiane soko, aumarapo. ²² Arirakano aporomo aumaraka someraka, ‘Hepene yapura ayapo.’ Aíyaka somerakano Koti unihaeaka rea amo sea ane aumaraka, Koti ipiane sea á kayasamo Kotiane soko aumarakanapo.

²³ Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Repo sereto asia kaeyako su mosane, tokonasu namina moraka, kaeyako hakásane Kotiaki karápo. Makata wakasemane repo karakayia, somemane kára metakira kakipayanapo. Koteaka takekea hemakapuniesane repo hemakapurafapo. Aporo meta kamenakaraka hemakapuniesane repo hemakapurafapo. Kotiaki himu hakásaraka hemakapuniesane soko, repo ayíáka hemakapurafapo. Asiamo makata kaeyako hakása Kotiaki karáne soko, somemane metakira kakipayasane soko, su kakimakafunureapo.

²⁴ Aporo hi taku tetákara fausamo aporo metakiraki ikia kara atarira ayíáka repo tarirakanapo. Re risiane uyáka risikinapo. He nakosa saro inini huruperakano makata wakasemane repo maka mamakatenapo. Mamakateraka yia repo saro kamo asia kára ane neketurapo.†

²⁵ Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Repo kapo soko, meraki soko, kima takua hákasa kusuraka, kakarua kusuhoanafonona ayíáka reane asiapo. Re kaum siaraka risikiako ayiane, re himua makata watikisa komarukua risike ayiane. Ayíáka risike repo makata hakimokoako, hemakapukua arirakano repo namina hemakapusuane soko, kekemaraka ayíáka re risikinapo.

²⁶ Ferese aporo re, aporo hi taku tetákara fausa arisia ayíáka risikinapo. Kapo kakaruane soko, meraki tuane soko, fana kusuhoanie. Kakaruane kusuraka faraka, kima takuane soko kotehokosapo. Aina ayíáka repo himu hemakapurane fana makotehoanie. Makoterakano re sia koteaka risikiakosapo.

²⁷ Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Aporo kusua hauaka murisiane kima yapura pene pakaesamo pairapo. Paisiane kima yapura kotesa nine, tamo atura aporo kusua toresa kikiane tokenapo. Aina ayíáka re ayíáka risikinapo.

²⁸ Arirakano aporomo re aseraka hemakapuraka, ‘I aporo kotesapo.’ Aíyaka hemakapusua nine, re himu tetáraka hemakapurane soko himu watikisane soko risikinapo.” Aíyaka Yasumo somesapo.

Kotimo somemane tisa aporo soko, Ferese aporo soko, fanasihokosane motoakosane oyapo.

Ruki 11:47-51

²⁹ Yasumo efera hunia someraka, “Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Kotimo some kará porofete aporo soko, Kotiaki hemakapukua risira aporoane soko, rusua kusua hauaka murisiane repo rakikia makotenapo. ³⁰ Makoteraka repo someraka, ‘Isiapo makasa kaua kekema risia maiya amo, isu risiisa satiki, makasa kaua kekema arareraka, Kotimo some kará porofete aporoane rufunufapo.’ Aíyaka repo somerapo. ³¹ Repo namina kepoane hufitaeraka somerakae. Repo makasa kaua kekemamo Kotimo some kará porofete aporoane rusua kusuapo. Arirakano makasa kaua kekema hakasamo wainepe pesane repo. Repo ainane soko hakása yiyapo. ³² Asiamo repo makasa kaua kekemamo ayikanafonosane repo ayikanie.

† ^{23:24:} Makata watikisa wakasemane Ferese aporomo asekepayanafapo. Arirakano makata watikisa kárane ipu asekepayarakaya iyiya rakiraka risikinapo.

³³ Re heseke ayireapo. Repo makasa kaua kekema heseke asía amo wainepe pesane pesasamo re soko, heseke ayireapo. Heao hauaka á re pusiehokusane mayíáka metakari-akosare? Metakariakosafapo. ³⁴ Asiamo repo kaiyisimo Kotimo some kará porofete aporomo soko, koteaka hemakapukua takekeea somera aporomo soko, Kotimo somemane tisa aporomo soko some kakako nōmo pusiehokusapo. Perakano repo aporo metakira ira matopesa paremarekeea rusua kukusapo. Aporo metakira Yu aporomo sarimana apea sako patesamo rukusapo. Rukua mokoatikirakano aporoane tekatarikia pukusapo. Pukua ape meta pukua, apea soko mokoatikirakano, tekatarikia pukua, ape meta ayíáka tekatarikia koraka tokoakosapo.

³⁵ Asiamo Kotiaki hemakapukua rea aporo, Aepo fana rusua kusuakipoko, amo patera aporo metakira soko rusua kusuapo. Keseke Perekayamo maeya Sekaráya Kotimo apea rusua kusuapo. Eke karosa taesane makama taku raraka Kotipoko ape rumu kikisisane makama taku roraka tipia reane e rusua kusuapo. Asiamo repo makasa kaua kekemamo watikiaka hemakapukua rakisia ayíáka, repo soko watikiaka rakiako hemakapurapo. ³⁶ Nōmo reaki kakaro somerakaripo. Aporo su koteaka risiane rusua kusuasamo, aporo hinamo maiya omo risiane Kotimo fanasihokusapo.” Aíyaka Yasumo somesapo.

Yarusarame sitia aporo hinamo risiane Yasumo hemakapusuane oyapo.

Ruki 13:34-35; 19:41-44

³⁷ Yasumo someraka, “Yarusarame aporo hinamo reo, repo Kotimo some kará porofete aporoane rusua kurakasupo. Kotimo pusiesa aporoane repo ekemo karerakasupo. Yarusarame aporo hinamo reo, mena kaiyiamon mena mano sarimaraka auamo mafainapo. Aina ayíáka efera hunia soko, efera hunia soko, nōmo re sarimaraka ayiakakosapoko asiane, repo anoaki hisisapo.

³⁸ Hao, kaisie. Yarusarame aporo hinamo reo, repo ape kamaka risikiakosapo. Apea aporo hinamo waka risikiakosafapo.

³⁹ Nōmo reaki kakaro somerakaripo. Repo ano efera hunia aseakosafapo. Arirakano keseke repo someraka, ‘Kotimo pusiesa aporo aperane Kotimo makotehoasimoripo,’ aíyaka somerakano maiya amo repo ano aseakosapo.” Aíyaka Yasumo somesapo. (*Buk Song 118:26*)

24

Kotimo ape ekeane kokoromokotehokusane Yasumo somesane oyapo.

Maka 13:1-2; Ruki 21:7-19

¹ Yasumo Kotimo apeane metakarikia purakano, ipi aporo hakása puramo Kotimo apeane somehokusakipoko Yasuaki tarisiapo. ² Tarirakano Yasumo someraka, “Kotimo apeane repo aserakarire? Hao, kaisie. Nōmo reaki kakaro somerakaripo. Apeane eke ripaka kisiane ekeane ipu kokoromokotesa hakása hakásaraka tokoakosapo,” aisapo.

Makata umisa kekepo faserepeakosane oyapo.

Maka 13:3-13; Ruki 21:7-19

³ Yasu ūri Orofea hikia kayakipoko ipi aporo hakása pura pekea, namina hakása toke Yasuaki akai kairaka, “Masinaka Kotimo eke apeane kokorotaehokusare? Arirakano ne paripeakosane makata yakapamo isuaki tariakosare? Arirakano maiya fahokusane makata yakapamo tariakosare?”

⁴ Airakano Yasumo someraka, “Aporo metamo reaki kotafe somerakano someane kakimrapaka asekeanie. ⁵ Aporo yakai peakosapo. Pekea ipu kotafe someraka, ‘Ano Keresopo. Unihae makárasane anopo.’ Aíyaka ano yano hokoa kotafe somerakano, someane aporo hinamo yakaimo kakimakosapo. ⁶ Aporo metakiramo aporo metakirayaki werakanaporakano, repo kaiyakosapo. Arirakano aporo metakiramo aporo metakirayaki werakanapo, aíyaka kotafe tokomako pukua somerakano, repo kaiyakosapo. Repo kairaka himu fahokopo. Aporomo weakosane fana faserepeakosapo. Arirakano fahokosa maiyane haru faserepeakosafapo. ⁷ Arirakano aporo hauaka metamo aporo hauaka metayaki wekea, arirakano kamani metamo kamani metayaki werakano

ayiakakosapo. Arirakano hauaka kekepoa makata nakosa farakano aporo hinamo kára meamohokosapo. Arirakano hauaka kekepoa momani yakai peakosapo. ⁸ Asiamo hinamo ipi himura hokosa kayane takapeakosakipoko kára mokoweraka mati tuaka pukua aina ayíáka momani perakano soko, makata nakosa farakano soko, yunu werakano soko, makata umisane kepomareraka ayiakakosapo.

⁹ Maiya amo aporo watikisamo re mokoatikihoasimo waseremokoa karikia pukusapo. Karikia pukua re rusua kukusapo. Re ano patera asesakipoko aporomano hauaka sua risiamo reaki hisihokosapo. ¹⁰ Hisirakano ano patera asesa aporo hinamo yakaimo ano metakarikia poparitariakosapo. Poparitarikia metakiramo metakira parakehokosapo. I namina yia, metamo metaki hisi, arirakano metamo metaki hisi ayíáka risikiakosapo.

¹¹ Arirakano kotafe some kará porofete aporo yakai fasereperaka some karakano, aporo hinamo metakiramo kotafe someane kakimakosapo. Kakimaka hasaka hemakapukusapo. ¹² Arirakano aporo hinamomo watikiaka rakirane kárahokosapo. Káraraka anoaki patera asesa aporo hinamo yakaimo himu hakásaraka hemakapukua sesenane fahokosapo. ¹³ Arirakano aporo hinamo Kotiaki patera asesane metakarirafaraka, yaiya hemakapukua risike, rakipe pukua rosaka taerakano, aporo hinamoane Kotimo mafasiakosapo. ¹⁴ Ano unihaeaka reane aporomano hauaka sua risiamo kaiyisimo, hauaka sua anoaki patera asesa aporo hinamo suamo some kotesane some kakakosapo. Some kasakipoko, fahokosa maiyane faserepeakosapo.” Aíyaka Yasumo somesapo.

Makata watikisa faserepeakosane oyapo.

Maka 13:14-23; Ruki 21:20-24

¹⁵ Yasumo someraka, “Wate fana Kotimo some kará porofete aporo Taniomo someraka, ‘Koti mawakasemahokosakipoko Kotimo apea aporomo makata watikisane mareakosapo.’ Aíyaka Taniomo somesane faserepeakosapo. Arirakano makata watikisane fasereperakano repo sawi one menona aporo hinamomo aseraka Yasumo someane repo hemakapukusapo. ^(Daniel 9:27; 11:31; 12:11)

¹⁶ Asiamo Yutía aporo hinamo reo, makatane fasereaperamo re tekatarikia ūria hinie.

¹⁷ Maiya amo aporo ape kopoá* reane ipi ape kakarua makata kemo mokoako puane siahoasifareapo. Asiamo ipi ape kopo rea aeyaka foaka takaripunie. ¹⁸ Aporo meta ipi hemo tipia reane apea pasu mako puane siahoasifareapo. ¹⁹ Hinamo umisa soko, hinamo hokosa kiri kaíyia soko, tekatarikia hiane kára wfafuhokosapo. ²⁰ Yakimo soko metao, fenena maiya amo soko metao, tekatarikia pukusa maiyane fasereperapaka kurikurihoanie. ²¹ Re tekatarikia pukua arisia maiya amo mokoatikihokosane kárahokosapo. Hauaka kara one kepomaresa maiya amo soko, yumo soko mokoatikihokosane fana asiafapo. Arirakano mokoatikiraka faraka, keseke ayíáka mokoatikihokosafapo. ²² Arirakano mokoatikihokosa maiya fasereaperamo, yaiya mokoatikiraka risikinone, aporo hinamo suane kukua keakosapo. Kukua kerapaka Kotimo murikimasa aporo hinamoane hemakapuraka, mokoatikihokosa maiya sapeane Kotimo rukupateraka makitakehokosapo.

²³ Arirakano aporo metamo reaki someraka, ‘Hao, kaisie. Aporo one Unihae makárasane epo. E Keresopo,’ aihokosapo. Arirakano aporo metamo reaki someraka, ‘Hao, kaisie. Kereso pekea, rekenapo,’ aihokosapo. Asiamo aporo metakiramo ayíáka somerakanone, ipu someane kakimakopo. ²⁴ Aporo metakira kotafe Kereso pariraka faserepeakosapo. Arirakano aporo metakira kotafe porofete aporo pariraka faserepeakosapo. Fasereperaka aporo hinamomo i patera asekeasimo ipu makata wakapu rakira kára rakiakosapo. Rakirakano aporo hinamomo asekeea fofahokosapo. Kotimo murikimasa aporo hinamomo ipu makata ainane kau aseako kirimaraka rakiakosapo. ²⁵ Kaisie. Maiyane faserepeasiraka makata ayiakakosane nōmo reaki somerakanapo.

* ^{24:17:} Yu aporomo ape kopoane motokotaeraka kirapo. Kikimaka namina hikia auamaka ape kopo torapo. Yapura hiakosakipoko inima wareware ape pasakaia rakirapo.

²⁶ Asiamo aporomo reaki someraka, ‘Kereso ima yaoa rekenapo,’ Airakano kakimaka aseako pukupo. Arirakano aporo metamo someraka, ‘Kereso apea fararekenapo.’ Airakano kakimakopo. ²⁷ Arirakano maiya apera takua yamakereraka faesane, maiya apura takua soko faenapo. Aina ayíáka ano aperamo ayíáka peakosapo. Aporomanomo Tákeane anopo. ²⁸ Arirakano makata kusua kakeno mena sakarekepomo sarimanapo.” Aíyaka Yasumo somesapo.

Yasu paripeakosane oyapo.

Maka 13:24-27; Ruki 21:25-28

²⁹ Yasumo someraka, “Mokoatikihokosa maiyane faraka wate foaka sere maíyamo erehokosapo. Ere maíyamo faehokosafapo. Ti makata hepene yapunaka hauaka wo hurupepehokosapo. Hepene yapura makata kára risiane mahohohokosapo. ³⁰ Maiya amo hepene yapunaka Aporomanomo Táke ano paripeakosane makata wakapu kára metamo tariakosapo. Makata tarirakano hauaka kara wo aporomanomo su risiamo aseraka hihiripuhokosapo. Hihiripuraka aseane ano hepene yapunaka ti pakae a wakapuyaki faesa kárayaki perakano aseakosapo. ³¹ Aserakano pikoro rukusapo. Rurakano hepene aporo yakai nōmo pusierakano peraka, nōmo murikimasa aporo hinamo hauaka sua risiane pasimokoakosapo. Nōmo murikimasa aporo hinamo patera takua risiane soko, ketaya takua risiane soko, ketaya takua risiane soko, kumisi neneme takua risiane soko, hauaka sua nōmo murikimasa aporo hinamoane pasimokoa sarimahokosapo.” Aíyaka Yasumo somesapo.

Ira fokeane Yasumo takumeaka somesane oyapo.

Maka 13:28-31; Ruki 21:29-33

³² Yasumo someraka, “Ira foke takumeane oyapo. Ira foke parusane yoaearakano repo aseraka hemakapuraka, ‘Kupa kakako makerakanapo.’ Aíyaka repo hemakapurapo. ³³ Aina ayíáka nōmo makata ayiakakosaposane fasereperakano aseraka repo hemakapuraka, ‘Yasu peako makerakanapo,’ aíyaka hemakapunie. Arirakano, ‘Aporo ape kakarua yoroako ikia koro makeraka area ayíáka, Yasu ayíáka peako makerakanapo.’ Aíyaka repo hemakapunie. ³⁴ Nōmo reaki kakaro somerakaripo. Aporo hinamo maiya hakásá yiamo hokono murisiane i kukusiraka hitaferaka arisiamo, nōmo ayiakakosaposane fasereperakano aseraka, ayiana ayareapo. Aíyaka aseakosapo.

³⁵ Asiamo ti yapurane soko hauaka kára one soko fahokosapo. Arirakano nōmo someane fahokosafapo. Yaiya rekeakosapo.” Aíyaka Yasumo somesapo.

“Ano paripeakosa maiyane aporo metamo hemakapurafapo.” Aíyaka Yasumo somesane oyapo.

Maka 13:32-37; Ruki 17:26-30, 34-36

³⁶ Yasumo someraka, “Ano peakosa sereane soko maiya hi awane soko aporomanomo hemakapurafapo. Hepene aporomo soko Kotimo hokosa nōmo soko hemakapurafapo. Nōmo Atamo ipi hákasamo hemakapurapo. ³⁷ Arirakano Noa rea maiya amo aporo hinamo risia ayíáka ano paripeakosa maiya amo aporo hinamo ayíáka risikiakosapo.

³⁸ Noa rea maiya amo he peasiraka aporo hinamomo makata nakosa soko, he soko nekea aporomo hinamo arumokoa, hinamomo aporo pukua ayíáka risiapo. Ayíáka risiakipoko Noa kasua ripasapo. ³⁹ Riparakano aporo hinamo suane meraruamo risiakipoko he hukupesapo. He hukuperaka makata su mokoa pusuapo. Asiamo Aporomanomo Táke anoane pariapera maiya amo Noa rea maiya amo asia ayíáka ayiakakosapo.

⁴⁰ Ano pariapera maiya amo, aporo tetá hemoa risiane meta nōmo pasimaraka, meta yia metakariakosapo. ⁴¹ Hinamo tetámo makata rakiraka toane, meta nōmo pasimaraka, meta yia metakariakosapo. ⁴² Ayiakakosasamo repo asekea risikianie. Repo unihae paripeakosa sereane repo hemakapurafaraka asekea risikianie.

⁴³ Arirakano aporo makata hakimoramó aporo metamo apea makata kemo hakimokoako perapo. Makata kemo hakimokoako peakosane, maiya hi awane ape wafayamo hemakapurafapo. Ere wakopemo soko metao, ere tipiamo soko metao,

fia makeanamo soko metao, hakimora aporo apea tau peakosane, ape wafayamo hemakapurafapo. Hemakapunafononasamo sere soko, ereamo soko, warafaraka ape asekea rerapo. ⁴⁴ Aina ayíáka repo soko ayíáka asekea risikianie. Aporomanomo Táke anoane paripeakosa maiyane soko, maiya teane soko, maiya hi awane soko, repo hemakapunafonosasamo re asekea risikianie.” Aiyaka Yasumo somesapo.

Aporo raipa risia Yasumo takumeaka somesane oyapo.

Ruki 12:41-46

⁴⁵ Yasumo someraka, “Aporo raipamo koteaka hemakapuraka ipi wafayaki himu hakásaraka hemakapukua uyáka rerapo. Wafayamo eaki someraka, ‘Nōmo ape aseke ake rekeanie. Aporo apea risiaki makata nakosa sia kakanie. Yapa marekea kakakopo.’ Aiyaka someaka marekea pukua, ⁴⁶ keseke pariperaka aseane aporo raipamo rakiniesane rakirakano aseke ake kára sesehokosapo. Seseraka e makotehokosapo.

⁴⁷ Ape wafayamo ipi aporo raipane makáraraka eaki someraka, ‘Nōmo makata kemo suane aseke ake rekeanie,’ aihokosapo.

⁴⁸ Arirakano aporo raipa watikisa uyáka rerapo. Aporo raipa watikisamo hemakapuraka, ‘Ape wafaya pusua haru paripeakosafapo.’ ⁴⁹ Aiyaka hemakapuraka aporo raipa metakira he watikisa nekea himu maparitaeraka, amano rura aporoakiyaki hakāsa toke, he watikisa nenapo. ⁵⁰ Ayíáka reke ipi wafaya paripeakosa sereane soko, maiya hi awane soko, hemakapunafonoraka reakipoko, ipi wafayane pariperapo. ⁵¹ Pariperaka aporo raipa fanasiraka rukua marekea eaki someraka, ‘Ne pusie. Aporo himu tetáraka risia akiyaki rekeako pusie. Hauaka á i risike hihiripuraka akai kirisiraka risikinapo. Á ne soko rekeako pusie.’ Aiyaka ape wafayamo somehokosapo.” Aiyaka Yasumo takumeaka somesapo.

25

Hinamo sakora kaeyakosu toane Yasumo takumeaka somesane oyapo.

¹ Yasumo someraka, “Unihae paripeakosa maiya amo, Koti unihaeaka aseke aareamo asia ayíáka, ayiakakosane oyapo. Hinamo sakora kaeyako sumo nafa mokoa ape metakarikia aporo hinamo kawe arumasane ikia kara sapenako pusuapo. ² Hinamo kaeyako suamo kakoreasu metamo koteaka hemakapusuafapo. Arirakano hinamo kakoreasu metamo koteaka hemakapusuapo.

³ Asiamo koteaka hemakapunafonosa hinamomo nafa hákasa mokoa puraka, keresene petoroa takamaraka mokoa pusuafapo. ⁴ Arirakano koteaka hemakapusua hinamomo nafa mokoa keresene soko petoroa takamaraka mokoa pusuapo. ⁵ Arirakano aporo hinamo kawe arumasane haru peanafonorakano hinamo kaeyakosu pusuane wakakorakan wasápo.

⁶ Waka kesakipoko ere tipiamo aporo metamo wáraka, ‘Aporo hinamo kawe arumakosane apere. Repo soko aseko peae.’ Aiyaka wásapo. ⁷ Wárakano hinamo kaeyako suane turikia tarikia nafa pakimokoa, ⁸ koteaka hemakapunafonosa hinamomo koteaka hemakapusua hinamoaki someraka, ‘Isiapo nafane kopaka apure. Repo keresene isiapo nafa wakasema takamarasie.’ ⁹ Airakano koteaka hemakapusua hinamomo someraka, ‘Wae, isiapo reaki takamahoane siahoadifareapo. Isu supoko kereseneane siahoadarakapo. Keresene fanapaka re namina sitaoa pukua haku roporasie.’

¹⁰ Airakano ipu keresene ropohoko pusuapo. Pusuakipoko aporo hinamo kawe arumakosane pesapo. Perakano keresene siaraka takamokoa pesa hinamoane eyaki namina hakāsa makata nakosa apea yorokoa hisiapo. Hinakano ikia koro mapirisaiapo.

¹¹ Mapirisaikipoko koteaka hemakapunafonosa hinamo kakorea suane keseke aperaka hauaka moro aeyaka wáraka, ‘Unihaeo, Unihaeo, ikia koro ropakamasie. Isu peakoripo.’

¹² Airakano unihaemo someraka, ‘Nōmo kakaro somerakaripo. Reane nōmo aserafapo.’ Aiyaka epo somesapo. ¹³ Ayiakakosasamo repo aseke ake risikianie. Asiamo ano paripeakosa maiya teane soko, maiya hi awane soko, repo hemakapunafonoraka aseke ake risikianie.” Aiyaka Yasumo somesapo.

Aporo raipamo makata rakisiane Yasumo takumeaka somesane oyapo.

Ruki 19:11-27

¹⁴ Yasumo someraka, “Unihae paripeakosa maiya amo ayiakakosane oyapo. Hemo wafaya kimisi pukusakipoko ipi aporo raipamo ipi moneane asekea risikiasimo peaer-akano pesapo. ¹⁵ Asiamo aporo raipamo ainane hemo wafaya amo aseraka, iaki makata hakásá yinesa kasafapo. Aporo hakásá metamo namo kakaro wakapuaka rakisiasamo eaki fae taosene kina (K5,000) asekea rekeasimo kasapo. Arirakano aporo hakásá metamo wakapuaka rakisiasamo eaki tu taosene kina (K2,000) asekea rekeasimo kasapo. Arirakano aporo hakásá metamo wakasema wakapuaka rakisiasamo eaki wane taosene kina (K1,000) kasapo. Kaka marekea ipi kimisi pusuapo.

¹⁶ Kimisi pusuakipoko fae taosene kina mosa aporoamo pisinisi rakiraka, fae taosene kina meta soko, mokoa akiyaki sarimasapo. ¹⁷ Arirakano tu taosene kina mosa aporoamo pisinisi rakiraka, tu taosene kina meta soko, mokoa akiyaki sarimasapo. ¹⁸ Arirakano wane taosene kina mosa aporoamo hauaka rakea, ipi asekea rea aporoamo wane taosene kina kasane kokomaresapo. ¹⁹ Asiamo maiya kára faraka aporo raipamo sia rakisiarihoamo, hemo wafayamo aseako paripesapo.

²⁰ Pariperakano fae taosene kina mosa aporoamo fae taosene kina meta soko mokoa akiyaki sarimasane, hemo wafayaki kasapo. Karaka epo someraka, ‘Unihaeo, nōmo anoaki fae taosene kina karakano, nōmo pisinisi rakiraka fae taosene kina meta soko, mosane nepoko mone suane taesa ayapo.’ ²¹ Airakano hemo wafayamo someraka, ‘Koterakae. Ne aporo raipa kotesapo. Nōmo anoaki himu hakásaraka hemakapukua koteaka rakireapo. Nōmo neaki wakasema asekea rekeasimo maresane nōmo koteaka rakisiasamo, nōmo makata kára asekea rekeasimo nōmo mareakosapo. Nōmo unihaeane anopo. Nōmo neaki seseripo. Nōmo soko sesehoanie. Iti hakásá seseaka risikiakosapo,’ aisapo.

²² Arirakano tu taosene kina mosa aporoamo hemo wafaya rea pekea someraka, ‘Unihaeo, nōmo anoaki tu taosene kina karakano, nōmo pisinisi rakiraka tu taosene kina meta soko mosane nepoko taesa ayapo.’ ²³ Airakano hemo wafayamo someraka, ‘Koterakae. Ne aporo raipa kotesapo. Nōmo anoaki himu hakásaraka hemakapukua koteaka rakireapo. Nōmo neaki wakasema asekea rekeasimo maresane nōmo koteaka rakisiasamo, nōmo makata kára asekea rekeasimo nōmo né mareakosapo. Nōmo unihaeane anopo. Nōmo neaki seseripo. Nōmo soko sesehoanie. Iti hakásá seseaka risikiakosapo,’ aisapo.

²⁴ Arirakano wane taosene kina mosa aporoamo hemo wafaya rea pekea someraka, ‘Unihaeo, nōmo hemakapuraka, “Ne aporo warepo. Ne ni hemo wafaya rekeno yia, aporo raipamo nepoko nōmo hemoa makata porosane, wate perakano, nōmo makasie, airapo.”* Aíyaka nōmo hemakapusakipoko ²⁵ ano namoraka reke nōmo moneane hauaka rakea kokomaresapo. Kokomaresane kefomaka nōmo ní menane neaki karakanapo.’ ²⁶ Airakano hemo wafayamo someraka, ‘Ne aporo raipa namo kakaro watikisapo. Ne kau hisiraka rakikia are. Nōmo hemakapuraka, “Nōmo hemo poroanafonoraka makata nakosa morapo.”’ ²⁷ Aíyaka hemakapuraka nōmo moneane nōmo pánikia motoafunureapo. Motorakano mone wakasema meta soko kima ripaka mareafunupo. Ano pariperaka mone umuraka taesane soko, mone wakasema ripasane soko, mokoafunupo,’ aisapo.

²⁸ Asiasamo hemo wafayamo aporo metakiraki someraka, ‘Wane taosene kina ipiaki asekea rekeasimo kasane fimasie. Fimaka tene taosene kina mosa aporoaki wane taosene kinane kakanie. ²⁹ Asiamo aporomo makata meta toaki, makata meta soko kakakosapo. Karakano ipi menane kára tokoakosapo. Arirakano makata meta tokoanafonosa aporoamo makata meta kakeno fimakosapo. ³⁰ Aporo raipa watikisane yao eresa hauaka

* ^{25:24:} Aporo raipamo wafayamo ainane ereketaesapo. Asiamo hemo soko, makata porosane soko ipimenapo. Hemo wafayamo ipi aporo raipaki makata ropo karapo. Asiamo wate perakano hemo wafayamo morakano ipi watikiaka rakirakanafapo.

takua makasurasie. Hauaka á aporo hinamo hihiripuraka mere kirisiraka risikiakosapo.' Aíyaka hemo wafayamo somesapo." Aíyaka Yasumo takumeaka somesapo.

Unihae mo pekea hauaka wo amano suane takeakosane oyapo.

³¹ Yasumo someraka, "Aporomanomo Tákeane anopo. Ano peraka faesayaki hepene aporo suyaki hakása peakosapo. Peraka ano unihae kárasamo sea faesa susu á kakakosapo. ³² Kakeno ano kumisi nenemea aporo hinamo hauaka su aeyaka karikia perakan sarimahokosapo. Sarimasane nōmo takekea parakuhokosapo. Asiamo saro sipyaki saro nanikoseyaki suasuaraka risiane, saro sipi wafayamo takekea parakuhokosapo. ³³ Parakuraka saro sipi hokono tumuru takua murikia, saro nanikose hokono kasakai takua murikia, ayíáka parakuhokosapo.

³⁴ Arirakano ano unihaeaka reke ano hokono tumuru takua, amano takekea murisiaki úyaka somehokosapo. 'Nōmo Atamo re makotesane peae. Re Kotimo hokosassamo reane nōmo unihaeaka asekea rekeakosapo. Anoyaki risikiako peae. Wate fana hauaka kara one kepomaresa maiya amo, re anoyaki risikiakosane Kotimo maroporaka maresapo.

³⁵ Arirakano ano meamorakano repo anoaki makata nakosa karakasupo. Ano he narirakano repo ano he nasimo karakasupo. Ano kumuku perakan repo apea ano peaeaka pasimarakasupo.

³⁶ Ano makata forokoa reke pasu fasekeno, repo ano arareraka pasu karakasupo. Ano makata takamaka warekeno, repo ano ararerakasupo. Ano tipura makerakano, repo ano ararehoko perakasupo.' Aíyaka nōmo somehokosapo.

³⁷ Aíyaka somerakano Kotiaki ereketae hemakapusua aporo hinamomo anoaki úyaka somehokosapo. 'Unihaeo, ne meamorakano, masinaka isiapo neaki makata nakosa karakasure? Né he narirakano, masinaka isiapo né he nasimo karakasure? ³⁸ Né masinaka kumuku perakan, isiapo né peaeaka pasimarakasure? Né pasu fasekeno, isiapo masinaka neaki pasu karakasure? ³⁹ Né makata takamaka warekeno, masinaka isiapo né ararerakasure? Né tipura makerakano, masinaka isiapo né aseako perakasure?' Aíyaka Kotiaki ereketae hemakapusua aporo hinamoamo somehokosapo.

⁴⁰ Aíyaka somerakano nōmo iaki úyaka some paripukusapo. 'Nōmo reaki kakaro somerakaripo. Nōmo nī mae parisa soko, nī papā parisa soko, hakása meta wakasemaraka reane repo ararerakasuane ano araresapo,' aihokosapo.

⁴¹ Arirakano ano hokono kasakai takua aporo hinamo murisiaki úyaka somehokosapo. 'Re su watikisapo. Satanepoko soko, Satanemo aporo raipapoko soko, ira kopakapunafononane maroporaka maresapo. Re soko ano metakarikia á pusie, aihokosapo.

⁴² Asiamo ano meamorakano repo anoaki makata nakosa karakasufapo. Ano he narirakano repo anoaki he nasimo karakasufapo. ⁴³ Ano kumuku perakan, repo ano peaeaka pasimarakasufapo. Ano makata forokoa reke pasu fasekeno, repo anoaki pasu karakasufapo. Ano makata takamaka warekeno, repo ano araresafapo. Ano tipura makerakano repo ano aseako perakasufapo.' Aíyaka nōmo somehokosapo.

⁴⁴ Aíyaka somerakano, ipu anoaki úyaka somehokosapo. 'Unihaeo, né meamoraka rekeno soko, he nariraka rekeno soko, kumuku perakan soko, pasu fasekeno soko, makata takamaka rekeno soko, tipura makerakano soko, masinaka isiapo né asekepayarakasure?' Aíyaka ipu somehokosapo.

⁴⁵ Aíyaka somerakano nōmo iaki úyaka some paripukusapo. 'Nōmo reaki kakaro somerakaripo. Aporo hinamo wakasemaraka rea hakása meta, repo ararehoanafonaraka, asekepayarakasuane anopo. Repo ano asekepayarakasupo.' Aíyaka nōmo some paripukusapo. ⁴⁶ Asiamo i yaiya fanasihokosakipoko taku atura purakano, Kotiaki ereketae hemakapusua aporo hinamoane Kotiyaki risikiakosakipoko, taku yapura hiakosapo," Aíyaka Yasumo somesapo.

¹ Yasumo makata ayiakakosane someaka faraka ipi aporo hakāsa puraki someraka,
² “Yape tetá faraka, Ape Farimaresa Hemakapuko Hokono Keakosapo. Hokono akera maiya amo, Aporomanomo Táke anoane ira matopesa paremarekea rusua kukusapo. Rusua kukusimo aporomo ano parakehokosapo,” aisapo.

³ Arirakano pirisiti aporo fanane ipi yano motosa Kaiafasapo. Epo apea pirisiti aporo kára soko, Yu aporo sisima soko su sarimasapo. ⁴ Sarimaraka ipu me rukua someraka, “Yasuane mahoperaka waseremaka rusua kukusimo rukusapo. ⁵ Asiamo hokono akera maiyamo, Yasu waseremayane siahoasifareapo. Aporo yakai sarimasamo isuyaki werapaka isiapo waseremakosafapo,” aisapo.

Petene apea wera wape yamona Yasu wamo hinamo metamo rekemaresane oyapo.

Maka 14:3-9; Yone 12:1-8

⁶ Petene apea Saemone toropakesa fasamo apea, Yasu reakipoko ⁷ hinamo meta peraka eke kotesa petoro pariraka rakisiane maka pesapo. Petoro maka pesa á wera namo kakaro wape yamona, mone káramo roponane kesapo. Kesane Yasu teboro makeraka kake makata nenaka kakeno, hinamoamo wera wape yamona Yasu wamo rekemaresapo. ⁸ Rekemarerakano asekea, aporo hakāsa puramo saperaka namina susu someraka, “Hinamoamo werane marirakano nenakamakayia rekemarekea farakanare?
⁹ Werane aporo metaki roporaka mone kára mokoafunureapo. Mone mosane aporo makata forosaki kakafunureapo.”

¹⁰ Airakano ipu hemakapusuane Yasumo asekea someraka, “Marirakano hinamoane mahisihoasimo aiyaka somerakanare? Hinamoamo ano wamo wera rekeamarerane makata rakira kakaro kotesane ayapo. ¹¹ Asiamo aporo makata forosane maiya suamo reyaki hakāsa risikiakosapo. Asiāne ano maiya suamo reyaki hakāsa rekeakosafapo. ¹² Ano kau kunikia motoakosakipoko hinamoamo wera wape yamona ano kau makotera-aka rekemareakosane murikimaka rekemarerakasapo. ¹³ Hao, kaisie. Nōmo reaki kakaro somerakaripo. Hauaka kara wo aporomo anoane some akara maiya amo hinamoamo wera rekemaresane soko aporo hinamomo hemakapusimo ipu somehokosapo.” Aiyaka Yasumo somesapo.

Yutasemo Yasu parakehokosapo, aisane oyapo.

Maka 14:10-11; Ruki 22:3-6

¹⁴ Aporo hakāsa pura hakāsa meta yano motosa Yutase Isekerio ipi pirisiti aporo kára risiakipoko puraka, ¹⁵ hokokaraka someraka, “Nōmo Yasuane parakerakanone repo anoaki yakapa kakakosare?” Airakano ipu Yutaseki someraka, “Isiapo neaki siufa mone hae teti (30)* kakakosapo.” ¹⁶ Aiyaka karakano Yutasemo, “Yasu mayiáka parakehoaepi,” aiyaka Yasu parakehokosa ikia karane kosapo.

Ape Farimaresa Hemakapuko Hokono Akeramo makata nakosakipoko Yasu ipi aporo hakāsa purayaki sarimasane oyapo.

Maka 14:12-21; Ruki 22:7-14; Yone 13:21-30

¹⁷ Farawa Pirianafonona Nakosakipoko hokono kera kepoamarera maiya amo Yasu rea aporo hakāsa pura pekea someraka, “Ape Farimaresa Hemakapuko Hokono Keraka makata nakosane, ape ma sarimaraka taehokosare?” ¹⁸ Airakano Yasumo someraka, “Yarusarame sitia puraka aporo metaki úyaka somehoanie. Tisamo someraka, ‘Ano kukusa maiyane makerakanapo. Makesasamo Ape Farimaresa Hemakapuko Hokono Keakosakipoko nōmo apea nōmo aporo hakāsa purayaki makata nakosapo.’ Aiyaka Yasumo somerakasapo, aihoanie.” Aiyaka Yasumo someaka marerakano, ¹⁹ somesane yaiya kekemaraka aporo hakāsa pura pukua makata nakosa sarimaraka taesapo.

²⁰ Samapu Yasu ipi aporo hakāsa pura kenosuyaki apea pusuapo. Pukua teboro makeraka ²¹ makata nenaka toa maiya amo Yasumo someraka, “Nōmo reaki kakaro somerakaripo. Repo aporo hakāsa metamo ano parakehokosapo.” ²² Airakano ipu himu

* 26:15: Siufa mone hae tetiane mone kárapo.

sesenafaraka mahisiraka, namina kaipe puraka, “Unihaeo, Né parakehokosane anore?” Aíyaka kaipe pusuapo.

²³ Kaipe purakano Yasumo someraka, “Nōmo farawa maka he waira kokoamarera yiamo, aporo metamo soko kokomarerakano aporo ayapo. Aporoamo ano parakehokosapo. ²⁴ Aporomanomo Tákeane anopo. Ano aporomanomo ayiakakosane Kotimo sawia porofete aporomo poparaka maresane yaiya ayiakakosapo. Ano parakeana aporoane fanasihokosane itifiakosafapo. Aporoane hokono mareanafonosa satiki ane kotehoa-funureapo.” ²⁵ Airakano Yutase Yasu parakehokosa aporoamo Yasuaki someraka, “Tisao, né parakehokosane anore?” Airakano Yasumo Yutaseaki someraka, “Ao, nōmo somesa ayapo.” Aíyaka Yasumo somesapo.

Aporo hakāsa puraki Yasumo farawa soko waene he soko kasane oyapo.

Maka 14:22-26; Ruki 22:15-20; 1 Korini 11:23-25

²⁶ Ipu makata nenaka toa maiya amo Yasumo farawa maka Kotiaki suseaka kurikurisapo. Kurikuriraka faraka epo farawa maka mosoraka, ipi aporo hakāsa puraki kaka someraka, “Farawa one repo maka nesie. One ano kaupo,” aisapo. ²⁷ Arirakano kapo he maka Kotiaki suseaka kurikuriraka faraka iaki karaka someraka, “Repo suamo nesie. ²⁸ He one ano yapipo. Kotimo aporo hinamoyaki kawe someaka masane hemakapusimo, ano yapi pukusa ayapo. Aporo hinamo yakaimo himu watikisane yapiamo mafahokosapo.

²⁹ Hao, kaisie. Waene he one nōmo efera hunia hauaka wo nakosafapo. Ata unihaeaka reamo hauaka á reyaki hakāsa sarimaraka waene he kawane nakosapo.” Aíyaka Yasumo somesapo. ³⁰ Aíyaka somerakano ipu Kotiaki kekereraka kesasapo. Kesaraka faraka apeane metakarikia ūri Orofea hisiapo.

“Yasu nōmo aserafapo.” Aíyaka Pitamo somehokosane Yasumo somesane oyapo.

Maka 14:27-31; Ruki 22:31-34; Yone 13:36-38

³¹ Aporo hakāsa puraki Yasumo someraka, “Pipu ereamo ano anakano asekea, repo suamo anoaki himu hakásaraka hemakupurafaraka ano metakariakosapo. Arirakano Kotimo sawia Kotimo somesa popasane oyapo. ‘Saro sipi wafayane nōmo kukusimo rurakano, saro sipi suane teketariakosapo.’ Aíyaka popasane ayiakakosapo. *(Sekaraia 13:7)*

³² Ayiakakosa nine ano maturikia taerakano Kariri hauaka á ano fana pusuakipoko, re keseke pekea isina hakāsa sarimahokosapo.” ³³ Airakano Pitamo Yasuaki someraka, “Ipu suamo neane metakarirakano, nōmo ne kakaro metakariakosafapo.”

³⁴ Airakano Yasumo Pitaki someraka, “Nōmo kakaro somerakaripo. Pipu ereamo kokorokomo mehoasiraka nōmo ‘Yasu aserafapo,’ aíyaka yape isiamo nōmo kotafe somehokosapo.” ³⁵ Airakano Pitamo someraka, “Wae. Ano neyaki hakasa kuraka, Maiyaka néane aserafapo, aihokosare?” Airakano aporo hakāsa pura suamo Pitamo someane hakasa nine kekemaraka somesapo.

Kesemane hauaka Yasumo kurikurisane oyapo.

Maka 14:32-42; Ruki 22:39-46

³⁶ Yasu aporo hakāsa purayaki Kesemane hauaka á puraka, Yasumo iaki someraka, “Re o toae. Ano wakasema pukua kurikurihokosapo.” ³⁷ Aíyaka Yasumo Pita soko, Sepetemo maeya tetá soko karikia puraka, Yasu ipi kára himu nekea mahisiraka sesenafaraka reapo.

³⁸ Aíyaka reke Yasumo iaki someraka, “Ano himu kára mahisiraka reke ano kukusireapo. Re o toae. Anopoko hemakapukua o toae. Re wakakopo.”

³⁹ Aíyaka Yasumo someaka marekea wakasema pukua, uakapekea hikumisimo hauaka nanireke kurikuriraka, “Atao, nōmo anoaki makata umisa maresapo. Maresane siasekenone makata umisane nōmo masie. Asiāne nōmo hemakapusua aeyaka ayi-akakopo. Nōmo ní hemakapusua aeyaka ayiakanie.”

⁴⁰ Aíyaka kurikuriraka faraka aporo hakāsa pura isiane toakipoko peraka, aseane i wakakesekeno asesapo. Asekea i maturikia taeraka Pitaki someraka, “Re maiya hi awa

hakásamo anoyaki hakāsa turikia asekea risikiasifareapo. ⁴¹ Asiamo re mokopipirakano repo watikiaka rakipe purapaka hitafe risike kurikurihoanie. Repo himumo kurikurihoko seseraka, asiane kaumō yoferaka wakakosapo.”

⁴² Aíyaka Yasu yape tetá pukua kurikuriraka, “Nōmo Atao, makata umisane nōmo anoaki makasapo. Makasane nōmo makanafonorakano fahokosafapo. Makata umisane fahoasimo nōmo makosapo. Nōmo hemakapusua aeyaka nōmo ayiakakosapo.” ⁴³ Aíyaka kurikuriraka faraka aporo hakāsa pura toakipoko, Yasu peraka aseane i wakakesekeno asesapo. Anakano i wakako hi kumikia nekeraka kakaro wakakesapo. ⁴⁴ Wakakesekeno metakarikia, Yasu wakasema pukua yape isiamo kurikurisapo. Kurikuriraka fana kurikurisa hakāsa yine kurikurisapo.

⁴⁵ Kurikuriraka faraka aporo hakāsa pura toakipoko Yasu pariperaka someraka, “Re yaiya wakakesare? Re su turisie. Aporomanomo Táke anoane parakeraka aporo watikisamo ano waseremakosa maiyane maiya yuyapo. ⁴⁶ Re su takahisie. Takahikia isu purakapo. Aporo ano parakehokosane apere,” aisapo.

Yasu waseremasane oyapo.

Maka 14:43-52; Ruki 22:47-53; Yone 18:2-12

⁴⁷ Yasumo somesa maiya amo aporo hakāsa pura meta yano motosa Yutase peraka, aporo yakai eyaki hakāsa pesapo. Aporo pesane aporo metakiramo poke mokoa pekea, aporo metakiramo ira rokopa menane mokoa pekea, aporo metakiramo ferepe menane mokoa pesapo. Aporo pesane pirsiti aporo káramo soko, Yu aporo sisimamo soko, iane pusierakano pesapo. ⁴⁸ Aporoane peasiraka parakena aporo Yutasemo fana someraka, “Aporo nōmo makanurakano aporo ayapo. Eane waseremakanie.”

⁴⁹ Aisasamo Yasu rea Yutase ereketae pekea someraka, “Tisao,” aíyaka epo Yasuane makanusapo. ⁵⁰ Makanurakano Yasumo someraka, “Hameo, nōmo ayiakakosane ayikanie.” Airakano aporo yakai peraka Yasu waseremasapo. ⁵¹ Waseremarakano Yasumo aporo hakāsa pura aporo hakāsa metamo ipi ferepe teaka maka, pirsiti aporo fanamo aporo raipa meta senaki rukusakaretapisiapo. ⁵² Rukusakaretapisiapo Yasumo someraka, “Nōmo ferepe terakaea rusaka maresie. Aporomanomo ferepemo werakano ferepemo eane rukusapo. ⁵³ Aporomo ano mokoatikina maiya amo nōmo Ataki wárakano Atamo hepene aporo hokono u yakai menohoasifa asia amo ano ararehoko pusiehokosapo, aíyaka Atamo hepene aporo ane pusiehokosane repo himeterire? ⁵⁴ Arirakano ano kukusaposane Kotimo sawia popasane ayiakasimo hepene aporo pusiehokosafapo.”

⁵⁵ Aíyaka Yasumo aporo su sarimasaki someraka, “Repo ferepe mokoa pekea, poke mokoa pekea, ano waseremako pekea arisiane ano hakimora apororeare? Maiya suamo Kotimo apea ano reke some karakano, repo ano waseremarakasufapo. ⁵⁶ Asiamo Kotimo sawia Kotimo some kará porofete aporomo poparaka anoaki ayiakakosaposane fasereapera ayapo.” Aíyaka somerakano Yasumo ipi aporo hakāsa pura suamo e metakarikia tekatarisiapo.

Pirisiti aporo Kaiafase rea á Yasu karikia pusuane oyapo.

Maka 14:53-65; Ruki 22:54-55, 63-71; Yone 18:13-14, 19-24

⁵⁷ Pirsiti aporo fanane Kaiafasepo. Kaiafasemo apea Yasu waseremasa aporoamo eane karikia pusuapo. Apea Kotimo somemane tisa aporo soko, Yu aporo sisima soko, Kaiafaseyaki sarimaraka risiakipoko ipu Yasuane karikia pusuapo. ⁵⁸ Karikia purakano Pita wakasema yamenoa kekemarape pusuapo. Kekemarape puraka pirsiti aporo fanamo ape hauaka moroa pauraka aporo terakaiyamosa toakipoko Pita soko kayapo. Kake Yasuaki makata hukuarurane aseako kayapo.

⁵⁹ Arirakano pirsiti aporo káramo soko, Kotimo somemane tisa aporomo soko, Yu aporo sisimamo soko, ipu aporo metakiraki peaesapo. Pekea aporoamo Yasuaki hukurukua topakamaraka somehoko peaesapo. Ipu hemakapuraka, “Aporo metakiramo Yasu hukururakano Yasu fansiraka rusua kukusapo.” Aíyaka topakamaraka somehoasimo kosapo.

⁶⁰ Kosa maiya amo aporo metakiramo Yasuaki kotafe topakamaraka somesa nine, ipu someane kairaka Yasu rusua kukunie, aíyaka somehoasimo ipu tafaraka siasafapo.

⁶¹ Keseke aporo tetá peraka someraka, “Aporoamo someraka, ‘Kotimo ape nōmo rarakitaeraka sere isia faraka efera hunia kiakosapo.’ Aisane etapo kaisiapo.”

⁶² Airakano pirisiti aporo fanaraka reane takahikia Yasuaki someraka, “Nómo some paripukusare? Néaki makata hukurusuane kepo yakapare?” ⁶³ Airakano Yasumo makata somehoanafonorakano pirisiti aporo fanamo someraka, “Koti yaiya reasasamo nōmo neaki akai kairakano nōmo aumaraka some paripeanie. Kotimo ne unihaeaka rekeasimo murikimasa aporo Keresoane nére? Kotimo hokosa ane nére? Nómo somesie.”

⁶⁴ Airakano Yasumo someraka, “Ao, nōmo ní someraka ayapo. Hao, kaisie. Koti ipi namo kakaro wakapuaka rekenapo. Asiamo keseke Aporomanomo Táke anoane Kotimo hokono tumuru takua kakeno repo aseakosapo. Ano hepene aeyaka akoyaki perakano repo aseakosapo.” ⁶⁵ Airakano pirisiti aporo fanamo kaikia mahisiraka, ipi pasu makoaraka someraka, “Aporoamo Kotiane mawakasemarakae. Epo yiamo Koti mawakasemarakano e hukuruko aporo meta peahokosafapo. Ipi yiamo Kotiane mawakasemarakano repo akaire. ⁶⁶ Kairaka repo hemakapusuane yakapare? Isiapo Yasuane mayiakakosare?” Airakano ipu someraka, “E rusua kukunie.”

⁶⁷ Aíyaka Yasu hikumisia torofaeraka, aporo metakiramo hokono mamuraka ruraka, aporo metakiramo hokono namamo ruraka someraka, ⁶⁸ “Ne Kerososasamo ne arurane epamo rurakarire? E yano hosie. Asiamo Kotimo porofete aporoaki somesa ayiáka, ne mokoatikiana aporoane Kotimo yano honakano kaikia nōmo yano hosie.” Aíyaka ipu somesapo.

Pitamo someraka “Yasuane nōmo aserafapo.” Aíyaka kotafe somesane oyapo.

Maka 14:66-72; Ruki 22:56-62; Yone 18:15-18, 25-27

⁶⁹ Hauaka moroa Pita kakeno hinamo raipa meta peraka eaki someraka, “Ne Kariri aporo Yasuyaki hakāsa purapo.” ⁷⁰ Airakano Pitamo waeraka aporo suamo kaiyisimo someraka, “Nómo somerakane ano himeteripo. Ano Kariri aporo Yasuyaki hakāsa purafapo.” ⁷¹ Airakano Pita ape tarua hikia rekeno, hinamo raipa metamo aporo toaki Pitane tarikia someraka, “Aporoane Nasare aporo Yasuyaki hakāsa pusuapo.”

⁷² Airakano Pitamo aumaraka someraka, “Aporoane nōmo aserafapo.”

⁷³ Airakano wakasema tuina aporo risiamo Pita rea pekea someraka, “Nómo me isiapo kaiyiáne Kariri aporomo merakae. Yasumo someane isiapo kairasasamo nōmo someane soko isiapo kaiyiáne, Yasumo aporo hakāsa puramo somerakae.”

⁷⁴ Airakano Pitamo ekeneraka aumaraka someraka, “Aporoane nōmo aserafapo. Nōmo kotafe somerakano Kotimo ano fanasihoane siahoasireapo.” Aihoanine wate foaka yia mena kokorokomo mesapo. ⁷⁵ Merakano kaikia Yasumo fana somesane Pitamo hemakapusuapo. Hemakapuraka ape metakarikia yaoa pukua kára hiripusapo. Asiamo fana Yasumo someraka, “Mena kokorokomo mehoasiraka nōmo yape isiamo ‘Yasuane nōmo aserafapo,’ aihokosapo.” Aíyaka Yasumo somesane Pitamo hemakapukua kára hiripusapo.

27

Pairate rea Yasu karikia pusuane oyapo.

Maka 15:1; Ruki 23:1; Yone 18:28-32

¹ Mituru fiarakano pirisiti aporo kára soko, Yu aporo sisima soko i sarimaraka, Yasu rusua kukusane me rukua someraka risiapo. ² Ipu someraka risina me rukua someaka faraka, Yasu sakomo taporaka marekea, Pairate rea Yasu karikia pusuapo. Arirakano Yutía hauaka ane Rome kamani aporo Pairatemo asekea reapo.

Yutase kusuane oyapo.

Tarira Aporo 1:18-19

³ Yasuane Pairate rea hukurusimo karikia purakano asekea, Yasu parakesa aporo Yutasemo aseraka ipi himu kára nekea hemakapuraka, “Katuaka yia parakehoe. Siufa

mone hae teti (30) kasane nōmo fimakakosapo.” Aíyaka hemakapuraka pirisiti aporo kára soko Yu aporo sisima soko i risiakipoko pekea someraka,⁴ “Nōmo watikiaka rakisiapo. Yasumo watikiaka rakianafonosa nine, nōmo e parakesapo.” Airakano ipu someraka, “Kepo nipo. Isiapo menafapo.”

⁵ Airakano mone hae mokoa pesane fikia Kotimo ape asikurua mokoasuraka, metakarikia pukua, Yutase ipi mawia sakomo kita humarekea huruperaka kusuapo.

⁶ Kurakano pirisiti aporo káramo mone fimokoasusane mokoa, me rukua someraka, “Aporo rusua kukusimo mone one kasasamo, Kotimo apea mone taesa akiyaki mone one sarimahoane siahoasifareapo.” Aíyaka ipu somesapo. ⁷ Aíyaka someraka mone ane mokoa, hauakamo orotipi rakira aporomo hauakane roposapo. Arirakano hauaka roposane aporo kimisi pesa kurakano hauaka á muriasimo roposapo.⁸ Asiamo hauakane yano motoraka Yapi Hauakapo. Aíyaka yano taerape pusuane, sawi one popana maiya amo soko, aíyaka hauakane yano hosapo.

⁹ Asiamo hauaka ane ropohoasiraka porofete aporo Yaremeyamo popasane oyapo. “Eane ropohoko Yu aporo káramo someraka, ‘Siufa mone hae teti (30) ane siahoasireapo.’ Aíyaka someaka masakipoko mone hae teti (30) ane mokoa¹⁰ hauakamo orotipi rakira aporomo hauakane roposapo. Roposane Kotimo ayiakakosaposane ásiapo.” Aíyaka Yaremeyamo popasane faserepesa ayareapo. *(Jeremaiā 32:6-9)*

Pairatemo Yasuaki somesane oyapo.

Maka 15:2-5; Ruki 23:2-5; Yone 18:33-38

¹¹ Rome aporo unihaeaka rea hikumisi nenemea Yasu rekeno Yasuaki akai kairaka, “Yu aporomo unihaeane nere?” Airakano Yasumo someraka, “Nōmo someraka ayapo.”

¹² Airakano pirisiti aporo káramo soko, Yu aporo sisimamo soko, Yasuaki hukurukua somerakano Yasumo some paripesafapo. Ipi watikiaka rakianafonosa nine, epo táfaraka some paripesafapo. ¹³ Some paripeanafonorakano Pairatemo someraka, “Ipu makata kára hukuarurane nōmo kairakari?” ¹⁴ Aihoane Yasumo some paripeanafonorakano asekeea Rome aporo unihaeemo hemakapuraka, “Me kauraka asekeea areane manakanarakapo,” aíyaka hemakapusuapo.

“Yasu rusua kukanunie.” Aisane oyapo.

Maka 15:6-15; Ruki 23:13-25; Yone 18:39-40

¹⁵⁻¹⁹ Pairatemo hemakapuraka, “Yu aporomo Yasuaki kakanakeraka rusua kukusimo ano rea karikia pesapo,” aíyaka hemakapusuapo. Hemakapukua Yasu hukuarura maiya amo Yasumo someane Pairatemo kairaka rekeno, Pairatemo aseamo Pairate rea aporo meta pusiesapo. Pusierakano aporoane pukua Pairateaki someraka, “Nōmo ní hinamomo someaka maresane oyapo. ‘Pipu nōmo kituamo aporo kotesa Yasuane asesasamo himumo kára hemakapukua rekenapo. Asiamo somemane mamosohoanafonona aporo kotesane fanasihokopo. Metakarinie,’ airakasapo.” Aíyaka aporo pesamo somerakano Pairatemo kaisiapo.

Arirakano Ape Farimaresa Hemakapuko Hokono Akera maiya amo tipura makesa aporo hakásá metane Rome kamani aporo unihaeemo tonotaenapo. Tipura makesa aporo hakásá metane tonotaehoasimo Yu aporomo murikimaraka, “Aporoane tonotaehoanie,” aíyaka murikimarakanano kamani unihaeemo tonotaenapo. Asiamo Yasu hukuarura maiya amo aporo kakaro watikisa yano motosa Parápase* tipura makesa rekeno asekeea, Yu aporo yakai sarimasaki Pairatemo someraka, “Aporo tonotaehokosane epa tonotaehoko hemakapurakanare? Parápase soko metao, Yasu Kereso soko metao, epa tonotaehokosare?” aisapo.

²⁰ Arirakano pirisiti aporo káramo soko, Yu aporo sisimamo soko, ipu aporo su sarimasaki hokokaraka someraka, “Yasuane rusua kuraka Parápase tonotaehoanie, aihoanie.” ²¹ Aisakipoko Rome kamani aporo unihae Pairatemo someraka, “Aporo

* 27:15-19: Parápase tipura makesane yano motosa metane Yasupo. Yasuane epo yakopo.

tetáne epa tonotaehoko hemakapurakanare?" Airakano ipu someraka, "Parápase tonotaehoanie."

²² Airakano Pairatemo someraka, "Yasu Keresoane maiyakaere?" Airakano ipu suamo someraka, "E ira matopesa paremarekeea rusua kukunie." ²³ Airakano Pairatemo someraka, "Marirakano rusua kukunierakanare? Epo watikiaka makata yakapa rakisiare?" Airakano ipu sakepamo wáraka, "E ira matopesa paremarekeea rusua kukunie."

²⁴ Aíyaka ipu sakepamo wáraka risiapo. Ayíáka risikino aporomo weakosane Pairatemo asekea hemakapuraka, "Nōmo someane ipu kakipayarakanapo." Aíyaka aporo suamo asekeasimo aporo su hikumisia reke, hemo ipi hokono kusuraka someraka, "Áporoane rusua kurakano nōmo kererefapo. Repo kererepo. Ano hokonoa makata parareane kusuraka fana ayapo." ²⁵ Airakano aporo hinamo suamo someraka, "Yasuane rurakano kerereane isiapo menapo. Isiapo hokosamo soko menapo."

²⁶ Airakano Parápase Pairatemo tonotaeraka, Yasu matia sakomo runiesapo. Rurakano asekea someraka, "Yasu ira matopesa paremareako karikia punie," aisapo.

Yasuane ame aporomo mainamaresane oyapo.

Maka 15:16-20; Yone 19:2-3

²⁷ Kamani aporo unihaeo ame aporo peraka, Yasuane kamanimo apea karikia pukua, Yasu rea ame aporo su sarimasapo. ²⁸ Sarimaraka Yasumo pasuane su hororaka, pasu susa osoraka marekea, ²⁹ hati kotesa unihae káramo karotapira ayíáka karotapikia maresapo. Asiane hati karotapisiane kakaro hatifapo. Yasu mainamareraka sako keta risia hati pariraka rakiakosakipoko, kita apera ayíáka pekea weroraka rakisiapo. Rakisiane Yasu wamoan karotapikia maresapo. Karotapikia Yasu hokono tumuru takua kepayia patekemasa hokono sakinia marekea kakuna porokoa mahokopariraka someraka, "Yu aporomo unihaeo, né aporo kárapo."

³⁰ Aíyaka Yasu kaua torofaeraka, kepayia hokonoa maresane maka Yasu wamoan rusuapo. ³¹ Rukua mahokopariraka faraka, pasu susa kau rakisiane horomaka, ipi pasuane osoraka marekea ira matopesa paremareako karikia pusuapo.

Yasu ira matopesa paremaresane oyapo.

Maka 15:21-32; Ruki 23:26-43; Yone 19:17-27

³² Yasu karikia puraka aseane Sairíni aporo ipi yano motosa Saemone perakano asekea, ira matopesane maka pusiesapo. ³³ Maka pusierakano i pukua Kokóta hauaka á pausapo. Arirakano Kokóta hauakane namo meaka Uni Kiki hauakapo. ³⁴ Kokóta hauaka á pauraka risike Yasumo nasimo waene he soko munamuna asíayaki sarimaraka kekeroraka kasapo.† Karakano Yasumo sareraka nesafapo. ³⁵ Nanafonorakano ame aporomo Yasu ira paremareraka, Yasumo pasuane parakuraka mokoakosakipoko ipu kase enana ayíáka enasapo.

³⁶ Enaraka toke Yasuane aporo metamo ararehokohoamo asekea toapo. ³⁷ Ame aporomo Yasu uni kima yapura eaki hukurusuane ira tumusakipoko poparaka paremareapo. Poparaka paremaresane oyapo. "Aporo one Yasupo. Yu aporomo Unihae epo." Aíyaka poparaka paremaresapo.

³⁸ Maiya amo hakimora aporo tetá Yasuyaki hakāsa ira matopesa paremurisiapo. Meta Yasu hokono tumuru takua paremarekea maporaka, meta Yasu hokono kasakai takua paremarekea maporaka, Yasu tipia paremarekea maposapo.

³⁹ Yasu paremaresa rekeno, aporo metakira e paremaresa makeraka puraka mainamareraka siraraka, unia rokoraka someraka, ⁴⁰ "Nōmo fana someraka, 'Kotimo ape rarakitaeraka yape isia faraka efera hunia kikimakosapo,' airakasupo. Aisasamo nōmo ní yia ararerasie. Né Kotimo hokosasekenone ira matopesane metakarikia o peae."

⁴¹ Airakano pirisiti aporo káramo soko, Kotimo somemane tisa aporomo soko, Yu aporo sisamamo soko, Yasuane ayíáka mainamareraka someraka, ⁴² "Yasumo aporo metakirane araresapo. Araresa nine ipiane ararehoasifareapo. Ipi Isiraya aporo

† ^{27:34:} Kau tenane fahoasimo waene he munamuna asíayaki aporomo nenapo.

unihaepo. Ipi ira matopesa metakarikia o perakanone, isiapo eaki himu hakásaraka hemakapukusapo. ⁴³ Ipi Kotiaki himu hakásaraka hemakapukua reke someraka, ‘Ano Kotimo hokusapo.’ Airakano Kotimo eane seseraka arareraka soko metao eane ararehoafunureapo,” aisapo. ⁴⁴ Airakano hakimora aporo Yasu takua ira matopesa paremurisia amo soko Yasuaki yaisapo.

Yasu kusuane oyapo.

Maka 15:33-41; Ruki 23:44-49; Yone 19:28-30

⁴⁵ Hauaka sua sere tuaro (12) korokomo kepomarekea eresapo. Ereraka reane samapu maiya isiamo faesapo. ⁴⁶ Samapu maiya isia makenamo, Yasumo Yu aporo meaka sakepamo wáraka, “Irae, Irae, rama sapakatani.” Aíyaka namo meaka someraka, “Nōmo Kotio, nōmo Kotio, nōmo ano marirakano metakariisiare?”

⁴⁷ Airakano kaikia aporo metakira makeraka risiamo someraka, “Epo Iraíyaki warakae.” ⁴⁸ Airakano aporo hakásá meta foaka pukua he watera ásia he kisa a kokomarekea fofako turua tapomarekea Yasumo nasimo makama yapurasapo. ⁴⁹ Aporo metakiramo someraka, “Harufapo. Iraíyamo Yasuane ararehoko perakarihoamo, isiapo kau risikinapo.” ⁵⁰ Airakano Yasumo efera hunia sakepamo wáraka, epo hemakapuraka, “Ano ho puane siahosireapo,” aíyaka hemakapukua kusuapo.

⁵¹ Yasu kusua maiya amo Kotimo apea pasu waremaresane yapunaka koarape atura pusuapo. Koarape pukua taku haku taku hakusapo. Ayiaka momani soko kára peraka, eke hemakapukua koaraka ⁵² aporo kusua motosa kunikia ekemo mapirisiane hemakapukua ropaka pusuapo. Ropaka puraka aporo Kotiaki himu hakásaraka hemakapukua risia kusuane Kotimo maturikia taesapo. ⁵³ Aporo maturikia taesane Yasu maturikia taesakipoko iane soko kunikia metakarikia Yarusarame sitia purakano aporo yakaimo iane asesapo.

⁵⁴ Arirakano ame aporo soko satiniyaki Yasu asekea risia amo aseane momani peraka makata su anakano asekea himu faraka someraka, “Aporoane kakaro Kotimo hokusapo,” aisapo.

⁵⁵ Arirakano hauaka wakasema tame yia hinamo yakai asekea risiapo. Asiamo Yasu Kariri hauaka koraka rekeno hinamoamo Yasu araresapo. Arareraka Yasu Yarusarame sitia perakano i soko pesapo. Peraka Yasu pipu yia ira matopesa paremarerakano, wakasema tame yia risike asesapo.

⁵⁶ Asesa hinamoane yano taesane oyapo. Meta, Makatara hinamoane Mariapo. Meta, Maria Yamesepe Yosefe tetapō kaíyiapo. Meta Sepetemo hokusamo kaíyiapo. I isiane soko, hinamo metakira soko ipu makata suane asesapo.

Yasu kunikia motosane oyapo.

Maka 15:42-47; Ruki 23:50-55; Yone 19:38-42

⁵⁷ Samapu maiya tuakeramo Arimatía aporo pesapo. Ipi makata kemo kára toapo. Ipi yano motosa Yosefepo. Eane Yasu patera asesapo. ⁵⁸ E Pairate rea pukua someraka, “Yasu kusuane nōmo kunikia motoako maka puaere?” Airakano Pairatemo ame aporoaki someraka, “Yasu kusuane fatarimaka Yosefeaki kakanie.” Aíyaka someaka maresapo.

⁵⁹ Someaka marerakano kairaka, Yasuane fatarimaka Yosefeaki kasapo. Karakano Yosefemo Yasu kusuane pasu pakaesa kotesamo taposapo. ⁶⁰ Taporaka Yosefemo maka pukua ipi eke kunikia fana rasa á, aporo meta fana motoanafonosakipoko, á Yasu motosapo. Motokoa marekea kunikia kakaru mapiriakosakipoko, eke kára tafeasa keperemarape pukua, kunikia kakarua mapirikia pusuapo. ⁶¹ Arirakano Makatara hinamo Maria soko, Maria meta soko, kunikia makeraka ereketaeraka toapo.

Yasu kusuane aporo metamo tau maka purapaka aporo terakaiyamosamo asekea risiane oyapo.

⁶² Fenena maiya á pauhokusakipoko kakoreamo, makata su sarimaraka taesapo. Taesa sereane faraka pirisiti aporo kára soko, Fereze aporo soko, Pairate rea sari-maraka someraka, ⁶³ “Unihaeo, Isiapo makata one hemakapurakanapo. Kotafe hora aporo Yasuane kukusiraka epo someraka, ‘Ano kusuane yape isia faraka maturikia

taehokosapo,’ airakasupo. ⁶⁴ Aisasamo yape isia omo kunikiane kakaro mapiriasimo nōmo someaka mareanie. Airakano Yasu kusua kunikia motosane ipi aporo hakāsa pura pekea, tau hakimaka aporo suaki someraka, ‘Yasuane Kotimo maturikia taesapo.’ Aiyaka somerakanone aporo suamo kakimakosapo. Kakimaka ipu kotafe hora amo kotafe hora fanane marokehokosapo. Ayiakakohoamo kunikia ane kakaro mapirinie. Aiyaka someaka mareanie.” ⁶⁵ Airakano Pairatemo someraka, “Aporo terakaiyamosamo asekeea risikiako pusiehokosapo. Re pukua eke tafea mapirisiane repo kakaro koteaka mapirinie.”

⁶⁶ Airakano i pukua eke tafea mapirisiane ropakamarapaka ororomo fea tipe pusuapo. Ayiáka mapirikia faraka aporo terakaiyamosamo asekeea risikiasimo murisiapo.

28

Yasu maturikia taesane oyapo.

Maka 16:1-20; Ruki 24:1-10; Yone 20:1-18

¹ Fenena maiya farakano yatipunumo* yao kawe fiarakano mituru Makatara hinamo Maria soko, Maria meta soko kunikia aseako pusuapo.

² Maiya amo wate foaka momani kára peraka, hepene yapunaka Unihae Kotimo hepene aporo pekea eke tafea kunikia ikia koro mapirisiane keperemafearaka, eke kima yapura asekeea kayapo. ³ Yamakeremo faeana ayíáka hepene aporo hikumisia ayíáka faesapo. Ipi pasuane ako kakaro pakaesa asíapo. ⁴ Hepene aporoane aporo terakaiyamosamo aseraka kára namoraka fofaraka hamisisiraka ku pesapo.

⁵ Arirakano hepene aporomo hinamoaki someraka, “Hinamo teto namohokopo. Nōmo hemakapuanetetápo Yasu ira paremarekea rusua kusuane aseako kope apere. ⁶ Yasu o rekerifapo. Epo ipi someraka, ‘Ano maturikia taehokosapo,’ aisane yasiapo. E kau motosa fasane aseako teto peae. ⁷ Asekeea faraka ipi aporo hakāsa puraki somehoko foaka pusie. Puraka úyaka somehoanie. ‘Yasu maturikia taesapo. E fana Kariri hauaka á pukua reakipoko, re kesekeea peraka Kariri hauaka á e aseakosapo.’ Aiyaka somehoanie. Asiamo nōmo tetóaki some ane somehoko pesapo.”

⁸ Airakano hinamo tetáne fofaraka kára seseraka kunikiane metakarikia, aporo hakāsa puraki somehoko fofoaka pusuapo. ⁹ Purakano asekeea Yasumo tetáne sapenekea peraka someraka, “Mituru, teto auaraka risikianie.” Airakano tetá pekea kakuna porokoa toke Yasuane korakea maka e kekeresapo. ¹⁰ Kekererakano Yasumo someraka, “Teto namohokopo. Nōmo nī mae parisaki úyaka somehoanie. ‘Kariri hauaka á pusie. Hauaka á ano aseakosapo.’ Aiyaka somehoko pusie.” Aiyaka Yasumo somesapo.

Aporo terakaiyamosamo somesane oyapo.

¹¹ Hinamo tetáne pusuakipoko aporo terakaiyamosa kunikia asekeea risiane, aporo metakira Yarusarame sitia puraka, makata su ásiarie pirisiti aporo káraki somesapo.

¹² Somesane pirisiti aporo káramo Yu aporo sisimayaki toke me rusuapo. Me rukua someaka maka aporo terakaiyamosaki mone karáka someraka, ¹³ “Aporo hinamo suaki úyaka somehoanie. ‘Ereamo isu wakakesakipoko Yasu kusua kunikia motosane ipi aporo hakāsa puramo hakimasesapo.’ Aiyaka kotafe somehoanie. ¹⁴ Airakano kamani aporo unihaemo kairaka re hukurukohoamo, isiapo reane farimaka, eane matasohokosapo.”

¹⁵ Airakano aporo terakaiyamosamo mone mokoa ayíáka pirisiti aporo káramo somesane ipu kakimasapo. Kakimaka kotafe somesane some koaka marekea somerakano, arirakano nōmo sawi one popana maiya amo soko, someane yaiya kotafe somerakano Yu aporo hinamomo kakimarakanapo.

Aporo hakāsa puraki Yasumo somesane oyapo.

Maka 16:14-18; Ruki 24:36-49; Yone 20:19-23

* 28:1: Yasu turikia pusua sereane yatipinupo. Arirakano Yu aporomo sokō menoraka, yatipinumo kepo marekea sokō menonapo.

¹⁶ Yasumo ipi aporo hakāsa pura Kariri hauaka á pusuapo. Fana Yasumo someraka ūria hiniesa á aporo hakāsa pura kinusu hikia, ¹⁷ Yasu aseraka kára kekeresapo. Kekereraka yia i metakiramo aseraka namina susu someraka, “Aporoane Yasureare?” Aíyaka himu tetáraka hemakapusuapo. ¹⁸ Aíyaka hemakapukua i risiakipoko Yasu pekea someraka, “Hepene yapuramo hemakapura wakapu suane soko, hauaka omo hemakapura wakapu suane soko, anoaki kasapo.

¹⁹ Kasasamo hauaka sua re puraka aporo hinamomo ano patera asekeasimo some kakanie. Some kayane kakimarakano, kakimasa aporo hinamoane Ata Koti yano motosa soko, Kotimo hokosa ano yano motosa soko, Ho Kotesa yano motosa soko, isu yano motosa á paorakano, aporo hinamoane hea tapukumurianie.

²⁰ Nōmo reaki ayikaniesane repo iaki some kakanie. Nōmo ayikaniesane tisa aporomo somera ayiáka repo somehoanie. Hao, kaisie. Maiya suamo ano reyaki rekenapo. Maiya fa ana maiyamo soko ano reyaki yaiya rekeakosapo.” Aíyaka Yasumo somesapo.

Maka Maka sawi one mahemakapukusa someane oyapo.

Yasu hepene yapura hisiakipoko keremisi tuaneti fae su (25) faraka, sawi one popasapo. Yasumo aporo kenosu eyaki hakāsa pusimo murikimasane, Maka ane murikimasafapo. Asiane Makamo Yasumo hemakapukua rakisiane asesapo. Yu aporo-hoanafonosamo Yasuane koteaka hemakapusimo Makamo sawi one popasapo. Keseke Porepe Pánapase teta kimisi purakano, Makamo tetáne araresapo. Arirakano Maka ane kakaro yano motosane Yone Makapo.

Maka sawia some kepo parakuraka popasane oyapo.

1:1-8 Yone hea tapukumareramo Yasuane some kasapo.

1:9-13 Yasu hea tapukumarekea faraka reakipoko Satanemo Yasuaki mokopipiraka hkokakako pesapo.

1:14-10:52 Yasumo some kaka rakisiapo.

11:1-19 Yasu saro toki matia ripaka Yarusarame sitia peraka, Kotimo apea aporomo makata roporakano Yasumo rukua koakataesapo.

11:20-12:44 Aporo yano motosa káraraka risia aporoamo Yasumo hasaka somerakari-hoamo, makata yakai Yasuaki somesapo.

13:1-37 Keseke makata ayiakakosane Yasumo somesapo.

14:1-15:47 Yasuane wasere maka hukurukua rusua kusuapo.

16:1-20 Yasu kusuane turikia pusuapo.

Yone he tapukumareramo Yasumo ikia kara makotesane oyapo.

Matiu 3:1-12; Ruki 3:1-18; Yone 1:19-28

¹ Kotimo hokosa Yasu Keresoane hemakapusimo some kotesa kepomaresane oyapo. ² Wate fana Kotimo somerakano porofete aporo Aesayamo kaikia popahoareapo. Popasane oyapo.

Kotimo ipi hokosaki someraka, “Hao, kaisie. Né pusiraka aporo metamo fana some kakako nōmo pusiehokosapo. Aporoamo ne ikia kara pukusane maropohokosapo. Ikia kara maropoana ayíáka aporo hinamomo himu hemakapusuane maropohokosapo. Ipu neane hemakapusimo some kakakosapo. ^(Malakai 3:1)

³ E ima yaoa rea maiya amo aporo hinamomo kaiyako perakano epo wakapuaka someraka, ‘Unihae peakosane ikia kara makotehoanie. Ikia karane hahaesekeno maereketaehoanie,’ aihokosapo.” Áiyaka Kotimo somerakano wate fana Yasu peasiraka Aesayamo kaikia popahoareapo. ^(Aisaia 40:3)

⁴ Popasa hakásá nine keseke Yone he tapukumarerane ima yaoa pukua rea ayareapo. Faserepeke reke aporo hinamoaki someraka, “Repo makata watikisane Kotimo mafahosimo, makata watikisane metakarinie. Metakarikia eaki risikiako parirakano, re nōmo hea tapukumiakosapo,” aisapo. ⁵ Aísa maiya amo, Yone rea hauaka á Yutía hauaka aeyaka soko, Yarusarame siti aeyaka soko, aporo hinamo yakai pesapo. Pekea ipu makata watikiaka rakisiane hufitaerakano i Yonemo he Yotanea tapukumurisiapo.

⁶ Maiya amo Yonemo saro kamo itimo pasu osoraka saro narikose kau terakae hikia, kitaro kesē asia nekea, wakaiyia he metekeraka nekea, ayíáka reapo. ⁷ Reke epo some karaka, “Ano reakipoko keseke aporo kára meta peakosapo. Peraka epo ano marokehokosapo. E namo kakaro kárupo. E aporo kárasasamo, aporo raipamo epo tamakane fisina ayíáka, ano kako pekea epo tamakane nōmo fisihoaue siahoasifareapo. E aporo kárasasamo, nōmo epoko raiparaka rakiako ayiane soko, ano wakasemasasamo, nōmo rakiane siahoasifareapo. Ano eyaki siasafapo. ⁸ Nōmo re hea hákasa tapukumurirakanapo. Arirakano epo re himua Ho Kotesa muriakosapo,” aíyaka Yonemo somesapo.

Yonemo Yasu hea tapukumaresane oyapo.
Matiu 3:13-17; Ruki 3:21-22; Yone 1:29-34

⁹ Yasu Kariri hauaka Nasare ape aeyaka Yone rea pesapo. Perakano Yonemo e he Yotanea tapukumaresapo. ¹⁰ Hea tapukumaresane ropaka hekeia ima yapura hianine, tiane kikisi aka, kikisi rorakano, aseane Ho Kotesa mena nume asia ti yapunaka pekeia Yasu rea pesapo. ¹¹ Perakano, ipu aseraka risiakipoko, hepene aeyaka Kotimo someraka, "Né, nōmo nī hokosapo. Néane nōmo himu tumurumo hemakapukua seserakanapo." Aiyaka somerakano kaisiapo.

Yasumo watikiaka rakisimo Satanemo e mokopipisane oyapo.
Matiu 4:1-11; Ruki 4:1-13

¹² Ho Kotesamo Yasuaki someraka, "Ne ima yaoa rekeako pusie," airakano pusuapo. ¹³ Pukua sere foti amo (40) Yasu ima yaoa reakipoko, Satanemo e mokopipihokosakipoko perakano asesapo. Arirakano yasaro soko, yákasa soko pesapo. Perakano yia hepene aporomo e arareraka asekea risiapo.

Yasu Kariri hauaka á pusuane oyapo.
Matiu 4:12-17; Ruki 4:14-15; Yone 4:1-3

¹⁴ Herotemo Yone tipura makesakipoko Yasu Kariri hauaka á pukua Kotimo some kotesane some kasapo. ¹⁵ Some karaka, "Kotimo murikimasa maiyane fasereperakanapo. Yumo Koti ipi unihaeaka asekea rekeakosa maiya ane fasereperakanapo. Asiasamo repo himu watikisane metakarikia eaki risikiako parirasie. Kotimo some kotesane kakimasie," áisapo.

Aporo kitafasuaki Yasumo someraka, "Ano patera asesie," aisane oyapo.
Matiu 4:18-22; Ruki 5:1-11

¹⁶ Yasu he Kariri fua pukua reke aseane Saemone soko ipi mamanea Enitu soko tetapō pokoa mokoako hea kasipu kokomareraka risikino asesapo. Arirakano tetapō makata rakirane pokoa pisinisi rakirapo. ¹⁷ Asiamo Yasumo tetāki someraka, "Ano patera asesie. Ano patera aserakano tetápo pokoa amora ayiáka aporo hinamo anoa paohokosane pasimokoasimo nōmo teto murikimarakanapo." ¹⁸ Aiyaka somerakano tati kasipuane wate foakayia metakarikia Yasuyaki hakāsa pusuapo.

¹⁹ Wakasema pukua Yasumo aseane Sepetemo maeya Yamesepe ipi mamanea Yone tetā kasua risike kasipu potakahesa petokoraka risikino asesapo. ²⁰ Aseraka tetāne peasimo Yasumo wásapo. Wárakano tetapō wafaya Sepeteane soko, ipi aporo raipane soko, i namina kasu yia risikino metakarikia, tetā Yasuyaki hakāsa pusuapo.

Yatafumo aporo ho masane oyapo.
Ruki 4:31-37

²¹ Kapaneame taonea pauraka fenena maiya amo, Yu aporomo sarimana apea pukua Yasumo some kasapo. ²² Some karakano aporo hinamomo kaikia fofaraka himu fasapo. Kotimo somemanane tisa aporomo some akara ayiáka, aporomanomo hemaka apura ayiáka, Yasumo some kasafapo. Aporo yano motosa fanamo some akara ayiáka some karakano kaikia, "Someane enahoasifareapo," aiyaka aporo hinamo kára fofasapo.

²³ Arirakano Yu aporomo sarimana apea, aporo hakāsa yatafumo e ho masa reke ²⁴ epo wáraka, "Yasu né Nasare aporopo. Nōmo isu yatafuane mayiakakosare? Isu mokoatikirako pesare? Né nōmo aserapo. Ne Kotimo pusiesane né Kotimo ipi hokosasamo namo kakaro kotesane népo."

²⁵ Airakano Yasumo yatafuaki someraka, "Wae, nōmo mehokopo. Nōmo aporo ho masane metakarikia pusie." ²⁶ Airakano yatafumo aporo ho masane mahamisisiraka marekeia, aporo ho masane metakarikia ipi kokoaeraka wárabe pusuapo. ²⁷ Purakano asekea aporo hinamo su risiane fofaraka, namina susu someraka, "Ane marirakanarakapo. Some akarane some kawereapo. Aporo hokopusuamo some akara ayiáka some akare. Kotimo ipi ayiakaniesane kekemarakia yatafu pusierakano yatafumo

kakimaka apure,” aisapo. ²⁸ Aíyaka aporo hinamo Kariri hauaka sua pukua, Yasumo makata rakisiane aporo hinamo suaki somesapo.

Aporo yakai makata tasa Yasumo mafasane oyapo.

Matiu 8:14-17; Ruki 4:38-41

²⁹ Yu aporomo sarimana apeane Yasumo metakarikia pukua Enitupe Saemone tetapō apea pukua yororakano, Yamesepe Yone tetā soko apea yorokoa pusuapo. ³⁰ Puane ipu Yasuaki foakayia someraka, “Saemonemo ipi aseamo kaīyia kau sisipuraka makata takamaka warekenapo,” aisapo. ³¹ Airakano hinamo makata takamasa warea á Yasu pukua hinamoane hokonoa maka e máfahoane kau sisipusane fasapo. Farakano hinamoamo ipoko makata nakosa paikia kasapo.

³² Arirakano wakasema nina maiya tuakeramo aporo hinamo metakira makata tasane soko, aporo hinamo metakira yatafumo i ho mosane soko, Yasu rea karikia pesapo. ³³ Karikia perakano aporo hinamo yakai Saemonemo ape ikia koroa sarimaraka kau risiakipoko ³⁴ Yasumo aporo hinamo yakai makata tasa kekepoane mafasapo. Yatafu yakaiaki metakarikia pusierakano pusuapo. Yatafumo Yasuane hemakapusuasamo, Yasumo iaki someraka, “Repo mehokopo,” aíyaka Yasumo somesapo.

Ape sumu yakai á some kakako Yasu pusuaneyo oyapo.

Ruki 4:42-43

³⁵ Mituru fiahoko makeanamo Yasu takahikia pukua, ima yaoa aporo fasakipoko á kurikurisapo. ³⁶ Kurikurihoko pusuakipoko Saemone soko, ipi aporo táke soko, ipu Yasu koako pusuapo. ³⁷ Pukua ipu Yasuane kokoa aseraka someraka, “Né aporo suamo korakanapo.” ³⁸ Airakano iaki Yasumo someraka, “Ape sumu metakira soko ano purakapo. Pukua apea nōmo Kotimo someane some kakakosapo. Asiamo Kotimo someane some kakako ano hauaka kára wo pesapo.” Aíyaka Yasumo somesapo. ³⁹ Yasu Kariri hauaka ape sumu sua koraka reapo. Koraka reke Yu aporomo sarimana apea some kakako pukua, Yu aporomo sarimana ape meta soko some kakako pukua, Yu aporomo sarimana ape meta soko, some kakako pukua asiapo. Yatafuaki soko Yasumo pusierakano pusuapo.

Aporo toropakesa Yasumo mafasane oyapo.

Matiu 8:1-4; Ruki 5:12-16

⁴⁰ Yasu rea aporo toropakesa pesapo. “Yasuane yano motosa kárapo,” aíyaka hemakapukua e kakuna porokoa kake someraka, “Nómo ano mafahoko seseraka soko metao seserire?”

⁴¹ Airakano aporoane Yasumo kamenakaraka ipi hokono máfaraka e sakairaka* someraka, “Ao, ano seseripo. Né makata takamasane farasie,” aisapo. ⁴² Aihoanine aporo toropakesane wate foaka fasapo.

⁴³ Faraka e siaraka rekeno asekea Yasumo aporo toropakesaki me paroaka someraka, “Né pusie. ⁴⁴ Ne toropakesa fasane aporo metakiraki somehokopo. Piriape aporo rea á né pukua, kau toropakesa fasane piriape aporoaki tarinie. Tarikia Mosesemo somemaneane kekemaraka makata yaku Kotiaki kakaniesane yaiya kakanie. Makata kakakosane piriape aporomo Kotipoko taehokosapo. Taena maiya amo né kau toropakesane kakaro fasapo, airakano aporo hinamo suamo kaikia hemakapukusapo.” Aíyaka Yasumo somesapo.

⁴⁵ Somerakano yia, aporo toropakesa fasamo kakipayaraka pukua aporo hinamo suaki somesapo. Someaka haerakano aporo hinamo suamo kaisiapo. Yasu reakipoko aporo hinamo su peraka, taperapaka taone sua Yasu pusufapo. Yasuane ima yaoa reapo. Ima yaoa rekeno aporo hinamo yakai peraka, sape akayaka soko, sape royaka soko, taku rayaka soko, taku atura aeyaka soko, aporo hinamo su Yasu rea pesapo.

* 1:41: Aporo toropakesane fasikia rerapo. Aporo metamo e kaua sakairafapo.

Aporo korosakataesane Yasumo mafasane oyapo.

Matiu 9:1-8; Ruki 5:17-26

¹ Sere hakása soko metao, sere tetá soko metao farakano, Yasu Kapaneame taonea paripesapo. Yasuane paripesapakano aporo hinamo suamo kaisiapo. ² Kaikia aporo hinamo yakai pekea sarimarako ape tapesapo. Ape taperaka ikia koroa kausekeno, Yasu ape kakaru tipia reke, aporoaki some kotesane some kasapo. ³ Some karaka rekeno aporo kitafasumo aporo korosakataesane fefeneakua makekea, maka pekea ⁴ aseane, aporo hinamo kára sarimasakipoko, Yasu rea pusifasekeno, aporo korosakataesane maka ape kopo yapura maka hikia, Yasu ipi rea unia kima aeyaka ape kopo feteketaeraka, ape kopo aeyaka fefeneaku tau metafirimakano metafirimakano, asukuru Yasu rea á motosapo. ⁵ Motoraka aporo korosakataesa maka pesa aporo kitafasuamo Yasuaki himu hakásaraka hemakapurakano asekea, Yasumo aporo korosakataesaki someraka, “Hameo, né himu watikisane nōmo mafarakanapo.”

⁶ Airakano Kotimo somemane tisa aporo metakira á toamo namina susu hemakapuraka, ⁷ “Koti ipi hákasamo aporo himu watikisane mafánapo. Aporomanomo mafánafapo. Asiamo Yasumo Kotiane mawakasemarakae. Epo aíyaka somehoane siahoasifareapo.”

⁸ Aíyaka ipu hemakapurakano, wate foaka ipu hemakapusuane Yasumo aseraka iaki someraka, “Repo marirakano ano mahokoparirakanare? ⁹ Aporo korosakataesaki nōmo someraka, ‘Né himu watikisane nōmo mafarakanapo,’ airane wafororakanafapo. Himu watikisa faraka soko metao, fahoanafonoraka soko metao, repo aserafapo. Asiāne nōmo someraka, ‘Né makata takamasane nōmo mafarakanapo,’ airane wafororakanafapo. Aporo korosakataesa takahirane repo aserakanapo. ¹⁰ Aporomanomo Tákeane anopo. Hauaka wo aporo hinamomo himu watikisane nōmo mafahoasimo, Kotimo ipi anoaki ayikaniesapo. Ayikaniesa hakása yine nōmo maka, repo asekeasimo aporo korosakataesaki nōmo takahisierakanapo.” Aíyaka Yasumo aporo korosakataesaki someraka, ¹¹ “Takahikia, asakapu maweroraka ní apea maka pusie.”

¹² Airakano aporoane takahikia ipi asakapu wate foakayia maweroraka maka pusuapo. Maka purakano aporo hinamo suamo asekea himu faraka, Kotiaki kekereraka someraka, “Fana makata aina ane isiapo asesafapo. Pipu makata hakureapo,” aíyaka ipu suamo somesapo.

Yasumo Rífaiaiki peae, aisane oyapo.

Matiu 9:9-13; Ruki 5:27-32

¹³ Yasu he kekeia kaya á pukua he fua reke aseane, aporo hinamo yakai sarimarakano, Yasumo iaki some kasapo. ¹⁴ Some kaka faraka pukua Yasumo aseane, Afiasemo maeya Rífaí ane ipi takese mora oposea kakeno asesapo. Asekea someraka, “Né ano patera aseako peae.” Airakano Rífaí takahikia Yasuyaki hakása pusuapo.

¹⁵ Pukua Rífaímo apea pauraka, ape namoa yorokoa Yasu soko, ipi aporo hakása pura soko, toke iyaki aporo himu watikisa soko, takese mora aporo* metakira soko, sarimarako namina hakása makata nenaka toapo. Aporo yakai toane metakira Yasuane kekemarako pusuapo. ¹⁶ Kekemarako pusua aporoane metakira aporo watikisa soko, takese mora aporo soko, i Yasuyaki hakása toke makata nenakano, Fereze aporomo namina somemane tisa aporomo asesapo. Aseraka ipu Yasumo aporo hakása puraki someraka, “Takeise mora aporoyaki aporo himu watikisayaki Yasu hakása toke makata anenane kakaro watikirareapo.”

¹⁷ Aírakano Yasumo kaikia iaki someraka, “Aporo koteaka reane mitikoromo mafahoasimo purafapo. Aporo makata takamasane mitikoromo mafahoasimo purapo. Asiamo aporo hinamomo himu watikiaka risiane, ipu watikisane metakarikia risikiako

* 2:15: Takese mora aporoamo mone sapeane hakimosapo. Anakano asekea aporomo i sesesafapo.

parihoasimo, iaki peahoko ano perakayiapo. Aporo kotesane peahoko ano perakayiapo." Aíyaka Yasumo somesapo.

*Kotimo asekeasimo aporo hinamo suamo makata nakosa sokoainane Yasumo somesane oyapo.
Matiu 9:14-17; Ruki 5:33-39*

¹⁸ Maiya metamo Yone he tapukumareramo ipi aporo hakāsa puramo soko, Fere se aporomo soko, makata nakosa sokoairaka risiapo. Sokoairaka risia maiya amo aporo metakiramo Yasuaki someraka, "Nómo aporo hakāsa puramo makata nakosa sokoai-hoanafononane mainakanonare? Yonemo ipi aporo hakāsa puramo makata nakosa sokoainapo. Fere se aporomo ipu aporo hakāsa puramo makata nakosa sokoainapo. Asiāne nómo aporo hakāsa puramo makata nakosa sokoainafapo."

¹⁹ Airakano Yasumo takumeaka someraka, "Aporomo hinamo arumarakano, aporo suamo hokono keraka seseaka makata nenapo. Makata nenaka aporo hinamo kawe apia iyaki hakāsa rekeno, i himu hisihoanafonoraka i seseraka risike, makata nakosane sokoainafapo. ²⁰ Arirakano aporo hinamo kawe apia aporo metakiramo waseremaka apura maiya amo, himu hisiraka makata nakosane sokoaihokosapo.

²¹ Arirakano pasu paté koasakipoko pasu kawe paremarekea irisane, pasu kaweane kuruhenaka pasu patéane fe taku aeyaka hatirirurapo. Hatiriruraka kára koahokosapo. Anapaka pasu patéyaki pasu kaweyaki sarimaraka irinafapo.

²² Arirakano nanikose kau aporomo maka petoro asia ayiáka irinapo. Waene he kawe metekesane petoro patéane takamanafapo. Takamarakano waene he kawemo ponoponraka petoro patéane faurakosapo. Fauraka petoro kakeraka waene heane sakuriakosapo. Sakuriraka waene he soko, petoro soko, tetákara fahokosapo. Arirakano waene he kawe metekesane petoro kawea takamarakano, petoroane faunafapo." Aíyaka Yasumo ipi some kawe kasane soko, ipu fana somesane soko, tetane sarimaraka kekemahoane siahoasifareapo, aíyaka Yasumo takumeaka somesapo.

Fenena maiya amo kepoane Yasumo somesane oyapo.

Matiu 12:1-8; Ruki 6:1-5

²³ Fenena maiya hakāsa metamo, witi hemoa Yasu soko, ipi aporo hakāsa pura soko i pusuapo. Puraka aporo hakāsa puramo witi hae susane tukua nesapo. ²⁴ Nenakano Fere se aporomo aseraka Yasuaki someraka, "Nómo ní aporo hakāsa puramo makata aturane asesie. Ipu makata arakirane fenena maiyamo yaposapo. Yaposane mamosoanane mairakanonare?"

²⁵⁻²⁶ Airakano asekeea, Yasumo ipu hasaka hemakapusuane tariakosakipoko, Tefeteane Kotimo sawia popasane iaki someraka, "Wate fana pirisiti aporo kára ipi yano motosa Apiata, e rea maiya amo, Tefete soko ipi aporo hakāsa pura soko meamosapo. Meamosa maiya amo, Tefete ipi Kotimo apea yorokoa aseane, Kotipoko farawa taesane Apiatamo karakano Tefetemo nenaka, ipi aporo hakāsa puraki soko, farawa taesane kasapo. Kasáne Kotipoko farawa taesane aporo hinamo ipu nakohoamo yapo motosapo. Pirisiti aporomo namina hákasa makata nenáne yaposafapo. Asiāne Tefete ipi pirisiti aporohoanafonosa yiamo farawa yaposane nesapo.[†] Aíyaka Kotimo sawia popahoareapo. Popasane repo menoraka kepoane hemakapurakarire? Wae, repo hemakapurakarifapo.

²⁷ Arirakano aporo ararehokosakipoko fenena maiyane Kotimo maresapo. Fenena maiyane makotehokosakipoko aporoane maresafapo. ²⁸ Aporomanomo Tákeane anopo. Yape fenena maiya amo makata aina ane ano unihaeaka rekenapo." Aíyaka Yasumo Fere se aporoaki somesapo.

Aporo hokono narisa Yasumo mafasane oyapo.

Matiu 12:9-14; Ruki 6:6-11

[†] 2:25-26: "Tefetemo makata nesasamo nōmo aporo hakāsa purane meamorakano makata nesane hasakasafapo." Aíyaka Yasumo kepoane iaki somesapo.

¹ Efera hunia Yu aporomo sarimana apea Yasu yorokoa aseane, aporo hokino narisane rekeno asesapo. ² Arirakano fenena maiya amo aporo hokino narisa Yasumo mafarakar-ihiamo, Fere se aporomo asekeea risisapo. Fenena maiya amo Yasumo rakirakano asekeea hukurukusakipoko, asekeea risiapo. ³ Asekeea risikino, Yasumo aporo hokino narisaki someraka, “Né pekea tipi o reae,” aisapo.

⁴ Aíyaka epo Fere se aporoaki someraka, “Fenena maiyámo koteaka rakiane soko metao, watikiaka rakiane soko metao, makata rakira meta mamo Kotimo somemaneane mamosorakare? Aporo meta kurapaka ararenane soko metao, aporo meta rurane soko metao, makata meta mamo Kotimo somemane mamosorakare?” Airakano ipu me kausapo.

⁵ Me kaurakano asekeea, Yasumo saperaka iane asekehaesapo. Aseane ipu himumo kakimako hisirakano asekeea Yasumo iaki himu mahisisapo. Asiāne epo aporo hokino narisaki someraka, “Né hokino máfaraka raerasie.” Airakano hokino raehoane narisane fasapo. ⁶ Aporoane hokino narisane farakano asekeea, Fere se aporoane Yu aporomo sarimana apeane metakarikia pukua, wate foaka Kini Herotemo ipi aporo raipayaki namina susu someaka maraka, “Yasuane kukusimo isiapo rukusapo. Isiapo mayiáka rukusare?” aíyaka someaka masapo.

He kekea kaya a aporo yakai sarimasane oyapo.

Matiu 4:24-25; Ruki 6:17-19

⁷ Yasu ipi aporo hakása pura soko, pukua he kekea kaya á pusuapo. Purakano iyaki aporo yakai asekehaeapea pusuapo. Pusuane Kariri hauaka aeyaka soko, Yutía hauaka aeyaka soko, ⁸ Yarusarame siti aeyaka soko, Itumea hauaka aeyaka soko, he Yotane yaoraka hauaka taku aeyaka soko, Saetone taone aeyaka soko, Taia taone aeyaka soko, aporo hinamo yakaimo kaiyiane Yasumo aporo hinamo makata takamasane mafasapakano kaikia, í é rea pesapo.

⁹⁻¹⁰ Aporo hinamo pesane í yakai makata tasane Yasumo mafasapo. Mafarakano asekeea aporo hinamo makata tasa suamo Yasuane kaua sakaihoko pesapo. Pekeea ipi kaua ipu suamo sakairakano asekeea Yasumo ipi aporo hakása puraki someraka, “Aporo hinamo kára peraka taperipo. Asiamo ano kasua kakakosapo. Kasu he fea sakomo kita humareanie,” aisapo. ¹¹ Airakano aporo hinamo tua yatafu risiamo Yasuane asera yiamo Yasu hikumisia hurupekea wareke wáraka, “Né Kotimo hokosapo.” ¹² Airakano Yasumo yatafuaki someraka, “Aporo hinamo suamo kaiyakohoamo ano Kotimo hokosapo, aihokopo.” Aíyaka Yasumo paroaka somesapo.

Aporo hakása pura kenosu yano taesane oyapo.

Matiu 10:1-4; Ruki 6:12-16

¹³ Yasu ūria hinaka, Yasumo ipi aporo sesesa susuane peaesapo. ¹⁴ Perakano asekeea, aporo kenosu murikimasapo. Murikimasane i tarira aporopo, aisapo. Murikimasane eyaki kikinarako hakása pukusakipoko murikimaka, arirakano epo someane some kakakosakipoko murikimaka, ¹⁵ arirakano yatafuane metakarikia pusie aihokosakipoko murikimaka ayiáka rakismo iaki wakapuan kasapo. ¹⁶ Asiamo aporo kenosu murikimasane oyapo. Saemone ipi yano motosa metane Pita, aíyaka Yasumo yano motosapo. ¹⁷ Arirakano meta Sepetemo maeya Yamese, arirakano meta Yamesemo ipi mamanea Yone tetā ane Poanesi, aíyaka Yasumo yano motosapo. Ipu Poanesi yano motosa kepoane namo meaka Yao Kikirira aíyaka yano motosapo.

¹⁸ Arirakano meta Enitu, arirakano meta Firipi, arirakano meta Patóromiu, arirakano meta Matiu, arirakano meta Tomase, arirakano meta Afiasemo maeya Yamese, arirakano meta Tátiese, arirakano meta Rome kamanimo Yu aporo asekeea reane metakarikosakipoko hemakapura aporo Saemone, ¹⁹ arirakano meta Yasu parakehokosa aporo Yutase Isekerio, ayiáka Yasumo aporo kenosu murikimasapo. Murikimaka faraka Yasu ipi apea pusuapo.

“Yasupe Satane tati hakāsa yiyareapo,” aíyaka Kotimo somemane tisa aporomo somesane oyapo.

Matiu 12:22-37; Ruki 11:14-23

²⁰ Efera hunia Yasu reakipoko aporo yakai sarimaraka kárasekeno maiya suamo Yasumo makata rakiraka reke, epo soko ipi aporo hakāsa puramo soko, ipu makata ne-safapo. ²¹ Makata nesafapakano, Yasumo ipi aporo iramo kaisiapo. Yasu masuasapakae, aisasamo ipu Yasu pasimako pesapo.

²² Arirakano Kotimo somemane tisa aporo Yarusarame siti aeyaka pekea ipu someraka, “Yatafumo unihae yano motosa Piaósipumo, Yasu ho maka, e Yasuyaki hakāsa reasasamo, Piaósipumo wakapuane Yasumo maka yatafu pusierakano apure.”

²³ Airakano Yasumo iaki someraka, “Re su peae.” Aíyaka perakano asekea Yasumo iaki takumeaka someraka, “Satanemo ipi yia aporo raipane mayáka pusierare? ²⁴ Aporo namina hauaka hakāsa risia yiamo parakuraka weraka aporoane koaka tarikia kekepo kekepoaka risike ape kauanehokosapo.

²⁵ Arirakano aporo ira hakāsa namina parakuraka weraka arupukua fahokosapo.

²⁶ Aina ayiáka Satanemo yatafuaki pusie satiki, ipi táké tati awera ayiáka weafunupo. Satanemo ipi aporo tákeyaki parakuraka wera satiki, i arupukua fahoafunupo. ²⁷ Arirakano aporo metamo aporo warēmo* apea makata kemo hakimokoariraka, fana aporo warēane sakomo taporaka motokoa marekea, ipi apea yorokoa makata hakimorapo. Aporo warēane tapohoasiraka, ipi yaiya warēraka rekeno asekea ipi apea hakimokoako yorokoa purafapo.

²⁸ Asiamo nōmo reaki kakaro somerakaripo. Aporo hinamomo kekepo watikiaka rakirapo. Watikiaka rakirane soko, Kotiane mawakasemarakaka somerane soko, Kotimo mafahokosapo. ²⁹ Asiāne Ho Kotesane aporo hinamomo mawakasemarakano, yumo soko, keseke soko, Kotimo kakaro mafahokosafapo. Aporo hinamomo Ho Kotesane mawakasemarakaka somesasamo, makata watikisane iyaki yaiya rekeakosapo,” aisapo.

³⁰ Asiamo ipu someraka, “Yatafumo Yasu ho masasamo Yasumo wakapuaka arakire.” Aisa akipoko Yasumo iaki aíyaka somesapo.

Yasumo ipi kaíyia soko ipi mamanea soko pesane oyapo.

Matiu 12:46-50; Ruki 8:19-21

³¹ Yasumo ipi kaíyia soko, ipi mamanea soko pesapo. Pekea hauaka moroa risike someraka, “Yasu peaehoanie.” ³² Airakano aporo hinamo yakai Yasuyaki hakāsa sarimaraka toamo Yasuaki someraka, “Nōmo ní ama soko, ní mae soko, ní papā soko, hauaka moro atura risike, né peaerakae.”

³³ Airakano Yasumo someraka, “Nōmo ama soko, nōmo mae soko, kepoane kaisie.”

³⁴ Aíyaka eaki himu hakásaraka hemakapura aporo hinamo toane Yasumo asekehaeraka someraka, “Nōmo ama asíane soko nōmo mae asíane soko repo. ³⁵ Asiamo aporomo soko, hinamomo soko, Kotimo hemakapusuane kekemarakaka rakirakano aporo hinamoane nōmo mae nōmo papā nōmo ama asíapo.” Aíyaka Yasumo somesapo.

4

Makata mano potesa Yasumo takumeaka somesane oyapo.

Matiu 13:1-9; Ruki 8:4-8

¹ Yasu he fea pukua efera hunia iaki some kasapo. Some karaka reke aseane aporo hinamo yakai sarimarakanano asekea, ipi takahikia pukua kasu hea tapuku reakipoko e kasua reke, aporo hinamo he fua risiaki some kasapo. ² Some yakai takumeaka some kasapo. Ipu hemakapusimo someraka, ³ “Hao, kaisie. Aporomo makata mano poterape pusua. ⁴ Poterape pusua maiya amo makata mano metakira ikia kara hurupepesapo. Hurupepesane menamo nesapo.

* 3:27: Aporo warēane takumeaka somesamo kepoane Satanepo. Aporo warēane tapora aporoane Yasupo.

⁵ Arirakano makata mano metakira eke kima hauaka wakasemasakipoko hurupepesane foaka tanehesa nine, pikinu koteaka pusuafapo. ⁶ Pikinu koteaka punafonosasamo maíyamo ruraka sisipuraka kuane yoferaka kukua kesapo.

⁷ Arirakano makata mano metakira makata mano keta risia arakarua hurupepesapo. Hurupepesane makata mano keta risia akiyaki hakāsa tanehesapo. Tanehenaka makata keta risiane popakeraka, makata manoane karotapiraka serekeraka wate pesafapo.

⁸ Arirakano makata mano metakira hauaka kotesakipoko hurupepesane tanehekeea wate pesapo. Wate peraka, metakira wate teti su (30) pekea, metakira wate sekeseti su (60) pekea, metakira wate wane harote su (100) ayíáka pesapo. ⁹ Re senaki risiamo kairaka koteaka kaisie. Kaikia hemakapunie." Aíyaka Yasumo iaki somesapo.

Maiya suamo Yasumo ipi takumeaka somesane oyapo.

Matiu 13:10-17; Ruki 8:9-10

¹⁰ Aporo hinamo yakai pukua fasokino aporo hukusi Yasuyaki risike, aporo kenosu fana murikimasane Yasuyaki risike ipu Yasuaki someraka, "Takume kepoane yakapare?"

¹¹ Airakano Yasumo iaki someraka, "Repo kaiyisimo Koti unihaeaka rea mahamesane pipu yumo some kepoane reaki hufitaeraka somerakanapo. Asiāne nōmo muriki-makanafonosa aporoaki takumeaka susu somerakanapo.

¹² Kotimo sawia poparaka ayiakakosapo, aisa amo kepoane porofete aporomo kakaro popahoareapo. Popasane oyapo.

'Aporo hinamomo himo aseraka aseakosapo. Asesa nine kepoane koteaka hemakapurafapo. Ipu senakimo kairaka kaiyakosapo. Kaisia nine kepoane koteaka hemakapurafapo. Ipu himumo koteaka hemakapukusane hisiraka risirapo. Asiamo ipu himu watikisane metakarikia Kotiaki risikiako parisa satiki, Kotimo ipu watikisane mafahoafunureapo.' Aíyaka porofete aporo Aesayamo popahoareapo." Aíyaka Yasumo iaki somesapo.

(Aisaia 6:9-10)

Makata mano potesa amo takume kepoane oyapo.

Matiu 13:18-23; Ruki 8:11-15

¹³ Yasumo ipi aporo hakāsa puraki someraka, "Repo takume some one kairakarifare? Takume some one hemakapunafonoraka repo takume suane mayíáka kepoane hemakapukusare? ¹⁴ Hao, kaisie. Makata mano poterape pura aporo asiane, Kotimo some kará aporopo. Makata mano asiane, Kotimo somepo. ¹⁵ Makata mano ikia kara hurupepesa asiane, aporo ikia kara fea risiamo Kotimo someane some kasane kairakano, Satane wate foaka pekea someane hakimarapo. ¹⁶ Arirakano eke kima hurupepesa asiane oyapo. Aporomo Kotimo someane kairaka wate foaka someane seseaka kaikia hemakapurapo.

¹⁷ Pikinu koteaka punafonona ayíáka koteaka kakimaka rerafapo. Makata watikisa fasereperakano soko metao, Kotimo some kakimasa aporoaki mokoatikirakano soko metao, Kotimo someane maiya wakasema kaisia nine, foaka metakarirapo. ¹⁸ Arirakano makata mano keta risia arakarua makata mano hurupepesa asiane oyapo. Aporomo Kotimo someane kaikia ya ¹⁹ hauaka wo makata tomekesa kára hemakapurane soko, mone kára mokoako seseraka hemakapurane soko, hauaka wo makata ane mokoako totoraka hemakapurane soko, makata isia amo Kotimo someane karotapiraka wate koteaka perafapo. Wate peanafonosa ayíáka, aporo hinamo metakiramo Kotiane hemakapusimo soko, Kotimo sesehoasimo soko, ayíáka rakiako hemakapurafapo.

²⁰ Arirakano hauaka kotesakipoko hurupepesa asiane oyapo. Aporomo Kotimo someane kaikia kakaro kakimaka risikino, wate apera ayíáka perapo. Wate perane metakira teti su (30), metakira sekeseti (60), metakira wane harote su (100) ayíáka wate tumokoasimo kára perapo." Aíyaka Yasumo takume amo kepoane somesapo.

Yasumo nafa takumeaka somesane oyapo.

Matiu 5:15; Ruki 8:16-18

²¹ Yasumo ipi aporo hakāsa puraki someraka, "Nafa pakimaka motokoa taramomo karotapirare? Nafane ape wara pete petaua motorare? Wae, nafa pakimaka apea

waremarerapo. ²² Aina ayíáka Kotimo some faremaresane kakamaraka mafekemahokosapo. Makata mahamesane hufitae hokosapo. ²³ Re senaki risiamo kairaka, koteaka kaisie. ²⁴ Nōmo someane koteaka kaikia hemakapunie. Repo makata akara ayíáka reaki kakakosapo. Makata meta soko ripaka marekea kakakosapo. ²⁵ Aina ayíáka repo nōmo someane koteaka hemakapuko, kepoane kope pukua hemakapurakano, some meta kepoane soko hemakapusimo Kotimo né ararehokosapo. Asiāne nōmo someane koteaka kokoa hemakapunafonosasamo, fana makata kaisiane soko meraruhokosapo.” Aíyaka Yasumo iaki somesapo.

“Kotimo aporo unihaeaka asekea reane oyapo.” Aíyaka Yasumo takumeaka somesane oyapo.

²⁶ Yasumo someraka, “Aporo hinamomo Kotiane hemakapususasamo Kotimo iane unihaeaka asekea rerapo. Asekea rera asiāne oyapo. Aporomo koane hae poteraka marekea, ²⁷ apea hikia ereamo waka mituru fiarakano turikia pukua, maiya suamo ari-raka rekenone makata mano potesane taneherapo. Sere soko ereamo soko taneherapo. ‘Mayíáka pauaka herare?’ Aíyaka aporo amo mahimeteraka, ²⁸ arirakano makata mano ipi hemakapukua hauaka aeyaka pauaka heke, fana ku murikia, amo tipia huhu murikia, amo keseke koane namo nakosane torapo.

²⁹ Koane namo nakosane namoraka parosekeno, aporomo tumarapo. Marirakano tumarare? Namō nakosa maiya á pausekeno tumarapo.” Aíyaka Yasumo iaki somesapo.

Ira máseta hae maposa Yasumo takumeaka somesane oyapo.

Matiu 13:31-32; Ruki 13:18-19

³⁰ Yasumo someraka, “Kotimo unihaeaka asekea reane makata yakapa asíare? Repo hemakapusimo takume somehokosane yakapa somehoasimore? ³¹ Kotimo aporo hinamomo unihaeaka asekea rea asiāne oyapo. Ira máseta hae aporomo ipi hemoa potesa asiapo. Máseta haeane namo kakaro wakasemapo. Hae meta wakasema ayíáka anafapo. ³² Máseta hae kakaro wakasema yiamo, pauaka henaka hemoa makata porosane marokeraka ira pariraka káranapo. Káraraka reakipoko ira eya á mena koraka torane pekea menamo ape kirapo. Aina ayíáka fana Kotimo aporo hinamomo hukusiane unihaeaka asekea rea nine, keseke aporo hinamomo kárane unihaeaka asekea rekeakosapo.” Aíyaka Yasumo iaki somesapo.

Aporo suaki Yasumo takumeaka somesane oyapo.

Matiu 13:34-35

³³ Yasumo ipi someane aporo hinamomo hemakapusimo epo takume yakai some kasapo. Some kasane ipu sia kairakano, some takume metakirane soko some kasapo.

³⁴ Aporo suaki epo takumeaka hakāsa somesapo. Arirakano ipi aporo hakāsa pura namina hákasa risike some kepoane hufitaeraka somesapo.

Atifoyaki he kupayaki kára pesane Yasumo mafasane oyapo.

Matiu 8:23-27; Ruki 8:22-25

³⁵ Maiya hakāsa yiamo samapu yao nene horamo, Yasumo ipi aporo hakāsa puraki someraka, “Isu he Kariri taku ra purakapo.” ³⁶ Airakano aporo su sarimasane metakarikia, Yasu kasua kakeno i soko, kasu yia ripaka pusuapo. Kasu meta soko aporo metakiramo rokua hakāsa purakano asekea ³⁷ Yasu kasu kenoa kake uni kata motokoa wareapo. Wasakipoko yao peraka atifo soko, he kupayaki kára pesapo. He kupa kára peraka, kasu tua he wakekeraka, kasu kenepesahopo. ³⁸ Keneppeakorakano asekea, aporo hakāsa puramo Yasu maturikia someraka, “Tisao, isu he nekea kukua keasireapo. Nómo isu hemakapurakarire?” ³⁹ Airakano Yasu turikia pukua atifoaki soko, he kupaki soko someraka, “Farasie. Auarasie.” Airakano atifo soko, he kupa kára pesane soko fasapo. ⁴⁰ Farakano asekea Yasumo iaki someraka, “Repo marirakano namorakanare? Repo anoaki kakaro himu hakásaraka hemakapurakanafareapo.” ⁴¹ Airakano i fofaraka namina yia someraka, “Yasumo someane atifomo soko, he kupamo soko, kakimaraka fane. Ayíáka arakirane e aporo eparakapo,” aisapo.

Yatafumo aporo ho masa Yasumo mafasane oyapo.

Matiu 8:28-34; Ruki 8:26-39

¹ He Kariri kekeia kaya kasu rokua hikia, Kerasa hauaka á kasu karimarekea ² hikia aseane, yatafumo aporo ho masa sapenako pesapo. ³ Aporoane aporo kusua taena kunikia á reke, eane aporo metakiramo tapohoane soko siasafapo. E mokowerakano waya hatisamo soko tapohoane siasafapo.

⁴ Fana maiya káramo aporo ho masane wayamo epo hokono soko korake soko taposapo. Taposane ipi waréraka wakapuraka wayane marutusapo. Maruturakano aporomo e mako ayiane soko, ipi wakapu siasafapo. ⁵ Ereamo soko, sere soko, e kunikia reke, ūria hikia nenakamaka wirisusuraka koraka reapo. Ipi kaua ekemo rusuane yokoaemosususapo. ⁶ Yameno anaka epo Yasuane aseraka foaka Yasu rea pekea kakuna porokoa kake Yasuaki kekeresapo.

⁷⁻⁸ Kekererakano asekeia Yasumo yatafuaki someraka, “Yatafu né ho watikisapo. Né aporoane metakarikia pusie,” aisapo. Airakano yatafumo aporo ho masane tura reke sakepamo wáraka someraka, “Yasuo, ne namo kakaro unihae Kotimo hokosao, nómó ano mayiakakosare? Nómó ano fanasiraka kau teraka yaiya rerane kakakopo.”

⁹ Airakano Yasumo someraka, “Né yano motosa epare?” Airakano yatafumo someraka, “Isu mukisakipoko ano yano motosa Mukisapo. ¹⁰ Hauaka one metakariako hisiripo. Hauaka one metakarikia pusiehokopo.” ¹¹ Aiyaka ipu aseane saro yakai ūri kakafaea makata nenakano aseraka someraka, ¹² “Nómó isu pusierakane saroane tua risikiako pusiesie.” ¹³ Airakano Yasumo someraka, “Ao. Ayisie.” Airakano yatafumo aporo ho masane metakarikia pukua saro tua risiapo. Risikirakano saro su tu taosene ane (2,000) ūri kakafaea aeyaka foaka sosenoraka peraka, he fesere mosakipoko aeyaka eteraka, he numua hurupeperaka saro suane he nekea kukua kesapo.

¹⁴ Kukua kerakano asekeia, saro asekeia risia aporoane tekatarikia apea hikia, apea risia aporoaki soko, ima risia aporoaki soko someraka, makata su asesane somesapo. Somerakano aporo suamo makata ásiane aseako pesapo. ¹⁵ Pekea Yasu rea aseane, aporo ho yatafu mukisamo fana masane, koteaka reke pasu osoraka koteaka hemakapukua rekeno asesapo. Aseraka namosapo. ¹⁶ Asesa aporoamo aporo yatafumo ho masa mafasane soko, saro kukua kesane soko, makata su asesane somesapo. ¹⁷ Somerakano aporo suamo Yasuaki someraka, “Isiapo hauaka one metakarikia, ne pusie.” ¹⁸ Airakano Yasu kasu ripaka pukusakipoko rekeno, aporo ho masa mafasamo someraka, “Ano neyaki hakāsa perakapo.” ¹⁹ Airakano Yasumo waesapo. Waeraka epo someraka, “Ní apea parihikia, ní aporo téakeki Unihaemo né araresane somehoanie. Unihaemo ne kamenakaraka hemakapukua araresane somehoanie.” ²⁰ Airakano aporoane paripukua, ape sumu kaeyakosu yano motosa Tekáporisi á someraka, “Yasumo ano uyáka araresapo.” Airakano aporo su fofasapo.

Hinamo hokosa kusua Yasumo maturikia taesane oyapo. Arirakano hinamo meta soko makata takamasamo Yasumo pasua sakaihoane mafasane oyapo.

Matiu 9:18-26; Ruki 8:40-56

²¹ Yasu kasua ripaka pukua he Kariri kekeia kaya taku ra poparipukua aseane, aporo hinamo yakai sarimaraka risikino asekeia Yasu he fea reapo. ²² Reke aseane Yu aporomo sarimana ape asekeia rea aporoane pekea, ipi yano motosa Yairasepo. Yairase pekea Yasu aseraka kakuna porokoa kake epo ²³ Yasuaki someraka, “Nómó hinamo hokosa kukusireapo. Asiasamo nómó hokonomo e sakairako peae. Sakairakano e makata tasane faraka e kukusafapo.”

²⁴ Airakano Yasu eyaki hakāsa pusuapo. Tetāyaki aporo hinamo yakai hakāsa kafukua pusuapo. ²⁵ Kafukua purakano, hinamo meta patera aeyaka pekea, ipi keremisi kenosumō wake apea makama yiaraka kayapo. ²⁶ Maiya káramo mitikoro aporo metakiramo rakiane soko hinamoane ipi fasafapo. Epo mone suane mitikoro aporoaki kaka, asiāne soko fahoanafonoraka ipi makata takamasane kárarasapo. ²⁷⁻²⁸ Makata takamasa káraraka

kake, Yasumo aporo hinamo makata tasa mafarakanapakano kaikia, hinamoamo ipi himumo hemakapuraka, "Yasumo pasua nōmo sakaihoane, ano wake apea makama yiaraka kayane fahokosapo." Aíyaka hemakapukua Yasu patera aeyaka pekea ipi pasua sakaisapo.

²⁹ Sakaihoane wate foaka ipi wake apea makama yiaraka kayane fasapo. Farakarakano kaisiapo. ³⁰ Arirakano Yasu ipi meraruamo puraka reke kaiyiáne, ipi wakapu purakarakano kaisiapo. Kaikia ipi pariaseraka, aporo hinamo suaki someraka, "Epamo nōmo pasua sakairakayiare?"

³¹ Airakano ipi aporo hakāsa puramo someraka, "Wae. Aporo hinamo yakaisakipoko nōmo mayiáka aseakosare? Ipu né kaua hisirimaka purakayiapo. Pasua sakaianane mari-rakano airakanare?" ³² Airakano Yasumo pariaseraka ipi pasua epamo sakaisarihoamo aseako pariaseraka, ³³ hinamoane ipi wake apea makama yiaraka kayane farakarakano, kaikia fofarakaka hamisisiraka, kakuna porokoa kake makata su asiane Yasuaki somesapo.

³⁴ Somerakano Yasumo kaikia eaki someraka, "Hinamo neo, nōmo anoaki himu hakásaraka hemaka apura yiamo ne makata takamasane mafarakayiapo. Ní tau koteaka kakanie. Ní makata takamasane kakaro fasapo," aisapo.

³⁵ Aisa maiya amo aporo metakira pekea, Yu aporomo sarimana ape asekea rea aporomo ape aeyaka pekea, Yairaseaki someraka, "Nómo hinamo hokosa namo kakaro kusuapo. Kusuasamo tisaki efera hunia somehokopo. Metakarisie." ³⁶ Airakano someane Yasumo kaikia kakipayaraka, Yu aporomo sarimana ape asekea rea aporoaki someraka, "Himu fahokopo. Anoaki himu hakásaraka hemakapunie," aisapo.

³⁷ Aíyaka Yasumo Pita soko, Yamese soko, ipi mamanea Yone soko, karikia pukua aporo suaki peakopo, aisapo. ³⁸ Aíyaka i pukua, Yu aporomo sarimana ape asekea rea aporomo apea pauraka aseane, aporo hinamo yakai sarimaraka, hokosa kusuapoko kára yaiya hihiripuraka tokeno asesapo. ³⁹ Asekea Yasu apea yorokoa aporo hinamo suaki someraka, "Marirakano hihiripurakanare? Hokosane wayereapo. Kusuafapo." Aíyaka hokosa ane maturikia taehokosane epo somesapo. ⁴⁰ Aíyaka somerakano aporo hinamo suamo Yasuaki hokomarekea keasapo. Kearakano asekea Yasumo i suaki someraka, "Re su yao hauaka moro atura pusie," aisapo. Purakano asekea hokosa amo kaiyia soko, wafaya soko, Yasumo karikia pukua, aporo isia eyaki hakāsa pesane soko karikia hokosa warea apea yorokoa, ⁴¹ hokosa hokonoa Yasumo maka ipi meaka someraka, "Tarita kumi," aíyaka somesapo. Arirakano namo meaka, "Masira, né turikia pusie," aisapo. ⁴² Aíhoane hinamo hokosa ane turikia pusuapo. Turikia pukua koraka reapo. Arirakano masira turikia pusua ane keremisi kenosu fasapo. Masira ane koraka rekeno aseraka i su fofasapo. ⁴³ Fofarakano Yasumo iaki someraka, "Aporo hinamo metakiraki somehokopo. Hokosane makata nakosa kakanie," aisapo.

6

Nasare apea Yasumo some karakano aporomo kakipayasane oyapo.

Matiu 13:53-58; Ruki 4:16-30

¹ Yairasemo apeane metakarikia Yasu ipi apea paripusuapo. Paripukua ipi aporo hakāsa purane soko, namina eyaki hakāsa poparipusuapo. ² Poparipuraka risike, fenena maiya amo Yu aporomo sarimana apea pukua, Yasumo some karakano, aporo hinamo metakiramo kaikia fofasapo. Fofaraka ipu someraka, "Epo makata suane ma kaisiare? Kotimo hemakapusua some kotesa somerakano ma kaisiarakapo. Epo Kotimo wakapumo hemakapukua arakirane epo hokonomo rakisiane ma enomasarakapo. ³ Eane kafeneta aporopo. Eane Mariamo maeyapo. Epo ipi mamanea ane Yamese soko, Yosefe soko, Yutase soko, Saemone soko, suane isiapo aserapo. Epo ipi ifiane isina hakāsa tokenapo." Aíyaka ipu Yasuaki himu hakásaraka hemakapunafonoraka hisiraka risiapo.

⁴ Hisiraka risikino Yasumo iaki someraka, "Kotimo some kará porofete aporomo ipi ape sumu aporo hakāsa risia amo soko, ipi aporo iramo soko, ipi amámo kepomo soko, ipi ape wará aporo hakāsa risiamo soko, eane makama fanaraka hemakapurafapo.

Hemakapunafonorakano yia, ape sumu meta á aporo hinamo metakiramo Kotimo some kara porofete aporoane makama fanaraka hemakapurapo,” aíyaka Yasumo somesapo.

⁵ Yasumo makata wakasema rakiraka, aporo hukusi makata tasa hokonomo sakaihoane fasa nine, Kotimo wakapumo hemakapukua rakirane ipi kára rakisiafapo. Aporo hinamomo Yasuaki himu hakásaraka hemakapunafonorakano, kára rakisiafapo. ⁶ Eaki himu hakásaraka hemakapunafonosane Yasumo ipi himu nekea kára hemakapusuapo.

Aporo keno sumo makata rakiako pusiesane oyapo.

Matiu 10:5-15; Ruki 9:1-6

Ape sumu fete sua Yasu pukua some kasapo. ⁷ Some karaka Yasumo ipi aporo kenosu murikimasane peaesapo. Perakano asekeea aporo tetá tetáka hauaka meta pukua, arirakano yaiya aporo tetá meta hauaka meta pukua, ayiakasimo murikimasapo. Murikimaka ipu yatafumo aporo ho masane metakarikia pusiehoasimo iaki wakapu kasapo.

⁸ Kaka someraka, “Kimisi puraka makata kára mokoakopo. Tatia maka puane siahoasireapo. Arirakano makata nakosa soko, ku soko, mone hae soko, makata ane mokoa pukupo.” ⁹ Tamaka osohoane siahoasireapo. Arirakano pasu tetá osohokopo. ¹⁰ Re puraka ape sumu á pauraka, apea yorokoa ape hakásia yia waka risikianie. Ape wafaya mahisihokohoamo ape meta wakako mokome pukupo. Ape sumu meta pukusakipoko, ape ne wasa aeyaka punie.

¹¹ Ape meta á aporomo reaki terehoanafonoraka, repo someane kaiyako hisirakano asekeea apeane metakarikia punie. Korakea kokotonemosane rerakatapikia marekeea metakarikia punie. Kokotonemosane iyaki hakásia yaiya rekeasimo aina ayíáka, ipu watikisane iyaki yaiya rekenapo. Aíyaka repo tarinie.” Aíyaka Yasumo aporo kenosuaki somesapo.

¹² Arirakano aporo kenosu pukua some karaka, “Aporo hinamo repo makata watikiaka rakisiane metakarikia Yasuaki risikiako parihoanie,” aíyaka some kasapo. ¹³ Yatafuaki soko ipu pusierakano pusuapo. Wera maka aporo makata tasa kaua sisihohane fasapo.

Yasumo wakapuaka rakisiane Herotemo kaikia himeteraka reane oyapo.

Matiu 14:1-2; Ruki 9:7-9

¹⁴ Yasumo wakapumo hemakapukua rakiraporakano Yasu yano motosa Herotemo kairaka aporo metakiramo someraka, “Yasu ipi Yone he tapukumarera ayareapo. Yone he tapukumarerane maturikia taerakano e pukua wakapuaka rakirakanapo.” ¹⁵ Airakano aporo metakiramo someraka, “Yasuane Iraíya fana reane paripeareapo.” Airakano aporo metakiramo someraka, “Yasuane porofete aporo meta reapo. Wate fana Kotimo some kará porofete aporo rea ayíáka e are.” ¹⁶ Airakano Herotemo kaikia someraka, “Yone nōmo mawi pateketaerasiesane Kotimo maturikia taesapo,” aisapo.

Yone he tapukumarerane Herotemo rusua kusuane oyapo.

Matiu 14:3-12; Ruki 3:19-20

¹⁷ Kariri hauaka asekeea rea aporoane Herotepo. Herotemo ipi mamanea yano motosa Firipipo. Firipimo ipi asea yano motosa Herótiasepo. Herótiaseane, Herotemo haki arumaka rekeno asekeea ¹⁸ Yonemo Heroteaki hukurukua someraka, “Ní maemo hinamoane nómo haki arumaka areane, somemané motosane nómo mamosoane.”

¹⁹ Aisasamo hinamo Herótiasemo kaikia Yoneaki hisiraka kake, e kukusimo ruko seseaka hemakapusuapo. Hemakapusua nine e rusua kusuafapo. ²⁰ Arirakano Herotemo Yoneaki namoraka reke, Yone waseremaka hokonoa taporaka tipura makeaniesapo. Tipura makesa rekeno asekeea, Herotemo hemakapuraka, “Yone ipi ereketaeraka reke ipi Kotiaki hemakapukua are.” Aíyaka Herote namoraka reke, Yone rusuafapo. Arirakano aporo metakiramo soko Yone rukusaporakano, Herotemo waesapo. Maiya metakiramo, Yonemo someane Herotemo kaikia seséaka kaisia nine himetesapo.

* ^{6:8:} Aporo mēromo iane ararehoasimo makata kemo mokoa pukupo, aisapo.

²¹ Herote ipi takapesa serea paurakano hokono keraka, Herotemo ipi kamani aporo soko, ame aporo satini soko, Kariri hauaka aporo kára soko, i suaki hokono keako peaesapo. ²² Perakano asekea Herótiasemo ipi faraya pekea Herotemo apea taneseraka kesasapo. Taneseraka kesarakano asekea Herotemo seséraka, aporo su pesamo soko sesésapo.

²³ Asiamo hinamo hokosa sakoraki Herotemo someraka, “Nómo makata makasierakanó neaki makakosapo. Nómo makata asekea rea sapeane neaki makakosapo. Nómo kakaro somehoanafonorakano soko, Kotimo aserakanapo,” aíyaka aumaraka somesapo. ²⁴ Somerakano Herótiasemo faraya pukua, ipi kaíyiaki someraka, “Nómo yakapa makasiehokusare?” Airakano Herótiasemo someraka, “Yone he tapukumareramo wamoane makasiehoanie. E kakaro rusua kusuane aseako ipi wamoane makasiehoanie.”

²⁵ Airakano Herótiasemo farayane wate foaka pukua, unihae Heroteaki someraka, “Yone he tapukumareramo wamoane patekemaka, tísia motokoa anoaki makasie.”

²⁶ Airakano unihae Herotemo kaikia mahisiraka reapo. Mahisiraka reke makakosapo, aíyaka aumaraka somesane, aporomo hokono akera maiya ámo suamo kaisiasamo, patekemakaniesane metakariane kaiyanapaka ipi somesane kekemasapo.

²⁷ Kekemaraka wate foaka aporo terakaiyamosamo Yone wamo pateketaehoasimo tipura apea pusiesapo. ²⁸ Airakano tipura apea pukua, Yone wamo patekemaka tísia motokoa maka pekea hinamo sakoraki kasapo. Karakano maka ipi kaíyia Herótiaseki kakako maka pusuapo. ²⁹ Arirakano Yonemo ipi aporo hakāsa pura peraka Yone oto susuane maka pukua kunikia motosapo.

Aporo yakai fae taoseneaki (5,000) Yasumo farawa kasane oyapo.

Matiu 14:13-21; Ruki 9:10-17; Yone 6:1-14

³⁰ Yasumo ipi tarira aporo murikimasane e rea paripekea ipu makata rakisiane soko, ipu some kasane soko, makata suane Yasuaki somesapo. ³¹ Someraka risike aporo hinamo yakai perakano purakano, perakano purakano, ariraka risike tarira aporomo makata nena maiyane fasapo. Asiamo Yasumo tarira aporoaki someraka, “Re hákasa anoyaki nena yaoa peae. Maiya wakasemamo fenako peae.” ³² Airakano i hákasa pukua nena yao taku ra pukusakipoko kasua ripaka rokoa pusuapo.

³³ Purakano aporo hinamo yakaimo asekea hemakapuraka, “I taku ra apure,” aíyaka hemakapuraka, i korakemo taku ra fofoaka pusuapo. Puraka ape sumu fete su aeyaka pusuapo. Pukua Yasu soko, ipi aporo hakāsa purane soko, i peasiraka, aporo hinamo yakai he fe ikia kara anaka pusuane, fana pauraka sarimasapo. ³⁴ Sarimasakipoko i kasua ripaka pesane, ima foraka aseane aporo hinamo yakai risikino asekea iane Yasumo kára kamenakasapo. Saro sipimo namina wafaya fasekeno mahimeteraka arisia ayíáka, i mahimeteraka risikinapo, aíyaka Yasumo hemakapuraka, ipu koteaka hemakapusimo Yasumo iaki some meta some kaka, some meta soko some kaka, ayíáka makata kára iaki some kasapo.

³⁵ Arirakano yao nenehoramo Yasumo ipi aporo hakāsa pura pekea Yasuaki someraka, “Hauaka wo ima yaosakipoko aporo hinamo risikinafapo. ³⁶ Maiya tukerapaka aporo hinamo sarimasamo ipu namina makata nakosa ropohoko apea poparipusiesie. Ima ape mano a soko ape sumu wakasema soko á makata nakosa ropohoko poparipusiesie.”

³⁷ Airakano Yasumo someraka, “Repo namina makata nakosa iaki kasie.” Airakano ipu someraka, “Aporo hinamo suamo makata nakosane isu pukua, tu harote kinamo (K200)† farawa roporaka iaki kakakosare? Asiamo isiapo tu harote kina ane (K200) fasasamo, mayíáka mokoakosare?” aíyaka ipu Yasuaki somesapo.

† 6:37: Ipu namina meaka mone hae tanariase tu harote ane somesapo. Asiáne isiapo hemakapusakipoko tu harote kina popasapo. Arirakano ipu moneane siufa mone hae asiáne yano motosa tanariasepo. Mone hae tanariase tu haroteane mokoako, sere tu haroteamo aporomo rakirapo.

³⁸ Aíyaka somerakano Yasumo iaki someraka, “Farawa yakapasu tokenare? Aseako pusie.” Airakano ipu kope pukua, paripekea Yasuaki someraka, “Makata nakosane farawa kakoreasu, pokoa tetá ayiáka tokesapo.”

³⁹ Airakano Yasumo someraka, “Aporo hinamo parakuraka su metakira taku rā asane kotesakipoko á toaesie. Arirakano i metakira sarimaraka taku rō asane kotesakipoko á toaesie.” ⁴⁰ Airakano i parakuraka toke, aporo hinamo metakira fifiti (50) sarimaraka taku ra toke, aporo hinamo metakira wane harote (100) sarimaraka taku ro toke ayiáka i su asanea toapo.

⁴¹ Tokeno asekea Yasumo farawa kakoreasu, pokoa tetá mokoa reke, hepene yapura asekea súseraka kurikurisapo. Kurikuriraka faraka farawa mosoraka, aporo hakāsa puraki kaka, aporo hinamo suane kakasimo Yasumo iaki kasapo. Pokoa tetáne soko, aporo hinamo suaki kakasimo Yasumo kasapo. ⁴² Karakano ipu aporo hinamo hokosa suamo siaraka mokoa nesapo. ⁴³ Nekea faraka farawa soko, pokoa soko, momo yia tokeno, aporo hakāsa puramo mate kenosua kekea komarusuapo.

⁴⁴ Arirakano aporo makata nesa suane menoraka fae taosenepo (5,000). Hinamo soko, hokosa soko, iane menosafapo. I menohoaafonosamo soko makatane sia nesapo.

Yasu he kima finirape pusuane oyapo.

Matiu 14:22-33; Yone 6:16-21

⁴⁵ Aporo hinamo suamo makata nekea farakano Yasumo ipi aporo hakāsa puraki someraka, “Re fana kasua ripaka he fe taku ra hisie. Hikia Pesaita taonea hinie. Arirakano aporo hinamo sarimasane i namina apea poparipusie, aihoko ano fore o rekenapo.” Airakano i kasua ripaka hisiapo. ⁴⁶ Hisiakipoko aporo hinamo su sarimasane soko namina apea poparipusuapo. Poparipusuakipoko Yasu ipi haku ūria kurikurihoko hisiapo.

⁴⁷ Hikia ereamo Yasu ipi haku ūria reke kurikuriraka reapo. Reke aseane aporo hakāsa pura kasua ripaka roko a purakano asesapo. ⁴⁸ Aseane he kupa atifoyaki kára peraka, kasu maka paripurakanoraka kasu roane punafonorakano asesapo. Yao fia makehoramo kasu tapukurea á Yasu he kima finirape pesapo. Finirape pekea, kasu marokeraka pukusapoko asiāne, ⁴⁹⁻⁵⁰ e he kima finirape perakano, i kasua toamo aseraka hemakapuraka yakasa horihoamo hemakapukua kokoaeraka wásapo. Wárakano Yasumo iaki foaka someraka, “Anopo. Re namohokopo. Namoraka himu fahokopo. Paroaka risikianie.” ⁵¹ Aíyaka kasu i toa á Yasu parohoane atifo fasapo. Farakano asekea aporo kasua toane kára fofasapo. ⁵² Fana farawa kakoreasu Yasumo mosoraka karakano, aporo hinamo hokosa yakaimo katu siaraka nesane mahimetesapo. Ipu himo asesa nine himumo kepoane hemakapusuafapo. Kakaro mahimetesapo.

Kenesare hauaka aporo makata tasa Yasumo mafasane oyapo.

Matiu 14:34-36

⁵³ He Kariri kekea kaya kasu roko a teraporaka Yasu soko, Yasumo ipi aporo hakāsa pura soko, Kenesare hauaka hisiapo. Hikia kasu matapea pauraka kasu kita hukumaresapo.

⁵⁴ Hukumarekea ima fokoa pukua, wate foaka aporo hinamo ipu hemakapuraka, “Ane Yasureapo.” ⁵⁵ Aíyaka hemakapukua apea fofoaka pukua, aporo hinamo makata tasa gefeneakua makekeea, Yasu á rekenapakano kaikia, e area mokoa pesapo. ⁵⁶ Yasu koraka rea ape sumu wakasema á soko, ape sumu kára á soko, ima yaoa ape mano a soko, perakano asekea hauaka rusua kakamasakipoko aporo hinamo makata tasane á taesapo. Taeraka ipu Yasuaki someraka, “Nómo pasu ke huhua isiapo sakaihoane siahoasisekeno ane nómo aosie.” Airakano Yasumo aosapo. Aorakano pasu huhu á ipu sakaihoane aporo hinamo makata tasane foakayia fasapo.

Makasa kaua kekemamo someamo Kotimo someane matekeamenane oyapo.

Matiu 15:1-9; Ruki 11:37-41

¹ Ferese aporo soko, Kotimo somemane tisa aporo soko Yarusarame siti aeyaka pekea Yasu rea sarimasapo. ² Sarimaraka aseane, Yasumo ipi aporo hakāsa pura metaki-ramo hokono kusuhoanafonoraka makata nenakano asekeha hemakapuraka, “Aporoamo hasaka arakire. Ayíaka arakiramo ipu himuane mokoatikiane. Ipu Yu aporo sisimamo somemane ane mamosoane.” aíyaka Ferese aporomo hemakapusuapo. ³ Arirakano Yu aporo sisimamo soko, Ferese aporomo soko ainane hokono kari aeyaka rotoraka kusuhoanafonoraka, makata maka nena fapo. Yu aporo sisima makasa kauamo ayikanie, aisane kekemaraka, hokono kusuraka makata nena fapo. ⁴ Makata ropona ape aeyaka pekea, fana i kau kusuraka faraka makata nena fapo. Makata nakosakipoko hokono kusuna ayíaka, kapo soko orotipi soko meraki soko kusunapo.

⁵ Asiamo Ferese aporope Kotimo somemane tisa aporo ipu Yasuaki someraka, “Marirakano nōmo aporo hakāsa puramo isiapo makasa kauamo ayikanie, aíyaka somepe pesane koaretaeraka risikinare? Koaretaeraka ipu makata nakosakipoko hokono kusurakarifapo. Hokono kusuhoanafonoraka makata maka anene.”

⁶ Airakano Yasumo iaki someraka, “Re himu tetáraka arisiane porofete aporo Aesayamo kakaro somehoareapo. Somesane Kotimo sawia popasane oyapo. Kotimo someraka, ‘Aporoamo anoaki akaimo kekereraka himumo anoaki hemakapurakanafapo. ⁷ Himumo anoaki hemakapunaenoraka nena akai susuamo anoaki kekerenapo. Ipu namina hemakapusuane some karakanapo. Some karaka yia, nōmo somemane ane metakarikia ipu namina aporomanomo somemane ane some karakanapo.’ Aíyaka Kotimo somerakano Aesayamo popahoareapo. *(Aisaia 29:13)*

⁸ Asiamo repo Kotimo somemaneane koaretaeraka makasa kaua kekemamo ayikanie aíyaka somepe pesane kakimarakanapo,” aíyaka Yasumo iaki somesapo.

⁹ Efera hunia Yasumo iaki someraka, “Repo makasa kauamo ayikanie aíyaka somepe pesane makama fanaraka, repo Kotimo somemane koaretaenane oyapo. ¹⁰ Kotimo ipi somemane Moseseaki someaka mareraka, ‘Ní atape ní ama tetāne koteaka hemakapukua makotehoanie,’ aihoareapo. Some meta soko someraka, ‘Aporo hinamo metamo ipi atane soko metao, ipi amane soko metao, yakasa ho mareraka ekenerakano, e kakaro kukusimo runie,’ aíyaka Kotimo someaka maresane Mosesemo aporo suaki somehoareapo. *(Kisim Bek 21:12; Lo 5:16; Kisim Bek 21:17)*

¹¹ Somesa nine repo someraka, ‘Aporomo soko, hinamomo soko, ipu namina ataki soko metao, ipu namina amaki soko metao someraka, “Tetoaki makata yaku kakakosapoko asiāne metakarikia, Kotiaki karakanapo.” Aíyaka re Ferese aporomo aporo hinamoaki some karakanapo.’ ¹² Some karakano aporo hinamomo ipi ata ama tetā ararehokosapoko asiane, metakarirakanapo. Asiamo ama ata ararenane repo matasorakanapo. ¹³ Makata matasona yakai metakira soko repo rakirakanapo. Asiamo repo namina makasa kaua kekemamo ayikanie aíyaka somepe pesane mafanahokosakipoko, Kotimo somemaneane repo mokosekeraka arisie. Makasa kaua kekemamo someane repo kakimaka ayikanie airakae,” aíyaka Yasumo iaki somesapo.

Aporo hinamo himu mokoatikinamo kepoane oyapo.

Matiu 15:10-20

¹⁴ Aporo hinamo su sarimahoasimo Yasumo peaeaka perakano, iaki someraka, “Repo suamo kaisie. Kaikia hemakapunie. ¹⁵ Makata yao aeyaka pekea aporo hinamo tua apuramo ipi yia mawatikinafapo. Tu aeyaka yaoa tono apuramo ipi yia mawatikinapo. ¹⁶ [Repo senakimo kairaka koteaka kakimakanie.”]

¹⁷ Aíyaka Yasumo someaka faraka, aporo hinamo sarimasane metakarikia, apea yorokoa purakano, Yasumo ipi aporo hakāsa puramo someraka, “Aporomano tua mawatikina takume kepoane yakapare?” ¹⁸ Airakano Yasumo someraka, “Repo soko kepoane yaiya hemakapurakarifare? Makata yao aeyaka pekea aporo hinamo tua apuramo ipi himu yia mawatikinafapo. ¹⁹ Makata yao aeyaka himua purafapo. Katukunu pukua, katukunu aeyaka fako otoa pukua katisokopo apea purapo. Asiamo makata nena suamo re himuane mawatikinafapo,” aíyaka Yasumo ipi somesapo.

²⁰ Yasumo efera hunia someraka, “Aporomanomo himu aeyaka tonoaheramo ipi yia mawatikinapo. ²¹ Himu aeyaka aporo hinamo ipu himumo makata watikisa hemakapurane oyapo. Watikiaka rakiako hemakapurane soko, makata kaýasa rakiako hemakapurua aporo hokosa takéyaki puko hemakapurane soko, makata kemo haki-mako hemakapurane soko, aporomano rusua kukuko hemakapurane soko, hinamo hakimako hemakapurane soko, aporo rea puko hemakapurane soko, ²² aporo meta menane makaripi aýaka hemakapurane soko, watikiaka rakiako hemakapurane soko, kotafe somehoko hemakapurane soko, hinamo rea puko hemakapurane soko, e area ayíáka ano ayíáka rekearipi aýaka hemakapurane soko, kotafe topakamaraka somehoko hemakapurane soko, e ipi makama fanaraka rekeako hemakapurane soko, mokome rakiako hemakapurane soko, makata suane himua risirapo. ²³ Himua risia makatane tū aeyaka tonoaheramo, aporomano ipi yia mawatikinapo.” Aíyaka Yasumo ipi somesapo.

Yu aporohoanafonosa hinamomo Yasuaki himu hakásaraka hemakapusuane oyapo.
Matiu 15:21-28

²⁴ Apeane Yasumo metakarikia puraka, Yu aporohoanafonosamo hauaka á pukua, Taia taone á soko, Saetone taone á soko makeraka pusuapo. Pukua aporomo e aserapaka e apea yorokoa ape kakarua pusuapo. Pusua nine e aporomo asesapo. ²⁵⁻²⁶ Yasu perakasaporakano wate foaka Yu aporohoanafonosa hinamomo kaisiapo. Hinamoamo hauakane Siria hauaka ayapo. Siria hauaka parakurakano sape á ipi takapesa hauaka yano motosane Finísia hauakapo. Hinamoamo ipi hokosa wakasema nine, yatafumo ho marakano asekea hinamoane pekea Yasu korake á kakuna porokoa kake someraka, “Nómo hinamo hokosa yatafumo ho masapo. Yatafuaki nómo pusiehoanie.”

²⁷ Airakano Yasumo hinamoaki takumeaka someraka, “Fana hokusamo* nasimo kayane siahoasireapo. Makata nakosa hokosapoko taesane kásaki kayane siahoasi-fareapo. Fana hokusamo nasimo karakanapo.” ²⁸ Airakano hinamoane ipi Yu hinamohoanafonosa nine, Kotimo e ararehoasimo himu hakásaraka hemakapusuasamo, Yasuaki someraka, “Unihaeo, kakarorakae. Asiāne hokusamo makata nenaka momo hurupeperakano, kása teporo petaua risiamo nenapo.”

²⁹ Airakano Yasumo someraka, “Nómo makata somerakasakipoko né ní apea seseaka pusie. Nómo ní hinamo hokosa yatafumo ho masane yatafu metakarikia pusuapo.”

³⁰ Airakano hinamoane ipi apea paripukua aseane, ipi hinamo hokosa yatafumo ho masane, yatafu metakarikia puraka, hinamo hokosane ipi koteaka apea warekeno asesapo.

Aporo senaki tisa soko, aru tapaya mesa soko, Yasumo mafasane oyapo.

³¹ Taia taone hauakane metakarikia pukua Saetone taone ane soko marokeraka pukua, he Kariria pukusakipoko taone kaeyako su yano motosa Tekáporisia pukua ³² aseane, aporo senaki tisa aru tapaya mesa aporo metamo karikia, Yasu rea peraka Yasuaki someraka, “Nómo hokonomo aporoane sakairasie.”

³³ Airakano aporo senaki tisane Yasumo karikia aporo hinamo yakai sarimasane metakarikia, tetá hákasa wakasema pukua, tati haku risike, Yasumo ipi hokonomo aporo senaki tisa taku tetákara paremarekea faraka, Yasu ipi hokonoa torofaeraka aporo aru tapaya mesane arua sakaisapo. ³⁴ Sakairaka reke ipi hepene yapura asekea aporoane kamenakaraka, kaiyáraka someraka, aporo senaki tisaki someraka, “Né senaki tisane ropakapusie,” aisapo. Aíyaka Yasumo ipi meaka someraka, “Efata.”

³⁵ Aihoane aporo senaki tisane faraka koteaka kairaka, aru tapaya mesane soko faraka ipi koteaka somerakano, asekea ³⁶ Yasumo ipi aporo suaki someraka, “Anoane aporo metakiraki somehokopo,” aisapo. Airakano ipu kakipayaraka ipu makata asesane kára somesapo. Efera hunia Yasumo iaki somehokopo aisane, ipu kakipayaraka kára somerakano ³⁷ kairaka, aporo hinamo metakiramo Yasuaki kára sesésapo. Seséraka someraka, “Epo makata su koteaka rakirareapo. Aporo senaki tisamo koteaka kaiyisimo

* ^{7:27:} Takume kepoane oyapo. Hokosane Yu aporopo. Kásane Yu aporohoanafonosa ayapo.

epo mafahoareapo. Aporo aru tapaya mesamo soko koteaka somehoasimo epo mafahoareapo," aisapo.

8

*Aporo yakai fo taoseneaki (4,000) Yasumo makata nakosa kasane oyapo.
Matiu 15:32-39*

¹ Efera hunia aporo hinamo su Yasu rea pekea sarimaraka, makata nakosa fasekeno, Yasumo ipi aporo hakāsa puraki someraka, ² "Sere isiamo aporo hinamo yakai anoyaki hakāsa sarimaraka risike, makata nenane fasapo. Fasasamo nōmo iane kára kamenakaripo. ³ Iane himu raru puraka ikia kara meamoraka yofehokosapo. I metakira yameno aeyaka pesapo."

⁴ Airakano aporo hakāsa puramo someraka, "Isu arisia one ima yaosasamo aporo sari-masaki farawa siaraka nasimo kayane siahoasifareapo. Kakakosane ma mokoakosare?"

⁵ Airakano Yasumo someraka, "Repo farawa yakapusu tokenare?" Airakano ipu someraka, "Farawa yatipinusu tokenapo."

⁶ Airakano Yasumo aporo suaki someraka, "Re hauaka á toae." Áiyaka i tokeno asekea, Yasumo farawa yatipinusu mokoa reke Kotiaki suseaka kurikuriraka, faraka farawa mosoraka, aporo hinamo suaki kakasimo ipi aporo hakāsa puraki karaka someraka, "Farawa one aporo hinamo su sarimasaki takupe pusie," aisapo. ⁷ Áiyaka keseke pokoa fete hukusi tokeno asekea, Yasumo Kotiaki suseaka kurikurisapo. Kurikuriraka faraka, aporo hakāsa puraki someraka, "Aporo hinamo suaki takusie," airakano takupe pusuapo. ⁸ Takukua aseane aporo hinamo ipu suamo siaraka nenakano asekea, farawa momoane aporo hakāsa puramo mokoa maté yatipinusua kesapo.

⁹ Arirakano aporo farawa nesa su sarimaraka menosane fo taosenepo (4,000). Arirakano hinamo soko, hokosa fete soko, menosafapo. I menohoanafonosamo soko, makata sia nesapo. ¹⁰ Aporo hinamo su sarimaraka farawa nesane Yasumo pusiesapo. I purakano Yasu kasua ripaka aporo hakāsa pura soko kasua ripaka, kasu rokua Taomanuta hauaka á pusuapo.

*Yasumo rakirane kau aseakosakipoko Ferese aporope Satusi aporo ipu somesane oyapo.
Matiu 16:1-4; Ruki 12:54-56*

¹¹ Ferese aporo pekea Yasuaki tafatafaraka someraka, "Kotimo murikimasane nesekenone, nōmo makata rakirane isiapo aseako nōmo rakikitakae. Kotimo hepene yapura makata ainane isiapo aseako nōmo rakikitakae." áiyaka someraka Yasuane ipi kau aseakosakipoko epo rakisimo somesapo.

¹² Somerakano, Yasu ipi himu mahisiraka someraka, "Aporo hinamo maiya omo arisiamo ipu ano kau aseakosakipoko someraka, 'Kotimo murikimasane nesekenone, nōmo rakirane isiapo aseako nōmo rakikitakae,' airakane mainakano airakare? Nōmo kakaro somerakaripo. Maiya omo aporo hinamo arisia omo asekeasimo Kotimo wakapumo hemakapukua rakirane nōmo rakiakosafapo." ¹³ Áiyaka marekea, Yasumo iane metakarikia kasua ripaka, he yaoraka taku ra pusuapo.

*"Ferese aporoane makata pirira asiapo. Ipu himu tetaraka hemakapusuane repo mokoakopo,"
áiyaka Yasumo somesane oyapo.*

Matiu 16:5-12

¹⁴ Aporo hakāsa purane Yasuyaki kasu rokua pukua ipu farawa mokoa peakosane meraruraka pesapo. Pekea kasua risike aseane farawa hakāsa kasua kakeno asesapo.

¹⁵ Arirakano Yasumo iaki takumeaka someraka, "Ferese aporomo soko, Herotemo soko, ipu watikiaka hemakapurane farawa pirira asíapo. Asía ane repo morapaka asekeanie. Ipu watikiaka hemakapurane kárahoarea ayiáka, reane ayiakakohoamo asekeanie."

¹⁶ Aiyaka Yasumo somerakano, some kepoane ipu himeteraka namina susu me rukua someraka, "Isiapo farawa mokoa peanafonosamo airakae." ¹⁷ Airakano ipu hemakapusuane Yasumo aseraka someraka, "Marirakano repo namina susu me rukua someraka, farawa fareaporakanare? Nōmo some kepoane repo yaiya mahimeteraka

risikiakosare? Repo himumo koteaka hemakapurakarifare? ¹⁸ Repo himo aseraka yia, koteaka aserakarifapo. Senakimo kairaka yia, koteaka kairakarifapo. Nōmo makata rakisiane repo meraruraka arisie. ¹⁹ Aporo yakai fae taosene (5,000) sarimasa amo, farawa kakoreasuane nōmo mosoraka kaka faraka, farawa momo yia tokeno maté yakapasua repo kesare?” Airakano ipu someraka, “Maté kenosua kesapo.” ²⁰ Airakano Yasumo someraka, “Aporo yakai fo taosene (4,000) sarimasaki nōmo farawa yatipinusu kaka faraka, farawa momo yia tokeno maté yakapasua repo kesare?” Airakano ipu someraka, “Maté yatipinusua kesapo.” ²¹ Airakano Yasumo someraka, “Ane repo yaiya himeterire? Farawa fasokino himu fahokopo, kára hemakapukopo,” aisapo.

Pesaita taonea aporo hi fausa Yasumo mafasane oyapo.

²² Yasu ipi aporo hakāsa purayaki Pesaita taonea pekea aseane, aporo metakiramo aporo hi fausa karikia pekea Yasuaki someraka, “Eane sakairasie.” ²³ Airakano asekeea Yasumo aporo hi fausane hokono maka taone metakarikia pukua ruru tapikia yao takua karikia pukua, Yasumo aporo hi fausa hia torofaeraka eane sakairaka someraka, “Nōmo himo yakapa aserakarire?” ²⁴ Airakano aporo hi fausamo someraka, “Nōmo aseane aporomanoane ira asera ayiáka aseraka sikiripo. Ira asera ayiáka aporomanoane ayiáka apure.”

²⁵ Airakano eféra hunia aporo hi fausane Yasumo sakaihoane, hi fakarikia makata su koteaka asesapo. Hi fausane kakaro mafarakano, koteaka aseke waperaka asesapo.

²⁶ Koteaka aserakano, Yasumo eaki someraka, “Ní apea pusie. Pesaita taone yia paripukupo,” aiyaka Yasumo somesapo.

“Yasu, né Keresopo.” Aiyaka Pitamo somesane oyapo.

Matiu 16:13-20; Ruki 9:18-21

²⁷ Yasu soko, ipi aporo hakāsa pura soko, i pukua, Sisaría Firipai taone makeraka pusuapo. Á pusua maiya amo, Yasumo ipi aporo hakāsa puraki someraka, “Aporo hinamo suamo anoane epapakasure?” ²⁸ Airakano ipu someraka, “Aporo metakiramo someraka, ‘Né Yone he tapukumarerane turikia pureapo.’ Aiyaka somerakasupo. Arirakano aporo metakiramo someraka, ‘Né porofete aporo Iraíyareapo.’ Aiyaka somerakasupo. Arirakano aporo metakiramo someraka, ‘Né porofete aporo metareapo.’ airakasupo.”

²⁹ Airakano Yasumo someraka, “Repo namina hemakapusuane, ano epapaka hemakapurakanare?” Airakano Pitamo someraka, “Kotimo Unihaeaka rekeasimo murikimasa aporo Keresoane nereapo.” ³⁰ Airakano Yasumo someraka, “Ano Keresoane aporo suaki somehokopo.” aisapo.

Yape menomo Yasumo someraka, “Aporomo ano kukusimo rukusapo.” aiyaka somesane oyapo.

Matiu 16:21-28; Ruki 9:22-27

³¹ Aporo hakāsa puramo hemakapusimo Yasumo iaki tariraka some kasane oyapo. Yasu ipi Aporomanomo Tákehokosakipoko hauaka wo pesapo. Asiāne ipi kára himu nasimo aporomo é mokoatikihokosapo. Yu aporo sisimamo soko, pirisiti aporo káramo soko, Kotimo somemane tisa aporomo soko eane hisiraka patera tariakosapo. Patera tarikia eane kukusimo rukusapo. Sere isia farakano maturikia taehokosapo. Aiyaka ayiakakosane, Yasumo ipi aporo hakāsa puraki some kasapo.

³² Some kasane kakaro hufitaeraka somesapo. Hufitaeraka somerakano, Pitamo Yasuane karikia, wakasema pukua someraka, “Neane rusua kukusapo, aiyaka somehokopo.” ³³ Airakano Yasu rekeako pariraka, ipi aporo hakāsa purane asekeea Pitaki someraka, “Satanemo somera aiyaka nōmo somehokopo. Kotimo hemakapurane kekemaraka hemakapunafonoraka, aporomanomo hemakapurane nōmo kekemaraka hemaka apure. Sataneo, né ano patera sapea pusie.” aiyaka Yasumo somesapo.

³⁴ Yasumo aporo suane soko, ipi aporo hakāsa purane soko, peaesapo. Perakano asekeea epo someraka, “Repo ano patera aseako, ano kuraka ira matopesa paremareakosane, nōmo makatiaka apura ayiáka, re soko, repo hemakapusuane metakarikia, ira matopesa

maka punie. Ano finisa á, re soko fini kafo kepe peanie. ³⁵ Aporomano hauaka wo areamo hitaferaka rekeakosane hákasa hemakapukua rakiraka rekeno, keseke aporoane Kotiyaki yaiya rekeakosafapo. Arirakano aporomano metamo someraka, ‘Yasupoko ano kuane soko siahoasireapo. Arirakano Yasumo some kotesa kakako ano kuane siahoasireapo.’ Aíyaka kurane hemakapurafaraka rekeno, aporoane Kotiyaki yaiya rekeakosapo.

³⁶ Arirakano aporomanomo hauaka kara wo makata kemo suane mokoa sarimaraka reke, Kotiyaki yaiya rerane epo metakarikia rekeno, akura maiya amo makata yakapamo e ararehokosare? Makata metamo e ararehokosane kakenafapo. ³⁷ Yaiya rerane ropohoko makata yakapamo roponare? Yaiya rerane makata metamo roponafapo.

³⁸ Maiya omo arisiamo aporo hinamo watikiaka risike, aporomo ipi hinamo metakarikia, hinamo metayaki apura ayiáka, ano metakarikia puraka, nōmo someane soko metakarikia risikino, keseke Aporomanomo Táke anoane pariapera maiya amo, ano metakarisia aporo hinamoane, nōmo soko iane metakariakosapo. Nōmo Atamo faesayaki, hepene aporo kotesa susuyaki pariapera maiya amo, aporo hinamomo ano metakariakipoko, iane soko nōmo metakariakosapo,” aíyaka Yasumo somesapo.

9

¹ Yasumo ipi aporo hakása puraki someraka, “Nōmo reaki kakaro somerakaripo. Re metakira yumo risiane kukusiraka risike aseane, Kotimo aporo hinamoane unihaeaka aseke reke ipi wakapuaka rakiraka rekeno aseakosapo,” aíyaka Yasumo somesapo.

Yasu kau hakuraka faesane oyapo.

Matiu 17:1-13; Ruki 9:28-36

² Sere namasu faraka Yasumo Pita soko, Yameise soko, Yone soko, i karikia ūri teraya hisiapo. Hikia namina hakása risike aseane, Yasu kau hakuraka, ³ ipi pasu ososane soko, namo kakaro pakaeraka faerakano asesapo. Hauaka wo sopomo pasu kususa pakaena asiafapo. ⁴ Ipi namo kakaro faesa rekeno asesapo. Aseane wate fana risia porofete aporo Iraíyape Mosese tetā risike, tetapō Yasuyaki makata someraka risikino asesapo.

⁵ Aseraka Pitamo Yasuaki someraka, “Tisao, isu o pesane kotesapo. Isiapo ape mano isia kiakosapo., Ape meta népoko, ape meta Mosesepoko, ape meta Iraíyapoko ayiáka kiakosapo.” ⁶ Aíyaka Pitamo Yasuaki somesapo. Ipu yakapa somehoasifasekeno i suane kakaro himu faraka namoraka risiapo.

⁷ I risiane akomo iane karotapisiapo. Ako karotapisia arakaru aeyaka someraka, “Eane nōmo nī hokosapo. E nōmo himu tumurumo hemakapurakanapo. Epo someane kaikia hemakapukua risikianie.” aíyaka somerakano ipu kaisiapo. ⁸ Kairaka ipu wate foaka aseane Yasu ipi hákasa yia iyaki reke, aporo tetá metane fasekeno asesapo.

⁹ I ūri teraya aeyaka peraka risike, Yasumo iaki paroaka wakapuaka someraka, “Aporomanomo Tákeane anopo. Keseke ano kukusapo. Ano kusuane maturikia taehoasiraka, repo pipu makata asesane haru somehokopo.” ¹⁰ Airakano ipu makata asesane aporo hinamo metakiraki somesafapo. Ipu namina someraka, “Maturikia taehokosa kepoane yakapare?” aíyaka ipu namina me rukua kára somesapo.

¹¹ Aporo hakása pura isiamo Yasuaki someraka, “Kotimo somemane tisa aporomo someraka, ‘Kereso peasiraka Iraíya fana peakosapo,’ aisa amo kepoane makata yakapare?” ¹² Airakano Yone he tapukumareramo Keresopoko ikia kara maroponane Yasumo hemakapukua someraka, “Iraíya fana peraka Keresopoko makata su makotehokosapo, aisane kakaro yasiapo. Keresoane hemakapusimo makata meta soko popasane oyapo. ‘Aporomanomo Tákeane ipi himu nasimo aporo metakiramo eane mokoatikiraka mainamareraka patera tariakosapo,’ aíyaka popasa ane soko hemakapunie. ¹³ Arirakano nōmo someana one kakaro somerakaripo. Iraíya peakosaposane kakaro perakasupo.* E perakasuanne ipu namina yia hemakapukua eane mokoatikisapo. Asiamo Kotimo sawia poparaka ayiakakosapo aisane kakaro yasiapo,” aíyaka Yasumo somesapo.

* 9:13: Kakaro perakasupo, aisa kepoane Yone he tapukumarera ayapo.

Yatafumo hokosa ho masane Yasumo mafasane oyapo.

Matiu 17:14-21; Ruki 9:37-42

¹⁴ Aporo hakāsa pura isia Yasuyaki ūri teraya hisiane metakarikia peraka aseane, aporo hakāsa pura metakirayaki aporo hinamo yakai sarimaraka risikino asesapo. Ayiáka risike Kotimo somemané tisa aporo metakiramo, aporo hakāsa purayaki tafatafaraka somerakano asesapo. ¹⁵ Aporo hinamo suamo Yasuane aseraka kára seseraka eane sapenako perakano asekea, ¹⁶ Yasumo iaki someraka, “Repo nōmo aporo pasimosaki makata yakapa me rukua somerakanare?”

¹⁷ Airakano aporo hakāsa metamo someraka, “Tisao, nōmo ararehoasimo nōmo hokosa karikia pesapo. Yatafumo hokosa ane ho maraka epo makata somerafapo. ¹⁸ Yatafumo ho masa maiya ámo hokosa ane hauaka atura rukumakasuraka, akai momotoro káraraka, akai kikitiraka, kiki wakapuraka korosakataesapo. Asiamo né peanafonosamo, nōmo aporo hakāsa puraki nōmo someraka, ‘Yatafu pusiesie.’ Airakano ipu pusiehoane yatafuane pusuafapo.”

¹⁹ Airakano Yasumo iaki someraka, “Aporo hinamo maiya omo risiamo Kotiaki himu hakásaraka hemakapukua risikirifapo. Maiya suamo repo makata hasaka hemakapukua risikino, nōmo repoko maiya suamo yaiya wafororaka rakiraka rekeakosare? Ano reyaki maiya káramo rekeno yia repo anoaki himu hakásaraka hemakapukua risikirifapo. Ano rea wo hokusane karikia peae.” ²⁰ Airakano hokusane Yasu rea karikia pesapo. Karikia perakano yatafumo Yasuane aseraka, hokusane yatafumo wate foaka mahamisisiraka hauaka atura rukumakasusapo. Rukumakasuhoane, hokusane mokowepe puraka akai momotoro kamusakae kárasapo.

²¹ Arirakano Yasumo hokosa wafayaki someraka, “Masinaka yatafumo hokusane ho masare?” Airakano hokosa wafayamo someraka, “Hokosa kiri yiamo asiapo. ²² Maiya suamo nōmo hokusane yatafumo ira rufia soko makasunapo. Hea soko makasunapo. Kukusimo ainapo. Asiamo nōmo siahoasisekenone eto kamenakarakaka nōmo arareriasie.”

²³ Airakano Yasumo someraka, “Marirakano siahoasireare airakanare? Aporomo anoaki himu hakásaraka rekeno, makata su nōmo rakiane siahoasireapo.” ²⁴ Airakano hokosa wafayamo wate foaka someraka, “Nōmo neaki himu hakásaraka hemakapurakanapo. Himu hakásaraka hemakapurane wakasemapo. Wakasemasane kárahoasimo nōmo ano arareriasie.”

²⁵ Airakano Yasumo aseane, aporo hinamo yakai sarimahoko foaka perakano asekea, yatafu watikisaki epo someraka, “Yatafu nōmo hokusane senaki matisane soko, me mahimetesane soko, né metakarikia pusie. Hokusane efera hunia ho mako paripeakopo.”

²⁶ Airakano yatafumo kaikia sakepamo wáraka hokusane kára mahamisisiraka marekea, hokusane yatafumo ho masane metakarikia purakano, hokusane kuraka sikisapo. Hokusane kuraka sikirakano aporo hinamo suamo aseraka someraka, “Akure,” aisapo.

²⁷ Airakano Yasumo hokosa hokonoa maka máfarakano, hokosa turikia pusuapo.

²⁸ Arirakano Yasu apea yorokoa perakano, ipu aporo hakāsa puramo someraka, “Isiapo yatafuane metakarikia pusiehoane punafonorakasane, mairakayiarakapo.” ²⁹ Airakano Yasumo someraka, “Yatafu ayíaka risiane pusimo, Kotiaki kurikuriraka reke, yatafu pusierakano pukusapo. Makata metamo pusierakano pukusafapo,” aíyaka Yasumo somesapo.

Yape tetámo Yasumo someraka, “Aporomo ano kukusimo rukusapo,” aisane oyapo.

Matiu 17:22-23; Ruki 9:43-45

³⁰ Hauaka ane ipu metakarikia, Kariri hauaka á pukua, hauaka ane marokeraka, i namina pusuane aporo suamo kaiyakohoamo, Yasu tau pusuapo. ³¹ Ipi aporo hakāsa puramo hemakapusimo, some kakako tau pusuapo. Yasumo some karaka, “Aporomanomo Tákeane anopo. Ano rusua kukusimo aporomo ano parakehokosapo. Parakeraka ano waseremaka kukusimo rukusapo. Ano rusua kusuane sere isiamo maturikia taehokosapo.” ³² Airakano someane i himetesapo. Himeteraka karekekeea namoraka risike ipu Yasuaki “Some kepoane yakapare?” aíyaka somesafapo.

Aporo fanaraka reamo kepoane oyapo.

Matiu 18:1-5; Ruki 9:46-48

³³ Yasu soko ipi aporo hakāsa pura soko pukua, Kapaneame taonea pauraka, apea yorokoa iaki Yasumo someraka, “Re ikia kara peraka repo namina susu makata yakapa somerakayiare?” ³⁴ Airakano ipu me kauraka risiapo. Arirakano i ikia kara puraka risike ipu someraka, “Isu aporo fanane epare?” aiyaka somesasamo kaíyarako ipu Yasuaki makata somesafapo. ³⁵ Somehoanafonorakano, Yasu ipi kake aporo hakāsa pura keno suane peaesapo. Perakano asekeea epo someraka, “Aporomo ano aporo kárapo, aiyaka otoa maka, makapororaka hemakapuraka, ‘Ano fanaraka rekeako seseripo,’ aiyaka repo hemakapukupo. Repo namina makama kesekehoanie. Repo aporo supoko rakinie.”

³⁶ Aiyaka someraka hokosa metane epo pasimaka i namina hikumisi nenemea reaesapo. Rekeno eane Yasumo hokonomo hokosane ketakamaka paua motokoa, i aporo keno suaki someraka, ³⁷“Aporo metamo ano himu tumurumo hemakapusuasamo hokosa wakasema asíane ararena ayíáka, ano soko ararerakanapo. Ano arareraka ano hákasa ararerakanafapo. Atamo ano pusiesane soko ararerakanapo,” aisapo.

Aporo metamo Yasu yano hokoa Kotimo makata wakapuaka rakira rakisiane oyapo.

Ruki 9:49-50

³⁸ Yonemo Yasuaki someraka, “Tisao, isiapo aseane aporo metamo né yano hokoa, aporo meta yatafumo ho masane pusierakano pusuapo. Purakano asekeea isiapo aporoaki someraka, ‘Ne Yasumo aporo hakāsa purayaki paosafapo. Paohoanafonasamo yatafu pusiehokopo.’” ³⁹ Airakano Yasumo iaki someraka, “Repo aporoane matasoraka somehokopo. Aporomo Kotimo makata wakapuaka rakira rakiakosakipoko ano yano hokoa, ipi wate foaka ano hokomaka somehokosafapo.

⁴⁰ Asiamo aporomo ipi isuyaki weanafonoraka isu ararerakanapo. ⁴¹ Nōmo some one kakaro somerakaripo. Aporo metamo someraka, ‘Né Keresoa paosa aporopo. Asiamo nōmo ne he nasimo karakanapo.’ Aisa aporoaki Kotimo makata ropo kakakosapo,” aiyaka Yasumo somesapo.

Mokopipina kepoane oyapo.

Matiu 18:6-9; Ruki 17:1-2

⁴² Yasumo ipi aporo hakāsa puraki someraka, “Hokosamo e ipiane makárahoanafonona ayíáka, anoaki himu hakásaraka hemakapura aporomo watikiaka rakisimo, aporo metamo mokopipirakano, mokopipina aporoane Kotimo kára fanasihokosapo. Mokopipina aporoane, ipi mawia eke kára kita humarekea maka he tawara numua he nasimo makasuhoane siahoasireapo. Ane fanasihokosane wakasemapo. Kotimo fanasihokosane kárahokosapo. ⁴³ Arirakano nōmo hokonomo makata watikiaka rakiraka rekeno, nōmo ní himuane mawatikinapo. Mawatikinapaka, hokono takuane patekemaka mamakatehoanie. Hokono tetákara reke ira kopakapunafonona hauaka heao hauaka á makasuhokohoamo, hokono hakāsa takuane patekemaka mamakatehoanie. Hokono taku hakāsa reke yaiya rerane kepomarekea rakiraka reke siahoasireapo. ⁴⁴ [Arirakano heao hauaka á fifita kurafapo. Ira soko kopakapurafapo.]

⁴⁵ Arirakano nōmo korakemo watikiaka rakiako watikisa taku á puraka reke, nōmo ní himuane mawatikinapo. Mawatikinapaka, korake takuane patekemaka mamakatehoanie. Korake tetákara reke heao hauaka á makasuhokohoamo korake takuane patekemaka mamakatehoanie. Korake hakāsa reke yaiya rerane kepomarekea rakiraka reke siahoasireapo. ⁴⁶ [Arirakano heao hauaka á fifita kurafapo. Ira soko kopakapurafapo.]

⁴⁷ Arirakano nōmo himo makata watikisane aseraka reke, ní himuane mawatikinapo. Mawatikinapaka, hi takuane pokomaka mamakatehoanie. Hi tetákara reke heao hauaka á makasuhokohoamo, hi takuane pokomaka mamakateraka hi taku hakāsa reke Kotimo unihaeaka asekeea rera á paohoane siahoasireapo. ⁴⁸ Arirakano heao hauaka á fifitaraka reke kurafapo. Ira soko kopakapurafapo.

⁴⁹ Asiamo kifirimo makata makotena ayíáka, aporomo makata watikisa himura kayane ira paikimarekea faraka, himuane makotenapo.

⁵⁰ Arirakano kifiri waperapo. Asiane kifiri wapesane farakano efera hunia waperafapo. Wapehoanafonona ayíáka repo, ‘Aporo fanaraka reane epare?’ aíyaka tafatafana maiya amo aporo metane ararenafapo. Asiamo fanaraka rekeako tafatafahokopo. Aporo hinamo suaki hemakapukua tau auaraka risikianie,’ aíyaka Yasumo somesapo.

10

Aporomo hinamo fimarerane Yasumo somesane oyapo.

Matiu 19:1-12; Ruki 16:18

¹ Yasu ipi Kariri hauaka ane metakarikia pukua, he Yotane yaoraka taku ra, Yutía hauaka á reapo. Reakipoko aporo hinamo yakai Yasu rea perakano asekea, Yasumo iaki some kasapo. Sere suamo epo some akara ayíáka, i perakano asekea, epo ipi ayíáka some kasapo. ² Yasu reakipoko Fere se aporo peraka, Yasu kau aseakosakipoko epo hasaka somerakarihoamo, ipu eaki someraka, “Aporomo ipi hinamo fimareane siahoasireare? Fimareane somemanane mamosohoasireare?”

³ Airakano Yasumo ipi someraka, “Mosesemo somemanemo yakapa someaka moto-sare?” ⁴ Airakano ipu aporo hakása metamo someraka, “Fana Mosesemo someraka, ‘Hinamo arumasa fimareako hinamoaki sawi poparaka kakanie,’ aisapo.” ⁵ Airakano Yasumo someraka, “Repo Kotimo someane koaretaesasamo Mosesemo aporoaki someraka, ‘Hinamo fimareane siahoasireapo,’ aísapo.

⁶ Asiāne wate fana kepomaresa maiya amo, Kotimo aporo soko, hinamo soko, tetákara rakisiapo. ⁷ Rakiraka Kotimo someraka, ‘Aporomo ipi kaíyia ipi wafaya metakarikia, hinamo arumaraka ipi hinamoyaki hakása paoraka, ⁸ tati kau hakásaraka risikinapo.’ Tati kau hakásaraka risirasamo tetáraka risikinafapo. Hakásapo. ⁹ Asiamo Kotimo hinamo aporo tati masarimasane, aporo metamo maparakuhoane siahoasifareapo.” Aíyaka Yasumo Fere se aporoaki somesapo.

¹⁰ Someaka faraka Yasu apea pukua reakipoko, aporo hakása puramo Yasuaki someraka, “Someaka kepoane yakapare?” ¹¹ Airakano Yasumo iaki someraka, “Aporomo hinamo arumasane ipi apiamo hisiraka, e fimarekea hinamo meta arumarakanano, aporo amo hinamo metane haki arumarakanapo. ¹² Arirakano hinamo aporo pusuanne ipi aporo hisiraka metakarikia, aporo meta purakano, hinamo amo aporo metane haki purakanapo,” aíyaka Yasumo somesapo.

Aporo hinamomo Yasu rea hokosa karikia pesane oyapo.

Matiu 19:13-15; Ruki 18:15-17

¹³ Yasu reakipoko hokosa karikia pesapo. Karikia pesane Yasumo hokonomo sakairaka makotehoasimo karikia pesapo. Karikia pesa aporo hinamoaki Yasumo ipi aporo hakása puramo himu mahisiraka iaki someraka, “Hokosa karikia peakopo.” ¹⁴ Airakano Yasumo kairaka mahisiraka someraka, “Ano rea hokosa peane siahoasireapo. Perakano matasohokopo. Aporo hinamo e ipiane makáranafaraka, hokosa mano ayíáka risiane, Kotimo unihaeaka asekea rekenapo. ¹⁵ Hokosa manomo ipi wafaya kaíyiamo eane koteaka asekea rekeasimo, himu hakásaraka hemakapura ayíáka, aporo hinamomo Kotiaki himu hakásaraka hemakapurakano, Kotimo iane asekea rekenapo.” ¹⁶ Aíyaka someaka marekea hokosane Yasumo fatuaka maka, i kaua ipi hokonomo sakairaka i koteaka risikiasimo, koteaka risirane iaki kasapo.

“Makata kemo káraraka rea aporoane Koti unihaeaka rea paoraka waforonapo,” aisane oyapo.

Matiu 19:16-30; Ruki 18:18-30

¹⁷ Kimisi pukusa maiya amo, aporo hakása meta foaka pekea Yasu hikumisi nenemea kakuna porokoa kake someraka, “Tisa kotesao, ano Kotiyaki yaiya rekeakosakipoko nōmo makata yakapa rakiakosare?” ¹⁸ Airakano Yasumo someraka, “Nómo anoaki marirakano, ‘Tisa kotesao,’ airakanare? Kepoane hemakapunie. Koti ipi hákasa kotesapo. Aporo meta kotesa rekenafapo. ¹⁹ Kotimo somemanane nōmo hemaka apure. Somemanane oyapo. ‘Aporo kukusimo rukupo. Hinamo hakimakopo. Makata meta hakimakopo. Aporo metaki kotafe topakamahokopo. Makata ropo sapeane hakimakopo. Ní ata soko,

ní ama soko, koteaka hemakapukua makotehoanie.' Aíyaka somemane motosane nómó kaisiapo." *(Kisim Bek 20:12-16)*

²⁰ Airakano aporoamo someraka, "Tisao, ano hokosa rea maiya amo, somemane ane kakimaka yaiya reapo." ²¹ Airakano Yasumo e aseraka, eaki himu tumurumo hemakapuraka someraka, "Nómó makata hakása meta siasafapo. Nómó makata kemo su ropohoko pusie. Pukua makata kemoane roporaka marekea, mone mosane aporo makata forokoa risiaki kakanie. Kaka farakano amo, nómó makata mahimunane hepene yapura tokenapo. Ní makata kemo kaka faraka, ano patera aseako peanie."

²² Airakano aporoamo kaikia ipi makata kemo kárasasamo, aporo metakiraki kakako hisiraka, ipi hikumisi yuyukuraka Yasu metakarikia pusuapo. ²³ Purakano asekea, Yasu rekeako pariraka, ipi aporo hakása puraki someraka, "Makata kemo káraraka rea aporoane, Koti unihaeaka rea paohokosane, namo kakaro waforonapo."

²⁴ Airakano aporo hakása puramo kaikia fofaraka risikino asekea Yasumo efera hunia someraka, "Hameo, Kotimo ré unihaeaka asekea rekeasimo paohokosane namo kakaro waforonapo. ²⁵ Pasu irina nitoro kakarua saro kamo kárasasamo kokoro puane tapenapo. Aina ayíáka makata kemo kára mora aporoane Koti unihaeaka rea paohokosane namo kakaro waforonapo." ²⁶ Airakano ipu kára fofaraka mahimeteraka eaki someraka, "Aporo makata kemo kárasane Kotimo unihaeaka asekea rekeasimo aohokosane namo kakaro waforonapo, airakae. Asiamo Kotimo aporoane mafasiasimo aporo epa pao-hokosare?" ²⁷ Airakano Yasumo i asekea someraka, "Aporoane Kotimo unihaeaka asekea rekeasimo aporomo ipi yiamo mafasirafapo. Makata su rakiakosane Kotimo ipi hákasa hemakapukua rekenapo. Asiamo aporo hinamoane Kotimo mafasiakosane Koti ipi hákasa siasapo."

²⁸ Airakano Pitamo someraka, "Isiapo menane su metakarikia né patera aseako pesapo." ²⁹ Airakano Yasumo someraka, "Nómó kakaro somerakaripo. Aporo hinamo suamo hakása hakásaraka anoaki hemakapuraka, nómó rakirane rakiakosakipoko, nómó some kotesane some kakakosakipoko, ipi ape metakarikia, ipi mae metakarikia, papá metakarikia, apu metakarikia, ama metakarikia, ata metakarikia, hokosa metakarikia, hauaka metakarikia, ayíáka makata su metakarikia rea aporoamo ³⁰ hauaka wo makata kára mokoakosapo. Mokoakosane oyapo. Ape soko, hauaka soko mokoakosapo. Aporo hinamo metakirane nómó ní mae, ní papá, ní apu, ní ama, ní hokosa ayíáka risikiakosapo. Arirakano aporo metakiramo ne mokoatikhoko ayiane, keseke né Kotiyaki yaiya rekeakosapo.

³¹ Asiamo yumo aporo yakai fanaraka risiane kesekehokosapo. Aporo yakai yumo kesekeea risiane fanahokosapo." Aíyaka Yasumo somesapo.

Yape isiamo Yasumo someraka, "Aporomo ano kukusimo rukusapo," aíyaka somesane oyapo. Matiu 20:17-19; Ruki 18:31-34

³² Yasu Yarusarame sitia fana hisiakipoko, ipi aporo hakása pura kesekeea hinaka, himumo kára hemakapupe hisiapo. Arirakano aporo hinamo metakira kesekeea keke-marape hinaka, "Yarusarame sitia pauna maiya amo, yakapa ayikanarakapo," aíyaka kára hemakapukua hisiapo. Hisia maiya amo aporo keno suane Yasumo karikia, wakasema hikia keseke Yasu ipiaki makata ayiakakosane iaki somesapo.

³³ Yasumo someraka, "Isu Yarusarame sitia hinakanapo. Yarusarame sitia aporo metakiramo Aporomanomo Táke anoane parakehokosapo. Parakerakano pirisiti aporo káramo soko, Kotimo somemane tisa aporomo soko, ano kukusimo ira paremaresie ai-hokosapo. Aíyaka ano kukusimo Yu aporohoanafonosamo ano ira paremareakosakipoko karikia pukusapo. ³⁴ Karikia purakano, Yu aporohoanafonosamo ano mokoatikiraka mahokoparihokosapo. Mahokoparihaka anoaki torofaeraka, ano kaua rukua, ano rusua kukusapo. Rusua kurakano sere isiamo Kotimo ano maturikia taehokosapo," aíyaka Yasumo iaki somesapo.

Sepetemo maeya tetá Yasumo hokono tumuru takua soko, hokono kasakai takua soko kakasimo somesane oyapo.

Matiu 20:28

³⁵ Sepetemo hokosa Yamesepe Yone tetá Yasu rea peraka Yasuaki someraka, “Tisao, etapo hemakapusuane nōmo ayikasimoripo.” ³⁶ Airakano Yasumo tetāki someraka, “Nōmo tetopoko makata yakapa ayikasimore?” ³⁷ Airakano tetapō someraka, “Né unihaeaka faesa area maiya amo, eto meta né hokono tumuru takua kayae, arirakano eto meta né hokono kasakai takua kayae aihoasimoripo.” ³⁸ Airakano Yasumo someraka, “Tetápo somerakane kepoane tetápo hemakapurakarifapo. Nōmo kapo he nená* tetápo soko nasireare? Arirakano aporo hea tapukumarera ayíáka anoane umisamo karo tapiakosapo. Ano umisamo karotapira ayíáka teto soko umisamo karotapiane siahoasireare?” Aíyaka Yasu ipiane mokoatikiraka rusua kukusane somesapo.

³⁹ Airakano tetapō someraka, “Ao, eto siahokosapo.” Airakano Yasumo tetāki someraka, “Nōmo kapo he nená hakásä yia tetápo kakaro nakosapo. Ano hea tapukumarerakano, teto soko hea tapukumuriakosapo. ⁴⁰ Arirakano ano hokono tumuru takua kakakosane soko, hokono kasakai takua kakakosane soko, nōmo kayae aihokosafapo. Nōmo nī Atamo ipi hemakapusua aeyaka seā maroposane murikimasapo.”

⁴¹ Airakano aporo hakásä pura kaeyako sumo kairaka, Yamesepe Yone tetāki hisisapo. ⁴² Hisirakano aporo hakásä pura suaki Yasumo peaesapo. Perakano asekeea Yasumo iaki someraka, “Yu aporohoanafonosamo ipu namina aporo unihae e ipi káraraka reasasamo aporoaki masamasaraka matewanapao. ⁴³ Aina ayíáka re ayíáka risikiakopo. Repo namina aporo metamo hemakapuraka, ‘Ano aporo káraraka rekleariripo.’ Aíyaka hemakapuraka aporo wakasemamo arakira ayíáka, aporo supoko arareraka rakinie.

⁴⁴ Aporo metamo hemakapuraka, ‘Ano aporo fanaraka rekleariripo.’ Aíyaka hemakapura aporoamo aporo raipamo arakira ayíáka, aporo supoko rakinie. ⁴⁵ Aporomanoaki tákehoko ano hauaka wo pesapo. Aporo raipamo arakira ayíáka, aporomo anopoko ayíáka rakisimo, ano pesafapo. Aporomano supoko aporo raipamo arakira ayíáka rakiako ano pesapo. Aporomanomo namina watikisapoko i fanasihokohoamo nōmo farimaka kukuko pesapo,” aíyaka Yasumo somesapo.

Aporo hi mesa Yasumo mafasane oyapo.

Matiu 20:29-34; Ruki 18:35-43

⁴⁶ Yasu soko ipi aporo hakásä pura soko pekea, Yariko taoneane marokeraka purakano, ipi aporo hakásä pura soko, aporo hinamo yakai Yasuyaki hakásä puraka aseane, aporo hakásä meta Tímiasimo maeya ipi yano motosa Pataméase, ipi hi taku tetákara mesa, ikia kara fea mone kakasimo kakeno asesapo. Ayíáka kake Pataméasemo kaiyiáne,

⁴⁷ Nasare aporo Yasuane perakarakano kaikia, ipi sakepamo wáraka, “Yasuo, Tefetemo aporo irao, anoane kamenakarakaka ararererasie.” ⁴⁸ Airakano aporo hinamo metakiramo eaki paroaka someraka, “Wáhokopo. Me fasie.” Airakano Pataméasemo efera hunia sakepamo wáraka, “Tefetemo aporo irao, anoane kamenakarakaka ararererasie.”

⁴⁹ Airakano Yasumo kairaka e pesane wasuaka rukua asekeea reapo. Asekeea reke Yasumo someraka, “Aporoane wo peae.” Airakano ipu aporo hi mesaki someraka, “Ne wo peaerakae. Asiamo né karekeakopo. Ne takahisie.” ⁵⁰ Airakano aporo hi mesamo ipi pasu horomaka foakия takahikia, Yasu rea pesapo. ⁵¹ Perakano Yasumo eaki someraka, “Nōmo sesehoasimo nōmo mayikasimore?” Airakano aporo hi mesamo someraka, “Tisao, nōmo himo koteaka aseakoripo. Hiane makotehoanie.” ⁵² Airakano Yasumo someraka, “Nōmo anoaki himu hakásarakaka hemaka apura yiamo, né hi mesane mafarakayiapo. Né pusie.” Aihoane aporo hi mesane faraka ipi koteaka asesapo. Koteaka aseraka Yasuyaki hakásä pusuapo.

* ^{10:38:} Yasumo kapo soko hea tapukumarerane soko takumeaka somesane ipi mokoatikiraka rusua kukusane somesapo. “Ano mokoatikirakan kukusa ayíáka teto soko kukusare?” Aíyaka tetāki somesapo.

11

Yasu saro toki matia ripaka Yarusarame sitia hisiane oyapo.

Matiu 21:1-9; Ruki 19:28-40; Yone 12:12-19

¹ Aporo hinamo yakai Yasuyaki hakāsa ikia kara hisiapo. Hikia Yarusarame sitiane makeraka pausapo. Yarusarame sitiane makeraka ūri Orofe rekenapo. Ūri Orofe makeraka Péfasi ape soko, Petene ape soko kisia á i pausapo. Pauraka Yasumo aporo hakāsa pura tetáki ² someraka, “Teto ape tameyia pusie. Pukua aseane ape fari yia saro toki mano humaresa ipi matia aporo meta ripakanafonosa kita humaresa rekeno asekosapo. Aseraka kita fatarimaka ano rea karikia peanie.

³ Arirakano aporo metamo tetoaki someraka, ‘Tetápo marirakanonare?’ Airakano tetápo someraka, ‘Unihae saro tokiane karikia peaniesasamo, etapo karikia purakanapo. Epo saro tokiyaki makata rakikia faraka, karikia paripusierakano, saro tokiane karikia paripeakosapo,’ aíyaka somehoanie.” Aíyaka Yasumo somesapo. ⁴ Aíyaka somerakano aporo hakāsa pura tetā pukua aseane saro toki mano ikia koro makeraka hauaka moroa ikia kara á kita humaresekeno asesapo. Aseke saro tokiane tetapō fatarimasapo.

⁵ Fatarimarakano, aporo risiamo someraka, “Mainakano saro toki manoane fatarimarakanare?” ⁶ Airakano tetapō Yasumo somesane iaki somesapo. Somerakano aporoamo someraka, “Ao, karikia pusie.” ⁷ Airakano tetapō karikia pukua, Yasu rea saro toki manoane karikia pesapo. Karikia perakano aseraka, aporo yakaimo pasuane saro toki matia furumurikia marekea, Yasu á ripasapo.

⁸ Ripaka perakano aseke, “Yasu ipi aporo hokopusuareapo,” aíyaka aporo hinamo yakai ipu suamo pasu ikia kara á ifunusapo. Arirakano aporo hinamo metakiramo makata kū hemoa popatesane, ikia kara á ifunusapo. ⁹ Ifunusakipoko Yasu perakano aporo hinamo metakira fanaraka, i metakira kesekeraka ayiáka pesapo. Peraka ipu wárape peraka,

“Hosana.* Isiapo né pasimarakanapo. Né pesane aporo kárapo. Unihae Kotimo né pusiesamo epo né makotesapo. *(Buk Song 118:26)*

¹⁰ Isiapo makasa kaua kekema Tefetemo unihaeaka aseke rea ayiáka, nómo unihaeaka aseke rekeakosapo. Unihaeaka aseke rekeakosane Kotimo makoterakanapo. Asiamo Koti hepene apea reane isiapo kekererakanapo. Hosana.”

¹¹ Aíyaka ipu wárape hikia Yasu Yarusarame sitia hikia pauraka, Kotimo apeane aseako pusuapo. Pukua makata suane asekehaesapo. Maiya tuakeramo Yasumo Kotimo apeane metakarikia aporo hakāsa pura kenosuyaki Petene apea pusuapo.

“Ira foke wate efera hunia peakosafapo,” aisane oyapo.

Matiu 21:18-19

¹² Ere hakāsa waka mituru fiarakano, Petene ape metakarikia hikia Yasu meamorakano ¹³ aseane wakasema yamenoa ira foke namo ku susu rekeno asesapo. Aseraka ira foke kepoa pukua ira wate tumakosakipoko aseane, ira foke wate ikia heanafonoraka kū susu rekeno asesapo. ¹⁴ Aseke Yasumo iraki someraka, “Efera hunia ne wate peakosafapo. Keseke aporomo wate nasimo peraka, ne wateane nakosafapo,” aíyaka somesapo. Aíyaka somesane ipi aporo hakāsa puramo kaisiapo.

Kotimo apea aporomo makata roporaka risiane Yasumo pusiesane oyapo.

Matiu 21:12-13; Ruki 19:45-47; Yone 2:13-22

¹⁵ Yasu ipi aporo hakāsa purayaki Yarusarame sitia hikia pauraka, Kotimo apea Yasu yorokoa puraka, Yasumo aseane, aporo metakiramo makata roporaka risikino, aseke arukuhoaeraka pusiesapo. Aporo metakiramo mone sanasiraka risikino, teboroane maparitaesapo. Aporo metakiramo mena nume asia roporakano, i sea toane soko

* 11:9: Wate fana Yasu peasiraka Yu aporomo Hipuru meaka someraka hosana, aira amo kepoane, “Nómo isu masfesianie,” airapo. Asiāne Yasu pesa maiya amo some kepoane sanasiraka, kepo kawe ane someraka, “Isiapo ne makáraraka kekererakanapo,” aíyaka hosana airapo.

maparitaesapo. ¹⁶ Maparitaeraka Yasumo iaki someraka, “Kotimo apea makata mokoa perakano purakano ayiakakopo. ¹⁷ Arirakano Kotimo sawia fana porofete aporo Aesayamo popasane oyapo. Kotimo someraka, ‘Aporo hinamo hauaka sua risiamo someraka, ‘Isiapo Kotiaki somehokosakipoko, Kotimo apea peraka kurikurihokosapo,’ airapo.’ Aira nine Kotimo ape one repo hakimora aporomo kunikia mapariane.”

¹⁸ Airakano pirisiti aporo káramo soko, Kotimo somemane tisa aporomo soko, ipu Yasumo someane kairaka Yasu kukusimo ruko hemakapusuapo. Yasumo some karane aporo suamo kaikia, “Kotehoareapo,” airakano asekea, pirisiti aporo káramo kakanaker-aka risike, Yasu rukusapoko asiāne i namoraka karekesapo.

¹⁹ Yao nenehoramo Yasu soko, ipi aporo hakāsa pura soko, Yarusarame sitiane metakarikia pusuapo.

Himu hakásaraka kurikurinane Yasumo somesane oyapo.

Matiu 21:20-22

²⁰ Mituru i poparihikia aseane ira foke fana asesane pikinu soko porasekeno as- esapo. ²¹ Asekea Pitamo Yasumo somesane hemakapukua, Yasuaki someraka, “Tisao, asesie. Nómō fana someraka ira fokeane efera hunia aporomanomo wate nakosafapo, airakasuane porahoareapo. Nómō asesie.” ²² Airakano Yasumo someraka, “Kotiaki himu hakásaraka hemakapunie. ²³ Nómō reaki some one kakaro somerakaripo. Repo aporo hinamo metamo someraka, ‘Úri né takahikia he tawara sokoperasie.’ Aíyaka himu tetáraka hemakuprafaraka kakaro himu hakásaraka hemakapukua, aysierakano ayiakakosapo. Aíyaka hemakapukua rekeno Kotimo ayiáka rakiakosapo.

²⁴ Asiamo repo kurikurina maiya amo, Kotiaki makata kairaka kakaro Kotimo anakanapo, aíyaka hemakapukua kurikurirakano, makatane kakaro ayiakakosapo.

²⁵ Kurikurina maiya amo, nómō aporo metaki mahisiraka reane mafarasie. Nómō watikisane Kotimo mafahoasimo nómō aporo metaki hisisane soko mafarasie. Aíyaka kurikurirakano Kotimo nómō watikisane mafahokosapo,” aíyaka Yasumo somesapo.

²⁶ [Arirakano Yasumo some meta someraka, “Nómō hisisane soko ropo mokoatikinane soko metakarianafonorakano, nómō watikisane soko nómō Ata hepene yapura reamo metakariakosafapo,” aisapo.]

“Yasumo arakirane epamo maresare?” aisane oyapo.

Matiu 21:23-27; Ruki 20:1-8

²⁷ Yarusarame sitia Yasu ipi aporo hakāsa purayaki hunia poparihikia, Yasu Kotimo ape makeraka koraka reakipoko pirisiti aporo kára soko, Kotimo somemane tisa aporo soko, aporo sisima soko, i su pekea ²⁸ Yasuaki someraka, “Nómō arakirane epamo maresare? Nómō ayiáka rakisimo epamo néaki ayiáka rakinie, aisare?”

²⁹ Airakano Yasumo iaki someraka, “Nómō reaki makata hakása meta akai kairakanapo. Kaiyiane repo anoaki some pariperakano, kaikia anoaki rakiniesane nómō reaki somehokosapo. ³⁰ Yonemo aporo hinamo hea tapukumurianiesane Kotimo aisare? Aporomo aisare? Epamo aisare? Repo anoaki somesie.”

³¹ Airakano namina susu tafatafaraka someraka, “Isiapo Yasuaki yakapa somehoa-narakapo. Isiapo someraka, ‘Kotimo aisapo,’ aíyaka somerakanone, Yasumo isuaki someraka, ‘Mairakano Yonemo someane kakipayasare?’ aihokosapo. ³² Arirakano isiapo someraka, ‘Aporomo aisapo,’ aíyaka somerakanone, aporo hinamo suamo isuaki mahisiraka sapehokosapo. Aporo hinamo suamo hemakapuraka, ‘Yone ipi kakaro porofete aporopo. Ipi kakaro Kotimo some kara aporopo.’” Aíyaka ipu hemakapusuasamo iaki namorakanapo. ³³ Asiamo namina tafatafaraka Yasuaki someraka, “Yonemo aporo hinamo hea tapukumurianiesane epamo aisarakapo. Isu himeteripo.” Airakano Yasumo someraka, “Repo anoaki some paripeanafonosasamo, anoaki rakiniesa kepoane reaki somehokosafapo,” aíyaka Yasumo iaki somesapo.

12

Kotimo ipi hokusane aporomo mokoatikihokosapo aíyaka Yasumo ipi nine takumeaka somesane oyapo.

Matiu 21:33-46; Ruki 20:9-19

¹ Yasumo takumeaka someraka, “Hemo wafayamo sako karepe hemo ane porokoa marekea, keseke rurusapo. Rururaka sako wate nenekeaneraka he pusimo, eke karoraka maua asia rakisiapo. Rakiraka aporomo hemoane koteaka asekea rekeasimo, huturu ape kisiapo. Kikimarekea hemoane aporo metakiramo asekea risikiasimo aporo metakira murikimaka murisiapo. Murikimaka faraka, hemo wafayamo aporoane soko, ipi hemoane soko metakarikia, hauaka meta á pusuapo.

² Pusuakipoko sako karepe wateane ikia ahera maiya amo, hemo asekea risia aporomo sako karepe wateane tumusapo. Tumokoa parakuraka hemo wafayamo somesane kaikia taehoko asiāne, ipu koarellaera hemoane hemakapukua, hemo wafayapoko taesafapo. Arirakano hemo wafayamo ipi aporo raipaki someraka, ‘Sako karepe wateane anopoko taesane nōmo mokoako pusie,’ aisapo. Airakano aporo raipamo mokoako pusuapo. ³ E pukua hemoa perakano, hemo asekea risia aporomo e rukua, sako karepe wate soko kakanafonoraka nena pusiesapo.

⁴ Arirakano efera hunia sako karepe wate mokoako hemo wafayamo aporo raipa metane pusiesapo. Pusiesane hemoa perakano, hemo asekea risia aporomo e wamoa rukua e mokoatikiraka mainamaresapo.

⁵ Rukua mokoatikiraka mainamaresane asekea hemo wafayamo aporo raipa metaki sako karepe wate mokoako pusiesapo. Pusiesane hemoa perakano, hemo asekea risia aporoamo e rusua kusuapo. Aporo raipa metakira soko yasiapo. Aporo raipa metakira rukua, arirakano aporo raipa metakira kakaro rusua kusuapo.

⁶ Arirakano hemo wafayamo hemakapuraka, ‘Aporo hakása meta rekenapo. E nōmo hokusapo. Eane nōmo kára himu tumurumo hemakapukua rekenapo. Eane nōmo hokosasamo ipu mokoatikihokosafapo.’ Aíyaka hemakapukua ipi hokosaki someraka, ‘Sako karepe wate mokoako pusie,’ airakano hokosa ane ipi pusuapo. ⁷ Pusuane hemoa perakano, hemo asekea risia aporomo someraka, ‘Hemo wafayamo hokusane apere. Arirakano keseke ipi wafayane kusuakipoko finihaoa e reke, hemo one epo asekea rekeasireapo. Anapaka e rukusapo. Rusua kurakano hemo one isiapo isina makosapo. Asiamo isiapo isina wafayarakka asekea risikiakosapo.’ ⁸ Aíyaka hokosa ane ipu waseremaka rusua kurakano, hemo ruru tapikia tama takua makasusapo.

⁹ Asiamo keseke hemo wafaya aperamo hemo asekea risia aporoane mayiakakosare? E pekea epo hemo asekea risia aporoane rusua kukusapo. Rusua kurakano aporo metakiramo hemoane koteaka asekea risikiasimo murikimakosapo.” Aíyaka Yasumo somesapo.

¹⁰ Arirakano Yasumo aporo hinamo suaki someraka, “Kotimo sawia some one popasane repo menosafare? Kotimo sawia popasane oyapo.

‘Ape kira aporomo ira waripi mamakatesane eféra hunia maka pekea tipia mapohareapo. ¹¹ Mapohoareane Kotimo ipi ayíáka rakireapo. Ayíáka rakisikino isiapo aseraka someraka, “Ane kotehoareapo,” airapo.’ Aíyaka popahoareapo.” *(Buk Song 118:22-23)*

¹² Aíyaka Yasumo somerakano, Fere aporomo kaikia hemakapuraka, “Yasumo isuane hukurukua marekea takumeaka somerakae.” Aíyaka hemakapukua, Yasu tipura makeasimo waseremakosakipoko asiāne, aporo hinamo ipu suamo iaki saperapaka, Yasuane metakarikia i pusuapo.

Takese mone kakakosane Yasumo somesane oyapo.

Matiu 22:15-22; Ruki 20:20-26

¹³ Fere aporomo soko, Heroteaki patera asesa aporomo soko, Yasu rea aporo metakirane pusiesapo. Yasumo hasaka somerakarihoamo, mahoperaka akai kaiyako pusiesapo. ¹⁴ Pusierakano i pukua, Yasu rea pekea someraka, “Tisao, nōmo someane

namo kakaro somerakae. Aíyaka isiapo hemakapurakaripo. Arirakano aporomo néane mokoatikihokosane nómo ní hemakapurafaraka nómo kakaro somerapo. Aporo kárane sesehoasimo nómo hokokaraka somerafapo. Kotimo ainane nómo kakaro some akare. Asiamo neaki isiapo akai kairakanapo. Isiapo Yu aporomo Rome aporo unihaeaki takese mone kayane siahoasireare? Kayane Kotimo somemaneane mamosohoasireare? Mayiakasireare? ¹⁵ Isiapo takese mone motoakosare? O metakariakosare?”

Airakano ipu himu tetáraka hemakapukua risike, ipu some yapake somesane Yasumo ipi aseraka iaki someraka, “Nómo hasaka somerakano nōmo ní some yiamo kakinumo maká arura ayíáka, ano níane rusimo repo aíyaka somerakae. Nómo hasaka somerakano repo ano tipura makeako somerakae. Asiamo mone haeane nōmo aseako maka peae.”

¹⁶ Airakano ipu mone hae maka pesapo. Maka perakano Yasumo asekea iaki someraka, “Aporo epa hikumisi mone haea rekerire? Epa yano motosa popahoareare?” Airakano ipu someraka, “Rome aporo unihae Sisa hikumisireapo. Ipi yano motosa popahoareapo.”

¹⁷ Airakano Yasumo someraka, “Rome aporo unihae menane ipiaki kakanie. Kotimo menane Koti ipiaki kakanie.” Airakano ipu kairaka himu fasapo.

Aporo kusua maturikia taehokosane Yasumo somesane oyapo.

Matiu 22:23-33; Ruki 20:27-40

¹⁸ Satusi aporo Yasu rea peraka ipu hemakapuraka, aporo kusuane maturikia tae-nafapo. Aíyaka hemakapukua ipu Yasuaki someraka, ¹⁹ “Tisao, Mosesemo someaka popasane oyapo. ‘Aporo metamo ipi mamaneamo hokosa hokono mareanafonoraka kurakano asekea, ipi mamaneamo hinamo yaroane arumarapo. Aporo kusua amo hokosa wainenaka sikiraka wainasimo hinamo yaroane ipi mamaneamo arumarapo.’ Aíyaka Mosesemo someaka popasane isiapo menosapo. Asiamo isiapo neaki akai kairakanapo.

²⁰ Aporo yatipinusu risiane namina mamanea hakásapo. Mamanea fanamo hinamo arumasane hokosa hokono mareanafonoraka kurakano, ²¹ mamanea kusuamo patera yiamo, hinamo yaroane arumasapo. Epo soko hokosa hokono mareanafonoraka e kusuapo. Kurakano epo patera yiamo hinamo yaroane arumasapo. Arumasane epo soko hokosa hokono mareanafonoraka kurakano, ²² ayipe pukua, mamanea yatipinusuamo hinamo yaro hakásane arumape pukua, hokosa hokono maresafapo. Keseke hinamo manokonomosane kaina keseke e kusuapo. ²³ Kusua maturikia taeana maiya amo, hinamo ane epamo hinamore? Hinamoane aporo yatipinusumo arumasapo.”

²⁴ Airakano Yasumo someraka, “Kotimo someane porofete aporomo sawia popahoareapo. Popasane soko, Kotimo ipi wakapuane soko, repo himeteraka hasaka hemaka apure. ²⁵ Aporo kusua maturikia taerakano hepene aporo arisia ayíáka risikiakosapo. Ayíáka arisia maiya amo aporo kusua maturikia taesamo hinamo kusua maturikia taesane arumarafapo.

²⁶ Arirakano aporo kusua maturikia taena amo kepoane Mosesemo popasane oyapo. Ira fete kokosususakipoko arakaru aeyaka ira rufiraka rea maiya amo, Kotimo Moseseko someraka, ‘Eparahamemo Kotiane anopo. Aisakemo Kotiane soko anopo. Yakopemo Kotiane soko anopo.’ Aíyaka somerakano Mosesemo popasane repo menoraka kepoane repo himeteane. *(Kisim Bek 3:6)*

²⁷ Popasa amo kepoane oyapo. Koti ipiane aporo hitafe arisiamo Kotipo. Ipi aporo kukua kesamo Kotifapo.” Aíyaka Yasumo somesa amo kepoane oyapo. Eparahame soko, Aisake soko, Yakope soko kusua nine, i yaiya hitaferaka risikinapo. Asiamo Yasumo Satusi aporoaki someraka, “Satusi aporo repo fana somerakasane hasaka somerakae,” aíyaka Yasumo somesapo.

Kotimo somemane fanane oyapo.

Matiu 22:34-40; Ruki 10:25-28

²⁸ Kotimo somemane tisa aporo hakásá meta pekea aseane, Satusi aporomo Yasuaki me rukua somesa maiya amo, ipu someane Yasumo hurutapirakano asekea, aporo pesa amo Yasuaki someraka, “Kotimo somemane meta mane fanare?” ²⁹ Airakano Yasumo someraka, “Isiraya aporo repo kaisie. Isiapo Unihae Koti ipi hákasa unihaeaka rekenapo.

³⁰ Asiamo repo Unihae Kotiaki himu tumurumo hemakapunie. Repo homo soko eaki hemakapunie. Repo himu hemakapuramo soko eaki hemakapunie. Repo wakapumo soko eaki kataka mareanie.

³¹ Arirakano Kotimo somemane metane oyapo. Nómo níane himu tumurumo hemaka apura ayíáka, aporo metane soko ayíáka himu tumurumo hemakapunie. Ayíáka somemane tetá ane kakaro fanapo. Some meta fanafapo,” aisapo. (*Lo 6:4-5; Wok Pris 19:18*)

³² Airakano Kotimo somemane tisa aporomo someraka, “Tisao, nómo somerakane kakarorakae. Koti ipi hákasapo. Unihae Koti meta rekenafapo. Nómo airakane kakarorakae. ³³ Eaki himu tumurumo hemakapuramo soko, wakapuaka hemakapuramo soko, nómo níane himu tumurumo hemaka apura ayíáka, nómo aporo metane ayíáka himu tumurumo hemakapunie. Airakane kakarorakae. Kotimo sesehoasimo somemane tetá ane kekemaraka rakirane kakaro fanapo. Kotiaki makata rukua paikia karáne kesekepo.”

³⁴ Airakano epo koteaka hemakapukua somesakipoko, Yasumo eaki someraka, “Kotimo né unihaeaka asekea rekeakosa maiyane makepo,” aisapo. Airakano ipu Yasuaki makata kaiyakosapoko asiāne, ipu some ane hurutapirakano, efera hunia makata meta akai kaisiafapo.

“Keresomo kepoane repo mayíáka hemakapurakarire?” aíyaka Yasumo Kotimo somemane tisa aporoaki me ruraka, ipu somesane Yasumo hurutapisiane oyapo.

Matiu 22:41-46; Ruki 20:41-44

³⁵ Aporomo hemakapusimo Kotimo ape makeraka taku meta á Yasumo someraka, “Kotimo somemane tisa aporomo someraka, ‘Keresoane Tefetemo aporo ira wainepe pesa amo apororeapo,’ airakasupo. Airakane marirakanore? ³⁶ Wate fana Ho Kotesamo Tefeteaki mahemakapurakarakano Tefetemo someraka, ‘Nómo Unihaeaki Unihae Kotimo someraka, ‘Ne ano hokono tumuru takua kayae. Hokono tumuru takua aporo hokopusua akaya ayíáka kayae. Kakeno nómo yunuane nómo rukumosakatapiakosapo,’ aisapo.’ Aíyaka Kotimo somesane Tefetemo popahoareapo. (*Buk Song 110:1*)

³⁷ Asiamo Tefetemo Keresoaki someraka, ‘Ne nómo Unihaepo,’ aisane marirakanore? Arirakano makasa kauamo ipi hokosa wainepe pukusaki ‘Unihaepo,’ airafapo. Asiamo Tefetemo Keresoaki ‘Unihaepo’ aisasamo, Tefete takapeasiraka Keresoane wate fana yaiya reapo. Asiāne repo someraka, ‘Tefetemo wainepe pesa á Kereso faserepeakosapo,’ airakae. Airakane marirakanore?” Aíyaka Kotimo somemane tisa aporomo someane Yasumo hurutapikia somerakano, aporo hinamo suamo kaikia kakaro sesesapo.

“Kotimo somemane tisa aporomo soko Ferese aporomo soko arakira ayíáka, repo soko ayíáka rakiakopo,” aíyaka Yasumo somesane oyapo.

Matiu 23:1-36; Ruki 11:37-54; Ruki 20:45-47

³⁸ Yasumo some kasa maiya amo some kasane oyapo. Epo someraka, “Kotimo somemane tisa aporomo arakira ayíáka, repo soko ayíáka rakiakopo. Ipu pasu horopokara osoraka pukua aporo hinamo sarimaraka risiakipoko i puraka, aporomo i hokono moraka i makáraraka someraka, ‘Tisa karao,’ aihoasimo kára sesenapo. ³⁹ Arirakano Yu aporomo sarimana apea pukua, aporo hinamo su sarimaraka toakipoko, i hikumisi neneme sapea sea tokoako sesenapo. Hokono akera maiya amo aporomo i makáraraka, aporo unihae hokopusua káramo sea á tokoako sesenapo.

⁴⁰ Arirakano hinamo yaromo mone soko, makata kemo soko, iaki kakasimo hinamo yaroane manamorapo. Ipu hakimakosakipoko ayíáka manamorapo. Manamoraka yia aporomo i kotehoareapo, aihoasimo ipu kurikuriraka risike, some horopo some nokone pukua kurikurinapo. Asiasamo i suane fanasihokosane kakaro kárahokosapo.” Aíyaka Kotimo somemane tisa aporomo ainane Yasumo somesapo.

Hinamo yaromo Kotiaki makata kasane oyapo.

Ruki 21:1-4

⁴¹ Kotimo apea maua motosakipoko, taku ra Yasu kake aseane, aporo hinamomo mone mokoa pekea Kotiaki kakako maua kesapo. Makata kemo kára toa aporo hinamo ipu suamo mone kára kesapo.

⁴² Arirakano hinamo yaroane makata forokoa kayasasamo ipi mone hae kusua tetá makesapo. ⁴³ Mone hae kusua tetá makerakano asekea, Yasumo ipi aporo hakāsa purane peaesapo. Perakano asekea Yasumo iaki someraka, “Aporo hinamo ipu suamo mone kesane, hinamo yaromo mone makesa amo marokesapo. ⁴⁴ Ipu mone kaka faraka mone metakira yia tokenapo. Arirakano hinamo yaroane ipi makata forokoa kayasasamo mone wakasema kayane su maka pekea kasapo. Mone meta ipi apea kakenafapo.” Aíyaka Yasumo ipi aporo hakāsa puraki somesapo.

13

“Kotimo ape ekeane kokoropepehokosapo.” Aíyaka Yasumo somesane oyapo.

Matiu 24:1-2

¹ Kotimo apeane Yasumo metakarikia pusua maiya amo, ipi aporo hakāsa pura hakásamo eaki someraka, “Tisao, Kotimo apeane asesie. Ekemo ape kisiane namo kakaro kotehoareapo. Asiamo apeane namo kakaro kotesapo.” ² Airakano Yasumo eaki someraka, “Kotimo ape etapo aserane, eke ripape hikia, ape kisiane keseke kokoromokoteraka hakásaraka tokoakosapo,” aisapo.

Makata umisa kekepo faserepeakosane Yasumo somesane oyapo.

Matiu 10:17-22; Matiu 24:3-14; Ruki 21:7-19

³ Yasu ūri Orofea hikia ūri kakafae aeyaka aseane, Kotimo ape rekeno asekea kake, Pita soko, Yamese soko, Yone soko, Enitu soko pekea, namina hakāsa risike Yasuaki ipu someraka, ⁴ “Nómo somerakane masinaka ayiakakosare? Kotimo ipi makata su ayiakakosane maiya mamo ayiakakosare? Isiapo hemakapusimo makata yakapamo isuaki tariakosare?”

⁵ Airakano Yasumo someraka, “Asekeanie. Keseke makata ayiákakosane oyapo. Aporo metakiramo reaki kotafe somerakano ipu someane kakimarapaka asekeanie. ⁶ Aporo yakai peakosapo. Pekea ipu kotafe someraka, ‘Ano Keresopo. Unihae makárasane anopo.’ Aíyaka ipu ano yano hokoa kotafe somerakano, some ane aporo yakaimo kakimakosapo. Asiamo repo asekeanie.

⁷ Arirakano aporomo ape sumu metayaki werakanaporakano, repo kaiyakosapo. Ape sumu makea soko, ape sumu yamenoa soko werakanapo, aíyaka some tokomako pukua somerakano soko repo kaiyakosapo. Kaikia himu fahokopo. Aporomo weakosane fana faserepeakosapo. Arirakano Kotimo makata su ayiakakosane haru faserepeakosafapo. ⁸ Aporo hauaka metamo aporo hauaka metayaki werakano, kamani metamo kamani metayaki werakano, ayiakakosapo. Hauaka kekepoa momani kára peakosapo. Arirakano hauaka kekepoa makata nakosa farakano aporo hinamo kára meamohokosapo. Hinamo ipi hokosa kaiyako aheramo kára mokoweraka mati soko, himu soko, kára tenapo. Tena kepoamarera ayíáka momani kára aperamo soko, makata nakosa farakano soko, yunu aweramo soko, ayíáka aporo hinamoaki makata umisane kepomareakosapo.

⁹ Maiya amo re huruperapaka asekeanie. Re aporo metakiramo waseremokoa hukurura aporomo reane hukururaka, arirakano Yu aporomo sarimana apea aporo metakiramo reane ira faimo rukusapo. Asiamo repo ano patera asesasamo, reane ape asekea risia aporoamo soko, aporo unihaemo soko, re hukurusimo aporo metakiramo re waseremokoako pusiehokosapo. Waseremokoa hukuarura sere amo, repo iaki anoane makáraraka somehokosapo.

¹⁰ Fahokosa maiyane faserepeasiraka anoane hemakapusimo, some kotesane hauaka sua aporo hinamo suaki nōmo kakimara aporo hinamomo some kakakosapo.

¹¹ Arirakano reane waseremokoa hukuarura maiya amo, repo somehokosane

karekeakopo. Hukuarura maiya yiamo somehokosane re himura Kotimo mahemakapurakarakano, repo somehokosapo. Repo namina hemakapusuane somehokosafapo. Ho Kotesamo hemakapusuane repo somehokosapo.

¹² Arirakano aporomo ipi mamaneane, aporo metamo rusua kukusimo parakehokosapo. Arirakano wafayamo ipi hokosa aporo metamo rusua kukusimo parakehokosapo. Arirakano hokosamo ipi wafaya kaīya tetāne aporo metamo rusua kukusimo parakehokosapo.

¹³ Asiamo re ano patera asesasamo reane aporo hinamo suamo hisihokosapo. Asiamo reane Kotimo mafasiasimo re Kotiaki patera asesane metakarirafaraka, yaiya hemakapuka risike, rakipe pukua rosaka taehoanie,” aiyaka Yasumo somesapo

Makata kakaro watikisa faserepeakosane oyapo.

Matiu 24:15-28; Ruki 21:20-24

¹⁴ Yasumo iaki someraka, “Repo aseane Kotiane mawakasemahokosakipoko, Kotimo apea makata watikisa motorakano, repo makata ane asekea hemakapunie. Amo re Yutía hauaka risiane tekatarikia ūria hinie. ¹⁵ Arirakano re aporo metakira ape kopo^a* risiane re ape kakarua makata kemo mokoako pukupo. ¹⁶ Arirakano re aporo metakira hemo tipia risiane, repo apea pasu mako pukupo.

¹⁷ Maiya amo hinamo umisa soko, hokosa kiri kaīya soko, tekatarikia hiane waforohokosapo. ¹⁸ Tekatarikia hiakosa maiya amo yao kára aperamo tekatarikia hiane kakaro waforohokosapo. Yao kára apera maiya amo, tekatarirapaka kurikurihoanie.

¹⁹ Tekatarikia hikia arisia maiya amo, makata umisa faserepeakosane kárahokosapo. Kotimo hauaka kára one kepomaresa maiya amo soko, pipu yumo soko, makata umisa faserepeakosa ane fana asiafapo. Makata umisa faserepeakosane faraka keseke ayiáka umisa faserepeakosafapo.

²⁰ Makata umisa fasere apera maiya amo, mokoatikiraka risira satiki aporomano suane kukua kekea fahoafunupo. Kukua kekea fanapaka Kotimo murikimasa aporo hinamoane hemakapuraka mokoatikihokosa maiya sapeane rukupateraka makinakehokosapo. ²¹ Arirakano aporo metamo reaki someraka, ‘Repo suamo wó asesie. Aporo ane ipi Unihae káraro. E Keresopo.’ Airakano aporo metamo reaki someraka, ‘Repo suamo aka asesie. Aporoane ipi Unihae káraro. E Keresopo,’ aiyaka ipu somerakano, someane repo kakimakopo. ²² Asiamo aporo metakira, kotafe Kereso pariraka peakosapo. Arirakano aporo metakira, kotafe some kará porofete aporo pariraka peakosapo. Peraka aporo hinamo suamo iaki patera asekeasimo, ipu makata wakapuaka rakira kára meta rakiakosapo. Rakirane Kotimo wakapuane iaki kasapo, aiyaka aporo hinamo suane fofaraka iaki hemakapusimo rakiakosapo. Kotimo murikimasa aporo hinamo ipu makata ainane, kau aseako kirimaraka rakiakosapo. Ipu hemakapuraka, ‘Nōmo someane kairaka soko metao, kaiyanafonoraka soko metao, iaki murikimaka somehokosapo,’ aiyaka ipu hemakapukusapo. ²³ Asiamo makata ane faserepeasiraka, makata ayiakakosane nōmo reaki somerakanapo. Nōmo someraka one repo kakaro kakimakanie.” aiyaka Yasumo aporo hakāsa puraki somesapo.

Yasu paripeakosane oyapo.

Matiu 24:29-31; Ruki 21:25-28

²⁴ Yasumo someraka, “Mokoatikihokosa maiya ane faraka amo patera, ‘sere maiyamo soko ere maiyamo soko faehokosafapo. ²⁵ Ti makata hepene yapunaka hurupepehokosapo. Arirakano hepene yapura makata kára risiane mahohohokosapo.’ (*Aisaia 13:10; 34:4*)

²⁶ Maiya amo aporo hinamo ipu aseane Aporomanomo Táke anoane perakano aseakosapo. Ti pakae á wakapuyaki faesayaki ano peakosapo. Ano perakano aporo hinamo suamo aseakosapo. ²⁷ Ano apera maiya amo aporo hinamo nōmo murikimasane nōmo hepene aporo yakaimo pasimokoako pusiehokosapo. Pusierakano i peraka hauaka sua,

* ^{13:15:} Ape kopoane ereke motosasamo ape kopo apero hikia torapo. Isiraya aporomo apeane asiapo.

patera takua risiane soko, ketaya takua risiane soko, ketaya takua risiane soko, hikumisi neneme takua risiane soko, hauaka sua nōmo aporo hinamo murikimosane hepene aporomo pasimokoa sarimahokosapo.” Aíyaka Yasumo somesapo.

Ira fokeane Yasumo takumeaka somesane oyapo.

Matiu 24:32-36; Ruki 21:29-33

²⁸ Yasumo someraka, “Ira foke amo takume kepoane hemakapunie. Ira foke ku paruraka yoerakano asekea repo hemakapuraka, ‘Kupa kakako makerakanapo,’ aíyaka repo hemakapurapo. ²⁹ Hemakapura ayiáka repo aseane, makata umisa faserepeakosapo aisane fasereperakano aseraka, nōmo makata su ayiakakosaposane makerakanapo, aíyaka repo hemakapukusapo. Aporo ape kakarua yoroako ikia koro makeraka apera ayiáka makerakanapo, aíyaka repo hemakapunie.

³⁰ Nōmo reaki kakaro somerakaripo. Aporo hinamo maiya hakása yiamo hokono murisiane, i kukusiraka hitafe arisia yiamo, nōmo ayiakakosaposane fasereperakano aseraka ipu someraka, ‘Makata ayiakakosaposane ayana ayareapo,’ aíyaka repo asekea hemakapukusapo. ³¹ Asiamo ti yapurane soko, hauaka one soko fahokosapo. Arirakano nōmo someane fahokosafapo. Nōmo someraka one kakaro ayiakakosapo,” aíyaka Yasumo ípi somesapo.

“Ano paripeakosa maiyane aporo metamo hemakapurafapo,” aíyaka Yasumo takumeaka somesane oyapo.

Matiu 24:36-44; 25:13; Ruki 12:40; 21:36

³² Yasumo ípi someraka, “Ano peakosa sereane soko, maiya hi awane soko, aporo hinamomo hemakapurafapo. Hepene aporomo soko, Kotimo hokosa nōmo soko, hemakapurafapo. Atamo ípi hákasamo hemakapurapo. ³³ Asiasamo repo asekea risikianie. Ano pari peakosa maiyane repo hemakapunafononasamo asekea risikianie.

³⁴ Ano paripeakosa maiya amo ayiakakosane oyapo. Aporo kimisi pukusakipoko ípi apeane aporo raipamo asekea risikiasimo marerapo. Ipu makata rakirane soko epo marerapo. Ikia koro asekea rera aporoaki epo someraka, ‘Koteaka asekea rekeanie,’ airapo. ³⁵ Ape asekea rera aporo pariperakarihoamo asekea risikianie. Ipi maiya tuakeramo soko metao, ere titipiamo soko metao, mena me horamo soko metao, mituru fiarakano soko metao, e perakarihoamo asekea risikianie. ³⁶ E wate foaka peraka aseane, re wakakesekeno aseakohoamo re asekea risikianie. ³⁷ Aíyaka nōmo re aporo hakása puraki someana one aporo hinamo suaki somerakanapo. Someane oyapo. Re suane waráfaraka asekea risikianie.” Aíyaka Yasumo ípi somesapo.

14

“Yasu rusua kukusimo waseremakosapo,” aíyaka somesane oyapo.

Matiu 26:1-5; Ruki 22:1-2; Yone 11:45-53

¹ Sere tetá faraka, sere metamo hokono keakosapo. Wate fana Iyipi hauaka metakarikia pusuakipoko, Ape Farimaresa* Hemakapuko Hokono Keakosapo. Hokono keraka farawa pirianafonona nenapo. Maiya amo pirisiti aporo kára soko, Kotimo somemane tisa aporo soko, ipu me rukua some maraka, “Yasuane rusua kukusimo eane maiyaka mahoperaka waseremakosare? ² Yumo hokono akera maiya amo Yasu waseremayane siahoasifareapo. Asiamo aporo yakai sarimasasamo isuyaki werapaka, yumo e waseremakosafapo.” Aíyaka pirisiti aporo káramo soko, Kotimo somemane tisa aporomo soko, someaka masapo.

Petene apea wera wape yamona Yasu wamoa hinamo metamo rekemaresane oyapo.

Matiu 26:6-13; Yone 12:1-8

* 14:1: Moses rea maiya amo Iyipi hauaka á Mosesemo ípi Feroaki someraka, “Yu aporoane Fero nōmo tonotaehoanafonorakano ane hokosa fana suane rusua kukusapo.” Airakano Yu aporomo saro sipi rukua yapiane ape kau kinitia paisiapo. Paisikino asekea, kura kará hepene aporomo apeane farimareke tapikia pusuapo.

³ Petene apea aporo meta yano motosa Saemone fana toropakesa reane fasapo. Asiamo Saemoneamo apea Yasu pukua, teboro makeraka sea kayakipoko, hinamo meta peraka eke kotesa petoro pariaka rakisiane maka pesapo. Petoro maka pesa á, wera namo kakaro wape yamonane kesa, mone káramo roponane kesapo. Kesane petoro tofene ropakataeraka Yasu wamoa rekemaresapo.

⁴ Rekemarerakano aporo metakira risiamo asekea saperaka namina susu someraka, “Hinamoamo werane marirakano nenakamakayia rekemarekeea farakanare? ⁵ Wera ane mone káramo roporaka, keremisi hakásapoko makata rakira ropo ane asiapo. Wera ane aporo metaki roporaka mone kára mokoa aporo makata forosaki kakafunureapo.” Aíyaka ipu hinamoaki someraka, “Nómo aporo makata forosane ararerafare? Mari-rakano wera ane rekemarekeea farakanare?” aisapo.

⁶ Airakano Yasumo someraka, “Hinamoamo ipi rakiako hemakapusuane marirakano repo makaíya marekea somerakanare? Asiamo repo aihokopo. Hinamoamo ano wamoa wera rekeamarerane kakaro kotesapo. ⁷ Asiamo aporo makata forosane maiya suamo reyaki hakāsa risikiakosapo. Asiāne ano maiya suamo reyaki hakāsa rekeakosafapo. Maiya metamo repo hemakapukua iane makotehoane siahoasireapo.

⁸ Hinamoamo rakiane siahoasisekeno ipi rakirakanapo. Ano kau ane kunikia motoakosakipoko, hinamoamo wera wape yamona ano kauane makoteraka reke-mareakosane murikimaka rekemaresapo. ⁹ Hao, kaisie. Nómo reaki kakaro somer-akaripo. Hauaka kara wo aporomo anoane hemakapusimo some karaka, hinamoamo wera rekemaresane soko, aporo hinamomo hemakapusimo ipu somehokosapo. Aíyaka somerakano hinamoane aporo hinamo yakaimo hemakapukusapo,” aíyaka Yasumo somesapo.

Yutasemo Yasu parakehokosapo, aisane oyapo.

Matiu 26:14-16; Ruki 22:3-6

¹⁰ Aporo hakāsa pura hakāsa meta yano motosa Yutase Isekeriopo. E pirisiti aporo kára risia á Yasuane parakehokosakipoko somehoko pusuapo. ¹¹ Pukua somerakano ipu seseaka kaikia eaki someraka, “Isiapo neaki mone kakakosapo,” aisapo. Airakano Yutasemo someraka, “Yasu mayíka parakehoaepi,” aíyaka hemakapukua Yasu parake-hokosa ikia karane kosapo.

Ape Farimaresa Hemakapuko Hokono Akeramo makata nakosakipoko Yasu ipi aporo hakāsa purayaki sarimasane oyapo.

Matiu 26:17-30; Ruki 22:7-14, 21-23; Yone 13:21-30

¹² Arirakano hokono keraka Farawa Pirianafonona Nená kepomaresa maiya amo, saro sipi mano rusuapo.† Maiya amo aporo hakāsa puramo Yasuaki someraka, “Ape Farimaresa Hemakapuko Hokono Keraka makata nakosane isiapo ape ma sarimaraka taehokosare?”

¹³ Airakano aporo hakāsa pura tetá pusimo Yasumo murikimaka someraka, “Teto ape sumua pusie. Pukua aseane aporo metamo he petoroa takamaka makatiraka perakano, tetápo e asekea sapenakosapo. Sapenekea e purakano, eyaki hakāsa punie. ¹⁴ Pukua e apea yorokoa purakano, apeane wafayaki someraka, ‘Tisamo someaka maresane oyapo. Ape Farimaresa Hemakapuko Hokono Keakosakipoko, nōmo aporo hakāsa purayaki sarimaraka, ape kakaru sape ma sarimaraka makata nakosare? Aporo kimisi pesa akipoko ape sape mayare?’

¹⁵ Airakano epo tetoane karikia, ape huturua hikia ape rumu kára tariakosapo. Ape á sea soko, teboro soko, toane tariakosapo. Tarirakano ape á makata nakosa sarimaraka taehoanie.” ¹⁶ Aíyaka Yasumo someaka marerakano, aporo hakāsa pura tetane pukua apea pauraka Yasumo ayiakakosaposane, ayíka rakirakan tetapō asesapo. Ape Farimaresa Hemakapuko Hokono Keakosakipoko tetapō makata nakosa sarimaraka taesapo.

† 14:12: Mosese rea maiya amo lyipi hauaka metakarikia pusimo Yu aporo makasa kauane Kotimo mafasisiane merarunapaka keremisi suamo saro sipi rukua hokono kerapo.

¹⁷ Sarimaraka taerakano asekeea maiya tuakeramo, Yasu apea pekea, ipi aporo hakāsa pura keno suyaki hakāsa sarimaraka toapo. ¹⁸ Ipu makata nenaka toa maiya amo, Yasumo someraka, “Nōmo reaki kakaro somerakaripo. Repo aporo hakāsa metamo anoyaki hakasa toke makata anena yiamo, repo hakāsa metamo ano parakehokosapo,” aísapo.

¹⁹ Airakano ipu mahisiraka namina hakāsa hakásaraka Yasuaki someraka, “Ne parakehokosane anore,” aíyaka namina yia fofaraka somerape pusuapo.

²⁰ Somerape purakano Yasumo someraka, “Re aporo atoa yiamo ano parakehokosapo. Nōmo farawa maka he waira á kokoamarera yiamo, aporo metamo soko, anoyaki hakāsa tukurakano aporo ayapo. Epo ano parakehokosapo. ²¹ Aporomano Tákehokosakipoko ano hauaka wo pesapo. Ano ayiakakosane Kotimo some kará porofete aporomo, Kotimo sawia poparaka maresa, hakāsa nine kekemaraka ayiakakosapo. Aporomanomo Tákeane anopo. Ano parakena aporoane ipi fanasihokosane kakaro itifiakosafapo. Aporoane e ipi hokono mareanafonosa satiki ane kotehoafunureapo,” aíyaka Yasumo somesapo.

Aporo hakāsa puraki Yasumo farawa soko waene he soko kasane oyapo.

Matiu 26:26-30; Ruki 22:15-20; 1 Korini 11:23-25

²² Ipu makata nenaka atoa maiya amo, Yasumo farawa maka Kotiaki suseaka kurikurisapo. Kurikuriraka faraka farawa mosoraka aporo hakāsa puraki hakāsa hakásaraka karaka someraka, “Farawa one masie. One ano kaupo,” aísapo. ²³ Arirakano kapo he soko, maka Kotiaki suseaka kurikuriraka faraka, iaki karakano ipu suamo nesapo.

²⁴ Nenakano asekeea Yasumo iaki someraka, “Waene he one ano yapipo. Ano yapi pukusa amo aporo hinamo suamo himu watikisane mafahokosapo. Ano yapimo aporo hinamo suane mafasiakosakipoko Kotimo ipi kawe someaka marakanapo. ²⁵ Nōmo reaki kakaro somerakaripo. Waene he one nōmo efera hunia hauaka wo reyaki hakāsa nakosafapo. Keseke Koti unihaeaka rea hauaka á nōmo waene he one reyaki hakāsa toke nakosapo.”

²⁶ Aíyaka Yasumo somerakano, ipu Kotiaki kekereraka kesasapo. Kesarako faraka, apeane metakarikia ūri Orofea hisiapo.

Pitamo “Yasu nōmo aserapao,” aihokosane Yasumo somesane oyapo.

Matiu 26:31-35; Ruki 22:31-34; Yone 13:36-38

²⁷ Aporo hakāsa puraki Yasumo someraka, “Repo suamo anoane metakariakosapo. Metakariakosane Kotimo sawia popasane oyapo.

‘Saro sipi wafayane nōmo rurakano saro sipi suane teketariakosapo,’ aíyaka Kotimo sawia popasane kakaro yaiya ayiakakosapo. *(Sekaraia 13:7)*

²⁸ Ayiakakosa nine, keseke ano maturikia taerakano, Kariri hauaka á ano fana pusuakipoko, re keseke pekea isina hakāsa sarimahokosapo.”

²⁹ Airakano Pitamo Yasuaki someraka, “Ipu suamo neane metakarirakano, nōmo ne kakaro metakariakosafapo.” ³⁰ Airakano Yasumo Pitaki someraka, “Nōmo kakaro somerakaripo. Pipu ereamo kokoroko yape tetá mehoasiraka nōmo someraka, ‘Yasu nōmo aserapao,’ aíyaka yape isiamo kotafe somehokosapo.” ³¹ Airakano Pitamo paroaka someraka, “Wae, ano neyaki hakāsa rusua kuraka soko metao, nōmo ‘Yasuane aserapao,’ aihokosafapo.” Airakano aporo hakāsa pura suamo Pitamo some hakāsa nine kekemaraka somesapo.

Kesemane hauaka Yasumo kurikurisane oyapo.

Matiu 26:36-46; Ruki 22:39-46

³² Yasu ipi aporo hakāsa purayaki Kesemane hauaka á puraka Yasumo iaki someraka, “Ano kurikuriraka area maiya amo re wo tokoanie.” ³³ Aíyaka Yasumo Pita soko, Yamese soko, Yone soko, karikia puraka, Yasu ipi kára himu nekea, mahisiraka sesenafaraka reapo. ³⁴ Ayíáka reke Yasumo iaki someraka, “Ano himu kára nekea mahisiraka reke, ano kukusireapo. Asiamo re wo toae. Re wakakopo,” aísapo.

³⁵ Aíyaka someaka marekea Yasu ipi wakasema pukua, uakapekea hikumisimo hauaka nanireke kurikuriraka, eaki makata umisane mafahoasimo kurikurisapo. ³⁶ Kurikuriraka

someraka, “Atao, nōmo makata su rakiane sianapo. Asiamo nōmo makata umisa anoaki makasane siasekenone makata umisane nōmo metakarisie, aíyaka nōmo hemakapurakaripo. Asiāne nōmo hemakapusua aeyaka ayiakakopo. Nōmo hemakapusua aeyaka ayiakanie.”

³⁷ Aíyaka Yasumo kurikuriraka faraka, aporo hakāsa pura isiane toakipoko peraka aseane, i wakakesekeno asesapo. Asekea i maturikia Pitaki someraka, “Saemoneo,[‡] ne maiya hi awa hakásamo asekea reafareapo. ³⁸ Reaki aporo metamo mokopipirakano, repo watikiaka rakipe purapaka, turikia pukua reke kurikurihoanie. Wakakopo. Repo himumo koteaka hemakapukua kurikurihoko sesesa nine, kaum yoferaka wakakosapo,” áisapo.

³⁹ Aíyaka Yasu efera hunia wakasema pukua kurikuriraka, fana kurikurisa hakāsa yaiya kurikurisapo. ⁴⁰ Kurikuriraka faraka, aporo hakāsa pura toakipoko peraka aseane, i su wakakesekeno asesapo. Arirakano i waka keako hi kumikia nekenekeraka kakaro wakakesapo. Wakakesakipoko, epo iane maturikia taeraka somerakano, ipu Yasuaki some paripukusane kakaro kára mahimetesapo.

⁴¹ Yape isiamo Yasu pukua pariperaka iaki someraka, “Re yaiya wakakesare? Wakakesane yaiya wakakeanie. Kurikurihokosa maiyane fasapo. Aporomanomo Táke anoane parakeraka aporo watikisamo ano waseremakosa maiyane pipu maya yuyapo. ⁴² Re su takahisie. Takahikia isu purakapo. Aporomo ano parakehokosane apere,” aisapo.

Yasu aporomo waseremasane oyapo.

Matiu 26:47-56; Ruki 22:47-53; Yone 18:2-12

⁴³ Yasumo somesa maiya yiamo aporo hakāsa pura meta yano motosa Yutase peraka eyaki aporo yakai hakāsa pesapo. Aporo pesane aporo metakiramo poke mokoa pekea, aporo metakiramo ira rokopa mokoa pekea, arirakano aporo metakiramo ferepe mokoa pesapo. Aporo pesane pirisiti aporo káramo soko, Kotimo somemané tisa aporomo soko, Yu aporo sisimamo soko, iane pusierakano pesapo. ⁴⁴ Aporoane peasiraka parakena aporo Yutasemo fana someraka, “Aporo nōmo makanurakano aporo ayapo. Eane waseremaka karikia punie.”

⁴⁵ Aíyaka marekea Yasu rea Yutase ereketae pekea someraka, “Tisao,” aíyaka epo Yasuane makanusapo. ⁴⁶ Makanurakano aporo suamo Yasuane waseremasapo.

⁴⁷ Waseremarakano ipi aporo hakāsa pura meta makeraka reamo epo ferepe teaka maka, pirisiti aporo fanamo aporo raipa senaki ferepemo rukusakaretapisiapo.

⁴⁸ Rukusakaretapirakano Yasumo iaki someraka, “Repo ferepe mokoa pekea, poke mokoa pekea, ano waseremako aperane ano hakimara aporore? ⁴⁹ Maiya suamo Kotimo apea isina hakāsa risike nōmo some karakano repo ano waseremarakasufapo. Asiāne Kotimo sawia poparaka ayiakakosaposane fasere apera oyareapo.”

⁵⁰ Airakano aporo hakāsa pura suamo Yasu metakarikia teketarisiapo. ⁵¹ Arirakano hokosa raua ipi pasu pakaesa osoraka, ipi Yasu fana pusuakipoko, e kesekea pusuapo. Pusuane aporo metakiramo e waseremarakano asekea ⁵² hokosa raua[§] ipi pasu pakae-sane metakarikia patera yase takaripusuapo.

Pirisiti aporo Kaiafase rea á Yasu karikia pusuane oyapo.

Matiu 26:57-68; Ruki 22:54-71; Yone 18:13-24

⁵³ Aporomo Yasu karikia pukua pirisiti aporo káramo apea, karikia pukua aseane, apea pirisiti aporo fanane soko, Yu aporo sisima soko, Kotimo somemané tisa aporo soko, sarimaraka tokeno asesapo. ⁵⁴ Yasu karikia purakano, Pitamo wakasema yamenoa kekemarape pusuapo. Kekemarape puraka pirisiti aporo fanamo ape hauaka moroa pauraka, aporo terakaiyamosa toakipoko Pita soko kayapo. Ira paisiakipoko Pita ira haka kayapo.

[‡] 14:37: Saemone yano motosa kepoane konakamopo. Konakomoane atifomo mahohonapo. Pita yano motosa kepoane ekepo. Ekeane atifomo mahohorafapo. [§] 14:52: Hokosa raua ane Maka ipipo, aíyaka aporo yakaimo hemakapusuapo.

⁵⁵ Kayakipoko pirisiti aporo káramo soko, Kotimo somemane tisa aporomo soko, Yu aporo sisimamo soko, ipu aporo metakiraki peaesapo. Aporoamo Yasuaki hukurukua topakamaraka somehoko peaesapo. Ipu hemakapuraka, “Aporo metakiramo Yasu hukurakano Yasu fanasiraka rusua kukusapo,” Aíyaka aporomo topakamaraka somehoko ipu kosapo. Asiāne ipu hukurukusane siahosifareapo, aisapo. ⁵⁶ Aporo yakaimo topakamaraka somesa nine ipu some hakásá somesa ayafapo. Aporo metakiramo some meta topakamaraka some, arirakano aporo metakiramo soko, some meta topakamaraka some ayiáka some kekepo somepe pusuapo.

⁵⁷ Somepe purakano aporo metakira takahikia kotafe hukurukua someraka, ⁵⁸ “Isiapo kaisiane oyapo. Epo someraka, ‘Kotimo apeane aporomo hokonomo kisiane nōmo rakaritaeraka, sere isia faraka Kotimo ape metane nōmo kiakosapo. Ape kiakosane aporomo hokonomo kinafonoraka, nōmo hemakapusua kiakosapo,’ aíyaka somerakasuane isiapo kaisiapo.” ⁵⁹ Aíyaka somesa nine, ipu somesa hakásá somesa ayafapo. Some kekepo kekepoaka somesapo. ⁶⁰ Someraka risina pirisiti aporo fana takahikia Yasuaki someraka, “Neaki makata hukuruuarurane nōmo yakapa some paripukusare?”

⁶¹ Airakano Yasumo ipi makata somesafapo. Somehoanafonoraka rekeno pirisiti aporo fanamo someraka, “Unihae máfaraka maresa Keresoane nére? Kotimo hokosane nere?”

⁶² Airakano Yasumo someraka, “Nōmo airaka ane anopo. Nōmo aseane Apromanomo Táke anoane Koti ipi wakapumo hokono tumuru takua ano kakeno repo aseakosapo. Hepene aeyaka ako faesayaki ano perakano repo aseakosapo,” aisapo.

⁶³ Airakano pirisiti aporo fanamo kaikia saperaka ipi pasu ososane makoaraka someraka, “E hukuruko aporo meta peahokosafapo. ⁶⁴ Epo ipi yiamo someraka Kotiane soko, eane soko, tati hakásá yiyareapo, airakae. Airakane repo hemakapusue yakapare? Isiapo Yasuane mayiakakosare?” airakano ipu someraka, “E Koti tati siasapo airakano e rusua kukunie.” ⁶⁵ Airakano aporo metakiramo Yasuane torofaeraka, arirakano aporo metakiramo Yasu hia pasumo taporaka e ruraka someraka, “Ne arurane epamo rurakarire? E yano hosie.” Airakano pirisiti aporo káramo aporo terakaiyamosamo ipu hokonomo e ruraka risiapo.

Pitamo someraka, “Yasuane nōmo aserafapo.” aíyaka kotafe somesane oyapo.

Matiu 26:69-75; Ruki 22:56-62; Yone 18:15-18, 25-27

⁶⁶ Yasu hukurusua maiya amo, hauaka moroa Pita kakeno pirisiti aporo fanamo hinamo raipa hakásá meta peraka aseane, ⁶⁷ Pita ira paisia á ira haraka kakeno asekea, hinamoamo someraka, “Nasare aporo Yasuyaki hakásá purane nereapo.” ⁶⁸ Airakano Pitamo waeraka someraka, “Nōmo somerakane ano himeteripo. Ano eyaki hakásá purafapo.” Aíyaka Pita takahikia pukua ikia koroa pusuapo.

⁶⁹ Pukua rekeno kokorokomo mesapo. Hinamo raipamo e aseraka, efera hunia aporo suamo kaiyisimo someraka, “Aporoane Yasuyaki hakásá pusuapo.” ⁷⁰ Airakano efera hunia Pitamo waesapo. Waeraka wakasema kaina, aporo makéraka risiamon Pitaki someraka, “Nōmo mehoane Kariri aporomo meane somerakae. Asiamo né Kariri aporopo. Ne Yasuyaki hakásá purareapo.” ⁷¹ Airakano Pitamo ekeneaka aumaraka someraka, “Yasuane nōmo aserafapo. Nōmo kotafe somerakano soko Kotimo ipi ano fanasihokosapo.”

⁷² Aihoanine yape tetámo mena kokorokomo mesapo. Merakano kaikia Yasumo some kasane Pitamo ipi hemakapusuapo. Arirakano fana Yasumo someraka, “Mena kokoroko yape tetá mehoasiraka, nōmo yape isiamon ‘Yasuane nōmo aserafapo,’ aihokosapo,” aisane Pitamo kára hemakapusua himu nekea hiripusapo.

Pairate rea Yasu karikia pusuane oyapo.

Matiu 27:1-2, 11-14; Ruki 23:1-5; Yone 18:28-38

¹ Mituru fiarakano pirisiti aporo kára soko, Yu aporo sisima soko, Kotimo somemane tisa aporo soko, i su Kanisoro aporoane sarimaraka Yasu rusua kukusane me rukua

somesapo. Someaka faraka Yasu sakomo taporaka marekea, Rome aporo ipi yano motosa Pairate rea Yasu karikia pusuapo.

² Pairatemo Yasuaki someraka, “Yu aporomo unihaeane nere?” Airakano Yasumo someraka, “Ao, nómó someraka ayapo.” ³ Airakano pirisiti aporo káramo Yasuane hokoréraka kotafe topakamaraka somesapo. ⁴ Asiamo efera hunia Pairatemo Yasuaki someraka, “Ipu makata kára hukuarurane nómó kairakarie? Nómó some paripeakosare?” ⁵ Airakano Yasumo makata somesafapo. Somehoanafonoraka me kaurakano asekea Pairatemo hemakapuraka, “Manakano me kaunaka rekenarakapo,” aíyaka hemakapusuapo.

“Yasu rusua kukunie,” aisane oyapo.

Matiu 27:15-26; Ruki 23:17-25; Yone 18:39-40

⁶⁻⁸ Fana aporo metakiramo Rome kamaniyaki wesa maiya amo aporo metakirane rusua kusuapo. Aporo hakásá ipi yano motosa Parápasepo. Parápasemo aporo meta rusua kusuapo. Rusua kurakano asekea e tipura makesapo. Tipura reakipoko aporo yakaimo Pairateaki someraka, “Ape Farimaresa Hemakapuko Hokono Akera maiya amo tipura makesa aporo hakásá meta isiapo hemakapusua aeyaka tonotaerasie, airakano nómó tonotaenapo. Keremisi suamo anapo. Pipu ayiakakosakipoko aporo hakásá tonotaehoanie,” aísapo.

⁹⁻¹⁰ Airakano Pairatemo hemakapuraka, “Pirisiti aporo káramo Yasuaki kakanakeraka hemakapusuasamo, e hukurusimo karikia pekea a risie.” Aíyaka Pairatemo hemakapuraka epo iaki someraka, “Yu aporo unihaeane tonotaehokosare?” ¹¹ Airakano pirisiti aporo káramo aporo su sarimasaki hokokeke someraka, “Parápase tonotaerasie, aísie.” Airakano ipu suamo wáraka, “Parápase tonotaerasie,” aíyaka ipu sakepamo wásapo.

¹² Airakano Pairatemo iaki someraka, “Repo Yu aporomo unihaeane mayiakaere?”

¹³ Airakano ipu sakepamo wáraka, “E ira matopesa paremarekea rusua kukunie,” aisapo.

¹⁴ Airakano Pairatemo someraka, “Marirakano e rusua kukunierakanare? Epo watikiaka makata yakapa rakisiare?” Airakano ipu efera hunia sakepamo wáraka, “E ira matopesa paremarekea rusua kukunie.” ¹⁵ Airakano aporo yakai ane masesehoasimo, Pairatemo ipu someane kekemaraka Parápase tonotaeraka, Yasuane matia sakomo rusie, aisapo. Rurakano asekea someraka, “Yasu ira matopesa paremareako karikia pusie,” aísapo.

Yasuane ame aporomo mainamaresane oyapo.

Matiu 27:27-31; Yone 19:2-3

¹⁶ Ame aporo peraka Yasuane kamanimo ape kára á karikia pusuapo. Karikia pukua ape kára á pauraka, ame aporo su sarimahoko peaesapo. ¹⁷ Perakano asekea, ipu Yasuane pasu susa osoraka marekea, mainamareraka, sako keta risia hati pariraka rakiakosakipoko, kita apera ayíáka pekea weroraka rakisiapo. Rakisiane Yasu wamoa karotapsiapo.

¹⁸ Ayíáka eane mahokopariraka unihaeapo, aíyaka hemakapukua eaki suruturaka someraka, “Yu aporomo unihaeo. Ne aporo kárapo.” ¹⁹ Aíyaka Yasu wamoa kepayiamo rukua, Yasu kaua torofaeraka, eane maunihaeraka sikiraka, pekea kakuna porokoa kake, ipu Yasuaki kotafe kekeresapo. ²⁰ Ayíáka mainamarekea faraka, pasu susa kau rakisiane horomaka, epo ipi pasuane osoraka marekea ira matopesa paremareako karikia pusuapo.

Yasu ira matopesa paremaresane oyapo.

Matiu 27:31-44; Ruki 23:26-43; Yone 19:17-27

²¹ Yasu ira matopesa paremareako karikia puraka aseane, ikia kara á aporo hakásá meta ipi yano motosa Saemone, Sairíni taone aeyaka Yarusarame sitia perakano asesapo. Arirakano Saemonemo hokosa tetá, meta Arekesáta, meta Rúfase, aíyaka yano motosapo. Asiamo ame aporomo Saemoneaki someraka, ira matopesane maka pusiesapo. ²² Aíyaka ipu Yasu karikia pukua Kokóta hauaka á pausapo. Arirakano Kokóta hauakane namo meaka Uni Kiki hauakapo. ²³ Kokóta hauaka á pauraka risike Yasu kau kára tenapaka waene he munamuna asíayaki sarimaraka kekeroraka Yasumo nasimo kasapo. Karakano Yasumo nesafapo.

²⁴ Arirakano ame aporomo Yasuane ira paremaresapo. Paremarekea maporaka marekea, Yasumo pasuane parakuraka mokoakosakipoko ipu kase enana ayíáka enasapo. ²⁵ Mituru maiya hi naene korokomo ipu Yasuane ira matopesa paremaresapo. ²⁶ Paremarekea Yasu uni kima yapura e ipi hukurusuane ira tumusakipoko poparaka úyaka popasapo. “Yu aporomo Unihaeane epo.” Aíyaka poparaka paremaresapo. ²⁷ Arirakano hakimora aporo tetá Yasuyaki hakása ira tetá meta paremurisiapo. Paremuriraka meta Yasu hokono tumuru takua paremarekea maporaka, meta Yasu hokono kasakai takua paremarekea maporaka asiapo.

²⁸ [Wate fana Yasu peasiraka Kotimo sawia popasane oyapo. “Makata watikiaka rakira aporo akiyaki eane hakása ninesapo.” Aíyaka Kotimo sawia popahoareapo. Popasa hakása nine faserepesa ayareapo. *(Aisaia 53:12)*]

²⁹ Arirakano Yasu ira paremaresa makeraka aporo metakira pukua, eaki mainamareraka siráraka unia rokoraka someraka, “Sirá, nómo fana someraka, ‘Kotimo ape rarakitaeraka, yape isia faraka efera hunia kikimakosapo,’ airakasupo. ³⁰ Aisasamo ní via ararerasie. Ira matopesa paremaresane metakarikia o peae,” áisapo.

³¹ Aíyaka pirisiti aporomo soko, Kotimo somemane tisa aporomo soko, ipu namina susu Yasuaki ayíáka mainamaresapo. Mainamareraka someraka, “Yasumo aporo metakirane araresapo. Araresa ayíáka e ipi nine ayíáka ararehoasifareapo. ³² E ipi kakaro Keresomo rakirane rakira satiki, ane Isiraya aporo amo unihae ane e ipi satiki, e ira matopesa paremaresane metakarikia peafunureapo. Perakano aseraka epo ipi somesane kakaro somehoareapo aihoafunupo.” Aíyaka ipu Yasu mainamareraka risiapo. Arirakano Yasuyaki hakása paremaresa aporoamo soko Yasuane mainamareraka somesapo.

Yasu kusuane oyapo.

Matiu 27:45-56; Ruki 23:44-49; Yone 19:28-30

³³ Hauaka sua sere tuaro (12) korokomo kepomarekea eresapo. Ereraka reke maiya hi awa isia amo ereraka reapo. ³⁴ Nina samapu maiya hi isia fahoko makeanamo Yasumo Yu aporo meaka sakepamo wáraka, “Irae, irae, rama sapakatani.” Aíyaka namo meaka someraka, “Nómo Kotio. Nómo Kotio. Nómo ano marirakano metakarirakanare?” áisapo. ³⁵ Airakano kaikia aporo metakira makeraka risiamo someraka, “Kaisie. Ipi Iraíyaki warakae.”

³⁶ Airakano aporo hakása meta foaka pukua he watera asía he kisa á kokomarekea fo-fako turua tapomarekea, Yasumo nasimo makama yapurasapo. Makama yapuraraka epo someraka, “Harufapo. Porofete aporo Iraíyamo Yasuane fataritaehoko perakarihoamo, isu yu kau risikipo.” ³⁷ Airakano aseane Yasumo sakepamo wásá yiamo Yasu ipi himu kikiraka kakaro himu rumaka kusekeno asesapo.

³⁸ Arirakano Kotimo apea pasu waremaresane* yapunaka koarape atura pusuapo. Koaraka taku haku, taku hakusapo. ³⁹ Arirakano ame aporo satini ipi Yasu hikumisi erekea reke aseane Yasu kurakano asekea someraka, “Nómo kakaro somerakaripo. Aporoane kakaro Kotimo ipi hokosapo,” aíyaka epo somesapo.

⁴⁰ Arirakano hauaka wakasema tame yia hinamo metakira soko asekea toapo. Asekea toa hinamo ane meta Makatara hinamo Mariapo. Arirakano meta Maria, Yamesepe Yosefe tetapó kaiyiapo. Arirakano meta hinamo Sarómepo. ⁴¹ Arirakano fana Yasu Kariri hauaka pusua maiya ámo, hinamo isiane eyaki hakása pukua, eane makata nakosa paikia kasapo. Arirakano Yasu Yarusarame sitia pesa maiya amo, eyaki hakása pesa hinamo metakiramo soko, hemakapukua asekea toapo.

Yasu kunikia motosane oyapo.

Matiu 27:57-61; Ruki 23:50-56; Yone 19:38-42

* 15:38: Kotimo ape tuane sape hakása aporomo asekohoamo yaporaka makikisiraka pasu waremaresapo. Pasu waremaresa ane koarape atura pusuapo.

⁴²⁻⁴³ Arimatía aporo Yosefeane ipi Ferese aporoyaki Kotimo somemané tisa aporo akiyaki hakāsa sarimaraka makata rakisiapo. Makata rakiraka ipi yano motosane kárasapo. Arirakano Kotimo unihaeaka asekea rekeakosa maiya ane faserepeasimo Yosefe kau reapo. Epo hemakapuraka, “Pipu samapu maiya tuakeramo rau fenena maiyane kepomareakosapo. Kepomareakosasamo fenakosakipoko yumo makata su mokoa sarimarakanapo.” Aiyaka hemakapukua ipi karekekeka namonafaraka Pairate rea pukua someraka, “Yasu kusuane kunikia motoako nōmo maka puaere?”

⁴⁴ Airakano Pairatemo ipi himumo hemakapuraka, “Yasu kakaro kusuare?” Aiyaka epo ame aporo satiniaki peaesapo. Perakano asekea Pairatemo eaki someraka, “Yasu kakaro kusuare?” ⁴⁵ Airakano satinimo someraka, “Ao, kakaro kusuapo.” Airakano kaikia Pairatemo Yosefeaki someraka, “Yasu kusuane nōmo maka puane siahosireapo,” aisapo.

⁴⁶ Airakano Yosefe pukua pasu pakae kotesa roporaka maka, Yasu ira paremare-sane fatarimaka, maka pukua, pasu pakae kotesa roposa amo Yasu taporaka maka pukua, eke kunikia fana rasa á Yasu motosapo. Motokoa marekea, kunikia kakaru mapiriakosakipoko, eke kára tafeasa keperemarape pukua, kunikia kakarua mapirisapo.

⁴⁷ Mapirirakano Makatara hinamo Maria soko, Yosefemo kaīyia Maria soko, tetapō Yasuane kunikia motorakano asesapo.

16

Yasu maturikia taesane oyapo.

Matiu 28:1-8; Ruki 24:1-12; Yone 20:1-10

¹ Fenena maiya farakano Makatara hinamo Maria soko, Yamesemo kaīyia Mariane soko, Saróme soko, ipu Yasu kaua wera wape yamona rekemareako werane roposapo.

² Fenena maiyane faraka, sokō kawe kepoamarera maiya amo* mituru fiaraka, maiya kawe ropaka aheramo hinamo isiane Yasu kunikia motosa á aseko pusuapo. ³ Puraka risike, hinamo isia amo namina susu someraka, “Eke kunikia mapirisiane epamo isupoko kepere mafearaka ropakataehoanare?” ⁴ Aiyaka hemakapupe pukua aseane, eke tafea kára ane kepere mafeasa yao takua hererekeno asesapo.

⁵ Asekea hinamo isia ane kunikia kakarua yorokoa aseane, hepene aporo raua pasu pakaesa osoraka, hokono tumuru takua kakeno asekea hinamo isia ane fofasapo.

⁶ Fofarakano epo iaki someraka, “Fofahokopo. Nasare aporo Yasu ira matopesa pare-marekea rusua kusuane, repo aseko apere. E maturikia taerakano turikia pusuapo. E wo warekenafapo. E kau motosa fasane aseko peae. ⁷ Asiamo ipi aporo hakāsa puraki soko, Pitaki soko repo somehoko pusie. Yasu fana Kariri hauaka á pukua reakipoko re kesekeia peraka, Kariri hauaka á repo e asekosapo. E kukusiraka epo fana some kasa hakāsa nine ayiakakosapo.” ⁸ Aiyaka hepene aporo rauamo somerakano, hinamo isia amo kunikia ane metakarikia, foforaka puraka, hamisisiraka himu faraka pusuapo. Puraka risike namoraka aporo hinamo metakiraki makata meta somesafapo.

Aporo hinamomo e asekeasimo Yasu pesane oyapo.

Matiu 28:9-10; Ruki 24:10-11; Yone 20:14-18

⁹ [Yatipinu sere amo Yasu turikia pukua aporo hinamo metakiramo e asekeasimo e pesapo. Makatara hinamo Maria fana yatafu yatipinusumo e ho masa, Yasumo yatafu pusierakano, yatafu pusuapo. Hinamo Maria amo e asekeasimo e rea Yasu faserepesapo.

¹⁰ Fasereperakano hinamoamo e asesapo. Asekea pukua Yasumo aporo hakāsa pura i risiakipoko hinamoane pausapo. Pauraka ipi aseane ipu Yasupoko himu nekea kára hihiripurakano asesapo. Asekea, hinamoamo iaki someraka, “Yasu turikia pusikenō nōmo aserakayiapo.” ¹¹ Airakano ipu kaikia yia kakarorakae, aiyaka hemakapusuafapo.

¹² Arirakano aporo tetá Yarusarame siti metakarikia yaoa purakano, tetapō e asekeasimo Yasu ipi kau hakusa pesapo. Perakano tetapō e asesapo. ¹³ Asekea, tetá

* 16:2: Yu aporomo sokō kepoamarera sereane isiapo yatipinupo, airapo.

Yarusarame sitia poparipuraka aporo hakāsa puraki Yasu asesane tetapō somesapo. Somerakano ipu kakimasafapo.

¹⁴ Keseke aporo hakāsa pura kinusu teporoa tokeno, asekea ipu e asekeasimo Yasu i toa pesapo. Asiamo aporo hinamo metakiramo Yasu maturikia taesane asesapo aisane, ipu kakimakanafonosasamo Yasumo iaki someraka, “Re masiare? Repo kakimako hisinane manakanonare?” aisapo.

¹⁵ Aíyaka Yasumo efera hunia iaki someraka, “Hauaka sua re pukua, aporo hinamo suaki ano hemakapusimo, some kotesane some kakanie. ¹⁶ Some karakano aporo hinamo metakiramo kakimaka, i hea tapukumurirakano, i Kotiyaki yaiya risikiasimo, Kotimo i mafasikia pasimakosapo. Arirakano aporo hinamomo kakimakanafonorakano Kotimo iane fanasihokosapo.

¹⁷ Arirakano kakimara aporo hinamoaki Kotimo wakapu kakakosane oyapo. Anoaki himu hakásaraka hemakapukua, nōmo yano motosane wakapusasamo, ano yano hokoa yatafu pusierakano pukusapo. Arirakano Kotimo wakapuyaki me meta, repo fana kaiyanafonona meane somehokosapo. ¹⁸ Arirakano Kotimo wakapu meta kakakosane oyapo. Heseke ane hokonomo meraruamo masa nine, hesekemo nesa kukusafapo. Arirakano Kotimo wakapu meta kakakosane oyapo. Aporomo he hawai nenakano makata takamakosafapo. Arirakano Kotimo wakapu meta kakakosane oyapo. Kakimara aporo hinamomo hokonomo aporo hinamo makata tasane sakairakano, i makata tasane fahokosapo.” Aíyaka Kotimo wakapu kakakosaposane Yasumo iaki somesapo.

Yasu hepene yapura hisiane oyapo.

¹⁹ Unihae Yasumo iaki makata someaka farakano, e hepene yapunaka Kotimo pasimasapo. Pasimasasamo e Kotimo hokono tumuru takua rekenapo. ²⁰ Arirakano aporo hakāsa purane pukua, Yasumo someane hauaka sua aporo hinamo suaki some kasapo. Ipu some karakano Unihae Yasumo iane araresapo. Ipu Kotimo wakapumo hemakapukua rakisimo, Unihae Yasumo iane arareraka wakapuane iaki kasapo. Asiamo ipu wakapuaka rakirakano, aporo hinamo suamo asekea hemakapuraka, “Kotimo iaki wakapu kasasamo Kotimo someane ipu some akarane, kakaro somereapo,” aíyaka hemakapurapo.]

Ruki Ruki sawi one mahemakapukusa someane oyapo.

Ruki Yasumo ipi aporo hakāsa pura rakisimo murikimasafapo. Rukiane Kiriki aporopo. E Yu aporofapo. Fana e mitikororaka rakiraka reapo. Rukimo Yasuane aserafapo. Asiāne ipi Yasuaki himu hakásaraka hemakapusuapo. Yu aporo hoanafonosamo Yasuaki himu hakásaraka hemakapusimo Rukimo kára hemakapukua, ipi aporo tákē Tioforaseaki sawi one popasapo.

Yasuane Rukimo asekeanafonosa nine ipi wafororaka kokoa hemakapukua sawi one popasapo. Arirakano aporo hinamo metakiramo Yasuane himo soko asekea, arirakano makata epo ainane soko rakirakan asekea, ayíáka risiakipoko, Ruki pekea aporoaki Yasumo makata rakirane epo akai kaikia koraka reapo. Asiamo Rukimo popasa one kakaro someane popasapo.

Keseke maiya metamo Ruki ipi Poreyaki hakāsa kimisi pusuapo. Arirakano keseke tarira aporomo rakirane epo hemakapukua, ayíáka epo sawi meta poparaka Tiaforaseaki makesapo.

Ruki sawia some kepo parakuraka popasane oyapo.

1:1-4 Rukimo Tiaforaseaki some wakasema somesapo.

1:5-38 Yone soko, Yasu soko, takapeakosane hepene aporomo somesapo.

1:39-56 Irísapeteane Mariamo aseako hisiapo.

1:57-80 Yone he tapukumarerane takapesapo.

2:1-40 Yasu takapesapo.

2:41-52 Yasu hokosa raua rea someane popasapo.

3:1-22 Yone he tapukumareramo makata rakisiapo.

3:23-38 Yasuane Yosefemo aporo ira á paoraka reapo.

4:1-13 Satanemo Yasuane kau aseako pesapo.

4:14-9:50 Yasu kariri hauaka reke makata rakiraka reapo.

9:51-19:27 Yasu Yarusarame sitia pukua reke makata rakiraka reamo takume some metakirane some kasapo.

19:28-23:56 Yasu ipi kukusa maiya makeanamo makata metakira haku faserepepesapo.
Asiamo Yasuane rusua kusuapo.

24:1-53 Yasu turikia pusuane aporo hinamo metakiramo asesapo.

Rukimo Tiaforaseaki sawi poparaka makesane oyapo.

¹ Tiaforaseo, né aporo kárapo. Nōmo neane hemakapuraka, sawi one poparaka makerakanapo. Isu arisia wo Kotimo makata ayiakakosaposane faserepesapo. Makata faserepesane^{*} aporo metakiramo asekea sawia popasapo. ² Makata faserepesane kepo-maresa maiya amo aporo metakiramo asesapo. Makata asesane ipu kakama somesapo. Asiamo aporo amo Kotimo someane some kasapo. Ipu some kasane isuaki soko some kasapo. Somerakano isiapo kaisiapo. Arirakano some hakāsa nine aporo metakiramo soko sawia popasapo. ³ Asiamo, Tiaforase, nōmo koteaka hemakapusimo some kepoane nōmo koteaka kokoa, makata faserepesane kepomaresa aeyaka, kekemarape pekea, pipu wo pauraka, nōmo kokoa asekea neaki ereketaeraka poparakanapo. ⁴ Asiamo aporo metakiramo neaki some karakano someane nōmo kaisiapo. Someane nōmo kaikia kakarorakae, aíyaka hemakapusimo, nōmo néaki sawi one poparaka makerakanapo.

Yone he tapukumarerane takapesane oyapo.

⁵ Yutía hauaka Herote unihaeaka rea maiya amo, pirisiti aporo hakasa meta reane, ipi yano motosa Sekaráyapo. Arirakano pirisiti aporo suane parakuraka, aporo ira meta yano motoraka Apáisa aíyaka yano motosapo. Aíyaka pirisiti aporo ira yano

* 1:1: Makata faserepesane Yasu hauaka wo pesa ayapo.

motosa Apaísá á Sekaráya ipi soko hakásá paoraka reke, pirisiti aporomo rakirane rakiraka reapo. Arirakano epo hinamo arumasane Eronemo aporo ira hinamoane arumasapo. Epo hinamoane yano motosa Irísapetepo.⁶ Arirakano Kotimo hikumisia Sekaráyape Irísapete tetā koteaka ereketae risiapo. Koteaka ereketaeraka risike, Unihae Kotimo somemaneane tetapō kakaro kekemasapo. Somemane hakásá meta soko tetapō metakarisiafapo.⁷ Metakarianafonoraka risike yia, Irísapete manokonomoraka, epo hokosa hokono maresafapo. Hokosa hokono mareanafonoraka risike teta tati sisimasapo.

⁸ Arirakano maiya hakásá metamo, Apaisa aporo ira anaka pirisiti aporomo makata rakira maiya amo, Sekaráya ane murikimaka Kotimo asekeasimo kakama rakisiapo. ⁹ Aiyáka rakiraka pirisiti aporo hakásá metamo makata wape yamonane paiyakosakipoko, pirisiti aporo su yano taesane poparaka taeraka hakásá meta masapo. Maka aseane, Sekaráya ipi yano motosane popasekeno asekea e murikimasapo. Murikimarakano Sekaráyane Kotimo ape kakarua yorokoa hikia makata wape yamonane paisiapo. ¹⁰ Pairaka rea maiya amo, Yu aporo hinamo yakai hauaka moroa risike kurikurisapo.

¹¹ Ipu kurikuriraka risikino Sekaráyamo makata wape yamona teboro asia maresa kima yapura makata pairaka reke aseane, hokono tumuru taku aeyaka, Unihae Kotimo hepene aporo pekea rekeno asesapo. ¹² Asekea himu faraka namosapo. ¹³ Namorakano hepene aporomo someraka, “Sekaráyao, né namohokopo. Nómó kurikurisane Kotimo kaisiapo. Kaisiasamo nómó hinamomo aporo hokosa hokono mareakosapo. Nómó aporo hokosa hokono marerakano, Yone yano motoanie. ¹⁴ Hokosa aki nómó kára sesehokosapo. Ipi taka apera maiya amo aporo hinamo metakiramo soko e asekea kara sesehokosapo. ¹⁵ Aiyáka repo asekea seserakano, Unihae Kotimo soko hokosa ane ipi yano motosa makárahokosapo. Arirakano nómó hokosamo waene he soko, he watikisane soko neane siahoasifareapo. Ipi kaýiamo tua kaya maiya amo, Ho Kotesane e himua marerakano, Ho Kotesa eyaki yaiya káraraka rekeakosapo. ¹⁶ Arirakano Isiraya aporo hinamomo Unihae Koti metakarisiane efera hunia risikiako parihoasimo epo iane ararehokosapo. ¹⁷ Unihae peasiraka e fana peakosapo. Pekea Ho Kotesamo wakapuamo Iraíyane araresa ayíáka, Ho Kotesamo wakapuamo eane soko ararehokosapo. Ararerakano hokosa wafayamo ipi hokosaki hisiraka rekeno, tetápo koteaka hemakapusimo, epo maropohokosapo. Arirakano ereketae aina aporo koteaka ereketaeraka hemaka apura ayíáka Kotimo someane koarellaena aporomo ayíáka hemakapusimo, epo maropohokosapo. Arirakano Unihae keseke peasimo, aporo hinamomo makata watikisane, epo fana maropohokosapo.” Aisapo.

¹⁸ Aíyaka hepene aporomo somerakano Sekaráyamo hepene aporoaki someraka, “Nómó somerakane kakarore? Nómó mayíáka hemakapukusare? Ano soko nómó hinamo soko eto tetákara sisimapo.” ¹⁹ Airakano hepene aporomo someraka, “Ano yano motosa Keiporopo. Ano Kotimo makata rakira hepene aporopo. Ano Koti makeraka reasasamo neaki some kotesa somehoko epo ano pusierakano ano perakayiapo. ²⁰ Hao, nómó kaisie. Pipu nómó neaki some akara one keseke murikimasa sere hakasa yiamo ayiakakosapo. Pipu nómó some akara one nómó kakimakanafonosakipoko né mé faraka rekeakosapo. Ne mé faraka reke, nómó ní someraka, makata aiyakakosapo, aisa maiya ane fasere aperamo, nómó efera hunia somehokosapo.” Aíyaka hepene aporomo somesapo.

²¹ Somesa maiya amo aporo hinamo hauaka moroa risike, Sekaráya peasimo asekea risiane, e peanafonorakano ipu hemakapuraka, “Marirakano Sekaráyane maiya káramo Kotimo apea rekenarakapo.” ²² Aíyaka ipu hemakapurakano, Sekaráya ape kakaru anaka yaoa pariperaka, ipi me fasasamo iaki makata somesafapo. Makata somehoanafonorakano ipu hemakapuraka, “Kotimo apea kituamo asera ayíáka asereapo.” Aíyaka hemakapurakano asekea, e me fasamo hokono susumo rakisiapo.

²³ Arirakano Kotimo apea ipi makata rakirane rakikia faraka ipi apea paripusuapo. ²⁴ Pukua, ipi apea wakasema nina, Irísapete umisapo. Umiraka kake ere maiya kako-reasumo ipi apea kayapo. ²⁵ Apea kake ipi someraka, “Kotimo ano araresapo. Arirakano aporo hinamo metakiramo anoaki someraka, ‘E manokonomosapo.’ Ipu anoaki airakano ano kakaro kara kaiyaraka kayane Kotimo ano arareraka mafasapo.” Aíyaka Irísapetemo somesapo.

“Yasu takapeakosapo.” Aíyaka hepene aporomo Mariaki somesane oyapo.

²⁶ Irísapete umiraka kake ere maiya nama amo hepene aporo meta yano motosa Keiporoaki Kotimo someraka, “Né Kariri hauaka Nasare apea pusie. ²⁷ Pukua, ape á Unihae Tefetemo aporo ira wainepe pesa a Yosefe faserepeke rekenapo. Yosefemo hinamo faisa Mariaki somehoko pusie.” Aisapo. ²⁸ Airakano Maria akaya á hepene aporo peke someraka, “Maria, neyaki Kotimo tau auaraka rerane kakenapo. Kotimo neane kára arareraka makotesasamo seseaka kakanie. Kotiane neyaki hakása rekenapo.”

²⁹ Airakano Mariamo kaikia fofaraka hemakapuraka, “Airakane kepoane yaka-parakapo.” ³⁰ Aíyaka hemakapurakano, hepene aporomo someraka, “Maria, né namohokopo. Kotimo neane arareraka makoterakanapo. ³¹ Né arareraka makoteraka ne hokosa umihokosapo. Umiraka kaina aporo hokosa takapeakosapo. Hokosa takapeakosaposane, takaperakano e Yasu yano motoanie. ³² Ipi yano motosane namo kakaro káraraka rekeakosapo. Yasuane Namo Kakaro Koti Unihae Káramo hokosapo, aporo hinamo suamo aihokosapo. Aíyaka Yasumo ipi makasa kaua kekema Tefete unihaeaka rea ayíáka, e soko unihaeaka rekeasimo Unihae Kotimo e mareakosapo. ³³ Ayíáka marerakano Yakopemo aporo ira wainepe pesa á, e takapekeea unihaeaka yaiya rekeakosapo. Unihaeaka reane fahokosafapo.”

³⁴ Airakano hepene aporoaki Mariamo someraka, “Ano aporoyaki punafonoraka kake yia, mayíáka ano umihokosare?” ³⁵ Airakano hepene aporomo eaki someraka, “Ho Kotesa né akaya á peakosapo. Peraka, Namo Kakaro Koti Káramo wakapuamo ne karotapikia rekeakosapo. Karotapirakano nómo aporo hokosa takapeakosapo. Takapekeea e Kotiyaki paoraka kotesa taku a susu kikisiaka rekeakosapo. Ayíáka rekeno Kotimo someraka, ‘Né, nōmo ní hokosapo,’ aihokosapo. ³⁶ Arirakano makata one soko nómo hemakapunie. Nómo ní aeya, Irísapeteane kakaro sisimaraka kayane, aporo hokosa takapeako umirakanapo. Fana manokonomoraka kayane, pipu yumo ere maiya namasumo umiraka kakenapo. ³⁷ Asiamo Kotimo ipi makata su siaraka rakirapo.” ³⁸ Airakano Mariamo someraka, “Ano Kotimo makata rakira hinamopo. Nómo anoaki ayiakakosaporakane kakaro ayiakanie.” Airakano hepene aporomo e metakarikia hisiapo.

Irísapete kayakipoko Mariamo aseako pusuane oyapo.

³⁹ Maiya amo Maria takahikia Yutía hauaka á, ape ūria kisiakipoko á foaka hisiapo. ⁴⁰ Ayíáka hikia Sekaráyamo apea pauraka, ape tua yorokoa, Irísapeteaki someraka, “Ano né aseako perakayiapo.” ⁴¹ Airakano Irísapetemo kaikia, e hokosa umisa kake, himura mahohorakarakano kaisiapo. Arirakano Ho Kotesa Irísapete tua káraraka rekeno, ⁴² Irísapetemo sakepamo wáraka someraka, “Hinamo suane Kotimo aseraka yia, néane namo kakaro kára arareraka makoterakanapo. Nómo hokosa takapeakosane aporo hinamo suamo eane makararaka kekerehokosapo. ⁴³ Ano hinamo wakasemapo. Ano sesehoasimo nōmo apea, nōmo Unihaemo ama ane pekea a akaye. ⁴⁴ Nómo someraka, ‘Ano né aseako perakayiapo.’ Airakano kaikia, nōmo hokosa tura kake seseraka mahohorakae. ⁴⁵ Arirakano Kotimo makata ayiakakosaposane nōmo kakimaka kakarorakae aisapo. Nómo aisasamo ne kara seseraka kakanie.” Aíyaka Irísapetemo Mariaki somesapo.

Mariamo Kotiaki kekeresane oyapo.

⁴⁶ Mariamo someraka,

“Nōmo himumo hemakapuraka, ‘Unihae ipi kárapo,’ aíyaka hemakapukua kakenapo. ⁴⁷ Kotimo ano mafasisiakipoko, nōmo homo kára seserakanapo. ⁴⁸⁻⁴⁹ Epo makata rakira hinamo wakasema anoane, epo hemakapusuasamo, nōmo himumo hemakapuraka, ‘Unihae ipi kárapo,’ aíyaka nōmo eaki seserakanapo. Unihae Koti Káramo anopoko makata kára rakisiapo. Kara rakisiasamo aporo hinamo pipu arisia omo soko, keseke aporo hinamo wainepe pukusamo soko, ipu suamo anoane someraka, ‘Hinamoane Kotimo makotesapo,’ aihokosapo. Unihae Koti Kárane ipi yano motosa haku kikisiraka kotesa susupo. ⁵⁰ Maiya yumo soko, keseke soko, aporo hinamomo Kotiane makárarakano epo iane kamenakaraka kara ararenapo. ⁵¹ Kotimo ipi wakapuaka makata rakirapo. Arirakano rupiaka makapororaka koaretaena aporoane tekatarikia pusimo Kotimo wakapumo hoaenapo. ⁵² Aporo unihaeaka risiane Kotimo mawakasemanapo. Aporo hokopunafonoraka risiane Kotimo makáranapo. ⁵³ Aporo hinamo makata forokoa risiaki, epo makata kotesa susuane siaraka karápo. Aporo hinamo makata kemo káraraka risiaki, makata kakanafonoraka nena hokono mitiki pusierapo. ⁵⁴⁻⁵⁵ Arirakano Eparahameane soko epo hokosamo hokosa wainepe pusua suane soko Kotimo kamenakasapo. Kamenakasane Kotimo hemakapuraka isiapo makasa kaua kekemaki ayiakakosapo, aisasamo Isiraya aporo hinamo suane epo araresapo. Arirakano Isiraya aporo hinamomo epoko raiparaka rakirapo.”

Aíyaka Mariamo somesapo. ⁵⁶ Aíyaka someaka faraka, Mariane Irísapetemo apea kake, ere maiya isia farakano, ipi apea paripusuapo.

Yone he tapukumarerane takapesane oyapo.

⁵⁷ Arirakano keseke Irísapeteane ipi hokosa takapeakosakipoko hokosa kaiyako heraka kayapo. Kaina ipi aporo hokosa takapesapo. ⁵⁸ Hokosa takaperakano asekea, Irísapete ipi kara seseraka kayapo. Arirakano eane Kotimo kára kamenakaraka araresasamo, Irísapetemo ipi aporo iramo soko, ipi apiamo aporo iramo soko, ipi hinamo ape hakása toamo soko, namina suamo kara sesesapo.

⁵⁹ Hokosa takapesa sereane menorape hikia yape karimo, hokosane kau hahaeraka paterakano, aporo sarimasamo someraka, “Ipi wafayamo yano motosa Sekaráyane yano motoakosapo.” ⁶⁰ Aiyaka yano motoakosapoko asiane ipi kaiyiamo someraka, “Wae, Yone yano motorakanapo.” ⁶¹ Airakano aporoamo someraka, “Nōmo ní aporo ira, Yone yakosa meta reafapo. Ipi wafayamo aporo irane soko, Yone yakosa meta reafapo.” ⁶² Aíyaka ipi wafayaki hokono susumo rakikia kairaka, “Nōmo ní hokosane, epa yano motoakosare?” Aíyaka aseane, Sekaráya ipi senaki tiraka, mé soko fasasamo, hokono susuamo tarisiapo.

⁶³ Tariraka, “Penesoroyaki pepayaki makasie.” Aíyaka tarirakano asekea, penesoro pepayaki eaki kasapo. Kaka aseane, epo poparaka, “Epo yano motosane Yonepo.” Aíyaka poparakano aporo suamo asekea fofasapo. ⁶⁴ Maiya yiamo Sekaráya mé fasane efera hunia koteaka somesapo. Koteaka somerakano ipi Kotiaki kara kekeresapo. ⁶⁵ Kekeresa maiya yiamo aporo hinamo ape hakása risiamo aseraka someraka, “Manakanarakapo. Makata hakuane,” aíyaka somesapo. Someraka, aporo metáki soko, aporo metáki soko, makata su asesane, somepe pukua Yutía aporo metakira ūria risiaki soko, somepe pusuapo.

⁶⁶ Somerakano ipu kaikia, kára hemakapurua fofaraka someraka, “Manoamo keseke mayikanarakapo.” Aíyaka ipu suamo hemakapurua somesapo. Arirakano Unihae Kotimo wakapuane manoakiyaki rekenareapo, aíyaka ipu hemakapusuapo.

Kotimo Sekaráyaki some kasane oyapo.

⁶⁷ Maiya amo Sekaráya ipi himua Ho Kotesa káraraka reke Sekaráyamo Kotimo someane someraka,

⁶⁸ “Isiapo Isiraya aporo hinamomo Koti Unihae Kárane nōmo makárarakaka kekerakanapo. Isu tipura arisia ayíka risiane, isu arareraka tonotaehoko e perakanapo.

⁶⁹ Arirakano Kotimo makata rakira aporoane Tefetepo. Tefetepo aporo ira amo wainepe pesa anaka, pipu yumo epo isuane farimaka rakiakosakipoko fasereperakanapo.

⁷⁰ Wate fana Kotimo porofete aporomo someraka, ⁷¹ ‘Re yunu aporomo rukuhoamo Kotimo mafaihokosapo. Aporomo reaki hisiraka mokoatikirakano Kotimo mafasiakosapo.’ ⁷² Aiyaka porofete aporomo somerakano, isiapo makasa kaua kekemanekotimo kamenakaraka araresapo. ⁷³ Wate fana isiapo makasa kaua kekema Eparahameaki Kotimo someaka masapo. Epo aumaraka someraka, ⁷⁴ ‘Nómo someaka masane kakaro ayiakakosapo. Eparahame, nómo aporo ira wainakosane yunu aporomo rukua fahokohoamo nómo mafaihokosapo. Mafairaka nómo aporo ira wainakosane namina namonane nómo mafahokosapo. Namonane mafaraka repo anopoko rakisimo nómo ararehokosapo. ⁷⁵ Maiya suamo ereketaeraka risike koteaka susu risikiasimo nómo ararehokosapo.’ Aiyaka Kotimo Eparahameaki somesapo. ⁷⁶ Arirakano nómo hokosa one, Koti Káramo ipi porofete apororaka rekeakosapo. Epo Unihaepoko epo ikia kára fana maroporape pukusapo. ⁷⁷ Puraka isu Yu aporo hinamo suaki someraka, ‘Keseke aporo meta aperamo re mafasiakosapo. Mafasikia repo himu watikisane epo mafahokosapo.’ Aiyaka hokosa omo some kakakosapo. ⁷⁸ Arirakano Kotimo isupoko kára hemakapukua kamenakarakanapo. Hepene yapunaka faesane isu risia wo peakosapo. ⁷⁹ Aporo katoraka risiaki faesane kakakosapo. Arirakano aporo kukuko makeraka risiane, faesamo kokoa aseakosapo. Isu auaraka risikiasimo ikia kara kotesa á pusimo epo tariakosapo.”

Aiyaka Sekaráyamo some kasapo. ⁸⁰ Arirakano Yoneane ipi sisimaraka hokosa raua reke koteaka hemakapukua reapo. Reke ipi hoane soko koteaka wakapuaka reapo. Isiraya aporo hinamoaki some kakako pusiraka, fana ipi ima yaoa reapo.

2

Yasu takapesane oyapo.

Matiu 1:18-25

¹ Maiya amo Rome aporo hinamo suamo kamani unihae kárane, epo ipi yano motosa Sisa Okásatasepo. Epo Yu aporo hinamo soko i suane, unihaeaka asekea reapo. Aporo hinamo su yano motosa popahokosakipoko epo someraka, “Re su namina apea punie.” Aisapo. ² Aisa maiya amo aporo hinamo su yano motosa kamanimo popanane kepomaresapo. Maiya amo kamani aporo Kuiríniasemo Siria hauaka hákasanee asekea reapo. ³ Asekea rea maiya amo aporo su namina apea yano popahoasimo pusuapo.

⁴ Asiamo Yosefe soko, Kariri hauaka, Nasare apeane metakarikia, Yutía hauaka á hisiapo. Petereheme taonea wate fana unihae Tefete takapesa ape á Yosefe hikia, Yosefe ipi Tefetemo aporo ira wainesasamo ipi aporo ira kayakipoko, Petereheme taonea hisiapo. ⁵ Hinaka ipi hinamo faisa Maria umiraka kayane soko, yano motosa popahoasimo tati hakasa hisiapo. ⁶ Hinaka Maria ipi hokosa takapeakosa maiya amo Petereheme taonea kayapo. ⁷ Kimisi peraka wará apeane tapesekeno asekea tetá saro ponoma kaumo apea toapo. Toakipoko ipi hokosa fanane aporo hokosa takapesapo. Takaperakano saro ponoma kaumo asane nasimo kesea taesakipoko, hokosa pasumo taporaka kesea motosapo.

Saro sipi wafayaki hepene aporomo some kasane oyapo.

⁸ Maiya amo Petereheme taoneane makeraka, ereamo, saro sipi wafayamo namina saro sipiane yaoa asekea risiapo. ⁹ Namina ayíáka asekea risike, aseane, Kotimo hepene aporo i risia á peraka Kotimo faesane fasereperaka, kára faerakano asekea i namoraka risiapo. ¹⁰ Namoraka risikino hepene aporomo someraka, “Re namohokopo. Repo sesehoasimo some kotesane nómo reaki some kakakosapo. Someane aporo hinamo suamo kairaka sesehokosapo. ¹¹ Pipu, Tefetemo taone, Petereheme taonea, aporo hokosa takapesa amo aporo hinamo re suane mafasiakosapo. Unihae Keresoane epo. ¹² Asiamo nómo someraka one repo asekea hemakapuraka, kakarohoareapo, aihokosapo. Asiamo re puraka makata aseakosane nómo somerakanapo. Makata aseakosane oyapo. Saro ponoakaumo apea asane nasimo taesakipoko á, hokosa pasumo taporaka motosa warekeno, repo aseakosapo.”

¹³ Airakano hepene aporo yakai metakira soko pekea Kotiaki kekereraka kesasapo.

¹⁴ Kesaraka,

“Koti ipi kárupo. Ipi hepene yapura rekenapo. Hauaka wo aporoane epo aseraka sesenapo. Aporoane auaraka risikiasimo epo makoterakanapo.”

¹⁵ Aíyaka kesaraka faraka i metakarikia hepene yapura poparihihiapo. Poparihinakano saro sipi wafaya namina susu someraka “Makata suane Kotimo isuaki somerakasane isiapo aseako Petereheme taonea purakapo.” ¹⁶ Aíyaka i fofaaka pukua Mariape Yosefe tetā kope pusuapo. Kope pukua tetā asesapo. Asiamo saro ponomakaumo apea asane taesakipoko, hokosa motosa warekeno asesapo. ¹⁷ Aseraka Mariape Yosefe tetāki ipu someraka, “Hokosa one hepene aporomo isuaki somerakasapo.” ¹⁸ Aíyaka somerakano aporo hinamo metakiramo kaikia fofasapo. ¹⁹ Fofarakano Mariamo ipu somesane hemakapukua kayapo. Epo merarusafapo. ²⁰ Arirakano hokosane saro sipi wafaya amo asekea Kotiane makáraraka kesarape poparipusuapo. “Kotimo makata ayiakakosaposane kakaro yasiapo. Kakaro yasiane isiapo asesapo. Makata asesane soko, makata kaisiane soko, seserakanapo.” Aíyaka ipu kesarape poparipusuapo.

Yasu yano motosane oyapo.

²¹ Sokō hakásá farakano, sere karimo kau hahaeraka patesa maiya amo, hokosane, Yasu yano motosapo. Maria umihoasiraka fana kaya maiya amo, hepene aporomo yano motoaniesane, yano motosapo.

Kotimo apea Yasu maka hisiane oyapo.

²²⁻²⁴ Mosesemo somemane karáka, “Aporo hokosa fana takapesane Kotimo menapo. Aíyaka hemakapuraka mena nume mano tetá soko metao, mena korofe tetá soko metao, Kotiaki kakako pirisiti aporomo eke kima paiyakosapo.” Aíyaka Mosesemo some kasapo. Some kasane Yasumo ipi kaíyiape ipi karikinesa wafaya tetapō kakimaka, hokosane maka Yarusarame sitia hisiapo. Hokosa fanane Kotimo ipi menapo. Aíyaka hemakapukua mena mano tetá paikia Kotiaki kasapo. (*Kisim Bek 13:2, 12, 15; Wok Pris 12:8*)

²⁵⁻²⁶ Arirakano Yarusarame sitia aporo yano motosa Símione reapo. Eereketaeraka reke Kotimo someane kakimaka reapo. Isiraya aporoane Kotimo ararehokosapo aisane aseako, epo kau reke, Ho Kotesane eyaki hakasa reapo. Ho Kotesamo eaki someraka, “Né kukusiraka reke, mafasira aporo Keresoane Unihae Kotimo pusiehokosapo. Aisane nómo aseakosapo.” Airakano Símionemo kakimaka reapo. ²⁷ E reakipoko Ho Kotesamo e himua someraka, “Kotimo apea né hisie.” Airakano kaikia, Kotimo apea hikia pauraka aseane, Yosefepe Maria tetapō tati hokosane maka perakano asesapo. Kotimo somemane motosane rakiako hemakapukua Kotimo apea maka perakano, ²⁸ hokosane Símionemo ketaka maka, Kotiaki susesapo. ²⁹ Epo Kotiaki suseaka someraka, “Kotio, nómo anoaki some karakasuane mano ane oyapo. Yumo ano kuane sia-hoasireapo. ³⁰ Isu Isiraya aporo hinamo farimakosa aporoane pipu nómo himo aserakanapo. ³¹⁻³² E ipi hákasa faesapo. Epo faesane soko, Koti neane soko, hokosa omo Yu aporohoanafonosaki tariakosapo. Isu Yu aporoane makárahoasimo nómo hokosa pusiesapo. Makata one aporo suamo hemakapusimo nómo ayíáka arakire.”

³³ Aíyaka somerakano Símionemo someane hokosa amo karikinesa wafayape* kaíyieta tetapō kairaka, “Kepoane yakaparakapo.” Aíyaka hemakapusuapo. ³⁴ Aíyaka hemakapurakano Kotimo tetāne makotehoasimo Símionemo tetāki some kasapo. Some kaka faraka Mariaki Símionemo someraka, “Hokosa one Kotimo murikimasapo. Epo Kotiane aporo hinamoaki tariasimo e Kotimo pusiesapo. Pusiesane perakano aporo metakiramo eaki hisiraka mainamarekea mokoatikhokosapo. Asiamo e pesasamo Isiraya aporo hinamo metakirane Kotimo farimakosapo. Arirakano metakirane marutaehokosapo.

³⁵ Aporomo mainamarekea ipu namina hemakapukua mahamekea risiane mafeke-marakanano epo aseakosapo. Ayíáka rakirakano, Maria, né, taremo karesa tena ayíáka,

* 2:33: Kotiane kakaro Yasumo Atapo. Arirakano hauaka wo Yosefeane Yasumo ipi sama asiapo.

ipu mainamarekea mokoatikirakano, nōmo aseraka, ne himu kára nekea hemakapukua hisiraka himu tehokosapo.” Aíyaka Símionemo Mariaki somesapo.

³⁶ Arirakano Kotimo someane kaira porofete hinamo yano motosa Ana kayapo. Anamo ipi wafaya yano motosa Fanuopo. Ipi aporo ira yano motosa Ásapo. Fana e aporomo arumaka kake, keremisi yatipinusu faraka ipi apiane kusuapo. ³⁷ Kurakano e yaro kake keremisi aiti fo amo (84) e yaro kayapo. Ayíaka Ana ipi kake sisimaraká, Kotiane merarusafapo. Ereamo soko, maíyamo soko, epo Kotiaki kekerenapo. Arirakano maiya suamo epo makata nakosane sokoairaka kake, Kotiaki kurikurisapo. ³⁸ Arirakano Yarusarame aporo hinamomo someraka “Isu mafasiakosa aporo Kotimo pusiehokosapo.” Aíyaka ipu hemakapukua kau risiapo. Arirakano Mariape Yosefe tetapō Kotimo apea hokosane maka pesa maiya amo, hinamo Ana Kotimo apea pekea iane aseraka Kotiaki susesapo. Suseraka Anamo hokosa ane tariraka someraka, “Isu mafasiakosane hokosa oyapo.” Aíyaka Anamo somesapo.

³⁹ Unihae Kotimo somemane kasane Mariape Yosefe tetapō kakimaka rakikia faraka, Yarusarame sitiane metakarikia Kariri hauaka poparipukua, tetapō tati ape Nasare apea poparipusuapo. Apea poparipukua risiapo. ⁴⁰ Apea risike Yasu ipi hokosa kara reapo. Ipi wakapuaka reke ipi koteaka hemakapurakano eane Kotimo makotesapo.

Kotimo apea Yasu pusuane oyapo.

⁴¹ Keremisi suamo Yarusarame sitia Ape Farimaresane Hemakapuko[†] Hokono Kerapo. Asiasamo Yasumo ipi kaíyia soko, ipi karikinesa wafaya soko, tetā sarimahoko hirapo. ⁴² Hikianasamo Yasu ipi keremisi kenosu rea maiya amo Yasu soko karikia hisiapo. ⁴³ Yasumo ipi kaíyiappe ipi karikinesa wafaya tetā hokono kekea soraka apea poparipusuapo. Poparipurakano Yasu ipi Yarusarame siti yia pariraka kayapo.

⁴⁴ Kayakipoko ipi kaíyiappe ipi karikinesa wafaya tetapō hemakapuraka, “E fana purakasiapo.” Aíyaka hemakapukua tetā pusuapo. Pukua yao nenehoramo Yasuane wáraka kosapo. Kokoa fasekeno ipi aporo iraki soko, ipi aporo tákeaki soko, kairaka, “Yasuane repo asesare?” Airakano aporo ipu someraka, “Isiapo eane asesafapo.”

⁴⁵ Airakano ipi kaíyiappe ipi karikinesa wafaya tetā efera hunia Yarusarame sitia Yasuane kope poparihisiaipo. ⁴⁶ Poparihikia yape tetá waka, yape isiamo Kotimo apea hikia aseane, Yu aporo tisa aporoyaki hakāsa Yasuane kakeno asesapo. Aseane, tisa aporomo makata somerakano, Yasumo kairaka kakeno asesapo. Arirakano epo soko tisa aporoaki akai kairaka kayapo. ⁴⁷ Yasumo nenakamaka mokome somehoanafonoraka, koteaka somerakano, aporo su toamo kairaka fofasapo. ⁴⁸ Aíyaka somerakano asekea, ipi kaíyiappe ipi karikinesa wafaya tetā fofasapo. Fofaraka ipi kaíyiamo eaki someraka, “Mano neao, né wo marirakano parisare? Ní ata etapo ne koane fasekeno himu fasapo.”

⁴⁹ Airakano epo someraka, “Marirakano mokome kope pusuare? Fana yia nōmo Atamo ape wo aseako peafokore? Nōmo Atamo ape wo aseako pesa satiki ano kakeno asekeafunupo.” ⁵⁰ Airakano epo someane ipi karikinesa wafayape ipi kaíyia tetapō, koteaka hemakapusuafapo.

⁵¹ Arirakano Yasu ipi kaíyia ipi karikinesa wafayayaki hakāsa Nasare apea poparipusuapo. Tetapō someane Yasumo koaretaesafapo. Anakano makata su asesane ipi kaíyiamo merarusafapo. ⁵² Asiamo Yasuane káraraka ipi himumo hemakapusuane soko koteaka hemakapukua, ipi kauane soko koteaka káraraka, ayíaka rekeno, aporomo aseraka eaki kara sesesapo. Arirakano Kotimo soko eaki kara sesesapo.

3

Yone he tapukumareramo some kasane oyapo.

Matiu 3:1-12; Maka 1:1-8; Yone 1:19-28

¹ Unihae Sisa Taipiriasemo Rome aporo hinamo suane asekea reke, e unihae káraraka reapo. E unihae raka reamo, Keremisi senaki suane (14) faraka, Keremisi pare amo

[†] 2:41: Sawi fariakoa Ape Farimaresane Hemakapuko Hokono Kerane some kepoane á asekeanie.

(15) Yutía hauakane Potiase Pairatemo ipi unihae wakasemaraka asekea reapo. Arirakano Kariri hauakane Herotemo ipi unihae wakasemaraka asekea reapo. Arirakano Ituria hauakane soko, Tekonaitisi hauakane soko, Herotemo mamanea Firipimo unihae wakasemaraka asekea reapo. Arirakano Apirini hauakane Riseniasemo unihae wakasemaraka asekea reapo.

² Arirakano maiya amo Anasepe Kaiafase tetā pirisiti aporo fanaraka risiapo. Maiya amo Sekaráyamo maeya Yoneane, ima yaoa reke, Kotimo somerakano kaisiapo. ³ Kaikia he Yotane fu hauaka a koraka reapo. Koraka reke epo some karáka, “Repo himu watikisane Kotimo mafahoasimo makata watikisane metakarikia, eaki risikiako parirasie. Risiako parirakano, nōmo re hea tapukumuriakosapo,” aisapo. ⁴ Aisane aihoasiraka wate fana porofete aporo Aesayamo sawia popasane oyapo.

“Aporo meta yao kauanea rekeakosapo. Á reke epo sakepamo someraka, ‘Unihae peakosane ikia kara makotehoanie. Ikia kara hahaesekeno maereketaehoanie.

⁵ Harusekeno suahoanie. Úri wakasema soko, úri kára soko rekeno, pateketaehoanie. Hahaesekeno maereketaehoanie. Eke soko ira pikinu soko tokeno takikia mokoatehoanie.

⁶ Ayíáka rakirakano reane Kotimo mafasiakosapo. Mafasirakano aporo hinamo suamo asekakosapo.’ Aiyaka aporoamo some kakakosapo.”

Aiyaka some kakakosa aporoane Aesayamo Kotimo sawia popasane Yone ipipo. (*Aisaia 40:3-5*)

⁷ Yone reakipoko aseane, aporo yakai Yonemo i hea tapukumuriasimo perakano, asekea, Yonemo iaki someraka, “Re su heseke ayireapo. Kotimo re suane saperaka fanasihokosapo. Kotimo fanasinapaka epamo reaki somerakano, re tekatarikia perakanare? ⁸ Arirakano ira kotesamo wate koteaka perapo. Ira wate koteaka apera ayíáka, repo himu watikisane metakarikia, risikiako parisane asekeasimo koteaka susu risikianie. Ayíáka hemakapukua risikiafunusa nine repo hemakapuraka, ‘Isu Eparahamemo aporo ira risiasamo Kotimo aporoane isupo. Asiamo isu siaraka risikinapo.’ Repo aiyaka hemakapukupo. Re Kotimo aporofapo. Eparahamemo ainane kotesapo. Repo ainane watikihoareapo. Asiamo Eparahamemo aporo ira parihoasimo, eke one Kotimo aporomano maparihoane, sia aporomano parihokosapo. ⁹ Asiamo aporomo ira tokohokosakipoko kapi máfaraka area ayíáka, maiya omo Kotimo fanasihokosane soko, ayíáka makeraka rekenapo. Ira wate koteaka peanafonona irane, tokoraka, mokoateraka iramo inakasimo ira paiyakosapo.”

¹⁰ Aiyaka Yonemo somerakano aporo yakai sarimasamo someraka, “Isiapo yakapa rakiakosare?” ¹¹ Airakano Yonemo someraka, “Repo aporo metamo pasu tetá toamo, pasu hakása meta maka, aporo meta pasu fasane kakanie. Arirakano repo aporo metamo makata nakosa tokeno, parakuraka, aporo makata nakosa fasane kakanie.”

Aisapo. ¹² Airakano takese mora aporo hea tapukumuriasimo peraka someraka, “Tisao, isiapo yakapa rakiakosare?” ¹³ Airakano Yonemo someraka, “Takese mone mora yaiya mokoanie. Mone meta hakimakopo.” Aisapo. ¹⁴ Airakano aporo terakaiyamosamo someraka, “Isiapo yakapa rakiakosare?” Airakano Yonemo someraka, “Mone hakimokoako aporo rukupo. Mone hakimokoako kotafe topakamaraka hukrukupo. Makata rakisiapoko makata ropo karakáno, repo seseaka makanie. “Makata ropo one siahoadifareapo.” Aihokopo.”

¹⁵ Aiyaka Yonemo somerakano, kaikia, aporo hinamomo hemakapuraka, “Mafasira aporo, Kereso peakosaposane apera ayare?” Aiyaka hemakapukua asekea toapo.

¹⁶ Asekea toakipoko aporo hinamo suaki Yonemo someraka, “Re nōmo hea hákasa tapukumurirakanapo. Hea tapukumurisiakipoko aporo kára meta keseke peakosapo. Aporoane aperamo epo re Ho Kotesa soko ira rufi soko* muriakosapo. Arirakano aporo káramo tamaka ane aporo raipamo fisinapo. Fisina ayíáka ano wakasemasasamo epo tamaka ane nōmo fisihiane siahoadifareapo. E aporo kárasasamo nōmo epoko

* 3:16: Ira rufiamo aporomanomo makata watikisane paiyakosapo.

raiparaka rakiako ayiane soko, ano wakasemasasamo, nōmo rakiane siahoasifareapo. Ano eyaki siasafapo. ¹⁷ Aporo kárane peraka, epo sipete asia foke maka peakosapo. Maka peraka hauaka moroa witi hae taesane fokemo fauhoane witi namoane ereketae hurupeperakano ane mokoa apea taehokosapo. Witi kauane fofomo mokoa pukua takua hurupeperakano ane mokoa ira rufi kopakapunafonona a paiyakosapo.” ¹⁸ Aíyaka Yonemo some kasá ayiáka, some meta soko some kaka, hunia soko some kaka, hunia soko some kaka, ayiáka Kotimo some kotesane epo aporo hinamoaki some kasapo. Ipu koteaka hemakapusimo some kasapo.

Herotemo Yone hea tapukumarerane tipura makesane oyapo.

¹⁹ Arirakano Herotemo Kariri hauaka asekea rea maiya amo, ipi mamanea Firipimo asea, Herótiase ane, Herotemo haki arumaka reapo. Epo makata watikisa suane rakirakano, asekea, Yonemo saperaka someraka, “Ne watikirareapo. Ayiakakopo.” ²⁰ Airakano Herotemo ipi fana watikiaka rakisia, yaiya efera hunia soko, watikiaka rakiraka, Yoneane tipura makesapo.

Yasuane Yonemo hea tapukumaresane oyapo.

Matiu 3:13-17; Maka 1:9-11; Yone 1:29-34

²¹ Yone tipura makeasiraka rea maiya amo, aporo hinamo su Yonemo hea tapukumurisiapo. Aporo hinamo suane hea tapukumurikia faraka, Yasu soko hea tapukumaresapo. Hea tapukumarerakano Yasumo kurikuriraka reke, aseane, tiane kikisi akā kikisi rorakano asekea reakipoko, ²² Ho Kotesa mena nume asia, Yasu rea pesapo. Perakano hepene aeyaka Kotimo someraka, “Né, nōmo nī hokosapo. Né nōmo himu tumurumo kára hemakapukua seserakanapo.” Aíyaka hepene aeyaka somesapo.

Yasumo aporo irane oyapo

Matiu 1:1-17

²³ Yasu reke Keremisi tuaneti naene su (29) faraka, Keremisi teti (30) amo makata rakirane kepomaresapo. Aporomo hemakapuraka Yasumo ipi atane Yosefepo. Aíyaka hemakapusuapo.

Yosefeane Hiraimo hokosapo.

²⁴ Hiraiane Mátatemo hokosapo. Mátateane Rífaimo hokosapo. Rífaiane Méaokaimo hokosapo. Méaokaiane Yánaimo hokosapo. Yánaiane Yosefemo hokosapo.

²⁵ Yosefeane Matataíasemo hokosapo. Matataíaseane Emosemo hokosapo. Emoseane Neamemo hokosapo. Neameane Esiraimo hokosapo. Esiraiiane Nákaimo hokosapo.

²⁶ Nákaiane Méatamo hokosapo. Méatane Matataíasemo hokosapo. Matataíaseane Sémenemo hokosapo. Sémeneane Yósekemo hokosapo. Yósekeane Yótamo hokosapo.

²⁷ Yótane Yóananemo hokosapo. Yóananeane Résamo hokosapo. Résane Serápapeomo hokosapo. Serápapeoane Siátiomo hokosapo. Siátioane Néraimo hokosapo.

²⁸ Néraiane Méaokaimo hokosapo. Méaokaiane Etaimo hokosapo. Etaiane Kosamemo hokosapo. Kosameane Eremétamemo hokosapo. Eremétameane Eamo hokosapo.

²⁹ Eane Yosuamo hokosapo. Yosuane Eriésamo hokosapo. Eriésane Yórimemo hokosapo. Yórimeane Mátatemo hokosapo. Mátateane Rífaimo hokosapo.

³⁰ Rífaiane Símionemo hokosapo. Símioneane Yutamo hokosapo. Yutane Yosefemo hokosapo. Yosefeane Yonamemo hokosapo. Yonameane Eraíyakimemo hokosapo.

³¹ Eraíyakimeane Méreamo hokosapo. Méreane Ménamo hokosapo. Ménane Mátatamo hokosapo. Mátatane Nétanemo hokosapo. Nétaneane Tefetemo hokosapo.

³² Tefeteane Yésemo hokosapo. Yéseane Opetemo hokosapo. Opeteane Póasemo hokosapo. Póaseane Saómonemo hokosapo. Saómoneane Násonemo hokosapo.

³³ Násoneane Amínatapemo hokosapo. Amínataapeane Ataminimo hokosapo. Ataminiane Anaimo hokosapo. Anaiane Héseronemo hokosapo. Héseroneane Péresememo hokosapo. Péreseane Yutamo hokosapo.

³⁴ Yutane Yakopemo hokosapo. Yakopeane Aisakemo hokosapo. Aisakeane Eparahamemo hokosapo. Eparahameane Teramo hokosapo. Terane Nahoremo hokosapo.

³⁵ Nahoreane Serakemo hokusapo. Serakeane Riyumo hokusapo. Riyuane Perekemo hokusapo. Perekeane Ipamo hokusapo. Ipane Siramo hokusapo.

³⁶ Sirane Kenanemo hokusapo. Kenaneane Afasatemō hokusapo. Afasateane Sememo hokusapo. Semeane Noamo hokusapo. Noane Remekemo hokusapo.

³⁷ Remekeane Metuseramo hokusapo. Metuserane Inokemo hokusapo. Inokeane Yaretēmo hokusapo. Yareteane Maharariomo hokusapo. Mahararioane Kenanemo hokusapo.

³⁸ Kenaneane Inosimo hokusapo. Inosiane Setemo hokusapo. Seteane Atamemo hokusapo. Atameane Kotimo hokusapo.[†]

4

Yasumo watikiaka rakisimo Satanemo mokopipisane oyapo.

Matiu 4:1-11; Maka 1:12-13

¹ Yasuane hea tapukumarekea reakipoko, Ho Kotesane Yasu ipi himua káraraka komarukua reke, he Yotane ane metakarikia pariperakano, Ho Kotesamo e karikia pukua, ² ima yaoa sere foti amo (40) karikia reapo. Rea maiya amo Satanemo Yasuane mokopipisapo. Arirakano sere foti amo Yasumo makata nesafapo. Nena himu raru reke sere fotiane (40) fahoane Yasuane namo kakaro kára meamosapo. ³ Meamoraka reakipoko Satanemo Yasu kau aseakosakipoko mokopipiraka someraka, “Né Kotimo hokusasamo nómō eke akayane maka, ní nakosakipoko farawa maparisie.” ⁴ Airakano Yasumo someraka, “Wae, Kotimo sawia popasane oyapo. ‘Aporomano koteaka rekeako, farawa hákasa nenaka koteaka rerafapo.’ Aíyaka Kotimo sawia popahoareapo.” (*Lo 8:3*)

⁵ Aíyaka somerakano, Satanemo Yasuane ūria karikia hisiapo. Hikia ūri terayia risike, kamani kekepomo hauaka kekepoane unihaeaka asekeea risia hauaka suane foakayia Yasuaki tarisiapo. ⁶ Tariraka someraka, “Hauaka suane soko hauaka á makata su namo kakaro kotesane soko, anoaki kasapo. Kasane nómō nī hemakapukua aporo metaki kakakosapo. ⁷ Asiasamo nómō anoaki kekererakano, makata ane su nómō néaki kakakosapo.”

⁸ Airakano Yasumo someraka, “Wae, Kotimo sawia popasane oyapo. ‘Nómō Unihaeane Kotipo. Koti ipiaki hákasa kekerehoanie. Epoko hákasa rakinie.’ Aíyaka Kotimo sawia popahoareapo.” (*Lo 6:13-14*)

⁹ Aíyaka Yasumo somerakano, Satanemo Yasuane Yarusarame sitia karikia hikia, Kotimo ape kopo yapura karikia hikia risike someraka, “Né Kotimo hokusasamo, ní yia hauaka atura hurupesie. ¹⁰ Huruperakano Kotimo hepene aporoaki someraka, ‘E ararerasie,’ airakano ipu né mafairaka rekeakosapo. ¹¹ Né korakea ekemo kareakohoamo hepene aporomo hokonomo né máfaraka maka rekeakosapo. Aíyaka Kotimo sawia popahoareapo.” (*Buk Song 91:11-12*)

¹² Airakano Yasumo someraka, “Kotimo some meta Kotimo sawia popasane oyapo. ‘Ní Unihae Kotiane kau aseakosakipoko ayiakakopo.’ Aíyaka Kotimo sawia popahoareapo.” (*Lo 6:16*)

¹³ Aíyaka Yasumo somerakano, Satanemo Yasuaki mokopipisane metakarikia pusuapo. Pukua Satanemo hemakapuraka, “Maiya metamo nómō e mokopipiraka aseakonapo.” Aíyaka Satanemo hemakapukua pusuapo.

Kariri hauaka á Yasumo makata rakira kepomaresane oyapo.

Matiu 4:12-17; Maka 1:14-15

¹⁴ Yasu ipi himua Ho Kotesane káraraka reke, Yasu Kariri hauaka á paripusuapo. Yasu Kariri hauaka pukua reke, Yasumo uyáka rakirakanaporakano kaikia, Kariri hauaka aeyaka aporo hinamo suamo kaisiapo. ¹⁵ Arirakano Yu aporomo sarimana ape yakaia Yasumo some karakano, aporo hinamo suamo kaikia eaki kekeresapo.

[†] 3:38: Atameane Kotimo ipi rakisiasamo Kotimo hokusapo, airapo.

Nasare taonea Yasumo some karakano aporomo kakipayasane oyapo.

Matiu 13:53-58; Maka 6:1-6

¹⁶ Nasare taonea Yasu ipi hokosa mano reane, ape á reke yia, ipi káraraka hokosa raua reapo. Arirakano Nasare taonea Yasu paripusuapo. Fenena maiya suamo, Yu aporomo sarimana apea Yasu pukuanasamo, Yasu Nasare taonea puraka, Yu aporomo sarimana apeá soko, e pusuapo. Pukua, Kotimo sawi menohoko takahiane, ¹⁷ eaki porofete aporo Aesayamo sawi popasane eaki karakano epo maka, mafisiraka menosapo. Popasane úyaka menosapo. ¹⁸ Yasumo menoraka,

“Unihae Kotimo ano murikimasasamo epo Ho Kotesane anoaki karakano ano himua rekenapo. Aporo makata forosaki some kotesane nōmo some kakasimo Kotimo ano murikimasapo. Arirakano aporo hinamo tipura kesa, ‘Re tonotaehokosapo.’ Aíyaka somehoko pusierakano ano pesapo. Aporo hinamo hi fausane faraka, efera hunia koteaka asekeasimo ano pusierakano pesapo. Aporo hinamo metakira yunu aporomo karikia pusuane pasimokoako pusierakano ano pesapo. ¹⁹ ‘Keremisi omo Kotimo aporo hinamoane makotehokosapo.’ Aíyaka nōmo somehoko pusierakano ano pesapo.” (*Aisia 61:1-2*)

Aíyaka popasane Yasumo menosapo.

²⁰ Menoraka faraka sawiane takosapo. Takosane sawiane Yu aporomo sarimana apeane asekeea rea aporoaki kaka marekea, e asekeea kayapo. Kakeno aporo hinamo suamo Yasumo yakapa somerakarihoamo e aseraka risiapo. ²¹ Aseraka risikino Yasumo i asekeea someraka, “Sawiane nōmo menorakano repo kaikia arisiamo makata ayiakakosapo, aíyaka popasane, pipu yumo faserepeareapo.”

²² Airakano aporo hinamo ipu someraka “Ao, koterakae,” aisapo. Ayíáka ipu namina himumo hemakapuraka, “Epo some akarane some kotesapo. Some kotesane maiyakanarakapo,” aíyaka namina susu hemakapusuapo. Arirakano ipu someraka, “E Yosefemo hokosafae?”

²³ Airakano Yasumo iaki someraka, “Repo anoaki yapake someraka, ‘Mitikoro, nōmo ní makata takamasane fana mafahoanie.’ Aíyaka repo anoaki some meta someraka, ‘Kapaneame taonea nōmo makata rakisiapakano isiapo kairaka, nōmo ní ape wo soko ayíáka rakinie.’ Aíyaka repo anoaki somehokosapo.

²⁴ Arirakano nōmo reaki kakaro somerakaripo. Kotimo some kará porofete aporomo someane ipi ape sumu á aporo hinamo hakása risiromo kakimara fapo.

²⁵ Hao, kaisie. Nōmo reaki kakaro somerakaripo. Some kepoane oyapo. Fana Iraíya rea maiya amo, Yu hinamo yaro yakai toapo. Maiya amo keremisi isia faraka, keremisi kitafa amo, ere maiya namasu amo, kupa kára karaka hauaka sua makata nakosane fasapo. ²⁶ Makata nakosa farakano asekeea, Iraíyane Yu aporomo hauaka á aporo hinamo ararehoko Kotimo pusiesafapo. Yu hinamo yaro yakai toane ararehoko pusiesafapo. Yu aporohoanafonosamo hauaka meta pusiesapo. Saetone hauaka á pukua, Sarefa apea hinamo yaro kayane ararehoko pusiesapo. ²⁷ Arirakano fana porofete aporo Iraísa rea maiya amo, Isiraya hauaka á Yu aporo risiane aporo toropakesa yakai risiapo. Risiane i suane mafasafapo. Arirakano Yu aporohoanafonosamo hauaka Siria aporo hakása meta, yano motosa Neamane, e toropakesa rekeno e hakása mafasapo.”

²⁸ Aíyaka Yasumo somerakano aporo hinamo su Yu aporomo sarimana apea toamo kairaka, ipu kakaro kara sapesapo. ²⁹ Saperaka takahihiraka, Yasuane waseremaka karikia pukua, apeane metakarikia ūri faea hikia ūri terayia aeyaka, feseremosá á Yasu makasuhokosakipoko ³⁰ asiane, Yasumo ipi aseraka, ipi yia rea nine puraka fasapo.

Yatafumo aporo ho masane Yasumo mafasane oyapo.

Maka 1:21-28

³¹ Yasu pukua Kariri hauaka Kapaneame taonea pausapo. Pauraka fenena maiya amo some kasapo. ³² Some karakano aporo hinamomo kaikia himu faraka fofasapo. Epo wakapuaka some karakano kaikia “Someane enahoasifareapo.” Aíyaka aporo hinamo suane fofasapo. ³³ Arirakano Yu aporomo sarimana apea aporo hakása meta, yatafumo e

ho masa reke, epo sakepamo wáraka someraka,³⁴ “Ae, ae, Yasu né Nasare aporopo. Nómō isu mayiakakosare? Isu mokoatikihoko pesare? Né nōmo aserapo. Né Kotimo pusiesane, né ipi hokosa namo kakaro kotesapo.”³⁵ Airakano Yasumo yatafuaki someraka, “Nómō mehokopo. Nómō aporo ho masane metakarikia né pusie.” Airakano aporo hinamo risia arakaru tipia, yatafumo aporo ho masane hauaka atura makasuraka marekea aporoane kakaro mokoatikihoanafonoraka, aporo ho masane yatafumo metakarikia pusuapo.

³⁶ Purakano aporo hinamo su sarimara someraka risiamo asekea, fofaraka namina susu someraka, “Someane marirakanarakapo. Aporo káramo somera ayiáka epo wakapuaka someraka, yatafu pusierakano, yatafumo kakimaka apure,” aisapo.³⁷ Ayiáka rakirakano asekea hauaka makea aporo hinamo risia suaki “Yasumo uyáka rakisiapo.” Airakano aporo hinamo suamo kaisiapo.

Aporo hinamo yakai makata tasa Yasumo mafasane oyapo.

Matiu 8:14-17; Maka 1:29-34

³⁸ Yasu takahikia Yu aporomo sarimana apeane metakarikia pukua, Saemonemo apea yorosapo. Yoroane Saemonemo ipi aseamo kaíyia kau kára sisipuraka, makata takamarakano, e mafahoasimo ipu Yasuaki somesapo.³⁹ Somerakano hinamo makata takamasa warea á Yasu pukua asekea, reke, e kau kara sisipusaki Yasumo wakapuaka someraka, “Kau sisipu, né metakarikia pusie.” Airakano kau sisipuane fasapo. Faraka, wate foaka hinamo ane takahikia, ipoko makata nakosa paikia kasapo.

⁴⁰ Arirakano wakasema nina maiya tuakeramo, aporo hinamomo namina aporo hinamo téke metakirane makata tasa Yasu rea karikia pesapo. Karikia perakano i makata tasa suane Yasumo hokonomo sakaihoane su fasapo.⁴¹ Arirakano aporo hinamo yakai yatafumo i ho mosane, yatafumo iane metakarikia wárake puraka someraka, “Né Kotimo hokosapo.” Airakano Yasumo iaki sakepamo someraka, “Repo mehokopo,” aisapo. Ipu “Aporo hinamo suane mafasismo, Yasuane Kotimo murikimasapo. Asiamo e Keresopo.” Aíyaka ipu hemakapusuasamo Yasumo iaki “Mehokopo,” aisapo.

Ape sumu kekepoa Yasumo some kakako pusuane oyapo.

Maka 1:35-38

⁴² Mituru fiarakano Kapaneame taoneane Yasumo metakarikia, kamaka nena yaoa aporo fasakipoko pusuapo. Pusuakipoko ipu Yasuane kokoa, aseraka someraka, “Isiapo apeane metakarikia pukupo.”⁴³ Airakano Yasumo someraka “Ano ape metakira á soko some kotesane some kakako pukusapo. Koti unihaeaka reane some kakako Kotimo ano pusiesapo.”

⁴⁴ Aíyaka Yasu pukua Yutía hauaka koraka reke, ape sumu meta Yu aporomo sarimana apea some kaka, ape sumu meta á soko Yu aporomo sarimana apea some kaka, ayiáka some kape puraka reapo.

5

Yasumo aporo hakāsa pura murikimasane oyapo.

Matiu 4:18-22; Maka 1:16-20

¹ He kekea kaya, he Kenesarete* fua Yasu rea maiya amo, aporo hinamo suamo Kotimo someane kaiyako pesapo. Kaiyako peraka aporo hinamo su sarimara, hauaka á taperakano, metakira kekefokekeforaka, metakiramo hokonomo koaka taeraka pekea, kaikia risikino asesapo.² Arirakano Yasumo aseane pokoa mora aporoamo ipu naminha kasuane metakarikia, kasipuane kusuraka risike, kasu tetákara karikimaresekeno asesapo.³ Arirakano Yasuane Saemonemo kasua ripaka reapo. Ripaka reke Saemoneaki Yasumo someraka, “He fe wakasema makeraka rokoa pusie,” aisapo. Aíyaka puraka Yasu kasu tua kake, aporo hinamo he fua risiaki some kasapo.

⁴ Some kaka faraka, Saemoneaki Yasumo someraka, “He numu aeyaka rokoa pusie. Puraka risike pokoa mokoako repo kasipuane mokoa hea kokomurisie.”

* 5:1: He Kariri yano motosa metane He Kenesaretelo.

⁵ Airakano Saemonemo someraka, “Tisao, pipu ereamo isiaapo kasipuane mokoa hea kokomuriraka risike, yao fiasane pokoa mosafapo. Pipu ereamo isu fenesafapo. Pokoa mokoanafonosa nine nōmo ayisierakano isiaapo kakimaka kasipuane mokoa hea kokomurirakanapo,” aisapo. ⁶ Aiyaka kasipuane hea kokomurikia, kihoane pokoa yakai kára hatirimaka pusuane su kasipua kesapo. Keraka umiraka kasipu ane potaka-heakorakano asekeea, ⁷ kasu meta ipu namina moremo kasuane tapukurekeno aseraka, hokono haesapo. Hokono haerakano, kasuane soko rokoa pekea, kasu tetákara pokoamo komarusuapo. Komaruraka umiraka, kasu hea kenepesahopo. ⁸ Arirakano kasu pokoamo komarusuane Saemone Pitamo aseraka, Yasu rea kakuna porokoa kake someraka, “Unihaeo, ano himu watikisapo. Né anoyaki hakāsa reke siahoasifareapo.”

⁹ Aiyaka epo soko namina suamo pokoa sakepamo mosane aseraka kara fofasapo. ¹⁰ Arirakano Sepetemo maeya Yamesepe Yone tetā Saemoneyaki hakāsa makata rakira aporopo. Tetā soko fofasapo. Arirakano Saemoneaki Yasumo someraka, “Ne namohokopo. Nōmo pokoa amora ayiáka, aporo hinamo ane ano patera asekeasimo nōmo ayiáka pasimokoakosapo,” aisapo.

¹¹ Arirakano i kasu rokoa, he fea pukua kasu matapea kasuane karimarekea, makata su yia metakarikia i Yasuyaki hakāsa pusuapo.

Aporo toropakesa Yasumo mafasane oyapo.

Matiu 8:1-4; Maka 1:40-45

¹² Arirakano maiya metamo Yasuane ape meta reakipoko, aporo toropakesa pekea, Yasu ipi yano motosane kárapo, aiyaka hemakapukua, kakuna porokoa kake someraka, “Unihaeo, nōmo ano mafahoko seseraka soko metao, ne seserire?” ¹³ Airakano Yasumo ipi hokono raeraka sakairaka someraka, “Ano seseripo. Né makata takamasane farasie.” Aihoanine aporo toropakesane wate foakayia fasapo. ¹⁴ Farakano Yasumo someraka, “Aporo metakiraki somehokopo. Pirisiti aporo rea pukua, né kau toropakesa fasane, pirisiti aporoaki tarinie. Tarikia, Mosesemo somemanemo ayiáka kakaniesane yaiya kakanie. Né mafasasamo makata yaku ayiáka kakanie. Ne fasane aporo hinamo suamo asekeea hemakapusimo nōmo ayiáka kakanie.” Aiyaka Yasumo somesapo.

¹⁵ Asiakipoko Yasumo makata rakisiane aporo metamo asekeea, aporo metaki someaka, arirakano aporo metamo aporo metaki someaka, aiyaka hauaka sua somepe pusuapo. Somerakano kaikia hauaka su aeyaka Yasumo someane kaiyakosakipoko aporo hinamo yakai pesapo. Arirakano aporo hinamo yakai makata tasane soko mafahoasimo pesapo. Perakano iane Yasumo mafasapo. ¹⁶ Mafárraka rea maiya amo, Yasu ipi haku ima yaoa pukua reke, Kotiaki kurikurihoko puraka rerapo.

Aporo korosakataesane Yasumo mafasane oyapo.

Matiu 9:1-8; Maka 2:1-12

¹⁷ Maiya metamo Yasumo some karakano Fereze aporo soko, Kotimo somemanne tisa aporo soko, Kariri hauaka ape su aeyaka soko, Yutía hauaka ape su aeyaka soko, Yarusarame siti aeyaka soko, ape sumu su aeyaka pekea toapo. Aporo makata tasane Yasumo mafahoasimo Kotimo ipi wakapuane Yasuyaki hakasa reapo.

¹⁸ Arirakano aporo metakiramo aporo korosakataesane fefeneakua makekeea maka pekea, Yasu rea apea maka pesapo. Maka pekea ape kakarua maka pukua Yasu hikumisi nenemea motoako pukusakipoko ¹⁹ aseane, aporo hinamo yakai sarimaraka ape tapesekeno metakarisiapo. Metakarikia, ape kopoanee maka hisiapo. Maka hikia ape kopoanee feteketaeraka, aporo fefeneakua makesane ape kakarua Yasu rea, tau yia hurutapisiapo. ²⁰ Arirakano aporo korosakataesane maka pesa aporo kitafasuamo, aporo korosakataesane Yasumo mafahoasimo, ipu Yasuaki himu hakásaraka hemakapusuapo. Ipu himu hakásaraka hemakapukua maka perakano, Yasumo asekeea, aporo fefeneakua makesaki someraka, “Né himu watikisane nōmo mafarakanapo.” ²¹ Airakano Fereze aporomo soko, Kotimo somemanne tisa aporomo soko, namina susu someraka, “Aporo himu watikisane mafarakanapo, airakane Kotimo ipi airaka sikirakae. Epo Kotiane

mawakasemarakane, e epare? Aporo himu watikisane aporomo mafanafapo. Kotimo ipi hákasa mafanapo.”

²² Airakano ipu hemakapusuane Yasumo aseraka someraka “Repo marirakano ano mahokoparirakanare? ²³ Aporo himu watikisane mafanane kárare? Aporo makata takamasa mafanane wakasemare? Meta mane kárare? Meta mane wakasemare? Wae, tetákara hakása yinesapo. ²⁴ Hao, kaisie. Aporomanomo Tákeane anopo. Hauaka wo aporo himu watikisane nōmo mafahoasimo, Kotimo ano murikimaka maresapo. Maresasamo repo asekeasimo, aporo korosakataesaki nōmo takahisierakanapo.” Aíyaka aporo korosakataesaki Yasumo someraka, “Ne takahisie. Takahikia nōmo ní asakapuane maweroraka maka, né ní apea pusie.”

²⁵ Airakano i hikumisia aporoane wate foaka takahikia ipi asakapuane maweroraka maka, ipi apea paripusuapo. Ipi puraka, Kotiaki kekererape pusuapo. ²⁶ Purakano aporo hinamo sarimasamo aseraka fofasapo. Fofaraka someraka, “Pipu makata haku aserakaripo.” Aíyaka Kotiaki kara kekereraka somesapo.

Yasumo Rífaiaiki peaesane oyapo.

Matiu 9:9-13; Maka 2:13-17

²⁷ Aporo korosakataesane mafaraka, Yasu pukua aseane, takese mora aporo yano motosa Rífai[†] takese mora oposea kakeno asesapo. Aseraka Yasumo Rífaiaiki someraka, “Né, ano patera aseako peae.” ²⁸ Airakano Rífaiane takahikia makata su metakarikia, Yasu patera asekea tati hakasa pusuapo. ²⁹ Puraka Rífaimo someraka, “Yasu né, nōmo apea makata nako peae.” Airakano aporo takese mora watikiaka risiane soko, aporo metakira himu watikiaka risiane soko, sarimaraka, Yasuyaki hakása Rífaimo apea makata nako sarimaraka toapo. ³⁰ Toke makata nenakano, Ferese aporomo soko ipu Yasumo aporo hakása puraki someraka, “Aporo takese mora[‡] aporo soko aporo himu watikisa akiyaki, marirakano re iyaki hakása toke makata nenakanare?” ³¹ Airakano Yasumo someraka “Aporo koteaka reane mitikoromo mafahoko e rea purafapo. Aporo makata takamasane mitikoromo mafahoko e rea purapo. ³² Aporo himu watikiaka risiamo himu watikisane rukupateraka metakarisimo, nōmo mafahoko ano perakayiapo. Aporo kotesane nōmo mafahoko ano perakayifapo.” Aíyaka Yasumo somesapo.

Kotimo asekeasimo aporo hinamo suamo makata nakosa sokoainane, Yasumo somesane oyapo.

Matiu 9:14-17; Maka 2:18-22

³³ Aporo metakiramo Yasuaki someraka, “Yone hea tapukumareramo ipi aporo hakása puramo makata nakosane sokoairaka Kotiaki kurikurinapo. Efera hunia soko, efera hunia soko, Ferese aporoaki patera asesa aporoamo soko makata nakosane sokoainapo. Arirakano nōmo aporo hakása puramo he soko, makata nakosane soko sokoairakarifapo. Airakane marirakanore?”

³⁴ Airakano Yasumo takumeaka someraka, “Isiapo Yu aporomo ainane oyapo. Aporomo hinamo arumarakano, aporo suamo hokono keraka, seseraka, makata nenapo. Nenaka aporo hinamo kawe apia iyaki hakása rekeno, aporo hinamo suamo himu hisihoanafonoraka, iyaki hakása seseraka risike, makata nakosa sokoainafapo. ³⁵ Arirakano aporo, hinamo kawe apia ane, aporo metakiramo waseremaka apura maiya amo, i himu hisiraka ipu makata nakosane sokoaihokosapo,” aisapo.

³⁶ Asiamo makata kawe rakirane soko, makata paté fana rakirane soko, sarimahoko-hoamo Yasumo takume meta someraka, “Pasu paté koasakipoko, pasu kawe resakamaka paremarekea irinafapo. Pasu kaweane koahoane siahosifareapo. Pasu kawe resakamaka, pasu paté paremarekea irihoane, tati sianafapo. Tati kekeponapo.

³⁷ Arirakano saro nanikose kau aporomo maka petoro irinapo. Iriraka waene he kawe metekesane, petoro patéa takamanafapo. Petoro patea takamarakano waene he kawemo ponoponoraka, petoro patéane fauhokosapo. Fauraka petoro kakeraka fetefeteraka,

[†] 5:27: Rífaiaiki peaesane oyapo. [‡] 5:30: Takese mora aporoamo mone sapeane hakimosapo. Anakano asekeaa aporomo iaki sesesafapo.

waene heane sakuriakosapo. Sakuriraka waene he soko, petoro soko, tetákara yi fahokosapo.³⁸ Asiamo waene he kawe metekesane petoro kawea takamakanie.³⁹ Aporomo someraka, ‘Waene he patéane kotehoareapo.[§] Ane seseripo,’ airapo.” Aíyaka Yasumo takumeaka somesapo.

6

Fenena maiya kepoane Yasumo somesane oyapo.

Matiu 12:1-8; Maka 2:23-28

¹ Fenena maiya hakása metamo witi hemoa Yasu pusuapo. Pukua witi haeane ipi aporo hakása puramo tukua hokonomo sosokeraka nesapo. ² Nenakano, Fereze aporomo asekeea someraka, “Fenena maiya yaposane marirakano repo mamosorakanare?”

³⁻⁴ Airakano Yasumo someraka, “Wate fana, Tefete soko, ipi aporo hakása pura soko, kára meamorakano, Tefeteane ipi Kotimo apea yorokoa pukua, Kotipoko farawa taesane maka nesapo. Nekea ipi aporo hakása puraki soko nasimo kasapo. Kotiaki farawa kasá taesane aporo hinamo ipu suamo nakohoamo yaposapo. Arirakano pirisiti aporo ipu namina hákasamo nenane yaposafapo. Asiāne Tefete ipi pirisiti aporohoanafonosa yiamō nesapo.* Aíyaka Kotimo sawia popahoareapo. Popasane repo menoraka, some kepoane hemakapurakarifapo. ⁵ Fenena maiya amo makata aina marerane ano unihaeaka rekenapo. Aporomanomo Tákeane anopo.” Aíyaka Yasumo somesapo.

Aporo hokono narisa Yasumo mafasane oyapo.

Matiu 12:9-14; Maka 3:1-6

⁶ Fenena maiya metamo Yasu Yu aporomo sarimana apea yorokoa some kasapo. Some kasa maiya amo, aporo hokono tumuru tkuane narisa rekeno asesapo. ⁷ Arirakano Kotimo somemane tisa aporo soko, Fereze aporo soko, ipu Yasumo fenena maiya amo aporo hokono narisa mafarakarihoamo asekeea risiapo. Fenena maiya amo Yasumo mafarakano asekeea, ipu Yasuaki hukurukusakipoko asekeea risiapo. ⁸ Asekeea risikino, ipu hemakapusuane Yasumo aseraka, aporo hokono narisaki someraka, “Né, takahikia pekeea tipi wo reae.” Airakano aporoane takahikia asekeea reapo. ⁹ Asekeea rekeno, Yasumo Kotimo somemane tisa aporoaki soko, Fereze aporoaki soko someraka, “Fenena maiya amo koteaka rakirane soko metao, watikiaka rakirane soko metao, rakira meta mamo Kotimo somemane mamosorakanare? Aporo meta kurapaka ararenane soko metao, aporo meta rurane soko metao makata rakira meta mamo Kotimo somemeane mamosorakanare?” ¹⁰ Aíyaka i aporo suane Yasumo asekeea, aporo hokono narisaki someraka, “Ne hokono raerasie.” Airakano hokono raehoane, hokono narisane fasapo. ¹¹ Hokono narisane farakano asekeea, Fereze aporo soko, Kotimo somemane tisa aporo soko, ipu kára saperaka namina susu me rukua someraka, “Yasuane kukusimo isiapo rukusapo. E mayíaka isiapo runarakapo.” Aíyaka me rukua somesapo.

Aporo hakása pura kenosu Yasumo murikimasane oyapo.

Matiu 10:1-4; Maka 3:13-19

¹² Yasu ūria kurikurihoko hisiapo. Hikia ere hakásamo e warafaraka, Kotiaki kurikuriraka reke, yao fiasapo. ¹³ Fiarakano aporo hakása pura murikimakosakipoko, peaerakano, i su pesapo. Aporo su pesane, epo aporo kenosu murikimaka, iaki yano motoraka tarira aporo yano motosapo. ¹⁴ Tarira aporo murikimasane yano taesane oyapo. Saemone ipi yano motosa meta Pitapo. Arirakano meta Saemonemo ipi mamanea Enitupo, arirakano meta Yamesepo, arirakano meta Yonepo, arirakano meta Firipi, arirakano meta Patóromiupo, ¹⁵ arirakano meta Matiupo, arirakano meta Tomasepo, arirakano meta Afiasemo maeya Yamesepo, arirakano meta Rome kamanimo Yu aporo asekeea reane metakarisimo hemakapura aporo Saemonepo, ¹⁶ arirakano

[§] 5:39: Waene he patéane kára waperapo. Waene he kaweanie kakaro waperafapo. * 6:3-4: “Tefetemo soko nesasamo, nōmo aporo hakása purane meamorakano makata nesane ipu hasakasafapo.” Aíyaka Yasumo somesapo.

meta Yamesemo maeya Yutasepo, arirakano meta Yasuane parakehokosa aporo Yutase Isekeriopo. I su Yasumo murikimasane ayapo.

Aporo hinamo makata tasa suane Yasumo mafasane oyapo.

Matiu 4:24-25; Maka 3:7-12

¹⁷ Yasuane aporo kenosuyaki ūri aeyaka pekea punua pausapo. Hauaka á eyaki aporo hinamo hakāsa pukua, kára sarimasapo. Arirakano Yutía hauaka su aeyaka aporo yakai pekea sarimaraka, Yarusarame siti aeyaka soko pekea sarimasapo. Arirakano ipu Yasumo someane soko kaiyako peraka yia, ipu aporo hinamo makata tasane soko mafahoasimo karikia pesapo. ¹⁸ Aporo yatafumo ho mosane soko perakano Yasumo mafasapo. ¹⁹ Yasumo wakapuamo aporo hinamo makata tasa suane mafarakano ipu namina suamo Yasuane sakaihoko pesapo.

Kotimo makotenane oyapo.

Matiu 5:1-12

²⁰ Yasumo ipi aporo hakāsa purane asekea someraka, “Repo someraka, ‘Kotimo menane ano forokoa reasasamo, Kotimo hemakapusua ayiáka, nōmo hemakapusakipoko seseripo.’ Aisa aporo hinamoane Kotimo unihaeaka asekea rekenapo. Asekea reke Kotimo reane makoterakano, re seseraka risikianie. ²¹ Arirakano yumo re meamoraka risike, seseraka risikianie. Keseke repo siaraka makata nakosapo. Arirakano yumo re hihiripuraka risike seseraka risikianie. Keseke re kara seseraka takuhokosapo.

²² Arirakano repo Aporomanomo Táke anoane patera asesasamo, reaki aporo metaki-ramo hisiraka re patera tarikia, re ekeneraka someraka, ‘Re aporo watikirareapo.’ Airakano re seseraka risikianie. ²³ Kára seseraka hokono potepoteraka risikianie. Hepene yapura repo makata ropo kára tokenapo. Asiamo porofete aporoane ipu makasa kaua kekemamo mokoatikisa ayiáka, re soko ayiáka mokoatikhokosapo.

²⁴ Arirakano makata kemo kárasha aporo re asekeanie. Repo makata kemo su hauaka wo siaraka mosapo. ²⁵ Arirakano yumo repo makata nakosa kára nenaka re asekeanie. Keseke re meamohokosapo. Arirakano yumo re takuraka risikino re asekeanie. Keseke re hihiripuhokosapo.

²⁶ Arirakano reaki aporo suamo kekereraka somerakano re asekeanie. Fana namina makasa kaua kekemamo kotafe porofete aporoaki kekeresa ayiáka, ipu reaki soko ayiáka kekererakano asekeanie.” Aíyaka Yasumo somesapo.

Rukuroponane Yasumo somesane oyapo.

Matiu 5:38-48; 7:12

²⁷ Yasumo someraka, “Repo kaikia risikino nōmo reaki somerakanapo. Aporo metamo ne mokoatikirakano, nōmo eaki himu tumurumo hemakapurunie. Aporo metamo neaki hisirakano, nōmo eane makotehoanie. ²⁸ Aporo metamo neaki yakasa ho marerakano, aporoane nōmo makotena someane eaki some kakanie. Aporo metamo neaki some watikisa somerakano, nōmo epoko farimaka kurikurihoanie. ²⁹ Aporo metamo ne akai parea rurakano, nōmo rukuroponafaraka, akai pare takua soko rusimo tarinie. Aporomo nōmo pasu osonane maka, nōmo pasu osona metane soko marakano, waehokopo. ³⁰ Aporomo neaki makasierakano, nōmo kakanie. Aporomo nōmo makata kemoane marakano eaki, ‘Nōmo makata kemoane nī fímkasie,’ aihokopo. ³¹ Arirakano nōmo hemakapuraka, ‘Aporo metamo anoaki makoteraka ararehoasimo, ano seseripo,’ aíyaka nōmo hemakapurakanone, nōmo fana aporo aki nōmo makoteraka rakinie.

³² Aporo metamo neaki himu tumurumo hemakapurakano, nōmo soko eaki ropo himu tumurumo hemakapurua someraka, ‘Kotimo ano makotehokosapo,’ aíyaka hemakapuane siahoasifareapo. Nōmo aina ayiaka aporo watikiaka reramo soko ainane hakása yiayapo. Arirakano aporo metamo aporo watikiaka rerane himu tumurumo hemakapurakano, epo soko neane ropo himu tumurumo hemakapurapo. ³³ Arirakano aporo metamo né makoterakano, nōmo soko e makotena akipoko, nōmo hemakapuraka, ‘Kotimo ano makotehokosapo.’ Aíyaka hemakapukupo. Asiamo nena aporomo soko hakása yineraka rakirapo.

³⁴ Nόmo aporo meta mone arareraka, nόmo takekea hemakapuraka, ‘Aporo aki nόmo mone yāno karakano, moneane epo anoaki parikakakosapo.’ Aiyaka hemakapurukua eaki mone karaka, nόmo hemakapuraka, ‘Nόmo koteaka rakisiasamo Kotimo ano makotehokosapo.’ Aiyaka hemakapurakanone ane siahoasifareapo. Nena aporomo ayiáka hemakapurapo. Ipu hemakapuraka, makata kasáne ropo makosakipoko karápo. Repo makata arakiramo nena aporomo rakirane marokehoanie. ³⁵ Asiamo aporo metakiramo reane mokoatikirakano, aporoane repo himu tumurumo hemakapunie. Aporo metakirane makotehoanie. Aporo metakiraki makata yaku kakanie. Makata yaku kasane nόmo ní keseke makosakipoko hemakapukupo. Ayiáka koteaka risikino, Unihae Koti Káramo reane ipi hokosapo, aihokosapo. Aiyaka reane epo karikia nakosapo. Arirakano reaki makata ropo kára kakakosapo. Arirakano suse aihoanafonona aporoane soko Kotimo ararenapo. Arirakano makaripi aira aporoane soko, Kotimo makotenapo. ³⁶ Asiamo repo Ata Kotimo aporo hinamo su kamenakana ayiáka, repo soko aporo hinamo suane ayiáka kamenakahoanie.” Aiyaka Yasumo somesapo.

“Aporo meta hokomakopo.” Aisane oyapo.

Matiu 7:1-5

³⁷ Yasumo someraka, “Nόmo aporo metane hokomaka someraka, ‘E watikiaka are. Ano koteaka rekenapo. E area ayiáka ano rekenafapo.’ Aihokopo. Nόmo hokomaka some-hoanafonorakano, aporo metakiramo soko, Kotimo soko, neaki ayiáka hokomaka some-hokosafapo. Arirakano nόmo someraka, ‘E fanasirasie.’ Aihokopo. Aihoanafonorakano neaki soko, ‘Fanasisrasie.’ Aihokosafapo. Arirakano aporo metamo ne mokoatikirakano eaki nόmo himumo mahisisane mafahoanie. Mafarakano Kotimo soko nόmo watikisane mafahokosapo. ³⁸ Nόmo makata karakano neaki soko makata kakákosapo. Karáka kára komarukua kakakosapo. Komarurakano pipiraka kapusuraka sakopepehoasimo kakakosapo. Nόmo makata akara ayiáka, neaki soko yaiya kakakosapo.” Aiyaka Yasumo somesapo.

³⁹ Yasumo iaki takumeaka someraka “Aporo hi fausamo aporo meta hi fausa hokonoa maka karikia puane siahoasireare? Wae, tati tetákara kutua eteraka hurupepehokosapo.

⁴⁰ Tisa aporo ipi fanaraka rerapo. Ipi aporo hakāsa purane kesekenapo. Aporo hakāsa puraki kakaro koteaka tarikia sukurakano asekeea, ipu makata su koteaka enomaka risike, tisa aporomo ipi hemakapuraka area ayiáka, aporo hakāsa puramo soko ayiáka, hemakapurua risirapo.

⁴¹ Arirakano nόmo ní maemo hia makata pepeno wakasema kayane aserapo. Aseraka yia nόmo ní hia makata pepeno kára kayane marirakano asekepayarakanare?

⁴² Asekepayaraka yia nόmo ní maeaki someraka, ‘Maeo, né hia makata pepeno wakasema akayane, nόmo maka mamakatehokoripo.’ Aiyaka nόmo somerakanone, né aporo himu tetáraka rekenapo. Fana nόmo ní hia makata pepeno wakasema akayane maka mamakatehokosakipoko, nόmo ní korakano siaraka kokoa asekosapo.” Aiyaka Yasumo somesapo.

Yasumo takumeaka ira wate somesane oyapo.

Matiu 7:16-20; 12:33-35

⁴³ Yasumo someraka, “Ira kotesamo wate watikisa perafapo. Ira watikisamo wate kotesa perafapo. ⁴⁴ Ira wate aseraka ira namo hemakapurapo. Sako utumua, foke wate pekerea tumarafapo. Sako keta risia sako karepe wate tumarafapo. ⁴⁵ Mahimuna makatane, himumo hemakapurapo. Aporo hinamo kotesamo himumo koteaka hemakapurua, akaimo soko koteaka somerapo. Koteaka hemakapurua koteaka rakirapo. Arirakano aporo hinamo watikisamo himumo watikiaka hemakapurua akaimo soko kekemaraka watikiaka somerapo. Watikiaka hemakapurua watikiaka rakirapo. Aporo hinamomo himumo makata hemakapusuane akai aeyaka somerapo.” Aiyaka Yasumo somesapo.

Aporo tetámo ape tetá kisia Yasumo takumeaka somesane oyapo.

Matiu 7:21; 7:24-27

⁴⁶ Yasumo someraka, “Repo anoaki, ‘Unihaeo, Unihaeo,’ airaka yia, nōmo makata rakiniesane rakianafononane marirakanonare? ⁴⁷⁻⁴⁸ Arirakano aporomo ape ki-akosakipoko hauaka parosa á ira kesa poroako hauaka rakea kuturaka ira kesa porokoa ape kisiapo. Ape kisiakipoko he huku puraka, ape koteaka kisiasamo rakarimaka pusuafapo. Rakarimaka punafonosa ayíáka, aporo hinamo ano rea pekea, nōmo someane kakimaka rakira aporo hinamoane ásiápo. ⁴⁹ Arirakano aporo metamo hauaka sakipu kima ape kiraka, hauaka wakasema kima susu rakea, ira kesa porokoa ape kisiane, he huku puraka, ape hauaka sakipusa kisiasamo, wate foakayia rakarimaka pusuapo. Rakarimaka puraka anusapo. Ape hauaka sakipua kisia hemo rakarimaka pusua ayíáka, nōmo some kakipayaraka rakianafonona aporo hinamoane asiápo.” Áiyaka Yasumo somesapo.

7

*Yasumo aporo terakaiyamosa satinimo aporo raipa makata takamasa mafasane oyapo.
Matiu 8:5-13*

¹ Aporo hinamo ipu suamo kaiyisimo, Yasumo some kaka faraka ipi Kapaneame taonea pusuapo. ² Kapaneame taonea Rome aporo terakaiyamosa satini reapo. Epo ipi aporo raipane kára hemakapukua sesenapo. Asiane epo aporo raipane makata takamasa kukuko makesapo. Kukuko makerakano satinimo kaiyiáne, “Yasumo aporo makata takamasa mafanapo.” Airakano kaisiapo. ³ Kairaka Yu aporo sisimaki someraka, “Yasumo nōmo aporo raipa makata takamasane mafahoasimo, Yasu pasimako pusie.” Airakano aporo sisimane pukua ⁴ Yasu rea pauraka kukunameaka someraka, “Rome aporo satiniane ipi aporo kotesapo. E nōmo ararehoane siaoasireapo. ⁵ Epo isu Yu aporoane hemakapurapo. Epo isupoko Yu aporomo sarimana apeane epo máfaraka kisiapo. Asiamo nōmo e ararehoane siaoasireapo.”

⁶ Airakano Yasuane iyaki hakasa pusuapo. Pukua satinimo ape ane makeraka pesapo. Yasu perakano satinimo asekeia ipi aporo tákemo someraka, “Né pukua Yasuaki somehoanie. Nōmo some akara one nōmo eaki uyáka some kakanie. ‘Unihaeo, né peraka wafororareapo. Ano aporo wakasemapo. Né aporo kárasasamo iti siasafapo. Asiamo nōmo apea né peane siaoasifareapo. ⁷ Ano wakasemasamo né rea ano pesafapo. Né yia reke, nōmo someraka ipi aporo makata takamasane farasie, aihoanie. Farasierakano nōmo aporo raipa makata takamasane fahokosapo. ⁸ Arirakano ano asekeia rea aporoamo, anoaki makata rakisierakano nōmo rakirapo. Arirakano nōmo aporo asekeia reaki pusierakano e purapo. Peaerakano e perapo. Nōmo aporo raipaki makata rakisierakano epo rakirapo. Nōmo aira ayíáka, nōmo soko aporo makata takamasane farasierakano, e fahokosapo.” Áiyaka repo Yasuaki somehoanie.”

⁹ Airakano i pukua satinimo someaka maresane Yasuaki ipu somesapo. Somerakano Yasumo kaikia sesesapo. Seseraka eyaki aporo hinamo hakása pesaki someraka, “Yu aporo hoanafonosa aporo terakaiyamosa satinimo anoaki himu hakásaraka hemakapukua reareapo. Satinimo anoaki himu hakásaraka hemaka apura ayíáka, Isiraya hauaka Yu aporo metamo anoaki ayíáka himu hakásaraka hemakapurafareapo.”

¹⁰ Airakano satinimo ipi aporo tákemo Yasuane metakarikia, satinimo apea popariperaka aseane, aporo raipa makata takamasane fasekeno asesapo.

Hinamo yaromo hokosa kusua Yasumo maturikia taesane oyapo.

¹¹ Sere metamo Yasu Naine taonea pusuapo. Epo ipi aporo hakása pura soko, aporo metakira soko, eyaki hakása pusuapo. ¹² Pukua ape ruru ikia koro makeraka aseane hokosa raua kusuane fefeneakua makekea kunikia motoakosakipoko maka perakano asesapo. Hokosa kusuane hinamo yaromo aporo hokosa hakása yiyapo. Ape aeyaka hinamo yaroyaki aporo hinamo yakai perakano asesapo. ¹³ Asekeia Yasumo hinamo yaroane kamenakaraka someraka, “Né hiripuhokopo.” ¹⁴ Áiyaka aporomo fefeneakua hokosa kusuane makekea ira paka pusuane fenekeia risikino fefeneakua Yasumo sakairaka someraka, “Hokosa rauao, né turikia pukua takahisie.”

¹⁵ Airakano hokosa raua fefeneakua wareane, foakayia turikia pukua asekea kayapo. Asekea kake makata somesapo. Somerakano asekea, hinamo yaroaki Yasumo someraka, “One nōmo ní hokosapo. Ní apea karikia pusie.” ¹⁶ Airakano aporo hinamo suamo aseraka himu fasapo. Himu faraka Kotiaki kekereraka someraka, “Porofete aporo kára isu arisia fasereapere. Kotimo ipi aporo hinamoane ararehoko apere.” Aisapo. ¹⁷ Arirakano Yutía aporo hinamomo soko, Yutía hauaka makeraka aporo risiamo soko, Yasumo aporo kusuane maturikia taesapakano kaisiapo.

*Yone hea tapukumareramo ipi aporo hakāsa pura Yasu rea pusierakano, pusuane oyapo.
Matiu 11:2-19*

¹⁸ Yasumo makata rakisiane, Yonemo ipi aporo hakāsa puramo Yoneaki somesapo. Somerakano kaikia, Yonemo ipi aporo hakāsa pura tetá peaerakano aporo tetá Yone rea pesapo. ¹⁹ Perakano Yonemo someraka, “Teto pusie. Teto pukua, Unihae Yasuaki kaiyinie. Kairaka, ‘Aporo meta Kotimo pusierakano peakosapo airakasuane nere? Aporo metare? Aporo meta perakarihoamo isu kau risikiaere?’ Aiyaka tetápo Yasuaki kaiyinie.” ²⁰ Airakano tetá Yasu rea pukua someraka, “Yone he tapukumareramo eto pusierakano perakayiapo. Etapo neaki makata kairakanapo. Asiamo Yonemo someraka, ‘Aporo meta Kotimo pusierakano peakosapo airakasuane nere? Aporo metare? Aporo meta perakarihoamo isu kau risikiaere?’ Aiyaka Yonemo somerakano etapo neaki kaiyako perakayiapo,” aisapo.

²¹ Airakano kaisia maiya amo, aporo hinamo makata tasa yakaiane Yasumo mafasapo. Aporo hinamo yatafumo ho masane Yasumo metakarikia pusiehoane, yatafu purakano aporo hinamo yatafumo ho mosane mafasapo. Aporo hinamo metakira hi fausamo, efera hunia makata koteaka asekeasimo, hi fausane Yasumo mafasapo. ²² Mafaraka risike, Yonemo ipi aporo hakāsa puraki Yasumo someraka, “Re poparipukua, makata asesane soko, makata kaisiane soko, Yoneaki somehoanie. Aporo hinamo hi fausane, mafasa koteaka aserakanapo.* Aporo hinamo korake matipusane, maraesaa koteaka purakanapo. Aporo hinamo toropakesane, mafasa koteaka risikinapo. Aporo hinamo senaki tisane, mafasa koteaka kairakanapo. Aporo hinamo kusuane, mafarearaka turikia tarikia risikinapo. Aporo hinamo makata forokoa risiaki soko, Kotimo some kaiyanafonosa aporo hinamoaki soko, Kotimo some kotesane nōmo some karakanapo. ²³ Asiamo aporo hinamomo anoaki himu hakásaraka hemakapurane metakarirafaraka, yaiya hemakapuraka risikino, aporo hinamoane Kotimo makotenapo.” Aiyaka aporo tetá pesaki Yasumo somesapo.

²⁴ Aiyaka Yasumo somerakano, Yonemo aporo tetá pusiesane tati apea poparipusuapo. Poparipurakano, Yasumo aporo hinamo su sarimasaki someraka, “Yonemo ima yaoa some karakano repo yakapa aseako pusuare? Fofako atifomo mahohoanane aseako pusuare? Wae. Fofako atifomo mahohoanane aseako pusufapo. ²⁵ Repo yakapa aseako pusuare? Aporo kau rakisiane aseako pusuare? Wae. Aporo kau rakisiane makata su siaraka unihaemo apea rerapo. Aporo kau rakikia yaoa rerafapo. ²⁶ Repo yakapa aseako pusuare? Porofete aporo aseako pusuare? Ao. Repo porofete aporo kárane asesapo. Asesane wate fana Kotimo sawia porofete aporomo popasane Yonepo.

²⁷ Wate fana Kotimo sawia porofete aporo metamo popasane oyapo. Mafasira aporoaki Kotimo someraka, ‘Né pusiraka aporo metamo fana some kakako nōmo pusiehokosapo. Aporoamo né ikia kara pukusane makotehokosapo.’ Aiyaka Kotimo somerakano, porofete aporomo popahoareapo. Aiyaka popahoareane Yoneane popasapo. (*Malakai 3:1*)

²⁸ Nōmo some kakasiraka aporo su wainepe pesa amo aporo metamo Yoneane maroke-safapo. Arirakano ano peraka some karaka, ‘Koti unihaeaka rekenapo.’ Airakano aporo

* ^{7:22:} Yoneaki some kakasimo Yasumo porofete aporo Aesayamo someane somesapo. (Aisaia 35:5, 6) Asiamo Yonemo hemakapuraka, “Kotimo aporo pusierakano pesane kakaro Yasureapo,” aiyaka hemakapukusapo.

hinamomo Kotimo someane kakimaka anoa paoraka someraka, ‘Ano wakasemapo,’ aisa aporo hinamoamo Yoneane makamakesekenapo.”

²⁹ Aíyaka Yasumo somerakano aporo hinamo suamo soko, aporo takese mora aporoamo soko Yasumo someane kakimasapo. Kakimaka someraka, “Someane kakarokae. Kotimo hemakapusuane ereketaerareapo. Asiamo Yonemo isu hea tapukumuri-anne siahoasireapo.” ³⁰ Airakano Yonemo aporo hinamo hea tapukumurisia maiya amo, Fere se aporomo soko, Kotimo somemane tisa aporomo soko, ipu someraka, “Isu hea tapukumuriako hisiripo.” Airakano Yonemo iane hea tapukumurisiafapo. Asiamo i hea tapukumurianafonosasamo ipu Kotimo someane koaretaesapo.

³¹ Arirakano Yasumo someraka, “Maiya omo aporo hinamo risiane nōmo mayiáka somehokusare? Nōmo takumeaka somerakanapo. ³² Hokosamo hauaka moroa enaraka, namina yia hokosa metakiramo hokosa metakiraki someraka, ‘Isiapo wiroko takiane, repo seseaka paoraka hakāsa kesarakarifapo. Isiapo hiripuhoane, repo soko paoraka hiripurakarifapo,’ aisapo. Asiamo i risia ayiáka, re soko ayiáka risikinapo. ³³ Ayiáka risiamo kepoane oyapo. Yone hea tapukumarerane peraka, makata nakosa farawane soko, waene he soko, sokoairaka nesafapo. Nanafonorakano asekea, repo someraka, ‘Yoneane yatafumo ho mayereapo,’ aisapo. Aíyaka re Yonea paosafapo.

³⁴ Arirakano Aporomanomo Táke ano peraka, makata nakosa soko waene he soko nenapo. Nenakano asekea, repo someraka, ‘Yasumo nako fitiraka sapekeamo nenareapo. Waene he soko kára nena reapo. Arirakano aporo takese morane soko, aporo himu watikisane soko ipi tákereapo,’ aíyaka someaka anoa paosafapo. ³⁵ Arirakano Kotimo hemakapusuane nōmo kekemaraka somesane, kakimara aporo hinamomo ipu hemakapuraka, ‘Kotimo hemakapusuane ereketaehoareapo,’ aíyaka ipu hemakapukusapo.” Aíyaka Yasumo somesapo.

Fere se aporo meta yano motosa Saemonemo apea Yasu pusuane oyapo.

Matiu 26:6-13; Maka 14:3-9

³⁶ Fere se aporomo Yasuaki someraka, “Né nōmo apea makata nako peae,” airakano Yasu pusuapo. Pukua apea makata nakosakipoko asekea kayapo. ³⁷ Arirakano ape sumu hakásia yia hinamo watikisa hakásia kayapo. Hinamoane ipi kake kaiyiane, Fere se aporomo apea Yasu pusuapkano hinamoamo kaikia, he wape yamona petoroa takamaka, apea maka pesapo. Arirakano eke kotesane maka petoro rakisiakipoko, petoro á, he wape yamonane takamaka pesapo. ³⁸ Peraka Yasu kayakipoko patera aeyaka pekea hiripusapo. Hiripuraka, hiripu heane Yasu korakea raposapo. Hinamoamo ipi uni itimo Yasu korakea hesane hokeraka, Yasu korakea makanusapo. He wape yamona maka pesane, Yasu korakea resapo.

³⁹ Rerakano Yasuane peae, aisa Fere se aporoamo ipi hemakapuraka, “Yasuane porofete aporo satiki hinamoane watikiaka kakeno asekeafunureapo. Porofete aporo rakanafareapo.” Aíyaka ape wafayamo hemakapurakano, ⁴⁰ Yasumo asekea someraka, “Saemoneo, néaki nōmo makata somerakanapo.” Airakano Saemonemo someraka, “Ao, Tisa, nōmo somesie.” ⁴¹ Airakano Yasumo takumeaka someraka, “Aporomo aporo tetáki mone fore kasapo. Aporo metaki mone wane harote kina asia (K100)† kasapo. Aporo metaki mone tene kina asia (K10) kasapo. ⁴² Karakano, keseke tetapō someraka, ‘Moneane nōmo etoaki kasane fasenko, ropo kakakosafapo.’ Airakano aporo mone kasámo tetáki someraka, ‘Ao, metakarisie. Teto nōmo mone kasane ropo anoaki kakakopo. Nōmo mamerarurakanapo. Ane siareapo.’ Aíyaka aporo mone kasámo somesapo. Asiamo Saemoneo, makata ropo metakarisiasamo, epamo aporo mone kasane kára seseraka hemakapurkusare? Aporo mone kára masamo mone kasá wafayane kára seseraka hemakapurkusare? Mone wakasema masamo aporo mone kasá wafayane kára seseraka hemakapurkusare?”

† ^{7:41:} Yasu rea maiya amo namina siufa mone yano motosa tanariase amo makata roposapo.

⁴³ Aíyaka Yasumo somerakano Saemonemo someraka, “Aporo mone kára masamo, mone kasá wafayane, kára seseraka hemakapukusapo.” Airakano Yasumo someraka, “Ao, kakarorakae.” ⁴⁴ Aíyaka hinamoane Yasumo aseako kakopariraka Saemoneaki efera hunia someraka, “Hinamoane nōmo asesie. Ano nōmo apea peane, nōmo ano korake kususafapo.[‡] Hinamoamo ipi hiripu hemo ano korake kusuane. Kusuraka ipi uni itimo ano korake hokeane. ⁴⁵ Ano peane, nōmo ano makanusafapo. Hinamoamo hákasa ano korakea makanuraka akaye. ⁴⁶ Nōmo ano uni itia wera resafapo. Hinamoamo he wape yamonamo ano korakea arere.

⁴⁷ Asiamo hinamoane ipi kára watikiaka kakeno asekea, makata watikisa kárane nōmo mafasapo. Mafasasamo anoaki kára hemaka apure. Arirakano aporo metamo makata watikisa wakasemasane mafarakano, anoaki wakasema hemakapurapo.” ⁴⁸ Aíyaka hinamoaki Yasumo someraka “Né himu watikisane nōmo mafasapo.” ⁴⁹ Airakano aporo metakira tepora toke namina susu someraka “Aporomano himu watikisa mafana aporoane epare?” Aisapo. ⁵⁰ Arirakano hinamoaki Yasumo someraka “Nōmo anoaki himu hakásaraka hemaka apura yiamo ne nōmo mafasirakayiapo. Ní koteaka kakako punie.” Aíyaka Yasumo somesapo.

8

Hinamomo Yasu araresane oyapo.

¹ Maiya wakasema farakano, Koti unihaeaka reane, Yasumo aporo hinamo metakiraki some kakako ape meta á pukua, arirakano aporo hinamo metakiraki soko, some kakako pusuapo. Pukua, ape meta á soko pukua, aiyáka some kape pusuapo. Yasumo ipi aporo hakāsa pura kenosuane Yasuyaki hakāsa pusuapo. ² Arirakano hinamo metakira soko Yasuyaki hakāsa pusuapo. Pusua hinamoane metakira makata tasane Yasumo mafasapo. Hinamo metakirane yatafumo ho masane soko Yasumo mafasapo. Arirakano hinamo i yano taesane oyapo. Makatara hinamo Maria ane, yatafu yatipinusumo ipi ho masane Yasumo mafasapo. ³ Meta, Kúsamo ipi asea Yoánapo. Yoánamo ipi apiamo Herotemo apea makata rakisiapo. Arirakano hinamo meta Susánapo. Hinamoamo soko, hinamo metakiramo soko, Yasuane arareraka eaki mone kasapo. Yasuane soko karaka, ipi aporo hakāsa purane soko kasapo.

*Makata mano potesa Yasumo takumeaka somesane oyapo.**Matiu 13:1-9; Maka 4:1-9*

⁴ Yasu rea á, taone aeyaka aporo hinamo yakai pekea sarimarakano asekea Yasumo takumeaka someraka, ⁵ “Aporomo makata mano poterape pusuapo. Poterape pusua maiya amo, makata mano metakira ikia kara á hurupepesapo. Hurupepesane aporomo finiraka finirakosapo. Metakira hurupepesane menamo nesapo.

⁶ Arirakano makata mano metakira eke kima á hurupepesane, tanehekeea risiane, makata otoa he kesaka rekeanafonosasamo, koteaka taneheanafonoraka kukua kesapo.

⁷ Arirakano makata mano metakira keta risiakipoko arakarua hurupepesapo. Hurupepesane makata mano keta risia akiyaki hakāsa tanehesapo. Tanehenaka makata keta risiane popakeraka, makata manoane karotapiraka serekasapo.

⁸ Arirakano makata mano metakira hauaka kotesakipoko hurupepesane tanehekeea, wate wane harote (100) aiyáka pesapo.” Aíyaka somesa maiya amo Yasumo someraka, “Re senaki risiamo kairaka, koteaka kaisie,” aisapo.

*Maiya suamo Yasumo takumeaka susu somesane oyapo.**Matiu 13:10-17; Maka 4:10-12*

⁹ Yasumo aporo hakāsa puramo eaki someraka, “Takume kepoane yakapare?” ¹⁰ Airakano Yasumo someraka, “Koti unihaeaka reane mahamesane, repo kaiyisimo some kepoane yumo nōmo reaki hufitaeraka somerakanapo. Arirakano aporo hinamo

[‡] *7:44:* Yu aporomo ainane oyapo. Aporo meta aporo ape wafayamo apea perakano, ape wafayamo e korake kusunapo. Asiamo Saemonemo Yasuane makotehoanafonosane Yasuane mawakasemasapo.

metakiraki some kepoane nōmo hufitaeraka somehoanafonoraka, takumeaka susu somerakanapo. Asiamo ipu himo aseraka asekea yia, kepoane koteaka hemakapurafapo. Ipu senakimo kairaka kaikia yia, himumo koteaka hemakapurafapo. Asiamo nōmo iaki takumeaka susu somerakanapo.” Aíyaka Yasumo somesapo. *(Aisaia 6:9)*

Makata mano potesa amo takume kepoane oyapo.

Matiu 13:18-23; Maka 4:13-20

¹¹ Arirakano Yasumo ipi aporo hakāsa puraki someraka, “Takume kepoane oyapo. Makata mano asiane Kotimo some ayapo. ¹² Ikia kara á hurupepesa asiane oyapo. Kotimo someane aporomo kaikia hemakapuraka, ‘Kotimo isu mafasiasimosapo.’ Aíyaka hemakapukua, Kotimo someane kakaro kakimakohoamo Satane ipi pekea Kotimo someane hakimarapo.

¹³ Arirakano eke kima á hurupepesa asiane, aporomo Kotimo someane seseraka kaikia, asiane pikinu koteaka punafonona ayiáka, ipu maiya wakasemamo kakimaka risina, keseke i kau aseako mokopipirakano asekea, ipu Kotimo someane metakarirapo.

¹⁴ Arirakano makata keta risia tanehesakipoko, arakarua makata mano hurupepesa asiane, aporomo Kotimo someane kaikia risikiyia, hauaka wo makata tomekesa hemakapuramo soko, hauaka wo makata kemo mokoako hemakapuramo soko, hauaka wo seseraka hemakapuramo soko, makata isia amo Kotimo someane karotapirapo. Karotapiraka, wate pesane koteaka sunafapo. ¹⁵ Arirakano hauaka kotesa á hurupepesa asiane, aporomo Kotimo someane senakimo koteaka kaikia, himumo koteaka susu hemakapukua, kakaro kakimaka, himu hakásaraka hemakapuraka risikino, ira wate kara apera ayiáka pekea risikiakosapo.” Aíyaka Yasumo somesapo.

Yasumo nafa faena takumeaka somesane oyapo.

Matiu 5:15; Maka 4:21-25

¹⁶ Yasumo someraka, “Nafa pakimaka motokoa taramomo karotapirafapo. Nafa pakimaka ape wará pete petaua motorafapo. Aporo metakira ape á yorokoa peraka faeane asekeasimo, nafane pakimaka apea waremarerapo.

¹⁷ Arirakano makata faremaresane keseke mafekemahokosapo. Arirakano makata mahamesane keseke makakamahokosapo.

¹⁸ Asiamo someane maíyaka kaikia kakimarakanare? Ayiáka hemakapukua risikianie. Repo someane kaikia kakimarakanano, makata meta soko reaki somerakanano, repo sia kakimakosapo. Arirakano someane repo kakimakanafonorakano, fana repo makata kaisiane soko meraruhokosapo,” aisapo.

Yasumo ipi kaíyia Maria soko, ipi mamanea soko, Yasuane aseako pesane oyapo.

Matiu 12:46-50; Maka 3:31-35

¹⁹ Yasumo ipi kaíyia soko, ipi mamanea soko, Yasu aseako pesane, aporo hinamo yakai sarimaraka, ape tapesekeno ape kakarua Yasuane aseako pusuafapo. ²⁰ Pusifasekeno aporo metamo Yasuaki someraka, “Nómo ní ama soko, ní mae soko né aseako pekea, hauaka moro atura arises.” ²¹ Airakano Yasumo aporo hinamo sarimasaki someraka, “Kotimo someane kakimaka rakira aporo hinamoane nōmo amapo, nōmo maepo.” Aíyaka Yasumo somesapo.

Atifoyaki he kupayaki kára pesane Yasumo mafasane oyapo.

Matiu 8:23-27; Maka 4:35-41

²² Sere metamo Yasu soko, ipi aporo hakāsa pura soko, kasua ripaka Yasumo someraka, “He kekeia kaya taku ra kasu rokoa purakapo.” Aíyaka kasu rokoa pukua ²³ he numua pauraka Yasu ipi wasápo. Wasakipoko, atifo kára peraka kasu tua he wakekeraka kasuane kenepesahopo. ²⁴ Keneppeakorakano asekea, aporo hakāsa puramo Yasu maturikia someraka, “Unihaeo, Unihaeo, kasu keneperaka isu he nekea kukua keasireapo.” Airakano Yasu turikia pukua atifoaki soko, he kupaki soko someraka, “Farasie,” airakano atifo soko, he kupa soko, faraka he auasapo.

²⁵ Auarakano asekea, Yasumo iaki someraka, “Marirakano repo anoaki kakaro himu hakásaraka hemakapurakanafare?” Airakano i namoraka fofaraka, namina susu someraka, “Yasumo someane atifomo soko he kupamo soko kakimaka fáne,” aisapo. Farakano asekea ipu someraka, “Aporoane eparakapo,” aisapo.

Yatafumo aporo ho masa Yasumo mafasane oyapo.

Matiu 8:28-34; Maka 5:1-20

²⁶ Kariri hauaka aeyaka he kekeia kaya á ipu kasu rokoa hikia, taku ra Keresa hauaka á pausapo. ²⁷⁻²⁹ Á pauraka, kasu yia kita hukumarekeia, metakarikia hisiapo. Arirakano ape make tameyia aporo meta yatafumo ipi ho masane reapo. Arirakano Yasu hinaka reke aseane, apea yatafumo aporo ho masamo Yasu sapenako perakano asesapo. Aseane, aporoane maiya káramo pasu osohoanafonoraka reke, apea wakanafonoraka aporo kusua taena kunikia á waká reapo. Maiya káramo aporoane yatafumo ho maka, efera hunia soko ho maka, asiane aporoane aporo metakiramo asekea risike, senemo hokonoa taporaka, korakea soko taporaka, asiane ipi kara wakapuraka seneane mokorutusapo. Mokoruturaka nena yaoa yatafumo e karikia pusuapo. Pusua yao aeyaka e perakano asekea, Yasumo yatafuaki someraka, “Aporo one nómo metakarikia, né pusie.” Airakano aporoamo Yasu asesa maiya yiamo aporoane himura yatafu rekerakano epo sakepamo wáraka, “Yasuo, né namo kakaro Unihae Kotimo hokosapo. Nómo ano mayiakakosare? Nómo anoaki kau terane kakakopo.”

³⁰ Airakano Yasumo eaki someraka, “Ne yano motosa epare?” Airakano aporoane yatafu mukisamo e ho masasamo, yatafumo someraka, “Ano yano motosa Mukisapo.

³¹ Hauaka watikisa kutu matoa isu pusiehokopo.”

³² Airakano aseane saro yakai ūri kakafaea risike makata nenaka risikino asekea someraka, “Nómo isu pusierakane saro tua isu risikiako pusiesie.” Airakano Yasumo someraka, “Ao, ayisie.” Aisapo. ³³ Airakano yatafumo aporo ho masane i metakarikia pukua, saro tua risiapo. Saro tua risikirakano, saro su ūri kakafae aeyaka foforaka sosonoraka peraka, he fesere mosakipoko aeyaka eteraka he numua hurupeperaka he nekea kukua kesapo.

³⁴ Kukua kerakano asekea saro asekea risia aporoane teketarikia pukua, aporo taonea risiaki soko, aporo ape kekepoa risiaki soko, makata su ipu asesane somesapo.

³⁵ Somerakano aporo hinamo suamo makata somesane aseako pesapo. Yasu rea i peraka aseane, yatafumo aporo ho masa mafasane Yasu korake makeraka tameyia kake, koteaka hemakapukua, pasu osoraka kakeno asesapo. Aseraka yia i namosapo. ³⁶ Asiamo asekea aporo hinamo i poparipuraka, aporo hinamo metakiraki someraka, “Yatafumo aporo ho masane Yasumo uyáka mafasapo,” aisapo.

³⁷ Aisane Keresa hauaka risia aporo hinamo suamo kaikia ipu namo kakaro namoraka Yasuaki someraka “Isiapo hauakane metakarikia pusie.” Airakano Yasu paripukusakipoko kasua ripasapo. ³⁸ Riparakano aporo ho masa mafasa amo someraka, “Ano néyaki hakásä peakoripo.” Airakano Yasumo someraka, ³⁹ “Wae, né ní apea paripusie. Kotimo né ararerakasane somehoanie.” Airakano aporoane paripukua, ipi apea aporo hinamo suaki someraka, “Yasumo ano uyaka araresapo,” aisapo.

Hinamo hokosa kusua Yasumo maturikia taesane oyapo. Arirakano hinamo meta makata takamasamo Yasumo pasua sakaihoane mafasane oyapo.

Matiu 9:18-26; Maka 5:21-43

⁴⁰ Yasu pariperakariamo aporo hinamo yakai sarimaraka kau risiapo. Kau risi-akipoko Yasu pariperakano asekea ipu sesésapo. ⁴¹⁻⁴² Arirakano Yu aporomo sarimana ape asekea rea aporo ipi yano motosa Yairasepo. Epo ipi hinamo hokosa hakásä nine kayapo. Masira ane ipi kake keremisi kenosu faraka, ipi makata takamaraka kukuko makerakano asekea, Yairasemo Yasuaki somehoko pesapo. Pekea Yasu korake kekenoyia, kakuna porokoa kake someraka, “Nōmo apea né peae.” Airakano Yasu Yairasemo apea

pukusakipoko, puraka reke, aporo hinamo yakai sarimasakipoko, Yasu puraka taperaka kafukua pusuapo.

⁴³ Pusua maiya amo hinamo meta iyaki hakāsa pusuapo. Hinamo pusuane keremisi keno sumo wake apea makama yiarakaka makata takamasa kayapo. Kaya ane mitikoromo soko sia mafasafapo. ⁴⁴ Hinamoane Yasu patera aeyaka pekea, Yasumo pasu kea sakaisapo. Sakaihoane wake ape makama yiarakaka kayane wate foakayia fasapo.

⁴⁵ Farakano Yasumo someraka, “Ano sakairakahoane epamo sakairakayiare?” Airakano ipu suamo someraka, “Wae, né isiapo sakairakayiafapo.” Airakano Pitamo someraka, “Aporo hinamo yakaisakipoko ne hisirimaka purakayiafapo.” ⁴⁶ Airakano Yasumo someraka, “Ano wakapuane purakarakano kaikia, aporo metamo ano sakairakahaoapo.”

⁴⁷ Airakano hinamoamo hemakapuraka, “Yasumo ipi makata su hemakapurapo. Nōmo mahameane siahoasifareapo.” Aiyaka hemakapuraka ipi hamisisiraka, Yasu rea kakuna porokoa kake, aporo hinamo suamo kaiyisimo someraka, “Ano makata takamasane mafahoasimo, Yasumo pasua sakairakayiafapo. Sakaihoane ano makata takamasane wate foakayia fasapo.” ⁴⁸ Airakano Yasumo someraka, “Hinamo neo, nōmo anoaki himu hakasaraka hemaka apura yiamo, né makata takamasane mafarakayiafapo. Né tau koteaka kakako pusie,” aisapo.

⁴⁹ Aisa maiya amo Yu aporomo sarimana ape asekeea rea aporo Yairasemo ape aeyaka aporo meta pekea eaki someraka, “Nōmo ní hinamo hokosane kusuapo. Asiasamo Tisaki efera hunia somehokopo.” ⁵⁰ Airakano Yasumo kaikia Yairaseaki someraka, “Namohokopo. Anoaki himu hakasaraka hemakapukua rekeanie. Nōmo ní hokosa makata takamasane nōmo mafahokosapo,” aiyaka Yasumo somesapo. ⁵¹⁻⁵³ Asiamo Yasu pukua apea pauraka aseane, hokosa kusuakipoko ipu kara hihiripuraka risikino asekeea, iaki Yasumo someraka, “Hihiripuhokopo. Hokosa ane kusuafapo. Ipi wasápo.” Airakano ipu hokosa kakaro kusikeno asekeea, ipu Yasuaki hokomarekeea keasapo. Kearakano asekeea, Yasumo iaki apea yorokoa peakopo, aisapo. Yasumo ipi aporo hakāsa pura Pita soko, Yone soko, Yamese soko, hokosa wafaya soko, kaīya soko, hakāsa karikia apea forosoraka ape tua pukua, ⁵⁴ hokosa kusuane hokonoa maka someraka, “Masira, ne turikia pusie,” aisapo.

⁵⁵ Airakano ipi hoane ipi kaua paripekeea paoraka ipi turikia pusuapo. Turikia purarakano asekeea, Yasumo someraka, “Hokosaki makata nakosa kasie,” aisapo. ⁵⁶ Airakano hokosa amo ipi wafayape kaīya tetā kakaro kara fofasapo. Fofarakano Yasumo tetāki someraka, “Aporo hinamo suaki tetápo makata asesane somehokopo,” aiyaka Yasumo somesapo.

9

Yasumo ipi aporo hakāsa pura kenosumo makata rakiako pusiesane oyapo.

Matiu 10:7-11; Maka 6:6-13

¹ Yasumo ipi aporo kenosumo ipu makata rakirane rakisimo, wakapu kakakosakipoko, iaki peaesapo. Perakano asekeea, ipu yatafumo aporo ho masane metakarikia pusiehoasimo iaki wakapu kasapo. Arirakano aporo makata tasane soko mafahoasimo iaki wakapu kasapo. ² Wakapu karakano i pukusakipoko, Yasumo iaki someraka, “Aporo hinamo suaki úyaka somehoanie. ‘Kotimo aporo hinamo unihaeaka asekeea rekenapo,’ aihoanie. Arirakano aporo hinamo makata tasane soko mafahoanie.” ³ Aiyaka Yasumo iaki some meta someraka, “Re kimisi puraka makata mokoa pukupo. Tatia soko, ku soko, makata nakosa soko, mone soko, mokoa pukupo. Pasu tetā mokoa pukupo. Pasu hakāsa maka puane siahoasireapo.” ⁴ Re pukua taonea pauraka, ape wafayamo reane pasimaka ipi apea karikia purakano apea yorokoa, ape á waka risikianie. Waka risike, ape meta mokome wakako pukupo. Waka risia ape aeyaka, taone meta punie. ⁵ Arirakano taone meta peane ape wafayamo re tereraka pasimakanafonarakano, taoneane repo metakarikia puraka, namina hisisane Kotimo asekeea sesenafapo.

Aiyaka ipu hemakapusimo, yapakeraka korakea kokotonemosane rerakatapikia marekea metakarikia punie.” Aiyaka Yasumo somesapo. ⁶ Arirakano i pukua, ape sumu kekepo sua pukua, Yasumo some kotesane some karaka, aporo hinamo makata tasane mafasapo. Ape sumu sua ayiáka rakipe pusuapo.

Herotemo Yasuane himetesane oyapo.

Matiu 14:1-2; Maka 6:14-16

⁷ Arirakano Yasumo makata wakapuaka rakisiane, Herote Kariri hauaka asekea rea aporomo kaisiapo. Aporo metakiramo someraka, “Yone kusuane maturikia taesapo.” Arirakano aporo metakiramo soko kaikia someraka, “Makata wakapuaka rakisiane, Yone kusuane maturikia taeraka epo wakapuaka rakiranareapo.” Airakano some ane Herotemo kaikia mahimeteraka reke, kepoane koteaka hemakapusuafapo. ⁸ Arirakano makata wakapuaka rakisiane aporo metakiramo kaikia someraka, “Iraíya pariperakanareapo.” Airakano kaikia aporo metakiramo kaikia someraka, “Wate fana porofete aporo kusuane hakása meta mafarearaka rekenareapo.” Airakano Herotemo kaikia mahimeteraka ⁹ epo someraka, “Yone mawiane nōmo patekemasie, airakano patekemasapo. Aporomo makata wakapuaka rakisiapakasuane epare? Eane nōmo asekori.” Aiyaka Herotemo hemakapusuapo.

Aporo fae taoseneaki (5,000) Yasumo farawa kasane oyapo.

Matiu 14:13-21; Maka 6:30-44; Yone 6:1-14

¹⁰ Yasumo ipi tarira aporo popariperaka, ipu makata rakisiane Yasuaki somesapo. Someaka farakano, aporo hinamo suane yia metakarikia, Yasumo ipi aporo hakása purane hákasa karikia, Pesaita taonea pusuapo. ¹¹ I pusuapakano aporo hinamo metakira keseke kekemarape pusuapo. I pusuakipoko keseke kekemarape perakano Yasumo asekea peaesapo. Perakano asekea Yasu seseraka reke Kotimo aporo hinamo unihaeaka asekea reane, i suaki somesapo. Aiyaka someaka aporo hinamo metakira makata tasane soko Yasumo mafasapo.

¹² Samapu maiya tuakeramo, Yasuaki ipi aporo hakása puramo someraka, “Aporo hinamo yakai pesane pusie, aisie. Ape sumu fetea soko metao, ima yao ape manoa soko metao á pusie, aisie. Asiamo one yao kauanesasamo wo ape rekenafapo. Asiamo namina ape fetea waráka makata nakosa mokoako, namina ape wasá á pusie, aisie.”

¹³ Airakano Yasumo someraka, “Repo iaki makata nakosa kakanie.” Airakano aporo hakása puramo someraka, “Isiapo makata nakosane farawa kakoreasu, pokoa tetá ayiáka tokenapo. Makata nakosa meta kakenafapo. Aporo suamo makata nakosane isiapo ropohoko pusimo nōmo hemakapurakarire?” Aisapo. ¹⁴ Asiamo aporo ane aseane, fae taosene ane (5,000) risikino asekea, aporo hakása puraki Yasumo someraka, “Aporo fifiti (50) kikisiraka taku á toaesie. Aporo fifiti (50) meta kikisiraka taku á toaesie. Su ayiáka tokoasimo somesie.”

¹⁵ Airakano aporo hakása puramo aporo fifitiaki (50) someraka, “Re su toae.” Airakano toapo. ¹⁶ Su tokeno asekea, farawa kakoreasu pokoa tetá ane Yasumo maka reke, hepene yapura asekea, Kotiaki suseraka kurikuriraka, faraka, mosoraka, aporo hakása puraki karaka someraka, “Aporo suane takusie.” ¹⁷ Airakano ipu takusuapo. Takurakano, aporo hinamo suamo katu nekea, siarakano, farawa momo yia tokeno, mate kenosua kekea komarusuapo.

“Yasu, ne Keresopo,” aiyaka Pitamo somesane oyapo.

Matiu 16:13-19; Maka 8:27-30

¹⁸ Maiya metamo Yasu ipi haku reke, kurikurirakano, aporo hakása pura suane pesapo. Perakano Yasumo iaki someraka, “Aporo hinamo suamo anoane epapakasure?”

¹⁹ Airakano aporo hakása puramo someraka, “Aporo metakiramo someraka, ‘Né, Yone he tapukumarerane turikia pureapo.’ Aiyaka somerakasupo. Arirakano aporo metakiramo someraka, ‘Né, Iraíyareapo,’ aiyaka somerakasupo. Arirakano aporo metakiramo someraka, ‘Né, porofete aporo fana kusua hakása meta mafarearaka paripereapo,’ airakasupo.”

²⁰ Airakano iaki Yasumo someraka, “Repo hemakapusuane, ano epapaka hemakapurakarire?” Airakano Pitamo someraka, “Kotimo Unihaeaka rekeasimo murikimasa aporo, Keresoane nereapo.” ²¹ Airakano aporo hakāsa puraki Yasumo someraka, “Ano Keresoane, aporo metaki hufitaeraka somehokopo,” aisapo.

Yape menomo Yasumo someraka, “Aporomo ano kukusimo rukusapo.” Aíyaka somesane oyapo.

Matiu 16:20-28; Maka 8:30-9:1

²² Yasumo ipi aporo hakāsa puraki someraka, “Aporomanomo Tákeane anopo. Keseke ano kau kára teraka himu nakosapo. Yu aporo sisimamo soko, pirisiti aporo káramo soko, Kotimo somemane tisa aporomo soko, anoane hisiraka anoaki patera tarikia ano kukusimo rukusapo. Rusuane, sere tetá farakano, sere isiamo ano maturikia taehokosapo.” Aíyaka Yasumo iaki some kasapo.

²³ Arirakano Yasumo aporo hinamo suaki someraka, “Repo ano patera asekone, ano kukusimo ira matopesa paremareakosane nōmo nī makatiraka apura ayiáka, repo soko maíya suamo repo namina hemakapusuane metakarikia, ira matopesa maka puraka ano finihaoa re soko fini kafo kepe punie.

²⁴ Asiamo aporo hinamo hakasa meta hauaka wo areamo hitaferaka rekeakosane hakasa hemakapukua rakiraka rekeno, eane Kotiyaki yaiya rekeakosafapo. Arirakano aporo hinamo hakāsa metamo someraka, ‘Yasupoko ano kuane soko siahoasireapo.’ Aíyaka kurane hemakuprafaraka rekeno, e ipiane Kotiyaki yaiya rekeakosapo. ²⁵ Arirakano aporo hinamo hakāsa meta, hauaka kara wo makata kemo suane mokoa sarimaraka reke, Kotiyaki yaiya rerane epo metakarikia rekeno, eane akura maiya amo makata yakapamo e ararehokosare? Wae. Makata metamo e ararehokosane kakenafapo.

²⁶ Arirakano aporo hinamo hakāsa metamo ano metakarikia, arirakano nōmo someane soko metakarikia rekeno, Aporomanomo Táke ano nī pariapera maiya amo, eane soko nōmo metakariakosapo. Ano faesayaki, nōmo Atamo faesayaki, hepene aporo kotesa susuyaki pariapera maiya amo aporo hinamomo ano metakirakano iane soko nōmo metakariakosapo. ²⁷ Nōmo reaki kakaro somerakaripo. Re metakira yumo risiane kukusiraka arisia amo, aporo hinamomo Kotiaki himu hakásaraka hemakapukua risiane Kotimo unihaeaka asekea rekeno, i asekosapo.” Aíyaka Yasumo somesapo.

Yasu kau hakuraka faesane oyapo.

Matiu 17:1-8; Maka 9:2-8

²⁸ Sere karisu faraka, Yasumo kurikurihoko ūri teraya hinaka Pita soko, Yone soko, Yamese soko, i karikia ūria hikia kurikurisapo. ²⁹ Yasu kurikuriraka rekeno, ipu Yasu kaua aseane Yasu ipi hikumisiane hakuraka reke, arirakano ipi pasu ososane namo kakaro pakaesapo. Pakaesane aseraka i hi kakanosapo. ³⁰ Arirakano Mosesepo Iraíya tetā soko faesayaki wate foakayia faserepekea risike, tetapō Yasuaki somesapo. ³¹ Yasumo Kotimo hemakapusuane su rakikia maraka, Yarusarame sitia kukusapo. Asiamo Yasumo hauaka one metakariakosane tetapō Yasuaki somesapo.

³² Somerakano, Pita, Yamese, Yone, i su wakako nekeraka toane, kakaro wakakesapo. Wakakesane turikia tarikia aseane Yasu faesayaki rekeno asesapo. Aseane aporo tetá Yasuyaki hakāsa risikino asesapo. ³³ Aporo tetā ane Yasu metakarikia hiakorakano, Pitamo someraka, “Yasuo, isu isina o pesane kotesapo. Isiapo ape mano isia kiakosapo. Meta nepoko, meta Mosesepoko, meta Iraiýapoko, ayiáka kiakosapo.” Aíyaka Pitamo somesapo. Pitamo nenakamaka mokome somesapo. Koteaka hemakapukua somesafapo.

³⁴ Pitamo somesa maiya amo, ako peraka iane karotapisiapo. Akomo karotapirakano, Yasumo ipi aporo hakāsa purane namoraka himu fasapo. ³⁵ Himu farakano, ako karotapisia arakaru aeyaka memo someraka, “Eane nōmo nī hokosapo. Nōmo murikimaka pusiesane epo. Asiamo epo someane repo kakimakanie.” ³⁶ Aíyaka makata someaka faraka Yasu ipi haku yia rekeno asesapo. Asiamo makata asesa maiya amo, Yasumo ipi aporo hakāsa puramo mahamekea somesafapo.

Yatafumo hokosa ho masane Yasumo yatafuaki metakarikia pusiesane oyapo.
Matiu 17:14-21; Maka 9:14-27

³⁷ Mituru fiarakano aporo isia Yasuyaki ūriane metakarikia pusuapo. I peraka, aporo hinamo yakaimo Yasuane sapenako pesapo. ³⁸ Aporo hinamo yakai arakarua aporo hakasa metamo wáraka, “Tisao, nōmo ní aporo hokosa yatafumo ho masapo. Nōmo ní aporo hokosa meta rekenafapo. Hokosa hakasa nine yatafumo ho masapo. ³⁹ Yatafumo e ho marakano ipi wáraka wiriraka, mokoweraka, akai momotoroyaki, akai kamusakaeyaki, mokowekea kara mokoatikiraka haru metakarirafapo. ⁴⁰ Asiamo nōmo ní aporo hakāsa puraki nōmo someraka, ‘Yatafuane ipi pusiesie.’ Airakano ipu pusiehoane yatafuane pusuafapo. Yaiya rekenapo.”

⁴¹ Airakano aporo suaki Yasumo someraka, “Aporo hinamo maiya omo arisiamo Koti-aki himu hakásaraka hemakapukua risikirifapo. Maiya suamo repo hasaka hemakapukua risikino, nōmo repoko maiya suamo wafororaka rakiraka rekenapo. Nōmo hokosa wo karikia peae.” Aisapo. ⁴² Asiamo hokosane karikia perakano aseane, yatafumo ho maka hauaka atura rukumakasuraka wareke mokowerakano asesapo. Asekea yatafuaki Yasumo pusiesapo. Airakano yatafu metakarikia pusuapo. Purakano asekea, hokosa mafasane Yasumo maka ipi wafayaki kaka someraka, “Nōmo ní hokosapo. Ní masie.” ⁴³ Airakano aporo suamo aseraka fofaraka someraka, “Koti ipi kárapo. Ipi wakapu kára rekenapo,” aisapo.

Yape tetámo Yasumo someraka, “Aporomo ano kukusimo rukusapo.” Aisane oyapo.
Matiu 17:22-23; Maka 9:30-32

Arirakano aporo hinamo su fofaraka risikino, aporo hakāsa puraki Yasumo someraka, ⁴⁴ “Nōmo some kakakoana one, repo meraruhokopo. Aporomanomo Tákeane anopo. Keseke ano rusua kukusimo aporomo ano parakehokosapo.” ⁴⁵ Airakano ipu kaikia hemakapunafonorakano kepoane Kotimo tarisiafapo. Tarianafonorakano ipu himete-sapo. Kepoane hemakapusakipoko Yasuaki ipu kaiyakosane karekesapo.

Aporo fanaraka reramo kepoane oyapo.
Matiu 18:1-5; Maka 9:33-37

⁴⁶ Aporo hakāsa puramo namina yia tafatafaraka someraka, “Ano fanapo.” Airakano metamo someraka, “Wae, ano fanapo.” Aiyaka tafatafaraka somesapo. ⁴⁷ Aiyáka somerakano ipu hemakapusuane Yasumo asesapo. Asekea hokosa hakāsa meta eane makeraka rekeasimo, Yasumo ipi karikia pekea someraka, ⁴⁸ “Aporomo ano hemakapusakipoko hokosa ásiane ararerakanone, anoane soko ararerakanapo. Ano arareraka maseserakanone, ano pusiesa Kotiane soko maseserakanapo. Asiamo aporo meta ipi kesekeea rekenone aporoane ipi fananapo,” aisapo.

Aporo metamo makata rakisiane oyapo.
Maka 9:38-40

⁴⁹ Yonemo someraka, “Tisao, isiapo aseane aporo metamo né yano hokoa aporo meta yatafumo ho masane pusierakano pusuapo. Purakano asekea, isiapo someraka, ‘Né Yasumo aporo hakāsa purayaki paosafapo. Paohoanafonosasamo yatafu pusiekopoko,’ aisapo.” ⁵⁰ Airakano Yasumo someraka, “Repo aihokopo. Aporo metamo isuyaki weanafonoraka isu ararerakanapo.” Aisapo.

“Yasu né peakopo,” aisane oyapo.

⁵¹ Yasu hepene yapura hiako makeraka rea maiya amo, Yasumo wakapuaka hemakapukira, “Ano Yarusarame sitia hinakapo.” Aiyaka hemakapukua, hinaka aporo metakiraki Yasumo someraka, ⁵² “Re fana hikia, Sameria hauaka á, taone meta hikia, ape wakako maropohoko hisie. Hikia ape maroposakipoko ano kesekeea peakosapo.” Airakano i ape marepohoko Sameria hauaka á hisiapo. ⁵³ Hikia taonea paurakano, Sameria aporomo someraka, “Re Yarusarame sitia hiakosapakae. Re á hiakosakipoko ape wo wayáne siahoasifareapo.” Aiyaka Yu aporoane soko, Yarusarame sitiáne soko Sameria aporomo hisisapo.

⁵⁴ Hisirakano asekea Yonepe Yamese tetapō someraka, “Unihaeo. Aporoane hepene aeyaka ira rufimo inaka kukusimo wáhoaere?” ⁵⁵ Airakano Yasu rekeako pariraka tetaki wakapuaka someraka, “Aíyaka somehokopo. Tetápo watikiaka hemaka apure.” ⁵⁶ Aíyaka ipu taoneane metakarikia taone meta á hisiapo.

“Yasu ne patera asekosapo.” Aíyaka aporo metakiramo somesa nine himu tetáraka risiane oyapo.

Matiu 8:19-22

⁵⁷ Namina ikia kara hisia maiya amo, ikia otoa aporo metamo Yasuaki someraka, “Né taku ra purakano soko, taku ro purakano soko, sapeaka hinakano soko, ano neyaki hakāsa puraka rekeakosapo.” ⁵⁸ Airakano aporoane ipi kau asekosakipoko Yasumo someraka, “Yákasa ipi hauaka rapia warápo. Mena ipi usi huturua warápo. Ipu ape waráne risikinapo. Arirakano ano Aporomanomo Tákeane anopo. Nōmo ape wará soko uni katane soko rekenafapo.” Aíyaka Yasumo somesapo.

⁵⁹ Aporo metaki Yasumo someraka, “Ano patera asesie.” Airakano aporoamo someraka, “Ano haru peakosafapo. Nōmo nī ata kurakano, hauaka marekea keseke néyaki peakosapo.” ⁶⁰ Aíyaka epo ipi hemakapusuane rakiakosakipoko, Yasumo someane kaisia fasikiraka metakarisiapo. Asiamo Yasumo someraka, “Aporo ano patera asekeanafonosane, e aporo kusua asiapo. Asiamo aporo kusua asiasamo epo ipi aporo kusuane hauaka mareane siahoasireapo. Asiamo ne ano patera aseako hemakapuraka, né pukua, aporo hinamo suaki someraka, ‘Kotimo ipi aporo hinamo suane unihaeaka asekea rekenapo.’ Aíyaka somehoko pusie,” aisapo.

⁶¹ Airakano aporo metamo Yasuaki someraka, “Yasuo, ano né patera asekosapoko asiane, fana amaki soko, ataki soko, papāki soko, maeaki soko, i suaki ayapahoko apea pukusapo. Ayaparaka marekea keseke paripekea néyaki hakāsa pukusapo.” ⁶² Airakano Yasumo someraka, “Aporomo irawae maka kasu táriraka, rokoa puraka, maiya suamo patera takua parieseane siahoasifareapo.* Aporo patera pesa sapea pariaserakanone ane, Kotimo unihaeaka asekea rekeakosafapo,” aíyaka Yasumo somesapo.

10

Aporo seweneti tu (72) Yasumo murikimasane oyapo.

¹ Yasumo aporo metakira seweneti tumo (72) ipi someane some kape pusimo i murikimasapo. Murikimaka epo someraka, “Re fana pusie. Taone metakira soko, hauaka metakira soko, re tetá tetákara pusie. Arirakano re fana pusuakipoko ano keseke peakosapo.*

² Hao, kaisie. Ira wate sū kárareapo. Asiane ira wate namo tuakosane aporo hukusireapo. Asiamo ira wate susane aporo raipamo tuako pusiehoasimo, hemo wafayaki kurikurihoanie. ³ Repo makata rakiako pusie. Reane saro sipi auasa asiapo. Aporo watikisane saro wofe† irirasa asia risiakipoko, nōmo re saro sipi auasa asiane pusierakanapo.

⁴ Asiamo re puraka, pausia mone makesane mokoa pukupo. Aku soko, tamaka soko, mokoa pukupo. Re ikia kara apuramo aporo meta sapenenaka e hokono mokoa maiya káramo yia risikiakopo. Nōmo makata rakirane himu hakásaraka hemakapuruka rakinie. ⁵ Arirakano re pukua apea pauraka fana úyaka somehoanie. ‘Aporo ape wafaya né tau auaraka rekeasimo Kotimo né ararehokosapo.’ ⁶ Aíyaka somehoane aporo ane tau auaraka rekeanafonorakano asekea, nōmo tau auaraka rerane aporo akiyaki rekeakosafapo. Metakarikia, ipi néyaki rekeako paripeakosapo.

* 9:62: Yasumo some kepoane oyapo. Repo ano patera asekea puraka yia makata fana metakarisiane yaiya hemakapuruka risike siahoasifareapo. Anoaki himu hakásaraka hemakapuruka ano patera kekemarape puraka risikianie. * 10:1: Aporo metakiramo Kiriki meane menoraka, hemakapuraka, Yasumo aporo seweneti (70) hákasa murikimasapo. † 10:3: Saro wofeane yákasa asia popakepo. Saro wofeane isiapo hauaka wo risikinafapo. Saro wofemo makata kakaya hitafe soko amano soko rukua menapo.

⁷ Arirakano ape hakása á waka reke aseane, aporo meromo néaki makata nakosa soko, he soko, karakano asekea nanie. Makata rakira aporomo makata rakisiakipoko, ipi makata ropoane makata nakosa akara ayapo. Ape meta á soko, ape meta á soko, ayíáka mokome pukupo. Ape sumu meta á pukusakipoko né ní ape wasá aeyaka punie. ⁸ Pukua taone meta á pauraka aseane, aporo ape wafayamo né pasimaka tereraka, makata nakosa karakano, makata ane nanie. ⁹ Aporo makata tasa mafahoanie. Mafaraka someraka, ‘Koti unihaeaka reane, reyaki makeraka rekenapo.’ Aihoanie.

¹⁰ Arirakano né pukua, taone meta á pauhoane, aporo ape wafayamo né tereraka pasimakanafonorakano, né hauaka moroa pukua á reke someraka, ¹¹ ‘Repo taone wo kokotonemosane ano korakea pararisiane rerakatapikia marerakanapo. Repo namina hisirakane Kotimo seserakanafapo. Aíyaka repo hemakapusimo kokotonomo rerakatapikia marerakanapo. Asiamo Koti unihaeaka reane nōmo reaki somehoko pesapo. Asiane repo koaretaesasamo ano taone meta purakanapo.’ Aihoanie.

¹² Hao, kaisie. Hukuarura maiya amo Sotome aporo hinamo iane hukurukusane wakasema kárahokosapo. Asiamo taone meta á repo some kayane aporo hinamomo kakipayaraka risikinone, taoneane hukurukusane namo kakaro kárahokosapo,” aíyaka Yasumo somesapo.

Yasumo wakapuaka rakisiane asesa aporomo namina himu watikisane metakarikia risikiako parihoanafonorakano i fanasihokosane oyapo.

Matiu 11:20-24

¹³ Arirakano Yasumo someraka, “Uao, enahoasifareapo. Korasini aporo hinamo reo, Pesaita aporo hinamo reo, repo taonea Kotimo wakapumo hemakapukua rakirane nōmo rakisiapo. Repo aserakayia repo makata watikisane metakarianafonorakano, reane kára fanasihokosapo. Arirakano Taia taonea soko, Saetone taonea soko, Yu aporohoanafonosa taonea risiamo nōmo makata rakirakano ipu asesa satiki, makata watikisane wate fana metakariafunupo. Metakarikia ipu makata watikiaka rakisiasamo i kaiyaraka risike, kaua ororomo paikia pasu pitikini makafirikia arupekeea ayíáka tokofunupo. Ayíáka toke ipu makata watikisane metakarikia risikiako parihoafunupo. Asiane ipu nōmo makata rakisiane aseafareapo. ¹⁴ Asiamo hukuarura maiya amo Taia aporo hinamo soko, Saetone aporo hinamo soko, wakasema kára hukurukua fanasihokosapo. Arirakano repo aserakayia risikiako parihoanafonosakipoko, reane namo kakaro kára hukurukua fanasihokosapo. ¹⁵ Kapaneame aporo hinamo reo, repo hemakapuraka, ‘Isu hokopukua risikiakoripo.’ Aíyaka hemakapukua, hepene yapurane máfana ayíáka repo namina yano motosa hákasa máfahoko hemaka apure. Asiamo keseke re fanasiraka heao hauaka atura re mokoasuhokosapo,” aíyaka Yasumo somesapo.

¹⁶ Yasumo aporo seweneti tuaki (72) someraka, “Repo someane aporomo kairakanano ane, nōmo someane kairakanapo. Reaki patera tarirakano, ane anoaki soko, patera tarirakanapo. Anoaki patera tarirakano, ano pusiesa aporoaki soko, patera tarirakanapo,” aíyaka Yasumo somesapo.

Aporo sewenetitumo (72) makata rakikia faraka poparipesane oyapo.

¹⁷ Aporo seweneti tu (72) pusuane seseaka popariperaka someraka, “Unihaeo, né yano hokoa yatafu pusierakano pusuapo. Isiapo someamo iane hurutapisiapo.” ¹⁸ Airakano Yasumo iaki someraka “Satane hauaka wo huruperaka yamakere piakaena ayíáka huruperakano nōmo asesapo. ¹⁹ Hao, kaisie. Nōmo reaki wakapu kára kasapo. Asiamo hesekeea repo finihoane rukunesa kukusafapo. Hanutanomo re rukunesa kupeakosafapo. Satanemo wareane repo hurutapiakosapo. Makata hakása metamo soko re mokoatikihokosafapo. ²⁰ Repo yatafu pusierakano pusuane wakasema sesehoanie. Arirakano hepene yapura repo yanoane poparaka maresasamo re kakaro kára sesehoanie,” aisapo.

Yasumo ipi kurikurisane oyapo.

Matiu 11:25-27; 13:16-17

²¹ Maiya amo Ho Kotesamo Yasuane masesesapo. Maseserakano epo someraka, “Atao, hepene yapura soko, hauaka wo soko, nōmo unihaeaka asekea rekenapo. Asiamo aporomo makata su enomasaki‡ nōmo makata faremaresane mafekemaraka tarirafapo. Asiane nōmo ní hokosa asia aki hákasa nōmo ní makata namo faremaresane mafeke-maraka tarirapo. Asiamo neaki suserakanapo. Atao, nōmo ní hemakapusua aporo aki tarirapo.” Aiyaka Yasumo kurikurisapo.

²² Arirakano Yasumo someraka, “Makata suamo kepoane nōmo Atamo anoaki tarisi-apo. Nōmo hemakapusuane soko, nōmo ainane soko nōmo Atamo ipi hakásamo asekea hemakapurapo. Arirakano nōmo Atamo hemakapusuane soko, epo ainane soko, nōmo ní hákasamo asekea hemakapurapo. Arirakano aporo hinamo metaki nōmo ní tariako hemakapukua, tarirakano, epo Atamo ipi ainane soko, hemakapurane soko, asekea hemakapukusapo.” Aisapo.

²³ Yasumo ipi aporo hakásá puraki asekea someraka, “Repo namina himo asesasamo, reane seseaka risikianie. ²⁴ Repo makata asesane Kotimo some kará porofete aporo yakaimo soko, kamani aporo unihaeemo soko, aseakoripo, aisa nine asesafapo. Repo kaisiane ipu kaiyakoripo, aisa nine kaisiafapo,” aiyaka Yasumo somesapo.

Sameria aporomo koteaka rakisiane oyapo.

²⁵ Maiya metamo Kotimo somemane kaira aporo Yasu rea peraka, Yasumo hasaka somehoasimo kau aseakosakipoko someraka, “Tisao, ano yaiya rekeakosakipoko makata yakapa rakiakosare?” ²⁶ Airakano Yasumo someraka, “Kotimo somemane popasane yakapa popasare? Nōmo yakapa menosare?”

²⁷ Airakano epo someraka, “Kotiane nōmo unihaeapo. Unihaeaki nōmo himu tumurumo hemakapunie. Nōmo homo soko eaki hemakapunie. Nōmo wakapumo soko eaki kataka mareanie. Nōmo himu hemakapuramo soko eaki hemakapunie. Arirakano nōmo níane himu tumurumo hemaka apura ayiáka, nōmo ní aporo tákeane soko, ayiáka himu tumurumo hemakapunie.” Aiyaka popahoareapo. *(Lo 6:5; Wok Pris 19:18)*

²⁸ Airakano Yasumo someraka, “Kakarorakae. Nōmo someraka ane kakimaka ayiáka rakirakanone ane, né yaiya rekeakosapo.” ²⁹ Airakano aporoamo ipi nine makáraraka sikiraka someraka, “Nōmo aporo tákeane epare?”

³⁰ Airakano Yasumo taku meaka someraka, “Aporo hakásá meta Yarusarame sitiane metakarikia, Yariko taonea pukusakipoko, ikia kara á puane hakimora aporomo e rusuapo. Rukua motokoa pasu ososane horomaka, kukuko makerakano e metakarikia pusuapo. ³¹ Pusuakipoko aporo rusuane kukurakano wareakipoko, pirisiti aporo ipi nenakamaka meraruamo peraka aseane, aporo rusuane ikia kara fe takua warekano, pirisiti aporoane ipi koaraka ikia kara fe taku aeyaka pusuapo. ³² Pirisiti aporo pusuakipoko, Rífai aporo meta, Kotimo apea raiparaka makata rakisia aporoane pekea aseane, aporo rusuane warekeno asekea, ipi asekepayarakaka metakarikia koaraka, ikia kara fe taku aeyaka pusuapo.

³³ Arirakano Rífai aporo pusuakipoko, Sameria§ aporo kesekea peraka aseane aporo rusua warekeno epo asekea kamenakaraka, ³⁴ aporo rusuane warekeno asekea, wera waene heyaki munamuna asia sarimaraka, aporo rusuane kaua rekemarekeea, pasumo taporaka, aporoane maka, epo ipi saro toki matia ripaka marekea ikia kara pusuapo. Pukua ikia kara tipia ape wará reakipoko ape a pukua, ape kakarua yorokoa pusuapo. Pukua aporo rusuane motokoa asekea wasápo. ³⁵ Mituru fiarakano Sameria aporoane ipi puraka, ape wafayaki siufa mone hae tetá karaka, someraka, ‘Ano purakanapo. Aporo rusuane nōmo asekea rekeanie. Asekea reke nōmo epoko makata roposa akipoko ano pariapera maiya amo nōmo ne makata ropo kakakosapo.’ Aiyaka Sameria aporomo somesapo.” ³⁶ Aiyaka Yasumo takumeaka someaka faraka, somemane kaira aporoaki

‡ 10:21: Aporomo makata su enomasaki hemakapusuane metakira Ferese aporopo. Metakira Kotimo somemane tisa aporopo. Kotimo ipi hokosa asiane, Yasumo ipi aporo hakásá pura ayapo. § 10:33: Sameria aporomo Yu aporoane hisiraka kikisiraka risiapo.

someraka, “Aporo rusua amo tākeane epare? Aporo isia pesane epo aporo tākeane epare?”³⁷ Airakano aporoamo someraka, “E araresane ipi aporo tākeane ayapo.” Airakano Yasumo someraka, “Né puraka, aporo ayiáka tākeraka rekeanie,” aisapo.

Matape Maria tetapō apea Yasu makata nako pusuane oyapo.

³⁸ Yasu ipi aporo hakāsa purayaki pukua, apea pauraka aseane, hinamo Matamo e tererakano asekea Matamo apea makata nako pusuapo.³⁹ Pukua apea yorokoa, Matamo ipi apu Maria pekea, Yasumo someane kaiyakosakipoko Yasu kayakipoko e korake kekeno maresayia kayapo.⁴⁰ Kakeno asekea, Matamo himu mahisiraka, ipi makata nakosa kára pairaka reke, makatane hákasa kára hemakapusuapo. Hemakapukua Yasu kayakipoko peraka someraka, “Unihaeo, nōmo nī haku makata nakosa pairakanapo. Nōmo nī hákasa rakirakano, nōmo hemakapurakarire? Nōmo apumo ano ararehoko pusiesie.”

⁴¹ Airakano Yasumo someraka, “Matao, Matao, nōmo makata nakosa hákasa akipoko kára hemakapuraka himu mahisinane kárareapo.⁴² Anakano makata hakásma meta, né forokoa akaye. Makata kotesane Mariamo hemaka apure. Makata kotesane etapo eaki matasohoane siahoasifareapo,” aiyaka Yasumo somesapo.

11

Kurikurinane Yasumo tarisiane oyapo.

Matiu 6:9-13; 7:7-11

¹ Yasu hauaka meta reke ipi kurikuriraka reapo. Kurikuriraka farakano, ipi aporo hakāsa pura hakāsa metamo someraka, “Unihaeo. Isiapo koteaka kurikurihoko isuaki kurikurinane some kasie. Kurikurinane Yone he tapukumareramo ipi aporo hakāsa puraki some kasesupo. Asia ayiáka nōmo soko isuaki some kasie.”² Airakano Yasumo iaki someraka, “Repo kurikuriraka úyaka kurikurihoanie.

Atao, né yano motosa kakaro kára, haku kotesa susuane makama fanahosimoripo.

Aporo su himua ne unihaeaka rekeasimo hemakapurakaripo.

³ Pipu makata nakosane siaraka nasimo kakanie. Ayiáka sere suamo nōmo karáka rekeanie.

⁴ Aporo metamo isuaki mokoatikirakano, isiapo ropo mokoatikinane mafaraka mamerarurakano asekea, isiapo watikisane soko nōmo mafaraka mameraruhoanie. Isu kau asekosane peakohoamo nōmo isu asekea rekeanie.

Aiyaka kurikurihoanie.” Aiyaka Yasumo iaki kurikurinane some kasapo.⁵ Asiamo ipi aporo hakāsa puraki Yasumo takumeaka someraka, “Ere tipiamo re hakāsa meta hikia, ní moremo apea someraka,⁶ ‘Moreo, nōmo apea aporo kimisi pesapo. Nōmo farawa fareapo. Asiamo nōmo farawa isia ano makasie.’⁷ Airakano ape wafaya wareke someraka, ‘Ikia koro mapirkia, roko motokoa, ano warekenapo. Nōmo hokosa soko, ano nīyaki hakāsa wakakesapo. Wakakesasamo neaki makata kakako, ano turikia pukua takahisifareapo. Né ní metakarikia pusie.’ Airakano efera hunia soko someraka, ‘Ano makasie.’ Aiyaka efera hunia soko, ‘Ano makasie.’ Aiyaka nōmo ní moreaki aufirakano makarápo.

⁸ Titi moresakipoko epo makaráfapo. Aufirakano makarápo.⁹ Hao, koteaka kaisie. Makosakipoko ní akaimo kaiyinie. Kairakano Kotimo neaki makakosapo. Aseako koanie. Korakano kokoa aseraka makosapo. Ikia koro ropakamakasimo paroparohoanie. Paroparorakano ropakamakosapo.¹⁰ Asiamo makata mako akaimo kairakano makosapo. Makata aseako korakano kokoa aseakosapo. Nōmo ikia koroa paroparorakano ropaka-makosapo.

¹¹ Repo aporomano hakasa metamo ní hokosamo someraka, ‘Atao, ano pokoa makasie.’ Airakano nōmo ní hokosaki yapakā kakakosare? Wae. Repo hokosaki yapakā kakakosafapo.¹² Arirakano nōmo ní hokosamo someraka, ‘Ano mena hae makasie.’ Airakano hanutano kakakosare? Wae. Repo hokosaki hanutano kakakosafapo.¹³ Asiamo né himu watikisa yamo nōmo ní hokosaki makata kotesa karápo. Makata kotesa

akara ayíáka, nómó Ata hepene yapura reamo soko makata kakakosane, kakaro kara marokeraka kakakosapo. Nómó eaki Ho Kotesa makasie, airakano epo néaki Ho Kotesa kakakosapo,” aíyaka Yasumo somesapo.

“Yasupe Satane tati hakása yiyyareapo.” Aíyaka aporo metakiramo somesane oyapo.

Matiu 12:22-37; Maka 3:20-30

¹⁴ Aporo yatafumo ho maraka me fasa amo koteaka somehoasimo, Yasumo yatafuaki metakarikia pusierakano pusuapo. Purakano asekea, aporo me fasamo koteaka somesapo. Somerakano aporo hinamo sarimasamo kairaka fofaraka someraka, “Siahoasifasa ane, epo ayiane. E aporo eparakapo,” aisapo. ¹⁵ Arirakano aporo metakiramo someraka, “Yatafumo unihae yano motosa Piaósipuane Yasuyaki hakása rekenareapo. Reasasamo Piaósipumo wakapuamo yatafu pusierakano apure,” aisapo. ¹⁶ Arirakano aporo metakiramo Yasumo rakirane kau aseakosakipoko Yasuaki mokopipiraka somesapo. Ipu someraka, “Kotimo murikimasane nésekenone, nómó rakirane isiapo aseako nómó rakikitakae. Kotimo hepene yapura makata ainane isiapo aseako nómó rakikitakae,” aisapo.

¹⁷ Airakano ipu hemakapusuane Yasumo aseraka someraka, “Aporo namina ape sumu hakása risia, aporoamo namina yia parakuraka weraka, aporoane koaka tarikia, kekepo kekeporaka risike, ape kauanehokosapo. Arirakano aporo ira hakása namina yia parakuraka weraka arupukusapo. ¹⁸ Aina ayíáka Satanemo yatafuaki ipi téke tati yia awera ayíáka weafunureapo. Satanemo ipi aporo tékeyaki parakuraka wera satiki i arupufunupo. Asiamo repo someraka, ‘Piaósipu anoyaki hakása reasasamo, epo ipi wakapumo yatafuaki pusierakano pusuapo,’ airakae. ¹⁹ Asiamo reane kekemana aporomo yatafu pusiesane, epa iyaki paoraka reare? Epamo wakapumo yatafuaki pusiesare? Nómó reaki somerakane, repo anoaki paripekea someraka, ‘Kotimo wakapumo pusiesapo,’ aihokosapo. ‘Piaósipumo wakapumo pusiesapo.’ Aíyaka repo some paripeakosafapo. Asiamo kepoane repo hemakapukusakipoko, repo namina kekemana aporomo ainane hemakapunie. ²⁰ Arirakano yatafu pusiehoasimo Kotimo wakapu aeyaka nómó pusierakano yatafu i metakarikia pusuapo. Asiamo Kotimo wakapuane repo asekea hemakapuraka, ‘Isuane Kotimo unihaeaka asekea rekeakosa maiya ane faserepesapo.’ Aíyaka hemakapunie.

²¹ Arirakano aporo waremo ipi makata kemo ape kakarua taeraka, aporo metamo hakimakohoamo tare maka, ira rokopa pokeyaki maka, ikia koroa matasoraka asekea rekeno, epo makata kemoane aporo metamo hakimarafapo. ²² Arirakano aporo meta namo kakaro ware yao aeyaka peraka, tati wekea, aporo yao aeyaka pesane ipi namo kakaro waresasamo, aporo ape wafayane marokenapo. Marokeraka aporo ape kakarua rea amo tare, ira rokopa, pokeyaki mahimuraka mokoa reane wasekemokoateraka apea forosoraka, makata kemo taesane soko morapo. Mokoa pukua ipi parakuraka morapo.

²³ Asiamo ano patera asekeanafonoraka risia aporo hinamo amo, anoaki yunuraka risikinapo. Arirakano anoa paosa aporo hinamo repo, aporo hinamo metakiramo anoaki himu hakásaraka hemakapusimo, repo pasimokoanafonorakanone, ane, aporo hinamo ane repo mapakataerakanapo.” Aíyaka Yasumo somesapo.

Yatafu yaoa pusuane eféra hunia pariperane oyapo.

Matiu 12:43-45

²⁴ Yasumo someraka, “Yatafumo aporo ho masa metakarikia pukua, hauaka porasakipoko á koraka rerapo. Koraka reke e ape wakakosane soko, e fenekea kakakosa soko, koane faseskeno ipi hemakapuraka, ‘Aporomanomo tura, ape ayíáka waka reane metakarikia pesasamo á rekeako paripurakapo,’ airapo. ²⁵ Ayíáka paripekea aseane, aporomanomo tura ape ayíáka feaosa makata su makotesekeno aserapo. ²⁶ Asekea, ipi yatafu téke yatipinusu pasimorapo. Yatafu yatipinusu pasimosa amo yatafu fana reamo watikiaka rakisiane marokeraka, ipu namo kakaro kára watikiaka rakirapo. Iane pasimokoa pekea aporoamo tura apea yorokoa arisia ayíáka, yorokoa risirapo. Yorokoa arisiamo aporoane namo kakaro watikiaka rerapo. Fana yatafu hakása rea maiya

amo, aporo amo watikiaka rakisiane wakasemasapo. Arirakano yatafu kari suane pekea arisiamo, aporo amo watikiaka rakirane, namo kakaro káranapo,” aisapo.

²⁷ Arirakano aporo hinamo yakai sarimasa amo, hinamo hakásá metamo Yasuaki someraka, “Né ní amamo harepayaki kaina takaperakano, néaki hoko pi kasá hinamoane, Kotimo makoterakano, ipi seseraka kakenapo.” ²⁸ Airakano Yasumo someraka, “Kotimo someane kakimara aporo hinamoane Kotimo makoterakano iane seseaka risirapo,” aiyaka Yasumo somesapo.

“Kotimo wakapumo hemakapukua rakirane isuaki tarinie.” Aiyaka Fereze aporomo somesane oyapo.

Matiu 12:38-42; Maka 8:11-12

²⁹ Aporo hinamo yakai pekea sarimarakan asekea Yasumo someraka, “Maiya omo aporo hinamo watikiaka risiamo someraka, ‘Kotimo ne pusierakano pesekenone ane, isiapo aseako Kotimo wakapumo hemakapukua rakirane nōmo rakikitakae.’ Airakae. Airakano nōmo rakiakosafapo. Makata hakásá meta nōmo tariakosapo. Repo hemakapusimo, Yonaki asia ayiáka ano soko ayiakakosapo. ³⁰ Kotimo Yona pusiesane, Ninefa aporo hinamomo hemakapusimo Kotimo Yonaki makata asiane Kotimo iaki tarisiapo. Tarisia ayiáka, Aporomanomo Táke anoane, maiya yumo aporo hinamo arisiaki nōmo tariakosapo.

³¹ Arirakano Soromonemo koteaka hemakapukua somesane hinamo meta unihae Kuinimo kaiyako pesapo. Arirakano hinamo Kuiniane hauaka namo kakaro yameno aeyaka pesapo. Arirakano maiya yumo aporo hinamo ano makeraka risiamo nōmo someane kakipayarakanapo. Asiasamo keseke Kotimo hukuarura maiya amo, aporo hinamo maiya yumo arisiane hinamo Kuini amo hukurukusapo. Arirakano Soromone ipi aporo kára rea nine, re risia titipi á ano reke Soromoneane marokeraka, ano namo kakaro káraraka rekenapo. ³² Arirakano Yonamo Kotimo someane some karakano, Ninefa aporo hinamomo namina watikisane metakarikia risikiako parisapo. Namina risikiako parisa nine, aporo hinamo maiya yumo risiamo makata watikisane metakarianafonoraka risikiako parisafapo. Asiasamo keseke Kotimo hukuarura maiya amo, Ninefa aporo hinamomo, aporo hinamo maiya yumo risiaki hukurukusapo. Repo makata watikisane metakarianafonosakipoko ipu reane hukurukusapo. Arirakano Yona ane ipi Kotimo some kará aporopo. Asiane re risia titipi á, ano* reke Yona ane marokeraka rekenapo,” aiyaka Yasumo somesapo.

Nafamo faenane takumeaka somesane oyapo.

Matiu 5:15; 6:22-23; Maka 4:21

³³ Yasumo takumeaka someraka, “Aporomo nafa pakimaka hauaka rasa kutua motoraafapo. Arirakano taramomo karotapirafapo. Nafa pakimaka apea waremaresa faerakanano, aporo hinamo metakira pekea apea yororaka aseane, nafamo faerakan aserapo.

³⁴ Né kaum nafa asia ane né hipo. Nōmo himo makata su koteaka asekea takékea, ne kauane faeraka rekeakosapo. Asiane né hi meraka reke, né kauane soko katoraka rekeakosapo. ³⁵ Asiamo nōmo faesane kopakapurapaka asekeanie. ³⁶ Né katoraka rekeanafonoraka, né faesa susu reke nafa faena ayiáka né kára faeraka rekeakosapo,” aiyaka Yasumo somesapo.

“Fereze aporomo arakira ayiáka repo ayiáka rakiakopo.” Aisane oyapo.

Matiu 23:1-36; Maka 12:38-40

³⁷ Some kasá maiya amo, Fereze aporo metamo Yasuaki someraka, “Nōmo apea makata nako peae.” Airakano Yasu pukua apea yorokoa teporo makeraka á kayapo. ³⁸ Á kake makata nakosakipoko ipi hokono kusuhoanafonorakano, Fereze aporomo aseraka fofaraka hemakapuraka, “Epo ane marirakanarakapo. Isiapo Fereze aporomo some maneane epo ipi kekemarakarifapo.” ³⁹ Aiyaka hemakapurakano Yasumo someraka,

* 11:32: Asiamo nōmo someane repo kakimarfarak, repo anoaki Kotimo wakapumo rakira rakikitakae, airakae.

“Ferese aporo reo, repo kapo soko meraki soko kima takuane hákasa kusuna ayíáka, re soko ayíáka risikinapo. Repo kauane hákasa siaraka risikiako ayiane re himua makata watikisa komarukua arisie. Repo aporo hinamo makata forosane asekepayaraka, namina yia makata kára mokoako hemakapukua risike, arirakano aporo hinamoane mokoatikhoko hemaka apure.⁴⁰ Re aporo masuasa ayireapo. Kotimo re kauane soko rakikia re himuane soko rakisiapo. Asiamo Kotimo re himuane asekea repo koteaka hemakapunafonoraka, aporomo re kau hákasa ane asekeasimo repo ayiane.⁴¹ Asiamo repo makata kemo kára tokenone, aporo hinamo makata forokoa risiane arareraka yaku kakanie. Ayíáka karakano re Ferese aporomo hemakapuraka, ‘Isiapo merakiane kima takuane soko tu takuane soko kusurakanapo,’ aíyaka repo hemakapusapo.

⁴² Asiamo Fereze aporo re asekeanie. Uao, enahoasifareapo. Repo hemo makata nena sereto asia kaeyakosu mosane, tokonasu namina moraka, kaeyako hákasané Kotiaki yaku karápo. Karaka yia, aporo hinamoaki koteaka takekea hemakapunie, aíyaka somemané motosane repo hemakapurafapo. Arirakano Kotiaki repo himu tumurumo hemakapunie, aíyaka somemané motosane repo hemakapurakarifapo. Asiamo makata kaeyako hákasané Kotiaki kakanie, aíyaka somemané motosane ayíáka kekemaraka reke, somemané metakirane soko, kekemaraka rakiraka risikanie. Somemané metakirane metakariakopo.

⁴³ Asiamo Fereze aporo re asekeanie. Uao, enahoasifareapo. Yu aporomo sarimana apea re pukua aporo hinamo su sarimaraka toakipoko, i hikumisi neneme sapea, sea a re tokoako sesenapo. Arirakano aporo hinamo makata ropona apea sarimaraka risiakipoko, re purakano aporomo re hokono mokoasimo repo sesenapo.⁴⁴ Asiamo aíyaka rakira aporo re asekeanie. Uao, enahoasifareapo. Reane aporo kusua hauaka maresa asiapo. Aporo kusua hauaka maresakipoko, asane tanehekea, hauaka maresane mosekeraka, nena hauaka parisakipoko aporo metamo asekeanafonosamo, meraruamo peraka aporo kusua hauaka maresa kima, finiraka purapo,” aisapo.

⁴⁵ Aíyaka Yasumo somerakano, Kotimo somemané tisa aporo hakásá metamo someraka, “Tisao, nómo somerakane nómo isu soko makaiyaraka hukurukua somerakae.”

⁴⁶ Airakano Yasumo someraka, “Kotimo somemané tisa aporo re asekeanie. Uao, enahoasifareapo. Aporo metakiramo makata fato umisa asiane makatihoasimo, repo iaki makatiraka marerapo. Makatiraka marekea repo iane wakasema soko ararenafapo.

⁴⁷ Asiamo aporo reo, uao, enahoasifareapo. Kotimo some kará porofete aporoane repo makasa kaua kekemamo rusua kusuapo. Rusua kurakano kunikia motosane repo makoteane.⁴⁸ Asiamo repo makata arakiramo repo makasa kaua kekemamo rakisiane repo kekemaraka arakire. Repo makasa kaua kekemamo rusua kusuasamo, repo seseraka kunikia motosane makoteraka arakire.⁴⁹ Asiamo Kotimo koteaka hemakapukua sawia popasane oyapo. Kotimo someraka, ‘Repo kaiyisimo nómo porofete aporo soko, tarira aporo soko, pusiehokosapo. Perakano asekea, i metakirane repo rusua kukusapo. I metakirane repo mokoatikhokosapo,’ aíyaka popahoareapo.⁵⁰ Asiamo hauaka one kepomaresa maiya amo, porofete aporo rusua kurane kepomarekea, rupe pekea pipu maiya wo pauraka, aporo hinamo risiane Kotimo hukurukusapo. Hukuarura maiya amo ipu umisane makosapo.⁵¹ Fana Aepo rusua kusuapo. Rusua kusuakipoko, amo patera aporo metakira soko rusua kusuapo. Aiyipe pekea kesekeia Sekaráya Kotimo apea rusua kusuapo. Eke karoraka taesane makama taku raraka, Kotipoko ape rumu kikisisane makama taku roraka, Sekaráya tipia reane e rusua kusuapo. Rusua kusuasamo, pipu maiya omo aporo hinamo risiane Kotimo hukurukusapo.

⁵² Asiamo Kotimo somemané tisa aporo re asekeanie. Uao, enahoasifareapo. Aporo hinamomo makata koteaka kaikia hemakapusimo, ape ikia koro repo kimo ropa-masafapo. Repo soko makata koteaka kaikia hemakapuko, ape kakarua yorosafapo. Aporo metakiramo soko makata kaiyako ape kakarua yoroako perakano, repo matasapo.” Aíyaka Yasumo apeane takumeaka somesapo.

⁵³ Aíyaka Yasumo someaka faraka Ferese aporomo apeane metakarikia purakano, Kotimo somemane tisa aporomo soko, Ferese aporomo soko ipu Yasuaki makata kotafe topakamaraka saperaka somesapo. Epo akaimo hasaka somerakarihoamo eaki some meta somerakano, some meta somerakano asiapo. ⁵⁴ Ipu Yasuane mahoperaka asekehaesapo. Makata kakayia kakinumo rusimo amarerera aiyáka, ipu makata somehoramo kakinu amarerera asiapo. Yasumo hasaka some pariperakano, e hukurukusakipoko, epo makata somerane ipu kaikia asekehaesapo.

12

“Ferese aporomo ainane makata pirira asiapo. Ipu himu tetáraka hemakapusuane repo mokoakopo.” Aíyaka Yasumo somesane oyapo.

Matiu 16:5-6; Maka 8:14-15

¹ Aporo hinamo taosene yakai sarimasakipoko hauaka taperaka, aporo hinamo kafukua puraka meta korakea meta korake takerupe pusuapo. Maiya amo Yasumo ipi aporo hakása puraki somerakana, “Ferese aporomo ainane, makata pirira asiapo. Ipu himu tetáraka hemakapusuane repo mokoakohoamo asekeanie.

² Arirakano makata faremaresane mafekemahokosapo. Makata mahamesane makakamaraka tariakosapo. ³ Re katosa á risike repo somesane, keseke faesa á risike repo somerakano aporo suamo kaiyakosapo. Re namina hakása sarimaraka ape sapea risike, makata tau mahamekea somesane yaiya mahamekea rekeakosafapo. Keseke aporo suamo kaiyisimo, hufitaeraka sakepamo wáraka somehokosapo,” aíyaka Yasumo somesapo.

“Kotiaki namohoanie,” aisane oyapo.

Matiu 10:28-31

⁴ Arirakano Yasumo some meta somerakana, “Maeo, reaki nōmo kakaro somerakaripo. Aporomo né kau kukusimo rurakano aporoaki namohokopo. Aporoamo nōmo hoane rukusafapo. ⁵ Asiamo né rusua kurakano né hoane heao hauaka á pusie, aihokosa Kotiaki namohoanie. Nōmo kakaro somerakaripo. Kotiaki namohoanie. Repo hemakapusimo nōmo reaki kakaro somerakaripo.

⁶ Arirakano maketea mena muri asia aporomo roponapo. Roporaka mena muri asiane kakoreasu mone hae kusua tetámo (2 toe) roponapo. Mena muri asia hakása soko Kotimo merarunafapo. ⁷ Mena muri wakasemané Kotimo asekeea rerasasamo, re aporomananoane, Kotimo namo kakaro kára hemakapukua asekeea rekenapo. Asekeea reke re uni iti suane epo hakása hakásaka menoraka hemakapukua fasapo. Asiasamo re namohokopo,” aisapo.

Yasu patera asesa aporoane soko, Yasu patera asekeanafonosa aporoane soko Yasumo somesane oyapo.

Matiu 10:19-20, 32-33; 12:32

⁸ Arirakano Yasumo somerakana, “Aporo suamo kaiyisimo aporo metamo someraka, ‘Ano Yasu patera aserakanapo.’ Aíyaka somerakano Kotimo hepene aporomo kaiyisimo, Aporomanomo Tákemo somerakana, ‘Ano patera asesa aporoane epo,’ aihokosapo. Aporomanomo Tákeane anopo. ⁹ Arirakano aporo suamo kaiyisimo, aporo metamo someraka, ‘Ano Yasu patera aseako hisiripo. Nōmo Yasuane metakarirakanapo.’ Aíyaka somerakano, aporoane Kotimo hepene aporomo kaiyisimo nōmo someraka, ‘Aporoane ano patera asesafapo. Ano patera asekeanafonosasamo e nōmo metakarirakanapo,’ aihokosapo.

¹⁰ Arirakano Aporomanomo Tákeane anopo. Anoaki aporo hinamo metamo mawakasemarakano, epo watikiaka somesane Kotimo mafahoasireapo. Arirakano Ho Kotesamo wakapuane, aporo hinamo metamo asekeea someraka, ‘Ane Satanemo wakapureapo.’ Aíyaka Ho Kotesane hokomaka mawakasemarakano, Kotimo epo makata watikisane mafahokosafapo.

¹¹ Arirakano re waseremaka Yu aporomo sarimana apea hukuruko karikia apura maiya amo, hukurura aporomo soko, aporo unihae mo soko, re hukururakano, repo hemakapuraka, ‘Isiapo maiyaka meakataeraka somehoanarakapo. Maiyaka some paripunarakapo.’ Aiyaka hemakapukupo. ¹² Asiamo hukuarura maiya yiamo, repo koteaka somehoasimo, Ho Kotesamo reaki some kakakosapo,” aiyaka Yasumo somesapo.

Aporomo makata kemo kára mosane Yasumo takumeaka somesane oyapo.

¹³ Aporo yakai sarimasakipoko aporo hakása metamo Yasuaki someraka, “Tisao, nōmo nī ata kusuakipoko, nōmo maemo makata kemo parakuraka ano kakanie, aihoanie.”

¹⁴ Airakano Yasumo someraka, “Makata hukurukua maroponane nōmenafapo. Makata kemo parakunane nōmenafapo,” aisapo.

¹⁵ Aiyaka aporo suaki Yasumo someraka, “Repo someraka, ‘Ano makasie. Makasie.’ Aiyaka someraka kára sakepamo mokoaripi airapaka asekeanie. Asiamo makata kemo káramo ne hitaferaka rerane kakakosafapo,” aisapo.

¹⁶ Aiyaka Yasumo efera hunia yapakeaka someraka, “Aporomo makata kemo kára moraka reapo. Ipi hauaka á koáne mano kosapo. Kosane káraraka tanehekeea namo nakosane kikísekeno tusuapo. ¹⁷ Turakano asekea aporoamo hemakapuraka, ‘Koáne nakosane kára tusuapo. Arirakano koáne tusuane ape wakasemasamo taehoane sia-hoasifareapo. ¹⁸ Ape kisiane wakasemasekeno nōmo kotahokosapo. Kotaraka ape kára meta kiakosapo. Ape kára ane kikimaka, koáne nako tusuane ape kawea taehokosapo. Nōmo makata kemo soko, su apea taehokosapo. ¹⁹ Apea makata kemo taesakipoko, nōmo nī yiamo úyaka hemakapukusapo. Nōmo makata kemo sia taesapo. Keremisi kára farakano makata nakosa soko, makata kemo soko, fahokosafapo. Asiamo yumo ano fenekeea makata rakiakosafapo. Ano fenekeea reke, makata nakosa soko waene he soko nekeea, aiyáka maiya suamo seseaka rekeakosapo. Aiyaka nōmo hemakapukusapo.’

²⁰ Aiyaka aporoamo hemakapurakano eaki Kotimo someraka, ‘Né masuasamo hemakapura ayireapo. Nōmo himu koteaka hemakapurane fareapo. Asiamo pipu ereamo ne kukusapo. Nōmo makata kemo umuraka taesane epamo mokoakosare? Nōmo nī mokoa pukusafapo.’ Aiyaka Kotimo somesapo.”

²¹ Aiyaka yapake some kepoane Yasumo someraka, “Aporo hinamomo namina makata kemoane hákasa kara hemakapukua, makata kemo kára sarimaraka, mahimuraka taerakano, Kotimo asekea someraka, ‘Hepene yapura makata ainane hemakapunafonarakan, né forokoa rekenapo.’ aihokosapo.” Aiyaka Yasumo somesapo.

“Makata nakosane kára himu nekea hemakapukupo.” Aisane oyapo.

Matiu 6:25-34

²² Yasumo ipi aporo hakása puraki someraka, “Né hitaferaka rekeako, hauaka wo makata nakosa hákasa akipoko, kára himu nekea hemakapukupo. Patera yase risirapaka pasu osohokosane, kára himu nekea hemakapukupo. ²³ Hitaferaka areamo makata nena hákasa ayare? Kaua pasu osohokosa hákasa ayare? Wae, hákasa ayafapo. Kotimo néaki himuha kasasamo, makata nakosane soko néaki kakasifareare? Ao. Epo sia kakakosapo. Néaki kau kasasamo kaua pasu osohokosane soko néaki kakasifareare? Ao, sia kakakosapo. ²⁴ Mena ane asekeanie. Menamo ipi makata nakosane pororafapo. Ira wate susekeno menamo tukua mokoa pukua apea keseke nakosakipoko taenafapo. Taehoanafonosa nine menane Kotimo makata nakosa karápo. Menaki karásasamo, aporomanoane epo sia kakasifareare? Ao, aporomanoane ipi kára hemakapukua makata nakosane karápo.

²⁵ Arirakano aporomanomo ipi himumo hemakapuraka, ‘Ano kukusane hisiripo.’ Aiyaka himu nekea rekeno, e kukusa sere motosane marokehokosare? Wae, marokehokosafapo. ²⁶ Kukusa sere motosane marokehoanafonorakano yia, marirakano makata meta akipoko kara himu nekea risikinare?

²⁷ Repo sako wemeane hemakapunie. Sako wemeane taneheakosakipoko sako wememo namina yia makata rakirare? Wae, makata rakirafapo. Sako weme wate

suhoasimo sako wememo pasu susane maka irinare? Wae, sako wememo ipi hemakapukua wateane sunapo. Arirakano wate fana Soromone aporo kára unihaeaka reke, ipi pasu kotesa ososapo. Soromonemo pasu ososana kotesa, asiane sako weme wateane namo kakaro kára kotesapo. ²⁸ Arirakano asane tanehekea arisiane, Kotimo makoteraka wate peasimo karápo. Karakano asane pipu tanehekea arisiane, keseke maiya wakasemamo iramo paiyiane inaka fanapo. Inaka faraka kukua kesane maiya wakasemamo tanehekea risirapo. Maiya wakasemamo tanehekea risia nine Kotimo asekea rerapo. Kotimo asekea area ayiáka nómō pasuane osohokosane Kotimo ipi ayiáka asekea rekenapo. Kotimo ne asekea rekeno yia nómō akipoko himu kara nekea rekenone, ane, nómō Kotiaki himu hakásaraka hemakapurane wakasemareapo. ²⁹ Asiamo Kotimo reane asekea reasasamo uyaka hemakapukupo. Makata nakosa mane nakosare? He mane nakosare? Aíyaka himu nekea kára hemakapukupo.

³⁰ Arirakano nena aporo hinamo hauaka sua risiamo maiya suamo makata nakosane soko, pasuane soko, kára himu tumurumo hemakapurapo. Asiamo makata nakosane soko, pasu osohokosane soko, makata su re fasane, repo sia mokoasimo repo Ata Kotimo ipi hemakapukua rekenapo. ³¹ Asiamo Kotimo re unihaeaka asekea rekeakosane, makama fanaraka hemakapunie. Aíyaka hemakapukua risikinone, makata nakosane soko, pasuane soko, siaraka mokoakosapo. ³² Aporo hinamo reane saro sipi mano sarimasa asiapo. Re himu fahokopo. Kotimo re asekea rekeako epo kára seserakanapo,” aíyaka Yasumo somesapo.

Hepene yapura mahimuna makata ane taehoasimo Yasumo somesane oyapo.
Matiu 6:19-21

³³ Yasumo someraka, “Repo makata kemoane roporaka mone mosane aporo makata forosaki kakanie. Pausi kaweane maka hepene yapura mahimuna makatane pausi tua keasimo ayiakanie. A mahimuna makata taesane paténafapo. Metamo hakimorafapo. Arirakano surisurimo soko nenafapo. ³⁴ Asiamo hauaka kara wo repo mahimuna makatane toasasamo, repo himu hemakapurane soko, hauaka wo kakenapo. Arirakano repo hepene yapura mahimuna makatane taesekeno, repo himu hemakapurane soko, hepene yapura kakenapo,” aíyaka Yasumo somesapo.

“Asekea rea aporo perakarihoamo, aporo raipamo koteaka rakikia kau risikianie,” aisane oyapo.

Matiu 24:42-44

³⁵ Arirakano Yasumo someraka, “Aporo raipamo rakikia maresa wafayamo hinamo fitu karáka hokono keakosakipoko pusuapo. Pusuane ereamo pariperapaka foaka ikia koro ropakamako ipi aporo raipamo pasu korake yatipinu atura faisa pusifasekeno, pasu kakuna fairaka kenare weraka, saro kau terakae hikia, arirakano nafa pakimaka asekea risirapo. Asekea risira ayiáka, re soko ayiáka asekea risikianie. ³⁶ Arirakano hokono kekeea faraka, aporo raipamo ipi wafayane peraka ikia koroa paroparorakano, aporo raipamo ikia koro foakayia ropakamarapo. Foaka ropaka amara ayiáka, repo soko ayiáka ropakamako hemakapukua risikianie.

³⁷ Aporo raipamo ipi wafaya pariapera maiya amo aseane, aporo raipa wakanafonraka turikia tarikia makata rakiraka risikino aserapo. Anakano aporo raipa ane seseaka risikiakosapo. Asiamo nómō reaki kakaro somerakaripo. Aporo raipamo ipi wafayamo aseane aporo raipa asekea risikino asekea someraka, ‘Re teboro makeraka toae. Re makata nakosa nómō nī kakakosapo.’ Aíyaka ipi pasu kenare weraka saro kau terakae hikia ayiáka reke, iaki makata nakosa kakakosapo. ³⁸ Anakano ere titipiamo soko, mena me horamo soko, aporo raipamo wafaya pariperapaka, aporo raipane waráfaraka asekea risiakipoko, aporo raipamo wafayane pariperakano aporo raipamo sesehokosapo.

³⁹ Asiamo some one hemakapunie. Makata hakimora aporomo aporo metamo apea makata kemo hakimokoako perapo. Makata kemo hakimokoako peakosane maiya hi awane ape wafayamo hemakapusua satiki ipi turikipukua asekea rekeafunupo. Ipi apea aporo metamo makata hakimako perakano asekea ipi matasohoafunupo. ⁴⁰ Asiamo

re soko rereraka maroporaka asekea risikianie. Aporomanomo Tákeane anopo. Ano paripeakosa maiya hi awane soko repo hemakapunafonoraka, re meraruamo risiakipoko ano paripeakosapo,” aisapo.

Aporo raipa kotesa soko, aporo raipa watikisa soko, Yasumo takumeaka somesane oyapo.

Matiu 24:45-51

⁴¹ Airakano Pitamo Yasuaki someraka, “Unihaeo, takumeane isuaki hakasa somerakanare? Aporo suaki soko somerakanare?” ⁴² Airakano Yasumo someraka, “Aporo raipa metamo ipi wafayaki himu hakásaraka hemakapukua reke, ipi wafayamo someane kaikia, koteaka hemakapukua rakira aporoaki nōmo somerakanapo. ⁴³ Aporo raipamo ipi wafaya fore hinaka, ipi aporo raipaki makata rakisimo kasane, rakiraka risiakipoko, ipi wafayane pariperakano, aporo raipa ane sesehokosapo. ⁴⁴ Asiamo aporo raipa kotesaki, ipi wafayamo someraka, ‘Nōmo hauaka soko, ape soko, makata kemo suane, nōmo asekea rekeanie,’ aihokosapo.

⁴⁵ Arirakano aporo raipa metamo hemakapuraka, ‘Ano asekea rera aporo hisiane haru paripeakosafapo.’ Aíyaka hemakapukua epo aporo raipa metakirane soko rukua, hinamo raipa metakirane soko rukua, arirakano makata nakosane hákasa nekea, he watikisa nekea, himu maparitaeraka ayiáka reke, ⁴⁶ e ipi asekea rea wafaya paripeakosa sereane soko, maiya hi awane soko, hemakapunafonoraka meraruamo reakipoko, e ipi asekea rea wafayane paripeakosapo. Pari apera maiya amo aporo raipaki saperaka e fansiraka, koarellaena aporo hinamo akiyaki rekeako pusie, aihokosapo.

⁴⁷ Arirakano aporo raipamo ipi wafayamo hemakapusuane aseraka tiki asesaneo, epo ipi hemakapusuane kekemaraka rakianafonoraka risikinone, aporo raipane hukurukua kára rukusapo. ⁴⁸ Arirakano aporo raipa metamo ipi wafayamo hemakapusua ayiáka hemakapunafonoraka watikiaka rakirakano, eane hukurukua rufunupo. Rufunusa nine e himeteraka watikiaka rakisiasamo wakasema rukusapo. Asiamo aporo raipa metamo makata kára rakisimo kasaki ipi siaraka koteaka rakisiarihoamo ipi wafayamo aseako peakosapo. Asiamo aporo yakaimo aporo hakásaki makata kara rakisimo karakano, keseke ipi kasane rakisiarihoamo epo ipi aseako peakosapo,” aíyaka Yasumo somesapo.

“Aporo fasikia risikiasimo ano pesapo.” Aíyaka Yasumo somesane oyapo.

Matiu 10:34-36

⁴⁹ Yasumo someraka, “Hauaka wo ira paiyakosakipoko ano pesapo. Ira rufihoasimo pairakano ane, kotehoasireapo. ⁵⁰ Arirakano ano kukusimo ira matopesa paremarerakano, kukusane Kotimo maresapo. Kukusa maiya ane haru faserepeanafonorakano ano himu nekea rekenapo. ⁵¹ Arirakano repo hemakapuraka, ‘Yasu pesasamo hauaka wo aporo su tákeraka tau auaraka risikiakosapo.’ Aíyaka hemakapukupo. Ano wo pesasamo aporo hinamo repo namina yia fasikia risikiakosapo. ⁵² Pipu kepomarekea pukua, keseke soko, ape hakásá á aporo hinamo kakoreasu risiane namina yia parakuraka, aporo hinamo isiamo aporo hinamo tetáki namina yia rakumarekea risikiakosapo. Aporo hinamo tetámo aporo hinamo isiaki namina yia rakumarekea risikiakosapo. ⁵³ Aina ayiáka aporo hokosamo ipi wafayaki rakumarekea, arirakano wafayamo ipi hokosaki rakumarekea risikiakosapo. Arirakano kaiyiamo ipi farayaki rakumarekea, arirakano farayamo ipi kaiyiaki rakumarekea risikiakosapo. Arirakano hinamomo ipi hokosamo aseaki rakumarekea, arirakano hinamomo ipi apiamo kaiyiaki rakumarekea ayiáka risikiakosapo,” aíyaka Yasumo somesapo.

“Pipu sere omo makata ayiakokosane koteaka takekea hemakapunie.” Aisane oyapo.

Matiu 16:2-3

⁵⁴ Yasumo aporo hinamo su sarimasaki someraka, “Maiya apura taku á repo ti yapura ti pakae aseraka, repo someraka, ‘Ti pakaeane fahokoane farakano, ane yao peasireapo,’ airapo. Aíyaka hemakapukua somesane yao perapo. ⁵⁵ Arirakano ketaya taku aeyaka atifo kára perakano repo someraka, ‘Pipu yao peasifareapo.’ Airakano kakaro yaiya yao perafapo.

⁵⁶ Asiamo re aporo himu tetáraka hemakapusuane, repo hauaka wo makata ainane soko, ti yapura makata ainane soko, asekea hemakapurapo. Asiāne maiya omo makata ayiakakosane, repo ayiáka hemakapurakarifapo,” aiyaka Yasumo somesapo.

“Aporomo ne hukururakano nōmo maroporaka mafahoanie.” Aisane oyapo.

Matiu 5:25-26

⁵⁷ Arirakano Yasumo ipi some meta someraka, “Repo makata kotesane takekea hemakapufununine marirakanosare? ⁵⁸ Anakano aporo metamo né hukuruko, hukurura some kepo kaira aporo rea karikia purakano, titi ikia kara puraka risike, sapesane titi maroporaka mafahoanie. Mafahoanafonorakanone, epo né hukuruko, hukurura some kepo kaira aporo rea karikia pukua, aporoamo ne kotoraka hukurukusapo. Yasemo né hukurukua aporo terakaiyamosayaki pusierakano aporo terakaiyamosamo né tipura makeakosapo. ⁵⁹ Né tipura makerakano haru tonotaehokosafapo. Nōmo api kakanafonorakano haru tonotaehokosafapo. Api suane karakano né tonotaehokosapo,” aiyaka Yasumo somesapo.

13

“Makata watikisane rukupateraka metakarinie.” Aisane oyapo.

¹ Maiya metamo aporo metakira pekea Yasuaki someraka, “Kariri aporomo saro sipi rukua paikia Kotiaki yaku karaka risiakipoko kamani aporo unihae Pairatemo ipi aporo terakaiyamosaki someraka, ‘Aporoamo saro sipi rukua paikia Kotiaki yaku akarane rusua kukanie.’ Airakano aporoane rusua kurakano ipu yapiane makata kakaya yapi akiyaki sarimarka suasuasapo.” Aiyaka aporo metakiramo Yasuaki somesapo.

² Somerakano Yasumo iaki someraka, “Kariri aporoane namina himu watikisakipoko rusua kusuare? Arirakano Kariri aporo metakira himu kotesakipoko yia metakarisiare?

³ Wae, aporo hinamo su himu watikisa susupo. Repo soko makata watikisane metakarianafonorakano i mokoatikisa aiyáka re soko aiyáka mokoatikihokosapo. ⁴ Arirakano Siroame huturu ape rakaripuraka aporo terayiasu (18) rusua kusuapo. Namina himu watikisakipoko rusua kusuare? Yarusarame aporo metakira himu kotesakipoko metakarisiare? ⁵ Wae, aporo su himu watikisa susupo. Repo makata watikisane metakarianafonorakano, i kusua aiyáka, re soko su aiyáka kukusapo,” aisapo.

Ira foke wate peanafonosane oyapo.

⁶ Yasumo iaki takumeaka someraka, “Hemo wafayamo sako karepe hemoa ira foke maposa reapo. Reane keseke hemo wafayamo ira foke wateane pesarihoamo tumako peane, ira foke wate peanafonosekeno asekea ipi hemo asekea rea ⁷ aporo raipaki someraka, ‘Ira fokeane tokorasie. Keremisi isia faraka nōmo aseako peane wate peafareapo. Asiasamo ira fokeane tokorasie. Hauaka kotesakipoko ira wate peanafononane hauaka kotesa a ira foke nena reke siahosifareapo.’

⁸ Airakano hemo asekea rea aporo raipamo someraka, ‘Aporo fanao, harufapo. Keremisi hakásamo ira kepoa hauaka mosoraka taeraka, asane soko taehokosapo.

⁹ Asane taeraka asekea nina ira wate peanafonorakano tokorasie, aihoanie. Ira wate perakano tokohokopo, aihoanie.’ Aiyaka hemo asekea rea aporo raipamo somesapo.” Aiyaka Yasumo taku meaka somesapo.

Hinamo arupekeea koraka rera Yasumo mafasane oyapo.

¹⁰ Fenena maiya metamo Yasu Yu aporomo sarimana apea pukua some kasapo. Some karaka reke aseane ¹¹ yatafumo hinamo meta ho masa keremisi terayiasumo (18) makata takamaka kayane asesapo. Ipi mati roporaka purafapo. Maiya suamo arupekeea susu koraka rerapo. ¹² Arirakano Yasumo someraka, “Hinamo neo, né nōmo mafarakanapo.”

¹³ Aiyaka hinamoane Yasumo sakaihoane foakayia ipi makata takamasane faraka matiane ropōraka takahisiapo. Takahikia hinamoamo Kotiaki kekeresapo.

¹⁴ Arirakano fenena maiya amo hinamo makata takamasane Yasumo mafarakanano asekea, Yu aporomo sarimana ape asekea rea aporomo saperaka aporo hinamo suaki

someraka, “Makata rakira maiyane sere namasu ayapo. Sere namasuane makata rakira maiyasasamo, aporo hinamo re makata tasa mafahoasimo peanie. Fenena maiya amo aporo hinamo re makata tasane mafahoasimo peakopo.” Aisapo.

¹⁵ Airakano Yasumo someraka, “Re himu tetáraka hemaka apure. Repo saro ponomakau soko metao, saro toki soko metao, apea kita hukumaresane fenena maiyamo, he nasimo, kita fitikimaka karikia purapo. ¹⁶ Hinamoane Eparahamemo aporo irapo. Satanemo hinamo ane keremisi teraya sumo (18) asekea reareapo. Pipu fenena maiyamo mafahoane siahoasireapo.” ¹⁷ Airakano Yasuaki mahisisa aporomo kairaka mahimetesapo. Yasumo wakapuaka rakisiakipoko aporo hinamo suamo aseraka kára sesésapo.

Ira máseta hae Yasumo takumeaka somesane oyapo.

Matiu 13:31-32; Maka 4:30-32

¹⁸ Yasumo someraka, “Unihae Kotimo aporo hinamo asekea reane yakapa asiare? ¹⁹ Ira máseta hae wakasema ane aporomo maka ipi hemoa maposa asiapo. Maposane pauaka hekeia keseke kárakara ira parinapo. Ira pariraka rea ira eya á mena pekea menamo ape kirapo. Aina ayíáka Kotimo aporo hinamo unihaeaka asekea reane asiapo.” Aíyaka Yasumo somesapo.

Makata pirira Yasumo takumeaka somesane oyapo.

Matiu 13:33

²⁰ Efera hunia Yasumo someraka, “Aporo hinamo Kotimo unihaeaka asekea reane yakapa asiare? ²¹ Kotimo unihaeaka asekea rea aporo hinamoane makata pirira asíapo. Farawa paiyakosakipoko makata pirirane wakasema maka, farawa tarámo kesa yia, makata pirirane hakása sarimaraka kekerorakano, farawa suane piriraka káranapo. Aina ayíáka aporo hinamo i suane Kotiaki risikiako parirane asíapo.” Aíyaka Yasumo somesapo.

Ikia koro makoropasane Yasumo takumeaka somesane oyapo.

Matiu 7:13-14, 21-23

²² Yarusarame sitia ahira maiya amo ape meta some kaka ape meta soko some kaka, ayíáka Yasumo some kape hisiapo. ²³ Hinakano aporo metamo someraka, “Unihaeo, aporo hinamo hukusi Kotimo mafasiakosare? Aporo hinamo yakai Kotimo mafasiakosare?” Airakano Yasumo someraka, ²⁴ “Re ikia koro makoropasa á yorokoa pukusakipoko koteaka hemakapukua koraká rekeanie. Aporo metakira ikia koro makoropasa yorokoa pukusapoko asiáne, pusifasekeno poparipukusapo. ²⁵ Ape wafaya takahikia ikia koro mapirirakano repo ikia koroa paroparoraka someraka, ‘Unihaeo, ikia koro ropakamasie.’ Airakano ape wafayamo someraka, ‘Re epare? Re nōmo aserafapo,’ aihokosapo.

²⁶ Airakano repo someraka, ‘Né isina hakása toke makata nenakasupo. Isiapo apea nōmo some karakasupo.’ ²⁷ Airakano epo someraka, ‘Repo ape mayare? Re nōmo aserafapo. Aporo hinamo watikisao, re ano metakarikia pusie.’ Aíyaka ape wafayamo somehokosapo.

²⁸ Someahora maiya amo repo yao anaka aseane Eparahame, Aisake Yakope porofete aporo i suane Koti unihaeaka rea hauaka á hakása risikino asekea, re kára hihiripuhokosapo. Hihiripuraka akai kirisiraka kára himu nakosapo. ²⁹ Arirakano aporo maiya apeta anaka soko, maiya apura anaka soko, ketaya anaka soko, ketaya taku anaka soko, su sarimahokosapo. Sarimaraka Koti unihaeaka rea hauaka á su teporo makeraka hakasa toke makata nakosapo.

³⁰ Asiamo yumo aporo hinamo metakira fanaraka risiane kesekehokosapo. I metakira kesekeia risiane fanahokosapo.” Aíyaka Yasumo somesapo.

Yarusarame sitia aporo hinamo risiane Yasumo himu tumurumo hemakapusuane oyapo.

Matiu 23:37-39

³¹ Maiya amo Fere se aporo pekea Yasuaki someraka, “Né Herotemo rukusapakae. Asiamo hauaka one metakarikia pusie.” ³² Airakano Yasumo someraka, “Kotafe somehaeraka wera aporoaki some one some kakanie. Pipu soko, rau soko, aporo ho yatafumo

mosane soko, aporo makata tasane soko nōmo mafarakanapo. Sere isiamo nōmo makata rakikia makosapo. ³³ Pipu soko, rau soko, rawai soko, nōmo makata rakirane rakikia mako ano Yarusarame sitia hiakosapo. Yarusarame sitia porofete aporoane rusua kurapo. Rusua kurane hauaka meta á kakenafapo. Asiamo ano Yarusarame sitia ipu namina rusua kukusimo ano hiakosapo.

³⁴ Yarusarame aporo hinamo reo, repo Kotimo some kará porofete aporoane rusua kusuapo. Kotimo pusiesa aporoane repo ekemo karesapo. Yarusarame aporo hinamo reo, mena kaīyiamo mena mano sarimaraka auāmo kafoko tapikia mafainapo. Aina ay-iáka nōmo reane efera hunia soko, efera hunia soko, sarimaraka ayiakakosapoko asiane repo anoaki hisiane. ³⁵ Yarusarame aporo hinamo reo, repo apeane kauanehokosapo. Apea aporo hinamo waka risikiakosafapo. Nōmo reaki kakaro somerakaripo. Repo ano efera hunia aseakosafapo. Arirakano keseke ano peakosa maiya amo repo asekeea someraka, ‘Kotimo pusiesa aporo aperane, Kotimo makotehoasimoripo,’ aihokosapo. Aíyaka somehora maiya amo anoane repo aseakosapo.” Aíyaka Yasumo somesapo.

14

Aporo makata takamasa Yasumo mafasane oyapo.

¹ Fenena maiya metamo Fere se aporo káramo apea Yasu ipi makata nako pusuapo. Maiya suamo Yasuane Fere se aporomo maserapi asekehaesapo. ² Arirakano aporo meta hokono pirikia korake soko pirikia ayiáka makata takamasa apea wareapo. ³ Ayiáka warekeno Kotimo somemane tisa aporoaki soko, Fere se aporoaki soko, Yasumo someraka, “Fenena maiya amo aporo makata takamasane mafarakanone, ane Kotimo somemaneane metakarirakanare?”

⁴ Aihoe ipu makata somesafapo. Some paripeanafonorakano makata takamasane Yasumo mafasapo. Mafaraka marekea aporo makata takamasa mafasane Yasumo pusiesapo. ⁵ Asiamo aporo suaki Yasumo someraka, “Fenena maiya amo nōmo ní hokosa soko metao, saro ponomakau soko metao, he kafa hurupesane, nōmo ní foaka marafare?”

⁶ Airakano aporo suamo makata somerafaraka me kauraka asekeea risiapo.

Hokono akera á puraka Yasumo somesane oyapo.

⁷ Yasumo ipi aseane aporomo makata nakosakipoko teporo makeraka a tokeno asesapo. Arirakano aporo metakira, “Ano yano kárapo,” aíyaka hemakapukua namina aporo hokopusuamo sea a tokoakosakipoko wate foaka pukua tokeno Yasumo i asesapo. Asekeea Yasumo takumeaka someraka, ⁸ “Hinamo aruamara maiya amo, aporo meromo hokono keraka né peaerakano, puraka aporo hokopusuamo sea á né kakakopo. ⁹ Aporo meta hokopusua peraka kakakosakipoko aporo meromo someraka, ‘Né takahikia aporo wakasemamo sea á kakako pusie.’ Airakano né takahinaka kaiyahokosapo. ¹⁰ Arirakano aporo wakasemamo sea á né fana kayane aporo meromo someraka, ‘Hameo, né takahikia aporo hokopusuamo sea á kakako peae.’ Aíyaka né makárarakano aporo suamo aseakosapo. ¹¹ Aporomo epo ipiane makárarakano keseke e mawakasemahokosapo. Arirakano aporomo epo ipiane mawakasemarakano keseke e makárahokosapo.” Aíyaka Yasumo somesapo.

¹² Arirakano aporo meroaki Yasumo someraka, “Hokono akera maiya amo ní more soko, ní mae soko, ní aporo táke soko, aporo makata kemo káraraka reane soko, iane peaehokopo. Nōmo peaerakano peaesakipoko né soko ropo yaiya peaehokosapo. ¹³ Arirakano hokono akera maiya amo aporo makata forosa soko, aporo hokono matipusa soko, aporo korake matipusa soko, aporo hi fausa soko, i suane nōmo peaehoanie. ¹⁴ Aporoane nōmo peaerakano aporoamo soko né ropo peaehokosafapo. Arirakano nōmo aporo metakira araresakipoko né seseaka rekeanie. Keseke aporo hinamo ereketaesane maturikia taena maiya amo Kotimo néane makata ropo kára kakakosapo.” Aíyaka Yasumo somesapo.

Hokono keakosane Yasumo takumeaka somesane oyapo.

Matiu 22:1-10

¹⁵ Aporo hakása meta teporo makeraka kayamo, Yasumo somesane kaikia someraka, “Koti unihaeaka reamo apea hokono keraka, aporo hinamo makata nekea tokoakosa aporo hinamoane yumo seseaka risikinapo.” ¹⁶ Airakano Yasumo takumeaka someraka, “Aporo metamo hokono kára keakosakipoko aporo yakai peaniesapo. ¹⁷ Hokono akeramo makata nakosane sarimasapo. Aporo su peasimo ipi aporo raipaki someraka, ‘Aporo su yumo peaehoanie,’ aisapo. Airakano aporo raipamo iane peaesapo. ¹⁸ Peaerakano pesafapo. Aporo suamo peakosafapo, aíyaka meaka sekesapo. Aporo metamo aporo raipaki someraka, ‘Hauaka nōmo kawe roposane aseako purakanapo. Ano peakosafapo.’ ¹⁹ Airakano aporo metamo someraka, ‘Saro ponomakau kaeyakosu (10) nōmo kawe roposane aseako purakanapo. Ano peakosafapo.’ ²⁰ Airakano aporo metamo someraka, ‘Ano hinamo kawe arumasasamo peakosafapo.’

²¹ Airakano aporo raipane paripukua ipu makata somesane ipi wafayaki somesapo. Somerakano aporo ape meromo saperaka, aporo raipaki someraka, ‘Ikia kara fea ape mukisapo. A foaka pukua, aporo makata forosaki someraka, “Re peae,” aíyaka aporo hokono matipusaki soko, aporo hi fausaki soko, aporo korake matipusaki soko, “Re su peae,” aihoanie.’ ²² Airakano aporo raipamo iane pasimokoako pusuapo. Puane i su perakano asekeea, aporo raipamo ipi wafayaki someraka, ‘Aporo unihaeo, nōmo peanie, aisane nōmo i suaki somesapo. Somerakano i sú pesapo. I pesane ape tapesafapo.’ ²³ Airakano aporo raipaki ipi wafayamo someraka, ‘Ape one metakarikia, yaoa ikia kara metakira kára soko, metakira wakasema soko, á pukua aporomano peaehoanie. Ape tapehoasimo aporo hinamo yakai peaehoanie. ²⁴ Hao, kaisie. Nōmo kakaro somerakaripo. Hokono akera wo, aporo fana peaehoane hisisane, nōmo metakariakosapo. Iane hakása makata nakosafapo,’ aisapo.” Aíyaka Yasumo takumeaka somesapo.

Yasu patera aseakosane oyapo.

Matiu 10:37-38

²⁵ Yasuyaki aporo hinamo yakai pusuapo. ²⁶ Puraka iaki Yasumo pariasekea someraka, “Aporo hinamo metamo ano patera aseako ipi ata, ipi ama, ipi hinamo, ipi hokosa, ipi mae, ipi papā, ipi kau soko, makata suane mokoma kesekehoanafonona aporo hinamoane, ano patera asesa aporo hinamofapo. ²⁷ Aporo hinamo metamo ipi ira matopesa makatiraka maka punafonona aporo hinamoane ano patera asesa aporo hinamofapo.

²⁸ Arirakano aporomo huturu ape (tu sitor) kiakosakipoko fana ipi moneane menonapo. Ape kikimakosane mone siahoasirihamo mone menonapo. ²⁹ Arirakano mone menohoanafonoraka ape takuma ira kesa hákasa porokoa kikifai tetá hákasanetraeraka mone farakano huturu yapurane metakariakosapo. ³⁰ Metakarirakano aporo metakiramo aseraka hokomaka someraka, ‘Ape kikimayafareapo,’ aíyaka somehokosapo. Aíyaka somehokohoamo fana mone menohoanie.

³¹ Arirakano aporo unihae kini wakasemamo ipi aporo terakaiyamosa ame aporoane yakai tene taosenepo (10,000). Aporo unihae wakasema amo ipi aporo unihae kini kara aki yunuraka weakosakipoko pesapo. Arirakano aporo unihae kini karamo yunu aporomo aporo terakaiyamosa ame aporoane, kara yakai tuaneti taosenepo (20,000). Arirakano aporo unihae kini wakasemamo yunu weasiraka fana hemakapuraka, ‘Isu weraka rukua koakataehoasireare? Rukua koakataehoanafonorakano isina weakosapo. Arirakano rukua koakataerakano isiapo metakariakosapo,’ aisapo. ³² Aíyaka ipi takekeea hemakapuraka, ‘Wae, isu aporo hukusismo rukua koakataehoasireapo. Nōmo weakosapoko asiane metakarirakanapo.’ Aíyaka hemakapukua ipi aporo raipaki someraka, ‘Aporo unihae kini kara wo peakohoamo, né i arisia pusie. Weakosane metakariakosakipoko nōmo somehoko pusie. Puraka úyaka somehoanie. “Isu aporo hukusipo. Reane aporo karapo. Asiamo isina weane siahoasifareapo. Weakosane metakariakosakipoko isiapo re api kayaere?” Aíyaka iaki somehoanie.’ Aíyaka unihae kini wakasemamo someaka maresapo.

³³ Asiamo hauaka wo makata kemo metakarianafonona aporo hinamoane ano patera asesa aporo hinamofapo. Aporo hinamo metamo ipi makata kemoane metakarirakano aporo hinamoane ano patera asesa aporo hinamopo." Aíyaka Yasumo somesapo.

Kifiri watikisa asiane oyapo.

Matiu 5:13; Maka 9:50

³⁴ Yasumo some meta someraka, "Kifiriane wapesa kotesapo. Kifiri wape farakano efera hunia wapehoasimo yakapa rakirare? Wae, wapehoasimo makata meta rakirafapo. Efera hunia wapehokosafapo. Asiamo kifiri wapesa fasane. Nena yaoa mamakatenapo.

³⁵ Arirakano makata mano koteaka taneheasimo hemo wafayamo kifiri wapesane hauaka kokomarerapo. Arirakano saro ponomakau fakosa akiyaki kifiri yaki sarimaraka makata porosa hauaka á taenapo. Taerakano makata porosane koteaka taneherapo. Arirakano kifiri wapesane fasekeno makata rurafapo. Nena yaoa mamakatenapo. Asiamo re senaki risiamo koteaka kaiyinie." Aíyaka Yasumo somesapo.

15

Saro sipi ipi haku rosaka pusuane oyapo.

Matiu 18:12-14

¹ Maiya metamo takese mora aporo soko, aporo watikisa metakira soko, su Yasu rea pekea, epo someane kaiyako pesapo. ² Perakano asekeea Fere se aporomo soko, Kotimo somemane tisa aporomo soko, saperaka someraka, "Aporo watikisane Yasumo ipi tereraka pasimaka iyaki hakása toke makata anene," aisapo.

³ Airakano Yasumo takumeaka someraka, ⁴ "Re aporo hakása metamo saro sipi wane harote (100) risiane hakása meta yaoa rosaka purakano repo asekepayanare? Wae. Saro sipi naeneti naene (99) yia sarimaraka risiane metakarikia, hakása rosaka pusuane kope purapo. Kokoa kokoa hisiraka aserapo. ⁵ Aseraka seseraka ketakamaka makatiraka apea maka purapo. ⁶ Apea maka pekea ipi aporo táke soko, ipi ape hakása risia aporoane soko peasimo wárupo. Wáraka perakano iaki someraka, 'Saro sipi rosaka pusuane, nōmo kokoa masapo. Asiasamo repo soko sesehoanie.' airapo.

⁷ Sesesa ayiáka aporo hakása metamo ipi makata watikisane hufitaeraka, makata watikisane metakarikia, koteaka rekeako pariraka rekeno, hepene aporomo soko Kotimo soko aseraka, namo kakaro kára sesenapo. Arirakano aporo naeneti naenemo (99) hemakapuraka, 'Isiapo himu koteaka susu hemakapukua risiane, marirakano isu risiki-ako parihokosare?' Aíyaka hemakapurakano, koteaka risia aporoane hepene aporomo asekeea sesenapo." Aíyaka Yasumo somesane Fere se aporomo hemakapusimo somesapo.

Mone hae hasaka kosane oyapo.

⁸ Yasumo takume meta someraka, "Hinamo hakása metamo ipi suifa mone hae kaeyakosu* toapo. Toane mone hae kaeyako hakása ane hurupesekeno asekepayanare? Wae. Ipi nafa paikia ape feaoraka, mone haeane kokoa hisiraka, ⁹ kokoa maraka, hinamoamo sesenapo. Seseraka ipi hinamo táke soko, ipi ape hakása toa hinamoane soko, sarimahoasimo wáraka su sarimarakan someraka, 'Nōmo mone hae hakása hurupesa hasaka kosane, nōmo nī kokoa masapo. Masekeno repo soko sesehoanie,' airapo.

¹⁰ Sesena ayiáka aporo hinamo hakása metamo makata watikisane hufitaeraka, watikisane metakarikia Kotiaki rekeako parirakano, Kotimo soko hepene aporomo soko aseraka sesenapo." Aíyaka Yasumo somesapo.

Hokosa ipi haku rosaka pusuane oyapo.

¹¹ Yasumo takume meta someraka, "Aporo metamo aporo hokosa tetá risiapo.

¹² Hokosa kesekemo ipi wafayaki someraka, 'Atao, né finihaoa eto risikiako nōmo makata kemoane parakurasie. Parakuraka ano kakakosane, ano nīaki yumo kasie.' Airakano ipi wafayamo makata kemoane parakuraka hokosa tetáki kasápo. ¹³ Karakano

* 15:8: Yu aporomo hinamo aporo aseamo siufa mone hae kaeyakosu hatiraka wamo motorapo.

wakasema nina hokosa kesekemo ipi makata mosane sarikekea maka pukua, ipi wafayamo hauakane metakarikia hauaka yamenoa pusuapo. Pukua hauaka á pauraka reapo. Hauaka á reke ipi makata watikiaka rakiraka reapo. Watikiaka rakiraka reke ipi moneane aporo hinamo metakiraki mokome karáka reapo.¹⁴ Mokome karáka reke ipi mone ane fasapo. Arirakano maiya amo hauaka á makata nakosane fasapo. Makata nakosane fasa maiya amo e kára meamosapo.¹⁵ Meamorakano e pukua hauaka mero aporoaki someraka, ‘Nepoko nōmo makata rakiaere? Nepoko nōmo makata rakiakoripo.’ Airakano aporo hauaka meromo someraka, ‘Nōmo saroane nōmo asekea rekeanie.’¹⁶ Airakano saroane epo asekea reke saromo makata nakosane epo asekea hemakapuraka, ‘Saromo makata nenane ano nariripo.’ Aíyaka epo hemakapurakano aporo metamo eane makata nakosa kasafapo.

¹⁷ Kakanafonorakano wakasema nina, ipi koteaka hemakapusuapo. Ipi hemakapuraka, nōmo atamo aporo raipamo makata sia nenakasupo. Pipu soko ipu makata siaraka nenakanapo. Ipu makata siaraka nenakao, ano hauaka wo reke namo kakaro kara meamoraka kukuripo.¹⁸ Asiamo ano takahikia atamo apea purakapo. Puraka ataki nōmo uyaka somehokosapo. ‘Atao, Kotiane nōmo mawakasemasapo. Ata ne soko nōmo mawakasemasapo.¹⁹ Nōmo yumo anoane, “Nōmo nī hokosapo.” Aihokopo. Anoane “Nōmo aporo raipapo.” Aihoanie.’²⁰ Aíyaka ipi ataki somehoko hemakapukua takahikia ipi atamo apea paripusuapo. Paripukua yamenoa perakano ipi wafayamo aseraka, ‘Nōmo hokosa wate rosaka pusuane apere.’ Aíyaka kamenakaraka foaka pukua ipi hokosane fatuaka maka makanusapo.

²¹ Makanurakano hokosamo someraka, ‘Atao, Kotiane nōmo mawakasemasapo. Né soko nōmo mawakasemasapo. Nōmo anoaki “Nōmo nī hokosapo,” aihokopo.’²² Airakano wafayamo ipi aporo raipa wáraka someraka, ‘Pasu kotesa epo osohoasimo foaka maka peae. Tamaka osohoasimo maka peae. Kau rakisimo waya hokonoa hira maka peae.²³ Saro ponomakau mano kaniamosekeno e nasimo rukua paiyinie. Pipu yumo isina e karikia seseaka makata paikinakosapo.²⁴ Nōmo hokosa kurakanareapo, aisane pipu nōmo aserakaripo. Wate fana e rosaka pusuane pipu apere. Asiamo pipu nōmo nī hokosapoko saro ponomakau mano maka rusie. Hokosapoko makata pakinakosapo.’ Airakano aporo raipamo saro ponomakau mano maka rukua paisiapo. Paikia nekea namina kesasapo.

²⁵ Kesasa maiya amo hokosa fanane hemoa rea peraka, ape makeraka kaiyiáne kesarakano kaisiapo.²⁶ Kairaka ipi aporo raipaki someraka, ‘Kesaraka sikirakae. Mairakarirakapo.’²⁷ Airakano aporo raipamo someraka, ‘Nōmo nī mae kesekeane kurafaraka ipi pariperakasapo. Asiasamo ni atamo seseraka saro ponomakau kaniamosa rukua, epoko makata paikinenaka kesaraka ayapo.’

²⁸ Airakano hokosa fanamo ipi kakaro kara saperaka, ‘Apea ano pukusafapo,’ aisapo. Airakano ipi ata pekea kukunameaka someraka, ‘Apea ne peae.’²⁹ Airakano hokosa fanamo someraka, ‘Maiya suamo nepoko aporo raipamo arakira ayiáka, nōmo rakisiapo. Nōmo someane nōmo kakimasapo. Nōmo anoaki makata yakapa kasare? Nōmo ano makata kasafapo. Saro nanikose mano hakásá soko, nōmo aporo tákéane karikia paiki-nasimo karakasufapo.³⁰ Nōmo nī hokosa kesekemo hinamo hakimaraka reapakasupo. Nōmo makata kemoane ipi mokoa pusuapo. Mokoa pusuane ipi hinamo hakimaraka moneane hinamo kaka fasapakasupo. E pariperakano, epoko nōmo saro ponomakau mano kaniamosa rukua e karikia makata paikia anene.’

³¹ Airakano ipi wafayamo someraka, ‘Né anoyaki hakásá reapo. Nōmo makata kemoane su nōmenapo.’³² Asiamo nōmo nī mae kesekeane kurakanareapo aisane pipu asesapo. Wate fana e rosaka pusuane pipu apere. Perakano seseaka makata paikinenakanapo.’ Aíyaka wafayamo somesapo.” Aíyaka Yasumo takumeaka somesapo.

¹ Aporo hakāsa puraki Yasumo takumeaka someraka, “Ape wafayamo makata kemo kárasekeno, aporo metamo ipi makata kemoane asekea rekeasimo murikimaka maresapo. Maresane aporo metamo aporo ape wafayaki hokoreraka someraka, ‘Nómo makata ropoane nómo aporo asekea reamo koteaka asekea rekenafapo. Ipi mokome karaka makata ropoane farakanapo.’ ² Airakano ape wafayamo aporo asekea reane peaesapo. Perakano eaki someraka, ‘Nómo makata koteaka rakisiapakare? Nōmo makata ropoane nómo mokome karakánapakae. Né makata rakisiane pipu metakarirakanapo. Né metakariasisiraka nómo makata rakisia ropo kará sawiane nōmo aseako pipu yia maka peae.’

³ Airakano aporo asekea reamo hemakapuraka, ‘Ano pipu metakarirakanapo. Keseke nōmo yakapa rakiakosare? Nōmo hauaka meta makata rakiako kaiyako ayiane ano sia wakapuhoasifareapo. Arirakano ape sua ano mone makasie, aíyaka kaiyako ayiane ano kaiyahoasireapo. ⁴ Ano metakarirakanano keseke aporomo ano ararehoasimo nōmo uyáka rakiakosapo.’ ⁵ Aíyaka hemakapuraka aporo suamo ape wafayaki makata ropo kakanafonosa nine makata ropo kakakosakipoko i su hakāsa hakásaraka peaesapo. Aporo hakāsa meta fana perakano, eaki kairaka, ‘Nómo makata yakapasu ape wafayaki kakafunure?’ ⁶ Airakano epo someraka, ‘Orofe wera tarámo wane harote (100) suane kakafunupo.’ Airakano aporo asekea reamo someraka, ‘Nómo wane harote (100) suane kakakosapoko asiāne, nōmo metakarikia sanasirakanapo. Asiamo nōmo wane harote ane kosoraka, fifiti ane (50) kakakosakipoko sawia poparasie.’

⁷ Aíyaka aporo metaki aporo asekea reamo someraka, ‘Nómo ape wafayaki makata yakapa su kakafunure?’ Airakano epo someraka, ‘Witi hae pakia kesane wane harote suane (100) kakafunupo.’ Airakano aporo asekea reamo someraka, ‘Nómo wane harote kakakosapoko asiāne, nōmo metakarikia sanasirakanapo. Asiamo nōmo wane harote (100) kosoraka áti su (80) kakakosakipoko sawia poparasie.’ Aíyaka aporo amo keseke e ararehoasimo aporo asekea reamo somesapo. Aiyáka fana makata ropo kára kakakosapoles metakarikia, makata ropo wakasema kakakosapo, aíyaka popasapo. ⁸ Asiasamo ape wafayamo aporo asekea reamo kotafe rakisiaporakano, eaki kekereraka sikiraka someraka, ‘Keseke aporomo né ararehoasimo ipu makata ropo anoaki kakafunusa nine nōmo sape meta rukupatesasamo iane araresapo.’ Aíyaka ape wafayamo somesapo.” Aíyaka Yasumo somesapo. Arirakano takume amo kepoane Yasumo someraka, “Nena aporo hinamomo someraka, ‘Keseke makata ropo kakasimo pipu népoko nōmo yaku rakirakanapo.’ Aíyaka nena aporomo wate foaka hemakapukua rakirapo. Arirakano Kotimo ikia kara faesa á risia aporo hinamomo wate foaka aiyáka rakirafapo.” Aíyaka Yasumo somesapo.

⁹ Aíyaka Yasumo efira hunia someraka, “Keseke hepene yapura ne hinaka Kotimo neaki someraka, ‘Nómo makata kemoane soko, moneane soko, koteaka asekea reapo.’ Aihoasimo hauaka wo makata kemoane soko moneane soko, koteaka asekea reke, moneamo aporo hinamoane ararehoanie. Koteaka ararerakanone, hauaka wo makatane fahoram, keseke hepene yapura ahiramo Kotimo someraka, ‘Nómo makata koteaka rakisiapo. Yumo né hepene ape wo peae,’ aihokosapo. ¹⁰ Arirakano repo aporo hinamo metamo makata wakasemanre koteaka asekea rekeno, ane makata kárane soko, koteaka asekea rekeakosapo. Arirakano makata wakasemanre koteaka asekea rekeanafonorakano, ane makata kárane soko, koteaka asekea rekeakosafapo.

¹¹ Asiamo hauaka wo makata kemo soko, mone soko, koteaka asekea rekeanafonorakano, ane nōmo Kotimo makata namo kakaro kotesane koteaka asekea rekeakosare? Wae, koteaka asekea rekeakosafapo. ¹² Arirakano aporo metamo menane nōmo koteaka asekea rekeanafonorakano, ane né makata ropoane kakakosare? Wae, kakakosafapo. ¹³ Arirakano wafaya tetápoko aporo raipa hakásamo rakiane siahorasifareapo. Wafaya tetápoko rakiraka metaki hisiraka rakiakosapo. Metaki seseraka rakiakosapo. Wafaya

* ^{16:8:} Aporo asekea reamo kotafe rakisiane ape wafayamo kekeresapo. Asiane makata kotafe rakirane Yasumo kekerenafapo. Yasumo takumeaka somesa ane aporomo enomakasimo somesapo.

hakása makáraraka seseraka rakiraka, wafaya metaki hisiraka patera tariakosapo. Asiamo himu metamo Kotiaki hemakapukua, himu metamo yokotae moneaki hemakapukua, ayíáka himu tetáraka hemakapukua rakiane siahoasifareapo.” Aíyaka Yasumo somesapo.

Yasumo makata metakira somesane oyapo.

Matiu 11:12-13; 5:31-32; Maka 10:11-12

¹⁴ Yasumo somesane Fere se aporomo kairaka, namina mone kára hemakapukua risike, Yasuane aseke a hokomaresapo. ¹⁵ Hokomarerakano Yasumo someraka, “Aporo suamo reane aseraka, ‘Fere se aporoane aporo kotesapo.’ Aihoasimo repo kaumo aina ayíáka arakire. Asiāne repo watikiaka hemakapukua rakisiane, himua mahamekea risiane, Kotimo ipi aserapo. Asiamo aporo hinamomo hauaka wo makata aki makáraraka hemakapukua risiane, Kotimo makáranafapo. Asiāne makata ane Kotimo aseraka, nenakamaka makata ayireapo, airapo.

¹⁶ Yone he tapukumarerane peasiraka Mosesemo somemane soko porofete aporomo some popasane soko, aporo hinamomo suamo kaisisupo. Asiamo somemane amo iane aseke a reasusupo. Asiane Yone he tapukumarerane peraka, Koti unihaeaka reane epo some kasapo. Asiamo maiya omo Kotimo aporo hinamomo aseke a rea someane nōmo some karakanapo. Aporo hinamomo yakaimo Kotimo iane aseke a rekeasimo, ipu namina seseraka kairakanapo. Aporo hinamomo yakaiane Kotimo ape tua hiakosakipoko makata hufitaehoramo, ikia koroa wakapuaka arura ayíáka ruraka risikinapo. ¹⁷ Hepene yapurane soko, hauaka one soko fahokosane makata wakasemapo. Arirakano Kotimo somemaneane fahokosafapo. Ane, makata kárapo.

¹⁸ Arirakano aporomo ipi asea fimareke a hinamomo meta arumarakanano aporoamo hinamomoane haki arumarakanapo. Hinamomo fimaresane aporo metamo arumarakanano hinamomoane haki arumarakanapo.” Aíyaka Yasumo somesapo.

Rásarase reane oyapo.

¹⁹ Yasumo someraka, “Aporo hakása metamo ipi mone kára sarimaraka reapo. Ipi pasu mone káramo roponapo. Maiya suamo pasu kotesa susu osoraka, makata nakosa kotesa susu nenapo. ²⁰ Arirakano aporo meta yano motosa Rásarase makata forokoa reke, ipi kauane neketasi sususapo. Maiya suamo aporo kára reamo apea ²¹ makata nenaka momoane teboro petaua atura hurupepesane Rásarasemo nakosakipoko mumiraka ikia koro makeraka aseke a kayapo. Aseke a kayane ipi kauane neketasisususane kásamo sarerakano asesapo. ²² Asiamo wakasema nina keseke Rásarase ipi kurakano hepene aporomo e karikia, Eparahame kayakipoko karikia hisiapo. Hisiakipoko, keseke aporo kárane kusua hauaka maresapo. ²³ Maresane e Hétisi hauaka atura puraka kau teraka himu neke a reapo. Ayíáka reke yameno yapura aseane Eparahame kayakipoko Rásarase kakeno aseke a ²⁴ wáraka, ‘Ata Eparahameo, Rásarasemo hokonomo he inusa sakairaka ano arua motoako e pusiesie. Hauaka wo ira rufia ano reke kára sisipuripo. Ano kau kára teripo. Rásarase ipi ano ararehoko pusiesie.’

²⁵ Airakano Eparahamemo someraka, ‘Hokosao, ní hitaferaka rea maiya amo makata kotesa susu ní marakasupo. Ane, nōmo meraruhokopo. Rásarase fana makata forokoa reane, yumo ipi seseke rekenapo. Ne fana káraraka reane, yumo tēsa hauaka á rekenapo. ²⁶ Arirakano tipia hao kára kayasasamo né area isu peasifareapo. Né soko isu arisia wo peasifareapo.’

²⁷ Airakano aporo káramo someraka, ‘Atao, nōmo ní mae kakoreasu atamo apea risikinapo. ²⁸ Ano area hauaka wo tēsa hauakapo. Hauaka wo iane peakohoamo Rásarasemo somehoko pusiesie.’ ²⁹ Airakano Eparahamemo someraka, ‘Ne tēsa rea hauaka á nōmo mae pukohoamo Mosesemo soko, porofete aporomo soko, some kasane ipu kaikia kekemahoafunureapo.’ ³⁰ Airakano aporo káramo someraka, ‘Eparahameo, Mosesemo some kasane ipu kakimarakarifapo. Ane siahoasifareapo. Arirakano aporo kusua turikia pusua amo iaki some karakanone, ane ipu kairaka makata watikisane metakarikia risikiako parihokosapo.’ ³¹ Airakano Eparahamemo someraka, ‘Mosesemo

some kasane soko, porofete aporomo some kasane soko, ipu kakipayaraka risiamo aporo kusua turikia puraka somerakano soko, ipu kakimakosafapo.' Aiyaka Eparahamemo somesapo." Aiyaka Yasumo takumeaka somesapo.[†]

17

*Makata watikiaka rakisiane oyapo.**Matiu 18:6-7, 21-22; Maka 9:42*

¹ Yasumo ipi aporo hakāsa puraki someraka, "Re hauaka wo makata rakisimo aporo metakiramo reaki hokokakakosapo. Repo watikiaka rakisimo reaki hokokakakosapo. Hokokasa aporoane Kotimo hukuarura maiya amo e hukurukusane itifiakosafapo.

² Aporoane eke káramo mawia kita hukumarekea he tawara numua makasuanane wakasema fanasirakanapo. Asiane aporomano meta kawe ano patera asesane epo watikiaka rakisimo aporo metamo hokokarakano, hokokasá aporoane ipi kára fanasiraka rekeakosapo.

³ Asiamo re asekeanie. Ní maemo né mokoatikirakano eane maroporaka someraka, 'Nómo makata watikiaka rakiakopo.' Airakano ipi makata watikisane metakarikia someraka, 'Nómo ne mokoatikisane nōmo kakaro kara hasaka rakireapo.' Airakano epo watikisane nōmo mafaraka mameraruhoanie. ⁴ Pipu maiya hakāsa yiamo nōmo ní maemo neane mokoatikisane epo neaki someraka, 'Neaki nōmo hasaka hemakapukua rakireapo. Asiane nōmo mameraruhoane siahosireare?' Airakano nōmo mafaraka mameraruhoanie. Maiya hakāsa yiamo yape yatipinusu ayíáka mokoatikiraka rakiraka nōmo hasakasapo, airakano nōmo mafaraka mameraruhoanie." Aiyaka Yasumo somesapo.

Yasumo someane kakimakosane oyapo.

⁵ Yasumo tarira aporomo eaki someraka, "Isiapo Kotiaki himu hakásaraka hemakapurane nōmo mawakapuraka makárahoanie." ⁶ Airakano Yasumo someraka, "Ira máseta hae namo kakaro wakasemapo. Repo Kotiaki himu hakásaraka hemakapurane wakasema ayiria ayíáka risikinone, ane repo ira káraki someraka, 'Kepo pikinuyaki su fimaka, he tawara numua rekeako pusie.' Airakano iramo kairaka ipi fikia pukua, he tawara numua rekeako pukusapo." Aiyaka Yasumo somesapo.

Aporo raipamo makata rakirane oyapo.

⁷ Yasumo takumeaka someraka, "Repo aporo hakāsa metamo hauaka asekea rekenone, nōmo aporo raipaki someraka, 'Nómo hemoane nōmo hauaka mosorako hinie. Arirakano nōmo saro sipi soko, nōmo asekea rekeanie,' airapo. Arirakano maiya amo aporo raipamo hauaka mosorako, hemoa hikia samapu apea perakano nōmo eaki someraka, 'Né makata nako peae,' aiyaka nōmo somerare? ⁸ Wae. Nómo aiyaka somerafapo. Nōmo someraka, 'Fana nōmo makata nakosane nōmo paikia, inasekeno ano akaya teporo wo maka peanie. Nōmo makata nakosa fana nekea farakano, né keseke makata nako punie.' Aiyaka nōmo somerapo.

⁹ Arirakano hauaka asekea rea aporomo ipi aporo raipaki, nōmo makata rakiniesane, epo rakisekeno ane, ipi asekea rea aporomo eaki kekereraka susehokosare? Wae. Aporo raipaki rakiniesane kakimaka rakisia hákasa akipoko kekerenafapo. ¹⁰ Arirakano aina ayíáka neaki ayíakaniesane nōmo kakimaka rakikia maraka nōmo someraka, 'Ano aporo raipapo. Aporo raipamo makata rakira ayíáka nōmo rakisiapo. Nōmo kekerehoasimo nōmo rakisiafapo.' Aiyaka somehoanie." Aiyaka Yasumo somesapo.

Aporo toropakesa kaeyakosu Yasumo mafasane oyapo.

† 16:31: Some one menoraka kepoane úyaka hemakapunie. "Aporo kara reamo ipi makata kemo karasasamo ipi heao hauaka pusuapo," aiyaka hemakapurakanone hasaka hemakapurakanapo. Arirakano "Aporo forokoa reamo ipi makata kemo fasasamo ipi hauaka kotesa á hisiapo," aiyaka hemakapurakanone hasaka hemakapurakanapo. Hepene apea hiakosakipoko aporomo ipi makata kemoane Kotimo aserafapo. Aporomo ipi Kotiaki himu hakásaraka hemakapusuane Kotimo asekea takeka pasimarapo.

¹¹ Yasu Yarusarame sitia pukusakipoko Kariri hauakane makama taku raraka, Sameria hauakane makama sape roraka, ikia tipia wareakipoko Yasu á pusuapo. ¹² Pukua apea perakano aporo toropakesa kaeyakosu e sapenako pekea, wakasema fasikia fe takua risike ¹³ wáraka, “Unihae Yasuo, nómō isu kamenakaraka ararerasie.” ¹⁴ Airakano Yasumo asekeea someraka, “Pirisiti aporomo re kau asekeasimo pusie.” Airakano i ikia kara puane toropakesane fasapo.

¹⁵ Arirakano aporo hakása metamo ipi kauane aseane toropakesane faseleno, ipi seleraka pariperaka Kotiaki sakepamo kekererape pesapo. ¹⁶ Pekea Yasu rea kakuna porokoa kake susesapo. Arirakano aporoane ipi Sameria aporopo. ¹⁷ Aporo hakása amo ipi suseaka perakano Yasumo someraka, “Aporo kaeyakosu nómō mafasapo. Kaeyakoane népo. Aporo tokona suane mayare?” ¹⁸ Aporo hakása meta ipi hauaka haku meta reamo Kotiaki susehoko pekea are. Aporo tokona suamo Kotiaki susehoko perakarifapo.” ¹⁹ Aíyaka aporoaki Yasumo someraka, “Nómō anoaki himu hakásaraka hemaka apura yiamo, ne toropakesane mafarakayiapo. Né takahikia pusie.” Aíyaka Yasumo eaki somesapo.

Yasu ipi paripeakosa maiyane oyapo.

Matiu 24:23-28, 37-41

²⁰ Yasuaki Fereze aporomo someraka, “Koti unihaeaka rekeakosane masinaka unihaeaka rekeakosare?” Airakano Yasumo iaki someraka, “Koti unihaeaka reane aporomo himo asekeasimo aiyáka unihaeaka rekenafapo. ²¹ Arirakano aporo metamo someraka, ‘Sape aka asesie. Koti unihaeaka rekenapo.’ Airakano aporo metamo someraka, ‘Sape ro asesie. Koti unihaeaka rekenapo.’ Aíyaka somehoane siahoasifareapo. Asiamo re arisia yia Koti ipi unihaeaka rekenapo,” aisapo.

²² Aíyaka aporo hakása puraki Yasumo someraka, “Keseke repo someraka, ‘Yape hakása Yasu Aporomanomo Tákeane isiapo aseakoripo.’ Aíyaka repo somehokosapo. Repo aíyaka someraka tiki somerakao, asiane, repo ano aseakosafapo. ²³ Reaki aporo metakiramo someraka, ‘Ano Aporomanomo Tákeane pesapo. Repo sape ro asesie.’ Airakano aporo metakiramo someraka, ‘Ano Aporomanomo Tákeane pesapo. Repo sape aka asesie.’ Aíyaka somerakanone repo kakimakopo. Someane repo hemakapukua kekemahokopo.

²⁴ Asiamo ano Aporomanomo Tákeane pariaperamo repo someraka, ‘Isiapo aser-akarifapo,’ aíyaka somehokosafapo. Ano pariaperamo yamakere faena aiyáka ano paripeakosapo. Yamakereraka foaka ti yapura faena aiyáka ano paripeakosapo. ²⁵ Ano paripeasiraka pipu yumo aporo hinamo arisiamo nómō someane koareaeraka ano kau mokoatikihokosapo.

²⁶ Aporomanomo Táke ano pariaperamo Noa rea maiya amo asia aiyáka ayiakakosapo. ²⁷ Noa rea maiya amo he peasiraka, aporo hinamomo makata nakosane hákasa hemakapukua, aporomo hinamo arumokoakosa hákasa hemakapukua aiyáka risiapo. Aiyáka risiakipoko Noa kasua ripasa maiya amo he peraka aporo hinamo suane he nekea kukua kekefa fasapo. ²⁸ Arirakano Rote rea maiya amo asia aiyáka ano pariaperamo ayiakakosapo. Rote rea maiya amo aporomo makata nekea, makata roporaka, makata porokoa, ape kikia, aiyáka rakiraka risiapo. ²⁹ Sotome taone ane Rotemo metakarisia maiya amo, hepene aeyaka ira rufiyaki ekeyaki yao asia sarimaraka peraka, aporo hinamo su rukua fasapo. ³⁰ Asia aiyáka, Aporomanomo Táke anoane fasere aperamo ayiakakosapo.

³¹ Ano pariapera maiya amo aporo yaoa reane ipi makata kemo mako ape kakarua puane siahoasifareapo. Ano foakaya peakosasamo, aporo apea puane siahoasifareapo.

³² Asiamo Rotemo hinamoaki asiane koteaka hemakapunie. Rotemo hinamomo parias-esa aiyáka repo soko anapaka asekeanie. ³³ Asiamo aporo hinamo hauaka wo arisiamo hitaferaka risikiakosa hákasané, aíyaka hemakapurakano, aporo hinamoane Kotiyaki yaiya risikiakosafapo. Arirakano aporo hinamomo anoaki hemakapuraka hauaka wo

kau hitaferaka risikiakosane makama kesekeraka, aíyaka hemakapurakano, aporo hinamoane Kotiyaki yaiya risikiakosapo. ³⁴ Hao, kaisie. Ereamo apea aporo tetá hakāsa wakakesane, meta nōmo pasimaraka, meta yia metakariakosapo. ³⁵ Arirakano hinamo tetá hakāsa asipa araka risiane, meta nōmo pasimaraka, meta yia metakariakosapo. ³⁶ [Aporo tetá yaoa risiane meta nōmo pasimaraka meta yia metakariakosapo.]

³⁷ Airakano aporo hakāsa puramo Yasuaki someraka, “Unihaeo, ma ayiakakosare?” Airakano Yasumo someraka, “Makata kusua kayakipoko mena sakarekepo asia sari-manapo.” Aíyaka Yasumo somesapo.

18

Hukurura kepo kaira aporoane rea á, hinamo yaro pesa Yasumo takumeaka somesane oyapo.

¹ Maiya suamo aporo hinamomo kurikurihoasimo, kurikurinane metakariakohoamo, Yasumo takumeaka somesane oyapo. ² “Ape meta hukurura kepo kaira aporo reke, epo Kotiane soko, ipi aporo tākeane soko koteaka hemakapurafapo. ³ Arirakano ipi ape sumu á hinamo yaro hakāsa kayapo. Hinamo yaroane aporo metamo mokoatikirakano hinamo yaroane hukurura kepo kaira aporo rea á peraka, hinamoamo someraka, ‘Aporo metamo ano mokoatikirakano, nōmo eane maroporaka, keseke ano ararehoanie.’ Aíyaka maiya suamo maroporaka ararehoanie, aisapo.

⁴ Airakano maiya káramo hukurura kepo kaira aporoamo kakipayasapo. Asiane keseke epo ipiyia hemakapukua someraka, ‘Kotiane nōmo hemakapurafapo. Aporo tākeane soko nōmo hemakapurafapo. ⁵ Asiamo hinamoamo anoaki maiya suamo someraka, “Maroporaka ararehoanie.” Airakano nōmo maiya suamo kaikia hisiripo. Efera hunia perakano e nōmo arareraka maropohokosapo. Maropohoanafonorakano maiya suamo ano rea perakano epo someane nōmo kaikia hisiraka ano wafororipo.’ Aíyaka hemakapukua hukurura kepo kaira aporomo somesapo.” Aíyaka Yasumo takumeaka somesapo.

⁶ Asiamo some kepoane hemakapusimo Yasumo efera hunia someraka, “Hukurura kepo kaira aporo watikiaka rea yiamo, hinamo yaroane epo arareraka eane mokoatik-isane maroposapo. ⁷ Hao, kaisie. Koti ipi koteaka susu rerasamo reane mokoatikisane epo maropohokosapo. Ereamo soko maíyamo soko Kotimo murikimasa aporo hinamomo eaki kurikurirakano, Kotimo kairaka maropohokosare? Epo haru maropohoanafonoraka keseke maropohokosare? ⁸ Ao, iane mokoatikisane Kotimo ipi foaka maropohokosapo. Ano Aporomanomo Tākeane pariaperamo aporo hinamomo Kotiaki himu hakásaraka hemakapukua kurikuriraka risiarihoamo nōmo asekosapo.” Aíyaka Yasumo somesapo.

Ferese aporo soko takese mora aporo soko tetapō kurikurisane Yasumo takumeaka somesane oyapo.

⁹ Aporomo ipiane hakāsa kekereraka sikiraka someraka “Ano kotesapo. Ano ereketaeraka sia rekenapo.” Aíyaka reke aporo metane makeferaka rerapo. Aporo ayiáka makáraraka risiaki Yasumo takumeaka someraka, ¹⁰ “Aporo tetá Kotimo apea kurikurihoko hisiapo. Kurikurihoko hisiane, meta ipi Ferese aporopo. Metane ipi takese mora aporopo. Tetá Kotimo apea hikia ¹¹ Ferese aporo ipi haku fasikia reke epo yano motosa makáraraka e ipiyia kurikuriraka, ‘Kotio, aporo metakiramo makaripi ayiáka risikino, kotafe horakano, arirakano makata hakimarakano anapo. I arisia ayiáka ano rekenafapo. Takese mora aporo e area ayiáka ano rekenafapo. ¹² Arirakano sokō hakásamo yape tetá né sesehoasimo makata nakosane nōmo sokoainapo. Nōmo mone soko parakuraka tokonasu nōmo nī maraka, kaeyako hakāsa néaki karápo.’ Aíyaka Kotiaki Ferese aporomo kurikurisapo.

¹³ Arirakano takese mora aporo wakasema yamenoa reke, epo ipi yano motosa mawakasemaraka, wamo arupekea reke kurikuriraka, ‘Kotio, aporo watikisane anopo. Ano kamenakahoanie.’ Aíyaka takese mora aporomo kurikurisapo.

¹⁴ Aíyaka kurikurisa aporoamo Kotiaki makata watikisane maroporaka marekea aíyaka kurikurisane, Kotimo kaikia makotesapo. Asiamo keseke aporoane ipi apea paripusuapo.

Arirakano Fere se aporomo asiafapo. Aporoamo epo ipiane makárrarakano, keseke e mawakasemahokosapo. Arirakano aporomo epo ipiane makama kesekerakano, keseke e makárahokosapo.” Aíyaka Yasumo somesapo.

Hokosa fete suane Yasumo makotesane oyapo.

Matiu 9:13-15; Maka 10:13-16

¹⁵ Hokosa feteane Yasumo sakairaka makotehoasimo Yasu rea karikia pesapo. Karikia perakano Yasumo aporo hakāsa puramo someraka, “Hokosane karikia peakopo.”

¹⁶ Airakano Yasumo hokosaki peaeraka someraka, “Hokosa ano rea wo karikia peane siahoasireapo. Iane repo matasohoane siahoasifareapo. Asiamo aporo hinamo reane, hokosa fete asikeno Kotimo unihaeaka asekea rerapo.

¹⁷ Arirakano Koti unihaeaka area a hokosa apera ayiáka, peanie. Ayiáka peanafonarakano, Koti unihaeaka area a paohokosafapo. Nōmo reaki kakaro somerakaripo.” Aíyaka Yasumo somesapo.

Aporomo makata kemo kára morane oyapo.

Matiu 19:16-30; Maka 10:17-31

¹⁸ Yu aporo káramo Yasuaki someraka, “Tisa kotesao, ano Kotiyaki yaiya rekeakosakipoko, pipu nōmo yakapa rakiakosare?” ¹⁹ Airakano Yasumo someraka, “Nōmo anoaki marirakano kotesapo, airakanare? Koti ipi hákasa kotesapo. Aporo meta kotesa rekenafapo.” ²⁰ Kotimo somemanane nōmo hemakapurapo. Somemanane oyapo. Hinamo hakimakopo. Aporo kukusimo rukupo. Aporo metamo makata kemoane hakimakopo. Aporo metaki kotafe topakamaraka somehokopo. Ní ata soko, ní ama soko, koteaka hemakapukua makotehoanie. Aisane nōmo kaisiapo.”

²¹ Airakano aporoamo someraka, “Ao, ano hokosa rea maiya amo someane nōmo kakimaka reane, pipu yumo soko, yaiya kakimaka rekenapo.” ²² Airakano Yasumo someraka, “Né makata hakāsa meta siasafapo. Nōmo makata kemo su roporaka, mone mosane aporo makata forokoa risiaki kakanie. Kaka farakanone, nōmo ní mahimuraka taena makata ane hepene yapura tokoakosapo. Ní makata kemo kaka faraka ano patera aseako peanie.” ²³ Airakano aporoamo ipi kaikia ipi makata kemo kára toane metakariasisekeno asekea, ipi himu mahisiraka someane kakimasafapo.

²⁴ Kakimakanafonorakano Yasumo e asekea someraka “Makata kemo kárarakaka rea aporo ane, Koti unihaeaka rea paohokosane, namo kakaro kára waforohokosapo. ²⁵ Saro kamo pasu irina nitoro kakaru asia, kokoropuane tapenapo. Aina ayiáka makata kemo kárarakaka rea aporoane Kotimo e unihaeaka rekeasimo e paohokosane namo kakaro wafororaka paohokosapo.” ²⁶ Airakano aporomo soko, hinamomo soko, ipi kaikia someraka, “Aporo epa Kotimo asekea rekeako pasimakosare?” ²⁷ Airakano Yasumo someraka, “Aporomo someraka ‘Siahoasifareapo.’ Aisa nine Kotimo ipi rakiane siahokosapo,” aisapo.

²⁸ Arirakano Pitamo someraka, “Isu neyaki hakāsa pukusakipoko, isiapo apeane metakariasiapo.” ²⁹ Airakano Yasumo someraka, “Nōmo reaki kakaro somerakaripo. Aporo suamo hakāsa hakásaraka, Koti unihaeaka rea paohokosakipoko, ipi ape soko, ipi hinamo soko, ipi mae soko, ipi ata soko, ipi ama soko, ipi hokosane soko, su metakarikia rekeno ³⁰ ipi hauaka wo areamo makata kára yasia meta mokoakosapo. Arirakano keseke Kotiyaki kakaro yaiya rekeakosapo.” Aíyaka Yasumo somesapo.

Yape isiamo Yasumo someraka, “Aporomo ano kukusimo rukusapo.” Aíyaka somesane oyapo.

Matiu 20:17-19; Maka 10:32-34

³¹ Yasumo ipi aporo kenosu murikimasane karikia wakasema pukua risike someraka, “Hao, kaisie. Isu Yarusarame sitia hinakanapo. Ano Aporomanomo Tákeane porofete aporomo popasane kakaro ayiakakosapo. ³² Anoane parakeraka karikia pukua Yu aporo-hoanafonosaki kakakosapo. Karakano namina ano mahokopariraka mokoatikiraka, ano kaua torofaeraka ayiakakosapo. ³³ Ayiáka marekea ano sakomo rukusapo. Ano rusua kukusapo. Rusua kusuane yape isiamo ano turikia pukusapo.” ³⁴ Aíyaka Yasumo

somesane ipi aporo hakāsa puramo himetesapo. Some kepoane faremaresakipoko someane ipu himetesapo.

Aporo hi mesa Yasumo mafasane oyapo.

Matiu 20:29-34; Maka 10:46-52

³⁵ Yasu Yariko taone makeraka perakano aporo hi taku tetakara mesane aporo metakiramo e mone kakasimo ikia kara fea mumiraka kayapo. ³⁶ E kake kaiyiáne aporo yakai perakarakano kaikia someraka “Perakarakane epare?” ³⁷ Airakano ipu someraka “Nasare aporo Yasu apere.” ³⁸ Airakano aporo hi mesamo wáraka, “Yasuo, né Tefetemo aporo irao, nōmo ano kamenakaraka ararerasye.” ³⁹ Airakano aporo fanaraka pesamo someraka, “Nómo Yasuane wahokopo, me fasie.” Airakano aporo hi mesamo sakepamo wáraka “Tefetemo aporo irao, nōmo ano kamenakaraka ararerasye.” ⁴⁰ Airakano Yasumo kairaka wasuaka rukua asekea reapo. Asekea reke epo someraka, “Aporoane ano are wo karikia peae.” Airakano e karikia pesapo. Karikia perakano Yasumo someraka, ⁴¹ “Nómo sesehoasimo nōmo ne mayiákasimore?” Airakano aporoamo ipi someraka, “Unihaeo, nōmo himo makata koteaka aseakoripo,” aisapo. ⁴² Airakano Yasumo eaki someraka, “Nómo koteaka asesie. Nōmo anoaki himu hakásaraka hemaka apura yiamo, né hi mesane mafarakayiapo.” ⁴³ Yasumo ipi aihoane, aporo hi mesa amo ipi himo wate foaka koteaka aserakano, e Yasuyaki hakāsa puraka Kotiaki kekererape pusuapo. Kekererape purakano, aporo hi mesa mafasane aporo hinamo suamo aseraka Kotiaki kara kekeresapo.

19

Sakiásemo Yasuane aseako pusuane oyapo.

¹ Yasu ipi Yariko taonea pauraka koraka reapo. ² Arirakano taonea aporo hakásá meta rea ipi yano motosa Sakiásapo. Sakiásemo ipi makata rakirane takese mora aporoane asekea reapo. Arirakano ipi makata kemo kara sakepamo toapo. ³ Asiāne Sakiáse ipi Yasu rea pukua Yasu aseako ayiane, aporo hinamo yakai sarimasakipoko mataisekeno epo Yasuane asesafapo. E aporo kinakesasamo, aporo hinamo metakirane hohoroposasamo Yasuane mataisakipoko epo asesafapo. ⁴ Asekeanafonorakano Sakiáse ipi foaka pukua aporo yakai sarimasane marokeraka pukua, Yasu perakano aseakosakipoko ira foke asia reakipoko ira huturua hikia asekea kayapo. ⁵ Sakiáse ipi ira huturua hikia asekea kakeno, Yasu pekea reke huturua asekea someraka, “Sakiáseo, né peae. Nōmo apea ano pukusapo. Asiamo né foaka peae,” aisapo. ⁶ Airakano Sakiáse ira huturu yapura kayane, Yasumo peaerakano Sakiáse foakayia sosonoraka peraka someraka, “Ao, nōmo apea ne peae.” Aiyaka epo Yasuaki seseraka tati hakāsa pusuapo. ⁷ Arirakano Sakiásemo apea tati purakano, aporo hinamo su sarimasamo aseraka kakanakeraka someraka, “Aporo watikisamo apea Yasu kimisi apure,” aisapo. ⁸ Airakano Yasu ipi Sakiásemo apea pusuapo. Pukua apea yorokoa kakeno, Sakiáse ipi takahikia Yasuaki someraka, “Unihaeo, né kárapo. Hao, kaisie. Nōmo makata kemo kára taesapo. Kára taesane parakuraka tetákara hakásá yineraka metakirane aporo makata forosaki kakakosapo. Anakano fana aporo metakiramo makatane nōmo hakimosakipoko, ropo kakakosapo. Aporoamo makatane hakásá nōmo hakimosakipoko, nōmo makata ropo kitafa susu ayíáka kakakosapo. Aporo suamo makata kemo nōmo hakimosakipoko, nōmo makata ropo kitafa susuaka kakakosapo.” Aiyaka Sakiásemo somesapo.

⁹ Airakano Yasumo someraka, “Né ereketaeraka rekeako parisasamo, pipu ne kakaro Eparahamemo aporo ira rekenapo. Sakiáse nōmo Kotiaki hemakapusuasamo, nōmo ní hokusamo soko, nōmo ní hinamomo soko, nōmo ní apea aporo risiamo, ipu suamo Kotiaki hemakapusimo, pipu Kotimo re mafasirakanapo. ¹⁰ Arirakano Aporomanomo Tákeane anopo. Aporo hinamo himu watikisane nōmo kope pekea iane mafasakipoko ano pesapo.” Aiyaka Yasumo somesapo.

Yasumo mone ane takumeaka somesane oyapo.
Matiu 25:14-30

¹¹ Yasu Yarusarame siti makeraka reke epo aporo hinamoaki some karakano ipu kaisapo. Kaikia hemakapuraka, “Yarusarame sitia wate foaka Koti unihaeaka rekeakosane pipu makeane.” Aíyaka hemakapurakano Yasumo takumeaka someraka, ¹² “Aporo kára metane unihaeaka mareasimo e hauaka yamenoa ¹³ pukusakipoko reke, ipi aporo raipa kaeyako suaki peaeaka, perakano epo someraka, ‘Reaki mone sawi tuaneti kina (K20) hakása hakásaraka nōmo karakanapo. Ano pusuakipoko mone akara one, mone metakira soko ripaka mokoakosakipoko, pisinisi rakinie.’ Aíyaka e pusuapo. ¹⁴ E purakano ipi aporo hakása risiamo eaki hisiraka, aporo metakiraki someraka, ‘E kekemarape pusie. Puraka úyaka somehoanie. ‘Isiapo hauaka wo ne unihaeaka areane hisiripo.’ Aíyaka somehoanie.’ Airakano aporo pusiesane pukua, aporo káraki somesapo. Someaka faraka namina apea paripesapo. Paripesakipoko ¹⁵ wakesema nina, aporo unihaeaka maresane ipi hauaka paripesapo. Pariperaka aporo raipa kaeyakosu mone kasaki peaesapo. I perakano aporo unihaeamo someraka, ‘Mone nōmo reaki kasane repo pisinisi makata yakapa rakisiare? Pisinisi rakikia mone meta ripaka marekea mosare?’

¹⁶ Airakano aporo meta fana pekea someraka, ‘Unihaeo, ano mone tuaneti kina (K20) kasapo. Amo pisinisi rakikia mone tuaneti kina (K20) kaeyakosuraka ayiáka sarimaraka, tu harote kina (K200) mosapo.’ ¹⁷ Airakano aporo unihaeamo someraka, ‘Ao, kotehoareapo. Nōmo koteaka rakireapo. Nōmo néaki wakasema kasane, nōmo himu hakásaraka rakisiakipoko ape sumu kaeyakosu nōmo asekea rekeasimo nōmo né marerakanapo,’ aisapo.

¹⁸ Arirakano aporo raipa metamo someraka, ‘Unihaeo, nōmo anoaki mone tuaneti kina (K20) kasapo. Moneamo pisinisi rakikia mone tuaneti kina kakoreasuraka ayiáka sarimaraka, wane harote kina (K100) mosapo.’ ¹⁹ Airakano aporoaki, aporo unihaeamo someraka, ‘Taone kakoreasu nōmo asekea rekeasimo, nōmo neaki marerakanapo,’ aisapo. ²⁰ Arirakano aporo raipa metamo someraka, ‘Hao, kaisie. Nōmo mone tuaneti kina (K20) anoaki kasane oyapo. Nōmo pasumo taporaka faremaresapo. ²¹ Né aporo waresasamo ano namoraka, moneane pasumo taporaka faremaresapo. Nōmo makata motoanafonosa nine, makata ane nōmo morapo. Nōmo hemoa makata nakosa poroanafonosa nine, makata nakosane nōmo morapo.’

²² Airakano eaki aporo unihaeamo someraka, ‘Né aporo watikihoareapo. Nōmo anoaki someraka akipoko né hukurukusapo. Nōmo someraka, “Anoane aporo warepo,” airakae. “Nōmo makata motoanafonosane nōmo morapo,” airakae. “Nōmo hemoa makata nakosa poroanafonosane nōmo morapo,” airakae. ²³ Asiamo nōmo pisinisi rakianafonohoareane mone ane pasepukua motoafunureapo. Asiamo moneane nōmo pasepukua motosa satiki mone metane ripaka marekea mokoafunureapo. Asiamo ano pariperaka mone su siaraka nōmo mokoafunureapo,’ aisapo. ²⁴ Arirakano aporo unihaeamo aporo risiaki someraka, ‘Eaki mone tuaneti kina (K20) nōmo kasane repo maka, aporo raipa mone tu harote kina (K200) mosa aporoaki kakanie.’ ²⁵ Airakano ipu someraka, ‘Aporo raipa amo mone tu harote kina (K200) sia kakenapo. Ipi mone kárapo. Mone meta mayane siahoasifareapo.’

²⁶ Airakano aporo unihaeamo iaki someraka ‘Wae, aporomo makata kakeno meta soko kakakosapo. Aporo metamo makata wakasemasekeno wakasemané fimakosapo.

²⁷ Arirakano ano unihaeaka rekeakosaporakano aporo metakiramo hisisapo. Hisisa aporoamo anoyaki yunusapo. Asiamo hisisa aporoane ano rea karikia peae. Nōmo hikumisi neneme yia iane rusua kukunie.’ Aíyaka aporo unihaeamo somesapo.” Aíyaka Yasumo takumeaka somesapo.

Yarusarame sitia Yasu hisiane oyapo.

Matiu 21:1-11; Maka 11:1-11; Yone 12:12-19

²⁸ Yasumo some kaka faraka Yarusarame sitia hiakosakipoko ipi fana hikia reapo.

²⁹ Ayiáka hinaka reke Péfasi apeane soko, Petene apeane soko, makeraka ūri Orofe

kikiripoa pauraka ipi aporo hakāsa pura tetāki ³⁰ Yasumo someraka “Teto ape tameyia pusie. Pukua aseane ape fariyia saro toki mano humaresa ipi matia aporo meta ripakanafonosa kita humaresa rekeno, aseakosapo. Aseraka kita fatarimaka ano area wo karikia peanie. ³¹ Airakano aporo metamo tetoaki someraka, ‘Saro toki kita humaresane marirakano fatarimarakanare?’ Airakano tetāpo someraka, ‘Saro tokiane Unihaemo makata rakiakosakipoko karikia peanie aisasamo etapo karikia purakanapo.’ Aíyaka somehoanie,” aisapo.

³² Arirakano tetā hinaka, Yasumo fana tetāki makata somesane tetapō yaiya asesapo. ³³ Aseke saro toki mano kita humaresane tetapō fatarimarakano, saro toki wafayamo someraka, “Marirakano fatarimarakanare?” ³⁴ Airakano tetapō someraka, “Unihaemo karikia peaniesasamo etapo karikia purakanapo,” aisapo. ³⁵ Asiamo saro toki manoane Yasu rea tetapō karikia pusuapo. Karikia puraka saro toki matia ipu pasu furumurikia, Yasu á ripaka maresapo.

³⁶ Arirakano Yasu saro tokia ripaka ikia kara hinakano, aporo hinamo ipu pasu mokoa pesane, ikia kara á ifunurape hisiapo. ³⁷ Arirakano Yarusarame siti makeraka ūri Orofe kakafaea perakano, aporo hinamo su Yasuyaki namina hakāsa sarimaraka peraka, Kotiaki suseaka kekeresapo. Ipu kekereraka someraka, “Epo Kotimo waka-puaka rakirane rakirakano, isiapo asesapo. ³⁸ Eane Unihae Kotimo hepene yapunaka pusierakano, Kotimo wakapuyaki apere. E yano motosa makama fanaraka reke Kotimo eane makotehoasimoripo. Kotimo isu mafasiakosane, hepene yapura risiamo soko, seseraka risikinapo. Kotiane isiapo makararakanapo.” Aíyaka hokono potepoteraka seseraka aporo hinamo suamo Kotiaki kekeresapo. ³⁹ Kekererakano, aporo hinamo su sarimasakipoko, Fere se aporo iyaki hakasa risiamo Yasuaki someraka, “Aporo hinamo néyaki hakāsa pesaki mehokopo, aisie.” ⁴⁰ Airakano Yasumo someraka, “Namina himumo sesesane mayiáka metakariakosare? Ipu kekerehoanafonosa satiki, ekemo kekerehoafunupo.” Aíyaka Yasumo somesapo.

Yarusarame sitiane Yasumo aseraka hiripusane oyapo.

⁴¹ Yarusarame sitiane makeraka pekea reke, Yasumo sitiane aseke kamenakaraka kára hemakapukua hiripusapo. ⁴² Yasu hiripuraka reke someraka, “Yarusarame aporo hinamo reo, maiya yumo tau auaraka risikiakosakipoko, ikia kara kotesa kekemahokosane repo hemakapusua satiki, re koteaka risikiafunureapo. Asiamo maiya yumo makatane farareasasamo repo aseakosafapo. ⁴³ Keseke yunu aporo fasereperaka repo ape kaua kauraka hahaeraka topere motokoa, aporo su peraka reane rukua fahokosapo. ⁴⁴ Re soko, repo hokosa soko, ape kakarua risiane waseremokoa hauaka atura mokoasuraka, rusua kukukeakosapo. Arirakano ape ekemo kisiane, ekeane kotahoane ape fahokosapo. Maiya yumo Kotimo re mafasiakosapoko asiane, repo kakimakanafonosasamo mafasiakosa maiyane fasapo.” Aíyaka Yasumo somesapo.

Kotimo apea Yasu yorosane oyapo.

Matiu 21:12-17; Maka 11:15-19; Yone 2:13-22

⁴⁵ Kotimo apea Yasu ipi yorokoa aseane, aporomo makata roporaka risikino aseke, Yasumo i rukuhoaeraka pusiesapo. ⁴⁶ Iaki Yasumo someraka, “Kotimo sawia popasane oyapo. ‘Nōmo apeane anoaki someaka wára kurikuri ape ayapo.’ Aíyaka Kotimo sawia popahoareapo. Asiane repo Kotimo ape one hakimora aporo risira kunikia asia maparihoeareapo.” Aíyaka Yasumo somesapo. (Aisaia 56:7)

⁴⁷ Arirakano maiya suamo Kotimo apea Yasumo some kasapo. Anakano Pirisiti aporo káramo soko, Kotimo somemané tisa aporomo soko, aporo sisimamo soko, Yasu rusua kukusapoko ⁴⁸ asiane Yasumo someane aporo hinamo suamo kakaro kaikia risikino aseke ipu someraka, “Aporo hinamo kara risia wo, mayiáka Yasuane kukusimo rukusare?” Aisapo.

“Yasumo rakirane epamo maresare?” Aisane oyapo.

Matiu 21:23-27; Maka 11:27-33

¹ Sere metamo Kotimo ape rurusa tua Yasu pekea, aporo hinamoaki epo some kotesane some kasapo. Some kasá maiya amo pirisiti aporo káramo soko, Kotimo somemane tisa aporomo soko, aporo sisimamo soko Yasu rea pekea ² eaki someraka, “Nómo arakirane epamo maresare? Néaki epamo ayáka rakinie, aisare?”

³ Airakano Yasumo iaki someraka, “Nómo soko reaki makata hakása meta akai kairakanapo. ⁴ Yonemo aporo hinamo hea tapukumurianiesane Kotimo aisare? O aporomo aisare? Repo anoaki somesie.” ⁵ Airakano ipu namina susu me rukua someraka, “Isiapo Yasuaki yakapa somehoanarakapo. Isiapo someraka, ‘Kotimo aisapo,’ aíyaka somerakanone, Yasumo isuaki someraka, ‘Marirakano Yonemo someane kakipayasare?’ aihokosapo. ⁶ Arirakano isiapo someraka, ‘Aporomo aisapo,’ aíyaka somerakanone aporo hinamo suamo isuaki mahisiraka sapehokosapo. Asiamo aporo hinamo suamo hemakapuraka, ‘Yone ipi Kotimo some kará porofete aporopo.’ Ipu aíyaka hemakapusuasamo isiapo ‘Aporomo aisapo,’ aíyaka somerakanone, isu ekemo kareakosapo.” ⁷ Aíyaka namina susu tafatafaraka ipu Yasuaki someraka, “Yoneaki hea tapukumurianiesane epamo aisarakapo. Isu himeteripo.”

⁸ Airakano Yasumo someraka, “Repo anoaki some paripeanafonosasamo, anoaki makata rakiniesa kepoane soko, reaki somehokosafapo,” aíyaka Yasumo somesapo.

Sako karepe hemoane aporomo asekeea risia Yasumo takumeaka somesane oyapo.

Matiu 21:33-46; Maka 12:1-12

⁹ Yasumo aporo hinamoaki takumeaka someraka, “Hemo wafayamo sako karepe hemoa porokoa, aporo metakiramo asekeea risikiasimo murikimasapo. Murikimaka faraka hemo wafaya hauaka meta pusuapo. Pukua ipi wate foaka paripeakosafapo, aíyaka hemakapukua hauaka meta á pusuapo. ¹⁰ Pusuakipoko sako karepe wate ikia ahera maiya amo, hemo asekeea risia aporomo sako karepe wateane tumosapo. Tumokoa parakuraka hemo wafayamo somesane kaikia taehoko asiane, ipu koarentaeraka hemakapukua, hemo wafayapoko taesafapo. Arirakano hemo wafayamo ipi aporo raipaki someraka, ‘Sako karepe wateane anopoko taesane nómo mokoako pusie,’ aisapo. Pusierakano e pusuapo. Pukua hemoa perakano hemo asekeea risia aporomo e rusuapo. Rukua e sako karepe wateane kakanafonoraka, nena paripusierakano e paripesapo.

¹¹ Pariperakano asekeea hemo wafayamo aporo raipa metaki pusiesapo. Arirakano aporo meta kesekeea pusiesane soko, hemo asekeea risia aporomo rukua mokoatikiraka, sako karepe wateane kakanafonoraka nena paripusierakano paripesapo. ¹² Pariperakano asekeea yape isiamo hemo wafayamo aporo raipa metane pusiesapo. Pusiesane hemo asekeea risia aporomo e rukumakasusapo. ¹³ Arirakano asekeea hemo wafayamo someraka, ‘Nómo mayiakakosare? Nómo nī hokosa himu tumurumo hemakapusuane pusiehokosapo. Nómo hokosane namina mokoatikihokosafapo.’ Aíyaka epo ipi hokosa pusiesapo.

¹⁴ Pusierakano hokosa ane hemoa pesapo. Perakano hemo asekeea risia aporomo someraka, ‘Hemo wafayamo hokosa apere. Keseke ipi wafayane kusuakipoko finihaoa e reke, hemo one epo asekeea rekeasireapo. Anapaka e isina rukusapo. Rusua kurakano hemo one isiapo isina makosapo.’ ¹⁵ Aíyaka hokosane ipu waseremaka ruru tapikia yao takua rukumakasuraka rusua kusuapo. Ipi hokosa rusua kurakano hemo wafayamo hemo asekeea risia aporoane mayiakakosare? ¹⁶ E pekea hemo asekeea risia aporoane rusua kukusapo. Rusua kurakano aporo raipa metakiramo hemoane asekeea risikiasimo murikimakosapo.” Aíyaka Yasumo somerakano, aporo suamo kaikia someraka, “Uao, Epo enahoko somerakarifapo. Kakaro somerakae,” aisapo. ¹⁷ Arirakano Yasumo aporo hinamo i suane asekeea someraka, “Kotimo sawia popasane oyapo. ‘Ape kira aporomo ira warupi mamakatesane maka pekea tipia maporareapo.’ Aíyaka Kotimo sawia popahoareapo.

(Buk Song 118:22)

Asiamo Kotimo sawia popasane kepoane repo hemakapurakarire? ¹⁸ arirakano ira warupia aporo hinamo terafaka ruraka kakaro etehokosapo. Arirakano ira warupi maposane huruperaka rurakano kakaro rukutaihokosapo.” Aíyaka Yasumo ipi yine ira warupi ayiáka takumeaka somesapo.

“Isiapo takese mone kakakosare?” Aisane oyapo.

Matiu 22:15-22; Maka 12:13-17

¹⁹ Pirisiti aporo káramo soko, Kotimo somemane tisa aporomo soko someraka, “Yasumo isuane takumeaka somerakae. Asiamo yumo isiapo e waseremakoripo.” Aisa nine e haru waseremasafapo. Aporo hinamo suamo iaki sapenapaka Yasu metakarisiapo.

²⁰ Asiamo ipu Yasuane asekehaeraka aporo metakiraki maserapi pusiesapo. Pusiesane kotafe Yasu patera asesa aporo pariraka, Yasuaki maiya suamo kaikihaeraka, Yasumo hasaka somerakarihoamo, yapake akai kaisiapo. Akai kaikia epo hasaka somerakano, e waseremaka kamani unihae rea karikia pukusakipoko kaikihaesapo. ²¹ Kaikihaeraka Yasu rea aporo metakira maserapi pusuapo. Pukua ipu Yasuaki someraka, “Tisao, nómō kakaro ereketaeraka somerapo. Aporo hinamo koteaka risikiasimo nómō Kotimo someane some akare. Aporomo someane nómō some karakarifapo. Aporo hokopusuane sesehoasimo nómō some karakarifapo. Aporomo neaki mokoatikihokosane nómō hemakuprafaraka nómō kakaro some akare. Kotimo ainane nómō kakaro some akare.

²² Asiamo isiapo Yu aporomo Rome aporo unihaeaki takese mone kayane siahoasireare? Kayane Kotimo somemaneane mamosohoasireare? Mayiakasireare?”

²³ Airakano ipu yapake someane Yasumo kairaka someraka, “Mone hae maka peae.

²⁴ Mone haeá epa hikumisi rekerire? Epa yano motosane popahoareare?” Airakano mone hae maka pesane ipu aseraka someraka, “Rome aporo unihae Sisa hikumisireapo. Sisa ipi yano motosa popahoareapo.” ²⁵ Airakano Yasumo someraka, “Rome aporo unihaeemo menane ipiaki kakanie. Arirakano Kotimo menane Koti ipiaki kakanie,” aisapo. ²⁶ Yasumo hasaka somehoanafonorakano, maserapi pesa aporoane fofasapo. Ipu someraka, “Yapake somesane Yasumo hemaka apure. Aporo suamo kaiyisimo epo hasaka somerakarihoamo yapake kaisiapo. Asiane yapake someane epo hemakapuraka hasaka somesafapo.” Aíyaka namina fofarakaka makata meta Yasuaki somesafapo.

Aporo kukua turikia pukusane, Satusi aporomo somesane oyapo.

Matiu 22:23-33; Maka 12:18-27

²⁷ Satusi aporomo hemakapuraka, “Aporo kusuane maturikia taenafapo,” aíyaka hemakapusuapo. Asiamo Yasu rea Satusi aporo i pekea someraka ²⁸ “Tisao, Mosesemo somemane popasane oyapo. Aporo metamo ipi mamaneamo hokosa hokono mareanafonoraka kurakano asekea, hinamo yaroane aporo kusuamo ipi mamaneamo arumarapo. Aporo kusua amo hokosa wainenaka sikiraka wainasimo, hinamo yaroane, ipi mamaneamo arumarapo. Aíyaka somemaneane Mosesemo popahoareapo. ²⁹ Arirakano aporo ipi mamanea yatipinusu risiapo. Mamanea fanamo hinamo arumasane, hokosa hokono mareanafonoraka kurakano, ³⁰ mamanea kusuamo patera yiamo hinamo yaroane arumasapo. Epo soko hokosa hokono mareanafonoraka e kusuapo. ³¹ Kurakano epo patera yiamo hinamo yaroane arumasapo. Epo soko hokosa hokono mareanafonoraka kusuapo. Ayipe pukua mamanea yatipinu suamo hinamo yaro hakásane arumape pukua, hokosa hokono maresafapo. ³² Keseke hinamo manokonomasane kusuapo. ³³ Kusua maturikia taeana maiya amo, hinamoane epamo hinamore? Eane aporo mamanea yatipinu suamo arumasapo.”

³⁴ Airakano Yasumo someraka, “Hauaka wo aporomo hinamo arumarapo. ³⁵ Arirakano keseke kusua maturikia taeana maiya amo Kotimo someraka, ‘Ne anoyaki hakásane rekeako peae.’ Airakano aporoane hepene yapura hinaka hinamo arumakosafapo. ³⁶ Namina hepene aporo arisia ayiáka risikiakosapo. Arirakano kurafapo. Aporo kusua maturikia taerakano i kakaro Kotimo hokosapo.

³⁷ Arirakano aporo kusua maturikia taena kepoane Mosesemo hemakapusuapo. Ira fete reakipoko arakarua ira rufisa nine, irane iramo inasafapo. Inakanafonorakano

Mosesemo aseako puraka, Kotiaki someraka, ‘Unihaeo, ne Eparahamemo Kotipo. Ne Aisakemo Kotipo. Ne Yakopemo Kotipo.’³⁸ Aíyaka Mosesemo somesa amo kepoane oyapo. Aporo kusuane maturikia taehoanafonosane, ane, Mosesemo someraka, ‘Ne Eparahame, Aisake, Yakope ipu Kotipo,’ aihokosafapo. Asiamo Kotiane aporo hinamo hitafe risiamo Kotipo. Aporo hinamo kukua kesamo Kotifapo. Kotiaki hemakapukua reane eyaki yaiya rekeakosapo.”³⁹ Aíyaka Yasumo somerakano Kotimo somemane tisa aporomo someraka, “Tisao, nómo someane kakarorakae.”⁴⁰ Aíyaka Yasuaki akai kaiyakosapoko asiāne ipu someane epo hurutapirakano asekea, eaki efera hunia makata meta akai kaisiafapo.

“Keresoane Tefetemo aporo ira amo wainakosapo.” Aisane oyapo.

Matiu 22:41-46; Maka 12:35-37

⁴¹ Yasumo iaki someraka “Keresoane, Tefetemo aporo ira amo wainakosapo, airakane marirakanore?⁴² Same púkua Tefetemo popasane oyapo. Nōmo Unihaeaki Unihae Kotimo someraka, ‘Né ano hokono tumuru takua kayae. Hokono tumuru takua aporo hokopusua akaya ayiáka kayae.⁴³ Kakeno nómo yunuane nōmo rukumosaka tapiakosapo.’ Aíyaka Kotimo somesane Tefetemo popahoareapo. (*Buk Song 110:1*)

⁴⁴ Asiamo Tefetemo Keresoaki someraka, ‘Ne nōmo Unihaepo,’ aisane marirakanano aisare? Arirakano makasa kauamo ipi hokosa wainepe pukusaki ‘Unihaepo,’ airafapo. Asiamo Tefetemo Keresoaki ‘Unihaepo’ aisasamo, Tefete takapeasiraka Keresoane wate fana yaiya reapo. Asiāne repo someraka, ‘Tefetemo wainepe pesa á Kereso faserepeakosapo,’ airakae. Airakane marirakanore?”* Aíyaka Yasumo somesapo.

“Kotimo somemane tisa aporo arisia ayiáka risikiakopo.” Aíyaka Yasumo somesane oyapo.

Matiu 23:1-36; Maka 12:38-40

⁴⁵ Aporo hinamo suamo kaiyisimo, Yasumo ipi aporo hakása puraki someraka,⁴⁶ “Kotimo somemane tisa aporomo arakira ayiáka, repo soko ayiáka rakiakopo. Ipu pasu horopokara osoraka pukua, aporo hinamo sarimaraka risiakipoko á i pukua, aporomo i hokono maraka iane makáraraka someraka, ‘Tisa kárao,’ aihorasimo namina kára sesenapo. Arirakano Yu aporomo sarimana apea soko i pukua aporo hinamo su sarimaraka toakipoko, i kumisi neneme sapea sea tokoako sesenapo. Arirakano hokono akera maiya amo, aporomo i makárahoasimo aporo hokopusuamo sea tokoako sesenapo.⁴⁷ Arirakano hinamo yaromo ape soko makata kemo soko Kotimo somemane tisa aporomo hakimorapo. Hakimoraka yia i kotehoareapo, aihorasimo ipu kurikuriraka risike some nokone pukua kurikurinapo. Asiasamo iane fanasihokosane kárahokosapo.” Aíyaka Yasumo somesapo.

21

Hinamo yaromo Kotiaki makata kasane oyapo.

Maka 12:41-44

¹ Kotimo apea maua motosakipoko aporomo mone Kotipoko kakakosane maua á kesapo. Yasumo aseane makata kemo kára toa aporo hinamo ipu suamo mone kára kerakano asesapo.² Arirakano hinamo yaro hakása meta makata forokoa kayasasamo, ipi mone hae kusua tetá makerakano asesapo.³ Makerakano asekea Yasumo someraka, “Aporo hinamo suamo mone kesane, hinamo yaroamo mone makesamo kakaro marokesapo.⁴ Arirakano aporo hinamo suamo namina mone kára tokeno yia sapeane Kotiaki kasapo. Arirakano hinamo yaro ipi makata forokoa kayasasamo, mone wakasema kaya ane su maka pekea kasapo. Epo ane su karaka, ipu moneane parakuraka sape metakira namina ape yia taesapo.” Aíyaka Yasumo somesapo.

* 20:44: Kereso ipi wate fana Kotiyaki yaiya reapo. Asiamo Keresoane ipi Tefetemo unihaepo. Arirakano keseke ipi hauaka wo pesane Tefetemo aporo ira wainepe pesa á ipi takapesapo.

Kotimo ape marakaritaehokosane oyapo.

Matiu 24:1-2; Maka 13:1-2

⁵ Maiya amo aporo metakiramo Kotimo apeane aseraka someraka, “Kotimo apeane namo kakaro kotesapo. Kotimo apeane eke káramo kisiapo. Arirakano aporomo makata yaku taeraka apeane kau rakikia makotesapo.” ⁶ Airakano Yasumo someraka, “Pipu repo aserane makata kotesane repo aserakanapo. Arirakano keseke maiya metamo, apeane eke ripaka kisiane, ekeane kokoro mokoteraka hakása hakásaraka tokoakosapo.” ⁷ Airakano ipu someraka, “Tisao, nōmo somerakane masinaka ayiakakosare? Ayiakakosane isiapo hemakapusimo makata yakapamo isuaki tariakosare?” Aisapo.

Makata umisa kekepo faserepeakosane oyapo.

Matiu 24:3-14; Maka 13:3-13

⁸ Arirakano Yasumo someraka, “Aporo metakiramo reaki kotafe somerakano, someane kakimarapaka asekeanie. Aporo yakaimo ano yano hokoa peakosapo. Pekea ipu kotafe someraka, ‘Ano Keresopo. Ano unihae kara rekeasimo murikimasa aporoane anopo. Asiamo fahokosa maiyane makepo.’ Airakano someane repo kakimakopo.

⁹ Asiamo aporomo ape sumu metayaki werakanaporakano repo kairaka namohokopo. Arirakano aporomo kamani aporoaki hisiraka yunu weakosapo. Werakanaporakano repo kairaka namohokopo. Makata ane fana peakosapo. Asiamo fahokosa maíya ane haru faserepeakosafapo.” Aisapo.

¹⁰ Aíyaka efera hunia Yasumo someraka, “Aporo hauaka meta á risiamo, aporo hauaka meta á risiaki yunu werakano, arirakano kamani metamo, kamani metayaki yunu werakano ayiakakosapo. ¹¹ Arirakano hauaka kekepoa momani kára peakosapo. Hauaka kekepoa makata nakosa faraka aporo hinamo kára meamohokosapo. Hauaka kekepoa makata tasa kára ikia peakosapo. Arirakano ti yapura makata meta haku tarirakano aporo hinamomo asekeea namohokosapo. ¹² Arirakano makata ane suane faserepeasiraka re waseremokoa, rukua mokoatikhokosapo. Waseremokoa Yu aporomo sarimana apea karikia pukua, hukurukua tipura keakosapo. Asiamo anoaki himu hakásaraka risiakipoko re waseremokoa, kamani aporo unihae rea á soko, arirakano hauaka asekeea risia aporo risia á soko, re karikia pukua hukurukusapo. ¹³ Reaki hukuarura maiya amo repo anoane makáraraka somehokosapo. ¹⁴ Re waseremarakano re himu fahokopo. ‘Isu hukururakano isiapo maíyaka somehoaere?’ Aíyaka hemakapukopo. ¹⁵ Asiamo repo koteaka hemakapukua somehoasimo, koteaka hemakapurane soko, koteaka somerane soko, nōmo reaki karakano repo koteaka somehokosapo. Repo koteaka somerakano, hukurura kepo kaira aporomo reaki someraka, ‘Nómo paroaka somerakano, nōmo yakapa some paripeasifareapo,’ aihokosapo.

¹⁶ Arirakano reane hukurukusakipoko, ní amamo, ní atamo, ní maemo, ní aporo tákemo, ní moremo, re waseremokoasimo parakehokosapo. Namina yia metamo metane rusua kukusapo. ¹⁷ Re ano patera asesasamo reane aporo suamo hisihokosapo. ¹⁸ Asiamo repo uni iti hakása soko fipukusafapo. ¹⁹ Arirakano repo anoaki himu hakásaraka yaiya hemakapuraka risikino fareanane repo makosapo.” Aíyaka Yasumo somesapo.

Yarusarame sitiane marakaritaeraka aporo su ruku marutaehokosane oyapo.

Matiu 24:15-21; Maka 13:14-19

²⁰ Arirakano Yasumo some meta someraka, “Yunu aporo peraka Yarusarame siti kaua aporo kauraka hahaeraka toperemotokoa, ape tipia marerakano, maiya amo repo asekeea hemakapuraka, ‘Maiya omo Yarusarame siti marakaritaeraka aporo su rukumarutae-hokosapo,’ aíyaka repo hemakapukusapo. ²¹ Asiamo maiya amo re Yutía hauaka á risiane tekatarikia ūria hinie. Arirakano re Yarusarame sitia risiane apeane metakarikia punie. Maiya amo re yaoa risiane Yarusarame sitia poparipeakopo. ²² Asiamo makata ane fasereperakano repo asekeea hemakapuraka, ‘Kotimo sawia popasane oyapo. Kotimo maropohokosa maiya ane fasere peakosapo, aíyaka popasane kakaro faserepesapo,’ aíyaka repo hemakapukusapo. ²³ Arirakano hinamo hokosa umisa soko, hinamo hokosa kiri kaíyia soko, tekatarikia puane waforohokosapo. Asiamo hauaka wo aporo hinamo

risiaki makata kára mokoatikihokosane soko, Kotimo kára sapenane soko faserepeakosapo. ²⁴ Arirakano yunu aporo metakiramo Yu aporo hinamoane ferepemo karekeea rukutaehokosapo. Arirakano pekea Yu aporo hinamo metakira waseremokoa hauaka kekepoa karikia pukusapo. Arirakano Yu aporohoanafonosamo Yarusarame sitiane rakaritaeraka i mokome koraka risikiakosapo. Koraka risina hisiraka keseke metakariakosa maiya ane paurakano Yu aporohoanafonosamo Yarusarame sitiane metakarikia poparipukusapo.” Aíyaka Yasumo somesapo.

*“Aporomanomo Tákeane anopo. Ano paripeakosane oyapo.” Aíyaka Yasumo somesane oyapo.
Matiu 24:29-31; Maka 13:24-27*

²⁵ Yasumo someraka, “Ti yapura sere maiyane soko, ere maiyane soko, ti makata soko, hakuraka risikiakosane Kotimo tarirakano, aporo hinamo suamo aseakosapo. Arirakano he tawara kupa kára peraka urakano, aporo hinamomo kairaka fofaraka, arirakano aporo hinamo hauaka kekepoa risiamo soko, kairaka kára fofaraka himu fahokosapo. ²⁶ Arirakano hauaka sua makata haku fasereperakano aporo hinamomo aseraka kára fofaraka namoraka hamisisiraka ku peakosapo. Arirakano Hepene yapura makata kára risiane soko mahohohokosapo. ²⁷ Maiya amo aporo hinamo ipu aseane Aporomanomo Táke anoane pariperaka, ti pakaea wakapuyaki faesayaki perakano aseakosapo. ²⁸ Asiamo nōmo makata someraka one kepomarekea fasereperakano, ereketaeraka risike mapiraraka asekea risikianie. Re mafasikia pasimokoakosa maiyane makerakanapo.” Aíyaka Yasumo somesapo.

*Ira fokeane Yasumo takumeaka somesane oyapo.
Matiu 24:32-35; Maka 13:28-31*

²⁹ Aporo hakása puraki Yasumo takumeaka someraka, “Ira foke soko ira suane asekea hemakapunie. ³⁰ Ira kuane konokoarakano repo asekea someraka, ‘Kupa kakako makerakanapo.’ Aíyaka repo somerapo. ³¹ Repo ira ku konokoasa asera ayíáka, nōmo ayiakakosaposane kepomarekea fasereperakano, repo asekea hemakapuraka, ‘Kotimo unihaeaka rekeakosa maiyane makerakanapo.’ Aíyaka hemakapunie.

³² Hao, kaisie. Nōmo reaki kakaro somerakaripo. Aporo hinamo maiya hakása yiamo hokono murisiane i kukusiraka, nōmo makata ayiakakosaposane kepomarekea fasereperakano, ipu yaiya kakaro aseakosapo. ³³ Arirakano ti yapurane soko, hauaka one soko, keseke fahokosapo. Arirakano nōmo someane fahokosafapo.” Aíyaka Yasumo somesapo.

“Ano foaka perakarihoamo repo kau risikianie.” Aíyaka Yasumo somesane oyapo.

³⁴ Yasumo someraka, “Repo hasakanapaka asekeanie. Repo makata nako fitiraka, he watikisa nekea, hauaka wo makata aki kára hemakapukua, ayíáka risikiakopo. Watikiaka risikiakopo. Ano peakosa maiya amo ano foaka peakosapo. ³⁵ Asiamo makata kakayia kakinumo foaka arura ayíáka, hauaka sua aporo hinamo suane hukuarura maiya amo, foaka ayiakakosapo. ³⁶ Ayiakakosa maiya ane himetenapaka hemakapukua risikianie. Re kára wakakopo. Makata umisa perakano, wakapuaka risikiako kurikuriraka risikianie. Aporomanomo Tákeane anopo. Ano rea hikumisi nenemea re namonafaraka kaiyanafaraka mapiraraka risikiako maiya suamo kurikurihoanie.” Aíyaka Yasumo somesapo.

³⁷ Maíyamo Kotimo apea Yasumo some kaka, ereamo ūri Orofea hikia reapo. ³⁸ Mituru fiarakano Kotimo apea paripuraka aporo hinamo suamo Yasumo someane kaiyako perakano epo some kasapo. Ayíáka sere suamo kaiyako perakano Yasumo some kasapo.

“Yasu kukusimo waseremakosapo.” Aíyaka somesane oyapo.

Matiu 26:1-5; Maka 14:1-2; Yone 11:45-53

¹ Ape Farimaresa Hemakapuko Hokono Keraka, Yu aporo hinamomo Farawa Piriana-phononane paikia nesapo. Hokono akera maiya ane makerakano ² pirisiti aporo káramo soko, Kotimo somemane tisa aporomo soko, ipu hemakapuraka, “Yasu mayíáka rusua

kukusare?" Aíyaka ipu hemakapuraka, aporo hinamo su sarimasane aseraka i namoraka risiapo.

Yutasemo Yasu parakehokosapo, aisane oyapo.

Matiu 26:14-16; Maka 14:10-11

³ Aporo hakāsa pura hakāsa meta yano motosa Yutase Isekeriopo. Yutase Isekerio ane Satanemo e ho marakano asekeea, e pukua ⁴ pirisiti aporo kára soko, Kotimo ape asekeea risira Yu aporo terakaiyamosa satini soko, i risiakipoko epo someraka, "Yasu ane nōmo uyaka parakehokosapo." ⁵ Airakano ipu kaikia seseraka someraka, "Parakehoasimo isiapo neaki mone kakakosapo." ⁶ Airakano epo aosapo. Epo hemakapuraka, "Aporo hinamo su pukua fasakipoko Yasuane nōmo parakehokosapo." Aíyaka hemakapuraka parakehokosa ikia karane kosapo.

Ape Farimaresa Hemakapuko Hokono Akeramo makata nakosakipoko Yasu ipi aporo hakāsa purayaki sarimasane oyapo.

Matiu 26:17-25; Maka 14:12-21; Yone 13:21-30

⁷ Farawa Pirianafonona paikia anena maiya amo Yu aporomo saro sipi mano rurapo. ⁸ Maiya amo Yasumo Pitape Yone tetāki someraka, "Ape Farimaresa Hemakapuko Hokono Keraka, isiapo makata nakosane tetāpo sarimaraka taehoanie." ⁹ Airakano tetapō someraka, "Ape ma sarimaraka taehokosare?" ¹⁰ Airakano Yasumo someraka, "Teto Yarusarame sitia pusie. Pukua aseane aporo metamo he petoroa takamaka makatiraka maka perakano tetāpo sapenakosapo. E sapenekea purakano tetāpo kekemarape punie. Pukua e apea yorokoa purakano, teto soko apea yorokoa pukua, tetāpo ¹¹ ape wafayaki someraka, 'Tisamo someaka maresane oyapo. Ape Farimaresa Hemakapuko Hokono Keakosakipoko nōmo aporo hakāsa purayaki sarimaraka, ape kakaru sape ma sarimaraka makata nakosare? Aporo kimisi pesa akipoko ape rumu mayare?' ¹² Airakano ape wafayamo, teto ape huturua karikia hikia, ape rumu kára tariakosapo. Ape sea soko, teporo soko, toane tariakosapo. Tarirakano ape á tetāpo makata nakosa sarimaraka taehoanie," aisapo.

¹³ Asiamo Yasumo someaka marerakano tetā pukua, apea pauraka Yasumo ayiakakosapo aisane yaiya rakirakano asesapo. Aseraka hokono keakosakipoko makata nakosa sarimasapo. ¹⁴ Sarimarakan keseke maiya tuakeramo Yasu soko ipi aporo hakāsa pura soko, ape á pekea, teporoa makeraka sea á sú sarimaraka toapo.

Yasumo ipi aporo hakāsa puraki farawa soko waene he soko kasane oyapo.

Matiu 26:26-30; Maka 14:22-26; 1 Korini 11:23-25

¹⁵ Arirakano i makata nenaka toa maiya amo, Yasumo iaki someraka, "Ano kau teraka himu nakosane, nasiraka hokono keraka isina hakāsa toke makata nenaka seserakanapo.

¹⁶ Ape Farimaresa Hemakapuko Hokono Keraka makata nakosane nōmo efera hunia hauaka wo hokono keakosafapo. Koti unihaeaka rea hauaka á hokono akera maiya amo, hokono kera kepoane repo kakaro hemakapuka nakosapo." Aisapo.

¹⁷ Asiamo waene heane kapoa takamasane, Yasumo maka Kotiaki suseaka rumaraka aporoaki someraka, "Kapo he one masie. Maka repo fete feteaka nesie. ¹⁸ Waene heane hauaka wo nōmo efera hunia nakosafapo. Koti unihaeaka reamo hauaka á nakosapo."

¹⁹ Aíyaka Yasumo farawa maka Kotiaki suseraka faraka, farawa mosoraka aporo hakāsa puraki kaka someraka, "One ano kaupo. Repoko ano kau kakakosapo. Ano kukusane hemakapuko nesie." Aíyaka Yasumo somesapo.

²⁰ I toke makata nekea faraka, Yasumo kapoane maka reke someraka, "Aporomanoaki Kotimo some kawe someaka marakanapo. Someaka marane aporo hinamo suamo kaki-maka kekemahoanie. Asiamo Kotimo aporo hinamo suane arareraka mafasiakosakipoko, ano kuraka ano yapi pukusapo. Ano yapi purakano repo aseraka hemakapuraka, 'Kotimo someaka masane ayiane,' aíyaka hemakapunie. ²¹ Asiane ano parakehokosa aporoane anoyaki hakāsa teporoa kakenapo. ²² Arirakano Aporomanomo Tákeane anopo. Ano ayiakakosane wate fana Kotimo someaka maresapo. Someaka maresasamo hakāsa yine

ayiakakosapo. Uao. Ano parakeana aporoane enahoasifareapo.” ²³ Airakano ipu namina susu someraka, “Isu hakāsa meta epamo eane parakehokosare?” Aíyaka namina susu me rukua somesapo.

“Ano fanapo,” aíyaka Yasumo ipi aporo hakāsa puramo tafatafasane oyapo.

Matiu 20:24-28; 19:28; Maka 10:41-45

²⁴ Yasumo ipi aporo hakāsa puramo namina tafatafaraka someraka, “Isu aporo arisia one epa fanare?” Airakano aporo metamo someraka, “Ano fanapo.” Airakano aporo metamo someraka, “Wae, né fanafapo. Ano fanapo,” aíyaka tafatafasapo. ²⁵ Tafatafarakan, Yasumo iaki someraka, “Yu aporohoanafonosa ipu namina aporo unihaemo kára masamasarapo. Masamasarakano unihaeaki ipu someraka, ‘Aporo hinamo ararenane éreapo,’ airapo. ²⁶ Asiamo repo ayiáka masamasahokopo. Ne fanaraka unihaeraka reane hokosa raua pariraka rekeanie. Né káraraka reane aporo raipa pariraka rekeanie. ²⁷ Aporo fanane epape? E teporo makeraka kayane fanare? Arirakano epo makata nakosa paikia mokoa pekea teporoa taesa aporoane fanare? Repo hemakapuraka, ‘E teporoa makeraka kayane fanapo,’ repo airapo. Asiane ano reyaki reke makata rakiraka rekenapo.

²⁸ Ano kau aseakosakipoko mokoatikirakan, repo ano metakarisafapo. Anoyaki hakāsa yaiya risikinapo. ²⁹ Nōmo unihaeaka asekeea rekeasimo, nōmo Atamo ano murikimasa ayiáka, re unihaeaka asekeea risikiasimo, nōmo re murikimarakapano. ³⁰ Murikimaka ano unihaeaka rea hauaka á nōmo reaki someraka, ‘Makata nakosa soko, he soko, nasimo nōmo teporo makeraka toae. Isiraya aporo ira kenosu makata hukurura kepo kaira aporomo rakira ayiáka repo rakisimo aporo hokopusuamo sea toae.’ Nōmo aihokosapo. Makata hukurura kepo kaira aporomo rakira ayiáka repo rakisimo pipu murikimarakapano.” Aíyaka Yasumo ipi aporo hakāsa pura keno suaki somesapo.

“Yasu nōmo aserafapo.” Aíyaka Pitamo somehokosane Yasumo somesane oyapo.

Matiu 26:31-35; Maka 14:27-31; Yone 13:36-38

³¹ Yasumo someraka, “Saemoneo, Saemoneo, kaisie. Hemo wafayamo witi hae tumosane kau kikisiraka haku taeraka, namoane kikisiraka haku taena ayiáka Satanemo re kau aseakosakipoko epo ayiáka rakiakosapo. ³² Asiane rakiakorakan nepoko nōmo kurikurisapo. Anoaki soko, Kotiaki soko, nōmo yaiya himu hakásaraka hemakapusimo nōmo kurikurisapo. Nōmo ano metakarikia, efera hunia rekeako parihokosapo. Rekeako pariraka ní maemo ano koteaka hemakapusimo ararehoanie.”

³³ Airakano Pitamo Yasuaki someraka “Né tipura purakano, ano soko neyaki hakāsa tipura pukusapo. Né kurakano, ano soko neyaki hakāsa kukusapo.” ³⁴ Airakano Yasumo someraka, “Nōmo kakaro somerakaripo. Kokoroko mehoasiraka nōmo yape isiamo ‘Yasu nōmo aserafapo,’ aihokosapo.” Aíyaka Yasumo somesapo.

Makata umisa faserepeakosane Yasumo somesane oyapo.

³⁵ Yasumo aporo hakāsa pura keno suaki someraka, “Fana nōmo reaki someraka, ‘Pausi soko, ku soko, tamaka soko metakarikia pusie.’ Airakano re pusua sereamo makata su siasare? Makata meta fesenosare?” Airakano ipu someraka, “Wae, makata su siasapo.”

³⁶ Airakano Yasumo someraka, “Pipu yumo re puraka pausi kakeno maka punie. Ku soko maka punie. Poke faseleno pasu roporaka mone masamo poke ropohoanie.

³⁷ Asiamo Kotimo sawia anoane popasane kakaro ayiakakosapo. Aíyaka popasane oyapo. ‘Aporo watikisa rusua kurakano ano iyaki hakāsa rusua kukusapo.’ Aíyaka popasane pipu ayiakakosapo.” *(Aisaia 53:12)*

³⁸ Airakano aporo hakāsa puramo someraka, “Unihaeo, asesie. Poke tetu kakenapo.” Airakano Yasumo someraka “Siareapo,” aisapo.

Kesemané hauaka á Yasumo kurikurisane oyapo.

Matiu 26:36-46; Maka 14:32-42

³⁹ Apeane Yasumo metakarikia, ūri Orofea hisiapo. Á ipi hikianasamo aporo hakāsa pura soko, e kekemarape hisiapo. ⁴⁰ Hikia hauaka á pauraka, Yasumo iaki someraka,

“Re kau aseakosa makata umisa fasereperakano ane, kekemaraka watikiaka rakipe purapaka kurikurihoanie,” aisapo. ⁴¹ Asiamo aporomo wakasema yamenoa eke makasuna ayíáka, Yasu wakasema yamenoa pukua, kakuna porokoa kake kurikuriraka, ⁴² “Atao, nómó anoaki makata umisa maresapo. Makata umisa metakariakosane siasekenone, nómó metakarisie. Asiamo nómó hemakapusuane ayiakakopo. Nómó hemakapusuane ayiakanie.” ⁴³ Aíyaka kurikuriraka rekeno, hepene aporo pekea Yasuane wakapu kaka maresapo. ⁴⁴ Wakapu kaka marerakano, Yasu ipi himu kára nekea kára kurikuriraka, ipi kaua kikipu apura ayíáka yapi pusuapo. Yapi pukua hauaka hurupesapo.

⁴⁵ Arirakano kurikuriraka faraka Yasu takahikia aporo hakása pura toakipoko peraka aseane, i himu nekea wakakesekeno asesapo. ⁴⁶ Asekea i maturikia someraka, “Mari-rakano re waka kerakanare? Turikia tarikia re kau aseakosakipoko makata watikiaka rakirapaka kurikurisie.” Aíyaka Yasumo somesapo.

Yasu waseremasane oyapo.

Matiu 26:47-56; Maka 14:43-50; Yone 18:3-11

⁴⁷ Arirakano Yasumo somesa maiya yiamo aseane, Yasumo ipi aporo hakása pura aporo hakása meta yano motosa Yutasemo aporo yakai karikia, Yutase ipi fanaraka perakano asesapo. Pekea Yasuane makanurakorakano ⁴⁸ Yasumo someraka, “Yutaseo, nómó ano parakehoko makanurakanare?” ⁴⁹ Airakano aporo hakása puramo makata fasere peakosane hemakapukua someraka, “Unihaeo, isiapo ferepemo rúaere?” ⁵⁰ Aíyaka aporo hakása pura metamo ferepe teaka maka, pirisiti aporo fanamo ipi aporo raipa senaki tumuru takuane, ferepemo rukusakaretapisiapo. ⁵¹ Rukusakaretapirakano Yasumo someraka, “Ayiakakopo.” Aíyaka Yasumo aporo raipane senaki sakairaka mafasapo. ⁵² Mafaraka aseane pirisiti aporo kára soko, Kotimo apeane asekea risia aporo ter-akaiyamosa soko, Yu aporo sisima soko e waseremako perakano asekea Yasumo iaki someraka, “Repo ferepe mokoa, poke mokoa aperane, repo ano aporo hakimara-sekeno asekea waseremako perakanare?” ⁵³ Sere káramo Kotimo apea ano reke somerakano repo ano waseremasafapo. Asiane yumo ere susuamo suaka taeraka reke, repo makata watikiaka rakiakosa maiyane fasere apera oyareapo.” Aíyaka Yasumo somesapo.

Pitamo someraka “Yasu ane nómó aserafapo,” aíyaka kotafe somesane oyapo.

Matiu 26:57-58, 69-75; Maka 14:53-54, 66-72; Yone 18:12-18, 25-27

⁵⁴ Aporo yakai pesamo Yasu waseremaka pirisiti aporo fanamo ipi apea karikia pusuapo. Karikia purakano Pita kesekeea kekemarape pusuapo. ⁵⁵ Kekemarape pukua pirisiti aporo fanamo apea pauraka hauaka moro tipia aporomo ira paikia haraka toakipoko Pita pekea iyaki hakasa kayapo. ⁵⁶ Ira paisia rufiraka faerakano aseane, Pita kakeno hinamo raipa metamo hi susuamo koteaka asekea takekea someraka, “Aporoane soko Yasuyaki hakása purapo.”

⁵⁷ Airakano Pitamo someraka, “Wae, hinamo neo, Yasuane nómó aserafapo.” ⁵⁸ Airakano asekea wakasema tuina, aporo metamo Pita asekea someraka, “Yasumo aporo hakása pura meta nepo.” Airakano Pitamo someraka, “Wae, anofapo. Eane nómó aserafapo,” aisapo.

⁵⁹ Aíyaka wakasema tuina wane awa farakano, aporo metamo Pita asekea someraka, “Aporoane fana Yasuyaki hakása pusuapo. E Yasumo aporo hakása purareapo. Namo kakaroripo. E Kariri aporopo.” ⁶⁰ Airakano Pitamo someraka “Wae, ape neo, nómó somerakane ano himeteripo.” Aíyaka somehora maiya yiamo, kokoroko mesapo. ⁶¹ Kokoroko merakano, Unihae Yasumo pariaseraka Pitane hi susuamo asesapo. Aserakano, ipi somesane Pitamo hemakapusuapo. Hemakapuraka, “Pipu kokoroko mehoasiraka nómó ano aserafapo, aihokosapo,” aisane Pitamo hemakapusuapo. ⁶² Aiyáka hemakapuraka Pita ipi takahikia pukua himu kára nekea kára hiripusapo.

Yasuane mainamarekea rusuane oyapo.

Matiu 26:67-68; Maka 14:65

⁶³ Arirakano Kotimo ape asekeia risia aporo terakaiyamosa metakiramo Yasu mainamarekea rusuapo. ⁶⁴ Rukua Yasu hia pasumo taporaka someraka, “Ne epamo rurakarire? Porofete aporomo makata asekeanafonosane somerapo. Somera ayiáka, nómó soko ayiáka somesie.” ⁶⁵ Aíyaka Yasuaki some watikisa metakira soko someraka, e mokoatikisapo.

Aporo sarimaraka risia a Yasu karikia pusuane oyapo.

Matiu 26:59-66; Maka 14:55-64; Yone 18:19-24

⁶⁶ Mituru fiarakano Yu aporo sisima soko, pirisiti aporo kára soko, Kotimo somemane tisa aporo soko, namina sarimasa ape á Yasu karikia pusuapo. ⁶⁷ Karikia pukua ipu someraka, “Unihae máfaraka maresa Keresoane nere? Nómó hufitaeraka somesie.” Airakano Yasumo someraka, “Nómó reaki somehokosapoko asiane, repo kakimakasi-fareapo. ⁶⁸ Nómó reaki makata akai kairakanone, repo anoaki some sia paripeasifareapo. ⁶⁹ Pipu kepomarekea pukua, keseke Aporomanomo Táke anoane Koti Káramo hokono tumuru takua kakeno, repo asekosapo.”

⁷⁰ Airakano ipu someraka, “Kotimo hokosane nere?” Airakano epo someraka “Repo namina someraka ayapo.” ⁷¹ Airakano ipu someraka, “E hukuruko aporo meta peae-hokosafapo. Epo ipi yiamo Koti mawakasemaraka somerakano isiapo kairakaripo.” Aisapo.

23

Paireate rea Yasu karikia pusuane oyapo.

Matiu 27:1-2, 11-14; Maka 15:1-5; Yone 18:28-38

¹ Aporo su sarimasane takahihiraka Paireate rea Yasuane karikia pusuapo. ² Karikia pukua Paireate rea pauraka Yasuane hukurukua someraka, “Isiapo Yu aporomo hasaka rakisimo Yasumo kirimasapo. Epo isu kirimaraka some kasane oyapo. ‘Kamani unihae Sisaki takese mone kakakopo. Ano Unihaepo. Ano Keresopo.’ Aíyaka epo somerakasupo.” ³ Airakano Paireatemo Yasuaki someraka “Yu aporomo unihaeane nere?” Airakano Yasumo someraka “Nómó ní someraka ayapo.” ⁴ Airakano Paireatemo pirisiti aporo káraki soko, aporo hinamo yakai su sarimasa iaki soko someraka, “Aporoamo makata watikiaka rakisia nómó hemakapurakarifapo.” ⁵ Airakano ipu wakapuaka someraka, “Yutía hauaka soko, Kariri hauaka soko, epo hauaka wo soko, aporo hinamo suamo Rome kamaniaki saperaka weasimo kirimaraka somerakasupo. Epo someane aporo hinamo suamo kaikia, Rome kamaniaki mahisiraka rakumarekea risiapo.” Aíyaka kotafe topakamaraka Yasuane hukurusuapo.

Herote rea Yasu karikia pusuane oyapo.

⁶ Aporo su sarimasamo someane Paireatemo kairaka someraka “Aporoane Kariri aporore?” Airakano ipu suamo aosapo. ⁷ Aorakano Paireatemo someraka, “Kariri hauakane nómó asekeia rekenafapo. Herotemo asekeia rekenapo. Herote rea karikia pusie.” Airakano Herote Yarusarame sitia kimisi pekea reakipoko, Yasu karikia á pusuapo. ⁸ Asiamo fana Yasu Kariri hauaka rea maiya amo, epo makata rakisiane Herotemo kairaka hemakapuraka, “Yasumo wakapumo hemakapurakua rakirane aseakoripo.” Aíyaka Herotemo hemakapuraka reakipoko, e rea Yasu karikia perakano Yasuane Herotemo aseraka sesesapo. ⁹ Arirakano Yasuaki Herotemo hunia kaikia, efera hunia soko kaikia, ayiane Yasumo makata meta somesafapo. ¹⁰ Somehoanafonoraka me kauraka rekeno, pirisiti aporo kára soko Kotimo somemane tisa aporo soko i makeraka risiromo Yasuaki memo iriraraka hukurusuapo. ¹¹ Hukururakano Herotemo soko ipi aporo terakaiyamosamo soko Yasuane mainamareraka kearakia, Yasuane pasu kára kotesane osoraka marekea someraka, “Paireate rea paripusie,” aisapo. ¹² Aisa sereamo, Herotepe Paireate tati moresapo. Fana tati mahisiraka risiane sereamo, mahisiraka risiane faraka tati moresapo.

“Yasu rusua kukunie,” aisane oyapo.

Matiu 27:15-26; Maka 15:6-15; Yone 18:39-19:16

¹³ Pairatemo someraka, “Re aporo su peae. Pirisiti aporo soko aporo kára soko re su peae.” Aíyaka aporo su Pairate kayakipoko pekea sarimarakano ¹⁴ Pairatemo someraka, “Repo fana aporoane karikia pekea someraka, ‘Isiapo watikiaka rakisimo epo tarirapo.’ Aíyaka repo hukururakano nōmo eaki hunia soko, hunia soko, kaisiapo. Re risiakipoko re hikumisi yia Yasu pekea rekeno, nōmo eaki kaisiapo. Kaiyiáne repo somesa aiyáka, epo rakisiafapo. Aíyaka nōmo hemakapurakaripo.

¹⁵ Herotemo soko someraka, ‘E karikia paripusie.’ Aisasamo Yasumo makata watikiaka rakisiane Herotemo asesafapo. Asiamo Yasuane rusua kuane siahoasifareapo. E rusua kukuasapo airakane, epo makata meta watikiaka rakisiafapo. ¹⁶ Asiamo sako patesamo e rukua farakano, e nōmo tonotaehokosapo.”

¹⁷⁻¹⁹ Aíyaka Pairatemo somerakano, aporo suamo someraka, “Wae, e kukusimo runie. Parápase tonotaehoanie,” aisapo. Aihoasiraka fana aporo suamo weasimo Parápasesemo kirimasapo. Epo aporo meta rusua kusuapo. Rusua kurakano, Parápase tipura makesapo. Arirakano Ape Farimaresa Hemakapuko Hokono Akera maiya amo, aporo tipura kesane hakásá tonotaenapo. Ainasasamo Parápase tonotaehoasimo, aporo suamo Parápase yano hokoa wásapo. ²⁰ Yano hokoa warakano, Pairatemo Yasuane tonotaehokosakipoko hemakapusua, efera hunia aporo hinamo suaki somerakano, ²¹ ipu suamo someraka, “Wae, Yasu ira matopesa paremarekeea rusua kukunie. Ira matopesa paremarekeea rusua kukunie,” aisapo.

²² Airakano efera hunia yape isiamo Pairatemo aporo hinamo suaki someraka, “Marirakano e rusua kukunie, airakanare? E rusua kukunie airakane, epo watikiaka rakisiafapo. E rusua kuane siahoasifareapo. E kamaka nena yia rurakano eane nōmo tonotaehokosapo,” aisapo.

²³ Airakano aporo hinamo suamo sakepamo wakapuaka someraka, “E ira matopesa paremarekeea rusua kukunie. Metakariakopo.” Aíyaka Pairatemo someane ipu rukutopakatapikia namina someane hákasa wakapusapo. ²⁴ Wakapurakano ipu namina hemakapusua aiyakasimo Pairatemo aporoaki someraka, “Yasu rusua kukunie.

²⁵ Parápasesemo aporo suamo weasimo kirimaraka, aporo meta rusua kurakano asekea, e tipura makesane tonotaerasie. Yasu karikia punie. Repo namina Yasu rusua kukuniesasamo, nōmo aporo terakaiyamosaki Yasu rusua kukunie, airakanapo.” Aíyaka Pairatemo somesapo.

Yasu ira matopesa paremaresane oyapo.

Matiu 27:32-44; Maka 15:21-32; Yone 19:17-27

²⁶ Rome aporo terakaiyamosamo Yasu karikia, ikia otoa puraka risiakipoko, aporo hauaka meta, Sairíni aporo yano motosa Saemone, yao aeyaka ikia otoa perakano asekea, Yasumo ira matopesane epo maka pusimo makatiraka maresapo. Makatiraka marerakano Saemonemo ira matopesane makatiraka Yasu patera pusuapo. ²⁷ Saemone patera aporo hinamo yakai pusuapo. Puraka hinamo metakiramo Yasupoko hihiripurape pusuapo.

²⁸ Hihiripurape perakano, Yasu rekeako pariraka aseraka iaki someraka, “Yarusarame hinamo reo, anopoko hihiripuhokopo. Re naminapoko hihiripuhoanie. Repo hokos-apoko hihiripuhoanie. ²⁹ Asiamo keseke mokoatikina maiya amo faserepeakosapo. Maiya amo hinamo hokosa kiri kaýiane teketakarikia puko ayiane hokosa kirimo nekenekeraka sia teketakarikia pukusafapo. Maiya amo aporo hinamomo someraka, ‘Hinamo manokonomosa seseaka tokenapo. Hinamo hokosa hokono mareanafonosane seseaka tokenapo. Namina sia teketakarikia pukusapo,’ aihokosapo. ³⁰ Sere amo watiki-hokosa maiya fasereperakano aporo hinamomo kakaro kára namoraka ūriaki someraka, ‘Uri nōmo isu matairasie.’ Aíyaka ūri feteaki soko someraka, ‘Isu mokosekehoanie.’ Aíyaka keseke mokoatikina maiya ane fasere aperamo repo aihokosapo. *(Hosea 10:8)*

³¹ Arirakano ira hitafe pateraka pairakano* ira porasane mayiakakosare?" Aíyaka Yasumo somesapo.

³² Someaka farakano aporo wera tetá Yasuyaki hakāsa ira matopesa paremareasimo karikia pusuapo. ³³ Karíkia pukua hauaka yano motosa Uni Kiki hauaka á pauraka, Yasuane ira matopesa paremaresapo. Aporo tetáne soko ira matopesa paremarekeea, meta Yasu hokono kasakai takua maporaka, meta Yasu hokono tumuru takua maposapo. Maporaka Yasuane tipia ira matopesa paremarekeea maposapo. ³⁴ Maporakano Yasumo someraka, "Atao, pipu ipu makata arakira one ipu koteaka hemakapurakarifapo. Ipu himeteraka arakire. I himu watikiaka arakirane nōmo mafahoanie." Aíyaka Yasumo somesapo. Arirakano Yasumo pasuane mokoakosakipoko ipu kase asia enasapo.

³⁵ Arirakano aporo hinamo suamo asekea risiapo. Asekea risike Yu aporo káramo hokomarekeea someraka, "Epo aporo hinamo metakira araresapo. Kotimo e máfaraka Unihae Kereso murikimasa satiki, epo ipi yia ararehoafunureapo. Ira matopesa metakarikia o peafunureapo." ³⁶ Airakano aporo terakaiyamosamo e mainamareraka he kísa karakáno Yasumo nesafapo. ³⁷ Nanafononakano namina someraka, "Ne Yu aporomo unihaeekenone ira matopesane metakarikia o peae," aisapo.

³⁸ Arirakano Yasu unia kima yapura ira tumusakipoko poparaka paremaresapo. Poparaka paremaresane oyapo. "Yu aporomo unihaeane epo." Aíyaka poparaka paremaresapo. ³⁹ Arirakano somemane koareaena aporo meta ira paremaresa amo Yasuaki mokoatikiraka someraka, "Unihae Kereso máfaraka maresane nere? Ne ni yia arareraka mafasisie. Eto soko nōmo arareraka mafasisie," aisapo. ⁴⁰ Aisa aporoaki aporo meta ira paremaresa amo someraka, "Nōmo Kotiaki namoraka hemakapurakarifapo. Yasu fanasina ayíáka eto soko fanasirakanapo. ⁴¹ Eto kuane siareapo. Etapo fana watikiaka risiasamo ropo kuane siahoasireapo. Arirakano Yasumo makata watikiaka rakisiafapo. Epo watikiaka rakianafonosasamo e kuane siahoasifareapo." ⁴² Aíyaka epo Yasuaki someraka, "Yasuo, né unihaeaka rea maiya amo nōmo ano hemakapunie." ⁴³ Airakano Yasumo someraka, "Ao, né anoyaki hakāsa pipu ape kotesa á rekeakosapo," aisapo.

Yasu kusuane oyapo.

Matiu 27:45-56; Maka 15:33-41; Yone 19:28-30

⁴⁴ Hauaka sua sere maiya tuaro korokomo (12) kepomarekeea eresapo. Ereraka reane samapu maiya isiam faesapo. ⁴⁵ Sere maiya faehoanafonorakano, Kotimo apea pasu waremaresane yapunaka koarape atura pusuapo. Koarape pukua taku haku, taku hakusapo. ⁴⁶ Arirakano Yasumo wáraka, "Atao, ano ho nōmo masie," aíyaka ipi kusuapo. ⁴⁷ Kusua maiya amo aporo terakaiyamosa satinimo aseraka Kotiaki kekereraka someraka, "Aporo kusuane kakaro kotesapo. E aporo kárapo."

⁴⁸⁻⁴⁹ Airakano Yasu patera asesa aporomo soko, Kariri hinamomo soko, wakasema yameno aeyaka risike asesapo. Yasu ira matopesa paremaresane aporo hinamo suamo asekea faraka apea poparipuraka, aporo hinamo suamo namina káwa ruraka, "Isu mahisiripo. Isu himu nenakaripo." Aíyaka namina apea poparipuraka káwa rupe pusuapo.

Yasu kunikia motosane oyapo.

Matiu 27:57-61; Maka 15:42-47; Yone 19:38-42

⁵⁰⁻⁵¹ Yu aporomo taone hakāsa meta yano motosa Arimatíapo. Arimatía aporo Yosefe ipi Fere se aporoyaki, Kotimo somemane tisa aporoyaki hakāsa sarimaraka rakisiaapo. Rakiraka e ereketaeraka koteaka susu reke, ⁵² aporo metakiramo Yasu rusua kukusane me rurakano epo waesapo. Kakaro rusua kurakano soko, epo waesapo. Aporoane Kotimo unihaeaka asekea rekeakosa maiya ane faserepeasimo, Yosefe kau reapo. Yosefeane Pairate rea pukua Pairateaki someraka, "Yasu kusuane kunikia motoako nōmo maka puaere?"

* 23:31: Takume kepoane oyapo. Koteaka rera aporo anoane mokoatikirakano, watikiaka risira aporoane mayiakakosare?

⁵³ Airakano Pairatemo aosapo. Aorakano Yosefe pukua Yasu kusuane fatarimaka, pasu pakae kotesamo Yasuane taporaka, maka pukua kunikia fana rasa á Yasu motosapo. Kunikia á aporo meta fana kusuane motosafapo. ⁵⁴ Yasu kusua kunikia motosa maiya ane aporo hinamomo makata sarimana maiyamo† éane motosapo. Sarimana maiya faraka maiya tuakeramo fenena maiya kepomaresapo. ⁵⁵ Arirakano Kariri hinamo Yasuyaki hakāsa pesamo, Yasu ira paramaresa kusuane, Yosefemo fatarimaka pukua kunikia motorakano, hinamo ipu soko aseako, Yosefeyaki hakāsa pusuapo. Pukua Yasu kunikia motorakano asekea ⁵⁶ namina apea poparipukua wera wape yamona soko, pauta asia soko, Yasu kaua paifyakosakipoko sarimasapo. Sarimaraka pukusakipoko asiane ereraka maiya fasapo. Asiamo fenena maiya paurakano makata rakiako asiane metakarikia fenesapo. Kotimo somemanee motoraka fenena maiya amo fenanie, aisasamo i fenesapo.

24

Yasu maturikia taesane oyapo.

Matiu 28:1-10; Maka 16:1-8; Yone 20:1-10

¹ Yatipinumo* mituru yao kawe fiarakano, hinamomo Yasu kunikia motosane aseako puraka, pauta asia sarimasane mokoa pukua, kunikia pauraka ² aseane, eke tafea kunikia ikia koroa mapirisiane kepere mafeasekeno asekea, ³ kunikia kakarua yorokoa pukua aseane, Yasu kunikia motosane fasekeno asesapo. ⁴ Fasekeno asekea mahimeteraka asekea risike, aseane aporo tetá pasu pakaesa ho piakaepiakaesa ososane fasereperakano asekea, ⁵ hinamo i namoraka arupepesapo. Arupeperaka risikino aporo tetapō someraka, “Aporo hitafe reane marirakano aporo kusua taena kunikia aseako perakanare? ⁶ E o rekerifapo. E maturikia taerakano pusuapo. Fana e Kariri hauaka koraka rea maiya amo, e ipi kukua turikia pukusapo, aíyaka somesane hemakapunie. ⁷ Asiamo epo somesane oyapo. Aporo watikisaki e karakáno, e ira matopesa paremarekeea kurakano, maka pukua kunikia motosane, sere tetámo wanina isiamoo turikia pukusapo. Aisane hemakapunie.”

⁸ Aíyaka tetapō somerakano hinamo ipu hemakapusuapo.

⁹ Aíyaka ipu hemakapuraka kunikia metakarikia poparipuraka, aporo tetá amo somesane, aporo kinu suaki soko, aporo metakiraki soko, somesapo. ¹⁰ Arirakano hinamoane meta Makatara hinamo Mariapo. Arirakano meta Yoánapo. Arirakano meta Yamesemo kaíyia Mariapo. Ipu soko, hinamo metakiramo soko, aporo hakāsa pura kinu suaki somesapo. ¹¹ Ayíáka somerakano aporoamo hemakapuraka, “Some koaka murikia kotafe somerakae.” Aíyaka hemakapukua hinamo ipu somepe kakimasafapo. ¹² Arirakano Pita takahikia kunikia aseako foaka pusuapo. Pukua kunikia kakarua weaka aseane, Yasu pasumo taporaka motosane pasu hakāsa yia kake, Yasu fasekeno asesapo. Fasekeno asekea Pita apea paripuraka, ikia otoa hemakapupe pusuapo. “Yasu masiarakapo,” aíyaka hemakapupe pusuapo.

Emease apea aporo tetá pusuane oyapo.

Maka 16:12-13

¹³ Sere hakásá yiamo aporo tetá Emease apea pusuapo. Arirakano apeane Yarusarame sitiane wakasema yamenopo. ¹⁴ Yamenosakipoko tetá puraka, makata asesane tetapō tati susu somepe pusuapo. ¹⁵ Somepe purakano asekea, Yasu ikia otoa faserepekeea namina hakāsa pusuapo. ¹⁶ Puraka aporo tetá amo Yasuane himetesapo.

¹⁷ Himeterakano Yasumo tetáki someraka, “Tetápo somepe apurane makata yakapa somerakanare?” Airakano aporo tetáne fenekeea risike hikumisi hiripuhoko ayiana ayíáka risiapo. ¹⁸ Ayíáka risike aporo hakásá yano motosa Kiriopasemo someraka, “Maiya omo aporo hinamo yakai Yarusarame sitia kimisi pesapo. Asiamo nómo ní hákasamo makata asíane ní hemakapurakafare?”

† 23:54: Ape Farimaresa Hemakapuko Hokono Keakosakipoko pipu makata sarimahokosapo. Aíyaka sereane sarimana maiyapo aisapo. * 24:1: Yasu turikia pusua maiya amo, sokó kepomarekeea menoraka, sere yatipinuanie sere káraro, aíyaka Keresoa paosa aporomo hemakapusuapo.

¹⁹ Airakano Yasumo someraka, “Makata asíane yakapare?” Airakano aporo amo someraka, “Nasare aporo Yasuane asíapo. E porofete apororeapo. Aporo hinamo hikumisia soko, Kotimo hikumisia soko, epo wakapumo rakira rakikia some kaka, asiasamo e porofete apororeapo. ²⁰ Arirakano isiapo pirisiti aporo soko, isiapo aporo káramo soko, ipu e karikia pukua Rome kamani unihaeemo e rusua kukunie, aíyaka mareasimo Rome kamaniaki e kasapo. Karakano ipu e ira matopesa paremarekea maposapo.

²¹ Arirakano isiapo hemakapusuane isu Yu aporo hinamoane epo tonotaehoa-funureapo. Rome kamamimo isu aseke aseke risiane metakarikia isiapo isina kamani unihaeaka aseke rekeasimo, máfaraka mareasafapo. Asiane máfaraka maresafapo. Makata meta soko faserepesapo. E kusuane sere tetá faraka, pipu sere isíapo. ²² Pipu isiapo hinamo metakiramo makata asesane isuaki somerakano, isiapo kaikia himu fasapo. Mituru fiarakano i Yasu motosa kunikia aseako hisiapo. ²³ Hikia kunikia pauraka aseane, Yasu fasenko asesapo. Aseke poparipeke ipu isuaki someraka, ‘Kunikia á hepene aporo risikino ipu asesapo. Hepene aporomo someraka, “E hitaferaka rekenapo,” airakasapakasupo.’ ²⁴ Aíyaka hinamomo somerakano, isiapo aporo metakiramo kunikia aseako pusuapo. Pukua aseane hinamo ipu aisa hakása yine asesapo. Yasuane ipu asesafapo,” aisapo.

²⁵ Aíyaka aporo tetámo somerakano, Yasumo tetáki someraka, “Tetápo koteaka hemakapurafaraka mokome somerakae. Porofete aporomo somesane tetápo koteaka hemakapukua kakimaka somerakarifapo. ²⁶ Kereso kárahokosakipoko, aporomo e mokoatikirakano, e kau teraka himu neke reke, makata su ayiakakosaposane ásiapo.” ²⁷ Aíyaka Kotimo sawia popasa kepoane tetáki Yasumo some kasapo. E ipiane popasane some kasapo. Mosesemo kepomarekea popasane, Yasumo tetáki somesapo. Mosesemo popasa maiya amo, patera porofete aporo yakaimo popasane tetáki somesapo. ²⁸ Somepe pukua i Emease apea pauraka, Yasu ape meta pukusakipoko tetáne marokeraka puko ayiane ²⁹ tetapó someraka, “Né pukupo. Etoyaki hakása peae. Yao ererakanapo,” aisapo. Arirakano Yasu iyaki namina hakása apea hikia, aseke toapo.

³⁰ Namina hakása toke makata nakosakipoko, Yasumo farawa maka Kotimo makote-hoasimo kurikuriraka mamosoraka tetáki kasapo. ³¹ Karakáno tetapó himo koteaka aseke someraka, “Ne Yasureapo.” Aíyaka hemakapuanine Yasuane ipi yia kaya nine fasapo. ³² Farakano aseke tetapó tati yia someraka, “Isiapo unihaeane kakaro turikia pusuapo. E turikia pusuane Saemonemo asesapo.” ³³ Airakano aporo tetá kawe pesamo soko someraka, “Eto ikia otoa puraka risiakipoko aseane Yasu peraka etoaki makata somerakasapo. Ikia otoa some karakano etapo eane koteaka hemakapusuafapo. Asiane apea isina hakása makata nakosakipoko toke epo farawa mosoraka etoaki karakano, amo etapo eane koteaka aseke hemakapusuapo.” Aíyaka aporo tetá amo somesapo.

³⁴ Arirakano tetá takahikia Yarusarame sitia poparihiisiapo. Poparihikia apea yorokoa aseane aporo hakása pura kinu suane soko, ipu aporo tákeyaki namina hakása sarimaraka tokeno asesapo. ³⁵ Arirakano ipu aporo tetá pesaki someraka, “Isiapo unihaeane kakaro turikia pusuapo. E turikia pusuane Saemonemo asesapo.” ³⁶ Airakano aporo tetá kawe pesamo soko someraka, “Eto ikia otoa puraka risiakipoko aseane Yasu peraka etoaki makata somerakasapo. Ikia otoa some karakano etapo eane koteaka hemakapusuafapo. Asiane apea isina hakása makata nakosakipoko toke epo farawa mosoraka etoaki karakano, amo etapo eane koteaka aseke hemakapusuapo.” Aíyaka aporo tetá amo somesapo.

Aporo hakása puramo asekeasimo Yasu pesane oyapo.

Matiu 28:16-20; Maka 16:14-18; Yone 20:19-23; Tarira Aporo 1:3

³⁶ Aporo tetapó someana maiya yiamo Yasu faserepeke, iyaki hakása reke someraka, “Koteaka auaraka risikianie.” ³⁷ Airakano namina fofaraka namoraka someraka, “Yakasa horeapo.” ³⁸ Airakano Yasumo someraka, “Marirakano re namorakanare? Marirakano himu tetáraka hemakapukua risikinare?” ³⁹ Ano hokono asesie. Ano korake asesie. Kakaro anopo. Kakaro anoreapo, aíyaka repo hemakapuko ano hokonoa sakairasie.

Yakasa ho kiki rerafapo. Ano kiki rekeno repo aserakanapo. Yakasa ho kau rerafapo. Ano kau rekeno repo aserakanapo.” Aisapo.

⁴⁰ Aisane hokono soko, korake soko, tarirakano ipu asesapo. ⁴¹ Asekea namina kakaro seseraka someraka, “Erakapo. E masiarakapo.” Aíyaka ipu asesa nine Yasu kakaro reane ipu koteaka hemakapusuafapo. Asiasamo Yasumo someraka, “Makata nakosa tokenare?” ⁴² Airakano ipu pokoa paisia inasane e karakano ⁴³ ipu asekeasimo Yasumo pokoane nesapo. ⁴⁴ Nekea faraka Yasumo someraka, “Ano fana reyaki rea maiya amo, makata ayiakakosane fana nōmo reaki somesapo. Nōmo somesane kakaro yasiapo. Fana Mosesemo anoane ayiakakosapo, aíyaka popasane soko, anakano porofete aporomo anoane ayiakakosapo, aíyaka popasane soko, anakano Same púkua popasane soko, anoane ayiakakosaposane kawe asia ayareapo.” Yasumo aisapo.

⁴⁵ I namina himeterakano ipu hemakapusimo Yasumo Kotimo sawia popasane iaki tarikia mahemakapusuapo. Asiamo Kotimo sawia popasane ipu hemakapusimo epo some karaka, ⁴⁶ “Kotimo sawia popasane oyapo. Keresoane kau teraka himu nekea rusua kusuane, yape tetá faraka yape isiamo turikia pukusapo, aíyaka popasapo. ⁴⁷ Asiamo ano turikia pusuakipoko Keresoane yano hokoa some karakano, aporo hinamomo kaikia ipu makata watikisane metakarikia, eaki risikiako parirakano, namina makata watikisane Keresomo mafahokosapo. Keresomo makata watikisane mafahokosa someane hauaka sua aporo hinamo suaki some kakanie. Yarusarame sitia some kaka, Yarusarame siti aeyaka kepomarekea somepe pukua, hauaka sua aporo hinamo suaki some kakanie. ⁴⁸ Asiamo repo makata su asesane somehoanie. ⁴⁹ Nōmo Atamo makata kakakosaposane, nōmo reaki kaka mareakosapo. Hepene yapunaka wakapuane re himua peasimo Yarusarame siti yia re su kau tokanie.” Aíyaka Yasumo somesapo.

Yasu hepene yapura hisiane oyapo.

Maka 16:19-20; Tarira Aporo 1:9-11

⁵⁰ Yasumo i karikia Yarusarame sitiane metakarikia, Petene ape makeraka hisiapo. Hikia risike, Yasumo ipi hokono tetákara máfaraka, iane makoteraka some kasapo.

⁵¹ Makoteraka some kasá maiya amo, Yasumo iane metakarikia, Kotimo e hepene yapura karikia hisiapo. ⁵² Yasu hinakano asekea ipu eane kekereraka Yarusarame sitia seseraka poparihiisiapo. ⁵³ Maiya suamo Kotimo apea hikia Kotiaki kekeresapo.

Yone

Yone sawi one mahemakapukusa someane oyapo.

Yasumo aporo hakāsa purane hakāsa metane Yonepo. Yonemo Yasumo makata somesane kaikia, arirakano Yasumo makata rakisiene soko asesapo. Asiasamo aporo hinamomo Yasuaki himu hakásaraka hemakapusimo sawi one Yonemo popasapo.

Yonemo ipi yanoane faremareke, aporo hakāsa pura Yasumo himu tumurumo hemakapusua aporoane Yone ipipo, aíyaka taku meaka popasapo.

Yasu turikia pukua hepene yapura hisiakipoko, keremisi 60 faraka Yonemo sawi one popasapo.

Yone sawia some kepo parakuraka popasane oyapo.

1:1-18 Yasu hauaka wo peasiraka, fana e Kotiyaki hakāsa yaiya reapo.

1:19-51 Yone he tapukumareramo makata rakisiakipoko Yasumo ipi aporo hakāsa pura metakirane murikimasapo.

2:1-24 Yasumo namo heane waene he maparisapo.

3:1-36 Ereamo Nikitímasemo Yasuaki somehoko pesapo.

4:1-54 Yasumo Sameria hinamoaki somesapo.

5:1-47 Yarusarame sitia hokono kesakipoko Yasumo some kasapo.

6:1-71 Yasumo aporo fae taoseneaki (5000) farawa nasimo kasapo.

7:1-8:59 Yarusarame sitia hokono kesakipoko Yasumo efera hunia some kasapo.

9:1-41 Aporo hi mesane Yasumo mafasapo.

10:1-42 Saro sipi aseke aseke rera aporoane Yasupo.

11:1-57 Rásarase kusuane Yasumo maturikia taesapo.

12:1-11 Yasu kukusa maiyane makerakano Mariamo Yasu korakea makata wape yamon-amo hokesapo.

12:12-50 Yasu saro toki matia ripaka Yarusarame sitia perakano, aporo hinamomo eane makárarakano Yu aporo sisimamo Yasuaki hisiraka risiapo.

13:1-16:33 Yasu Yarusarame sitia hinaka ipi aporo hakāsa puraki some kasapo.

17:1-20 Yasumo ipi Ataki kurikurisapo.

18:1-19:42 Yasuane parakeraka hukurukua ira matopesa paremareke aseke kusuapo.

20:1-31 Yasu turikia purakano Yarusarame sitia aporo hinamo metakiramo asesapo.

21:1-25 Yasu he Kariri fua pekea ipi aporo hakāsa puraki tarisiapo.

Yasu ipi yano motosa metane Somepo, aisane oyapo.

¹ Makata su kepomaresa maiya amo, ipi yano motosa Someane^{*} wate yaiya reapo. Someane Kotiyaki hakāsa reapo. Someane ipi Kotipo. ² Makata su kepomaresa maiya amo e Kotiyaki hakāsa yaiya reapo. ³ E aeyaka makata suane kepomaresapo. E metakarikia makata su kepomaresafapo. E aeyaka kepomaresapo.

⁴ Yaiya reramo kepoane e ipipo. Yaiya reramo faesane aporomanoaki karápo. ⁵ Faesa amo katosa arakaru tipia kára faeraka rekenapo. Katosamo faesane kopakataenafapo.

⁶⁻⁷ Asiamo faesane somehoko aporo hakāsa meta Kotimo pusiesapo. Pusierakano pesane ipi yano motosa Yonepo. Aporo suamo kakimakasimo epo somehoko pesapo.

⁸ Faesane éfapo. Faesane epo somehoko pesapo. ⁹ Arirakano kakaro faesamo kepoane Yasu ipipo. Ipi hauaka wo aporo suane mafae hoko pesapo. ¹⁰ Arirakano wate fana epo hauaka one soko aporomano ane soko rakisiapo. Epo ipi rakisia nine e hauaka kara wo pesa maiya amo aporo hinamomo eane himetesapo. Kotimo eane pusierakano, pesane aporo hinamomo hemakapusufapo. ¹¹ Ipi aporo iramo apea perakano ipu eane teresafapo. ¹² Asiane aporo hinamo metakiramo eane tereraka epo ipi yano

* ^{1:1:} Wate fana Yu aporoane namoraka risike Kotimo yano motosane hufitaeraka kakama somesafapo. Ipu takumeaka yano motoraka Someane aíyaka somesapo. Asiamo Yonemo sawi one poparaka Yasu ipi yano motosa metane Somepo, aíyaka poparakano Yu aporo suamo hemakapuraka Yasuane Koti hakása yiyo.

motosa paoraka eaki himu hakásaraka hemakapurakano iaki epo someraka, “Re Kotimo hokosapo,” aíyaka somesapo. ¹³ Kotimo hokosapo, aisane aporomo hinamo arumaka hokosa hokono amarerera ayafapo. Aporomo hinamo arumaka hokosa hokono maresa hokosane aporomo ipi hemakapusua ayapo. Kotimo hokosa risikiasimo Kotimo ipi hemakapukua someraka, “Neane nōmo nī hokosapo.” Aíyaka ipi hokosa risikiasimo murisiapo.

¹⁴ Arirakano Somemo isiapo aporomanomo kauane maka, hauaka wo pekea isuyaki reapo. Epo isu hemakapuraka arareraka, kakaro someane some kasapo. Some akaramo Yasumo wakapu faesane isiapo asesapo. Ipi wakapu faesane ipi Kotimo hokosa hakása yinesasamo Kotimo wakapuanne faesa ayapo.

¹⁵ Arirakano Kotimo hokosa ane Yonemo somesapo. Yonemo paroaka someraka, “Aporo keseke peakosane e ipi namo kakaro fanapo. Ano takapeasiraka e fana yaiya reapo. Fana yaiya reasasamo e ipi namo kakaro kárapo. Ano wakasemapo,” aíyaka Yonemo somesakipoko aseane Yasu perakano asesapo.

¹⁶ Yasumo isu su yaku kára araresapo. Efera hunia soko, efera hunia soko yaku arareraka rekeakosapo. ¹⁷ Kotimo somemaneane Mosesemo aporoaki some kasapo. Arirakano yaku ararenane soko, kakaro somerane soko, Yasu Keresomo isuaki kasapo.

¹⁸ Aporomo Kotiane aserafapo. Asiāne ipi hokosa hakása yine tati hakāsa risiasamo, hokosa amo Kotimo ainane tariako pesapo.

Yone he tapukumareramo somesane oyapo.

Matiu 3:1-12; Maka 1:1-8; Ruki 3:1-18

¹⁹ Yu aporo sisimamo pirisiti aporoaki soko, Rífai aporoaki soko someraka, “Re Yarusarame siti metakarikia Yoneaki makata kaiyako punie.” Airakano i pukua Yone rea pekea someraka, “Ne epare? Kotimo pusiesa aporoane nere?” ²⁰ Airakano Yonemo mahemesafapo. Epo hufitaeraka someraka, “Ano Keresofapo. Aporo Unihaeaka rekeasimo murikimasa aporo keresoane anofapo.” ²¹ Airakano ipu someraka, “Ne eparakapo. Ne Iraíyare?”[†] Airakano epo someraka, “Wae, ano Iraíyafapo.” Airakano ipu someraka, “Porofete aporo kárane nere?” Airakano epo someraka, “Anofapo,” aisapo.

²² Airakano ipu someraka, “Ne epare? Isu pusiesa aporoaki isiapo somehokosakipoko nōmo somesie.” ²³ Airakano epo someraka, “Ima yaoa sakepamo somehokosa aporoane anopo. Unihae peakosane ikia kara hahaezeno maereketaehoanie aihokosa aporoane anopo. Anoane Aesayamo popahoareapo,” aisapo. *(Aisaia 40:3)*

²⁴ Airakano Fere se aporomo pusiesa aporoamo someraka ²⁵ “Keresoane soko, Iraíya ane soko, arirakano porofete aporo karane soke nefareapo. Asiamo marirakano nōmo aporo hinamoane hea tapukumurirakanare?”

²⁶⁻²⁷ Airakano Yonemo someraka, “Re nōmo hea hákasa tapukumurirakanapo. Ano reakipoko aporo hakása meta peakosapo. E peakosane reyaki rekenapo. Ayíáka repo eane hemakapurakanafapo. E aporo kárasasamo aporo raipamo epo tamaka ane fisina ayíáka nōmo fisihoe siahosifareapo. E aporo kárasasamo nōmo epoko raiparaka rakiako ayiane soko ano wakasemasasamo nōmo rakiane siahosifareapo. Ano eyaki siasafapo.” Aíyaka Yonemo Petene apea somesapo. ²⁸ He Yotane taku ra Petene ape rekenapo. He Yotanea Yonemo aporo hinamo hea tapukumurisiapo.

“Kotimo saro sipi mano apere,” aisane oyapo.

²⁹ Ere hakásaraka, mituru Yonemo aseane Yasu perakano aseraka someraka, “Kotimo saro sipi manoane apere. Aporomo himua makata watikisane epo mafahokosakipoko saro sipi arura ayíáka e rukusapo. ³⁰ Fana eane nōmo reaki somerakasu ayapo. Asiamo ano fana pesakipoko aporo meta kesekeea peakosaposane apera ayareapo. Asiamo aporoane ano hokono mareasiraka e ipi wate fana yaiya reapo. Asiamo aporoane ipi namo kakaro fanapo.

[†] 1:21: Iraíyane wate fana porofete aporopo.

³¹ Fana aporo meta Kotimo pusiehokosaposane nōmo kairaka epa peanarakapo, aíyaka hemakapukua ano himetesapo. Asiane Isiraya aporo hinamo repo eane hemakapusimo reane nōmo hea tapukumurirakanapo. Hea tapukuamuriramo eane atarira ayiáka tarirakanapo,” aíyaka Yonemo somesapo.

³²⁻³³ Aíyaka efera hunia Yonemo someraka, “Fana Kotimo anoaki hea tapukumuriako pusiesapo. Kotimo some kasa yiamo someraka, ‘Ho Kotesa pekea aporo hakásá meta á karaporakano epo ipi yiamo Ho Kotesane aporo hinamo suaki muriakosapo.’ Aíyaka Kotimo somesakipoko aporoane fasere perakano fana e nōmo himetesapo. Himetesane Ho Kotesa mena nume asia ea karaporakano aseraka nōmo hemakapuraka, ‘Kotimo fana somesane ereapo,’ aíyaka nōmo hemakapusuapo. ³⁴ Hemakapukua eane nōmo himo asekeea someraka, ‘Eane kakaro Kotimo hokosapo. Kotimo murikimasa aporoane ereapo,’ aíyaka nōmo someraka rekenapo.” Aíyaka Yonemo somesapo.

Yasumo aporo hakásá pura fana murikimasane oyapo.

³⁵ Ere hakásá waka, mituru Yone ipi aporo hakásá pura tetáyaki risike, epo aseane ³⁶ Yasu purakano asekeea wáraka someraka, “Asesie. Kotimo saro sipi mano e apure.”

³⁷ Aíyaka wárakano Yonemo aporo hakásá pura teta amo kaikia Yoneane metakarikia Yasuane kekemarape pusuapo. ³⁸ Kekemarape perakarakano Yasumo patera pari-aseane tetā kekemarape perakano asekeea someraka, “Teto yakapa aseako perakanare?” Airakano tetapō someraka, “Tisao,‡ né ape ma warakánare?”

³⁹ Airakano Yasumo someraka, “Aseako peae.” Airakano tetā Yasuyaki hakásá pukua epo ape waráne asesapo. Asesa sere yiamo Yasuyaki hakásá risiapo. Yasuyaki hakásá risia sere ane samapu maiya kitafapo.

⁴⁰ Yonemo someane kakimaka Yasu kekemaraka pusua aporo tetāne meta yano motosa Enitupo. Enituane e Saemone Pitamo mamaneapo. ⁴¹ Fana Enitu ipi mamanea Saemone ane kope pusuapo. Pukua e kokoa asekeea someraka, “Aporo Kotimo pusiehokosaposane Kereso perakasapo. Isiapo asesapo. Keresoane Kotimo Unihae murikimaka maresa ayasesapo.”

⁴² Aíyaka Enitumo Saemone ane karikia Yasu rea pesapo. Perakano Yasumo e asekeea someraka, “Né Yonemo hokosa Saemonereapo. Yumo nōmo neane yano motoraka Sifase yano motorakanapo,” aíyaka Yasumo somesapo. Arirakano Sifase yano motosane Kiriki meaka Pita yano motosapo. Namo meaka Eke, aíyaka yano motosapo.

Firipipe Natanio tetāki Yasumo peaesane oyapo.

⁴³ Ere hakásá waka, mituru Yasu Karuka hauaka pusuapo. Pukua Firipi aseraka someraka, “Ano patera asesie,” aisapo. ⁴⁴ Arirakano Firipi ipi Pesaita taonea reapo. Enitu soko, Pita soko i Pesaita taonea hakásá risiapo. ⁴⁵ Firipi pukua Natanio asekeea eaki someraka, “Mosesemo somemane sawia poparaka maresa aporoane isiapo asesapo. Porofete aporomo soko eane popasane isiapo asesapo. E Yosefemo hokosa Yasupo. Epo apeane Nasare apopo.”

⁴⁶ Airakano Nataniomo someraka, “Nasare ape aeyaka aporo kotesa perafapo.” Airakano Firipimo someraka, “Aseako peae,” aisapo. ⁴⁷ Aíyaka tetā pukua Natanio perakano Yasumo asekeea someraka, “Isiraya aporo kotesane ereapo. Epo makata kotafe somerafapo.” ⁴⁸ Airakano Nataniomo someraka, “Nómo ano mayíka hemakapukua asekeea somerakanare?” Airakano Yasumo someraka, “Firipimo néaki peaehoasiraka né ira foke kepoa kakeno nōmo né asesapo.” ⁴⁹ Airakano Nataniomo someraka, “Tisao, Kotimo aporo hokosane nereapo. Né Isiraya aporomo unihæreapo.” ⁵⁰ Airakano Yasumo someraka, “Né ira foke kepoa kakeno nōmo asesapo. Asiasamo nōmo anoaki himu hakásaraka hemakapurakanapo. Asiane nōmo makata someana one wakasemapo. Keseke makata kára meta nōmo aseakosapo.” ⁵¹ Aíyaka efera hunia Yasumo someraka, “Nōmo kakaro somerakaripo. Ti kikisi akaraka, kikisi roraka, Aporomanomo Táke ano

‡ 1:38: Namina meaka Rapae, airapo. Isiapo meaka Tisa, airapo.

unia kima yapura Kotimo hepene aporoane pekea parihinakano repo asekeakosapo," aíyaka Yasumo somesapo.

2

Kena taonea aporo metamo hinamo arumaraka hokono kesane oyapo.

¹ Sere teta faraka, sere isiamo aporo metamo hinamo arumaraka hokono kesapo. Kariri hauaka á Kena taonea hokono kesapo. Hokono akera apea Yasumo ipi kaíya pukua kayapo. ² Arirakano Yasu soko, ipi aporo hakása pura soko, iaki aporo meromo peaeerakano i pukua á risiapo.

³ Arirakano aporo hinamo su risiamo waene heane nekea farakano, Yasumo ipi kaíyiamo eaki someraka, "Waene heane ipu suamo nekea fahoareapo." ⁴ Airakano Yasumo ipi kaíyiaki someraka, "Amao, marirakano nómō anoaki somerakanare? Nómō maíyane*" harufapo." ⁵ Airakano Yasumo ipi kaíyiamo aporo meromo aporo raipaki someraka, "Yasumo reaki makata rakisimo somerakano, hakása yine kakimaka rakinie," aisapo. ⁶ Airakano aseane petoro namasu tarámo kára asia toane asesapo. Arirakano Yu aporo sisimamo hemakapuraka, "Kotimo isuaki sesehoasimo isiapo hokono kusunapo." Aíyaka hemakapusuasamo hokono kusuhoko eke petoroa he taka apea taesapo. Apea taesane tarámo kára asia petoro kárane taesa tokeno asesapo. ⁷ Aseraka aporo meromo aporo raipaki, Yasumo someraka, "Petoro kárane komarusimo he taka kesie." Airakano ipu he taka kekea komarusuapo.

⁸ Komarurakano asekea Yasumo aporo raipaki someraka, "Petoro kára á he kesane, takamaka aporo hokono akera hokono meromo nasimo takamaka pusie." ⁹ Airakano ipu takamaka pukua, aporo hokono meroaki karakáno epo nesapo. Namo heane waene he maparisane epo hemakapusuafapo. Arirakano aporo raipa he tasamo ipu hákasa hemakapusuapo. Aporo meroamo waene heane nenaka aporo hinamo kawe arumasa apiane peaesapo. ¹⁰ Perakano epo someraka, "Isiapo ainane oyapo. Waene he namo kakaro kotesa wapesane fana aporo hinamo hokonoa pesaki karápo. Fana kasane ipu siaraka nenakano asekea, waene he wakasema wapesane kesekeea karápo. Arirakano nómō waene he wakasema wapesane fana akare. Kakaro wapesane kesekeea akare," aisapo.

¹¹ Arirakano aporomo hemakapusimo Yasumo Kotimo wakapumo hemakapukua rakira fanane oyapo. Namo heane waene he maparihoasimo rakisiapo. Kariri hauaka á Kena taonea epo rakisiapo. Epo wakapu kára ane aporo hinamo suamo asekeasimo epo wakapuaka rakisiapo. Rakirakano ipi aporo hakása puramo aseraka eaki himu hakásaraka hemakapukua risiapo.

¹² Arirakano hokono kekea soraka Yasu soko, Yasumo ipi kaíya soko, ipi mamanea soko, ipi aporo hakása pura soko, i su pukua Kapaneame taonea pukua sere hukusimo waka risiapo.

Kotimo apea Yasu pusuaney oyapo.

Matiu 21:12-13; Maka 11:15-17; Ruki 19:45-46

¹³ Ape Farimaresa Hemakapuko Hokono Akera maiya ane makerakano, Yasu Yarusarame sitia hisiapo. ¹⁴ Hikia Kotimo ape ruru kakarua yorokoa aseane aporomo saro ponomakau soko, arirakano saro sipi soko, arirakano mena soko roporaka risikino asekea, aporo metakira teporoa toke mone sanasirakano asesapo. ¹⁵ Asekea Yasumo sako kita toane maka, kita pekea, kita amo aporo soko, namina saro ponomakau soko, saro sipi[†] soko, Kotimo apea karikia pesane tekatarikia pusimo rukuhoaesapo. Rukuhoaeraka aporomo mone sanasiraka toa amo teporoane maparitaeraka mone rukukoakataesapo. ¹⁶ Rukukoakataeraka aporo mena roporaka risiaki Yasumo someraka, "Mena ane mokoa pusie. Nómō Atamo ape one makata ropona ape mapariraka ayiakakopo."

* ^{2:4:} Amo kepoane oyapo. Nómō atamo ano pusiesamo aporo hinamo suaki tarikia rakiakosa maiya ane haru faserepesafapo. † ^{2:15:} Aporo hinamomo saro ponomakau soko, saro sipi soko, mena soko, rukua paikia Kotiaki kakasimo roposapo.

¹⁷ Airakano kaikia epo ipi aporo hakāsa puramo Kotimo sawia popasane hemakapusuapo. Popasane oyapo. “Kotio, nōmo apeane namo kakaro kotesa susuane nōmo hemaka apuramo fanaraka hemakapurakanapo.” Aiyaka popasane Yasumo ipi aporo hakāsa puramo hemakapusuapo. ^(Buk Song 69:9)

¹⁸ Arirakano Yu aporo sisimamo Yasuaki someraka, “Né epa asiamo arirakayiare? Né fanaraka reane isiapo aseako tarinie. Kotimo wakapumo hemakapukua rakirane nōmo rakinie.”

¹⁹ Airakano Yasumo someraka, “Kotimo ape one rakaritaeraka yape isia faraka efera hunia nōmo kikimakosapo.” ²⁰ Airakano ipu someraka, “Ape one kiraka risike keremisi foti sekese (46) faraka kikimasapo. Asiane mayiáka yape isia yiama nōmo ape one kikimakosare?” ²¹ Airakano Yasumo ipi homo apeane ipi kauane takumeaka ape kiakosane somesapo. ²² Aiyaka somesane Yasu ipi kukua turikia pusua maiya amo somesa kepoane ipi aporo hakāsa puramo hemakapusuapo. Maiya amo Kotimo sawia popasane soko Yasumo somesane soko kakimasapo. ²³ Arirakano Ape Farimaresa Hemakapuko Hokono Akera maiya amo Yasu Yarusarame sitia reke, Kotimo wakapumo hemakapukua rakirane epo rakisiapo. Rakirakano aporo hinamo yakaimo aseraka eaki himu hakásaraka hemakapusuapo. ²⁴ Arirakano aporomano himumo hemakapusuane‡ Yasumo aseraka epo iaki himu hakásaraka hemakapusuafapo. ²⁵ Aporomo hemakapusuane aporo metamo Yasuaki someaka tarisiafapo. Yasumo ipi yiama aporomo himuane asesapo.

3

Nikitímasemo Yasu rea somehoko pusuane oyapo.

¹ Yu aporo hakāsa meta yano motosa Nikitímasepo. Ipi Yu aporo sisima unihaeaka reane ipi Fereze aporopo. ² Ereamo Yasu rea e pekea someraka, “Tisao, Koti néyaki hakāsa reasasamo nōmo Kotimo wakapumo hemakapukua rakirane rakirakanapo. Asiamo tisaraka rakisimo Kotimo pusiesane népo. Aiyaka nōmo hemakapurakaripo.”

³ Airakano Yasumo someraka, “Nōmo kakaro somerakaripo. Aporo efera hunia makaweraka rekeanafonorakano, aporoane Kotimo unihaeaka asekea rekeakosafapo.”

⁴ Airakano Nikitímasemo someraka, “Aporo sisimane mayiáka efera hunia makaweraka takapeakosare? Hokosa pariraka kaýyamo tuanaka efera hunia takapeane siahoasi-fareapo.”

⁵ Airakano Yasumo someraka, “Ho Kotesamo aporoane hokono mareanafono, airakano hea tapukumareanafono asiane Kotimo unihaeaka asekea rea aporoakiyaki paohokosafapo. ⁶ Aporo hinamomo hokosa hokono marerane kau, kiki, maýya, hokono marerane kaumo mena ayapo. Arirakano aporo hinamo namina ho makawehoasimo, Ho Kotesamo mena ayapo. ⁷ Nōmo neaki someraka, ‘Re makaweraka risikianie,’ airakasane nōmo kaikia fofahokopo. ⁸ Arirakano atifo purakarakano senakimo hákasa kairapo. Himo aserafapo. Atifomo makata meta mahohorakano, himo aserapo. Atifo manaka perakanarakapo. Pekea ma purakanarakapo. Aira ayiáka aporo hinamomo himura Ho Kotesa rekerakano epo arakirane aporo metamo aserapo.”

⁹ Airakano Nikitímasemo someraka, “Nōmo somerakane mayiáka ayiakakosare? Ano himeteripo.” ¹⁰ Airakano Yasumo someraka, “Nikitímase, Isiraya aporomo tisane nepo. Kotimo sawia popasamo kepoane nōmo some karapo. Asiane nōmo some kepoane nōmo hemakapurakarifare? ¹¹ Hao, kaisie. Nōmo neaki kakaro somerakanapo. Isiapo makata kakaro hemakapusua hákasané somerapo. Arirakano isiapo* makata asesa hákasané somerapo. Somesa nine repo kakimararakarfapo.

‡ 2:24: Aporomanomo himumo hemakapusuane oyapo. Wate foaka seseraka keseke metakariakosane Yasumo aseraka iaki himu hakásaraka hemakapusuafapo. * 3:11: Isiapo ayiáka popasa amo kepoane oyapo. Koti soko, Yasu soko, Ho Kotesa soko, i suane ayapo.

¹² Hauaka wo makata rakirane nōmo somerakano repo kakimara fapo. Arirakano hepene yapura makata rakirane nōmo somerakano repo kakimakosare? Wae, kaki-makosafapo. ¹³ Asiamo hepene yapura makata rakirane aseako aporo meta hepene yapura hikia, hauaka wo somehoko pesafapo. Ano nī hákasa hepene aeyaka pekea, Aporomanomo Táke anoane hauaka wo somehoko pesapo.

¹⁴ Arirakano fana ima yaoa Mosesemo rete asiamo heseke pariraka rakikia ira maporaka heseke paremarea ayíáka, Aporomanomo Táke anoane ayíáka paremareakosapo.

¹⁵ Ano paremarerakano aporo hinamomo anoaki himu hakásaraka hemakapukua risiane yaiya risikiakosapo.” Áiyaka Yasumo somesapo.

¹⁶ Asiamo hauaka wo aporo hinamo su risiane Kotimo himu tumurumo hemakapusuasamo ipi hokosa hakásá yine pusiesapo. Pusierakano ipi hokosa pesapo. Perakano aporo hinamomo eaki himu hakásaraka hemakapukua risiane eyaki yaiya risikiakosapo. Iane hurupukusafapo. ¹⁷ Kotimo ipi hokosamo aporomano fanasihokosakipoko pusiesafapo. Aporomano mafasiakosakipoko pusiesapo. ¹⁸ Asiamo Kotimo hokosamo someane aporo hinamomo kakimarakano iane fanasihokosafapo. Arirakano Kotimo hokosamo someane kakimakanafonarakano, fanasihokosane fana yaiya murikimaka maresapo. Asiamo Kotimo ipi hokosa hakásá yiamo somesane kakimakanafonosasamo fanasihokosane fana yaiya murikimaka maresapo.

¹⁹⁻²⁰ Fanasihokosa kepoane oyapo. Faesa hauaka wo pesapo. Faesa pesane aporo hinamomo hisiraka namina watikiaka rakiako katosa yia risirapo. Aporo hinamomo namina watikiaka rakisiane aporo metamo aserapaka faesa á perafapo. Faesane kakaro hisiraka, faesa á risikiako perafapo. ²¹ Arirakano namo kakaro koteaka rakira aporo hinamoane faesa á risikiako perapo. Asiamo ipu Kotimo someane kairaka kekemaraka rakiraka risirane aporo suamo asekeasimo i faesa á rakiraka risirapo.

“Kotimo unihaeaka rekeasimo murikimasa aporoane Yasu reapo,” aíyaka Yonemo somesane oyapo.

²² Yasu ipi aporo hakásá purayaki Yutía hauaka pusuapo. Á pukua risike ipu aporo hinamo hea tapukumurisiapo. ²³ Arirakano Inone apeane Sarime taonea makeraka, he kára pekereakipoko aporo hinamo perakano iane Yonemo hea tapukumurisiapo.

²⁴ Yonemo hea tapukuamurisia maiya amo e tipura haru makesafapo.

²⁵ Arirakano Yu aporo hakásá metamo Yonemo ipi aporo hakásá pura metakiraki makata watikisa fahokosakipoko hea tapukumuriane tafatafaraka somesapo.

²⁶ Tafatafaraka somerakano Yonemo aporo hakásá pura suane Yone rea pekea someraka, “Tisao, he Yotane yaoraka ne rea takua aporo pesane hemakapurakarire? E† peakosa ikia karane maropohoko nōmo some karakasupo.” Airakano Yonemo, “Ao. Eane nōmo hemakapurakaripo.” Airakano ipu someraka, “Aporoamo aporo hinamo metakirane hea tapukumuriranapao. Asiamo aporo hinamo suamo né metakarikia e rea purakana-pakae.”

²⁷ Airakano Yonemo someraka, “Kotimo karakano hakásá yine aporomo marapo. Kotimo kakanafonarakano aporomo marafapo. ²⁸ Fana nōmo someraka, ‘Ano Keresofapo. Kereso peakosa ikia karane nōmo maropohokosakipoko ano fana pesapo.’ Aíyaka nōmo somerakasuane repo kaisiapo. ²⁹ Arirakano aporomo hinamo faisane aporo metamo arumarafapo. Hinamo faisane aporoamo ipi yiamo arumarapo. Hinamo arumakosa aporoamo somerakano ipi maemo kairaka sesenapo. Ipi mae sesena ayíáka ano kára seseraka rakiraka rekenapo. ³⁰ Yasu ipi káraraka hokopukua rekeakosapo. Ano wakasemaraka rekeakosapo.” Aíyaka Yonemo somesapo.

³¹ Arirakano aporo hepene yapunaka pesane ipi namo kakaro fanaraka rekenapo. Arirakano hauaka wo takapesa aporoane ipi hauaka menapo. Ipi hauaka wo makata rakirane somerapo. ³² Asiamo e hepene yapunaka pesasamo hepene yapura makata

† 3:26: E peakosapo, aíyaka popasa amo kepoane Yasupo. † 3:29: Yasumo some kakimara aporo hinamoane hinamo faisa ásiapo. Hinamo apia asíane Yasupo. Hinamo apiamo mae asíane Yonepo.

asesane soko, makata kaisiane soko, epo somerapo. Someane aporo metakiramo kakimakanafonorakano yia, epo makata asesane soko kaisiane soko yaiya somerapo. ³³ Arirakano aporo metakiramo epo somesane kakimaka risike someraka, “Ao, Kotimo someane kakarohoareapo,” airapo.

³⁴ Arirakano e Kotimo pusierakano pekea Kotimo someane some karakanapo. Ho Kotesa feteaka Kotimo eaki kasáfapo. Kára komarukua kasápo. ³⁵ Ata Káramo ipi hokosa ane himu tumurumo hemakapukua reke, ipi hokusamo makata su asekea rekeasimo murikimaka maresapo. ³⁶ Asiamo Kotimo ipi hokusamo somesane aporo hinamomo kakimarakano iane Kotiyaki yaiya risikikosapo. Kotimo hokusamo somesane koarenterakano iane Kotiyaki yaiya risikiakosafapo. Aporo hinamomo kakipayasaki Kotimo yaiya saperaka rekeakosapo.

4

Sameria hinamoaki Yasumo somesane oyapo.

Matiu 4:12; Maka 1:14; Ruki 4:14

¹⁻³ Aporo hinamoane Yasumo hea tapukumurisiafapo. Arirakano ipi aporo hakāsa puramo hea tapukumurisiapo. Aporo metakiramo asekea someraka, “Yasu patera asesa aporo hinamo yakaiane Yasumo ipi aporo hakāsa puramo hea tapuku amurire. Asiamo Yasu patera asesa aporo hinamoane yakairaka kárarakanapo. Arirakano Yonemo hea tapukumurisia aporo hinamoane hukusipo. Yasumo aporo hinamo hea tapukumurisia amo Yonemo aporo hinamo hea tapukumurisiane marokeane.” Aíyaka somerakano Fere se aporomo kaisiapo. Asiamo Yasumo hemakapuraka, “Nōmo makata rakirane aporomo somerakano Fere se aporomo kairakayiapo.” Aíyaka hemakapuraka Yasu Yutía hauaka metakarikia Kariri hauaka efera paripukusakipoko ⁴⁻⁵ pekea Sameria* hauaka tipia pauraka á reapo. Sameria hauaka tipia Saika taone á rekenapo. Saika taone makeraka hauaka ane Yakopemo ipi hokosa Yosefeaki wate fana tarisiapo.

⁶ Yakopemo he keasimo hauaka rasa á Yasu pukua kayapo. Maiya tipiamo ipi korakemo finiraka pesasamo ipi sosekenaraka kayapo. ⁷⁻⁸ Kayakipoko ipi aporo hakāsa puramo makata nakosa ropohoko taonea pusuapo. Pusuakipoko Yasu rea Sameria hinamo he takamako perakano Yasumo someraka, “Ano he takamakasie.”

⁹ Airakano Sameria hinamoamo hemakapuraka, “Yu aporo Sameria aporo tati hakāsa sarimanafapo. Yu aporomo Sameria aporoane arare, arirakano Sameria aporomo Yu aporo arare anafapo.” Aíyaka hemakapukua hinamoamo someraka, “Marirakano nōmo anoaki he takamakasie airakanare? Né Yu aporopo. Ano Sameria hinamopo. Marirakano nōmo né ararerakasimo somerakanare?” ¹⁰ Airakano Yasumo hinamoaki someraka, “Kotimo makata yaku karane soko, nōmo hemakapukua, arirakano nōmo anoane soko asekea, ereapo, aíyaka hemakapusua satiki, nōmo anoaki aíyaka somehoafunufapo. Nōmo neaki someraka, ‘Ano he takamakasie,’ airakano nōmo ano asekea hemakapusua satiki nōmo anoaki someraka, ‘Ano he takamakasie,’ aihoafunureapo. Airakano nōmo né he fuakataena kakafunupo.”

¹¹ Airakano hinamoamo someraka, “Hauaka rasa kutusasamo takamakosane nōmo petoro fareapo. He fuafuana mayíáka takamakosare? ¹² Isiapo makasa kaua kekema Yakopemo hauaka one rasapo. Wate fana epo soko ipi hokusamo soko ipi saro sipimo soko hauaka rasa he kesa hákasane nesapo. Yakope kurakano epo hauakane soko he rasane soko isiapo asekea risikinapo. Hauaka wafaya makasa kaua kekema Yakopeane aporo wakasemare? Nōmo he haku fuakataena kakaro kotesa kakakosaporakane ne ní hákasane aporo fanarakanare? Yakopeane makamakesekerakanare?”

¹³ Airakano Yasumo someraka, “Hauaka rasa he kesane aporo hinamomo nesane efera hunia soko ‘He nariripo,’ aihokosapo. ¹⁴ Nōmo he takamaka karakano aporo hinamomo

* ^{4:4-5:} Yutía hauaka soko Kariri hauaka soko Yu aporomo hauakapo. Arirakano Sameria aporo hinamoane hapokase aporo hinamopo. Hapokasesane Yu aporomo Yu hinamohoanafonosa arumasapo. Yu aporohoanafonosamo Yu hinamo arumasapo.

nenaka efera hunia, ‘He nariripo,’ aihokosafapo. Nōmo he akarane he fuafuana ayiáka ne tua fuafuahokosapo. Asiamo né yaiya rekeakosapo.”

¹⁵ Airakano hinamoamo someraka, “Aporo fanao, he fuafuanane anoaki makasie. Makarakáno efera hunia, “He nariripo,” aihokosafapo. Arirakano efera hunia nōmo takamako peakosafapo.” ¹⁶ Airakano Yasumo someraka, “Ní makapinu pasimaka peanie.” ¹⁷ Airakano hinamoamo someraka, “Nōmo aporo rekenafapo.” Airakano Yasumo someraka, “Kakarorakae. ¹⁸ Aporo kakorea sumo ne arumasapo. Asiane yumo ne aporoyaki kake, ne kakaro aporomo arumasafapo. Ne mokome aporoyaki purareapo.”

¹⁹ Airakano hinamoamo someraka, “Aporo fanao, nōmo ainane nōmo hemakapukua somesasamo né porofete apororeapo. ²⁰ Repo Yu aporomo someraka, ‘Yarusarame sitia Kotiaki kekerehoanie.’ Aiyaka repo somesa nine, isiapo makasa kaua kekema Sameria hauaka ūria hikia a ipu Kotiaki kekeresapo.”

²¹ Airakano Yasumo someraka, “Keseke fasereapera sereamo Ata Káraki kekerenane Sameria hauaka ūria soko, Yarusarame sitia soko tetá hákasa aeyaka hákasa kekerehokosafapo. Hauaka su aeyaka kekerehokosapo. ²² E kekeresane repo Sameria aporo hinamomo kakaro koteaka hemakapurakanafapo. Mafasira aporo hauaka wo takapeasimo Yu aporo irane Kotimo murikimarakano, Yu aporo ira aeyaka hauaka wo takapesapo. Yu aporo ira aeyaka takapesasamo e kekeresane isiapo Yu aporomo hemakapurakanapo. ²³ Arirakano keseke soko yumo soko aporo hinamomo kaumo hemakapukua kekerenafaraka himumo Kotiaki kakaro koteaka hemakapukua kekerehokosapo. Aporo hinamomo homo soko kekerehokosapo. Kakaro hemakapukua kekerena aporo hinamoane Kotimo sesenapo. ²⁴ Kotiane ipi hopo. Hosasamo e kekerena aporo hinamomo homo kekerenapo. Himumo soko kakaro koteaka hemakapukua kekerenapo.”

²⁵ Airakano hinamoamo someraka, “Kotimo unihaeaka rekeasimo murikimasa aporo Keresoane peakosapo. Aiyaka nōmo hemakapurakaripo. E peraka makata suane isuaki somehokosapo.” ²⁶ Airakano Yasumo someraka, “Nōmo somerakane, anopo. Nōmo someraka yiamo neaki somerakanapo.” Aisapo.

²⁷ Arirakano Yasumo aporo hakāsa pura popariperaka aseane Yasumo hinamoaki somerakano asekea, fofaraka makata meta somesafapo. “Marirakano hinamoaki somerakanare? Makata yakapa makasierakanare?” Aiyaka soko ipu somesafapo. ²⁸ Arirakano hinamoamo ipi petoroane metakarikia, apea foaka paripukua aporo hinamoaki someraka, ²⁹ “Nōmo fana kake makata su rakisiane aporoamo anoaki somerakasapo. Fana epo ano asekeanafonosa nine nōmo aina suane somerakasapo. E aseako peae. Keresoane erakapo.”

³⁰ Airakano aporo hinamomo namina ape metakarikia Yasu rea aseako pesapo. Ikia kara peraka arisiamo ³¹ Yasumo aporo hakāsa puramo eaki someraka, “Tisao, makata nesie.” ³² Airakano Yasumo someraka, “Nōmo makata nenane repo hemakapurakarifapo.” ³³ Airakano aporo hakāsa puramo namina yia someraka, “Aporo metamo makata nakosa maka pekea eaki karakasare?”

³⁴ Airakano Yasumo someraka, “Epo ano pusiesamo epo hemakapusuane nōmo kekemaraka, ipi makata rakirane nōmo rakikia marakano nōmo makata nena asiane ayapo. ³⁵ Arirakano repo someraka, ‘Ere maiya kitafasu faraka witi hae susekeno tumokoakosapo.’ Airakano nōmo someraka, Hemoane asesie. Witi hae tumokoasimo yumo surareapo. ³⁶ Witi hae tumora aporomo makata ropo yumo morakanapo. Witi hae tumora ayiáka aporo Yasuyaki yaiya risikiasimo pasimorakanapo. Witi hae potena[†] aporo soko, arirakano witi hae tumora aporo soko, tetá tatī sesehokosapo. ³⁷ Fana aporo metamo someraka, ‘Aporo metakiramo makata mano potenapo. Arirakano aporo metakiramo tumorapo.’ Aiyaka somesane kakaro somehoareapo. ³⁸ Arirakano aporo

[†] 4:36: Witi hae potena ayiáka fana aporomo Kotimo someane some kasá ayapo. Witi hae tumora ayiáka aporomo Kotimo someane keseke akearane aporo hinamomo kakimaka risikiako parirakano pasiamora ayapo.

metakiramo makata mano poteraka aseke a nina, makata mano potesane taneheheraka hemoa wate pesane repo tumokoako nōmo pusierakanapo. Aporo metakiramo wafororaka rakisia nine wate pesane repo tumorakanapo.”

³⁹ Aíyaka Yasumo ipi aporo hakāsa puraki takumeaka someraka reakipoko hinamo amo ipi apea someraka, “Ano fana kake makata su rakisiane anoaki somerakasapo.” Aisasamo Sameria aporo hinamo yakaimo Yasuaki himu hakásaraka hemakapusuapo. ⁴⁰ Ipu namina ape metakarikia Yasu rea pekea someraka, “Ne isiapo apea waka rekeako peae.” Airakano Yasu ipu apea pukua iyaki yape tetá waka reapo.

⁴¹ Waka reke epo some karakano aporo yakai metakiramo soko epo somesane kakimasapo. ⁴² Kakimaraka hinamoaki ipu someraka, “Nómo somesa hákasa kaikia eaki himu hakásaraka hemakapuraka asiafapo. Yasumo ipi soko somerakano kaikia isiapo eaki himu hakásaraka hemakapurakanapo. Epo aporo hinamo su mafasiako apere, aíyaka isiapo hemakapurakaripo,” aíyaka ipu somesapo.

Kamania makata rakisia aporomo hokosa Yasumo mafasane oyapo.

⁴³ Sere tetá faraka, aporo hinamo ipu ape Saika apeane Yasumo metakarikia Kariri hauaka á pusuapo. ⁴⁴ Pukua Yasumo iaki someraka, “Kotimo some kará porofete aporomo ipi ape sumu aporo hakāsa risia amo soko, ipi ape wará aporo hakāsa risia amo soko, eane makama fananafapo,” aisapo. ⁴⁵ Asia nine e Kariri hauaka perakano aseke a Kariri aporomo e teresapo. Fana Ape Farimaresa Hemakapuko Hokono Akera maiya amo i namina Yarusarame sitia hikia aseane Yasumo makata su rakirakano asesapo. Asesasamo Yasuaki teresapo.

⁴⁶ Arirakano Kariri hauaka á Kena taonea Yasu paripusuapo. Fana Kena taonea epo namo heane waene he maparisapo. Arirakano Kena taonea kamania makata rakisia aporo Kapaneame taone aeyaka kimisi pesapo. Ipi apea ipi hokosa makata takamasa warekeno metakarikia Kena taonea kimisi pesapo. ⁴⁷ Kimisi pekea rea maiya amo kaiyiáne, Yasu Yutía hauakane metakarikia Kariri hauaka wo pesapakano kaikia, e Yasu rea pekea someraka, “Nómo aporo hokosa kára makata takamasa kukusipo. Hokosane mafahoko Kapaneame taonea peae.” ⁴⁸ Airakano Yasumo someraka, “Kotimo wakapumo hemakapukua rakira asekeanafonorakano repo anoaki himu hakásaraka hemakapukusafapo.” ⁴⁹ Airakano kamania makata rakisia aporoamo someraka, “Aporo fanao, nōmo hokosa kukukohoamo nōmo apea peae.”

⁵⁰ Airakano Yasumo someraka, “Né pusie. Nómo hokosa koteaka rekenapo.” Airakano someane kamani aporoamo kakimaka ipi apea pukua ⁵¹ ikia kara peane, ipi aporo raipamo e sapenekea someraka, “Ní hokosa fasapo. Koteaka rekenapo.” ⁵² Airakano kamania makata rakisia aporoamo someraka, “Fasane masinaka fasare?” Airakano ipu someraka, “Rau samapu wane korokomo ipi kau sisipusane fasapo.”

⁵³ Airakano hokosamo ipi atamo hemakapuraka, “Rau samapu wane korokomo Yasumo someraka, ‘Ní hokosa koteaka rekenapo.’ Aisa maiya amo kau sisipusane fahoareapo.” Aíyaka hemakapukua ipi soko ipi aseamo soko, ipi hokosamo soko, ipu namina suamo Yasuaki himu hakásaraka hemakapukua risiapo.

⁵⁴ Asiamo Yasu Yutía hauaka metakarikia Kariri hauaka paripesa maiya amo, hokosa mafasa ane Kotimo wakapumo hemakapukua rakira yape tetáne ayapo.

5

He kafa he fea aporo hakásá meta makata takamasa Yasumo mafasane oyapo.

¹ Wakasema nina Yu aporomo Kotiaki kekerehoko hokono kesapo. Hokono akera maiya amo Yasu Yarusarame sitia hisiapo. ² Yarusarame sitia ekemo rurusane ikia koro yakai otoro mosapo. Ikia koro hakásá metane yano motosa Saro Sipi Ikia Koropo. Arirakano ikia koroane makeraka he kafa kesapo. Yu aporomo Hipuru meaka he kafa ane yano motosa Petésata yano motosapo. He kafa he fea ape mano kakoreasu kisiakipoko á aporo yakai makata tasa warisiapo. ³ Warisiane aporo metakira hi fausa soko, aporo metakira kakuna masa soko, aporo metakira korosakataesa soko i warisike,

hea makakayahoasimo warisiapo. ⁴ [Warisike aseane Unihaemo hepene aporo pekea he kafa makakayarakano, aporo makata tasa warisiane hakása meta fana pukua, he kakayarakano he tapuane ipi makata takamasane farakano anapo.]

⁵ Airakipoko aporo hakása meta keremisi teti aitimo (38) makata takamasa reke, ape manoa warekeno, ⁶ Yasumo asekea hemakapuraka, “Aporoane maiya káramo makata takamasa wareareapo.” Aíyaka hemakapukua Yasumo aporoaki someraka, “Ne makata takamasane fahoasimo hemakapurakarire?”

⁷ Airakano aporoamo someraka, “He kakaya ana maiya amo ano hea pukusakipoko asiane, aporo metamo ano hea maka pusuafapo. Ano maka punafonorakano kakape puraka reakipoko, aporo meta fana pukua hea tapusesapo.”

⁸ Airakano Yasumo someraka, “Ne takahisie. Ní asakapu maweroraka maka pusie.” ⁹ Aihoanine aporoane wate faraka takahikia ipi asakapuane maweroraka maka pusuapo. ¹⁰ Fenena maiya amo aporoamo asakapu maka purakano, Yu aporo sisima unihae suamo aporo makata takamasa mafasaki someraka, “Pipu fenena maiyapo. Fenena maiya amo asakapu maka pukupo. Aíyaka fana somemane motosusupo.”

¹¹ Airakano aporoamo someraka “Aporo ano mafasa amo someraka, ‘Ní asakapu maka pusie,’ airakasapo.” ¹² Airakano ipu someraka, “Asakapu maka pusiesane aporo epamo aíyaka somerakasare?”

¹³ Airakano aporo hinamo yakai sarimasakipoko Yasu kokororaka pusuapo. Pusuakipoko aporo makata takamasa mafasamo someraka, “Aporoane eparakapo. Ano himeteripo. E pureapo,” aisapo. ¹⁴ Aíyaka wakasema nina Yasu Kotimo apea koraka reke, epo aporo mafasane aseraka someraka, “Ní makata takamasane farareapo. Makata watikisa rakirane efera hunia rakiakopo. Makata takamasa káranapaka makata watikisane kakaro metakarinie.”

¹⁵ Airakano aporoane pukua Yu aporo sisima suaki someraka, “Yasumo ano mafasapo.” ¹⁶ Airakano ipu hemakapuraka fenena maiya amo Yasumo aporo makata tasane mafasapo. Aíyaka hemakapusuasamo ipu Yasuane mokoatikisapo. Yasumo fenena maiya amo rakisiasamo ipu Yasuane hukurusuapo. ¹⁷ Ipu hukururakano Yasumo someraka, “Maiya suamo nōmo Atamo rakiraka rekenapo. Nōmo soko rakiraka rekenapo.” ¹⁸ Aíyaka somerakano Yu aporo sisima suamo, “Yasu rusua kukusapo,” aíyaka hemakapusuapo. Fenena maiya yaposane Yasumo metakarikia, arirakano epo someraka, “Kotiane nōmo Atapo.” Aíyaka Yasumo ipi yia máfaraka, ano Koti asiapo airakae. Airakasakipoko Yasuane rusua kukusapo, aíyaka Yu aporo sisima suamo hemakapusuapo.

Yasumo someraka, “Ano Kotimo hokosapo,” aisane oyapo.

¹⁹ Yu aporo sisima suamo Yasuaki hukururakano Yasumo iaki some paripuraka, “Nōmo reaki kakaro somerakaripo. Ano Kotimo hokosasamo, nōmo nī hemakapusua aeyaka rakirafapo. Nōmo Atamo rakirane asekea hakása yineraka rakirapo. Nōmo Atamo rakira ayíáka, nōmo soko hakása yineraka rakirakanapo. ²⁰ Atamo himu tumurumo anoane hemakapukua epo ipi makata rakira suane anoaki tarirakanapo. Tarisiane marokeraka makata kára meta tariakosapo. Tarirakano nōmo makata kárane rakiakosapo. Rakirakano repo asekea someraka, ‘Uao, itifisiafapo,’ aihokosapo. ²¹ Arirakano Atamo aporo kusua maturikia taeraka yaiya rerane akara ayíáka, nōmo soko ayíáka yaiya rera kakakosapo. Nōmo nī hemakapusua aporo murikimasaki yaiya rerane kakakosapo.

²² Arirakano Atamo aporo hinamoane fanasihoko hukururafapo. Epo ipi hokosa anoaki someraka, ‘Aporo hinamo fanasihokosane nōmo hukurunie,’ aisapo. ²³ Aisasamo aporomo Koti makárana ayíáka Kotimo ipi hokosa makárahoasimo, ‘Nōmo hukurunie,’ aíyaka Kotimo ipi hokosane murikimaka maresapo. Aporomo Kotimo hokosane makárahoanafonorakano, hokosa pusiesa amo ipi Ata Kotiane soko makáranafapo.

²⁴ Hao, kaisie. Nōmo reaki kakaro somerakaripo. Nōmo somesane aporo hinamomo kakimaka, arirakano ano pusiesa aki himu hakásaraka hemakapukua risira aporo hinamoane yaiya risike fahokosafapo. Iane hukurukua fanasihokosafapo. Kura faraka

farearaka rera takua risikiakosapo. ²⁵ Hao, kaisie. Nōmo kakaro somerakaripo. Aporo hinamomo Kotiaki himu hakásaraka hemakapunafonosane kusua ayíáka risikinapo. Aporo hinamo kusua ayíáka risia amo nōmo meane kaikia kekemarakano, keseke maturikia taena maiya amo i yaiya risikiakosapo. ²⁶ Yaiya rera kepoane nōmo Atapo. Nōmo Atamo yaiya rerane ipi hokosa anoaki kasapo. Kasasamo yaiya rera kepoane ano sokopo. ²⁷ Aporomanomo Tákeane anopo. Asiasamo hukuarura maiya amo aporomanoane parakuhoasimo Atamo ipi hokosa ano murikimaka maresapo. ²⁸ Fofahokopo. Keseke aporo hinamo su kusua hauaka murisia amo soko, nena yaoa kukua kesa amo soko, ipu suamo nōmo meane kaikia, ²⁹ hauaka murisiane metakarikia turikia tariakosapo. Aporo hinamo hitaferaka risia maiya amo koteaka risia aporo hinamoane turikia tarirakanano iaki nōmo someraka, ‘Anoyaki yaiya risie,’ aihokosapo. Arirakano aporo hinamo hitaferaka risia maiya amo watikiaka rakiraka risia aporo hinamoane turikia tarirakanano iaki nōmo someraka, ‘Reane fanasinane nōmo motorakanapo,’ aihokosapo.” Aíyaka Yasumo somesapo.

“Yasu ipi Kotimo hokosapo.” Aíyaka repo hemakapusimo tarisiane oyapo.

³⁰ Arirakano Yasumo someraka, “Nōmo nī hemakapusuane nōmo kekemarakaka rakirafapo. Kotimo, ‘Ayiáka hukurunie,’ airakano nōmo ayíáka hukururapo. Epo ano pusiesamo epo hemakapusua ayíáka nōmo soko ayíáka hemakapukua rakirapo. Nōmo hemakapusua ane makama kesekenapo. Asiasamo nōmo koteaka ereketaeraka hukurukua maroponapo. ³¹ Nōmo nī ainane nōmo nī yiamo somehoane siahoasifareapo. Nōmo nī ainane nōmo nī hákasa somerakanano repo kotaferakae, aihokosapo. ³² Arirakano Koti ipi wakinisi meta reke, nōmo ainane somehokosapo. Nōmo ainane Kotimo somerakanano epo kakaro somerapo, aíyaka nōmo hemakapurakanapo.

³³ Fana Yu aporo sisíma répo aporo metakiraki someraka, ‘Yonemo some kepoane kaiyako pusie.’ Airakano Yone rea ipu kaiyako pusuapo. Pukua Yone rea perakano Yonemo anoane kakaro somesapo. ³⁴ Yonemo somesane nōmo kaiyisimo Yonemo some-safapo. Repo kaiyisimo Yonemo somesapo. Asiamo re mafasiakosakipoko nōmo reaki mahemakapurukua somerakanapo. ³⁵ Arirakano nafa faena ayíáka, Yonemo maropohoko pekea some kasámo, nafa faena ayíáka faesapo. Faesa á re maiya wakasemamo risike epo somesane seseaka kaisiapo.

³⁶ Arirakano nōmo makata ayianamo Yonemo somesane marokerakanapo. Asiamo nōmo atamo rakiniesane nōmo wakapuaka rakirakanano repo asekeea hemakapuraka, ‘E Kotimo pusiehoareapo.’ Aíyaka repo hemakapusimo rakirakanapo. Arakiramo Kotimo ano pusiesane reaki tarirakanapo.

³⁷ Arirakano Kotimo soko nōmo ainane asekeea tarirakanapo. Epo ipi ano pusiesamo nōmo ainane somerakanapo. Somerakanano ipi meane repo kairakarifapo. Ipi hikumisiane repo aserakarifapo. ³⁸ Epo pusierakanano pesa aporoaki repo himu hakásaraka hemakapurakarifapo. Hemakapunafonoraka epo pusiesamo someane soko repo hemakapurakarifapo. ³⁹ Yaiya risikiakosakipoko repo Kotimo sawia popasane kokoa menoanane. Kotimo sawia popasa amo anoane tarikia somerakanapo. ⁴⁰ Somerakanano yia yaiya risikiakosakipoko ano rea re perakarifapo. ⁴¹⁻⁴² Repo himuane nōmo aserakaripo. Aseane repo Kotiaki himu tumurumo hemakapunafonorakanano aserakaripo. Asiamo repo ano makáraraka soko metao, mawakasemarakaka soko metao, ane nenakamaka makata asiapo. ⁴³ Arirakano nōmo atamo hemakapusuane nōmo kekemarakaka, ipi yano motosa aeyaka ano pesapo. Ano pesane repo patera atarire. Arirakano aporo metamo epo ipi hemakapusua rupiaka rakipe peraka, epo ipi yano motosa máfarakanano eaki repo patera asere. ⁴⁴ Aporomo re asekeea someraka, ‘Aporoane kotesapo,’ aihoasimo repo namina yia kaumo arakire. Arirakano Kotimo re aseraka, ‘Aporoane kotesapo,’ aihoasimo repo rakirafapo. Rakianafonorakanano Kotimo someane soko repo kakimakasifareapo. Koti ipi hákasapo. Koti meta rekenafapo.

⁴⁵⁻⁴⁷ Repo someraka, ‘Isiapo Mosesemo somemaneane kekemarakaka risikino Kotimo isu pasimokoakosapo.’ Aíyaka hemakapurane kotafe hemakapurakanapo. Fana Mosesemo

anoane popasapo.* Popasane repo kakimasa satiki, nōmo someane soko kakimaka-funureapo. Epo someane repo kakaro kakimakanafonosasamo nōmo someane soko kakimakosafapo. Epo someane kakimakanafonosakipoko epo re pasimokoa Kotiaki hukurukusapo. Nōmo re pasimokoa Ataki hukurukusafapo.” Aíyaka Yasumo somesapo.

6

Aporo fae taoseneaki (5,000) Yasumo farawa kasane oyapo.

Matiu 14:13-21; Maka 6:30-44; Ruki 9:10-17

¹⁻⁴ Ape Farimaresa Hemakapuko Hokono Keakosa maiyane makerakano, Yasu paripukua, he Kariri teraporaka taku ra pusuapo. He Kariri ane yano motosa meta he Taipiriasepo. Aporo hinamo makata tasane Yasumo mafarakano aporo hinamo yakaimo asesasamo Yasu patera kekemarape perakano, Yasu ūria hikia ipi aporo hakāsa purayaki toke ⁵ aseane, aporo hinamo yakai perakano asekea Firipiaki Yasumo someraka, “Aporo hinamo suamo makata nakosane isiapo ma ropohokosare?” ⁶ Aíyaka Firipiane kau aseakosakipoko Yasumo somesapo. Asiamo Yasumo ipi ayiakakosane hemakapukua reke Firipiaki kaisiapo.

⁷ Kairakano Firipimo someraka, “Aporo hinamo yakaisakipoko ipu suamo feteaka nasimo mone tu harote kinamo (K200)* ropohoasifareapo.” ⁸ Airakano aporo hakāsa pura hakāsa meta Saemone Pitamo mamanea Enitumo someraka, ⁹ “Aporo hokosa metamo farawa parosane kakoreasu, arirakano pokoa tetá ayiáka atoae. Asiamo aporo yakaisakipoko sia nasifareapo.”

¹⁰ Airakano Yasumo aporo hakāsa puraki someraka, “Aporo hinamo su toaesie.” Airakano asane sususakipoko a toapo. Aporo á toa susuane menosane fae taosene (5,000) ayiáka menosapo.† ¹¹ Arirakano Yasumo farawa maka Kotiaki suseaka kurikuriraka rumaraka aporo toaki kasiesapo. Pokoa soko maka suseaka kurikuriraka rumaraka aporo toaki kasiesapo. Kasierakano aporo hakāsa puramo kasapo. Karakano aporo suamo siaraka nesapo. ¹² Siaraka nenakano aporo hakāsa puraki Yasumo someraka, “Farawa nekea siarakan metakira yia tokeno mosie. Nenakamaka yaoa mokoate-hokopo.” ¹³ Airakano i pukua farawa yia tokeno mokoa, mate keno sua kekeia komarukua taesapo. ¹⁴ Arirakano farawa hukusi kakorea suane Yasumo makáraraka ayiáka, Kotimo wakapumo hemakapukua rakirane rakirakano aporomo asekea someraka, “Porofete aporo kára hauaka wo peakosaposane ereapo.”

¹⁵ Airakano Yasumo hemakapuraka, “Aporo suamo anoane maka Rome kamani aporoane marokeraka unihaeaka asekea rekeasimo mareakosakipoko hemaka apure.” Aíyaka Yasumo hemakapukua ipu ayiakakohoamo ipi haku ūria hisiapo.

Yasu he kima finirape pusuane oyapo.

Matiu 14:22-33; Maka 6:45-52

¹⁶ Samapu maiya tuakeramo aporo hakāsa pura he Kariria pukua, ¹⁷ kasu ripaka Kapaneame taone taku ra poparipukusakipoko, kasu rokoa puraka risiapo. Kasu rokoa puraka risikiyia yao eresapo. Ereamo Yasu peanafonorakano kasu rokoa puraka risiapo.

¹⁸ Rokoa puraka risike atifo he kupayaki kára pesapo.

¹⁹ Perakano he numu tipia rokoa puraka risike aseane kasu erekeraka Yasu he kima finirape perakano asekea, i kara namoraka himu fasapo. ²⁰ Himu farakano Yasumo someraka, “Anopo. Namohokopo.” ²¹ Airakano ipu someraka, “Ao, kasua ripasie.” Airakano Yasu kasua parorakano aseane kasuane he fe taku ra foakayia paurakano asesapo.

“Yasu masiarakapo.” Aíyaka kosane oyapo.

* 5:45-47: Kotimo sawia Mosesemo popasane oyapo. Stat, arirakano Kisim Bek, arirakano Wok Pris, arirakano Namba, arirakano Lo, sawi kakorea suane Mosesemo popasapo. * 6:7: Isiraya aporomo mone hae yano motosa tanariasepo. Asiāne isiapo hemakapusakipoko kina popasapo. † 6:10: Arirakano hinamo soko, hokosa soko, metakira menohoaanafonosa amo farawane soko, pokoane soko, sia nesapo.

²² Mituru fiarakano aporo hinamo yia popariraka risiamo hemakapuraka, “Kasu hakāsa humaresa Yasumo aporo hakāsa pura ripaka pusuapo, Yasu iyaki hakāsa ripaka pusuafapo. Yasu masiarakapo.” Aiyaka hemakapukua ²³ aseane kasu metakira Taipiriase taone aeyaka pekea karimaresane asesapo. Arirakano Unihae Yasumo farawa soko, pokoa soko, Kotiaki suseaka someaka, makata siaraka nesa hauaka ane makeraka kasu metakirane karimarerakano asesapo. ²⁴ Arirakano ipu Yasu soko Yasumo aporo hakāsa purane soko koane fasekeno asekeea, kasu karimaresa á i ripaka, ipu Yasu kope Kapaneame taone taku ra rokua pusuapo.

“Yaiya rekeakosa makata nenane anopo.” Aiyaka Yasumo takumeaka somesane oyapo.

²⁵ Arirakano aporoamo kasu rokua pukua taku ra pauraka ipu Yasuane kokoa aseraka someraka, “Tisao, ne masinaka pesare?” ²⁶ Airakano Yasumo someraka, “Nōmo kakaro somerakaripo. Repo farawa siaraka nesakipoko repo ano kope apere. Nōmo Kotimo wakapumo hemakapukua rakirane rakirakano repo asekeea hemakapukua kope perakayi-afareapo. ²⁷ Hauaka wo makata nenane torehokosapo. Makata akipoko rakiakopo. Re yaiya rera makata nena makosakipoko rakinie. Makata nenane nōmo reaki kakákoripo. Aporomanomo Tákeane anopo. Yaiya rera makata nenane reaki kakákoripo. Kakasimo nōmo Ata Koti ipi yiamo ano murikimaka maresapo.”

²⁸ Airakano ipu someraka, “Kotimo makata rakirane isiaipo yakapa rakiaere? Kotimo makata yakapa sesenare?” ²⁹ Airakano Yasumo someraka, “Kotimo makata rakira sesenane oyapo. Kotimo e pusierakano pesa aporoaki himu hakásaraka hemakapukua risikianie.” ³⁰ Airakano ipu someraka, “Isiaipo neaki himu hakásaraka risikiako, nōmo Kotimo wakapumo hemakapukua rakirane nōmo rakikitakae. Isiaipo neaki hemakapusimo nōmo makata yakapa wakapuaka rakiakosare?”

³¹ Wate fana ima yaoa makata nakosa hurupeperakano isiaipo makasa kamumamo nesapo. Kotimo sawia poparaka, ‘Hepene yapunaka epo makata nakosa kasapo.’ Aiyaka popasane isiaipo menosapo. Mosesemo[‡] makata rakisia ayíaka nōmo rakiasireare?” (*Kisim Bek 16:4; Buk Song 78:24*)

³² Airakano Yasumo someraka, “Nōmo kakaro somerakaripo. Hepene yapunaka makata nená kasáne Mosesemo kasafapo. Arirakano yumo hepene yapunaka kakaro makata nenane[§] nōmo Atamo karápo. ³³ Asiamo Kotimo kakaro makata nena karáne e hepene yapunaka perakano hauaka wo aporo hinamo suaki yaiya rerane karápo.”

³⁴ Airakano ipu someraka, “Aporo fanao, makata nenane isuaki yaiya karáka rekeanie.” ³⁵ Airakano Yasumo someraka, “Kakaro yaiya rekeakosa makata nenane anopo. Anoaki himu hakásaraka hemakapukua risike, hunia ‘meamoripo,’ aihokosafapo. Nōmo someane kakimaka risike, ‘he nariripo,’ aihokosafapo. ³⁶ Repo ano aseraka, asekeea ayíaka repo anoaki himu hakásaraka hemakapurakarifapo. Hemakapunafonorakano nōmo reaki someraka ayapo. ³⁷ Aporo hinamo nōmo Atamo anoaki karakano, i ano rea peakosapo. Perakano iaki nōmo peakopo aihokosafapo.

³⁸ Nōmo nī hemakapusua rakiako pesafapo. Nōmo Atamo ano pusiesamo hemakapusuane nōmo rakiako pesapo. ³⁹ Nōmo Atamo ano pusiesapo. Epo hemakapusuane oyapo. Aporo hinamo epo anoaki kasáne, hakāsa soko hasaka koakohoamo, suane nōmo metakariakosafapo. Fa ana sere amo iane nōmo maturikia taehoasimo, aiyaka Kotimo hemakapukua someaka maresapo.

⁴⁰ Asiamo nōmo Atamo hemakapusuane oyapo. Aporo hinamo metakiramo Kotimo hokosa anoane aseraka someraka, ‘E Kotimo hokosapo,’ aiyaka someraka, ipu Kotimo hokosa anoaki himu hakásaraka hemakapukua risikino, yaiya rerane mokoakosapo. Asiamo fa ana sere amo iane nōmo maturikia taehokosapo.” Aiyaka Yasumo somesapo.

⁴¹ Aiyaka somerakano Yu aporo sisima suamo kaikia mahisisapo. Arirakano Yasumo someraka, “Hepene yapunaka pesa makata nenane anopo,” aisane ipu kaikia mahisisapo.

[‡] 6:31: Aporoamo Mosesane makárasapo. [§] 6:32: Yasumo ipiyine takumeaka makata nenane somesapo.

Mahisiraka someraka,⁴² “Aporo ane Yasupo. Ipi Yosefemo hokosapo. Ipi wafaya ipi kaīya isiapo aserapo. Mayíáka hepene yapunaka pesaporakanare?”

⁴³ Airakano Yasumo someraka, “Repo namina susu hisiraka somehokopo. ⁴⁴ Aporomo hemakapuraka, ‘Nōmo Yasuaki himu hakásaraka hemakapukua rekeakosapo,’ aíyaka hemakapura ane nōmo Atamo eaki karakáno, aporoamo ano patera aseakosapo. Patera aserakano fa ana sere amo aporoane nōmo maturikia taehokosapo. Arirakano aporomo anoaki himu hakásaraka hemakapurane nōmo Atamo aporoaki kakanafonorakano aporoamo ano patera aseakosafapo.

⁴⁵ Arirakano porofete aporo suamo poparaka, ‘Aporo suamo enomakasimo Kotimo tarirapo,’ aíyaka popahoareapo. Asiamo Atamo someane aporo hinamomo kakimaka, anoaki risikiako pariraka, anoaki himu hakásaraka hemakapukua risikiakosapo. (*Aisia 54:13*)

⁴⁶ Arirakano Kotimo hauaka aeyaka pesa aporo hákasamo Ata ane asesapo. Aporo metamo Ata ane asesafapo. ⁴⁷ Nōmo kakaro somerakaripo. Kakimara aporo hinamoane Kotiyaki yaiya risikiakosapo. ⁴⁸ Yaiya rera makata nenane anopo. ⁴⁹ Wate fana ima yaoa makata nenane repo makasa kaua kekemamo nenaka, wakasema risina, keseke kukua kesapo.

⁵⁰ Hepene yapunaka makata nená pesane repo maka nenakano yaiya risikiakosapo. ⁵¹ Yaiya rera makata nená hepene yapunaka pesane anopo. Makata nena ane aporo hinamomo nenakano yaiya risikiakosapo. Aporo hinamo su yaiya risikiasimo makata nená kakakosane ano kaupo.” ⁵² Airakano Yu aporo sisima suamo kairaka saperaka tafatafaraka someraka, “Isiapo nasimo epo kau isuaki mayíáka kakakosare?” ⁵³ Airakano Yasumo iaki someraka, “Nōmo reaki kakaro somerakaripo. Ano Aporomanomo Táke reke, ano kau ano yapi repo nanafonorakano yaiya rerane re tua kepomaresafapo. ⁵⁴ Ano kau, ano yapi, aporomo nenaka, yaiya rerane re tua kepo amarera ayapo. Fa ana sere amo nōmo re maturikia taerakano yaiya risikiakosapo.

⁵⁵ Makata nena kepoane ano kaupo. He nena kepoane ano yapi. ⁵⁶ Ano kau soko, ano yapi soko nenakano, né ano tua rekenapo. Ano soko né tua rekenapo. ⁵⁷ Atamo ano pusierakano pekea, epo wakapua nōmo kataka marekea rekenapo. Asiamo repo soko anoane nenakano nōmo wakapua repo kataka marekea risikinapo.

⁵⁸ Kakaro makata nená hepene yapunaka pesane anopo. Aporo hinamomo nenakano Kotiyaki yaiya risikiakosapo. Arirakano makata nená isiapo makasa kaua kekemamo nesane hakásia yiayafapo. Makata ane ipu nekea risina kusuapo. Asiane hepene yapunaka pesa makata nená ane nenakano Kotiyaki yaiya risikiakosapo.” ⁵⁹ Aíyaka Kapaneame Yu aporomo sarimana apea Yasumo somesapo.

Yaiya rekeasimo Yasumo somesane oyapo.

⁶⁰ Arirakano Yasumo somerakano ipi patera asesa aporo metakiramo kaikia someraka, “Someane umihoareapo. Mayíáka kakimakosare?” ⁶¹ Aíyaka ipu himumo hemakapusuane Yasumo asekea someraka, “Marirakano re hisiraka risikinare? ⁶² Ano Aporomanomo Tákeane pekea nina, fana rea hauaka á parihihakano repo asekea yakapa hemakapusare? ⁶³ Arirakano Kotiyaki yaiya risikiakosane Ho Kotesamo karápo. Aporomo kaumo wakapuamo karáfapo. Nōmo someraka one Ho Kotesamo wakapuane soko, yaiya risikiakosamo wakapuane soko someraka ayapo. ⁶⁴ Aíyaka somerakano repo metakiramo kairaka kaisianeo, kakimararakarifapo.” Aíyaka Yasumo somesapo. Arirakano kepomaresa maiya amo Yasumo aporo su asekea hemakapuraka, “Kakimakanafonosa aporoane ayapo. Ano parakehokosa aporoane ayapo.” Aíyaka hemakapusuapo.

⁶⁵ Efera hunia Yasumo someraka, “Anoaki himu hakásaraka hemakapukua rekeakosapo, aíyaka hemakapurane Kotimo kakanafonorakano aporoamo anoaki himu hakásaraka hemakapukua rekeakosafapo. Aíyaka nōmo someraka ayapo.”

⁶⁶ Aíyaka Yasumo somerakano eyaki aporo hakásia pura yakaimo e metakarikia pusuapo.

⁶⁷ Metakarikia purakano Yasumo ipi aporo hakásia pura keno suaki someraka, “Repo soko ano metakariakosare?” ⁶⁸ Airakano Saemone Pitamo someraka, “Unihaeo, meta

epayaki isu pukusare? Yaiya rera kepoane nōmo some akare. ⁶⁹ Some karakano isiapo kakimarakanapo. Né Kotimo hokosa murikimaka pusiesapo. Makata watikisane kikisiraka kotesa susu rerane nepo. Aíyaka isiapo hemakapurakaripo.”

⁷⁰ Airakano Yasumo someraka, “Re aporo kenosu ane nōmo murikimasapo. Kenoane Satanemo aporo irapo.” ⁷¹ Aíyaka Isekerio aporo Saemonemo hokosa Yutaseane Yasumo somesapo. Aporo hakāsa pura kenoane Yutasepo. Yasu ipiane parakehokosane somesapo.

7

Yasumo ipi mamaneamo somesane oyapo.

¹ Yasu Kariri hauaka koraka nina Yutía hauaka aeyaka Yu aporo sisima risiamo someraka, “Yasu rusua kukusapo,” aisapakano Yasu Yutía hauaka á hisiafapo. ² Wate fana Ape Fete* Kikia Risia maiyane Yu aporo hinamomo Hemakapuko Hokono Kesapo. Hokono keako makeanamo ³ Yasumo ipi mamaneamo eaki someraka, “Né patera asesa aporo hinamo Yutía hauaka risiamo nōmo wakapuaka rakirane asekeasimo, hauaka one metakarikia Yutía hauaka a hinie. ⁴ Aporomo hokopukua rekeakosakipoko ipi makata rakirane faremarekea rakirafapo. Aporo hinamo suamo asekeasimo mafekemaraka rakirapo. Asiamo nōmo wakapuaka rakirane aporo hinamo suamo asekeea neaki himu hakásaraka hemakapusimo rakinie.” ⁵ Aíyaka ipi mamaneamo Yasuaki himu hakásaraka hemakapunafonoraka aíyaka mahokopariraka somesapo.

⁶ Aíyaka somerakano Yasumo someraka, “Aporo hinamo suamo asekeasimo makata rakiakosa maiya ane pipu oyafapo. Maiya suamo repo rakiane siahosireapo. ⁷ Yumo soko keseke soko repo rakirane aporomo aseraka hisihokosafapo. Anoaki hákasa hisirakanapo. Nōmo kakama someraka, ‘Repo watikiaka rakirakanapo.’ Airakano aporomo anoaki mahisiranakanapo.

⁸ Re namina hokono keako hisie. Yumo ano hiakosafapo. Pipu repo maiyapo. Nōmo maiyane harufapo.” ⁹ Aíyaka e Kariri hauaka yia parisapo.

Ape Fete Kisiane Hemakapuko Hokono Akera maiya amo Yasu pesane oyapo.

¹⁰ Yasumo ipi mamanea fana Yarusarame sitia hisiakipoko, Yasu wakasema asekeea nina, keseke aporo hinamo suamo aserapaka e tau kesekeea papaterarape hisiapo.

¹¹ Arirakano Yarusarame sitia Yu aporo sisima metakiramo someraka, “Yasu masiare?” aíyaka hokono kesa apea kope pusuapo.

¹² Arirakano aporo metakira sarimaraka namina susu tau someraka, “Yasu ipi aporo kotesareapo.” Airakano aporo metakiramo someraka, “Wae, epo aporo hinamo ikia kara hasaka pusimo karikia tarirakanapo.” Aíyaka aporo yakaimo tau me rusuapo. ¹³ Me rukua tau meakamaka somesane Yu aporo sisimamo kaikia hukururapaka ipu sakepamo hufitaeaka somesafapo.

¹⁴ Arirakano hokono keraka risikiyia fahoko makerakano Yasuane Kotimo apea pukua some kasapo. ¹⁵ Some karakano Yu aporo sisimamo fofaraka someraka, “Sawi menonane epo mayíáka enomasarakapo. Eane isiapo somemane tisa aporo káramo sukurusafapo.”

¹⁶ Airakano Yasumo someraka, “Kotimo ano pusiesamo anoaki some kasane nōmo reaki some karakanapo. Nōmo nī hemakapusuane some karakanafapo. ¹⁷ Nōmo nī hemakapusua hákasane nōmo some karakano soko metao, Kotimo hemakapusuane nōmo some karakano soko metao, mayíáka repo hemakapurkusare? Kotimo hemakapusua kekemaraka rakiako hemakapura aporoamo nōmo somesane takekea kepo hemakapukusapo. ¹⁸ Arirakano aporomo ipiane makárahokosakipoko ipi hemakapusuane some karápo. Arirakano ano pusiesa aporoane makárahoko hemakapuraka nōmo kakaro koteaka some karápo. Ano niane makáraraka some karáfapo. Kotafe some karáfapo.

* ^{7:2:} Mosesemo Isiraya aporo hinamo karikia pukua lyipi hauaka metakarikia ima yaoa koraka risia maiya amo ipu yaoa ape fete kisia risiane Hemakapuko Hokono Kesapo. Hokono keraka sere kari sumo hokono kerapo.

¹⁹ Arirakano Mosesemo somemanane reaki some nine repo kekemaraka hemakapukua rakirafapo. Marirakano repo ano rusua kukuko hemakapurakanare?"

²⁰ Airakano aporo suamo someraka, "Ne masuarareapo. Epamo neaki rusua kuku sapakasare?" ²¹ Airakano Yasumo someraka, "Fenena maiya hakása metamo nōmo hemakapukua wakapuaka rakirakano repo someraka, 'Epo marirakanare? Fenena maiya yaposane epo koaretaerakanapo,' airakasupo.

²² Asiane repo namina makasa kaua kekemamo aporo hokosa takaperakano, hokosa takapesa hokono ane menorape hikia karimo aporo hokosa kau hahaeraka patehoanie, aíyaka repo namina makasa kaua kekemamo somemanne motosapo. Ipu somesane Mosesemo soko ayikaniesapo. Asiamo fenena maiya yiamo sere karia paurakano aporo hokosa kauane hahaeraka patenapo. ²³ Asiamo Mosesemo somemanane koaretaenapaka fenena maiyamo soko, repo aporo hokosa kauane hahaeraka patenapo. Mosesemo ásia ayíáka fenena maiyamo nōmo aporo makata takamasa mafasane marirakano repo saperakanare?

²⁴ Wakasema asekea foaka hukuruane siahoasifareapo. Kepoane koteaka hemakapunie. Kepo kakaro hemakapukua ereketae takekeea hukuruane siahoasireapo." Aíyaka Yasumo somesapo.

"Yasuane unihaeaka rekeasimo kotimo murikimasa aporoane ere?" aisane oyapo.

²⁵ Yarusarame aporo metakiramo Yasuane aseraka someraka "Aporo rusua kuku sposane ere? ²⁶ Aporo suamo kaiyisimo hauaka kakamasakipoko á epo some akare. Epo someane aporo metamo hurutapirakanafapo. Epo someane hurutapirafaraka Kotimo unihaeaka rekeasimo murikimasa aporo Keresoane erakapo," aíyaka ipu hemakapukua somesapo. ²⁷ Arirakano "Kereso fasereperakano ipi faserepesa kepoane isiapo hemakapukusafapo. Asiane Yasu ipi takapesa apeane isiapo asesapo. Asesasamo e Keresofapo." Aíyaka Yarusarame aporo metakiramo somesapo.

²⁸ Airakano Kotimo apea Yasumo sakepamo someraka, "Repo ano kakaro aserapo. Ano takapesa apeane soko repo aserapo. Repo asesa nine nōmo kakaro kepoane repo himeteraka hemakapurakanafapo. Arirakano ano ni hemakapusua aeyaka kekemaraka pesafapo. Metamo ano pusierakano ano pesapo. Eane repo himeteraka, ²⁹ arirakano nōmo eane hemakapurapo. Epo ano pusierakano e aeyaka ano pesapo." ³⁰ Airakano Yasuane ipu waseremakosapoko asiane, waseremakosa maiyane haruhoanafonosekeno e waseremasafapo. ³¹ Arirakano aporo hinamo yakaimo Yasumo someane kakimaka someraka, "Yasumo wakapu rakirane namo kakaro kara kotesapo. Yasumo makata rakisiane aporo meta fasere aperamo rakikia marokehoasifapo. Asiasamo Yasuane Kotimo unihaeaka rekeasimo murikimasa aporoane, e kereso reapo," aisapo.

Sikiriti aporoaki Yasuane waseremako pusiesane oyapo.

³² Arirakano aporo yakaimo someane kaikia koaka purakano Fereze aporomo kaikia, ipu soko, pirisiti aporo káramo soko, Kotimo apea sikiriti aporo asekea risiaki someraka, "Repo Yasu waseremako pusie." Airakano Yasu rea sikiriti aporo pusuapo. ³³ Perakano Yasumo someraka, "Maiya wakasema metamo ano reyaki rekeakosapo. Wakasema nina epo ano pusiesamo hauaka yia ano parihiakosapo.

³⁴ Hisiakipoko repo ano koane fasokino aseakosapo. Ano hiakosa hauaka á re soko hiakosane siahoasifareapo." ³⁵ Airakano Yu aporo sisima suamo Yasumo someane himeteraka namina susu someraka, "Isiapo eane aseakosafapo, airakane e ma hiakosarakapo. Yu aporo hoanafonosamo apea hiakosarakapo. Á hinaka Yu aporo metakira risiaki soko, Yu aporo hoanafonosa risiaki soko, somehoko hiakosarakana reapo.

³⁶ Epo someraka, 'Ano koane aseakosafapo. Ano hiakosa hauaka á re hiane siahoasifareapo,' airakane, some kepo ane mairakarirakapo." Aíyaka Yu aporo sisima suamo somesapo.

He fuakataena Yasumo kakakosaposane oyapo.

³⁷ Hokono akera maiya amo sere kesekeane sere kárapo. Sereamo Yasu takahikia sakepamo someraka, “He narirakano ano rea he nako peae. Kakimara aporo reo, re ano rea pekea he nesie. ³⁸ Arirakano Kotimo sawia popasane oyapo. He kafa fuafuana ayíáka anoaki himu hakásaraka hemakapura aporo ane himua yaiya rera heane komarukua sakopeperaka rekeakosapo.” Aíyaka popasane Yasumo takumeaka somesapo. ³⁹ Asiamo Yasumo somesamo kepoane oyapo. Aporomo Yasuaki himu hakásaraka hemakapukua risikino Ho Kotesa i himua komarukua muriakosapo. Arirakano Yasumo somesa maiya amo Kotimo faesa hauaka yapura Yasu hiasiraka reke, Ho Kotesa hauaka wo haru pesafapo.

Aporomo kekepo hemakapusuane oyapo.

⁴⁰ Yasumo someane aporo yakai sarimasamo kaikia someraka “Aporoane kakaro porofete apororeapo.” ⁴¹ Airakano aporo metakiramo someraka, “Keresoane epo.” Airakano aporo metakiramo someraka, “Kariri hauaka aeyaka Kereso perafapo. ⁴² Arirakano Kotimo sawia popasane oyapo. Tefetemo aporo iramo Kereso takapeakosapo. ‘Tefetemo ipi ape sumu Petereheme taonea takapeakosapo.’ Aíyaka popahoareapo.” ⁴³ Aíyaka somerakano aporo sarimasamo kekepo hemakapusuapo. ⁴⁴ Ipu metakiramo, “E tipura makeanie,” aisapo. Aisane kakaro tipura makesafapo.

Pirisiti aporomo Yasuaki himu hakásaraka hemakapunafonosane oyapo.

⁴⁵ Arirakano Kotimo ape asekeea risira sikiriti aporomo Yasuane metakarikia pariperakan, pirisiti aporo káramo soko, Ferese aporomo soko, ipu someraka, “Yasu karikia peanafonosane mainakano asiare?” ⁴⁶ Airakano sikiriti aporomo someraka, “Epo somera ayíáka aporo metamo fana somesafapo. Epo somera ayíáka fana somerakano isiapo kaisiafapo.”

⁴⁷ Airakano Ferese aporomo someraka, “Yasumo re mahoperaka epo kotafe somerakan, repo soko kakimarakanare? ⁴⁸ Isiapo isina suamo Yu aporo sisimamo soko, Ferese aporomo soko suamo epo somerakasane kakipayarakanapo. Isiapo hakásá metamo soko kakimarakanafapo. ⁴⁹ Aporo hinamo yakai sarimasamo Mosesemo some maneane koteaka hemakapurakarifapo. Hemakapunafonorakano iane fanasina hauaka pukusapo.”

⁵⁰ Airakano Ferese aporo namina yia Nikitímase ipi fana Yasuaki somesa epo Ferese aporo suaki someraka, ⁵¹ “Isiapo somemane motosakipoko, somemane ane aporomo koaretaeraka watikiaka rakisiaporakano ipiaki fana kairapo. Kaikia kakaro yasikino asekeea, fanasinane marerapo. Aporoaki kaiyasiraka, fanasinane marerafapo.”

⁵² Airakano ipu someraka, “Né soko Kariri aporore? Kotimo sawi koteaka menohoanie. Porofete aporoane Kariri hauaka aeyaka perafapo. E porofete apororakanafareapo.” Aíyaka ipu hemakapukua somesapo.

⁵³ Aíyaka someaka marekeea aporo su namina apea pusuapo.

8

Hinamo aporo metayaki mokome purakano asekeea Yasu rea Ferese aporomo karikia pesane oyapo.

¹ [Aporo namina apea purakano Yasu ipi haku ūri Orofea hisiapo. ² Mituru fiarakano Kotimo apea Yasu paripukua, aporo yakai e rea sarimarakan e kake some kasapo.

³ Some karaka reakipoko, hinamo aporo asea aporo metayaki mokome purakano aporo metakiramo asekeea, hinamoane karikia pekea, Kotimo somemane tisa aporomo soko, Ferese aporomo soko e karikia Yasu rea pesapo. Pekea aporo su sarimaraka risiakipoko aporo suamo asekeasimo hinamoaki someraka, “Aporo su hikumisia né á reae,” aíyaka hukurusuapo.

⁴ Hukurukua ipu Yasuaki someraka, “Tisao, hinamoane aporo metayaki mokome purakano aporo metakiramo asesapo. ⁵ Fana Mosesemo somemane motosane oyapo.

Hinamo aporo metayaki mokome purakanone, hinamoane ekemo kareasimo maka-suhoanie. Aíyaka Mosesemo somemane motosapo. Somemane motosasamo nōmo mayiáka hemakapurakanare?” Aíyaka ipu Yasuaki somesapo. ⁶ Aíyaka somehoane Yasumo hasaka somerakarihoamo, ipu Yasu kau aseako aíyaka mahoperaka eane hukurukusakipoko somesapo. Aíyaka somerakano Yasu arupekea titiwaruraka kake, hokonomo hauaka poparaka kayapo.

⁷ Kakeno ipu namina efera hunia kaikia, efera hunia kaikia airakano Yasu arupekea kaina takahikia someraka, “Repo aporo hakásá metamo makata watikiaka rakiana-fononamo, ekeane maka nōmo ní fana kareanie.” ⁸ Aíyaka Yasu efera hunia arupekea titiwaruraka kake hauaka poparaka kayapo.

⁹ Poparaka kayakipoko aporo sisima fana pusuakipoko, aporo hakásá hakásaraka pukua fasekeno, hinamoane hákasa yia rekeno Yasumo asesapo. ¹⁰ Yasu arupekea kaina takahikia hinamoaki someraka, “Hinamo neo, aporo su masiare? Aporo hakásá metamo né hukuruko yia rekenare?”

¹¹ Airakano hinamoamo someraka, “Wae, su pukua fahoareapo.” Airakano Yasumo someraka, “Nōmo soko ne hukurukusafapo. Né pusie. Puraka keseke efera hunia watikiaka rakiraka kakakopo,” aíyaka Yasumo somesapo.]

“Aporo hinamo suamo faesamo kepoane anopo,” aíyaka Yasumo somesane oyapo.

¹² Aporo hinamo sarimarakano Yasumo efera hunia someraka, “Hauaka wo aporo hinamo risiamo faesamo kepoane anopo. Aporo hinamomo ano patera asekea risiane i katosa pukusafapo. Yaiya rera faesa pukusapo.” ¹³ Airakano Fere aporomo someraka, “Nōmo ní airaka yiamo nōmo ní yine somerakaripo. Nōmo ní airaka yiamo isuaki somehoane siahoasifareapo.”

¹⁴ Airakano Yasumo someraka, “Nōmo ní somerakane kakaro somerakaripo. Ano pesa hauakane soko ano hiakosa hauakane soko nōmo ní hákasa hemakapurakanapo. Asiane repo hemakapuraka, ‘E pesane mayiáka pesarakapo. E hiakosane mayiáka hiakosarakapo.’ Aíyaka repo himeteraka hemaka apure.

¹⁵ Aporomo ipi hemakapusua hukuarura ayiáka repo hukururakanapo. Asiane Yumo nōmo reane hukururakanafapo. ¹⁶ Arirakano nōmo hukururakanone koteaka hukurukua maroponapo. Hukurukua maroponane nōmo ní hemakapusua aeyaka hukurukua maroponafapo. Atamo ano pusiesa amo hemakapusuane nōmo kekemaraka hukurukua maroponapo. ¹⁷ Arirakano repo somemane sawia poparaka, ‘Wikinisi aporo tetámo makata asesa hakásá yineraka somerakano, kakarorakae airapo.’ Aíyaka popahoareapo.

¹⁸ Arirakano nōmo ní somerakane soko, nōmo Atamo ano pusiesamo epo anoane somerakane soko, etapo wikinisi tetámo hakásá yineraka somerakayiapo.”

¹⁹ Airakano ipu someraka, “Ní Ata mayare?” Airakano Yasumo someraka, “Ano soko nōmo Ata soko repo himeteane. Repo ano hemakapusua satiki, nōmo Atane soko repo hemakapufunureapo.” ²⁰ Aíyaka Yasumo Kotimo apea some kasápo. Arirakano ape rumua mone kera maua taesa ane makeraka Yasu reke some kasapo. Arirakano ipu Yasuaki saperakano yia e kukusa maiya fasere peanafonosasamo e hukurukua waseremasafapo.

“Ano hiakosa hauaka á re hiane siahoasifareapo,” aíyaka kakimakanafonosa aporoaki Yasumo some kasane oyapo.

²¹ Yasumo efera hunia someraka, “Nōmo reane metakarikia hiakosapo. Ano hisi-akipoko repo ano kokoa aseakosafapo. Re watikiaka yaiya rakiraka risina kukua keakosapo. Ano hiakosa hauaka á re hiane siahoasifareapo.” ²² Airakano Yu aporo sisimamo someraka, “Epo someraka, ‘Ano hiakosa hauaka á re hiane siahoasifareapo,’ airakae. Airakane kepoane yakaparakapo. Ipi yia makukusarakapo.”

²³ Airakano Yasumo someraka, “Re hauaka wo risikinapo. Ano yapunaka pesapo. Re kakaro hauaka aporopo. Hauaka one kakaro nōmo hauakafapo.

²⁴ Nōmo fana somesane efera hunia somerakanapo. Re watikiaka yaiya rakiraka risina kukua keakosapo. Ano ni yaiya rerapo.* Asiamo some one repo kakimakanafonrakanone re yaiya watikiaka rakiraka risina kukua keakosapo.”

²⁵ Airakano ipu someraka, “Né epare?” Airakano Yasumo someraka, “Nōmo fana reaki some kasa yine, anopo. ²⁶ Repo makata ainane nōmo reaki some kakakosane kára kakenapo. Reaki hukurukusane kára rekenapo. Nōmo Atamo ano pusiesamo ipi kakaro somerapo. Epo someane nōmo kakimaka aporo hinamo suaki somerakanapo.” ²⁷ Aíyaka ipi Ata Kotiane Yasumo somerakano ipu kairaka himetesapo.

²⁸ Himeterakano Yasumo someraka, “Aporomanomo Tákeane anopo. Ano ira matopesa paremarekea máfaraka mapoana maiya amo ano ni yaiya rerapo, aíyaka repo hemakapukusapo. Maiya amo repo someraka, ‘Epo ipi hemakapusuane rakiafareapo. Ipi Atamo somerakano someane somehoareapo.’ Aíyaka repo somehokosapo. ²⁹ Arirakano epo ano pusiesamo ano metakarirafapo. E anoyaki rekenapo. E sesehoasimo nōmo rakirakano epo ano metakarirafapo.” ³⁰ Airakano aporo hinamo yakaimo Yasumo someane kakimaka eaki himu hakásaraka hemakapusuapo.

Yasumo someraka, “Re tonotaehokosapo,” aisane oyapo.

³¹ Arirakano Yasumo someane Yu aporo hinamomo kakimarakan iaki Yasumo someraka, “Nōmo someane kakimaka risikino, re kakaro ano patera asesa aporo hinamoane risikinapo. ³² Kakaro someane repo kakimarakan kakaro someamo re tonotaehokosapo.” ³³ Airakano ipu someraka, “Isu tonotaehokosapo, airakane kepoane yakaparakapo. Eparahamemo aporo ira wainepe pesane isupo. Aporo metakiramo isu roporakan isu tipura arakira ayíáka isiapo aporo metakirapoko raiparaka rakisiafapo. Isu raiparaka rakisimo aporo metamo ropohoanafonosasamo epo isu tonotaehokosapo, aisane mayíáka tonotaehokosare?”

³⁴ Airakano Yasumo someraka, “Nōmo kakaro somerakaripo. Aporomo watikiaka rakira amo wafayane makata watikisa ayapo. Makata watikisa amo someraka, ayikanie, airakano apromo kakimaka raiparaka rakirapo. ³⁵ Arirakano atamo ipi hokosane metakarirafapo. Aporo metaki hokosane roponafapo. Asiane aporo raipa roposa wafayamo ipi hemakapuraka aporo raipane metakarikia aporo metaki roponapo. ³⁶ Arirakano makata watikisamo reane tipura kesaka risiane, Kotimo hokosamo re tonotaerakan, re kakaro tonotaesa risikiakosapo. ³⁷ Re Eparahamemo aporo ira wainepe pesane nōmo hemakapurakaripo. Eparahamemo aporo ira wainepe pesa yiamo ano rusua kukuko hemaka apure. Nōmo someane repo kakimakanafonosasamo ano rusua kukuko hemaka apure. ³⁸ Asiamo nōmo Atamo anoaki makata tarisiane nōmo nī reaki somerakanapo. Someane repo kakipayarakano, repo namina atamo somesane kakimarakanapo.”

³⁹ Airakano ipu someraka, “Isiapo atamo wainepe pesa Eparahamepo.” Airakano Yasumo someraka, “Re Eparahamemo hokosa wainesa satiki Eparahamemo rakisia ayíáka repo rakiafunureapo. ⁴⁰ Rakiafunusa nine repo ano rusua kukuko hemaka apure. Kotimo kakaro someane nōmo kaikia reaki some kasapo. Some karakano repo ano rukusakipoko hemaka apure. Ayíáka Eparahamemo hemakapusuafapo. ⁴¹ Asiamo repo namina atamo hemakapusuane repo arakire.” Airakano ipu someraka, “Ikia oto hokosane isufapo. Isiapo Ata hákasa Koti ipipo.”

⁴² Airakano Yasumo someraka, “Repo Koti Ata hemakapusua satiki repo himu tumurumo ano hemakapufunureapo. Koti rea hauaka aeyaka ano pesapo. Ano nī hemakapusua aeyaka ano pesafapo. Kotimo ano pusierakan pesapo. ⁴³ Nōmo someane kaikia hemakapunafononane marirakanonare? Nōmo someane repo kakimako hisiraka risiasamo, nōmo someane repo kaikia hemakapurakarifapo. ⁴⁴ Repo atane Satanepo. Repo atamo hemakapusuane repo seseaka kekemaraka rakirakanapo. Aporo rusua

* 8:24: Kotimo Moseseaki someraka, “Ano ni yaiya rerapo,” aisapo. (Kisim Bek 3:14). Asiamo Yasumo hakásá yineraka somerakano aporo suamo hemakapuraka Yasumo Kotiane mawakasemasapo. Yasumo airakano ipu sapesapo.

kukusimo kepomaresane epo kepomaresapo. Arirakano kakaro somerane epo rukupateraka metakarisiasamo epo kotafe somerane hákasa hemakapurapo. Kakaro someane hakásá soko Satane ipia kakenafapo. Kotafe someane susu e himua komarukua rekenapo. E himu aeyaka kotafe someane susu some karaka rerapo. Kotafe someamo kepoane Sataneapo.⁴⁵ Nōmo nī someane kakaro susu somerapo. Kakaro susu somerakano repo kakimarakarifapo.⁴⁶ Nōmo watikiaka hemakapukua rakirano repo asesare? Wae. Repo asesafapo. Nōmo kakaro somerakano yia marirakano repo kakipayaraka risikinare?⁴⁷ Kotimo someane ipi hokosamo kairapo. Re Kotimo hokosahoanafonosasamo Kotimo someane repo kaiyako hisiane,” aisapo.

“Eparahamee hokono mareasiraka ano yaiya reapo,” aíyaka Yasumo somesane oyapo.

⁴⁸ Airakano Yu aporo sisimamo someraka, “Né Sameria aporopo.[†] Yatafumo né ho masapo. Isiapo kakaro somerakaripo.”⁴⁹ Airakano Yasumo someraka, “Yatafumo ano ho masafapo. Aíyaka repo somerakane repo kakaro somerakarifapo. Nōmo Atane nōmo makama fanaraka makárarakanapo. Arirakano repo ano makama kesekeraka mawakasemarakanaapo.⁵⁰ Arirakano nōmo ni yia yano motosa makáraraka somehoko hemakapurakarifapo. Kotimo ano yano motosane makárahokosapo. Ano makárahokosane Kotimo makárahokosapo. Epo aporo hinamo suane takekea parakuhokosapo.⁵¹ Arirakano nōmo reaki kakaro somerakanapo. Nōmo someane aporo hinamomo kakimarakano ane, i kakaro kukusafapo. Iane yaiya risikiakosapo.”

⁵² Airakano Yu aporo sisimamo someraka, “Yatafumo né hoane kakaro mayereapo. Asiamo né masuaraka himu mahimeteraka somerakae. Eparahame kusuapo. Porofete aporo soko kusuapo. Asiāne nōmo someraka, ‘Nōmo someane kakimara aporo hinamoane kukusafapo. Yaiya risikiakosapo.’⁵³ Aisa nine Eparahame kusuane nōmo hurutapirakanare? Né aporo unihae kárare? Porofete aporo soko kusuapo. Né epapaka hemakapurakanare?”

⁵⁴ Airakano Yasumo someraka, “Ano nī yia makáraraka somesa satiki nenakamaka rupiaka somehoafunureapo. Asiane nōmo Atamo ano makáraraka marerakanapo. Nōmo Ataki repo Kotipo airapo. Nōmo Atane repo Koti hakásá yiyapo. Koti hakásá yiamo ano makárarakanapo.⁵⁵ Eane repo kakaro koteaka hemakapusuafapo. Eane nōmo kakaro hemakapurakanapo. Asiamo nōmo e asekeanafonoraka nōmo somesa satiki nōmo kotafe somehoafunupo. Repo kotafe somera ayiáka nōmo somerafapo. Nōmo eane hemakapuraka epo someane nōmo kakaro kaikia kekemarapo.⁵⁶ Arirakano ano hauaka wo peakosane repo makasa kaua kekema Eparahamemo hemakapusuapo. Ano peakosane hemakapukua seseraka reapo.”

⁵⁷ Airakano Yu aporo sisimamo Yasuaki someraka, “Eparahameane nōmo asesare? Né keremisi fifiti (50) ayiáka né reafapo. Né sisimafapo. Nōmo mayiáka Eparahame asesare?”

⁵⁸ Airakano Yasumo someraka, “Nōmo kakaro somerakaripo. Eparahamee hokono mareasiraka ano yaiya reapo.”⁵⁹ Airakano Yu aporo sisimamo Yasuane kareakosakipoko eke morakano asekeea Yasu fararererape pukua Kotimo apeane metakarikia pusuapo.

Aporo hi mesa Yasumo mafasane oyapo.

¹ Yasu ikia kara puraka aseane aporo meta hi mesa rekeno asesapo. Aporoane ipi kaíyiamo takapesa maiya amo hi mesapo. ² Aporo hi mesane asekeea aporo hakásá puramo Yasuaki someraka, “Tisao, aporo hi mesane epamo watikiaka rakisiakipoko e fanasiraka hi mesare? Epo ipi watikiaka rakisiakipoko e fanasisare? Ipi kaíyiape wafaya tetapō watikiaka rakisiakipoko e fanasisare? Epamo watikiaka rakisiakipoko e fanasisare?”

[†] 8:48: Yasuane Sameria aporo reapo, aíyaka hokomaresamo kepoane oyapo. Sameria aporoane Yu aporoyaki yunuraka risiapo.

³ Airakano Yasumo someraka, “Epo ipi watikiaka rakisiakipoko e fanasiraka hi mesafapo. Ipi wafayape kaīyia tetapō watikiaka rakisiakipoko e fanasiraka hi mesafapo. Kotimo wakapuamo e hi mafarakano aporo suamo asekeasimo e takapesa maiya amo hi mesapo. ⁴ Arirakano erehoasirakayia maiya faena yiamo nōmo makata rakirakanapo. Kotimo ano pusiesasamo epo makata rakirane isiapo rakiane siahosireapo. Ereamo nōmo soko repo soko makata rakiakosafapo. Erehoko makerakanapo. ⁵ Ano hauaka wo areamo aporo hinamo hauaka wo risiamo faenane anopo.”

⁶ Aíyaka Yasumo someaka ororoa torofaeraka, hokonomo sosokeraka maka, aporo hi mesane hia paisiapo.

⁷ Ororomo paikia marekea Yasumo eaki someraka, “Ne pukua he Siroame kafa á ne hikumisiane kusuhoko pusie.” Airakano he Siroameane namo meaka he rakemása aíyaka yano motosapo. He kafa á aporoane pukua, hikumisi kusuhoane himo koteaka asesapo.

⁸ Aserakano aporo ipi tákemo soko, fana mone kakasimo kakeno asesa aporoamo soko someraka, “Aporo fana mone kakasimo kakesuane ere?”

⁹ Airakano aporo metakiramo someraka, “Ao, aporo ayapo.” Airakano aporo metakiramo someraka, “Érakanafareapo. Aporo meta e hikumisi yaisia rekenapo. Aporo ayarakanareapo.” Airakano aporo hi mesa fasamo someraka, “Ao, mone kakasimo kakesuane anopo.” ¹⁰ Airakano ipu someraka, “Mayiáka né hi fasare?” ¹¹ Airakano epo someraka, “Aporo meta ipi yano motosa Yasumo ororoa torofaeraka, ano hia paikia someraka, ‘Né pukua he Siroame kafa kusuhoko pusie.’ Airakano ano pukua he kafa kusuhoane koteaka asesapo.”

¹² Airakano ipu someraka, “Yasu ma rekenare?” Airakano aporoamo someraka, “Ano himeteripo. E ma pusuarakapo,” aisapo.

¹³⁻¹⁴ Arirakano fenena maiya amo aporo hi mesane Yasumo mafasapo. Mafarakano ipu e karikia Fere se aporo risia á karikia pusuapo. ¹⁵ Fere se aporo risia á karikia perakano, Fere se apromo aporo hi mesa mafasaki someraka, “Né hi mesane mayiáka fasare?” Airakano epo someraka, “Aporo metamo ororo maka ano hia paisiane hemo kusuhoane fasapo. Faraka koteaka aserakanapo.” ¹⁶ Airakano Fere se aporo metakiramo someraka, “Fenena maiya amo epo makata rakiasasamo e Kotimo pusierakano pesa aporo ayafareapo.” Airakano aporo metakiramo someraka, “Epo wakapuaka rakirane nena aporo watikiaka rea apromo ayiáka wakapuaka rakirafapo.” Aíyaka namina himumo kekepo hemakapukua tafatafasapo.

¹⁷ Tafatafaraka aporo hi mesa mafasaki Fere se apromo efera hunia someraka, “Né hi mafasa aporoane nōmo epapaka hemakapurakanare?” Airakano aporo hi mesa mafasamo someraka, “E porofete apororeapo.” ¹⁸ Airakano Yu aporo sisimamo someraka, “Aporoane ipi kaīyiamon takapesa maiya amo e hi mesarakapo. Kakaro hi mesa mafasarakapo.” Aíyaka hemakapuraka ipi kaīyiape wafaya tetā peaesapo.

¹⁹ Peaerakano pesapo. Perakano Yu aporo sisima amo someraka, “Aporoane tetapō titi hokosare? Hi mesa takapesare? Yumo koteaka aserane mayiáka koteaka aserakanare?”

²⁰ Airakano ipi kaīyiape wafaya tetapō someraka, “Eane etapo hokosapo. Takapesa maiya amo e hi mesapo. ²¹ Yumo koteaka aserane mayiáka aserakanarakapo. E hi mafasane aporo eparakapo. Eaki kaiyinie. E ipi aporo rauasasamo ipi yiamo hemakapurakanarakayiapo. Epo somehoane siahosireapo.” Aíyaka tetapō somesapo.

²² Tetapō Yu aporo sisima ane namoraka risiasamo aíyaka somesapo. Tetapō somehoasiraka fana Yu aporo sisimamo someraka, “Aporo metamo someraka, ‘Yasu ipi Keresopo,’ airakanone aporoaki Yu apromo sarimana apea peakopo, aihokosapo.” Aíyaka Yu aporo sisimamo somesapo.

²³ Aíyaka somesasamo ipi kaīyiape wafaya tetapō hemakapuraka, “Etoaki peakopo, aihosireapo.” Aíyaka hemakapuraka tetapō someraka, “Aporo hi mesa mafasane aporo rauasasamo e ipiaki kaiyinie,” aisapo.

²⁴ Arirakano efera hunia Yu aporo sisimamo aporo hi mesa mafasaki peaesapo. Peaerakano pesapo. Perakano ipu someraka, “Kotimo kaiyisimo nōmo kakaro aumaraka

somehoanie. Koti makama fanahoanie. Yasumo himu watikiaka reane isiapo hemakapurakaripo.”²⁵ Airakano aporoamo someraka, “E himuane nōmo aserafapo. E himuane kotesarakapo. E himuane watikisarakapo. Ane nōmo hemakapurakanafapo. Asiāne nōmo makata hakāsa hemakapusuane oyapo. Ano fana hi mesa reane, yumo nōmo koteaka aserakanapo. Ane nōmo hemakapurakanapo.”²⁶ Airakano ipu someraka, “Epo mayiáka né hi mafasare?”²⁷ Airakano epo someraka, “Nōmo reaki pipu somerakasafare? Somerakasane repo kakimararakarifapo. Marirakano efera hunia anoaki kairakanare? Repo eane patera aseke aseke risikiakosakipoko somerakanare?”

²⁸ Airakano ipu saperaka eaki mainamarekea someraka “Aporoane patera asesa aporoane nepo. Isu Mosese patera aserakanapo.”²⁹ Kotimo Moseseaki somesapo, aíyaka isiapo hemakapurakaripo. Aporo ane maeyaka pesarakapo, aíyaka isiapo hemakapurakaripo.”

³⁰ Airakano aporo hi mesa mafasamo someraka, “Repo mairakare? Re yaiya himerire? Repo someraka, ‘Aporoane maeyaka pesarakapo,’ aíyaka repo somerakasa, aporoamo ano hi mafasapo.”³¹ Aporo himu watikiaka hemakapukua reamo Kotiaki wárakano Kotimo kairafapo. Kotiaki kekereraka Kotimo hemakapusua rakirane rakiraka reamo wárakano, Kotimo kairapo. Ane isiapo hemakapurakanapo.”³² Wate fana hauaka kara one kepomaresa maiya amo soko, aporo wainepe pesa makasa kamuma risia maiya amo soko, makasa kaua risia maiya amo soko, ata rea maiya amo soko, aporo ipi kaýyamo taka apera maiyamo hi mesa takapesane aporo metamo mafasapakano isiapo kairafapo. Fana ayiáka mafasafapo.”³³ Kotimo makata rakirane rakiako pusiehoanafonosa satiki, aporoamo ayiáka mafahoafunufapo.”*

³⁴ Airakano ipu someraka, “Ní atane soko ní amane soko himu watikiaka reke, né soko himu watikiaka takapesapo. Né kotesapaka isuaki some karakánare? Isiapo nōmo someane kaiyakosafapo. Yu aporomo sarimana ape one metakarikia pusie.” Airakano e pusuapo.”³⁵ Pusuakipoko aporo hi mesa mafasaki hukurukua pusiesane Yasumo kaikia, aporoane kokoa aseraka someraka, “Aporomanomo Tákeaki nōmo himu hakásaraka hemakapurakanare?”

³⁶ Airakano aporoamo someraka, “Ape neo, eaki himu hakásaraka hemakapuko anoaki tarikia somesie. Eane epare?”³⁷ Airakano Yasumo someraka, “Nōmo yumo aserakasane anopo. Nōmo néaki somerakanapo.”³⁸ Airakano aporoamo someraka, “Unihaeo, nōmo neaki himu hakásaraka hemakapurakanapo.” Aíyaka epo kekereaka somerakano³⁹ Yasumo someraka, “Aporo hinamo Kotiaki himu hakásaraka risiane soko, aporo hinamo Kotiaki himu hakásaraka risikianafonosane soko, parakuhoko ano hauaka wo pesapo. Aporo metamo someraka, ‘Nōmo makata su aserafapo,’ aisa aporoane hi faeraka rekeakosapo. Arirakano aporo metakiramo someraka, ‘Ano siapo. Nōmo himo makata su aserapo,’ aisa aporoane hi katoraka rekeakosapo.”⁴⁰ Airakano Fere aporo makeraka risiamo kaikia someraka, “Isu hi mesa risikino nōmo aseke aseke somerakanare?”⁴¹ Airakano Yasumo someraka, “Repo someraka, ‘Isu hi mesa risikinapo,’ aíyaka hufitaesa satiki, re himu watikisane nōmo mafahoafunureapo. Asiāne repo hufitaerakarifapo. Repo someraka, ‘Isiapo makata su hemakapukua, arirakano makata su aseke aseke siaraka risikinapo.’ Aíyaka somerakane re himu watikisane yaiya risikinapo.” Aíyaka Yasumo somesapo.

10

Saro sipi keasimo rurusane takumeaka somesane oyapo.

¹ Yasumo aporo hinamoaki efera hunia someraka, “Nōmo reaki kakaro somerakaripo. Saro sipi rurusa aporo ikia koro aeyaka peanafonoraka, ruru tipi aeyaka tapikia perakano aporoamo saro sipiane mokoatikiraka hakimako perapo.”² Aporo ipi ikia koro aeyaka perakano saro sipi aseke aseke rera aporo ayapo.”³ Saro sipi aseke aseke rera aporoane ruru kakarua

* 9:33: Asiamo aporo hi mesa mafasamo someamo kepoane, Kotimo pusiesa aporoane pesa ayareapo.

peasimo, ikia koro asekea rea aporomo ikia koroane ropakamarapo. Ropakamarakano saro sipi asekea rera aporomo saro sipi yano taesane yano hokoa wáhoane, saro sipi su perakano namina asekea rera aporomo karikia yaoa purapo.

⁴ Asekea rera aporo fanaraka purakano, epo meane ipu kaikia kekemarape purapo. ⁵ Saro sipi asekea rekeanafononane, ipu kekemarape purafapo. Me kaiyiáne me meta kairakarakano tekatarirapo.” ⁶ Aíyaka Yasumo takumeaka somerakano, ipu some kepoane himetesapo.

Yasumo someraka, “Saro sipi asekea rera aporoane anopo,” aisane oyapo.

⁷ Aihoane i himeterakano efera hunia Yasumo someraka, “Nōmo reaki kakaro somerakaripo. Saro sipi keasimo rurusa ikia koro asiane anopo.” ⁸ Fana aporo pesane hakimora aporopo. Ipu kotafe wárakano, ipu meane saro sipimo kaiyiáne, kumuku kairakarakano, kekemarape pusuafapo. ⁹ Ikia koro asiane anopo. Saro sipi ikia koroa yorokoa pesa susuane nōmo asekea rekenapo. I ikia koroa yorokoa pesa susuane makata metamo mokoatikinapaka nōmo mafairaka asekea rekenapo. Ikia koro aeyaka pekea yaoa asane kotesa nako purapo. Aina ayiáka anoaki paosa aporo hinamoane nōmo asekea reke mafasiakosapo.

¹⁰ Asiamo hakimara aporomo makata hakimokoa rukua mokoatikiraka ayiakako perapo. Arirakano aporo hinamo Kotiyaki koteaka risikiasimo ano pesapo. Yumo i su hauaka wo arisiamo Kotimo iane makoterakano hemakapukua, makata su siaraka risike, seseraka ayiáka koteaka risikiasimo ano pesapo. ¹¹ Saro sipi asekea rera aporo kotesane anopo. ‘Saro sipi koteaka risikiasimo asekea rera aporoane kuane siahoasireapo,’ aíyaka saro sipi asekea rera aporo kotesamo hemakapurapo.

¹² Arirakano aporo metamo saro sipi asekea reke mone makosakipoko raiparaka rakirapo. Aporomo saro sipiane kakaro epo ipi menahoanafonosasamo epo aseane, saro wofe* perakano asekea saro sipiane metakarikia takaripurapo. Takaripurakano saro wofemo saro sipi metakirane rukunenakano, metakirane yaoa tekatarikia rosaka tarirapo. ¹³ Asiamo aporomo mone hákasa hemakapukua raiparaka rakiraka saro sipiane ipimenahoanafonosasamo koteaka hemakapukua asekea rerafapo.

¹⁴⁻¹⁵ Arirakano saro sipi asekea rera aporo kotesane anopo. Nōmo Atamo anoaki hemakapukua, nōmo Ataki hemakapukua area ayiáka, nōmo saro sipiane hemakapukua, saro sipimo anoaki hemakapukua ayiáka risirapo. Nōmo saro sipipoko ano kuane siahoasireapo. ¹⁶ Arirakano saro sipi metakira ruru wo keanafonosane soko nōmenapo. Iane soko nōmo karikia peakosapo. Saro sipi nena yaoa risiamo soko, nōmo someane kakimarakanano, karikia peakosapo. Yaoa risiane soko, ruru kakarua risiane soko, rurua hákasa keke su sarimaraka risikiakosapo. Asiamo asekea rera aporoane ano hákaspao.

¹⁷ Ano turikia pukusakipoko kukusapo. Ayiakakosasamo Atamo anoane himu tumurumo hemakapurakanapo. ¹⁸ Aporomo hemakapusua aeyaka ano rusua kukusafapo. Nōmo aohoanafonorakanone ane ano rusua kukusifareapo. Nōmo nī hemakapusuanne aosasamo ano rusua kukusireapo. Aporomo ano rusua kukusimo nōmo nī hemakapusua aeyaka ano kauane kakakosapo. Ano kukua efera hunia turikia apuramo wakapuaka turikia pukusapo. Aíyaka nōmo Atamo hemakapukua maresapo.” Aíyaka Yasumo somesapo.

¹⁹ Aíyaka Yasumo somerakano Yu aporo sisimamo kaikia himumo kekepo hemakapukua tafatafasapo. ²⁰ Tafatafaraka aporo metakiramo someraka, “Yatafumo e ho masasamo epo airakae. E masuarakanareapo. Marirakano epo someane repo kairakanare?” ²¹ Airakano aporo metakiramo someraka, “Yatafumo aporomano ho masamo aíyaka somerafapo. Aporo hi mesane yatafumo mafanafapo,” aisapo.

Yasumo some kayane Yu aporo sisimamo kakipayasane oyapo.

²² Wate fana Kotimo Ape Kikimasane Kotiaki Suseraka Hemakapuko Hokono Keakosa maiya ane makesapo. Hokono keakosakipoko yaki ikia aperamo Yu aporo Hinamo

* ^{10:12:} Saro wofe yákasa kára asiapo. Saro wofemo aporomano soko, makata kakayia soko hitafe rukunenapo.

Yarusarame sitia sarimasapo. ²³ Kotimo apea Yasu pukua ape taru yano motosa Soromone ape tarua koraka reakipoko ²⁴ Yu aporo sisima sarimaraka ipu Yasuaki someraka, “Isiapo neane aseraka himu tetáraka risikinapo. Masinaka isuaki kakama somehokosare? Ne Keresopo airakane nōmo isuaki kakama hufitaeraka somehoanie.”

²⁵ Airakano Yasumo someraka, “Fana nōmo reaki somerakasuamo repo kakimaraka-ufapo. Atamo yanoane máfaraka ipi wakapumo hemakapukua rakira amo anoane reaki tarirakanapo. Tarirakano yia repo koteaka hemakapurakarifapo. ²⁶ Asiane reane nōmo saro sipirakanafareapo. Repo nōmo someane kakimararakarifapo.

²⁷⁻²⁸ Arirakano nōmo someane nōmo saro sipimo kakimaka kekemarape perakano, nōmo iane hemakapuraka kakaro yaiya risirane karápo. Karakano i hasaka koakosafapo. Iane aporo metamo wasekemaka hakimakosafapo. Saro sipiane nōmo Atamo anoaki kasapo. ²⁹ Ata ipi kakaro kárapo. Aporo metamo e hurutapirafapo. Saro sipiane ipi asekeea rekenapo. Ipi asekeea rerasamo aporo metamo hakimakosafapo. ³⁰ Ata eto iti hakása yiyapo.” ³¹ Airakano kaikia Yu aporo sisimamo ekemo kareako mosapo. ³² Morakano Yasumo someraka, “Repo asekeasimo Atamo anoaki rakiniesane makata kára nōmo rakisiapo. Nōmo makata yakapa hasaka rakirakano repo ekemo ano kareakonare?” ³³ Airakano Yu aporo sisimamo someraka, “Nōmo koteaka rakirakano isiapo ne ekemo kareafunufapo. Asiāne nōmo someraka, ‘Koti eto iti hakása yiyapo,’ airakasa akipoko ne ekemo kareakosapo. Nōmo someraka, ‘Ano Kotipo,’ airakae. Asiāne né kakaro aporomanopo.”

³⁴⁻³⁵ Airakano Yasumo someraka, “Kotimo sawia popasane kakaro yasiane popa-hoareapo. Popasa ane metakariakopo. Fana popasane oyapo. Kotimo ipi some kaira aporoaki someraka, ‘Kotio,’ aisane popasapo.” ^(Buk Song 82:6)

³⁶ Kotimo aisa yiamo ano murikimaka pusierakano ano hauaka wo pesapo. Pekea someraka, ‘Ano Kotimo hokosapo.’ Airakano repo someraka, ‘Epo Kotiane mawakase-marakae.’ Aíyaka repo somerakane mairakare?

³⁷ Atamo makata rakirane nōmo rakianafonosa tiki nōmo someane repo kakipaya-hoane siahoasireapo. ³⁸ Atamo makata wakapuaka rakirane nōmo rakirakano, makata rakirane asekeea repo himu hakásaraka hemakapunie. Anoaki himu hakásaraka hemakapunafonoraka, nōmo rakirane asekeea himu hakásaraka hemakapunie. Ano Atayaki hakása reke, arirakano Atane anoyaki hakása reke, ayíaka rekeno repo asekeea hemakapukusapo.”

³⁹ Airakano ipu e tipura makeako wasere makorakano Yasu ipi rea nine fasokeno asesapo. ⁴⁰ Arirakano Yasu pukua, he Yotane yaoraka taku ra pukua, Yonemo aporo hea tapukumurisia hauaka á pukua reapo. ⁴¹ Rekeno aporo hinamo yakai peraka namina susu someraka, “Isiapo asekeasimo Kotimo wakapumo hemakapukua rakirane Yonemo rakisiafapo. Asiāne Yasumo ainane Yonemo somesane namo kakarohoareapo.” ⁴² Aíyaka aporo hinamo yakaimo Yasumo someane kakimasapo.

11

Rásarase kusuane oyapo.

¹ Aporo hakása meta ipi yano motosa Rásarase, Petene apea reapo. Ape hakása yia Maria soko ipi yapaya Mata soko tetā toapo. Rásarase ipi makata takamasa wareapo.

² Arirakano fana Mariamo makata wape yamonane Yasumo korakea rekemarekea, ipi uni itimo hokesapo. Hinamoamo ipi ifia Rásaraseane makata takamasapo. ³ Takamarakano Mariape Mata tetapō aporo metaki someaka mareraka, “Nōmo Unihae Yasuaki somehoko pusie. Nōmo úyaka somehoanie. Unihaeo, nōmo ní aporo téke Rásaraseane makata takamasa warekenapo, aihoanie.” Airakano aporoane pukua tetapō someaka maresane Yasuaki somesapo.

† ^{10:34-35:} Kotimo ipi some kaira aporo unihaeaka risiasamo Kotimo iaki Kotio, aisapo.

⁴ Somerakano Yasumo kaikia someraka, “E kukusapoko makata takamasafapo. Aporo hinamomo Kotiaki hemakapukua kekerehoasimo makata takamasapo. Aporomanomo Tákeane anopo. Anoaki soko hemakapukua kekerehoasimo e makata takamasapo,” aisapo.

⁵ Arirakano Yasumo Mata soko, ipi yapaya maria soko Rásarase soko, i suaki himu tumurumo hemakapuraka, ⁶ Rásarase makata takamasapakano yia, Yasu ipi rea hauaka á yape tetá wasápo. Epo aseako pusuafapo. ⁷ Yape tetá waka yape isiamo Yasumo someraka, “Yutía hauaka á isu paripukusapo.” ⁸ Airakano ipi aporo hakása puramo someraka, “Tisao, kawe né kukusimo Yutía hauaka á Yu aporo sisimamo ekemo kareakorakasu yia, né efera hunia kreasimo paripurakanare?”

⁹ Airakano Yasu ipi kukusa maiyane haru faserepeanafonorakano ipu hemakapusimo Yasumo someraka, “Sere hakása tuaro (12) awa faenapo. Maíyamo faesakipoko himo asekea puraka terafaka ruraka etenafapo. ¹⁰ Ereamo puraka katosakipoko terafaka ruraka etenapo. ¹¹ Isiapo aporo táké Rásaraseane ipi wasápo. Wasáne nōmo maturikia taehoko pukusapo.”

¹² Aíyaka takumeaka somerakano, ipi aporo hakása puramo himeteaka risike someraka, “Unihaeo, e makata takamasa warekerakane fahokosapo.” ¹³ Aíyaka Rásarase nena makata takamasa warekenapakasiki hemakapukua, Rásarase ipi kakaro kusuane Yasumo takumeaka somerakano, ipu himetesapo. ¹⁴ Himeteraka risikino aseraka Yasumo hufitaeraka someraka, “Rásarase kusuapo. ¹⁵ E makata takamaka warea ano pusuafapo. E kusua kunikia motosapakano aseako pukusapo. Sereamo nōmo makata rakirakano, repo anoaki himu hakásaraka hemakapurkusapo.”

¹⁶ Airakano Tomase ipi yano motosa meta Titimase*, epo aporo hakása pura metakiraki someraka, “Eyaki isu su pukusapo. Eyaki isu kukuko pukusapo,” aisapo.

“Yaiya rekeasimo maturikia taena aporoane anopo.” Aíyaka Yasumo somesane oyapo.

¹⁷⁻¹⁹ Yasu ipi aporo hakása purayaki Petene apea perakano aporo metakiramo someraka, “Rásarase kusua kunikia motosane pipu kitafapo,” aisapo. Airakano kaikia aseane Petene apea Matape Maria tetapō ipi ifia Rásarasepoko himu nekea torapaka mapirahoasimo, Yu aporo hinamo yakaimo ararehoko pekea risikino asesapo. Petene apeane Yarusarame siti aeyaka makesakipoko aporo soko, hinamo soko, yakai pesapo.

²⁰ Arirakano Yasu apererakano Matamo e sapenako puraka, Maria ape yia kakeno, Mata pukua Yasuaki someraka, ²¹ “Unihaeo, né wo reasatiki nōmo papāne kukufunufapo. Asiamo e kusuapo. ²² Asiane yumo nōmo Kotiaki wáraka ayikanierakano epo ayiáka rakiakosapo, aíyaka nōmo hemakapurakaripo.”

²³ Airakano Yasumo someraka, “Ní papā maturikia taehokosapo.” ²⁴ Airakano Matamo someraka, “Fa ana maiya amo aporo hinamo su maturikia taerakano e soko maturikia taehokosapo, aíyaka nōmo hemakapurakaripo.” ²⁵ Airakano Yasumo someraka, “Yaiya rekeasimo maturikia taena aporoane anopo. Aporomo anoaki himu hakásaraka rekeno, aporoane kuraka tiki kusuaneo, asiāne turikia pukua yaiya rekeakosapo. ²⁶ Anoyaki yaiya reke anoaki himu hakásaraka hemakapukua rea aporoane kakaro kukusafapo. Someane nōmo kakimarakanare?” ²⁷ Airakano Matamo someraka, “Ao, Unihaeo, nōmo kakimarakanapo. Kotimo hokosa nereapo. Arirakano Kotimo ne unihaeaka rekeasimo murikimasa aporo Keresoane nereapo, aíyaka nōmo hemakapurakaripo,” aisapo.

Yasumo Rásaraseane hamakapuraka hiripusane oyapo.

²⁸ Matamo someaka faraka ipi apea paripuraka aporo hinamo suamo kaiyakohoamo Matamo Mariaki tau someraka, “Tisa pesa rekesapo. Né aseako wárakasapo.” ²⁹ Airakano Mariamo kaikia foaka takahikia puane ³⁰ Yasu apea perafaraka, fana Matamo Yasu sapenekea asesa yia Yasu rekeno aseako pusuapo. ³¹ Purakano Yu aporo hinamomo Mariane mapirahoasimo arareraka toamo aseane Maria foaka takahikia purakano asesapo.

* 11:16: Titimase airakane namo meaka yano horaka Hokosa Tetasa aíyaka somerakaripo.

Asekea hemakapuraka, “Maria kunikia hiripuhoko apure,” aíyaka ipu hemakapukua kekemarape pusuapo.

³² Arirakano Yasu rea Maria pekea kakuna porokoa kake someraka, “Unihaeo, né woreasatiki nōmo papā kukufunufapo.” ³³ Airakano Yasumo aseane Mariamo hiripurakano Yasumo aseane Yu aporo hinamo kekemarakaka pesamo soko hiripurakano asekea, Yasumo himu kára nekea someraka, ³⁴ “Rásarase kusuane kunikia ma motosare?” Airakano ipu someraka, “Unihaeo, aseako peae.” ³⁵ Airakano Yasumo hiripusapo.

³⁶ Hiripurakano Yu aporo sisima metakiramo asekea someraka, “Epo aporo tákeane kára hemakapuraka hiripuane.” ³⁷ Airakano Yu aporo sisima metakiramo someraka, “Aporo hi mesa mafasasamo Rásarase soko kukukohoamo mafahoafunureapo,” aisapo.

Rásaraseane Yasumo maturikia taesane oyapo.

³⁸ Yasu himu kára nekea kunikia pukua aseane kunikia kakarua ekemo mapirisikino asekea ³⁹ someraka, “Ekemo mapirisiane kotomaka kepere mafearasie.” Airakano aporo kusuamo ipi ifia Matamo someraka, “Unihaeo, kunikia motosane pipu kitafapo. Pipu toreraka ikiki yamohokosapo.” ⁴⁰ Airakano Yasumo someraka, “Nōmo néaki fana someraka, ‘Nōmo someane kakimarakano Kotimo wakapu faesa aseakosapo.’ Aíyaka nōmo somesapo.”

⁴¹ Airakano ekemo mapirisiane kotomafearakano asekea Yasumo yapura asekea someraka, “Atao, nōmo néaki wásane nōmo kakimarakano néaki suserakanapo.” ⁴² Maiya suamo nōmo someane nōmo kakimarakano nōmo hemakapurakaripo. Aporo hinamopoko ano pusiesane népo. Aíyaka ipu hemakapusimo nōmo néaki wárakanapo.”

⁴³ Aíyaka kurikuriraka faraka sakepamo someraka, “Rásarase né wo peae.” ⁴⁴ Airakano aporo kusuane pekea, pasumo hokono soko korake soko wamo soko taporaka perakano Yasumo someraka, “E pusimo pasuane fisisie,” aisapo.

“Yasu rusua kukusapo,” aisane oyapo.

Matiu 26:1-5; Maka 14:1-2; Ruki 22:1-2

⁴⁵ Arirakano Yu aporo sisima metakiramo Maria ararehoko pesamo Yasumo Rásarase kusua maturikia taerakano aseraka, ipu Yasuaki himu hakásaraka hemakapusuapo.

⁴⁶ Arirakano Yu aporo sisima metakira Fere se aporo risia pukua, Yasumo rakisiene somesapo. ⁴⁷ Somerakano Fere se aporo soko, pirisiti aporo soko, namina sarimaraka someraka, “Yasuane isiapo mayiakakosare? Epo kakaro wakapuaka rakirakanapo. Isiapo eane matasohoko mayiáka rakiakosare? ⁴⁸ Epo someane rukupatehoanafonorakano, aporo suamo epo someane kakimakosapo. Kakimarakano Rome kamani aporomo Kotimo apeane rakaritaehokosapo. Rakaritaeraka isu Yu aporo hinamo su rusua kukusapo.”

⁴⁹ Airakano aporo meta ipi yano motosa Kaiafasapo. Keremisi amo Kaiafase pirisiti aporo fanaraka reapo. Kaiafasemo someraka, “Re himeteraka arisesie.” ⁵⁰ Aporo hinamo su kukua keane siahoasifareapo. Aporo hinamo supoko aporo hakásu kuane siahoasireapo.”

⁵¹ Aíyaka somesane Kaiafasemo ipi hemakapusua anaka somesafapo. Keremisi amo e pirisiti aporo fanarakareasamo Kotimo makata keseke ayiakakosane tarirakanano somesapo. Keseke ayiakakosane Yasu ipi Yu aporo hinamo supoko farimaka kukusane somesapo. ⁵² Yu aporo hinamo hákasapoko kukusane somesafapo. Aporo hinamo metakira soko Kotiaki himu hakásaraka risiane kekepo rosaka tarisia ane sarimahoasimo e kukusapo, aisapo. ⁵³ Aisa sereamo Fere se aporope pirisiti aporo namina Yasu rusua kukusakipoko hemakapukua ikia kosapo.

⁵⁴ Asiamo Yu aporo hinamo risiakipoko Yasu kakamaraka koraka reafapo. Yao kauane makeraka Eferaime taonea pukua wakareapo. Apea ipi aporo hakásu purayaki waka risiapo. ⁵⁵ Yu aporomo Ape Farimaresa Hemakapuko Hokono Keakosa maiyane makerakano Yu aporo hinamo yakai namina himu watikisa mafahoasimo namina hauaka metakarikia Yarusarame sitia hisiapo.

⁵⁶⁻⁵⁷ Hikia Kotimo apea yororakano pirisiti aporo káramo soko Fere se aporomo soko someraka, “Repo Yasu aseraka isuaki somehoanie.” Aíyaka ipu Yasu tipura makeako

somerakano aporo suamo Yasu aseako kokoa namina susu me rukua someraka, “Hokono akera wo Yasu peanarakapo. Repo metakiramo mayíáka hemakapurakanare?” Aíyaka namina susu me rukua somesapo.

12

Petene apea makata wape yamona Yasu korakea rekemaresane oyapo.

Matiu 26:6-13; Maka 14:3-9

¹ Ape Farimaresa Hemakapuko Hokono Keakosakipoko sere namasu rekeasimo Yasu Petene apea pusuapo. Pukua Rásarase kusuane Yasumo maturikia taesa reamo apea Yasu pusuapo. ² Pukua Rásarasemo apea Yasu perakano, Yasupoko makata nakosa paisiapo. Paikia Rásarasepe Yasu tetā aporo metakirayaki teporo makeraka tokeno, Matamo makata nakosa paikia kasapo.

³ Arirakano Mariamo petoroa makata wape yamona yano motosa nate kesane maka pekea, Yasu korakea makata wape yamonane mone káramo roposane rekemarekea, Mariamo ipi uni itimo hokesapo. Hokerakano aporo suamo makata wape yamonane yamosapo.

⁴ Yamorakano Yasumo aporo hakása pura hakása meta Yutase Isekerio epo keseke Yasuane parakehokosa aporoamo someraka, ⁵ “Mone siufa tiri harotemo (300) makata wape yamona petoroa kesane roporaka aporo makata forosaki kakafokore.” ⁶ Aisane aporo makata forosaki kakaro kakakosapoko hemakapukua somesafapo. Yutaseane ipi hakimora aporo reasamo somesapo. Arirakano aporo hakása pura suamo moneane sarimaraka pausia kekea, Yutasemo asekea reapo. Asekea reke mone metakira epo tau hakimosapo.

⁷ Arirakano Yasumo Yutaseaki someraka, “Hinamoamo ipi rakiako hemakapusuane rakirie. Makata wape yamonane ano kukusa kauane makotehoko rekeamarere. Ano kukusane hemakapukua murikimaka rekeamarere. ⁸ Maiya suamo aporo makata forosane reyaki hakása yia risikiakosapo. Arirakano maiya suamo ano reyaki hakása rekeakosafapo.” Aíyaka Yasumo somesapo.

“Rásarase rusua kukusapo,” aisane oyapo.

⁹ Yasu Petene apea rekenapakano aporo hinamo yakaimo kairaka aseako pusuapo. Ipu Yasuane soko, Rásarase kusua maturikia taesane soko, aseako pusuapo. ¹⁰ Purakano pirisiti aporomo someraka, “Rásarase soko rusua kukusapo.” Aíyaka hemakapukua risiapo.

¹¹ Rásarase maturikia taesakipoko, Yu aporo sisima yakaimo pirisiti aporomo someane metakarikia, Yasuaki patera aserakano, pirisiti aporomo saperaka Rásaraseane rusua kukusapo, aisapo.

Yasu Yarusarame sitia pusuane oyapo.

Matiu 21:1-11; Maka 11:1-11; Ruki 19:28-40

¹² Ere hakása waka Yarusarame sitia hokono keakosakipoko aporo yakai sarimasa amo Yasu apererakano kaikia ¹³ namina hiriki pateke mokoa e aseako pukua, e perakano asekea, sakepamo wáraka, “Isiapo Kotiaki kekererakanapo. Unihae Kotimo ne pusiesamo epo né yano motosane makárarakanapo. Yu aporomo Unihae kárane népo.” ¹⁴ Airakano Yasu saro tokia ripaka pusuapo. Wate fana Kotimo sawia poparaka, ¹⁵ “Saeone apea* risia aporo hinamo re namohokopo. Repo Unihaeane saro toki matia ripaka peakosapo.” Aíyaka wate fana popasane apera ayareapo. *(Sekaraia 9:9)*

¹⁶ Yasu saro toki matia ripaka pesa maiya amo aporo hakása puramo fana Kotimo sawia popasa amo kepoane hemakapusuafapo. Asiâne Yasu hepene yapura hisiakipoko ipu hemakapuraka, “Fana Kotimo sawia poparaka aporo Unihae ayíáka peakosapo, aisane Yasu perakasu ayareapo.” Aíyaka Yasu hepene yapura hisiakipoko keseke ipu hemakapusuapo.

* 12:15: Yarusarame sitiane ūri Saeonea kisiapo. Asiasamo Yarusarame sitiane yano meta, Saeone ape, airapo.

¹⁷ Arirakano Yasu Yarusarame sitia apererakano aporo hinamo yakaimo aseako pusuapo. Yasumo Rásarase kusuane maturikia taerakano, aporomo soko hinamomo soko ipu metakiramo asesamo pekea somerakano, aporo hinamo metakiramo kaikia Yasu apererakano aseako pusuapo.

¹⁸ Kotimo wakapuaka rakirane rakisiapakano Yasuane aseako pusuapo. ¹⁹ Purakano Fere se aporomo asekea namina susu someraka, “Isiapo someane aporo hinamo suamo metakarikia, Yasumo someane kakimaka e patera asere. Yasumo isiapo hemakapusuane marakoane.” Aíyaka Fere se aporomo namina susu somesapo.

Kiriki aporomo Yasu aseako pesane oyapo.

²⁰ Hokono keasiraka risia maiya amo Kiriki aporo metakira Yarusarame sitia Kotiaki kekerehoko hisiapo. ²¹ Hikia Firipiaki somesapo. Firipimo ipi ape sumuane Pesaita taonepo. Ipi hauakane Kariri hauakapo. Firipiaki ipu someraka, “Isiapo Yasu aseako pukuripo.” ²² Airakano Firipi pukua Enituaki someaka, tati hakása pukua Yasuaki somesapo. ²³ Somerakano Yasumo someraka, “Aporomanomo Tákeane anopo. Kotimo nōmo yanoane makáraraka mareasimo ano kukusa maiyane maiya yuyapo. ²⁴ Nōmo kakaro somerakaripo. Makata mano kokomaresane, kauane hauaka toreraka, namo pauaka herapo. Pauaka hekea amo wate sakepamo perapo. Kokomaresane kau torehoanafonoraka namo pauaka herafapo. ²⁵ Makata mano aina ayíáka re soko ayiakakakosapo. Hauaka wo aporomo ipi kaum rakirane mahimuraka rekeno, ipi namo kakaro yaiya rekeakosane metakirakanapo. Hauaka wo kaum rakirane metakarikia, patera tarirakano, ipi namo kakaro yaiya rekeakosapo.

²⁶ Aporo hinamo hakása metamo nōmo arakira ayíáka rakiako hemakapurakanone ane, anoaki patera asekea kekemahoanie. Asiamo ano rea nōmo makata rakira aporo hinamo ane anoyaki hakása risikiakosapo. Nōmo makata rakira aporo hinamo ane Kotimo makárahokosapo.” Aíyaka Yasumo somesapo.

Yasumo someraka, “Ano kukusapo,” aisane oyapo.

²⁷ Yasumo someraka, “Ano kukusane hemakapukua himu nenakaripo. Ataki maíyaka somehoanarakapo. Atao, maiya yumo ano kurapaka ararehoanie, aíyaka somehokosafapo. Kukusakipoko ano hauaka wo pesapo. ²⁸ Atao, aporomo né kekerehoasimo ní yano motosa máfahoanie.” Airakano hepene aeyaka Kotimo someraka, “Aporomo ano kekerehoasimo nōmo yano motosa fana máfasapo. Efera hunia soko nōmo yano motosa máfahokosapo.”

²⁹ Aíyaka hepene aeyaka somerakano aporo hinamo su sarimaraka risiam kairaka, “Kikirirakae,” airakano ipu metakiramo someraka, “Wae, hepene aporomo eaki makata somerakae.” ³⁰ Airakano Yasumo someraka, “Nōmo kaiyisimo hepene aeyaka somerakarifapo. Repo kaiyisimo somerakae. ³¹ Hauaka wo aporo hinamomo makata watikiaka rakisiakipoko Kotimo hukurukusapo. Arirakano hauaka wo Satane unihaeaka reane epo wakapuane rukumosaka tapiakosapo. Asiamo Kotimo ayiakakosane pipu maiya yumo kepo marerakanapo. ³² Arirakano ano ira matopesa paremarekea máfaraka mapoana maiya amo aporo hinamo suamo anoaki himu hakásaraka hemakapusimo nōmo kirimahokosapo.”

³³ Aíyaka e aporomo ira matopesa paremarerakano kukusane Yasumo somesapo. ³⁴ Aíyaka somerakano aporo sarimasamo someraka, “Kotimo sawia popasane oyapo. ‘Kotimo unihaeaka rekeasimo murikimasa aporo Keresoane yaiya rekeakosapo.’ Aíyaka popasa nine nōmo someraka, ‘Aporomanomo Tákeane ira matopesa paremareakosapo.’ Airakane marirakano aíyaka somerakanare? Aporomanomo Tákeane epare?”

³⁵ Airakano Yasumo someraka, “Faesane reyaki maiya wakasema rekeakosapo. Faesa reyaki area sereamo koteaka punie. Katorakano koteaka purafapo. Katosa amo ikia kara pukusane mahimeteraka risirapo. ³⁶ Ano faesa rekeno faesa aki† himu hakásaraka

† 12:36: Faesane kepoane Yasu ipipo.

hemakapukua risikinone, re su faeraka risikiakosapo.” Aíyaka Yasumo some kaka faraka, e tau pukua ipu aseakohoamo farareapo.

Yasumo some kayane Yu aporo sisimamo kakipayasane oyapo.

³⁷ Yasumo ipi wakapumo hemakapukua rakirakano yia, ipu himo asekeea asekepayasapo. Asekepayaraka eaki himu hakásaraka hemakapusuafapo. ³⁸ Aesayamo someraka ayiakakosaposane kakaro yanakano yia ipu asekepayasapo. Fana Aesayamo someraka, “Unihaeo, nómō someane isiapo some kasane ipu kakimasafapo. Unihae, nómō wakapumo hemakapukua rakirane isuaki tarisiane ipu asekepayasapo.” (*Isaia 53:1*)
³⁹ Aíyaka Aesayamo someraka kakipayana kepoane hemakapusimo some meta some kasapo. Some metane oyapo.

⁴⁰ “Asekepayasa aporo hinamoamo himo aseakohoamo hiane Kotimo makatosapo. Himumo hemakapukohoamo himu mahimetena. Fana Kotimo some kakipayaraka ipu keseke someraka, ‘Kotimo isiapo makata watikisane mafahoasimosapo.’ Aíyaka hemakapukua risikiako parinapaka i himuane Kotimo mahimetesapo. I hiane makatosapo.” (*Isaia 6:10*)

⁴¹ Aíyaka Aesayamo somesapo. Fana Yasu peasiraka Yasumo faesane Aesayamo asekeea aíyaka somesapo. Yasumo someane aporo hinamomo kakipayahokosane Aesayamo somesapo.

⁴² Arirakano aporo hinamo metakiramo soko, Yu aporo fanaraka risia aporo metakiramo soko Yasumo someane kakimasapo. Kakimarakan Fere aporomo kairaka iaki hukururapaka i namoraka risiapo. Fere aporomo iaki someraka, “Yu aporomo sarimana apea peakopo,” airapaka Yasuaki risikiako parisane aporo suaki hufitaeraka somesafapo. ⁴³ Aporo metakiramo “Ne kotesafapo,” airapaka hufitaeraka somesafapo. Aporo metakiramo “Ne kotesapo,” aihoasimo aporomo someane makama fanasapo. Kotimo “Né kotesapo,” aihoasimo someane makama fanasafapo.

Yasumo somesane oyapo.

⁴⁴ Aporo hinamo suamo kaiyisimo Yasumo sakepamo someraka, “Aporo hinamomo anoaki himu hakásaraka hemakapukua risikinone, Kotimo ano pusiesa aporoaki soko himu hakásaraka hemakapukua risikinapo. ⁴⁵ Repo ano aseraka ano pusiesa Kotiane soko repo aserakanapo. ⁴⁶ Hauaka wo ano faeraka pesapo. Faeraka perakano aporomo nómō someane kakimaraka katosane metakarikia faeraka risikiakosapo.

⁴⁷ Aporo hinamo suane mafasiako ano pesapo. Aporo hinamoane hukuruko ano pesafapo. Arirakano aporo hinamomo nómō someane kaikia kakipayarakano, aporo hinamoane nómō parakuraka hukurukusafapo. ⁴⁸ Aporo hinamomo anoaki patera tarikia, nómō someane kakipayasa, some yiamo iane hukurukusapo. Pipu nómō somesane ipu kakipayasakipoko hukuarura maiya amo somesa ane fasereperaka somesa amo iane hukurukusapo. ⁴⁹ Nómō someane nómō nī hemakapusua aeyaka somerakanafapo. Atamo ano pusiesamo someaka maresane nómō somerakanapo. ⁵⁰ Someane aporo hinamomo kakimarakan i yaiya risikiakosapo, aiyáka nómō hemakapurakaripo. Asiamo Atamo anoaki someaka maresane nómō reaki some karakanapo.” Aíyaka Yasumo somesapo.

13

Yasumo ipi aporo hakāsa purane korake kususane oyapo.

¹ Ape Farimaresa Hemakapuko Hokono Keakosa maiya ane raupo, aíyaka Yasumo hemakapuraka, “Hauaka one metakarikia Ata rea hauaka yapura hiakosa maiya ane makerakanapo.” Aíyaka hemakapukua, ipi aporo hakāsa purane himu tumurumo hemakapusuapo. Ipi himu tumurumo hemakapusuane tipia metakarisiafapo.

² Ereamo Yasu ipi aporo hakāsa purayaki makata nekea toapo. Makata nekea tokoasiraka Satane pekea Isekerio aporo Saemonemo hokosa Yutase himua someraka, “Nómō Yasu parakehoanie,” aíyaka Yutaseaki somesapo. Somesakipoko keseke namina hakāsa toke makata nesapo.

³ Makata nekea toakipoko Yasumo hemakapuraka, “Atamo wakapu suane anoaki karakano ano siaraka rekenapo. Ano Koti rea aeyaka pesapo. Koti rea yia parihiakosapo.”

⁴ Aíyaka hemakapuraka ipi takahikia pasu kima ososane horomaka, tawero maka otoa sotakamaka, ⁵ tisia he takamaka pukua aporo hakāsa purane korake kusuraka, tawero otoa sotakamasane fatarimaka hokesapo. Aporo raipamo korake kusuraka hokena ayíáka, Yasumo kusuraka hokesapo.

⁶ Saemone Pita rea perakano Saemone Pitamo someraka, “Unihaeo, ano korake kusuhokosare?” ⁷ Airakano Yasumo someraka, “Korake kusuana kepoane repo yumo himeteane. Keseke hemakapurakusapo.” ⁸ Airakano Pitamo someraka, “Yumo soko keseke tipiamo soko, ano korake nōmo kusuhokosafapo.” Airakano Yasumo someraka, “Né korake kusuhoanafonorakanone né anoyaki hakāsa rekeakosafapo.”

⁹ Airakano Saemone Pitamo someraka, “Unihaeo, Korake hákasa kusuhokopo. Korake kusuraka, hokono soko, wamo soko, su kusuhoanie.” ¹⁰ Airakano Yasumo someraka, “He tapuraka kau pikirisane fasakeno, efera hunia kau susu he tapurafapo. Korake hákasa kusunapo. Re su pikirisane faraka, aporo hakāsa meta pikirisa yaiya are.” ¹¹ Aíyaka somesane Yasu ipi parakehokosa aporoane hemakapuraka somesapo.

¹² Korake kusuraka faraka Yasumo ipi pasu kima ososa horomaka motosane, efera hunia osoraka teporo makeraka kake someraka, “Nōmo re korake kusurakasane kepoane repo hemakapurakanare? ¹³ Repo anoaki, ‘Tisao, Unihaeo,’ airakasuane anopo. Repo kakaro airapo. ¹⁴ Repo tisane soko, repo unihaeane soko, anopo. Asiane ano aporo raipa pariraka re korakeane kususapo. Asiamo repo soko namina yia meta korakeane kusuhoanie. ¹⁵ Nōmo ainane reaki tarirakayiapo. Asiamo nōmo repoko raiparaka rakirakasa ayiaka, repo soko aporo hinamo metakirapoko raiparaka rakinie. ¹⁶ Asiamo nōmo kakaro somerakaripo. Aporo raipamo ipi wafayane marokenafapo. Arirakano somehoko pusierakano pesa aporoamo ipi pusiesa aporoane marokenafapo. ¹⁷ Yumo kakaro somesane repo hemaka apure. Hemakapuraka ayíáka rakirakano re seseaka risikiakosapo.

¹⁸ Re suane nōmo somerakanafapo. Yasumo i suaki somerakano yia, Yutasemo Yasumo someane kakimasafapo. Re su nōmo pasimosane repo hemakapusuane nōmo hemakapurakanapo. Asiane fana Kotimo sawia popasane kakaro ayiakakosapo. Aíyaka Kotimo sawia popasane oyapo. ‘Anoyaki hakāsa toke makata nesa aporoamo himu meta fasereperaka anoaki hisiraka yunuraka reapo.’ Aíyaka fana popasane pipu yanakanapo. (*Buk Song 41:9*)

¹⁹ Keseke ayiakakosane pipu nōmo reaki somerakanapo. Áyiana maiya amo repo asekeha hemakapuraka, ‘E kakaro Keresopo. E yaiya rerapo.’ Aíyaka hemakapusimo keseke ayiakakosane pipu nōmo reaki somerakanapo. ²⁰ Nōmo kakaro somerakaripo. Nōmo someane some kakako pusiesa aporoane peraka some karakano, aporo metamo kakimaka, nōmo someane soko kakimarakanapo. Arirakano ano pusiesa Kotiamo someane soko kakimarakanapo.” Aíyaka Yasumo somesapo.

Yasumo someraka, “Ano parakehokosapo.” Aisane oyapo.

Matiu 26:20-25; Maka 14:17-21; Ruki 22:21-23

²¹ Yasu ipi aporo hakāsa purayaki toakipoko ipi himu nekea kake someraka, “Nōmo kakaro somerakaripo. Repo hakāsa metamo ano parakehokosapo.” ²² Airakano aporo hakāsa pura toamo namina susu asekeha someraka, “Eparakapo.” ²³ Aíyaka himeteaka tokeno, aporo hakāsa pura hakāsa metaki Yasumo himu tumurumo hemakapusuane Yasu makeraka kayapo. ²⁴ Kakeno Saemone Pitamo hi pipiraka, “Nōmo Yasuaki kaisie. Aporoane epare? Aíyaka kaisie.” ²⁵ Aíyaka hi pipirakano, Yasumo hemakapusua aporo hakásane tati hakāsa karoraka toke, wamohae hákasa uaka hikia Yasu senakia someraka, “Unihaeo, aporo hakāsa nōmo somerakasane epare?” ²⁶ Airakano Yasumo someraka,

* ^{13:6:} Amo kepoane oyapo. Pitamo hemakapuraka, “Yasumo anopoko raiparaka rakiraka ano korake kusuhoane siahoasifareapo,” aíyaka hemakapusuapo.

“Nōmo farawa maka he waira kokomarekea karakano, aporo ayapo.” Aíyaka epo farawa maka he waira kokomarekea, Isekerio aporo Saemonemo hokosa Yutaseaki kasapo.

²⁷ Karakano farawane Yutasemo masapo. Masa maiya amo Satane pekea epo himuane maparitaesapo. Maparitaerakano Yasumo someraka, “Nōmo rakiakosane foaka rakinie.”

²⁸ Airakano aporo hakāsa pura Yasuyaki hakāsa toamo someane kaikia himetesapo. Ipu metakiramo himeteraka hemakapuraka, ²⁹ “Yutasemo mone pausi aseke reasamo, Yasumo eaki hokono keakosakipoko makata nakosa ropohoko pusierakae.” Aíyaka hemakapusuapo. Arirakano ipu metakiramo himeteaka hemakapuraka, “Aporo makata forosaki mone kakako pusierakae.” Aíyaka i himeteraka toapo.

³⁰ Himeteraka hemakapurakano, farawane Yutase maka foaka takahikia, ere yiamo yaoa pusuapo.

Yasumo somemane kaweane oyapo.

³¹ Yutase pusuakipoko Yasumo someraka, “Aporomanomo Tákeane anopo. Nōmo wakapuanne repo asekeasimo yumo nōmo reaki tariakosapo. Ano aeyaka Kotimo wakapuanne soko reaki tariakosapo. ³² Asiamo Kotimo wakapuanne tarirakano nōmo wakapuanne soko Kotimo tariakosapo. Yumo tariakosa maiya ane makerakanapo.

³³ Hokosa reo, maiya suamo reyaki ano rekeakosafapo. Wakasema nina keseke repo ano kope pukusapo. Ano hinakano re anoyaki hakāsa hiane siahoasifareapo. Some one fana nōmo Yu aporo sisimaki somesapo. Somesa hakāsa yine nōmo reaki somerakanapo.

³⁴ Asiamo somemane kawe haku nōmo reaki some karakanapo. Re namina susu himu tumurumo hemakapukua risikianie. Nōmo re himu tumurumo hemakapukua area ayíáka repo namina yia ayíáka himu tumurumo hemakapukua risikianie.

³⁵ Ayíáka hemakapukua risikino aporo metakiramo aseke someraka, ‘I Yasu patera asesa aporo ayareapo,’ aíyaka somehokosapo.” Aíyaka Yasumo somesapo.

“Pitamo someraka, ‘Yasuane nōmo aserafapo,’ aíyaka kotafe somehokosapo.” Aiyaka Yasumo somesane oyapo.

Matiu 26:31-35; Maka 14:27-31; Ruki 22:31-34

³⁶ Saemone Pitamo someraka, “Unihaeo, né ma hiakosare?” Airakano Yasumo someraka, “Ano hiakosa á yumo né kekemarape hiane siahoasifareapo. Keseke né hiakosapo.” ³⁷ Airakano Pitamo someraka, “Marirakano ano yumo kekemarape hiakosafaporakanare? Nōmo né hemakapuraka népoko ano kukuko hisirakanafapo.”

³⁸ Airakano Yasumo someraka, “Né anopoko kakaro kukusare? Hao, kaisie. Nōmo neaki kakaro somerakaripo. Kokoroko mehoasiraka nōmo ‘Yasuane nōmo aserafapo.’ Aíyaka nōmo yape isiamo kotafe somehokosapo.” Aíyaka Yasumo somesapo.

14

“Ata rea hauaka hiakosa ikia karane anopo,” aíyaka Yasumo somesane oyapo.

¹ Yasumo ipi aporo hakāsa puraki someraka, “Repo kara hemakapukua himu fahokopo. Kotiaki himu hakásaraka hemakapukua risikianie. Anoaki soko himu hakásaraka hemakapukua risikianie. ² Nōmo atamo apea, ape rumu yakai risikinapo. Ape rumu yakai risikianafonosa satiki nōmo reaki aíyaka somehoafunufapo. Re hepene yapura hinaka risikiakosa apeane ano fana hinaka repoko maropohoko hiakosapo. ³ Ano hikia repoko ape maroporaka, siaraka marekea keseke ano rea hauaka isina hakāsa risikiakosakipoko re pasimokoako ano paripeakosapo. ⁴ Asiamo ano rea hauaka hiakosa ikia karane repo hemakapurapo.”

⁵ Airakano Tomasemo someraka, “Unihaeo, né rekeakosa hauakane isu himeteripo. Ikia kara soko, isu himeteripo.” ⁶ Airakano Yasumo someraka, “Ikia karane anopo. Kakaro somerane anopo. Yaiya rera kepoane soko anopo. Re Ata rea hauaka hiakosane ano koaraka hiakosafapo. Anoaki himu hakásaraka risiane hiakosapo. ⁷ Repo ano aseraka nōmo Ata soko aserakanapo. Pipu yumo Ata repo aseke hemakapurakanapo.”

⁸ Airakano Firipimo someraka, “Unihaeo, Atane isuaki tarisie. Tarirakano isiapo aseraka someraka efera hunia tarisie aihokosafapo.” ⁹ Airakano Yasumo someraka,

“Maiya káramo ano reyaki reapo. Asiane Firipio, nōmo ano hemakapurakarifare? Repo ano aseraka nōmo Ata soko aserakanapo. Mayiakako Ata tarisie, airakanare? ¹⁰ Ano Atayaki rekenapo. Atane anoyaki rekenapo. Iti sarimaraka hakásá yineraka risikinapo. Firipio, makata ane nōmo hemakapurakarifare?” Aiyaka ipi aporo hakásá pura susuaki Yasumo someraka, “Reaki makata some akara one nōmo nī hemakapusua aeyaka reaki some karakanafapo. Ata anoyaki reke epo wakapuaka rakirane tarirakano nōmo rakirakanapo. ¹¹ Nōmo Ataki kataka marekea, Atamo anoaki kataka marekea, ayíáka iti hakásá yineraka risikinapo. Nōmo someraka one kakimakanie. Repo kakimakanafonorakano ane, nōmo wakapuaka arakirane repo himo asekea, anoaki himu hakásaraka hemakapunie. Hemakapukua nōmo someane soko kakimakanie.

¹² Nōmo kakaro somerakaripo. Aporo hinamomo nōmo someane kakimaka himu hakásaraka risike, nōmo arakira ayíáka aporo hinamoamo ayíáka rakiacosapo. Ano Ata rea yapura hinaka, Ho Kotesa pusierakano, Ho Kotesa hauaka wo peraka, Ho Kotesamo reaki wakapu karakano, repo nōmo makata rakirane marokeraka repo makata kára rakiacosapo. ¹³ Repo anoaki himu hakásaraka risike ano yano motosa mafanahoko hemakapukua kurikuriraka makata ayikanie, airakano, nōmo ayiakacosapo. Atamo wakapu kárane aporo suamo asekeasimo repo ayikanie airakano, ipi hokosa nōmo ayiakacosapo. ¹⁴ Repo anoaki himu hakásaraka risike ano yano motosa mafanahoko hemakapuraka makata su ayikanie, airakano makata suane nōmo ayiakacosapo.

Ho Kotesa peakosaposane oyapo.

¹⁵ Repo anoaki himu tumurumo hemakapukua risikinone nōmo somemanane soko repo kaikia kekemaraka risikiacosapo. ¹⁶ Kekemaraka risikino nōmo Ataki someraka, re ararehoko Ho Kotesa pusiehoanie, aihokosapo. Airakano Ho Kotesamo re ararehoko Atamo pusiehokosapo. Pusierakano peakosapo. Peraka Ho Kotesa reyaki yaiya rekeacosapo. Ho Kotesane Kakaro Somera Hoane epo.

¹⁷ Ho Kotesane nena aporo hinamomo, ‘Isuyaki hakásá reae,’ airafapo. Epo ainane ipu aserafapo. Arirakano eane ipu hemakapurafapo. Arirakano repo Ho Kotesane hemakapurapo. Yumo Ho Kotesa reyaki rekenapo. Keseke re himua hakásaraka Ho Kotesane rekeacosapo.

¹⁸ Arirakano réane karaiya hokosa ayíáka risikiasimo nōmo re metakariakosafapo. Ano paripeakosapo. ¹⁹ Arirakano maiya wakasema nina kakimakanafonona aporo hinamoamo ano efera hunia aseakosafapo. Arirakano repo anoane aseakosapo. Ano yaiya rekeakosasamo, re soko yaiya risikiacosapo. ²⁰ Maiya amo ano Atayaki reke, arirakano re anoyaki reke, arirakano ano reyaki reke, ayíáka isina su hakásá risike repo hemakapukusapo. ²¹ Nōmo somemanane kaikia kekemara aporo hinamoamo anoaki himu tumurumo hemakapurapo. Anoaki himu tumurumo hemakapusua aporo hinamoane nōmo Atamo himu tumurumo hemakapukusapo. Aporo hinamoaki, nōmo soko himu tumurumo hemakapukusapo. Ipu ano kakaro koteaka hemakapusimo nōmo ainane iaki tariakosapo,” aisapo.

²² Airakano Yutasemo Yasuaki makata somesapo. Arirakano Isekerio aporo Yutase Yasu parakesa ayafapo. Epo ipi yako Yutase metamo someraka, “Unihaeo, nōmo ainane isuaki hákasa tarikia, nena aporo hinamoaki tariakosafapo, airakane mairakare?”

²³ Airakano Yasumo someraka, “Aporo hinamomo anoaki himu tumurumo hemakapurakanano nōmo someane soko aporo hinamoamo kaikia kekemahokosapo. Kakimara aporo hinamoaki nōmo Atamo soko himu tumurumo hemakapukusapo. Aporo hinamo akiyaki Ata eto risikiacosapo.

²⁴ Arirakano aporo hinamomo anoaki himu tumurumo hemakapurafonorakano, aporo hinamoamo nōmo someane kakimakosafapo. Nōmo some karakano repo kaisiane nōmo nī hemakapusuane reaki some kasafapo. Atamo ano pusiesamo epo hemakapusuane nōmo reaki some kasapo. ²⁵ Yumo ano reyaki areamo some karakanapopo.

²⁶ Keseke Atamo ano yano motosa mafanaraka re ararehoko Ho Kotesa pusiehokosapo. Pusierakano re himua Ho Kotesa peakosapo. Peraka repo makata su enomaka

hemakapusimo epo some kakakosapo. Nōmo somerakano repo kaisiane efera hunia hemakapusimo repo himura Ho Kotesamo mahemakapukusapo.

²⁷ Arirakano nōmo tau auaraka rerane reaki karakanapo. Hauaka wo aporomo tau auaraka rerane reaki ayiáka karafapo. Nōmo auaraka rerane reaki karakanapo re himu faraka namoraka risikiakopo. ²⁸ Nōmo fana someraka, ‘Nōmo reane metakarikia ano hikia, keseke re arisia paripeakosapo.’ Aisane repo kaisiapo. Repo himu tumurumo anoaki hemakapuraka, nōmo Ata rea hiakosaposane kaikia seseaka hemakapunie. Atane namo kakaro fanaraka reke, Ata patera ano rekenapo. E rea ano hiakosapo aisane repo kaikia seseaka hemakapunie. ²⁹ Ano hiasiraka area omo reaki somerakanapo. Nōmo someane repo kakimakasimo keseke ayiakakosane, yumo nōmo reaki somerakanapo. Ano hinakano repo aseraka nōmo someane kakimakosapo. ³⁰ Arirakano reaki somehokosa maiyane fahoko makerakanapo. Hauaka omo unihae Satane peako makeraka rekenapo. Satanemo ipi wakapumo ano hurutapirafapo. Epo anoaki ayikanierakano nōmo kakimarafapo. ³¹ Atamo ayikanierakano nōmo kakimarapo. Ataki nōmo himu tumurumo hemakapurapo. Nōmo Ataki himu tumurumo hemakapukua reane aporo hinamo suamo hemakapusimo, nōmo Atamo ayikanierakano nōmo kakimarapo. Arirakano yumo nōmo someane yiyo. Re su takahisie. Isu purakapo.” Aiyaka Yasumo somesapo.

15

Yasumo someraka, “Kakaro sako karepe kepo asiāne anopo,” aisane oyapo.

¹ Yasumo someraka, “Kakaro sako karepe* kepo asiāne anopo. Sako karepe hemo wafayane nōmo Atapo. ² Anoa eyamo kataka marekea reke wate peanafonosane, hemo wafayamo eya ane popateraka mokoatenapo. Arirakano eyamo kataka marekea reke wate pesane efera hunia peasimo eyane horoposane hako kepo tipia popatenapo. Popateraka kepo aeyaka efera hunia susuniraka wate yakai koteaka perapo. ³ Asiamo repo nōmo someane kakimasasamo repo makata watikisane nōmo someamo popateraka mokoatesapo. ⁴ Re anoyaki reke, ano soko, reyaki reke, ayiáka isina hakāsa sarimaraka risikiakosapo. Sako karepe eya foanepekeha hauaka kake ipi hemakapukua wate perafapo. Sako karepe eyamo kepoa kataka marekea rekeno wate perapo. Wate pekeha area ayiáka repo anoaki himu hakásaraka kataka marekea risike koteaka rakipe puraka risikiakosapo.

⁵ Sako karepe kepo asiāne anopo. Sako karepe eya asiāne repo. Repo anoaki kataka marekea risikino, nōmo kepo aeyaka sisipuane eya pukua, wate pekeha arisia ayiáka re ayiáka risikiakosapo. Anoaki kataka marekea risikianafonoraka, wate peanafonoraka arisia ayiáka re ayiáka risikiakosapo. ⁶ Anoaki kataka marekea risikianafonosa aporo hinamoane sako karepe eya pateke mokoatesa asiapo. Pateke mokoatesane yoferaka poranapo. Porasa mokoatesane su sarimaraka faturaka ira paikimarerapo.

⁷ Repo anoaki himu hakásaraka hemakapukua risike, nōmo someane repo kaki-maka hemakapukua kekemaraka rakipe puraka, repo anoaki ayikanierakano nōmo ayiakakosapo. ⁸ Arirakano wate apera ayiáka nōmo some kakimara aporo hinamoane namo kakaro koteaka risikiakosapo. Ayiaka risikino aporo hinamo metakiramo asekeha nōmo Atane makarahokosapo. ⁹ Atamo anoaki himu tumurumo hemakapukua area ayiáka, nōmo soko reane ayiáka himu tumurumo hemakapukua rekenapo. Nōmo himu tumurumo hemakapusuane repo metakariakopo. Yaiya maka risikianie. ¹⁰ Atamo someane nōmo kakimarakanano Atamo ano yaiya himu tumurumo hemakapukua reke-napo. Hemakapukua area ayiáka, nōmo somemanre soko repo kakimarakanano, re soko, nōmo yaiya himu tumurumo hemakapukua rekeakosapo.

¹¹ Nōmo sesenane reyaki risikiasimo nōmo reaki somerakanapo. Nōmo someane kakimaraka repo kára seseraka mapiraraka siaraka mokoasimo hemakapurakaripo.

¹² Nōmo somemanre oyapo. Nōmo re himu tumurumo hemaka apura ayiáka, repo namina

* 15:1: Sako yano motosa sako karepe. Karepe wate perakano aporomo tumokoa metekeraka waene he rakirapo.

ya ayiáka himu tumurumo hemakapunie. ¹³ Aporomo ipi aporo tákepoko farimaka kurane ane, himu tumurumo hemakapusuane namo kakaro fanapo.

¹⁴ Nōmo somemané repo kaikia kekemarakano reane nōmo tákepo. ¹⁵ Yumo reaki nōmo aporo raipapo, airakanafapo. Asiamo aporo raipaki wafayamo ipi hemakapusuane somerafapo. Arirakano Atamo anoaki somesane makata su reaki nōmo somerakanapo. Aporo tákeki somera ayiáka nōmo reaki somerakanapo.

¹⁶ Repo ano murikimaka pasimasafapo. Nōmo reane murikimaka pasimosapo. Asiamo sako wate pekea arisia ayiáka re ayiakasimo nōmo reane pasimokoa murikimaka makata rakiako pusiesapo. Wate yaiya peraka risikiasimo murikimaka makata rakiako pusiesapo. Pusierakano repo ano yano motosa mafanaraka hemakapukua risike, Ataki ayikanierakano epo ayiakakosapo. ¹⁷ Arirakano nōmo reaki somemané akara oyapo. Repo namina yia metamo metane himu tumurumo hemakapukua, arirakano metamo metane himu tumurumo hemakapukua ayiáka risikianie.” Aíyaka Yasumo somesapo.

“Aporomo reaki hisihokosapo,” aisane oyapo.

¹⁸ Arirakano Yasumo someraka, “Aporomo reaki hisirakanone, anoaki fana hisisane, repo hemakapunie. ¹⁹ Re nena aporoyaki paosa satiki ipu reaki himu tumurumo hemakapufunupo. Arirakano nōmo re pasimokoa murikimasasamo re nena aporoyaki paosafapo. Re iyaki hakāsa yinehoanafonosasamo ipu reaki hisihokosapo. ²⁰ Fana nōmo reaki somesane meraruhokopo. Somesane oyapo. ‘Aporo raipamo ipi wafayane marokenafapo.’ Aíyaka fana nōmo somesapo. Asiamo nena aporomo ano mokoatikira ayiáka, re soko mokoatikihokosapo. Arirakano nōmo someane ipu kakimarakano, repo someane soko kakimakosapo.

²¹ Repo ano patera asesasamo ipu re mokoatikihokosapo. Kotimo ano pusiesane namina hemakapurakanafapo. ²² Ano hauaka wo peraka makata watikiaka rakirane kakama somesapo. Somesasamo ipu makata watikiaka rakisiane hufitaeraka metakariafunupo. Asiāne nōmo someane ipu kaikia, makata watikiaka rakisiane metakarirafaraka, yaiya asekepayarakano, ipu makata watikisa amo iane hukurukusapo. Aporo hinamomo makata watikiaka rakisiane metakarisimo, nōmo somehoko peanafonosa satiki ipu makata watikisane meraruamo yaiya rakiafunupo. ²³ Arirakano anoaki hisisa aporo hinamomo nōmo Ataki soko hisirakanapo. ²⁴ Nōmo wakapuaka rakisia ayiáka, fana aporo hakāsa metamo ayiáka wakapuaka rakisiafapo. Nōmo wakapuaka rakianafonosa satiki aporo hinamo metakiramo hemakapuraka, ‘Wakapuaka rakirane isiapo asesafapo,’ aihoafunupo. Asiāne nōmo wakapuaka rakisiane ipu asekeea asekepayarakano, ipu makata watikiaka rakisiane metakarisiafapo. Metakarianafonosasamo ipu makata watikisa amo iane hukurukusapo. Nōmo wakapuaka rakisiane aporo hinamomo asesapo. Asekeea yia anoaki soko, Ataki soko, hisiraka risikinapo.

²⁵ Arirakano fana Kotimo sawia popasane oyapo. ‘Ipu namina anoaki nenakamakaya hisihokosapo.’ Aíyaka fana poparaka *(Buk Song 35:19; 69:4)*

ayiakakosaposane yumo yainakananapo.

²⁶ Arirakano Ho Kotesa re ararehoko peakosane Ata rea aeyaka peakosapo. Kakaro someane aporo hinamomo hemakapusimo some kaka, arirakano tarikia, ayiakako peakosapo. Ano Ata rea yapura hinaka Ho Kotesamo re ararehoasimo nōmo Ataki someraka, Ho Kotesa pusiehoanie, aihokosapo. Airakano Atamo pusiehokosapo. Pusierakano peakosapo. Peraka anoane kakaro tarikia some kakakosapo. ²⁷ Arirakano hauaka wo koraka reke nōmo makata kepomarekea rakisia maiya amo re anoyaki hakāsa risiapo. Maiya suamo isina hakāsa risirasamo ano asesane repo aporo hinamo metakiraki some kakanie.” Aíyaka Yasumo ipi aporo hakāsa puraki somesapo.

16

¹ Yasumo ipi aporo hakāsa puraki someraka, “Repo anoaki himu hakásaraka hemakapusuane metakarirapaka, keseke ayiakakosane yumo nōmo reaki some akara oyapo.

² Keseke ano patera asekeanafonosa aporoamo reaki someraka, ‘Yu aporomo sarimana

apea Kotiaki kekerehoko peakopo,’ aihokosapo. Ipu re kukusimo rukusapo. Rukua someraka, ‘Isiapo Kotimo rakirane rakiraka reane rurakanapo,’ aíyaka somehokosapo. ³ Aporoamo Kotiane soko anoane soko hemakapunafonosasamo reane mokoatikihokosapo. ⁴ Mokoatikihokosane nōmo yumo someraka one keseke re mokoatikiana maiya amo nōmo somesane repo hemakapukusapo. Hemakapukua risikiasimo keseke ayiakakosane yumo nōmo reaki somerakanapo.” Aíyaka Yasumo somesapo.

“Ho Kotesa peakosapo,” aisane oyapo.

⁵ Yasumo someraka, “Fana isina hakāsa risikisuamo some one nōmo reaki somesafapo. Asiamo Kotimo ano pusiesa amo hauaka hiakosakipoko yumo nōmo reaki somerakanapo. Somerakano repo anoaki someraka, ‘Ne ma hiakosare?’ airakarifapo. ⁶ Nōmo somerakano repo kairaka kára hemakapukua himu nekea atoae. ⁷ Asiamo nōmo kakaro somerakaripo. Re makotehokosakipoko ano hinakanapo. Ano hianafonorakanone, Ho Kotesamo re ararehoko peakosafapo. Ano hinaka Ho Kotesaki pusierakano Ho Kotesamo re ararehoko peakosapo. ⁸ Peraka aporo hinamo su hauaka wo risiaki hakāsa hakásaraka someraka, ‘Nōmo watikiaka rakisiane ayapo. Arirakano makata ereketae aina susuane ayapo. Arirakano aporo hinamomo watikiaka rakisiane Kotimo hukurukusapo.’ Aíyaka Ho Kotesamo tarikia somehokosapo. Arirakano aporo hinamomo hasaka hemakapusuane Ho Kotesamo tariakosapo.

⁹ ‘Asiamo aporo hinamomo anoaki himu hakásaraka hemakapukua risikianafonarakano ane makata watikisamo kepoane ayapo.’ Aíyaka makata watikisamo kepoane Ho Kotesamo tarikia somehokosapo.

¹⁰ Arirakano kakaro ereketae somera aporoane anoreapo, aíyaka hemakapusimo Ho Kotesamo reaki tariakosapo. Asiamo ano makáraraka marerakano, Ata rea ano hinakano repo ano aseakosafapo. Asekeanafonona maiya amo ereketae somera aporoane ano reapo, aíyaka repo hemakapukusapo. Hemakapusimo Ho Kotesamo tarikia somehokosapo.

¹¹ Arirakano hukurukusa amo kepoane Ho Kotesamo reaki tariakosapo. Ano hauaka wo pesasamo hauaka wo unihae Sataneane Kotimo rukumosakatapisiapo. Rukumosakatapisiane Ho Kotesamo reaki tarikia somehokosapo.

¹² Arirakano makata metakira soko nōmo somehokosapoko asiane some kárasasamo repo hemakapusifareapo. ¹³ Arirakano Ho Kotesa aperamo kakaro some kepoane repo hemakapusimo epo kakaro some susuane reaki some kakakosapo. Epo hemakapusua aeyaka somehokosafapo. Nōmo someane soko Atamo someane soko epo kaisiane reaki somehokosapo. Keseke ayiakakosane soko somehokosapo. ¹⁴ Epo ano makárahokosapo. Nōmo ainane epo reaki somehokosapo. ¹⁵ Atamo menane nōmenapo. Asiamo nōmo ainane repo hemakapusimo Ho Kotesamo reaki somehokosapo.” Aíyaka Yasumo somesapo.

Himu nekea risirane metakarikia himu seseraka risikiakosane oyapo.

¹⁶ Yasumo ipi aporo hakāsa puraki someraka, “Wakasema risina repo ano aseakosafapo. Arirakano wakasema risina repo anoane efera hunia aseakosapo.”

¹⁷ Airakano aporo hakāsa puramo namina susu someraka, “Yasumo ipi someraka, ‘Wakasema risina repo ano aseakosafapo. Wakasema risina repo ano efera hunia aseakosapo.’ Aíyaka Yasumo some meta someraka, ‘Ata rea ano hiakosasamo repo ano aseakosafapo.’ airakane kepoane yakaparakapo.

¹⁸ Yasumo someraka, ‘Wakasema risina,’ aíyaka somerakane kepoane yakaparakapo. Isu himeteripo.” ¹⁹ Airakano Yasumo someraka, “Wakasema risina repo anoane aseakosafapo. Arirakano wakasema risina repo anoane efera hunia aseakosapo, aíyaka nōmo somehoane repo namina susu me arure. ²⁰ Nōmo reaki kakaro somerakaripo. Ano rusua kurakano hauaka wo anoaki hisiraka risia aporo hinamomo kára sesehokosapo. Asiāne repo anopoko hemakapuraka hihiripuhokosapo. Repo hihiripusane faraka sesehokosapo.

²¹ Arirakano hokosa takapeakosakipoko hinamo kau teraka karápo. Takapekeea hokosa maka kake, kau tesane soko, kau nenakasane soko, faraka, meraruraka, seseraka karápo. Aporo hokosa takapesasamo seseraka karápo. ²² Aina ayíáka yumo re soko himu nekea risikinapo. Wakasema risina ano maturikia taeraka re aseako perakano, re seseraka risikiakosapo. Repo sesenane yaiya risikiakosapo. Aporo metamo re mokoatikianamo soko, makata umisa fasere aperamo soko, repo sesenane yaiya risikiakosapo.

²³⁻²⁴ Ano turikia pukua hepene yapura ahira maiya amo repo anoaki kaiyakosafapo. Ataki kaikia kurikurihokosapo. Repo ano yano motosane makama fanaraka hemakapukua Ataki ayikanierakano epo ayiakakosapo. Fana soko yumo soko ano yano motosane makama fanaraka hemakapukua repo Ataki ayikaniesafapo. Kára seseraka mapiraraka risikiakosakipoko Ataki ayikanierakano epo ayiakakosapo. Nōmo reaki kakaro somerakaripo." Áiyaka Yasumo somesapo.

Satanemo wakapuane Yasumo rukumosakatapisiane oyapo.

²⁵ Yasumo ipi aporo hakāsa puraki someraka, "Fana nōmo reaki takumeaka somesapo. Asiamo keseke Atane nōmo kakama hufitaeraka somehokosa maiyane makerakanapo.

²⁶ Maiya amo repoko nōmo Ataki kaiyakosafapo. Repo ano yano motosa makama fanaraka hemakapukua risike, repo namina yiamo Ataki kaiyakosapo. ²⁷ Ano Koti aeyaka pesane repo kakimaka, arirakano repo anoaki himu tumurumo hemakapukua asiasamo Kotimo reane himu tumurumo hemakapukua rekenapo. ²⁸ Ata rea aeyaka ano hauaka wo pesapo. Pekea wakasema nina hauaka one metakarikia Ata rea yapura parihiakosapo."

²⁹ Airakano aporo hakāsa puramo someraka, "Nōmo takumeaka somesane metakarikia, yumo isuaki kakama hufitaeraka somerakae. ³⁰ Makata suane nōmo hemaka apure. Isiapo neaki kaiyakosane, kaiyasiraka nōmo ní hemakapukua somerapo. Asiamo né kakaro Kotimo pusiesapo, aiyaka isiapo hemakapurakaripo." ³¹ Airakano Yasumo someraka, "Repo anoaki kakaro himu hakásaraka hemakapukua risikinare? ³² Maiya wakasemamo risina, repo ano metakarikia repo namina ape kekepoa tekatarikia pukusapo. Tekatarikia purakano ano ni haku rekeakosapoko asiane Ata anoyaki rekeakosapo.

³³ Repo anoaki himu hakásaraka risike namonane faraka, mapiraraka risikiasimo, keseke ayiakakosane nōmo somerakanapo. Hauaka wo aporomo re mokoatikihokosapo. Mokoatikirakano yia, namonafaraka paroaka risikianie. Hauaka wo anoaki yunuraka risia aporo hinamoane nōmo wakapumo rukumosakatapisiapo." Áiyaka Yasumo somesapo.

17

Yasumo ipi aporo hakāsa purapoko kurikurisane oyapo.

¹ Yasumo ipi aporo hakāsa puraki someaka faraka, hepene yapura asekea kurikuriraka, "Atao, nōmo fana ayiakakosaposane maiya omo ainakanapo. Nōmo né makárahoasimo nōmo ní hokosa anoane makáraraka mareanie. ² Aporo hinamo suane nōmo unihaeaka asekea rekeasimo nōmo ano maresapo. Asiamo aporo hinamo nōmo murikimaka anoaki kasane nōmo iane asekea reke, yaiya risirane iaki kasapo. ³ Asiamo yaiya risirane kepoane oyapo. Atao, kakaro Koti hákasané népo. Arirakano Yasu Kereso hauaka wo pusiesane anopo. Anoaki soko néaki soko himu hakásaraka hemakapukua risia aporo hinamoane etoyaki hakāsa yaiya risikiakosapo. ⁴ Nōmo anoaki ayíáka rakiniesane nōmo rakikia masapo. Rakikia masasamo né kararaka reane aporo hinamomo hemakapusimo nōmo tarisiapo. ⁵ Atao, hauaka one kepomareasiraka ano neyaki kararaka faesa reapo. Kararaka faesa rea ayíáka efera hunia soko, ayíáka kararaka faesa rekeako nōmo anoaki kakanie.

⁶ Hauaka wo aporo su risiane nōmo asekea, metakira nōmo murikimaka pasimokoa anoaki kasapo. Asiamo nōmo anoaki kasá aporoane nōmo ní ainane hemakapusimo, nōmo tarisiapo. Aporo ane fana nōmo aporo risiapo. Asiamo nōmo aporoane anoaki kasapo. Kasá aporoamo nōmo someane kakaro kakimaka rakisiapo. ⁷ Arirakano nōmo

wakapuaka arakirane kepoane né aeyaka pesasamo ipu hemakapurakanapo. ⁸ Nómō someaka maresane nōmo iaki some kasapo. Some karakano ipu kakimasapo. Ano néyaki fana reane soko, nōmo ano pusiesane soko, ipu kakimaka hemakapurakanapo.

⁹ Iane nōmo ararehoasimo nōmo kurikurirakanapo. Arirakano neaki hisisa aporo akipoko nōmo kurikurirakanafapo. Nómō aporo pasimokoa anoaki kasáne nōmo ní menasasamo ipoko nōmo kurikurirakanapo. ¹⁰ Nómomenane etapo iti menapo. Arirakano nómomenane soko etapo iti menapo. Ano patera asesa aporomo nōmo yano motosane makararaka tarirakanapo. ¹¹ I hauaka wo risikiakosapo. Arirakano ano hauaka one metakarikia, né rea peakosapo. Ata Kotesao, nōmo anoaki kasá aporoamo néaki himu hakásaraka hemakapukua risikiasimo, nōmo iane asekea rekeanie. Etapo iti himu hakásaraka hemaka apura ayiáka, ipu soko ayiáka himu hakásaraka hemakapukua risikiasimo ararehoanie. ¹² Ano iyaki rea maiya amo iane nōmo mafairaka asekea reapo. Ipu nōmo ainane hemakapusimo nōmo iane asekea reapo. Asekea rekeno iane paripusuafapo. Asiāne aporo hakásá meta ipi hemakapusua aeyaka paripusuapo. Nómō sawia poparaka ayiakakosapo, aisane kakaro hakásá yine fasereperaka ayiane.

¹³ Asiamo ano né rea peakosapo. Ano seseraka area ayiáka iane soko kára seseraka risikiasimo nōmo néaki kurikurirakanapo. Ano hauaka wo area yumo nōmo ipoko kurikurirakanapo. ¹⁴ Nómō someane nōmo iaki some karakano ipu kakimasapo. Ipu kakimaraka hauaka wo makata rakira hemakapusuane metakarisiasamo, nena aporomo iaki hisiranap. Arirakano hauaka wo makata rakira nōmo hemakapunafonona ayiáka ipu soko hemakapurakanafapo. Asiamo iaki nena aporomo hisiraka risikinapo.

¹⁵ I hauaka one metakarismo nōmo pasimokoanie, aiyaka nōmo kurikurirakanafapo. Hauaka wo Satanemo i asekea rekeakohoamo nōmo mafairaka asekea rekeanie, aiyaka nōmo kurikurirakanapo. ¹⁶ Hauaka wo makata rakira nōmo hemakapunafonona ayiáka ipu soko ayiáka hemakapurakanafapo. ¹⁷ Nómō someane kakaro somepo. Kakaro someane kakimaka risikiasimo nōmo iane ararehoanie. Kakaro some á hákasa risikiasimo ararehoanie. ¹⁸ Aporo hinamo hauaka wo risiaki some kakako nōmo ano pusiesa ayiáka, ipu soko aporo hinamoaki some kakako nōmo iane pusierakanapo. ¹⁹ Ipu namina ainane neaki kakasimo, nōmo ní ainane néaki karakanapo. Asiamo ipu nōmo kakaro someane kakimaka risikiasimo, nōmo ní hemakapusua aeyaka ano rusua kukusapo.

²⁰ Asiamo ipoko hákasa nōmo kurikurirakanafapo. Ipu some karakano aporo hinamomo kakimaka, anoaki himu hakásaraka risikiakosa aporo hinamo akipoko soko nōmo kurikurirakanapo. ²¹ Arirakano ipu namina metamo metaki hemakapukua, metamo metaki hemakapukua ayiáka himu hakásaraka risikiasimo ararehoanie. Atao, néane anoyaki reke, arirakano anoane néyaki reke, ayiáka eto iti himu hakásá yineraka arisia ayiáka, ipu etoaki himu hakásaraka kataka marekea ayiáka risikiasimo ararehoanie. Asiamo kakimara aporo hinamomo himu hakásaraka hemakapukua risikino, kakimakanafonosa aporo hinamomo asekea hemakapuraka, ‘Kotimo Yasuaki hauaka wo pusiehoareapo.’ Aiyaka ipi hemakapukusapo.

²² Nómō wakapu ainane anoaki kasane, nōmo some kakimara aporo hinamoaki wakapu aina hakásá yine kasapo. Iti hakasa yineraka arisia ayiáka ipu soko namina hakasa yineraka ayiáka risikiasimo nōmo wakapu ainane iaki kasapo. ²³ Né anoyaki reke, ano iyaki reke, ayiáka isina himu hakásaraka risikinapo. Himu hakásaraka risiane kakimakanafonosa aporo hinamomo asekea someraka, ‘Kotimo Yasuane hemaka apura ayiáka, kakimara aporo hinamoane soko, Kotimo hemakapurakanapo. Asiamo Kotimo Yasu hauaka wo pusiesapo, aisane kakarohoareapo,’ aiyaka ipu hemakapusimo himu hakásaraka hemakapurane kakimara aporo hinamoaki kakanie. ²⁴ Atao, nōmo anoaki aporo hinamo kasane anoyaki hakásá risikiasimoripo. Hauaka one kepo mareasiraka nōmo anoaki himu tumurumo hemakapusuapo. Hemakapuraka nōmo wakapu faesa kotesane anoaki kasapo. Wakapu faesa kotesa anoaki kasane ipu asekeasimo anoyaki hakásá risikiasimoripo.

²⁵ Atao, Ereketae aina kepoane népo. Asiamo nómo some hisisa aporo hinamomo néane hemakapurakanafapo. Néane nómo hemakapurakanapo. Nómo ano pusiesane nómo aporo hakāsa puramo hemaka apure. ²⁶ Néane ipu hemakapusimo nómo iaki tarisiapo. Tarisiane yaiya tariraka rekeakosapo. Asiamo nómo anoaki himu tumurumo hemaka apura ayiáka, himu tumurumo hemakapurane i himua mahemakapunie. Arirakano ano soko iyaki hakāsa rekeakosapo.” Aíyaka Yasumo kurikurisapo.

18

Yasu parakesane oyapo.

Matiu 26:47-56; Maka 14:43-50; Ruki 22:47-53

¹ Yasumo kurikuriraka faraka Yasu takahikia apeane metakarikia, ipi aporo hakāsa purayaki pukua, he wakasema yano motosa he Kitorone yaoraka hikia, ira orofe hemoa hikia toapo. ² Asiamo Yasu ipi aporo hakāsa purayaki hemoa tokoako hikianasamo, hemoa efera hunia tokoakosakipoko hisiapo. Arirakano hemoane Yasu parakehokosa aporo Yutasemo aserapo.

³ Aserasamo hemoa Rome kamani ame aporo soko, arirakano Kotimo apea sikiriti aporo asekea risiane soko Yutasemo karikia hisiapo. Arirakano fana pirisiti aporope Fere se aporo ipu sikiriti aporoaki someraka, “Re Yutaseyaki paoraka hisie.” Airakano iane Yutasemo karikia, Yasu parakehokosakipoko hemoa hikia, ipu ira rokopa soko, kapi soko, sari soko, wera makatane mokoa, nafa paikia, arirakano sapa paikia ayiáka hisiapo.

⁴ Hikia perakano, Yasumo aseraka eaki makata ayiakakosane epo ipi hemakapusuapo. Yasumo ipi aporo hakāsa purayaki hakāsa toane, iane yia metakarikia, aporomo e waseremako pesa sapea pusuapo. Puraka Yutasemo aporo karikia pesaki Yasumo someraka, “Repo epa kope perakanare?” aisapo. ⁵ Arirakano e parakehokosa aporo Yutaseane iyaki hakāsa yia rekeno, ipu suamo someraka, “Nasare aporo Yasuane isiapo kope perakanapo.” Airakano Yasumo someraka, “Anopo.” ⁶ Airakano i suane fofaraka wakasema fimiti pukua, hauaka atura hurupeperaka warisiapo.

⁷ Warisikino Yasumo efera hunia someraka, “Repo epa kope perakanare?” Airakano ipu someraka, “Nasare aporo Yasuane isiapo kope perakanapo.” ⁸ Airakano Yasumo someraka, “Reaki nómo somerakasa ayapo. Repo ano kope peraka, nómo aporo hakāsa purane pusimo metakarisie. Purakano matasohokopo,” aisapo. ⁹ Arirakano fana ipi Kotiaki someraka, “Aporoane nómo anoaki kasane, hakāsa meta hasaka kosafapo.” Aíyaka Kotiaki somesasamo waseremako pesa aporoaki Yasumo someraka, “Aporo hakāsa meta repo rukupo. Metakarisie,” aisapo.

¹⁰ Airakano Saemone Pitamo ipi ferepemo pirisiti aporo fanamo aporo raipa senaki tumuru takuane rukusakare tapisiapo. Aporo raipa amo yano motosane Maokase, ipi senaki rukusakare tapisiapo. ¹¹ Rukusakare tapirakano Yasumo Pitaki someraka, “Fere-peane nómo ferepe makera pausi terakae hisia á rusakamaresie. Atamo ano kukusane maresasamo himu nekea, kau teraka kukusapo. Kukusane metakariakosafapo.” Aisapo.

Anase rea Yasu karikia pusuane oyapo.

¹² Arirakano ame aporo soko, satini soko, sikiriti aporo soko, ipu Yasuane hokono tetákara taporaka waseremaka, ¹³ Anasemo apea karikia pusuapo.* Anasemo ipi farayane Kaiafasemo arumasapo. Keremisi amo Kaiafase ipi pirisiti aporo fanaraka reapo. ¹⁴ Arirakano fana Kaiafasemo Yu aporoaki someraka, “Aporo hinamo supoko aporo hakāsa kuane siahoasireapo.” Aíyaka Kaiafasemo somesapo.

“Yasumo aporo hakāsa purane nere?” Airakano Pitamo waesane oyapo.

Matiu 26:69-70; Maka 14:66-68; Ruki 22:55-57

¹⁵ Yasu fana karikia purakano, Saemone Pita soko, aporo hakāsa pura meta soko, kesekeea kekemarape pusuapo. Pukua pirisiti aporo fanamo apea pauraka, aporo hakāsa

* 18:13: Anaseane pirisiti aporo fanaraka rea nine Rome kamani aporomo Anaseane metakarikia sanasiraka, Kaiafase pirisiti aporo fanaraka rekeasimo maresapo.

pura tetá pesa amo aporo hakásá metamo pirisiti aporo fanane aserapo. Aserasamo ape ruru ikia koro aeyaka yorokoa pukua, Yasuyaki hakásá ape hauaka moroa pukua risiapo.¹⁶ Pita kumuku pekea, ikia koro yao takua rekeno, aporo hakásá pura meta fana pusuane ikia koroa paripesapo. Paripekea ruru ikia koro asekeea rea hinamoaki someraka, “Pita peasimo ikia koro ropaka mayane siahoasireare?” Airakano hinamoamo aoaka, ikia koroane ropaka masapo. Ropakamaka Pita perakano¹⁷ hinamoamo eaki someraka, “Yasumo aporo hakásá pura metane nere?” Airakano Pitamo kotafe someraka, “Anofapo,” aisapo.

¹⁸ Arirakano sikiriti aporo soko, pirisiti aporo raipa soko inurakano ira kau asia paikia rufirakano, hokono ira tarikia asekeea risiakipoko, Pita soko ira hakakosakipoko pekea, iyaki hakásá risiapo.

Pirisiti aporo fanamo Yasuaki somesane oyapo.

Matiu 26:59-66; Maka 14:55-64; Ruki 22:66-71

¹⁹ Pitane aporo metakirayaki sarimaraka ira haraka risiakipoko, pirisiti aporo fanamo Yasuaki someraka, “Nómo ní aporo hakásá pura epare? Aporomo hemakapusimo nómo yakapa somesare?” Aiyaka Yasuaki kairakano²⁰ Yasumo someraka, “Aporo suamo kaiyisimo nómo kakama somesapo. Yu aporomo sarimana apea soko, Kotimo apea soko, á Yu aporo pekea sarimarakan some kasapo. Tau mahamekea somesafapo. ²¹ Marirakano nómo anoaki kairakanare? Nómo some kasane kaisia aporoaki kaiyinie. Nómo somesane ipu kaikia hemakapukua risikinapo. Iaki kaiyinie.”

²² Airakano sikiriti aporo hakásá metamo Yasu rusuapo. Ruraka someraka, “Nómo pirisiti aporo fanaki aiyaka somehokopo.” ²³ Airakano Yasumo someraka, “Nómo watikiaka somerakanó kaisiane aporo suamo kaiyisimo somesie. Nómo kakaro somerakanó yia marirakano nómo ano rurakanare?” aisapo. ²⁴ Arirakano Yasu ipi hokonoa taposane yaiya rekeasimo yia, Anasemo sikiriti aporoaki someraka, “Aporoane pirisiti aporo fana Kaifasemo hukurusimo karikia pusie.” Aiyaka Anasemo somesapo.

Pitamo efera hunia waesane oyapo.

Matiu 26:71-75; Maka 14:69-72; Ruki 22:58-62

²⁵ Anasemo aiyaka somesa maiya yiamo Pita ira haraka rekeno aporo metakiramo eaki someraka, “Aporoamo aporo hakásá pura pasimasane nére?” Airakano Pitamo kotafe someraka, “Anofapo,” aisapo.

²⁶ Airakano pirisiti aporo fanamo aporo raipa ipi senaki Pitamo rukusakare tapisiamo ipi tákemo someraka, “Ne ira orofe hemoa aporoakiyaki kakeno nómo asesane nere?”

²⁷ Airakano Pitamo waesapo. Waehoanine mena kokorokomo mesapo.

Pairate rea Yasu karikia pusuane oyapo.

Matiu 27:1-2, 11-14; Maka 15:1-5; Ruki 23:1-5

²⁸ Mituru fiarakano yia, Kaifasemo apeane ipu metakarikia kamani aporo fanaraka reamo apea Yasuane karikia pusuapo. Karikia pukua aporoane Yu aporoohoanafonosasamo, ipi apea Yu aporo yorosafapo. Ape Farimaresa Hemakapuko Hokono Keakosakipoko Yu aporomo hemakapuraka, “Yu aporoohoanafonosayaki ape hakásá sarimaraka toke, keseke hokono akera maiya amo makata neane siahoasifareapo.” Aiyaka hemakapuraka kamani aporomo apea yorosafapo. ²⁹ Yu aporo yorokoa peanafonorakanó Pairate takahikia ipi apeane metakarikia aseako pusuapo. Pukua iaki someraka, “Aporoaki repo makata hukuarurane, makata yakapapoko hukururakanare?”

³⁰ Airakano ipu someraka, “Epo watikiaka rakianafonosa satiki né rea karikia pea-funufapo.” ³¹ Airakano Pairatemo someraka, “Repo namina somemane kakenapo. Asiamo repo namina yia eane hukurunie.” Airakano Yu aporomo someraka, “Re Rome kamanimo someraka, ‘Aporo rusua kukusane repo Yu aporomo menafapo. Isu Rome aporomo menapo.’ Aiyaka repo somesasamo repo eane ira paremareasimo karikia perakanapo.” Aiyaka Yu aporomo somesapo. ³² Ipu somehoasiraka fana Yasumo

someraka, “Keseke ano ira matopesa paremarerakano rusua kukusapo.” Aisane yumo kakaro yanakanapo.

³³ Airakano Pairate ipi apea paripuraka Yasuaki peaesapo. E perakano Pairatemo someraka, “Yu aporomo unihaeane nere?” ³⁴ Airakano Yasumo someraka, “Nómo ní hemakapusua aeyaka, ‘Né unihaeane?’ aiyaka kairakanare? Aporo metamo néaki somerakano nómō anoaki kairakanare?” ³⁵ Airakano Pairatemo someraka, “Ano Yu aporofapo. Nómō ní fanasihoasimo nómō ní aporo ira Yu aporomo soko, pirisiti aporo káramo soko, né karikia pesapo. Nómō watikiaka rakisiane, makata yakapa watikiaka rakisiare?”

³⁶ Airakano Yasumo someraka, “Hauaka wo aporoane nómō unihaeaka asekeea rekenafapo. Hauaka aporo ane nómō asekeea unihaeaka rea satiki anō waseremakohoamo, nómō aporo hakása puramo Yu aporo sisimayaki weafunupo. Weakosapoko asiane hauaka wo anō unihaeaka rekeanafonosamo wesafapo.” ³⁷ Airakano Pairatemo someraka, “Unihaeane tiki nerakanareapo.” Airakano Yasumo someraka, “Ano unihaeane nómō someraka ayapo. Nómō somerakane anoane somerakae. Kakaro some kakako anō hauaka wo pesapo. Kakaro some takua risia aporo hinamoamo nómō someane kakimarakanapo.” ³⁸ Airakano Pairatemo someraka, “Kakaro someane yakapare?” aisapo.

Yasuaki kotafe topakamaraka hukurusuane oyapo.

Matiu 27:15-31; Maka 15:6-20; Ruki 23:13-25

Pairatemo ipi apeane metakarikia pukua, Yu aporo sisimaki someraka, “E fanasihokosapoko asiane epo watikiaka rakisiafapo. ³⁹ Ape Farimaresa Hemakapuko Hokono Akera maiya suamo aporo tipura kesa hakása meta nómō tonotaenapo. Tonotaenasamo nómō tonotaehokosapo. Yumo repo Yu aporomo unihaeane tonotaehoare?” ⁴⁰ Airakano ipu sakepamo wáraka, “Wae. E tonotaehokopo. Parápase hákasa tonotaehoanie,” aisapo. Arirakano makata hakimokoakosakipoko aporo meta rurane Parápasepo.

19

¹ Pairatemo Yasu karikia ipi apea pukua, ame aporoaki rusierakano sakomo rusuapo.
² Arirakano unihae káramo hati kotesa karotapirapo. Asiamo Rome ame aporomo Yasuane mainamareraka sako keta risia weroweroraka hahaeraka unihae káramo hati murikimaka rakisiane Yasu wamoakarotapikia maresapo. Arirakano unihaeemo pasu susa kotesane Yasu osoraka marekea ³ mainamareraka someraka, “Yu aporomo unihaeane népo. Neane isiaipo makararakanapo.” Aiyaka someaka eane ipu hokonomo rusuapo.

⁴ Rurakano Pairatemo ipi apeane metakarikia, aporo sarimasaki someraka, “Repo asekeasimo efera hunia nómō Yasuane karikia perakanapo. Eane fanasihokosapoko asiane epo watikiaka rakiafareapo.” ⁵ Aihoane Yasu sako keta risiamo wamoakarotapikia marekea, unihaeemo pasu susa osoraka marekea, aiyaka Pairatemo apeane metakarikia yao takua perakano, Pairatemo someraka, “E aperane asesie. Kára aiyaka mayiakako asiare?”

⁶ Airakano pirisiti aporo káramo soko, sikiriti aporomo soko Yasu aseraka sakepamo wáraka, “Eane ira matopesa paremarekea maporasie. Eane ira matopesa paremarekea maporasie.” Airakano Pairatemo someraka, “Repo namina eane karikia pusie. Karikia pukua repo namina eane ira matopesa paremarekea maporasie. Epo watikiaka rakisiane nómō hemakapurakarifapo.” ⁷ Airakano Yu aporo sisimamo someraka, “Isiaipo somemanemotoraka, ‘Koti mawakasemarakasomera aporoane rusua kukunie.’ Aiyaka somemanemotosasamo Yasumo someraka, ‘Ano Kotimo hokosapo,’ aisakipoko eane rusua kukunie.”

⁸ Aiyaka somerakano Pairatemo kairaka, kára namoraka reapo. Yasumo ipi someraka, “Ano Kotimo hokosapo,” aisapakano Pairate namoraka reapo. ⁹ Namoraka reke Yasu karikia ipi apea paripukua Yasuaki someraka, “Né hauaka maeyaka pesare?” Airakano Yasumo makata somerafaraka me kausapo. ¹⁰ Me kaurakano Pairatemo someraka,

“Nómo anoaki makata somerakarifapo. Marirakanonare? Ne rusua kukusane soko né tonotaehokosane soko nōmo ayiakakosapo. Ane nōmo maroponapo. Nōmo hemakapu-rakarifare?”

¹¹ Airakano Yasumo someraka, “Nómo ayakakosane nōmo ni hemakapusua aeyaka ayiakakosapo. Kotimo aorakano nōmo ayiakakosapo. Nōmo ano hukurukua fanasihoasimo aporomo ano karikia pesane ipu watikisane kakaro kárupo.” ¹² Airakano Pairatemo kaikia, Yasuane tonotaehoko hemakapusuapo. Tonotaehokosapo airakano, Yu aporo suamo wáraka, “Wae. Tonotaerakano Rome kamani unihae Sisamo né tákehokosafapo. Aporoamo someraka, ‘Año unihaeaka rekenapo.’ Aisa aporoane Sisayaki yunuraka rekenapo. Asiamo aporoane nōmo farimarakano Sisamo néaki yunuhokosapo.”

¹³ Airakano Pairatemo kaikia Yasu karikia ipi apeane metakarikia, fanasihokosakipoko hukurura aporomo sea kayapo. Hukurura aporomo sea kaya ane, Yu aporo meaka yano motoraka Kapata yano motosapo. Namo meaka semenesepo, aíyaka yano motosapo.

¹⁴ Arirakano Ape Farimaresa Hemakapuko Hokono Keakosane rau ayiakakosasamo pipu aporo hinamo suamo makata su maroponapo. Asiamo maropoana maiya amo maiya tuaro (12) koroko paurakano Pairatemo Yu aporoaki someraka, “Repo unihaeane épo.”

¹⁵ Airakano ipu sakepamo wáraka, “E rusie. E rusie. Rukua ira matopesa paremaresie.” Airakano Pairatemo someraka, “Repo unihaeane ira matopesa paremaresie, aíyaka nōmo somehoasimore?” Airakano pirisiti aporo káramo someraka, “Isiapo unihae kárane kamani unihae Sisa ipi hákasapo.” ¹⁶ Airakano Pairatemo someraka, “Yasu ira matopesa paremareako karikia pusie.” Airakano ipu Yasu karikia pusuapo.

Yasu ira matopesa paremaresane oyapo.

Matiu 27:32-44; Maka 15:21-32; Ruki 23:26-43

¹⁷ Yasu karikia puraka ira matopesane Yasumo ipi maka pusuapo. Pukua uni kiki hauaka á pauraka risiapo. Hauaka ane Hipuru meaka yano motosa Kokóta hauakapo.

¹⁸ Hauaka á Yasu ira matopesa paremarekeamaposapo. Maporaka aporomano rura aporo tetáne soko ira paremarekeamaposapo. Meta Yasu hokono tumuru takua maposapo. Meta Yasu hokono kasakai takua maposapo. Maporaka Yasuane tipia maposapo.

¹⁹ Maporaka marekeamaposapo. Popasane oyapo. “Yasuane Nasare aporopo. Yu aporomo unihaeane épo.” Aíyaka Pairatemo popasane ipi ame aporomo maka, Yasu unia kima yapura paremaresapo. ²⁰ Yasu ira paremarekeamaposane Yarusarame siti makeraka maposapo. Yarusarame siti makeraka paremaresasamo aporo hinamo yakaimo aseako peraka, popasane menosapo. Popasane Hipuru meaka soko, Rome aporo meaka soko, Kiriki aporo meaka soko me isiane su popasapo. ²¹ Popasane Yu aporo pirisiti aporo káramo menoraka Pairateaki someraka, “Yu aporomo unihaeane épo, aíyaka popahokopo. Úyaka popahoanie. ‘Ipi yiamo someraka, ‘Yu aporomo unihaeane anopo,’ aíyaka somerakasuane épo.’ Aíyaka popahoanie.”

²² Airakano Pairatemo someraka, “Nōmo popasane siapo. Kosohokosafapo,” aisapo.

²³ Yasu ira matopesa paremaresa yia rekeno, ame aporomo Yasumo pasuane mokoa parakuraka i kitafasuaki kasapo. Yasumo pasu horopokarane yaiya weroraka rakisia irihoanafonosa pasuane makosakipoko ²⁴ ame aporomo someraka, “Pasuane koahoane siahoasifareapo. Asiamo pasuane aporo hakásamo mako, isiapo kaseraka enana ayíáka makata fete mokoasuraka napane asekea enahokosapo,” aisapo. Arirakano fana Kotimo sawia poparaka ayiakakosaposane aina ayapo. Fana popasane oyapo. “Nōmo pasuane mokoako aporomo parakuhokosapo. Arirakano nōmo pasu kara meta aporomo mako kaseraka enana ayíáka enahokosapo.” Aíyaka popasane kakaro aina ayapo. (*Buk Song 22:18*)

²⁵ Arirakano Yasu ira matopesa maposane makeraka ipi kaíyia soko, ipi aeya soko, Koropasemo hinamo Mariane soko, Makatara hinamo Mariane soko, i su pekea asekea risiapo. ²⁶ Asekea risikino Yasumo ipi kaíyia soko, ipi aporo hakása pura hakása metane Yasumo himu tumurumo hemakapukua rea aporoane soko aseraka ipi amaki Yasumo someraka, “Hinamo neo, nōmo ní hokosa hemaka apura ayíáka, aporoane nōmo

hemakapunie.” ²⁷ Aíyaka ipi aporo hakása puraki Yasumo someraka, “Nómo ní ama asekea area ayiáka, nōmo amane nōmo asekea rekeanie.” Aíyaka Yasu kusua maiyamo aporo hakása puramo Yasumo kaíyiane ipi apea karikia pukua asekea reapo.

Yasu kusuane oyapo.

Matiu 27:45-56; Maka 15:33-41; Ruki 23:44-49

²⁸ Arirakano Yasumo makata rakirane fasapo, aiyaka hemakapusuasamo Yasumo ipi someraka, “Ano he nariripo.” Aíyaka Kotimo sawia popasa yine aina ayapo. ²⁹ Asiamo merakia waene he kisa takamasane he watera asia waene hea kokomarekea, ira turua taporomarekea Yasumo akai kiria motosapo. ³⁰ Motorakano Yasumo sareraka someraka, “Yiyapo.” Aíyaka Yasu ipi kukuko makehoramo wamo arupekea hemakapuraka, “Ano ho puane siahoasireapo.” Aíyaka hemakapuruka kusuapo.

Yasu ketayia takua ferepemo karesane oyapo.

³¹ Yu aporo sisimamo Pairateaki someraka, “Ira matopesa paremurisiane fatari mokoakosakipoko aporoane korake rukumosorasiehoanie.* Arirakano Ape Farimaresa Hemakapuko Hokono Keakosakipoko pipu makata nakosa sarimarakanapo. Asiamo rau fenena maiyamo aporo ira matopesa paremurisiane yia risiane siahoasifareapo.” Aíyaka aporoamo hemakapuraka Pairateaki somesapo.

³² Aíyaka somerakano Pairatemo someraka, “Aporoane foaka kukusimo korakeane rukumosorasie,” aisapo. Airakano ame aporo pukua aporo takua paremaresane korake rukumosoraka, arirakano takua paremaresane soko korake rukumosoraka, ³³ arirakano Yasuane korake rukumosorako aseane Yasu kakaro kusikenno asekea, ipi korakeane rukumososafapo. ³⁴ Ame aporo hakása metamo ferepemo Yasu ketayia karesapo. Kareane yapi soko he soko pusuapo. ³⁵ Purakano aporomo asesapo. Asesa aporoamo sawi one popasapo. Epo asesasamo kakaro someaka popasapo. Repo kakimakasimo epo popasapo.

³⁶⁻³⁷ Arirakano fana Kotimo sawia popasane oyapo. “E kiki suane hakása meta soko rukumosohokosafapo.” Aíyaka popasapo. *(Buk Song 34:20)*

Arirakano makata meta soko poparaka, “E ketayia karesane aporomo aseakosapo.” Aíyaka ayiakakosapo, aíyaka popasane yasiapo. *(Sekaraia 12:10)*

Yasu kunikia motosane oyapo.

Matiu 27:57-61; Maka 15:42-47; Ruki 23:50-56

³⁸ Arirakano Arimatía aporo yano motosa Yosefemo Yasu kukusiraka rea maiya amo, e Yasu patera asesapo. Yu aporomo aserapaka namoraka tau Yasu patera asesapo. Yosefe pukua Pairateaki someraka, “Yasu kusuane kunikia nōmo motoaere?” Airakano Pairatemo aosapo. Aorakano Yosefe pukua Yasu kusuane fatarimaka pusuapo.

³⁹ Arirakano Nikitímase fana ereamo Yasu aseako pusuane Yosefeyaki pukua, pauta wape yamona, meta yano motosa mua, meta yano motosa arose, tetapō mokoa pusuapo. Pauta sakepamo mokoa pusuapo. ⁴⁰ Aporo tetá amo Yasu kusuane maka, pauta wape yamosane kaua soaeraka, pasumo taporaka, Yu aporomo aporo kusua kunikia motoakosakipoko tapona ayiáka taposapo.

⁴¹ Arirakano ira matopesa maposane makeraka orofe hemo reapo. Hemo á kunikia reapo. Kunikia á fana aporo kusua motosafapo. ⁴² Yu aporomo yape fenena maiya makeraka taki awara maiyamo, kunikia makeraka reakipoko Yasu kusuane motosapo.

20

Yasu kusua kunikia motosane fasokino asesane oyapo.

Matiu 28:1-8; Maka 16:1-8; Ruki 24:1-12

¹ Yatipinumo* mituru fiahoko makehoramo Makatara hinamo Mariane pukua, Yasu kunikia motosa aseako pusuapo. Pukua aseane, eke tafeamo kunikia mapirisiane

* 19:31: Foaka kukusimo korake rukumososapo. * 20:1: Isiapo yatipinu sereane Yu aporomo menopo aíyaka somerapo.

ropakataesekeno asesapo. ² Aseane Yasu fasokino aseraka foaka parihikia, Saemone Pitape Yasumo ipi aporo hakāsa pura hakāsa metane Yasumo himu tumurumo hemakapusua[†] aporoane soko, Mariamo tetāki someraka, “Unihae kusua kunikia motosane, aporo metakiramo maka pusesapo. Ma maka pusuarakapo.”

³ Airakano tetā kunikia aseako foaka pukua, ⁴ aporo hakāsa pura metamo Pitane marokeraka fana foaka pukua kunikia pausapo.

⁵ Kunikia yao taku aeyaka reke, weaka aseane, Yasu kusua pasumo taposane pasu hákasa yia wareke, Yasu fasokino asesapo. ⁶ Arirakano Pita kesekeea foaka pesa nine kunikia kakarua aseako forosoraka pusuapo. ⁷ Forosoraka pukua aseane pasumo e taposane yia wareke, arirakano pasu metamo wamo taposane soko yia warekeno asesapo. ⁸ Arirakano aporo hakāsa pura meta fana pesane soko kunikia forosoraka pukua, pasuane aseraka ipi hemakapuraka, “Yasu kakaro turikia pureapo,” aiyáka hemakapusuapo. ⁹ Arirakano Kotimo sawia poparaka, “E kusuane turikia pukusapo.” Aisane fana tetapō koteaka hemakapusuafapo. Asekeasiraka hemakapusuafapo. ¹⁰ Yasu kunikia motosane fasokino tetā apea poparihisiaipo.

Makatara hinamo Mariamo Yasu asesane oyapo.

Matiu 28:9-10; Maka 16:9-11

¹¹ Kunikia yao takua Maria hiripuraka reke weaka aseane, ¹² hepene aporo tetā pasu pakae ososa Yasu kusua motosa á, meta korake sapea, arirakano meta wamo sapea aiyáka tokeno asesapo. ¹³ Aserakano tetapō someraka, “Hinamo neo, marirakano hiripurakanare?” Airakano Mariamo someraka, “Unihae kunikia motosane ipu maka pusesapo. Ma maka pusuarakapo.” ¹⁴ Aiyaka someaka faraka, ipi patera pariaseane Yasu rekeno asesapo. Aseraka, “Yasureapo,” aiyaka hemakapusuafapo.

¹⁵ Asekeha hemakapunafonorakano Yasumo someraka, “Marirakano hiripurakanare? Epa kope perakanare?” Airakano hinamoamo hemakapuraka, “Hemo wafayareapo,” aiyaka hemakapukua someraka, “Nómo e maka pukua ma motosare? Maka pukua motosane anoaki somesie. Nómo e mako pukusakipoko anoaki tarisie.” ¹⁶ Airakano Yasumo someraka, “Maria.” Airakano Yasumo meane hinamoamo kairaka rekeako pariraka aseane Yasu rekeno asesapo. Aseraka, “Tisao,” aisapo. Aiyaka somerakane Yu aporomo Hipuru meaka Raponai airapo.

¹⁷ Airakano Yasumo someraka, “Ano kaua sakiraka maka rekeakopo. Ata rea hauaka ano hianafonosasamo, nómo ano maka rekeakopo. Nómo aporo hakāsa pura, nómo nī mae asiaki úyaka somehoanie. ‘Ata rea ano parihikia. Nómo Atane soko repo Atane soko hakāsa yiypao. Nómo Kotiane soko repo Kotiane soko hakāsa yiypao. E rea ano parihikia. Aiyaka iaki somehoanie.’” ¹⁸ Airakano Maria parihikia aporo hakāsa puraki someraka, “Yasuane nómo asesapo.” Aiyaka Yasumo someaka maresane soko iaki some kasapo.

Aporo hakāsa puramo Yasu asesane oyapo.

Matiu 28:16-20; Maka 16:14-18; Ruki 24:36-49

¹⁹ Sere hakāsa niné yatipinumo ereamo, Yasumo ipi aporo hakāsa puramo Yu aporo sisima perapaka namoraka ikia koro mapirikia toapo. Toakipoko ape á Yasu pekeia iaki someraka, “Mapiraraka risikianie.” ²⁰ Aiyaka ipi hokono tetā ikokosa umuruane tarikia, arirakano ipi ketayia karesa umuruane tarirakano ipi aporo hakāsa puramo aseraka Unihareapo, aiyaka hemakapukua sesesapo.

²¹ Seserakano Yasumo efera hunia someraka, “Seseraka auaraka risikianie. Atamo ano pusiesa aiyáka, nómo reane pusie airakanapo.” ²² Aiyaka Yasumo himu haraka i toakipoko akai fofoane makama asapo. Makama araka Yasumo someraka, “Ho Kotesane re himua rekeasimo masie.” ²³ Aporomo watikiaka rakisia himu ra kayane hufitaerakano watikisane repo someraka, ‘Watikisane farakanapo.’ Airakano watikisane kakaro fanapo.

[†] 20:2: Aporo hakāsa pura hakāsa meta Yasumo himu tumurumo hemakapusua aporoane Yonepo.

Repo someraka, ‘Watikisane fasafapo.’ Airakano watikisane fanafapo.” Aíyaka Yasumo someaka faraka Yasu ipi yia reanine fasekeno asesapo.

Tomasemo Yasu asesane oyapo.

²⁴ Aporo hakāsa pura keno suane meta Tomase, ipi yano motosa meta Titimase, e iyaki hakāsa tokoanafonosasamo Yasuane asesafapo. ²⁵ I toakipoko Tomase perakano ipu someraka, “Yasuane isiapo asesapo.” Airakano Tomasemo someraka, “Someane nōmo kakimakosafapo. Yasu hokono umuruane nōmo sakairaka ipi, ketaya umuruane sakairaka, nōmo himu hakásaraka hemakapukusapo,” aisapo.

²⁶ Arirakano soko hakāsa faraka, sere karimo i efera hunia sarimaraka apea toapo. Maiya amo Tomase soko iyaki hakāsa toapo. Ikia koro mapirikia toakipoko Yasu pekea iaki someraka, “Seseraka auaraka risikianie.” ²⁷ Aíyaka Yasumo Tomaseaki someraka, “Nōmo ano hokono asesie. Hokono umuruane sakairasie. Ketaya umuruane sakairasie. Himu tetáraka hemakapusuane metakarikia, himu hakásaraka hemakapukua rekeanie.”

²⁸ Airakano Tomasemo someraka, “Nōmo Unihaeo. Nōmo Kotio.” ²⁹ Airakano Yasumo someraka, “Nōmo ano asesasamo himu hakásaraka hemakapukua rekenapo. Arirakano aporo hinamo metakiramo ano asekeanafonosa aporo hinamoamo anoaki himu hakásaraka hemakapukua risike, i kakaro seseraka risikiakosapo.” Aíyaka Yasumo somesapo.

Sawi one popasa kepoane oyapo.

³⁰ Maiya metamo aporo hakāsa puramo asekeasimo Yasumo makata wakapuaka rakira metakirane soko rakisiapo. Rakirakano aporo hakāsa puramo asesapo. Makata rakisia metakirane sawi wo popasafapo. ³¹ Arirakano Kotimo unihaeaka rekeasimo murikimasa aporoane épo. Yasu ipiane Keresopo. E Kotimo hokosapo. Aíyaka repo kakimakasimo sawi one popasapo. “Yasu ipi Keresopo. Ipi Kotimo hokosapo.” Aíyaka repo hemakapukua kakimaka, Yasu yano motosane makama fanaraka hemakapurakano re yaiya risikiakosapo.

21

Aporo hakāsa puramo efera hunia asekeasimo Yasu he Taipiriase fua pesane oyapo.

¹ Aporo hakāsa puramo efera hunia asekeasimo Yasu he Taipiriase* fua pesane oyapo. ² Saemone Pita soko, Tomase ipi yano motosa meta Titimaseane soko, Natanio ipi Kariri hauaka Kena taone aeyaka pesane soko, Sepetemo hokosa tetāne soko, Yasumo aporo hakāsa pura tetá metane soko, i su he fua risiapo.

³ Risike Saemone Pitamo iaki someraka, “Pokoa mokoako purakapo.” Airakano ipu someraka, “Neyaki isu perakanapo,” aisapo. Aíyaka i kasua ripaka, rokoa hikia he numua kasipu makasuraka, kiraka mayane kasipua pokoa kesafapo. Ere hakāsa yiamo airaka risike, pokoa hakāsa soko masafapo.

⁴⁻⁵ Mituru fiarakano maíya kawe aperamo, Yasu he fua pekea reke someraka, “Hameo, pokoa kasipua kesare?” Airakano ipu Yasureapo, aíyaka hemakapunafonoraka ipu someraka, “Wae, kesafapo.” ⁶ Airakano Yasumo someraka, “Hokono tumuru takua kasipu makasuhoane pokoa keakosapo.” Airakano ipu hokono tumuru taku aeyaka kasipuane makasuraka, kihane pokoa kára kesamo umirakano kihosifareapo. ⁷ Kihosifasekeno aporo hakāsa pura hakāsa meta Yasumo himu tumurumo hemakapusua aporoamo Pitaki someraka, “Isiapo Unihaeapo.” Airakano Saemone Pitamo pasu horomasane maka, osoraka hea makasuraka he tapukua pusuapo. ⁸ Purakano aporo hakāsa pura metakiramo kasipu kiraka mokoa risike, kasu rokoa he fe makesakipoko wane harote mita (100) rokoa pusuapo.

⁹ Rokoa pukua he fea karimarekea, kita humarekea, kasu yia metakarikia peraka aseane Yasumo ira paikia rufirakano pokoa paikia, farawayaki taesekeno asesapo.

¹⁰ Aserakano Yasumo someraka, “Pokoa kasipua kawe kesane metakira mokoa peae.”

* 21:1: He Taipiriase airakane he Kaririaki aíyaka airakaripo.

¹¹ Airakano Saemone Pita paripukua, kasipuane waseremaka he fea kirape hisiapo. Kasipua pokoa popake kesane menoraka wane harote fifiti tiri (153) aiyáka kesekeno menosapo. Pokoa kára kesa nine kasipu potakahesafapo.

¹² Arirakano Yasumo someraka, “Makata nako peae.” Airakano ipu “Ne epare?” aisafapo. “Unihaeereapo,” aiyáka hemakapusuapo. ¹³ Hemakapurakano Yasumo farawa taesane mokoa, pokoayaki kasapo. ¹⁴ Kasá sereamo Yasuane ípi aporo hakása puramo asekeasimo, yape tetá fana tarisiakipoko, yape isiane sereamo tarisia ayapo.

Yasumo Pitaki somesane oyapo.

¹⁵ Makata nekea farakano Yasumo Saemone Pitaki someraka, “Yonemo hokosa Sae-moneo. Nómo pokoa morane himu tumurumo hemakapurakanapo. Anoaki nómo himu tumurumo fanaraka hemakapurakanare?” Airakano Pitamo someraka, “Unihaeo, nōmo né himu tumurumo hemakapusuane nómo ní hemaka apure.” Airakano Yasumo someraka, “Nōmo saro sipi manoane nómo makata nakosa kakanie.”

¹⁶ Aiyáka efera hunia yape tetámo Yasumo someraka, “Yonemo hokosa Sae-moneo. Nómo ano himu tumurumo hemakapurakanare?” Airakano Pitamo someraka, “Unihaeo, ao, nōmo né himu tumurumo hemakapusuane nómo ní hemaka apure.” Airakano Yasumo someraka, “Nōmo saro sipiane koteaka asekea rekeanie.”

¹⁷ Aiyáka efera hunia yape isiamo Yasumo someraka, “Yonemo hokosa Sae-moneo, nómo ano himu tumurumo hemakapurakanare?” Aiyáka Yasumo yape isiamo somerakano asekea Pita ípi sesenafaraka someraka, “Unihaeo. Makata su nómo hemakapurapo. Nōmo né himu tumurumo hemakapusuane nómo ní hemaka apure.” Airakano Yasumo someraka, “Nōmo saro sipiane makata nakosa kakanie. ¹⁸ Nōmo kakaro somerakaripo. Né hokosa raua rea maiya amo, pasu kenare weraka terakae hikia, ni hemakapusua aeyaka pusuapo. Arirakano né sisimana maiya amo né hokono máfarakano aporo metamo neane taporaka, kiraka maka pukusapo. Kiraka maka purakano né hisihokosapo.”

¹⁹ Aiyáka Yasumo takumeaka some kasapo. Pita ípi ira matopesa paremarerakano kukusane takumeaka some kasapo. Pita ira matopesa paremarekeea kurakano, aporo hinamomo asekea Kotiane makarahokosapo. Asiamo Yasumo Pitaki someraka, “Ano patera asesie,” aisapo.

Aporo hakása pura hakása metane Yasumo somesane oyapo.

²⁰ Pitamo patera pariaseane aporo hakása pura Yasumo himu tumurumo hemakapusua aporoane kekemarape perakano asesapo. Yasu kukusiraka ipu makata nenaka toa maiya amo, aporo hakása pura meta uaka hikia Yasuaki someraka, “Unihaeo, epamo né parakehokosare?” Aiyáka somesa aporoane Pitamo asesapo. ²¹ Asekea Pitamo Yasuaki someraka, “Unihaeo, aporoane mayiakakosare?”

²² Airakano Yasumo someraka, “E ayiakakosane nómo somehoane siahosifareapo. Ano hikia pariaperamo ípi yia rekeno soko metao, ipi rekeanafonorakano soko metao, nóménafapo. Né ano patera asesie.” Aiyáka Yasumo somesapo.

²³ Aiyáka somerakano aporo hakása pura metamo metaki some, arirakano metamo metaki some, arirakano metamo metaki some aiyáka namina yia somepe pukua tipia Yasumo somesane metakarikia, “Aporoane kukusafapo.” Aiyáka some koaka marekeea namina somepe pusuapo. Asiāne Yasumo someraka, “E kukusafapo,” aisafapo. “Ano pariapera maiya amo aporoane yia reke soko metao, rekeanafonoraka soko metao, nóménafapo,” aiyáka Yasumo somesapo.

Sawi one popasa kepoane oyapo.

²⁴ Yasumo somesane ano Yonemo kaisiapo. Arirakano Yasumo rakisiane soko nōmo aseraka sawi one popasapo. Popasane isiapo menoraka hemakapuraka, “Makata su popasane kakarohoareapo,” aiyáka isiapo hemakapurakanapo. ²⁵ Arirakano Yasumo makata metakira soko rakisiapo. Makata su epo rakisiane aporomo popasafapo. Yasumo

Yone 21:25

222

Yone 21:25

makata rakisiane hakása hakásaraka popasatiki sawi mukihoafunupo. Mukiraka hauaka wo sawi taesane siahoafunufapo.

Tarira Aporomo Makata Rakisiane Oyapo.
Tarira Aporomo Makata Rakisia sawi one
mahemakapukusa someane oyapo.

Yasu hauaka wo reke makata rakisiane, Rukimo fana Tiaforaseaki sawi meta poparaka makesapo. Amo patera kesekeia soko, sawi meta one Rukimo Tiaforaseaki poparaka makesapo.

Yasu hepene yapura hisiakipoko, Kotimo ipi Ho Kotesane Keresoa paosa aporo hinamo ararehoasimo, hauaka wo pusiesapo. Ho Kotesa peraka, Kotimo wakapuane kakimara aporo hinamoaki kasapo. Arirakano Yasu hauaka wo reke aporo metakira Yasuyaki hakāsa pusuapo. Yasu hisiakipoko ipu Yasuane some kape pusuapo. Some kape purakano iane tarira aporopo, aíyaka somesapo.

Ho Kotesamo iaki Kotimo wakapuane karakano ipu makata kara wakapuaka rakisiapo. Aporo hinamo makata tasane ipu mafasapo. Mafaraka Yasu kusua maturikia taesane some karakano, aporo hinamo yakaimo kakimaraka, ipu makata watikisane metakarikia Yasu Keresoa paosapo. Yu aporoane soko, Yu aporo hoanafonosane soko, aporo hinamo yakai Keresoa paosapo. Asiasamo Yu aporo Keresoa paohoanafonosa aporomo Keresoa paosa aporo hinamoane kára mokoatikisapo. Mokoatikirakano Keresoa paosa aporo hinamo hauaka kekepoa tekatarikia pusuapo. Tekatarikia puraka, ipu Yasumo someane hauaka kekepoa soko somesapo. Tarira aporo soko, hauaka kekepoa pukua Yasuane some kasapo. Pore kimisi puraka, Yasuane some karakano taone metakira a sese apeane kepo maresapo.

Tarira Aporomo Makata Rakisia sawia some kepo parakuraka popasane oyapo.

1:1-26 Yasu hepene yapura hinakano, Ho Kotesa peakosaposane perakarihoamo, kakimara aporo hinamomo kau toapo.

2:1-47 Ho Kotesa pesa maiya amo, Pitamo some karakano, aporo hinamo yakaiane Yasuaki risikiako parisapo.

3:1-6:7 Yarusarame sitia tarira aporomo makata kara wakapuaka rakirakano, Keresoaki yunuraka risia aporo amo ian e mokoatikisapo.

6:8-7:60 Keresoaki yunuraka risia aporo amo Sitifene waseremaka, eane ekemo karesapo.

8:1-40 Sameria hauaka á tarira aporomo Yasumo makata rakirane rakisiapo.

9:1-31 Soreane Yasuaki rekeako parisapo.

9:32-12:25 Pitamo Yasumo makata rakirane rakisiapo. Yu aporo hoanafonosaki Pitamo some karakano i risikiako parisapo.

13:1-14:28 Porepe Pánapase teta kimisi pusuapo.

15:1-35 Yu aporo hoanafonosane Keresoa paosasamo, Yarusarame sitia, sése aporo asekeia risia aporomo somemanane maroposapo.

15:36-18:22 Porepe Saerase teta efere hunia kimisi pusuapo.

18:23-21:16 Pore efere hunia kimisi pusuapo.

21:17-23:35 Yarusarame sitia Pore waseremaka Sisaría taonea karikia pusuapo.

24:1-26:32 Sisaría taonea Pore tipura makesa rekeno, ipu eane hukurusuapo.

27:1-28:15 Pore Rome sitia puraka kasu sipia ripaka pusuapo.

28:16-31 Rome sitia Poreane ipi apea tipura reke, aporo hinamo yakaiaki Yasumo someane some kasapo.

Rukimo Tiaforaseaki sawi poparaka makesane oyapo.

¹ Fana Tiaforase néaki nōmo sawi meta popasapo. Popasane Yasu hauaka wo reke ipi makata rakiraka reane soko, some karaka reane soko, keseke e rusua kusuane Kotimo maturikia taeraka hepene yapunaka pasimarakano hisiane soko, makata su nōmo neaki

poparaka makesapo. ² Arirakano Yasuane hepene yapura Kotimo pasimakasiraka Yasu hauaka wo rea maiya amo tarira aporoaki someaka maresapo. Someaka maresane ipu makata rakiakosane Ho Kotesamo someaka marerakano tarira aporoaki somesapo. Arirakano tarira aporoane* fana Yasumo aporo hakāsa pura murikimasa ayapo.

³ Arirakano Yasu kusuane Kotimo maturikia taerakano turikia pukua sere foti amo (40) tarira aporomo e asekeasimo e pekea pukua efera hunia soko pekea pukua ayíáka yape yakai iaki e kakaro maturikia taesane tariako pesapo. Ipu hemakapuraka, "Yasu maturikia taesane turikia pukua rekenarakapo." Aíyaka hemakapurapaka i risiakipoko tariako peraka, Kotimo unihaeaka asekea reane iaki somesapo. ⁴ Iyaki hakasa sarimaraka rea maiya amo epo someraka, "Yarusarame sitiane metakarikia pukupo. Atamo makata kakakosaposane mokoako Yarusarame siti yia kau tokoanie. Makata kakakosaposane nōmo reaki somesapo. ⁵ Yonemo ré hea hákasa tapukumurisiapo. Arirakano maiya wakasema risina Ho Kotesa re himua muriakosapo." Aíyaka Yasumo somesapo.

Yasu hepene yapura hisiane oyapo.

⁶ Tarira aporo suane sarimaraka risike ipu Yasuaki someraka, "Unihaeo, fana isiapo isina Yu aporomo unihaeaka asekea risia ayíáka, maiya yumo Isiraya hauaka ane isiapo isina unihaeaka asekea risikiasimo nōmo mareakosare?"[†] ⁷ Airakano Yasumo iaki someraka, "Ayiakakosa maiyane nōmo Atamo hákasa hemakapukua marerapo. Marerane repo hemakapurafapo. Ayiakakosa maiya ane repomenafapo. ⁸ Arirakano Ho Kotesane re himua murirakano maiya amo epo wakapuane repo mokoakosapo. Epo wakapuane repo mokoa risike, anoane repo some kakakosapo. Nōmo some kasane soko, repo some kakakosapo. Yarusarame sitia soko, Yutía hauaka á soko, Sameria hauaka á soko, hauaka sua repo ano asesane some kape pukusapo."

⁹ Aíyaka someaka farakano, ipu aseane Yasu hepene yapura hinakano asesapo. Asekea risiakipoko Yasuane akomo matairaka maka hinakano asekea fasisiapo. ¹⁰ Yasu hinakano aporomo ti yapura asekea risiakipoko, hepene aporo tetá pasu pakaesa osoraka wate foaka pekea ¹¹ iaki someraka, "Kariri aporo reo, repo marirakano ti yapura asekea risikinare? Yasuane Kotimo pasimarakano hinakasa ayíáka, keseke soko yaiya paripeakosapo. E hinakano repo aserakasa ayíáka Yasu efera hunia paripeakosapo," aíyaka hepene aporomo somesapo.

Yutase finihaoa rekeasimo aporo meta murikimasane oyapo.

¹² Tarira aporo i ūri Orofeane metakarikia Yarusarame sitia poparipusuapo. Arirakano Yarusarame siti aeyaka ūri Orofe ane make tamiyiyapo. ¹³ Arirakano i Yarusarame sitia pauraka huturu apea i risira á hisiapo. Aporo apea poparipusua susuane yano taesane oyapo. Pita soko, Yone soko, Yamese soko, Enitu soko, Firipi soko, Tomase soko, Patóromiu soko, Matiu soko, Afiasemo maeya Yamese soko, kamaniaki patera asesa aporo Saemone soko, Yamesemo maeya Yutase soko, i su á sarimaraka toapo. ¹⁴ Namina su sarimaraka himu hakásaraka hemakapukua Kotiaki kurikurisapo. Ipu kurikuriraka toa a hinamo metakira soko, Yasumo kaíya Maria soko, Yasumo mamanea soko, iyaki hakāsa sarimaraka toke kurikurisapo.

¹⁵ Maiya amo Keresoa paosa aporo hinamo sarimasane wane harote tuaneti su (120) sarimasapo. Sarimarakano Pita takahikia iaki someraka ¹⁶ "Maeo, Yutasemo Yasu parakehokosane, wate fana Ho Kotesamo Tefeteaki some karakano, Tefetemo popahoareapo. Kakaro ayiakakosapo aíyaka popasane faserepesa ayareapo. Yutasemo aporo metakira pasimokoa e fanaraka pukua, Yasu parakeraka, ipu Yasu waseremasapo. ¹⁷ Arirakano fana isiapo Yasumo makata rakirane rakisimo, Yasumo isu soko murikimaka, Yutase soko murikimasapo.

* 1:2: Tarira aporoane Pisini meaka yano motosa Aposopo, airapo. Yasu hisiakipoko tarira aporomo makata rakisiane Rukimo Tarira Aporo sawia popasapo. † 1:6: Yasu rea maiya amo Rome kamani aporomo Isiraya hauaka ane unihaeaka asekea risiapo.

¹⁸ Murikimasa nine Yutasemo mone maraka Yasuane parakesapo. Wakasema nina, é kuraka hauaka harepa ikia huruperaka fako fausapo. Faurakano asekea, hauaka á Yutasemo ipi mone mosa amo hauaka ane roposapo. ¹⁹ Fako fausaporakano Yarusarame aporo suamo kaikia, hauaka roposane Yu aporo meaka yano motoraka Akeramapo. Namo meaka yano motoraka Yapi Pusua hauakapo.

²⁰ Asiamo wate fana Kotimo sawia Tefetemo popasane oyapo. ‘Aporomo ipi apeane kauanehokosapo. Ipi apea aporo metakira risikiakosafapo,’ aíyaka popahoareapo. (*Buk Song 69:25*)

Maiya metamo Tefetemo poparaka, ‘Ipi rakirane aporo metamo rakiakosapo,’ aíyaka popasane Yutasemo ayiakakosane Tefetemo popahoareapo. (*Buk Song 109:8*)

²¹ Aíyaka popasasamo aporo metamo isuyaki hakása rakisimo isiaipo murikimakosapo. Aporo murikimakosane oyapo. Yasu isuyaki koraka rea maiya amo, aporo meta isuyaki hakása pusuane e murikimakosapo. ²² Arirakano Yonemo kepo marekea aporo hinamo hea tapukumurisia maiya amo, nina, Yasu kusua maturikia taerakano, turikia pukua hepene yapura hinakano, asesa aporo isuyaki hakása pusua aporoane isiaipo murikimakosapo. Yasu kusuane maturikia taerakano turikia pusuane asesa aporoamo isina hakása somehokosakipoko murikimakosapo.” ²³ Aíyaka Pitamo somerakano aporo tetá nenakamaka murikimaraka, meta yano motosa Yosefe Pásapase, ipi aporo ira yano motosane Yásatase eane murikimaka, arirakano aporo meta yano motosa Matiase ipu murikimasapo.

²⁴ Murikimaka faraka ipu kurikuriraka, “Unihaeo, aporo tetá one isiaipo nenakamaka murikimasapo. Murikimarakan tetapó himuane nómo aserapo. Aporo tetá yano motosa popasane, hakása meta nómo murikimaka isuaki tarinie. ²⁵ Yutasemo tarira aporomo rakirane metakarikia, watikiaka rakisiakipoko watikisamo ropo mara hauaka á pusuapo. Tarira aporomo rakirane epo metakarisiane, aporo metamo rakisimo nómo murikimaka isuaki tarinie,” aisapo. ²⁶ Airakano aporo Kotimo murikimasane asekea hemakapuko, aporo tetá yano motosane poparaka petoro kakarua makekea, mahohoraka sawi hakása huruperakano aseane, Matiase yano motosa huruperakano aseraka Matiaseane ipu pasimasapo. Tarira aporoane kinusu risiakipoko kenoane Matiase paoraka sarimaraka, tarira aporoane keno su risiapo.

2

Ho Kotesa hauaka wo pesane oyapo.

¹ Yasu hisiakipoko Penekose hokono kesapo. Hokono akeramo kakimara aporo su ape hakása sarimaraka toapo. ² Toakipoko wate foaka ti yapunaka makata kára urakano kaikia toakipoko, atifo kára apera ayíáka peraka, i toa ape kakarua pesapo. ³ Perakano ipu namina yia aseane, ira rufi asia i namina su wamoa hakása hakásaraka kataka risikino asesapo. ⁴ Aseane, Ho Kotesa pekea i namina su himua káraraka komarukua risike, Ho Kotesamo i himua me meta somerakarakan ipu me kekepo kekepoaka somesapo.

⁵ Arirakano Yu aporo metakiramo Kotiaki kekerehoko hemakapusua aporoane, hauaka su anaka kimisi pekea Yarusarame sitia risiapo. ⁶ Risike kaiyiáne makata kára uaka perakarakan, aporo yakaimo aseako peraka kaiyiáne, aporo sarimasamo me kekepo somerakano ipu kaikia someraka, “Mairakarirakapo.” Aíyaka hauaka su anaka aporo pesamo kaiyiáne aporo sarimasamo ipu me kekepoane somerakano kaisiapo.

⁷ Kaikia fofaraka aporo kimisi pesamo someraka, “Ane mairakarirakapo. Aporoamo me kekepo somerakane iane Kariri aporosamo Kariri meaka somehoafunureapo. ⁸ Isiapo me kekepoane ipu somerakano kairakaripo. Mairakariakapo. ⁹ Isu aporo sarimasane Patía hauaka aeyaka soko, Mítia hauaka aeyaka soko, Írame hauaka aeyaka soko, Mesopotémea hauaka aeyaka soko, Yutía hauaka aeyaka soko, Kapatósia hauaka aeyaka soko, Pónetase hauaka aeyaka soko, Ésea hauaka aeyaka soko, ¹⁰ Firísia hauaka aeyaka soko, Pamefíria hauaka aeyaka soko, Iyipi hauaka aeyaka soko, Sairíni taone makeraka Rípia hauaka aeyaka soko, Rome siti aeyaka soko, Yarusarame siti wo kimisi pesapo.

¹¹ Isu aporo kimisi pesane metakira Yu aporo soko, metakira Yu aporohoanafonosamo Yu aporo sisimamo somemane kakimasane soko, isu metakira Kiríti hauaka aeyaka soko, Arépea hauaka aeyaka soko, isu hauaka su aeyaka, isiapo isina hauakane metakarikia pekea, Yarusarame siti wo risikinapo. Asiane isiapo me kekepoane ipu somerakae. Kotimo wakapumo hemakapukua rakiraka, isiapo me kekepoaka somerane ipu kaiyanafononane, ipu me kekepo kekepoaka somerakae.”

¹² Airakano aporo suamo himu faraka mahimeteraka ipu namina yiamo someraka, “Makata hakuane mairakarirakapo.” ¹³ Airakano aporo metakiramo mainamareraka someraka, “Ipu namina waene he kawe metekesane nareapo. Nesasamo himu mapari-taeraka me kekepoaka somerakae.” Aisapo.

Pitamo some kasane oyapo.

¹⁴ Pita soko tarira aporo kinu suane soko takahikia aporo yakai pesaki paroaka someraka, “Yu aporo soko, arirakano Yarusarame sitia kimisi pekea risia aporo repo soko, nōmo some one kaisie. ¹⁵ Repo someraka, ‘Aporoamo waene he kawe metekesane nekeia himu maparitaerareapo,’ airakae. Ane repo hasaka hemakapukua somerakae. Yumo mituru maiya tokonamo aporo himu maparitaenafapo. Aporo reo, some one kaisie. ¹⁶ Pipu mituru repo kairakasane wate fana porofete aporo Yoremo popasane pipu fasere apera oyareapo. Yoremo popasane oyapo.

¹⁷ Kotimo someraka, ‘Maiya fahoko makeanamo nōmo uyáka rakiakosapo. Aporo suaki nōmo Ho Kotesa muriakosapo. Murirakano repo aporo hokosamo soko, hinamo hokosamo soko, porofete aporomo some akara ayíáka, nōmo someane kaikia, ayíáka some kakakosapo. Repo hokosa rauamo soko, aporo sisimamo soko, kituamo asera ayíáka aseakosapo. ¹⁸ Arirakano maiya amo nōmo aporo raipaki soko, arirakano hinamo raipaki soko, Ho Kotesa muriakosapo. Murirakano porofete aporomo some akara ayíáka, ipu nōmo someane kaikia, ayíáka some kakakosapo. ¹⁹ Arirakano aporomo asekeia fofahoasimo, ti yapura makata wakapu kára nōmo rakiakosapo. Hauaka wo soko aporomo asekeasimo nōmo makata wakapu meta soko rakiakosapo. Yapi soko, ira rufí soko, ira musu kára soko, nōmo muriakosapo. ²⁰ Arirakano Unihae Yasu paripeakosakipoko, fana sere maiya ane katorakosapo. Ere maiyamo faeane yapi asia susu faehokosapo. Fahoko makeana maiya amo ayiakakosapo. Unihae pariapera maiya amo epo wakapuanne soko, faesane soko repo aseakosapo. ²¹ Asiamo aporo metamo Unihaeaki ararehoasimo kurikurirakano aporoane Unihaemo mafasiakosapo.’ Aíyaka Kotimo somerakano Yoremo popahoareapo. *(Joel 2:28-32)*

²² Arirakano Isiraya aporo repo suamo kaisie. Nasare aporo Yasuane nōmo somerakanapo. Repo hemakapusimo e hauaka wo Kotimo pusiesapo. Kotimo wakapumo hemakapukua rakirane aporomo aseraka, ‘Kotimo rakira ayareapo,’ aihoasimo Yasu pekea rakisiapo. Re risiakipoko epo pekea rakirakano, repo asesasamo repo hemakapurakanapo. ²³ Arirakano wate fana Yasuane ayiakakosane Kotimo ipi hemakapukua reapo. Hemakapukuareasamo Yasuane reaki karakano repo e rusua kusuapo. Aporo watikisamo e ira matopesa paremarerakano repo soko aosapo. Repo aosasamo repo namina yiamo eane rusua kusuapo. ²⁴ Rusua kurakano Yasuane Kotimo maturikia taesapo. Kura namonane Kotimo mafaraka Yasuane maturikia taesapo. Yasu kakaro kuane siahoasifasekeno Kotimo Yasuane maturikia taesapo.

²⁵ Arirakano Yasuane Tefetemo popasane oyapo. Tefetemo someraka, ‘Nōmo hemakapuraka maiya suamo Unihae Kotiane anoyaki rekenapo. Eane ano mak-erakareasamo ano namorakanafapo. ²⁶ Asiamo nōmo himumo seseraka mapiraraka somerakanapo. Ano amano hitafe reane Kotimo ano asekeia rekeakosapo. Aíyaka nōmo hemakapurakaripo. ²⁷ Ano akura maiya amo ano hoane hétisi hauaka yaiya rerapaka, Koti nōmo ano ararehokosapo. Asiamo nōmo murikimasa aporo kotesane kurakano, kauane torehokohoamo, nōmo asekeia rekeakosapo. Aíyaka nōmo hemakapurakaripo. ²⁸ Arirakano yaiya rekeakosa ikia karane nōmo anoaki tarisiapo. Né anoyakireasamo

kára sesenane nōmo anoaki kakakosapo. Aíyaka nōmo hemakapurakaripo.’ Aíyaka Tefetemo someaka popahoareapo.

(*Buk Song 16:8-11*)

²⁹ Maeo, nōmo yapakeaka somerakanafapo. Isiapo makasa kaua kekema Tefeteane wate fana kusua hauaka mareako rasane isiapo asesapo. Asesasamo Tefetemo aporo meta someaka popasane isiapo hemakapurakanapo. Ipiane popasafapo. ³⁰ Arirakano Tefeteane ipi porofete aporopo. Kotimo keseke ayiakakosaposane Tefetemo kaikia hemakapusuapo. Kotimo aumaraka someaka mareraka, ‘Tefeteo, né unihaeaka area ay-iáka, nōmo aporo ira wainepe pukua aporo metane soko, ayiáka unihaeaka rekeakosapo.’ ³¹ Airakano Kotimo ayiakakosaposane Tefetemo kakimaka hemakapusuapo. Kakimaka hemakapukua Keresoane maturikia taehokosane Tefetemo someraka, ‘Akura maiya amo ano ho hétisi hauaka yaiya rerapaka, Koti nōmo ano ararehokosapo. Ararerakano ano kau torehokosafapo.’ Aíyaka Tefetemo somehoareapo.

(*Buk Song 16:10*)

³² Asiamo Yasu kusuane Kotimo maturikia taerakano Yasu turikia pusuapo. Turikia purakano isiapo suamo asesapo. ³³ Arirakano Kotimo Yasuane makárarakaraka marekea Koti ipi rea hokono tumuru takua Yasu rekeno, Ata Kotimo someraka Ho Kotesa kakakosaposane eaki kasapo. Karakano epo masapo. Pipu repo makata aserane soko, makata akairane soko, Ho Kotesane epo masane, isuaki yaku akare.

³⁴ Arirakano Tefete hepene yapura hianafonosa yamo Tefetemo popasane oyapo. Nōmo Unihaeaki, Unihae Kotimo someraka, ‘Né ano hokono tumuru takua kayae. ³⁵ Kakeno nōmo yunuane nōmo rukumosakatapi-akosapo.’ Aíyaka Kotimo somerakano Tefetemo popahoareapo.

(*Buk Song 110:1*)

³⁶ Arirakano Isiraya aporo repo suamo himumo hemakapunie. Yasuane repo ira matopesa paremaresane, e Kotimo unihaeaka rekeasimo murikimasa aporoane ayapo. E Keresopo.”

³⁷ Aíyaka Pitamo somerakano aporo suamo kairaka himu faraka, Pitaki soko, tarira aporoaki soko, ipu someraka, “Maeo, isiapo yakapa rakiakosare?” ³⁸ Airakano Pitamo someraka, “Repo suamo himu watikisane rukupateraka metakarinie. Metakarikia Yasu Keresomo yano motosane wakapusasamo, repo himu watikisane mafahoasimo e yano hokoa, epo wakapumo siahoasireapo, aíyaka hemakapurakano hea tapukumurianie. Hea tapukumurirakano, Kotimo repo himu watikisane mafahokosapo. Mafaraka Ho Kotesa reaki yaku kakakosapo. ³⁹ Ho Kotesa kakakosaposane Kotimo kakaro somesapo. Reaki soko, repo hokosaki soko, aporo hauaka yamenoa risiaki soko, aporo hinamo su Kotimo pasimosaki soko, Kotimo kakakosaposane kakaro somesapo.”

⁴⁰ Aíyaka Pitamo some meta soko wakapuaka someraka, “Aporo hinamo maiya yumo risiane watikiaka rakiraka risikinapo. Watikiaka rakiraka risia nine, repo watikisane metakarikia Yasuaki risikiako parihoanie.” ⁴¹ Airakano aporo yakaimo epo someane kakimasapo. Kakimarakan hea tapukumurisiapo. Maiya amo aporo hinamo yakai tiri taosene ane (3,000), Yasuaki patera asesa aporo hinamo akiyaki paosapo. ⁴² Paoraka tarira aporomo some kasane ipu kakimaka, arirakano maiya suamo sarimaraka, kikinaraka himu hakásaraka hemakapukua, arirakano makata nenaka toke hemakapuraka, “Yasu isupoko farimaka kusuapo.” Aíyaka hemakapukua makata nenaka toke, Kotiaki kurikuriraka ayiáka risiapo.

Keresoa paosa aporo hinamo risiane oyapo.

⁴³ Kotimo wakapumo hemakapukua rakirane, tarira aporomo rakisiapo. Ayiáka rakirakano aporo suamo asekea fofasapo. ⁴⁴ Arirakano kakimara aporo hinamo susuane sarimaraka toapo. Aporo hakásamo makata kemoane namina sumenapo, aíyaka hemakapukua suamo ásiapo. ⁴⁵ Ipu makata kemo roporaka mone mokoa parakuraka, metakiramo mone fasokino arareraka kasapo. Metakiramo mone wakasemasekeno suamo arareraka kasapo. ⁴⁶ Maiya suamo i sarimaraka, Kotimo apea hikia poparipukua, namina apea sarimaraka, himu hakásaraka hemakapukua toke seseraka makata nesapo.

⁴⁷ Kotiaki kekereraka risikino aporo suamo iyaki hakāsa seseraka risiapo. Arirakano maiya suamo aporo hinamo metakirane Unihae Kotimo mafasikia pasimorakano, i Keresoa paosa aporo hinamoyaki paoraka risiapo.

3

Aporo korake matipusa mafasane oyapo.

¹ Samapu maiya isiamo Yu aporomo kurikurihoko Kotimo apea hirapo. Arirakano Pitape Yone tetā hikia, ² ikia koro yano motosa Kotesa á pauraka aseane, aporo korake matipusa kakeno asesapo. Arirakano aporo korake matipusane hokosa kiri kaiyiamo takaperakayia, korake matipusa pusifasekeno karápo. Arirakano maiya suamo aporo metakiramo e maka pekea motorakano, mone mokoako ikia koroa asekeea karápo. Aporo Kotimo apea hiraki mone makarakarihoamo kau karápo. ³ Aiyáka kayakipoko Pitape Yone tetā hinakano, aporoamo asekeea someraka, “Anoaki mone makasie.” ⁴ Airakano tetapō e asekeea Pitamo someraka, “Nómo eto asesie.” ⁵ Airakano aporo korake matipusamo mone mako hemakapukua tetā asekeea kayapo.

⁶ Asekeea kakeno Pitamo someraka, “Nómo mone kakenafapo. Makata meta nōmenane neaki kakakosapo. Nasare aporo Yasu Keresomo yano motosane wakapusasamo Yasumo yano motosa aeyaka, né takahikia pusie.” ⁷ Aiyaka Pitamo e hokono tumurua maka máfarakano, wate foaka korake hi soko, korake kiki soko, wakapuaka reke, aporoane takahikia finirape pusuapo. ⁸ Pukua tetāyaki hakāsa Kotimo apea yorokoa, kurusu kurusurape hikia Kotiaki kekeresapo. ⁹ Kekererape hinakano, aporo suamo e asekeea ¹⁰ someraka, “Aporo Kotimo ape ikia koro yano motosa Kotesa á mone mokoako kaya aporoane apera ayareapo.” Aiyaka aporo suamo aporo korake matipusa fasane aseraka fofasapo.

Kotimo apea Pitamo some kasane oyapo.

¹¹ Aporo korake matipusa fasane Pitape Yone tetā makeraka reapo. Arirakano aporo suamo aseraka foaka pekea, Kotimo ape ape taru hakāsa yano motosa Soromonemo ape á i peraka aseraka fofasapo. ¹² Fofarakano i pesane Pitamo aseraka someraka, “Isiraya aporo reo, marirakano repo fofaraka isuane asekeea hi pokohetheraka risikinare? Eto koteaka risiasamo aporo korake matipusaki takahisiesare? Wae. Aporoane etapo wakapumo mafasare? Wae.

¹³ Eparahamemo soko, Aisakemo soko, Yakopemo soko, isiapo makasa kaua keke-mamo soko, ipu suamo Koti amo ipi aporo raipa Yasumo yano motosane makárasapo. Makárarakano Yasuane hukurukusakipoko Pairate rea repo e karikia pusuapo. Karikia pukua Yasu hukrukua, Yasuane ipi koteaka reasasamo Pairatemo tonotaehoko hemakapusuapo. Asiāne repo waeraka, ¹⁴ Yasu ipi koteaka susu reke watikisa kikisiaka reane repo tonotaehoko Yasuane hisiraka someraka, ‘Yasuane tonotaehokopo. Aporomano rura aporo Parápase ane tonotaehoanie.’ ¹⁵ Aiyaka someraka, Yaiya Reramo Kepo Yasuane repo ira matopesa paremarekea rusua kusuapo. Kurakano e Kotimo maturikia taesapo. Maturikia taerakano, turikia pusuane etapo asesapo.

¹⁶ Yasumo yano motosane wakapusasamo, etapo Yasuaki himu hakásaraka hemakapurakano, Yasumo yano motosa wakapu aeyaka aporoane mafásapo. Mafása aporoane re arisia e koteaka purakanapo. Etapo Yasuaki himu hakásaraka hemakapura amo aporoane mafásane repo aserakanapo.

¹⁷ Maeo, nōmo hemakapuraka, ‘Repo soko, repo aporo unihaeaka risiamo soko, hime-teraka Yasu rusua kuriapo,’ aiyaka nōmo hemakapurakanapo. ¹⁸ Arirakano Kotimo fana somesane yumo kakaro ayiana ayareapo. Wate fana Kotimo somerakano porofete aporo suamo kaikia someraka, ‘Kotimo ipi Mafasira Aporo Kereso murikimasane aporomo mokoatikirakano, Kereso kau teraka himu nakosapo.’ Aisane yaiya faserepesa ayareapo.

¹⁹ Asiamo repo himu watikisane Kotimo mafahoasimo, repo watikisane rukupateraka metakarikia, Kotiaki risikiako parihoanie. ²⁰ Arirakano maiya sisipuraka risiane fofo

peraka auara ayiáka, Koti ipi yiamo re himu sesena kakasimo Kotiaki risikiako parihoanie. Mafasira aporo Kotimo murikimasane Yasu ipipo.* Yasuane re arisia Kotimo paripusie aihoasimo, re Kotiaki risikiako parihoanie. ²¹ Arirakano Yasu hepene yapura nina makata su makaweraka mareakosakipoko, Kotimo e paripusiehokosapo. Aíyaka someaka maresane wate fana Kotimo somerakano, ipi porofete aporo koteaka risia aporoamo kaikia aporo hinamo suaki some kasapo.

²² Fana Mosesemo someraka,
 ‘Unihae Kotimo ano porofete aporohoasimo murikimasa ayiáka, repo Yu aporomo soko namina yia meta porofete aporohoasimo murikimakosapo. Murikimarakano epo some karakano kaiyinie. ²³ Kaiyianafonoraka kakipayana aporo hinamoane kikisiraka marutaehokosapo. Kakipayana aporo hinamoane Kotimo some kakimara aporo hinamoyaki hakása sarimaraka risikiakosafapo.’ *(Lo 18:15-19)*

²⁴ Aíyaka Mosesemo somerakano, porofete aporo su Sámio soko, e patera porofete aporo metakira soko, Kotimo somerakano ipu kaikia, pipu yumo ayianane wate fana ipu somesapo.

²⁵ Kotimo ayiakakosaposane some karakano porofete aporo repo makasa kaua keke-mamo kaikia, somesa ane reaki some kasapo. Arirakano repo makasa kaua kekemaki Kotimo someaka masane reaki soko, someaka masapo. Arirakano Eparahameaki Kotimo someaka maraka, ‘Aporo hinamo hauaka sua risiaki, nómó aporo ira wainepe pukusa aeyaka† nómó makotehokosapo.’ Aíyaka Kotimo somehoareapo. *(Stat 22:18)*

²⁶ Arirakano repo suamo makata watikisane metakarismo, re Yu aporoane fana makotehoko, ipi aporo raipa Yasuane Kotimo murikimaka re arisia pusiesapo,” aíyaka Pitamo somesapo.

4

Pitape Yone tetā hukurusuane oyapo.

¹ Kotimo apea Pitape Yone tetapō aporo hinamoaki some kasakipoko pirisiti aporo soko, aporo terakaiyamosa satinimo Kotimo ape asekea reane soko, Satusi aporo soko i su peraka, Pitape Yone tetāki sapesapo. ² Saperakano aporo hinamo suaki Pitape Yone tetapō someraka, “Yasu kusua maturikia taesapo.” Aisasamo aporo hinamoane soko, keseke maturikia taehokosapo. Aíyaka somesakipoko ipu tetāki sapesapo. ³ Saperaka tetāne waseremokoa tipura kesapo. Tipura kekea ererakano hukurusuafapo. Asiamo tetā tipura ape yia wakakesapo. ⁴ Arirakano tetā tipura keasiraka tetapō some karakano, aporo hinamo yakaimo kakimasapo. Tetapō someane kakimasa, aporo hinamo suane menoraka fae taosenepo (5,000).

⁵ Asiamo mituru fiarakano Pitape Yone tetā tipura kesane hukurukusakipoko, Yu aporo unihae soko, Yu aporo sisima soko, Kotimo somemane tisa aporo soko, Yarusarame sitia sarimasapo. ⁶ Sarimaraka pirisiti aporo fana Anaseane soko, Kaiafase soko, Yone soko,* Arekesáta soko, Anasemo aporo ira metakira soko, i sú sarimasapo. ⁷ Sarimaraka risike Pitape Yone tetāne peaesapo. Perakano ipu tetāki someraka, “Teto pekea tipi wo risie.” Aírakano tetā pekea tipia risikino ipu hukurusuapo. Hukururaka someraka, “Tetapo aporo makata tasa mafásane yakapamo wakapumo mafásare? Tetápo epamo yano motosane yano hokoa mafásare?”

⁸ Airakano Pita himua Ho Kotesa komarukua rekerakano Pitamo someraka, “Aporo unihaeaka asekea risiao, Yu aporo sisima reo, repo kaisie. ⁹ Aporo korake matipusa mafásane etapo araresasamo repo etoaki pipu hukuarurare? E mayiaka mafásare? Aíyaka hukururakano ¹⁰ repo soko kaikia arirakano Isiraya aporo hinamo soko kaikia

* 3:20: Yasumo ipi namo kakaro yano motosane Yasupo. Anakano Kereso yano motosa kepoane Mafasira Aporopo, aíyaka someraka yano motosapo. Kiriki aporo meaka ipu Kereso airapo, anakano Yu aporo meaka ipu Mesaia airapo.

† 3:25: Eparahamemo aporo ira aeyaka Yasuane takapesapo. Asiamo Yasumo makata rakisia aeyaka, aporo hinamo suane Kotimo makotehokosapo. * 4:6: Yone ane, Anasemo aporo irapo. Yasumo aporo hakása pura Yone ayafapo.

hemakapusimo nōmo somerakanapo. Aporo korake matipusane Nasare aporo Yasu Keresomo wakapumo siahoasireapo, aíyaka etapo hemakapukua risike, e yano hokoa mafásapo. Yasu Kereso ipiane repo ira paremarekeea rusua kusuapo. Rusua kurakano Kotimo maturikia taesapo. ¹¹ Maturikia taesa aporoane, wate fana Kotimo sawia poparaka,

‘Ira warupiane repo ape kira aporomo mamakatesane, efera maka pekea, tipia mapo-hoareapo,’ aíyaka popahoareapo. (Buk Song 118:22)

¹² Arirakano hauaka sua aporo hinamo himu watikisane aporo metamo mafahoane siahoasifareapo. Aporo hinamo himu watikisa mafanane, Yasumo ipi wakapu hákasamo mafahoasireapo. Aíyaka Kotimo maresapo.” Aíyaka Pitamo somesapo.

¹³ Arirakano Pitape Yone tetapō namonafaraka mapiraraka somerakano, hukurura aporomo kaikia fofaraka someraka, “Tetā kára sukurusafapo. Tetapō mayíáka mapiraraka somerakanarakapo. Tetā Yasuyaki hakāsa pusuasamo mapiraraka somerakae.” Aíyaka namina hemakapusuapo. ¹⁴ Arirakano aporo mafasane tetāyaki rekeno, ipu aseraka me kauraka makata somerafaraka asekeea toapo. “Aporoane mafasafapo,” aihoane siahoasifareapo. ¹⁵ Aíyaka hemakapukua toke ipu someraka, “Isiapo some-hokosakipoko, teto ape one fore metakarikia pusie.” Aíyaka tetā metakarikia purakano, namina susu toke me rusuapo. ¹⁶ Me rukua ipu someraka, “Tetāne isiapo mayiakakosare? Tetapō makata wakapu rakira kára rakisiante Yarusarame sitia aporo suamo aserakasupo. Asesasamo isiapo someraka, ‘Aporoane mafasafapo,’ aihoane siahoasifareapo. ¹⁷ Mafasane aporo metakiramo kaiyakohoamo, tetapō Yasu yano hokoa, efera hunia somehokohoamo yaporakanapo.” ¹⁸ Aíyaka me rukua faraka marekea, tetā peaesapo. Perakano tetāki ipu someraka, “Maiya suamo Yasu yano hoakohoamo yapo motorakanapo. Yasuane repo some kakakohoamo yumo yaporakanapo. Efera hunia somehokohoamo yumo yaporakanapo.”

¹⁹ Airakano tetapō someraka, “Kotimo sesehoasimo ipi someane kakimayane siahoasireare? Ipi some metakarikia repo someane kakimayane siahoasireare? Repo takekeea hemakapusie. Kotimo someane metakariane siahoasifareapo. ²⁰ Yasumo makata rakirakano etapo asesane soko, makata somerakano etapo kaisiane soko, yaiya somehokosapo. Metakariakosafapo.”

²¹ Airakano tetāki efera hunia ipu paroaka someraka, “Yasuane some kakakopo. Yasu yano hoakopo. Yasu yano hoakosane isiapo yaporakanapo.” Aíyaka fanasihoane siahoasifasekeno tetāne tonotaesapo. “Tetapō wakapuaka rakisiakipoko, aporo hinamo suamo aseraka Kotiaki kekererakano fanasihoasifareapo.” Aíyaka ipu hemakapukua tetā tonotaesapo. ²² Arirakano aporo korake matipusa mafasane, ipi aporo sisimapo. Ipi keremisi foti su (40) faraka ayiáka ipi rekeno mafasapo.

Keresoa paosa aporo hinamomo kurikurisane oyapo.

²³ Pitape Yone tetā tonotaerakano, tetā pukua kakimara aporo hinamo risiakipoko á pusuapo. Á puraka pirisiti aporo fanamo soko, Yu aporo sisimamo soko, ipu someaka motosane tetapō iaki somesapo. ²⁴ Somerakano aporo tákemo kairaka himu hakásaraka risike Kotiaki kurikuriraka, “Unihae Kotio, né kakaro káraro. Ti yapurane soko, hauaka one soko, he tawarane soko, nōmo rakisiapo. Ti yapura makata arisiane soko, hauaka wo makata arisiane soko, he tawara makata arisiane soko, makata su nōmo rakisiapo. ²⁵ Nōmo someane isiapo makasa kaua kekema Tefeteaki Ho Kotesamo somerakarakano, Tefete nōmo aporo raipamo kaikia nōmo someane popasane oyapo.

‘Yu aporohoanafonosamo marirakano sapesare? Yu aporomo Kotimo Mafasira Aporoane mokoatikihokosapo, aisane marirakano aisare? ²⁶ Hauaka su aeyaka unihae metakira pekea, Unihae Kotiane ipu hisiraka, Kotimo Mafasira Aporoane soko hisiraka, tetāki weakosakipoko sarimasapo.’ (Buk Song 2:1-2)

²⁷ Aíyaka Tefetemo popasane kakaro yasiapo. Ape wo Herotemo soko, Potiase Pairatemo soko, Yu aporohoanafonosamo soko, Yu aporomo soko, suamo nómō murikimasa aporo Yasuane ipu hisiraka, rusua kukusakipoko sarimasapo. Nómō aporo raipa Yasumo ipi ainane kotesa susupo. ²⁸ Arirakano ipu Yasuane rusua kukusakipoko sarimasane, wate fana nómō ní hemakapukua someaka maresa nine yasiapo. ²⁹ Asiamo Unihaeo, yumo isu mokoatikihokosaposane nómō kairakanapo. Isu nómō aporo raipapo. Nómō someane isiapo namonafaraka mapiraraka somehoasimo, nómō isu arareremie. ³⁰ Aporo makata tasane mafahoasimo nómō ararehoanie. Nómō ní aporo raipa kakaro kotesane Yasu ipipo. Epo wakapumo hemakapukua rakirane isiapo rakisimo ararehoanie. Aporo suamo asekeasimo ararehoanie.”

³¹ Aíyaka kurikuriraka faraka i toakipoko apeane mahohoraka Ho Kotesane i sú himua komarukua risiapo. Komarukua risikirakano Kotimo someane ipu suamo namonafaraka mapiraraka some kasapo.

Keresoa paosa aporo hinamomo himu hakásaraka hemakapukua risirane oyapo.

³² Kakimara aporo hinamo suamo himu hakásaraka hemakapukua risiapo. Himu hakásaraka risike ipu someraka, “Makata kemoane nómō ní mena hákasafapo. Isina suamo menapo.” Aíyaka ipu makata kemo namina menane, namina sumenapo. ³³ Ayíáka someraka risike, Yasu kusua maturikia taerakano turikia pusua asesane, tarira aporomo wakapuaka some kasapo. Some karaka i suane Kotimo hemakapukua arareraka makoterakano, ³⁴ namina suane aporo meta makata forokoa reafapo. Ipu makata su siaraka risiapo. Arirakano aporo metakiramo ipu hauaka roporaka, arirakano aporo metakiramo ipu ape roporaka, ³⁵ ayíáka mone mosane tarira aporomo aporo makata forokoa risiaki kakasimo, mone mokoa pekea taesapo. Taerakano moneane parakuraka metamo pasu fasékeno, pasu ropohoasimo moneane kasapo. Metamo makata nakosa fasékeno, epo makata nakosa ropohoasimo mone kasapo.

³⁶ Arirakano aporo meta yano motosa Yosefe ipi Rífai aporo ira reapo. Yosefeane Saéparase hauaka aeyaka perakano, tarira aporomo e yano meta Pánapase yano motosapo. Namo meaka Pánapaseane Mawakapu Somera Aporo ayíáka yano motosapo.

³⁷ Pánapasemo ipi hauaka roporaka, mone mosane tarira aporomo parakuhoasimo kasapo.

5

Ananásepe Safára tetapō hauaka reposane oyapo.

¹ Aporo meta yano motosa Ananásemo ipi asea yano motosa Safárapo. Ananásemo ipi hauakane aporo metaki roporaka ² mone mosane parakusapo. Parakuraka ipi aseamo soko aserakano sape meta ipi tau faremarekea motosapo. Sape meta tarira aporoaki kasapo.

³ Karakano Pitamo aseraka someraka, “Ananáseo, Satanemo né himu maparitaerakano, nómō eaki aoanane marirakanonare? Satanemo néaki hokokerakano, hauaka roporaka mone mosane tau faremarekea motoreapo. Motokoa yia marirakano aíyaka somerakanare? Nómō Ho Kotesaki kotafe someahore. ⁴ Hauaka ropohoasiraka hauakane nómō nímenapo. Hauaka roporaka mone mosane soko nómō nímenapo. Mone anoaki maka pesane nómō hemakapuraka, ‘Mone ane su yiyareapo,’ aíyaka hemakapusimo maka perakayiare? Marirakano nómō aíyaka hemakapusare? Nómō aporoaki hákasa kotafe hokoa somerakanare? Wae, Kotiaki soko kotafe hokoa someahore.” ⁵ Aíyaka somehoanine Ananásemo kaikia hauaka huruperaka kusuapo. Kusuane aporo metakiramo kairaka namoraka risiapo. ⁶ Arirakano hokosa raua metakira pekea, aporo kusuane taporakafefeneakua makekeea, maka hikia hauaka maresapo.

⁷ Maiya hi awa isia faraka, Ananásemo ipi asea peraka, ipi apia kusuaposane kaisiafapo. ⁸ Arirakano Safára Pitamo someraka, “Hauaka reposane mone su maka pesa yiyare?” Airakano hinamoamo someraka, “Ao, mone maka pesane su yiyapo.” ⁹ Airakano

Pitamo someraka, “Tetápo tití mone parakuraka himu hakásaraka hemakapuraka, ‘Mone tau faremarekeea motosane, mahamekea kotafe somehokosapo. Kotafe somerakano Unihaemo Ho Kotesamo aserakanafapo.’ Aíyaka hemakapukua marirakano tetápo aíyaka kotafe somesare? Aporomo ní makapinu kusuane hauaka marekea popariapere. Ikia koro makeraka né mako apere.”

¹⁰ Aíyaka Pitamo somehoanine, hinamoane wate foaka huruperaka kusuapo. Kurakano hokosa rauamo aseraka, fefeneakua makekea maka hikia, ipi apia hauaka maresa taku yia, hinamoane soko yia maresapo. ¹¹ Marerakano Keresoa paosa aporo hinamomo soko aporo hinamo metakiramo soko suamo kaikia kára fofasapo.

Tarira aporomo makata wakapu rakira kára rakisiane oyapo.

¹² Aporo hinamo su risiakipoko ipu asekeasimo tarira aporomo makata wakapu rakira kára rakisiapo. Rakirakano Kotimo apea ape taru hakásá meta yano motoraka Soromonemo apea kakimara aporo hinamo su sarimasapo. ¹³ Sarimarakano nena aporo namoraka iyaki hakásá sarimasafapo. Sarimahoanafonoraka ipu someraka, “Kakimara aporo hinamoane koteaka risikinapo,” aisapo.

¹⁴ Airakano maiya amo aporo hinamo yakaimo Unihae Yasuaki himu hakásaraka hemakapukua, kakimara aporo hinamo akiyaki paosapo. Paosa maiya amo i namo kakaro yakaisapo. ¹⁵ Arirakano aporo hinamo makata tasane, aporo metakiramo mokoa pekeea, ikia kara taeraka, metakira asakapu ifunuraka taeraka, metakira fefeneakua kekeea taesapo. Taehoane Pita puraka ipi homo sakairaka mafahoasimo makeraka taesapo.

¹⁶ Arirakano Yarusarame siti makeraka hauaka metakira risia aeyaka aporo hinamo makata tasa soko yatafumo aporo hinamo ho mosane soko mokoa perakano su mafásapo.

Tarira aporo tipura kesane hepene aporomo tonotaesane oyapo.

¹⁷ Arirakano pirisiti aporo fanamo soko, ipi aporo táke Satusi aporomo soko ipu suamo tarira aporoaki kakanakesapo. ¹⁸ Kakanakeraka tarira aporoane waseremokoa tipura kesapo. ¹⁹ Tipura kesa risiakipoko, ereamo Unihaemo hepene aporo pekea, tipura ikia koro mapirisiane ropakamaka, tarira aporoane pasimokoa iaki someraka, ²⁰ “Re Kotimo apea punie. Pukua aporo makaweraka risira some kepoane aporo hinamo suaki some kakanie,” aisapo.

²¹ Airakano tarira aporomo kakimaka, mituru fiarakano Kotimo apea yorokoa some kasapo. Arirakano pirisiti aporo fana soko, ipi aporo táke soko sarimaraka, tarira aporo hukurukusakipoko Yu aporo sisimaki soko, pirisiti aporo káraki soko, Kotimo somemané tisa aporoaki soko someraka, “Sarimahoko peae,” aisapo. Aíyaka i perakano asekea su sarimaraka risike, ipu aporo terakaiyamosaki someraka, “Tarira aporo tipura apea risiane pasimokoako pusie.” ²² Airakano aporo terakaiyamosa tipura apea pukua aseane, tarira aporo fasokino poparipesapo. ²³ Popariperaka ipu someraka, “Isiapo tipura apea aseane, ikia koro mapirikia róko motokoa, aporo terakaiyamosamo asekea risikisapo. Ikia koro mapirisia nine ropakamaka ape kakarua yorokoa aseane aporo fasokino asesapo.”

²⁴ Airakano Kotimo ape asekea rea aporo terakaiyamosa satinimo soko, pirisiti aporo fanamo soko kaikia someraka, “I mayiáka tonopusuarakapo. Makata meta fasere peanarakapo,” aíyaka i mahimeteraka risiapo. ²⁵ Mahimeteraka risikino aporo meta pekeea someraka, “Tarira aporo tipura kesane Kotimo apea risike aporo suaki some karakanapo.” ²⁶ Airakano satini soko, aporo terakaiyamosayaki Kotimo apea hákasa puraka, tarira aporoane pasimokoako pusuapo. Pukua Kotimo apea pauraka tarira aporoane wasere mokoakosapoko asiane, aporo metakiramo iane ekemo karerapaka namoraka, ipu tarira aporoane sakepamo waseremosafapo. Tau auaraka pasimosapo.

²⁷ Pasimokoa aporomo hukuruko sarimaraka risiakipoko karikia perakano, pirisiti aporo fanamo tarira aporoaki hukururaka someraka, ²⁸ “Aporo suaki Yasuane repo somerapaka isiapo yapo motosapo. Yapo motosa nine repo kakipayaraka, Yarusarame

sitia aporo hinamo suaki Yasuane some karakanapo. Yasu rusua kusuane isiaipo rusua kusuapo, aiyaka repo isu hokomaka somerakanapakae."

²⁹ Airakano tarira aporo Pitape tarira aporo ipu someraka, "Kotimo someaka maresane fanapo. Aporomo someaka maresane kesekepo. Kotimo someane fanasasamo isiaipo kakimaka some kakakosapo. ³⁰ Arirakano Yasuane repo ira paremarekeea rusua kusuane Kotimo maturikia taesapo. Kotiane isiaipo makasa kaua kekemamo Kotipo. ³¹ Yasu ipi fanaraka reke, ipi Mafasira Aporo reakipoko, Kotimo ipi hokono tumuru takua Yasu makáraraka rekeasimo maresapo. Aporo himu watikisane mafahoasimo Yasuane Kotimo maresapo. Isiraya aporomo himu watikisane metakirakano, Yasumo mafahoasimo e murikimasapo. ³² Murikimasane isiaipo asekea somerakanapo. Arirakano Ho Kotesamo soko tarirakanapo. Aporo hinamomo Kotimo someane kakimasaki Ho Kotesa Kotimo yaku karápo," aiyaka Pitamo somesapo. ³³ Somerakano aporo sarimaraka risiamo kairaka kára saperaka, tarira aporoane rusua kukusimo hemakapusuapo.

³⁴ Arirakano aporo sarimasane meta yano motosa Kamério, ipi Fereze aporo reane, Kotimo somemanne tisa aporomo rakirane epo rakiraka reapo. Ayiáka rekeno e aporo suamo seseaka hemakapusuapo. Arirakano Kamério takahikia someraka, "Tarira aporo fore yaoa risikiako pusiehoanie." Airakano i ape metakarikia pusuapo. ³⁵ Purakano Kamériomo someraka, "Isiraya aporo repo suamo kaisie. Tarira aporoaki foakayia fanasinane mareakopo. ³⁶ Asiamo fana aporo meta yano motosa Tiutasemo someraka, 'Ano aporo kárapo,' aiyaka somerakano aporo yakai fo harote suane (400) eyaki paosapo. Aporo metamo Tiutaseane rusua kurakano, eyaki paosa aporoane tekterikia pusuapo. Tekterikia purakano, Tiutasemo rakirane nenakamakayia rakisiasamo ipu metakarisapo. ³⁷ Tiutase kusuakipoko, patera á Kariri aporo meta yano motosa Yutase reapo. Kamanimo aporo su yano taesane yano wáraka popana maiya amo, Yutaseamo soko, epo ipi yano motosa makáraraka somerakano aporo metakira eyaki paosapo. Paorakano Yutaseane soko aporo metamo rusua kusuapo. Rusua kurakano eyaki paosa aporoane tekterikia pusuapo.

³⁸ Asiasamo yumo tarira aporoane rusua kukukopo. Metakarisie. I Kotimo ararehoanafonorakanone, ipu rakirane fahokosapo. ³⁹ Arirakano ipu rakirane Kotimo ararerakanone, iane repo hurutapiakosafapo. Repo Kotiaki yunuraka risirapaka asekeanie."

⁴⁰ Airakano Kamériomo someane ipu kairaka, tarira aporoane peaesapo. Perakano tarira aporoane ira famo ruraka paroaka someraka, "Yasu yano hoakopo. Yasuane some kakakopo," aiyaka tarira aporoane tonotaesapo. ⁴¹ Tonotaerakano tarira aporomo hemakapuraka, "Yasuaki patera asesakipoko ipu isuane mawakasemaraka rusuapo. Yasupoko ruane siahoasireapo," aiyaka hemakapukua sesesapo.

⁴² Maiya suamo Kotimo apea soko, ipu namina apea soko, Yasuane some kasapo. Ipu some karaka, "Yasuane ipi Mafasira Aporopo. Ipiane aporo unihaeaka rekeasimo makáraraka maresasamo ipi Keresopo," aiyaka some kasapo.

6

Aporo yatipinusumo aporo hinamo metakira ararehoasimo murikimosane oyapo.

¹ Wakasema risina Yasuaki patera asesa aporo hinamo yakaisekeno Yu aporo toke metakiramo Hipuru* meaka somerapo. Arirakano metakiramo Kiriki meaka somerapo. Kiriki meaka somera aporomo Hipuru meaka somera aporoaki me uraka somesapo. Me uraka someraka, "Maiya suamo makata nakosa parakuraka, isu Kiriki meaka somera hinamo yaroaki makata nakosa wakasema akare. Iaki siaraka karakarifapo," aiyaka Kiriki meaka somera aporoamo spesapo. ² Saperakano tarira aporomo Yasuaki patera asesa aporo hinamoane maropohoko peaesapo. Peaeraka perakano asekea, iaki tarira aporomo someraka, "Makata nakosane isiaipo parakuhoko Kotimo someane some akarane metakariane siahoasifareapo. ³ Asiamo makata nakosa parakuhoasimo

* 6:1: Yu aporo hinamomo Hipuru meane somerapo.

aporo yatipinusu koteaka risikinapakasuane murikimokoanie. Aporo i himua Ho Kotesa komarukua risike, ipu himumo koteaka takekeea hemakapukua risikino, aporoane murikimokoanie. Murikimokoa, aporoamo makata nakosane parakurasiehokusapo. Ipu makata nakosane parakuanamo ⁴ maiya suamo isiapo kurikuriraka, arirakano Kotimo someane some kaka ayiakakosapo.”

⁵ Airakano tarira aporomo someane aporo hinamo suamo seseaka aoraka, aporo yatipinusu murikimosapo. Aporo murikimosane hakásara meta yano motosa Sitífenepo. Sitífenemo kakaro Kotiaki himu hakásaraka hemakapukua reke, e himua Ho Kotesane komarukua reapo. Ayíáka Sitífene soko, Firipi soko, Pokórase soko, Naekéna soko, Taemone soko, Pámenase soko, Nikorase soko, i su murikimosapo. Nikorase ipi Anitioke taone aeyaka pesane e Yu aporofapo. Asiāne epo Yu aporomo somemaneane kakimasapo. ⁶ Aporo murikimosane tarira aporo risia karikia perakano, i Kotimo ararehoasimo, tarira aporomo i hokonomo sakairaka kurikurisapo. ⁷ Arirakano maiya amo Kotimo someane some karaka, maiya suamo ayíáka some kasapo. Some karakano aporo hinamo metakiramo kakimaka Yarusarame sitia Yasuaki patera asesa aporo hinamo yakai káraraka risiapo. Arirakano pirisiti aporo káraraka yakaimo Yasuaki himu hakásaraka hemakapukua epo someane kakimasapo.

Sitífene waseremasane oyapo.

⁸ Sitífeneane Kotimo yaku ararerakano epo wakapuaka rakisiapo. Aporomo hemakapusimo epo Kotimo wakapumo hemakapukua rakirane rakisiapo. ⁹ Rakirakano aporo metakiramo eaki hisisapo. Yu aporo Sairíni taone aeyaka soko, Aresátia taone aeyaka soko, i pekea Yu aporomo sarimana ape yano motosa Firímane sarimana apea i sarimasapo. Sarimaraka ipu Yu aporo Sirísia hauaka aeyaka pesamo soko, Esea hauaka aeyaka pesamo soko, ipu suamo Sitífeneaki tafatafasapo. ¹⁰ Tafatafarakano, Ho Kotesamo Sitífene ararerakano, Sitífenemo makata kepo su hemakapukua somerakano, ipu kaikia fofaraka, Sitífenemo someane rukutopakatapiasifareapo.

¹¹ Asiasamo i pukua aporo metakira tau murikimokoa someraka, “Repo úyaka somehoanie. Mosesane soko, Kotiane soko, Sitífenemo hokomarakano isiapo kaisiapo. Aíyaka somehoanie.” ¹² Airakano tau murikimosa aporoamo ayíáka kotafe someraka aporo kirimasapo. Kirimarakano kotafe someane aporomo kakimaka, ipu Sitífeneaki sapesapo. Saperaka Yu aporo sisimamo soko, Kotimo somemane tisa aporomo soko, saperaka ipu suamo Sitífene waseremaka hukuruko pirisiti aporo kára soko, Yu aporo sisima soko, Kotimo somemane tisa aporo soko, i sarimaraka risiakipoko karikia pusuapo. ¹³ Karikia pukua Sitífene hukururaka, aporomo kotafe somehoasimo murikimosa aporoamo kotafe someraka, “Maiya suamo Sitífenemo Kotimo apeane hokomaka, Mosesemo somemane motosane mawakasemarakasupo. ¹⁴ Nasare aporo Yasumo Kotimo apeane marutaehokusapo, airakasupo. Kotimo somemaneane isuaki Mosesemo kasane, Yasumo metakarikia somemane meta kakakosapo airakasupo.” Aíyaka ipu kotafe topakamaraka somesapo.

¹⁵ Arirakano aporo sarimaraka risiamo aseane, Sitífenemo hikumisiane hakuraka, hepene aporomo hikumisi aseraka sikiraka asesapo.

Sitífenemo some kasane oyapo.

¹ Pirisiti aporo fanamo Sitífeneaki kairaka, “Ne hukurusuane yasiare?” ² Airakano Sitífenemo someraka, “Maeo, aporo sisimao, kaisie. Isiapo makasa kaua kekema Eparahameane Harane taonea pusiraka, Mesopotémea hauaka rea maiya amo, Kotifaesa peraka eaki someraka, ³ ‘Nómo ní hauakane metakarikia, nómó ní aporo irane metakarikia, hauaka meta nómó néaki tarirakano hauaka a né punie.’” *(Stat 12:1)*

⁴ Airakano Eparahamemo kakimaka, Kaotia hauakane metakarikia, Harane taonea pukua, a reakipoko ipi wafaya kusuapo. Kusuakipoko hauaka one Kotimo eaki tarirakano hauaka wo e pesapo. Arirakano hauaka wo isu arisiane Kotimo Eparahameaki tarisiapo.

⁵ Arirakano e pesa maiya amo, e rekeakosa hauaka ane Kotimo eaki kasafapo. Hauaka wakasema soko eaki kasafapo. Asiāne Eparahamemo hokosa hokono mareasiraka rea maiya amo, Kotimo someaka motoraka, ‘Hauaka one nepoko nōmo murikimaranapō. Keseke nōmo aporo iraki nōmo kakakosapo.’ ⁶ Aiyaka Kotimo some meta someraka, ‘Nōmo aporo ira hauaka meta hakua pukua risike, a wainepe pukua risikiakosapo. Risike keremisi fo harote (400) amo hauaka wafayamo iaki someraka, “Isiapo aporo raipane repo,” airakano hauaka wafayapoko ipu raiparaka rakiakosapo. Rakiraka risike, hauaka wafayamo i mokoatikirakano soko, yaiya raiparaka rakiakosapo. ⁷ Rakiraka risikino, keseke hauaka wafayane nōmo fanasinane motoakosapo. Motorakano nōmo aporo irane hauaka a risiane metakarikia, hauaka wo peraka, anoaki hemakapukua kekerehokosapo.’

(Stat 15:13-14)

⁸ Aiyaka Kotimo someaka masane aporomo hemakapusimo Kotimo Eparahameaki someraka, ‘Aporo kau hahaeraka patehoanie.’ Airakano Eparahamemo aporo kau hahaeraka patesapo. Asiamo ipi maeya Aisake hokona mareraka, yape karimo e kau hahaeraka patesapo. Arirakano keseke Aisakemo hokosa Yakopeane hokono maresapo. Arirakano keseke Yakopemo hokosa kenosu hokono murisiapo.

⁹ Arirakano isiapo makasa kaua kekemamo ipu mamanea Yosefeaki kakanakeraka sapesapo. Saperaka Yosefeane Iyipi aporoaki roposapo. Roporakano Yosefe Iyipi hauaka reke raiparaka rakisiapo. Rakiraka reane Kotimo e metakarisiafapo. ¹⁰ Iyipi aporomo e mokoatikirakano Kotimo e arareraka mafasisiapo. Mafasirakano unihae Fero rea Yosefeane pukua, unihae Feroaki koteaka hemakapukua some kasapo. Koteaka some karakano unihae Feromo seseraka eane makárasapo. Asiamo Iyipi hauaka ane asekea rekeasimo Yosefeane maresapo. Arirakano ipi ape soko, ipi makata kemo soko Yosefemo asekea rekeasimo eane maresapo. Asiamo unihae Feromo Yosefeaki someraka, ‘Makata suane nōmo asekea rekeanie,’ aiyaka epo Yosefeane makáraraka murikimasapo.

¹¹ Arirakano kupa kára karáka, Iyipi hauaka soko, Kenane hauaka soko makata nakosane fesenosapo. Fesenoraka aporo hinamo su meamorakano, isiapo makasa kaua kekemamo soko, makata nakosa fasenko kosafapo. ¹² Yakopemo kaiyiáne, Iyipi hauaka á makata nakosa tokenapakano kaisiapo. Asiamo Yakopemo ipi hokosa isiapo makasa kaua kekemamo makata nakosane mokoako Iyipi hauaka pusiesapo. Airakano mafana yia i pusua yiamo, ipu makata nakosane roposapo. ¹³ Arirakano isiapo makasa kaua kekema yape tetá Iyipi hauaka pusua maiya amo, Yosefe hikumisi asekeanafonoraka himeterakano, Yosefemo ipi mamaneaki ipiane mafekemarako someraka, ‘Repo maeane anopo,’ aisapo. Asiamo Yosefemo ipi mamanea soko, ipi wafaya soko, risikinapakano, unihae Feromo kaisiapo. ¹⁴ Arirakano Yosefemo ipi wafaya Yakopeaki someaka mareraka, ‘Atao, né peanie. Nōmo ní mae soko, ipu hokosa hinamoyaki su Iyipi hauaka wo peanie.’ Aiyaka Yosefemo ipi mamaneaki someaka maresapo. Yosefemo mamanea pukua, ipi wafaya Yakopeaki somehoane epo aorakano, i sú Iyipi hauaka pusuapo. I pusua susuane aporo soko, hinamo soko, menoraka seweneti fae (75) aiyáka pusuapo. ¹⁵ Pukua Iyipi hauaka á Yakope reane kusuapo. Asiamo isiapo makasa kaua kekema soko, Iyipi hauaka pukua risiane kusuapo. ¹⁶ Kusuane keseke i kiki mokoa pukua, Eparahamemo kunikia fana roposa á taesapo. Arirakano wate fana Sekeme taonea Hamomo aporo iramo hauaka á kunikiane Eparahamemo roposapo. Roposa á i kikiane mokoa pukua á taesapo.

¹⁷ Arirakano wate fana Eparahameaki Kotimo someaka maraka, ‘Hauaka one nōmo aporo iraki nōmo kakakosapo.’ Aisane hauaka kakako makeana maiya amo, Eparahamemo aporo ira Iyipi hauaka risiane kára wainesapo. ¹⁸ Wainekeea risikino, keseke Iyipi hauaka unihae Fero metane fasere pekea unihaeaka reapo. Yosefeane fana kusuakipoko, e fasere pekea reasasamo epo Yosefeane asesafapo. ¹⁹ Asekeanafonoraka reke, isiapo aporo irane unihae Feromo hisiraka mokoatikisapo. Mokoatikisa maiya amo epo someraka, ‘Hokosa kiriane kukusimo hea mokoasuhōanie,’ aisapo. ²⁰ Arirakano maiya amo Moseseane takapesa, hokosa apapusekeno Kotimo asekea sesesapo. Ere maiya isiamo Moseseane ipi wafayamo apea ipi kaīyamo faremarekeea asekea kayapo.

²¹ Asekea kaina ere maiya isia faraka, hokosa hea makasuhokosane karekerakarakano, faremareako hemakapukua, akua makekeea he fea motosapo. Motosane Unihae Feromo farayamo e asekea, ketaka maka ipi hokosa pariaka karikia nesapo. ²² Karikia nekea, Iyipi aporomo ainane Mosesane tarikia sukurusapo. Sukururakano Mosesemo enomaka koteaka hemakapukua rakiraka reapo. Aporo unihaemo rakira ayíáka epo rakisiapo. Aporo unihaemo somera ayíáka epo somesapo.

²³ Arirakano Moses keremisi foti su amo (40) reke hemakapuraka, ‘Isiraya aporoane nōmo nī aporo irasamo aseako purakapo.’ ²⁴ Aíyaka hemakapukua, e puraka aseane aporo tetá werakano asesapo. Meta Iyipi aporomo Isiraya aporoane mokoatikiraka werakano, Isiraya aporoane Mosesemo patera aseraka, Iyipi aporoane rusua kusuapo. ²⁵ Rusua kurakano, Mosesemo hemakapuraka, ‘Isiraya aporoane makokorotaehoasimo Kotimo ano murikimasapo. Murikimasane Isiraya aporomo hemakapusapo.’ Aíyaka hemakapusua nine Isiraya aporo hinamoane makokorotaehoasimo, Kotimo e murikimasane ipu hemakapusuafapo. ²⁶ Hemakapunafonorakano yape tetá Moses efera hunia paripuraka aseane Isiraya aporo tati yia werakano, Mosesemo kisiraka someraka, ‘Weane siahoasifareapo. Metakarisie. Teto aporo ira hakásapo. Titi marirakano werakanare?’ ²⁷ Airakano fana wesa aporoamo Mosesaki mokopipiraka someraka, ‘Né metakarikia pusie. Né epamo unihaeaka rekeasimo murikimasare? Nόmo makata maropohoasimo né epamo murikimasare?’ ²⁸ Asiamo nόmo rau Iyipi aporo rusua kusua ayíáka, ano soko, nόmo rusua kukusare?’ ²⁹ Airakano Mosesemo kaikia Iyipi hauaka metakarikia pukua, Mitiane hauaka á takaripusuapo. Takaripukua Mitiane hauaka á reke hinamo arumaka, aporo hokosa tetá hokono murisiapo.

³⁰ Hokono murikia reke keremisi foti su (40) faraka, Moses ima yaoa pukua, ūri Sainae makeraka aseane ira rufirakano asesapo. Ira nena rufiraka, ira namo inakanafonorakano aseane, hepene aporo ira rufia rekeno, ³¹ Mosesemo aseraka fofaraka, pukua makeraka aseako pesapo. ³² Perakano Unihae Kotimo someraka, ‘Nόmo makasa kaua kekemamo Kotiane anopo. Eparahamemo soko, Aisakemo soko, Yakopemo soko, ipu suamo Kotiane anopo.’ Airakano Moses kakaro himu faraka hamisisiraka reke, aseakosapoko asiane metakarisiapo. ³³ Metakarirakano Mosesaki Kotimo someraka, ‘Ano rea hauaka one enonoraka kikisia hakupo. Asiamo nόmo tamaka ane fisiraka horomaka motosie. ³⁴ Isiraya aporoane Iyipi aporomo mokoatikirakano nόmo asesapo. Aporo suamo anoaki sakepamo wárakano nόmo kaisiapo. Arirakano Isiraya aporo makokorotaeraka ararehoko ano perakayiapo. Ano peraka nόmo né Iyipi hauaka paripusie, airakanapo.’ Aíyaka Kotimo someaka maresapo.

³⁵ Arirakano Mosesane Isiraya aporomo asekepayaraka someraka, ‘Né epamo unihaeaka rekeasimo murikimasare? Nόmo makata maropohoasimo isiapo néane murikimasafapo,’ aisapo. Asiāne aporomo aíyaka somesa nine, Kotimo Moses ipi nine murikimasapo. Epo aporo makokorotaeraka unihaeaka rekeakosane Kotimo e murikimasapo. Asiamo hepene aporo ira rufi arakarua rea amo Kotimo Mosesane murikimarakano eaki some kasapo. ³⁶ Some karakano Isiraya aporomo Iyipi hauaka ane metakarismo Kotimo wakapumo hemakapukua rakirane Mosesemo ipi yia wakapuaka rakisiapo. Iyipi hauaka soko, he Retea soko, a ipu asekea Kotiane hemakapusimo wakapuaka rakiraka i karikia Iyipi hauaka ane metakarikia pusuapo. Metakarikia pukua nena yaoa keremisi foti su amo (40) risike, Kotimo wakapumo hemakapukua rakirane rakisiapo.

³⁷ Arirakano Moses ipi yiamo Isiraya aporoaki someraka, ‘Nόmo Kotimo someane kaikia, aporo hinamo suaki some kakasimo ano murikimaka pusiesa ayíáka, repo namina yia hakásä metamo porofete apororaka some kakasimo Kotimo murikimaka pusiehokosapo.’ (Lo 18:15)

³⁸ Aisa aporoane nena yaoa Isiraya aporoyaki hakásä risiapo. Isiapo makasa kaua kekemayaki hakásä reke ipi ūri Sainae yapura hikia hepene aporomo some karakano kaikia some kasapo. Some kasane isiapo soko kaiyisimo some kasapo.

³⁹ Some karakano isiapo makasa kaua kekemamo Mosesemo someane koaretaeraka, Mosesese fanaraka reane hisiraka, eaki patera tarikia someraka, ‘Iyipi hauaka á isu poparipukuripo.’ ⁴⁰ Aíyaka namina Eroneaki someraka, ‘Mosesese ūria hisiane paripeanarakapo. Mosesese Iyipi hauaka aeyaka isu karikia pesane kurakanareapo. Isu himeteripo. Isiapo makata meta kekerehoko kotafe koti pariraka rakikia maresie. Makatane rakirakano, isiapo makama fanaraka hemakapukua makataki kekerehokosapo.’ (*Kisim Bek 32:1, 23*)

⁴¹ Aíyaka saro ponomakau mano pariaka hokonomo murikimaka rakisiapo. Ipu namina makata rakisiane asekea someraka, ‘Isiapo kárane ayapo.’ Aíyaka saro sipi rukua paikia karáka hokono kesapo. Hokono keraka ipu hokonomo makata rakisiaki hemakapukua kekeresapo. ⁴² Kekererakano Kotimo patera tarikia, ipu ti makataki kekereaka kurikurirakano asekea Kotimo i metakarisiapo. Arirakano wate fana porofete aporomo Kotimo sawia popasane oyapo.

Kotimo someraka, ‘Isiraya aporo reo. Re ima yaoa keremisi fotisu amo (40) risike, saro sipi rukua, saro ponomakau rukua paikia, anoaki hemakapukua kasare? Wae. Anoaki hemakapukua kasafapo. ⁴³ Re ima yaoa koraka risike anoaki kekerehoko farae ape kisia ane repo hemakapuraka, “Farae ape one isiapo unihae Mórokemo apepo.” Aíyaka hemakapuraka Mórokeane makáraraka kekeresapo. Ti makata yano motosa Refane repo makáraraka kekeresapo. Ano metakarikia repo hokonomo kotafe koti pariraka rakisia makataki kekeresapo. Asiasamo repo hauakane metakarikia, hauaka meta Pápirone hauaka marokeraka hauaka meta á re risikiasimo nōmo fanasiraka pusiehokosapo.’ Aíyaka Kotimo somerakano porofete aporomo kaikia popahoareapo. (*Amos 5:25-27*)

⁴⁴ Arirakano isiapo makasa kaua kekema ane ima yaoa risike, Koti iyaki rekeakosakipoko farae ape kisiapo. Ane Kotimo Moseseki tarirakano ayiáka kisiapo. ⁴⁵ Farae ape kisiane Kenane hauaka maka pusuapo. Kenane aporoane rukukoakataehoasimo Kotimo Isiraya aporoane araresapo. Ararerakano isiapo makasa kaua kekema ane Yosuamo karikia pukua, Kenane aporoyaki wekea rukukoakataeraka, hauaka one masapo. Maka Kotimo farae ape soko maka pekea hauaka wo kisiapo. Wate fana maka pekea kisiane Tefete rea maiya amo soko, farae apeane yaiya reapo. ⁴⁶ Kotimo Tefeteaki seserakano, Tefetemo someraka, ‘Yakopemo Kotio, isiapo neaki kekerehoko ape meta kotesane kiaere?’ Airakano Kotimo waesapo. ⁴⁷ Waerakano asekea risina, keseke Tefetemo maeya Soromonemo Kotipoko ape kisiapo.

⁴⁸ Arirakano Koti ipi namo kakaro kárasasamo aporomo ape kisia á e rerafapo. Porofete aporomo Kotimo sawia popasane oyapo. ⁴⁹ Kotimo someraka, ‘Ano unihaeaka reke, ti yapura ano kakenapo. Ano korakeane hauaka atura motorapo. Anopoko ape mayíáka kiakosare? Ano ma fenakosare? ⁵⁰ Makata su one nōmo rakisiapo.’ Aíyaka Kotimo somerakano porofete aporomo kaikia popahoareapo. (*Aisaia 66:1-2*)

⁵¹ Asiamo repo Kotimo hemakapusuane metakarikia repo namina hemakapusuane arakire. Repo Kotiaki hemakapurakarifapo. Kotimo someane repo kakipayaraka arises. Ho Kotesamo someane repo makasa kaua kekemamo koaretaesa ayiáka, repo soko maiya suamo koaretaeraka arises. ⁵² Porofete aporo suane repo makasa kaua kekemamo mokoatikirakasupo. Wate fana porofete aporo metakiramo someraka, ‘Mafasira Aporo peakosapo. Epo ainane namo kakaro ereketae susupo.’ Aíyaka some kasa porofete aporoane repo makasa kaua kekemamo rusua kusuapo. Mafasira Aporo pesane repo parakeraka rusua kurakasupo. ⁵³ Kotimo somemanane reaki hepene aporomo some karakano yia, repo koaretaeraka arises,’ aíyaka Sitífenemo somesapo.

Sitífene ekemo karesa kusuane oyapo.

⁵⁴ Sitífenemo somerakano, aporo suamo kairaka kára sapesapo. ⁵⁵ Saperakano Sitífene himua Ho Kotesa komarukua rekerakano, Sitífenemo hepene yapura aseane Koti faesa reke, Koti hokono tumuru takua Yasu rekeno asesapo. ⁵⁶ Sitífenemo aseraka someraka, ‘Kaisie. Tiane kikisi aka hikia kikisi ro pukua asiapo. Asiakipoko nōmo aseane, Aporomanomo Tákeane Koti hokono tumuru takua rekeno aserakaripo.’

⁵⁷ Airakano aporo suamo saperaka kearaka, Sitífenemo someane kairapaka hokonomo senakia mapirisiasiapo. Aporo su yia pukua Sitífene waseremaka, ape yao takua maka pukua, ekemo karesapo. ⁵⁸ Sitífene kareako aporomo ipu namina pasu ososane hororaka taeraka e karesapo. Hokosa raua yano motosa Sore reakipoko, ipu pasuane hororaka Soremo asekea rekeasimo á taesapo. ⁵⁹ Taeraka Sitífeneane karerakano Sitífenemo kurikuriraka, “Unihae Yasuo, ano ho masie.” ⁶⁰ Aiyaka kakuna porokoa kake sakepamo wáraka, “Unihaeo, aporomo ano ekemo karesakipoko, nómó iaki ropo watikisane kakakopo,” aihoanine Sitífene kusuapo.

8

¹ Sitífene rusua kusuane Soremo aseraka sira ayiakarie, aisapo.

Yasu Keresoa paosa aporoane Soremo mokoatikisane oyapo.

Sitífene rusua kusua sereamo kepo marekea, Yarusarame sitia aporo yakaimo Yasu Keresoa paosa aporo hinamoane kára mokoatikisapo. Mokoatikirakano Keresoa paosa aporo hinamo teketarikia pusuapo. Teketarikia pukua metakira Yutía hauaka pukua, metakira Sameria hauaka pukua asiapo. Iane purakano tarira aporoane Yarusarame siti ya risiapo.

² Arirakano Kotiaki hemakapusua aporomo Sitífene kusuane hihiripuyaki maka pukua hauaka maresapo. ³ Arirakano Yasu Keresoa paosa aporoaki Soremo kára hisiraka, i Yasu Kersoa paosane metakarisimo kára mokoatikisapo. Mokoatikiraka reke ape meta yorokoa, ape meta yorokoa, ayiáka apea yorokoa kakimara aporo soko kakimara hinamo soko waseremokoa tipura kesapo.

Sameria taonea Yasuane hemakapusimo some kasane oyapo.

⁴ Kakimara aporo hinamo teketarikia i hauaka meta pukua, arirakano metakira soko hauaka meta pukua, aporo hinamo metakiraki Yasuane some kasapo. ⁵ Arirakano Firipi Sameria hauaka pukua, Sameria taonea aporo hinamo suaki someraka, “Yasuane ipi aporo unihaeaka rekeasimo máfaraka maresasamo ipiane Keresopo.” ⁶ Airakano someane aporo suamo kaikia, himu hakásaraka hemakapukua kairaka Firipimo Kotimo wakapumo hemakapukua rakirane rakirakano, aporo suamo asesapo. ⁷ Aseane yatafumo aporo hinamo ho mosaki Firipimo pusiesapo. Pusierakano aporo hinamo yakai yatafumo ho mosane metakarikia, sakepamo wárape pusuapo. Arirakano aporo yakai korosakataesa warisiane Firipimo mafásapo. Aporo yakai korake matipusa soko Firipimo mafásapo. ⁸ Ayiáka aporo hinamo yakai mafárákano, Sameria aporo hinamomo aseraka himumo sesesapo.

⁹ Arirakano aporo meta yano motosa Saemone Sameria taonea reamo ipi makata kamuraka rakirakano, Sameria aporo hinamomo asekea fofarakano ipi someraka, “Ano aporo káraro.” ¹⁰ Airakano Sameria aporo suamo epo someane kakaro kakimasapo. Kaikia aporo unihaeemo soko, aporo unihaeoanafonosamo soko, aporo suamo kaisiapo. Kaikia namina someraka, “Kotimo ipi wakapuanne Saemoneaki karakano, Saemonemo wakapuanne kakaro kárareapo.” ¹¹ Aiyaka hasaka hemakapukua, ipi wate fana makata kamuna yaiya, makata kamurakano aporo suamo asekea fofarakano epo someane kaki-masapo. ¹² Arirakano Firipi Sameria taonea reke someraka, “Koti unihaeaka rerapo. Ipi hokosa Yasu Keresomo isu mafasiako pesapo.” Aiyaka Yasuane hemakapusimo some kotesa kasane, ipu kakimarakano, aporo soko, hinamo soko, i su hea tapuku murisiapo. ¹³ Firipimo someane Saemonemo soko kakimarakano, e hea tapuku maresapo. Hea tapuku marerakano, Firipiyaki hakásá pusuapo. Puraka aporomo hemakapusimo Kotimo wakapumo hemakapukua rakirane Firipimo wakapuaka rakirakano, Saemonemo asekea fofasapo.

¹⁴ Asiamo Sameria aporo hinamomo Kotimo someane kakimasapakano tarira aporo Yarusarame sitia risiamo kaisiapo. Kairaka ipu Sameria taonea Pitape Yone tetapō aseako pusiesapo. ¹⁵ Pusierakano Pitape Yone tetā Sameria taonea pekea, Ho Kotesane Sameria aporo hinamo i himua muriasimo kurikurisapo. ¹⁶ Fana i hea tapuku murisia

maiya amo, ipu Unihae Yasu yano motosane hakása hemakapurakano, Ho Kotesa i himua murisiafapo. ¹⁷ Murianafonorakano Pitape Yone tetapō iane hokonomo sakaihoane Ho Kotesane ipu mosapo.

¹⁸ Arirakano tarira aporomo hokonomo sakaihoane Ho Kotesane morakano Sae-monemo aseraka, mone maka pekea tetāki someraka, ¹⁹ “Wakapuane anoaki makasie. Nōmo aporo meta wamo sakairakano aporoamo Ho Kotesane makasimoripo. Tetápo wakapuane anoaki makasie.” ²⁰ Airakano Pitamo someraka, “Kotimo yaku arareraka karáne monemo roponafapo. Nōmo roporako hemakapusuakipoko, nōmo ní moneane soko, né níane soko, tetakara nine fahokosapo. ²¹ Nōmo hemakapusuane Kotimo aseraka siahoasifareaporakano, etoyaki hakása rakiane siahoasifareapo. ²² Nōmo watikiaka hemakapusuane rukupatehoanie. Watikiaka hemakapusuane Kotimo mafahoasimo hufitaeraka kurikurihoanie. ²³ Etapo wakapuaka rakisiakipoko nōmo mahisiraka kakanakeraka are. Ayíaka watikiaka hemakapura amo né ní yia mokoatikirakanapo.” ²⁴ Airakano Saemonemo someraka, “Nōmo someane anoaki ayiakakohoamo, nōmo anopoko Unihae Kotiaki kurikurihoanie,” aiyaka Saemonemo somesapo.

²⁵ Arirakano Unihae Kotimo someane Pitape Yone tetapō some karaka, Kotimo tetāraresane tetapō aporo hinamo suaki some kape hisiapo. Sameria hauaka aeyaka Yarusarame sitia poparihinaka, ikia tipia ape metakira risiakipoko Kotimo someane some kape hisiapo. Some kape hikia Yarusarame sitia pausapo.

Firipimo Itiopia aporoaki some kasane oyapo.

²⁶ Arirakano Kotimo hepene aporomo Firipiaki someraka, “Né takahisie. Takahikia Yarusarame sitiane metakarikia, maiya apera ketaya taku aeyaka, Késa taonea puko ikia kara á punie. Arirakano ikia kara ane haōsapo.” ²⁷ Airakano Firipi takahikia pusuapo. Pukua aseane Itiopia aporo ipi hinamo arumakanafonosane* ipi Yarusarame sitia Kotiaki kekerelhoko hisiapo. A hikia nina, ipi hauaka paripurakano Firipimo asesapo. Arirakano Itiopia hauaka á hinamo hakásamo unihaeaka asekeea kayapo. Hinamoane yano motosa Kuini Kanetesepo. Kuini Kanetesepoko Itiopia aporoamo makata rakirane Kuini Kanetesemo moneane epo asekeea reapo. Ipi Yarusarame sitia hikia Kotiaki kekereraka ²⁸ ipi apea paripuraka saro hosemo wakone wakasema maka purakano, Itiopia aporo wakone ripaka kakarua kake, sawi menoraka kayapo. Sawiane wate fana porofete aporo Aesayamo popasane menosapo.

²⁹ Ayíaka menoraka kakeno, Firipiaki Ho Kotesamo someraka, “Wakone perakano sapenako hisie.” ³⁰ Airakano Firipi foaka hikia wakone sapenesapo. Aporo wakone kakarua kake porofete aporo Aesayamo sawi popasane menorakano, Firipimo kaikia someraka, “Sawi menosane koteaka hemakapurakarire?” ³¹ Airakano Itiopia aporoamo someraka, “Mayiáka hemakapusimore? Metamo anoaki kepo somehoanafonorakano, nōmo mayiáka hemakapukusare? Né anoyaki wakone o ripakako peae,” airakano Firipi wakonea ripasapo.

³² Arirakano Aesayamo sawi popasane Itiopia aporomo menosane oyapo. “Saro sipi ruko karikia apura ayíaka, e soko ruko karikia pusuapo. Aporomo saro sipi mano iti morakano, saro sipimo mehoanafonona ayíaka epo soko somesafapo. ³³ Eane makeferakano aporo metamo, ‘E aporo koteaka reasasamo e ayiakakopo,’ aisafapo. Aporo metamo e patera asesafapo. E ipi aporo tákemo watikiaka hemakapukua e rusua kusuapo.” Aiyaka Aesayamo popasane Itiopia aporomo wakonea kake menosapo. (*Aisaia 53:7-8*)

³⁴ Epo sawi menosane hemakapuko Firipiaki Itiopia aporoamo someraka, “Aesayamo popasane aporo epane popasare? Aesayamo ipiane popasare? Aporo metane popasare?”

³⁵ Airakano Firipimo someraka, “Aesayamo popasane Yasu Keresoane popasapo.” Aiyaka Aesayamo popasa kepoane Firipimo somesapo. Someraka Itiopia aporoamo Yasuane hemakapusimo some kotesane some kasapo. ³⁶ Some karakano, wakone ikia kara

* 8:27: Aporo raipa roporaka makata rakisimo ipu saro tafakae amara ayíaka, Itiopia aporoane ayíaka marapo.

hikia hea pausapo. Pauraka Itiopia aporoamo someraka, “Heane asesie. Ano hea tapukumareane siahoasireare?”³⁷ [Airakano Firipimo someraka, “Nómo Yasuaki kakaro himu hakásaraka hemakapurakanone, hea tapukumareane siahoasireapo.” Airakano epo, “Ao, Kotimo hokosane Yasu Keresopo, aíyaka nōmo hemakapurakanapo.]³⁸ Wakone yia rekeanie.” Airakano Firipipe Itiopia aporo tetā hea pukua, Firipimo Itiopia aporoane hea tapukumaresapo.³⁹ Hea tapukumarekea faraka, tetā he metakarikia ikia kara paripusa maiya amo, Ho Kotesamo Firipi tau karikia purakano, Firipiane Itiopia aporoamo efera hunia asesafapo. Itiopia aporoane wakonea ripaka seseaka pusuapo.

⁴⁰ Purakano Firipiane Ho Kotesamo maka purakano, Firipiane meraruraka pukua, Asotose taonea pausapo. Pauraka Asotose taone aeyaka ikia kara pukua taone meta Kotimo someane some kaka, yaiya taone meta soko, Kotimo some kotesane some kaka, ayíáka some kape pusuapo. Some kape pukua Sisaría taonea pausapo.

9

Sore Yasuaki rekeako parisane oyapo.

¹ Maiya amo Unihae Yasuaki patera asesa aporo hinamoane Soremo hisiraka someraka, “Re rusua kukusapo,” aisapo. Asiamo pirisiti aporo fana reakipoko² Sore pukua eaki someraka, “Tamásakase taonea Yu aporomo sarimana ape asekeea risia aporoaki sawi poparaka, úyaka popahoanie. Unihae Yasumo kakisara aporo hinamoane reyaki risikinone, Sore kimisi aperamo epo iane tipura keako Yarusarame sitia karikia peane siahoasireapo. Aíyaka poparaka sawiane anoaki makanie.” Airakano pirisiti aporomo sawi popasane Soremo maka Tamásakase taonea pusuapo.

³ Pukua Tamásakase taone makerakano, wate foaka hepene aeyaka Sore reakipoko kára faesapo. ⁴ Kára faeraka Sore hauaka huruperakano, metamo someraka, “Soreo, Soreo, marirakano nōmo ano mokoatikirakanare?”⁵ Airakano Soremo someraka, “Unihaeo, né epare?” Airakano epo someraka, “Ano Yasupo. Nōmo ano mokoatikirakanapo.

⁶ Né takahikia Tamásakase taonea punie. Ape a nōmo makata ayiakakosane aporo metamo néaki somehokosapo.”⁷ Airakano aporo Soreyaki hakása pusuane pekea risike kaiyiane, memo hákasa somerakano kairaka, aporomano aseako koane, aporomano kau asesafapo. Asekeanafonorakano i fofaraka, me faraka asekeea risiapo.⁸ Asekeea risikino, Sore takahikia hi fakarikia makata asesafapo. Asekeanafonorakano Sore hokonoa aporo metamo maka Tamásakase taonea karikia pusuapo.⁹ Karikia pukua apea reke, sere isiamio ipi himo asesafapo. Makata nakosa soko, he soko nenafaraka, sokoairaka reapo.

¹⁰ Aíyaka rekeno Tamásakase taonea Yasuaki patera asesa aporo meta Ananáse reapo. Ananásembo kituamo asekeea epo kaiyiáne Unihae Yasumo someraka, “Ananáseo.” Airakano Ananásembo someraka, “Wō, Unihaeo, ano wó rekenapo.”¹¹ Airakano Unihaemo someraka, “Né takahisie. Takahikia ikia kára yano motosa Ereketae a pusie. Yutasemo apea, Tasase taone aporo yano motosa Sore, aseako pusie. Arirakano Soremo kurikuriraka reke,¹² ipi kituamo aseane, aporo yano motosa Ananáse pekea, Sore ipi himo koteaka asekeasimo aporoamo hokonomo eane sakairakano asesapo.”

¹³ Aíyaka Unihaemo somerakano, Ananásembo someraka, “Unihaeo. Yarusarame sitia Kotimo aporo hinamoane Soremo mokoatikisapakae. Mokoatikisane aporo yakaimo anoaki somerakasupo.”¹⁴ Ape wo soko e pekea, néaki kurikurina aporo hinamoane tipura keako pesapakasupo. Soremo i tipura keasimo pirisiti aporo fanamo ayikanie, aisapakasupo.”

¹⁵ Airakano Unihaemo someraka, “Né pusie. Soremo anopoko rakiasimo e nōmo murikimasapo. Epo nōmo someane Yu aporo hoanafonosaki soko, kamani aporo unihaeaki soko, Yu aporoaki soko, i suaki somehoasimo e nōmo murikimasapo.

¹⁶ Murikimarakano asekeea, Soremo ano patera asesakipoko aporo metakiramo e mokoatikirakano, anopoko e himu nakosapo. Himu nenakano nōmo tariakosapo.” Aíyaka kituamo Unihaemo somerakano Ananásembo kaisiapo.

¹⁷ Kaikia e pukua, apea pauraka, ape kakarua yorokoa, Soreane Ananásemo hokonomo sakairaka someraka, “Sore, maeo, Unihae Yasumo ano né rea wo pusierakasapo. Né ikia kara pesa maiya amo epo né asesasamo, epo ano né rea wo pusierakasapo. Nómó himo koteaka asekeea, arirakano Ho Kotesane soko né himua komarukua rekeasimo, epo ano pusierakano ano apera oyapo.” ¹⁸ Aihoanine wate foakayia Sore hi katosa anaka nenepe asia hurupepehoane, Soremo himo koteaka asesapo. Aseraka takahisiapo. Takahikia rekeno aporo metamo e hea tapukumarekea ¹⁹ e makata nakosa karakano, e makata neane kau yofesane faraka, wakapuaka koteaka reapo.

Tamásakase taonea Soremo some kasane oyapo.

²⁰ Arirakano Soreane Yu aporomo sarimana apea puraka, Yasuane some karaka, “Yasuane Kotimo hokosapo.” ²¹ Aíyaka some karakano, aporo suamo kairaka fo-faraka someraka, “Yarusarame sitia Yasuaki kurikurina aporo hinamoane mokoatikisa aporoane ayare? Ao, ayareapo. E wo pekea Yasuaki kurikurina aporo hinamoane taporaka pirisiti aporomo hukurusimo karikia pukusarihoapo,” aisapo.

²² Arirakano Soremo Kotimo someane wakapuaka someraka, ipi someane ipu kakaroripo, aihoasimo someraka, “Mafasira Aporoane Yasu ipipo.” Aíyaka paroaka somerakano, Yu aporo Tamásakase taonea risiamo kairaka himu faraka, eaki some paripurafaraka, me kauraka toapo. ²³ Arirakano wakasema risina Yu aporoane* sarimaraka, me rukua someraka, “Sore kukusimo rukusapo.” ²⁴ Aíyaka someraka sere maíyamo soko, ere maíyamo soko, Soreane rukusakipoko e perakarihoamo, aporo metakiramo ruru ikia koroa asekeea risiapo. Asekeea risikino Kereso aporo metamo Soreaki someraka, “Né rusua kukusapakae.” ²⁵ Airakano ereamo Sore rukuhoamo ipi tákemo e karikia pukua, ekemo rurusakipoko Soreane fefeneaku asia makekea ruru tapikia yao takua tau metafirirakan metafirirakanoraka ayíáka hauaka motosapo.

Yarusarame sitia Sore pesane oyapo.

²⁶ Sore Yarusarame sitia pekea epo hemakapuraka, “Yasuaki patera asesa aporoyaki ano hakása rekeakosapo.” Aíyaka hemakapurakano Yasuaki patera asesa aporo Yarusarame sitia risiamo, Soreane Yasuaki rekeako parisane kaikia, ipu kakimasafapo. Soreane asekeea i namosapo. ²⁷ Namoraka risiane, Pánapase pekea Sore arareraka, tarira aporoyaki hakása rekeasimo Sore pasimasapo. Pánapasemo someraka, “Sore ikia kara pusua maiya amo, Unihae Yasuane epo asesapo. Asekeea Yasumo someane epo kakimasapo. Yasumo eaki makata somerakano, Sore Tamásakase taonea pukua, Yasumo someane epo mapiraraka some kasapo.” ²⁸ Airakano Soreane tarira aporoyaki hakása reapo. Reke Yarusarame sitia Yasuane mapiraraka some kaka korakareapo. ²⁹ Yu aporomo Kiriki meaka somesane iyaki Soremo me rusuapo. Me rurakano ipu Sore kukusimo ruko sesesapo. ³⁰ Rukusaporakano Keresoa paosa aporo maemo kairaka, Sore pasimaka Sisaría taonea karikia puraka someraka, “Sore, né pusie. Ní ape sumu Tasase taonea pusie,” aisapo.

³¹ Arirakano maiya amo Yutía hauaka a soko, Kariri hauaka a soko, Sameria hauaka a soko, Yasu Keresoa paosa aporo hinamoane aporo metakiramo mokoatikisafapo. Mokoatikihoanafonorakano i tau risike Kotiane makáraraka hemakapuraka, Kotimo someane kakimaraka Ho Kotesamo ararerakano aporo meta soko Yasuaki rekeako pariraka, aporo meta soko Yasuaki rekeako pariraka, aporo meta soko Yasuaki rekeako pariraka, ayíáka aporo yakai risikiako parisapo. Risikiako parirakano kakimara aporo akiyaki namina hakása sarimasapo.

Pita Rita taonea reane oyapo.

³² Arirakano Pita hauaka sua koraka rekeako pusuapo. Puraka Rita taonea Koti-aki hemakapura aporo hinamoane aseako pusuapo. ³³ Pukua Pitamo aseane, aporo yano motosa Iniase wareke, keremisi kari sumo (8) korake korosakataesa, asakapua warekeno asesapo. ³⁴ Warekeno Pitamo asekeea someraka, “Iniaseo, né Yasu Keresomo

* ^{9:23:} Yu aporoane Keresoa paosa aporofapo.

mafarakanapo. Takahisie. Ní asakapuane maweroraka maka, takahisie.” Airakano Iniase wate foaka takahisiapo. ³⁵ Takahinakano Rita aporo hinamomo soko, Serone aporo hinamomo soko, suamo Iniaseane aseraka, i Unihae Yasuaki risikiako parisapo.

Yopa taonea Pitamo makata rakisiane oyapo.

³⁶ Arirakano Yopa taonea hinamo yano motosa Tapita kake, ipi Yasuaki patera asesapo. Hinamoane Kiriki meaka Tókase yano motosapo. Maiya suamo Tókasemo metakiraki kamenakaraka, iane makoteraka, arirakano metakira makata forokoa risiane araresapo. ³⁷ Maiya amo ipi makata takamaraka kusuapo. Kurakano hauaka mareako ipi kusua kau narisane kusuraka, huturu apea maka hikia kirimaresapo.

³⁸ Arirakano Rita taoneane Yopa taone make tameiyapo. Yopa taonea Yasuaki patera asesa aporomo kaiyáne, Rita taonea Pita rekenaporakano kaikia, e pasimako aporo tetá pusiesapo. Pukua Rita taonea pauraka tetapō Pitaki someraka, “Né yumo Yopa taonea foaka peae.” ³⁹ Airakano Pita wate foaka takahikia tetāyaki hakāsa pusuapo. Pukua Yopa taonea pauraka, huturu apea karikia hisiapo. Hikia Pita reakipoko, hinamo yaro peraka hihiripuraka someraka, “Anopoko pasu one Tókasemo irisapo.” Aíyaka suamo Tókase hemakapukua, Tókasemo pasu irisane mokoa pesane Pitaki tarisiapo.

⁴⁰ Arirakano Pitamo i pusiesapo. I purakano Pita kakuna porokoa kake kurikurisapo. Kurikuriraka faraka, hinamo kusuane aseraka eaki someraka, “Tapita, né turikia pukua takahisie.” Airakano ipi hi fakarikia Pita asekea kayapo. ⁴¹ Kakeno ipi hokonoa Pitamo maka máfahoane, turikia pukua takahikia rekeno, hinamo yaroaki soko, Kotimo aporo hinamo metakiraki soko peaesapo. I perakano Pitamo i suaki someraka, “Tókase turikia pukua area oyapo,” aíyaka iaki tarikia somesapo.

⁴² Arirakano Yopa taonea aporo hinamo yakaimo kairaka Unihae Yasuaki himu hakásaraka hemakapukua risikiako parisapo. ⁴³ Arirakano ere káramo Pita Yopa taone yia pariraka, Saemonemo apea waka reapo. Arirakano Saemone amo saro ponomakau kauane taoraka rakirakano, eyaki Pita hakāsa waka reapo.

10

Koniniasemo apea Pita pusuane oyapo.

¹ Yu aporohoanafonosa aporo meta yana motosa Koniniase* ipi Rome kamanimo amea paoraka rakisiapo. Rakikia reke, koporomo rakirane rakiako murikimarakano aporo parakuraka koporomo aporo wane harote (100) unihaeaka asekea rea, ayíáka ipi asekea reapo. Ipi aporo parakusane Itari hauaka anaka pekea, i su Sisaría taonea risiapo. ² Koniniasemo Kotiaki hemakapukua, ipi ape hakāsa risiamo soko, Kotiaki hemakapukua kekeresapo. Asiamo Yu aporo makata forosane Koniniasemo arareraka, mone karáka reke, maiya suamo Kotiaki kurikurisapo. ³ Ayíáka reke, sere metamo samapu maiya isiamo ipi kituamo asera ayíáka asesapo. Aseane, hepene aporo peraka someraka, “Koniniaseo.”

⁴ Airakano Koniniasemo aseraka, himu faraka hi pokohetheraka someraka, “Unihaeo, yakapare?” Airakano hepene aporomo someraka, “Nómo kurikurianane Kotimo kairakanapo. Kaikia, nómo Yu aporoaki mone akarane soko, epo aseraka neane hemakapurakanapo. ⁵ Arirakano Saemone Pita, Yopa taonea rekeno, aporo metakiramo e pasimako pusiehoanie. ⁶ Ipi yako Saemone akiyaki waka rekenapo. Saemone amo saro ponomakau kau taoraka rakirapo. Rakirane asekea he tawara fu makeraka apea waka rekenapo.”

⁷ Aíyaka someaka marekea, hepene aporo hinakano, Koniniasemo aporo raipa tetá soko, ame aporo hakása soko, i isiane peaesapo. Peaerakano ame aporo pesa amo ipi Kotiane hemakapukua, ipi Koniniase soko araresapo. ⁸ Arirakano aporo isiane peae aka perakano, hepene aporomo somesane Koniniasemo iaki somesapo. Epo someraka, “Re Yopa taonea pukua, Pita pasimaka peanie,” aisapo.

* 10:1: Koniniase ipi Yu aporohoanafonosa nine Kotiaki himu hakásaraka hemakapusuapo.

⁹ Airakano aporo isiane takahikia pukua, waka mituru fiarakano pukua, Yopa taonea pauhoko makeanamo maiya hi titipiamo Pitamo kurikurihoko, ape kopoa hisiapo. ¹⁰ Hikia Pitamo kurikuriraka reke, meamoraka makata narisapo. Narirakano asekea, metakiramo Pitapoko makata paikia kawe sarimarakano, Pitamo kituamo sere asera ayíáka ¹¹ ti kakapurakano aseane, pasu kára ke aeyaka tau metafirirakano metafiri-rakanoraka Pita rea motorakano asesapo. Motorakano aseane, ¹² pasu kakarua makata kakayia soko, kuyare soko, mena soko, makata su kesekeno asesapo. ¹³ Asekea reke kaiyíáne memo someraka, “Pitao, né takahisie. Takahikia makata kesane nómō rukua nesie.”

¹⁴ Airakano Pitamo someraka, “Unihaeo, wae. Makata kesane fana Kotimo some-manemo yaposapo. Makata yaposane nómō nakosafapo.” ¹⁵ Airakano efera hunia someraka, “Makata yaposane Kotimo mafásapo. Asiamo nómō neane siahoasireapo, Kotimo airakano nómō yapohoane siahoasifareapo.” ¹⁶ Aíyaka yape isiamo somesapo. Yape isiamo someaka faraka, pasuyaki makata kesa akiyaki, hepene yapura maka parihihiapo.

¹⁷ Maka parihinakano Pitamo hemakapuraka, “Kepoane marirakanarakapo.” Aíyaka Pita himeteraka reakipoko, Koniniasemo aporo isia pusiesane Yopa taonea peraka, Saemonemo apeane kope pesapo. Kope pekea ikia koro anaka ¹⁸ wáraka, “Saemone Pita, ape wo waka rekerire?”

¹⁹ Aihora yiamo Pitamo makata asesa amo kepoane hemakapusapoko asiane himeteraka rekeno, Ho Kotesamo someraka, “Kaisie. Aporo isia metakiramo né kope apere. ²⁰ Né takahisie. Né takahikia hauaka atura takapesie. Aporo isia akiyaki puko karekeakopo. Aporo pesane nómō pusiesapo.” Aíyaka Ho Kotesamo somerakano, ²¹ Pita takahikia, hauaka atura takapekeea pauraka reke aporo isiaki someraka, “Re mayiakako pesare? Repo aporo kope pesane anopo.”

²² Airakano aporoamo someraka, “Koporo Koniniasemo isu pusierakasapo. Koniniase ipi aporo kotesapo. Ipi Kotiaki himu hakásaraka hemakapukua rekenapo. Yu aporomo namina susu someraka, ‘Koniniase ipi aporo kotesapo,’ airapo. Arirakano Koniniaseaki Kotimo hepene aporomo someraka, ‘Pitamo someane kaiyako, ní apea Pita peasimo pasimaka peaniehoanie,’ aisapo.” Aíyaka Koniniasemo pusiesa aporoamo somerakano, ²³ Pitamo kaikia iaki someraka, “Re anoyaki hakásä wakako peae.” Airakano i pekea, namina ere hakásamo waka, mituru fiarakano poparipukusakipoko Yopa taonea Keresoa paosa aporo mae metakira soko, Pita soko, Koniniasemo pusierakano pesa aporo akiyaki hakásä pusuapo.

²⁴ Pukua i ikia tipia waka, mituru takahikia pukua, Sisaría taonea pausapo. Aporo Pita pasimako pusuane perakarihoamo, Koniniase kau kake ipi táké soko, ipi more soko, su sarimarakia eyaki hakásä toapo. ²⁵ Toakipoko Pita perakano Koniniasemo hemakapuraka, “Pita ipi aporo káraro,” Aíyaka hemakapuraka, Pita asekea Koniniase seseraka peraka, hauaka moroa uakapekeea kakuna porokoa, hikumisimo hauaka atura nanireapo. ²⁶ Arirakano Pitamo aseraka maka máfaraka someraka, “Takahisie. Né aporo ayíáka ano soko aporopo.” ²⁷ Aíyaka Koniniaseaki Pitamo somepe pukua, apea yorokoa peraka, aseane aporo yakai sarimasekeno asesapo.

²⁸ Aseraka Pitamo iaki someraka, “Fana repo kaisiane Yu aporohoanafonosamo apea Yu aporo purane yaposapo. Yu aporomo Yu aporohoanafonosa ane morenafapo. Asiamo Kotimo anoaki kawe yumo someraka, ‘Aporo metayaki sarimahoko hisihokopo. Aporo metane “Aporoane watikirareapo,” aíyaka hemakapukopo.’ ²⁹ Aíyaka Kotimo anoaki somesakipoko repo ano peaesapo. Peaerakano nómō waesafapo. Aoaka ano pesapo. Ano pasimako pesane marirakano pasimako pesare?”

³⁰ Airakano Koniniasemo Pitaki someraka, “Námái ano samapu maiya isiamo apea kake kurikurihoane, aporo meta haku pasu faesa ososane ano rea perakasupo. ³¹ Pekea aporoamo anoaki someraka, ‘Koniniaseo, nómō kurikurianane Kotimo kaisiapo. Nómō aporo ararehoko mone akarane Kotimo asesapo. Né Kotimo hemakapurakanapo. ³² Yopa

taonea Saemone Pita rekeno, aporo metakiramo e pasimako pusiehoanie. Saemone ipi yakoyaki he tawara fu makeraka waka rekenapo. Arirakano Yopa taonea ipi yako Saemoneomo saro ponomakau kauane taoraka rakirapo.³³ Aíyaka hepene aporomo anoaki somerakano, né foaka pasimako aporo isiane pusiesapo. Né aoraka perakano, Unihaemo someane somehoaniesane isiapo kaiyako sarimasapo. Sarimarakan Kotimo isu aseke rekenapo,” aíyaka Koniniasemo somesapo.

Pitamo some kasane oyapo.

³⁴ Arirakano Pitamo someraka, “Nōmo kawe yumo hemakapusuane oyapo. One namo kakaroripo. Kotimo aporo su hakásá yineraka hemakapurapo. Yu aporo soko, Yu aporo hoanafonosa soko, suane Kotimo hakásá yineraka hemakapurapo. ³⁵ Hauaka sua aporo suamo Kotiaki hemakapurakano, Kotimo aseraka siaraka arakire aihoasimo koteaka rakirakano, aporoane Kotimo aseraka sesenapo. ³⁶ Kotimo ipi someane Yu aporoaki some kasapo. Yu aporo auaraka risikiasimo, Yasu Keresomo some kotesane some kakako pesapo. Yu aporoaki some kakako pesaposane kakaroripo. Asiane Yu aporo soko, Yu aporo hoanafonosa soko, aporo suamo unihaeane Yasu ipipo. ³⁷ Arirakano someane Yutía hauaka faserepesane repo kaisiapo. Kaisiane oyapo. Fana Yone he tapukumareramo someraka, ‘Repo watikisane rukupateraka metakarikia Kotiaki risikiako parirakano nōmo re hea tapukumuriakosapo.’ Aíyaka Yonemo some karakano, Kariri hauaka a Yasu pekea reke, makata kepomareke some karáka, Yutía hauaka sua Yasumo Kotimo someane some kasapo. ³⁸ Nasare aporo Yasuaki Kotimo Ho Kotesa e himua marekeea wakapu soko eaki kasapo. Yasu koraka reke Kotiane eyaki hakásá reasasamo, epo makata koteaka rakiraka, Satanemo aporo raipa yatafumo aporo ho mosane metakarikia pusierakano i pusuapo. Purakano aporoane fasapo. Aíyaka makata suane repo kaisiapo.

³⁹ Arirakano Yu aporomo hauaka á soko, Yarusarame sitia soko, Yasumo makata rak-isiane isiapo asesane somerakanapo. Yu aporomo Yasuane ira matopesa paremarekeea rusua kusuapo. ⁴⁰ Rusua kusua nine yape isiamo Kotimo maturikia taerakano e turikia pusuapo. Turikia pusuane isiapo asesapo. ⁴¹ Asiāne Yu aporo suamo asesafapo. Asesane somehoasimo Kotimo isu murikimarakano, isiapo hákasa asesapo. Isiapo Yasu turikia pusuane aseke, eyaki hakasa toke makata nesapo. ⁴² Arirakano Yasumo isuaki someraka, ‘Aporo hinamo suaki Kotimo someane some kakanie. Aporo hitafe risiane soko, aporo kusuane soko, nōmo takekeea parakuhoasimo Kotimo ano murikimasapo. Aporo suaki someane some kakanie.’ Aíyaka Yasumo isuaki somesapo. ⁴³ Arirakano wate fana porofete aporomo someraka, “Aporo hinamo suamo Yasuaki himu hakásaraka risikino, i himu watikisane Yasumo mafahokosapo. Yasumo wakapumo rakiane siahoasireapo, aíyaka hemakapukua e yano horakano i himu watikisane mafahokosapo.” Aíyaka porofete aporomo somehoareapo.” Aíyaka Pitamo Koniniasemo apea some kasapo.

Yu aporo hoanafonosa himua Ho Kotesa pesane oyapo.

⁴⁴ Pitamo someahora yiamo, kaisia aporo hinamoane i himua Ho Kotesa pesapo. ⁴⁵ Yu aporomo Yasumo someane kakimaka risiane Yopa taone aeyaka Pitayaki hakásá pesamo aseane, Yu aporo hoanafonosane sarimaraka risiaki Ho Kotesa yaku karakano aseraka, i Yu aporoane fofasapo. ⁴⁶ Ipu kaiyiane, Yu aporo hoanafonosamo me kekepo kaiyánafonosane, Ho Kotesamo i Yu aporo hoanafonosaki karakano, ipu someraka Kotiaki seseraka kekererakano Yu aporomo kaisiapo. Asiamo Pitamo someraka, ⁴⁷ “Isu Yu aporo himua Ho Kotesa perakasu aiyáka, i himua soko, Ho Kotesa aiyáka apere. Aporo wo risiane hea tapukumurirakano, aporo metamo waehoane siahoasifareapo. ⁴⁸ Aporomo Yasu Keresomo wakapuaki himu hakásaraka hemakapukua, e yano horakano i hea tapukumurianie.” Airakano ipu Pitaki someraka, “Né ere hukusi isuyaki waka rekeanie.” Aíyaka aporo suamo somesapo.

11

Yarusarame sitia Yasu Keresoa paosa aporoaki Pitamo some kasane oyapo.

¹ Yu aporohoanafonosamo Kotimo someane kakimasapakano, Yutía hauaka sua tarira aporomo soko, Yasu Keresoa paosa aporo maemo soko, kaisiapo. ² Kairakano Yu aporo metakiramo hemakapuraka, “Yu aporohoanafonosamo Yasu patera aseako seserakano, isiapo Yu aporomo ainane kekemarakaka kau hahaeraka patehoafunureapo.” Aíyaka aporoamo hemakapuraka, Pita Yarusarame sitia perakano, Pitaki hukrukua someraka, ³ “Marirakano nōmo Yu aporohoanafonosamo apea pukua, iyaki hakāsa toke makata nesare? Aporoane i kau hahaeraka patesafapo. Marirakano iyaki hakāsa toke makata nesare?”

⁴ Airakano eaki Kotimo makata su tarisiane ipu hemakapusimo Pitamo someraka, ⁵ “Ano Yopa taonea reke, kurikuriraka rea maiya amo, nōmo kituamo sere asera ayiáka asesapo. Aseane pasu kára asia hepene yapunaka ano rea perakasupo. Pasu ke aeyaka tau metafirirakano metafirirakanoraka ano rea motorakano, ⁶ nōmo aseane pasu kakarua makata kakayia, yasaro ásia soko, kuyare soko, mena soko, makata su kesekeno asesapo. ⁷ Asekeia nōmo kaiyiane memo someraka, ‘Pitao, né takahisie. Takahikia makata kesane rukua nesie.’

⁸ Aíyaka somerakano, nōmo some parihinaka, ‘Unihaeo, wae, makata kesane wate fana Kotimo somemanemo motoraka yaposapo. Asiasamo makata yaposane nōmo nenafapo.’

⁹ Airakano yape tetá memo someraka, ‘Makata yaposane Kotimo mafásapo. Neane siahoasireaporakano yia, nōmo yapohoane siahoasifareapo.’ ¹⁰ Aíyaka yape isiamo someaka farakano pasuyaki makata kesa akiyaki hepene yapura maka parihinakasupo.

¹¹ Arirakano maiya amo, ano apea kayakipoko aporo isia pesapo. I Sisaría taone anaka pekea, ano pasimako Koniniasemo aporo isiane pusierakano pesapo. ¹² Perakano anoaki Ho Kotesamo someraka, ‘Né aporo isia akiyaki yumo hakāsa pusie. I Yu aporohoanafonosa kikisiaka risia yia ne puko karekeakopo.’ Aíyaka Ho Kotesamo somerakasupo. Arirakano Yasu Keresoa paosa aporo namasu repo aserane, anoyaki hakāsa pukua Koniniasemo apea yorosapo.

¹³ Isu yororakano Koniniasemo someraka, ‘Nōmo aseane nōmo apea hepene aporo pekea someraka, ‘Saemone Pita Yopa taonea waka reane aporo metakiramo e pasimako pusiehoanie. ¹⁴ Pukua e pasimarakano, e pekea, epo some karakano, nōmo soko nōmo ní ape hakāsa aporo hinamo risiamo soko, someane kakimarakan, Kotimo mafasikia ararehokosapo.’ Aíyaka hepene aporomo somesapo.’

¹⁵ Aíyaka Koniniasemo somerakano, nōmo iaki someahora yiamo, Ho Kotesa i himua pesapo. Fana isu himua Ho Kotesa perakasu ayiáka, i himua soko, Ho Kotesa ayiáka pesapo. ¹⁶ Arirakano Yasumo fana somerakasuane nōmo hemakapusuapo. Hemakapusuane oyapo. Yasumo someraka, ‘Yonemo hea hákasa tapukumurisiapo. Nōmo Ho Kotesa re himua muriakosapo.’ Aíyaka Yasumo fana somerakasuane nōmo hemakapusuane reapo. ¹⁷ Isiapo Unihae Yasu Keresoaki himu hakásaraka hemakapukua risikino, Kotimo Ho Kotesa yaku kasapo. Isuaki yaku kasa ayiáka, iaki soko yaku kasasamo nōmo Kotiaki, ‘Kakakopo,’ aihoane siahoasifareapo.” Aíyaka Pitamo somerakano ¹⁸ aporo suamo kairaka hukurusuane metakarisiapo. Ipu Kotiaki kekereaka someraka, “Isu soko, i Yu aporohoanafonosane soko, neyaki yaiya risikiasimo himu watikisane nōmo mafasapo,” aisapo.

Kotimo some kakimara aporo Anitioke taonea risiane oyapo.

¹⁹ Sitífene rusua kusuakipoko, aporo metakiramo Yasuaki patera asesa aporo hinamoane mokoatikisapo. Mokoatikirakano metakira yamenoa teketarisiapo. Teketarikia, metakira Finísia hauaka pukua, metakira Saéparase hauaka pukua, metakira Anitioke taonea pusuapo. I pukua Yu aporoaki hákasa Yasuane some kasapo. ²⁰ Arirakano Yu aporo kakimara aporo metakira Saéparase hauaka aeyaka soko, Sairíni hauaka aeyaka soko, i Anitioke taonea pusuapo. Pukua Yu aporohoanafonosane Anitioke taonea risiaki

ipu Unihae Yasuane some kasapo. ²¹ Some kayane unihaeemo wakapumo i ararerakano, aporo yakaimo ipu someane kakimaka Unihae Yasuaki risikiako parisapo.

²² Arirakano Yarusarame sitia Yasu Keresoa paosa aporomo kaikia Pánapaseaki someraka, “Né Anitioke taonea pusie.” ²³ Airakano Pánapase Anitioke taonea puraka, aseane Yasu patera asesa aporo hinamoane Kotimo hemakapukua ararerakano asekea someraka, “Nōmo himumo kára seseripo,” aíyaka Pánapasemo iaki someraka, “Repo Unihae Yasuaki himu hakásaraka yaiya hemakapukua risikianie. Unihaeaki hemakapusuane hemakapukua rosakataehoko hemakapunie,” aisapo. ²⁴ Arirakano Pánapaseane aporo kotesapo. Ipi himua Ho Kotesa komarukua reke, Kotiaki himu hakásaraka hemakapukua reapo. Epo some karakano, aporo hinamo yakaimo kakimaka, fana Unihae Yasu Keresoa paosa aporo risia akiyaki paosapo.

²⁵ Arirakano Pánapase Anitioke taoneane metakarikia, Tasase taonea Sore pasimako kope pusuapo. ²⁶ Pukua Sore pasimaka, Anitioke taonea paripesapo. Keremisi hakásamo tatí hakásá reke, Yasu Keresoa paosa aporo hinamoyaki sarimaraka, Kotimo someane aporo hinamo yakaíaki some kasapo. Arirakano Anitioke taonea Yasuaki patera asesa aporoane mafana yia someraka, “I Keresoa yano motosa paosa aporopo,” aíyaka somesapo.

²⁷ Maiya amo Yarusarame siti anaka Anitioke taonea porofete aporo metakira pesapo. ²⁸ Peraka porofete aporo hakásá meta yano motosa Ákapaseaki Ho Kotesamo somerakano, Ákapasemo someraka, “Makata nakosa hauaka sua fahokosapo.” Aíyaka Ákapasemo somesa, hakásá nine fasere peraka, Korótiae unihaeaka rea maiya amo, makata nakosane fasapo. ²⁹ Arirakano Yutía hauaka makata nakosa fasokino, Anitioke taonea Yasuaki patera asesa aporomo someraka, “Isiapo Keresoa paosa aporo mae Yutía hauaka risiane ararehokosapo.” Aíyaka aporo metakiramo mone wakasema kayamo wakasema kasapo. Arirakano aporo metakiramo mone kára kayamo kára kasapo. Makata nakosa ropohoasimo mone kasapo. ³⁰ Kaka marekea, Sorepe Pánapase tetákí ipu someraka, “Tetápo moneane mokoa pukua, Yutía hauaka Keresoa paosa aporo asekea risia aporoaki kakanie.” Airakano tetapó mokoa pusuapo.

12

Yasu Keresoa paosa aporo hinamo mokoatikisane oyapo.

¹ Herote* ipi kamani unihaeaka reke, epo Yasu Keresoa paosa aporo metakira kára mokoatikisapo. ² Mokoatikiraka Yonemo mamanea Yameseane kukusimo, “Ferepemo paterasie,” aíyaka Herotemo someaka maresapo. Someaka marerakano, e rusua kusuapo. ³ Rusua kusuane Yu aporo metakiramo sesérakano† asekea, Herotemo someraka, “Pitane soko waseremasie.” Airakano Pita waseremaka tipura makesapo. Tipura makesa maiya amo, Yu aporomo Farawa Pirianafonona Nako hokono kesapo. ⁴ Hokono kesa ane faraka, Ape Farimaresane Hemakapuko Hokono Kesapo. Hokono akera maiya amo, Pita tipura makesane, aporo terakaiyamosa kitafasu kitafasuaka asekea risiapo. Herotemo hemakapuraka, “Hokono kekea soraka, aporo suamo asekeasimo Pita hukurukusapo.” Aíyaka hemakapukua, Pita tipura makekea reapo. ⁵ Tipura makekea reakipoko, Keresoa paosa aporo hinamomo Kotiaki namo kakaro himu hakásaraka hemakapukua, Pitapoko farimaka kurikurisapo.

Pita tipura makesa hepene aporomo tonotaesane oyapo.

⁶ Herotemo hemakapuraka, “Rau Pita hukurukusapo,” aíyaka hemakapurakano, ereamo Pita wasakipoko aporo terakaiyamosa meta takua waka meta takua waka Pita tipia wasapo. Pita hokono tumuru takua sene karamo kita humarekea, sene sapemo aporo terakaiyamosa hokonoa kita humarekea, sene kára metamo Pita hokono kasakai

* 12:1: Yasu takapesa maiya amo Kini Herote ipi unihaeaka reapo. E kuraka, epo hokosamo hokosa epo ipi yako Herote meta faserepesapo. † 12:3: Yameseane rurakano Yu aporo metakira seséraka risiane Yasu Keresoa paosa aporofapo.

takua kita humarekea, sene sapemo aporo terakaiyamosa meta hokonoa kita humarekea, ayíaka wakakesapo. Arirakano aporo terakaiyamosa metakiramo ikia koroa mafairaka aseke a risiakipoko,⁷ ereamo wate foaka Unihae Kotimo hepene aporo peraka, tipura ape kakarua faesapo. Faesakipoko hepene aporomo Pita wataroa mahohoraka someraka, “Pita né turisie. Turikia foaka takahisie.” Aíyaka hepene aporomo somehoanine, Pita hokonoa sene káramo kita humaresane hemakapukua horopepesapo.

⁸ Horopeperakano hepene aporomo someraka, “Ní terakae hisie. Ní tamaka osorasie.” Airakano Pitamo terakae hikia, tamaka soko ososapo. Osorakano hepene aporomo someraka, “Ní inu pasu osoraka anoyaki peae.”⁹ Airakano Pita takahikia, hepene aporoane kekemasapo. “Hepene aporomo ano tonotaerakanapo,” aíyaka hemakapusuafapo. Kituamo arirakarihoamo kekemasapo.¹⁰ Kekemaraka aporo tipura ikia koro mafairaka aseke a risia fanane marokeraka, amo tipia aporo metakira mafairaka aseke a risiane soko marokeraka, ape hauaka moroa pukusakipoko tetā peane rurua aenemo ikia koro mapirisiane hemakapukua ropakapurakano, tetā hauaka moroa pauraka ikia kara pusuapo. Ikia kara puraka, hepene aporomo wate foaka Pita metakarikia hisiapo.¹¹ Hinakano Pitamo hemakapuraka, “Kituamo arirakarifapo. Namo kakaro sere ayiane, ano kakaro tonotaerakayireapo. Kotimo ipi hepene aporomo ano tonotaehoasimo epo pusiehoareapo. Pusierakano pekea Herotemo ano rukohoamo tonotaesapo. Ano mokoatikihokosane Yu aporomo asekohoamo tonotaesapo.” Aíyaka Pitamo hemakapusuapo.

¹² Aíyaka hemakapukua, hinamo Mariamo apea e pusuapo. Mariane Yone Makamo kaīyapo. Mariamo apea aporo yakai sarimaraka Pitapoko kurikuriraka toapo.¹³ Kurikuriraka toakipoko ikia koroa Pitamo paroparorakano, hinamo raipa Rotamo kaikia aseako pesapo.¹⁴ Pekea Pitamo méane Rotamo kairaka, ikia koro ropakamakos-apoko asiane, kára seseraka aporo kurikuriraka toaki somehoko, foaka ape kakarua pukua someraka, “Aporo reo, Pita ikia koroa rekerakae.”¹⁵ Airakano aporo suamo Rotaki someraka, “Né masuarakae.” Airakano Rotamo someraka, “Wae, kakaroripo.” Airakano aporoamo someraka, “Ane hepene aporo Pita aseke a rea aporo amo méane kairakayapo.”

¹⁶ Airakano Pitamo efera hunia yaiya paroparorakano, aporomo ikia koroane ropakamaka, Pita aseraka fofasapo.¹⁷ Fofaraka risikino me fahoasimo Pitamo hokono rukurakoraka someraka, “Ano tipura makesane tonotaehoasimo Unihae Kotimo ano araresapo. Yameseaki‡ soko, Yasu Keresoa paosa aporo mae metakiraki soko, nōmo some one somehoanie.” Aíyaka someaka marekea, apeane Pitamo metakarikia taone meta pusuapo.

¹⁸ Mituru fiarakano, aporo terakaiyamosamo aseane Pita pusekeno aseke, fofaraka mahimeteraka someraka, “Pita mayare? Pita manaka tonopusuarakapo,” aíyaka fofasapo.¹⁹ Arirakano Herotemo someraka, “Pita waseremako kope pusie.” Airakano Herotemo aporo terakaiyamosamo kope pukua, Pita asekeanafonorakano aporo terakaiyamosaki Herotemo saperaka hukurukua someraka, “Aporo terakaiyamosane rusie.” Airakano i rusua kusuapo. Rusua kukua kerakano, Herote Yutía hauakane metakarikia, Sisaría taonea pusuapo.

Herote kusuane oyapo.

²⁰ Arirakano Taia aporoaki soko, Saetone aporoaki soko, Herotemo sapesapo. Arirakano ipu makata nakosane Herotemo hauaka a morapo. Asiasamo Herotemo iaki someraka, “Nōmo hauaka a repo makata nakosane mokoakosafapo.” Aihokohoamo ipu Heroteaki somehoko pesapo. Pekea ipu Herotemo ape aseke a rea aporo Parásatasemo i patera aseke a rarehoasimo tau auaraka somesapo. Somerakano Parásatasemo Heroteaki some páteraka someraka, “Nōmo sapesane metakarinie. Aporoamo tákeraka

‡ 12:17: Yameseane Yasumo ipi mamaneapo. Ipi yako Yonemo mamaneane, Herotemo rusua kusuapo.

risikiakosapo." Airakano Herotemo someraka, "Nōmo iaki somehokosakipoko sere meta murikimakosapo," aisapo.

²¹ Murikimasa maiya amo, Herotemo ipi unihaemo pasu kotesa osoraka, kau rakikia, unihaemo sea á kake, aporoaki makata kára some kasapo. ²² Some karakano ipu suamo someraka, "Herotemo méane aporomanomo méfapo. Méane kotimo mépo." ²³ Airakano Herotemo iaki someraka, "Repo hasaka somerakae," aisafapo. Herotemo kakaro Kotiane makárahoanafonosasamo, wate foaka Kotimo hepene aporomo e rusuapo. Ruane Heroteane fakoa makata takamara sofe risiapo. Sofeane risike Herote kusuapo.

²⁴ Arirakano Kotimo someane aporo metakiramo kaikia somepe pusuapo. Somepe purakano aporo yakaimo someane kakimasapo. ²⁵ Arirakano Pánapasepe Sore tetapō Yarusarame sitia makata nakosa ropohoasimo mone kaka, Yarusarame sitiane metakarikia, Yone Makane pasimaka karikia pukua, Anitioke taonea poparipusuapo.

13

Pánapasepe Sore tetā murikimaka pusiesane oyapo.

¹ Anitioke taonea Yasu Keresoa paosa aporo metakira porofete aporopo. Metakira tisa aporopo. Arirakano i yano taesane oyapo. Pánapase soko, arirakano meta Símione ipi yano motosa meta Naisa soko, arirakano meta Rúsise ipi Sairíni taone aeyaka pesane soko, arirakano meta Manéyane ipi kamani unihae Herote tetā hokosa risia maiya amo tatī ape hakāsa risiane soko, arirakano meta Sore soko, ipu namina su yiamo Kotimo someane hemakapuraka aporo metakiraki some kasapo.

² Maiya hakāsa metamo, ipu Kotipoko makata nakosa sokoairaka, eaki kekereraka kurikurirakano Ho Kotesamo iaki someraka, "Pánapasepe Sore tetapō nōmo makata rakinie aisane, tetapō rakisimo, kikisiraka murikimakanie." ³ Airakano ipu makata nakosa sokoairaka kurikuriraka, tetā wamoahokonomo sakairaka Kotimo makata rakirane tetāki rakiako pusiesapo.

Saéparase he tonoa Pánapasepe Sore tetā pusuane oyapo.

⁴ Arirakano Pánapasepe Sore tetāki Ho Kotesamo pusierakano pusuapo. Pukua Serusia taonea kasu sipia ripaka, Saéparase he tonoa pusuapo. ⁵ Pukua, Saéparase he tonoa pauraka, Saramisi taonea pukua, Yu aporomo sarimana apea pukua, a Kotimo someane some kasapo. Arirakano Yone Makamo tetā ararehoasimo tetapō e soko karikia pusuapo.

⁶ Karikia pukua Saramisi taone ane metakarikia, he tono sapea pukua Páfose taonea pausapo. Pauraka taonea Yu aporo yano motosa Payasu asesapo. Payasu asesane e Yu aporopo. Yu aporoane kotafe porofete aporopo. Aíyaka kotafe hokoa makata kamusapo.

⁷ Arirakano ipi Saéparase aporo kamani unihae yano motosa Sésease Póraseaki tákeraka reapo. Arirakano Sésease Póraseremo himumo koteaka hemakapuraka, someane kaikia, kepoane wate foaka hemakapurapo. Ipi Kotimo someane kaiyako, Pánapasepe Sore tetāki peauerakano, ⁸ tetā pukua, eaki some kasapo. Arirakano Payasu yano motosa meta Kiriki meaka Eremase yano motosapo. Yano motosa kepoane makata kamuna aporopo. Aporoamo ipi Soremo someane metakarisimo waeraka, kamani unihaemo Yasuaki himu hakásaraka hemakapukohoamo paritaeraka some kasapo.

⁹ Arirakano Sore ipi yano motosa meta Porepo. Pore ipi himua Ho Kotesa komarukua rekerakano, aporo makata kamunaki hi pokohetheraka aseraka ¹⁰ someraka, "Nōmo Satane patera asekea, epo ipi rakirane nōmo arakire. Koteaka ereketae rerane nōmo hemakapurakarifapo. Hemakapunafonoraka, ereketae rakira makata aki nōmo yunuraka are. Watikiaka rakirane soko, kotafe somerane soko, né himua komarukua are. Aporoane Unihae Kotimo ikia kara fasikia hasaka pusimo, nōmo kirimaraka watikiaka arakire. Maiya suamo nōmo yaiya watikiaka rakiraka rekeakosare?" ¹¹ Arirakano pipu Unihae Kotimo hokonomo né rurakano, né hi katohokosapo. Pipu sere faenane nōmo aseakosafapo. Asekeanafonoraka wakasema nina asekeakosapo." Aihoanine makata kamuna aporo reane, eresa ako apera ayiáka pekea, e karotapisiapo. Karotapisiapo metamo e hokonoa maka karikia pusimo, epo hokono susuamo sesakairape

pusuapo. ¹² Arirakano Payasu hi mapirisiane unihae Sésease Pórasemo aseraka, Kotimo someane kakimaka, Unihae Yasuane Soremo some karakano kaikia fofasapo.

Pisitia hauaka pukua Anitioke taonea pausane oyapo.

¹³ Arirakano Páfose taonea anaka Pore aporo metakirayaki kasu sipia ripaka pukua, Pamefíria hauaka pauraka Paka taonea pesapo. Peraka a Yone Makamo i metakarikia Yarusarame sitia paripusuapo. ¹⁴ Paripurakano i Paka taoneane metakarikia, Pisitia hauaka pukua, Anitioke* taonea pausapo. Pauraka fenena maiyamo Yu aporomo sarimana apea pukua toapo. ¹⁵ Arirakano Kotimo somemane Mosesemo popasane Yu aporomo sarimana ape asekea risia aporomo menoaka faraka, porofete aporomo sawia popasane menoaka faraka, ipu aporo metaki someraka, “Pore soko aporo eyaki pesane soko, iaki kaiyako pusie. Pukua úyaka somehoanie. Maeo, repo isu ararehokosa someane hemakapurakarakanone isuaki somehoanie.” Airakano aporoamo pukua iaki somerakano,

¹⁶ Pore takahikia hokono rukurakoraka someraka, “Isiraya aporo repo kaisie. Yu aporohoanafonosamo Kotiaki hemakapura aporo repo soko kaisie. ¹⁷ Isu wainepe pesa kepoane Isiraya aporo Kotimo murikimasapo. Murikimaka Isiraya aporo Iyipi hauaka risia maiya amo kára wainenakano Kotimo iane makárasapo. Isiraya aporoane Iyipi hauaka metakarikia pusimo, Kotimo wakapumo hemakapukua rakiramo iane pasimosapo. ¹⁸ Pasimokoa keremisi foti amo (40) ipu watikiaka rakikia nena ima yaoa koraka risikino asekea Kotimo i metakariakosane hisiraka asekea reapo. ¹⁹ Arirakano aporo me kekepo yatipinu sumo Kenane hauaka asekea risiane, Kotimo rukutaesapo. Rukutaeraka marekea, Kenane hauakane Isiraya aporoaki karaka someraka, ‘Hauaka ane repo hauakapo,’ aiyaka iaki kasapo. Keremisi fo harote fifiti (450) amo Kenane hauakane Isiraya aporomo asekea risikiasimo Kotimo murikimasapo. ²⁰ Murikimasa maiya ane farakano, maropona aporomo asekea risikiasimo Kotimo murikimasapo.

²¹ Wakasema risina Sámio ipi porofete aporo rea maiya amo, Isiraya aporomo Kotiaki someraka, ‘Aporo hakása isu unihaeaka asekea rekeasimo murikimaka mearanie.’ Airakano Pénesamenemo aporo ira, aporo Kisimo maeya yano motosa Soreane, ipi unihaeaka rekeasimo Kotimo maresapo. Arirakano keremisi foti amo (40) Sore unihaeaka reapo. ²² Arirakano Soreane Kotimo metakarikia, Tefete unihaeaka asekea rekeasimo maresapo. Tefeteane Kotimo someraka, ‘Yésemu maeya Tefeteane nōmo seseripo. Epo nōmo hemakapusua susuane hákasa hemakapukua rakiakosapo,’ aisapo. ²³ Arirakano Tefetemo aporo ira wainepe pesa a Yasu takapesapo. Yasumo Isiraya aporo mafasiasimo eane Kotimo maresapo. Fana Kotimo someaka mareraka ayiakakosapo aisane kakaro faserepesa ayareapo.

²⁴ Arirakano Yasumo some kaka koraka rekeasiraka Isiraya aporoaki Yonemo some karaka, ‘Repo himu watikisane rukupateraka metakarirakano, nōmo re hea tapukumuriakosapo,’ aisapo. ²⁵ Arirakano Yonemo makata rakisiane fahoko makeanamo Yonemo ipi someraka, ‘Repo hemakapusuane ano epare? Aporo kára unihae peakosaporakano repo aseako risiane anofapo. E kesekea peakosapo. E ipi aporo kárasasamo epo tamakane nōmo fisihiane siahosifareapo,’ aiyaka Yonemo somesapo.

²⁶ Maeo, Eparahamemo aporo irao, repo kaisie. Yu aporohoanafonosamo Kotiaki hemakapura aporo repo soko kaisie. Isu ikia kara hasaka purapaka Yasumo mafasiako pesapo. Isu suane mafasiako e pesapo. ²⁷ Arirakano Yarusarame aporomo soko, namina aporo unihaeamo soko, Mafasira Aporo pesane ipu asesa nine ipu hemakapusuafapo. Hemakapunafonoraka fenena maiya suamo porofete aporomo Mafasira Aporo popasa ane ipu menoraka, menosa nine someamo kepoane ipu kára himetesapo. Arirakano fana porofete aporomo someraka, ‘Mafasira Aporo pesane rukusakipoko aporo suamo aoraka seserakano e rukusapo.’ Aiyaka ipu namina, ‘Aporoane rusua kukunie,’ aihokosapo. Arirakano porofete aporomo ayiakakakosaposane faserepesa ayareapo. ²⁸ Yasu ipi koteaka

* 13:14: Taone teta yano motosane Anitioke taonepo. Meta, Pisitia hauaka á kisiapo. Meta, Siria hauaka á kisiapo.

reasasamo ipi kukusimo hukurukusane ikia kara kakanafonosa nine ipu Pairateaki someraka, 'Yasu rusua kukunie,' aisapo. ²⁹ Arirakano wate fana Yasuane ayiakakosapo aíyaka popasane, hakása yine fasereperaka, Yasu ira paremareke, rusua kurakano, fatarimaka maka pukua, kunikia motosapo. ³⁰ Yasu kusua kunikia motosane Kotimo maturikia taesapo. ³¹ Maturikia taerakano, turikia pukua yape yakaimo eane aporo metakiramo asesapo. Yasu kukusiraka rea maiya amo aporo metakira Kariri hauaka anaka Yasuyaki hakása Yarusarame sitia pesa aporoamo Yasu kukua turikia purakano ipu eane asesapo. Ipu Yasu asesa aporoamo Yu aporoaki yumo some karakanapo.

³² Arirakano ape wo etapo o some kotesa somehoko perakayiapo. Someane oyapo. Fana isiaipo makasa kaua kekemaki Kotimo someaka mareraka, 'Keseke nōmo ayiáka rakiakosapo.' ³³ Aisane yumo makasa kaua kekemamo hokosa wainepe pesa ane isupoko Kotimo someaka maresane pipu faserepesa ayareapo. Ayiáka isu risia maiya omo Yasu kusuane Kotimo maturikia taesapo. Kotimo sawia Same sawia napa tu (2) popasane oyapo. Kotimo someraka, 'Né nōmo hokosapo. Pipu nōmo ní Atane[†] anopo.' Aíyaka Kotimo somerakano popahoareapo. (Buk Song 2:7)

³⁴ Yasu kusua maturikia taesane efera hunia kukua kau toreraka siahoasifasekeno Kotimo someraka, 'Tefeteaki nōmo makoteraka ayiakakosaposane néaki kakakosapo. Nōmo some one kakaroripo,' aisapo. (Aisaia 55:3)

³⁵ Aisa kepoane Same sawia some meta Tefetemo popasane oyapo. Kotimo someraka, 'Nōmo aporo raipa kotesa susu rea aporoane kuraka kau torehokohoamo nōmo asekea rekeakosapo.' Airakano Tefetemo kaikia popahoareapo. (Buk Song 16:10)

³⁶ Popasane Tefetemo e ipiane popasafapo. Kotimo hemakapusuane Tefetemo himu hakásaraka hemakapukua rakiraka, e rea maiya amo aporo hinamo hakása risiaki some kasapo. Some kaka e hitafe rea maiya ane faraka e kusuapo. Kurakano e kusuane maka pukua, ipi makasa kaua kekema hauaka murisia a maresane ipi kau toresapo.

³⁷ Arirakano Kotimo maturikia taesa aporoane ipi kau toresafapo.

³⁸ Asiasamo, maeo. Repo himu watikisane Yasumo mafarakano asekea etapo reaki somerakanapo. Somerakano repo hemakapunie. ³⁹ Aporomo Yasuaki himu hakásaraka reke, Yasumo someane kakimarakano, aporoamo himu watikisane Kotimo mafanapo. Mafaraka watikisane metakarisimo makokorotaenapo. Arirakano Mosesemo some-manemo repo himu watikisane mafanafapo.

⁴⁰⁻⁴¹ Arirakano Kotimo somesane porofete aporomo kaikia someraka, 'Mainamareraka somera aporo re asekeanie. Re maiyiakakosare? Aíyaka hemakapukua nōmo rakirane repo hemakapunaforakanone, ane re kukusapo. Re arisia maiya amo nōmo rakirakanapo. Arakiramo kepoane aporo metamo reaki somerakano yia repo kakimakosafapo.'

Aíyaka porofete aporomo popasa ayiáka repo ayiakakohoamo asekeanie." (Habakuk 1:5)

⁴² Aíyaka someaka faraka Porepe Pánapase tetā Yu aporomo sarimana apeane metakarikia, takahikia purakano aporomo someraka, "Soko meta fenena maiya amo Kotimo someane some kakako peanie." ⁴³ Airakano tetā pusuapo. Purakano Yu aporo soko, Yu aporomo somemanre Yu aporoanafonosamo kakimasa aporoane soko, tetāyaki hakása pusuapo. Puraka risike tetapō someraka, "Kotimo re yaku araresasamo yaiya hemakapukua risikianie. Kotiane metakariakopo," aisapo.

⁴⁴ Soko meta fenena maiya amo, Anitioke taonea aporo hinamo suamo Kotimo someane kaiyako sarimasapo. ⁴⁵ Sarimarakano Yu aporomo aseane, aporo hinamo yakaimo tetapō some kaiyako sarimasekeno asekea namina himumo kakanakeraka sapesapo. Saperaka Poremo ásiapo aíyaka somerakano, ipu ásiafapo aíyaka Poreaki tafaraka, some parikaraka e mainamaresapo.

[†] 13:33: Same sawia napa tu popasamo kepoane oyapo. Fana Koti Yasumo ata rea nine pipu ipi seséraka ipi rakirane rakisimo Yasuane maresapo.

⁴⁶ Arirakano Porepe Pánapase tetapō Kotimo someane mapiraraka paroaka someraka, “Kotimo someane re Yu aporoaki etapo fana some kasapo. Some kasane repo koare-taeraka hisiraka Kotiyaki yaiya risikiakosane hisirakano soko repo namina menapo. Asiasamo re metakarikia, Yu aporohoanafonosaki Kotimo someane etapo some kakakosapo.

⁴⁷ Fana Kotimo someraka,

‘Yu aporohoanafonosane Kotimo ikia kara pusimo nōmo mafaehokosapo. Aporo su hauaka sua risiane nōmo farimakasimo nōmo maresapo.’

Aíyaka Kotimo somerakano etapo kakimaka Yu aporohoanafonosaki some kakako pukusapo.”

(Aisaia 49:6)

⁴⁸ Aíyaka tetapō somerakano, Yu aporohoanafonosamo kaikia seseraka, Unihae Kotimo someane kaisiasamo kekeresapo. Aporo Kotiyaki yaiya risikiasimo Kotimo murikimasapo. Murikimasa aporo hinamomo Yasu hemakapusimo tetapō some kasane ipu kakimasapo.

⁴⁹ Arirakano hauaka á Kotimo someane sape ro some kaka, sape aka some kaka, ayiáka hauaka sua pukua some kape pusuapo. ⁵⁰ Arirakano Kotiaki kekerena hinamo fanaraka toamo soko, aporo fanaraka risiamō soko, suamo Poreaki sapehoasimo Yu aporomo hokoreraka somesapo. Porepe Pánapase tetā mokoatikiraka someraka, “Teto isiapo hauaka wo risikiakopo. Metakarikia pusie.” ⁵¹ Airakano namina watikisane Kotimo hisirakano namina hemakapusimo, tetapō korakea kokotonomo pararisiane tarotaroraka rerakatapisiapo. Kokotonomo rerakatapikia marekea, Anitioke taoneane metakarikia, hauaka meta pukua, Aikoniamē taonea pusuapo. ⁵² Arirakano Anitioke taonea Yasuaki patera asesa aporo hinamo himua Ho Kotesa komarukua risikino kára seseaka risiapo.

14

Aikoniamē taonea Porepe Pánapase tetā risiane oyapo.

¹ Aikoniamē taonea Porepe Pánapase tetā Yu aporomo sarimana apea yorokoa tetapō some kasapo. Tetapō Yasuane some karakano aporo yakaimo someane kakimasapo. Kakimasa aporoane metakira Yu aporomo soko, metakira Yu aporohoanafonosamo soko, kakimasapo. ² Arirakano Yu aporo metakiramo tetapō someane kakipayasapo. Asiamo Keresoa paosa aporoaki Yu aporohoanafonosamo sapehoasimo, Yasumo someane kakipayasa aporoamo hokoreraka somesapo. ³ Arirakano Aikoniamē taonea, Pánapasepe Pore tetā maiya kára waka risike, Unihae Yasuane wakapuaka some kasapo. Tetapō mapiraraka someraka, “Yasumo isu yaku ararenapo.” Aíyaka someane kakaroripo aihoasimo, Kotimo tetā ararerakano, tetapō Kotimo wakapumo hemakapukua rakirane rakisiapo. Rakirakano aporo suamo aseraka fofasapo. ⁴ Fofaraka Aikoniamē taonea aporo risiamō kekepo kekepoaka hemakapusuapo. I parakuraka, metakiramo Yu aporoaki* patera aseako hemakapusuapo. Arirakano metakiramo tarira aporoaki patera aseako hemakapusuapo.

⁵ Arirakano Yu aporohoanafonosamo soko, Yu aporomo soko, ipu aporo fanaraka risiamō soko, Porepe Pánapase tetāne waseremaka, ekemo ⁶ kareakosaporakano tetapō kaikia, Rikonia hauaka tekatarikia pusuapo. Tekatarikia pukua Rikonia hauaka risike, Risitara taonea soko, Tepe taonea soko, hauaka make tameyia soko, koraka risike ⁷ aporo hinamomo Yasuane hemakapusimo some kotesane some kasapo.

Risitara taonea Porepe Pánapase tetā risiane oyapo.

⁸ Risitara taonea aporo korake watikisa kake, aporoane ipi kaīyiamo takapesa maiya amo, korake watikisasamo fininafapo. ⁹ Poremo some karakano, aporo korake watikisamo kaisiapo. Kairakano Poremo aporoane koteaka asekea hemakapuraka, “Aporoamo korake watikisane Kotimo mafahoasimo himu hakásaraka hemakapukua are.” ¹⁰ Aíyaka

* 14:4: Yu aporoamo Yasumo someane kakipayasa aporopo.

hemakapuraka Poremo eaki sakepamo someraka, “Ne takahisie.” Airakano aporoane wate foaka takahisiapo. Takahikia epo korakemo koteaka finisapo.

¹¹ Finirakano aporo suamo aseraka namina Rikonia meaka someraka, “Kotiane yapakeaka aporomano pariaka isu arisia wo peareapo.” ¹² Aíyaka Pánapaseaki ipu kotafe koti meta yano motosa Siusi[†] yano yakosapo. Pore fanaraka some karaka reasamo, eane Hémisi yano motosapo. ¹³ Arirakano Aikoniamē taonea ruru tapikia, fe takua Siusipoko ape kisia á, Siusimo pirisiti aporo reapo. Pirisiti aporoamo soko, aporo yakai sarimasamo soko, saro ponomakau ape ruru ikia koroa karikia pekea, ira farafara soko mokoa pekea, Porepe Pánapase tetāki yaku kakakosakipoko karikia pesapo. Karikia peraka ipu someraka, “Saro ponomakau one rukua kakakosapo,” aisapo.

¹⁴ Aisapakano Pánapasepe Pore tetapō kaikia, aporoamo hasaka hemakapurakano aseke, tetapō mahisiraka pasu ososane horomokoa mokokoaraka[‡], aporo yakai sari-maraka risiakipoko foaka pukua sakepamo wáraka, ¹⁵ “Aporo reo. Repo mainakanare? Eto soko aporo reapo. Eto soko re soko isina kau hakásá yyiyapo. Repo nenakamaka makata makárasane metakarikia, kakaro Kotiaki risikiako parihoasimo, epo some kote-sane etapo some kakako perakayiapo. Arirakano ti soko, ti yapura makata arisiane soko, hauaka soko, hauaka wo makata arisiane soko, he tawara soko, he tawara makata arisiane soko, makata suane Kotimo ipi rakisiapo. Koti Kakaro Yaiya Rera amo rakisiapo. ¹⁶ Fana aporo su hauaka sua risiamo ipu hemakapusuane rakirakano, Kotimo i matasosafapo. ¹⁷ Ayiáka epo ipi makata ainane aporo suamo aseke hemakapusimo tariraka, epo re makoteraka, yao peasimo rakikia marekea, makata nakosa koteaka taneheasimo rakikia marekea, reaki makata nakosa soko kaka, seséna soko kasapo.” ¹⁸ Airakano aporo suamo Porepe Pánapase tetāpoko saro ponomakau ruko kára sesésapo. [§] Sesésane tetapō kakaro waerakano yia, aporo suamo kára seséraka saro ponomakau rusuahopo.

¹⁹ Arirakano Yu aporo Pisitia hauaka Anitioke taonea aeyaka pesa aporoamo soko arirakano Aikoniamē taone aeyaka pesa aporoamo soko, i sarimaraka, Risitara aporomo Porepe Pánapase tetāki sapehoasimo kirimasapo. Kirimaraka some karakano, Risitara aporoamo i patera aseke, Poreane ekemo karesapo. Kareke motokoa Pore kusuari-hoamo yaoa kikirimaka pusuapo. ²⁰ Arirakano Pore wareakipoko Yasu Keresoa paosa aporo su sarimasapo. Sarimarakan Pore turikia pukua takahikia, Risitara taonea paripusuapo. Paripukua waka mituru fiarakano Pánapaseyaki Tepe taonea pusuapo.

Yasuaki patera asesa aporo hinamoane tetapō araresane oyapo.

²¹ Tepe taonea risike Porepe Pánapase tetapō Kotimo some kotesane some karakano, aporo yakaimo kakimasapo. Kakimarakano Tepe taone metakarikia Anitioke taonea poparipuraka, Risitara taoneane marokeraka Aikoniamē taoneane soko marokeraka, Anitioke taonea poparipusuapo. ²² Poparipuraka, Yasuaki patera asesa aporo ararehoko someraka, “Kotiaki himu hakásaraka paroaka hemakapukua risikianie. Kotiane metakariakopo. Koti unihaeaka rea pauhokosakipoko arisia maiya amo makata umisa kekepo kára faserepepehokosapo. Faserepeperakan Kotiaki himu hakásaraka paroaka hemakapukua risikianie,” aíyaka tetapō somesapo. ²³ Yasu Keresoa paosa aporo hinamoane aseke risikiasimo, tetapō aporo metakira murikimosapo. Murikimosa aporoane Yasu Keresoa paosa aporo hinamo aseke risikiakosa aporoane ayapo, aíyaka murikimosapo. Fana Kotiaki himu hakásaraka risikino aseke aporoane murikimosapo. Murikimoka makata nakosa sokoairaka iane Kotimo ararehoasimo kurikurisapo.

Siria hauaka Anitioke taonea tetā poparipusuane oyapo.

[†] 14:12: Kiriki aporomo kotafe koti yatafu asiane makáraraka kekeresapo. Meta, yano motosa Siusi, arirakano meta, yano motosa Hémisipo. [‡] 14:14: Ipu Yu aporomo ainane oyapo. Aporo metamo kakaro Kotiane mawakasemarakano Yu aporomo namina pasu ososane horomokoa mokokoanapo. [§] 14:18: Risitara aporomo ipu kotafe koti yatafu asiaki masesehokosakipoko Porepe Pánapase tetāpoko saro ponomakau ruko hemakapusuapo. Asiane Poremo waeraka, ipu aíyaka rakiane namo kakaro Kotiane mawakasemahoasireapo, aíyaka hemakapuraka epo waesapo.

²⁴ Keseke Porepe Pánapase tetā Pisitia hauaka koraka risina Pamefíria hauaka á pesapo. ²⁵ Pekea Paka taonea some kotesane some kaka faraka Ataria taonea pusuapo. ²⁶ Ataria apea kasu sipia ripaka, Anitioke taonea poparipusuapo. Fana Anitioke taonea tetapō Kotimo rakirane rakisimo murikimasapo. Murikimarakano some kape pukua Anitioke taonea yia poparipesapo. ²⁷ Popariperaka, Yasu Keresoa paosa aporoaki sarimahoko peerakano, i pekea sarimasapo. Sarimarakano tetapō someraka, “Kotimo eto araresapo. Yu aporohoanafonosamo Yasuaki himu hakásaraka hemakapusimo, Kotimo ikia koro ropakataena ayáka, i himuane ropakataeraka maereketaesapo.” Aíyaka Kotimo tetā ararerakano tetapō makata su rakisiane tetapō some kasapo. ²⁸ Maiya káramo tetā Anitioke taonea Yasuaki patera asesa aporoyaki hakāsa risiapo.

15

Yarusarame sitia aporo yakai sarimasane oyapo.

¹ Yutía hauaka aeyaka Yu aporo metakira pekea, Anitioke taonea pauraka risike, Yu aporohoanafonosa Keresoa paosa aporoaki ipu someraka, “Repo Mosesemo somemaneane kakimakanie. Somemaneane kakimaka kau hahaeraka patehoanie. Kau hahaeraka patehoanafonorakano Kotimo re mafasiakosafapo.” ² Airakano some kasa aporoaki Porepe Pánapase tetapō kára tafatafasapo. Tafatafarakano Anitioke aporomo someraka, “Kau hahaeraka patena kepoane mawaroako Pore né soko, Pánapase né soko, Anitioke aporo metakira soko, re su Yarusarame sitia hisie. Yarusarame sitia tarira aporoaki soko, Keresoa paosa aporo asekea risia aporoaki soko kaiyako hisie.” Aíyaka Anitioke taonea Keresoa paosa aporo risiamo iane hisiesapo. ³ Hisierakano i namina Yarusarame sitia hiakosakipoko Finísia hauakane soko, Sameria hauakane soko, marokeraka pukua, aporoaki ipu someraka, “Yu aporohoanafonosamo namina makata watikiaka rakisiane metakarikia, yumo Kotiaki risikiako parisapo.” Aisane ipu kaikia kára sesesapo. ⁴ Arirakano i pesane hikia Yarusarame sitia pausapo. Pauraka Yarusarame sitia Keresoa paosa aporomo tereraka i karikia seserakano, tarira aporomo soko, iane tereraka karikia sesesapo. Arirakano Keresoa paosa aporo asekea risia aporoamo soko, iaki seseraka tererakano asekea Porepe Pánapase tetapō iaki makata somesapo. Kotimo some kape pusua maiya amo, Kotiane tetáyaki rekeno tetapō makata su rakisiane iaki somesapo.

⁵ Arirakano kakimara aporo metakira Fere se aporo risiane takahikia someraka, “Kotiaki hemakapura Yu aporohoanafonosane kau hahaeraka paterasie, aihoanie. Mosesemo somemane motosane kakimaka rakisie aihoanie.” ⁶ Airakano someane mawaroako tarira aporomo soko, Keresoa paosa aporo hinamoane asekea risia aporoamo soko, sarimarakano, ⁷ kára me rukua risina Pita takahikia someraka, “Maeo, wate fana Yu aporohoanafonosamo Yasuane hemakapusimo some kotesane some kakasimo Kotimo isu isina yia ano murikimasapo. Some ane ipu kaikia kakimakasimo somehoko pusie, aiyaka Kotimo ano murikimasapo. ⁸ Arirakano aporo hinamo su himua Kotimo aserapo. Yu aporohoanafonosane Yasu Keresoa paorakano i himuane soko Kotimo aseraka, ‘Siareapo,’ aíyaka i himua Ho Kotesa murisiapo. Isu Yu aporoane Ho Kotesa murisia ayáka, i Yu aporohoanafonosane soko Ho Kotesa murisiapo. ⁹ Isuaki soko, iaki soko, Kotimo kekepo hemakapusuafapo. Yu aporohoanafonosamo Yasuaki himu hakásaraka hemakapusuasamo, Kotimo i himu watikisane mafasapo. ¹⁰ Mafasasamo marirakano repo Koti kau aseako rakirakanare? Marirakano Yu aporohoanafonosa Keresoa paoraka risiaki Mosesemo somemane motosane rakinie, airakanare? Makata fato umisa maka punafonona ayáka Mosesemo somemaneane isiapo makasa kaua kekemamo rakiafareapo. Isiapo soko rakiasifareapo. ¹¹ Kaisie. Isiapo hemakapurane oyapo. Unihae Yasumo isu yaku arareraka mafasirapo. Isu Yu aporoane mafasira ayáka, i Yu aporohoanafonosane soko, ayáka mafasirapo.” Aíyaka Pitamo somesapo.

¹² Aíyaka somehora yiama aporo suamo kairaka me kausapo. Me kauraka risikino Pánapasepe Pore tetapō someraka, “Yu aporohoanafonosamo Kotiaki hemakapusimo,

Kotiane etoyaki rekeno, Kotimo wakapumo hemakapukua rakirane rakisiapo.” Aíyaka tetapō makata su rakisiane somesapo. ¹³ Someaka farakano Yamesemo* someraka, “Maeo, repo kaisie. ¹⁴ Saemonemo isuaki someraka, “Yu aporohoanafonosamo Koti pat- era asekea, Koti ipiane hemakapusimo i metakirane murikimosapo.” Aíyaka Saemonemo isuaki some akare. ¹⁵ Arirakano porofete aporomo fana somesane soko, Saemonemo yumo someraka ane soko, hakása yiyareapo. Porofete aporomo somesane oyapo.

¹⁶ ‘Unihaemo someraka, “Keseke ano paripeakosapo. Paripekeea Tefetemo ape rakari- pusuane efera hunia nōmo kiakosapo. Kirakano yaiya rekeakosapo. ¹⁷ Ape kawe kisiane aporo suamo soko, Yu aporohoanafonosa nōmo murikimosa aporoamo soko, suamo ano hemakapuraka, ano aseako sesehokosapo. Keseke ayiakakosane nōmo wate fana maresapo.” ¹⁸ Aíyaka wate fana Unihae Kotimo somerakano porofete aporomo kaikia, sawia poparaka motoreapo.’

(Amos 9:11-12)

¹⁹ Aisasamo nōmo hemakapusuane oyapo. Yu aporohoanafonosane Kotiaki risikiako parirakano, iaki makata umisa mareane siahoasifareapo. ²⁰ Asiāne isiapo iaki some wakasema meta úyaka popahokosapo. ‘Kotafe koti aporomo hokonomo rakisia makata aki ipu someraka, “Isiapo unihae kárane oyapo.” Arirakano kotafe koti ipu hokonomo makata rakisiaki makata kakayia kasane nakopo. Arirakano meta, hinamo hakimakopo. Arirakano meta, makata kakayia mawia kita humaresa kusuane nakopo. Arirakano meta, makata yapi nakopo.’ Aíyaka popahokosapo. ²¹ Arirakano fenena maiya suamo Yu aporomo sarimana apea Mosesemo somemaneane aporomo kaiyisimo menonapo. Wate fana soko yumo soko maiya suamo somemaneane ape sua menoraka some karápo.” Aíyaka Yamesemo somesapo.

Yu aporohoanafonosa Keresoa paosa aporoaki Yamesemo sawi poparaka makesane oyapo.

²² Yamesemo someaka farakano tarira aporomo soko, Keresoa paosa aporo asekea risia aporoamo soko, Keresoa paosa aporo hinamomo soko, ipu suamo someraka, “Porepe Pánapase tetapō Anitioke aporoaki somehoko pusiehokosapo. Arirakano Keresoa paosa aporo metakira soko tetāyaki pusimo murikimaka pusiehokosapo.” Aíyaka someaka maka Yutase ipi yano motosa meta Pásapasepe Saerase tetā murikimasapo. Keresoa paosa aporo maeane kotesaporakano asekea tetāne murikimasapo. Murikimasa aporoamo sawi maka pusimo sawiane úyaka popasapo.

²³ “Re Yu aporohoanafonosa Anitioke taonea risiaki soko, Siria hauaka risiaki soko, Sirísia hauaka risiaki soko, re suaki sawi one poparaka makerakanapo. Isu Keresoa paosa aporo asekea risiamo soko, tarira aporomo soko, isiapo Keresoa paosa aporo maeane repo. Isiapo reaki sawi poparaka makerakanapo.

²⁴ Aporo metakiraki isiapo some kakako pusie, aihoanafonosa nine, isu oyaka aporo metakira pukua, re risiakipoko some karakano, repo mahisisapakae. ²⁵ Mahisisane isiapo kairaka, isu su sarimaraka, aporo metakira murikimaka, aporoane Pánapasepe Pore tetāyaki repo apea somehoko pusierakanapo. Tetāne isiapo kára hemakapurakanapo.

²⁶ Tetapō isiapo Unihae Yasu Keresopoko rakiraka kusuahopo. ²⁷ Asiamo aporo tetā murikimasane yano taesane oyapo. Meta Yutase, meta Saerase tetā murikimasapo. Isiapo sawi popasane soko, tetapō hakása yineraka somehoasimo pusierakanapo. ²⁸ Ho Kotesamo hemakapusuane isiapo soko hakása yineraka hemakapurakanapo. Ho Kotesamo soko, isiapo soko, repo kakimakasimo makata umisa marerakanafapo. Asiane isiapo some metakira reaki someaka marerakano repo kakimaka rakinie. Repo kakimaka rakiakosane oyapo. ²⁹ Kotafe koti, aporomanomo hokonomo rakisiaki someraka, ‘Isiapo unihae kárane oyapo.’ Aíyaka someraka kotafe kotiaki makata kakayia kasane repo nakopo. Arirakano meta, makata yapi nakopo. Arirakano meta, makata kakayia mawia kita humaresa kusuane nakopo. Arirakano meta, hinamo hakimakopo. Asiamo makata watikisane repo rakianafonorakanone, ane kotehokosapo. Asiamo isiapo some yiaypo. Re ayapa.” Aíyaka sawia popasapo.

* 15:13: Yameseane ipi Yasumo mamanea ayapo. Yarusarame sitia Keresoa paosa aporo hinamoane Yamese amo asekea reapo.

³⁰ Poparaka faraka aporo murikimasaki kaka pusierakano, i pukua Anitioke taonea pauraka, Keresoa paosa aporoaki sarimarasie, aisapo. Aporoane sarimarakano, sawi popasane iaki kasapo. ³¹ Karakano, sawiane ipu menoraka, aporo suamo kaikia sesesapo. ³² Arirakano Yutasepe Saerase tetāne porofete aporopo. Tetā maiya káramo Keresoa paosa aporo maeyaki risike, namina Yasupoko mapiraraka himu paroaka risikiasimo, some kotesane some kasapo. ³³ Some karáka risina, tetāki Keresoa paosa aporo mae sarimarako risiamo tetāki ayapasapo. Ayaparaka Yarusarame sitia tetā hisiesa aporo risiakipoko a poparihiasimo ayapasapo. ³⁴ [Asiane Saeraseane Anitioke taonea yia parisapo.] ³⁵ Arirakano Anitioke taonea Porepe Pánapase tetā á risike tetapō soko, aporo metakiramo soko, ipu Unihae Kotimo someane aporo suamo enomakasimo some kasapo.

Porepe Pánapase tetā ikia kara kekepo pusuane oyapo.

³⁶ Maiya wakasema faraka Poremo Pánapaseaki someraka, “Fana Unihae Kotimo someane some karakasu taone yia efera hunia eto poparipuko nōmo hemakapurakaripo. Keresoa paosa aporo maeane mayíáka risikirihamo aseako poparipurakapo.”

³⁷ Airakano Pánapasemo someraka, “Yone Maka soko karikia pukusapo.” ³⁸ Airakano Poremo someraka, “Wae, e karikia pukusafapo. Fana Pamefíria hauaka epo eto metakarisiapo. Kotimo someane some kakako kimisi pusuane, epo rakikia masafapo.” Aíyaka Poremo somerakano, ³⁹ tati kára tafatafasapo. Tati tafatafaraka marekea, meta ikia kara takua pukua, meta ikia kara takua pukua asiapo. Pánapasemo Maka karikia, kasu sipia ripaka Saéparase he tonoa pusuapo. ⁴⁰ Arirakano Poremo Saerase pasimaraka, tetāne Kotimo ararehoasimo Keresoa paosa aporo maemo kurikurirakano tetā pukua, ⁴¹ Siria hauaka a soko, Sirisia hauaka a soko, pusuapo. Hauaka á Yasu Keresoa paosa aporo hinamomo Kotiaki kára hemakapusimo some kotesane some kasapo.

16

Porepe Saerase tetāyaki Timoti pusuane oyapo.

¹ Tepe taonea soko, Risitara taonea soko Pore pesapo. Perakano Risitara taonea Yasuaki patera asesa aporo hakásá meta yano motosa Timoti reapo. Ipi kaiyia Yu hinamopo. Hinamoamo Yasuaki himu hakásaraka hemakapukua kayapo. Arirakano ipi wafaya Kiriki aporopo. ² Risitara taonea soko, Aikoniamē taonea soko, Keresoa paosa aporo mae risiamo someraka, “Timotiane aporo kotesapo.” ³ Airakano Poremo someraka, “Timotiane anoyaki hakásá peanie,” aisapo. Aíyaka Timotiane Poreyaki hakásá perakano, Poremo Timotiane kau hahaeraka patesapo. Yu aporomo kaiyiáne Timotimo wafayane Kiriki aporoporakano ipu kaisiapo. Kaisiasamo ipu mahisihokohoamo Poremo Timotiane kau hahaeraka patesapo.*

⁴ Arirakano i taone meta soko, taone meta soko, ayíáka some kape pusuapo. Ayíáka some kape puraka, tarira aporomo soko, Keresoa paosa aporo asekea risia aporoamo soko, ipu Yarusarame sitia somemane motosane kakimara aporomo kakimakasimo some kape pusuapo. Some kape puraka ipu someraka, “Yarusarame sitia somemane motosane kakimakanie.” ⁵ Aíyaka some karakano, Keresoa paosa aporo hinamomo Yasuaki himu hakásaraka hemakapusuane káraraka hemakapusuapo. Maiya suamo aporo hinamomo Yasuaki risikiako parirakano, Keresoa paosa aporo hinamo fana risia akiyaki paoraka namo kakaro kárasapo.

Toróase taonea Poremo kitusane oyapo.

⁶ Pore soko aporo metakira soko Firisia hauaka pukua, Karesia hauaka hisiapo. Hinakano Ho Kotesamo someraka, “Esea hauaka makata somehoko pukopo.” ⁷ Airakano i pukua Misia hauaka faria pauraka risike, ipu hemakapuraka, “Isu Pitínia hauaka purakapo.” Aíyaka hemakapusuane Yasumo Homo waerakano ⁸ ipu Misia hauakane

* 16:3: Yu aporomo Yu aporohoanafonosa akiyaki sarimanafapo. Timotimo some karakano, Yu aporomo kakiyahokohoamo Poremo Timoti kau hahaeraka patesapo. Kau hahaeraka patesasamo Timoti ipi Yu aporo parisapo.

metakarikia pukua Toróase taonea pesapo.⁹ Peraka, ereamo Poremo kituamo aseane, Masetónia aporo reke wáraka someraka, “Masetónia hauaka isu ararehoko peanie,” airakano Poremo kaisiapo.¹⁰ Kituaka farakano isiapo[†] hemakapuraka, “Masetónia aporoaki Kotimo some kotesane some kakako pusie, aýaka Kotimo kituamo tarireapo.” Aýaka hemakapuraka Masetónia hauaka puko isiapo makata sarikesapo.

Hinamo hakásá yano motosa Ritia Yasuaki kakako parisane oyapo.

¹¹ Isu Toróase taone metakarikia, kasu sipia ripaka, isu ereketae pukua, Samoterese he tonoa pukua, mituru Niaporisi apea pausapo.¹² Niaporisi apea pauraka, anaka hauaka ikia pukua Firipai taonea pausapo. Masetónia hauaka ape fanane Firipai taone ayapo. Firipai taoneane Rome kamanimo asekea reapo. Arirakano sere yakaimo Firipai taonea isu risike,¹³ fenena maiya amo ape metakarikia ape make tameyia he fea isu pusuapo. Asiamo isiapo hemakapuraka, “Aporo metakiramo kurikurihoko he fea perapo.” Aýaka hemakapurua puraka aseane, hinamo metakira sarimaraka tokeno á iaki isiapo some kasapo.

¹⁴ Some karakano, hinamo meta yano motosa Ritiamo kaisiapo. Ipi Taiataíra taone hinamopo. Ipi makata rakirane pasu susa rakikia roponapo. Ipi Kotiaki kekerenapo. Arirakano Poremo some kasane Ritiamo kakimakasimo, Unihae Kotimo Ritia ararerakano, Ritiamo koteaka kakimasapo.¹⁵ Kakimarakano Ritia hea tapukumaresapo. Hea tapukumarerakano metakira Ritiayaki ape hakásá toane soko, hea tapukumurisiapo. Hea tapukumurirakano Ritiamo someraka, “Repo hemakapuraka, ‘Ritia ipi kakaro Keresoa paosa hinamopo. Unihae Kotiaki himu hakásaraka kakenapo.’ Aýaka hemakapuraka, nōmo apea peanie.” Airakano ipi apea isu pusuapo.

Firipai taonea Pore tipura makesane oyapo.

¹⁶ Arirakano aporo metakiramo kurikurihoko sarimana hauaka a isu puraka, hinamo meta perakano isuyaki sapenesapo. Hinamoane wafesa kake, keseke makata ayiakakosane epo aseraka somesapo. Aseraka somehoasimo, aporomo aporo metakiraki mone kára kasapo. Mone kasane hinamoaki kasafapo. Aporo metakiramo hinamoane roposa wafaya iaki mone kasapo. Aporomo e roposa wafaya akipoko hinamoamo makata rakirapo.¹⁷ Arirakano hinamoamo Pore soko, isu soko, kekemarakana wáraka, “Aporoane Koti káramo makata rakira aporopo. Aporo re su Kotimo mafasiakosane ipu some kakakosapo.”¹⁸ Aýaka sere yakaimo hinamoamo wáraka kekemasapo. Wáraka kekemarakano, Poremo himu mahisiraka saperaka pariaseraka wafeaki someraka, “Yasu Keresomo yano motosane yano hokoa, wafe né hinamoane metakarikia pusie,” airakano wafeane wate foaka metakarikia pusuapo.

¹⁹ Purakano hinamoane faraka koteaka kayapo. Kakeno ipi roposa wafayamo aseraka hemakapuraka, “Wafe pusuakipoko mayiáka isiapo makata ropo mokoakosare?” Aýaka hemakapuraka ipu Porepe Saerase tetā waseremokoa, kamani aporo risia hauaka moroa aporo sarimasa á, karikia pusuapo.²⁰ Karikia pukua, Rome kamani maropona aporo risia a pauraka, hukururaka someraka, “Aporoane Yu aporopo. Isiapo ape wo auanane ipu mokoatikirakanapo.”²¹ Ipu isuaki, ‘Makata uyáka rakinie,’ aýaka somerakano, isiapo Rome aporomo ipu ainane kakimayane siahoasifareapo.”

²² Airakano aporo suamo hinamo roposa wafayane patera asekea, tetāne hukururakano, maropona aporomo Porepe Saerase tetā pasu ososane horomokoa someraka, “Ira famo rusie.”²³ Aýaka aporomo sakepamo rurakano maropona aporomo tetāne tipura kesapo. Tipura kekea, aporo tipura asekea reaki ipu someraka, “Tetāne tonopuko-hoamo ikia koro suane róko motokoa asekea risikianie.”²⁴ Airakano aporo tipura asekea reamo kairaka, tipura ape kakarua tetane kakaro kesapo. Kekea tetā purapaka tetakara iramo korakea tanemaka taposapo.

²⁵ Arirakano ere tipiamo, Porepe Saerase tetapō kurikuriraka Kotiaki kekereraka kesarakano, aporo metakira tipura kesamo kaikia toapo.²⁶ Arirakano foakayia momani

† 16:10: Ruki soko iyaki hakásá pusuapo.

kára peraka, tipura ape ira porosa mahohosapo. Momanimo ape mahohorakano, ikia koroane hemakapukua ropakapusuapo. Aporo su tipura kesane korakea soko hokonoa soko senemo taposane hemakapukua potakahehesapo. ²⁷ Arirakano aporo tipura asekeea reamo turikia puraka aseane ikia koro ropakapusekeno asesapo. Asekeea ipi hemakapuraka, “Aporo tipura kesane tonopureapo,” aíyaka hemakapuraka ipi yia kareako ferepe masapo. ²⁸ Ferepe marakano Poremo sakepamo wáraka, “Ní yia kareakopo. Isu su yia risikinapo.”

²⁹ Airakano aporo tipura asekeea reamo wáraka, “Nafa maka peae,” aíyaka wárakan, nafa maka foaka pukua, Porepe Saerase tetā risia pukua, namoraka hamisisiraka kakuna porokoa kayapo. ³⁰ Kaina takahikia, Porepe Saerase tetā karikia tipura ape metakarikia wakasema pukua someraka, “Kotimo ano mafasiasimo nōmo yakapa rakiakosare?”

³¹ Airakano tetapō someraka, “Unihae Yasuaki himu hakásaraka hemakapukua rekeanie. Himu hakásaraka rekeno, Kotimo né mafasiakosapo. Ní hinamo soko, ní hokosa soko, ní apea aporo metakira hakāsa risiane soko, su mafasiakosapo.” ³² Aíyaka eaki soko, ipi apea aporo metakira hakāsa risiaki soko, tetapō Unihae Yasumo someane some kasapo. ³³ Some karakano, ere hakásá yiamo tetā matia rusuane, aporo tipura asekeea reamo hokeraka kususapo. Aporo tipura asekeea reane soko, ipi hinamo soko, ipi hokosa soko, i suane hea tapukumurirakano, ³⁴ ipu Kotiaki himu hakásaraka risike himumo sesesapo. Porepe Saerase tetā ipi apea karikia pukua tetāki makata nakosa kasapo. ³⁵ Arirakano mituru aporo terakaiyamosaki maropona aporomo someraka, “Né tipura apea pusie. Pukua aporo tetá tipura kesane tonotaerasie, aihoanie.” Airakano aporo terakaiyamosa pukua, aporo tipura asekeea reaki maropona aporoamo someaka maresane somesapo. ³⁶ Somerakano, Poreaki aporo tipura asekeea reamo someraka, “Teto maropona aporomo tonotaerasie, airakasapo. Aisasamo teto metakarikia puane siahoasireapo. Teto auaraka pusie.”

³⁷ Airakano Poremo someraka, “Etapo makata watikiaka rakisiafapo. Rakianafonosa nine, repo etapo someane kairafaraka, eto wate foaka rurakasupo. Aporo suamo asekeasimo maropona aporomo eto rusierakasupo. Rukua eto tipura kerakasupo. Asiāne eto Rome aporopo. Repo Rome aporoaki ayíáka ayiakafunufareapo. Yumo eto tau tonotaerakanaporakae. Wae. Eto pukusafapo. Maropona aporomo ipu namina eto tonotaehoko peaniehoanie.”

³⁸ Airakano aporo terakaiyamosamo paripuraka, Poremo somesane maropona aporoaki some kasapo. Some karakano, maropona aporomo kaiyiáne, aporo tetá tipura kesane Rome aporoporakano kairaka, i namina namosapo. ³⁹ Ayíáka i tipura apea pukua pauraka, auaraka someraka, “Isiapo teto hasaka rukua tipura kesapo,” aíyaka tetā karikia, tipura ape metakarikia pukua someraka, “Firipai taone one metakarikia pusie.”

⁴⁰ Airakano tetā tipura apeane metakarikia, Ritiamo apea puraka, á Keresoa paosa aporo maeane aseraka someraka, “Kotiane hemakapuraka paroaka risikianie.” Aíyaka Porepe Saerase tetapō Firipai taoneane metakarikia pusuapo.

17

Tesaronaeka taonea Pore pusuane oyapo.

¹ Poreane aporo metakirayaki hakāsa puraka, Amifiporisi taoneane soko marokeraka pukua, Aporonia taoneane soko marokeraka pukua, Tesaronaeka taonea pausapo. Tesaronaeka taonea Yu aporomo sarimana ape kisia rekeno, ² á Pore pusuapo. Sarimana apea e pukuanasamo pusuapo. Pukua fenena maiya amo, Kotimo sawi menoraka Yu aporoaki some kasapo. Fenena maiya yape isiamon pukua some karaka, ³ Kotimo some popasane some kepoane Poremo iaki someraka, “Wate fana Kotimo someraka, ‘Aporomanoane Keresomo mafasiakosapo. Mafasikia ipi himu nekea kurakano, nōmo maturikia taehokosapo.’ Aíyaka Kotimo ayiakakosapo aisane yasiapo. Yasuane nōmo somerakane, ipi aporo unihaeaka rekeasimo makáraraka maresasamo, ipi Keresopo.”

⁴ Airakano Tesaronaeka aporo metakiramo some ane kakimaka, Porepe Saerase tetāyaki

paosapo. Arirakano Kiriki aporo yakai Kotiaki kekerena aporomo soko some ane kakimaka, tetāyaki paosapo. Arirakano hinamo yakai fanaraka toamo soko some ane kakimaka paosapo.

⁵ Paosasamo Yu aporo kakimakanafonosa aporoamo iaki kakanakesapo. Arirakano kakanakesa aporoamo Porepe Saerase tetāne mokoatikihoko hemakapusuapo. Asiamo aporo metakira kau hisiraka risike, watikiaka risia aporoane ipu weasimo kirimasapo. Kirimaraka aporoane su karikia sarimaraka, aporo suamo saperaka weasimo karikia taripe pukua, Porepe Saerase tetā waseremokoakosakipoko Yásoneemo apea kope pesapo. ⁶ Peraka aseane, Porepe Saerase tetā fasakeno asekea, ipu Yásone soko, Keresoa paosa aporo mae metakira soko, i waseremosapo. Waseremokoa, kamani aporomo apea karikia pukua sakepamo someraka, “Hauaka sua aporo watikiaka risikiasimo Porepe Saerase tetapō hasaka some karakasupakae. Kawe yumo soko, ape wo, yaiya hasaka somehoko perakasupo.

⁷ Perakano, Yásonemo tetāne karikia pukua, ipi apea waka risiapo. Yásone soko, Pore soko, Saerase soko, Keresoa paosa aporo suamo soko, kamani unihae Sisamo somemanane ipu koaretaeraka someraka, ‘Isiapo isina unihae kakaro kárane meta rekenapo. Ipi yano motosane Yasupo, airakasupo.’” ⁸ Airakano ape aporo suamo soko, kamani aporomo soko, kairaka mokome takahikia sapesapo. ⁹ Arirakano Yásoneaki soko, Keresoa paosa aporo iaki soko, kamani aporomo someraka, “Mone kakanie. Mone karakanone, re metakariakosapo.” Aíyaka mone karakano, iane metakarisiapo.

Perea taonea Porepe Saerase tetapō rakisiane oyapo.

¹⁰ Ereamo Porepe Saerase tetāki Keresoa paosa aporo suamo someraka, “Teto Perea taonea foaka pusie.” Airakano tetā pukua, Perea taonea pauraka, Yu aporomo sarimana apea pusuapo. ¹¹ Sarimana apea yorokoa, Kotimo someane some kasapo. Arirakano Perea aporoane Tesaronaeka aporo risira ayiáka i risiafapo. Perea aporoamo Poremo someane seseaka kaisiapo. Kaikia sere suamo Poremo someane kakaro somerakarihoamo, ipu Kotimo sawia kokoa menosapo. Menoraka Kotimo sawia popasane soko, Poremo some kasane soko, hakása yiyare, aíyaka hemakapukua, Kotimo sawia kokoa menosapo. ¹² Arirakano aporo yakaimo Poremo someane kakimasapo. Metakira Kiriki hinamo fanaraka toamo soko, metakira Kiriki aporo yakaimo soko, some ane kakimasapo.

¹³ Arirakano Yu aporo Tesaronaeka taonea risiamo kaiyiáne Perea taonea, Poremo Kotimo someane some kasaporakano kaisiapo. Kaikia i Perea taonea peraka Perea aporo suamo Poreaki sapehoasimo, ipu Perea aporoaki kirimaraka Poreane hokoresapo. ¹⁴ Hokorerakano Keresoa paosa aporo metakiramo Poreaki someraka, “Né, yumo he tawara fea pusie.” Airakano aporo metakira Pore karikia pusuakipoko, Saerasepe Timoti tetā Perea taonea parisapo. ¹⁵ Parirakano aporo metakira Poreyaki Atenese taonea pusuapo. Pore Atenese taonea reke, aporo metakira karikia pesaki epo someraka, “Re Perea taonea poparipuraka, Saerasepe Timoti tetā Perea taone metakarikia, anoyaki hakása risikiakosakipoko, wate foaka Atenese taone wo pusiehoanie.” Airakano aporomo Pore karikia pesane Perea taonea poparipuraka, Saerasepe Timoti tetā Poremo someaka maresane somesapo.

Atenese taonea Pore reane oyapo.

¹⁶ Atenese taonea Saerasepe Timoti tetā peasimo Pore kau kayapo. Kau kake aseane, aporomo kotafe kotiane hokonomo rakisia makatane mukisekeno asesapo. Aporoamo namina hokonomo rakisia makataki kekerenapo. Arirakano Poremo asekea, ipi himu nekea kára mahisisapo. ¹⁷ Asiamo Yu aporomo sarimana apea Pore pukua, Yu aporomo soko, Kiriki aporomo soko, ipu kakaro Kotiaki kekerena aporoaki Poremo Yasuane some kasapo. Arirakano maiya suamo hauaka moroa e peraka aseane, aporo meraruamo perakano aporo iaki soko Yasuane some kasapo.

¹⁸ Arirakano Epikúrianea* paosa tisa aporoane soko, Sitoíkia paosa tisa aporoane soko, ipu Poremo some karakano kaikia someraka, “Epo some koaka marekea somerakae.” Airakano Yasu kusua maturikia taesane Poremo somesasamo ipu metakiramo someraka, “Hauaka meta a aporomo Kotiaki kekererane† epo somerakae,” aisapo.

¹⁹ Arirakano Areopakase apea aporomo me rukua sarimaraka risiakipoko Pore karikia pusuapo. Karikia pukua ipu Poreaki someraka, “Nómo someane some kawereapo. Isiapo kaiyako somerasie. ²⁰ Someane hakureapo. Isiapo kumuku kairakaripo. Some kepoane isiapo kaiyako somesie.” Aisapo. ²¹ Arirakano maiya suamo Atenese aporomo soko aporo kimisi pesamo soko makata kaweane kaikia somehoko seseaka sarimaraka me rusuapo.

²² Arirakano Areopakase apea‡ aporo sarimaraka risiakipoko, Pore iyaki hakása hikumisi nenemea reke someraka, “Atenese aporo reo. Repo kotafe kotiaki kekereraka hemakapurakano nōmo asesapo. ²³ Repo taonea ikia kara ano koraka reke aseane, makata meta isiapo kárane oyapo, aihokosakipoko aporomo hokonomo rakisiane repo kekererakano, nōmo asesapo. Aseane eke kima makata meta makárasa aki makata yaku paikia kakako, eke kima rakisiane nōmo asesapo. Eke kima hakása meta aporo metamo poparaka, ‘Isiapo unihae kárane meta rekenapakano kaiyanafonosasamo, eke kima one rakisiapo.’ Aiyaka popasane nōmo asesapo. Makata kaiyanafonosa repo kekeresa kepoane, nōmo reaki somerakanapo.

²⁴ Ti yapurane soko, hauaka kára one soko, makata su arisiane soko, Kotimo rakikia ipi unihaeaka asekea rekenapo. Aporomo ape kisia a ipi rekenafapo. ²⁵ Epo makata su aporoaki kaka, hitafe rerane soko, himuhane soko, makatane su, epo aporoaki karápo. Kaka, ipi fesenoraka rekeanafonosasamo aporomanomo hokonomo rakikia eaki karáfapo. ²⁶ Arirakano wate fana Kotimo aporo hakása rakisiapo. Rakisia aporo hakása amo wainepe pukua, hauaka parakuraka, hauaka meta aporo metakira pukua, hauaka meta aporo metakira pukua, ayíaka hauaka sua pusuapo. Ayíaka pusimo Kotimo maresapo. Namina hauaka risikiasimo hauakane Kotimo enonoraka maresapo. Namina risikiakosa maiya ane soko Kotimo maresapo. ²⁷ Ayíaka maresane, aporomo eane kokoa, e ipiane hemakapusimo maresapo. Asiasamo Kotiane isu makeraka rekenapo. ²⁸ Arirakano repo aporo sawi popanamo poparaka, ‘E aeyaka hitafe risirane soko koraka torane soko isuaki karakano isu hitafe risike makata rakirapo.’ Aiyaka poparaka, repo aporo sawi popana metamo someraka, ‘Ipi hokosane isupo,’ aiyaka somesapo.

²⁹ Arirakano isu Kotimo hokosasamo isiapo hokonomo koti pariaka rakirafapo. Korótomo soko metao siufamo soko metao ekemo soko metao koti pariaka rakisia makataki hemakapurane hasaka hemakapurakanapo. Aporomo hokonomo murikimaka rakisiane koti ayíaka rekenafapo. ³⁰ Arirakano fana aporomo himeteraka risia maiyane Kotimo asekepayasapo. Yumo aporo suaki Kotimo someraka, ‘Makata watikisa metakarikia rukupateraka, anoaki risikiako parihoanie.’ ³¹ Aiyaka keseke aporo hinamo hauaka sua risiane Kotimo parakuhokosapo. Parakuhokosa maiya ane Kotimo maresapo. Aporo hinamo ereketaeraka parakuhoasimo aporo hakása meta Kotimo murikimasapo. Aporo hinamo suamo kakaroripo aihoasimo, Kotimo murikimasa aporoane kusua maturikia taesapo.”

³² Aiyaka Poremo somerakano, Atenese aporomo kaiyiáne aporo kusua maturikia taesapakano kaikia, aporo metakiramo mainamaresapo. Arirakano aporo metakiramo someraka, “Some ane isiapo efera hunia kaiyako seserakanapo.” ³³ Airakano i sari-masane Poremo metakarikia pusuapo. ³⁴ Purakano aporo metakira Pore patera asekea Yasuaki risikiako parisapo. Arirakano Areopakase apea aporo sarimasa a aporo meta yano motosa Taianísiasemo soko, arirakano meta, hinamo yano motosa Tamárisimo soko, arirakano aporo metakiramo soko, someane kakimaka Yasuaki risikiako parisapo.

* 17:18: Atenese taonea aporo tetamo hauaka wo makata kára enomasa risiapo. Meta yano motosa Epikúriane, arirakano meta yano motosa Sitoíkipo. Asiamo tetapō Atenese aporoaki tetapō hemakapusuane sukurusapo.

† 17:18: Atenese aporomo kakaro Kotiaki kekeresafapo. Ipu kotafe koti yatafu asiaki kekeresafapo. ‡ 17:22: Areopakase apeane Kiriki aporomo sarimana apepo.

18

Korini taonea Poremo makata rakisiane oyapo.

¹ Wakasema nina Poremo Atenese taoneane metakarikia, Korini taonea pusuapo. ² Korini taonea Yu aporo yano motosa Akuwírane Poremo asesapo. Akuwíra ipi takapesa hauaka, Pónetase hauakane metakarikia, Itari hauaka pusuapo. Puraka kamani unihae Korótiasemo someraka, “Yu aporo su Rome sitia risiane metakarikia pusie.” Airakano Akuwíra soko ipi asea Pirisíra soko Itari* hauaka metakarikia, Korini taonea pesapo. Arirakano Pore Korini taonea pekea tetā aseako pusuapo. ³ Tetapō makata rakirane farae ape irinapo. Arirakano Poremo soko makata rakirane farae ape iriraka rakirasamo, tetāyaki hakāsa rakiraka, tetapō apea e waka reapo.

⁴ Arirakano fenena maiya suamo Yu aporomo sarimana apea Pore pukua, Yu aporomo soko, Kiriki aporomo soko, ipu namina Yasuane hemakapusimo Poremo some kasapo. ⁵ Some karaka risiakipoko, Saerasepe Timoti tetā Masetónia hauaka anakā perakano soko, maiya suamo Poremo himu hakásaraka reke, Kotimo someane hákasa some kasapo. Some karaka Yu aporoaki someraka, “Yasu ipi aporo unihaeaka rekeasimo Kotimo makáraraka maresasamo, ipi yano motosa Keresopo.” ⁶ Aiyaka Poremo somehoane, Yu aporomo waeraka, Poreane mahokoparirakano Poremo mahisiraka i metakari-akosane, tariako, epo pasu kokotonomo marereraka someraka, “Re Yasuaki risikiako parihoaanafonorakano repo namina menapo. Asiamo re hasakarakano repo namina yiamo ayiakakosapo. Kepoane anofapo. Asiamo yumo Yu aporo hoanafonosaki Kotimo someane nōmo some kakakosapo.”

⁷ Aiyaka someaka iane metakarikia, Yu aporo hoanafonosane Títiae Yásatasemo Kotiaki kekereraka rekeno ipi apea pusuapo. Ipi apeane Yu aporomo sarimana ape kisiakipoko ape kaua makeraka yia reapo. ⁸ Arirakano Yu aporomo sarimana ape asekea rea aporo yano motosa Kirísipase ipi Unihae Kotimo someane kakimaka, Unihae Yasuaki rekeako parisapo. Ipi asea soko, ipi hokosa soko, ipi apea hakasa risiane soko, i suane Yasuaki risikiako parisapo. Arirakano Korini aporo metakiramo soko some ane kaikia kakimarakano, i hea tapukumurisiapo.

⁹ Arirakano ereamo Poremo kitusapo. Kituamo eaki Unihae Kotimo someraka, “Namohokopo. Nōmo someane mapiraraka some kakanie. Metakariakopo. ¹⁰ Ano neyaki rekenapo. Ne aporo metamo mokoatikihokosafapo. Ape wo aporo hinamo yakaimo ano patera asekea risikinapo.” ¹¹ Airakano Pore turikia pukua reke, keremisi hakása faraka, keremisi metane ere maiya namasu amo Korini taonea reke, Kotimo someane aporo hinamoaki some kasapo.

¹² Arirakano keseke Akaía† hauaka á kamani aporo Kario unihaeaka asekea reapo. Kario unihaeaka asekea rea maiya amo, Yu aporo sarimaraka Pore waseremaka, hukurura apea karikia pusuapo. ¹³ Karikia pukua Karioaki ipu someraka, “Isiapo somemanane aporo amo rukupateraka metakarikia, Kotiaki kekerehoasimo some haku paroaka some karakanapo.”

¹⁴ Airakano Poremo somehokosapoko asiane Kariomo Yu aporoaki someraka, “Yu aporo reo. Aporo amo watikiaka rakirane soko metao, wekea aporo rurane soko metao, repo asekea anoaki somerakano nōmo kaiyiáfunureapo. ¹⁵ Kaiyiáfunusa nine repo some haku karakasane, yano motosa nōmo kaiyiánafonosasamo repo somemanane nōmo mawaroakosafapo. Repo namina mawaroako pusie.” ¹⁶ Aiyaka wakapuaka pusierakano ¹⁷ aporo su pukua hauaka moroa, Yu aporomo sarimana ape asekea rea aporo Sosotenesse waseremasapo. Waseremaka, eane hukurura apeane makeraka rusuapo. Rurakano Kariomo asekepayasapo.

Anitioke taonea Pore paripusuane oyapo.

¹⁸ Korini taonea Keresoa paosa aporo maeyaki Pore wakasema reapo. Nina Poreane pukusakipoko iaki ayapasapo. Ayaparaka i metakarikia Pirisfrape Akuwíra tetā

* 18:2: Rome siti Itari hauaka á kisiapo. † 18:12: Akaía hauaka á Kiriki aporo risiapo.

Poreyaki hakāsa pukua, Siria hauaka pukusakipoko, kasu sipia ripaka pusuapo. Pukua Senekiria taonea pauraka, Poremo Kotiaki kekereraka makata someaka maraka ipi uni iti enomosapo. Enomokoa efera hunia i kasu sipia ripaka pusuapo. ¹⁹ Pukua Efesase taonea pauraka, taonea Pirisírape Akuwíra tetāne taone yia metakarisiapo. Metakarikia Yu aporomo sarimana apea hikia Yu aporomo kakimakasimo kára some-sapo. ²⁰ Somerakano, Yu aporoamo someraka, “Isuyaki maiya káramo rekeanie.” Airakano Poremo someraka, “Wae. ²¹ Keseke Kotimo aorakano ano paripeakosapo.” Aíyaka ayaparaka, Efesase taoneane metakarikia kasu sipia ripasapo.

²² Ripaka pukua Sisaría taonea fosapo. Fokoa aeyaka Yarusarame sitia hikia Yasu Keresoa paosa aporo hinamoaki some kasapo. Some kaka faraka, Yarusarame sitiāne metakarikia Anitioke taonea pusuapo. ²³ Pukua wakasema nina taoneane metakarikia, Karesia hauaka a soko Firísia hauaka a soko hikia, Yasuaki patera asesa aporo hinamoaki someraka, “Yasu Keresoaki himu hakásaraka hemakapukua eaki himu paroaka risikianie.” Aíyaka Poremo somesapo.

Efesase taonea Apórose reane oyapo.

²⁴ Yu aporo meta yano motosa Apórose ipi taone Aresátia taoneane metakarikia, Efesase taonea pesapo. Arirakano Apórosemo Kotimo sawiane menoraka, koteaka hemakapukua mapirarako some kasapo. ²⁵ Arirakano Unihae Yasumo ikia karane aporo metamo e tarikia sukururakano, epo enomaka, Yasuane aporo suamo hemakapusimo seseaka some kasapo. Yasuane hasaka some kasafapo. Asiāne hea tapukumarera ane ipi Yonemo hea tapukumaresane hákasa kaikia hemakapusuapo. ²⁶ Arirakano Yu aporomo sarimana apea Apórosemo mapirarako some kasapo. Some karakano, Pirisírape Akuwíra tetapō kaikia, e karikia tetapō apea pukua, Unihae Kotimo some kaiyiánafonosane eaki some kasapo.

²⁷ Arirakano Akaía hauaka Apórose puko seserakano Efesase taonea Yasuaki patera asesa aporo mae risiamo aoraka pusiesapo. Aíyaka Akaía hauaka Keresoa paosa aporo risiaki ipu sawi poparaka, “Apóroseane repo apea karikia pukua e ararehoanie.” Aíyaka Apóroseane ararehoasimo popasapo. Sawi popasane Apórosemo maka, Akaía hauaka pusuapo. Pukua e á reke Kotimo eane yaku araresasamo, aporo hinamo metakiramo Yasumo someane kakimasapo. Kakimara aporo hinamoane Apórosemo araresapo. ²⁸ Asiamo Yu aporoyaki Apórosemo me rukua iaki someraka, ipu hasaka hemakapusuane maroporakano, ipu Apóroseaki some paripesafapo. Asiamo Kotimo sawia popasa kepoane tarikia someraka, “Mafasira aporo Kotimo murikimasane ipi Yasupo,” aíyaka Apórosemo some kasapo.

19

Efesase taonea Pore reane oyapo.

¹ Korini taonea Apórose rea maiya amo, Pore hauaka ikia pukua Efesase taonea pausapo. Pauraka, taonea Yasuaki patera asesa aporo hinamo risiane epo asesapo.

² Aseraka, iaki Poremo akai kairaka, “Re Yasuaki risikiako parisa maiya amo, re himua Ho Kotesa pesare?” Airakano ipu someraka, “Wae. Ho Kotesane isiapo himeteraka kaisiafapo.”

³ Airakano Poremo efera hunia akai kairaka, “Re hea tapukumurisia maiya amo, repo some yakapa kakimasare?” Airakano ipu someraka, “Yonemo someane isiapo kakimarakano, isu hea tapukumurisiapo.” ⁴ Airakano Poremo someraka, “Yonemo Isiraya aporoaki somesane oyapo. Repo himu watikisa metakarikia rukupatehoanie. Ano patera aporo hakāsa meta yano motosa Yasu peakosapo. Yasuaki himu hakásaraka hemakapukua risikianie.”

⁵ Aíyaka Yonemo somesane Poremo iaki some karakano, ipu kaikia Unihae Yasumo yano motosane yano horakano, i hea tapukumurisiapo. ⁶ Hea tapukumurirakano, iane Poremo hokonomo sakaihoane, i himua Ho Kotesa pesapo. Ho Kotesa pesa maiya amo, ipu me kekepo kaiyiánafonoraka risiane, me kekepoane somesapo. Arirakano iaki

Kotimo some meta soko somerakano, ipu kaikia somesapo. ⁷ Arirakano aporoane namina kenosu risiapo.

⁸ Arirakano ere maiya isiamo Yu aporomo sarimana apea Pore pukua iaki some karaka, “Koti uyáka unihaeaka rekenapo.” Aíyaka Poremo mapiraraka iaki some kasapo. ⁹ Some karakano, aporo metakiramo koaretaeraka paroaka someraka, “Someane isiapo kakimakosafapo. Unihae Yasumo ikia karane watikirareapo.” Aíyaka aporo suamo kaiyisimo ipu kakama somerakano, Yu aporomo sarimana apeane Pore metakarikia pukua, Yasuaki patera asesa aporo hinamo karikia puraka, maiya suamo Tiránasemo apea some kaka me rusuapo. ¹⁰ Keremisi tetámo Poremo some karaka reapo. Asiamo Esea hauaka Yu aporo soko, Kiriki aporo soko, aporo su risiaki Unihae Yasumo someane Poremo some karakano, ipu suamo kaisiapo.

Sífamo hokosamo rakisiane oyapo.

¹¹ Arirakano Kotimo wakapumo hemakapukua rakira kárane Pore hokono aeyaka Kotimo rakisiapo. ¹² Arirakano pasu hakesopo soko, pasu tawero soko, Poremo sakaisane aporo metakiramo mokoa pukua, aporo makata tasane warisiakipoko pasu mokoa puraka, aporo makata tasane mafásapo. Yatafumo aporo ho mosane soko metakarikia pusuapo.

¹³ Arirakano Yu aporo metakira ape meta pukua, ape a yatafumo aporo ho morakano, yatafu pusimo hokoaseraka makata kamuraka rakipe pusuapo. Rakipe puraka, Yu aporoamo Yasuaki himu hakásaraka hemakapunafonoraka, ipu hemakapuraka, “Nena murikimaka Unihae Yasu yano hokoaserakapo. Yasu yano hoane aporoane mafahoanarakapo.” Aíyaka ipu hemakapukua yatafuaki someraka, “Yasuane Poremo some karakano asekea, isiapo Yasu yano horakanapo. Yasu yano hokoa yatafu né metakarikia pusie,” aisapo. ¹⁴ Arirakano Yu aporo pirisiti aporo fanane meta yano motosa Sífapo. Ipi aporo hokosa yatipinusumo ayíáka Yasu yano motosane nenakamaka yano hokoa, yatafuaki someraka, “Né metakarikia pusie.” ¹⁵ Airakano yatafumo someraka, “Yasu nōmo hemakapurakaripo. Pore soko nōmo hemakapurakaripo. Arirakano re aporo epare? Re nōmo mahimeteripo.” ¹⁶ Airakano aporo yatipinu suane aporo yatafumo ho masamo rukumokoasuraka, ipu pasuane horomosapo. Horomorakano i apeane metakarikia patera yase tekatarikia pusuapo. Arirakano i kauane pipirukuraka tekatarikia pusuapo. ¹⁷ Tekatarikia pusuaporakano Efesase taonea Yu aporomo soko, Kiriki aporomo soko, ipu suamo kaisiapo. Ipu suamo kairaka, namoraka, Yasumo yano motosa kakaro káraro, aíyaka hemakapusuapo.

¹⁸ Arirakano Yasumo kakimara aporo hinamo yakai peraka aporo suamo kaiyisimo makata watikiaka rakisiane hufitaesapo.* ¹⁹ Arirakano sawia ira hamí rura popasane soko, kamuna popasane soko, aporo metakiramo mokoa pekeá aporo suamo asekeasimo, ira paisiapo. Arirakano sawi popasa paisiane mone káramo roposapo, asiāne mokoa pekeá ira paisiapo. Siufa mone hae fifiti taosenemo (50,000) sawi roposane ira paisiapo. ²⁰ Asiasamo Unihae Kotimo someane wakapu kárareapo. Maiya suamo Kotimo someane some karakano, someane wakapusekeno aporo yakaimo kakimasapo.

Efesase aporomo wesane oyapo.

²¹ Makatane fasakipoko keseke Ho Kotesamo Poreaki mahemakapurakano Poremo hemakapuraka, “Ano kimisi pukusapo. Aíyaka ano Masetónia hauaka pukua, Masetónia hauakane marokeraka, Akaíá hauaka pukua, ane soko marokeraka, Yarusarame sitia hikia, á wakasema nina Rome sitia hiakosapo.” Aíyaka hemakapukua ²² Timotipe Erásatase tetapó e ararerakano, tetáki epo someraka, “Teto fana Masetónia hauaka pusie,” aíyaka e Esea hauaka á fore pariraka yia wakasema waka reapo.

* 19:18: Ira hamí rurane soko, kamunane soko, ho pairane soko, makata ayíáka rakirane su hufitaesapo.

²³ Maiya amo aporo yakaimo Unihae Yasumo someane kakimaka kekemasakipoko, aporo metakiramo saperaka hokoreraka wesahopo.[†] ²⁴ Arirakano aporo meta yano motosa Timítirasemo pisinisi uyáka rakisiapo. Epo siufa maka kurakaya hinamo Átemesemo ape murikimaka ape fete rakisiapo.[‡] Makata rakisiane epo roporaka, mone kára mosapo. Ipi aporo raipamo soko mone kára mosapo. ²⁵ Asiamo ipi aporo raipaki Timítirasemo peaesapo. Arirakano aporo metakiramo pisinisi hakása rakira aporoaki peaesapo. I su pekea sarimarakanano, Timítirasemo someraka, “Isiapo pisinisi rakisia aeyaka mone kára morapo. ²⁶ Arirakano yumo Poremo someraka, ‘Makata meta unihae pariaka hokonomo murikimaka rakisiane kakaro kotifapo.’ Aisane aporo yakaimo epo someane kakimarakanapo. Efesase taonea aeyaka soko, Esea hauaka aeyaka soko, aporo suamo epo someane kakimarakanapo. Kakimasapakano repo kairakanapo. Ipu Kotiaki kekererakanano repo aserakanapo. ²⁷ Asiamo aporo hinamomo isiapo ape fete rakisiane ropohoko hisirakanone, isiapo pisinisiune huruperaka fahoanaminapo. Arirakano Esea aporo hinamomo soko, hauaka sua aporo hinamo risiamo soko, Átemeseaki kekererane metakarirakano, Átemesepoko ape kára kisiane nenakamakayia kiraka ayiakacosapo. Atemeseane namo kakaro kárasane mawakasemahoanaminapo.”

²⁸ Aíyaka Timítirasemo somerakanano, aporo suamo kairaka saperaka wáraka, “Efesase aporomo unihaeane Átemese ipipo.” ²⁹ Airakano aporo metakiramo sape meaka kirimaraka, ape aporo suamo weakosakipoko risiapo. Hauaka moroa aporo su foaka sarimaraka, aporo tetá Masetónia hauaka anaka Poreyaki hakása pesane waseremosapo. Aporo tetá waseremosane yano motosa meta Kaíase, arirakano meta Arisítákase tetáne waseremokoa hauaka moroa pusuapo. ³⁰ Waseremokoa purakano Poremo someraka, “I sarimasa hauaka moro tipia ano pukuripo.” Airakano Yasuaki patera asesa aporomo waesapo. ³¹ Arirakano kamani aporomo soko waesapo. Kamani aporomo Pore tati moresasamo eane hemakapukua, Pore rea aporo meta pusiesapo. Pusierakano aporoane Pore rea peraka, kamani aporomo someaka maresane Poreaki wakapuaka someraka, “Né rusua kukohoamo hauaka moroa pukupo,” aisapo.

³² Arirakano hauaka moroa aporo suamo me hakapiraka risiapo. Aporo metakiramo makata haku someaka wáraka, arirakano aporo metakiramo makata haku meta someaka wásapo. Ayíáka wárakanano aporo metakiramo someraka, “Manakano isu wo pesare? Manakano me hakapirakanare? Makata kepo yakapapoko isu sarimasare?” Aíyaka aporo yakaimo mahimeteraka somesapo. ³³ Arirakano Yu aporomo aporo meta Arekesátaki someraka, “Né fanaraka pusie.” Airakano Arekesátame fanaraka pusuapo. Pukua aporo suamo me fahoasimo Arekesátamo ipi hokono rukurakoraka, ³⁴ Yu aporo patera asekeea somehoko seserakanano aporo sarimasamo aseane, Arekesátane Yu aporo reasamo, namina e asekepayaraka efera hunia ipu suamo sakepamo wáraka, “Efesase aporomo unihaeane Átemese ipipo.” Aíyaka maiya hi awa tetámo wáraka someraka risiapo.

³⁵ Wáraka risikino Efesase taone kanisoro kusikusi aporomo i mauasapo. Namina me farakano ipi someraka, “Efesase aporo reo. Átemesemo apeane Efesase aporomo kikia asekeea risikinapo. Ti yapunaka eke yaposa hurupesane repo asekeea risikinapo. Asekeea risiane aporo suamo makatane kairapo. ³⁶ Ekeane isiapo kakaro yaiya asekeea risiane, aporo hakása metamo someraka, ‘Isiapo asekeea risirafapo,’ aihoasifareapo. Asiamo re tau risike wate foaka sapeaka weakopo. ³⁷ Asiamo aporo waseremokoa karikia pesa amo ipu Átemesemo apeane soko mokoatikisafapo. Arirakano Átemeseaki soko tetápō hokomasafapo. ³⁸ Arirakano Timítirasemo soko, ipi písini aporo metakiramo soko, aporo metaki saperaka, hukurukusa maiya murikimasamo maropona aporo rea á karikia pufunureapo. Pukua hukurukusakipoko murikimasa maiya amo hukurufunureapo. ³⁹ Repo sapesane kepo meta yia kakenone, hukurura kepo kaira aporo metakira sari-masakipoko mawaroako punie. ⁴⁰ Pipu isu su sarimaraka saperaka sakepamo wáraka

[†] 19:23: Efesase taonea kurakaya hinamopoko ape kára kikia, apea kurakaya hinamo yano motosa Átemese kekereraka eaki makata yaku kasapo. [‡] 19:24: Ape fete rakisiane aporo hinamomo roporaka namina apea taeraka Átemeseaki kekeresapo.

weakorakasakipoko kamanimo isu hukurunaminapo. Hukururakano isiapo maíyaka somehoanarakapo. Isiapo isina yiamo sapeaka weakosa nine tafahoane siahosifareapo. ⁴¹ Yumo re koakatarikia pusie.” Airakano i sú koakatarikia pusuapo.

20

Pore Kiriki hauaka pusuane oyapo.

¹ Arirakano aporo sarimasane koakatarikia pusuakipoko, Poremo Yasuaki patera asesa aporoaki peaesapo. Perakano Poremo iaki someraka, “Re, Yasuaki paroaka hemakapukua risikianie. Ano Masetónia hauaka purakanapo. Re, ayapa.” Aíyaka marekea, i metakarikia, e Masetónia hauaka pusuapo. ² Hauaka á pukua, some karaka, “Yasuaki hemakapukua paroaka risikianie.” Aíyaka i mapirahoasimo, some kape pusuapo. Pukua, Kiriki hauaka pauraka, ere maiya isiamo á reapo. ³ Nina, Siria hauaka pukusakipoko, epo kaiyiáne, “Yu aporomo ne rukusakipoko someaka masapo.” Airakano kaikia, Siria hauaka pukusane metakarikia, Masetónia hauaka á paripusuapo.

⁴ Arirakano Perea aporo Pírasemo maeya Sópata soko, Tesaronaeka aporo tetá, Arisítakase soko, Sekánatase soko, Tepe aporo Kaíase soko, Timoti soko, arirakano Esea hauaka aeyaka aporo tetá, Tíkikase soko, Torófimase soko, i Poreyaki hakāsa pusuapo.

⁵ Arirakano i fana pukua, Toróase taonea isu peasimo, kau toapo. ⁶ Kau tokeno, isu Firipai taonea toakipoko, Farawa Pirianafonona Hokono Kekefa faraka, soraka, Firipai taoneane metakarikia pukua, kasu sipia ripaka puraka risike, yape kakoreasu kasu sipia waka, Toróase taonea pausapo. Pauraka, namina fana pusuakipoko, isu kesekea pukua pausapo. Pauraka isu isina sokō hakásamo risiapo.

Toróase taonea Poremo some kasane oyapo.

⁷ Yatipinumo ereamo, huturu apea, isu Kereso asipa nako sarimasapo. Sarimaraka, rauaka Pore hiakosakipoko, pipuaka Poremo kára someraka kake yia, ere tipisapo.

⁸ Ape huturuua isu sarimaraka toa, nafa yakai paikia taeraka, Poremo someraka kayapo.

⁹ Someraka kakeno, hokosa raua meta, Yútikaseane, ape winitoa kayapo. Kayane Poremo some haru rumakanafonorakano, Yútikaseane wakako nekeraka kaina, kakaro wasápo. Wasáne ape winito huturu anaka, hauaka atura hurupesapo. Huruperakano, aporo metamo e maka aseraka someraka, “E kureapo.” ¹⁰ Airakano, Pore huturu apea reane metakarikia, inima sosonoraka peraka, aseane hokosa raua hurupesa warekeno asekea, arupekeea ketakamaka someraka, “Repo himu fahokopo. E kusuane yumo hitafeane.”

¹¹ Aíyaka Pore huturu apea hikia, Kereso asipa maka nekea faraka, aporo metakirayaki someraka, tuina, mituru fiarakano i metakarikia e pusuapo. ¹² Arirakano hokosa raua hurupesa kusua, Poremo maturikia taesane, metakiramo aseraka seseraka, ipi apea karikia pusuapo.

Toróase taoneane Poremo metakarikia, Mairítase taonea pusuane oyapo.

¹³ Arirakano isu Toróase taoneane metakarikia, kasu sipia ripaka, Ásose taonea pusuapo. Asiane Poremo ipi hemakapusua anaka Toróase taoneane metakarikia, hauaka ikia korakemo pukua Ásose taonea isu sapenesapo. ¹⁴ Isu sapenekea kasu sipia ripasapo. Riparaka isu pukua, Mitiríni taonea pukua pausapo. ¹⁵ Mitiríni taoneane metakarikia, kasu yia waka, mituru fiarakano pukua, Kaíose he tono makea pukua, pauraka, waka, mituru fiarakano pukua, Sémose he tono pauraka, á soko waka, mituru fiarakano, pukua, Mairítase taonea pausapo. ¹⁶ Arirakano Poremo hemakapuraka, “Esea hauaka maiya káramo warapaka, kasu sipimo Efesase taoneane metakarikia koaraka pukusapo. Pukua, maiya siasekeno Yarusarame sitia Penekose Hokono Keakosakipoko foaka hiakosapo,” aíyaka hemakapusuapo.

Efesase taonea, Keresoa paosa aporo asekea risia aporoaki, Poremo ayapasane oyapo.

¹⁷ Mairítase taonea Pore reke, aporo metaki someraka, “Né Efesase taonea pukua, Keresoa paosa aporo asekea risia aporoane, ano rea, pusiehoanie.” Aíyaka marekea i perakano, ¹⁸ Poremo iaki someraka, “Fana ano Esea hauaka peraka, nōmo kepomarekea

rakiraka, maiya káramo reyaki rekeno, nōmo ainane repo asesapo. ¹⁹ Aseraka yia, maiya káramo Yu aporomo nōmo someane rukumosakatapiakosakipoko, ipu tau someaka maka, meauraka, ano mokoatikisapo. Mokoatikirakano yia, makata umisa fasereper-akano, Unihae Yasumo rakirane nōmo rakiraka, ano nī makama fanaraka ayiáka nōmo rakisiafapo. ²⁰ Makata kotesamo re ararehoasimo nōmo some kasapo. Makata kotesane meta nōmo mahamesafapo. Yu aporomo sarimana apea aporo suamo kaiyisimo, nōmo kakama some kasapo. Repo apea soko nōmo some kape pusuapo. Nōmo makata asiane repo hemakapurakanapo. ²¹ Yu aporoaki soko, Yu aporohoaafonosa Kiriki aporoaki soko, nōmo some kasane oyapo. ‘Re himu watikisa metakarikia, Kotiaki risikiako parihoanie. Unihae Yasu Keresoaki himu hakásaraka hemakapukua risikianie.’ Aiyaka nōmo reaki somesapo. ²² Ho Kotesamo anoaki somerakano, nōmo kakimaka, ano yumo Yarusarame sitia hiakosapo. Yarusarame sitia hinaka, anoaki makata ayiakakosane ano himeteripo. ²³ Himeterakano yia, taone sua ano puane, Ho Kotesamo anoaki someraka, ‘Neaki makata watikisa faserepeakosapo. Aporomo né tipura makeakosapo. Arirakano né mokoatikihokosapo.’ Aiyaka Ho Kotesamo anoaki somerapo. ²⁴ Airakano yia, ano nī hitaferaka rekeakosane hákasa makama fanaraka hemakapurakarifapo. Ano kukusireapo, aiyaka nōmo hemakapurakarifapo. Unihae Yasumo anoaki uyáka rakinie, aisane rakikia rosakataehoko hemakapurakaripo. Epo anoaki, ‘Kotimo yaku ararena some kotesane some kakanie.’ Airakano some kotesane hákasa somehoko hemakapurakaripo.

²⁵ Re suaki nōmo someraka, ‘Koti unihaeaka rekenapo.’ Aiyaka somerakano repo kairakanapo. Akaira aporo repo efera hunia ano hikumisi aseakosafapo. ²⁶ Pipu reaki nōmo hokomareako somerakanafapo. Kakaro somerakanapo. Repo aporo hakásá metamo Kotimo someane kakimakanafonorakano nōmenafapo. Namina yiamo ayiakakosapo. ²⁷ Kotimo someaka maresa suane repo kakimakasimo, nōmo reaki mapiraraka some kasapo. Someane mahamesafapo. ²⁸ Namina yiamo koteaka asekea risikianie. Repo Kereso aporo hinamoane asekea risikianie. Repo asekea risikiasimo, Ho Kotesamo re murikimokoa murisiapo. Arirakano Kotimo hokosa Yasumo, Keresoa paosa aporo hinamopoko farimaka kusuapo. Farimaka kusuakipoko, saro sipi wafayamo ipi saro sipi asekea area ayiáka, Yasu Keresoa paosa aporoane repo ayiáka asekea risikianie.

²⁹ Saro wofemo* saro sipi rukua nako apera ayiáka, ano pusuakipoko aporo metakira re arisia peraka, reane mokoatikihokosapo. Aporoamo reane koteaka hemakapusafapo. ³⁰ Arirakano re namina yia, aporo metakiramo ipu namina yano motosane mafanahoko, Keresoa paosa aporo hinamomo iaki patera asekeasimo, kotafe some kakakosapo. ³¹ Ayiakakosasamo, kotafe someane repo kakimarapaka asekeanie. Keremisi isiamo, ano reyaki reke, ereamo soko, sere soko, reaki hakásaraka some kasapo. Repo Yasuaki himu hakásaraka hemakapurane makárahoasimo, reaki nōmo hiripuyaki some kasapo.

³² Arirakano ano pusuakipoko, Kotimo re asekea rekeasimo, nōmo kurikurirakanapo. Kotimo yaku ararena some amo, re mapiraraka paroaka risikiasimo ararenapo. Aporo makata watikisa kikisiraka, koteaka susu rakira aporo akiyaki, re paoraka risikiasimo, Kotimo yaku ararena someamo sia asekea rekeakosapo. Asiamo Kotimo yaku ararena someamo re ararehoasimoripo. ³³ Arirakano repo moneane soko, pasuane soko, nōmo aseraka, ano makaripi, aiyaka hemakapusufapo. ³⁴ Nōmo nī makata rakikia, mone mokoa siaraka reapo. Anoyaki aporo pesane soko, siaraka risikiasimo, nōmo hokonomo rakisiafapo. Rakirakano repo asesapo. ³⁵ Arirakano aporo makata forosane ararehoko, maiya suamo makata rakira ane nōmo rakisiafapo. Repo ayiáka arareraka rakisimo, nōmo reaki tariraka, nōmo rakirakasu ayapo. Unihae Yasumo someraka, ‘Makata mokoakosane, maiya suamo hemakapukua risikiakopo. Makata kakakosane, hemakapukua risikianie. Aiyaka risikinone, namo kakaro seseaka risikiakosapo.’ Aiyaka Yasumo somesane hemakapunie.”

* 20:29: Saro wofeane yákasa asíapo.

³⁶ Aíyaka Poremo some kaka faraka, iyaki kakuna porokoa kake kurikurisapo. ³⁷ Kurikuriraka farakano, aporo suamo hihiripuyaki mokonuraka ayapasapo. ³⁸ Ipu namina hemakapuane Poremo someraka, “Efera hunia repo ano hikumisi aseakosafapo.” Airakano ipu kamenakaraka himu nesapo. Ayíáka marekea kasu sipi humaresa á Pore ripakasimo karikia pusuapo.

21

Yarusarame sitia hiakosakipoko kasu sipia ripasane oyapo.

¹ Efesase taonea Keresoa paosa aporo asekea risia aporoaki isiaipo ayapasapo. Aíyaka isu kasu sipia ripaka pusuapo. Puraka he numu tipi aeyaka teraporaka pusuapo. Pukua Kóse he tonoa pesapo. A waka, mituru pukua, Róse he tonoa pesapo. A waka, mituru pukua, Patára taonea pesapo. ² A waka, mituru Finísia hauaka pukusakipoko, kasu sipi meta ripaka pusuapo. ³ Pukua, Saéparase he tono aseraka, fe taku aeyaka koaraka pukua, Siria hauaka pekea, Taia taonea kasu hukumaresapo. Hukumareane Taia taonea makata fato kasua ripasane, he fea aporo raipamo fokotaerakano, isu kasu metakarikia pusuapo. ⁴ Pukua Yasuaki patera asesa aporo Taia taonea risiane, isiaipo kokoa aseraka, sokó hakásamo iyaki risiapo. Risiane Ho Kotesamo iaki somerakano, ipu Poreaki someraka, “Né rusua kukohoamo, Yarusarame sitia hiakopo,” aisapo.

⁵ Ayíáka sokó hakása farakano, isu kasu matapea poparipukua, isuyaki, Yasuaki patera asesa aporo soko, namina hinamo soko, namina hokosa soko, su namina apeane metakarikia, isina hakása pekea, kasu matapea kakuna porokoa toke, Kotiaki kurikurisapo. Kurikuriraka faraka rumaraka ayaparaka, ⁶ namina apea poparipurakano, isu kasu sipia ripaka, ⁷ Taia taoneane metakarikia pukua, Toremése taonea pausapo. Pauraka kasu sipiane metakarikia, Toremése taonea Keresoa paosa aporo maeane isiaipo aseraka, ere hakásamo iyaki hakása wasápo.

⁸ Waka mituru Toremése taoneane metakarikia, pukua Sisaría taonea pausapo. Taone a Kotimo some kape pura aporo Firipimo apea pukua waka risiapo. Fana Yarusarame sitia aporo yatipinusumo makata nakosa parakuhoasimo murikimosane, meta Firipi ipipo.

⁹ Ipi faraya kitafasu aporomo arumokoanafonosa toapo. Hinamoane porofete hinamopo. Kotimo ipi someane i himua mahemakapurakano ipu kaikia, aporo hinamoaki some karápo.

¹⁰ Arirakano sere yakaimo isu risiakipoko, Yutía hauaka anaka porofete aporo yano motosa Ákapase perakasupo. ¹¹ Isu risiakipoko Ákapase pekea, Poremo saro kau terakaean tumaka, Pore korakea soko, hokona soko, saro kau terakaemo taporaka someraka, “Ho Kotesamo someane oyapo. Poreane ipi saro kau terakaemo nōmo taposa ayíáka, Yu aporomo ayíáka, Poreane taporakosapo. Taporaka Yu aporomoanafonosamo e tipura makeasimo, Yu aporomo karikia pukusapo.” Aíyaka Ho Kotesamo somerakano Ákapasemo somesapo.

¹² Aíyaka somerakano, isiaipo soko kaikia, Sisaría aporomo soko kaikia, Poreaki paroaka someraka, “Yarusarame sitia ne hiakopo.” ¹³ Airakano Poremo someraka, “Re marirakano hihiripurakanare? Ano himu nasimo marirakano hihiripurakanare? Unihae Yasupoko ano tipura makeane siahoasireapo. Eane hemakapukua, epoko kuane soko, siahoasireapo.” ¹⁴ Aíyaka isiaipo paroaka somehoane, Poremo ipi hiakosa hákasane hemakapuraka, parihokosa himuane hemakapusuaafapo. Hemakapunafon-rakano asekea, isiaipo someraka, “Unihaemo hemakapusua ayíakakosane siahoasireapo.” Aíyaka isiaipo makata meta somesafapo.

¹⁵ Wakasema risina, makata kemo sarikekea mokoa, Yarusarame sitia hisiapo. ¹⁶ Sisaría taone anaka, Yasuaki patera asesa aporo metakiramo isu karikia hinaka, Yarusarame sitia Saéparase aporo yano motosa Nésonemo, ipi apea waka risikiakosakipoko isu karikia hisiapo. Arirakano ape wafaya Nésone amo, wate fana Yasumo someane kakimasapo.

Yameseane Poremo asesane oyapo.

¹⁷ Arirakano isu Yarusarame sitia perakano Keresoa paosa aporo maemo isu aseraka tereraka, isina hokono mokoa sesesapo. ¹⁸ Seserakano, isu isina hakāsa waka, mituru, Pore soko, isu soko, Yameseane aseako pusuapo. Pukua Keresoa paosa aporo asekea risia aporoane, Yameseyaki risikino asekea, ¹⁹ i sú Poremo hokono mokoa, Poremo iaki makata somesapo. Epo makata rakira suane iaki some kasapo. Yu aporo hoanafonosaki some karaka, epo some aeyaka Kotimo wakapuaka rakisiane Poremo some kasapo. Aíyaka somerakano ²⁰ ipu suamo kaikia Kotiaki kekeresapo. Ipu Poreaki someraka, “Hameo, hauaka wo Yu aporo yakaimo Yasuaki risikiako parisapo. Ipu Mosesemo somemaneane kakaro metakarianafonoraka kekemarakanapo.

²¹ Ipu kaiyiáne, Yu aporo hoanafonosamo hauaka á, Yu aporo pukua risia aporoamo, Mosesemo somemaneane rukupatehoasimo, nómō some kasaporakano ipu kaisiapo. Arirakano aporo hokosa kau hahaeraka patenane metakarisimo, nómō some kasaporakano ipu kaisiapo. Yu aporomo ainane metakarisimo, nómō some kasaporakano ipu kaisiapo. ²² Yu aporo amo neaki saperaka risiasamo isiapo mayiakakosare? Yumo né Yarusarame siti wo pesane ipu kaiyakosapo. ²³ Asiamo isiapo some one nómō kaikia, nómō Yu aporomo ainane uyáka rakinie. Yu aporo kitafasu wo risikinapo. Ipu Kotiyaki someaka makasimo Mosesemo somemane kasane kakimaka, i uni iti enomokoakosapo. ²⁴ Né, iyaki hakāsa Kotimo apea pukua, Kotiaki makata yaku kakanie. Asiamo i uni iti enomokoasimo ipoko piriti aporoaki makata ropoane nómō kakanie. Karakano Yu aporomo aseraka hemakapuraka, ‘Mosesemo somemaneane Poremo metakarisiafapo. Metakariasiapo aisane kotafe hoareapo.’ Aíyaka ipu namina hemakapukusapo.

²⁵ Arirakano Yu aporo hoanafonosamo Yasuaki risikiako parisane iaki isiapo sawi poparaka makesane oyapo. ‘Kotafe koti aporomo hokonomo rakisiaki ipu someraka, “Isiapo unihae kárane oyapo.” Aíyaka someraka makata aki makata kakayia kasane repo nakopo. Arirakano meta, makata kakayia yapi soko nakopo. Arirakano meta, makata kakayia mawia kita humaresa kusuane nakopo. Arirakano meta, hinamo hakimakopo.’ Aíyaka iaki sawi poparaka isiapo makesapo.” Aíyaka Keresoa paosa aporo asekea risia aporomo Poreaki somesapo.

²⁶ Arirakano ere hakásamo waka, aporo kitafasuane Poremo karikia, i namina hakāsa pukua, Kotiaki makata yaku kakasimo pusuapo. Pukua Kotimo apea yorokoa piriti aporoaki epo someraka, “Sere yatipinusu murikimaraka, serea paurakano, ano iyaki pekeia, Kotiaki makata yaku kakakosapo. Kaka faraka Yu aporomo aina ayiáka rakikia makosapo,” aíyaka Poremo somesapo.

Kotimo apea Pore waseremasane oyapo.

²⁷ Sokō hakásá fahoko makeanamo, Yu aporo Esea hauaka anaka pesamo, Kotimo ape ruru kakarua yorokoa á Pore ipu asesapo. Asekea Poreane ipu waseremaraka aporo suamo eaki sapehoasimo ipu topakamaraka someraka, ²⁸ “Isiraya aporo reo, repo ararehoko peae. Aporo omo hauaka sua Yu aporo mawakasemaraka mahokopariraka some karápo. Arirakano Mosesemo somemaneane aporo suamo metakarisimo epo some karápo. Arirakano Kotimo ape wo aporo suamo mawakasemahoasimo epo some karápo. Arirakano Yu aporo hoanafonosane Kotimo ape ruru kakarua yororane yaposapo. Asiáne epo kawe yumo Kotimo ape wo Kiriki aporo karikia ayorora amo epo Kotimo apeane mokoatikirakanapo,” aisapo. ²⁹ Arirakano fana Yu aporo Esea hauaka anaka pesamo aseane, Efesase aporo meta, Yu aporo hoanafonosane yano motosa Torófimaseane Poreyaki hakásá Yarusarame siti hauaka moroa koraka risikino ipu asesapo. Aseraka ipu hemakapuraka, “Kotimo apea Torófimase Poremo karikia perakarihoapo,” Aíyaka ipu hemakapuraka Poreaki spesapo.

³⁰ Aporo suamo saperaka iriraraka risiasamo, aporo su sarimaraka Pore waseremaka, Kotimo ape anaka kikirimaka pusuapo. Kikirimaka pukua, Kotimo ape ikia koroane aporo metamo mapirisiapo. ³¹ Mapirirakano asekea Pore kukusimo hauaka moroa Yu aporomo rusuapo. Rurakano Rome ame aporo satini rea aporo meta pukua, ame

aporo satiniaki someraka, “Yarusarame sitia aporo suamo sakaremokoa wekea haeraka risikinapo.”

³² Airakano ame aporo satini foaka pukua, ame aporo metakira soko, ame aporo koporo metakira soko, eyaki hakāsa aporo weraka risia á foaka pusuapo. I perakano, Yu aporomo aseraka, Pore ruraka risiane metakarisiapo. ³³ Metakarirakano Pore tipura makeakosakipoko ame aporo satinimo someraka, “Aporoane sene tetámo tapohoanie. Aporoane yano motosa epare? Epo masiare?” ³⁴ Airakano aporo metakiramo makata meta someraka wárakano, aporo metakiramo makata meta someaka wárakano, ayiáka suamo kekepo kekepoaka wásapo. Aporo suamo kekepoaka wárakano ame aporo satinimo someraka, “Nōmo kaiyafareapo.” Aíyaka epo someraka, “Ame aporomo apea, aporoane karikia pusie.” Airakano Pore karikia pukua, ³⁵ inima pauraka, aporo suamo saperaka weakorakano Poreane aporomo rukuhoamo, ame aporomo hokonomo rakaremaka pusuapo. ³⁶ Purakano, aporo suamo kekemaraka sakepamo wáraka, “Pore rusua kukunie.”

³⁷ Airakano ame aporoamo Poreane karikia pukua, ipu ape makerakano, ame aporo satiniaki Poremo Kiriki meaka someraka, “Néaki nōmo makata somehoare?” Airakano ame aporo satinimo someraka, “Nōmo Kiriki me somerare? ³⁸ Nōmo hemakapusuane, né Iyipi aporopo, aíyaka hemakapurakaripo. Wakasema fana Iyipi aporoamo aporo yakai fo taosene (4,000) kirimaraka, karikia pukua, namina weako terakaiya mokoa, tare mokoa, poke mokoa, ima yaoa pusuapo. Né aporo ayare? O, ne aporo ayafare?”

³⁹ Airakano Poremo someraka, “Wae. Ano Yu aporopo. Nōmo nī taoneane Tasasepo. Sirísia hauaka á taone kárane Tasase ayapo. Taoneane nōmo taonepo. Aporo suaki nōmo somehoare?” ⁴⁰ Aíyaka ame aporo satinimo aorakano, Pore inima reke, aporo suamo mé fahoasimo Poremo ipi hokono rukurakoraka, suamo mé farakano asekea Poremo Hipuru* meaka somesapo.

22

Poremo kakaro tafaraka somesane oyapo.

¹ Arirakano Poremo ipi kakaro tafaraka someraka, “Maeo, aporo sisima, repo nōmo some one kaisie. Nōmo watikiaka rakisiafapo.” ² Aíyaka Poremo Hipuru meaka somerakano, aporo suamo kaikia, mé faraka tau risiapo. Tau risikino, epo someraka, ³ “Ano Yu aporopo. Ano takapesane Sirísia hauaka, Tasase taonea takapesapo. Takapekeea ano káraraka, ano Yarusarame siti wo sukuruhoko pekea, nōmo tisa Kamériomo ano sukurrakano, nōmo enomasapo. Nōmo makasa kaua kekemamo somemane kepoane, epo ano sukurrakano nōmo enomasapo. Pipu maiya omo, repo Kotiaki patera asera ayiáka, nōmo soko fana Kotiaki ayiáka patera asesapo.* ⁴ Fana, Yasuaki patera asesa aporo hinamoane nōmo mokoatikisapo. Mokoatikiraka metakira rusua kusuapo. Metakira waseremokoa tipura kesapo. ⁵ Arirakano reaki nōmo some one somerakanone, pirisiti aporo fanamo soko, Yu aporo sisima suamo soko, ‘Kakarorakae,’ aihokosapo. Ipu Tamásakase taonea Yu aporo risiaki sawi poparaka, anoaki karakano, Tamásakase taonea, Keresoa paosa aporo hinamoane waseremokoako, ano pusuapo. Pukua, Yarusarame sitia fanasihokosakipoko, senemo taporaka kita humurikia karikia hiakosakipoko, ano Tamásakase taonea pusuapo,” aíyaka Poremo somesapo.

Pore Yasuaki rekeako parisane oyapo.

Tarira Aporo 9:1-19; 26:12-18

⁶ Poremo someraka, “Ano Tamásakase taonea pukua sere maiya tipiamo, Tamásakase taone makeraka pauhoane, wate foaka hepene anaka ano rea makata kára faerakano,

⁷ ano hauaka huruperaka yía, nōmo kaiyáne mémo anoaki someraka, ‘Soreo, Soreo, marirakano nōmo ano mokoatikiranare?’ ⁸ Airakano nōmo someraka, ‘Unihaeo, né

* 21:40: Yu aporomo Hipuru meaka somerapo.

* 22:3: Poreane Yasuaki rekeako parihoasiraka, epo Kotiane hákasa makárasapo. Yasuane hemakapusuafapo.

epare?’ Airakano epo someraka, ‘Nasare aporo Yasuane anopo. Nōmo anoaki mokoat-ikirakanapo.’⁹ Airakano aporo anoyaki hakāsa pesamo faerakano hákasa asesapo. Mémo somerakano ipu koteaka kaisiafapo.¹⁰ Arirakano nōmo someraka, ‘Unihaeo, nōmo yakapa rakiakosare?’ Airakano Unihaeo anoaki someraka, ‘Né takahisie. Takahikia, Tamásakase taonea pusie. Taone a nōmo makata rakisimo aporo metamo néaki somehokosapo.’¹¹ Airakano faesa kárane nōmo asesamo ano hi kakanoraka asesafapo. Asekeanafonorakano, aporo anoyaki hakāsa pesamo ano hokonoa maka, Tamásakase taonea karikia pusuapo.

¹² Arirakano Tamásakase taonea, aporo hakása meta yano motosa Ananáse reapo. Isiapo Yu aporomo somemane epo kakimaka, Yu aporo suamo e aporo kotesaporakano,¹³ ano rea e pekea someraka, ‘Mae Soreo, efera hunia asesie.’ Aihoanine, ano hi faeraka Ananáseane koteaka asesapo.¹⁴ Aserakano epo anoaki someraka, ‘Isiapo makasa kaua kekemamo Koti amo epo hemakapusuane nōmo enomaka kakimakasimo, epo né murikimasapo. Ipi ereketae susu hemakapura aporo Yasuane nōmo asekeasimo epo né murikimasapo. Epo ipi méane kaiyisimo Kotimo né murikimasapo.’¹⁵ Né murikimasamo aporo hinamo suaki nōmo Yasuane asesane soko, kaisiane soko, somehokosapo.¹⁶ Yumo né kau rekeakopo. Takahisie. Takahikia, aporo metamo né hea tapukumareakosapo. Hea tapukumarerakano, nōmo Yasumo wakapuaki himu hakásaraka hemakapunie. Himu hakásaraka hemakapukua kurikurirakano, nōmo himu watikisane epo mafahokosapo.’ Aíyaka Ananásemo somesane yasiapo,’ aíyaka Poremo somesapo.

Yu aporohoanafonosaki Poremo some kakako pusiesane oyapo.

¹⁷ Poremo someraka, “Ano Yarusarame sitia parihisia maiya amo, Kotimo apea yorokoa, kurikuriraka reke, aseane kituamo asera ayiáka Unihae Yasu rekeno asesapo.¹⁸ Aseane epo anoaki someraka, ‘Né Yarusarame sitiane metakarikia foaka pusie. Asiamo nōmo anoane aporoaki some karakano aporoamo kakimakosafapo.’¹⁹ Airakano nōmo someraka, ‘Unihaeo, fana Yu aporomo sarimana ape sua ano pukua, Keresoa paosa aporo hinamoane, tipura kekeia rukua mokoatikisapo.²⁰ Arirakano Sitífene rea maiya amo néane some karakano, aporo metakiramo e rusua kusuapo. Rusua kurakano nōmo “Ao, rusie,” aisapo. Aíyaka marekea reke, Sitífene rusua aporoamo pasu hororaka taesane, nōmo asekea reapo. Ayiáka reane, Yarusarame aporomo kaikia hemakapukua risikinapo.’²¹ Airakano Unihae Yasumo anoaki someraka, ‘Né pusie. Yamenoa, Yu aporohoanafonosaki soko, nōmo someane some kakako pusie.’ Aíyaka Yasumo anoaki somesapo.”

²² Aíyaka Poremo tafaraka somerakano, aporoamo kaiyiáne, Yu aporohoanafonosaki somehoko pusiesapo, airakano kaikia, aporo suamo sakepamo wáraka, “Poreane aporo watikisapo. E rusua kukunie. E rekeane siahoasifareapo.”²³ Aíyaka ipu sakepamo wáraka, saperaka, namina pasu horomokoa mokoateraka, airirakano kokotonomo soko fauraka su koakamayapururasapo.²⁴ Koakamayapurarakano, Rome aporo ame satinimo someraka, “Ame aporomo apea Poreane karikia pusie. Yu aporomo manakano Pore hisiraka, sakepamo wárakanare? Aporoamo ipi watikisane hufitaehoasimo, e sakomo rusie.”²⁵ Airakano Pore matia ruko eane taporakano, Poremo ame aporo koporoaki someraka, “Ano Rome aporopo. Arirakano kamani aporomo someaka mareraka, Rome aporo watikiaka rekenone, hukurura aporomo takekea someaka motoakosapo. Rome aporoane nenakamaka rurafapo. Asiamo anoane fanasihoanie, aíyaka somehoane siahoasireare? Repo ano sakomo ruane siahoasireare?”²⁶ Airakano ame aporo koporomo kaikia pukua, ame aporo satiniaki someraka, “Marirakanore? Aporoane ipi Rome aporopo. Rome aporosasamo e ruane siahoasifareapo.”²⁷ Airakano ame aporo satiniarie Pore rea pekea someraka, “Né Rome aporore?” Aihoane Poremo aorakano kaikia²⁸ ipi someraka, “Rome aporoa paoraka rekeakosakipoko, Rome kamaniaki nōmo mone kára kasapo.” Airakano Poremo someraka, “Ano kakaro Rome aporopo. Takapesa maiya amo, ano Rome aporo takapesapo.”²⁹ Airakano Poremo watikisane hufitaehoasimo aporomo

sako mokoa ruko pesane, wate foaka fimiti pukua metakarisiapo. Ame aporo satinimo hemakapuraka, “Pore ipi Rome aporosasamo, Rome aporo nōmo senemo tapohoane siahoasifareapo,” aíyaka ame aporo satinimo hemakapukua fofasapo.

Yu aporo sarimaraka risiakipoko Pore karikia pusuane oyapo.

³⁰ Waka mituru, Yu aporomo Poreaki hukurukusa kepoane ame aporo satinimo hemakapusakipoko, pirisiti aporo káraki soko, Yu aporo sisimaki soko, Kotimo somemane tisa aporoaki soko, “Sarimahoanie,” aisapo. Ame aporo satinimo someraka, “Aporoane senemo taposane fisioanie.” Airakano fisiraka, aporo su sarimaraka risiakipoko, Poreane karikia pusuapo. Karikia pekea, satinimo Poreaki someraka, “Ne ipu hikumisi neneme titipia reae,” aíyaka ame satinimo somesapo.

23

Aporo su sarimasakipoko Poremo tafaraka somesane oyapo.

¹ Arirakano aporo sarimasa suane Poremo aseraka someraka, “Maeo, fana soko, yumo soko, maiya suamo Kotimo ano himua aserakano, nōmo himumo ano siapo, aíyaka hemakapurakarakano nōmo kairapo.” ² Airakano pirisiti aporo fanaraka rea, Ananásemo aseane, Pore makeraka aporo metakira risiaki someraka, “Aporoane akaia rusie.” ³ Airakano Poremo someraka, “Ne Kotimo rukusapo. Ira watikisa aporomo asekohomo, pene pakaesamo paikia, makata watikisane sekenapo. Sekena aiyáka, ne himu watikisane aporomo asekohomo nōmo sekesapo. Kotimo somemane keke-maraka nōmo ano maroporaka ararehoafunusa nine, nōmo ano rusierakane, Kotimo somemaneane nōmo mamosorakanapo.”

⁴ Airakano aporo metakira risiadio someraka, “Pirisiti aporo fanaki aiyáka hia some-hoane siahoasifareapo.” ⁵ Airakano Poremo someraka, “Maeo, e pirisiti aporo fanaraka reane, nōmo hemakapusuafapo. Arirakano Kotimo sawia popasane oyapo. ‘Yu aporo unihaeaki watikiaka somehokopo.’ Aíyaka popasasamo aporoane pirisiti aporo fanaraka reane nōmo hemakapusua satiki, aíyaka somehoafunufapo.” (*Kisim Bek 22:28*)

⁶ Aíyaka Poremo aseane, Fere se aporo metakira soko, Satusi aporo metakira soko, sarimaraka risikino asesapo. Aseke aseane, “Maeo, ano Fere se aporomo. Nōmo ata soko Fere se aporomo. Nōmo hemakapusuane, aporo kusua keseke Kotimo maturikia taehokosapo. Aíyaka hemakapurambo repo ano hukuarure.” ⁷ Airakano Fere se aporomo Satusi aporoyaki namina tafatasapo. Fere se aporomo haku hemakapukua, arirakano Satusi aporomo haku hemakapukua, aiyáka ipu himumo hemakapusuane kekeporaka hemakapusuapo. ⁸ Arirakano Satusi aporomo hemakapuraka, “Aporo kusua keseke maturikia taehokosafapo. Arirakano Hepene aporo hakásá soko rekenafapo. Arirakano ho soko rekenafapo,” aíyaka Satusi aporomo hemakapusuapo. Arirakano Fere se aporomo hemakapuraka, “Aporo kusua keseke maturikia taehokosapo. Arirakano Hepene aporo soko risikinapo. Arirakano ho soko risikinapo,” aíyaka hemakapusuapo.

⁹ Arirakano ipu kekepo hemakapukua, aporo suamo sakepamo wáraka sapesapo. Saperaka risina, metakira Fere se aporo Kotimo somemane tisa aporo takahikia tafat-faraka someraka, “Aporoamo watikiaka rakisiafapo. Hepene aporomo soko metao, homo soko metao, eaki some karakasiapo. Epo somehoane siahoasireapo.” ¹⁰ Airakano aporo suamo saperaka wesapo. Werakano ame aporo satinimo ipi ame aporoaki someraka, “Ipu Pore rukua kikirapaka repo apea e karikia pusie.” Airakano Poreane ipu apea karikia pusuapo.

¹¹ Karikia pukua namina apea pauraka reakipoko, ereamo Unihae Yasuane Pore rea peraka Poreaki someraka, “Poreo, ne mapiraraka rekeanie. Namohokopo. Anoane Yarusarame sitia nōmo some kasá aiyáka, Rome sitia soko nōmo some kakakosapo,” aisapo.

“Pore rusua kukusapo.” Aíyaka aporomo somesane oyapo.

¹²⁻¹³ Mituru fiarakano Yu aporo foti (40) su sarimaraka risiakipoko, aporo metakira iaki paoraka sarimaraka someraka, "Pore isiapo rusua kukusapo. Pore rusua kukusiraka, makata nenáne soko he soko sokoairaka risikiakosapo. Isiapo makata nenáne su nakosafapo. Poreane rusua kurakano isiapo makata nakosapo. Isiapo kakaro somerakanapo." ¹⁴ Aiyaka aporoane pekea pirisiti aporo kára soko, Yu aporo sisima soko, i risia pekea someraka, "Poreane isiapo rusua kukusapo. Pore rusua kukusiraka makata nakosane isiapo sokoaihokosapo. Isiapo kakaro somerakaripo. Someane metakariakosafapo.

¹⁵ Asiamo Pore rukusakipoko repo suamo aporo meta murikimaka, ame aporo satini rea pusiehoanie. Pukua epo ame aporo satiniaki someraka, 'Pirisiti aporo káramo soko, Yu aporo sisimamo soko, Kotimo somemane tisa aporomo soko, i su arisia, Poreane karikia punie. Efera hunia Poremo some kepoane ipu koteaka kaiyakosakipoko karikia punie.' Aiyaka kotafe somehoanie. Airakano isu fararisiakipoko Pore hauaka ikia perakano, isiapo e rusua kukusapo," aisapo.

¹⁶ Arirakano Pore rukusapo aisane, Poremo ipi makai hokosamo kairaka, ame aporomo apea pukua Poreaki somesapo. ¹⁷ Somerakano ame aporo koporoaki Poremo someraka, "Hokosa rauamo satiniaki somehoasimo nōmo karikia pusie." ¹⁸ Aiyaka somerakano ame aporo satini rea, hokosa rauane ame aporo koporomo karikia pukua, ame aporo satiniaki epo someraka, "Hokosa raua omo neaki makata somehoasimo Pore tipura reamo karikia pusiesapo." Aiyaka ame aporo koporomo somerakano, ¹⁹ hokosa rauane ame aporo satinimo tau haku karikia pukua, epo hákasa kaiyisimo someraka, "Anoaki yakapa somehokosare?"

²⁰ Airakano hokosa rauamo someraka, "Yu aporomo efera hunia Poremo some kepoane koteaka kaiyakosapo, airakasapo. Pirisiti aporo káramo soko, Yu aporo sisimamo soko, Kotimo somemane tisa aporomo soko, ipu kanisoromo apea Pore karikia peanie, aiyaka rau neaki somehokosapo, airakasapo. ²¹ Ipu someane nōmo kakimakopo. Apea Pore karikia purakano Yu aporo foti (40) su tau fararisiakipoko Pore rukusapo. Ipu Pore rukusakipoko makata nenáne sokoairakanapo, airakasapo. Yumo Pore ruko tokenapo. Nōmo karikia perakarihoamo ipu asekea tokenapo." ²² Airakano hokosa rauaki ame aporo satinimo someraka, "Yumo ne pusie. Nōmo anoaki makata somesane mahameanie. Aporo metaki somehokopo," aiyaka satinimo somesapo.

Kamani unihae Fírikisi rea Pore karikia pusiesane oyapo.

²³ Ame aporo koporo tetáki ame aporo satinimo peaeaka perakano tetáki epo someraka, "Ere titipiamo Sisaría taonea Fírikisi unihaeaka rea a Pore karikia punie. Karikia pusimo makata su sarimahoanie. Ame aporo metakira tu harote (200) su sarimaraka, arirakano ame aporo metakira tu harote (200) suamo ira rokopa mokoa pusimo sari-maraka, ame aporo metakira seweneti (70) su saro hosea ripaka pusimo sarimahoanie. ²⁴ Saro hosea Pore ripakasimo sarimaraka puraka kamani unihae Fírikisimo apea koteaka asekea karikia punie."

²⁵ Aiyaka someraka, sawi Fírikisimo menohoasimo ame aporo satinimo sawi poparaka makesapo. Sawi popasane oyapo. ²⁶ "Fírikisi, né Sisaría taonea unihaeaka rea, neaki nōmo sawi poparaka makerakanapo. Ano Korótiase Rísiásemo néaki poparaka makerakanapo. Né koteaka rekenare?

²⁷ Poreane Yu aporomo waseremaka rusua kusuahopo. Rurakano nōmo kaiyiáne Pore Rome aporosasamo, nōmo ame aporo sarimaraka, e ararehoko pusuapo. ²⁸ Arirakano Poreaki mahisinane kepoane kaiyakosakipoko, nōmo Pore karikia pukua, pirisiti aporo kára soko, Yu aporo sisima soko, Kotimo somemeane tisa aporo soko, sarimaraka risiakipoko a karikia pusuapo. ²⁹ Pukua Poreaki mahisina kepoane oyapo. Namina Pore hukururaka rusua kukunie, aiyaka someaka motoane siahoasifareapo. Tipura makeanie, aiyaka someaka motoane siahoasifareapo. Yu aporomo somemane mamosos-apakano ipu hukurusuapo. ³⁰ Arirakano Yu aporo metakiramo Pore rusua kukuko, tau fararisikinapakano, ne rea Pore foaka karikia pusiesapo. Nōmo Poreaki kaiyisimo

mahisina aporoane soko neaki somehoko pusiesapo. Ayapa.” Aíyaka ame aporo satinimo popasapo.

³¹ Poparaka faraka sawi ane ame aporoaki karakano, ereamo ame aporomo Poreane karikia pukua, Atipátarisi taonea pausapo. ³² Mituru fiarakano ame aporo metakira hauaka ikia pusuane, Atipátarisi taoneane metakarikia, i namina apea poparihihiapo. Arirakano ame aporo metakira saro hosea ripaka pusuane, Poreyaki hakāsa pusuapo.

³³ Pukua Sisaría taonea i pauraka, kamani unihae aporo area Pore karikia puraka, kamani unihae aporoaki sawi poparaka makesane kasapo. ³⁴ Karakano, sawi popasane kamani unihae aporoamo menoraka Poreaki someraka, “Nómo ní hauakane mayare?” Airakano Poremo someraka, “Sirisia hauakapo.” ³⁵ Airakano kamani unihae aporoamo someraka, “Né aporomo hukuruko perakano, nómō someane nōmo kaiyakosapo.” Aíyaka ame aporoaki kamani unihae aporoamo someraka, “Kamanimo ape Herotemo asekeea rea apea Pore karikia pukua, tipura makeraka nómō asekeea rekeanie,” aisapo.

24

Yu aporomo Poreane hokoresane oyapo.

¹ Arirakano ere fiane kakoreasu faraka pirisiti aporo fanaraka reane Ananáse soko, Yu aporo sisima soko, Sisaría taonea pusuapo. Pukua aporo hakāsa meta yano motosa Tetárase i patera asekeea, ipoko arareraka somehoko pusuapo. Pukua kamani unihae Fírikisi rea pekea Poreane hokoresapo. ² Hokoreraka marekea Pore peaeaka, e perakano Tetárasemo Poreane hokoreraka someraka, “Fírikisio. Né kárapo. Né unihaeaka reakipoko, isu auaraka risikiasimo, nómō isu araresapo. Isu koteaka risikiasimo, nómō isu arareraka nómō somemané metakira motosapo. ³ Motosasamo maiya suamo isiapo neaki suserakanapo. ⁴ Arirakano isiapo maiya káramo neaki someraka nómō hisihokohoamo, isiapo some kára kakakosafapo. Nómō kaiyisimo some wakasema kakakosapo.

⁵ Maiya suamo aporoane watikiaka reke, aporo metakiramo mahisihoasimo, epo kirimaraka someraka rekenapo. Hauaka sua Yu aporomo weasimo epo kirimaraka somerapo. Nasare aporo Yasuaki patera asesa aporo risiane Pore ipiane fanapo.

⁶ Arirakano Kotimo ape yaposane epo mamosohokosapoko asiane isiapo e wasere-masapo. [Waseremaka Yu aporomo somemanéne isiapo kekemaraka Poreane hukurukusakipoko asiane, ⁷ ame aporo satini Rísiase tipia pekea, Pore waseremakohoamo isiapo hokonomo maka reane isuaki wekea ayíáka waseremasapo. ⁸ Waseremaka isuaki ame aporo satini Rísiasemo someraka, ‘Repo Poreaki mahisiraka hukurukusane kamani unihae Fírikisimo kaiyisimo somehoko pusie,’ aisapo.] Arirakano Poremo someane yumo nómō eaki kaiyinie. Kairaka isiapo somesane soko, epo ipi somehokosane soko hakāsa yinerakano, nómō isuaki, ‘Repo kakaro somehoareapo,’ aihokosapo.” ⁹ Aíyaka Tetárasemo somerakano Yu aporo metakiramo someraka, “Ao. Someane kakarorakae,” aisapo.

Fírikisimo hukururakano Poremo ipi hemakapusuane some kasane oyapo.

¹⁰ Kamani unihae Fírikisimo Poreaki someraka, “Nómo ní hemakapusuane some kasie.” Airakano Poremo someraka, “Keremisi yakaimo, hauaka wo nómō Yu aporo suane koteaka maroporaka reke, nómō watikiaka rakianafonosakipoko, nómō néaki somehoko seserakanapo. ¹¹ Ere fia yape kenosu (12) faraka, Yarusarame sitia Kotiaki kekerehoko, ano hisiapo. Hisiane, nómō aporo metaki kairakano, aporoamo someraka, ‘Ao, kakaro yaiya hisiapo,’ aihokosapo. ¹² Asiane Kotimo apea soko, Yu aporomo sarimana apea soko, hauaka moroa soko, nómō aporo metaki kirimaraka somerakano, ipu ano asesafapo. ¹³ Ipu asekeanafonosasamo ipu anoane topakamaraka somerakanapo. Kotafe someraka, yumo ipu anoane topakamaraka somesane, nómō kakaroripo, ai-hoasimo somerakanapo. Ano asesa aporoane hakāsa soko, ape wo rekenafapo. ¹⁴ Nómō hemakapusua hákasane nómō kaiyisimo someana oyapo. Yasumo ipi ikia kara hákasa á, ano kekemaraka purakanapo. Yasumo someane nómō kekemaraka rakirakano

asekea, ipu someraka, 'Yasumo someane kakimaka rakira aporo akiyaki isina hakása ninesafapo,' aisapo. Arirakano Yasumo tarisia aeyaka nōmo enomaka, isiaipo makasa kaua kekemamo Kotiaki nōmo kekererakanapo. Mosesemo somemané motosane nōmo kakimaka, porofete aporomo popasane soko, nōmo kakimaka rekenapo. ¹⁵ Kakimaka reke nōmo hemakapuane, aporo hinamo kusuane Kotimo maturikia taehokosapo. Koteaka risiane soko, watikiaka risiane soko, suane Kotimo maturikia taehokosapo. Maturikia taehokosane ipu soko kakimasapo. ¹⁶ Asiamo Kotimo soko, aporomo soko ano aserakano, maiya suamo nōmo himumo ano siapo, aiyaka hemakapurakarakano, kaiyakosakipoko ano koteaka rekenapo.

¹⁷ Keremisi yakaimo Yarusarame sitia ano hisiafapo. Kawe yumo, Yarusarame sitia, Yu aporo fesenosaki mone kakako mokoa ano hisiapo. Arirakano Yarusarame sitia Kotiaki makata yaku kakako maka hinaka eaki nōmo susesapo. ¹⁸ Kotiaki makata yaku kakakosakipoko, nōmo Mosesemo somemanéne kekemaraka makata rakisiapo. Rakikia, Kotimo apea yoroako ano siaraka reapo. Arirakano ano Kotimo apea rekeno, Yu aporo metakira Esea hauaka aeyaka pesamo soko ano asesapo. Ipu aseane, ano aporo yakayaki rekeanafonoraka, aporo metayaki weako sape mehoafonoraka, ayíáka ano siaraka rekeno ipu asesapo. ¹⁹ Ano asesa aporoamo anoaki makata hukurukusa rekenone, neaki somehoko peafunusa nine, i pesafapo. ²⁰ Peanafonorakano aporo arisia omo namina apea sarimaraka, ano hukurusua maiya amo nōmo yakapa watikiaka rakisiapakano ipu kaisiare? Ipu makata kaisia satiki neaki somehoafunupo. ²¹ Asiāne nōmo some hakása meta nōmo somehoane namina hisisapo. Namina sarimaraka ano hukurusua maiya amo ano takahikia someraka, 'Aporo kusuane keseke Kotimo maturikia taehokosapo.' Aiyaka somesasamo, ano hukuarure." Aiyaka Poremo somesapo.

²² Poremo somerakano, Yasu Keresoa paosa aporomo rakirane Fírikisimo kaisiapo. Kaikia haru hukuruuanafonoraka epo someraka, "Fore yia motorakanapo. Keseke ame aporo satini Rísiase perakano, eféra hunia nōmo kaiyakosapo." ²³ Aiyaka ame aporo koporoaki epo someraka, "Pore tipura makesane asekea rekeanie. Tipura makesane ipi wakasema koraka reke siahoasireapo. Ipi aporo tákemo e makata nakosa soko kayane siahoasireapo," aiyaka Fírikisimo somesapo.

Fírikisipe Túrusira tetāki Poremo some kasane oyapo.

²⁴ Kamani unihae Fírikisiane ipi Rome aporopo, asiane ipi asea ane Yu hinamopo. Arirakano ere fiane sere hukusi faraka, Fírikisi ipi asea Túrusira tetā peraka Poreaki peaesapo. Peaerakano Poreane pekea someraka, "Yasu Keresoaki himu hakásaraka hemakapukua risikianie." Aiyaka Poremo some karakano tetapō kaisiapo. ²⁵ Tetapō kaiyisimo Poremo eféra hunia úyaka somesapo. "Ereketaeraka rekeanie. Arirakano kaumō watikiaka hemakapukua rakirane rukupateraka metakarinie. Arirakano keseke Kotimo aporo kotesane parakuraka kikisiraka hakua murikia, arirakano aporo watikisane parakuraka kikisiraka hakua murikia, ayíáka parakuraka takekea kikisihokosapo." Airakano Fírikisimo namoraka someraka, "Yumo né pusie. Asiamo keseke maiya metamo neaki eféra hunia somehoko peaniehokosapo." ²⁶ Aiyaka Fírikisimo hemakapuraka, "Pore tipura makesane tonotaehoasimo, epo anoaki mone kakakosapo." Aiyaka hemakapukua, maiya yakaimo Poreaki somehoko peaesapo.

²⁷ Arirakano keremisi tetá faraka Fírikisi hauaka meta pusuapo. Pusiraka reke, Yu aporomo seséhoasimo Pore tipura makesane tonotaesafapo. Tonotaenafaraka metakarikia purakano, Pósiase Fésetase kamani unihaeaka asekea rekeako pesapo.

"Rome aporo unihae Sisamo nōmo someane kaiyisimo e rea ano puko seseripo," aiyaka Poremo somesane oyapo.

¹ Fésetase Sisaría taonea pekea, ere fiane isia Sisaría taonea waka, mituru metakarikia, Yarusarame sitia hisiapo. ² Hinakano pirisiti aporo fanamo soko, Yu aporo fanaraka risiamo soko, Fésetaseaki Poreane hokoresapo. ³ Hokoreraka ipu someraka, "Isu

seséhoasimo Yarusarame sitia Pore pasimaka peae hoanie." Aíyaka ipu tau hemakapuraka, "Pore perakano isu ikia kara fararisiamo e waseremaka rusua kukusapo.⁴ Aíyaka hemakapusua nine, Fésetasemo someraka, "Sisaría taonea Pore tipura makesane yia rekenapo. Maiya hi makerakano ano Sisaría taonea paripukusapo.⁵ Paripurakano re aporo fanaraka risiane anoyaki hakāsa puraka, Poremo watikiaka rakirakanone, e hukurunie."

⁶ Aíyaka Fésetasemo someraka Yarusarame siti yia reke, ere fiane karisu soko metao, kaeyakosu soko metao faraka, Sisaría taonea e paripusuapo. Paripukua, ere hakásamo waka, mituru fiarakano, hukurura apea pukua kake, "Pore karikia peae," aisapo.

⁷ Aíyaka Pore karikia perakano, Yarusarame siti aeyaka Yu aporo pekea, Poreyaki hakāsa risike, ipu Fésetaseaki Poreane namo kakaro mokoatikiaka hokoresapo. Hokoresane, kaisia aporo wakinisiane rekeanafonosamo aporo metamo kakaroripo, aisafapo.

⁸ Aihoanafonorakano Poremo tafaraka someraka, "Yu aporomo somemanane nōmo mokoatikisafapo. Arirakano Kotimo apeane soko, nōmo mokoatikisafapo. Arirakano Rome aporo kamani unihaeane soko, nōmo mokoatikiraka somesafapo."

⁹ Airakano Yu aporo maseséraka Fésetasemo Poreaki someraka, "Né pasimaka Yarusarame sitia hikia ipu hokoresane, nōmo takekeea maropohoane siahoasireare?"

¹⁰ Airakano Poremo someraka, "Ano wo reakipoko Rome kamani aporomo takekeea maropohoane siahoasireapo. Asiamo Yu aporoane nōmo mokoatikisafapo. Mokoatikihoanafonosane nōmo kaisiapo.¹¹ Arirakano nōmo watikiaka rakirakano ipu ano rusua kukunie, aihoane siahoasireapo. Rusua kukunie, airakanone nōmo metakarinie, aihekosaafapo. Asiāne nōmo watikiaka rakisiafapo. Yu aporomo ano kotafe yia hokorehoane siahoasifareapo. Yu aporo risiakipoko ano karikia pukupo. Rome kamani unihae Sisamo maropohoasimo eaki somehoko ano seseripo."¹² Airakano Fésetasemo aporo metakiraki someraka, "Poremo Sisaki somehoko hiane siahoasireare?" Airakano ipu someraka, "Ao, siahoasireapo." Airakano Fésetasemo Poreaki someraka, "Rome aporo unihae Sisaki nōmo somehoko seserire? Ne seseripo airakano, e rea né karikia hiakosapo," aisapo.

Unihae Kini Akarípa soko ipi papā Pénisi soko Sisaría taonea pesane oyapo.

¹³ Wakasema nina unihae Kini Akarípa soko, Pénisi soko, Fésetase aseako Sisaría taonea pesapo. ¹⁴ Ere fia yakai faraka, Poreane unihae Kini Akarípaki Fésetasemo someraka, "Fírikisi unihaeaka reamo Pore tipura makesapo. Makesane ano pesa sereamo tipura makesa yaiya rekesapo. ¹⁵ Ano Yarusarame sitia hinakano, pirisiti aporo fanaraka risiamo soko, Yu aporo sisimamo soko, Poreane hokoreraka anoaki someraka, 'E fanasihoko someaka motoanie,' aisapo. ¹⁶ Airakano nōmo someraka, 'Mokome fanasihokosafapo. Asiamo Rome kamanimo aporo meta fanasihoko mokome someaka motorafapo. Makata hukurura aporoamo, aporo makata hukuruko pesaki, hikumisia some kaka hukururapo. Arirakano aporo makata hukuruko pesamo, epo ipi makata ásiane some karápo. Some karakano some kepoane Rome kamanimo kaikia takekeea someaka motorapo.'

¹⁷ Aíyaka iaki someraka Sisaría taonea ano pariperaka, i soko taone wo perakano, ere hakásamo isina waka, mituru Poremo someane kaiyakosakipoko nōmo, 'E karikia peae,' aisapo. ¹⁸ Karikia perakano nōmo hemakapuraka, 'Kamanimo yaposane Poremo rukupateraka rakisiaamo, ipu eane hukurukusapo,' aíyaka nōmo hemakapusuaapo. Asiāne ipu ayiáka hukurusuafapo. ¹⁹ Asiāne hukurusua kepoane oyapo. Yu aporomo makata kurikurinane soko, aporo hakāsa meta kusua, yano motosa Yasuane soko, tafatafasapo. Tafatafarakano Poremo someraka, 'Yasu kusuane maturikia taesane yumo rekenapo.' Airakano ipu someraka, 'Wae, Yasuane maturikia taesafapo.' Aíyaka tafatafasapo.

²⁰ Tafatafarakano kepoane nōmo himetesasamo maropohoane siahoasifareapo. Asiamo Poreaki nōmo someraka, 'Yarusarame sitia né maropohoasimo hiakosare?' ²¹ Airakano Poremo someraka, 'Wae, Rome kamani aporo unihae Sisamo maropohoasimo, e rea ano

hiakosapo.' Airakano Poreane Sisa rea hiakosakipoko yumo kau asekea rekeno, e tipura apea yu reae, aisapo." Aíyaka Fésetasemo somesapo.

²² Airakano Fésetaseaki Akarípamo someraka, "Poremo someane nōmo kaiyakoripo." Airakano Fésetasemo someraka, "Rau e karikia perakano nōmo kaiyakosapo."

²³ Airakano, waka mituru Akarípape Pénisi tetā kau rakikia, aporomo makata somera apea pesapo. Peraka tetāyaki ame aporo satini soko, ape aporo fanaraka risiane soko, hakāsa pesapo. Perakano Fésetasemo someraka, "Pore karikia peae," aisapo. ²⁴ Aíyaka karikia perakano Fésetasemo someraka, "Akarípao. Né aporo unihae kárapo. Nōmo soko, aporo su pesa amo soko, aporo one asesie. Eane Yu aporo suamo Sisaría taonea risiamo soko, Yarusarame sitia risiamo soko, nōmo maropohoasimo ipu suamo eane topakamarakanapo. Topakamaraka ipu sakepamo wáraka, 'Poreane rusua kukunie,' aisapo. ²⁵ Asiāne epo kára watikiaka rakianafonosasamo e rusua kuane siahoasifareapo. Epo someraka, 'Rome aporo unihae Sisamo nōmo someane kaikia ano maropohoasimo seséripo. Airakasuakipoko karikia hiniehokosapo.' ²⁶ Aíyaka Rome aporo unihaeaki Poreane sawi poparaka maýaka popahoanarakapo. Akarípao, nōmo ano ararehoanie. Poremo someane kaikia, nōmo popahoasimo kepoane anoaki somehoanie. ²⁷ Aporo tipura makesane Rome aporo unihae rea pusierakano pukua, unihaeaki hukurusua kepoane popahoanafonorakano, siahoasifareapo," aíyaka Fésetasemo somesapo.

26

Poremo Akarípaki some kasane oyapo.

¹ Akarípamo Poreaki someraka, "Ipu né hokoresasamo nōmo ní hemakapukua some-sie." Airakano Poremo ipiane somehokosakipoko aporo suamo kaiyisimo hokono máfaraka someraka, ² "Kini Akarípa, né unihaeepo. Yu aporomo ano hokoresane, pipu nōmo kaiyisimo nōmo néaki seséraka somerakanapo. ³ Yu aporomo ainane soko, somerane soko, nōmo kaisiasamo néaki somehoko ano sesérakanapo. Asiasamo nōmo someane nōmo koteaka kaisie.

⁴ Ano hokosa nina, sisimarka rekesuamo, nōmo makata rakisiane Yu aporomo asesapo. Maiya suamo nōmo ní aporo iramo hauaka á soko, Yarusarame sitia soko, ano reane Yu aporomo asesapo. ⁵ Maiya suamo ano Fere se aporo reapo. Asiamo Fere se aporomo somemane nōmo enomaka, namo kakaro umisane nōmo kekemasapo. Yu aporoaki nōmo someraka, 'Poremo somerakane kakarore?' Airakano ipu someraka, 'Ao, Poremo Fere se aporomo somemane kakaro kakimaka rakisiapo,' aihokosapo. ⁶ Arirakano wate fana isiapo makasa kaua kekemaki Kotimo ayiakakosaposane, nōmo kakimarakanano, ipu ano hukururakanapo. ⁷ Asiamo Kotimo ayiakakosaposane, isiapo aporo ira keno sumo kakimaraka, ereamo soko, sere soko, maiya suamo Kotiaki kekerenapo. Kekereraka Kotimo ayiakakosaposane nōmo kakimasakipoko, Yu aporomo ano hokorerakanapo. Unihaeo, hukurura kepoane oyapo. ⁸ Kotimo someraka, 'Aporo kusua maturikia taehokosapo.' Aisane aporo metakiramo someraka, 'Aporo kusua Kotimo maturikia taehokosafapo.' Aihorane mainakano airakanare?

⁹ Arirakano nōmo fana Nasare aporo Yasumo yano motosane nōmo mawakasemasapo. Mawakasemaraka, ipi kakimara aporo hinamoane nōmo mokoatikisapo. Mokoatikisa maiya amo nōmo hemakapuraka, 'Nōmo koteaka rakirakanapo,' aíyaka nōmo hemakapusuapo. ¹⁰ Nōmo ayiáka hemakapuraka, Yarusarame sitia Keresoa paosa aporo hinamoane mokoatikisapo. Pirisiti aporo káramo ayiakanierakano kaikia, Kotimo aporo hinamo yakai nōmo mokoa tipura kesapo. Tipura kesane, 'Rusua kukunie,' aíyaka someaka motorakano, nōmo soko, 'Ao, rusua kukunie,' aisapo. ¹¹ Aíyaka efera hunia soko, efera hunia soko, Yu aporomo sarimana ape metakira ano pukua, Yasu Keresoa paosa aporomo Yasu yano motosa mawakasemahoasimo, iane nōmo mokoatikisapo. Iaki nōmo kakaro kára saperaka, hauaka meta yamenoa soko, taone metakira soko, iane mokoatikhoko ano pusuapo." Aíyaka Poremo somesapo.

Poremo someraka, "Ano Yasuaki rekeako parisapo," aisane oyapo.

¹² Poremo efera hunia someraka, “Tamásakase taonea Keresoa paosa aporo hinamoane mokoatikihoko ano pusuapo. Pukusakipoko pirisiti aporomo anoaki someraka, ‘Keresoa paosa aporo hinamoane mokoatikihohanie.’ Aíyaka ano pusierakano, Tamásakase taonea ano pusuapo. ¹³ Kini Akarípao, ano ikia kara tipia puraka reakipoko, maiya hi titipiamo, hepene aeyaka fae kára faerakano nōmo asesapo. Sere maiyamo faenane wakasemapo. Fae asesane namo kakaro kárupo. Ano soko, aporo anoyaki hakāsa pusuane soko, isu ikia kara puraka risiakipoko fae kára fasereperakano, ¹⁴ isu hurupepesapo. Hurupeperaka hauaka warisike, nōmo kaiyiáne Hipuru meaka someraka, ‘Soreo, Soreo, marirakano nōmo ano mokoatikirakanare? Saro ponomakau korakemo taposoraka ira fenesamo karerakano ipi yia terapo. Aina ayíáka nōmo ano mokoatikinane, nōmo ní yia mokoatikirakanapo.’

¹⁵ Airakano nōmo someraka, ‘Unihaeo, né epare?’ Airakano Unihaemo someraka, ‘Ano Yasupo. Nōmo ano mokoatikirakanapo. ¹⁶ Yumo né takahisie. Né nōmo aporo raipa murikimako, neaki nōmo faesane tarirakanapo. Nōmo neaki atarira one pipu nōmo asekea, aporo metakiraki somehoanie. Keseke nōmo tariakosane soko, aporo metakiraki somehoanie. ¹⁷ Yu aporomo soko, Yu aporohoanafonosamo soko, suamo né hisirakano né nōmo mafasiakosapo. Yu aporohoanafonosaki nōmo someane some kakako punie. ¹⁸ Puraka Yu aporohoanafonosane hi katoraka risiane metakarikia faeraka risikiasimo somehoanie. I hi katoraka risiane, hi fakariasimo somehoanie. Satanemo Yu aporohoanafonosane asekea reane metakarikia, Kotimo asekea rekeasimo some kakanie. Yu aporohoanafonosane anoaki himu hakásaraka hemakapukua risikino, i himu watikisane nōmo mafahokosapo. Mafaraka i Keresoa paorakano Kotimo aporo hinamo murikimosa akiyaki hakāsa risikiakosapo,’ aíyaka Yasumo somesapo.

¹⁹ Asiamo unihae Kini Akarípao, hepene aeyaka Yasumo faesane nōmo asekea, epo someane nōmo kakipayasafapo. ²⁰ Arirakano fana Tamásakase taonea aporo risiaki soko, Yarusarame sitia aporo risiaki soko, Yutía hauaka sua aporo risiaki soko, Yu aporohoanafonosaki soko, nōmo some karaka, ‘Re himu watikisane rukupateraka metakarinie. Kotiaki risikiako parihoanie. Kotiaki risikiako parisane, aporo suamo asekeasimo koteaka rakikia risikianie.’ ²¹ Aíyaka nōmo Yu aporohoanafonosaki some kasasamo, Yu aporomo anoaki hisiraka, Kotimo apea ano waseremaka rusua kusuahopo. ²² Ipu ano rusua kukuko asiāne, maiya suamo Kotimo ano ararerakano, pipu aporo unihaeaki soko, aporo unihaeoanafonosaki soko, nōmo some karakanapo. Porofete aporomo ayiakakosapo aisane soko, Mosesemo ayiakakosapo aisane soko, someane su nōmo some akara one hakasa yiyapo. ²³ Ipu ayiakakosapo aisane oyapo. Kereso ipi himu nekea kurakano, Kotimo e maturikia taehokosapo. E fana maturikia taeraka epo Yu aporoaki soko, Yu aporohoanafonosaki soko, faeraka risikiakosane somehokosapo. Aíyaka porofete aporomo somesane faserepesa ayareapo.”

²⁴ Aíyaka Poremo kakaro tafaraka somerakano, Fésetasemo sakepamo someraka, “Poreo, nōmo makata kára kaisiasamo, né himu maparitaerareapo.” ²⁵ Airakano Poremo someraka, “Fésetaseo, ano himu maparitaesafapo. Nōmo kakaro somerakanapo. ²⁶ Unihae Kini Akarípao, makata some kepoane nōmo hemakapurakano, néaki nōmo mapiraraka somerakanapo. Nōmo faremarekea rakirafaraka, mafekemaraka ereketae rakirakarakano nōmo kaisiapo.

²⁷ Unihae Kini Akarípao, nōmo hemakapusuane, nōmo porofete aporomo someane kakimayereapo. Kakaro somerakarire?”

²⁸ Airakano Akarípamo Poreaki someraka, “Maiya wakasemamo ano Keresoaki rekeako parihoasimo nōmo anoaki some akare.” ²⁹ Airakano Poremo someraka, “Maiya wakasemamo soko metao, maiya káramo soko metao, ane nōmo hemakapurakarifapo. Né soko, pipu aporo su pekea, nōmo some kairakasa aporoane soko, re su ano area ayíáka, re Keresoa paoraka risikiasimo nōmo hemakapurakarifapo. Ayíáka risikiasimo, Kotiaki nōmo kurikurirakanapo. Asiāne ano tipura area ayíáka, re soko tipura kekea risikiasimo nōmo hemakapurakarifapo.”

³⁰ Airakano unihae Kini Akarípa soko, Sisaría aporo unihae Fésetase soko, Pénisi soko, i su sarimasane takahihiraka pusuapo. ³¹ Puraka namina susu someraka, “Aporoamo watikiaka rakisiafapo. Asiamo rusua kuane siahoasifareapo. Tipura makeane soko siahoasifareapo,” aisapo. ³² Arirakano Fésetaseaki Akarípamo someraka, “Poremo someraka, ‘Ipu hokoresane Rome aporo unihae Sisamo maropohoasimo ano Rome sitia hiakoripo, aisapo.’ Aiyaka Sisamo maropohoasimo epo somehoanafonorakanone, Pore tonotaehoane siahoasireapo,” aiyaka Akarípamo somesapo.

27

Rome sitia Pore hisiane oyapo.

¹ Akarípape Fésetase tetapō someraka, “Rome aporo unihae Sisaki Poremo somehoasimo Itari hauaka á hisiehokusapo.” Aiyaka Itari hauaka Rome sitia hiasimo Pore soko, aporo metakira tipura kesane soko, ame aporo koporo yano motosa Yúriaseaki tetapō someraka, “Iane nómo asekea rekeanie.” Airakano iane Yúriasesemo asekea reapo. Arirakano makata rakiako ame aporo wane harote (100) ane, koporo Yúriasesemo asekea reapo. Asekea reke epo Rome aporo unihae Sisapoko rakisiapo.

² Arirakano kasu sipi hakása Ataramítiami taone aeyaka peraka, Esea hauaka pukusapo, airakano isu kasu sipia ripaka pusuapo. Pusua amo Pore soko, ano Ruki soko, arirakano Masetónia hauaka aeyaka, Tesaronaeaka taone aporo Arisitákase soko, isu su pusuapo. ³ Pukua ere hakása waka, mituru fiarakano pukua, Saetone taonea pausapo. Saetone taonea Yúriasesemo Poreaki makoteraka someraka, “Ní aporo táké aseako sesérakanone, aseako pusie. Ní aporo tákemo né arareraka makata kakasimo, ní aporo tákéane aseako pusie.” ⁴ Airakano Pore pukua paripekea, efera hunia kasu sipia ripaka pusuapo. Puraka risiakipoko, atifo kára peraka, kasu unihaea rurakano asekea, Saéparase he tonoamo matahoasimo, he tono taku aeyaka pusuapo. ⁵ Pukua Sirísia hauakane soko marokeraka pukua, Pamefíria hauakane soko marokeraka pukua, Risía hauaka pauraka, Maera taone kasu matapea kasu sipiane karimaresapo. ⁶ Karimarekea, kasuane yia metakarikia, isu ima fokoa hikia risike, ame aporo koporomo hi susuamo kokoa aseane, kasu sipi meta Aresátia taone aeyaka pekea, Itari hauaka á hiakosakipoko perakano, epo someraka, “Kasu sipi á ripasie.” Airakano isu kasu sipi á ripasapo.

⁷ Ripaka puraka risike yia, ere fiane yakai fasapo. Sereamo atifo soko he kupayaki kára pesapo. Peraka kasu unihaea tasoakaruraka masekeame pusuapo. Kasu sipi wafayane wafororaka masekeame pusuapo. Pukua Naétase taone kasu matapea kasuane karimareakosapoko asiane, atifomo kasu unihaea ruraka tasoakarurakano, Kiríti he tono taku aeyaka pusuapo. Puraka Saómoni hauaka asekea marokeraka, ⁸ he fe makeaka waforoaka pukua, Kasu Matape Kotesa á pauraka, kasu karimaresapo. Raséa taone makeraka Kasu Matape Kotesa á kasu karimaresapo.

⁹ Taone á ere fia yakaimo isu waka risiapo. Arirakano Yu aporomo hokono kesa* sereane fasapo. Fasasamo yao kaserakawi peakosa maiya ane makeraka, yao kaserakawi perapaka, kasu puane siahoasifareapo. ¹⁰ Asiamo Poremo paroaka someraka, “Repo kaisie. Nómo hemakapusuane, yumo isu puane siahoasifareapo. Isu purakanone, isu su hea koaka pukusapo. Makata fato soko, kasu sipi soko, isu aporo ripasane soko mokoatikihoasireapo.” ¹¹ Airakano ame aporo koporomo Poremo someane kakipayasapo. Kakipayaraka kasu sipi maropona aporomo someane soko, kasu sipi wafayamo someane soko, epo kakimasapo. ¹² Asiamo tetapō someraka, “Kasu matape wo, karimareane siahoasifareapo. He kupa soko, atifo soko, kára peakosasamo kasu matape wo karimareane siahoasifareapo. Ixiapo kasu matape wo metakarikia, Kiríti he tonoa Fínikisi taone kasu matapea karimareako purakapo. Atifo kára peakosa ere maiya amo Fínikisi taone kasu matapea karimarerakanone mataihokusapo. Matairaka atifo kára aperamo mokoatikihokusafapo.” Aiyaka tetapō somesapo.

* 27:9: Yu aporomo hokono kesa one, yano motosa Makata Nakosa Sokoihoanie, aisapo.

Atifo kára pesane oyapo.

¹³ Arirakano atifo wakasema kasu keno sape aeyaka perakano, ipu hemakapuraka, "Isu puane siahosireapo." Aíyaka hemakapukua rete kára umisa eke asia, hea makasusane fitikimaka, kasua motokoa, Kiríti he tono fe makeraka pusuapo. ¹⁴ Maiya wakasemamo puraka risiakipoko, atifomo he tonoane tapikitaeraka pesapo. Peraka kasu unia ¹⁵ atifomo ruraka, kasu tasoaka ruraka kasu purafaraka, atifomo kasuane maka puraka, kasu ereketae pusuafapo.

¹⁶ Ereketae purafaraka, Kóta he tono makeraka, he tonoamo matairakano kasu wakasema meta kita humaresane, kasu sipi kakarua motoakosakipoko ayiane parosapo. Parorakano asekea, wakapuaka kikirimaka kasu sipi kakarua motosapo. ¹⁷ Motoraka kasu sipi he kupamo rukua aronapaka, sakomo kasu sipiane otoa taposapo. Taporaka marekea, asekea toakipoko ipu hemakapuraka, Afirikia hauaka he fea atifomo maka purakarihoamo, he fea kasu sipimo he tu atura hauakakipoko, kasu petauamo hauaka atura sakairapaka, pasu farae fatarimasapo. Fatarimayane atifomo kasu sipiane nenakamaka maka pusuapo.

¹⁸ Puraka risikiyia ererakano, waka mituru fiarakano, atifo yao kaserakáwi he kupa soko, yaiya peraka rekeno, makata fato ripasane kepomarekea mokoatesapo. ¹⁹ Mokoateraka ere fiane yape tetá faraka, yape isiamo kasu sipia makata toane, ipu hokonomo mokoa, he tawara mokoatesapo. ²⁰ Mokoateraka ere fia yape yakaimo, yao kaserakáwi atifo kára soko peraka, sere maiya soko, ti makata soko, matairakano, aporo suamo someraka, "Isu kukusireapo." Aíyaka hemakapukua, "Metamo isu mafasiakosapo." Aíyaka hemakapusuane metakarisiapo.

²¹ Ayiáka ere fia yape yakaimo, aporo suamo namoraka, makata nakosa sokoairakano, Poremo someraka, "Nōmo someane repo kakimakafunureapo. Repo manakano Kiríti he tonoane metakarikia koaraka pusuare? Metakarikia koaraka punafonosa, makata fatoane soko, makata kemo soko, su yaiya tokoafunupo. ²² Asiamo yumo paroaka risikianie. Isu aporomanoane hakása soko meta kukusafapo. Kasu hákasa kenepeakosapo. ²³ Kotiaki nōmo kekereraka, Kotimo rakirane nōmo rakirapo. Arirakano pipu ereamo Kotimo hepene aporo ano rea pusiesapo. ²⁴ Pusierakano pekea, anoaki epo someraka, 'Poreo, namohokopo. Rome aporo unihae Sisa rea né hiakosapo. Asiamo Kotimo ararerakano, kasu sipia né soko, aporo su hakása ripasane soko, kukusafapo.' ²⁵ Aíyaka hepene aporomo somesasamo, re mapiraraka risikianie. Kotiaki nōmo himu hakásaraka hemakapukua rekenapo. Kotimo ayiakakosapo aisane, kakaro ayiakakosapo. ²⁶ Arirakano atifomo kasu maka pukua, he tono meta kasu kikirimape pukusapo," aíyaka Poremo somesapo.

²⁷ Arirakano ere fia fotini (14) amo, he tawara yano motosa Metiteréniane á kasu sipiane atifomo maka pukua, ere titipiamo kasu maropona aporomo hemakapuraka, "He fe makerakanapo." Aíyaka hemakapukua, ²⁸ he numua murikimakosakipoko he tu makerihoamo rura asíamo murikimako sako hea makasusapo. Makasuraka he tu atura murikimasane rura asia napa menoraka fotipo (40). Wakasema pukua efera hunia murikimayane tetipo (30). Tetiane asekea hemakapuraka, "He seraraka wakasemaraka hauaka makerakanapo," aíyaka hemakapusuapo. ²⁹ Aíyaka hemakapukua, he fe makeraka, kasumo eke rurapaka, kasu keno aeyaka eke asia rete umisane, kitafasu kitamo hukumurisiane hea mokoasusapo. Mokoasuraka i namoraka kau toke someraka, "Yao wate foaka fiasie," aisapo. ³⁰ Airakano kasu maropona aporomo hemakapuraka, "Kasu sipi yia metakarikia, isu hákasa pukusapo." Aíyaka hemakapukua, kasu wakasemane kasu sipi kára kakarua motosane, he tawara atura tau metafirirakano metafirirakanoraka kakeno namina ripakakosakipoko kotafe someraka, "Kasu unia aeyaka rete kára umisa eke asia sakomo kita hukumurikia hea motoakosapo," aíyaka kotafe somesapo.

³¹ Kotafe somesane, Poremo asekea, ame aporo koporoaki soko, ame aporo metakiraki soko someraka, "Kasu maropona aporoamo kasu sipia yaiya risikianafonoraka, kasu wakasema meta ripaka purakanone, re su hea koaka pukua he nakosapo." ³² Airakano

kasu sipi maropona aporoamo kasu sipi metakarikia, kasu wakasema a riparapaka, kasu wakasema ane sakomo kita hukumaresane ame aporomo pateketaesapo. Pateketaerakan he tawaramo kasu wakasema ane maka pusuapo.

³³ Fiahokorakano aporo suaki Poremo wakapuaka someraka, “Sokō tetámo repo makata nakosa sokoairaka, namoraka risikisuane, ³⁴ yumo makata nakosane nesie. Makata neane re wakapuhokosapo. Re aporo hakásá meta kukusafapo. Re su yaiya siaraka risikiakosapo.” ³⁵ Aiyaka aporo suamo asekea risikino, Poremo farawa maka, Kotiaki suseraka farawa mosoraka nesapo. ³⁶ Nenakano ipu suamo asekea, himu mapiraraka hemakapukua, ipu soko makata nesapo. ³⁷ Arirakano kasu sipia aporo ripasane menoraka, tu harote seweneti sekese (276) ane, kasu sipia ripasapo. ³⁸ Ripasa aporo suamo makata siaraka nekea, kasu ofohoasimo kasu kakarua witi faturaka taesane hea mokoasusapo.

Kasu sipi arosane oyapo.

³⁹ Yao fiana maiya amo, he fu takunane kasu maropona aporoamo aseraka e himete-sapo. He kekehisiakipoko hauaka sakipu kotesa aseraka, á kasu hiakosakipoko, hemakapusuapo. ⁴⁰ Ayíaka rete kára umisa eke asia suane kita hukumurisiane popateraka, hea mokoasuraka metakariasiapo. Kasu maropohoko ira wae sakomo hukumurisiane sakoane popateraka, pasu farae fatarimasane efera hunia hukumarekea, atifomo maka pusimo hukumaresapo. ⁴¹ Hukumarekea puraka, kasu unia he fea ekeakipoko kasu tu tamo aturamo kikirimape pusuapo. Kasu unia ekea kake, kasu keno sapea he kupamo ruraka arosapo. ⁴² Arorakano aporo tipura kesane he tapukua he fea rokoa tekedarikia purapaka, ame aporomo rusua kukusimo hemakapusuapo. ⁴³ Rusua kukusimo hemakapusua nine, ame aporo koporomo Poreane farimaraka hemakapuraka, “Poreane rusua kukukopo,” aisapo. Aiyaka ame aporo koporomo someraka, “He tapura aporo, re fana hea mokoasuraka he tapunie. ⁴⁴ Amo patera aporo metakira he tapuanafonona aporo re kasu arosa soko metao, ira soko metao mokoa, hea mokoasuraka, tapuku a risike he fea rokoa hinie.” Airakano isu su he tapukua he fea fosapo.

28

He tono yano motosa Móta á Pore reane oyapo.

¹ He tono fea isu fosane yano motosa Mótapo. ² Móta hauaka á aporo risiamo isu seséraka araresapo. Isu yao rukua inuraka pekea risikino, ipu isu arareraka ira paikia marekea, isu hakásimo peaesapo. ³ Peaerakano pesapo. Perakano Poremo ira pora eya faturaka maka pekea paisiapo. Paiyiane ira rufimo inakako makesapo. Inakako makerakano asekea toakipoko heseke ira fatusa arakaru aeyaka pekea, Pore hokonoa rukunesapo. ⁴ Rukunenakano, Móta aporoamo asekea namina susu someraka, “Aporoamo aporo meta kakaro rusua kurakanareapo. Epo watikiaka rakisiasamo, e he nekea kukufunureapo. Kukunafonorakano, heseke rukua anenane kukusapo. E hitaferaka rekeakohoamo e makurakanapo.”

⁵ Airakano Poremo hokono materaterahoane, heseke ira rufia huruperaka, iramo inasapo. Iramo inasakipoko, Pore koteaka siaraka reapo. ⁶ Koteaka sia rekeno, Móta aporo suamo hemakapuraka, “Aporoane kau piriraka soko metao, foaka kuraka soko metao, ayiakakosapo.” Aiyaka hemakapukua tuina, maiya káramo aseane, Pore koteaka rekeno asekea, ipu himu meta hemakapukua someraka, “Poreane aporo haku meta reapo.” Aiyaka hemakapukua Poreane makáraraka somesapo.

⁷ Arirakano aporo su sarimarka, Pápíriasesmo hauaka makeaka risiapo. Arirakano he tonoa aporo suamo unihaeane Pápíriase ipipo. Epo isuaki wakako peae, airakano isu pukua, ere fia isiamo isu waka risiapo. Waka risikino epo isu asekea reapo. ⁸ Pápíriasesmo ipi wafaya makata takamaraka, kau sisipuraka, himuhano pukua warekeno, e warea Pore pukua, Kotiaki kurikuriraka, e kaua sakaihoane makata takamasane fasapo. ⁹ Asiamo aporo su makata tasa, he tonoa warisiane, Pore rea perakano, i suane mafasapo. ¹⁰ Mafarakano ipu isuaki makata yaku kára kasapo. Wakasema risina, keseke kasu sipia

ripaka pukusaporakano, makata karasamo siahoanafonorakano, ipu makata sarikekeka kasu sipia taesapo.

Móta apeane metakarikia, Rome sitia Pore hisiane oyapo.

¹¹ Móta he tonoa kasu sipi meta, fana Aresátia taone aeyaka pekea, kirimaresusupo. Arirakano atifo yao kaserakáwiyaki peasiraka kasu matahoasimo, kasu matapea kirimaresusupo. Arirakano kasu sipi unihaea aporo hokosa tetá murikimaka rakikia maresesupu. Arirakano ere maiya isia farakano, isu kasu sipia ripaka pusuapo. ¹² Isu pukua Saerakúsi taonea pauraka, ere fia isiamo waka risiapo. ¹³ Waka risina, Saerakúsi taoneane metakarikia pukua, Ríkiame taonea pauraka, waka keke, mituru atifo kasu keno sape aeyaka peraka, kasu maka puraka reke yia, ere hakásá faraka, Putiórae taonea pausapo. ¹⁴ Pauraka Keresoa paosa aporo mae Putiórae taonea risiomo, isu aseraka someraka, “Isuyaki sokó hakásamo waka risikianie.” Airakano iyaki hakásá waka risina, sokó hakásá faraka marekea, Putiórae taoneane metakarikia, hauaka ikia aeyaka Rome sitia hisiapo.

¹⁵ Hikia Rome sitia pauhoane, Keresoa paosa aporo mae Rome sitia risiane, isu peaki i peaki isina hakásá sapenesapo. Sapenekeea i aporo metakira, Apíase makete hauaka á perakano, isina sapenesapo. Sapenekeea marekea, i aporo metakira Ape Isia kisia á perakano isina sapenesapo. Sapenenakano, Poremo asekeea Kotiaki himu hakásaraka hemakapukua reke suseraka mapiraraka reapo.

Rome sitia Pore reane oyapo.

¹⁶ Rome sitia tipura apea Pore wasáfapo. Kamani aporomo eaki someraka, “Né ape hakua rekeane siahoasireapo. Né takaripurapaka ame aporomo né asekeea rekeakosapo.” Airakano Pore yia reapo. ¹⁷ Ayíaka reke, ere fiane yape isia faraka, Yu aporo fanaraka Rome sitia risiane sarimahoasimo Poremo peaesapo. Perakano Poremo someraka, “Maeo, isiapo aporo ira Yu aporoane nōmo mokoatikisafapo. Mokoatikihoanafonorakano yia, Yarusarame sitia Yu aporomo ano waseremaka, Rome aporomo tipura makeasimo karikia pusuapo. ¹⁸ Karikia pukua, ano hukurusuane Rome aporomo kaikia, anoaki someraka, ‘Nōmo watikiaka rakianafonosasamo, rusua kuane siahoasifareapo. Tonotaehoane siahoasireapo.’ ¹⁹ Airakano Yu aporomo waeraka, tonotaehokopo, aisapo. Airakano Yu aporoamo ano nenakamakayia rurapaka nōmo someraka, ‘Yu aporomo hokoresane Rome kamani unihae Sisamo maropohoasimo, Rome sitia ano hiako seseripo.’ Aisa nine nōmo iaki mahisirakanafapo. ²⁰ Ano tipura makesa kepoane nōmo reaki somehokoripo. Kotimo someraka, Mafasira Aporoane peakosapo, aisane Isiraya aporomo hemakapukua kau risikinapo. Arirakano Mafasira Aporo pesane nōmo aiyaka somesa akipoko, ipu ano senemo taporaka ayíaka rukua karoraka tipura makesapo.”

²¹ Aiyaka Poremo somerakano, Yu aporo Rome sitia sarimaraka risiomo someraka, “Yutía hauaka aeyaka aporo metakiramo né tipura makesane, sawi poparaka makesafapo. Arirakano Yu aporo Rome siti wo peraka neane hokoreraka pesafapo.

²² Arirakano hauaka sua aporo metakiramo someraka, ‘Keresoa paosa aporo akiyaki isina hakásá ninesafapo.’ Aiyaka Keresoa paosa aporoane hokomasapakae. Hokomasaparakano kaikia kepo hemakapukusakipoko, né Keresoa paoraka reasasamo kepoane isuaki somehoanie. ²³ Asiamo isiapo kaiyako peakosakipoko, yumo sere murikimaranapano. Sere murikimasa á paurakano, isu peakosapo.” Aiyaka ipu somesapo. Arirakano wakasema risina, sere murikimasa á paurakano, Pore rea aporo yakai pesapo. Perakano mituru some kepomarekea someraka toke yia, ereamo someaka fasapo. Poremo someraka, “Aporo hinamomo Kotiaki himu hakásaraka hemakapurakano, epo reane unihaeaka asekeea rekenapo.” Aiyaka Yasuane ipu hemakapusimo epo someraka, “Fana Yasuane Mosesemo soko, porofete aporomo soko some kasapo. Some karakano, Yasuane Kotimo sawia popasapo. Asiamo Mafasira Aporo peakosapo, aiyaka popasane Yasu ipipo.”

²⁴ Aíyaka Poremo somerakano aporo metakiramo kakimasapo. Arirakano aporo metakiramo kakiyararakano, Poremo iaki someraka, ²⁵ “Ho Kotesamo porofete aporo Aesayaki somerakano, epo isiapo makasa kaua kekemaki some kasane kakaro hoareapo. Ho Kotesamo Aesayaki someraka,

²⁶ ‘Ne pukua Yu aporo hinamoaki úyaka somehoanie. “Repo kairaka kaiyakosapo. Kaisia nine kepoane repo koteaka hemakapukusafapo. Repo aseraka aseakosapo. Asesa nine kepoane repo koteaka hemakapukusafapo,” aíyaka somehoanie. ²⁷ Asiamo aporo hinamo ane himu mahimeteraka risikinapo. Ipu himo asekea, himumo hemakapurapaka hikumisiapo. Ipu senakimo kaisiane kaiyako hisiraka, senaki tisapo. Ipu himumo hemakapuko hisiraka, koteaka hemakapurakanafapo. Ipu himu watikisane nōmo mafahoasimo i anoaki risikiako parirakanafapo.’ Aíyaka Ho Kotesamo Aesayaki somerakano popahoareapo.

(Aisaia 6:9-10)

²⁸ Arirakano makata meta soko nōmo reaki someana one, repo hemakapunie. Kotimo arareraka mafasirane Yu aporohoanafonosamo kaiyisimo, nōmo iaki some kasapo. Some karakano Kotimo someane ipu kakimakosapo.”

²⁹ [Aíyaka Poremo some kaka farakano, Yu aporo puraka, namina susu tafatafarape pusuapo.]

³⁰ Arirakano keremisi tetámo, Pore ipi ape hakua waka rekeakosakipoko, ape wafayaki mone kasapo. Mone kaka apea e reakipoko, aporo suamo e aseako pesapo. Perakano Poremo i asekea, seséraka, iane peaesapo. I perakano, iyaki hakāsa toke makata somesapo. ³¹ Poremo iaki someraka, “Aporo hinamomo Kotiaki himu hakásaraka hemakapurakanone Kotimo unihaeaka asekea rekenapo.” Aíyaka Poremo some kasapo. Arirakano some meta Poremo someraka, “Mafasira Aporo, Keresoane, Yasu ipipo. Yasu Keresoane isiapo unihaeapo.” Aíyaka mapiraraka some karakano epo someane aporo metamo rukupatesafapo.

Rome

Rome sawi one mahemakapukusa someane oyapo.

Yasu hepene yapura keremisi tuaneti sewene su (27) faraka Poremo sawi one popasapo. Sawi one Poremo popasa maiya amo Pore Korini taonea reapo. Kotipoko raiparaka rakira hinamo Fipimo sawi one maka, Rome sitia Keresoa paosa aporo hinamo risiaki makesapo.

Pore Sepéne hauaka pukusakipoko hemakapuraka, Rome sitia pekea, Rome siti aeyaka Sepéne hauaka á pukusapo. Rome sitia Yu aporo soko Yu aporohoanafonosane soko Keresoa paoraka risiapo. Rome sitia Pore pusiraka, aporo metakiramo Yasuane some kasá aeyaka aporo hinamo metakirane Yasuaki risikiako pariraka Keresoa paosapo. Asiamo Rome sése apea aporo hinamomo Yasuaki himu hakásaraka hemakapusuane kakaro ereketae hemakapusimo Poremo tariako hemakapusuapo.

Arirakano Poremo Sepéne hauaka á puko hemakapusua nine e pusuafapo. Asiāne Pore Yarusarame sitia hisiapo. Hisiane Rome ame aporomo e tipura makesapo. Tipura reane Rome sitia karikia hisiapo. Asiamo Pore Rome siti tipura apea makesa reakipoko, aporo hinamo metakira e area perakano, Yasumo someane some kasapo.

Rome sawia some kepo parakuraka popasane oyapo.

1:1-15 Poremo sawi one kepomarekeea popasapo.

1:16-17 Aporomo Kotiaki himu hakásaraka hemakapurakano Kotimo ipi ereketae ainane karápo.

1:18-3:20 Aporo hinamomo watikiaka rakirasamo Kotimo fanasinane motorapo.

3:21-4:25 Aporomo Yasu Keresoaki himu hakásaraka hemakapurakano, Kotimo yaku arareraka mafasirapo. Somemanemo aporoane mafasirafapo.

5:1-7:25 Makata kotesane soko makata watikisane soko popasapo.

8:1-39 Ho Kotesamo isu ararenapo. Arirakano Kotimo isuaki himu tumurumo hemakapurapo.

9:1-11:36 Maiya yumo Yu aporomo Yasu Keresoane kekemahoanafonosa nine, keseke Kotimo ararerakano i risikiako pariraka Yasu Keresoane kekemahokosapo.

12:1-15:13 Keresoa paosa aporoane koteaka risike someane kakimakasimo popasapo.

15:14-16:27 Poremo some meta someaka ayapasane sawi wo popasapo.

Aporo hinamo Rome sitia risiaki Poremo sawi poparaka makesane oyapo.

¹ Rome aporo hinamo reaki ano Poremo sawi one poparaka makerakanapo. Yasu Keresomo makata rakira aporo ane anopo. Yasumo ano tarira aporohoasimo murikimarakasupo. Kotimo some kotesane nōmo aporo hinamoaki some kakasimo Yasumo ano pusierakasupo. ² Arirakano, “Some kotesa kepo ane nōmo aporo hinamoaki some kakakosapo,” aíyaka wate fana Kotimo somehoareapo. Kotimo ipi ayiakakosapo aisane porofete aporomo Kotimo sawia popahoareapo. Popasane kakaro yasiapo.

³ Kotimo some kotesa amo kepoane ipi Hokosa pesa ayapo. Unihae Tefetemo aporo ira wainepe pesa á, Kotimo Hokosane aporomano kau ayíaka takapereapo.

⁴ Takapekeea hauaka wo Kotimo Hokosamo namo kakaro kotesa susu hemakapukua reareapo. Koteaka susureasamo Kotimo ipi Hokosa unihaeaka rekeasimo ipi Hokosane mawakapuhoareapo. Ipi Hokosa kusuane Kotimo maturikia taerakano, ipi Hokosa unihaeaka rekeasimo Kotimo ipi marereapo. Kotimo Hokosane epare? Ipi Hokosane Yasu Keresopo. Yasu Keresoane isiapo unihaepo.

⁵ Yasu Keresomo anoaki somesa maiya ámo Kotimo ano murikimarakasupo. Yasu Keresomo tarira aporomo rakirane rakisimo Kotimo ano arareraka murikimarakasupo. Murikimasasamo nōmo Yasupoko some karakanapo. Yu aporohoanafonosamo Yasuaki himu hakásaraka hemakapukua Yasumo ainane kekemahoasimo nōmo some

karakanapo. ⁶ Arirakano re Rome sitia aporo hinamo arisia ane, re su Yu aporofapo. Yu aporo hoanafonosa nine Yasu Kereso patera asekeasimo Kotimo re peaerakasupo.

⁷ Re suane Kotimo himu tumurumo hemakapusuasamo, epo reane peaerakasupo. Repo suamo makata watikisane kikisiraka koteaka susu rakiraka risikiasimo peaerakasupo. Asiamo Ata Kotipe Unihae Yasu Kereso tetapō re suane kamenakaraka, reaki tau auaraka risirane kakasimo, nōmo kurikurirakanapo. Aiyaka nōmo re Rome aporo hinamo suaki nōmo sawi one poparaka makerakanapo.

Rome sitia Poremo aporo hinamo aseako pukuripo, aisane oyapo.

⁸ Nōmo some fanane oyapo. Hauaka sua aporo hinamo suamo someraka, “Rome aporo hinamomo Yasuaki kakaro himu hakásaraka hemakapukua risikinapo.” Airakano kaikia, nōmo Kotiaki suserakanapo. Isupoko farimaka titipia rea aporo Yasu Keresoaki soko, nōmo suserakanapo. ⁹ Arirakano Kotimo aseane, nōmo himumo Kotiaki kekerena aeyaka ipi Hokosane aporo hinamomo hemakapusimo nōmo some kape purakano aserakanapo. Nōmo kurikuriana maiya suamo, nōmo repoko hemakapukua kurikurirakanano Kotimo ipi kairakanapo. ¹⁰ Kairakanano nōmo kurikurisane oyapo. “Kotio, Rome sitia aporo hinamo ane nōmo aseako pukuripo. Aiyaka pukusakipoko maiya káramo hemakapuraka reasasamo yumo puaere? Nōmo aoraka, ane ano pukusa ikia kárane anoaki tarinie.” Aiyaka maiya suamo nōmo Kotiaki kurikurirakanapo.

¹¹ Nōmo re aseako kára seserakanapo. Ho Kotesamo wakapuanne repo mokoasimo, nōmo re ararehokoripo. Asiamo repo Kotiaki himu hakásaraka hemakapurane kakaro káraraka risikiasimo, nōmo hemakapurakaripo. ¹² Aiyaka hemakapuraka ano apera maiya amo, repo Kotiaki himu hakásaraka hemakapusua amo anoane arare, arirakano nōmo Kotiaki himu hakásaraka hemakapusua amo reane soko arare, ayíáka isu isina hakása yia arareraka risike, isu isina yia mawakapuhokoripo.

¹³ Kereso maeo, repo hemakapusimo nōmo some one somerakanapo. Efera hunia soko, efera hunia soko, re arisia á ano peakosakipoko asiāne ano matasosapo. Arirakano ira kotesamo wate sakepamo apera ayíáka, aporo hinamo Yasu Keresoaki paoraka himu hakásaraka hemakapusuane kárahoasimo, nōmo reaki tariakoripo. Hauaka meta Yu aporo hoanafonosaki tarisia ayíáka, reaki soko tariakoripo. ¹⁴ Kotimo ano kára araresasamo, nōmo epoko rakiako kára hemakapurakaripo. Kára hemakapuraka Kiriki mé kaira aporoaki soko, Kiriki mé kaiyíánafonona aporoaki soko, makata su hemakapura aporoaki soko, makata su hemakapunafonona aporoaki soko, ipu suamo Yasu hemakapusimo some kotesane nōmo i suaki some kakakoripo. ¹⁵ Asiamo aporo hinamo re su Rome sitia risia amo Yasuane hemakapusimo some kotesane nōmo reaki some kakako peako hemakapurakaripo.

Yasu Keresoaki himu hakásaraka hemakapura aporoaki Kotimo someraka, “Nōmo ereketae ainane néaki karakanapo,” aisane oyapo.

¹⁶ Yasu hemakapusimo some kotesane nōmo some kakako ano karekerafaraka mapirarakanapo. Kotimo wakapuanne some kotesa ayapo. Some kotesane Yasu hemakapusimo some kotesa ayapo. Some kotesane aporo hinamomo kakimarakanano, iane Kotimo mafasirapo. Watikiaka rakirakanano asekea Kotimo mafasikia ipi ereketae ainane iaki karapo. Aiyaka some kotesane fana Yu aporo aki some kasesupo. Amo patera á Yu aporo hoanafonosaki some karakanapo. ¹⁷ Some kotesa akarane oyapo. Aporo hinamoane Kotimo ipi hikumisia ereketae risikiakosa ikia kara ane isiaipo some karakanapo. Wate fana soko, yumo soko aporo hinamo ereketaeraka risikiakosakipoko Kotiaki himu hakásaraka hemakapunie, aisapo. Ayíáka hemakapurakanone Kotimo ipi ereketae ainane iaki karapo. Some hakása yine wate fana porofete aporomo Kotimo sawia popahoareapo. Popasane oyapo. “Ereketaeraka risira aporo hinamomo Kotiaki himu hakásaraka hemakapukua rakipe purapo.” Aiyaka Kotimo sawia popahoareapo. (*Habakuk 2:4*)

Aporo hinamo suamo Kotiaki patera tarisiane oyapo.

¹⁸ Mayiáka rakirakano Kotimo aporo hinamo ereketaeraka risikiasimo maropo-hokosare? Aporo hinamo metakiramo Kotiaki patera tarikia, arirakano aporo hinamo metakiramo aporo hinamo metakiraki mokoatikiraka, ayiáka arakiramo, Kotimo ipi aina tarisiane aporo hinamomo hisiraka kakaro someane hemakapukuhoamo matasonapo. Matasona aporo hinamoaki Koti ipi hepene yapura reamo asekea, i suaki hisiraka saper-aka rerapo. Saperaka reke, ipi fanasinane aporo hinamo suaki kakama faserepereapo. Faserepesane makakamáhoareapo. ¹⁹ Asiāne aporo hinamomo Kotiane hemakapusimo Kotimo ipi ainane kakama tarireapo. Kakama tarisia nine, aporo hinamomo asekea hemakapufunureapo. ²⁰ Hemakapufunusa nine marirakanosare? Aporo hinamomo hímo Kotiane asekeanafonosa nine, Kotimo hauaka soko, ti soko rakisiane aporo hinamo suamo aserapo. Makata rakisiane aserakayia Kotimo ainane hemakapufunureapo. Kotimo ipi makata rakira aeyaka, ipi aina tarisiane oyapo. Koti ipi yaiya wakapuaka rerapo. Arirakano Koti ipi kakaro rekenapo. Ayiáka makata tetáne tarirakano, aporo hinamo suamo hemakapufunureapo. Hemakapufunusa nine ipu Kotiane someraka, "Kotiane nōmo asekeanafonosasamo Kotimo ainane nōmo hemakapurakarifapo," aiyaka meaka taehoane siahoasifareapo.

²¹ Aporomanomo Kotimo ainane hemakapurakayia Kotiaki someraka, "Né Koti káraro. Néaki suserakanapo." Aiyaka kekerehoafunusa nineo kekerehoafareapo. Ipu himumo koteaka hemakapurane maparitaeraka masuaraka hemaka apura ayiáka, hemakapureapo. Koteaka hemakapunafonoraka i himuane katoraka risiareapo.

²² Katosa á risike ipu someraka, "Isiapo makata su hemakapukua siaraka risikinapo." Aiyaka namina hemakapurane makáraraka rupiaka someraka risike, namina kára hasakaraka risiareapo. ²³ Kakaro kára hasakaraka risike, ipu Yaiya Rera Koti faesaki patera tarikia, yatafu yakasa hoaki kekereraka risiareapo. Aiyaka kekerehokosakipoko amano ayiáka murikimaka hokonomo rakikia, arirakano meta, mena ayiáka murikimaka rakikia, arirakano meta, saro ponomaikau ayiáka murikimaka rakikia, arirakano meta, kuyare ayiáka murikimaka rakikia, ayiáka ipu hokonomo murikimaka rakisia makataki kekereraka risiareapo.*

²⁴ Ayiáka ipu namina hokonomo makata rakisiane kekererakano asekea, Kotimo iane metakarireapo. Namina himumo watikiaka hemakapusua amo iane kirimaraka kaíyasa makatane rakiraka risike, namina kakaro watikiaka rakiraka risiareapo. Arirakano namina kaumo hemakapusuane kekemaraka hímo asekea himumo makariraka hemakapurane kekemahoareapo. Asiasamo Kotimo iane metakarireapo. ²⁵ Metakarirakano aporo hinamomo Kotimo ipi aina tarisiane[†] patera tarikia risiareapo. Patera tarikia risike, Kotimo iaki tarianafonosa makata aki patera asereapo. Makata su rakisia wafaya Kotiane kekerehoanafonoraka metakarikia Kotimo makata rakisiaki ipu kekerehoareapo. Asiamo Koti ipiaki hákasa kekerehoafunureapo. Yumo soko keseke soko, yaiya e ipi hákasaki kekerehoafunureapo. Kakaroripo.

²⁶ Aporo hinamomo Kotiane kekerehoanafonorakano Kotimo iane metakarireapo. Metakarirakano aporomo namina kaumo hemakapukua kaíyasa makatane rakiako seser-aka risiareapo. Arirakano hinamomo namina aporoane metakarikia hinamo hokosa takéyaki purareapo. ²⁷ Arirakano aporomo namina hinamo hisiraka, aporo hokosa takéyaki purareapo. Asiamo aporo takéyaki purane himu topakapurareapo. Aporo metamo aporo metaki kau kaíyasa makatane rakiraka risiareapo. Asiakipoko makata ropo watikisane Kotimo iaki karakano, i himu nekea kau teraka risiareapo.

²⁸ Arirakano ipu Kotiane hemakapuko hisiraka metakarirakano asekea, Kotimo soko iane metakarireapo. Metakarirakano Kotiaki ipu himumo hemakapunafonosasamo makata watikisane susu hemakapukua kekemaraka rakireapo. ²⁹ Makata watikisa himua komarukua risiane uyáka komarukua risiareapo. Makata kepo namoane aserafaraka

* ^{1:23:} Fana namo aporomo yakasa ho murikimarakia kau rakirapo. Kau rakikia kesanapo. [†] ^{1:25:} Kotimo ipi aina tarisiane oyapo. (1) E kakaro rekenapo. (2) Epo makata suane rakisiapo. (3) Maiya suamo ipi kakaro yaiya wakapuaka rerapo. Rome 1:18-20 á menohoanie.

asiaminapo, aíyaka somerane soko ipu topakamaraka somerareapo. Arirakano metane makata ane ayiakakopo, aisane ipu rakireapo. Arirakano metane aporo metamo makata kemo kárane ano makaripi aíyaka hemakapukua risiareapo. Arirakano metane makata umisa kárane aporo metamo aporo metaki maiya suamo karáreapo. Arirakano metane, e area ayíáka ano soko ayíáka rekearipi aíyaka hemakapurareapo. Arirakano metane, aporo metamo metane kukusimo hemakapukua rurareapo. Arirakano metane aporo metayaki werareapo. Arirakano metane, aporo hinamo metaki kotafe somerareapo. Arirakano metane, aporo hinamo metaki hokorerareapo. Arirakano metane, aporo hinamo metane hokomaka somerareapo.

³⁰ Arirakano metane, aporo hinamo metaki kotafe topakamaraka somerareapo. Arirakano metane, Kotiaki hisirareapo. Arirakano metane aporo, fanaraka risiane hurutapiako somerareapo. Arirakano metane, namina yia makáraraka somerareapo. Arirakano metane, ipu namina yano motosa rupiaka somerareapo. Arirakano metane, makata watikisane kepomarekea rakiako hemakapurareapo. Arirakano metane ipi wafaya kaíyia tetapo someane koareaerareapo.

³¹ Arirakano metane, “Nómo watikiaka rakisiakipoko nómo Kotiaki makata yakapa somehokusare?” Aíyaka hemakapurane metakarikia watikiaka rakiraka risiareapo. Arirakano metane, kotafe hokoa rukua somerareapo. Arirakano metane, aporo iraki namina yia himu tumurumo hemakapurafareapo. Arirakano metane, aporo mae metaki kamenakanafareapo. Ayíáka hemakapukua aporo hinamomo watikiaka rakiraka risiareapo.

³² Asiasamo Kotimo somemanemo someraka, “Aporomo watikiaka rakisiakipoko rusua kukusapo.” Aíyaka somemane motosane aporo hinamo suamo hemakpureapo. Hemakapusua nine koareaenareapo. Koareaeraka yaiya watikiaka rakiraka risiareapo. Ipu watikiaka rakisia ayíáka, aporo metakiramo soko hakása nineraka watikiaka rakirakano asekeia ipu someraka, “Ane siareapo,” airapo.

2

Aporo hinamomo watikiaka rakirakano Kotimo ereketaeraka takekea hukurukua paraku hokusane oyapo.

¹ Watikiaka rakira aporoaki Kotimo ipi saperaka fanasinapo. Fanasinane ereketae fanasinapo. Asiamo fanasinane nómo asekeia someraka, “Sira! Ipi watikiaka rakisia amo ropoane ayapo,” airapo. Aira aporo neaki nómo someraka, “Nómo aporo metane hukuarura maiya amo, né ní yia hukururaka sikiranapao. Nómo ní somesa maiya amo, aporo amo watikiaka arakira ayíáka, nómo soko Koti patera tarikia hakása yine watikiaka rakirapo,” airapo. ² Ayíáka watikiaka rakira aporo hinamo suamo watikiaka hemakapukua rakisiane, Kotimo ipi takekea hukurupao. Takekea hukuarura maiya ámo, ipi kepo suane hemakapukua hukurukusakipoko, ereketae susu takekea hukurukua parakunapo. Kotimo ipi ainane isiapo suamo hemakapurapo.

³ Aíyaka hemakapurasamo koteaka takekea hemakapunie. Aporo metamo watikiaka rakirakano, nómo asekeia hemakapuraka, “E watikiaka are. Eane Kotimo ipi fanasirakano siapo,” airapo. Aíyaka hemakapuraka reke yia, nómo soko hakása yineraka watikiaka rakiraka rerapo. Hakása yineraka watikiaka rakiraka rekeno, Kotimo asekeapaya-hokusare? Wae, epo néane hukurukusane metakariakosafapo. ⁴ Asiâne Kotimo reane makoteraka asekeia reke, re peasimo ipi kau reke, reane epo foaka fanasinafapo. Foaka fanasihoanafonorakano, “Kotimo fanasihokusane kakaro metakarirakanare?” aíyaka hemakapukupo. Repo Kotiaki himu hakásaraka hemakapukua risikiako parihoasimo, Kotimo re makotehokusakipoko ipi kau reke, wate foaka fanasirakanafapo.

⁵ Koti ipi kau rekeno yia, repo eaki himu hisiraka koareaeraka risikinapo. Keseke Kotimo kára sapehoasimo, repo makata watikisane taeraka umuraka risikinapo. Aporo hinamomo makata watikisane taeraka umusa akipoko, Kotimo re hukuarura maiya amo, ipi sapenane reaki kakakosapo. ⁶ Kotimo hukuarura maiya amo, aporo hinamo suamo

asekeasimo, epo ereketaeraka takekea parakuraka fanasihokosapo. Fanasina maiya amo aporo hinamomo namina rakisiane Kotimo asekea, kakaro ereketaeraka parakuraka, makata ropo kakakosapo. Aporo hinamomo makata koteaka rakisiaki, makata ropo kotesa kakakosapo. Arirakano aporo hinamomo makata watikiaka rakisiaki, makata ropo watikisa kakakosapo.

(Buk Song 62:12; Sindaun 24:12)

⁷ Aporo hinamomo maiya suamo namina koteaka susu rakiraka risike, faesa a risikiako seseaka hemakapukua, arirakano Kotimo sesehoasimo rakiako hemakapukua, arirakano Kotiyaki yaiya risikiako seseaka hemakapukua, ayíáka risira aporo hinamoaki Kotimo yaiya rerane kakakosapo. ⁸ Arirakano aporo hinamomo i namina makáraraka, Kotiane mawakasemaraka, Kotimo kakaro someane koaretaeraka ayíáka, watikiaka risia aporo hinamoaki Kotimo kára mahisiraka ropo kakaro watikisane kakakosapo.

⁹ Asiamo aporomo watikiaka rakisiakipoko makata umisa kakaro kára karakano, aporoane himu kára nakosapo. Yu aporomo watikiaka rakisiakipoko, iaki makata umisa kakaro kárane soko, himu nenane soko, Kotimo iaki kakakosapo. Yu aporo hoanafonosamo soko watikiaka rakisiakipoko iaki makata umisa kára soko, himu kára nenane soko, Kotimo kakakosapo. ¹⁰ Asiâne aporo hinamo suamo koteaka rakirakano asekea, Kotimo né kotesapo aihokosane soko, faesa á hokopukua risikiakosane soko, auaraka risikiakosane soko, Kotimo iaki kakakosapo. Yu aporo koteaka risiaki soko, Yu aporo hoanafonosa koteaka risiaki soko, i suaki makata ropo hakásá yineraka kakakosapo. ¹¹ Arirakano Kotimo aporo ira metaki himu pukua, arirakano aporo ira metaki himu punafonoraka ipi ainafapo.

¹² Kotimo somemané Moseseaki kasane Yu aporo hoanafonosamo kaisiafapo. Kaiyanafonosa nine, ipu himumo makata kotesane soko, makata watikisane soko takekea hemakapurapo. Takekea hemakapurakayia, watikiaka rakirakano, ipu takekea hemakapura aeyaka Kotimo kekemaraka iane hukurukua fanasihokosapo. Arirakano Kotimo somemané kaisia aporo amo soko, ipu himumo makata kotesane soko, makata watikisane soko, takekea hemakapurapo. Takekea hemakapurakayia watikiaka rakirakano, Kotimo ipi somemané somesa aeyaka kekemaraka iane hukurukua fanasihokosapo.

¹³ Asiamo Kotimo somemané aporomo senakimo hákasa kairakano, Kotimo “Né ereketaerareapo,” aíhokosafapo. Arirakano Kotimo somemané aporomo kakaro kakimaka rakiraka rekeno, Kotimo “Ne ereketaerareapo,” aíhokosapo. ¹⁴ Arirakano Yu aporo hoanafonosamo Kotimo somemané kaisiafapo. Ipu Kotimo somemané kaiyanafonosa nine, Yu aporo hoanafonosa metakiramo himumo koteaka takekea hemakapurua rakiraka risiapo. Ayíáka risike ipu somemané meta kotesane motosapo. Ipu somemané meta kotesane motosane kekemaraka rakiane Kotimo somemané akiyaki hakásá yinesapo.

¹⁵⁻¹⁶ Asiamo Kotimo somemané kaiyanafonosa nine, Kotimo somemané i himua Kotimo akara ayíáka, himua tarikia mahemakapurapo. Mahemakapurakano ipu himua makata kotesa susu tarisia hakásá yine kekemaraka, Kotimo somemané rakireapo. Arirakano himura makata watikisa fasereperakano kekemaraka rakisiakipoko, himu kotesa fasereperaka, “Makata watikisane rakiafunufasanine rakireapo,” airapo. Arirakano meta, himura makata watikisa fasereperakano kekemaraka rakisiakipoko, himu watikisamo himu koteaka hemakapusuane marakonapo. Asiamo hukuarura maiya amo ayiakakosane oyapo. Aporomo himura hokokaraka, “Makatane watikihoareapo. Ane rakiakopo.” Aíyaka himura mahemakapurakarakan yia kakipayaraka mahamekeia rakisiakipoko, keseke hukuarura maiya amo Yasu Keresomo mafekemahokosapo. Mafekemaraka Kotimo hukurukua parakuhokosapo. Asiamo Kotimo someane nōmo some akara maiya amo, Yasumo aporomano ararenane soko, aporomano hukururane soko, some tetáne nōmo aporo hinamoaki some karapo.

Yu aporomo Kotimo somemané kakipayasane oyapo.

¹⁷ Yu aporo repo someraka, “Isu Yu aporoane Kotimo murikimasapo. Kotimo ipi somemané isuaki kasápo. Koti isuyaki hakásá rekenapo. ¹⁸ Kotimo somemané

amo epo hemakapusuane isuaki tarirapo. Tarirakano isiapo makata ereketaesane hemakapuraka,¹⁹ aporo hi katosane isiapo karikia taripe puane siahoasireapo. Aporo hi katoso risiamo asekeasimo faesane isupo.

²⁰ Kotimo somemaneane isu Yu aporomo kakimasasamo, makata su hemakapura kepoane soko, kakaro some suane soko, isiapo hemakapurakanapo. Isiapo hemakapusuasamo aporo hasaka hemakapusuaki maroporaka tarirapo. Hokosa kirimo mahimeteana ayíáka, aporo metakiramo ayíáka mahimeteraka risiane, isiapo maroporaka tarirapo.” Aíyaka re Yu aporomo someraka risikinapo. ²¹ Someraka risike, repo aporo metakiraki tariraka yia, repo namina yia soko tariafunureapo. Repo someraka, “Makata hakimokoakopo.” Aíyaka someraka yia, repo namina soko hakimorapakae. ²² Repo someraka, “Hinamo hakimakopo.” Aíyaka someraka yia, repo namina soko hinamo hakimarapakae. Repo someraka, “Yatafu yakasa hoaki kekerehokopo,” aíyaka someraka yia, repo soko yatafumo apea pukua yatafupoko makata taesane repo hakimorapakae. ²³ Repo someraka, “Kotimo somemaneane isu Yu aporoaki kasapo.” Aíyaka repo namina yia makáraraka rupiaka somesa nine, Kotimo somemaneane repo tapikia rakirapo. Repo ayíáka rakiraka Kotiane mawakasemanapakae. ²⁴ Ainasamo Kotimo sawia porofete aporomo poparaka,

“Re Yu aporomo watikiaka rakisiasamo, Yu aporohoanafonosamo Kotimo yano motosane mokoatikirakanone ane, kepoane re Yu aporopo.” Aíyaka porofete aporomo popasane yumo kakaro yairaka risikinapo. (Aisaia 52:5; Esekiel 36:22)

Kau hahaeraka patena amo kepoane oyapo.

²⁵ Re Yu aporomo anoaki someraka, “Isu Yu aporoane Kotiaki paosa aporopo. Yu aporohoanafonosane isiapo marokerakanapo. Kotimo Eparahameaki someraka, ‘Aporo hokosa kau hahaeraka* patehoanie,’ aisasamo isiapo ayíáka kekemaraka patenapo.” Airakano nōmo reaki úyaka somerakanapo. Kotimo somemaneane kakaro kekemaraka kau hahaeraka patenane kotesapo. Asiāne Kotimo somemaneane kekemahoanafonoraka repo kau hahaeraka patenane nenakamakayia patenapo. Kotimo somemane kekemahoanafonorakanone ane, re aporo kau hahaeraka patehoanafonosa aporo ayireapo. ²⁶ Asiamo Yu aporohoanafonosamo kau hahaeraka patehoanafonosa nine Kotimo some manemo ipi himura hokokarakano kekemasasamo ipi kau hahaeraka patesa aporo asíapo.

²⁷ Arirakano Kotimo somemane popasane re Yu aporoyaki kakenapo. Repo namina kau hahaeraka patesa nine Kotimo somemaneane tapikia rakirapo. Asiāne Yu aporohoanafonosane kau hahaeraka patenafapo. Kau hahaeraka patehoanafonosa yiamo Kotimo ereketae aina tarisiane ipu kekemaraka rakisiasamo, re Yu aporoane ipu marokenapo. Marokerakano asekea aporo suamo hemakapuraka, “Re Yu aporoane Kotimo fanasihoane siahoasireapo,” airapo.

²⁸ Arirakano aporomo someraka, “Ano Yu aporopo.” Aira aporoane kau hákasa hahaeraka patesa ásia reke, ipi Kotiaki hemakuprafaraka rekeno, aporoane kakaro Yu aporofapo. ²⁹ Asiāne aporomo ipi himu watikisane metakarikia Kotiaki hemakupukua rekeno, aporoane kakaro Yu aporopo. Asiamo aporoane Kotiaki paosa aporopo. Aporo Kotiaki paohoasimo Ho Kotesamo tarirapo. Arirakano aporo Kotiaki paohoasimo somemanemo tarirafapo. Asiamo Kotiaki himu hakásaraka hemakupukua rea aporoane kakaro Yu aporopo. Aporoane Kotimo makáranapo. Aporomanomo aporoane makáranafapo.

* ^{2:25:} Kau hahaeraka patena kepo ane uyáka patenapo. Kau hahaeraka patesekeno ane, Yu aporo irareapo, airapo. Kotimo someane ipu some kakasimo Kotimo murikimayereapo.

¹ Yu aporomo someraka, “Somemanemo isu Yu aporoane mafasianafonorakano isuane maiyakakosare? Isu Yu aporo ira wainepe pesane nenakamaka makatare? Isu Kotimo aporo ira murikimasasamo, aporo kau hahaeraka patenane nenakamaka makatare?” Aiyaka somerakano, ² nōmo re Yu aporoaki some paripurakanapo. Aporo reo, Kotimo ipi makata kotesa susuane Yu aporoaki kayereapo. Fana Kotimo ipi someane Yu aporoaki some kasane, aporo hinamo suaki some kakasimo, Yu aporoaki some kayereapo.

³ Kotimo ipi someane Yu aporoaki some karakano Yu aporo metakiramo kaki-masafapo. Kakimakanafonosasamo Kotimo ipi ayiakakosaposane metakariakosare?

⁴ Wae. Metakariakosafapo. Kotimo makata ayiakakosaposane kakaro yanapo. Aporo-manomo kotafe somerapo. Kotimo ayiáka somerafapo. Arirakano Kotimo sawia popasane oyapo.

“Kotio, hukuarura maiya ámo aporo hinamoaki nōmo kakaro ereketae susu somerapo. Kakaro ereketae susu somerasamo aporomo néaki hukururaka néane hurutapi-akosafapo. Hurutapianafonorakano nōmo kakaro ereketae susu someramo ipu someane marokenapo,” aiyaka popahoareapo. *(Buk Song 51:4)*

⁵ Wate fana isu Yu aporoaki Kotimo someraka, “Nōmo somemananeane kekemaraka rakinie. Repo ayiáka rakianafonorakano nōmo hukurukua fanasihokosapo,” aihoareapo. Aisa nine isu Yu aporomo Kotimo somemananeane koaretaesapo. Koaretaerakano Kotimo ipi fanasihokosapo aiyaka somesane fansinapo. Isiapo makata watikiaka rakirakano, makata ropo watikisane Kotimo karápo. Asiamo aporo metakiramo aseraka someraka, “Kotimo ereketae rakirakanapo,” aiyaka someanamo Kotimo yano motosane makáranapo. Arirakano Yu aporomo someraka, “Isiapo makata rakisia aeyaka Kotimo yano motosane makáraranakanapo. Asiasamo Kotimo isu Yu aporoane fanasihoane siahoasifareapo.” Aihoane siahoasireare? Wae, siahoasifareapo. Aiyaka me rukua somenane, aporo namina hemakapusua aeyaka nenakamaka me rukua somerapo. ⁶ Aiyaka repo somehokopo. Kotimo hasaka watikiaka rakirafapo. Kotimo hasaka watikiaka rakira satiki, aporo hinamo su hauaka wo risiane ereketaeraka takekeea parakuhoafunufapo. Asiáne aporo hinamo su hauaka wo risiane, keseke Kotimo ereketaeraka takekeea parakuhokosapo.

⁷ Arirakano aporomo namina hemakapusua aeyaka me rukua some meta somerane oyapo. Aporomo someraka, “Nōmo kotafe somerakano, Kotimo kakaro someane repo kakama kaiyakosapo. Asiamo Kotimo yano motosane repo makáranapo. Nōmo kotafe somesa aeyaka Kotimo yano motosa makárasasamo, Kotimo ano fanasihoane siahoasifareapo.” Aiyaka somehoane siahoasifareapo. Nena aporomo aiyaka somerapo. ⁸ Arirakano aporomo namina hemakapusua aeyaka someraka, “Nōmo watikiaka rakirakano Kotimo mafahokosapo. Mafanasamo Kotimo ipi koteaka rakirakanapo. Asiamo Kotimo ipi koteaka rakirane kárahoasimo nōmo efera hunia soko watikiaka rakiakosapo.” Aiyaka aporo metakiramo somerakanapo. Ipu metakiramo anoane topakamaraka someraka, “Poremo ayikanie, aiyaka some kasapo.” Aisa aporoamo kotafe somesasamo ipu ropo watikisane mokoakosapo.

“Aporo suamo ereketae hemakapusua risikinafapo,” aisane oyapo.

⁹ Isu Yu aporoane maiyakakosare? Isu Yu aporomo Yu aporohoanafonosane marokenare? Koti hikumisia isu Yu aporoane fanare? Wae, fanafapo. Fana nōmo somesane oyapo. Yu aporomo soko Yu aporohoanafonosamo soko isiapo suamo watikiaka rakirapo. Makata watikisa wakapuamo isu kirimaraka watikiaka rakiraka risiapo.

¹⁰ Arirakano Kotimo sawia poparaka,
“Ereketae rakira aporo hinamo hakásá meta soko rekenafapo. Kakaroripo.

¹¹ Enomaka hemakapusua aporo hakásá meta soko rekenafapo. Kotiane kokoa asera aporoane hakásá meta soko rekenafapo.

¹² Aporo hinamo suamo Kotiaki patera tarirapo. Asiamo Kotimo ipi ainane kekemaraka rakira aporo hinamo hakásá meta soko rekenafapo. Aporo hinamo koteaka ararena

aporo hinamo hakása meta soko rekenafapo. Kakaroripo. *(Buk Song 14:1-3; Buk Song 53:1-3; Saveman 7:20)*

¹³ Aporo hinamomo akaimo somehoramo, aporo hinamo metakirane mokoatikinapo. Aporomano hauaka rakea maresa ikikisa ásiapo. Asiamo ipu arumo kotafe someraka tauraka somerapo. *(Buk Song 5:9)*

Hesekemo akaimo aporomano rukunesa watikiana ayíáka, aporomano akaimo makata somerane watikisa ásiapo. *(Buk Song 140:3)*

¹⁴ Akaia makata watikisane komarukua risike, ekene me somerane soko, mahisiraka somerane soko, yakasa ho marekea somerane soko i akaia komarukua risikinapo. *(Buk Song 10:7)*

¹⁵ Ipu aporo metane rusua kukusakipoko foaka ruko purapo.

¹⁶ Ipu aporo metamo menane mokoatikianamo, aporoaki ipu makata umisane karapo. *(Sindaun 1:16)*

¹⁷ Arirakano aporo hinamo metakirayaki auaraka risirane i mahimeteraka risirapo. *(Aisaia 59:7-8)*

¹⁸ Ipu Kotiaki namohoanafonoraka Kotiane makáranafapo. Aporomano suane ayíáka risikinapo." Áiyaka Kotimo sawia popahoareapo. *(Buk Song 36:1)*

¹⁹ Kaisie. Kotimo ipi somemaneane Moseseki some kasane, Mosesemo Yu aporoaki some kasapo. Asiamo somemaneane Yu aporomo kekemahoasimo, somemaneamo iane aseke rekenapo. Asiamo somemane suane Yu aporomo koteaka kaikia kekemasa nine, ipu hasaka rakirapo. Airaka ipu somemane suane kekemanafapo. Asiamo i hukuarura maiya amo, ipu Kotimo hikumisia sia somehoasifasekeno, Kotimo iane fanasihokosapo. Ayiakakosa ayíáka, aporo hinamo hauaka sua risiane, Kotimo hikumisia ereketae risikianafonorakano, Kotimo iane soko fanasihokosapo. ²⁰ Arirakano Kotimo somemanemo makata watikisane soko, makata kotesane soko, makakamáraka tarirapo. Tarisia nine aporo hinamomo watikiaka rakirakano somemane amo mafanafapo. Mafa-hoanafononasamo aporo hinamoane Kotimo hikumisia ereketaeraka risirafapo.

Kotimo ipi ereketae ainane kará kepoane oyapo.

²¹ Kotimo ipi ereketae ainane aporomanoaki kakakosaposane wate fana Mosesemo soko, porofete aporomo soko, popahoareapo. Kotimo ipi ereketae ainane aporomanoaki kakasimo aporomo somemane kekemarakano, somemaneamo aporomanoane ararenafapo. Koti hikumisia aporomano ereketaeraka risikiasimo, kepo meta aeyaka ipi ereketae ainane karápo. ²² Asiamo Kotimo ipi ereketae ainane kará kepoane oyapo. Aporo hinamomo Yasu Keresoaki himu hakásaraka hemakapukua risikino, Kotimo ipi ereketae ainane iaki karápo. Yasuaki himu hakásaraka hemakapusua aporo hinamo i suaki karápo. Yu aporoaki soko, Yu aporoanafonosaki soko, ipu suamo Yasuaki himu hakásaraka hemakapurakano, Kotimo ipi ereketae ainane i suaki karápo. Kotimo aporo metakiraki kaka, metakirane metakarikia anafapo.

²³ Aporo hinamo suamo watikiaka rakirapo. Asiasamo Kotiane namo kakaro faesa koteaka reasasamo, epo faesa kotesane aporo hinamo su fesonoraka risikinapo.

²⁴ Fesonoraka watikiaka risikino aseke, Kotimo iane kamenakaraka yaku araresapo. Aporo hinamomo watikiaka rakisiapoko apí akara ayíáka, Yasu kukusimo Kotimo Yasu Keresoane hauaka wó pusiesapo. Asiamo Yasumo aporo hinamopoko farimaka kusuasamo, Kotimo hukurukua fanasihokosane mafásapo. Aporo hinamomo watik-isapoko Kotimo sapesane mafahoko, makata ropo ane Yasu kusua ayapo. Asiamo Yasu kuraka, aporo hinamomo watikiaka rakisia akipoko apíhoko ipi yapiane hauaka wo pusuapo. Akipoko aporo hinamomo Yasuaki himu hakásaraka hemakapurakano, iaki Kotimo ipi ereketae ainane karápo.

²⁵ Yasumo apí akara ayíáka, ipi kukusimo Kotimo e pusiesapo. Arirakano Kotimo ipi ereketae ainane wate fana reane, yumo soko, yaiya ereketaeraka reane, aporo hinamoaki tarisiapo. Wate fana aporo hinamomo watikiaka rakirakano Kotimo foaka fanasihoafareapo. ²⁶ Wate fana aporo hinamomo watikiaka rakisiane Kotimo asesa nine,

ipi kau reareapo. Yasu peasiraka aporo hinamo risiane soko, yumo arisiane soko, i supoko farimaka Yasumo apí akara ayiáka e kurakano, Koti ipi kau reareapo. Yumo soko aporo hinamomo watikiaka rakirakano, Kotimo foaka fanasihoafunusa nine, ipi ereketae aina ikia karane aporo hinamoaki tarirapo. Ereketae ainane Koti ipipo. Yasuaki himu hakásaraka hemakapura aporo hinamoane Kotimo ipi ereketae ainane karápo.

²⁷ Kotimo ipi ereketae ainane karásamo aporo hinamomo ipu namina makata koteaka hemakapukua rakisiane rupiaka makárahoane siahoasireare? Wae, repo namina yia rupiaka somehoane siahoasifareapo. Kotimo somemane ane kakimaka kekemana aporo hinamoaki Kotimo ipi ereketae ainane karáfapo. Yasu Kereso ipiaki himu hakásaraka hemakapura aporo hinamoaki Kotimo ipi ereketae ainane karápo. Ereketae hemakapura kepoane Yasu ipisasamo repo namina yia rupiaka somehokosane kakenafapo. Asiamo Yasu Keresoane makáraraka somehoanie. ²⁸ Asiamo aporo hinamomo Yasuaki himu hakásaraka hemakapurakano, Kotimo ipi ereketae ainane iaki karápo. Arirakano aporo hinamomo Kotimo somemaneane kakimaka kekemarakano Kotimo ipi ereketae ainane iaki karáfapo. Ane isiapo hemakapurakaripo.

²⁹ Arirakano Yu aporomo someraka, “Kotiane Yu aporomo Koti hákasapo” Aiyaka somerakano some ane somehokopo. Yu aporomo Kotiane soko, Yu aporohoanafonosamo Kotiane soko, Koti ipi hakásaya yiyo. ³⁰ Koti ipi hakásasamo ipi ikia kara hakásaya. Kotimo ipi ereketae aina ikia kara hakásapo. Kau hahaeraka patesa aporomo Yasuaki himu hakásaraka hemakapurakano, iaki Kotimo ipi ereketae ainane karápo. Arirakano kau hahaeraka patehoanafonosa aporomo soko, Yasuaki himu hakásaraka hemakapurakano, iaki soko, Kotimo ipi ereketae ainane karápo. ³¹ Asiamo Yasuaki himu hakásaraka hemakapura aporo hinamo aki Kotimo ipi ereketae ainane karásamo Kotimo somemane ane isiapo rukupatesare? Wae, isiapo rukupatesafapo. Rukupatesapo, aiyaka hemakapukupo. Asiamo Yasuaki himu hakásaraka hemakapura aporo hinamoaki Kotimo ipi wakapuane karápo. Wakapuane karakano, aporo hinamoamo himumo hemakapukua Kotimo somemane ane koteaka kekemanapo.

4

Eparahameaki Kotimo ipi ereketae ainane kasane oyapo.

¹ Asiamo isu Yu aporomo makasa kaua kekema Eparahameane masiare?
² Eparahamemo makata koteaka rakisia nine, Kotimo ipi ereketae ainane eaki kasafapo. Kasa satiki Eparahamemo ipiane makáraraka somehoafunureapo. Asiamo aporomo koteaka rakiraka tiki rakirakao, aiane epo Kotiaki himu hakásaraka hemakapunafonorakano, ane Kotimo eaki, “ne ereketaerareapo,” airafapo. ³ Arirakano Eparahameane Kotimo sawia popasane oyapo. Eparahamemo Kotiaki himu hakásaraka hemakapukua, kataka marekea reasasamo, Kotimo ipi ereketae ainane Eparahameaki karakano, Koti ipi hikumisia Eparahameane sia reareapo, aiyaka Kotimo sawia popahoareapo. *(Stat 15:6)*

⁴ Arirakano aporomo makata rakisia akipoko makata ropo maraka, “yaku marakanapo,” aiyaka hemakapurafapo. “Makata rakisia akipoko makata ropo marakanapo,” aiyaka hemakapurapo. ⁵ Asiāne Kotimo ipi ereketae ainane aporomo makata rakisia akipoko makata ropo karáfapo. Aporomo ipi himu watikisane mafahoko someraka, “Nōmo makata rakira amo nōmo himu watikisane mafánafapo. Aporomo hinamomo himumo watikiaka hemakapusua mafánane, Kotimo ipi mafánapo. Arirakano ereketae aina karáne Kotimo ipi karápo.” Aiyaka aporo hinamomo hemakapukua, Kotiaki himu hakásaraka hemakapusuasamo, Kotimo ipi ereketae ainane iaki karápo.

⁶ Arirakano Unihae Tefetemo somesa hakásaya yine popahoareapo. Arirakano aporomo makata rakisiane Kotimo asekea someraka, “Ne aporo ereketaerareapo,” airafapo. Aporomo ipi himumo Kotiaki hemakapurakano, Kotimo asekea someraka, “Ne aporo

ereketaerareapo," airapo. Airakano aporoane seseraka rerapo. ⁷ Arirakano Tefetemo popasane oyapo.

"Aporomo makata watikiaka hemakapukua rakisiane Kotimo mafasasamo, aporoane Kotimo makotenapo. Aporomo makata watikisane Kotimo kososasamo Kotimo makotenapo. ⁸ Epo makata watikisane Kotimo mafasasamo, makata watikisa akipoko efera hunia Kotimo hukurukusafapo. Makata watikisa mafarakano, mafasa aporoane kára seseraka rekeakosapo." Aíyaka Tefetemo popahoareapo. (Buk Song 32:1-2)

⁹ Kotimo aporo makotesane aporo epa Tefetemo popahoareare? Aporo kau hahaeraka patesa hákasane Tefetemo popahoareare? Wae, aporo kau hahaeraka patesane soko, aporo kau hahaeraka patehoanafonosane soko, aporo suane epo popahoareapo. Arirakano Eparahameane hemakapunie. Kotimo sawia popasane koteaka hemakapunie. "Eparahamemo Kotiaki himu hakásaraka hemakapukua rekeno, Kotimo Eparahameaki someraka, 'Nómo anoaki himu hakásaraka hemakapusuasamo, né ereketaeraka rekenapo,' aíhoareapo." Aíyaka Kotimo sawia popasane isiapo menorakanapo.

¹⁰ Asiamo masinaka Kotimo Eparahameaki someraka, "Né ereketaeraka rekenapo," aisare? Eparahameane kau hahaeraka patehoasiraka soko metao, eane kau hahaeraka pateraka reakipoko soko metao, aisare? Eparahameane kau hahaeraka patehoasiraka Kotimo eaki someraka, "Né aporo ereketaerareapo. Né siaraka rekenapo," aíhoareapo.

¹¹ Eparahame kau hahaeraka patehoanafonosa yamo, Kotiaki himu hakásaraka hemakapukua rekeno, Kotimo eaki someraka, "Né ereketaeraka rekenapo," aíhoareapo. Aisane aporo suamo hemakapusimo Kotimo Eparahameaki someraka, "Nómo anoaki himu hakásaraka hemakapusuasamo, 'Né Kotimo aporopo,' aihokosakipoko nōmo ne murikimarakano, ne kau hahaeraka patehoanie," aíhoareapo. Arirakano aporo suane kau hahaeraka patehoanafonosamo Kotiaki himu hakasaraka hemakapukua risikino Kotimo someraka, "Re ereketaeraka risikinapo." Airapo. Arirakano aporoamo Eparahameane hemakapuraka, "Eparahameane isiapo makasa kauapo," airapo.

¹² Arirakano aporomo Kotiaki himu hakásaraka hemakapukua risike, kau hahaeraka patesamo soko, Eparahameane hemakapuraka, "Eparahameane isiapo makasa kauapo," airapo. I kau hahaeraka patesasamo airafapo. Ipu Kotiaki himu hakásaraka hemakapusuasamo, "Eparahameane isiapo makasa kauapo," airapo. Arirakano Eparahame kau hahaeraka patehoasiraka rea maiya amo, Kotiaki himu hakásaraka hemakapusua ayíáka, ipu soko Kotiaki ayíáka himu hakásaraka hemakapukua risirapo.

Aporo hinamo suamo Kotiaki himu hakásaraka hemakapusuane Kotimo makotehokosapo, aisane oyapo.

¹³ Nōmo Eparahameane some meta one somerakanapo. Wate fana Eparahamemo Kotiaki himu hakásaraka hemakapuku rekeno, Kotimo someraka, "Ne ereketaeraka rekenapo," aíhoareapo. Eparahamemo Kotiaki himu hakásaraka hemakapukua reasasamo Kotimo someraka, "Néaki soko, nōmo ní aporo ira wainepe pukusaki soko, hauaka su one nōmo reaki kakakosapo," aíhoareapo. Aíyaka Kotimo makoteraka ayiakakosaposane Kotimo someaka motoareapo. Eparahamemo Kotimo somemane kekemasasamo, Kotimo makoteraka ayiakakosaposane someaka motoafareapo. Eparahamemo Kotiaki himu hakásaraka hemakapusuasamo Kotimo makoteraka ayiakakosaposane someaka motoareapo. ¹⁴ Kotimo someraka, "Nōmo somemane kakimaka kekemana aporoaki, nōmo hauaka su one kakakosapo," aisa satiki, Kotiaki himu hakásaraka hemakapurane nenakamaka makatareapo. Arirakano Kotimo makata ayiakakosapo aisane soko nenakamaka makatareapo, aíhoafunureapo. Asiāne aporomo Kotiaki himu hakásaraka hemakapurakan, Kotimo makoteraka ayiakakosapo, aíhoareapo.

¹⁵ Asiamo Kotimo somemane aporomo kakimaka kekemahoko hemakapusua nine, somemane hakásá meta tapirakano, ane makata ropo kakakosaposane Kotimo metakarikia ipi saperaka fanasihokosapo. Asiamo Kotimo somemane kakimara aporomo

kakaro koteaka kekemahoanafonorakano, somemane hakása soko metao, rukupater-akano Kotimo ipi sapenapo. Kotimo ipi somemane motoanafonosa satiki ane, aporomo Kotimo somemane tapirakanapo, aihoafunufapo.

¹⁶ Arirakano Kotimo Eparahameaki makoteraka ayiakakosaposane Kotimo ipi some-mane koaretaena aporoaki karafapo. E ipiaki himu hakásaraka hemakapura aporoaki karapo. Kotimo ipi hemakapusua aeyaka yaku karápo. Ayíáka yaku kasane Kotimo makoteraka ayiakakosaposane Eparahamemo hokosa wainepe pesane suki kakakos-apo, aihoareapo. Eparahamemo Kotiaki himu hakásaraka hemakapusua ayíáka, isu Yu aporohoanafonosamo soko, ayíáka himu hakásaraka hemakapurakano, Kotimo ayiakakosaposane ayiakakosapo. Arirakano Kotimo ipi somemane kasa aporoane Yu aporomo Kotiaki himu hakásaraka hemakapurakano, Kotimo iaki ayiakakosaposane ayiakakosapo. Asiamo isiapo suamo makasa kauane Eparahamepo. ¹⁷ Aisa hakása yine Kotimo sawia popasane oyapo. Kotimo Eparahameaki someraka, “Nómo aporo irane kára me kekepoaka wainepe pukusapo. Wainepe apura amo ipu suamo makasa kaua kekemané népo. Néane nōmo murikimasapo.” aíyaka Kotimo somerakano popahoareapo

(Stat 17:5)

Asiamo Eparahamemo Kotiaki himu hakásaraka hemakapusua ayíáka, aporomo soko ayíáka hemakapurakano, Kotimo hikumisia aporoane Eparahamemo aporo ira wainepe pesa aporo ayapo. Eparahamemo himu hakásaraka hemakapusua, Koti amo ainane oyapo. Aporo kusuane epo maturikia taenapo. Arirakano makata namo faserepeanafonosane epo sia mafasereperapo.

¹⁸ Arirakano Eparahame ipi sisimaraka reasamo hemakapuraka, “Nómo hokosa hokono mareane siahosasifareapo.” Aíyaka Eparahamemo hemakapufunusa nine, ipi ayíáka hemakapuafareapo. Arirakano Eparahamemo hemakapuraka, “Kotimo ayiakakosaposane kakaro ayíákasimoripo,” aíyaka ipi hemakapukua, Kotimo eaki some kasane kakimaka reareapo. Kakimaka reasasamo aporo yakaimo makasa kaua kekemané epo. Fana Kotimo ayiakakosaposane hakása yineraka yasiapo. Kotimo ayiakakosaposane Eparahameaki someraka, “Nómo aporo ira wainakosane ti makata kára arisia ayíáka, nōmo aporo iramo ayíáka wainakosapo.” aihoareapo.

(Stat 15:5)

¹⁹ Aisa maiya amo Eparahamemo Kotiaki wakapuaka himu hakásaraka hemakapukua reareapo. Eparahame kakaro sisimasakipoko Kotimo eaki someraka, “Nómo hokosa hokono mareakosapo.” Airakano Eparahamemo kakaro kakimasapo. Kakimaka Eparahamemo hemakapuraka, “Ano kakaro sisimaraka keremisi wane harote (100) makeraka, kau kusua ayíáka rekenapo. Nōmo hinamo Sara soko, manokonomoraka kake, sisimasasamo hokosa hokono mareasifareapo.” Aíyaka hemakapukua rea nine, ipi yaiya Kotiaki himu hakásaraka hemakapukua reareapo. Tipiá metakarianafonoraka, yaiya Kotiaki paroaka hemakapukua reareapo. ²⁰ Kotimo kakaro ayíákakosapo ais-amo Eparahamemo hemakapuraka, “Ayiakakosapo. Ayikanarakapo.” Aíyaka himu tetaraka hemakapukua reafareapo. Kakaro himu hakásaraka hemakapukua rererape pereapo. Epo Kotiaki himu hakásaraka hemakapura aeyaka Eparahameane wakapuraka reke, Kotiaki kekeresapo.

²¹ Arirakano Kotimo ipi ayiakakosaposane, Kotimo ipi wakapumo kakaro ayiakakos-apo, aíyaka Eparahamemo ipi himetenafaraka kakaro hemakpureapo. ²² Asiasamo, “Eparahamemo Kotiaki himu hakásaraka hemakapurakano, eaki Kotimo ipi ereketae ainane kasapo,” aíyaka Kotimo sawia popahoareapo.

(Stat 15:6)

²³ Popasa ane Eparahamemo Kotiaki himu hakásaraka hemakapurakano, Kotimo ereketae ainane eaki kasane, Eparahameane hákasa popahoafareapo. ²⁴ Popasa amo kepoane Kotimo isu soko ararehokosapo, aíyaka isiapo hemakapusimo popahoareapo. Isiapo Unihae ane Yasu Keresopo. Yasu Kereso kusuane Kotimo maturikia taesapo. Maturikia taesa Kotiaki isiapo himu hakásaraka hemakapukua risikino, Kotimo asekea isuaki soko, ipi ereketae ainane karapo. ²⁵ Isiapo makata watikiaka rakisiakipoko apiana

ayiáka, Yasumo isupoko farimaka ira matopesa á kusuapo. Kotimo ipi ereketae ainane isuaki kakasimo Yasu kusuapo. Kurakano Kotimo eane maturikia taesapo.

5

Kotiyaki ereketaeraka risirane oyapo.

¹ Asiamo isiaipo Kotiaki himu hakásaraka hemakapukua risiasamo, Kotimo ipi ereketae aina kotesane isuaki karapo. Karakano isu Kotiyaki, kikinaraka risike, Kotiane soko isuyaki kikinaraka rekenapo. Kotimo isu hukurukusapoko asiāne, isiaipo Unihae Yasu Keresomo isu mafasirakano, isu su Kotiyaki tau auaraka risikiasireapo. ² Yasu Keresoane isupoko farimaka kusuapo. Kusuasamo Kotimo yaku ararenane isuaki kakasimo ikia koroane Yasumo ropakamasapo. Asiamo isiaipo Yasuaki himu hakásaraka hemakapukua, Kotimo yaku ararena ikia kara á isu puraka risikinapo. Puraka risikino, keseke Koti ipi wakapuraka rea á, isu soko eyaki hakása wakapuraka risikiakosapo. Ayiáka risikiakosamo, isu seseraka hemakapukua risikinapo.

³ Arirakano makata meta soko isiaipo hemakapuraka seseraka risikinapo. Isu kau aseakosakipoko makata umisane fasere perakano isu seseraka risikinapo. Asiamo isiaipo makata hemakapurane oyapo. Isu kau aseakosakipoko mokoatikina maiyane fasereperakano, "Kotiane metakarirakanare? O Kotiane metakarirakanafare?" aiyaka isu kau aseako perapo. Perakano Kotiaki yaiya himu hakásaraka hemakapusuane rakikia rosakataehokosapo. Paripukusane hákasa hemakapurafaraka wakapuaka hemakapukua risikiakosapo. ⁴ Wakapuaka hemakapukua risikino, Kotimo isuaki seseraka hemakapusapo. Seseraka hemakapurakano, isu eyaki hakása wakapu kára faesa á risikiakosapo, aiyaka hemakapurakaripo. ⁵ Aiyaka hemakapusuasamo isu kaýahokosafapo. Kotimo isuaki ipi Ho Kotesa yaku kasane, isiaipo himua hakása hakásaraka risikinapo. Asiamo Kotimo isuaki himu tumurumo hemakapurane Ho Kotesamo mahemakapurarakarcano kairapo.

⁶ Kotimo isuaki himu tumurumo hemakapusuane kakaro kára hemakpureapo. Isiaipo isina yia makata watikisa mafahokosane siahoasifareapo. Siahoasifasekeno asekeea aporo hinamomo makata watikisane mafahoko, Keresomo farimaka apiana ayiáka e kusuapo. Kotimo murikimasa sere a paurakano e kusuapo. ⁷ Arirakano koteaka ereketae rera aporopoko, hauaka aporo metamo eane arareraka farimaka kurafapo. Arirakano namo kakaro aporo kotesapoko, eane ararehoko isu meta kukunarakapo. ⁸ Asiāne isu yaiya watikiaka rakiraka risikino asekea, Yasumo isupoko farimaka kusuapo. Farimaka kusuasamo Kotimo ipi himu tumurumo hemakapurane isuaki tarisiapo.

⁹ Asiamo isiaipo makata watikisane mafahoko Yasu kusuapo. Yasu kusuane isiaipo watikisa akipoko ipi yapimo apiana ayiáka e kusuapo. Kusuasamo Koti hikumisia isu ereketae risikinapo. Arirakano fanasihokosa maiya amo Kotimo isuaki sapehokosakipoko asiane, Yasumo ipi yapi pusuasamo isuane epo mafasiakosapo. Asiamo Yasumo yapimo isu kára ararenapo. ¹⁰ Fana isiaipo Kotiaki yunuraka risia sereamo, Kotimo hokosa Yasumo isupoko farimaka kusuapo. Kusuasamo isiaipo Kotiaki tákeraka risikinapo. Kotiaki tákeraka risikino, Kotiyaki yaiya rera hauaka á risikiasimo, Yasumo isu pasimokoa hiakosapo. Yasu ipi turikia pukua hitaferaka reasasamo, epo isu ararehokosapo. Ane isiaipo hemakapurakanapo. ¹¹ Asiamo isu Kotiaki kataka marekeaa risiasamo isu seseraka risikinapo. Arirakano isiaipo Unihaeane Yasu Kereso ipipo. Ipi isupoko farimaka apiana ayiáka, ipi kukua turikia pusuasamo, isu Kotiyaki hakása tákeraka risikinapo.

Atamemo watikiaka rakisiakipoko Yasumo mafahoko pesane oyapo.

¹² Atamemo makata rakisiiane soko, Keresomo makata rakisiiane soko, tetakara takekea kepoane uyáka hemakapusireapo. Wate fana aporo hakása Atamemo Kotimo someane koaretaeraka watikiaka rakisisamo, makata watikisane hauaka wo faserepeareapo. Faserepeakea kakeno, makata watikisa aeyaka aporo hinamo kurapo. Aporo hinamo su Atame aeyaka wainepe pesane kurapo. Asiamo hauaka wo aporo hinamomo

watikiaka rakirasamo, aporo hinamo su kurapo. ¹³ Arirakano Kotimo somemane motoasiraka, hauaka wo aporo hinamomo watikiaka rakisiapo. Watikiaka rakisia nine, somemane motoanafonosasamo makata watikiaka rakirakano iane hukurusuafapo. ¹⁴ Hukurunafonosa nine aporo hinamo suane kusuapo. Atamemo wainepe pukua Mosesea pauhokosakipoko, wainepe pusua maiya amo, aporo hinamo su kusuapo. Kura wakapumo aporo hinamo su hurutapisiapo. Atamemo Kotimo somemane koaretaesasamo e kusuapo. E kusua ayíáka, somemane motoasiraka somemane koaretaehoanafonosa aporo hinamoane soko kusuapo. Atamemo makata ásia ámo aporomano suane suaka taesapo. Arirakano Yasumo epo makata ásia ámo soko, aporomano suane suaka taesapo.

¹⁵ Asiāne Atame soko, Yasu Kereso soko, tetāne hakureapo. Teta hakuane oyapo. Kotimo somemane motosane Atamemo koaretaesasamo, aporo hinamo su Kotimo ikia kara ane metakarikia koaraka purapo. Asiāne Yasu Keresomo Kotimo someane kakimasasamo, aporo hinamo su Kotimo ikia kára á poparipeasimo epo tarisiapo. Kotimo ipi isu kára kamenakaraka yaku arareraka tarisiapo. Aporo hakásamo Kotimo somemane motosane koaretaesasamo, aporomano su kupe pereapo. Asiāne Kotimo kára kamenakaraka, aporo hinamo suane yaku araresapo. Arareraka Kotimo ipi hokosa hakásica Keresoane pusiesapo. Pusiesa amo aporo hinamo suane epo kakaro kára yaku araresapo. ¹⁶ Arirakano Atamemo watikiaka rakireapo. Watikiaka rakisia amo ikia kara watikisane ropakamayereapo. Asiane Yasu Keresomo Atamemo ásia ayíáka ásiafapo. Yasu Keresomo koteaka rakisiasamo aporomano su ararerakano, Kotimo yaku ararena ikia kara kotesane ropakamayereapo. Asiamo aporo hakásica Atamemo yape hakásica watikiaka rakirakano, Kotimo aporo hinamo suaki hukurukua someraka, "Repo makata watikiaka rakisiakipoko, reane nōmo fanasihokosapo," aihoareapo. Arirakano aporo hinamomo yape yakai kára watikiaka rakisiane, Yasumo yaku ararena amo mafasapo. Asiamo makata watikiaka rakisiane mafasa aporo hinamoaki Kotimo someraka, "Reaki nōmo ereketae ainane karakanapo," airapo.

¹⁷ Arirakano aporo hakásica Atamemo, yape hakásica Kotimo someane koaretaeraka watikiaka rakisiasamo, aporomano su kureapo. Asiamo kura wakapuamo aporomano su asekea rekenapo. Arirakano aporo hakásica Yasumo, Kotimo someane kakimaka apíana ayíáka e ipiane kureapo. Kusuasamo kakimara aporo hinamoane yaiya rera wakapuamo asekea rekenapo. Kotimo kára yaku ararenane soko, Kotimo ereketae ainane soko, makata tetāne aporo hinamomo marakano, Koti yaiya reramo hauaka á hikia, Kotiyaki hakásica yaiya risikiakosapo.

Atamemo soko Keresomo soko tetapō makata haku ásiane oyapo.

¹⁸ Aporo hakásica Atamemo makata hakásica watikiaka rakisiakipoko, Kotimo aporo hinamo suaki fanasina motosane kura motoreapo. Arirakano aporo hakásica Yasu Keresomo makata hakásica meta ereketaeraka rakisiakipoko, Kotimo aporo hinamo fanasina motoakosane metakariraka, aporo hinamoaki yaiya rerane kaka ereketae rerane soko kayereapo. ¹⁹ Arirakano aporo hakásica Atamemo Kotimo someane koaretaesakipoko, aporo hinamo suaki watikiaka rakira aporo hinamopo, aihoareapo. Arirakano aporo hakásica Yasumo Kotimo someane kakimasakipoko, Yasumo someane kakimasa aporo hinamoaki Kotimo someraka, "Reane ereketae risira aporo hinamopo," airapo.

²⁰ Arirakano Kotimo somemaneane motoasiraka aporo hinamomo makata watikisa rakiraka risiareapo. Watikiaka rakiraka risikino asekea, Kotimo ipi somemaneane motoreapo. Asiamo makata watikisane ayareapo, aíyaka kakaro hemakapuraka makata watikiaka rakisiane aporo hinamomo asekea takekeha hemakapusireapo. Arirakano aporo hinamomo makata watikiaka rakirane káraraka faserepekeha rakiraka risiareapo. Rakiraka risikino asekea, Kotimo yaku ararenane aporo hinamo suaki káraraka faserepeareapo. ²¹ Arirakano makata watikisamo unihaeaka asekea rea maiya amo aporo hinamo kukua kesapo. Arirakano isu yaiya risikiasimo, Kotimo yaku ararenamo isuane

unihaeaka asekea rekenapo. Unihae Yasu Kereso aeyaka isuaki ereketae ainane karápo. Asiamo isu Kotiyaki yaiya risikiakosapo.

6

Makata watikisa suane metakarikia rukupatehoanie. Aisa amo kepoane oyapo.

Karesia 2:19-20; Rome 12:1; Ruki 9:23-24

¹ Aporomanomo hemakapuraka, “Nōmo fana watikiaka rakisiane Kotimo mafasasamo, efera hunia soko watikiaka rakirakano, Kotimo mafahokosapo. Kotimo yaku arareraka mafahokosasamo nōmo efera hunia soko watikiaka rakiane sihoasireapo.” Aiyaka hemakapuane siahoadireare? ² Wae, siahoadifareapo. Aporomanomo akura ayíáka, Keresoa paosa maiya amo isiapo makata watikiaka rakirane makusuapo. Asiamo aporo kusuamo makata watikiaka rakirafapo. Aina ayíáka isiapo makata watikisane kusuasamo mayíáka efera hunia hitaferaka watikiaka rakiakosare?

³ Re Yasu Keresoaki kataka marekea risikino, hea tapukumurisiapo. Hea tapukumurisia maiya amo, Yasuyaki hakása akura ayíáka kusuapo. Ane repo hemakapu-rakanapo. ⁴ Yasu kusua hauaka maresa ayíáka isu soko hea tapukumurisia maiya amo ásiapo. Ata Kotimo wakapu faesa aeyaka Yasu kusuane maturikia taerakan kawe hitaferaka area ayíáka isu soko asiapo.

⁵ Asiamo isu kakimara aporo hinamomo Yasuaki kataka marekea risikino, Yasu kusua ayíáka, isu soko eyaki hakása kusua asiapo. Arirakano Yasu maturikia taeraka kaweraka reasasamo, isu soko maturikia taeraka kaweraka risikinapo. ⁶ Aporo hinamomo himumo watikiaka hemakapukua kaumo rakirane rukupatehoasimo Yasu ira matopesa paremaresapo. Asia ayíáka isiapo soko himumo watikiaka hemakapurane ira matopesa paremaresapo. Paremaresasamo makata watikisa amo wakapuane rukupater-aka makusuasamo, makata watikisa amo isu unihaeaka asekea rekenafapo. Ane isiapo hemakapurakanapo. ⁷ Asiamo kakimara aporo hinamomo Yasuyaki kusua amo makata watikisamo isu unihaeaka asekea rerapaka isu tonotaesapo. Tonotaesasamo isu kakama ereketae risikinapo. Makata watikisamo wakapuane makusuapo.

⁸ Isu Yasuyaki hakása akura ayíáka kusuane, Yasu maturikia taesa ayíáka isu soko eyaki hakása maturikia taesa risikinapo. Maturikia taesasamo isu kaweraka risikinapo.

⁹ Yasu Kereso kusua maturikia taesane efera hunia kukusafapo. Kura wakapumo Yasuane hurutapikia unihaeaka asekea rekenafapo. Makata ainane isiapo hemakapurakanapo.

¹⁰ Yasu ipi yape hakása kusua amo makata watikisamo wakapuane rukua mosaka tapisiapo. Rukua mosaka tapikia, ipi farearako reke Kotiyaki hakása rekenapo. ¹¹ Asia ayíáka repo soko, makata watikiaka rakiako hemakapurane akura ayíáka kusuapo. Kusuasamo repo Kotipoko makata rakiako risikinapo. Re Yasuaki kataka marekea risike, Kotiyaki hakása risikinapo. Aiyaka hemakapunie.

¹² Arirakano makata watikisamo repo kauane unihaeaka asekea rekeakohoamo makata watikisane metakarikia kikisiraka risikianie. Arirakano repo kauane hauaka wo wakasema risina kukusapo. Asiamo kaumo watikiaka hemakapusua amo reaki hkokarakano, some ane repo kakimakopo. ¹³ Repo korake, hokono, kau suamo makata watikisa á paoraka rakiakopo. Kotiaki hákasa paoraka rakinie. Repo kauane akura ayíáka kusuane maturikia taesasamo, maturikia taesa kauane Kotiaki kaka Kotipoko hákasa ereketae susu rakinie. ¹⁴ Asiamo Kotimo yaku ararenamo reane asekea rekenapo. Kotimo somemanemo reane asekea rekenafapo. Asiasamo makata watikisamo reane asekea rekenafapo. Makata watikisamo ayiakanie, aiyaka somerakano, repo kaiyakopo.

Ereketaeraka risikiakosakipoko raiparaka rakirane oyapo.

¹⁵ Kotimo somemanemo isu asekea rekeanafonosasamo Kotimo yaku ararenamo isu asekea rekenapo. Asiamo isiapo watikiaka rakiane siahoadireare? Wae, siahoadifareapo.

¹⁶ Some one kakaro somepo. Nōmo ní hemakapusuane metakarikia, aporo metamo someane kekemaraka rakirakanone, aporo aporo raipane népo. Aina ayíáka makata watikisa kekemaraka rakirakanone, makata watikisamo aporo raipane népo. Arirakano

makata ereketae susuane nōmo kekemaraka rakiraka rekenone ane, ereketae reramo aporo raipane népo. Aporo raipa hakásamo aporo pose tetápoko raiparaka rakirafapo. Nōmo makata watikisane kekemaraka rakirakano, né kukusapo. Ne Kotiyaki yaiya rekeakosafapo. Asiāne Kotimo someane kakimaka kekemaraka rakirakano, né ereketaera-ka rekeasimo Kotimo ararehokosapo.

¹⁷ Fana repo makata watikisapoko raiparaka rakiraka, aporo metamo Kotimo someane some karakano, repo makata watikisane metakarikia Kotimo someane kakimaka, himu hakásaraka hemakapukua kekemasapo. Asiasamo yumo nōmo Kotiaki suserakanapo.

¹⁸ Arirakano makata watikisakipoko repo raiparaka rakirakano, makata watikisamo reane asekea reke, tipura kesa arisia ayiáka risiapo. Ayiáka risiane Yasumo tonotaesapo. Tonotaerakano Kotimo ipi ereketae ainane repo kekemaraka raiparaka rakirakanapo. Asiasamo yumo nōmo Kotiaki suserakanapo.

¹⁹ Fana repo kaumo hemakapusuane kekemasasamo, Kotimo ainane hemakapusuafapo. Repo koteaka hemakapusimo hauaka wo makata ane nōmo takumeaka somerakanapo. Hauaka wo aporomo raiparaka makata rakirane soko, aporo metamo poseraka asekea rerane soko, nōmo takumeaka somerakanapo. Someamo kepoane oyapo. Fana repo kaumo hemakapusuane kekemaraka rakiakosakipoko, repo namina kau soko, hokono soko, korake soko suane makata watikisaki karakano, makata watikisa amo reane poseraka asekea reapo. Asekea rekeno repo makata kaýasa rakiafunufasa nine repo rakisiapo. Asiāne yumo repo koteaka rakiakosakipoko repo namina kau soko, hokono soko, korake soko, suane Kotiaki kakanie. Karakano Kotimo ereketae aina amo reane poseraka asekea rekeakosapo. Asekea rekeno re koteaka susu risikikosapo.

²⁰ Arirakano makata watikisamo reane poseraka asekea rea maiya amo, repo ereketaera-ka rakiako hemakapusuafapo.

²¹ Repo makata watikisa rakisia maiya amo makata watikisamo re makotesare? Wae, makotesafapo. Repo fana watikiaka rakisiane yumo hemakapuraka re kaýaraka hikumisi mafairaka risiapo. Kaýasa makatane rakisia maiya amo, re Heao ikia kara á puraka risiapo. ²² Asiane yumo re uyáka risikinapo. Fana kaumo hemakapusuamo re poseraka unihaeaka asekea reane Kotimo reane mafasisiapo. Mafasisasamo repo Kotipoko raiparaka rakiraka risikinapo. Asiamo Kotimo reane makoteraka re koteaka ereketaera-ka risikiasimo, Kotimo reane arareraka rekeakosapo. Kotimo reane ararerakano reane Kotiyaki hakāsa risina, keseke soko Kotiyaki yaiya risikiakosapo. ²³ Arirakano makata watikisa amo ipi aporo raipaki makata ropo karapo. Makata ropo ane Heao hauaka ayapo. Asiane Kotimo ipi aporo raipaki yaiya rerane yaku karapo. Unihae Yasu Keresoaki isiapo kataka marekea risikino, Yasu Kereso aeyaka Kotimo yaiya rerane isuaki karápo.

Yasuaki kataka marekea risiakipoko eyaki hakāsa akura ayiáka kaumo hemakapusuane kusuapo. Aisa amo kepoane oyapo.

¹ Maeo, re kakimara aporo hinamomo hemakapusimo some meta reaki nōmo someraka oyapo. Aporo mano hitafe areamo somemanemo e asekea nina akuramo somemanemo e asekea rekeakosafapo. Ane repo somemane hemakapura aporomo hemakapurakanapo. ² Aina ayiáka somemaneane uyáka motosapo. “Hinamo aporo aseamo ipi apia hitafe rekeno, ipi apiayaki hakāsa kakanie. Ipi apia hitafe rekeno yia, aporo metayaki mokome pukupo.” Aíyaka somemane motosapo. Arirakano hinamo ipi apiane kurakano, ipi apiamo ape yia kakanie, aíyaka somemane motosafapo. ³ Arirakano hinamomo ipi apia rekeno yia aporo metayaki purakano, hinamoane aporo rea pura hinamopo airapo. Asiamo ipi apia kusuakipoko hinamo yaroane aporo metamo arumarakano hinamoane aporo rea pura hinamopo, airafapo.

⁴ Maeo. Re Yasu Keresoaki kataka marekea risikinapo. Risike somemane kekemaraka rakisiane Yasua paosa sereamo akura ayiáka kusuapo. Kusuasamo hinamo ipi apia kurakano aporo meta apura ayiáka re Yasuyaki hakāsa paoraka purakanapo. Maturikia

taesa aporoane Kereso ipipo. Eyaki re hakāsa purakanapo. Puraka Kotipoko hakasa koteaka susu rakiako purakanapo.⁵ Isu Yasuaki risikiako parihoasiraka, kaumohemakapusuane kekemasapo. Kotimo ipi somemanemo someraka, ayiakakopo, aisa ane kaumohemakapusua amo rakiako seseraka, ayiáka rakisiapo. Rakiraka isu Heao ikia kara á puraka risiapo.

⁶ Somemanemo isu tipura akera ayiáka kesapo. Tipura kesa kusua asíane yumo tonotaesapo. Tonotaeraka Kotimo somemanemo isu poseraka asekea rekenafapo. Asiamo somemanemopopasane isiapo kekemaraka Kotipoko ayiáka rakirakanafapo. Arirakano Ho Kotesamo isu himua mahemakapurakano isiapo kekemaraka Kotipoko ayiáka rakirakanapo.

Somemanemo makata watikisa tarirane oyapo.

⁷ Isiapo someraka, "Somemanane watikirareapo." Aiyaka somehoane siahoasireare? Wae. Siahoasifareapo. Somemanane watikisafapo. Somemanemotoanafonosa tiki nōmo makata watikisane hemakapufunufapo. Asiamo somemanemo someraka, "Aporo metamo makatane aseraka ano makaripi aiyaka hemakapukupo," aiyaka somemanemo somesapo. Somerakano kaisiasamo metamo makatane ano makaripi aiyaka hemakapurakanapo. Somehoanafonosa satiki ane hemakapufunufapo. *(Kisim Bek 20:17; Lo 5:21)*

⁸ Somemanemotosakipoko makata watikisa amo watikiaka rakira ikia kara ane ropakamaka ano kirimasapo. Kirimaraka, aporo metamo menane ano makaripi, aiyaka hemakapusuane makárasapo. Makárasasamo ano ni yia mokoatikisapo.

⁹ Fana somemanemo ayiakakoposane nōmo hemakapunafonoraka reapo. Hemakapunafonoraka rea sereamo, "Kotimo hikumisia ano siareapo," aiyaka nōmo hemakapusuapo. Hemakapusua nine keseke somemanemotoraka, "Aporo metamo makatane ano makaripi aiyaka hemakapukupo." Aisane kaikia aporo metamo makatane mako hemakapusuane káraraka takahisiapo. Takahinakano asekea Kotimo somemanekoarentaeraka rerane rekeako hemakapusuapo. Hemakapuraka Kotimo hikumisia ano rekeane siahoasifareapo, aiyaka hemakapusuapo.¹⁰ Arirakano Kotimo somemanemo yaiya rera ikia kara tariafunusa nine, kura ikia karane tarisiapo.

¹¹ Somemanemo someraka, "Watikiaka rakiakopo." Aisa nine makata watikisamo ano mahoperaka kirimarakanano nōmo kekemaraka rakisiapo. Kekemaraka rakisiasamo ano akura ayiáka kusuapo.¹² Asiamo somemanane Kotimo somepo. Ayikaniesane soko, ayiakakoposane soko, hakāsa hakásaraka ipi ainapo. Aporo metaki ayikaniesane soko ayiakakoposane soko ereketae susupo. Somemanane kotesa susupo.

¹³ Asiamo Kotimo somemanekotesa susuamo ano rusua kusuare? Wae. Nōmo aiyaka somerakanafapo. Somemanemo ano rusua kusuafapo. Makata watikisamo ano kirimaraka rusua kusuapo. Rusua kurakano makata watikisamo kepoane kakaro watikisapo aiyaka kakama tarirapo. Somemanekotesamo makata watikisa tariane nōmo watikiaka rakirakanoso asekea ano rusua akura ayiáka rusua kusuapo. Asiamo somemanemo makata watikisa kepoane namo kakaro watikisapo, aiyaka hemakapusimo somemanemo tarirapo.

Makata tetamo kirimanane oyapo.

¹⁴ Asiamo makata one kakaroripo. Kotimo somemanemo Kotimo hemakapusuane isuaki kakama tarirapo. Asiāne anoane aporomanopo. Aporomanomo kaumohemakapusuane apura ayiáka, kaumohemakapusuane kekemaraka raiparaka rakirapo.¹⁵ Makata watikiaka raiparaka rakirane mainakanorakirakanarakapo. Ane ano himeteripo. Nōmo koteaka rakiako seseraka hemakapukupo ayiane koteaka rakirafapo. Arirakano nōmo watikiaka rakiako hisiraka hemakapusuane watikiaka rakirapo. Ayianane mainakanarakapo.¹⁶ Nōmo makata watikisane rakiako hisiraka hemakapusuane watikiaka rakirapo. Amo kepoane yakapare? Kotimo

somemanemo ayikaniesane soko, ayiakakoposane soko, nōmo kakimaka aorakanapo. Arirakano Kotimo somemaneane kotehoareapo, aiyaka nōmo hemakapurakanapo.

¹⁷ Nōmo hemakapuraka, “Nōmo watikiaka rakiakosafapo.” aiyaka hemakapusua nine watikiaka rakirapo. Nōmo nī hemakapusuane rakirafapo. Makata watikisane ano himua reke, nōmo hemakapurane kirimarakano nōmo watikiaka rakirapo. ¹⁸ Asiamo ano nī rerane asekea hemakapuraka ano himua makata reane kotesafapo. Ano nī kaum hemakapukua rakira amo nōmo ainane makotesafapo. Makotehoanafonosamo nōmo koteaka rakiako seseaka hemakapusua nine koteaka rakira wakapuane kakenafapo.

¹⁹ Arirakano koteaka rakiako seseraka hemakapuko ayiane koteaka rakirafapo. Arirakano watikiaka rakiako hisiraka hemakapusuane watikiaka rakipe purapo. ²⁰ Asiamo nōmo himumo makata rakiako hemakapunafonosane nōmo rakirakanone ane kakaro nōmo nī rakirakanafapo. Makata watikisane ano himurareasamo ipi yiamo rakiakanapo.

²¹ Asiamo nōmo makata kotesa seseraka rakiako ayiane, makata watikisamo foakaya kirimanapo. ²² Asiane nōmo himu tumurumo Kotimo somemaneane hemakapurakanapo. ²³ Himumo Kotimo somemaneane hemakapukua rakiako ayiane, kaua someman meta soko anoyaki hakāsa reasasamo, tati kakanakeraka rekenapo. Himumo ipi ayiakakoposane, kaum hemakapusua amo marokeraka, kaum hemakapusuane fanāraka ipi rakirapo. Asiamo kaum somemane a ano tipura amakera ayiáka makesapo. ²⁴ Ano nī yia kaíya. Ano aporo watikisapo. Kaum hemakapusua amo ano kirimaraka, kura ikia kara á purapaka, epamo ano mafasiakosare? ²⁵ Unihae Yasu Keresomo isu mafasiasamo nōmo Kotiaki suserakanapo. Arirakano makata tetámo ano kirimanapo. Nōmo himumo hemakapuraka, “Kotimo somemane kakimakosapo.” Aiyaka hemakapuko ayiane kaum hemakapuraka, “Watikikaka rakisie,” airakano watikiaka rakirapo.

8

Isiapo makata watikisane Yasu Keresomo mafaraka, isuaki Ho Kotesamo kasane oyapo.

¹ Isiapo Yasu Keresoaki katakamarekeasomeakamotosakekemasasamo, isiapo watikisakipoko Kotimo hukurukua fanasihokosane someaka motosa kakenafapo. ² Isiapo watikiaka rakisiasamo isu kura ikia kara á pusuapo. Asiane Ho Kotesamo wakapuamo isu makokorotaesapo. Isiapo Yasuaki katakamarekeasomeakamotosakekemasasamo, isiapo himu ra unihaeaka asekea rekeno, kaum hemakapusua amo isu unihaeaka asekea rekenafapo.

³ Isiapo kaum hemakapusuane kekemasasamo somemane fana motosa amo makata watikisamo wakapuane mafasafapo. Mafahoanafonosa nine makata watikisamo wakapuane Kotimo mafasapo. Mafahoko ipi hokosa hakāsa nine hauaka wo pusiesapo. Pusierakano ipi hokosa ane aporomanomo kauane maka, hauaka wó pekea reapo. Aporomanomo kauane maka rea nine, kaum hemakapusuane epo kekemasafapo. E kakaro koteaka susu reane, isiapo kaum makata watikiaka rakirane epo masapo. Yasumo isupoko apí akara ayiáka e kusuapo. Kusuasamo isiapo watikiaka rakisiakipoko isu fanasihokosane Kotimo Yasuaki kasapo. ⁴ Isu fanasihokosane Yasumo mainakano masare? Kotimo somemane aeyaka makata ayiakakoposane soko, makata ayikaniesane soko, isiapo ereketae kekemahoanafonorakano isuane fanasihokosapo. Fanasinane isuaki kakakosapoko asiāne, Yasuaki kasasamo isuane tonotaesapo. Tonotaesasamo isiapo kaum hemakapusuane metakarikia Ho Kotesamo hemakapusuane kakimaka risike Kotimo somemaneane kakaro koteaka hemakapukua rakirapo.

⁵ Arirakano kaum hemakapusuane kekemaraka rakiraka rekeno, himumo soko kaum hemakapusua hakāsa nine hemakapuraka rerapo. Asiāne Ho Kotesamo ayikaniesane kekemaraka rakiraka rekeno, himumo soko Ho Kotesamo hemakapurane hakāsa nine hemakapuraka rerapo. ⁶ Asiamo kaum hemakapusua hakāsane hemakapukua rekeno ane, akuramo Kotiyaki yaiya rekeakosafapo. Asiāne Ho Kotesamo ayikaniesane hakāsa hemakapukua rekeno ane, Yumo koteaka rekeno, keseke soko Kotiyaki koteaka

yaiya rekeakosapo. ⁷ Kaumo hemakapusuane hákasa kekemaraka rakiraka rekeno, Kotiaki yunuraka rekenapo. Kaumo hemakapusuane hákasa hemakapukua rakiraka rekeno, Kotimo somemanne kakimakasifareapo. Kotimo somemanne kekemahoko hemakapukua asiāne kekemahokosane wakapu faraka kakimakasifareapo. ⁸ Asiamo kaumo hemakapusuane hákasa hemakapukua kekemaraka rakira aporo amo Kotiane masesehoasifareapo.

⁹ Arirakano re himua Kotimo Ho Kotesane kakaro reke, Ho Kotesamo re himua mahemakapurakarano repo kaikia kekemanapo. Kaumo hemakapusuane repo kekem-anafapo. Arirakano Ho Kotesa Keresomo pusiesane re himua rekeanafonorakano, ane re Kereso menafapo. ¹⁰ Arirakano Ho Kotesa Keresomo pusiesane re himua rea nine, repo kauane kukusapo. Aporo hinamo suamo watikiaka rakisiasamo isu kauane kukusapo. Asiāne Kotimo isiapo ainane maereketaeraka makotesasamo e ipi yaiya rerane isiapo himua risikinapo. ¹¹ Yasu kusua maturikia taesane Koti ipipo. Ipi Ho Kotesane re himua risiasasamo Yasu maturikia taesa Koti amo repo kau kusuane soko maturikia taehokosapo. Ipi Ho Kotesa repo himua risikino asekea, Kotimo maturikia taehokosapo.

¹² Asiamo maeo, Ho Kotesa re himura reasasamo kaumo hemakapusua amo re asekea rekenafapo. Asiamo kaumo hemakapusuane kekemaraka rakiane siahoasifareapo.

¹³ Repo kaumo hemakapusua kekemaraka rakiraka risikino Kotimo reane fanasihokosapo. Arirakano Ho Kotesamo reane ararerakano, makata watikisane rusua kusua ayíáka, rukupateraka metakarikia, re Kotiyaki yaiya risikiakosapo. ¹⁴ Ho Kotesamo aporo hinamoaki ayikaniesane kekemaraka rakirakano, ane Kotimo aporo hinamoane ayapo.

¹⁵ Fana repo Kotiane hemakapuraka, "Kotimo isu fanasihokosapo," ayíáka hemakapukua namoraka risiapo. Asiāne yumo Ho Kotesane repo himua risikiasimo Kotimo pusiesapo. Re manamohoasimo Ho Kotesa repo himua maresare? Wae, re karikia nasimo maresapo. Marekea epo karikia nesasamo isiapo Kotiaki "Atao" airapo. ¹⁶ Airasamo isiapo himumo hemakapuraka, "Ano kakaro Kotimo hokosapo," airakano Ho Kotesamo soko hakásá yineraka someraka, "Né Kotimo hokosapo," airapo. Aíyaka tetá tati hakásá siasapo.

¹⁷ Asiamo isuane Kotimo hokosasamo, ipi hokosapoko makata kotesa taesane isuaki kakakosapo. Kotimo Yasuaki kasa ayíáka, isuaki soko kakakosapo. Asiāne fana Yasumo makata umisa masa ayíáka, isiapo soko ayíáka makata umisa makosapo. Yasumo ipi makata umisa masasamo Kotimo e makárasha ayíáka isiapo soko makata umisane marakano, Kotimo isuane makárahokosapo.

Keseke hepene yapura koteaka risikiakosane oyapo.

¹⁸ Sere omo makata umisa masa kára nine, namo kakaro kárafapo. Keseke Kotimo isu makotehokosane namo kakaro kárapo. Asiamo Kotimo isu makotehokosane yumo asekeanafonosane, keseke aseakosapo. Aíyaka nōmo hemakapurakaripo. ¹⁹ Kotimo ipi hokosa makotehokosa maiya ane fasere perakarihoamo Kotimo ipi rakisia makata amo suamo Kotimo ayikasimoripo, ayíáka kau risikinapo. ²⁰ Kotimo ipi makata su rakisia maiya amo siaraka rakisiapo. Ayíáka rakisia nine makata watikisane tipia faserepesapo. Fasereperakano Kotimo fanasinane motosapo. Kotimo makata rakisia amo hemakapusua aeyaka ásiapapo. Kotimo ipi hemakapusua aeyaka ásiapo. Makata suane makawehoko ayikanie ayíáka kau risikiasimo Kotimo murikimasapo. ²¹ Yumo makata suane kukua torenane, keseke Kotimo makotehokosapo. Makoteana maiya amo ipi makata rakisiane kukua torehokosafapo. Ipiaki paosa aporo hinamoane kurane faraka, Kotiyaki faesa takua yaiya risikiakosapo. Yaiya risikino Kotimo iane makotehokosapo. Makata su Kotimo rakisiane soko Kotimo makotehokosapo.

²² Hinamo hokosa taka apera maiya amo hinamo mokoweraka pūane ayíáka, Kotimo rakisia makata amo pürakanapo. Makata watikisa faserepesa maiya anaka kepomarekea pesa amo, Kotimo rakisia makata suamo püraka mokoweraka risikinapo. ²³ Arirakano isu Kereso aporo hinamoane soko yaiya mokowekea püraka risikinapo. Arirakano Kotimo ipia paosa aporo hinamoaki makata kakakosaposane, fana kasane ipi Ho Kotesa ayapo. Ipi Ho Kotesa isuaki karakano aporo hinamo suamo hikumisia Kotimo isuane

ipi hokosapo, aihoasimo pūana ayíáka pūraka kau risikinapo. Isuaki kau kaweané haku akara maiya amo isuane ipi hokosapo, aihokosapo. ²⁴ Arirakano watikiaka rakira takua Kotimo isu mafasisiapo. Mafasisiasamo isuane Kotimo makata su ayiakakosaposane ayiakasimo isu kau risikinapo. Makata ayiakakosaposane faserepeasimosapo, aíyaka kau nina fasereperakano, aseraka efera hunia kau risikiakosafapo. ²⁵ Makata faserepeasimosapo aíyaka kau nina faserepeanafonarakano soko himu hakasaraka hemakapusuane metakarirafaraka yaiya hemakapukua risike kau risikiakosapo.

²⁶ Kau risike rakipe pusimo Ho Kotesamo isu ararenapo. Isu kau aseakosakipoko makata umisa karakano Kotimo ipi ikia kara á isu puraka wakapuraka purakanafapo. Wakapuraka punafonorakano Ho Kotesa isuyaki hakāsa paoraka reke, isiapo makata tomekesane epo ararenapo. Mokoatikiana maiya amo soko, kau aseakosa sere amo soko, isu Kotimo ikia kara á pukusane wakapuhoanafononasamo Ho Kotesamo isu ararenapo. Asiamo isiapo mayiaka kurikurihoanarakapo, airakano Ho Kotesamo isuane farimaka, isiapo makata umisamo kepoane hemakapukua ipi meaka Kotiaki somerapo. ²⁷ Kotimo hemakapusua aeyaka Ho Kotesamo asekea kurikurinapo. Kakimara aporo hinamoane Ho Kotesamo arareraka farimaka kurikurinapo. Arirakano aporo hinamomo himumo hemakapusuane asera Koti amo Ho Kotesamo hemakapusuane soko epo aserapo.

²⁸ Kotimo ararena metane soko isiapo kakaro hemakapurakanapo. Kotiaki himu tumurumo hemakapura aporo hinamo akipoko susu makata umisa soko, makata kotesa soko, makata su fasereperane Kotimo ipi maroporaka makotenapo. Wate fana Kotimo ipi keseke makata faserepeakosane hemakapukua fasapo. Ipi hemakapusua ikia kara á i kekemahoasimo aporo hinamoane murikimosapo. ²⁹ Ipiaki himu hakasaraka hemakapukusa aporo hinamoane Kotimo ipi wate fana murikimoyareapo. Ipi Hokosa Yasumo aina ayíáka iane soko ayíáka risikiasimo Kotimo hemakapukua, iane wate fana murikimoyareapo. Ayíáka murikimosa aporomo mae fanane Kotimo ipi Hokosa ayapo. Kotimo Hokosa amo mae kesekeane murikimosa aporo ayapo. ³⁰ Arirakano wate fana murikimosa aporo hinamo ane Kotimo pasimoreapo. Pasimosa aporo hinamoaki Kotimo ipi ereketae ainane kayereapo. Ereketae aina kasa aporo hinamoaki yaiya rerane kakakosapo. Yaiya rerane karaka, ipi faesa hauaka á i Yasuyaki hakāsa risike, makata su asekea risikiakosapo.

Isuaki Kotimo himu tumurumo hemakapurane oyapo.

³¹ Asiamo Kotimo ásiane soko, Kotimo ariraka areane soko, isiapo maíyaka some-hokosare? Kotiane isu arisia takua rekeno, epamo isuyaki yunu wekeea hurutapiakosare? Wae, metamo isuane hurutapiakosafapo. ³² Kotimo ipi hokosa isuaki kakakosane karekesafapo. Karekerafaraka isu suane ararehoasimo ipi hokosa pusiesapo. Asiamo makata metakira soko isuaki kakakosane metakariakosare? Wae, metakariakosafapo. ³³ Arirakano Kotimo murikimokoa pasimosa aporo hinamoane aporo metamo hukurukusare? Wae, hukurukusafapo. Kotimo ipi pasimosa aporo hinamomo makata watikiaka rakisiane Kotimo mafáraka iaki ipi ereketae ainane kasapo. Kasasamo iane aporo metamo hukurukusafapo.

³⁴ Arirakano epamo Kotimo pasimosa aporoaki fanasihoko someaka motoakosare? Yasu Keresomo ayiakakosare? Wae, Yasu Kereso isupoko farimaka apiana ayíáka ipi kusuapo. Ipi kusuane Kotimo maturikia taesapo. Maturikia taeraka pipu yumo Yasu Kotimo hokono tumuru takua hepene yapura areane Kotimo maresapo. Kotimo isuane ararehoasimo Yasumo isupoko farimaka kurikuriraka rekenapo. ³⁵ Asiamo Yasu Keresomo isuaki himu tumurumo hemakapusuane makata metamo tipia matasohokosafapo. Makata umisa faserepeakea, arirakano meta himu nena faserepeakea, arirakano meta isiapo Kotimo somemané kekemasapoko isu mokoatikina faserepeakea, arirakano meta makata nakosa faraka meamoraka risike, arirakano meta pasu faraka risike, arirakano meta aporomo “Néaki weakosapo.” aira maiyane faserepeakea, arirakano meta aporomo isu rusua kukua, ayíáka makata suamo Yasu Keresomo isuaki himu tumurumo hemakapusuane matasohokosafapo.

³⁶ Makata su ayiáka faserepeakosane Kotimo sawia popahoareapo. Tefetemo Kotiaki someraka, “Kotio, isu nōmo aporo hinamosasamo maiya suamo néaki hisisa aporomo isuaki someraka, ‘Reane rusua kukusapo.’ Aiyaka saro sipi ruko murikiamara ayiáka isu soko ayiáka ruko murikimarakanapo.” Aiyaka Kotimo sawia popahoareapo. *(Buk Song 44:22)*

³⁷ Arirakano Kotimo isuaki himu tumurumo hemakapusuane makata watikisa fasereaperamo matasohokosafapo. Yasu Keresomo isuaki himu tumurumo hemakapuraka, isupoko farimaka kusuapo. Kusuasamo epo ipi isu kára araresapo. Araresasamo yumo soko isu ararerakano makata watikisa fasereperakano isiaipo marokehokosapo.

³⁸ Asiamo some one kakaro somepo. Yasumo isuaki himu tumurumo hemakapusuane makata hakása metamo matasohokosafapo. Isu akura maiya amo soko, isu hitafe arisia maiya amo soko, makata umisa fasere apera maiya amo soko, makata amo Yasumo isuaki himu tumurumo hemakapusuane matasonafapo. Arirakano hepene aporomo soko, yatafumo unihae amo soko, yumo makata ainamo soko, keseke makata ayiakakosamo soko, mokoatikina makata wakapumo soko, ³⁹ ti yapura makata risiamo soko, hauaka wo makata risiamo soko, Kotimo rakisia makata amo soko, makata amo suamo Kotimo ipi himu tumurumo isuaki hemakapusuane matasohokosafapo. Unihae Yasu Keresomo isu ararehoko pusiesa amo isuaki Kotimo ipi himu tumurumo hemakapusuane tarisiapo.

9

Yu aporo hinamomo Yasuaki himu hakásaraka hemakapunafonorakano Poremo kára hemakapusuane oyapo.

¹⁻² Ano Keresoa paosa aporosasamo nōmo reaki kakaro somerakanapo. Kotafe hokomareako somerakanafapo. Nōmo someane oyapo. Nōmo aporo ira Isiraya aporomo Yasuaki patera tarisiapo. Asiasamo Isiraya* aporopoko maiya suamo nōmo kára hemakapuraka himu nekea rekenapo. Aiyaka nōmo somesane ano himura Ho Kotesamo soko hakasa yine kakarorakae aiyaka somerakanapo.

³ Isiraya aporoane nōmo aporo ira hakasapo. Isiaipo suamo me hakása somerapo. Iane nōmo nī aporo táképo. Arirakano ipu Yasuaki patera tarisiasamo iane Kotimo fanasihokosapo. Iane Kotimo fanasinapaka, i fanasihokosane Kotimo anoaki kakarie, aiyaka hemakapurakanapo. I fanasinane metakariraka, ano Yasuaki paosane Yasumo ano metakarirakano, ane fanasina amo ropoane, nōmo amara ayapo. Ayikasimo nōmo hemakapurakaripo.

⁴ Isiraya aporoane Kotimo kára araresapo. Isiraya aporoane Kotimo ipi hokosa pariraka risikiasimo iane pasimoyereapo. Arirakano Koti ipi iyaki hakása reke, ipu hemakapusimo Koti ipi ti pakae faesa ira rufi ásiáne iyaki hakása reareapo. Arirakano Kotiane Isiraya aporoyaki reke, someaka mayereapo. Someaka maraka iaki Kotimo ipi somemané karaka, ūri Sainae á Moseseaki Kotimo ipi somemané kayereapo. Arirakano Isiraya aporomo Kotiane koteaka kekerehoasimo Kotimo iane ararehoareapo. Ayiáka iane makotehokosakipoko Kotimo someaka mayereapo.

⁵ Arirakano isiaipo makasa kaua kekema Eparahame soko, Aisake soko, Yakope† soko, ipu wainepe pesane Isiraya aporo ayapo. Ipu aporo ira aeyaka Yasu Keresoane isu aporo hinamomo kauane maka takapesapo. Asiāne Yasuane kakaro Kotipo. Asiamo makata suamo unihaeane Yasu ipipo. Yumo soko keseke soko aporo hinamo suamo Yasu yano motosane makama fanaraka kekereraka risikiasimoripo. Kakaroripo.

“Kotimo nena somesafapo,” aisane oyapo.

⁶ Isiraya aporoaki Kotimo ayiakakosaposane nena somesare? Ayiakakosaposane metakarisiare? Wae. Metakarisiafapo. Isiraya aporo ira wainepe pesa yine suamo kakaro

* 9:1-2: Isiraya aporoane Yu aporo hakása yiyapo. † 9:5: Yakope ipi yano motosa metane Isiraya airapo. (Stat 32:28; 35:10)

Isiraya aporomo aina ayíáka anakanafapo. ⁷ Arirakano Eparahamemo aporo ira wainepe pesapo, aihorane Eparahamemo ipi kaumo hemakapusua anaka hokosa hokono murisia amo wainepe pesa aporoane airakanafapo. Asiane Kotimo Eparahameaki someraka, “Aisake aeyaka aporo ira wainepe pukusane nōmo ní aporo irane ayapo,” aihoareapo. *(Stat 21:12)*

⁸ Aisa amo kepoane oyapo. Kaumo hokosa hokono murisia suane kakaro Kotimo hokosafapo. Kotimo ayiakakosaposane kakimasa aporoane kakaro Kotimo hokosapo.

⁹ Asiamo Kotimo ayiakakosapo aisane epo someraka, “Sere meta nōmo murikimasa maiya a paurakano, ano efera hunia pariaperamo Saramo aporo hokosa hokono mareakosapo,” aíyaka somehoareapo. *(Stat 18:10, 14)*

¹⁰ Kotimo some meta soko repo hemakapusimo Kotimo ayiakakosaposane ayiana ayareapo. Aisane oyapo. Aisakemo ipi asea Repekeamo hokosa tetásā umiraka kayapo.

¹¹ Umiraka kakeno hokosa tetásā mano Isope Yakope tetā takapeasiraka umiraka kaya maiya amo, hokosa hakásane Kotimo ipi fana murikimayereapo. Eparahamemo aporo ira wainepe pusimo Kotimo ipi hemakapusua aeyaka hokosa hakásane murikimayereapo.

¹² Hokosa tetásā takapeasiraka hokosa amo makata kotesane soko makata watikisane soko rakiasiraka, Kotimo ipi hemakapusuane kekemaraka rakisimo hokosa hakásane ane Kotimo murikimayereapo. Murikimaka hokosa takapeasiraka hokosa tetamo kaīya Repekeaki Kotimo someraka, “Hokosa fana taka aperamo ipi mamanea kesekepoko rakiakosapo,” aíyaka Kotimo Repekeaki somehoareapo. *(Stat 25:23)*

¹³ Somesa hakásā yine porofete aporo metamo popasane oyapo. Kotimo someraka, “Yakopeane nōmo makotehoko hemakapukua rea yine kekemaraka murikimarakanapo. Isomo Yu aporo ira wainepe pusimo nōmo hemakapurakanafapo. Eane nōmo murikimarakanafapo.” Aíyaka someraka porofete aporomo popahoareapo. *(Malakai 1:2-3)*

¹⁴ Asiasamo isiaipo Yu aporo metakiramo someraka, “Hokosa hakásā murikimaka makotesasamo Kotimo siaraka hemakapuafareapo,” aíyaka somehokopo. ¹⁵ Yu aporomo Kotiane patera tarikia saro ponomakau kekererakano, Kotimo iaki saperaka fanasihoko-hoamo Mosesemo ipoko farimaka Kotiaki kurikurihoareapo. Kurikurirakano Kotimo Moseseaki someraka,

“Aporo metane nōmo kamenakahoko hemakapuraka ane, nōmo kamenakahokosapo. Arirakano aporo metane nōmo makotehoko hemakapuraka ane, nōmo makotehokosapo.” Aíyaka Kotimo somehoareapo. *(Kisim Bek 33:19)*

¹⁶ Asiamo aporomo ipi makata su hemakapukua faraka, makata su rakira akipoko Kotimo murikimarafapo. Asiāne Kotimo ipi hemakapusua aeyaka aporomano ane kamenakaraka makotenapo. ¹⁷ Aporoane Kotimo ipi hemakapukua reasamo murikimasa makata one soko hemakapunie. Fana Kotimo Iyipi aporo unihae Feroaki somehoko Moseso pusiesapo. Pusierakano ipi pukua Iyipi aporo unihae Feroaki Mosesemo someraka, “Kotimo néaki somehoasimo some kasane oyapo. Né unihaeaka rekeasimo nōmo né marekea maresapo. Nōmo someane nōmo koaretaerakano, nōmo fanasinane kakakosakipoko nōmo wakapuane néaki kakama tariakosapo. Tarirakano hauaka sua aporo hinamo suamo, Koti hákasa anopo, aíyaka ipu hemakapukusapo. Asiasamo nōmo né unihaeaka rekeasimo murikimaka maresapo.” Aíyaka Kotimo sawia popahoareapo. *(Kisim Bek 9:16)*

¹⁸ Asiamo Kotimo ipi rakiako hemakapusua aeyaka rakirapo. Kotimo ipi hemakapusua aeyaka aporo metane kamenakaraka makotenapo. Arirakano Kotimo ipi hemakapusua aeyaka aporo metane himu makunututu mareako hemakapuraka, himuane makunututuraka marerapo.

Aporo metaki Kotimo saperaka aporo metane arareraka ayíáka Kotimo hemakapurane oyapo.

¹⁹ Kotimo ipi hemakapusua aeyaka aporoaki maresasamo epo aporoaki hukuarurane marirakano hukururakanare? ²⁰ Aiyaka repo somerakanone reane aporo-manosasamo Kotiaki some iriraraka somehoane siahoasifareapo. Aporomanomo epo ipiane makáraraka Kotiaki sapehoane siahoasifareapo. Asiamo nōmo neaki takumeaka somerakanapo. Akú pēsa hinamoaki akúmo someraka, “Nōmo ano marirakano ayíáka pesare?” Aiyaka akúmo hinamoaki somerare? Wae, akúmo ipi aiyaka hinamoaki somerafapo.

(Aisaia 29:19; 45:9)

²¹ Arirakano hinamo akú peramo ipi hemakapusua aeyaka aku perapo. Hinamomo aku peako hemakapuraka sekeapo maka, aéya akú soko, waru akú soko, ayíáka akú kekepoaka perapo. Ayíáka hinamomo ipi hemakapusua aeyaka akú perapo.

²² Arirakano hinamomo ipi hemakapusua aeyaka akú apēra ayíáka, Kotimo Isiraya aporo hinamoaki ipi hemakapukua murikimasa aeyaka rakiakosapo. Rakiakosane ayíáka hemakapukua fasapo. Isiraya aporo hinamo metakiramo watikiaka rakirakano, Kotimo saperaka kára mokoatikihokosapoko asiane, ipi fore asekepayarako kau rekenapo. Ipu watikiaka rakisiakipoko Kotimo sapehoafunusa nine ipi kau rekenapo. Kaureasamo eaki repo meuraka somehoane siahoasifareapo. ²³ Kau reke aporo hinamo metakirane soko Kotimo kamenakarakanapo. Kamenakara aporo hinamoaki Kotimo yaku ararenane soko ipi faesa kárane soko tariako hemakapusuapo. Asiamo i metakirane eyaki faesa hauaka á risikiakosane fana murikimaka maroposapo. ²⁴ Asiamo Kotimo aporo ira murikimasane isupo. Yu aporoane soko, Yu aporoanafonosane soko isu suane epo ipi murikimaka maroposapo. ²⁵ Arirakano Kotimo somesane porofete aporo Hoseamo kaikia popasane oyapo.

Kotimo someraka, “Aporo metakira nōmo aporoanafonosaki, ‘Re nōmo aporo irapo,’ aihokosapo. Aporo metakira nōmo himu tumurumo hemakapunafonosaki, ‘Re nōmo himu tumurumo hemakapurakanapo,’ aihokosapo.” Aiyaka Kotimo somerakano Hoseamo popahoareapo.

(Hosea 2:23)

²⁶ Arirakano Yu aporoanafonosane Hoseamo some meta soko popasane oyapo. “Fana Yu aporoanafonosa risira hauaka á Kotimo someraka, ‘Re nōmo aporo irafapo,’ aisa nine hauaka á Kotimo someraka, ‘Ano Kotipo. Ano yaiya rerapo. Re nōmo aporo irapo.’ Aiyaka yaiya rera Koti amo somesapo.” Aiyaka somerakano Hoseamo kaikia popahoareapo.

(Hosea 1:10)

²⁷ Asiāne Isiraya aporo hinamoane Aesayamo me paroaka someraka, “He tawara hauaka sakipu mukisa ayíáka, Isiraya aporo re ayíáka mukisapo. Aporo mukisa nine, Kotimo fanasiraka faraka, aporo hukusi metakira Kotimo mafasiakosapo. ²⁸ Aporo hinamo risia hauaka á Kotimo fanasihokosaposane, fanasiana maiya amo Kotimo foaka fanasihokosapo. Epo kau rekeakosafapo.” Aiyaka Aesayamo Kotimo sawia popahoareapo.

(Aisaia 10:22-23)

²⁹ Aesayamo some meta soko popasane oyapo. “Koti namo kakaro unihae káramo isu Yu aporo hinamo hukusi mafasianafonosa satiki, Sotome aporope Komora aporo i marutaesa ayíáka, isu soko marutaehoafunureapo.” Aiyaka Aesayamo popahoareapo.

(Aisaia 1:9)

Isiraya aporomo Yasuaki himu hakásaraka hemakapunafononane oyapo.

³⁰ Yu aporoanafonosamo Kotimo ereketae ainane mokoakosakipoko wafororaka rakianafonosa nine, Kotimo ereketae ainane mosapo. Asiamo Yu aporoanafonosa amo Yasuaki himu hakásaraka risiasamo Kotimo iane ereketaeraka risikiasimo maroporaka marerapo. ³¹ Asiane Yu aporomo Kotimo ereketae aina ayíáka risikiako Kotimo somemane kekemaraka rakiraka tiki rakisia nine, kakaro su siaraka rakisiafapo. ³² Marirakano ásiare? Ipu Kotiaki himu hakásaraka hemakapurafaraka, somemaneane kekemaraka, ipu hokonomo makata rakisiaki himu hakásaraka hemakapukua rakiraka risiapo. Arirakano yapake somesane oyapo. Aporo hinamo ikia kara hasaka purapaka iramo matasonapo. Ira matasosa á aporo hinamoane terafaka ruraka etenapo. Eteana ayíáka Yu aporo hinamoane ayíáka etesapo. Ipu watikisapoko Kotimo sapenane fahoasimo, Yasumo ipi

apiana ayíáka e kusuane, Yu aporomo asekepayaraka iane eteana ayíáka etesapo. Asiamo Koti hikumisia i ereketae siaraka risiafapo.

³³ Ásiane wate fana Kotimo sawia Aesayamo úyaka popahoareapo.

Kotimo someraka, “Kaisie, Saeone apea ape kiakosakipoko ira warupi‡ maka motoakosapo. Ira warupi motosa á aporo metakira terafaka ruraka etehokosapo. Asiāne ira warupiane kotesasamo aporo metakiramo maka ape kiakosapo. Ira warupi kotesaki himu hakásaraka hemakapura aporo hinamoane kaíyahokosafapo.” Aíyaka Kotimo somesane Aesayamo popahoareapo. *(Aisaia 8:14; 28:16)*

10

Kotimo hemakapusuane Yu aporomo hemakapunafonoraka himeteraka risiane oyapo.

¹ Maeo, nōmo aporo ira Yu aporoane somerakanapo. Nōmo iaki himu tumurumo hemakapuraka, Kotimo ipu watikiaka rakirane mafasikia Yasuaki katakamarekea risiki-asimo nōmo kurikurirakanapo. ² Ásiane i fasikia risikinapo. Nōmo iane aseraka kakaro somerakanapo. Ipu Koti masesehoasimo wafororaka rakirakanapo. Ásiane Kotimo hemakapusuane ipu koteaka hemakapunafonoraka himeteraka Kotimo rakirane siaraka rakirakanafapo. ³ Asiamo aporo ereketaeraka risikiasimo ereketae risirane Kotimo karápo. Kakakosa ikia kara á ipu kekemasafapo. I namina ereketae risikiakosakipoko ipu namina hemakapusuane kekemasapo. Kekemaraka risike ipu namina hemakapusuane makáraraka Kotimo ereketae aina ikia karane patera tarisiapo. ⁴ Asiamo Kotimo ikia kárane oyapo. Aporo ereketae risikiasimo somemanemo ikia karane tarisiapo. Arirakano Yasu pesakipoko aporo ereketaeraka risira kepoane Yasu ipipo. Yasuaki himu hakásaraka hemakapura aporoaki Kotimo ipi ereketae ainane karápo.*

⁵ Somemanane aporomo kakimaka rakirakano asekeea Kotimo someraka, “Né aporo ereketaereapo,” aihoasimo Mosesemo popasane oyapo. “Kotimo somemanane ayikaniesane aporomanomo kakimaka rakiraka risia, yaiya kakimaka rakiraka risikianie,” aíyaka Mosesemo popahoareapo. *(Wok Pris 18:5)*

⁶ Arirakano aporomo Yasu Keresoaki himu hakásaraka hemakapukua rekeno aporoaki Kotimo someraka, “Ne ereketae rekenapo.” Airakano aporoamo ipi someraka, “Yasu Kereso hauaka wo peasimo epamo hepene yapura pasimako hiakosare?” Aíyaka somehoane siahoasifareapo. Yasumo isuane makotehoko fana pesa ayapo. ⁷ Airakano some meta soko aporomo someraka, “Yasu kusuane maturikia taehoasimo aporo epamo aporo kusua hauaka aseako pukusare?” Aíyaka somehoane siahoasifareapo. Yasuaki himu hakásaraka hemakapura aporomo aíyaka somerafapo. Yasumo ereketae aina ikia kara tarisimo Yasuane Kotimo fana maturikia taesa ayapo.

⁸ Arirakano aporomo Yasu Keresoaki himu hakásaraka hemakapukua rekeno aporoaki Kotimo someraka, “Né ereketae rekenapo.” Airakano aporoamo ipi someraka, “Kotimo someane nōmo kaisiasamo ano mahimeteraka rekenafapo. Himumo hemakapukua akaimo somerakanapo.” Aíyaka somehoane siahoasireapo. *(Lo 30:12-14)*

Asiamo isiapo Yasumo someane some karakano repo kakimaka Yasuaki himu hakásaraka hemakapurakanapo.

⁹ Asiamo aporo hinamo suamo kaiyisimo nōmo someraka, “Unihaeane Yasu ipipo,” aíyaka somerakano, nōmo himu hakásaraka hemakapuraka, “Kotimo maturikia taesane Yasu ipipo.” Aíyaka himu hakásaraka hemakapurakano, néane Kotimo mafasiakosapo. Watikiaka rakira takua Kotimo né mafasiakosapo. ¹⁰ Aporomo ipi himumo Yasu Keresoaki hemakapusuane Kotimo aseraka someraka, “Aporoane ereketae rekenapo.” Aíyaka Kotimo ipi ereketaenane aporoaki karápo. Arirakano aporoamo himumo hemakapukua akaimo someraka, “Yasu Keresoaki nōmo himu hakásaraka hemakapukua rekenapo.” Airakano aporoane Kotimo mafasirapo.

‡ 9:33: Saeone ape yano motosa metane Yarusarame apepo. Yu aporomo ekemo ape kirapo. Namo aporomo iramo ape kirasamo, ira popasapo. Ira warupi ásiáne Yasu ipipo. * 10:4: Pirisiti aporomo rakisimo somemanane motosane Yasumo marakosapo.

¹¹ Arirakano Kotimo sawia popasane oyapo. “Yasuaki himu hakásaraka hemakapura aporo hinamoane kaíyahokosafapo. Koti ipi hikumisia siaraka rekeasimo Kotimo ararehokosapo.” Aíyaka porofete aporo Aesayamo popahoareapo. *(Aisaia 28:16)*

¹² Asiamo Yu aporo soko, Yu aporohoanafonosa soko i supoko Kotimo ereketae aina ikia karane hakásapo. Aporo metaki makata meta some arirakano aporo metaki makata meta some anafapo. Asiamo aporo suane hakasa yineraka Yasu Keresomo unihaeaka asekea rekenapo. Asiamo aporo suane unihaeaka asekea rerane Yasu ipipo. Aporo hinamomo Unihae Yasu Keresoaki kurikuriraka risikinone i suaki Yasumo yaku ararenane kakakosapo. ¹³ Ararena ane Kotimo sawia popasane oyapo. “Unihaeaki aporo hinamomo kurikuriraka, ‘Unihaeo, nōmo watikiaka rakira amo, ano nī yia mokoatikirakanapo. Watikiaka hemakapura takua rakiraka reane, Koti nōmo ano mafasikia pasimaka néyaki mapaorasie,’ Airakano Unihae Kotimo né pasimaka, e rea taku á mapaohokosapo.” Aíyaka Kotimo sawia popahoareapo. *(Joel 2:32)*

¹⁴ Arirakano aporo metamo Yu aporo ane farimako anoaki someraka, “Aporomano mafasiako Yasu kusuane Yu aporomo himu hakásaraka hemakapurafapo. Hemakapunafonoraka risike, Yasumo i ararehoasimo mayiaka kurikurihokosare? Yasuaki himu hakásaraka hemakapukusakipoko asiane ipu Yasuane kaisiafapo. Kaiyafunusa nine aporo metamo iaki some kasafapo. ¹⁵ Some kakakosakipoko asiane Kotimo ‘somehoko pusie’ aihoafareapo. Asiamo Yu aporomo Yasuaki himu hakásaraka hemakapunafonona kepoane i naminafapo.” Aíyaka repo somerakano nōmo some paripusuane oyapo. Kotimo ereketae aina ikia kara somehokusakipoko Kotimo aporo metakiramo somehoko kakaro pusiesapo. Pusierakano Kotimo someane ipu some kape pusuapo. Kotimo sawia porofete aporo Aesayamo some poparaka, “Kotimo isu araresane hemakapusimo some kotesane some kara aporoane namo kakaro kotesapo.” Aíyaka Aesayamo popahoareapo. *(Aisaia 52:7)*

Yu aporomo Kotimo some kotesane kakimakanafonosane oyapo.

¹⁶ Yasu hemakapusimo some kotesane some karakano, Yu aporo metakiramo kaisia nine ipu kakimasafapo. Kakimakanafonosane Aesayamo fana poparaka, “Unihaeo, nōmo someane isiapo some kasapo. Some karakano ipu kaisia nine kakimasafapo,” aíyaka popahoareapo. *(Aisaia 53:1)*

¹⁷ Asiamo aporo hinamomo Yasuane hemakapusimo aporo metakiramo some karakano ipu kaiyakosapo. Kaikia Yasuaki himu hakásaraka hemakapukusapo. ¹⁸ Asiane Yasu hemakapusimo some kotesane Yu aporomo kaisiare? Ao, kaisiapo. Arirakano Tefetemo some hakásá yine poparaka, “Hauaka suá Kotimo someane some kakasimo aporo pusiesapo. Pukua, aporo hinamo sua risiaki some karakano ipu kaisiapo,” aíyaka Kotimo sawia popahoareapo. *(Buk Song 19:4)*

¹⁹ Arirakano nōmo efera hunia reaki makata kairkanapo. Kotimo someane Yu aporo hinamomo hemakapusuare? Ao hemakapusuapo. Asiamo fana Mosesemo someraka. Isiraya aporoaki Kotimo someraka, “Yu aporohoanafonosa hauaka kekepoa risiane nōmo ararerakano, repo aseraka kakanakehokosapo. Repo hemakapuraka, ‘Ipu Kotiane hemakapurakanafapo,’ aíyaka repo hemakapusua nine nōmo iane ararerakano repo aseraka sapehokosapo.” Aíyaka Mosesemo popahoareapo. *(Lo 32:21)*

²⁰ Asiamo Yu aporohoanafonosane Kotimo somerakano Aesayamo popasane oyapo. Kotimo Yu aporohoanafonosaki someraka, “Repo ano asekosakipoko koanafonosa nine, repo ano hemakapukusapo. ‘Kotimo ainane yakapare?’ aíyaka repo anoaki kaiyanafonorakano yia, nōmo reaki tarisiapo,” aíyaka popahoareapo. *(Aisaia 65:1)*

²¹ Asiane Isiraya aporoaki Kotimo someraka, “Wafayamo ipi hokosa peasimo hokono haena ayíáka, re anoaki risikiako parihoasimo nōmo reaki hokono haesapo. Maiya suamo reaki peaesapo. Peaesa nine repo hisiraka asekepayaraka patera tarisiapo.” Aíyaka Kotimo Yu aporo hinamo ane somerakano Aesayamo popahoareapo. *(Aisaia 65:2)*

11

Kotimo Isiraya aporo hinamo araresane oyapo.

¹ Nōmo reaki efera hunia makata kairakanapo. Kotimo Isiraya aporo murikimasane metakarisiare? Wae, metakarisiafapo. Ano Pore ane Isiraya aporopo. Anoane Kotimo metakarisiafapo. Eparahameane nōmo makasa kaua kekemapo. Nōmo aporo irane Pēnesamene aporo irapo. ² Wate fana Koti ipiaki paosa aporo risikiasimo Kotimo Isiraya aporoane murikimayereapo. Murikimaka iane Kotimo metakarisiafapo. Arirakano Kotimo sawia popasane repo hemakapurakanapo. Popasane oyapo. Wate fana Isiraya aporomo watikiaka rakisiasamo porofete aporo Iraíyamo Kotiaki meuraka somehoareapo.

³ Iraíyamo someraka, “Unihae Kotio, eke kima yapura néaki makata paikia kara ekeane Isiraya aporomo marakaritaesapo. Nōmo some kara porofete aporoane ipu rusua fasapo. Rukua faraka ano hákasa rekenapo. Anakano ipu ano soko rukusakipoko ipu hemakapurakanapo.” *(1 King 19:10, 14)*

⁴ Airakano Kotimo Iraíyaki someraka, “Aporo ano patera asesane né hákasafapo. Isiraya aporo metakira sewene taosene suane (7,000) ano patera asesa aporopo. Ipu ano hemakapuraka, kotafe koti yano motosa Peaoane makáraraka kekeresafapo.” Aíyaka Kotimo Iraíyaki somesane Kotimo sawia popahoareapo. *(1 King 19:18)*

⁵ Fana asia ayiáka maiya yumo soko isu Yu aporo hukusi metakiramo Kotiaki hemakapukua risikinapo. Kotimo ipi yaku ararena amo i pasimosapo. ⁶ Aporo pasimosane Kotimo ipi aporo hinamoane hemakapuraka kamenakaraka pasimosapo. Kamenakaraka pasimosasamo aporo hinamomo namina makata rakisia akipoko Kotimo pasimosafapo. Aporo hinamomo makata koteaka rakirakano asekea pasimosa satiki ane, Kotimo ipi hemakapukua yaku ararerakanapo, aihoafunufapo.

⁷ Asiamo Isiraya aporo ane nōmo úyaka somerakanapo. Kotimo someraka, “Isiraya aporo ereketaeraka risikinapo,” aihoasimo ipu rakiraka risia nine Kotimo aisafapo. Asiane Eparahamemo Kotiaki himu hakásaraka hemaka apura ayiáka, aporo hukusimo ayiáka hemakapurakano, aporo hukusi ereketaeraka risikiasimo Kotimo maroposapo. Asiane Isiraya aporo hukusi metakira maropohoanafonosa aporoane ereketaeraka risikiako, Kotimo makotesapo, aíyaka hemakpunafonorakano, Kotimo ipu himu hemakapusuane makunututu marereapo.

⁸ Arirakano Kotimo sawia popasane oyapo.
“Isiraya aporomo himumo hemakapurane Kotimo mahimeteraka maresasamo, aporoane wasá kusua arisia ayiáka risiapo. Yaiya risina ipu hī ane soko makumikia, arirakano ipu senaki ane soko tiraka yaiya risikinapo. Asiamo ipu takekea hemakpunafonoraka risikinapo. Fana soko pipu maiya yumo soko ayiáka risikinapo.” Aíyaka Kotimo sawia popahoareapo. *(Aisaia 29:10; Lo 29:4)*

⁹ Arirakano Yu aporoane ayiakasimo Kotimo sawia Tefetemo popasane oyapo.
“Isiraya aporomo Koti neaki hemakpunafonoraka, hokono akeramo namina yia fanasi-hokosane nōmo tarisimoripo. Iane saro rurū rasakipoko huruperaka, saro rurū kakarua ira porosamo akarera ayiáka, nōmo somemanemo iane metakira makukua fahoasimoripo. ¹⁰ I hīane katosa ayiáka, Koti nōmo somemaneane hemakapukua, somemaneamo kepoane hemakuprafaraka mahimeteraka mareanie. Koti nōmo i fanasiraka, makata umisa kára asia mati yapura motosa, mati tipuru hekea apura ayiáka, aporoane ayiáka pusimoripo,” aisapo. Aíyaka Tefetemo hemakapusuane Kotimo sawia popahoareapo. *(Buk Song 69:22-23)*

Yu aporohoanafonosane Kotimo pasimosane oyapo.

¹¹ Arirakano reaki nōmo takume meta somerakanapo. Isiraya aporo kakaro eteraka yaiya warisikiakosare? Wae, aíyaka hemakapukupo. Iane eteraka warisina efera hunia turikia tariakosapo. Asiane maiya wakasemamo Kotimo ereketaeraka risira ikia karane Yu aporomo waeraka, aíyaka patera tarikia metakarisiapo. Patera tarikia

metakarirakano, Yu aporohoanafonosaki somehoko Kotimo ipi some kara aporoane pusiesapo. Pusierakano i pukua Kotimo hemakapusua someane some karakano, Yu aporohoanafonosa yakaimo kakimasapo. Kakimarakano, Kotimo i ereketaeraka risiki-asimo arareraka makotesapo. Makoterakano Yu aporomo aseraka, "Isu soko ayiakako seseripo," aihoasimo Yu aporohoanafonosane Kotimo makotesapo. ¹² Arirakano Kotimo ereketaeraka risira ikia karane Yu aporomo patera tarirakano asekea, Kotimo hauaka wo aporo hinamo metakirane makotesapo. Yu aporomo Koti ipi hikumisia siaraka risikianafonoraka huruperakano, Yu aporohoanafonosane Koti ipi hikumisia siaraka ereketae risirane iaki kasapo. Asiasamo keseke Koti hikumisia Isiraya aporo hinamoane ereketaeraka risikiasimo Kotimo iane pasimokoakosapo. Pasimokoa Yu aporoane Kotiaki risikiako pariraka arisia maiya amo iane soko Yu aporohoanafonosane soko Kotimo namo kakaro makotehokosapo.

Yu aporohoanafonosa Kotimo mafasiane oyapo.

¹³ Re Yu aporohoanafonosa Rome sitia risiaki nōmo somerakanapo. Yasumo tarisia ayiáka nōmo tarisimo Kotimo ano tarira aporo murikimasapo. Murikimarakano Yu aporohoanafonosamo Yasuane hemakapusimo someane nōmo some karakanapo. Re Yu aporohoanafonosapoko rakiraka ano kára seseraka rakirakanapo. ¹⁴ Kára seseraka rakirakano Yu aporomo kaikia someraka, "Yu aporohoanafonosane Kotimo makoterakano, isu soko makotehoasimo hemakapurakaripo," aihoasimo Yu aporohoanafonosapoko Kotimo rakirane nōmo makáraraka somerakanapo. Somerakano Yu aporomo kára hemakapuraka, Yasuaki himu hakásaraka hemakapurakano Kotimo i mafasikia pasimokoasimo ano seseripo.

¹⁵ Yu aporoane Kotimo makikisiraka risia maiya amo aporo hinamo hauaka sua risiane Kotiaki paohoko peasimo Kotimo araresapo. Asiakipoko keseke Kotimo Yu aporoane mafasikia iane pasimokoa iaki someraka, "Re siareapo," aihokosapo. Aihora maiya amo aporo kusua maturikia taesa arisia ayiáka, Yu aporoane ayiáka risikiakosapo. ¹⁶ Arirakano nōmo reaki takumeaka somerakanapo. Farawa paikia parakuraka wakasema Kotiaki karakano, wakasemané Kotimenapo. Farawa wakasema Kotimenasasamo farawa kárane soko Kotimenapo. Arirakano takume meta somesane soko oyapo. Ira pikinu Kotiaki karakano ira eya ane soko ipimenapo.*

¹⁷ Arirakano takume metane oyapo. Hemoa ira orofe eya á wate fasakeno pateketaeraka, ira orafe meta yaoa reane patekemaka hemoa ira orofe rea a taponapo. Taporakano hemo ira orofe pikinu aeyaka ira piamo yao ira orofeane makotenapo.† ¹⁸ Asiamo re Yu aporohoanafonosamo hemakapuraka, "Yu aporoane isiapo marokerakanapo," aiyaka hemakapukupo. Ira eya aeyaka ira pikinuane mawakapunafapo. Ira pikinu aeyaka ira eyane mawakapunapo. Aina ayiáka Yu aporo aeyaka, re Yu aporohoanafonosane makotesapo. Re Yu aporohoanafonosa aeyaka makotena faserepesafapo. ¹⁹ Asiane re Yu aporohoanafonosamo someraka, "Nena yaoa ira orofe eya ane, hemoa rea ira orofea taporomarekea tapohoasimo, hemoa ira orofe eya metakira pateketaesapo. Pateketaeana ayiáka isu Kotiaki kataka marekea risikiakosakipoko Yu aporomo Kotiaki himu hakásaraka hemakapunafonoraka risiane fasikia risikianie, aiyaka Kotimo somesapo."

²⁰ Aiyaka re Yu aporohoanafonosamo kakaro somerakanapo. Wate fasakeno hemo wafayamo ira orofe eya pateketaena ayiáka, Isiraya aporo pateketaesapo. Ipu Kotimo hemakapusua aeyaka ereketaeraka risira ikia karane himu hakásaraka hemakapunafonorakano, Kotimo iane fore makamafeasapo. Asiane re Yu aporohoanafonosamo Kotimo hemakapusua aeyaka ereketaena ikia karane himu hakásaraka hemakapukua kekemarakano, reane Kotimo pasimosapo. Pasimorakano repo namina yia makáraraka rupiaka hemakapukupo. Asiamo reane Kotimo pateketaenapaka asekeanie. ²¹ Yu

* 11:16: Takume kepoane oyapo. Yu aporomo makasa kauane Kotimenapo. Kotimenasasamo makasa kauamo hokosa wainepe pesane soko Kotimenapo. † 11:17: Yu aporo ane hemoa ira orofe reamo eya asiapo. Yu aporohoanafonosane yaoa rea ira orofe eya asiapo.

aporoane kakaro hemoa ira orofe eya asíane Kotimo pateketaesasamo, re kakaro hemo ira orofe eyahoanafonosa asiane soko pateketaehokosapo. Repo Kotiaki himu hakásaraka hemakapunafonorakano, epo reane pateketaehokosapo.

²² Asiamo Kotimo ipi aporo hinamoaki kamenakanane soko, mahisinane soko, repo hemakapunie. Yu aporoane terafaka ruraka etesane Kotimo hisisapo. Kotimo ereketaena ikia karane kekemahoanafonoraka i eterakano, Kotimo iaki fanasinane kasapo. Arirakano re Yu aporoohoanafonosamo Kotiaki himu hakásaraka hemakapukua yaiya risikino, epo reaki kamenakahokosapo. Repo eaki himu hakásaraka hemakapunafonorakano, epo reane soko kamenakaraka hemakapuskafapo. Kotimo ira eya pateketaeana ayíáka, reane soko ayíáka pateketaehokosapo.

²³ Yu aporoane efera hunia Kotiaki risikiako parirakanone, kakaro hemoa ira orofe eya pateketaesa, efera hunia maka, namo kakaro orofea taporomarekea tapohokosapo. Taporomarekea tapohokosane Kotimo ipi wakapuamo siahoasireapo. Taporomarekea tapohokosa ayíáka, Kotiaki himu hakásaraka hemakapura Yu aporo hinamoane Kotimo pasimokoakosapo. Pasimorakano iaki ipi ereketae ainane kakakosapo. ²⁴ Yoa rea ira orofe eya pateke maka hemo ira orofea taporomarekea taporakano, kakaro hemo ira orofe eya parihokosapo. Asiamo hemoa ira orofe eya pateketaesane Kotimo maka, hemo ira orofea taporomarekea taporakano, namo kakaro hemo ira orofe taneherapo. Aina ayíáka Yu aporoohoanafonosane yaoa ira orofe eya asiane pasimokoa, arirakano Yu aporoane hemo ira orofe eya ayíáka risiane soko pasimokoa i suane Koti ipia hakāsa mapaohokosapo.

Yu aporoane Kotimo mafasiakosane oyapo.

²⁵ Maeo, fana Kotimo ipi hemakapusuane Yu aporoaki ayíákakosane somehoanafonosa nine, yumo isu ipi some kara aporoaki mafekemaraka somesapo. Somesane re Yu aporoohoanafonosamo hemakapusimo, nōmo reaki somerakanapo. Nōmo someraka one repo namina makáraraka hemakapuraka, “Kotimo Yu aporoaki makotenane rukupateraka, isu Yu aporoohoanafonosa hákasané makoterakanapo,” aíyaka hemakapurapaka, Kotimo Yu aporoaki ayiakakosane nōmo reaki somerakanapo. Kotimo ayiakakosane oyapo. Kotimo Yu aporoane unihaeaka aseke akeasimo Kotimo Yasu Keresoane pusiesapo. Pusiesane perakano Yu aporomo maiya wakasemamo eaki himu hakásaraka hemakapurakanafapo. Arirakano Yasu hemakapusimo some kotesane hauaka sua aporo hinamo suaki some kaka farakano, Yu aporomo soko Yasuaki himu hakásaraka hemakapuskafapo. Himu hakásaraka hemakapurakano,

²⁶ Yu aporo hinamoane Kotimo makamafeasa nine efera hunia pasimokoakosapo. Some hakása yine wate fana Kotimo sawia porofete aporo Aesayamo poparaka, Kotimo someraka, “Yarusarame siti aeyaka Yu aporoane Makokorotaena Aporoane peakosapo. Yakopemo aporo ira wainepe pesa aporoamo Kotimo ikia kara kekemahoanafonosane Makokorotaena Aporoamo makokorotaehokosapo. ²⁷ Ipu watikiaka rakisiane nōmo mafahokosapo. Mafahokosa ikia kara kaweane some karakanapo.” Aíyaka iyaki Kotimo some kawe someaka mayereapo. Aíyaka Aesayamo wate fana popahoareapo. (*Aisaia 59:20-21; 27:9*) Asiamo re Yu aporoohoanafonosamo Yu aporoaki koteaka hemakapunie.

²⁸ Aporo hinamomo Yasu hemakapusimo some kasane Yu aporomo patera tarirakano, iaki Kotimo yunuraka rekenapo. Arirakano re Yu aporoohoanafonosaki Kotimo makoteraka ararerakanapo. Asiane Yu aporomo Kotimo someane some kakako murikimasasamo, iaki Kotimo ipi himu tumurumo hemakapukua rekenapo. Asiamo Yu aporomo makasa kauane Eparahame soko, Aisake soko, Yakope soko, ipu aporo ira wainepe pesa aeyaka Kotimo ipi makotenane aporo hinamo suaki kakakosapo, aisakipoko Kotimo Yu aporoane himu tumurumo hemakapukua rekenapo.

²⁹ Asiamo Kotimo ipi hemakapusuane rukupateraka metakarirafapo. Metakari-anafonoraka Kotimo ipi rakirane rakisimo aporo murikimasane metakarirafapo. Ipi rakirane rakisimo ararenane soko firarafapo. ³⁰ Re Yu aporoohoanafonosamo fana

Kotimo someane koaretaesa nine, yumo Kotimo re kamenakaraka ararerakanapo. Yu aporomo Kotimo someane koaretaerakano, epo ipi someane reaki some karakanapo. ³¹ Arirakano Yu aporomo yumo Kotimo someane koaretaesa nine, Kotimo iane soko kamenakaraka ararehokosapo. Re Yu aporohoanafonosane kamenakaraka araresa ayíáka, Yu aporoane soko ayíáka kamenakaraka ararehokosapo. ³² Asiamo aporo suamo, Yu aporomo soko, Yu aporohoanafonosamo soko suamo Kotimo somemanane koaretaesapo. Koaretaesasamo Kotimo iane hukurukua fanasihoko hemakapusua nine, iane kamenakaraka ararehoko hemakapurakanapo.

Kotiaki kekerenane oyapo.

³³ “Yao watikisapo. Itifisiafapo,” aíyaka Kotiaki hemakapunie. Kotimo isu kára ararenane kotesa susupo. Kotimo isuaki ayikaniesane kotesa susupo. Kotimo hemakapusuane kotesa susupo. He tawara numu kárahoarea ayíáka, ipi kotesane kára asiapo. Kárasasamo Kotimo ipi hemakapukua takekeea someramo kepoane aporomanomo hemakapurafapo. Kotimo ipi hemakapukua aina kepoane aporomanomo hemakapurafapo. ³⁴ Arirakano Kotimo sawia popasane oyapo.

Kotimo hemakapusuane aporomanomo hemakapurafapo. Kotiaki ayikanie aíyaka aporomanomo somerafapo. ³⁵ Kotimo isuaki makata kakasimo aporomanomo Kotiaki makata ropo fana kaka maresafapo. Aíyaka Kotimo sawia popahoareapo. (*Aisaia 40:13; Jeremaiá 23:18; Jop 41:11*)

³⁶ Popasane kakaro somesapo. Kotimo makata suane rakisiapo. Makata rakisiane ipi hemakapusua aeyaka risikiasimo wafayamo asekea rera ayíáka ipi makata suane asekea rekenapo. Asekea reke keseke ayiakakosane soko ipi hemakapusua aeyaka ayiakakosapo. Asiasamo maiya suamo isiapo Kotimo yano motosane yaiya makáraraka kekererakanapo. Ayiakasimoripo.

12

“Kotiane masesehoko risikianie,” aisane oyapo.

¹ Keresoa paosa aporo maeo, aporo hinamomo watikiaka rakisiane Kotimo mafasis-asamo Koti ipiane masesehoko uyáka risikianie. Kotimo né kára kamenakasasamo, nómó ní kauane soko, nómó ní himu hemakapurane soko, eaki yaku kakanie. Maiya suamo hauaka wo area maiya amo né níane eaki kakanie. Né níane epo ipi menapo ai-hoasimo hemakapukua risikianie. E sesehoasimo risikianie. Ayíáka risikinone, ane eaki kakaro koteaka kekerenapo. ² Arirakano hauaka wo Koti kekemahoanafonona aporomo hemakapusuane kekemahokopo. Nómó hemakapusuane Ho Kotesamo makawehoasimo ayikanie aihoanie. Nómó hemakapusua makawerakano, ne areane soko makawehokosapo. Makaweraka reke, Kotimo néaki ayíáka rakiniesane kaikia rakiakosapo. Kotimo neaki ayíáka rakinie aisane, ereketae kotesa susupo. Ayíáka rakiniesane rakirakano, Kotimo sesehokosapo.

³ Arirakano Kotimo ano hemakapukua, epoko makata rakira rakinie aisane, nómó kakimaka rakiraka, reaki hakásá hakásaraka some karakanapo. Some karane oyapo. Nómó ní yano motosane makárahoko rakirane rakiakopo. Nómó ní wakapumo Kotipoko rakiakopo. Kotimo makata rakira kára kekeposane, repo rakisimo Kotimo ipi wakapu kekepoane reaki karapo. ⁴ Aporomano kau hakásá yia ipi senaki soko, akai soko, hokono soko, korake soko, ayíáka kekepo kekeporaka risikinapo. Kekepo arisia amo kau hakásá ane ararehoko, kaua rea makata amo rakirane soko kekeponapo. Senakimo makata meta rakikia, arirakano akaimo makata meta rakikia, arirakano hokonomo makata meta rakikia, arirakano korakemo makata meta rakikia, ayíáka rakirapo.

⁵ Aina ayíáka isu Keresoa paosa aporo hinamo su hakásá risiane, Keresoa paosa maiya amo, isu su kau hakásá asíapo. Isu su Keresoa paosane isina yia metamo meta arare, metamo meta arare, ayiakasimo, isu su sarimaraka, kau hakásá asíapo. ⁶ Kotimo ipi rakira kekepo rakisimo wakapu kekepoane soko, hemakapura kekepoane soko, isuaki hakásá hakásaraka kekeporaka karápo. Kotimo ipi makata rakira isiapo rakisimo ayíáka

yaku karápo. Kotimo neaki somerakano, nōmo kaikia, Kotimo somesane aporo hinamo metakiraki kakaro ereketae some kakanie. Asiamo porofete aporomo wakapuane Kotimo neaki karakanone, Kotiaki himu hakásaraka hemakapukua some kakanie.⁷ Arirakano Kereso aporo hinamo metakirane ararena wakapuane Kotimo néaki karakanone, nōmo Kereso aporo hinamoane kakaro koteaka ararehoanie. Arirakano Kotimo some kepoane nōmo hemakapusuasamo aporo hinamo metakiramo enomakasimo tisamo tarira wakapuane Kotimo néaki karakanone, aporo hinamo metakirane tisaraka tarinie.

⁸ Arirakano aporo hinamo metakiraki ararena someane Kotimo neaki karakanone, nōmo aporo hinamo metakirane arareraka makotehoasimo ararena someane some kakanie. Arirakano aporo hinamo metakira makata forokoa risiane, arareraka makata kemo parakuraka kará wakapuane Kotimo néaki karakanone, nōmo kára kakanie. Arirakano aporo hinamo ane soko, makata rakirane soko, poseraka asekea rera wakapuane Kotimo néaki karakanone, nōmo koteaka asekea rekeanie. Arirakano aporo hinamomo makata umisa masaki kamenakaraka ararena wakapuane Kotimo néaki karakanone, aporo hinamomo makata umisa masaki nōmo himu seseaka kamenakaraka ararehoanie. Ayíáka rakira wakapuane Kotimo kekepo kasane repo kekemaraka rakinie.

Kereso aporo hoanafonosaki himu tumurumo hemakapurane oyapo.

⁹ Repo aporo hinamo metakiraki himu tumurumo hemakapurua, kakaro himu hakásaraka hemakapunie. Himu tetaraka hemakapukupo. Uyáka hemakapunie. Makata watikisane kakaro hisiraka patera tarikia risikianie. Arirakano makata kotesane seseraka hemakapurua risikianie. ¹⁰ Arirakano aporomo ipi maeane himu tumurumo hemaka apura ayíáka, nōmo soko Keresoa paosa aporo hinamo suane ayíáka himu tumurumo hemakapunie. Arirakano ní maemo yano motosane makáraraka epo someane kaiyinie.

¹¹ Arirakano Unihae Kotipoko rakiraka hisinifaraka, wakapuaka seseraka susu rakinie. Arirakano Ho Kotesa re himua rekerakano kairaka seseaka rakinie. ¹² Arirakano Unihae Kotimo keseke né makoteraka ayiakakosaposane hemaka apura maiyamo seseraka hemakapurua kau risikianie. Arirakano makata umisa maraka meuhokopo. Arirakano Kotiaki kurikurina maiya amo hemakapuraka, "Nōmo kurikurisa makata ane Kotimo ayiakakosapo," aiyaka hemakapurua kurikuriraka risikianie. ¹³ Arirakano Keresoa paosa aporo hinamomo makata nakosa soko pasu soko fasenko, nōmo nimenane iaki kakanie. Arirakano Kereso aporo kimisi perakano, nōmo tereraka pasimokoa makimisihoanie.

¹⁴ Arirakano aporomo néaki makata umisa karakano, eane Kotimo arareraka makotehoasimo nōmo farimaka kurikurihoanie. Asiane efera hunia nōmo néaki someraka, eane Kotimo makotehoasimo kurikurihoanie. Eaki yakasa ho marehokopo. Arirakano Kotimo eane mokoatikihoasimo kurikurihokopo. ¹⁵ Arirakano makata kotesa fasere aperamo aporo meta seseraka rekeno, ne soko eyaki seseraka rekeanie. Arirakano makata umisa fasere aperamo aporo meta hiripuraka rekenone, ane nōmo eane kamenakaraka epoko hiripuhoanie.

¹⁶ Arirakano né níane makotena ayíáka, aporo hinamo metane soko ayíáka hakásá yineraka iane soko hemakapunie. Asiamo né ní yia makáraraka unihaeaka rekeakosakipoko hemakapukupo. Sere suamo makata rakirane aporo wakasemaraka risia akiyaki soko hakásá rakinie. Arirakano nōmo ní yano motosane makáraraka someraka, "Nōmo ní hakasa koteaka hemakapurapo," aiyaka hemakapukopo.

¹⁷ Arirakano aporo metamo reaki mokoatikirakano, repo ropo mokoatikihokopo. Asiamo nōmo hemakapuraka, "Maiya suamo nōmo kakaro susu somehokosapo. Koteaka rakirane rakiakosapo," aiyaka hemakapunie. Ayíáka hemakapurua rakirakano, aporo metamo asekea someraka, "Eane koteaka rekenapo," aihoasimo koteaka rakiraka rekeanie. ¹⁸ Repo suamo aporo hinamo suaki tau auaraka risikianie. Auaraka risike aporo metamo néaki iriraraka rekeno aseraka, nōmo mauahoane siahoasisekeno nōmo mauahoanie.

¹⁹ Kereso aporo maeo, aporo metamo re mokoatikirakano, repo ropo mokoatikihokopo. Arirakano Kotimo sawia popasane oyapo. Kotimo someraka, "Watikiaka

rakirakano ropo watikisa karáne, nōmo karápo. Nōmo nī yiamo makata ropo watikisane iaki kakakosapo.” Aíyaka Kotimo somerakano popahoareapo. (Lo 32:35)

Asiamo repo hemakapuraka, “Isiapo ropo mokoatikihokosafapo. Kotimo saperaka iane fanasihokosane motoakosapo.” Aíyaka hemakapukua kau risikianie.

²⁰ Arirakano re uyáka risikianie. Kotimo sawia popasane oyapo. “Aporo meta titi himumo saperaka risiane e meamorakano, nōmo eane makata nakosa kakanie. E he narirakano soko, nōmo eane he nasimo kakanie. Ayíáka karakano epo ipi hasakasane himumo hemakapuraka, ipi yia kaíyahokosapo. Ipi himumo aíyaka hemakapurakano Kotimo eane makotehoasimo nōmo ararerakanapo.” Aíyaka Kotimo sawia popahoareapo. (Sindaun 25:21-22)

²¹ Aporomo néane mokoatikirakano, nōmo eane ropo mokoatikirakano, ane nōmo ropo mokoatikihoko hemakapura amo néane unihaeaka asekea rekenapo. Anapaka nōmo ropo mokotikihoko hemakapukua rakiakopo. Makata watikisamo reane asekea reane, asekea reke siahoasifareapo. Arirakano aporomo ne mokoatikirakano, nōmo eane ropo makoterakano, nōmo eane makoteaka rakiako hemakapura amo néane unihaeaka asekea rekenapo. Asiamo makata koteaka susu rakikia risike makata watikisane makama kesekehoanie.

13

“Aporo unihaeaka asekea risiamo somepane motosane kakimakanie,” aisane oyapo.

¹ Repo kamani aporomo soko, ape asekea risia aporomo soko, ipu someane repo suamo kakimaka risikianie. Aporomanoane aporo metakiramo unihaeaka asekea risiki-asimo Kotimo ipi hemakapusua aeyaka murikimosapo. Kotimo murikimosa aporomo aporo metakirane asekea risikinapo. ² Arirakano unihaeaka asekea risira aporoane Kotimo murikimosa aporoamo someane, repo koaretaeraka waerakano, Kotimo ipi hemakapusuane repo koaretaerakanapo. Asiamo koaretaena aporo hinamoane namina koaretaesa aeyaka fanasinane mokoakosapo.

³ Arirakano koteaka risira aporo hinamomo kamani asekea rera aporoaki namonafapo. Arirakano watikiaka risira aporo hinamomo kamani asekea rera aporoaki namonapo. Iane fanasinapaka namonapo. Asiamo asekea rera aporoaki namohoanafonoraka risiki-ako hemakapuraka, ane koteaka rakiraka risikianie. Repo koteaka rakiraka risikino kamani asekea rera aporoamo reaki “Kotehoareapo,” aihokosapo. ⁴ Re koteaka risikiasimo kamani aporomo réane ararehoasimo Kotimo murikimasapo. Asiane repo watikiaka rakiraka risike re namohoanie. Kamani aporomo painate ane nenakamaka mokoa risikinafapo. Watikiaka rakira aporoane rukua maropohokosakipoko mokoa risikinapo. Kamani asekea risira aporoane Kotimo murikimosapo. Murikimosasamo i Kotipoko makata rakira aporopo. Watikiaka rakira aporoane Kotimo fanasihohanie airakano, kamani asekea risira aporoamo fanasihokosapo. ⁵ Asiamo kamani aporomo someane kakimakanie. Re fanasinapaka fofaraka kakimayane siahoasifareapo. Repo himumo koteaka hemakapukua kakimayane siahoasireapo.

⁶ Kamani aporomo aporo hinamo suane koteaka risikiasimo ipu Kotipoko rakirakanapo. Asiasamo repo koteaka rakirane himumo takekeua hemakapukua takese mone taehoanie. ⁷ Asiamo kamanimo somepanemo takese mone kekepo kekepo taerasier-akano, takese moneane taehoanie. Takese metane nōmo makata rakisiane makata ropo amora maiya amo takese mone taerasie airakano taehoanie. Arirakano takese metane pisinisi rakiakosakipoko takese taerasie, airakano takese ane soko taehoanie. Asekea risira aporomo someane kakimaka eane makotehoanie. Unihaeaka risia aporomo yano motosane makáraraka hemakapunie.

Aporo hinamo metakiraki himu tumurumo hemakapurane oyapo.

⁸ Repo aporo metamo makatane mosane, foaka makata yāno kakanie. Mokoa yakuhokopo. Asiane yaku hakása meta ayíkaniesane oyapo. Nōmo himu tumurumo sere suamo aporo hinamoaki hemakapukua risikianie. Aporo metaki himu tumurumo

hemakapurakanone, Kotimo somemanemo ayikaniesane repo kakaro kakimaka keke-marakanapo.

⁹ Asiamo Kotimo ipi somemanane Moseseaki kasane hemakapunie. “Hinamo hakimakopo. Arirakano aporo kukusimo rukupo. Arirakano aporo metamo menane hakimakopo. Arirakano aporo metamo makata kemoane ano makaripi, aiyaka himumo hemakapukopo.” Aiyaka somemanane soko, somemanane meta soko Kotimo motosapo. Somemanane suane namo kakaro sarimaraka kepo hakásapo. Kepo hakásane oyapo. Né níane himu tumurumo hemaka apura ayiáka, aporo hinamo metane soko ayiáka himu tumurumo hemakapunie. *(Kisim Bek 20:13-17; Lo 5:17-21)*

¹⁰ Asiamo nómo aporo metaki himu tumurumo hemakapurakanone, aporo hinamo metamo neane mokoatikihokosafapo. Nómo aporo metaki himu tumurumo hemakapurakanone, Kotimo ayikaniesane, nómo namo kakaro koteaka kekemarakanapo. *(Wok Pris 19:18)*

“Yasu paripeakosasamo koteaka risikianie,” aisane oyapo.

¹¹ Hauaka wo isu maiya wakasemamo risikiakosasamo, aporo hinamoaki himu tumurumo hemakapunie. Fana isu Yasu Keresoa paosa maiya amo, Yasumo isu pasimokoakosa maiyane maiya kárapo, aiyaka repo hemakapusuapo. Asiane yumo Yasu paripeakosa maiya ane makerakanapo. Asiamo aporo wasa turikia pukua wakapuraka arisia ayiáka, re ayiáka turikia wakapuraka risikianie.

¹² Asiamo yao eresane faraka mituru fiana ayiáka, watikiaka rakira maiya ane faraka Yasu paripekea makata su makotehokosa maiya ane, makerakanapo. Makesasamo koteaka hemakapukua risikianie. Fana katosa takua risikisu maiya amo watikiaka rakisi-apo. Watikiaka rakisiane metakarinie. Arirakano aporo meta tati yunu awera ayiáka, kaumohemakapukua watikiaka rakira akiyaki isia po yunu werakanapo. ¹³ Asiamo aporo hinamo isuane sere maiyamo faerakano apura ayiáka, Yasumo ikia kara á koteaka puko rakiraka risikianie. Rakisiane aporo metakiramo aserakano, kaiyanapaka koteaka rakiraka risikianie. He watikisa nakopo. He watikisa nekea, masuaraka koaretaeraka koraka risira ayiáka risikiakopo. Arirakano hinamo hakimakopo. Aporo metayaki mokome pukopo. Kaumo hemakapukua makata kaíyasane rakiakopo. Arirakano me rukua tafatafahokopo. Aporo metamo menane, ano makaripi, aihokopo.

¹⁴ Yunu wera pasu osona ayiáka, Unihae Yasu Keresoane ayiáka osohoanie. Isia po Unihae Yasu Keresoaki kataka marekea risiasamo ipi hemakapusua anaka kekemarako koteaka rakinie. Kaumo watikiaka rakirane seseraka kekemahoko hemakapurane metakarinie.

14

“Ní maeane hokomaka somehokopo,” aisane oyapo.

¹ Kereso aporo hinamo metakiramo Yasumo aina kepoane koteaka hemakapurafapo. Aporo metamo Yasuaki himu hakásaraka hemakapusuane kakaro wakapuaka hemakapunafona aporoane perakano asekea repo someraka, “Isuyaki hakasa sarimaraka kurikurihoko peae.” Aiyaka aseane e perakano asekea repo eaki tafatafaraka somehokopo.

² Arirakano Kereso aporo metakiramo hemakapuraka, “Makata kakayiane isia po nenapo. Makata kakaya neane siareapo,” aiyaka hemakapurapo. Arirakano Kereso aporo metakiramo hemakapuraka, “Makata kakaya suane isia po nenafapo.* Makata kakaya neane siahosifareapo,” aiyaka hemakapukua, hemo makata hákasané ipu nenapo.

³ Arirakano makata kakaya nená aporoamo, makata kakaya nanafonona aporoane makefehokopo. Arirakano makata kakaya nanafonona aporomo, makata kakaya nená aporoaki someraka, “Ne watikirareapo,” aihokopo. Makata kakaya nená aporoane

* 14:2: Makata kakaya kotafe kotaiki kaka marekea maketea aporomo roponapo. Makata kakaya kotafe kotaiki kasasamo aporo metakiramo roponafapo. Some ane 1 Korini 8 á menohoanie.

Kotimo pasimosapo. ⁴ Arirakano aporo metamo aporo raipane nōmo maropohoane siahoasifareapo. Aporo raipamo koteaka rakirakano soko, hasaka rakirakano soko, e asekeea rea wafayamo ipi maroponapo. Aina ayáka Unihae Yasumo ipi hákasamo isu asekeea reasasamo, epo isuaki, re siareapo, aíyaka soko, re siafareapo, aíyaka soko, epo ipi yiamo somehokosapo. Aíyaka somerane nōmo ní menafapo. Aporo raipane koteaka rekeasimo Unihae Kotimo e mawakapuhokosapo. Mawakapurakano epo koteaka rakiraka rekeakosapo.

⁵ Arirakano Keresoa paosa mae namina yia aporo metamo hemakapuraka, “Sere metakira yaposapo. Sere metakira yaposafapo.” Airakano aporo metamo hemakapuraka, “Sere su hakasa yinesapo. Sere meta yaposafapo.” Aíyaka kekepoaka hemakapurakanapo. Kekepoaka hemakapurane siapo. Asiamo repo himumo hemakapurarakarakan kaikia kekemahoanie. ⁶ Keresoa paosa aporo metamo someraka, “Koti kekerehokosa sere one káraro,” aíyaka hemakapukua somerakan, Kotiane makamafanahoko somerakanapo. Arirakano makata su nena aporomo Unihaeane hemakapukua makárahokosakipoko Kotiaki suseraka makata su nenapo. Arirakano makata kakayia sokoaina aporomo Unihaeane hemakapukua makárahokosakipoko Kotiaki suseraka makata nakosa sokoainapo.

⁷ Hauaka wo ne hitafe areamo né ní haku rekenafapo. Asiamo né níane makamafanara maseseraka aíyaka hemakapukupo. Né hitaferaka areane soko kukusane soko nōmo ní asekeea rekenafapo. ⁸ Asiamo hauaka wo re hitafe arisia maiya amo Unihaemo yano motosane makárahoanie. Akura maiya amo soko, Unihaemo yano motosane makárahoasimo hemakapunie. Arirakano isu hitafe arisiane soko, isu akurane soko, Unihae Kotimo ipi hákasa hemakapukua murikimarapo. Asiamo ipi yano motosane makárahoanie.

⁹ Arirakano Yasu Keresoane isiaipo watikisapoko farimaka kusuane maturikia taesapo. Maturikia taesasamo epo aporo hitafe risiane soko, aporo kusuane soko aporo hinamo suane ipi unihaeaka asekeea rekenapo. ¹⁰ Asiamo repo namina yia maemo ainane asekeea hokomaka someraka, “Ne watikirareapo.” Aíyaka marirakano nōmo hokomaka somerakanare? Repo metakiramo anapo. Ainane siahoasifareapo. Kotimo ipi hukuarura maiya amo e reakipoko isu su sarimahokosapo. Keseke Kotimo huku arura maiaya amo e reakipoko isu su sarimaraka risikiakosapo. Risikino Kotimo ipi isu suane takekea hukurukusapo. ¹¹ Hukurukusane Kotimo sawia popasane oyapo.

“Anoane kakaro Unihae Kotipo. Nōmo someane kakaro somerakanapo. Ano reakipoko aporo hinamo su sarimaraka, kakuna porokoa toke, anoane makáraraka hufitaeraka someraka, ‘Kotimo makata su asekeea reasasamo isu hukurukusane soko Kotimo ipi aiyakakosapo.’ Aíyaka aporomo somehokosapo.” Aíyaka Kotimo somesane porofete aporomo popahoareapo.

(Aisaia 45:23)

¹² Asiamo keseke Kotimo isu hukuaruramo, isiaipo isina yia hakásara saka isiaipo suamo makata ásia suane Kotiaki somehokosapo.

Keresoa paosa aporomo ní maeane ararehoanie, aisane oyapo.

¹³ Repo aporo metaki hokomaka watikiaka somerane metakarinie. Repo úyaka hemakapunie. Ni maeane Keresomo ikia kara kekemarakapu pusuane, etehoasimo makata matasona ayáka, nōmo kirimaraka makata meta rakiakopo. ¹⁴ Nōmo Unihae Yasuaki kataka marekea reasasamo epo anoaki tarirakano nōmo úyaka hemakapurakanapo. “Makata nakosa suane kotesapo,” aíyaka nōmo hemakapurakanapo. Asiāne aporo metamo hemakapuraka, “Makata nakosa metane watikisapo,” aíyaka hemakapukua nenakano, ipi yia mawatikirakanapo.

¹⁵ Arirakano nōmo makata nakosane nenaka rekeno Keresoa paosa aporo mae metamo aseraka someraka, “Epo makata nanafononane anene.” Airakanone nōmo ní Keresoa paosa aporo maemo hemakapusuane mokoatikirakanapo. Mokotikinapaka epoko nōmo makata nakosane sokoaihoanie. Epo aíyaka somerakanone e terafaka ruraka etesa kakenapo. Akipoko makata nakosane sokoaihoanie. Nōmo sokoaihoanafonorakanone

nómo ní maeane himu tumurumo hemakapurakanafapo. Asiamo ní maepoko Yasumo farimaka kusuapo. Farimaka kusuasamo nómo ní maeane mokoatikihoane siahoadifareapo. ¹⁶ Asiamo nómo makata rakirane hemakapukua, “Ayiáka rakiante siahoadireapo.” Aiyáka hemakapusua nine ní Keresoa paosa aporo maemo someraka, “Ayiáka rakiante siahoadifareapo.” Aihokohoamo nómo ayiáka rakiakopo.

¹⁷ Arirakano Kotimo aporo hinamo asekeea rerane makata nená ayafapo. Makata fanane oyapo. Repo ereketae hemakapurane soko, auaraka risirane soko, arirakano seseraka risirane Ho Kotesamo karapo. Ayiáka risia aporo hinamoane Kotimo unihaeaka asekeea rerapo. ¹⁸ Ayiáka Keresoaki hemakapukua rakira aporo hinamoaki Kotimo sesenapo. Arirakano aporo metakiramo asekeea someraka, “Aporo hinamoane koteaka ereketaeraka risikinapo,” airapo.

¹⁹ Asiasamo Keresoa paosa aporo hinamomo himu hakásaraka hemakapusimo isiapo makata ereketae aina susuane kekemahokosapo. Isu isina suane mawakapuhokosakipoko ereketae aina susuane kekemahokosapo. ²⁰ Arirakano ní Kereso aporo maemo someraka, “Nómo makata ane neane siahoadifareapo,” airakano nómo yaiya nenakano Kotimo mafasiako rakirane matasorakanapo. Asiamo makata nená akipoko Kotimo rakirane matasohokopo. Arirakano Koti ipi hikumisia makata nená suane neane siahoadireapo. Asiane nómo makata anenamo aporo meta eterakanone ane, nómo makata ainane watikisapo. ²¹ Asiamo nómo makata kakayia soko, waene he soko nenakanone, nómo Keresoa paosa aporo maemo aseraka terafaka ruraka eterakano, nómo makata nenáne sokoaihoanie. Nómo makata meta soko rakirakanone, Keresoa paosa aporo ní maemo asekeea, e etehoane siahoadifareapo. Etenapaka nómo ayiáka rakiakopo.

²² Arirakano tau auaraka risira metane oyapo. Nómo ní hemakapusua aeyaka hemakapuraka, “Makata nenáne soko, makata rakirane soko siareapo,” aiyáka hemakapurane Koti tetápo titi menapo. Nómo hemakapusuane Kotimo aserapo. Asiamo Kotimo neaki somehokosapo. Aporo metaki tafatafahokopo. Makata nená soko makata rakira soko takekea hemakapukua, “Siareapo,” aiyáka hemakapukua rakinie. Ayiáka makata rakira maiya amo himumo tau hemakapukua someraka, “Watikirareapo,” aiyáka somehoanafonorakano né seseraka rekeakosapo. ²³ Arirakano nómo makata nakosa himu tetáraka hemakapukua nenakanone watikiaka rakiraka ayiakakosapo. Nómo hemakapuraka, “Makata one rakiante watikihoasireapo.” Aisa nine nómo rakirakanone nómo watikiaka rakiraka ayiakakosapo. Nómo makata rakiakosapoko Kotiaki himu hakásaraka hemakapunafonosamo watikiaka rakiraka ayiakakosapo. Himu tetaraka hemakapukua rakirakano, ane nómo watikiaka rakirakanapo.

15

“Aporo metane ararehoko hemakapukua rakinie,” aisane oyapo.

¹ Tau auaraka risikiakosakipoko some one soko hemakapunie. Yasuaki wakasemaraka hemakapusua aporoane isu Yasuaki káraraka hemakapusua aporoamo ararehoanie. Isiapo isina hemakapusuane rakiante siahoadifareapo. Isu isinane hákasa maseseraka rakiako hemakapuraka risikiakopo. ² Asiamo isiapo suamo hakása hakásaraka Kereso mae papá metane masesehoko arareraka rakinie. Ipu Kotimo ainane koteaka keke-maraka hemakapusimo iane arareraka rakinie. Ayiáka rakirakano ipu Yasuaki himu hakásaraka hemakapusuane wakapuaka risikiakosapo.

³ Arirakano Yasumo e ipiane ararehoko hemakapukua rakisiasapo. Epo ipi ainane Kotimo sawia porofete aporomo úyaka popahoareapo. “Kotio, aporomo néaki hokomaka somehoko asiane, anoaki hokomaka somesapo,” aiyáka popahoareapo. (*Buk Song 69:9*)

⁴ Wate fana Kotimo sawia popasane Kotimo ainane isiapo hemakapusimo popasapo. Asiamo Kotimo ainane hemakapusimo popahoareapo. Arirakano Kotimo some popasane isiapo menoraka, isiapo Kotiaki himu hakásaraka hemakapusuane paroaka risike, Kotimo ipi makoteraka ayiakakosapo aisane faserepeasimo, isu kau risikinapo.

⁵ Ayiáka risikiasimo nōmo repoko úyaka kurikurirakanapo. Repo suamo Yasu Kereso kekemahoasimo Kotimo reane ararehoasimoripo. Asiamo re Kereso kekemaraka risike re namina ya himu hakásaraka risikiasimo hemakapurakaripo. Isiapo himu hakásaraka hemakapurane Kotimo mawakapunapo. Arirakano isiapo isina yiamo makoteraka tau auaraka risikiasimo Kotimo rakirapo. ⁶ Repo suamo akai hakásamo someraka, “Kotio, néane isiapo kekererakanapo. Isiapo Unihae Yasu Keresomo Ata kárane népo.” Aíyaka repo Kotiaki kekerehoasimo nōmo reane farimaka kurikurirakanapo.

Yu aporoane soko Yu aporohoanafonosane soko Yasu Keresomo araresane oyapo.

⁷ Yasu Keresomo re makotesa ayiáka repo soko Keresoa paosa aporo su ayiáka makote-hoanie. Makoteraka risikino Kotimo yano motosane makárahokosapo. ⁸ Yu aporomo makasa kaua kekemaki Kotimo makata ayiakakosapo aíyaka somesapo. Somesane Yu aporomo kakarohoareapo, aihoasimo, Yasu Kereso hauaka wo pesapo. Pekea reke Yu aporoane arareraka rakiako pesapo.

⁹ Arirakano Keresomo Yu aporoane araresa yiamo Yu aporohoanafonosane soko araresapo. Arirakano Yu aporohoanafonosane soko Kotimo kamenakahoareapo. Ipi kamenakarakano, Kereso pekea Yu aporohoanafonosane araresapo. Araresasamo yumo Yu aporohoanafonosamo soko Kotiane kekererakanapo. Kekerena ane Kotimo ipi sawia wate fana porofete aporomo Keresomo somehokosane aíyaka popahoareapo.

“Kotio, nōmo Yu aporohoanafonosane kamenakasasamo ano Yu aporoyaki rea maiya amo, néaki kekererakanapo. Aporo hinamomo nōmo yano motosane kekererakanapo nōmo néaki kesarakanapo.” Aíyaka Keresomo Kotiaki somehokosane porofete aporomo popahoareapo. *(2 Samuel 22:50; Buk Song 18:49)*

¹⁰ Arirakano Kotimo sawia popasane some meta one soko popahoareapo. Mosesemo poparaka,

“Yu aporohoanafonosa reo, Kotimo aporo murikimasa Yu aporo akiyaki sarimaraka sesehoanie,” aíyaka popahoareapo. *(Lo 32:43)*

¹¹ Arirakano some meta popasane oyapo.

“Yu aporohoanafonosa reo, repo Unihae Kotiane kekererohanie. Aporo hinamomo suamo hauaka sua Kotiaki someraka, ‘Nōmo yano motosane káraro,’ aihokosapo.” Aíyaka Kotimo sawia popahoareapo. *(Buk Song 11:7)*

¹² Arirakano Yasu hauaka wo peakosaposane some meta Aesayamo popasane oyapo.

“Tefetemo wafaya Yésemo wainepe pusua aporo ira amo aporo hokosa* meta taka-peakosapo. Epo Yu aporohoanafonosane unihaeaka asekeea rekeasimo Kotimo mareakosapo. Ayiáka marerakano Kotimo aporo hinamomo suane makotehoko ayiakakosaposane Yu aporohoanafonosamo kau risikinapo.” Aíyaka Aesayamo popahoareapo. *(Aisaia 11:10)*

¹³ Arirakano repoko nōmo úyaka kurikurirakanapo. Isuaki makata kotesa Kotimo kakakosaposane, isiapo mokoakosakipoko kau risikinapo. Asiamo repo Kotiaki himu hakásaraka hemakapurua risikino, Kotimo reaki himu sesenane soko, himu auanane soko re himua komarusimo nōmo kurikurirakanapo. Asiamo Ho Kotesamo wakupuamo repo Kotiaki himu hakásaraka hemakapusuane makárahoasimoripo.

Poremo sawi popasa one wakapuaka popasapo, aisane oyapo.

¹⁴ Maeo, repo koteaka ainane rakikia, arirakano koteaka ainane hemakapurua, aíyaka risikinapo, aíyaka nōmo hemakapurakanapo. Asiamo repo Keresoa paosa aporo mae papáki makata koteaka hemakapurua ainane some kakane siahoasireapo. ¹⁵ Kotimo ano hemakapurua ararerakano nōmo reaki sawi popana one some metakira wakasema parosapo. Kotimo someane repo merarunapaka nōmo reaki poparakanapo.

¹⁶ Ano Yasu Keresomo aporo raipa ayiáka rekeasimo Kotimo ano murikimasapo. Yu aporohoanafonosane ararehoko Yasu Keresomo aporo raipa rakisimo Kotimo ano murikimaka rakinie, aisasamo nōmo rakirakanapo. Aporo hinamomo Kotiaki koteaka

* 15:12: Tefetemo wafaya Yésemo wainepe pusua aporo iramo aporo hokosa meta takapeakosapo aisane Yasupo.

kekerehoasimo pirisiti aporomo iane ararena ayíáka, nōmo soko re Yu aporohoanafonosamo Keresomo ainane hemakapusimo ararerakanapo. Arirakano aporomo Kotiaki saro sipi karakano pirisiti aporomo maka, Kotimo asekeasimo eke kima taeraka arakira ayíáka, Yu aporohoanafonosamo Kotiaki himu hakásaraka hemakapusimo, nōmo rakirakanapo. Himu hakásaraka hemakapura aporo hinamoane Kotimo asekeasimo, nōmo akara ayíáka, Kotiaki makata yaku karakano Kotimo sesenapo. Seseraka makata yakuane amara ayíáka, himu hakásaraka hemakapura aporo hinamoane epo pasimorapo. Pasimokoa ipu himua Ho Kotesa rekeasimo murirapo.

¹⁷ Kotimo makata rakirane nōmo Yasu Keresoyaki hakāsa rakirakanapo. Eyaki hakāsa rakiraka Koteaka rakiraka reke ano sererakanapo. ¹⁸ Kotimo makata rakirane Yasu Kereso aeyaka nōmo makata rakisiane nōmo kakama somerakanapo. Epo ano pusiesamo Yu aporohoanafonosamo Kotimo someane kakimasapo. Nōmo some kasane ipu kaikia, arirakano nōmo makata rakisiane ipu asekea, asiasamo Kotimo someane ipu kakimasapo. ¹⁹ Arirakano ipu asesane oyapo. Kotimo ipi hemakapukua wakapuaka rakirane aporo hinamomo asekea fofahoasimo nōmo rakisiapo. Ho Kotesamo ano mawakapurakano Kotipoko nōmo rakisiapo. Kotimo ano pusiesasamo ano Yarusarame siti aeyaka kepomarekea, taone sua pukua Iririkame hauaka á pauraka, ane marokeraka pusuafapo. Yasu hemakapusimo some kotesane some kape pukua yumo some kaka fasapo.

²⁰ Arirakano Kotimo makata rakirane rakiako, nōmo himumo uyáka seseraka hemakapurapo. Aporo hinamomo Yasu Keresoane kaiyánafonosa hauaka á nōmo some kakako seserakanapo. Arirakano aporo metamo ira kesa fana porosakipoko nōmo ape namo kiakosane hisinapo. Aina ayíáka aporo metamo Kereso hemakapusimo someane some kaka rakisiakipoko kesekeea nōmo some kakako puko hisiripo. ²¹ Asiamo aporomo Kereso hemakapunafonona hauaka á nōmo some kakako purapo. Arirakano porofete aporo Aesayamo popasane oyapo.

“Aporo hinamoaki Eane[†] some kakako aporo meta punafonosa nine, keseke ipu kaikia hemakapukusapo. Fana Kotimo someane kaiyánafonosa nine, keseke ipu kaikia hemakapukusapo.” Aiyaka Aesayamo popahoareapo.

(Aisia 52:15)

Rome sitia Keresoa paosa aporo hinamo risiane Poremo aseako pukusakipoko hemakapukua somesane oyapo.

²² Ano makata rakiraka reke, re aseako peakosapoko asiane, maiya suamo makata rakiramo matasorakano reane aseako pesafapo. ²³ Peanafonosa nine yumo hauaka wo Yasu hemakapusimo some kotesane, nōmo aporo hinamoaki some kasane ipu kaisiapo. Keremisi yakaimo nōmo re aseako peako hemakapuraka reasamo yumo re aseako peakosapo. ²⁴ Ano Sepéne hauaka á puko, re arisia pekea, aeyaka Sepéne hauaka á pukusapo. Puko apera maiya amo, reyaki wakasema rekeako hemakapurakanapo. Maiya amo reane aseraka kára sesehokosapo. Ano Sepéne hauaka apuramo repo ano ararehoasimoripo.

²⁵ Asiane yumo re arisia ano peasiraka, ano Yarusarame sitia fana pukusapo. Puraka Keresoa paosa aporo hinamopoko mone taesane iaki kakako pukusapo. ²⁶ Arirakano Yarusarame sitia Keresoa paosa aporo hinamoane makata forokoa risikinapo. Forokoa risiasamo Masetónia hauaka aeyaka Keresoa paosa aporo hinamomo soko, Ákaia hauaka aeyaka Keresoa paosa aporo hinamomo soko mone taesapo. ²⁷ Mone taesane ipu hemakapukua seseraka taesapo. Asiamo Yasu hemakapusimo some kotesane Yu aporo aeyaka some karaka, Koti menane Yu aporohoanafonosaki araresapo. Asiamo Yu aporohoanafonosamo Yu aporoane kaumo menane[‡] arareraka kakafunupo.

²⁸ Ipu mone ane nōmo mokoa Yarusarame sitia pukua mone yaku kasane Keresoa paosa aporo hinamoaki kaka faraka ano Sepéne hauaka pukusapo. Pukusakipoko ano

† 15:21: Eane Yasupo. ‡ 15:27: Kaumo menane moneane somesapo.

re arisia peakosapo. Pekea aeyaka Sepéne hauaka a pukusapo. ²⁹ Ano apera maiya amo Yasumo makotenane anoyaki káraraka reasasamo, nōmo reane makotehokosapo.

³⁰ Maeo, Unihae Yasu Keresomo isiapo suamo Kotipoko rakisimo ararenapo. Isu himua Ho Kotesane reasamo isiapo isina yia himu tumurumo hemakapurakanapo. Asiamo repo ano ararehoasimo nōmo reaki makata meta somerakanapo. Anoaki makata umisa fasereperakano Kotimo ano ararehoasimo anopoko farimaka kurikurihoanie. ³¹ Kurikuriraka ano Yutía hauaka apuramo, Kotimo someane patera tarira aporomo ano waseremaka rurapaka, Kotimo ano ararehoasimo kurikurihoanie. Arirakano Yarusarame sitia Yu aporo hoanafonosamo mone ane Yu aporomo seseraka mokoasimo kurikurihoanie.

³² Kotimo anoaki repo sitia pusierakano ano seseraka peakosapo. Ano apera maiya amo repo anoane mawakapu, arirakano nōmo reane mawakapu, ayíáka isu isina masesehokoripo. ³³ Himu auanamo kepoane Koti ipipo. Kotimo re ararerakano re himu auaraka risikiasimo hemakapurakaripo. Kotimo anakanapo. Aíyaka hemakapukua nōmo kurikurirakanapo. Kakaroripo.

16

Rome sitia Keresoa paosa aporo hinamo risiaki Poremo hemakapusuane oyapo.

¹ Isiapo Keresoa paosa papā Fipi, re arisia perakano, repo eane makotehoanie. Senekiria taonea Yasu Keresopoko Fipimo rakirapo. Fipimo Yasu Keresoa paosa aporo hinamoane arareraka rakirapo. ² Rakirasamo repo Unihae Yasu Keresoaki hemakapukua, Kotimo aporoaki seseraka pasiamara ayíáka, repo Fipiane soko re arisia perakano, repo pasimakanie. Fipimo makata meta fasekeno repo e arareraka kakanie. Ano soko aporo hinamo yakai metakirane soko Fipimo araresasamo repo eane ararehoanie.

³ Arirakano Pirísíra nōmo ní aporo Akuwíra teto anoyaki hakása risike, Yasu Keresomo makata rakirane isiapo rakisiapo. Asiamo nōmo tetoane hemakapurakanapo. ⁴ Tetápo ano ararerakano, tetoane rusua kusuahopo. Akipoko nōmo tetoaki suserakanapo. Yu aporo hoanafonosa Keresoa paosa aporo hinamo suamo soko tetoaki suserakanapo.

⁵ Tetápo apea* Yasu Keresoa paosa aporo hinamomo Kotiaki kurikurihoko sarimaraka risiane soko nōmo hemakapurakanapo.

Epinítase né soko iti kakaro tékepo. Né nōmo kára hemakapurakanapo. Esea hauaka á fana Yasuaki rekeako parisa aporoane népo. Amo patera aporo hinamo metakirane soko Yasuaki risikiako parisapo.

⁶ Maria nōmo Rome sitia Keresoa paosa aporo hinamopoko makata kára wafororaka rakisiapo. Asiamo né nōmo hemakapurakanapo.

⁷ Atonaékasepe Yunia teto soko nōmo kára hemakapurakanapo. Teto soko ano soko isu Yu aporopo. Yasu Keresomo makata rakirane isiapo rakisiasamo isu hakása tipura kesapo. Ano Keresoa paohoasiraka této fana Keresoa paorakasupo. Tarira aporomo someraka, “Tetoane aporo kotesapo,” airapo.

⁸ Amepétase etapo Unihae Yasuaki himu hakásaraka hemakapukua risiasamo né nōmo tékepo. Tákesasamo né nōmo hemakapurakanapo.

⁹ Epánease nōmo isuyaki hakása Unihae Yasumo rakirane nōmo rakirakasupo. Néane nōmo hemakapurakanapo. Arirakano Setékese né soko nōmo tákesasamo, neane soko nōmo hemakapurakanapo.

¹⁰ Apérese, nōmo Keresoaki himu hakásaraka hemakapusuasamo, aporo metaki-ramo néane mokoatikisa nine, nōmo Keresoaki yaiya himu hakásaraka rekenapakae. Reasasamo Kereso kakaro kekemana aporoane népo. Néane nōmo hemakapurakanapo.

Arirakano Arisitúpurasemo apea aporo hinamo hokosa su risiane nōmo hemakapurakanapo.

¹¹ Arirakano Herotiaóne eto Yu aporo hakása yiwasamo né nōmo hemakapurakanapo.

* 16:5: Tetapō apea aporo hinamoane sese apea sarimana ayíáka sarimanapo.

Arirakano Keresoa paosa aporo mae Nasísasemo apea aporo hinamo risiane soko nōmo hemakapurakanapo.

¹² Arirakano Taraeféna Taraefósa tetápo Unihae Kotimo makata rakirane wakapuaka rakirasamo teto soko nōmo hemakapurakanapo.

Pésese nōmo Unihae Yasumo makata rakirane, wakapuaka rakirasamo né nōmo Keresoa paosa papāpo. Néane soko nōmo hemakapurakanapo.

¹³ Rúfase nōmo Unihae Yasumo makata rakirane rakismo, Unihae Kotimo neane murikimarakasupo. Né soko nōmo ní ama ane soko nōmo hemakapurakanapo. Nōmo ní ama ane nōmo ama asiapo.

¹⁴ Asinikirítase soko, Ferékone soko, Hémisi soko, Patarópase soko, Hémase soko, reyaki Keresoa paosa mae papā hakāsa sarimaraka Kotiaki kekereraka risiane soko, re sú nōmo hemakapurakanapo.

¹⁵ Firórokase soko, ipi asea Yúria soko, Nériase soko, Neriasemo ipi papā soko, Orímpase soko, repo apea aporo hinamo su sarimaraka Kotiaki kekereraka risiane soko nōmo hemakapurakanapo.

¹⁶ Repo namina yia seseraka hokono mokoanie.

Arirakano Yasu Keresoa paosa aporo hinamo suamo hauaka wo kekepo kekepoaka risiamo reane hemakapurakanapo.

“Kotafe hora aporomo some kasane kakimakopo.” aisane oyapo.

¹⁷ Maeo, nōmo some one koteaka kakimaka hemakapunie. Kotimo someane reaki some karakano repo kakimasapo. Kakimarakano asekea matasohokosakipoko, kotafe hora aporomo reaki tafatafaraka Kotimo kakaro someane metakarikia, ipu namina kotafe someane some karaka reane kirimarakanapo. Ipu kotafe some kasasamo aporo hinamo metakiramo Keresoane metakarisiapo. Kotafe some akaramo Kereso aporo hinamo metakirane parakuraka kekepo risikinapo. Asiamo kotafe hora aporoane re fasikia risikianie. ¹⁸ Kotafe hora aporoamo Unihae Keresomo rakirane namo kakaro rakirakanafapo. Ipu namina kauane maseraka rakirapo. Makata aina kotesane takekeea hemakapunafona aporomo hasaka hemakapukua ipu someane kekemahoasimo ipu kirimarako hokokeka, kukunameaka kotafe somerapo. Keresomo menane kekemaraka rakiakohoamo ipu kotafe somerapo.

¹⁹ Asiane Kotimo someane repo kakimasane aporo metakiramo hauaka su aeyaka kaisiapo. Kaisiasamo reaki nōmo seserakanapo. Yumo repo Kotimo someane kakimasa nine maiya suamo repo makata koteaka rakiakosa kepoane takekeea hemakapusimoripo. Makata watikisane hemakapufaraka meraruhoasimoripo. ²⁰ Kotafe hora aporomo someane makikisiraka fasikia risiasamo, Satanemo re kirimana wakapuane Kotimo mahurutapiakosapo. Sataneane repo korakemo finiraka matekeameana ayiáka, Kotimo Satane ane mahurutapiakosapo. Re Kereso aporo hinamo sarimaraka hakāsa risikiasimo Kotimo re ararehokosapo. Asiamo himu auaraka reramo kepoane Koti ipipo. Unihae Yasumo yaku ararenamo reane ararehoasimo nōmo kurikurirakanapo.

“Aporo metakira Poreyaki hakāsa risia amo Rome sitia aporo risiane hemakapurakanapo,” aisane oyapo.

²¹ Timotimo Yasu Keresopoko anoyaki hakāsa rakiraka, epo reane hemakapurakanapo, airakae. Rúsiase soko, Yásone soko, Sósepata soko, ipu suamo reane hemakapurakanapo airakae. Isu suane Yu aporopo.

²² Sawi one anopoko Téteasemo poparakanapo. Epo Unihae Yasuane hemakapukua reke, epo reane soko hemakapurakanapo, airakae.

²³ Kaíasemo soko re hemakapurakanapo airakae. Kaíasemo ano arareraka pasimarakano, epo apea ano rekenapo. Epo apea Yasu Keresoa paosa aporo hinamo kurikurihoko sarimarakanapo. Arirakano Erásatasemo taone wo takese mone taesane asekea rekenapo. Epo soko reane hemakapurakanapo, airakae. Arirakano Keresoa paosa aporo isiapo mae Kótasemo soko re hemakapurakanapo airakae. ²⁴ Isiapo Unihae Yasu Keresomo re su himua ararehoasimo hemakapurakaripo. Kakaroripo.

Kotimo yano motosa makáranane oyapo.

²⁵ Fana maiya suamo Kotimo ayiakakosaposane mahamesapo. Yumo repo asekea hemakapusimo kakama tarisiapo. Kakama tarisiane Yasu Keresopo. Yasu Keresoane nōmo some karakano repo kakimaka kakaro wakapuaka hemakapusimo Kotimo ararehokosapo. Ararehokosasamo Kotiaki kekererakanapo. ²⁶ Mahamesa nine yumo isuaki epo rakira aporoaki kakama somesapo. Kakama somerakano aporo hinamo suamo someane hemakapusimo isiaipo arareraka some karakanapo. Wate fana porofete aporomo Kotimo sawia popasane isiaipo some karakanapo. Ipu Yasu Keresoane ayiakakosaposane some karakanapo. Koti ipi yaiya rekenapo. Epo ipi someane isiaipo some kakako isu pusiesapo. Yu aporohoanafonosamo kakimaka, Yasuaki himu hakásaraka hemakapusimo, some kakako pusiesapo. ²⁷ Pusie airane Koti ipi hákasapo. Makata su hemakapura kepoane soko Koti ipi hákasapo. Asiamo isu ararehoasimo epo Yasuane hauaka wo pusiesapo. Asiasamo Koti ipi yano motosane makáraraka kekererakanapo. Yumo soko keseke soko kekereraka risikiakosapo. Kakaroripo.

1 Korini

1 Korini sawi one mahemakapukusa someane oyapo.

Pore kimisi puraka, Korini taonea aporo hinamomo Yasuane hemakapusimo some kasapo. Aporo hinamo yakaimo Yasumo someane kakimarakano, Pore keremisi hakásakipoko, keremisi tetá ane hafo paoraka, iyaki some kakako parisapo.

Korini taonea Yu aporo soko, Kiriki aporo soko, aporo makata kemo kara toane soko, aporo makata kemo forokoa risiane soko, i sú risiapo. Korini taonea aporo yakaimo kotafe koti parisane ipu makararaka kekeresapo. Pore Korini taone metakarisia maiya amo, Apórosepe Akuwíra tetapo Keresoa paosa aporo hinamo asekea risiapo.

Keresoa paosa aporo metakiramo makata aina watikisane rakisiapakano iane maropo-hoasimo sawi one popasapo. Arirakano Korini aporomo Poreaki makata akai kairakano, Poremo sawi wo some paripusuapo.

1 Korini sawia some kepo parakuraka popasane oyapo.

1:1-9 Poremo sawi one kepomarekeea popasapo.

1:10-4:21 Keresoa paosa aporomo kekepo kekepoaka tafatafaraka risikino, Poremo paroaka somesapo.

5:1-6:20 Keresoa paosa aporomo hauaka omo makata hemakapusuane kekemaraka rakisiasamo, Poremo paoraka somesapo.

7:1-40 Aporomo hinamo arumakosane soko hinamo aporo pukusane soko, Poremo somesapo.

8:1-11:1 Himu tetáraka hemakapukua risikiakopo. Yasu Keresoaki himi hakásaraka hemakapunie, aisapo.

11:2-14:40 Isu Keresoa paosa aporo hinamoane Keresomo kau asiapo. Asiasamo himu hakásaraka hemakapukua ararehoanie, aisapo.

15:1-58 Kereso kusua maturikia taesasamo isu soko kurakano, maturikia taehokosapo, aisapo.

16:1-24 Poremo some metakira someraka faraka ayapasapo.

Korini sése apea Keresoa paosa aporo hinamoaki Poremo sawi fana poparaka makesane oyapo.

¹ Kotimo ipi hemakapukua Yasu Keresomo tarira aporo rekeasimo ano Poreane murikimasapo. Ano soko murikimaka Keresoa paosa aporo isiapo mae Sosotenese soko, anoyaki hakásä reke, nōmo sawi one poparaka makerakanapo. ² Keresoa paosa aporo hinamo Korini sése apea risia reaki nōmo sawi one poparaka makerakanapo. Re Yasu Keresoaki kataka marekeaa risikino, makata watikisane Kotimo re makikisiraka marekeaa, re Kotimo aporo ira risikiasimo murikimasa aporo reaki poparakanapo. Hauaka sua Keresoa risikiako parisa aporo hinamo suamo, isiapo Unihae Yasu Keresoaki kurikurina aporo hinamo ea paoraka arisia aiyáka risikiasimo pasimosapo. Unihaeane isiapo soko, ipu soko, isina suamo Unihae Yasu ipi hakásapo. ³ Isiapo Ata Kotipe Unihae Yasu Kereso tetapō yaku ararenane soko, auaraka risirane soko, reaki kakasimo kurikuriranapo.

Yasu Keresomo yaku ararenane oyapo.

⁴ Kotimo Yasu Kereso aeyaka rakumarekeea re araresakipoko maiya suamo nōmo Kotiaki suserakanapo. ⁵ Repo Keresoaki kataka marekeaa risikino, Kotimo reane makoteraka, makata su siaraka maresapo. Siaraka maresasamo, repo himumo Kotimo some kepoane hemakapurakanapo. Arirakano Kotimo someane soko wakapuaka some karakanapo. ⁶ Keresoane nōmo reaki kára somerakanano, repo himumo kakaroripo, aiyaka wakapuaka hemakapukua risikinapo. ⁷ Yasu kakama pariperakarihoamo re kau arisia maiya amo, Ho Kotesamo wakapu yaku ararena suane reaki kasapo. ⁸ Unihae Yasu Kereso pariapera maiya amo, Kotimo re asekea someraka, “Re siaraka koteaka risikinapo,” aihokosapo. Arirakano hauaka one fa ana maiya amo, repo himu hakásaraka yaiya paroaka hemakapuraka risikiasimo, Kotimo re yaiya arareraka rekeakosapo. ⁹ Arareraka

rekeakosakipoko Kotimo re peaesapo. Perakano asekea, ipi hokosa Yasu Keresoaki himu hakásaraka kataka marekea risikiasimo, Kotimo peaeraka pasimosapo. Kotimo ipi makata su kakaro ainasasamo kakaro ayiakakosapo.

Keresoa paosa aporomo kakanakeraka fasikia risirane oyapo.

¹⁰ Keresoa paosa aporo maeo, nōmo some one repo kaiyisimoripo. Isiapo Unihae Yasu Keresoane ipi yano motosa kárasasamo uyáka risikianie. Sapeaka fasikia risiane mafahoanie. Repo suamo himu hakásaraka hemakapukua risike, himumo hemakapurane soko, makata rakirane soko, himu hakásaraka hemakapunie. ¹¹ Keresoa paosa aporo maeo, repo namina kára tafatafaraka risikinapo. Aíyaka Korowimo ape aeyaka aporo metakira risiane ano rea pekea, anoaki hufitaeraka somerakasupo. ¹² Repo úyaka somerakanapakae. Repo namina yia aporo metakiramo someraka, “Ano Pore patera aserakanapo.” Airakano aporo metakiramo someraka, “Ano Apórose patera aserakanapo.” Airakano aporo metakiramo someraka, “Ano Pita patera aserakanapo.” Airakano aporo metakiramo someraka, “Ano Kereso patera aserakanapo,” aisapakae.

¹³ Aisapakano nōmo kairaka reaki someraka, “Manakano Keresoane parakurakanare? Ayiane siahosasifareapo. Ira matopesa kusuane ano Pore repoko kusuare? Wae, ano repoko kusuafapo. Re ano Poremo yano motosa yano hokoa hea tapukumurisiare? Wae, ásiafapo.” ¹⁴⁻¹⁵ Arirakano nōmo Kirísipasipe Kaíase tetá hákasa hea tapukumurikia, amo patera a aporo metakira nōmo hea tapukumurisiafapo. Repo metakiramo someraka, “Ano Pore yano motosa yano hokoa hea tapukumaresapo.” Aíyaka somerapaka re suane nōmo hea tapukumurianafonosamo ano seseripo. ¹⁶ Asiāne nōmo meraru-raka aihoareapo. Aporo hakása meta soko, nōmo hea tapukumaresapo. Ipi yano motosa Setéfanasepo. E soko, epo apea aporo hinamo hakása risiane soko, nōmo hea tapukumurisiafapo. Aporo metakira nōmo hea tapukumurisiare? Wae, metakirane nōmo hea tapukumurisia hemakapurakarifapo. ¹⁷ Asiamo aporo hea tapukumuriasimo Keresomo ano pusiesafapo. Ipi some kotesa some kakasimo ano pusiesapo. Hauaka wo makata rakira enomasa someane some kasafapo. “Yasu kusuapo.” Aisa kepoane mawakasemanapaka, some akaramo aporomo hemakapusuane nōmo some kasafapo.

¹⁸ “Yasu ipi isupoko farimaka ira matopesa paremarerakano kusuapo.” Aisane kakimakanafonosa aporomo someraka, “Someane some watikirareapo.” Aíyaka somerakanone i mafasira ikia kara a purakanafapo. Arirakano Kotimo mafasisia aporomo someraka, “Someane Kotimo wakapu ayapo.” Aíyaka ipu somerapo. ¹⁹ Arirakano wate fana Kotimo sawia popasane oyapo. Kotimo someraka, “Aporomo makata su enomaka hemakapusuane nōmo mawakasemahokosapo. Aporomo hauaka wo makata su enomaka hemakapusuane nōmo mafahokosapo.” Aíyaka Kotimo somerakano popahoareapo. (Aisaia 29:14)

²⁰ Aíyaka popasasamo hauaka wo makatane enomasa aporo iane Kotimo hikumisia fanāre? Wae, i fanāfapo. Yu aporomo somemane tisa aporo iane fanāre? Wae, iane soko fanāfapo. Maiya omo me rukua kirimaraka someana aporo iane fanāre? Wae, iane soko fanāfapo. Asiāne Kotimo someraka, “Hauaka wo makata su enomaka hemakapukua makata some ainane nenakamaka makatapo,” airapo. ²¹ Aíyaka Kotimo someraka, “Aporomo ipi hauaka wo makatane enomaka hemakapura amo anoane hemakapusifareapo.” Aíyaka Kotimo ipi kepo su hemakapurasamo ayiáka maresapo. Ipiane someaka maresane isiapo some karakanapo. Some karakano aporo metakiramo kaikia someraka, “Someane masuasa aporomo somepo,” airapo. Airakano yia some kasane aporo metakiramo kakimarapo. Kakimasa aporo hinamoane Kotimo mafasirapo. Ayiáka Kotimo maresapo. ²² Arirakano Yu aporomo someraka, “Kotimo wakapumo hemakapukua rakirane repo rakirakano asekea, repo some kasane soko isiapo kakimakosapo.” Aíyaka Yu aporomo somerapo. Arirakano Yu aporo hoanafonosamo someraka, “Aporomo hauaka wo makata enomaka hemakapusuane some karakanone, isiapo kekemaraka kakimakosapo.” Aíyaka Yu aporo hoanafonosamo somerapo.

²³ Somerakano yia isiaipo some karaka, "Kereso isupoko farimaka ira matopesa paremarerakano kusuapo." Aisa kepoane Yu aporomo saperaka Koti mawakase-marakae, aiyaka hemakapuraka someane kakimakasifareapo. Arirakano some kasane Yu aporo hoanafonosamo kaikia someraka, "Someane nena some watikisareapo," airapo. ²⁴ Arirakano yia, Yu aporo soko, Yu aporo hoanafonosa soko, su Kotimo murikimasa aporomo hemakapuraka, "Kereso ane some kasane kakaroripo. Kotimo wakapuane Keresoyaki rekenapo. Kotimo makata kepo su hemakapurane Keresoyaki rekenapo," airapo. ²⁵ Arirakano Kotimo isuaki mafasira ikia karane tarirakanapo. Tarirakano aporo hinamo metakiramo asekea someraka, "Nenakamaka ikia karapo." Aisa nine ipu namina hemakapusuane Kotimo hemakapusua amo hurutapirapo. Asiamo ipu someraka, "Kotimo rakirane nenakamaka makata ayireapo." Aiyaka somesa nine, ipu rakira wakapuane Kotimo rakira amo marokenapo. Kotimo rakirane namo kakaro wakapureapo.

²⁶ Keresoa paosa aporo maeo, re fana Kotimo pasimokoasiraka risia maiya amo repo makata rakisiene hemakapunie. Asiāne repo aporo yakaimo makata kára enomaka risiafapo. Re namina yia aporo yakai unihaeaka risiafapo. Re metakira aporo hokopukua risiafapo. ²⁷ Arirakano hauaka wo makatane hemakupurafaraka rea aporo soko, aporo wakapu fasa aporo soko, Kotimo murikimoka pasimosapo. Pasimosane makata su enomasa aporoane soko, aporo wakapuaka risiane soko, Kotimo pasimosafapo. Mari-rakano Kotimo ayiáka rakisiare? Aporo hauaka wo makatane enomaka hokopukua risiane makaýahoasimo Kotimo ásiapo. ²⁸ Arirakano aporomanomo someraka, "E aporo wakasemasasamo yano motosa kakenafapo. E makama kesekesapo." Airakano aporo makama kesekesane Kotimo pasimosapo. Pasimoraka aporo hokopukua risiane hurutapiako aporo fanahoanafonosane murikimaka pasimosapo. Pasimosane hauaka wo makata hemakapusuane nenakamaka makata ásiapo. Aiyaka tariraka Kotimo iane makama kesekesapo. ²⁹ Asiamo Kotimo ipi hemakapukua aporo hinamoane pasimosasamo, aporomanano namina yano motosane makárahoane siahoasifareapo.

³⁰ Yasu Keresoaki kataka marekeea risikiasimo, Kotimo re pasimosapo. Pasimosasamo eaki kataka marekeea risikino, isiaipo makata kepo su hemakapusimo tarirane Kereso ipipo. Isu ereketaeraka risikiasimo tarirane soko, Kereso ipipo. Isiaipo watikisane kikisiraka metakarikia koteaka susu risikiasimo tarirane soko, Kereso ipipo. Isiaipo watikisane mafahoasimo, Yasumo yapimo roporaka ikia kara kotesa maresane Kereso ipipo. ³¹ Kereso ipisasamo,

"Repo aporo metane makáraraka somehoariraka, né níane makáraraka somehoane siahoasifareapo. Unihae Yasu Keresoane makáraraka somehoanie." Aiyaka Kotimo sawia poparaka taesane hemakapunie.

(Jeremaia 9:24)

2

"Yasu ira matopesa paremarea kusuapo." Aiyaka some kasane oyapo.

¹ Keresoa paosa aporo maeo, Yasu Keresomo rakirane Kotimo kakaro anoaki somerakano, nōmo reaki somehoko pesapo. Somehoko pesa maiya amo aporo káramo some akara ayiáka, reaki nōmo some kasafapo. Aporomo ipi hemakapusua enomaka some akara ayiáka, nōmo reaki some kasafapo. ² Arirakano ano reyaki hakāsa rekesu maiya amo nōmo hemakapuraka, "Yasu Keresoane hákasa nōmo some kakakosapo. Epo isu farimaka ira matopesa paremarerakano kusuane hákasa, nōmo some kakakosapo." Aiyaka nōmo hemakapukua reaki some kasapo. Makata meta nōmo tipia hemakapukua reaki some kasafapo. ³ Some kasa maiya amo, ano wakapu faraka fofaraka hamisisiraka reke some kasapo. ⁴ Some karaka aporomo ipi hemakapusua enomaka kirimaraka some akara ayiáka, nōmo reaki Yasuane ayiáka some kasafapo. Some akarane kakaro somerakae, aihoasimo Ho Kotesamo wakapuaka rakirane nōmo rakisiapo. Rakiraka reke some kasapo. ⁵ Ayiáka some karakano, repo Kotimo wakapuane asesasamo Kotiaki repo

himu hakásaraka hemakapurakanapo. Aporo káramo namina hemakapusua enomaka somesane kaisiasamo, Kotiaki himu hakásaraka hemakapurakanafapo.

Kotimo makata kepo su hemakapurane oyapo.

⁶ Isiapo tarira aporomo Kotimo makata kepo hemakapusua kotesane hemakapuraka, Keresoa paosa aporo paroaka risiaki some karakanapo. Some akarane hauaka wo makata hemakapura some ayafapo. Hauaka wo aporo unihaeemo someane soko, some karakanafapo. Hauaka wo aporo unihaeaka risiane soko, i fahokosapo. ⁷ Arirakano kepo su hemakapura some akarane Kotimo kakaro aina farareane some karakanapo. Some akarane fana Kotimo mahamekea, aporoaki hufitaeaka somesafapo. Hufitaeaka somehoanafonosa nine, hauaka one kepomareasiraka, isu Kotiyaki faeraka risikiasimo, Kotimo Yasuane murikimasapo. ⁸ Yasu murikimasane, hauaka wo aporo unihae suamo hemakapusuafapo. Hemakapusua satiki Unihae faesane ira matopesa paremareafun-ufapo. ⁹ Arirakano Kotimo sawia popasane oyapo.

“Aporomo asekeanafonosa makatane soko, kaiyanafonosa makatane soko, aporo-manomo hemakapunafonosa makatane soko, makata suane Kotiaki seseraka hemakapura aporoakipoko Kotimo maresapo.” Aíyaka Kotimo sawia popahoareapo. *(Aisia 64:4)*

¹⁰ Kotimo sawia popasane Kotimo Ho Kotesamo isu tarira aporoaki tarikia somesapo. Arirakano Ho Kotesamo makata su hemakapurapo. Kotimo hemakapusua kepoane soko hemakapurapo. ¹¹ Arirakano aporomo aporo metamo hemakapusuane aserafapo. Aporomo epo ipi hemakapusua hákasane epo ipi homo aserapo. Aina ayíáka Kotimo hemakapusuane aporomo aserafapo. Kotimo ipi hemakapusuane ipi Ho Kotesamo hákasa aserapo. ¹² Hauaka omo hoane Kotimo isuaki kasafapo. Ho Kotesa Koti ipi aeyaka isuaki kasapo. Kotimo wakapu yaku ararena su, isuaki kasane hemakapusimo Ho Kotesa kasapo.

¹³ Asiamo isiapo some akaramo aporomo ipi hemakapusua enomasane some akara ayíáka some karakanafapo. Ho Kotesamo isuaki some akara ayíáka, isiapo soko reaki ayíáka some karakanapo. Ho Kotesa rea aporoaki, homo menane some karakanapo.

¹⁴ Arirakano aporo himua Ho Kotesa risikianafonosamo, Ho Kotesamo ararenane soko, someane soko hisiraka kakimaraafapo. Kakimakanafonoraka someraka, “Ho Kotesamo ararenane soko, someane soko, nenakamaka makatapo.” Aíyaka Ho Kotesamo ainane hemakapurafapo. Arirakano aporo himua Ho Kotesa risia aporoamo hákasa Ho Kotesamo ainane hemakapurapo. ¹⁵ Aporo himua Ho Kotesa risiamo aseraka, “Ikia kara ane kotesapo. Ikia kara ane watikisapo.” Aíyaka takekea hemakapurapo. Asiāne Ho Kotesa rea aporomo makata su takekea asekea hemakapurane, nena aporo metamo asekea hemakapurafapo. ¹⁶ Asiamo Kotimo sawia popasane oyapo.

“Unihae Kotimo hemakapusuane epamo aserare? Aporo hinamo suamo aserafapo. Kepoane Kotimo enomakasimo epamo tarirare? Eaki aporomanomo tarirafapo.” Aíyaka Kotimo sawia popahoareapo. *(Aisia 40:13)*

Asiāne Keresomo hemaka apura ayíáka isiapo hemakapurakanapo.

Kotimo aporo raipane oyapo.

¹ Keresoa paosa aporo maeo, fana ano reyaki rea maiya amo, aporo himua Ho Kotesa komarukua risia aporoaki, some kára kakafunu nine, ayíáka reaki some kasafapo. Repo hokosa kirimo hemakapura ayíáka hemaka apure. Hauaka wo aporo himua Ho Kotesa risikianafonosa arisia ayíáka risikino asekea, reaki some kasapo. ² Hokosa kiri hoko akara ayíáka, reaki some wakasema kasapo. Re kárahoanafonosekeno, makata kakayia maíyasa akara ayíáka, reaki some kasafapo. Asiamo Kotimo kepo hemakapukua somera some kepoane repo hemakapusifareapo. Yumo soko repo hemakapusifareapo. ³ Re nena aporo arisia ayíáka, yaiya risikinapo. Repo namina yia kakanakeraka, namina yia tafatafaraka risikinapo. Nena aporo arisia ayíáka re risikinapo. ⁴ Re ayíáka risike

repo metakiramo someraka, "Ano Pore patera aserakanapo." Airakano metakiramo someraka, "Ano Apórose patera aserakanapo." Aíyaka someraka arisiane nena aporomo tafatafaraka ayíáka repo namina yia ayíáka tafatafaraka risikinapo.

⁵ Apóroseane ipi epare? Poreane ipi epare? Eto Kotimo aporo raipapo. Repo Kotimo some kakimakasimo etapo some karaka risiapo. Unihae Kotimo Apóroseaki ayíáka rakiniesane epo rakisiapo. Anoaki ayíáka rakiniesane nōmo rakisiapo. Kotimo etoaki makata rakira kekepo karakano etapo rakisiapo. ⁶ Arirakano hemoa makata mano aporora ayíáka etapo rakiraka risiapo. Makata mano nōmo porosapo. Pororakano Apórosemo heane taka reraka reapo. Makata mano koteaka terahoasimo Kotimo matanehekea maresapo. ⁷ Makata mano porora aporoane soko, he taka rera aporoane soko, teta wakasemapo. Arirakano makata mano matanehera Kotiane ipi namo kakaro kárupo. ⁸ Makata mano porora aporoane soko he taka rera aporoane soko tati makata rakira hakásá yinesapo. Asiamo makata mano porora aporoamo soko, ipi makata rakisia akipoko, makata ropoane makosapo. Arirakano he taka rera aporoamo soko, ipi makata rakisia akipoko makata ropo makosapo. Ayíáka hakásá hakásaraka makata rakisia akipoko makata ropo makosapo. ⁹ Asiane Koti ipiane namo kakaro kárupo. Kotimo etoane murikimasasamo, etapo Kotiyaki hakásá makata rakiranapo. Kotimo hemo ásiane répo. Hemo wafayane Kotipo. Taku me meta soko, Kotimo ape ásiane répo.

¹⁰ Kotimo ano ararerakano nōmo aporo ape kiramo ape akira ayíáka nōmo kisiapo. Kiraka ape takuma ira kesa koteaka aporora ayíáka reaki nōmo fana some kasapo. Ira kesa porosakipoko a aporo metakiramo ape namo akira ayíáka, ano pusuakipoko aporo metakiramo reaki some karakanapo. Ape kira aporomo koteaka kiane siahoasireapo. Mokome kiane siahoasifareapo. Asiamo ape kira aporo suamo ape koteaka kiakosakipoko asekea hemakapukua kinie. ¹¹ Ira kesa ásiane Yasu Kereso ipi hakásapo. Ira kesa meta rekenafapo. Ira kesa meta mapohokopo.

¹² Ira kesa a ape namo kiraka aporo metakiramo ape paroaka kirapo. Asiamo ipu korótó soko meta, siufa soko meta, eke kotesa soko meta makata kakaro parosane mokoa ape kirapo. Arirakano aporo metakiramo ape paroaka kirafapo. Asiamo ipu makata haparesa mokoa, asane soko meta, yasoso soko meta, foaka fahokosa makatane mokoa ape kirapo.

¹³ Arirakano ape paroaka kisiane soko metao, watikiaka kisiane soko metao, hukurukua parakuna maiya amo, Keresomo tariakosapo. Maiya amo ira rufi faserepekea makata rakisiane su inakakosapo. Inarakano aseane makata koteaka paroaka rakisiane yaiya rekeno aseakosapo. Watikiaka rakisiane iramo inakakorakano aseakosapo. ¹⁴ Arirakano ira rufimo inasane iramo kakaro inakakohoanafonoraka ira rufi arakaru yia ape rekeno apeane kisia aporoamo makata ropo makosapo. ¹⁵ Arirakano iramo inakakorakano, apeane kisia aporoamo makata ropo makosane metakariakosapo. Epo makata ropoane metakariraka e aporomanoane pasimakosapo. Ape kisia aporoane mafasiakosakipoko ira rufi arakaru aeyaka amara ayíáka, Kotimo e maka, mafasiakosapo.

¹⁶ Arirakano Kotimo ape ane repo. Kotimo Ho Kotesane re su himua risikinapo. Makatane meraruhopo. ¹⁷ Kotimo ape kotesa susu rekeasimo makata watikisane kikisiraka risirapo. Kotimo apeane aporomo mokoatikirakano, mokoatikina aporoane Kotimo fanasiraka marutaehokosapo. Asiamo Koti rea apeane repo.

¹⁸ Asiamo repo hasaka hemakapurapaka asekeanie. Repo metakiramo hemakapukua someraka, "Hauaka wo makata suane nōmo enomaka hemakapurapo." Aíyaka hemakapura aporoane Koti hikumisia ipi aporo kárafapo. Ásiane aporo metakiramo hauaka wo makata rakira enomasane makama kesekeraka risikinone, Koti hikumisia aporo ane hokopukua risikiakosapo. Ayíáka risikino nena aporomo asekea someraka, aporoane himu mahimeterareapo, aihokosapo. ¹⁹ Arirakano hauaka wo aporomo someraka, "Hauaka wo makata enomasa hemakapusuane kárupo." Airakano Kotimo someraka, "Hauaka wo makata enomasa hemakapusuane nenakamaka makata ayireapo," airakanapo. Arirakano Kotimo sawia Yopamo popasane oyapo.

“Aporomo hauaka wo makata rakira enomasane kakinu asiapo. Makata rakisia amo kakinumo arura ayíáka, ipi nine keseke rukusapo. Ayíáka rukusane Kotimo maresapo.”
Aiyaka popahoareapo. (Jop 5:13)

²⁰ Kotimo sawia, Same púkua makata meta soko popasane oyapo. Enomasa aporomo hemakapusuane Unihaemo asekea someraka, “Nenakamaka makata ayireapo,” aíyaka popahoareapo. (Buk Song 94:11)

²¹ Popasane hemakapukua, hauaka aporomo makata ainane makáraraka rupiaka somehokopo. Makata suane repoko Kotimo rakisiapo. ²² Ano Pore soko, Apórose soko, Pita soko, isiapo re ararehoasimo Kotimo isu murikimasapo. Hauaka wo makata ane soko, Kotimo reaki kasapo. Koteaka risikiasimo hitafe rerane soko, Kotimo kasapo. Ipi hauaka hiakosakipoko kurane soko kasapo. Yumo ainane soko, keseke ayiakakosane soko, makata suane re koteaka risikiasimo Kotimo maresapo. ²³ Asiamo some one hemakapunie. Reane Keresomo menapo. Arirakano Keresoane Kotimo menapo.

4

Keresomo aporo raipane oyapo.

¹ Repo isu hemakapuraka, “Keresomo aporo raipane ipo. Kotimo makata kakaro aina farareane some kakasimo murikimasa aporoane ipo.” Aíyaka isuane hemakapunie.

² Murikimasa aporoamo ipi rakinie aisa aporo akipoko himu hakásaraka hemakapukua rakiraka risikino, ane kotehokosapo.

³ Repo soko aporo metakiramo soko anoaki hukurukua someraka, “Poremo ipi siaraka rakirakanare? Ipi Kotiaki himu hakásaraka hemakapukua rakirakanarakapo.” Aíyaka aporo metakiramo ano hukururakano nōmo kakipayarakanapo. Nōmo siaraka rakirakarire? Siahoanafonoraka rakirakarire? Aíyaka nōmo ni yia somehoane siahoasi-fareapo. ⁴ Arirakano nōmo himumo hemakapuraka, “Makata watikisane nōmo nī himua rekenafapo,” aíyaka nōmo hemakapurakanapo. Hemakapusua nine nōmo himua makata watikisane yia reke soko metao, rekeanafonoraka soko metao, Unihae ipi hákasamo aserapo. Epo nōmo makata rakisiene asekea, nōmo himuane soko asekea anoaki someraka, “Nōmo koteaka rakisiapo. O, nōmo watikiaka rakisiapo.” Aíyaka epo ipi yiamo anoane keseke hukurukusapo. ⁵ Asiamo Yasu paripeasiraka repo nōmo rakisiene aseraka, “Epo watikiaka arakire.” Aíyaka repo wate foaka anoane hukurukupo. Unihae pariperaka isiapo himua makata katosa farareane epo mafekemaraka tariakosapo. Aporomo hemakapusuane epo hufitaeraka somehokosapo. Maiya amo aporo suaki hakasa hakasaraka somehokosapo. Someana maiya amo Kotimo makata rakira kára rakisia aporoaki Kotimo kára kekerehokosapo. Wakasema rakisia aporoaki wakasema kekerehokosapo.

⁶ Keresoa paosa aporo maeo, Apórose etapo rakirane, nōmo reaki somerakanapo. Repo etoaki úyaka hemakapunie. Kotimo ainane koteaka ereketae hemakapusimo poparakanapo. Kotimo some kepo ipi sawia popasane kakimakanie. Kakimaka risike repo hakása meta tapikia rakiakopo. Asiamo repo namina yia rupiaka makáraraka risike, aporo metane makáraraka, arirakano aporo metane makama kesekeraka, ayiane siahoasifareapo. ⁷ Aporo metakirane mawakasemaraka, aporo metakirane makáraraka, ayíáka someraka arisiane, epamo reaki aysiakanieaka somesare? Metamo reaki aysiakaniesafapo. Repo makata kotesa susu mosane Kotimo reaki yaku kasapo. Kotimo reaki kasane repo mokoa risike yia, namina yano motosane máfaraka someraka arisiane marirakanonare?

⁸ Repo hemakapukua someraka, “Kotimo makata su kasasamo isu siaraka risikinapo. Re tarira aporoane isiapo metakarikia isu isina unihaeaka risikinapo.” Aíyaka repo somerakanapakae. Aíyaka somesane nōmo kaikia hemakapuraka, “Re namina unihaeaka risia satiki, ano soko reyaki hakása unihaeaka rekeafunupo.” Aíyaka hemakapurakanapo. ⁹ Reane namina unihaeaka risikinone, Kotimo isu tarira aporoane makama kesekehoasireapo. Asiamo nōmo reaki taku meane somerakanapo. Aporo su fanaraka

pusuakipoko isu tarira aporoane kesekeea perakanapo. Aporomo, aporo meta rusua kukusimo murikiamara ayíáka, murikimasane isupo. Hepene aporomo soko, hauaka aporomo soko, ipu suamo asekeasimo isu kakama yia rusua kukusapo. ¹⁰ Arirakano isiapo Keresoane some karakano aporo suamo kaikia isuaki someraka, “Re masuahoareapo.” Aíyaka repo somerakanapakae. Repo namina yia aseraka someraka, “Keresoa paosa aporoane isupo. Kára hemakapura aporoane isupo.” Aíyaka repo somerakanapakae. Aporomo isuaki someraka, “Re roraraka risikinapo.” Aíyaka repo somerakanapakae. Repo namina yia someraka, “Isu wakapuaka risikinapo.” Aíyaka repo somerakanapakae. Isuaki aporomo mahisiraka risikinapakae. Arirakano re aporomo makárarakanapakae.

¹¹ Fana soko, yumo soko, isu meamoraka risike, he nariraka risike, pasu paté osoraka risike, isu rurakano risike, isu ape fasekeno hauaka meta koraka risike, ¹² makata nakosakipoko hokonomo wafororaka rakirakanapo. Aporomo isuaki yakasa ho marerakano soko, Kotimo iane ararehoasimo isiapo someraka, “Re makotehokoripo,” airapo. Isu Kereso patera asekea risiasamo isu rurakano soko, isiapo rukua roponafapo. ¹³ Aporomo isuaki mainamarerakano soko, isiapo iaki auaraka somerapo. Ipu isuaki someraka, “Reane hauaka wo makata pepeno ayireapo. Arirakano hauaka wo he torofae ayireapo.” Aíyaka isuaki mayapakeraka somerakanapo. Fana soko, yumo soko, yaiya someraka risikinapo.

Poremo someraka, “Nōmo ainane kekemahoanie.” Aisane oyapo.

¹⁴ Re kaiyahoasimo nōmo reaki poparakanafapo. Repo koteaka kaikia hemakapukua risikiasimo poparakanapo. Re nōmo hokosa asiapo. Nōmo re kára hemakapurakanapo.

¹⁵ Repo Keresomo ikia karane hemakapusimo, aporo yakaimo reaki tisaraka some kakako pesapo. Aporo yakaimo tisaraka some kakako pesa nine, re Keresoa paosa aporomo ata asíane hakásapo. Hakásane anopo. Keresomo some kotesa nōmo fana some kakako pesapo. Pekea some karakano repo kakimasapo. Akipoko anoane repo ata asíapo.

¹⁶ Asiamo ano area ayíáka, re soko ayíáka risikianie. ¹⁷ Ayíáka risikiasimo, Timotiane nōmo re arisia pusiesapo. E Keresoaki rekeako parihosimo, nōmo eaki some kasapo. Some kasasamo e nōmo hokosa asíapo. Eane nōmo kára hemakapurakanapo. Epo Keresomo rakirane koteaka rakirapo. Arirakano e peraka nōmo Keresomo ainane kekemaraka reane, epo reaki mahemakapukusapo. Keresomo ipi aina ikia kara a, nōmo kekemaraka reane, nōmo kurikuri ape sua some karakanapo. Some hakása yine epo soko reaki some kakakosapo.

¹⁸ Repo metakiramo someraka, “Pore peakosafapo.” Aíyaka repo namina yia rupiaka makáraraka risikinapakae. ¹⁹ Asiāne ano wakasema nina peakosapo. Unihae Kotimo aorakanone ano peakosapo. Ano apera maiya amo, rupiraka risia aporoamo somesane, nōmo kairaka, kaikia ayíáka ipu makata rakisiane nōmo aseakosapo. ²⁰ Asiamo Kotimo ipi unihaeaka asekea rea aporoamo makata somera hakasa ayafapo. Ipi kakaro wakapuaka rerapo. ²¹ Ano apera maiya amo re maropohoko ira firisi maka apera ayíáka, maka peakonahoae? Reaki himu tumurumo hemakapukua himu auaraka apera ayíáka peakonahoae? Repo hemakapusuane maiyakasireare? Ano auaraka peasimo hemakapuraka namina yia fana maropohoanie.

“Hinamo hakimakopo.” Aisane oyapo.

¹ Repo metakiramo hinamo hakimasapakae. Aporo hakasa metamo ipi atamo hinamo hakimaraka rekenapakae. Ayíáka hakimarane Keresoa paohoanafonosa aporomo soko anafapo. ² Repo namina yia aporo hakasa metamo ipi atamo hinamoane hakimaka yia, re namina yano motosa makararaka arisiane marirakanonare? Re kaíyaraka fofarakia risikiafunureapo. Hakimara aporoane reyaki hakasa rekeakohoamo mafasikia pusiehoafunureapo. ³ Asiāne ano reyaki hakasa rekenafapo. Ano amano kauane reyaki hakasa rekeanafonoraka, nōmo himu hemakapurane maiya suamo reyaki hakasa

rekenapo. Ano reyaki hakāsa area ayíáka reke nōmo someraka, "Hakimora aporoane watikirareapo," airakaripo. ⁴ Asiamo Yasumo yano motosa makárahoko sarimana maiya amo, nōmo himumo hemakapurane reyaki hakāsa reke, Unihae Yasu soko, reyaki hakāsa rekenapo. Reasasamo ipi wakapuane reyaki rekeno hakimara aporoane ⁵ Sataneaki kakanie. Karakano aporoamo watikiaka rakira kau watikisane Satanemo mokoatikihokosapo. Mokoatikisane Unihae Yasu pariapera maiya amo, aporoamo hoane Kotimo pasimakosapo.

⁶ Arirakano repo namina yano motosane makáraraka someraka risike siahoasifareapo. Arirakano makata pirira wakasemamo farawa suane makáranapo. Aina ayíáka aporo hakásamo watikisa amo re suane mokoatikihokosapo. Anapaka aporo watikisane reyaki hakāsa kikinahokopo.*

⁷ Arirakano Yu aporomo Ape Farimaresa Hemakapuko hokono keako ipu apea makata pirira rekeakohoamo, ipu kokoa mamakatenapo. Mamakateraka ipu farawa makata pirira fasenko farawa kawe hitafe kotesa pairapo. Aina ayíáka re su koteaka risikiasimo, aporo watikisane reyaki hakāsa kikinahokopo. E makama yaoahoanie. Arirakano Ape Farimaresa Hemakapuko hokono kesa maiya amo, Yu aporomo saro sipi mano rusuapo. Asia ayíáka isiaipo watikisane mafahokosakipoko, Yasu isupoko farimaka kusuapo. Kusuasamo isu kawe koteaka risikiasireapo. ⁸ Arirakano Yu aporomo Ape Farimaresa Hemakapuko hokono keakosakipoko, makata pirira mamakatesapo. Asia ayíáka isiaipo soko saperaka, makata watikisa rakirane mamakatehoanie. Aporo mokoatikiraka hemakapurane soko, mamakatehoanie. Asiamo isiaipo aporo metaki himumo koteaka hemakapukua, arirakano kakaro somerane susu someaka ayíáka risikianie.

⁹ Fana nōmo reaki sawi meta poparaka, "Hinamo hakimara aporoyaki re sarimahokopo," aíyaka popasapo. ¹⁰ Popasa kepoane Keresoa paoraka risike yia hakimarane popasapo. Aporo akiyaki sarimahokopo. Asiāne Keresoa paohoanafonosa aporoamo hinamo hakimarane sarimahokopo, aíyaka nōmo popasafapo. Keresoa paohoanafonosa aporomo hinamo hakimarane soko, makata makaripi aíyaka hemakapura aporoane soko, makata hakimakosakipoko makata kotafe somera aporoane soko, yakasa hoaki kekerena aporoane soko, aporo akiyaki sarimahokopo, aisafapo. Asiamo nena aporo hauaka sua risikinapo. I fasikia re ma risikiakosare? Hauaka wo iyaki hakāsa risikianie. ¹¹ Asiāne repo koteaka hemakapusimo nōmo reaki úyaka poparakanapo. Repo Keresoa paosa aporo maemo hinamo hakimaraka risikino, eyaki hakāsa risikiakopo. Arirakano re Keresoa paosa aporo mae metakiramo makata makaripi aíyaka hemakapurane soko, yakasa hoaki kekerenane soko, aporo meta mainamarerane soko, he watikisa nekea masuanane soko, arirakano makata kemo hakimorane soko, suane Keresoa paosa aporo metakiramo ayíáka rakirakano, aporo akiyaki re sarimahokopo. Iyaki hakasa toke makata nakopo.

¹²⁻¹³ Keresoa paohoanafonosa aporo hukururane isiaipo menafapo. Iane Kotimo hukurukusapo. Keresoa paosa aporo isuyaki hakāsa sarimana aporo ane isiaipo hukuruane siahoasireapo. Arirakano Kotimo sawia popasane oyapo. "Aporo watikisa reyaki hakasa sarimaraka risikino pusiehoanie." Aíyaka Kotimo sawia popahoareapo. (*Lo 13:5; 17:7; 22:21, 24*)

6

Keresoa paosa aporomo tafatafarakano maroponane oyapo.

¹ Repo namina yia Keresoa paosa aporo mae metamo Keresoa paosa aporo mae metayaki tafatafaraka, hukurura kepo kaira aporo Keresoa paohoanafonosa aporomo maropohoasimo puane siahoasifareapo. Keresoa paosa aporomo maropohoasimo punie.

* ^{5:6:} Makata pirirane Pisini meaka yano motosa yis airapo. Yisimo ainane oyapo. Yisimo makata torenapo. Toreraka makáranapo. Hinamomo farawa paikinako yisi wakasema farawayaki kekeroraka motokoa asekea kaina, yisimo rakiraka reke farawa suane makáranapo. Arirakano yisimo makata torenasamo Kotimo sawia taku meaka makata watikisane yisipo, airapo.

² Some one hemakapunie. Hauaka wo aporo suamo watikiaka rakisiane keseke Keresoa paosa aporomo iane Keresoyaki maropohokosapo. Maropohokosane repo hemakapurakanafare? Keseke makata karane repo maropohokosasamo, yumo makata fete ane maropohoanafonoraka asekepayahoane siahosifareapo. ³ Keseke hepene aporo menane soko isiapo maropohokosapo. Maropohokosasamo yumo hauaka wo soko makata feteane isiapo maropohoane siahosireapo.

⁴ Re Keresoa paosa aporomo tafatafarakanano, nena aporomo maropohoasimo purakanapakae. Ane manakano asiare? ⁵ Asiasamo re kaíyahoafunureapo. Repo namina yia tafatafasa maropohokosa ane Keresoa paosa aporo hakása meta koteaka hemakapura rekenafare? Rekenone, epo re maropohoasimo punie. ⁶ Asiāne repo metakiramo ipi Keresoa paosa aporo mae hukuruko purakano, Keresoa paohoanafonosa makata hukurura aporoyaki maroporakanapakae. Ayíáka rakiane siahosifareapo.

⁷ Arirakano repo makata hukururane ikia kara kotesafapo. Re namina yiamo makata watikisane hemakapuraka hukuarura amo re Keresomo ainane hurupereapo. Arirakano aporo metamo né mokoatikirakano soko, nómó ní menane hakimarakano soko, metakariafunureapo. Marirakano hukururakanare? ⁸ Asiāne repo yiamo Keresoa paosa aporo maeane mokoatikiraka, epo makata ropoane soko, repo mokoyakurakanapakae. Epo menane repo haki morakanapakae. Ayíáka rakiane siahosifareapo.

⁹ Ayíáka watikiaka rakira aporoane Kotimo unihaeaka asekea rerafapo. Some ane repo hemakapurakanapo. Aporomo hinamo hakimako puraka, arirakano hinamomo aporo mokotokoraka, arirakano aporo sisimamo hinamo hokosa fetakapeane paremurikia aina aporo hinamoane Kotimo unihaeaka asekea rerafapo. Yakasa hoaki kekerena aporoane soko, aporo hokosa fete aporo takéyaki purane soko, ¹⁰ makata kemo hakimaranane soko, makatane ano makaripi aíyaka hemakapurane soko, he watikisa nekea masuanane soko, mainamarerane soko, faremarekea tau yapakeaka hakimaranane soko, ayíáka rakira aporo hinamoane Kotimo unihaeaka asekea rerafapo. I Kotiyaki yaiya risikiakosafapo. ¹¹ Fana repo metakiramo ayíáka watikiaka rakirakano asekea, watikisane Kotimo kososapo. Watikisane makikisiraka maresapo. Unihae Yasu Keresope Ho Kotesa tetapō, re arareraka repo watikisane hukurukusapoko asiāne rukupatesapo. Rukupatesasamo Kotimo someraka, “Reane aporo ereketaesapo,” aisapo.

“Re kauane Kotimo kau ayireapo.” Aisane oyapo.

¹² Aporo metakiramo someraka, “Nómó ní hemakapusuane kekemaraka rakiane siahosireapo,” airakanapo. Airakano yia nómó someraka, “Makata sumo ano makotenaafapo. Makata su nómó rakirakano makata amo ano makotehoasifareapo. Arirakano makata ane hakása metamo soko, ano asekea rekeane siahosifareapo,” aíyaka nómó hemakapurakaripo. ¹³ Makata nenapoko katukunuane rakikia maresapo. Katukunupoko makata nenane rakikia maresapo. Asiāne makata nenane soko, katukunuane soko, tetāne Kotimo mafahokosapo. Arirakano hinamo hakimakasimo aporomanomo kauane Kotimo rakikia maresafapo. Unihae Koti ipipoko kauane rakikia maresapo. Aporomanomo tua Unihae Koti ipi rekeakosakipoko, aporomanomo kauane rakikia maresapo. ¹⁴ Unihae Yasu kusuane Kotimo maturikia taesapo. Maturikia taesa Kotiamo isu aporomanomoane soko kusuane, epo maturikia taehokosapo.

¹⁵ Keresomo ipi hokono ipi korake ipi kau asiāne isupo. Isu Keresomo ipi kau asiāpo. Ipu kauane hinamo aporo metayaki mokome pura hinamo akiyaki paohoane siahosireare? Wae, siahosifareapo. ¹⁶ Kotimo sawia popasane oyapo. “Aporo hinamoyaki purane tati kau hakásareapo,” aíyaka popahoareapo. *(Stat 2:24)*

Arirakano aporo rea pura hinamoane aporo meta tati hakása paoraka purakano, ane tati kau hakásarakanapo. ¹⁷ Arirakano Unihae Keresoaki kataka marekea rea aporoane Kereso tati ho hakása yineraka risikinapo.

¹⁸ Ho hakasa yineraka risiasamo hinamo meta hakimaka paohokopo. Aporomo makata meta watikiaka rakiraka, epo ipi kauane mokoatikinapopo. Hinamo hakimarakano ipi kauane mokoatikinapo. ¹⁹ Repo kauane Ho Kotesamo apepo. Ho Kotesa Kotimo kasane

re tua risikinapo. Risiasamo reane Koti menapo. Repo namina yia asekea risikinafapo.
²⁰ Repoko Kotimo makata ropo kára kasapo. Kasasamo repo kaumō epoko rakinie. Koti ipi faeraka reane makáraraka rakipe punie.

7

Keresoa paosa aporo Korini taonea risiamo Poreaki makata kairaka, “Aporomo hinamo arumakanafonanane kotehoareare? Hinamo aporo punafononane kotehoareare?” Aíyaka kairaka sawi popasane oyapo.

¹ Repo anoaki makata kairaka sawi makesesuane, nōmo asekea reaki sawi poparakanapo. Aporomo hinamo arumakanafonoraka rekenone, ane kotesapo.
² Asiāne aporomo hinamo hakimorane kárarakanapakae. Anapaka, aina kotesane oyapo. Aporomo soko ipi hinamo kekepo arumayane siahoasireapo. Hinamo soko ipi aporo kekepo puane siahoasireapo. ³⁻⁴ Hinamomo ipi kauane ipi asekea reke siahoasifareapo. Ane ipi apiamo asekea rekenapo. Apiamo ipi aseaki, “Iti hakāsa yao purakapo,” aihoane ipi aseamo takēraraka hisihiane siahoasifareapo. Arirakano aporomo soko ipi kauane asekea rekeane siahoasifareapo. Ane ipi aseamo asekea rekenapo. ASEAMO ipi apiaki, “Yao purakapo,” aihoane apiamo takēraraka hisihiane siahoasifareapo. ⁵ Titi arumaka risike takēraraka hisihokopo. Sere metamo titi himu hakásaraka hemakapuraka, “Sere omo Kotiaki kurikuriraka risikiakosapo. Yumo maiya wakasemamo hakasa yao purane metakarirakanapo. Yaoa karikia pukusafapo.” Aíyaka titi himu hakásaraka hemakapuraka ayiakanie. Sereamo Kotiaki kurikuriraka faraka, efera hunia titi hakāsa yao punie. Satanemo né mokopipiraka hinamo metayaki pukohoamo ní hinamo titi yao hakasa punie. Titi mokokekepohokopo.

⁶ Asiamo nōmo hemakapuraka repo hinamo arumarane soko siapo. Nōmo yaprakanafapo. Asiāne arumakanie, aíyaka nōmo somerakanafapo. Nōmo someana one re arareraka somerakanapo. ⁷ Nōmo hinamo arumakanafonoraka area ayiáka aporo su ayiáka risikiasimo hemakapurakaripo. Arirakano Kotimo makata yaku kekepo kekepoaka ararenapo. Aporo metaki makata meta arareraka, arirakano aporo metaki makata meta arareraka, ayiáka kekepo kekepoaka ararenapo.

Korini aporomo Poreaki makata kairaka, “Hinamo arumakanafosa aporomo hinamo arumarane kotehoareare? Hinamo yaro efera hunia aporo purane kotehoareare?” Aíyaka Poreaki kaisiane oyapo.

⁸ Hinamo arumakanafosa aporoaki soko, hinamo yaroaki soko, nōmo someraka, “Hinamo yaro efera hunia aporo punafonoraka, arirakano aporomo hinamo arumakanafonoraka, ano area ayiáka re risike kotehoasireapo. ⁹ Asiane sere suamo aporomo ipi hemakapusuane hinamo puraka rekeno, amo hinamo arumayane siahoasireapo. Himumo hemakapusuane iramo inara ayiáka inaraka rekeno, ane hinamo arumakanie. Arirakano hinamo otoatoa ane soko, aporo puko hemakapurakarano aporo puane siahoasireapo.” Aíyaka nōmo somerakanapo.

Korini aporomo Poreaki kairaka, “Kereso aporomo ipi aseane fimareane siahoasireare? Kereso hinamomo ipi apiane fimarekea puane siahoasireare?” Aíyaka kaisiane oyapo.

¹⁰ Aporo hinamo apiaki soko, hinamo aporo aseaki soko, nōmo somerakanapo. Ane nōmo ní hemakapusua somerakanafapo. Unihae Kotimo someaka maresane nōmo reaki somerakanapo. Asiamo someaka maresane oyapo. “Hinamomo ipi apia metakariakopo.

¹¹ Hinamomo ipi apiane fimarekea metakarikia purakano, hinamoane aporo meta pukupo. Ipi haku tipia nenakamaka kakanie. Hinamoane ipi haku kakako hisirakano, ipi apia fana fimaresa tati sapesane maroporaka mafaraka ipi apiamo ape yia paripeanie. Arirakano aporomo ipi hinamo arumasane fimarekea pusiehoane siahoasifareapo.” Aíyaka Unihae Kotimo someaka maresapo.

Korini aporomo Poreaki kairaka, “Nena aporo hinamo tati arumaka risina, keseke tati meta Keresoa paoraka, metane Keresoa paohoanafonorakano, ane fimareane siahoasireare?” Aiyaka kaisiane oyapo.

¹² Makata one Unihaemo somehoanafonosa nine anoaki tarisiane nōmo nī hemakapukua re arareraka somerakanapo. Aporo Keresoa yororaka ipi aseane Keresoa yoroanafonoraka hinamoamo ipi apiaki hemakapukua kakeno yia ipi apiamo hinamoane fimareane siahoasifareapo. ¹³ Arirakano hinamo Keresoa yororaka, ipi apiane Keresoa yoroanafonorakano, ipi apiamo ipi aseaki hemakapukua rekeno yia, hinamoamo ipi apiane metakariane siahoasifareapo. ¹⁴ Arirakano aporo Keresoa paohoanafonorakano, epo aseane Keresoa paoraka kake, epo Kotiaki himu hakásá hemakapusua aeyaka, aporo ane soko Kotimo ararerakanapo. Arirakano hinamo Keresoa paohoanafonorakano, epo apiane Keresoa paoraka reke, epo Kotiaki himu hakásá hemakapusua aeyaka, hinamo ane soko Kotimo ararerakanapo. Ararehoanafonosa satiki tetapō tati hokosa hokono murisiane, Keresoa paohoanafonosa aporo hinamomo hokosa ayiáka risikiafunupo. Asiane tetapō hokosane soko, Kotimo asekea rekenapo. ¹⁵ Arirakano Keresoa paohoanafonosa aporomo, ipi asea Keresoa paosa ane hisiraka fimarerekano, hinamo né, metakarikia puane siahoasireapo. Arirakano Keresoa paohoanafonosa hinamomo ipi apia Keresoa paosane hisiraka metakirirakano, aporo nōmo waehokopo. Keresoa paohoanafonosa aporomo hinamoane fimareane siahoasireapo. Re Keresoa paosa aporo hinamo tau risikiasimo Kotimo ré murikimaka pasimosapo. Asiamo re fimarerekano waehokopo. ¹⁶ Re Keresoa paosa hinamomo ní aporoane ararerakanano, ipi Keresoaki rekeako pariraka soko metao, himeteripo. Re Keresoa paosa aporomo ní hinamoane ararerakanano, ipi Keresoa paoraka soko metao himeteripo.

“Kotimo re pasimosa maiya amo re risia ayiáka risikianie.” aisane oyapo.

¹⁷ Aporo reo, ano kimisi koraka areamo, some one taone sua, Kereso aporo hinamoaki some kape purapo. Repo makata su ayianane Kotimo maresapo. Maresasamo Kotimo re pasimosa maiya amo risia ayiáka, yaiya risikianie. ¹⁸ Arirakano Kotimo pasimokoasiraka risia maiya amo, Yu aporomo ipi kau hahaeraka patesapo. Yasuaki risikiako pariana maiya amo ipi kau hahaeraka patesa umuruane mokosekehoane siahoasifareapo. Arirakano Yu aporohoanafonosamo ipi kau hahaeraka patehoanafonosane Keresoaki risikiako pariana maiya amo kau hahaeraka patehoane siahoasifareapo. ¹⁹ Asiamo aporo kau hahaeraka patesane soko, kau hahaeraka patehoanafonosane soko, makatane yumo nenakamaka makata asiapo. Kotimo somemane kakiamarane kakaro makata namo ane ayapo. ²⁰ Asiamo Kotimo re pasimosa maiya amo, re risia ayiáka risikianie. ²¹ Pasimosa maiya amo aporo metamo re roposa wafaya akipoko repo raiparaka rakisiare? Ayiáka rakirane mahisiraka rakiakopo. Ayiáka rakiakosapoko asiane, re roposa wafayamo someraka, “Re tonotaerakanano metakarikia puane siahoasireapo.” Airakano raiparaka rakisiene metakarikia puane siahoasireapo. ²² Tonotaehoanafonoraka re roposasamo yaiya rakiraka risikianie. Kotimo re pasimosa maiya amo re Kotimo tonotaesa aporo parisapo. Arirakano aporo metamo re ropohoanafonorakano, re Kotimo roporaka pasimosapo. Asiamo re Kotimo aporo raipa pariraka risikianie. ²³ Kotimo repoko makata ropo kasasamo, repo aporo metamo hemakapusuane kekemaraka rakiakopo. Aporo metamo reane aporo raipa pariraka sikiraka asekea reke siahoasifareapo. Repo Keresopoko rakirakanapo. ²⁴ Keresoa paosa aporo maeo, Kotiaki himu hakásaraka hemakapukua risikianie. Re peaeaka pasimosa maiya amo risia ayiáka yaiya risikianie.

Korini aporomo Poreaki kairaka, “Hinamo aporo punafonoraka yaiya toke kotehoasireare? Aporomo hinamo arumakanafonoraka yaiya risike kotehoasireare?” Aiyaka kaisiane oyapo.

²⁵ Hinamo aporo punafonosane repo anoaki kaisiane someaka poparakanapo. Makatane Unihae Yasumo someaka maresafapo. Someaka mareanafonosa nine, anoaki tarisiane nōmo reaki some karakanapo. Kotimo ano araresane nōmo kakaro ereketae somerakanano, repo kaiyiane siahoasireapo.

²⁶ Yumo hauaka wo makata watikisa kára fasere apera maiya amo, fana risia ayíáka, yumo soko yaiya risikianie. Ayíáka risike kotehokosapo. ²⁷ Hinamo arumaka reke hinamo arumasane fimareakopo. Arirakano aporomo hinamo arumakanafonoraka reke hinamo faihokopo. ²⁸ Hinamo arumayane soko siahoasireapo. Hinamo aporo puane soko siahoasireapo. Ane makata watikisafapo. Asiane hinamo titi arumaka arisia maiya amo hauaka wo makata rakiramo teto kau aseakosapo. Anapaka hemakapurakaripo.

²⁹ Keresoa paosa aporo maeo, kepoane oyapo. Hauaka one fahokosa maiyane makerakanapo. Aporo hinamo apia repo aporo hinamo arumakanafonosamo Kotipoko arakira ayíáka rakinie. ³⁰ Re hiripuraka risike yaiya hiripuraka risikiakopo. Makata akipoko repo hiripurakano makatane keseke fahokosapo. Hiripuhoanafonoraka arisia ayíáka risikianie. Arirakano re seseraka risike seshokopo. Makata akipoko seseraka risikino makatane keseke fahokosapo. Arirakano repo makata kára roporako hemakapurukua risikiakopo. Re forokoa arisia ayíáka risikianie. Makata roposane keseke fahokosapo. ³¹ Arirakano repo hauaka wo makata rakirane rakiraka risike makárahokopo. Hauaka wo makata one keseke faraka makata meta faserepeakosapo. Hauaka wo makata rakira himu tumurumo hemakapunafonona aporo arisia ayíáka, risikianie.

³² Hauaka wo makata akipoko kara himu nekea hemakapurukua risikino, ano hisiripo. Arirakano Kotimo sesehoasimo aporo hinamo arumakanafonosamo Kotipoko kára rakiraka rekeako hemakapurapo. ³³ Arirakano aporo hinamo apiamo ipi aseamo sesehoasimo hauaka wo makata rakirane kára hemakapurapo. ³⁴ Himu takumo hinamoaki hemakapurukua, himu takumo Kotiaki hemakapurukua, ayíáka rerapo. Hinamo yaromo soko, hinamo aporo punafonosamo soko, Kotipoko rakirane kára hemakapurapo. Hauaka wo makata rakirane fasikia ipi kau soko, ipi ho soko, ipi hemakapurane soko, Kotiaki paoraka rakiako hemakapurapo. Arirakano hinamo aporo aseamo ipi apiamo sesehoasimo hauaka wo makata rakirane kára hemakapurapo.

³⁵ Arirakano makata yaporaka mareakosakipoko reaki some karakanafapo. Nōmo re ararehoko some karakanapo. Re kakaro koteaka risike Kotipoko himu hakásaraka hemakapurukua rakisimo nōmo some karakanapo.

Korini aporomo Poreaki kairaka, “Hinamo faisane arumayane kotehoasireare?” Aíyaka kaisiane oyapo.

³⁶ Aporomo hinamo fairaka nina himumo hinamo arumako hemakapurakarakan arumayane siahoasireapo. Hinamo arumarane watikisafapo. ³⁷ Arirakano aporo metamo ipi yiamo hemakapuraka, “Hinamo arumakosafapo.” Aíyaka ipi yiamo hemakapurukua hinamo arumakanafonoraka rekeno soko siahoasireapo. ³⁸ Hinamo faisane arumayane siahoasireapo. Asiāne hinamo arumakanafononane namo kakaro kotesapo.

Hinamo yaro kakakosane oyapo.

³⁹ Hinamo ipi apia rekeno tati kakaro hakása yinenapo. Ipi apia metakarikia aporo metayaki puane siahoasifareapo. Ipi apia kurakano amo aporo meta ipi hemakupukua seseraka puane siahoasireapo. Siaraka siahoasinineo asiane Keresoa paosa aporo puane siahoasireapo. ⁴⁰ Arirakano nōmo hemakapuraka ipi hinamo yaro yia kake ipi kakaro seseraka kakakosapo. Aíyaka nōmo hemakapurakanapo. Ho Kotesa ano himuareasamo anoaki tarirakano nōmo reaki some karakanapo.

“Yatafuaki makata nakosa kasane keseke neane siahoasireare?” Aíyaka kaisikeno asekeea Poremo Korini aporoaki somesane oyapo.

¹ Yatafuaki soko, yakasa hoaki soko, makata nakosa* kasane nōmo reaki poparakanapo. Arirakano fana some meta one nōmo somerakanapo. Isiapo makata kára hemakapurapo. Arirakano aporomo makata kára hemakapurane takahinaka i namina makaporonapo. I namina makáranane, ikia kara kotesafapo. Asiāne ikia kara namo kakaro kotesane, aporo metamo aporo metaki himu tumurumo hemaka apura ayapo. Aporo metaki himu tumurumo hemakapura amo isu su mawakapuraka, aporo metakirane ararenapo. ² Aporo metamo hemakapuraka, “Nōmo makata su hemakapukua faraka rekenapo.” Aíyaka hemakapura amo ipi yia makáraraka sikiraka, ane sia hemakapurakanafapo. Ane hasaka hemakapurakanapo. ³ Arirakano aporomo himu tumurumo Kotiaki hemakapurakano, Kotimo asekea someraka, “Aporoane nōmo aporopo.” Aíyaka Kotimo somerapo.

⁴ Arirakano repo anoaki kaisiane nōmo reaki somerakanapo. Yatafuaki soko, yakasa hoaki soko, makata nakosa kasane repo neane siahoasireare? Isiapo Keresoa paosa aporomo hemakapusuane yatafuane ipi namo kakaro fanāfapo. Yakasa ho soko kakaro fanāfapo. Hauaka wo iane namo kakaro Kotifapo. Arirakano iane kekerehoane siahoasi-fareapo. Koti yakai risikinafapo. Koti hakása rekenapo. ⁵ Arirakano hauaka wo makata risiane soko, hepene yapura makata risiane soko, Keresoa paohoanafonosa aporomo asekea someraka, “Makatane koti parisapo. Makatane unihae kára parisapo.” Aíyaka ipu hasaka someraka, kakaro Kotiane metakarikia, makata metaki kekereraka risikinapo. ⁶ Asiāne isiapo hemakapuraka, “Koti hakása rekenapo. Isiapo Atane epo. E aeyaka makata su fasere pesapo. Isiapo epoko rakiraka risikiasimo epo isu rakisiapo. Unihae hakásane Yasu Keresopo. Kotimo makata su rakiakosakipoko Yasu aeyaka kepomarekeea rakisiapo. Asiasamo Yaiya rerane Yasu aeyaka isiapo maka yaiya risikiakosapo.”

⁷ Aíyaka isiapo hemakapurakano yia, Keresoa paosa aporo metakiramo aíyaka hemakapurakanafapo. Fana ipu maiya suamo yatafuaki soko, yakasa hoaki soko, kekereraka hemakapusuasamo, yaiya hemakapukua risikinapo. Risike aseane, makata nakosa yatafuaki soko, yakasa hoaki soko, kasane asekea hemakapuraka, “Makata nakosa ane neane siahoanarakapo. Nenakano isu himu mokoatikiraka soko metao mayiakanarakapo.” Aíyaka hemakapurakaya nenakanone, i himuane tomekemarekeea yaiya risikiakosapo. ⁸ Asiāne isu Koti hikumisia koteaka risikiakosane, makata anenamo soko metao, makata nanafononamo soko metao, makata amo ikia kara kotesane tariakosafapo.

⁹ Makata nenane yaposa kakenafapo. Asiamo re asekeanie. Nōmo Yasuaki kára hemakapukua reke, arirakano aporo metamo Yasuaki kataka marekea paroaka hemakapurafaraka reke, epo né aseane, nōmo yatafuaki makata kakayia kasane nenakano asekea hemakapuraka, “Keresoa paosa aporo yiamo makata ane arakire.” Aíyaka ipi hemakapura amo hasaka rakirane kirimanapaka, repo makata nenane koteaka asekea nanie. ¹⁰ Nōmo hemakapuraka, “Makata nena yaposa kakenafapo.” Aíyaka hemakapukua yatafuaki makata kakayia kasane nekea reakipoko, aporo meta Yasuaki paroaka kataka marekea rekeanafonosa aporoane pekea asekea hemakapuraka, “Nōmo soko makata kakayia ane nakosapo.” ¹¹ Aíyaka hemakapukua nenakano, e karekekeea kaíyaraka rekeakosapo. Aporoamo makata kakayia yatafuaki kasane hemakapuraka, ipi fofaraka kaíyaraka rekeakosapo. Eane karekekeea kaiyarakaka rekeno, kepoane népo. Arirakano Keresoane ní maepoko soko farimaka kusuapo. Asiane nōmo ayiana amo ní maeane mokoatikirakanapo. ¹² Yasuaki paroaka hemakapunafonosa aporoane ní Keresoa paosa aporo maepo. Nōmo ní maeane mokoatikirakano, nōmo Keresoane mokoatikirakanapo. ¹³ Arirakano nōmo makata kakayia yatafuaki kasane nenakano, nōmo ní Kereso maeane fofaraka karekekeea kaíyaraka rekeno, ane, nōmo makata kakayia

* 8:1: Pore rea maiya amo nena aporo hinamo uyáka risiapo. Ipu makata kakayia yatafupoko murisiapo. Murisiane rusua taku ane yatafuaki kasapo. Taku metane yia taesa tokeno mokoa pukua maketea roposapo. Arirakano makata kakayiane Kereso aporo metakiramo makata nakosakipoko ropohoko hisisapo. Asiane Kereso aporo metakiramo yaiya ronopapo.

efera hunia nakosafapo. Arirakano nōmo ayianamo nōmo Kereso mae ano patera pesane mokoatikinapaka, makata kakayiane nōmo efera hunia nakosafapo.

9

Aporo metakiramo Poreane mawakasemarakana somerakano Poremo iaki some parihisiane oyapo.

¹ Aporo metakiramo ano mawakasemarakanapakae. Asiane nōmo nī hemakapusuane soko, rakiane siahoasireapo. Makata metamo ano matasosafapo. Yasumo ipi tarira aporoane anofare? Isiapo Unihae Yasuane nōmo asesafare? Nōmo Unihae Yasuane some karakano repo kaikia eaki risikiako parisafare? Ao, ásiapo. ² Arirakano aporo metakiramo someraka, “Pore ipi tarira aporofapo. E Yasumo murikimasa aporofapo.” Aíyaka ipu somerakano, repo ayiáka somehoane siahoasifareapo. Nōmo some karakano repo kaikia, kakimaka Yasuaki risikiako parisasamo, ane kepoane ano tarira aporo reapo.

³ Aporo metakiramo anoaki “Né tarira aporofapo.” Airakano nōmo some one parihinakanapo. ⁴ Nōmo tarira aporomo rakirane rakirasamo nōmo aporo metakiraki someraka, “Makata nakosa soko, he soko makasie.” Aihoane siahoasireapo. Arirakano Yasuane nōmo some kaka rakirasamo repo anoaki makata nakosane kakafunupo. ⁵ Tarira aporo metakiramo soko, Unihae Yasumo ipi mamaneamo soko, Pitamo soko, ipu namina hinamoane karikia apura ayiáka, nōmo soko, hinamo kaya satiki karikia puane siahoafunupo. Isu suaki repo makata nakosa kakafunupo. ⁶ Asiane Pánapase etapo hakasa makata nakosakipoko hokonomo rakiane siahoasireare? Wae, siahoasifareapo.

⁷ Asiamo ame aporo arisia ayiáka eto risikiafunureapo. Aporo amea paosa amo ipi makata nakosakipoko makata ropo karáfapo. Aina ayiáka aporomo hemoa sako porokoa, sako karepe wateane tumaka nenapo. Ipi maposa wafayasasamo tumaka nenapo. Aina ayiáka saro ponomakau asekeea rea aporoamo ipi saro ponomakau hoko piane nenapo. Ipi wafayasasamo nenapo.

⁸ Arirakano hauaka wo makata ainane nōmo reaki somerakanapo. Asiamo Yu aporomo somemané Mosesemo popasane soko, hakásá yinesapo. ⁹ Asiamo fana Mosesemo somemané popasane oyapo. “Witi hae kau haketarisimo saro ponomakaumo finirape apuramo, saro ponomakaumo witi haeane nasimo akaia tapohokopo. Ipi rakirasamo ipi neane siahoasireapo.” Aíyaka popasane kepoane namo kakaro ponomakau ane, Kotimo somesafapo. *(Lo 25:4)*

¹⁰ Kepoane isu Kotimo makata rakira aporoane yapakeaka somesapo. Somesane isiapo hemakapusimo Mosesemo popasapo. Asiamo hemo morō mora aporoamo soko, witi hae tura aporoamo soko, tati makata rakiraka risike, makata nakosane keseké makosapo, aíyaka hemakapurapo. ¹¹ Aina ayiáka etapo witi hae potena ayiáka, Kotimo someane etapo reaki some kasapo. Etapo reaki some kasasamo aporomo witi hae anena ayiáka, repo makata nakosa etoaki karakano, etapo mokoa neane siahoasifareare? Ao, siahoasireapo. ¹² Eto pusuakipoko aporo metakira pekea reaki some karakano, aporoaki repo makata nakosa karakano ipu mosapo. Asia ayiáka, etapo soko, mokoafunusa nine metakarisiapo. Metakarikia hemakapuraka, “Yasu Keresomo some kotesane repo kaiyako hisihokohoamo makata ropo mokoakosane metakirakanapo. Yasumo some kotesane etapo matasonapaka etapo iti yia makata umisa maka rakirakanapo.” Aíyaka etapo hemakapurakanapo.

¹³ Arirakano Kotimo ipi apea pirisiti aporomo makata rakiraka risike Kotimo apea makata nakosa taesane ipu namina mokoa nenapo. Pirisiti aporomo saro ponomakau rukua, eke kima paikia, Kotiaki kaka, ipu soko eke kima paisiane parakuraka nenapo. Ipu makata nenane namina makata rakisiakipoko, makata ropo amora ayiáka morapo. Ane repo hemakapurakanafare? ¹⁴ Pirisiti aporomo makata nakosa amora ayiáka, Kotimo some kará aporoamo Kotimo someane some karásasamo, makata ropo makasireapo. Some kará aporomo makata nakosa mokoasimo, Kotimo some kaisia aporoamo makata ropo kayane siahoasireapo. Aíyaka Unihae Yasumo maresapo.

¹⁵ Aíyaka maresa nine nōmo makata ropo makasierakanafapo. Arirakano nōmo makata ropo mayane siahoafununine metakarisiapo. Asiāne nōmo sawi popana one makata ropo kakanie, aíyaka poparakanafapo. Repo makata ropo nōmo morafapo. Aíyaka somehoko seseripo. Aihoko sesenane repo rukupatehokopo. Rukupatenapaka ano kukuko seserakanapo. ¹⁶ Kotimo anoaki someraka, “Yasuane some kakanie.” Aíyaka someaka marerakano, nōmo ipi someane some karakanapo. Some kakanafonoraka nōmo koaretaesa satiki ane ano kaíyahoafunupo. Yasuane nōmo some kasasamo ano nī rupiaka makáraraka somehoane siahoasifareapo. ¹⁷ Nōmo nī hemakapukua Kotimo some kasá satiki, makata ropo makafunupo. Asiāne makata rakirane rakinie aíyaka Kotimo someaka maresasamo nōmo rakirakanapo. ¹⁸ Asiamo nōmo makata ropoane yakapare? Nōmo makata ropo asiane Kotimo some yaku akara ayapo. Nōmo makata ropo mayane siahoasinine metakarikia Yasumo some kotesane nōmo seseaka yaku some akarane nōmo makata ropo ayapo.

Aporo hinamo su Yasuaki risikiako parihoasimo Poremo koteaka rakisiane oyapo.

¹⁹ Repo makata ropoane nōmo makanafonosasamo, ano aporo hakásá metamo aporo raipafapo. Aporo su Yasuaki risikiako parihoasimo, aporo supoko ano aporo raipa pari-raka reke rakirakanapo. ²⁰ Yu aporoyaki ano reke rakisia maiya amo, i Yasuaki risikiako parihoasimo, Yu aporomo aina ayíáka, ano soko ayíáka reapo. Mosesemo somemaneane nōmo makama fananafapo. Asiāne Yu aporomo Mosesemo somemaneane makama fanaraka, i Yasuaki risikiako parihokosakipoko, ipu Mosesemo somemane makama fanaraka risia ayíáka, ano soko ayíáka reapo. ²¹ Asiamo Mosesemo somemane motosane nōmo koaretaenafapo. Arirakano Yasu Keresomo somemaneane soko, nōmo kakimaka reapo. Kakimaka reke, Yu aporo hoanafonosayaki ano reke rakisia maiya amo, ipu Mosesemo somemane kakimakanafonoraka yia, i Yasuaki risikiako parihokosakipoko, i risia ayíáka, ano soko ayíáka reapo. ²² Aporomo Keresoaki wakapuaka hemakapuna-fonona aporoane ararehoko, i risia ayíáka, ano soko, ayíáka reapo. Aporo suamo aina ayíáka, ano soko, ayíáka reapo. I metakira Yasuaki risikiako parihoasimo ano ayíáka reapo. ²³ Yasumo ano makotehoasimo ipi some kotesane aporoaki some kakakosakipoko yaiya koraka reke some karakanapo.

Kereso aporo hinamo wakapuaka risikiasimo Poremo takumeaka somesane oyapo.

²⁴ Aporo foaka purane hemakapunie. Aporo yakai foforaka pukua fanahokosakipoko asiane, aporo hakásamo marokeraka, ipi hákasa makata ropo marapo. Makata ropo amara ayíáka, repo soko, Kotimo makata ropo mokoakosakipoko, wakapuaka rakiraka risikianie. ²⁵ Hauaka wo aporomo hemakapuraka, “Marokehokosakipoko, ano mokome rekeakosafapo. Kau mawakapuhokosakipoko ereketaeraka rekeakosapo.” Aíyaka ipi hemakapurapo. Hauaka wo makata ropo fahokosane* makosakipoko ipi yia kaumo hemakapusuane metakarikia kakaro ereketaeraka rerapo. Aina ayíáka isu Keresoa paosa aporomo soko, makata ropo yaiya rekeakosane mokoakosakipoko, kakaro wakapuaka ereketaeraka risikiasireapo.

²⁶ Asiamo ano soko, Kotipoko rakiraka makata ropo yaiya rekeakosane mako, Yasu rea kepoa naohokosakipoko ereketae purakanapo. Ereketaeraka apura ayíáka Kotipoko ereketaeraka rakirakanapo. Nena enaraka weako ana maiya amo marokehoko aporoaki hokonomo ereketaeraka kaua rurapo. Mokome rukuhaenafapo. Mokome rukuhae-hoanafonona ayíáka Kotipoko nōmo mokome rakirakanafapo. ²⁷ Ano yamenoa foaka puraka roranapaka kaumo hemakapusuane kairafaraka rekenapo. Aporo metakiraki Kotimo some kotesa nōmo some kasapo. Some kasa nine keseke Kotimo anoaki, “Né siahoasifareapo.” Airapaka pipu nōmo kaumo hemakapusuane kairafaraka kauane himumo hemakapusua a kekemarakanapo.

* ^{9:25:} Aporo foaka pukua fana kepoa naosaki makata ropo karápo. Makata ropo karáne uni hatipo. Uni hatiane ira ku kotesa hatiraka karotapirapo. Ira kuane hauaka menasamo torehokosapo.

10

“Wate fana Yu aporomo Kotiane kau aseako rakisia ayíáka repo ayiakakopo.” Aisane oyapo.

¹ Keresoa paosa aporo maeo. Wate fana isiapo makasa kaua kekemamo ásiame repo meraruhokopo. Asiamo fana isiapo makasa kaua kekemamo Mosese kekemarape pusuapo. I puraka ti pakae Kotimo yapura maresane aseke, ti pakaeane purakano ipu kekemarape pusuapo. Puraka i su he Reteane yaohoane hémo nesafapo. ² Arirakano ti pakaea soko, he Retea soko, aporo hea tapuku amurira ayíáka, i tapukumuriraka sikisapo. Arirakano i hea tapuku amurira ayíáka i suane Moseseaki paosapo. ³ Makata nakosa Ho Kotesamo kasane ipu suamo nesapo. Heane soko Ho Kotesamo kasane ipu nesapo. ⁴ Arirakano i puraka eke ane asesapo. Eke anaka he pesapo. Arirakano Keresoane yapake eke somesapo. Asiamo i purakano Kereso iyaki hakása pusuapo. ⁵ Arirakano Kotimo iane eféra hunia soko, eféra hunia soko, araresa nine, ipu epo someane koaretaeraka Kotiane masesesafapo. Kotiane masesehoanafonorakano, Kotimo iane fanasiraka aporo nena ima yao kauanea kukua kesapo.

⁶ Ipu makata watikisa yaposane metakarianafonosa ane isiapo hemakapusimo popasapo. Makata watikisane ipu fana seseaka rakisia ayíáka isiapo soko anapaka popasapo. ⁷ Ipu yatafuaki soko yakasa hoaki soko kekerena ayíáka repo kekerehokopo. Ipu saro ponomakau mano murikimaka rakikia kekereraka hokono kesapo. Arirakano ipu Kotimo someane koaretaesakipoko, Kotimo sawia popasane oyapo. “Maiya amo ipu hokono keraka sarimaraka toke makata paisiane nekea waene he soko nesapo. Nekea faraka takahihiraka kesasapo.” Aíyaka Kotimo sawia popahoareapo. *(Kisim Bek 32:6)*

⁸ Arirakano ipu hinamo hakimasa ayíáka repo ayiakakopo. Hinamo hakimasakipoko Kotimo fanasirakano i yape hakásamo aporo tuaneti tiri taosene (23,000) kusuapo. ⁹ Arirakano isu Kotimo metakarirakarihoamo isiapo Kotiane kau aseako rakiane siahoasi-fareapo. Isiapo makasa kaua kekemamo ásia ayíáka, repo ayiakakopo. Asiamo ipu Koti kau aseako rakirakano, iane hesekemo nesa kukua kesapo.

¹⁰ Maiya suamo ipu someraka, “Kotimo makata rakisiane su siahoasifareapo.” Aíyaka ipu meuraka Kotiane mawakasemarako somesa ayíáka repo soko, ayíáka meuraka Kotiane mawakasemarako somehokopo. Asiamo i mahisiraka risiakipoko su Makura Hoane Kotimo pusierakano peraka i makukua kekefa fasapo. ¹¹ I kusua ayíáka isu soko, ayíáka kurapaka Kotimo sawia popasapo. Makata su iaki fasere pesane, isiapo hemakapusimo, Kotimo sawia popasapo. Arirakano fahokosa maiyane makeanamo isu koteaka risikiasimo popasapo.

¹² Aporo metamo someraka, “Ano siaraka rekenapo.” Aíyaka someraka tiki somerakao, aíyaka né terafaka ruraka etenapaka asekeanie. ¹³ Kau aseako makata fasere aperane reaki makata haku fasere perakanafapo. Aporo suaki fasere apera ayíáka, reaki soko ayíáka fasere perakanafapo. Repo Kotiaki himu hakásaraka hemakapukua risikino, re kau aseako makata fasere aperamo reane hurutapiakosafapo. Re hurutapirapaka Kotimo re mawakapurakano, wakapuaka risike re hurupeakosafapo. Kau aseako makata fasere aperane metakarisimo, Kotimo ikia kara maroporaka tariakosapo.

“Yakasa ho soko, yatafu soko, makárahokopo,” aisane oyapo.

¹⁴ Hameo. Yatafuaki soko, yakasa hoaki soko, makárahokopo. Yatafuaki soko, yakasa hoaki soko, kekerenane metakarinie. ¹⁵ Re aporo koteaka hemakapura risikinapo. Nōmo someane repo takekeha hemakapunie. ¹⁶ Arirakano Kereso asipa anena maiya amo, kapo he kotesane maka, Kotimo yaku ararenane kakasimo kurikuriraka rumaraka, kapo heane maka nenakano, Keresomo yapia isu paorakanapo. Asipa farawa feteraka mosoraka nenakano, Keresomo kaua isu paorakanapo. ¹⁷ Asipa oro hakása ásiame isupo. Asipa oro hakásane ruturaka feteraka nenakano, isu su Kereso ipia hakása paorakanapo. Asipa oro hakásane isiapo aporo hinamo yakaimo nenakanone, isu aporo kau hakása ásiapo.

¹⁸ Yu aporomo rakirane hemakapunie. Ipu saro ponomakau rukua eke kima paikia Kotiaki kasane ipu nenapo. Nenaka Kotiaki paonapo. ¹⁹ Asiamo someamo kepoane

yakapare? Yakasa hoane soko yatafuane soko kakaro kotifapo. Kakaro fanāfapo. Aporomo iaki makata nakosa karakanone iyaki paorakanapo. ²⁰ Aporomo yatafu yakasa hoaki makata nakosa akarane kakaro Kotiaki karakanafapo. Satanemo aporo raipaki karakanapo. Re Satanemo aporo raipa a paohokohoamo nōmo reaki somerakanapo. ²¹ Asiamo Unihae Yasumo kapo heane soko, yatafumo kapo heane soko, tetakara neane siahoasifareapo. Unihae Yasumo tepora Kereso asipa nenane soko, arirakano makata nakosa yatafuaki kasane soko, tetakara neane siahoasifareapo. ²² Unihae Yasumo kakanakeraka sapehoasimo isiapo ayiáka rakiane siahoasifareapo. E ipi namo kakaro wakapuaka rekenapo. Ipi wakapuane isiapo wakapuamo hurutapiasireare? Wae, hurutapiakosafapo.

²³ Arirakano repo metakiramo someraka, “Isiapo isina hemakapusuane kekemahoane siahoasireapo. Makata metamo isu matasosa kakenafapo.” Airakano nōmo soko hemakapuraka, “Someane kakaroripo. Asiane makata suamo isu ararehokosane kak-erifapo,” aihokosapo. ²⁴ Asiamo isu isinane hakasa hemakapukua somehokopo. Aporo metakirane soko hemakapukua somehoanie.

²⁵ Arirakano maketea makata roporaka neane siahoasireapo. Ropohoasiraka fana kairaka, “Makatane yatafuaki soko, yakasa hoaki soko kasare?” Aiyaka kaiyakopo.

²⁶ Asiamo Kotimo sawia popasane oyapo. “Hauaka one soko, hauaka wo makata arisiane soko, su Unihae Kotimo ipi menapo.” Aiyaka popahoareapo. (Buk Song 24:1)

²⁷ Arirakano Keresoa paohoanafonosa aporomo reaki makata nako peaerakano re pukua epo makata nakosa karakano nanie. Nasiraka kairaka, “Makata nakosa one yatafuaki kasare?” Aiyaka repo hemakapukua kaiyakopo. ²⁸⁻²⁹ Kaiyanafonorakano aporo metamo reaki someraka, “Makata nakosa one yatafu yakasa hoaki kasapo.” Airakano repo nakopo. Epo reaki someraka, “Re watikiaka arisie.” Aihokohoamo makatane nakopo. Nanafonoraka re kaíyahokosafapo. Arirakano eane soko kaíyahokohoamo nakopo. Arirakano aporo metamo someraka, “Aporo meta kaíyahokohoamo nōmo makata nenane yaporaka mareane siahoasifareapo. Nōmo makata nenane su neane siahoasireapo. ³⁰ Nōmo makata nakosapoko Kotiaki suserakano, makata susesakipoko aporo metamo yaporaka mareane siahoasifareapo.” Aiyaka hemakapukupo.

³¹ Repo makata nenane nenaka soko, he nenaka soko, makata rakiraka soko, makata suane Kotimo yano motosa makárahoko ayiakanie. ³² Yu aporo soko, Yu aporohoanafonosa soko, Keresoa paosa aporo soko, i kaíyaraka fofahoasimo ayiakakopo. ³³ Arirakano aporomo asekea sesehoasimo ano Poremo rakirakanapo. Ano reke, nōmo nī menane hákasa hemakapukua rekenafapo. Aporo metakirane nōmo hemakapukua arareraka, ipu watikisane Kotimo mafasiasimo nōmo hemakapukua rekenapo.

11

¹ Keresomo aina ayiáka, nōmo ayiáka rakirakanapo. Asiamo ano area ayiáka, re soko ayiáka risikianie.

Korini taone sése apea aporomo ketaua kerane soko, hinamomo pasu makafirirane soko somesane oyapo.

² Repo anoaki hemakapukua, nōmo someane soko repo kakimaka, asiasamo nōmo kára seserakanapo. ³ Asiane repo hemakapusimo nōmo some one some karakanapo. Hinamo aporo aseamo ipi unihaeane ipi apiapo.* Ipi apiamo unihaeane Keresopo. Keresomo ipi unihaeane Kotipo. ⁴ Asiamo aporomo Koti kekeréhoko sarimaraka toakipoko, á aporo metamo takahikia kurikuri anamo soko metao, Kotimo somerakano kaikia aporo suaki some akaramo soko metao, ipi wamoane hati karotapikia reke some karakano, aporoamo ipi unihae Yasuane mawakasemarakano.

⁵ Arirakano aporo su sarimaraka toakipoko, hinamo aporo asea takahikia kurikuri anamo soko metao, Kotimo somerakano kaikia some akaramo soko metao, pasu

* 11:3: Hinamo aporo aseamo pasu makafirikia, hikumisi soko pasu yahanasamo mataisekeno, ane hinamo aporo asea reapo, aiyaka hemakapurapo.

makafirianafonoraka[†] pasu rawi motokoa ipi takahikia reke some karakano, ipi apia unihae manoane makaiyarakanapo. Ipi pasu makafirianafonoraka kekeno ane, hinamo uni iti enomosane, e aporo metamo aserakano kaýana ayíáka, hinamoane soko ayíáka kaýarakaka kakakosapo. ⁶ Hinamo pasu makafirianafonoraka reke, uni itiane soko enomokoa fahoanie. Uni iti enomokoa faraka reke kaýana ayíáka kaiyanapaka pasu makafirinie. ⁷ Arirakano kurikuri apea aporomo wamoa ketaua soko uni hati soko karotapiakopo. Asiamo Koti unihaeaka area ayíáka Kotimo aporo unihaeaka rekeasimo maresapo. Aporo hinamo suamo aporo kotesane aseraka ipu Koti yano motosane makáranapo. Arirakano hinamo kotesane aseraka ipi apiane yano motosane makáranapo. ⁸ Arirakano Kotimo hinamo kamapeane maka aporo rakisiafapo. Aporo kamapeane maka hinamo rakisiapo. ⁹ Arirakano hinamopoko aporoane Kotimo rakisiafapo. Aporopoko hinamoane rakisiapo. ¹⁰ Rakisiasamo hinamomo hemakapuraka, “Nōmo unihaeane nōmo aporo pusua ayapo.” Aiyaka hemakapuraka Kotiaki kekerehoko sarimana maiya amo pasu makafirirapo. Hepene aporomo soko aseraka sesehokosapo.

¹¹ Arirakano Keresoa paosa hinamo ipi haku kakenafapo. Arirakano Keresoa paosa aporo soko ipi haku rekenafapo. ¹² Fana aporo kamapeane Kotimo maka hinamo rakisiapo. Asiane yumo hinamo aeyaka aporo hokosa takaperapo. Makata aiyanane su Kotimo hákasa rakisiapo.

¹³ Arirakano repo takekea hemakunipie. Aporo soko hinamo soko su sarimasakipoko hinamo pasu makafirianafonoraka Kotiaki kurikurihoane siahoasireare? Ane kote-sare? ¹⁴ Isiapo ainane oyapo. Aporo uni iti hohoroponafapo. Uni iti hohoroporaka reke, “Watikirareapo,” aiyaka somerapo. ¹⁵ Asiane hinamo uni iti hohoroposa kake, “Kotehoareapo,” airapo. Hinamomo ipi pasu makafirira ayíáka ipi uni itimo matiane mokosekenapo. Uni iti hohoroposane Kotimo hinamoaki kasapo. ¹⁶ Asiamo pasu makafirira ayíáka makafirirane, tafatafaahoane siahoasifareapo. Tafatafanapora hi-namoaki isiapo tarira aporomo someraka, “Hinamo repo pasu makafirinie.” Aiyaka isiapo some meta kakenafapo. Pasu makafiriakopo, aisane soko kakenafapo. Kurikuri ape metakira á soko, Keresoa paosa aporo hinamomo some meta kakenafapo. Some hakásayiapo.

Kereso asipa nenane oyapo.

¹⁷ Yumo nōmo reaki sawi popana one re ereketae risikinapo, aiyaka poparakanafapo. Repo Kotiaki kurikurihoko sarimana maiya amo namina yia makoterakanafapo. Repo namina yia mokoatikirakanapo. ¹⁸ Repo Kotiaki wahoko arisiamo namina yia himu hakásaraka hemakuprafaraka fasikia risikinapakae. Aisane nōmo kaikia hemakupraka, “Someane metakira kakarorakae,” aiyaka hemakuprakaripo. ¹⁹ Arirakano aporo parakuraka fasikia risiane soko, metakira koteaka risirane soko, metakira watikiaka risirane soko, repo namina asekeea takekea hemakupukusapo.

²⁰ Asiamo yumo Kereso asipa nenane nōmo somerakanapo. Sarimana maiya amo repo makata nenane kakaro Kereso asipa nenakanafapo. Repo namina yiamo makata nenane nenakanapo.[‡] ²¹ Makata anena maiya amo re meamorakano, aporo hinamomo makata nakosane namina yiamo wate foaka mokoa, mokokakanoraka nenapo. Aporo metakiraki kakanafonorakano i meamoraka risirapo. Arirakano aporo metakiramo waene he kára nekea masuaraka risirapo. ²² Makata nena soko, waene he soko, ayíáka nakosakipoko repo namina apea nanie. Repo Kotiaki patera asesa aporoane makeferaka aporo makata forokoa risiane makata nakosa kakanafonorakano i kaiyaraka risikinapo. Akipoko nōmo reaki, “Kotehoareapo,” aihoadireare? Wae. “Re koteaka risikinapo,” airakanafapo.

Kereso asipa nenane oyapo.

Matiu 26:26-29; Maka 14:22-25; Ruki 22:14-20

[†] 11:5: Aporo mokotokona hinamomo pasu makafirirafapo. Asiamo hinamoane kaýahoasimo aporo hinamo metakiramo e uni itiane enomorapo. [‡] 11:20: Korini sése apea Kereso aporo hinamo sarimaraka makata nesapo. Nekea faraka Kereso asipa nesapo. Arirakano metakiramo Kotiane hemakupunafonoraka sakepamo nesasamo Poremo iane hukurusuapo.

²³ Unihae Yasumo anoaki somerakano, nōmo reaki some kasane oyapo. Yutasemo Unihae Yasuane parakesa ere hakásá yiamo Yasumo farawa maka ²⁴ Kotiaki suseraka mosoraka maka reke someraka, “One ano kauane oyapo. Repoko ano kauane karakanapo. Farawane nenaka ano hemakapunie. Ano hemakapukusakipoko keseke soko, ayíáka nenaka risikianie.” ²⁵ Aíyaka ipu makata nekea farakano, farawa masa ayíáka, Yasumo kapo maka reke someraka, “Kotimo aporoyaki kawe someaka marakanapo. Someaka masane Kotimo someane aporomanomo somea mapaoraka sarimaraka some masane metakarirapaka nōmo yapimo rukutirakanapo. Kapo heane anena maiya amo ano hemakapunie.” Aíyaka Yasumo somesapo. ²⁶ Asiamo Unihae Yasu paripeasiraka kau arisiamo, Kereso asipa anenamo hemakapuraka, “Unihae isupoko farimaka kusuapo.” Aíyaka hemakapukua nakosapo.

²⁷ Asiamo Kereso asipa farawane soko, kapo heane soko, repo mokome nenakano, Unihae Yasumo kauane soko, yapiane soko, mokoatikirakanapo. ²⁸ Anapaka, nasiraka yia aporo hinamo repo namina suamo himua makata watikisa rerapaka kokoa hemakapunie. Né himu siarakano nanie. ²⁹ Arirakano aporo metamo Unihae Yasu kusua kepoane hemakapunafonoraka ayíáka Kereso asipa soko, kapo he soko, mokome nenakano e ipi yiamo fanasihoasimo rakirakanapo. ³⁰ Repo metakiramo makata watikisa himua kerekano yia Kereso asipa ane nenapo. Asiasamo re metakira makata taraka, arirakano metakira roraraka, arirakano metakira kukua kekeásiapo. ³¹ Arirakano Kereso asipa nasiraka himura makata watikisané kokoa hufitaerakano ane hasakahokosafapo. ³² Asiane makata watikisa yia rekeno, Kotimo isu maropohokosapo. Keseke isu hauaka one fa ana maiyamo, isu nena aporoyaki Satanemo hauaka ápusie, aihokohoamo, yumo Unihae Yasumo isu maroporakanapo.

³³ Hameo. Kereso asipa anena maiya amo su sarimaraka su yiamo nakosakipoko asekea tokoanie. Aporo hinamo metamo wate fana foakayia nakopo. ³⁴ Aporo hinamo meta meamoraka makata narirakano ipi apea nanie, aihoanie. Re sarimaraka toakipoko Kotimo maropohoane siahoasifareapo. Arirakano makata meta hasakasane ano re arisia peraka, nōmo re maropohokosapo.

12

Ho Kotesamo wakapumo ararenane oyapo.

¹ Hameo. Ho Kotesamo wakapumo ararenane repo himeteraka risirapaka nōmo maroporaka poparakanapo. ² Re Yasuaki risikiako parihoasiraka, makata meta kekerehoko hemaka apuramo, yakasa ho soko, yatafu soko, kekerehoko kirimasapo. ³ Asiamo some one repo hemakapusimo reaki nōmo somerakanapo. Ho Kotesa rea aporomo “Yasuaki yakasa ho marerakanapo.” Aíyaka somerafapo. Arirakano Ho Kotesa rea aporomo “Yasuane ipi Unihaepo,” aíyaka somerapo. Ho Kotesa rekeanafonosa aporomo “Yasu ipi Unihaepo,” aíyaka somerafapo.

⁴ Arirakano Ho Kotesamo wakapumo yaku ararenane kekeporeapo. Kekeposa nine kepoane Ho Kotesa ipi hakasapo. ⁵ Unihae Yasupoko isiapo makata rakirane kekeporeapo. Kekeposa nine Unihae hakasa Yasupoko rakirakanapo. ⁶ Kotimo rakira kekepoane isiapo rakirakanapo. Rakirane Koti ipi hakasamo isu ararerakano, isiapo rakirakanapo.

⁷ Keresoa paosa aporo hinamo suane isiapo makoteraka ararehoasimo, Ho Kotesamo ipi wakapumo yaku ararenane, isuaki hakására karkakanapo. ⁸ Ho Kotesamo makata karáne oyapo. Keresoa paosa aporo hinamo metakiraki makata kepo kotesa aporo hinamo suaki some kakasimo tarirapo. Arirakano makata metane, Kotimo hemakapura ayíáka, Keresoa paosa aporo hinamo metakiraki ayíáka hemakapusimo kepoane tarirapo. Tarirakano aporo hinamo suaki ipu some kakasimo Ho Kotesamo mawakapunapo. ⁹ Arirakano Keresoa paosa aporo hinamo metakiramo Kotiaki himu hakásaraka kara hemakapurane, Ho Kotesamo iaki karápo. Karakano, ipu Kotiaki wárakano, Kotimo kakimaka, makata ipu wásane karápo. Aíyaka hemakapusimo Ho Kotesamo iane ararenapo. Arirakano aporo hinamo metakiraki, aporomano makata

tasa mafana wakapuane, Ho Kotesamo karápo. ¹⁰ Arirakano aporo hinamo metakiramo Kotimo wakapumo hemakapukua rakirane rakisimo Ho Kotesamo iaki karápo. Arirakano aporo hinamo metakiramo Kotimo somerakano kaikia, aporo hinamo metakiraki some kakasimo, Ho Kotesamo iaki mahemakapurapo. Arirakano aporo hinamo metakiraki Ho Kotesamo menane soko, yatafu yakasa homo menane soko, takekea hemakapurane, Ho Kotesamo tarirapo. Arirakano aporo hinamo metakiramo me meta soko, me kekepo meta soko, fana kaiyanafonosane somehoasimo, meane Ho Kotesamo mahemakapurapo. Arirakano aporo hinamo metakiramo me meta kaisia, kepoane ipi meaka paritaeraka, aporo hinamo suaki some kakasimo, me kepoane Ho Kotesamo mahemakapurapo. ¹¹ Asiamo makata ararena suane, Ho Kotesamo ipi hákasamo karápo. Ipi hemakapukua aporo hinamo metaki makata ararena meta kaka, arirakano aporo hinamo metaki makata ararena meta kaka, aporo hinamo metaki makata ararena meta kaka anapo.

“Kau hakása nine meta korake, meta hokono, ayíáka kekepoane sarimaraka kau hakásareapo.” Aisane oyapo.

¹² Arirakano korake soko, hokono soko, kekeporaka kau hakása area ayíáka, Kereso ane ipi ásiapo. Isu su kekeposane, e ipi hakásaki sarimarakanapo. ¹³ Isu suane Ho Kotesa hakásamo suaraka risikinapo. Isu metakira Yu aporopo. Isu metakira Yu aporofapo. Isu metakira aporo raipa roposa ayapo. Isu metakira aporo raipa ropohoanafonosa ayapo. Isiapo suamo he anena ayíáka, Ho Kotesa hakásane maka risikinapo. ¹⁴ Isu aporomano kau hakásaraka, kaua makata risiane hakásafapo.* ¹⁵ Asiamo korakemo someraka, “Ano hokonohoanafonosasamo aporomano kaua rekeako hisiripo.” Aíyaka somerakanone, korakeane ipi haku rekeakosare? Wae. Kau hakása yia rekenapo. ¹⁶ Arirakano senakimo someraka, “Ano hikoanafonosasamo aporomano kaua rekeako hisiripo.” Aíyaka somerakano, senakiane ipi haku rekenare? Wae. Kau hakása yia rekenapo. ¹⁷ Aporomano kaua hí susu risike, makata someane mayíáka kaiyakosare? Aporomano kaua senaki susu risike, mayíáka makata yamohokosare? ¹⁸ Senaki susu risikiasimo Kotimo isu rakisiafapo. Ipi hemakapukua aporomano kaua hokono soko marekea, korake soko marekea, senaki soko marekea, hi soko marekea, ayíáka murisiapo. ¹⁹ Aporomano kaua senaki susu risia satiki kau rekeafunufapo. ²⁰ Aporomano kaua makata risike kekepo risikinapo. Asiāne aporomano kauane hakásapo.

²¹ Arirakano himo hokonoaki someraka, “Né metakarikia nōmo nī haku rakiakosapo.” Aíyaka somehoane siahoasifareapo. Arirakano wamomo korakeaki someraka, “Né metakarikia nōmo nī hákasa rakiraka reke kotehoasireapo.” Aíyaka somehoane siahoasifareapo. ²² Isu kaua makata metane isiapo hemakapuraka, “Makatane nenakamaka makatapo.” Aíyaka makatane isiapo kára hemakapurafapo. Kára hemakapunafonosa nine makatane rekeanafonosa isu kau koteaka rekeafunufapo. ²³ Isu kau makoteraka kau rakirapo. Arirakano kaua makata kaíyasane pasu osonapo. ²⁴ Arirakano kaíyahoanafonosane pasu osonafapo. Pasu osonafaraka soko metao, kau rakirafaraka soko metao, aporo hinamo suamo aseane siahoasireapo. Arirakano hokono soko, korake soko, kiri soko, fako soko, suane Kotimo sarimaraka kau hakása á sarimaraka marekea, makata metakira yano motosa kárahoanafonosane, Kotimo makáraraka marekea, kau hakása á sarimaraka maresapo. ²⁵ Aporomano kaua, Kotimo makata meta kekepo risikiasimo rakisiafapo. Kaua makata su arisiamo metamo meta arare, arirakano metamo meta arare, ayíakasimo maresapo. ²⁶ Asiamo korake soko metao, hokono soko metao, ane hakása nenakarakano kau suane terapo. Hakása meta yano motosa makárarakano, suane seseaka risikinapo.

²⁷ Asiamo Keresomo kau asíane repo. Re kaua makata kekepo kekepo risiane sarimaraka, ipi kau hakasapo. ²⁸ Keresoa paosa aporomo rakira kekepoane rakisimo, Kotimo uyáka murikimasapo. Fana tarira aporo marekea, amo patera Kotimo somerakano kaira aporo marekea, amo patera tisa aporo marekea, amo patera Kotimo wakapumo

* 12:14: Su korake hákasa risikinafapo. Su hokono hakasa risikinafapo.

hemakapukua rakira rakisimo aporo marekea, amo patera aporo makata takamasa mafana aporo marekea, amo patera aporo meta ararena aporo marekea, amo patera unihaeaka asekea rekeasimo aporo marekea, amo patera me meta kaiyanafononane kaikia somehoasimo aporo marekea, ayíáka murikimasapo. ²⁹ Ayíáka murikimasane aporo su tarira aporofapo. Su Kotimo somerakano kaira aporofapo. Su tisa aporofapo. Su Kotimo wakapumo hemakapukua rakira aporofapo. ³⁰ Su aporo makata takamasa mafana aporofapo. Su me kaiyianafonona somera aporofapo. Su me kaiyianafonona kaikia kepoane ipi meaka paritaeraka some kará aporofapo. Asiamo aporo suamo kekeporaka rakisimo Kotimo murikimasapo.

³¹ Ho Kotesamo wakapumo yaku ararena karáne kakasimo repo himu tumurumo hemakapunie. Asiāne ikia kara kakaro fanāne nōmo reaki some ana oyapo. Ikia kara omo ikia kara metane marokenapo.

13

Ikia kara fanane oyapo.

¹ Aporomo me kekepo yakaiane soko, hepene aporomo meane soko, nōmo kaikia someraka tiki somerakao, asiāne nōmo himu tumurumo aporo metane hemakapuna-fonorakano ane, akai susuamo somerakanapo. Aiyanane roko wakayia murianafonoraka nena takiane me ana ayíáka, nōmo nena akai susuamo somerakanapo. Ira kakarua ruane nena mehora ayíáka nōmo nena akai susuamo somerakanapo. ² Arirakano Kotimo some karakano nōmo kaikia aporo metaki some kaka, arirakano Kotimo makata kakaro aina farareane hemakapukua, arirakano makata mahamesane asekea hemakapukua, arirakano Kotiaki himu hakásaraka hemakapuraka, ūriaki hisierakano, ūriane hinakano asekea, arirakano nōmo makata su enomaka ayíáka rakiraka tiki rakirakao, asiāne aporo metaki himu punafonoraka areakipoko ano nenakamaka aporo asiápo. ³ Nōmo makata kemo su aporo makata forosaki kakakosane soko, aporo metamo ano rusua kurakano ano kauane iramo inakasimo kakakosane* soko, nōmo karaka tiki karakao, asiāne nōmo aporo meta himu tumurumo hemakapunafonorakano ane, makata kemo su kasane soko, kau kasane soko, nenakamakayia kayereapo. Ayíáka kasekenone ane, ano yano motosane makárahokosafapo.

⁴ Isiapo himu tumurumo aporo metane hemakapukua risirane oyapo. Aporo metamo isuaki mokoatikirakano tapare sapehoanofonoraka tau auaraka risirapo. Aporo metane kamenakaraka ararenapo. Kakanakeraka hemakapurafapo. Ano nī yano motosa makárahokosakipoko nōmo nī menane rupiaka somerafapo. ⁵ Makapororaka, “Ano hokopukua rekenapo.” Airafapo. Aporo meta kaiyahoasimo rakirafapo. “Nōmo ni menane hakasa siapo.” Aiyaka hemakapurafapo. Aporo metamo weako nanaerakano soko, kaikia nanaeane hisiraka kakipayanapo. Aporo metamo anoaki mokoatikirakano soko, nōmo ropo mokoatikihoko hemakapurafapo. Mokoatikisane himumo hemakapukua rerapao. ⁶ Aporo metamo watikiaka rakirakano asekea sesenafapo. Aporomo makata koteaka rakikia kakaro somerakano ipi kaikia sesenapo. ⁷ Aporomo ipi yia umisane maraka aporo metaki topakamarafapo. Eaki mokoatikirakano soko, ipi himu tumurumo hemakapusuane metakarirafapo. Arirakano aporo metaki himu hakásaraka hemakapukua rerapo. Arirakano watikiaka rakirakano asekea hemakapuraka, “Keseke koteaka rekeakosapo,” aiyaka hemakapurapo. Arirakano makata umisa su fasere aperamo soko, himu tumurumo hemakapurane yaiya wakapuaka hemakapukua rerapo.

⁸ Aporo metane himu tumurumo hemakapurane fahokosafapo. Arirakano Kotimo ipi ayiakakosaposane somerakano kaikia aporo metaki some akarane soko fahokosapo. Arirakano me kaiyianafonona somerane soko fahokosapo. Makata kepo fararea Ho Kotesamo makata hemakapura karáne soko fahokosapo. ⁹ Yumo kakaro ainane isiapo wakasema hemakapurapo. Kakaro su hemakapurafapo. Kotimo somerakano wakasema

* 13:3: Maiya amo Keresoaki yunuraka risia aporomo, Keresoa paosa aporoane, mokoatikiraka ira pairapo.

kairapo. Wakasema kaisiane aporo metaki some karápo. ¹⁰ Asiāne keseke makata su siaraka hemakapukusa maiyane fasere peakosapo. Fasere perakano makata wakasema hemakapusuane faraka kára hemakapukusapo. Hauaka one fa ana maiya amo, makata kepo suane asekea kepo suane hemakapukua ayiakakosapo.

¹¹ Asiamo ano hokosa rea maiya amo, hokosamo somera ayiáka nōmo somesapo. Hokosamo asera ayiáka nōmo asesapo. Hokosamo hemakapura ayiáka nōmo hemakapusuapo. Asiāne ano aporo sisimaraka rea maiya amo, hokosamo rakira ayiáka rakisiane yumo metakarisiapo. ¹² Hea hiho asera ayiáka aseane akósa aserapo. Aina ayiáka yumo isiapo akósa asera ayiáka aserakanapo. Keseke kakaro kakamaraka asekea hemakapukusapo. Nōmenane Kotimo su asekea hemakapurapo. Asekea hemakapura ayiáka keseke nōmo makata su hemakapukusapo.

¹³ Makata yaiya rekeakosane oyapo. Kotiaki himu hakásaraka hemakapurane yaiya rekeakosapo. Makata kotesane makosakipoko kau risirane soko yaiya risikiakosapo. Aporo metane himu tumurumo hemakapurane soko yaiya rekeakosapo. Makata isíane fahokosafapo. Kakaro fanane aporo metaki himu tumurumo hemakapura ayapo.

14

Ho kotesa wakapumo yaku ararena some metane oyapo.

¹ Repo namina yia aporo metamo aporo metaki hemakapukua, metamo metaki hemakapukua, ayiáka himu tumurumo hemakapura ane kekemahoanie. Ho Kotesamo wakapumo yaku ararenane mokoako hemakapunie. Ayiáka hemakapuraka, “Kotimo somerakano someane nōmo kaikia reaki some kakako seseripo.” Aiyaka nōmo hemakapurakanapo. ² Aporomo me kaiyianafononane kaikia someraka, someamo kepoane somehoanafonorakanone, aporomanomo kaikia hemakapusafapo. Asiamo me kaiyianafonona somera aporoamo, aporomanomo kaiyisimo somerakanafapo. Epo Kotiaki hákasa somerakanapo. Kotimo makata kakaro aina farareane Ho Kotesamo eaki mahemakapurakarakan, epo me meta kaiyianafononane somerapo. ³ Arirakano Kotimo ainane somerakano, porofete aporomo kaira ayiáka, aporomo kaikia epo ipi meaka somerapo. Asiamo ipi meaka somerakano, aporo suamo kaiyisimo somerakanapo. Aporomo kaikia hemakapurakanone ane, someamo iane ararerakanapo. Arirakano ipu Kotipoko yaiya rakiraka risikiasimo, Kotimo somerakano kaira aporomo someamo iane mawakapunapo. Arirakano ipu himu nekea risiane epo someamo mawakapunapo. ⁴ Arirakano Kotimo somerakano kaikia somera aporoamo, Keresoa paosa aporo hinamo suane ararenapo. Ipu suamo Kotiane hemakapusimo ararenapo. Asiane me meta kaiyianafonona somera aporoamo, ipi hákasamo Kotiane hemakapusakipoko ipi yia ararenapo.

⁵ Arirakano repo suamo me kaiyianafonona Ho Kotesamo akarane somehoasimo ano seseraka tiki seserakao, asiāne Kotimo somerakano kaira aporomo ipi meaka somehoasimo, nōmo kakaro kára hemakapurakaripo. Kotimo somerakano kaira aporomo ipi meaka some akara aporoane ipi namo kakaro fanāpo. Arirakano Ho Kotesamo me meta karakan, me kaiyianafonona somera aporo ane ipi kesekepo. Me kaiyianafonona somera aporomo someraka, some kepoane somehoanafonorakan, Keresoa paosa aporo hinamomo hemakapusafapo. Asiane metamo kepoane somerakano, Keresoa paosa aporo hinamomo hemakapusuapo.

⁶ Asiamo Keresoa paosa aporo maeo. Re arisia ano peraka reaki me kaiyianafonona susu somerakanone, repo makata kaweane enomakasimo nōmo arareraka tariraka ayiakakosafapo. Me kaiyianafononane somerakanone ane, Kotiane hemakapusimo nōmo re arareraka ayiakakosafapo. Asiāne Kotimo someane anoaki somerakano, nōmo isiapo isina meaka some karakanone ane, re nōmo arareraka ayiakakosapo. Kotimo hemakapusua anoaki tarisiane nōmo reaki some karakanone ane, re nōmo arareraka ayiakakosapo.

⁷ Arirakano someane kepoane repo hemakapusimo reaki nōmo yapake somerakanapo. Aporomo kíta soko metao, wiroko soko metao, mokome rurakano, repo koteaka kaiyiánafonoraka, kesane maiyaka koteaka kesahokosare? ⁸ Arirakano weako pukusakipoko aporo sarimahoasimo aporomo pikoro maka rurapo. Mokome rurakarakano aporomo weako pukusakipoko sarimahokasafapo. Kakaro rurakariakapo, aiyaka hemakapukusapo. ⁹ Aina ayiáka aporomo me kaiyianafonona somerakano, aporo metamo kepoane somehoanafonorakano, maiyaka someamo kepoane repo hemakapukusare? Someamo kepoane hemakapunafonorakanone, someane nenakamaka hurupeakosapo.

¹⁰ Arirakano hauaka sua me kekepo yakai risikinapo. Me suane kepoane su hakásaraka some kepo risikinapo. Asiamo aporo suamo namina meaka namina hemakapusimo somehoane siahoasireapo. ¹¹ Arirakano aporo metamo ipi me haku somerakano, nōmo kaikia hemakapunafonoraka reke, eyaki tákkenafapo. Epo soko anoyaki tákkenafapo. ¹² Aina ayiáka aporomo me kaiyianafonona somerakanone, repo some kepoane hemakapunafonorakano maiyakakosare? Someamo re makotehokosafapo. Ho Kotesamo ararena wakapuane repo mokoako seseraka ainakanapo. Sesaraka Keresoa paosa aporo hinamo suane ararehokosakipoko ararena ane mokoako Kotiaki kurikurihoanie.

¹³ Asiamo me meta kaiyianafonona somera aporomo someamo kepoane hemakapusakipoko, Ho Kotesamo wakapuane mako kurikurihoanie. ¹⁴ Arirakano me kaiyianafonona me metamo kurikuriraka nōmo homo kurikurinapo. Aiyaka kurikurisa nine ano himumo hemakapurafapo. ¹⁵ Nōmo maiyaka kurikurihokosare? Nōmo homo soko kurikuriraka, himumo soko hemakapukua kurikurihokosapo. Homo soko kesaraka himumo soko hemakapukua kesahokosapo. ¹⁶ Arirakano kurikuri apea re su sarimaraka risikino, me kaiyianafonona somera aporoamo someraka Kotiaki suseaka kurikurirakano, someamo kepoane repo hemakapunafonoraka risike, maiyaka repo aohokosare? Someamo kepoane hemakapunafonosasamo, epo kurikurianaki himu hakásaraka hemakapukusafapo.

¹⁷ Asiamo aporo metaki Ho Kotesamo wakapu karakano, aporoamo me kaiyianafonona someraka kurikuriraka tiki kotesapo. Asiāne repo hemakapunafonorakano kurikurianamo reane ararenafapo. ¹⁸ Ho Kotesamo ano ararerakano, nōmo me kaiyianafonona some yakai somerapo. Repo soko ayiáka somera nine reane nōmo marokesapo. Asiasamo nōmo Kotiaki suserakanapo. ¹⁹ Sarimana maiya amo me kaiyianafononane nōmo some waseremaka pukua somehoane siahoasifareapo. Asiāne aporo hinamomo kaikia hemakapusimo ipu meaka some kinake somehoane siahoasireapo. Ayiáka someanamo me kaiyianafonona someane marokenapo.

²⁰ Arirakano Keresoa paosa aporo maeo. Nōmo some one kairaka hokosa wakasema popakemo seséraka koaretaena ayiáka koaretaehokopo. Hokosa kirimo metaki mokoatikihoanafonona ayiáka, repo soko metaki mokoatikihoanafonoraka tau risikianie. Ayiáka risike aporo sisimamo hemakapura ayiáka hemakapunie. ²¹ Arirakano Yu aporomo ainane maropohoasimo i arisia a aporo me metamo somehoko Kotimo pusiesapo. Asiamo Kotimo sawia popasane oyapo. Unihae Kotimo someraka, “Yu aporoaki nōmo somehokosakipoko aporo me meta somera aporo nōmo pusiehokosapo. Pusierakano i pukua, nōmo someane ipu some kakakosapo. Some karakano yia, Yu aporomo yaiya kakipayahokosapo.” Aiyaka Kotimo somesapo. Somesane Kotimo ipi sawia porofete aporomo popahoareapo. *(Aisaia 28:11-12)*

²² Arirakano kakimakanafonona aporoaki me kaiyianafononane somerapo. Ipu Kotiane hemakapusimo somerapo. Asiāne kakimara aporoaki me kaiyianafononane somerafapo. Kakimara aporopoko Kotimo somerakano kaira aporomo namina yia meaka somerapo. Kakimara aporomo Kotiane koteaka kára hemakapusimo namina someane some karápo.

²³ Arirakano re Keresoa paosa aporo hinamoaki Ho Kotesamo arareraka, me kaiyianafononane me kekepoaka somerakano, aporo kumuku peraka soko, kakimakanafonona aporo peraka soko, ipu kaikia reaki someraka, “Aporo hinamoane masuarareapo,”

aihokosapo. ²⁴ Arirakano Kotimo somerakano kaira aporomo someane ipi meaka some karakano, aporo kumuku pesa aporomo soko, kakimakanafonona aporo pesa amo soko kaikia, "Ano himu watikirareapo. Kotimo ano takekea hukurukusapo," aihokosapo. ²⁵ Aiyaka hemakapukua ipi tau hemakapurane hufitaehokosapo. Hufitaeraka arupekeia Kotiaki kekereraka someraka, "Koti reyaki rekenapo," aihokosapo.

"Kotiaki kekerehoko sarimana maiya amo mokome rakiakopo," aisane oyapo.

²⁶ Arirakano Keresoa paosa aporo maeo, nōmo some kepoane yakapare? Kotiaki kekerehoko sarimana maiya amo re aporo metamo kesa kepomareanie. Repo metamo aporo suamo enomakasimo Kotimo someane some kakanie. Repo metamo kaiyiane Kotimo some karakano kaikia aporo suaki someane repo namina meaka some kakanie. Repo metamo Ho Kotesamo wakapu karakano me kaiyianafonona kaikia somehoanie. Repo metamo me kaiyianafonona kaikia someamo kepoane repo namina meaka some kakanie. Ayiáka repo namina Keresoa paosa aporo hinamo suane mawakapuraka Kotiaki kekerehoko sarimanamo koteaka sarimahoanie. ²⁷ Arirakano repo aporo metakiramo me kaiyianafonona somerakano, someamo kepoane aporo metamo repo namina meaka some kakanie. Me kaiyianafononane repo aporo tetámo soko metao, aporo isiamo soko metao, hakásara hakásaraka somehoanie. Aporo kitafasu, kakoreasu ayiáka me kaiyianafononane aporo yakaimo somehokopo. Aporo isiamo somehoane siahoasireapo. ²⁸ Asiāne me kaiyianafonona someamo some kepoane some kará aporo rekeanafonosekeno, repo metamo me kaiyianafononane tau himumo Kotiaki somehoanie. Tau ní yia somehoanie. Aporo suamo kaiyisimo somehokopo.

²⁹ Arirakano Kotimo somerakano kaira aporo tetámo soko metao, aporo isiamo soko metao, some kaisiane hakásara hakásaraka aporo suaki some kayane siahoasireapo. Some karakano repo aporo suamo takekea hemakapunie. ³⁰ Arirakano aporo meta takahikia some karaka reakipoko, Kotimo someane aporo meta kayamo kairaka, epo somehoko takahinakano, fana takahikia someraka rea aporo né, kakanie. ³¹ Aporo suamo makata kawe hemakapusimo Kotimo somerakano kaira aporo repo hakásara hakásaraka somehoanie. Ayianamo aporo suane seseraka wakapuaka risikiakosapo. ³² Arirakano Kotimo somerakano kaira aporoamo hemakapuraka, "Kotimo someane some kakakosapoko asiāne, nōmo fore asekea rekeakosapo." Aiyaka keseke someraka soko metao, foaka someraka soko metao, aporoamo ipi menapo.

³³ Asiamo mokome su yiamo somerakano asekea Kotimo sesenafapo. Aporomo himu hakásaraka hemakapukua tau somerakano asekea Kotimo sesenapo. ³⁴ Arirakano ape sumu sua Keresoa paosa aporo hinamo su sarimana maiya amo, hinamo repo fanaraka takahikia somehokopo. Repo somehoane siahoasifareapo. Re fanahoanafonosasamo tau tokoanie. Aiyaka Yu aporomo somemane motosane yaiya kakenapo.

³⁵ Hinamo repo some kepo himeterakano, ní apea ní apiaki kaiyinie. Kurikuri apea aporo hinamo su sarimasakipoko hinamo takahikia sakepamo iriraraka makata kaiyíane siahoasifareapo. Ayiane kaýahoasireapo. ³⁶ Korini aporo hinamo repo marirakano mokome sarimarkanare? Kotimo someane re aeyaka pesare? Kotimo someane repo hákasa kakimasare? Wae. Asiafapo.

³⁷ Arirakano aporomo hemakapuraka, "Kotimo somerakano kaira aporoane anopo. Ho Kotesamo wakapuane anoaki yaku kasápo." Aiyaka hemakapura aporoamo nōmo sawi popana one asekea someraka, "Poremo Kotimo someaka maresane popahoareapo," aihokosapo. ³⁸ Nōmo popasa one aporomo kakipayarakanone ane, aporoamo someane repo kakimakopo.

³⁹ Asiamo hameo, Kotimo somerakano repo kaikia, someane some kakako Kotiaki kurikurihoanie. Asiane me kaiyianafonona ane, Ho Kotesamo some karakano, aporomo kaikia somehokosane repo yapohokopo. ⁴⁰ Arirakano Kotiaki kekerehoko sarimana maiya amo, mokome someaka sarimahokopo. Koteaka maroporaka sarimahoanie.

Yasu kusua maturikia taesane oyapo.

¹ Keresoa paosa aporo maeo. Yasuane nōmo reaki fana some kasane, yumo soko, efera hunia hemakapusimo somerakanapo. Fana some kasane repo kakimosapo. Pipu soko yaiya kakimokoa risikinapo. ² Asiamo Yasuane nōmo some kasane repo yaiya kakimokoa hemakapukua risikino, Kotimo re mafasiraka rekeakosapo. Asiāne someane repo kaumō hemakapurakanone, ane re ikia kara hasaka pukusapo.

³ Arirakano Kotimo anoaki some fana kasane some hakāsa yine nōmo reaki soko some kasapo. Some kasane oyapo. Isiapo watikisapoko Yasu kusuapo. Yasu kukusiraka Kotimo sawia poparaka, Yasuane kukusapo, aiyaka popasane yasiapo. ⁴ Arirakano Yasu kusua kunikia motosane yape isiamo Kotimo e maturikia taesapo. Maturikia taerakano e turikia pusuapo. Wate fana Kotimo sawia poparaka, Yasuane turikia pukusapo, aiyaka popasane yasiapo. ⁵ Asiamo Yasu turikia pusuane, fana Pita rea, e perakano Pitamo, eane asesapo. Arirakano aporo hakāsa pura kinusu risia á e perakano ipu soko eane asesapo. ⁶ Arirakano eaki patera asesa aporo fae harote (500) soko, aporo metakira soko i risiakipoko, Yasu perakano ipu soko asesapo. Asesa aporo 500 ane metakira, kárane yumo sawi one nōmo popana maiya omo yia risikinapo. Metakira hukusi kusuapo. ⁷ Arirakano Yameise rea soko Yasu perakano, epo soko eane asesapo. Arirakano tarira aporo su risia soko Yasu perakano, ipu soko eane asesapo.

⁸ Arirakano keseke, ano rea soko tariako e perakano, nōmo soko eane asesapo. Tarira aporo kinu sumo fana Yasuyaki hauaka wo hakāsa koraka rea maiya amo, ipu Yasuaki risikiako parisapo. Hokosa takapera maiyane faraka, keseke takapera ayiáka ano Yasuaki keseke rekeako parisapo.

⁹ Arirakano tarira aporo makama kesekesane anopo. Tarira aporohoasimo Keresomo ano murikimakosa nine, nōmo fana Keresoa paosa aporoane mokoatikisapo. Asiasamo ano kaiýarakanaapo. ¹⁰ Asiāne Kotimo ano yaku ararerakano, ano koteaka reke tarira aporo rekenapo. Kotimo ano yaku araresasamo ano nenakamaka rekenafapo. Nōmo kára wafororaka rakiraka rekenapo. Tarira aporo metakiramo wakapuaka rakiraka tiki rakirakao, asiāne nōmo namo kakaro kára wakapuaka rakirakanapo. Asiāne nōmo nī wakapumo ayiáka rakirakanafapo. Kotimo wakapumo ano ararerakano nōmo ayiáka rakirakanapo.

¹¹ Asiamo ipu rakisiane soko metao, nōmo rakisiane soko metao, makatane fanafapo. Isiapo suamo reaki Yasuane some karakano, someane repo kakimarakano, someane fanapo.

Isu maturikia taehokosaposane oyapo.

¹² Isiapo Yasuane some akarane oyapo. "Yasu kusuane Kotimo maturikia taesapo." Airakano repo metakiramo someraka, "Aporo kusuane maturikia taehokosafapo." Aiyaka somerakane marirakanore? ¹³ "Aporo kusuane maturikia taehokosafapo," aiyaka kakaro somesa satiki, Kotimo Yasu soko maturikia taehoafunufapo. ¹⁴ Asiāne Yasu maturikia taehoanafonosa satiki, isiapo nenakamakayia some kakafunupo. Nena some kasa satiki, repo nenakamakayia kakimakafunupo. ¹⁵ Asiāne isiapo someraka, "Keresoane Kotimo maturikia taesapo," aisapo. Arirakano Kereso kusua maturikia taehoanafonosa satiki, isiapo Kotiane kotafe some kakafunupo. Asiāne Kereso maturikia taehoanafonosa satiki, aporo su kusua maturikia taehoafunufapo. ¹⁶ Asiāne aporo kusua maturikia taehoanafonosa satiki, Keresoane soko maturikia taehoafunufapo. ¹⁷ Arirakano Kereso maturikia taehoanafonosa satiki, re yaiya himu watikiaka risikiafunupo. Asiamo repo nenakamakayia Yasu Keresoaki himu hakásaraka hemakapukua risikiafunupo. ¹⁸ Arirakano Keresoa patera asesa aporo yumo kusuane, kura ikia kara pufunupo. ¹⁹ Hauaka wo hákasa isu Keresoyaki risina, akura maiya amo yaiya Keresoyaki risikianafonorakano, isu kára kaiyahokosapo.

²⁰ Arirakano kakaro someane oyapo. Kereso kusuane Kotimo kakaro maturikia taesapo. Aporo kusua fana maturikia taesane Keresopo. Arirakano ira wate fana pekea rea ayiáka, Kereso ipi kusuane fana maturikia taesapo. ²¹⁻²² Atamemo makata watikiaka rakisiasamo, ipi kusuapo. Aporo su Atamemo wainepe pesasamo, Atameane ipi kusua ayiáka, aporo su kurapo. Arirakano Keresomo koteaka rakisiasamo, e Kotimo maturikia taesapo. Asiamo Keresoaki kataka marekea risia aporoane, Kereso maturikia taesa ayiáka, maturikia taehokosapo. Asiamo aporo hakása meta Atameane fana kusuasamo, isu soko kukusapo. Arirakano aporo hakása meta Yasuane kusua maturikia taeraka yaiya reasasamo, isu soko maturikia taeraka yaiya risikiakosapo. ²³ Yaiya risikiasimo murikimasa maiya á paurakano maturikia taehokosapo. Fana Kereso maturikia taesapo. Maturikia taesane e keseke pariapera maiya amo, eaki kataka marekea risia aporo hinamoane maturikia taehokosapo.

²⁴ Sereamo hauaka wo fahokosa maiyane fasere peakosapo. Maiya amo Keresoaki yunuraka risia aporo unihaeane soko, aporoamo wakapuane soko, ipu somemane motosane soko, suane Keresomo marokeraka rukua mosaka tapiakosapo. Rukua mosaka tapikia, Ata Koti ipi hákasa unihaeaka rekeasimo, Kereso ipiaki kataka marekea risia aporo hinamoane Kotiaki kakakosapo. ²⁵ Asiamo Kereso ipi unihaeaka reke yunu suane epo korakemo finiraka marakoraka rekeakosakipoko ipi unihaeaka rekenapo. ²⁶ Yunu suane marakoraka rukua mosaka tapikia yunu kesekeane rukua mosaka tapiakosane kura ayapo. Kurane Keresomo rukua mosaka tapiakosapo. ²⁷ Arirakano Kotimo sawia popasane oyapo. Kotimo someraka, "Makata su Keresomo ipi rukua mosaka tapiakosapo. Ipi makata su unihaeaka asekea rekeakosapo," aíyaka Kotimo maresapo. Kotimo maresasamo Yasumo Kotiane marokehokosafapo. *(Buk Song 8:6)*

²⁸ Asiamo Keresomo ipi yunu suane marokeraka makata su unihaeaka asekea area maiya amo, epo Kotiaki someraka, "Atao, ano soko nōmo asekea rekeanie," aihokosapo. Airakano Kotimo Keresoane soko, makata suane soko, epo ipi hákasa kakaro unihaeaka asekea rekeakosapo.

²⁹ Arirakano hauaka wo aporo kusuapoko re aporo metakira hitafe risiane hea tapukumurirakasupo. Yasu kusua maturikia taesane nōmo kotafe some kasa satiki ane, aporo hea tapukumuriraka suane nena yia hea tapukumuriafunupo. Asiāne aporo kusuane maturikia taehoanafonosa ane, ipoko aporo hitafe risia marirakano hea tapukumurirakanare? ³⁰ Isu tarira aporomo Keresopoko rakiraka risikino, aporo metakiramo isu mokoatikirakano soko, yaiya rakiraka risikinapo. Isu maturikia taehokosapo, aíyaka someane kakarohoanafonosekenone ane, marirakano isiaipo Keresopoko yaiya rakiraka risikino, ipu isu mokoatikirakanare?

³¹ Hameo, maiya suamo nōmo someraka, "Pipu ano rusua kukusare?" Aíyaka nōmo kakaro somerakanapo. Repo Unihae Yasu Keresoaki kataka marekea rakiraka risikino asekea ano seserakanapo. Aíyaka nōmo kakaro somerakanapo. ³² Asiamo Kotimo aporo kusua maturikia taehokosapo. Aíyaka Kotimo some kasane nōmo some kasapo. Efesase taonea someane nōmo some karakano, Efesase aporoamo ano makotesafapo. Efesase taonea ano rea maiya amo aporo irirasamo ano mokoatikisapo. Kotimo aporo kusua maturikia taehoanafonosa satiki, yunu aporomo ano mokoatikihoafunufapo. Arirakano aporo metakiramo someraka, "Aporo hinamo kusuane maturikia taehokosafapo. Isu maiya wakasema risina kukua fahokosapo. Asiasamo pipu yia isiaipo kaumo hemakapusuane kekemaraka makata nakosane soko, he watikisane soko, hemakapukua nakosapo," airapo. *(Aisia 22:13)*

³³ Asiamo repo hasaka hemakapukupo. Pipu yia hasaka hemakapurapaka mahoperaka somerane kakimakopo. Koteaka rea aporoane ipi aporo tákane watikiaka reasamo eane kirimaraka, tati hakása watikiaka risikiakosapo. ³⁴ Anapaka hasaka hemakapusuane metakarikia, koteaka ereketaeraka hemakapukua risikianie. Makata watikisane

metakarinie. Repo metakiramo Kotiane kakaro hemakapurakanafapo. Asiamo re kaíyahoasimo nōmo someaka poparakanapo.

Kau maturikia taehokosane oyapo.

³⁵ Repo aporo metakiramo someraka, “Aporo kusuane mayáka maturikia tae-hokosare? Maturikia taerakano kau masia maka hitafehokosare?” ³⁶ Aiyaka himeteaka somehokopo. Repo makata mano hae hauaka kokomaresane, hae kauane fana toreraka, namo pauaka herapo. ³⁷ Hauaka kokomarerane hae hákasa kokomarerapo. Makata hae hauaka kokomaresa yine pauaka herafapo. Makata hae kokomaresane witi hae soko metao, makata hae meta soko metao, ane toreraka oto kuyaki pauaka herapo. ³⁸ Asiamo witi haeaki witi oto kuane, Kotimo ipi hemakapukua karápo. Witi haeaki witi ipi oto kuane karápo. Sinima haeaki sinima ipi oto kuane karápo. Ayíaka makata hae sua ipi ku oto ayíaka kekepo kekepoaka karápo.

³⁹ Arirakano makata hitafe arisiane su kauane kekepopo. Aporomano kau haku, saro kau haku, mena kau haku, pokoa kau haku, ayíaka makata su kauane kekepopo.

⁴⁰ Arirakano ti yapura makata faenane metakira haku kekepo risikinapo. Hauaka wo soko makata metakira haku risikinapo. Makata kotesane ti yapura makata kotesane hakupo. Hauaka wo makata kotesane hakupo. ⁴¹ Sere maiyamo ipi faenane hakupo. Ere maiyamo ipi faenane hakupo. Ti makatamo ipi faenane soko hakupo. Ti makata hakása yine faenane kekepo kekepoaka risikinapo.

⁴² Asia ayíaka aporo kusua maturikia taehokosa kauane asiapo. Kusua hauaka amarerane kau torenapo. Maturikia taena kauane kakaro torenafapo. ⁴³ Asiamo aporo kau kusua hauaka amarerane yano motosa kára kakenafapo. Arirakano maturikia taena kauane yano motosa kára kakenapo. Kusua hauaka amarerane kau wakapu fasapo. Arirakano maturikia taehokosa kauane wakapu rekenapo.

⁴⁴ Asiamo aporo kusua hauaka amarerane hauaka omo menapo. Maturikia taehokosa kauane homo menapo. Hauaka omo himuha hitafe rera kauane hakureapo. Homo hitafe rera kauane hakureapo. ⁴⁵ Arirakano Kotimo sawia popasane oyapo. “Aporo fana rea Atameaki Kotimo himuha karakano e hitaferaka reapo,” aiyaka popahoareapo. Arirakano Yasu apororaka pekea* e kusuane maturikia taerakano, hitaferaka yaiya rerane aporoaki epo kasapo. *(Stat 2:7)*

⁴⁶ Arirakano aporo hauaka wo hitafe rekeasimo, hauaka omo kauane Kotimo fana aporoaki kasapo. Arirakano keseke Hepene yapura yaiya rekeasimo, ho menane kakakosapo. ⁴⁷ Aporo fana Atameane Kotimo ororo maka rakisiapo. Rakisiasamo e hauaka aporopo. Arirakano aporo keseke pesane hepene yapunaka pesapo. ⁴⁸ Asiamo aporo fana rea ayíaka, isu hauaka aporomano su ayíaka risikinapo. Arirakano aporo hepene yapura hiakosane hepene yapunaka pesa aporo rea ayíaka risikiakosapo. ⁴⁹ Asiamo isu aporomano hauaka maka rakisia aporoane hakása yine aseraka sikiraka risikinapo. Ayíaka keseke isu hepene yapunaka pesa aporo hakása yine aseraka sikiraka risikiakosapo.

⁵⁰ Hameo, kepoane oyapo. Hauaka omo kauane soko, yapiane soko Koti unihaeaka rea hauaka á paohokosafapo. Hauaka wo kau torenane yaiya rera akiyaki paohokosafapo.

⁵¹ Kaisie. Fana mahamesane yumo nōmo somerakanapo. Isu su kukusafapo. Kukunafonosa nine isu su kauane sanasiraka hakuhokosapo. ⁵² Kotimo pikoro rurakarakano aseane hi kopeanayiamo kauane foakayia hakusekeno aseakosapo. Pikoro rurakarakano, aporo kusuane hitafe yaiya risikiasimo maturikia taehokosapo. Arirakano aporo hitafe hauaka wo risiane soko, kauane hakurakano aseakosapo. ⁵³ Torena kauane metakarikia, torehoanafonona kau kotesane mokoakosapo. Kau kusuane metakarikia hitafe yaiya rekeakosa kauane mokoakosapo. ⁵⁴ Torena kauane mamakateraka, torehoanafonona kau kotesa amora maiya amo, Kotimo sawia popasane ayiakakosapo. Aiyaka popasane oyapo. “Kurane mafaraka kakaro rukua mosaka tapisiapo. ⁵⁵ Asiamo kura wakapuane

* 15:45: Yasuaki Kotimo hitafe rerane kasasamo, Yasuane Atame meta, airapo.

Kotimo mafasasamo ma rekenare? Kura namonane Kotimo mafasasamo ma rekenare? Rekenafapo." Aíyaka Kotimo sawia popahoareapo. *(Aisaia 25:8; Hosea 13:14)*

⁵⁶ Isiapo watikiaka rakisiakipoko kura namona ayapo. Kotimo somemané motosasamo isiapo makata watikisane mafekemanapo. ⁵⁷ Asiamo kurane Unihae Yasu Keresomo mafasasamo makata watikisane soko, kurane soko, isiapo rukua mosaka tapirapo. Akipoko isiapo Kotiaki suserakanapo.

⁵⁸ Hameo, namoraka wasuaka rukupo. Keresoa paoraka himu hakásaraka risikianie. Maiya suamo Unihae Kotipoko kára rakinie. Keseke re kusua maturikia taehokosasamo, yumo repo makata arakirane, Kotimo aseraka, makatane nenakamaka makatapo, ai-hokosafapo.

16

Keresoa paosa aporo ararehokosakipoko mone taenane oyapo.

¹ Keresoa paosa aporo ararehokosakipoko mone taenane repo anoaki kaisiane, nōmo reaki some paripurakanapo. Keresoa paosa aporo hinamo Karesia taonea risiaki nōmo someraka, "Yarusarame sitia Keresoa paosa aporo hinamoane arareraka mone kakako taehoanie." Aíyaka nōmo iaki somesane repo kaikia, repo soko ayíáka taehoanie. ² Yatipinumo maiya suamo repo namina suamo hakasa hakasaraka mone taehoanie. Soko suamo makata rakisiakipoko mone wakasema maraka, mone wakasema taehoanie. Mone kára moraka, mone kára taehoanie. Taerakano mone su taesane sarimaraka keanie. Ano apera maiya amo, mone sarimaraka keane siahoasifareapo. Ano peasiraka yumo keanie. ³ Arirakano mone taesane Yarusarame sitia mokoa pusimo, aporo kotesane repo murikimokoanie. Asiamo ano peraka aporo repo murikimosamo mone mokoa pusimo, nōmo iaki sawi poparaka kakakosapo. Sawiane poparaka úyaka popahokosapo. "Korini aporoane kotesasamo ipu Yarusarame aporo re ararehoko apura ayapo. Asiamo iane perakano, repo arareraka pasimokoanie." Aíyaka nōmo Yarusarame aporoaki popahokosapo. ⁴ Asiamo ano soko purakanone ane, i soko anoyaki hakása pukusapo.

"Nōmo ayiakakosapo." Aíyaka Poremo somesane oyapo.

⁵ Ano Masetónia hauaka pukua, Masetónia hauaka aeyaka repo taonea peakosapo. Peraka Masetónia hauaka kakaro rekeakosafapo. ⁶ Asiāne repo taonea maiya wakase-mamo reke soko metao, yaki hakásamo reke soko metao ayíáka rekeanarakapo. Ano himeteripo. A nina ano hauaka meta pukusaporakano, koteaka pukusakipoko, repo ano ararehoane siahoasireapo. ⁷ Ano pekea foaka paripukusane maiya wakasemamo re aseako hisiripo. Unihae Kotimo aorakano maiya káramo ano reyaki rekeakosapo.

⁸ Arirakano Penekose hokono keakosakipoko ano Efesase taone yia rekeakosapo.

⁹ Kotimo some kakasimo ikia koro asíane Kotimo ropakamasapo. Asiamo nōmo epoko some karakano, aporo yakaimo kairakanapo. Arirakano aporo yakai metakiramo Kotimo someane hisiraka ipi rakirane matasorakanapo.

¹⁰ Arirakano Korini aporo repo taonea Timotiane perakano, repo eane pasimaka makotehoanie. Asiamo Unihae Kotipoko nōmo arakira ayíáka, epo soko ayíáka raki-rakanapo. ¹¹ Repo eane asekea makefekopó.* E ano area kimisi aperamo koteaka peasimo repo eane ararehoanie. Ararerakano e seseraka peraka Keresoa aporo mae metakirayaki perakarihoamo ano kau rekenapo. ¹² Isiapo Keresoa paosa aporo mae Apóroseaki nōmo someraka, "Keresoa paosa aporo mae metakirayaki, Korini taonea aporo aseako kimisi punie." Aisa nine e repo apea yumo pukusane seserakanafapo. Keseke peariraka hemakapuraka e peakosaposapo.

Poremo ayapa aisane oyapo.

¹³ Makata watikisa fasereperapaka wakakoraka risikiakopo. Kotiaki yaiya himu hakásaraka hemakapurua rakiraka risikianie. Epoko paroaka wakapuaka risikianie.

¹⁴ Repo rakiraka aporo metane himu tumurumo hemakapurua rakinie.

* 16:11: Timotiane aporo sisima rekeanafononasamo, aporo sisima metakiramo eane makeferaka asekepayasapo.

¹⁵ Hameo, Setéfanase ipi asea soko, ipi hokosa soko, Akaía hauaka á i suane fanaraka Yasuaki risikiako parisapo. Yumo Keresoa paosa aporo hinamo metakirane ararehoko ipu rakiraka risikinapo. ¹⁶ Asiamo hameo, nōmo reaki paroaka somerakanapo. Setéfanasemo makata rakira ayiáka eyaki hakāsa makata rakira aporomo soko, ayiáka rakirasamo ipu someane soko kaiyinie. Arirakano i suane ararehoanie.

¹⁷ Setéfanase soko, Fotunétase soko, Akaíkase soko i kimisi perakano asekea ano seseripo. Reyaki hakāsa rekeanafonoraka aporo isiane pekea ano ararerakano asekea seseripo. ¹⁸ Ipu re masesena ayiáka, ano soko maseserakanapo. Asiamo iane, “Aporo kotesapo,” aihoanie.

¹⁹ Arirakano Keresoa paosa aporo Esea hauaka á risiamo re hemakapurakanapakae. Akuwíra soko, ipi asea Pirisíra soko, ipu apea Keresoa paosa aporo sarimasamo soko, ipu suamo reane hemakapurakanapakae. Reane Unihae Keresoa paosasamo ipu hemakapurakanapakae. ²⁰ Keresoa paosa aporo mae hauaka wo risiamo soko, re hemakapurakanapakae. Repo soko, Keresoa paosa aporo maeane kára hemakapukua, namina yia hokono mokoanie.

²¹ Nōmo hokonomo sawi wakasema one poparaka, “Nōmo re hemakapurakaripo,” aiyaka ano Poremo poparakanapo.[†]

²² Arirakano repo metakiramo Unihae Kotiaki himumo hemakapunafonorakano, aporoane Kotiyaki yaiya rekeakosafapo. Arirakano Unihae Yasu paripeakosane nōmo hemakapuraka, “Yasu ne foaka peanie,” aiyaka hemakapurakaripo. ²³ Unihae Yasumo re yaku ararehoasimo nōmo hemakapurakaripo. ²⁴ Re soko, ano soko, Yasu Keresoaki patera asekea risiasamo, nōmo himu tumurumo re kára hemakapukua rekenapo.

[†] 16:21: Sawi one popasa suane Poremo ipi hokonomo popasafapo. Epo someane aporo metamo kaikia popasapo. Arirakano sawi poparaka fahoramo, sawi fari atura wakasema popasane Poremo ipi hokonomo popasapo.

2 Korini

2 Korini sawi one mahemakapukusa someane oyapo.

Yasu hepene yapura hisiakipoko keremisi tuaneti fae su (25) faraka, Poremo Keresoa paosa aporo hinamo Korini taonea risiaki sawi fana popasapo. Ipu makata watikiaka rakisiane Poremo maropohoko hemakapusuasamo sawi ane popasapo.

Wakesema nina, iane maiyaka risikinarakapo, aiyaka Poremo hemakapuraka, Taetasemo aseako pusiesapo. Taetase pukua Poreane Masetónia hauaka á reakipoko, Taetase paripesapo. Taetase peraka Poreaki someraka, "Korini aporomo namina makata watikisane maroposapo. Asiāne aporo metakiramo Poremo someane koaretaeraka, kotafe tarira aporomo someane kaikia kekemaraka risikinapo," aisapo.

Asiamo Kotimo Poreane tarira apororaka rakisimo murikimasane Poremo ipi paroaka somesapo. Korini aporo hinamomo Yasuane hemakapusimo Poremo fanaraka some kasapo. "Kotafe tarira aporomo someane repo kakimakopo," aiyaka Poremo somesapo.

Arirakano Poremo some meta soko sawi wo popasapo. Yutía hauaka á Keresoa paosa aporo hinamo makata forokoa risiaki repo mone sarimaraka kakanie, aiyaka Poremo sawia popasapo.

2 Korini sawia some kepo parakuraka popasane oyapo.

1:1-11 Poremo Korini aporo hinamoaki sawi one kepomarekea poparaka Kotiaki susesapo.

1:12-2:4 Poremo someane ereketae susu somerapo.

2:5-11 Watikiaka rakisia aporoane repo fanasisasamo pasimakanie.

2:12-17 Ano peakosaposane makata fasere perakano ano pesafapo.

3:1-4:16 Kotimo fana someaka masane Kotimo kawe someaka masamo marokesapo.

5:1-10 Isu hepene yapura hinaka kau kawe kotesa mokoakosapo.

5:11-6:10 Poremo makata rakirane aporo hinamomo Kotiaki hemakapusimo some karapo.

6:11-7:4 Aporomo ipi hokosaki somera ayiáka Poremo iaki ayiáka somerapo.

7:5-16 Poremo Taetase aseraka sesesapo.

8:1-9:15 Kotiane hemakapukua risike makata forokoa risia aporoane arareraka mone kakanie, aisapo.

10:1-13:10 Kotafe tarira aporoane Poremo marokesapo.

13:11-14 Poremo ayapasapo.

Keresoa paosa aporo hinamo Korini taonea risiaki Poremo sawi meta keseke poparaka makesane oyapo.

¹ Kotimo hemakapusua aeyaka ano Pore Yasu Keresomo tarira aporo rekeasimo murikimasane anopo. Nōmo soko, isiapo Keresoa paosa aporo mae Timotimo soko, etapo reane hemakapurakanapo. Re Yasu Keresoa paosa aporo hinamo Korini taonea risiane soko, Kotimo aporo hinamo Akaia hauaka á risiane soko, re suaki nōmo sawi one poparaka makerakanapo. ² Isiapo Ata Kotipe Unihae Yasu Kereso tetapō reaki yaku ararenane soko, auaraka risirane soko, yaiya kakasimo hemakapurakaripo.

Kotiaki Poremo susesane oyapo.

³ Isiapo Unihae Yasu Keresomo ipi Atane Koti ipipo. Kamenakaraka hemakapura kepoane soko Koti ipipo. Isu kára himu nekea umiraka risikino, isu mapirahoasimo kamenakaraka some kará kepoane soko Koti ipipo. Asiamo isiapo Kotiaki kekerehoanie.

⁴ Makata umisa isu kaua faserepeperakano isu himu kára nakohoamo Kotimo isuane kamenakaraka arareraka mawakapuraka rekenapo. Asiasamo aporo meta kaua makata umisa fasereperakano, isiapo aseraka kamenakaraka ararehoane siahoasireapo. Asiamo Kotimo isu kamenakaraka araresa ayiáka, aporo metane soko, isiapo ayiáka kamenakaraka ararenapo. ⁵ Yasu Kereso kára kau teraka himu nesa ayiáka, isu soko kára kau

teraka himu nekea risirapo. Isiapo Yasuane kekemarakano aporomo isu mokoatikinapo. Asiasamo Yasu Keresomo isu kára kamenakaraka ararenapo.

⁶ Arirakano aporomo isu mokoatikirakano, mokoatikina umisane isiapo mokoa risikinapo. Re arareraka arirakano Kotimo re mafasikia ayiakasimo umisane isiapo mokoa risikinapo. Mokoa risikino Kotimo isu ararenapo. Ararerakano repo aseke aúyaka hemakapunie. “Tarira aporoane mokoatikirakano Kotimo i ararena ayiáka, aporomo isu soko hakása nineraka mokoatikirakano, Kotimo isu soko ararehokosapo.” Aíyaka hemakapukua himu mahisinane metakarikia himu mapiraraka hemakapukua risikianie. ⁷ Asiamo isu kau teraka himu nekea risikino, Yasu Keresomo isu kamenakaraka ararena ayiáka, re soko kau teraka himu nekea risikino, epo re soko kamenakaraka ararehokosapo. Asiamo repo Kotiaki yaiya hemakapuraka risikiasimo hemakapurakaripo. Hemakapurane isiapo metakarirakanafapo.

⁸ Keresoa paosa aporo maeo, Esea hauaka á aporo metakiramo isu kára mokoatikisane re himeteraka risirapaka, repo kaiyisimo sawi one poparakanapo. Arirakano mokoatikisane itifisiafapo. Kára mokoatikisapo. Kára mokoatikisasamo isiapo maýane keposahopo. ⁹ Isiapo isina hemakapuraka, “Maiya omo isiapo maýane farakanapo,” aíyaka isiapo hemakapusuapo. Aíyaka hemakapuraka mokoatikina umisane marirakano faserepesare? “Isiapo isina wakapuane siahoasifareapo. Kotimo ipi wakapu hákasamo siahoasireapo. Kotimo aporo kusua maturikia taenasasamo ipi wakapu hákasane siareapo.” Aihoasimo makata umisa kára faserepesapo. ¹⁰ Isu mokoatikisa kukufunusa nine Kotimo isu kára arareraka mafasisiapo. Mafasirakano isiapo hemakapuraka, “Efera hunia soko Kotimo isu arareraka mafasiakosapo,” aíyaka hemakapurakanapo.

¹¹ Arirakano repo isupoko farimaka Kotiaki kurikuriana amo Kotimo isu ararerakanapo. Kotimo ararehoasimo hemakapukua, repo soko aporo hinamo metakiramo kurikurirakano, Kotimo kaikia isu makoterakanapo. Makoterakano aporo hinamo yakaimo aseke Kotiaki kára susehokosapo.

Poremo someraka, “Ano peakosapo,” aisa nine parisane kepoane oyapo.

¹² Nōmo some one reaki kakaro somerakaripo.* Ano Keresoa paohoanafonosa aporoyaki reane soko, re Keresoa paosa aporoyaki ano reane soko, maiya suamo amo koteaka reapo. Asiamo nena aporomo hemakapusuane nōmo kekemasafapo. Kotimo wakapumo ano yaku arareraka, makata aina kotesa soko ereketaenane soko, anoaki kasapo. Asiamo Koti hikumisia ano reyaki kakaro koteaka reapo. Koteaka reke nōmo himumo hemakapuraka, “Ne siaraka rekenapo.” Aíyaka hemakapurakarakan koteaka reane repo kaiyisimo nōmo mahamerakanafapo. ¹³⁻¹⁴ Sawi one repo menoraka hemakapusimo nōmo reaki hufitaeraka poparakanapo. Mahamekea poparakanafapo. Yumo nōmo hemakapusuane repo wakasema hemakapukua, keseke repo koteaka suane hemakapusimo nōmo hemakapurakaripo. Nōmo hemakapuraka Unihae Yasu pariapera maiya amo nōmo reaki sesehokosa ayiáka repo anoaki ayiáka sesehoasimo hemakapurakaripo.

¹⁵ Repo anoaki seseraka hemakapukusane nōmo hemakapukua someraka, “Re makotehoko yape tetá repo taonea ano peakosapo. ¹⁶ Aíyaka Masetónia hauaka á pukusakipoko repo taonea ano pekea, wakasema nina aeyaka metakarikia, Masetónia hauaka á pukua wakasema nina, pariapera maiya amo, repo taonea efera hunia pekea, wakasema rekeakosapo. Nina Yutía hauaka pukusakipoko repo ano ararehoasimo maiya wakasema rekeakosapo.” Aíyaka nōmo hemakapukua somesapo.

¹⁷ Aíyaka somesane peanafonorakano, repo metakiramo someraka, “Poremo himu tetá hemakapurapo,” aisapakae. Asiamo repo hemakapusuane, ano ní makotehoko peako ayireare? Repo hemakapusuane, nōmo kotafe horapo, aíyaka hemakapurakanare? Arirakano repo hemakapusuane, maiya metamo nōmo aoraka, maiya metamo nōmo

* ^{1:12:} Pore peakosapo aisane peanafonorakano Korini aporomo Pore hukururaka someraka, “Kotafe somera aporoane nepo.” Airakano Pore parisa kepoane iaki somesapo.

waeraka, airare? Wae, nōmo airafapo. ¹⁸ Arirakano Kotimo ipi makata ayiakakosaposane kakaro ainapo. Aina ayiáka nōmo soko kakaro somerapo. Nōmo aorane himu tetáraka hemakapukua aorafapo. Nōmo aorane waehoko aorafapo.

¹⁹ Nōmo soko, Saerasemo soko, Timotimo soko, isiapo Kotimo hokosa Yasu Keresoane reaki fana some kasapo. Arirakano Yasumo some tetáraka somerafapo. Epo aoraka, wae-hoko aorafapo. Kotimo somerakano Yasumo aorapo. ²⁰ Asiamo Kotimo ayiakakosapoaka someaka motosane kepoane Yasu ipipo. I pisasamo isiapo Yasuaki kataka marekea risike Kotiaki kekerena maiya amo kakaroripo, airapo.

²¹ Isiapo soko, repo soko, Keresoaki himu hakásaraka hemakapukua paroaka risiki-asimo, Kotimo isuaki paroaka risirane kasapo. Isiapo rakirane soko, epo isuaki rakinie, aíyaka maresapo. ²² Isu suane epo ipi menapo, aíyaka isiapo hemakapusimo saro senaki patena aiyáka isuane epo ipi máka motoraka, Ho Kotesa isu himua maresa ayapo. Kotimo ayiakakosaposane isiapo kakarorakae aíyaka hemakapusimo, Ho Kotesa fana maresa ayapo.

²³ Arirakano Kotimo ano himu aserasamo epo kaiyisimo nōmo kakaro somerakanapo. Repo makata aina watikisane nōmo maropohokosakipoko ano Korini taonea peako asiāne repo mahisinapaka ano pesafapo. ²⁴ Asiāne repo Kotiaki himu hakásaraka hemakapurane paroaka risikinapo. Asiamo isiapo reane mawakasemaraka somerakanafapo. Re seseaka risikiasimo isiapo ararehoko hemakapuraka somerakanapo.

2

¹ Fana ano pesa maiya amo, repo makata watikisane nōmo maroporakano re kára kaýasapo. Asiamo nōmo re ararehoko peako asiane, re efera hunia mahisinapaka repo taonea ano pesafapo. ² Asiāne ano pekea re maroporakanone repo anoaki mahisihokosapo. Mahisirakano epamo ano masesehokosare? Re mahisiraka risike repo ano masesehokosafapo. ³ Repo ano masesehoafunusa nine, asiāne repo taonea ano peraka aseane re watikiaka risikino asekea, ano himu mahisihoa funureapo. Anapaka repo makata watikisane maropohoasimo, nōmo reaki sawi poparaka makesapo. Ano seseraka rekeno, re soko seseraka risikiakosapo. Aíyaka nōmo hemakapurakaripo. ⁴ Arirakano fana ano himu nekea hiripuyaki nōmo reaki sawi poparaka makesapo. Re himu mahisihoaasimo nōmo reaki sawi poparaka makesafapo. Poremo isuaki himu tumurumo hemakpureapo, aihoasimo nōmo reaki sawi poparaka makesapo.

“Watikiaka rakisia aporoane fanasisane metakarinie,” aisane oyapo.

⁵ Aporo hakásá metamo reaki makata umisa karakano asekea ano mahisirakanapo. Mahisinane ano hakasa mahisirakanafapo. Re soko mahisirakanapake. Asiāne nōmo someane kára somehokosafapo. ⁶ Asiamo makata umisa kasá aporoane repo suamo e fanasisane sia fanasisapo. ⁷ Asiamo pipu yumo fanasisane metakarikia eaki someraka, “Makata watikiaka rakisiante fanasisasamo pipu yumo mahisisane fasapo,” aihoanie. Epo kára himu nekea hemakapurane káranapaka e ararehoanie. ⁸ Asiamo repo e hokono maka eaki someraka, “Isiapo né kára himu tumurumo hemakapurakanapo.” Aihoanie.

⁹ Fana nōmo reaki sawi poparaka makesane, nōmo some suane repo kakimarakari-hoamo aseako poparaka makesapo. ¹⁰ Aporo metamo reaki watikiaka rakirakano asekea repo hisisane metakarikia watikisane mamerarurakano, nōmo soko epo watikisane mamerarurakanapo. Re seseraka risikiasimo Kereso hikumisi nenemea mamerarurakanapo. Apromo watikiaka rakiraka tiki rakirakao, watikiaka rakisia nine nōmo mamerarurakanapo.

¹¹ Isu yaiya hisiraka risikiasimo Satanemo hkokakakohoamo, aporo watikisane maroporaka mafarakanapo. Satanemo ipi makata aina watikisane isiapo asekea hemakuprasamo, epo isu asekea reke mokoatkinapaka, aporo watikisane maroporaka mafarakanapo. Arirakano Satanemo ipi hemakapukua rakirane isiapo himeterafaraka etenapaka isiapo isina ainane hemakapukua asekea risikinapo.

Toróase taonea Pore pusuane oyapo.

¹² Toróase taonea ano pusua maiya amo, aporomo Keresoane hemakapusimo some kotesane nōmo some kakako pusuapo. Pukua ano Toróase taonea pauraka aseane, ikia koro mapirisia ropaka amara ayíáka some kotesane some kakasimo ikia koro Kotimo ropakamarakano asesapo. ¹³ Asiáne nōmo Keresoa paosa aporo mae Taetase ane nōmo kope pukua, e asekeanafonorakano nōmo someraka, “E masiarakapo.” Aíyaka kára hemakapuraka kope pukua Toróase aporo suaki ayaparaka i metakarikia, Masetónia hauaka á pusuapo.

*Kotimo Poreane maseserakano Poremo Kotiaki kekeresane oyapo**

¹⁴ Isiapo suamo Kotiaki himu hakásaraka hemakapukua risiasamo isiapo Kotiaki suserakanapo. Isu Keresoaki kataka marekea risia aporoane Kotimo karikia purakanapo. Karikia puraka Kotimo Sataneane hurutapikia marokeraka wawaeraka apura ayíáka, isu karikia purakanapo. Asiamo aporo hinamomo Keresoane hemakapusimo isiapo Yasu Keresoane some kape purakanapo. Asiamo Yasu Keresomo someane isiapo some akarane makata wape yamona asiapo. ¹⁵ Asiamo aporomo makata wape yamona Kotimo yamohoasimo paikia akará ayíáka, Keresomo wape yamonane isupo. Wape yamona ayíáka isiapo Keresomo someane some karakanapo. Some karakanapo aporo metakiramo someane kakimarapo. Arirakano aporo metakiramo koaretaenapo.

¹⁶ Koaretaena aporomo isiapo some kasane, ipu kaikia someraka, “Some ane makata kusua ikiki yamona ayíáka ikiki yamoripo.” Aíyaka hemakapusua aporoane kakaro kukusapo. Arirakano kakinara aporomo isiapo some kasane ipu kaikia someraka, “Someane isiapo kairaka, makata wape yamona ayíáka wape yamoripo.” Aíyaka hemakapusua aporoane kakaro yaiya risikiakosapo. Arirakano someane some kakakosane epamo siaraka some karáre?[†]

¹⁷ Arirakano aporo metakiramo mone mokoakosakipoko Kotimo someane some karaka, pisinisi arakira ayíáka some kape purapo. Ipu arakira ayíáka, isiapo mone mokoakosakipoko Kotimo someane ayíáka some karakanafapo. Kotimo isu murikimaka some kakako pusierakano, Koti hikumisia isiapo Keresoaki himu hakásaraka hemakapuraka ayíáka, kakaro koteaka ereketae some karápo.

3

Kotimo kawe someaka masane isiapo kekemaraka Kotipoko rakiraka risiane oyapo.

¹ Isiapo isina yano motosane makárahokosakipoko, isiapo reaki sawi poparakanafapo. Isiapo reane hokokerakanafapo. Arirakano Keresoa paosa aporo metakiramo ipu namina yano motosa makárasane sawia popasa maka peraka reaki someraka, “Isiapo someane kaiyinie.” Aíyaka reaki sawiane tarikia, anakano repo ipu someane kaikia seserakano asekeia, i apura maiya amo ipu reaki someraka, “Isiapo koteaka rakisiapo. Aíyaka repo sawia poparaka isuaki makanie.” Aíyaka aporoamo sawi popasane maka taripe purapo. Asiamo ipu arakira ayíáka isiapo ayíáka rakirafapo. Isiapo isina yano motosa makárahokosakipoko sawi aporo metamo popasane reaki tariako maka perafapo.

² Isiapo Yasuane some kasasamo, re Yasu Keresoaki risikiako parisapo. Asiasamo isiapo makata rakirane aporo suamo hemakapusimo re Keresoa paosane asekeasimoripo. Asiamo isiapo sawi popana ayíáka popasane re Keresoa paosa ayapo. Asiamo isiapo sawi popasane maka purafapo. Asiamo isiapo hokonomo sawi popasane maka perafaraka, isiapo himu hemakapurane reyaki reke, reane isiapo sawia popana ayíáka popasapo.

³ Isiapo makata rakisia aeyaka repo Yasu Keresoane kekemarakanapo. Asiasamo Keresomo sawi popasa asíane repo. Sawi ane Yasu Keresomo ekea popasafapo.* Aporo hinamo himua popana ayiaka yaiya rera Kotiamo Ho Kotesa re himua murisia ayapo.

⁴ Asiamo isiapo some amo kepoane oyapo. Kotimo isu murikimasasamo isiapo rakirapo.

* 2:13: 14-17 Kotimo Poreane masesesa kepoane 2 Korini 7:5-7 á menohoanie. † 2:16: Poremo iaki makata akai kaisiane, epo some pari kasane, repo hemakapukusakipoko 2 Korini 3:5 á menohoanie. * 3:3: Kotimo fana someaka masa Moseseaki kasane ekea popasapo.

Isiapo Yasu Keresoaki kataka marekea risike, Kotiaki himu hakásaraka hemakapukua risike, isu mapiraraka risike somerakanapo. ⁵ Isiapo koteaka rakiako, isiapo isina hemakapusua aeyaka isiapo wakapumo siahoasifareapo. Isiapo siaraka rakisimo Kotimo wakapuane isuaki karápo. Karakano isiapo koteaka rakirakanapo. ⁶ Kotimo ipi kawe someaka masane isiapo some kakasimo epo isu murikimokoa murireapo. Ipi hemakapusua kawe someaka masane, fana somemane motokoa popasa ayíáka popasafapo. Kawe yumo Kotimo Ho Kotesane isu himua marekea, Ho Kotesamo ipi yiamo isuaki somer- apo. Arirakano fana Kotimo somemane popasane aporomo kekemahoanafonorakano aporoane kukusapo, aíyaka somemane fana motoreapo. Arirakano Ho Kotesamo aporo mafareahoko ararenapo.

⁷ Arirakano fana somemane motosane Kotimo eke poparaka Moseseaki kayereapo. Kasa maiya amo, maiya wakasemamo Mosese hikumisia faesane reasasamo Isiraya aporomo aseraka, hi kakanoraka asekeasifareapo, aisapo. Arirakano somemane Moseseaki kasa maiya amo Mosesemo hikumisia faesane wakasema farape pukua, keseke faesane kakaro fasapo. Somemane motosa suane aporomo kekemahoanafonorakanone, aporo ane kukusapo, aíyaka popasapo. Asiāne somemaneane kasá maiya amo Kotimo faesayaki kasápo. ⁸ Arirakano Kotimo Ho Kotesa kasá maiya amo Kotimo wakapu soko faesa namo kakaro kára kasapo. Somemanemo wakapuane soko, faesane soko, wakasemapo. Arirakano Ho Kotesamo wakapuane soko, faesane soko, namo kakaro kárapo. Somemane ane Ho Kotesamo marokesapo.

⁹ Asiamo Kotimo fana someaka masa maiya amo aporoaki someraka, "Ní watikisapoko fanasihoko motoakosapo." Aíyaka Kotimo Moseseaki somesa maiya amo faesayaki kasápo. Arirakano keseke Kotimo kawe someaka masa maiya amo aporoaki someraka, "Né maereketaerakanapo." Aíyaka Kotimo Ho Kotesa kasá maiya amo namo kakaro faesayaki kasápo.

¹⁰ Kawe namo kakaro faesamo sesakereraka, fana faesane makokōrakanapo. ¹¹ Fana maiya wakasemamo fana someaka masamo faesa sesakereraka reane, keseke kokōrakano keseke kawe someaka masamo kawe faesamo fahoanafonoraka namo kakaro faeraka sesakererakanapo.

¹² Kotimo isuaki kawe someaka masamo faesane fahoanafonasamo isu mapiraraka risikinapo. ¹³ Arirakano mapiraraka arisia ayíáka, Mosese mapiraraka reafapo. Mosese hikumisi faesa fahokorakano aporo hinamomo asekohoamo, Mosesemo pasu yahanasa maka e hikumisia karotapisiapo. ¹⁴ Arirakano fana Isiraya aporomo Mosesemo some- mane kaisia nine, ipu koteaka hemakapusuafapo. Koteaka hemakapunafonoraka ipu himu hemakapurane pasumo karotapisia ásiapo. Fana soko yumo soko, Kotimo fana someaka maraka sawia popasane ipu menoraka hemakapurakanafapo. Arirakano pasumo karotapisiane sakaremakasimo, aporo hinamomo Yasu Keresoaki himumo kataka marekea risikino, pasu yahanasamo karotapisia ayíáka himua karotapikia risiane Keresomo ipi sakaremasapo.

¹⁵ Yasu Keresomo sakaremakosapoko asiane ipu Kotiaki himu hakásaraka hemakapunafonoraka Mosesemo somemane popasane aporomo pipu yia menosane mer- arunapo. Pasumo karotapisia ayíáka i himua karotapisiasamo ipu himumo sawi popasa kepoane hemakapurafapo.

¹⁶ Asiāne Keresoaki aporo hinamo metakira Unihae Keresoaki risikiako parirakano, pasu sakareamara ayíáka ipu himura karotapikia risiane sakaremrapo. ¹⁷ Aporo hinamomo Unihaeaki risikiako parirakano, Ho Kotesamo i himua pasumo ayíáka karotapisiane sakaremakenapo. Asiamo aporo hinamoane somemanemo tipura kesa asia risiane, Ho Kotesamo iane makokorotaesapo. Makokorotaerakanano aporoane seseraka risikiakosapo. ¹⁸ Arirakano Unihaemo ipi faesamo isu ruraka isu ho piakae piakaerakanapo. E ipi area ayíáka risikiasimo ipi faesane isuaki karakanapo. Fana wakasema faeraka risiane, keseke kára faehoasimo Unihaemo rakirakanapo. Unihaemo ipi Ho Kotesamo rakiraka rekenapo.

4

Kotimo some kotesa faesa asíane isiapo some kakasimo, Kotimo isu murikimasane oyapo.

¹ Kotimo isuaki yaku arareraka, epo ipi someane some kakasimo, isu murikimasapo. Asiasamo isiapo Kotimo makata rakirane yaiya rakiraka risike isu himu fahokosafapo.

² Kotimo isuaki makata rakiniesane, makata kaíyasa rakirane soko, makata mahamekea rakirane soko, isiapo metakarisiapo. Asiamo metakarisiane tau mahoperaka arakira ayíáka isiapo rakirakanafapo. Kotimo someane isiapo some karaka, sanasiraka kotafe hokoa some karakanafapo. Asiamo Koti hikumisia ipi someane isiapo kakaro hufitaeraka some karakanapo. Some karakano aporo suamo kaikia, someane kakaroripo, aíyaka hemakapusimo, isiapo kakaro some karakanapo.

³ Ayíáka some karakano, aporo hinamo metakiramo kairaka someraka, “Someamo kepoane isu himeteripo.” Aira aporo hinamoane Heao hauaka á pukusapo. ⁴ Aíyaka somera aporo hinamoamo Kotimo someane kakimarafapo. Kakimakanafonona aporo hinamoane, Satanemo i himua makatosapo. Makatosasamo ipu himumo Kotimo some kotesane kakaro hemakapurafapo. Yasu Keresoane Koti tati hakása yinesapo. Tetapó tati faesa kotesane isiapo some karakano, ipu hemakapukohoamo, himu hemakapurane hauaka omo unihae Satanemo makatosapo. Makatosasamo, Kotimo faesane ipu hemakapurafapo. Kotimo some kotesane soko ipu hemakapurafapo.

⁵ Arirakano isiapo isina yano motosane makáraraka some karáfapo. “Yasu Kereso ipi unihaeaka rekenapo,” aíyaka isiapo some karapo. Some karáká aporo raipamo arakira ayíáka isiapo repoko rakirakanapo. Isiapo Yasu Keresoaki hemakapukua reaki some karakanapo. ⁶ Arirakano hauaka one kepomaresa maiya amo Kotimo someraka, “Katosane faerasie.” Aisa Kotiamo isu himua mafaesapo. Asiamo isiapo hemakapuanne, isiapo Yasu Kereso asekea Kotimo faesane soko, wakapuanne soko aserapo.

Poreane kára mokoatikisa nine Kotimo araresane oyapo.

⁷ Isiapo makata mahimunane akúa kerapo.* Akú ane keseke potakaheke watik-ihokosapo. Aina ayíáka Kotimo ipi Ho Kotesamo makata aina kotesane isu himua kesapo. Arirakano isu aporomano kauane keseke toreraka fahokosapo. Asiamo Kotimo hemakapuraka, aporo hinamo suamo asekea hemakapusimo Kotimo wakapuanne soko, faesane soko, isu hauaka aporoaki karakanapo. Isiapo arakirane, isiapo isina wakapu anaka rakirakanafapo. Kotimo wakapu anaka rakirakanapo.

⁸ Kotimo wakapuanne isuaki karakano, aporo metakiramo isuaki yunuraka risike isuane mokoatikinapo. Asiāne Kotimo isu ararerakano ipu isu mahurutapisiafapo. Arirakano maiya metakiramo isuane kára hemakapukua mahimeteraka risiapo. Asiāne Kotimo isu ararerakano ipu hurupesafapo. ⁹ Arirakano aporo metakiramo ipu ruko kekemaraka mokoatikirakano yia, Kotimo isu metakarisifafapo. Arirakano aporo metakiramo ipu rusua hauaka warisiane kusuafapo. Asiāne Kotimo isu ararerakano, isu takahikia pusuapo. ¹⁰ Asiamo Yasu makusua ayíáka, maiya suamo isu makukusakipoko aporo metakiramo ipu mokoatikirakanapo. Yasu maturikia taerakano turikia pukua reasasamo, ipi wakapuraka rerane isuaki karakano, isu soko wakapuaka risikinapo.

¹¹ Maiya suamo isiapo Yasupoko rakirakano, asekea aporo metakiramo ipu rusuapo. Rusua kusuahopo. Rusua kusuahonine isu fore risira kaua Yasumo wakapuanne reasasamo, repo asekeasimo isu yaiya arisia yuyapo. ¹² Asiamo isiapo Yasuane some karakano, aporo metakiramo ipu rusua kukusakipoko asiāne kusuafapo. Asiāne isiapo some kasáne repo kaikia Yasuaki himu hakásaraka yaiya risikiakosapo.

¹³ Arirakano Kotimo sawia popasane oyapo. “Nōmo Kotimo someane kakimasasamo some karakanapo.” Aíyaka popasa aporoamo Kotiaki himu hakásaraka hemaka apura ayíáka isiapo soko Kotiaki himu hakásaraka risike, ipi some kakimasasamo some karakanapo.

(Buk Song 116:10)

* 4:7: Paeporo Pukua á hauakamo orotipi rakisia popasane, isiapo hauakamo orotipi rakianafononasamo, isiapo akú popasapo.

¹⁴ Isiapo hemakapuraka, “Unihae Yasuane Kotimo maturikia taesapo. Asiamo Koti amo isu soko Yasuaki kataka maresa aporo hinamoane, maturikia taehokosapo. Maturikia taerakanano isu soko, re soko, Koti hikumisi nenemea risikiasimo pasimokoakosapo.” Aíyaka hemakapurakanapo.

¹⁵ Arirakanano isiapo makata arakirane soko repoko rakirakanapo. Asiamo isiapo makata rakisiakipoko isu mokoatikinane soko, repoko isu mokoatikirakanapo. Mokoatikirakanano yia repoko yaiya rakiraka risikinapo. Kotimo aporo hinamo yakai ararehoasimo, aporo hinamo yakaiaki isiapo some karakanapo. Some karakanano, aporo hinamo yakai Kotiaki risikiako pariraka ipu Kotimo ararenane hemakapuraka eaki suserakanapo. Suserakanano aporo hinamo metakiramo Kotiaki risikiako pariraka eaki susenane kárahokosapo. Kárasakipoko Kotimo yano motosa makárarakanapo.

Kotiaki himu hakásaraka rerane oyapo.

¹⁶ Asiamo isiapo Koti makama fanahokosakipoko, isiapo makata rakirane hisiraka metakarirakanafapo. Isu kau hákasa sisimaranakanapo. Asiamo maiya suamo isu himu soko, ho soko, Kotimo makaweraka marerakanapo. ¹⁷ Arirakanano yumo maiya wakase-mamo isu mokoatikisane wakasemareapo. Akipoko keseke Kotimo isuaki fahoanafonona faesa kára kakakosapo. Namo kakaro faesane makosakipoko, mokoatikina makatane isiapo hemakapurakanafapo. Makata ane, faesa amo marokehokosapo.

¹⁸ Asiamo makata hímo aserane kára hemakapurakanafapo. Makata asekeanafonona makata akipoko kára hemakapurakanapo. Makata hímo aserane maiya wakasema nina keseke fahokosapo. Asiāne makata himo asekeanafononane yaiya rekeakosapo. Yaiya rekeakosa makata akipoko isiapo kára hemakapurakanapo.

5

Isu kurakano hepene apea Kotimo isuaki kau kotesa kakakosane oyapo.

¹ Isu hauaka wo arisiane farae apea arisia ayíáka risikinapo. Homo apeane isu kau oyapo. Arirakanano farae ape rakaritaeana ayíáka isu kau kukusa ayapo. Isu kau kurakano isiapo hoane yaiya risikiakosakipoko, Kotimo hepene yapura ape asiane kau hitafe haku mako hiakosa ayapo. Asiamo apeane namo kakaro apefapo. Ape asiane kau haku yaiya risikiakosa kau ayapo. Asiamo kauane fahokosafapo.

² Arirakanano isiapo someraka, “Isu hauaka one metakarikia, hepene yapura hiakoripo. Hepene yapura kau kawe haku mokoako hiakoripo.” Aíyaka hemakapuraka kára seserakanapo. Asiamo isu hauaka wo risike kau nenakarane hisiraka, hauaka wo metakarikia, hepene yapura kau haku yaiya risira ane Kotimo kakakosane seserakanapo.

³ Arirakanano isiapo pasu osona ayíáka hepene yapura kau haku yaiya risira kauane mokoa osohokosapo. Arirakanano aporomo pasu horotaeraka patera yase arisia ayíáka, isiapo hoane ayíáka risikiakohoamo pasu osona ayíáka, isu kau hitafe haku mokoa osohokosapo. Isu kauyaki hoyaki hakása sarimaraka risikiakosapo.

⁴ Hauaka wo farae ape asiane isu aporomano kau ayapo. Kau one arisia maiya amo makata umisa maka puraka, umirakanano kanahiraka maka apura ayíáka, isu ayíáka puraka risikinapo. Arirakanano isiapo pasu ososane horomorakanone isu patera yase risirapo. Isiapo ayíáka rakiane siahoasifareapo. Asiāne pasu kaweanne kima yapura osoraka pasu paté fana ososane horomarapo. Aina ayíáka isiapo kau kawe haku yaiya risira kauane osoraka, hauaka omo kau patéane horotapiakosapo. Asiamo maiya suamo isu kau haku kotesayaki yaiya risikiakosapo. ⁵ Asiamo yaiya risira kauane mokoakosakipoko isu meraruamo risikiakohoamo Kotimo isuaki tarirakanapo. Tariraka Kotimo isuaki someraka, “Keseke yaiya risira kauane nōmo reaki kakakosapo.” Aíyaka fana Ho Kotesane kasapo.*

* ^{5:5:} Hinamo fairaka fana sekete soko karáka someraka, “Hinamo fitu keseke kakakosapo.” Aíyaka somera ayíáka Kotimo Ho Kotesane isuaki fana kasapo.

⁶ Kotimo Ho Kotesa kasasamo maiya suamo isu paroaka risikinapo. Isu kau one arisia maiya amo, Kotimo apea Unihae Yasuyaki hakasa risikinafapo, aiyaka hemakapurakanapo. ⁷ Asiamo isiapo Unihae Yasuane asekeanafonoraka yia isiapo Kotiaki himu hakásaraka hemakapukua rakiraka risikinapo. ⁸ Asiamo keseke Kotimo isu makote-hokosapo. Aisasamo isu paroaka risikinapo. Asiane isu kukua kau one metakarikia, hauaka one metakarikia, Unihaemo apea hiako seserakanapo. Asiamo maiya suamo Unihaeyaki risikiako namo kakaro seserakanapo. ⁹ Asiamo isu hauaka wo arisiamo soko metao, hepene yapura hikia arisiamo soko metao, maiya suamo Kotimo sesehoasimo hemakapurakaripo. ¹⁰ Asiamo keseke aporo hinamo su Keresomo takekea parakuana maiya amo, e rea isu su pukua sarimahokosapo. Sarimaraka isiapo hauaka wo risike makata rakisiakipoko, makata ropo siaraka mokoakosapo. Makata watikiaka rakisi-akipoko, ropo watikisane mokoakosapo. Arirakano Koteaka rakisiakipoko, ropo kotesane mokoakosapo.

Isiapo Kotiyaki yunuraka risiane Yasu Kereso kusua aeyaka Kotimo isu tákésane oyapo.

¹¹ Unihae Kotiane karasasamo isiapo eane namoraka hemakapukua rakirapo. Asiamo aporo metakirane Kotiaki risikiako parihoasimo isiapo paroaka wakapuaka some karakanapo. Arirakano isiapo aina kotesane Kotimo aserakanapo. Asiamo repo soko, isiapo aina kotesane asekeasimo hemakapurakaripo.

¹² Asiamo isiapo isina yano motosane makama mafaraka somerakanafapo. Isiapo reane kirimarakanafapo. Isiapo ainane repo koteaka hemakapusimo isiapo sawi one poparakanapo. Arirakano aporo metakiramo namina rupiaka some karaka, Kotimo sesehoasimo rakirafapo. Asiane ipu aina amo, Kotimo sesehoasimo rakirafapo. Ipu namina hemakapusuane some karapo. Asiamo aporoamo isu hokomaka somerakano repo isiapo rakira ainane hemakapuraka iaki somehokosapo. ¹³ Aporoamo isuane hokomaka someraka, "I masuaraka risikinapo," aisapakae. Asiamo isu masuaraka risike yia, isiapo Kotipoko himu hakásaraka rakirakanapo. Arirakano isiapo repoko farimaka arakirane isu masuaraka rakirakanafapo. Asiamo isiapo makata arakiramo kepoane oyapo. ¹⁴ Yasu Keresomo isuaki namo kakaro himu tumurumo hemakapurapo. Keresomo himu tumurumo hemakapurane isiapo himua komarukua risiasamo, isiapo ayíáka rakirakanapo. Arirakano aporo hinamo supoko Yasu Kereso ipi hákasa farimaka kusuapo. Aporo hinamo supoko e kusuasamo, aporo hinamo su e kusua ayíáka, kusuapo. ¹⁵ Aporo hinamo supoko e kusuane, aporo hinamomo ipu namina mena akipoko rakisimo, e kusuafapo. E kusua maturikia taerakano turikia pusuane, e ipipoko ipu rakisimo, e kusuapo.

¹⁶ Arirakano fana aporo kau kima isiapo aseraka hauaka omo hemakapusua aeyaka isiapo someraka, "Aporo metane kotesapo. Aporo metane watikisapo." Aiyaka hemakapusua nine, yumo isiapo metakarisiapo. Fana isiapo Keresoane kau kima aseraka hauaka wo hemakapusua aeyaka eane hemakapusuapo. Asiāne yumo Keresoane ayíáka hemakapurakanafapo.

¹⁷ Asiamo aporo hinamomo Yasu Keresoaki rekeako pariraka, Keresoaki kataka marekea risia aporo hinamoane, Kotimo makawenapo. Namina fana aina watikisane metakarikia, yumo kawe kotesa risikinapo. ¹⁸ Fana isiapo Kotiaki yunuraka risiapo. Asiāne Yasu Kereso kusua aeyaka Kotimo isu mafasikia, isu tákéraka risikiasimo mare-sapo. Arirakano Kotimo isuaki someraka, "Aporo hinamo metakiramo anoaki tákéraka risikiasimo repo somehoko pusie." Aiyaka Kotimo isuaki someaka maresapo. ¹⁹ Someaka marerakano isiapo someraka, "Aporo hinamo suamo Kotiaki yunuraka risiane, Yasu Kereso kusua aeyaka mafarakano, tákéraka risikiasimo, Kereso Koti tetapō rakisiapo. Asiamo aporo hinamomo watikisane Kotimo efera hunia hemakapukusafapo." Aiyaka aporo hinamomo Kotiaki tákéraka risikiasimo isiapo some karakanapo. Some kakasimo Kotimo isu murikimasapo.

²⁰ Murikimarakano isiapo Keresopoko some kape purakanapo. Asiamo isiapo some akara aeyaka Kotimo aporo hinamoaki some karakanapo. Asiamo isiapo some

karka, "Kereso repoko kusuasamo, repo Kotiaki yunuraka risiane metakarikia, Kotimo mafasirane hemakapukua Kotiaki tákera risikianie." Aíyaka isiapo some karakanapo. ²¹ Arirakano Kereso ipi ereketae susu reke, watikiaka rakisiafapo. Epo watikiaka rakianafonosa nine, isiapo watikisane epo maka, e watikisa pariraka, isupoko kusuapo. Isiapo Keresoaki kataka marekea risike, isu ereketae risikiasimo, Yasuane watikisa pariraka kukusimo Kotimo maresapo. Koti ereketae susu area ayíáka, isu ereketae risikiasimo epo hemakapukua maresapo.

6

"Kotimo hemakapukua yaku ararenane repo metakariakopo," aisane oyapo.

¹ Isiapo Kotiyaki hakása rakiraka risike, reaki paroaka somerakanapo. Kotimo re hemakapukua yaku ararenane, repo mosane hemakapuraka, "Makata ane nenakamaka makatareapo," aíyaka hemakapukupo. ² Fana Kotimo somerakano porofete aporomo kaikia popasane oyapo.

"Nōmo re yaku ararehokosa ikia karane ropakataesapo. Repo anoaki mafasisiesa maiya hakása yiamo nōmo re mafasisiapo. Asiamo nōmo reane ararehoasimo, repo anoaki wása maiya amo nōmo kaisiapo," aíyaka popahoareapo. *(Aisaia 49:8)*

Asiamo isuane Kotimo yaku ararehokosa ikia kara ropakataesane yaiya kakenapo. Mafasiakosapo aíyaka fana popasane, pipu yumo soko yaiya kakenapo.

Kotimo makata rakirane Poremo rakisiasamo aporomo eane mokoatikisane oyapo.

³ Repo isuaki someraka, "Repo watikiraka rakirakanapo," aihokohoamo, isiapo repoko rakiraka, ikia kara makata matasosakipoko terafaka arura ayíáka, terafaka rusimo, matasoraka arakira ayíáka, isiapo mokome some kaka rakirakanafapo.

⁴ Isu Kotimo aporo raipapo, aíyaka repo asekeha hemakapusimo, isuaki aporo metakiramo mokopipirakano, isiapo Kotiane metakirakanafapo. Isu Kotiyaki wakapuraka risikinapo. Wakapuraka risike isu mokoatikirakano soko, ⁵ rurakano soko, tipura kerakano soko, isuaki sapehoasimo kirimarakano soko, mawaforo marerakano soko, yaiya mekéraka risike, Kotipoko wakapuraka rakirakanapo. Rakiraka risike, waforosasamo ereamo wakanafonoraka, arirakano makata soko nanafonoraka himuraru ayíáka risike yia, isiapo Kotiane metakirakanafapo.

⁶ Arirakano isiapo ereketae hemakapukua risike, arirakano makata kepo koteaka hemakapukua risike, arirakano aporo metakiramo isu mokoatikirakano soko, isiapo sapehoanafonoraka risike, arirakano aporo hinamo metakira arareraka makoteraka risike, isu Kotimo aporo raipane isusasamo aporo metakiramo isuane asekeasimo, isiapo ayíáka koteaka susu rakiraka risikinapo. Asiamo Ho Kotesa isu himua risikirakano, aporo hinamo suane isiapo himu tumurumo hemakapurakanapo. ⁷ Kotimo kakaro someane isiapo some karáka risike, Kotimo wakapu amo isu ararerakano, isu koteaka risikinapo. Ereketae susu rerane asi tare asíapo. Hokono tumurumo maka, hokono kasakaimo soko maka area ayíáka, ereketae susu rerane maka rekenapo.

⁸ Arirakano aporo metakiramo isu makáraraka, arirakano aporo metakiramo isu mawakasemarakano. Arirakano aporo metakiramo isuaki someraka, "Re aporo kotesapo," airapo. Arirakano aporo metakiramo isuane hokomaka somerapo. Arirakano aporo metakiramo isuaki someraka, "Repo kotafe somerakae," airapo. Aisa nine isiapo namo kakaro susu somerapo. Aporo metakiramo isu mokoatikirakano yia, isiapo Kotimo kakaro someane metakirafaraka yaiya some karakanapo.

⁹ Arirakano aporo metakiramo isu asera nine isu aseraka makefenapo. Arirakano aporo metakiramo isu rusua kusuahonine, isu kusuafapo. Arirakano isu rurakano soko isu kusuafapo. ¹⁰ Arirakano aporo metakiramo isu mahisihoasimo rakirakano yia, isu seseraka risikinapo. Arirakano isu makata kemo faraka risike yia, mahimuraka yaiya rekeakosa makata kemoane aporoaki isiapo karápo. Arirakano isu makata kemo forokoa risike yia makata suane isiapo menapo.

¹¹ Korini aporo hinamo reo, isiapo reaki hufitaeraka somerakanapo. Isiapo re himu tumurumo hemakapukua re ararehoko hemakapurakanapo. ¹² Isiapo re ararehoko hemakapurane metakarirakanafapo. Asiane repo isuaki hemakapurane matasorareapo. Asiamo isina yia himu hakásaraka hemakapurakanafapo. ¹³ Isiapo soko reane ararehoko hemakapura yaiya, repo soko isuaki ararehoko hemakapunie. Aiyaka aporomo ipi hokosaki some akara ayíáka, nōmo reaki ayíáka some karakanapo.

“Keresoa paohoanafonosa aporo hinamoyaki hakāsa sarimaraka rakiakopo,” aisane oyapo.

¹⁴ Keresoa paosa aporo hinamoyaki, nena aporo hinamoyaki, hakāsa sarimaraka rakipe pukupo.* Arirakano makata kotesayaki makata watikisayaki sarimanafapo. Kepo hakásafapo. Arirakano faesayaki katosayaki sarimaraka hakāsa risirafapo. ¹⁵ Arirakano Keresope Satane tati sarimaraka hakāsa tákeraka risirafapo. Asiamo Keresoa paosa aporomo Keresoa paohoanafonosa aporo tati makata hemakapurane hakāsa ninesafapo.

¹⁶ Arirakano Kotimo apeane soko yatafu yakasa ho menane soko, tati hakāsa ninesafapo. Yaiya rera Kotimo apeane isu supo. Arirakano Kotimo somesane oyapo. “Re suane nōmo aporo hinamopo. Asiamo repo Kotiane anopo. Ano reyaki hakāsa rekeakosapo.” Aiyaka Kotimo somerakano popahoareapo. (*Wok Pris 26:12; Jeremaija 32:38; Esekiel 37:27*)

¹⁷ Arirakano maiya metamo Unihae Kotimo someraka, “Nena aporomo hemaka apura ayíáka repo hemakapukohoamo re fasikia risikianie. Fasikia risike ipu aina watikisane kekemahoanafonorakano, nōmo re pasimokoa karikia nakosapo.” (*Aisaia 52:11; Esekiel 20:41*)

¹⁸ Karikia nenaka nōmo reaki someraka, “Repo atane anopo nōmo aporo hokosane soko nōmo hinamo hokosane soko repo,” aihokosapo. Aiyaka Unihae Koti káramo somerakano popahoareapo. (*2 Samuel 7:14; 7:8*)

7

¹ Hameo, repo ata anosasamo Kotimo ayiakakosapo aisane aporo hinamo fana risiaki soko, isuaki soko somesapo. Asiamo isu kau mawatikinane soko, isu ho mokoatikinane soko isiapo metakarinie, airakaripo. Kotiaki namoraka risike makata watikisane kikisiraka koteaka susu rakiraka risikianie, airakaripo.

Poremo sesesane oyapo.

² Repo namina aporo tékeane hemaka apura ayíáka, isuane soko ayíáka hemakapunie. Isiapo reane mokoatikisafapo. Repo watikiaka rakismo isiapo reaki hokokasafapo. Repo makata meta isiapo hakimasafapo. ³ Nōmo sawi one poparaka nōmo reaki hukurukua someraka, “Re aporo watikirareapo,” airakanafapo. Fana nōmo reaki someraka, “Re nōmo kára hemakapurakanapo.” Aisane yaiya hemakapurakanapo. Ano akura maiya amo soko, nōmo re yaiya hemakapukusapo. Ano hitafe area maiya amo soko, reane hemakapurakanapo. ⁴ Nōmo reaki himu hakásaraka hemakapurakanapo. Asiamo reane nōmo aporo metakiraki kekereraka somerakanapo. Makata umisa fasereperakano isiapo reane hemakapukua sesenane komarukua risikinapo.

⁵ Fana Masetónia hauaka á isu pukua risia maiya amo, isu fenesafapo. Ape sumu á aporo watikiaka risia aporo yaki pekea isuaki sapemeraka mokoatikisapo. Mokoatikirakano asekea isiapo hemakapuraka, “Mayikanarakapo,” aiyaka isu himu faraka risiapo. ⁶ Asiamo aporo himu faraka risiane mapirahoasimo Kotimo kamenakaraka ararena ayíáka isuaki soko kamenakaraka araresapo. Kotimo araresa aeyaka Taetase isu risia perakano asekea kára sesesapo. ⁷ Taetase perakano isu seseraka, arirakano epo some kasane soko, isiapo kairaka kára sesesapo. Epo isuaki some kasane oyapo. Repo e masesesapo, airakasupo. Arirakano repo ano aseako seserakanapo, airakasupakae.

* ^{6:14:} Aporo tetámo makata ira paka puraka meta horopo meta kitake asia tati ira paka purafapo. Makata rakiakosakipoko aporo tetá tati siasa rakirapo. Aina ayíáka aporo tetá Keresoa paosa tati rakiane siahoasireapo.

Arirakano repo makata watikiaka rakisiane hisiraka metakarikia, arirakano ano patera aseako hemakapurakanapo, airakasupakae. Airakano nōmo kaikia kára sesesapo.

⁸ Fana re maropohoasimo nōmo reaki sawi poparaka makesapo. Poparaka makesane repo menoraka mahisisaporakano, nōmo kairaka fana sawi katuaka poparaka makeapo, aiyaka nōmo hemakapusuapo. Aiyaka wakasema nina, keseke efera hunia kaiyiáne, repo makata watikisane metakarikia Kotiaki himu hakásaraka hemakapukua risikinaporakano kairaka, ano seseripo. Katuaka poparaka makeapo aiyaka hemakapusuane, yumo aiyaka hemakapurakanafapo. ⁹ Re mahisiraka risikinaporakano nōmo kairaka, ano soko seseraka reafapo. Asiāne yumo ano seserakanapo. Nōmo sawi poparaka makesane repo aseraka mahisiraka kaýaraka hemakapusuapo. Mahisiraka kaýaraka hemakapurane Kotimo kaka, epo re yaku ararerakano, repo makata watikisane hufitaeraka metakarikia, efera hunia Kotiaki hemakapukua risikinaporakano nōmo kaikia kára seserakanapo. Asiamo repo watikiaka rakisiane maropohoasimo, nōmo sawi poparaka makesamo reane mokoatikisafapo. ¹⁰ Arirakano aporomo watikiaka rakirakano, kaýaraka hemakapurane ipi himua Kotimo mahemakapurapo. Asiamo aporoamo ipi hufitaeraka makata watikisane metakarikia, Kotiaki rekeako parirakano, Kotimo eane mafasiakosapo. Asiamo aporo metamo e maroposasamo epo mahisinafapo. Arirakano nena aporomo watikiaka rakirakano kaýaraka, hufitaeraka makata watikisane metakarianafonoraka aporoamo hauaka omo hemakapusuane kekemaraka rekeno, aporoane akuramo, Kotiyaki yaiya rekeakosafapo.

¹¹ Kotimo re ararerakano repo hemakapuraka katuaka rakiapo, aiyaka hemakapukua makata watikisane metakarisiapo. Metakarikia re kakaro koteaka risikiakosakipoko hemakapukua risikinapo. Aporo metamo re asekea hokorehokohoamo repo watikisane foaka metakarireapo. Repo makata watikisane asekea mahisiraka risiapo. Arirakano repo makata watikisane kárahokohoamo namoraka risiapo. Asiamo repo isuaki tákehoko hemakapukua risiapo. Repo ano hikumisi aseako hemakapukua, repo watikisane nōmo asekea maropohokosapo, aiyaka repo hemakapurakayiapo. Asiamo aporoamo makata watikiaka rakisiane repo maroporaka fanasisapo. Aporoane repo fanasisasamo makata watikisa amo kepoane fasapo. Asiamo makata watikisa ane repo maroporaka fasane kotehoareapo. ¹² Nōmo reaki sawi popasa amo kepoane oyapo. Kotimo reane himu tumurumo hemakapusuasamo makata aina watikisamo reane mokoatikirakano Kotimo mahisisapo. Asiamo makata watikisane metakarikia, makata aina kotesane kekemaraka rakismo, Kotimo hemakapurakanapo. Arirakano Koti hikumisia nōmo someane repo kaikia hemakapuraka risikiasimo, nōmo sawi ane popasapo. Asiamo aporo repo namina yia aporo yako meta mokoatikisapakano, eane maropohoasimo nōmo sawi ane popasapo.

¹³ Arirakano nōmo sawi popasane repo kekemaraka, repo isuaki yaiya hemakapukua risikinapo, aiyaka nōmo hemakapurakanapo. Asiamo isu seseraka risikinapo. Arirakano Taetase repo apea pesamo repo watikisane metakarirakano asekea, Taetase isu risia wo pekea, e himu nesane faraka perakano asekea isu soko kára seserakanapo. ¹⁴ Fana nōmo Taetaseaki reane kekereraka somesapo. Repo e masesesakipoko nōmo reane kekereraka ano kaiyarakanafapo. Ano reyaki rea maiya amo nōmo reaki someraka, “Re aporo kotesapo.” Aiyaka re nōmo kekeresane nōmo kakaro somesapo. ¹⁵ Arirakano yumo epo reaki kára seseraka hemakapurakanaporakae. Fana re fofaraka risike, e pasimaka epo some kasane kekemarakano, epo reaki kára seseraka hemakapurakanaporakae.

¹⁶ Asiamo nōmo hemakapuraka, “Repo Kotimo some kakimasane yaiya kakimaka risikiakosapo,” aiyaka nōmo hemakapurakanapo. Hemakapukua kára seseraka rekenapo.

¹ Maeo, nōmo some meta one soko, reaki some karakanapo. Keresoa paosa aporo Masetónia hauaka wo risiane Kotimo hemakapuraka ararerakano, ipu rakisiane yumo nōmo reaki poparakanapo. ² Arirakano makata umisa iaki kára fasereperakano, aporo metakiramo iane mokoatikirakano yia, ipu Kotiane metakarisafapo. Metakarianafonraka i makata forokoa risike yia, ipu himumo kakaro seseraka hemakapusua aeyaka, aporo hinamo metakirane arareraka mone kára karakasupo.

³ Mone kára kaka ipu mone kakakosapoko taesane soko karáka yia ipu namina mena taesane soko kima ripaka kára karakasupo. Namina hemakapukua ayíáka karakasupo. Ipu kasane nōmo asekea kakaro somerakaripo. ⁴ Arirakano ipu someraka, “Yutía hauaka á Kotimo aporo hinamo makata forokoa risiasamo isiapo iane ararehoko seseripo. Keresoa paosa aporo hinamo sése ape metakira á risiamó iane ararena ayíáka, isiapo soko ayíáka ararehoko seseripo. Asiamo isiapo mone sarimaraka Yutía aporo hinamoaki kakasimo néaki kakakosapo. Néaki karakano nōmo someraka, ‘Nōmo mokoakosafapo,’ aihokopo.” Aíyaka ipu anoaki aofiraka somerakasupo. Ipu arareraka mone kakako kakaro seserakanapo, airakasupo.

⁵ Airakano isiapo hemakapuraka, “Ipu mone kakakosapo.” Aíyaka hemakapusua nine ipu mone hákasa kasafapo. Mone kakasiraka risia maiya amo ipu someraka, “Isu isinane Unihae Kotiaki karakanapo.” Aíyaka efera hunia ipu someraka, “Kotimo someaka maresane Poremo isuaki somerakano isiapo rakiakosapo.” Aíyaka ipu kára seseraka somerakano kaikia, ipu kasá ayíáka repo soko ayíáka kakasimo nōmo hemakapurakaripo.

⁶ Asiamo repo taonea nōmo Taetaseane efera hunia pusierakanapo. Asiamo fana Taetase reyaki rea maiya amo, Yutía hauaka Keresoa paosa aporo hinamoane ararehokosakipoko, fana moneane epo kepomareke sarimasapo. Sarimasakipoko repo mone yaku kakakosane kaka fahoasimo repo taonea epo sarimahoasimo nōmo pusierakanapo. ⁷ Repo makata kára rakiraka risikinapo. Repo Kotiaki himu hakásaraka hemakapurakanapo. Arirakano Kotimo someane soko repo some karakanapo. Arirakano Kotimo some kepo suane repo hemakapurakanapo. Arirakano aporo metane repo ararehoko seserakanapo. Arirakano isuane soko repo kára hemakapurakanapo. Repo ayíáka koteaka rakirasamo repo mone akaramo kára kakasireapo.

⁸ Repo kakanie, aíyaka nōmo somerakanafapo. Asiāne aporo metakiramo seseraka mone kasapo, airakanapo. Aíyaka repo aporo metakiraki himu tumurumo hemakapurane nōmo asekeasimo, repo soko seseraka mone kakasimoripo. ⁹ Arirakano Unihae Yasu Keresomo isuane kára hemakapukua yaku ararenane repo hemakapunie. Makata su ipi mena nine makata suane ipi mahimurafaraka ipi isupoko hauaka wo peraka makata forokoa koraka reapo. E makata forokoa reke araresa aeyaka isu koteaka seseraka hemakapukua risikinapo.

¹⁰ Arirakano nōmo hemakapusuane oyapo. Fana Keremisi hakásá fasamo repo kepomareke mone sarimaraka risiane, yumo kaka fahoanie. Aporomo fana mone kakakosane someraka, “Isiapo aporo hinamo metakira ararehokosakipoko mone kakakosapo.” Aíyaka repo fana hemakapukua kasapo. ¹¹ Aíyáka kasane, yaiya karáka risikianie. Tipia metakariakopo. Mone metakira taesa tokenone, moneane mokoa kakanie. Repo namina kakako hemakapusuane kaka fahoanie. ¹² Repo mone suane Kotimo aserapo. Mone tokeno asekea parakuraka sape meta Kotiaki seseraka karakano, Kotimo asekea sesehokosapo. Arirakano metamo namo kakaro mone fasamo kakanafonorakano Kotimo sapehokosafapo.

¹³⁻¹⁴ Arirakano repo hemakapuraka, “Poremo aporo metakiraki someraka, ‘Yutía aporoane ararehoanie.’ Aíyaka somehoanafonoraka isuaki hákasa maiya suamo epo someraka, ‘Repo mone kakanie.’ Airakane mairakariakapo.” Aíyaka repo hemakapukupo. Reaki nōmo maumi marerakanafapo. Yumo repo mone kára tokeno asekea airakaripo. Tokeno, asekea aporo makata forokoa risiane repo ararehoafunupo. Ararerakano, keseke re soko makata forokoa arisia maiya amo, ipu soko re ararehokosapo.

Arirakano repo i ararerakano, ipu soko re ararehokosapo. Ayíáka repo namina yia ararerakano, re su siaraka risikiakosapo. ¹⁵ Arirakano aporo metakiramo aporo metakiraki araresane Kotimo sawia popasane oyapo.

“Makata nakosa kára mosa aporomo aporo metane arareraka karaka, kina taesafapo. Arirakano makata nakosa wakasema mosa aporoane soko meamosafapo,” aíyaka popa-hoareapo. ^(Kisim Bek 16:18)

Korini taonea Taetasepe aporo meta teta Poremo pusiesane oyapo.

¹⁶ Nōmo re ararehoko hemaka apura ayíáka Taetasemo reane ayíáka ararehoko hemakapurakanapo. Hemakapurane Kotimo Taetaseaki karakano nōmo Kotiaki suser-akanapo. ¹⁷ Arirakano nōmo Taetaseaki someraka, “Nōmo Korini aporo hinamoane ararehoko pusie.” Airakano epo someraka, “Ao. Ano pukusapo. Nōmo nī hemaka-pusuane soko i ararehoko seseripo. Ano seseraka pukusapo.”

¹⁸ Aíyaka epo seseraka somerakano, eyaki Keresoa paosa aporo mae hakása meta soko pusierakanapo. Arirakano aporo pusienamo Keresoa paosa aporoaki Yasuane hemakapusimo some kotesane some karakano, aporo suamo kairaka someraka, “Epo someane koteaka somerakae,” aíyaka Keresoa paosa aporo suamo somesapakae.

¹⁹ Somesa aporo hakasa yine e isuyaki pukua aporo metakiraki ararehoko mone sarimahokosakipoko Keresoa paosa aporomo soko e murikimasapo. Murikimarakanano aporo makata forosaki ararehoko mone mokoa sarimarakanapo. Sarimaraka aporo forosaki karakano aporo metakiramo aseraka Kotiane kekererakanapo. ²⁰ Arirakano aporo metakiramo someraka, “Mone kára sarimasane ipu hasaka parakuraka kasapo. Wakasema sapeane ipu hakimosapo.” Aíyaka ipu isuane hokorehokohoamo, moneane koteaka asekea risikiasimo, aporo metakira isuyaki hakása purakanapo. ²¹ Unihae Kotimo soko, aporo suamo soko, aseraka someraka, “Ipu mone siaraka asekea risikinapo.” Aihoasimo yumo isiapo koteaka asekea risikinapo.

²² Asiamo isiapo kakaro koteaka asekea risikiakosakipoko repo apea Keresoa paosa aporo mae hakása meta soko nōmo pusierakanapo. Eaki nōmo someraka, “Nōmo rakiako puane siahosireare?” Aihoane maiya suamo epo someraka, “Ao rakiakosapo.” Aíyaka epo seserakano nōmo asesapo. Yumo soko epo hemakapuraka, “Korini aporomo Keresoa paosa aporo Yutía hauaka risiaki mone kakakosapo.” Aíyaka epo himu hakásaraka hemakapukua, repo sése apea e seséraka purakanapo, airakae.

²³ Arirakano nōmo repoko arareraka arakira ayíáka, Taetasemo soko, repoko arareraka anoyaki hakása rakirakanapo. Arirakano Keresoa paosa aporo mae tetá eyaki hakása pukusane, Keresoa paosa aporo hinamomo murikimasapo. Murikimarakanano ipu raki-raka risike Keresomo yano motosa makárahokosapo. ²⁴ Aporo mone mokoako aperamo, repo himu tumurumo hemakapurane asekeasimo mone sarimaraka kakanie. Karakano ipu someraka, “Poremo Korini aporoane koteaka risikinapo, aisane kakarohoareapo,” aihoakosapo. Aíyaka Keresoa paosa aporo hinamo sese ape metakira risiamon soko aihoakosapo.

9

Keresoa paosa aporo hinamo Yutía hauaka makata forokoa risiane arareraka makata yaku kakanie, aisane oyapo.

¹ Yutía hauaka Keresoa paosa aporo hinamo risiane, repo arareraka mone kakakosasamo, nōmo reaki nena poparakanapo. ² Repo kakaro seseraka kakasireapo, aíyaka nōmo hemakapurakaripo. Asiamo ano Masetónia hauaka á apuramo, Masetónia aporoaki nōmo someraka, “Korini aporomo mone kakakosapo. Akaia* hauaka Keresoa paosa aporo risiamon keremisi hakása fasamo ipu kakakosapo, aisapo.” Aíyaka nōmo repo yano motosane kekereraka somehokosapo. Somehoane repo kakakosakipoko sesésane

* 9:2: Korini taoneane Akaia hauaka a kisiapo.

ipu kairaka, aporo yakai metakiramo soko someraka, “Isiapo mone kakakosapo,” airakasupo.

³ Airakano nōmo re kekereraka somesane kotafe horakanareapo. Airapaka, Keresoa paosa aporo mae Taetase iane, repo hauaka á nōmo pusierakanapo. Nōmo iaki someraka, “Korini aporomo moneane sarimasapo.” Airakano repo mone sarimasane ipu aseako pusierakanapo.

⁴ Keseke Masetónia aporo anoyaki, re risia á peraka aseane repo mone sarimahoanafonosekeno aseraka, ano kaýahoasireapo. Arirakano fana nōmo hemakapuraka, “Ipu mone kakakosapo,” aíyaka aporo metakiraki re yano motosa makáraraka somesasamo repo mone sarimahoanafonosekeno asekea ano kaýahoasireapo. Ano kaiýaraka re soko kaýahokosapo. ⁵ Anapaka nōmo Keresoa paosa aporo maeaki someraka, “Re fana pusie. Ano kesekeea peakosapo,” airakanapo. Asiamo repo mone kakakosaposane sarimahoasimo iane fana nōmo pusierakanapo. Repo namina hemakapukua seseraka yaku kayane soko siahoasireapo. Ano peraka nōmo reaki kakanie, airakano repo kayane siahoasifareapo.

⁶ Arirakano mone yaku karámo kepoane oyapo. Aporomo makata mano hukusi poterakano, wateane soko hukusi tumorapo. Arirakano aporomo makata mano yakai poterakano wateane soko yakai tumorapo. ⁷ Aina ayíáka repo mone kakakosane repo namina fana hakásá hakásaraka hemakapunie. Repo namina hemakapusua nine kekemaraka kakanie. Aporomo ipi hemakapuraka, “Nōmo mone kára kakakosapo.” Aíyaka hemakapukua mone kára kayane soko siahoasireapo. Arirakano aporo metamo hemakapuraka, “Nōmo mone wakasema kakakosapo.” Aíyaka hemakapukua mone wakasema kayane soko siahoasireapo. Aporo metamo ipi moneane aporo metamo kakanierakano, karáka himumo mahisiraka kayane siahoasifareapo. Aporomo ipi seseraka karakano Kotimo eaki seseraka hemakapurapo.

⁸ Kotimo reaki makata kotesa kára kakakosane Kotimo ipi siaraka rekenapo. Ipi hemakapukua ararenane enonosa kakenafapo. Asiamo ararenane epo reaki karakano, repo kakaro siaraka mokoa risikinapo. Kotimo ararenane siaraka mokoa risikino, re namina himuane soko, kauane soko makotehoasimo, Kotimo siaraka arareraka rekenapo. Arirakano makata rakira kotesa rakisimo Kotimo siaraka arareraka rekenapo.

⁹ Arirakano makata kára kará aporoane Kotimo sawia popasane oyapo.

“Aporomo makata mano potena ayíáka, aporo kotesamo aporo makata forosaki makata kára karápo. Asiamo aporo kotesamo makata rakira kotesane fahokosafapo.” Aíyaka popahoareapo.

(Buk Song 112:9)

¹⁰ Asiamo makata mano potehoasimo karáne soko Kotimo karápo. Makata nakosa nasimo karáne soko Kotimo karápo. Makata su akaramo kepoane Koti ipi hákasapo. Aina ayíáka repo aporo metakiraki makata kakasimo Kotimo reaki kakakosapo. Makata mano tanehekeea wate apera ayíáka, repo koteaka rakirane Kotimo makárahokosapo.

¹¹ Repo makata kára kakasimo Kotimo reaki makata kára kakakosapo. Karakano repo mone karáne isiapo mokoa aporo makata forosaki kakakosapo. Karakano repo i araresakipoko ipu Kotiaki kára susehokosapo. ¹² Asiamo repo makata akara aeyaka Kotimo aporo hinamo makata forosaki repo ararehokosapo. Repo makata karakano aporo yakaimo Kotiaki susehokosapo. Susehoane Kotimo yano motosane makárahokosapo.

¹³ Repo makata karakano Keresoa paosa aporo mae metakiramo soko aseakosapo. Aseane repo iaki soko, aporo metakiraki soko, makata kára yaku karakano asekea ipu someraka, “Mone kasá aporomo Unihae Kotiane seseraka hemaka apure. Arirakano Yasu Keresoane hemakapusimo some kasane ipu kakimaka arakire.” Aíyaka repo moneane iaki kasasamo ipu Kotiane makáraraka susehokosapo. ¹⁴ Susehoane Kotimo re kára hemakapukua araresasamo, ipu reaki kára seseraka hemakapukua, Kotimo re eféra hunia soko ararehoasimo kurikurihokosapo.

¹⁵ Arirakano Kotimo isuaki makata yaku kasá akipoko isiapo Kotiaki suserakanapo. Kotimo ipi hokosa Yasu Kereso isu ararehoko pusiesa, akipoko soko isiapo kára suserakanapo.

10

Aporo metakiramo Poreaki topaka maraka somerakanano Poremo someraka, “Kotimo ano murikimarakano nōmo Kotipoko ereketae rakirakanapo,” aisane oyapo.

¹ Repo hemakapusimo ano Poremo reaki somerakanapo. Yasu Keresomo aporoaki hemakapukua tau auaraka somesa ayíáka, nōmo soko re hemakapukua, repo kaiyisimo tau auaraka somerakanapo. Asiamo aporo metakiramo anoane topaka maraka someraka, “Isu hikumisia Poremo someana maiya amo epo tau somerapo. Arirakano e yamenoa reke isuaki me paroaka poparaka makerapo,” aíyaka somerakanapakae. ² Arirakano aporo metakiramo someraka, “Poremo hauaka wo makata rakirane kára hemakapukua rakirakanapo,” airakanapakae. Aíyaka somera aporoaki hikumisia nōmo me paroaka somehokosapo. Ano apera maiya amo nōmo reaki paroaka somerapaka, repo watikiaka somesane metakarinie.

³ Isu hauaka wo risike, Kotiaki yununa aporo akiyaki isiapo werakanapo. Asiāne isiapo awerane hauaka aporomo awera ayíáka werakanafapo. Satanemo menaki isiapo werakanapo. ⁴ Arirakano hauaka wo aporomo weraka, poke ira rokopa menane hokonomo rakikia mokoa aporoyaki werapo. Asiane hauaka omo menane isiapo mokoa werakanafapo. Arirakano Kotimo someane mawakasemana aporoane Kotiaki yununa aporo ayapo. Isiapo Kotiaki yununa aporo akiyaki werakanapo. Weraka isiapo Kotimo wakapuamo werakanapo. Asiamo isiapo Kotimo wakapuane mokoa aweramo Kotiaki yununa aporoane hurutapiakosapo. ⁵ Aporomo Kotiane kakaro hemakapukuhoamo aporo metakiramo namina yia makáraraka kotafe tafaraka somerapo. Asiamo ipu kotafe someane isiapo marutaenapo. Kotiaki yununa aporoane ikia hasaka purapo. Asiamo iane pasimokoakosakipoko Kotimo wakapuamo isiapo werakanapo. Asiamo isiapo Kotimo kakaro someane some karakanapo. Some karakano ipu kaikia risikiako pariraka Yasu Keresomo hemakapusuane kekemahokosapo. ⁶ Asiamo isiapo some kasane repo metakiramo kaikia kekemarakano yia, metakiramo kaikia koaretaerakano aporoane isiapo maroporaka fanasihokosapo.

⁷ Arirakano aporo metakiramo someraka, “Poreane tarira aporohoasimo Kotimo murikimasafapo.” Airakanone repo kairaka some ane koteaka takekea hemakapurakanafapo. Repo kepo hemakapunafonoraka makata kima susu aserakanapo. Arirakano aporo metamo someraka, “Yasu Keresomo makata rakisimo murikimasane anopo. Refapo.” Airakanone e soko Keresoa paoraka makata arakira ayíáka, isu soko Keresoa paoraka makata rakirapo. Aíyaka hemakapunie. Meraruhokopo. ⁸ Repo Kotiaki himu hakásaraka hemakapurane makárahoasimo, Kotimo ano murikimasapo. Ano murikimasasamo, ano níane kekereraka sikiraka somerakanapo. Aíyaka somerakane, ano níyia karekerakanafapo. Arirakano aporomo ape kikia mako arakira ayíáka, re ararehoasimo Unihae Kotimo ano murikimasapo. Aporomo ape marakaritaena ayíáka, reane marutaehoasimo ano murikimasafapo. ⁹ Asiamo nōmo reaki sawi popanamo re namohoasimo popanafapo.

¹⁰ Asiamo aporo metakiramo someraka, “Poremo sawi popanamo paroaka someaka popanapo. Asiane e peraka epo aporo hikumisi aseramo epo paroaka somerafapo.” Aíyaka kotafe somesapakae. ¹¹ Arirakano re yamenoa risiaki nōmo sawi popasane soko, ano pekea reyaki hakása risike, reaki some karane soko, hakása yinesapo. Nōmo sawia haku poparaka arirakano nōmo akaimo haku some ainafapo. Asiasamo ano hokomara aporoaki somehoanie.

¹² Aporo metakiramo ipu namina yano motosa makama fanaraka somerakanano, isiapo ayíáka somerafapo. Aporo akiyaki isina hakása ninesafapo. Aporoamo hauaka wo makata hemakapusuane kekemarakaka úyaka somerapo. Namina yia aporo hakása

metamo someraka, "Ano fanapo." Airakano yaiya aporo hakása metamo soko someraka, "Ano fanapo." Airakano yaiya aporo hakása metamo soko someraka, "Ano fanapo." Aíyaka namina tafatafaraka kakanakeraka someraka risirapo. Aporoamo hasaka hemakapukua risike tafatafaraka kakanakeraka somerapo. Aíyaka someramo siaraka risikiakosa kepoane hemakapunafonoraka risike aíyaka mokome somerapo.

¹³ Arirakano Kotimo isuaki makata rakiniesane isiaipo rakisiapo. Asiamo Kotimo isuaki someraka, "Hauaka á pusie, ape á pusie," aisa á isu pusuapo. Asiamo Kotimo isuaki makata rakisimo murikimasane isiaipo kekemarakaka rakisiapo. Kotimo somesane isiaipo marokesafapo. Asiamo isiaipo makata rakianafonosane isiaipo isina makáraraka reaki somehokosafapo. Asiāne repo taonea makata rakisimo Kotimo isu pusierakano isu pesapo. Pekea isiaipo namo kakaro koteaka rakisiapo. ¹⁴ Arirakano Kotimo ano tarira apororaka rakisimo murikimaka, repo taonea pusierakano ano pesapo. Asiamo repo Yasu Keresoane hemakapusimo ano fana pekea reaki some kotesa some karaka reapo. Asiamo re nōmo sia maropohokosapo. Arirakano aporomo someraka, "Nōmo Korini aporoane sia maropohokosafapo," aíyaka somerakano ipu someane kotafe somerakanapo. ¹⁵ Arirakano isiaipo makata rakisiane ipu kotafe someraka, "Isiaipo rakisiapo," aíyaka somerakano reane mahimetesapo. Asiamo aporo metamo rakisiane isiaipo aseraka kotafe someraka, "Isiaipo rakisiapo," aíyaka isiaipo somerafapo. Kotimo rakiniesane isiaipo rakisiapo, aíyaka kekereraka somerakanapo. Repo Kotiaki himu hakásaraka hemakapurane kárahoasimo isiaipo hemakapurakaripo. Arirakano repo aorakano isiaipo reyaki kára rakiako hemakapurakaripo.

¹⁶ Kára rakikia maka, hauaka meta á pukua aporo metakiraki some kakako pukusapo. Asiamo isu fana pukua some karakano, aporo metamo someane some kakanafonosa kawe kaiyakosapo. Asiamo aporo metamo some kakanafonosasamo, isiaipo fanaraka some kasasamo metamo isuaki kakanakeraka somehokosafapo.

¹⁷ Arirakano Kotimo sawia popasane oyapo. "Repo namina yia makata rakisiane kekerehokopo. Kotimo makata rakisiane kekerehoanie," aíyaka popahoareapo. (*Jeremaia 9:24*)

¹⁸ Arirakano aporomo ipi yia makáraraka kekererakano, ane siahoasifareapo. Arirakano Kotimo aporoane makáraraka kekererakano, ane siahoasireapo.

11

Poremo makata rakira akipe kotafe tarira aporomo makata rakira tati hakása ninesafapo, aisane oyapo.

¹ Repo anoaki someraka, "Ne himu rekenafareapo," aisapakae. Asiamo ano himu rekeanafonosa yiamo, nōmo reaki somerakanapo. Somerakano repo kaisie. ² Kotimo reane kara hemakapusuasamo aporo metamo someane repo kekemarakano, Koti himu kára nakosapo. Aina ayíáka ano soko himu nenakanapo. Keresomo re hinamo ayíáka arumakasimo, reane epo faisasamo nōmo re asekea rekenapo. Hinamomo aporo hakása apura ayíáka, re Kereso hákasa pusimo, reane nōmo asekea rekenapo. Asekea reke re ikia hinamonapaka nōmo asekea rekenapo.

³ Arirakano kuyaremo mahoperaka kotafe somesane Ifimo kakimasapo. Asia ayíáka aporo metamo some meta kotafe somerakano repo Yasu Keresoaki himu hakásaraka hemakapurane mahimeteraka, aporo metamo kotafe somerakano, someane repo kaki-makasireapo. Anapaka nōmo reane hemakapukua himu farakanapo. ⁴ Asiamo ano himu fána amo kepoane oyapo. Re himu tetaraka risike, sere metamo aporo metamo somerakano á kekemarakaka, sere metamo aporo metamo somerakano á kekemarakaka anapo. Fanā isiaipo reaki Yasuane some karakano isiaipo someane repo kakimasapo. Arirakano aporo meta peraka Yasuane some haku some karakano, aporoamo kotafe someane repo kakimakasireapo. Arirakano fanā Ho Kotesane repo masapo. Kotafe someane repo kekemarakano ho meta watikisane repo makasireapo. Arirakano fanā Keresoane repo hemakapusimo some kotesane isiaipo some karakano, repo kakimasapo.

Asiāne kepo meta hemakapusimo, aporo metamo some meta some karakano, repo yaiya kakimakasireapo. Repo takekea hemakapunafonoraka some metane seseraka kakimarakanapakae.

⁵ Arirakano some meta some kará aporoaki repo someraka, "Reane tarira apororeapo." Aíyaka iane makama fanaraka, ano makama kesekeraka somehoane siahoasifareapo. Ano mayireare? I fanaraka ano kesekefapo. ⁶ Asiamo nōmo akaimo fofóaka somerafapo. Nōmo masekeame somerapo. Asiāne some kepo suane nōmo hemakapurakanapo. Hemakapuraka repo suamo kaiyisimo makata kepo suane nōmo reaki some kasapo.

⁷ Arirakano Kotimo someane nōmo reaki some kasa akipoko, nōmo makata ropo masafapo. Makata ropo makosane metakarikia, re makotehoko aporo raipamo arakira ayiáka, ano ni makama kesekeraka yaku rakisiapo. Nōmo yaku rakisia amo reane makotesapo. Asiamo repo anoaki someraka, "Ne watikirareapo," aihokopo. ⁸ Re yaku ararehoko, Keresoa paosa aporo hauaka metakira risiamo ano mone karakano, nōmo mosapo. Repo ano kakafunusa nine, repo ano kakanafonorakano, asekea aporo metakiramo ano karakasupo. Repoko nōmo rakiraka reke ipu menane nōmo yaku mosapo. ⁹ Asiamo ano reyaki rea maiya amo nōmo mone fasokeno reaki someraka, "Ano makata nakosa kakanie," aisafapo. Repo hisihokohoamo Masetónia hauaka aeyaka aporo metakira pekea, ano mone karakano, nōmo mokoa makata nakosa roposapo. Repo anoaki mahisinapaka reaki nōmo makata umisa maresafapo. Repo mahisinapaka, "Repo ano makasie," aisafapo. Fana nōmo reaki makasie aihoanafonosasamo, keseke soko, nōmo reaki makasie aihokosafapo.

¹⁰ Yasu Keresomo ipi kakaro somera ayiáka, nōmo soko kakaro somerakanapo. Nōmo reaki someraka, "Makasie," aihoanafonosakipoko ano nī seseraka somerakanapo. Arirakano Akaia hauaka á aporo risiamo anoaki someraka, "Nōmo kotaferipo," aihokosafapo. ¹¹ Asiamo nōmo maíyaka somerakarire? Nōmo reane hemakapunafonoraka somerakarire? Wae, nōmo re kakaro seseraka hemakapuraka somerakaripo. Asiamo nōmo some kepoane Kotimo asekea hemakapurakanapo. ¹² Yumo repo mone nōmo mokoanafonona ayiáka, keseke soko nōmo mokoakosafapo. Arirakano kotafe tarira aporomo someraka, "Poremo rakira ayiáka, isiapo soko hakásá yineraka rakirakanapo." Aíyaka namina yia kekereraka somerapaka, repo moneane nōmo mokoakosafapo. Nōmo makata ropo mokoanafononasamo, ipu makata ropo mora akiyaki isina hakásá yinesafapo.

¹³ Re arisia aporo metakira peraka someraka, "Isu tarira aporopo," aisa aporoane namo kakaro tarira aporofapo. Iane kotafe tarira aporopo. Repo iane aseraka, namo kakaro Keresomo tarira apororeapo, aihoasimo ipu re mahoperaka kotafe rakirakanapo.

¹⁴ Arirakano aporoamo kotafe rakirakano ano fofarakanafapo. Satane ipi kau kima hákasane kotafe hepene aporo faesa pariraka rekeno aporomo aseraka someraka, "E hepene aporopo," airapo. ¹⁵ Satane kotafe hepene aporo pariraka area ayiáka, eaki patera asesa aporoane soko, kotafe aporo ereketaesa pariraka risikino, aporo hinamomo kotafe aporo ereketaesa parisane aseraka someraka, "Aporoane ereketaehoareapo," airapo. Kotafe aporo ereketaesa parisasamo keseke ipu namina makata rakisia yinaka makata ropo mokoakosapo.

Aporomo Pore mokoatikisane oyapo.

¹⁶ Fana nōmo reaki makata somesane efera hunia somerakanapo. Repo anoaki someraka, "Ne himu rekenafareapo," aisapakae. Aisa aporo repo, nōmo someane kaisie. Ano himu rekenapo. Arirakano kotafe tarira aporomo namina yia kekereraka somesapo. Asiamo yumo nōmo soko, ano nīane kekereraka somerakanapo. Asiamo nōmo someane repo kairaka, Pore himu rekenafareapo, airakano, nōmo kára hemakapukusafapo. ¹⁷ Unihae Kotimo anoaki someraka, "Nōmo nī kekereraka somehoanie," aisafapo. Aihoanafonosa nine ano nī yia kekereraka aporo himu rekeanafonosamo someana ayiáka nōmo somerakanapo.

¹⁸ Aporo metakiramo hauaka wo makata hemakapusua kekemaraka ipu namina makata rakira makárana ayíáka, nōmo soko ano nīane makáraraka kekereraka somerakanapo. ¹⁹ Repo makata kára enomaka hemakapurakayia, aporo himu hemakapura fasa kotafe tarira aporoane repo seseaka karikia risikinapo. ²⁰ Karikia hakāsa risikino, ipu reane aporo raipa mapariraka isupoko rakinie, airapo. Aíyaka repo makata nakosa soko, moneane soko, ipu morakanapakae. Ipu mahoperaka risike, matewaraka risike, re mawakasemaraka hikumisia fawaka rurakano yia repo i seseraka pasimokoa karikia hakāsa risikinapakae. ²¹ Ipu aina ayíáka isiapo ásiafapo. Isiapo re runafonoraka metakarirakasuane, isu re asekea namoraka airakasue? Wae. Isu namosafapo. Isiapo re runafonorakano aporomo aseraka someraka, “Pore ipi rorasapo,” airakanapakae. Ano nī kekereraka someraka aporo himu rekeanafonosamo somera ayíáka nōmo somerakanapo. Asiāne ipu namina kekereraka somesa ayíáka, nōmo soko, nī kekereraka somerakanapo.

²² Kotafe tarira aporomo ipu Hipuru meaka somerare? Ao, ipu Hipuru meaka somerasekeno, ane nōmo soko Hipuru meaka somerapo. Aporoane Isiraya aporore? Ao, i Isiraya aporsekeno, ane ano soko Isiraya aporopo. Aporoane Eparahamemo aporo irare? Ao, i Eparahamemo aporo irasekeno, ane ano soko Eparahamemo aporo irapo.

²³ Aporoane Keresomo aporo raipare? Keresomo aporo raipa fanaraka reane anopo. Ano nī kekereraka somenane aporo himu hemakapura fasamo somera ayíáka nōmo somerakanapo. Ipu rakisiane nōmo marokeraka nōmo namo kakaro kára rakisiapo. Arirakano yape yakai ano tipura makekea, arirakano yape yakai ano rukua mokoatikiraka kusuahopo.

²⁴ Arirakano Yu aporomo ano rusuane teti naene (39) ayíáka menoraka, yape kakoreasumo ayíáka saro kau terakaemo ano rusuapo. ²⁵ Arirakano yape isiamo Rome kamani aporomo ira faimo ano rusuapo. Arirakano yape hakásamo ekemo ano karesapo. Arirakano yape isiamo kasu sipia ano ripasane arosapo. Yape hakásamo kasu sipi arorakano ere hakása, sere hakása, ayíáka ano ira arosane maka, he tawara kima tapukureapo.

²⁶ Arirakano ano kimisi apura maiya amo makata káramo ano mokoatikinapo. He kára kukurupiraka perakano asekea, arirakano maiya metakiramo aporomo nōmo makata kemoane hakimokoakosakipoko ipu ano rukusakipoko risikino asesapo. Arirakano nōmo nī aporo ira Yu aporo yiama soko, ano rukusakipoko risikino asesapo. Arirakano Yu aporohoanafonosamo soko, ano mokoatikihokosakipoko risikino asesapo. Arirakano kotafe Keresoa paosa aporo maemo soko, ano mokoatikihokosakipoko risikino asesapo. Arirakano maiya metakiramo ano mokoatikirakano ape sumu metakira á soko, yaoa soko, he tawara soko, ano kusuahopo. ²⁷ Asiamo nōmo arakiramo wafororaka rakirapo. Ereamo wakanafonorakano soko, meamorakano soko, he narirakano soko, nōmo yaiya rakiraka reapo. Maiya metamo makata nakosane soko faraka kusuahopo. Arirakano ano pasu siahoanafonosasamo kára inuraka reapo.

²⁸ Ayíáka reke maiya suamo Keresoa paosa aporo hinamoane nōmo asekea reapo. Asekea reke nōmo hemakapuraka, “I siaraka risikinarakapo. I hasakaraka risikinarakapo.” Aíyaka kára hemakapukua rekenapo. ²⁹ Arirakano aporo metamo Keresoaki himu hakásaraka hemakapusuane paroaka rekeanafonorakano aseraka, aporoane nōmo kára hemakapurakanapo. Arirakano Keresoa paosa aporo metamo watikiaka rakisimo aporo metamo kirimarakanano aseraka, nōmo kára mahisiraka hemakapurakanapo. Nōmo kára rakikia, kára hemakapukua, ayíáka ano rekenapo.

³⁰ Ano nīane makáraraka somehoko hisirakanapo. Nōmo nī yano motosane makára-hoafunufapo. Asiāne aporo metakiramo namina yano motosane makárarakanano, nōmo soko nī yano motosane makárarakanapo. Asiamo anoaki makata fasere perakano nōmo nī wakapumo siahoasifasekeno asekea somerakanapo. ³¹ Kotiane ipi Unihae Yasumo Ata ane, maiya suamo isiapo kekererakanapo. Kotimo kairakano nōmo kotafe somerakanafapo. ³² Arirakano Tamásakase taonea ano rea maiya amo, tipura makeasimo

Aretase unihaeaka rea maiya amo, taoneane kamani aporo asekeea reamo aporo terakaiyamosaki someraka, "Ape ruru ikia koroa Pore purakarihoamo Pore waseremako asekeea risikianie." ³³ Airakano ipu asekeea risiapo. Asekeea risikino yia ano fefeneaku asiakipoko makekeaa ruru winito anaka metafirimakano metafirimakano hauaka atura motorakano ano takaripusuapo.

12

Kotafe tarira aporomo someane Poremo hurutapiasimo Kotimo Poreaki makata tarirakano Poremo somesane oyapo.

¹ Kotimo ano murikimasane repo hemakapusimo ano nīane kekereraka somehokosapo. Kekereraka someanamo ano nī makārahokosafapo. Nōmo kekereraka someanane nenakamaka somerakanapo. Asiamo nōmo kituamo Unihae Kotimo anoaki makata tarirakano, nōmo asesane reaki somerakanapo.

² Keremisi senakis (14) faraka, Keresoa paosa anoane hepene yapura Koti ipi rea hauaka á* Kotimo ano pasimaka hisiapo. Ano pasimarakano hisiane nōmo hemakapurakanapo. Ano ho hákasa hinaka soko metao, kauyaki hoyaki hakāsa hinaka soko metao, nōmo hemakapurakanafapo. Kotimo ipi hákasa hemakapurakanapo. ³ Arirakano anoane hepene yapura hisia amo, hepeneane yano motosa Párataese† á pasimarakano hisiane, ho hákasa hinaka soko metao, kauyaki hoyaki hakāsa hinaka soko metao, nōmo hemakapurakanafapo. Kotimo ipi hákasa hemakapurakanapo. ⁴ Ano hepene yapura pasimarakano hikia reke, hepene yapura makata kaikia ano peraka, hauaka wo nōmo murikimaka somehoasifapo. Hepene yapura namo kakaro haku kakenapo. Hauaka ukiyaki hepene yapura akiyaki murikimaka somehoasi kakenafapo. ⁵ Anoane hepene yapura pasimarakano hisiane nōmo somehokosapoko asiane nōmo ano nīane makāraraka somehokosafapo. Arirakano ano hauaka wo reke anoaki makata fasereperakano nōmo nī wakapu amo siahosasifasekeno makata ane repo kaiyisimo somerakanapo. ⁶ Nōmo nī yia kekereraka somesa satiki, aporo himu rekeanafonosamo somera ayíáka somehoafunufapo. Asiane nōmo somerakano ane kakaro somehokosapoko. Nōmo kakaro someraka nōmo ano nīane kekereraka somehokosapoko asiane, aporomo anoaki someraka, "Né aporo káraro." Airapaka nōmo ano nīane kekereraka somehokosafapo. Nōmo makata rakisiane soko aporomo asekeea, arirakano nōmo some kasane soko aporomo kaikia, asiamo nōmo ainane soko, nōmo rakirane soko ipu asekeea anoane hemakapukusapo. Asiamo ano nīane makāraraka somehokosafapo.

⁷ Arirakano Kotimo anoaki makata kára tarirakano nōmo asesapo. Nōmo asesasamo ano nī yia makāraraka rekeafunureapo. Asiāne ano nī makāraraka rekeakoahoamo ano kaua keta ásia‡ Kotimo kasá amo karesapo. Keta ásiane Satanemo aporo raipamo ano akarera ayíáka ketamo ano karerakano tesapo.

⁸ Ano teraka reke yape isiamo nōmo Kotiaki wáraka, "Keta asiamo ano akarerane metakarinie." ⁹ Airakano Kotimo anoaki someraka, "Nōmo neane hemakapukua yaku ararehokosa ane siapo. Asiamo né roraraka rekeno, nōmo wakapu amo né mawakapuhokosapo." Airakano ano roraraka reke yia, hisiraka rekenafapo. Ano rorasa nine seseraka rekenapo. Asiamo Keresomo wakapu anoyaki rekerakano kaikia, ano seseraka rekenapo.

¹⁰ Ano roraraka reke yia nōmo Keresopoko rakiraka reke, aporo metakiramo anoaki mainamarerakano soko, makata amo ano ayakarie, aíyaka mekeraka yaiya rakiraka rekenapo. Arirakano ano mokoatikirakano soko, Keresopoko nōmo yaiya rakiraka reke ano kusuahopo. Asiāne nōmo someraka, "Siapo," airakanapo. Asiamo ano roraraka rekeno, Keresomo ano ararenapo. Ararerakano ano wakapuaka rekenapo.

* 12:2: Hepene yapurane isiane Koti ipi rea ayapo, aisapakae. † 12:3: Hepene hauaka ane yano motosa Párataese, aíyaka somerane hauaka ane kotesapo. ‡ 12:7: Keta somesane isiapo kepoane hemakapurakanafapo. Asiāne isiapo hemakapuraka keta ane makata takamara ayareapo.

Poremo Korini aporo hinamoane kára hemakapusuane oyapo.

¹¹ Fana repo ano kekeremoafunusa nine repo ano kekeresafapo. Repo ano kekeremoafonarakano nōmo aporo himu rekeanafonosamo somehra ayíáka nōmo somerakanapo. Repo ano aporo wakasemaporakano yia, kotafe tarira aporoane repo makama fanasa amo ano marokesafapo. ¹² Tarira aporomo arakira ayíáka, nōmo makata rakirane Kotimo wakapuyaki rakirakanrepo aserakasupo. Tarira aporomo arakira ayíáka nōmo rakisiane oyapo. Kotimo ipi hemakapukua wakapu rakirane nōmo rakirakanrepo aseraka someraka, “Kotimo rakirane ayareapo,” aihoasimo nōmo rakisiapo. Tarira aporomo rakirane repo asekeasimo nōmo maiya káramo rakisiapo. Asiamo nōmo tarira apororaka rakisimo Kotimo ano murikimasane repo aserakasupo.

¹³ Arirakanrepo anoaki someraka, “Keresoa paosa aporo hinamo sése ape metakira árisiane nōmo makama fanaraka, isu makama kesekesapo.” Aisaporakane nōmo re mayíáka makama kesekesare? Nōmo iane araresa ayíáka, re soko ayíáka araresapo. Asiane repo moneane ano arareraka ano kasafapo. Repo moneane nōmo mokoanafonosane nōmo hasaka rakisiare? Repo saperaka hasaka hemakapusuane metakarinie.

¹⁴ Yumo yape isiamo repo apea ano peakosakipoko makata kemo sarikesapo. Ano peraka repo moneane nōmo makasie, aihokosafapo. Repo moneane nōmo makosapoko hemakapurakarifapo. Repo anoaki himu auaraka hemakapukua risikiasimo nōmo hemakapurakaripo. Arirakanrepo hokusamo ipi atape ipi ama tetápoko makata nakosa soko, pasu soko, karáfapo. Ipi atamo ipi hokosaki karápo. Aina ayíáka re nōmo hokosa asiasamo nōmo reane ararehoko hemakapurakanapo. ¹⁵ Repo atane anosasamo nōmo makata su reaki kakakosapo. Re nōmo arareraka makotehoko nōmo wakapumo repoko rakiakosapo. Nōmo re kára seseraka hemakapusuasamo, repo ano wakasema hemakapurukusare?

¹⁶ Repo moneane nōmo mosafapo. Aíyaka nōmo somesane repo kaikia kakarorakae, aisapo. Aisa nine repo isuaki someraka, “Poremo kotafe hokoa, isiapo aserapaka, mahoperaka tau hakimasapo.” ¹⁷ Airakanrepo nōmo reaki someraka, “Masinaka nōmo hakimosare? Nōmo pusiesa aporoane pekea ipu kotafe hokoa makata hakimosare? Anoaki makata yakapa kasare?” ¹⁸ Nōmo Taetase soko, Keresoa paosa aporo mae meta soko, repo sése apea pusiesapo. Pusierakanrepo Taetase repo sése apea peraka, tetapō makata meta hakimasafapo. Taetasemo hemaka apura ayíáka, nōmo soko, ayíáka hemakapurapo. Epo arakira ayíáka, nōmo soko, ayíáka rakirapo,” airakaripo.

¹⁹ Arirakanrepo hemakapuraka, “Isiapo Pore patera asekeasimo Poremo ipi yiamo makáraraka tafárraka somerakae.” Aíyaka repo hemakapurakanare? Repo aíyaka hemakapukupo. Hameo, Kotimo kairakanrepo Yasu Keresoaki katakamarekeasireane ararehokosakipoko somesapo.

²⁰ Ano peraka re koteaka risikino aseakoripo. Asiane re koteaka risike soko metao, watikiaka risike soko metao, mayíáka risikino asekeanarakapo. Arirakanrepo keseke ano peraka re aseramo, nōmo reaki mahisiraka soko metao, reaki seseraka soko metao, ano himeteripo. Arirakanrepo anoaki mahisiraka soko metao, seseraka soko metao, ano himeteripo. Ano aperamo nōmo aseane repo tafatafanane soko, kakanakenane soko, tapare sapenane soko, repo namina mena himu tumurumo hemakapurane soko, aporo meta mainamarerane soko, aporo metaki some koakamarekeasomerane soko, re namina makáraraka koaretaenane soko, hasakaraka mokome rakirane soko, repo yaiya rakiraka risikino nōmo asekeanarakapo. Asiamo repo ayíáka rakiraka risikinone ane metakarinie.

²¹ Ano aperamo aseane aporo metakiramo hinamo hakimorane soko, maiya suamo hinamo hakimokoako hemakapurane soko, repo yaiya rakiraka risike watikisane hufitaeraka rukupatehoanafonosekeno aseraka, repoko nōmo hiripuhokosapo. Repo asekeasimo repo watikisane Kotimo anoaki tarirakanrepo, ano kaíyahokosapo. Ano apera maiya amo ayikanarakapo.

13

“Repo makata watikiaka rakisiane maropohoanafonosekeno, ano aperamo re maropohokosapo,” aiyaka Poremo somesane oyapo.

¹ Fana yape tetá repo sése apea ano pesapo. Yumo soko, yape isiamo ano peakosakipoko, nōmo makata kemo sarikesapo. Arirakano Kotimo sawia popasane oyapo. “Hukuarura maiya amo aporoaki fanasihokosane motoakosakipoko, aporo tetámo asesa soko metao, aporo isiamo asesa soko metao, makata asesane hakásá nineraka somehoanie. Asesa aporomo hakásá nineraka somehoanafonorakano fanasihokosane metakarinie.” Aiyaka popahoareapo. (Lo 17:6)

² Fana ano yape tetá pesa maiya amo aporo watikiaka risiaki nōmo someraka, “Re watikiaka risikiakopo,” aiyaka nōmo somesapo. Yape tetá pesa maiya amo ayiakakopo, aisa ayiáka, yumo soko ano yamenoa reke, nōmo efera hunia somerakanapo. Nōmo someraka, “Ano apera maiya amo pekea aseane, aporo fana watikiaka risiane yaiya watikiaka risikino aseraka soko metao, aporo metakiramo kawe makata watikiaka rakiraka risikino aseraka soko metao, repo ayiáka rakiraka risikino re nōmo kamenakahokosafapo. Kamenakahoanafonoraka fanasihokosane soko metakariakosafapo. Kakaro fanasihokosapo.

³ Repo someraka, “Keresomo né aeyaka some karáka tiki some karakao, ane isiapo mayíáka hemakapukusare?” Aiyaka repo somerakane mairakare? Repo makata watikiaka rakirakano maropohokosakipoko Keresomo asekepayanafapo. Asiamo repo makata watikisane mafahokosakipoko, repo himua Keresomo wakapuaka rakirapo. ⁴ Arirakano fana Keresomo kauane wakapuhoanafonoraka, ira matopesa paremarerakano e kusuapo. E kusuane Kotimo wakapuane karakano, wakapu ane maka yaiya rekenapo. E wakapuhoanafonoraka rea ayiáka, isu soko wakapuhoanafonoraka risikinapo. Asiāne Kotimo wakapuane Yasuaki karakano, wakapu ane epo maka area ayiáka, isiapo soko Kotimo wakapuane maka, wakapuaka risike re maropohokosapo.

⁵ Arirakano re namina hakásaraka himua fana koanie. Kokoa someraka, “Ano Kotiaki kakaro himu hakásaraka rekenare? O, Kotiaki himu hakásaraka rekenafare?” Aiyaka repo namina himua kokoa hemakapunie. Repo namina hakásaraka someraka, “Yasu Kereso ano himua rekenapo,” aiyaka somehoasimo nōmo hemakapurakaripo. Repo Yasuaki himu hakásaraka hemakapunafonosekenone, e re himua rekenafapo. Rekeanafonorakanone, re siaraka risikinafapo. ⁶ Asiamo repo anoane someraka, “Poremo Yasuaki himu hakásaraka hemakapukua rekenapo. Asiamo e siaraka rekenapo.” Aiyaka repo somehoasimo nōmo hemakapurakaripo.

⁷ Arirakano repo watikiaka rakiakohoamo isiapo repoko farimaka kurikurirakanapo. Repo watikiaka rakianafonorakano aporo metakiramo asekeea isuane makáraraka someraka, “Pore ipu koteaka rakisiapo,” aihoasimo repoko kurikurirakanafapo. Aporomo isuane makáraraka soko metao, makárahoanafonoraka soko metao, isiapo repoko farimaka Kotiaki kurikurirakanapo. Re ereketae koteaka risikiasimo isiapo hemakapurakaripo. Asiamo isiapo repoko farimaka kurikurianane kepo akipoko kurikurirakanapo.

⁸ Arirakano re ereketae koteaka risike Kotimo kakaro someane kekemarakanone, isiapo reane maropohokosafapo. Kakaro someane isiapo rakikia rosaka taehokosakipoko rakirakanapo. ⁹ Arirakano aporo metakiramo ano hokomaka someraka, “Poreane wakapuaka rekenafapo.” Airakano yia ano wakapuaka rekenapo. Re namina Keresosane paroaka risikino, ano seseraka rekenapo. Asiamo nōmo re maropohokosane kepo makipoko maropohokosare? Nōmo re maropohoasifareapo. Asiamo re namo kakaro koteaka risiakiasimo nōmo re farimaka kurikurirakanapo.

¹⁰ Arirakano Unihae Kotimo ipi makata rakirane rakisimo, ano murikimasapo. Murikimaka epo wakapuane anoaki kasapo. Asiamo Kotimo wakapuamo nōmo reane ararehoko hemakapurakaripo. Kotimo wakapuamo nōmo reane maroporaka fanasihoko hemakapurakarifapo. Asiamo pipu yumo ano yameno aeyaka reke, nōmo reaki sawi poparakanapo. Ano apera maiya amo, re nōmo kára fanasinapaka, fana reaki sawi

poparaka makerakanapo. Asiāne repo makata watikisane maropohoanafonosekeno, nōmo wakapuyaki re maroporaka fanasihokosapo.

Poremo ayapasane oyapo.

¹¹ Keresoa paosa aporo maeo, nōmo some yiyo. Reaki nōmo ayaparakanapo. Repo namina Keresosane koteaka risikiako makata watikisamo reane kirimanapaka koteaka wakapuaka asekea risikianie. Nōmo someane kakimaka risikianie. Re namina yia himu hakásaraka risikianie. Arirakano aporo metaki tau auaraka risikianie. Arirakano aporo meta himu tumurumo hemakapuramo kepoane soko, auaraka risiramo kepoane soko, Koti ipipo. Ipi reyaki rekeasimo nōmo hemakapurakaripo.

¹² Keresoa paosa mae papa repo namina yia hokono mokoanie. ¹³ Keresoa paosa aporo hinamo suamo reaki hemakapurakaripo airapakae.

¹⁴ Unihae Yasu Keresomo re su yaku ararenane soko, arirakano Kotimo re suaki seseraka hemakapurane soko, arirakano Ho Kotesane soko re su himua risikiasimo nōmo hemakapurakaripo.

Karesia

Karesia sawi one mahemakapukusa someane oyapo.

Sawi one Keresoa paosa aporo hinamo Karesia hauaka á risiaki Poremo poparaka makesapo. Fana Karesia hauaka á Pore kimisi puraka, aporo hinamomo Yasuane hemakapusimo some kasapo. Karesia hauaka á ape sumu metakira Anitioke taonea soko, Aikoniame apea soko, Risitara apea soko, Tepe apea soko Yasuane Poremo some kasapo.

Karesia aporo ane Yu aporohoanafonoraka risia nine Yasuaki himu hakásaraka hemakapukua Keresoa paosapo.

Poremo someraka, “Keresoa paohoasimo, Yasu Keresoaki himu hakásaraka hemakapukua risikianie,” aisapo. Asiamo Karesia aporoane Yu aporohoanafonosa nine Keresoa paohoareapo. Keseke Pore pusuakipoko Yu aporo metakira pekea someraka, “Re Keresoa paosa aporomo Mosesemo somemané ane kekemaraka, kau hahaeraka patehoaniesane, kekemahoanie.” Áiyaka kotafe some akaramo Poremo somesane mawakasemasapo. Asikipoko Poremo saperaka, aporoamo kotafe some karakano kaisiane, maropohoasimo Poremo sawi one poparaka makesapo.

Karesia sawia some kepo parakuraka popasane oyapo.

1:1-5 Sawi poparaka kepo marekea popasane oyapo.

1:6-2:21 Poreane Tarira aporohoasimo Kotimo murikimasapo. Aporomo kotafe some karakano, kotafe some akarane kakimaka kekemahokopo.

3:1-4:31 Kotiyaki yaiya risikiakosakipoko Yasu Keresoaki himu hakásaraka hemakapunie. Kaumo hemakapukua rakira somemané ane kekemahoane siahoasifareapo.

5:1-6:10 Kaumo hemakapura akipe Ho Kotesamo hemakapura tati kakanakeraka yunuraka risikinapo.

6:11-18 Poremo aíyaka someaka faraka ayapasapo.

Keresoa paosa aporo hinamo Karesia hauaka á risiaki Poremo sawi poparaka makesane oyapo.

¹⁻² Yasu Keresoa paosa aporo hinamo re su Karesia hauaka á ape sumu sua risiaki ano Poremo sawi one poparaka makerakanapo. Arirakano Yasu Keresoane some kakasimo Kotimo ano tarira apororaka rakiraka rekeasimo murikimasapo. Kotimo ano murikimasane repo hemakapusimo nōmo somerakanapo. Epo makata rakirane rakisimo aporo metamo soko metao, aporo yakaimo soko metao ano murikimasafapo. Yasu Keresope ipi Ata Koti tetapō ano murikimaka tarira apororaka rakirane nōmo rakisimo ano murikimasapo. Arirakano ano murikimasa Koti amo Yasu kusuane maturikia taesapo. Arirakano nōmo soko, Keresoa paosa aporo mae anoyaki hakāsa risiamo soko, isiapo suamo reane hemakapurakanapo.

³ Arirakano isiapo Ata Kotimo soko, isiapo Unihae Yasu Keresomo soko, re hemakapukua ararerakano, re auaraka risikiasimo isiapo hemakapurakaripo. ⁴ Isiapo Ata Kotimo hemakapusuane Yasumo kekemaraka rakisiapo. Kekemaraka rakiraka, isiapo makata watikisane mafahokosakipoko Yasu isupoko farimaka kusuapo. Arirakano maiya yumo hauaka wo makata watikisamo isu kirimaraka mokoatikihokohoamo isu mafasiakosakipoko Yasuane kusuapo. ⁵ Atamo repoko wakapuaka rakisiasamo isiapo maiya suamo Ataki kekereraka risikiakoripo. Kakaroripo.

Yasuane hemakapuraka Keresoa paohoasimo some kotesa hakása yine kayane oyapo.

⁶ Keresomo re kamenakaraka ararena aeyaka Kotimo re murikimaka peaesapo. Murikimaka peesa nine Keresoa paosane repo foakayia metakarireapo. Asiamo repo metakarisikino ano fofaripo. Repo Yasuane hemakapusakipoko some metane repo kekemahoareapo. ⁷ Asiane Yasuane hemakapusakipoko some kotesa hakása yine kakenapo. Some kotesa meta haku kakenafapo. Kakanafonosa nine repo some meta kakimakasimo aporo metakiramo kakaro some kotesane sanasiraka some meta haku

some karaka, réane ipu kirimarakanapo. Kirimaraka repo Yasuaki hemakapusuane ipu mokoatikirakanapo.

⁸ Fana some kotesa nōmo reaki some karakasuane, kakaro someane some kasapo. Asiane isiapo tarira aporoane hakāsa metamo soko metao, hepene aporomo soko metao, keseke, some kotesa sanasiraka, some meta haku some karakanone, aporoane Heao hauaka á Kotimo fanasihoko motoakosapo. ⁹ Fana isiapo reaki some one some karakasuane, efera hunia soko, some one reaki paroaka some karakanapo. Yasu Keresoyaki hakāsa yia risikiasimo some kotesa repo kakimasakipoko some meta haku aporo metamo reaki some karakanone, aporoane Heao hauaka á Kotimo fanasihoko motoakosapo.

¹⁰ Aporomo anoaki sesehoasimo nōmo some karakanare? Wae. Kotimo anoaki sesehoasimo nōmo some karakanapo. Aporomo ano aseraka sesehoasimo nōmo ayiáka some karakanafapo. Aporomo anoaki sesehoasimo rakisia satiki, ane, ano Keresomo aporo raipa rekeafunufapo. Asiane ano Keresomo aporo raipapo.

Ano tarira aporo rekeasimo murikimasane oyapo.

¹¹ Maeo, kaisie. Some one nōmo kakaro somerakanapo. Yasuane hemakapusimo some kotesa nōmo reaki some karakasuane aporomo somefapo. Kotimo somepo. ¹² Some kotesa ane aporo metamo anoaki somesa ayafapo. Aporo metamo kaisiamo anoaki somesafapo. Yasu Kereso ipi hakásamo anoaki tarirakano asekea, nōmo reaki some karakanapo.

¹³ Arirakano wate fana Yu aporo sisimamo somemaneane nōmo kekemasa maiya amo, nōmo ainane repo kaisiapo. Aporo hinamo Keresoa paoraka risiane maiya suamo nōmo mokoatikiraka reapo. ¹⁴ Yu aporo sisimamo somemaneane nōmo kakimaka, kakaro kára kakimaka kekemasapo. Kekemaraka aporo metakira isina hakāsa hokono murisiane, nōmo makama kesekeasapo.

¹⁵ Arirakano ano hokono mareasiraka, ano keseke Yasuaki rekeako parihokosane Kotimo fana hemakapukua reasusupo. Hemakapukua reasasamo epo anoane kamenakaraka arareraka, epo makata rakirane rakismo ano murikimasapo. ¹⁶ Kotimo ipi hemakapukua murikimaka, re Yu aporohoanafonusaki nōmo Yasuane some kakasimo, ipi hokosa Yasuane anoaki tarisiapo. Tarisiane aporo metaki nōmo kaikia haēsafapo.

¹⁷ Yarusarame sitia tarira aporo fana murikimasa iaki soko nōmo kaiyako hisiafapo. Arirakano fana ano Arépea* hauaka á pukua, nina, Arépea hauaka aeyaka, keseke Tamásakase taonea pariperaka, ereketaeraka paripesapo. ¹⁸ Keremisi isia faraka, ano Yarusarame sitia Pita aseako hinaka, sokō tetámo eyaki hakāsa waka reapo. ¹⁹ Waka reke, tarira aporo metakirane nōmo asesafapo. Unihae Yasumo ipi mamanea Yameseane hakāsa nōmo asesapo.

²⁰ Nōmo sawi popana one kakaro poparakanapo. Kotimo ano aserakano nōmo kotafe poparakanafapo. ²¹ Arirakano Yarusarame sitiane metakarikia Siria hauaka á soko, Sirisia hauaka á soko, nōmo some kakako pusuapo. ²² Nōmo some kakako pusua maiya amo, Yutía hauaka á ape metakira Keresoa paosa aporo hinamo sarimasa amo ano hikumisi asesafapo. ²³ Asekeanafonosa nine aporo metakiramo anoane somerakanano ipu kaisiapo. Kaisiane metakiramo someraka, “Isu mokoatikirakasu aporoane, yumo Keresoa paoraka rekenapakae. Keresomo someane marutaehokosakipoko rakirakasu aporoamo, yumo Keresomo someane some karakanapakae.” Airakano Keresoa paosa aporo hinamo Yutía hauaka á risiamo kaisiapo.

²⁴ Asiamo ano Yasuaki rekeako parisapakano ipu kaikia Kotiaki kekeresapo.

Yarusarame sitia Pore hisiane oyapo.

* 1:17: Arépea hauaka á amano risikianafonoraka yao kauanesapo.

¹ Keremisi senakisu (14) faraka, Pánapase eto efera hunia Yarusarame sitia hinaka, Taetase soko etapo karikia hisiapo. ² Hisiane Kotimo anoaki, "Ne hinie," aisasamo ano hisiapo. Kotimo anoaki hinierakano, hinaka, fana sésea aporo fanaraka asekea risia aporo akiyaki hakāsa nōmo somesapo. Ipu someraka, "Poremo hasaka some karakanareapo," airapaka iaki nōmo kakama somesapo. Yu aporohoanafonosamo Yasuane hemakapusimo some kotesane, nōmo some karáne iaki somesapo. ³ Arirakano Taetase anoyaki pesane, ipi Kiriki* aporo rea nine ipu asekea, aporo metakiramo hemakapuraka, "Taetase kau hahaeraka patehoafunupo." Aíyaka aporo metakiramo hemakapusua nine, sese aporo fanaraka risiamo nōmo someane patera asekea kekemasapo. Asiamo ipu hemakapusuane rukupateraka, Taetase kau hahaeraka patehokosane metakarisiapo. ⁴ Arirakano aporo metakiramo Yu aporomo somemane paroaka keke-masa aporoamo, tau maserapi pekea, isuyaki hakāsa sarimasapo. Sarimaraka, aporoamo someraka, "Isu kakaro Keresoa paosa aporopo," aíyaka ipu kotafe someraka isuyaki hakāsa sarimasapo. Sarimaraka hemakapuraka, "Marirakano kakaro Keresoa paosa aporomo Yu aporomo somemaneane kekemarakanafare?" aíyaka hemakapusuapo. Arirakano isu tipura makesa asekea area ayíáka, Yu aporomo somemanemo isuane ayíáka asekea risiapo. Asiane Yasu Keresomo isu tonotaesapo. Tonotaesa nine kotafe Keresoa paosa aporomo isu efera hunia tipura makeasimo aina ayíáka asiapo. ⁵ Arirakano re Yu aporohoanafonosamo Yasuane hemakapusakipoko some kotesa amo namo kepoane yaiya kairaka risikiasimo nōmo asekea reapo. Asekea reasasamo ipu someraka, "Kau hahaeraka patehoanie," aisa nine nōmo kakimaka aosafapo. Ipu someane isiapo wakasema soko kekemasafapo.

⁶ Asiamo Yarusarame sitia aporo sarimasane, sése aporo fanaraka risiane nōmo reaki somerakanapo. Repo metakiramo hemakapuraka, "Aporoane aporo fanaraka risiki-napo," aíyaka hemakapuraka yia, iane aporo fanaraka risiane soko metao, aporo wakase-maraka risiane soko metao, nōmo hemakapuraka, "Ane nenakamaka makatareapo," aíyaka hemakapurakano Kotimo soko hakāsa yine hemakapurapo. Arirakano aporo fanaraka risiane Kotimo hikumisia nenakamaka makata asiapo. Yasuane hemakapusimo some kotesa nōmo some kasane Yarusarame sitia aporo sarimasamo kaisiapo. Kairakano sese aporo fanaraka risiamo, nōmo someane ipu hemakapuraka, "Someane siareapo," aisasamo nōmo some akiyaki ipu some meta paoraka some kasafapo.

⁷ Arirakano tarira aporomo hemakapuraka, "Yu aporomo Yasuane hemakapusimo, some kotesane some kakasimo Kotimo Pitane murikimasapo. Murikimasa ayíáka Yu aporohoanafonosamo Yasuane hemakapusimo, some kotesane some kakasimo Kotimo Poreane murikimasapo." Aíyaka tarira aporomo hemakapusuapo. ⁸ Asiamo Pitamo Yu aporoaki tarikia rakisimo Kotimo Pitane murikimasapo. Arirakano nōmo Yu aporohoanafonosaki tarikia rakisimo Koti hakāsa yiamo anoane soko murikimasapo.

⁹ Asiamo tarira aporo fanaraka risiane, Yamese, Pita, Yone, ipu aseane, nōmo rakisimo Kotimo ano hemakapukua arareraka murikimasekeno asekea, ipu ano soko, Pánapase soko eto hokono mosapo. Isina makata hakāsa rakirasamo isina hokono mosapo. Hokono mokoa, ipu someraka, "Isiapo Yu aporoaki some karakano, tetápo Yu aporohoanafonosaki some kakanie. ¹⁰ Some karaka yia, Yu aporo Keresoa paosa aporo makata forokoa risiane ararehoanie." Airakano nōmo soko hakāsa yine hemakapuraka aosapo.

Anitioke taonea Pitamo hasaka rakisekeno Poremo eane maroporaka somesane oyapo.

¹¹ Keseke Anitioke taonea Pita pesa maiya amo epo hasaka rakisiasamo, ipi hikumisia nōmo someraka, "Nómo hasaka arakire," aisapo. ¹² Aisa amo kepoane oyapo. Fana Pitamo Yu aporohoanafonosayaki hakāsa toke, makata nesapo. Makata hakāsa nesa nine, Yamesemo aporo táké perakano asekea, Yu aporohoanafonosayaki Pitamo hakāsa toke makata nesane metakarisiapo. Metakarikia iane fasikia reapo. Aporo pesamo

* 2:3: Kiriki aporoane Yu aporofapo. Yu aporohoanafonosamo namina kau hahaeraka patenafapo.

Yu aporomo somemaneane kekemaraka, “Kau hahaeraka patehoanie,” aisa aporoamo aserapaka, Pitane fasikia Yu aporoyaki reapo. Aporoamo someraka, “Yu aporo Yu aporo hoanafonosayaki hakāsa tokoakopo.” Aisasamo Pita ipi himu tetáraka hemakapukua fasikia reapo.

¹³ Yu aporo metakiramo soko himumo namoraka risiamo, Pitane aseraka, ipi ainane kekemaraka, Yu aporo hoanafonosane makeferaka fasikia risiapo. Pánapasemo soko ipu ainane asekeea, ipi soko Yu aporo hoanafonosane makeferaka fasikia reapo. ¹⁴ Fasikia risike ipu Yasuane hemakapusimo some kotesamo kakaro kepoane kekemahoanafonrakano asekeea, nōmo Pitaki kakama aporo suamo kaiyisimo nōmo someraka, “Né Yu aporo nine, nōmo Koti hemakapunafonosa aporomo aina ayíáka nōmo ayiane. Asiamo Yu aporomo ainane Yu aporo hoanafonosamo murikimakasimo nōmo tariane siahoasifareapo.” Aíyaka Pitane nōmo maroporaka somesapo.

Some kotesamo kakaro kepoane oyapo.

¹⁵ Isu hokono murisia maiya amo isu Yu aporo hokono murisiapo. Yu aporoaki Kotimo ipi somemaneane some kakasimo Kotimo isuane murikimasapo. Murikimarakan, Yu aporomo uyaka hemakapusuapo. Yu aporomo somemaneane Yu aporo hoanafonosamo kekemahoanafonoraka, ipu watikiaka rakiraka risikinapo, aíyaka isiapo Yu aporomo hemakapurapo. ¹⁶ Isu Yu aporo yiamo Yu aporomo somemane kekemaraka rakiraka risikino isuaki Kotimo someraka, “Re aporo ereketaesapo. Re siareapo,” airafapo. Asiane aporomo Yasu Keresoaki himu hakásaraka hemakapukua risikino aporoaki Kotimo someraka, “Re siareapo. Re aporo ereketaesapo,” airapo. Isu Yu aporomo soko, re Yu aporo hoanafonosamo soko, isina suamo Yasu Kereso hákasaki himu hakásaraka hemakapureapo. Yasu Keresoaki himu hakásaraka hemakapura aporoaki Kotimo someraka, “Re siareapo. Re aporo ereketaesapo,” airapo. Yu aporomo somemaneane hákasa aporomo kekemasasamo Kotimo someraka, “Re siareapo. Re aporo ereketaesapo,” airafapo. Somemaneane hákasa kekemaraka rakira aporoaki Kotimo someraka, “Re siareapo. Re aporo ereketaesapo,” aíyaka somerane kakenafapo. ¹⁷ Arirakano isu Yu aporo Keresoa paoraka risiamo Yasu Keresoaki himu hakásaraka hemakapuraka, Yu aporomo somemane kekemanane metakarisiapo. Asiamo Yu aporo metakira Keresoa paohoanafonosamo isuane aseraka someraka, “Re Yu aporomo somemane kekemahoanafonosasamo, re Yu aporo hoanafonosa asiapo. Re aporo watikisapo.” Airakano isuane Yasu Keresomo mawatikisare? Wae, aíyaka somehokopo. Someane aporo masuasamo somera ayíáka somerakae.

¹⁸ Arirakano ano Yu aporo reamo Yasuaki himu hakásaraka hemakapuraka, Yu aporomo somemaneane kekemasane nōmo metakarisiapo. Metakarisiane efera hunia Yu aporomo somemaneane kekemarakanone, ano aporo watikihoareapo, aihokosapo. Nōmo some one kepoane yakapare? Somemane suane aporo hakása metamo epo ipi wakapuamo kekemahoane siahoasifareapo. Epo somemane meta koaretaeraka fasikia kekemahokosapo. Nōmo soko nōmo wakapuamo Kotimo somemaneane kekemaraka, somemane metane koaretaeraka fasikia rekeakosapo. Arirakano somemanemo someraka, “Aporomo somemane metane koaretaeraka, e watikiaka reke, eane makukusapo,” aíyaka somesapo. ¹⁹ Arirakano nōmo Kotimo somemane kekemaraka somemaneane koaretaerakano, somemaneamo ano hukururaka ano kusua asiapo. Asiane Yasumo ano farimaka kusuapo. Yasu Kereso ira matopesa paremarerakano kusua ayíáka ano eyaki hakasa kusuapo. ²⁰ Asiamo yumo somemaneamo ano hukurunafonosasamo ano tonotaesa asiapo. Arirakano Yasu Kereso kusua maturikia taesa ayíáka, ano ayíáka maturikia taesasamo, hitaferaka rerane nōmo masapo. Keresoane ano tua reasasamo ipi rerane nōmo maka rekenapo. Ano nī rerane maka rekenafapo. Kusuane maturikia taesasamo ano nī rera ayíáka rekenafapo. Ano kau hitaferaka reke, Kotimo hokosa Yasu Keresoaki nōmo himu hakásaraka hemakapukua rekenapo. Kotimo hokosamo anoane himu tumurumo hemakapuraka ipi kau hitaferaka rerane anopoko farimaka api kasápo. ²¹ Kotimo ano kamenakarakaka araresane nōmo metakirakanafapo. Aporomo Kotimo

somemanane kekemarakano, Kotimo somemanamo isu maereketaesa satiki, Yasu ne-nakamakayia kukufunureapo. Asiane somemanemo isu maereketaehoanafonosasamo, Yasumo isu maereketaehoko kureapo.

3

Koti hikumisia re ereketaeraka risike ainane kepoane oyapo.

¹ Aporo metakiramo reaki kotafe somerakano repo some ane kakimasapo. Kakimaraka repo koteaka hemakapurane takekeha hemakapurafareapo. Marirakano kotafe some ane kakimasare? Yasu ira matopesa paremarekeha rusua kusuane nōmo reaki someaka fasapo. Somerakano repo suamo kaisiapo. Kotafe someane epamo reaki hokokarakasare?

² Makata meta nōmo reaki kairakanapo. Kotimo somemanane repo kekemaraka rakisiakipoko, Kotimo reaki Ho Kotesa kasáre? Wae, akipoko kasáfapo. Yasuane hemakapusimo some kotesa karakasuane repo kakimasakipoko, Kotimo reaki Ho Kotesa kasáre? Ao, akipoko kasápo. ³ Fana some kotesane repo kepomarekeha kaisia maiya amo, Ho Kotesamo araresane repo maka rakiraka risiapo. Yumo rakikia makoana maiya amo Ho Kotesamo makata araresane repo metakarikia kaum hemakapusua kekemaraka rakiraka risikiakosare? Asiamo yumo repo mariraka toke hasakaraka hemakapurakanare? ⁴ Ho Kotesamo reaki makata tarisiane repo metakarirakanare? Makata tarisiane nenakamaka makata tarisiapaka hemakapurakanare? Repo hemakapusuane hasakaraka hemakapureapo. ⁵ Kotimo reaki Ho Kotesa kaka, reyaki reke epo wakapumo hemakapukua rakirane rakisiapo. Repo Kotimo somemanane kakimasakipoko asiare? Wae, akipoko asiafapo. Yasuaki himu hakásaraka hemakapukua risiakipoko asiare? Ao, akipoko asiapo.

⁶ Kepoane hemakapusakipoko Eparahameane hemakapunie. Arirakano Kotimo sawia popasane hemakapunie. Eparahamemo Kotiaki himu hakásaraka hemakapukua reasasamo Kotimo Eparahameaki someraka, “Nōmo anoaki himu hakásaraka hemakapusuasamo, né aporo ereketaesapo. Né siareapo,” aisane Kotimo sawia popahoareapo. (*Stat 15:6*)

⁷ Asiamo Kotimo sawia popasa aeyaka repo úyaka hemakapunie. Kotiaki himu hakásaraka hemakapura aporoane kakaro Eparahamemo aporo ira ayapo. ⁸ Arirakano wate fana Yu aporohoanafonosane Kotimo makotehokosane, Kotimo sawia kakama matarikia popahoareapo. Asiamo Yu aporohoanafonosamo Kotiaki himu hakásaraka hemakapukua risikino, iaki Kotimo someraka, “Re siareapo. Re ereketaesapo,” airapo. Aihokosane Kotimo sawia popasane oyapo. Eparahameaki Kotimo someraka, “Eparahameo, né aeyaka aporomano hauaka sua risiane nōmo makotehokosapo.” Aisapo. Aisane Kotimo sawia popahoareapo. (*Stat 12:3; 18:18; 22:18*)

⁹ Arirakano Eparahamemo Kotiaki himu hakásaraka hemakapukua rekeno, Eparahameane Kotimo makotesa ayíaka aporomo Kotiaki himu hakásaraka hemakapukua risikino aporoane Kotimo makotenapo.

¹⁰ Arirakano Kotimo somemanane Kotimo sawia popasane kakama someraka, “Somemanane aporomo kekemarakano rakiraka, somemané hakás meta mamosoraka koaretaerakanone, Kotimo fanasinane motoakosapo,” aíyaka Kotimo sawia popasapo. Aporomo hemakapuraka, “Nōmo Kotimo somemané kekemarakano rakiraka, Koti hikumisia ano siaraka rekeakosapo.” Aíyaka hemakapurakanone, Kotimo fanasinane motoakosapo. Asiamo Kotimo somemané suane aporomo kekemahoanafonorakano, Kotimo iane fanasina motoakosapo. (*Lo 27:26*)

¹¹ Asiamo Kotimo somemanane aporomo kekemarakano, aporoaki Kotimo someraka, “Né siareapo. Né ereketaesapo,” aíyaka Kotimo somerafapo. Asiāne aporomo Kotiaki himu hakásaraka hemakapukua rekeno, aporoaki Kotimo someraka, “Né aporo ereketaesapo. Né siareapo,” airapo. Airakano aporoane farearaka yaiya rekeakosapo. Asiamo Kotimo sawia popasane soko hakás yiyareapo. (*Habakuk 2:4*)

¹² Arirakano makata one hemakapunie. Somemaneane hakureapo. Arirakano Kotiaki himu hakásaraka hemakapurane soko hakureapo. Asiamo Kotimo sawia popasane oyapo. “Kotimo somemane suane kekemarakano yaiya rerane makosapo.” Aisa nine aporomo Kotimo somemane suane siaraka kekemahoanafonorakano, yaiya rerane makasimo somemanemo aporoane ararenafapo. Asiane yaiya rerane makasimo Yasuaki himu hakásaraka hemaka apuramo aporoane ararenapo. *(Wok Pris 18:5)*

¹³ Kotimo somemane suane isiapo kekemahoanafonosasamo somemaneamo isuane fanasihoko motoakosapo. Isuane fanasihoko motoakosane metakarisimo, Yasumo isupoko farimaka, api akara ayiáka Yasumo ipi kauane rukua kasá ayareapo. Kasáne isupoko e hákasa fanasiraka kusuapo. Arirakano Kotimo sawia popasane oyapo. “Ira matopesa paremarera aporoane Kotimo kakaro fanasihokosapo.” Aíyaka popahoareapo. *(Lo 21:23)*

¹⁴ Asiamo Kotimo Eparahameaki someaka motosane, Eparahamemo aporo ira wainepe pesane makotehokosa ayiáka, Yasu aeyaka Yu aporohoanafonosamo aporo irane soko, Kotimo makotehokosapo. Kotimo Ho Kotesa kakakosaposane, isiapo Yasuaki himu hakásaraka hemakapusuasamo Ho Kotesane makosapo.

“*Kotimo Eparahameaki ayiakakosaposane, Kotimo somemanemo matasosafapo,*” aisane oyapo.

¹⁵ Maeo, repo ainane nōmo somerakanapo. Aporo ipi kukusiraka hitafe reke, ipi hokosamo epo makata kemoane mokoasimo, epo someaka motorapo. Someaka motosane sawia poparaka motorapo. Poparaka motosane kakaro yainapo. Ayiakakosaposane fasirafapo. Some popasa akiyaki aporomo hemakapusuane meta popanafapo. Somesa hákasa yine popanapo.

¹⁶ Asiamo Eparahameaki soko, ipi hokosa wainepe pesaki soko, Kotimo makoteraka ayiakakosaposane someaka motosapo. Eparahamemo hokosa wainepe pesa suaki Kotimo makoteraka ayiakakosaposane someaka motosafapo. Wae, ipi hokosa wainepe pesa hakásá yine makoteraka ayiakakosaposane someaka motosapo. Aisane epo ipi hokosa wainepe pesa hakásá yine Keresoane aisapo.

¹⁷ Arirakano nōmo someraka one kepoane oyapo. Kotimo someaka motoraka ayiakakosaposane maiya suamo yainaka rerapo. Yainaka reke keremisi fo harote teti (430) faraka, amo ipi somemaneane Moseseaki Kotimo kasapo. Somemane kasá amo fana Kotimo ayiakakosaposane rukumosakatapisiafapo. Fana Kotimo ayiakakosaposane kakaro yasiapo. ¹⁸ Asiamo Kotimo ayiakakosaposane makosakipoko aporomo Kotimo somemane suane kekemarakanone, ane Kotimo ayiakakosaposane makosafapo. Kotimo Eparahameaki someraka, “Né makoteraka ayiakakosapo.” Aisane Eparahamemo kaki-masasamo eaki kasapo.

¹⁹ Kotimo ayiakakosaposane siarakano yia, marirakano Kotimo somemaneane motosare? Aporomo makata watikiaka rakirapo. Asiamo aporomanomo makata watiki-aka rakirane hemakapusimo Kotimo somemaneane motosapo. Kotimo Eparahameaki someraka, “Nómo wainepe pesane hokosa hakásane nōmo makotehokosapo.” Aisane Yasu faserepeasiraka Kotimo ipi somemaneamo aporo hinamoane asekea reapo. Kotimo somemaneane epo hepene aporoaki karakano, ipu Moses tipia rea aki karakano, Mosesemo Yu aporo hinamoaki some kasápo. ²⁰ Arirakano Yu aporo hinamomo Kotimo somemaneane kaiyisimo Kotimo aporo tipia rea aki kasápo. Asiane Kotimo Eparahameaki ayiakakosapo aíyaka someaka motoraka, Koti ipi hákasa yiamo somesapo. Tipia aporo meta aki some kasáfapo.

²¹ Somemanemo Kotimo ayiakakosaposane rukumosakatapisiare? Wae, rukumosakatapisiafapo. Somemanemo aporomananoane mafareahokosa satiki, somemaneamo isu maereketaehoafunureapo. Asiane somemanemo isu mafareahoasifasekeno yaiya rerane karáfapo. ²² Arirakano Kotimo sawia popasane some one kakenapo. Hauaka wo aporo suane makata watikisamo asekea rekenapo. Aíyaka Kotimo sawia popasane kakaro popasapo. Aporo suamo watikisa ainane metakariane siahoasifasekeno, Kotimo

makotenane kakakosaposane makasifareapo. Asiane Yasu Keresoaki himu hakásaraka hemakapura aporoaki Kotimo makotenane kakakosaposane karápo. Kakimara aporoaki kakakosaposane karápo. ²³ Fana Yasuaki himu hakásaraka hemakapura someane faserepesafapo. Aporomo hemakapusuafapo. Some one faserepeasiraka somemanemo isu tipura akera ayíáka kekea aseke reapo. Aseke rekeno isu kau risina Yasuaki himu hakásaraka hemakapura someane faserepeasimo aseke reisipo. ²⁴ Asiamo Kereso peasisraka isu karikia nesa wafaya asiane Kotimo somemanayapo. Somemanemo isu wafayaraka aseke reke isiapo makata watikisane tarisiapo. Arirakano Kereso perakano eaki himu hakásaraka hemakapusuakipoko Kotimo someraka, “Re siareapo. Re aporo ereketaerareapo,” airapo. ²⁵ Airakano Yasuaki himu hakásaraka hemakapukusa maiyane faserepesapo. Faserepesasamo yumo somemanemo isu wafayaraka aseke rekenafapo.

²⁶ Arirakano isiapo aporo suamo Yasu Keresoaki himu hakásaraka hemakapukua risike Keresoa paosapo. Asiamo isuane Kotimo ipi hokosapo. ²⁷ Asiamo re Keresoa paoraka, Yasu Keresoaki katakamareke reisiane, hea tapukumurirakano re pasu osona ayíáka Keresoane ososapo. ²⁸ Re namina su hakásayineraka risikinapo. Reane Kotimo someraka, “Né Yu aporopo. Né Kiriki aporopo. Né aporo raipa roposapo. Né aporo raipa roposafapo. Né aporopo. Né hinamopo.” Aiyaka Kotimo hemakapurafapo. Re namina su Keresoa paoraka hakásayineraka risikinapo. ²⁹ Arirakano re Yu aporohoanafonosane Keresoa paoraka risiasamo re soko suane, Eparahamemo hokosa pariraka risikinapo. Eparahameaki Kotimo makotehokosapo, aiyaka someaka motosane, reaki soko, Kotimo makotenane kakakosapo.

4

Isu Kotimo hokosa pariraka risiane oyapo.

¹ Yu aporomo ainane nōmo somerakanapo. Aporomo ipi maeya rekenapo. Ipi maeyane epo ipi hokosasamo, ipi wafayamo makata suane aseke rerafapo. Hauaka soko, makata kemo soko, aseke rekeafunusa nine, ipi hokosasamo ipi aseke rekeane siahoasifareapo. Asiamo hokosa amo ipi aseke rea aporoamo someane kakimakarakirapo. Hokosa ane nena aporo raipa asiapo. ² E hokosa rea maiya amo, aporo aseke rea amo e aseke nina, keseke sisimarka, ipi wafayamo murikimasa maiya á paurakano, hauakane soko, makata kemoane soko, hokosa amo ipi yiamo aseke rerapo.

³ Aina ayíáka isu Yu aporoane soko asiapo.* Yu aporomo somemanemo isu aseke reapo. Isu nena aporo raipa arisia ayíáka somemaneane kekemaraka rakisiapo.

⁴ Arirakano Kotimo murikimasa maiya amo Kotimo ipi hokosa pusiesapo. Pusiesane hinamo sakoramo hokosa hokono maresapo. Hauaka wo e rea maiya amo Kotimo Moseseaki somemane kasá amo e aseke reapo. ⁵ Somemane kekemasa aporo hinamoane mafasiakosakipoko Yasumo ipi kauane rukua kasapo. Isu Kotimo ipi hokosa mapariraka karikia nasimo Yasumo ipi kauane rukua kasapo.

⁶ Isuane mayíáka ipi hokosapo, aiyaka hemakapukusare? Asiamo Kotimo ipi Ho Kotesane, ipi hokosa Yasuyaki reane, isu himua risikiasimo Kotimo pusiesapo. Pusierakano peraka, isu arareraka, isiapo Kotiaki someraka, “Atao, Atao,” airapo. ⁷ Kotimo Ho Kotesa isuaki kasasamo isu aporo raipafapo. Isu kakaro Kotimo ipi hokosapo. Isu Kotimo ipi hokosasekeno, Kotimo ipi hokosaki ayiakakosaposane isuaki soko kakakosapo.

Poremo Karesia aporoane kára hemakapusuane oyapo.

⁸ Fana Kotiane repo hemakapusuafapo. Hemakapusiraka yatafu yakasa hopoko repo raiparaka rakisiapo. Iane namo kakaro Kotifapo. ⁹ Yumo Kotiane repo hemakapuprakanapo. Hemakapurakanano Kotimo soko reane hemakapurakanapo. Asiane marirakanano efera hunia poparitarikia yatafu yakasa ho menane rakiako hemakapurakanare? Ipu reaki makata kotesa karáfapo. Kakanafonorakanano yia, marirakanano repo ipoko raiparaka rakiranare? ¹⁰ Maiya yumo re Yu aporomo ainane kekemarakanapo. Sere

* 4:3: Sawi meta á 4:3 úyaka popasapo. Fana hauaka wo makata amo soko yatafumo soko rakiniesane isiapo rakisiapo.

metane soko, ere maiya metane soko, yaki metane soko, keremisi metane soko, hokono maka menoraka, makáraraka risikinapo. ¹¹ Makáraraka risikino, nōmo repoko makata rakirakasuane nenakamaka yia rakireapo. Asiamo ano fofaripo. Reane nōmo kara hemakapurakanapo.

¹² Keresoa paosa aporo maeo, ano pesa maiya amo Yu aporomo somemananeane nōmo kekemasafapo. Re arisia ayíáka ano ayíáka reapo. Yu aporomo somemanameamo ano asekea reafapo. Arirakano Yu aporo metakiramo somemananeane repo kekemahoasimo reane kirimarakanapo. Asiamo ano area ayíáka re ayíáka risikianie. Nōmo reaki paroaka somerakanapo. Nōmo nī ainane repo murikimakanie. Fana repo ano makeferaka risiafapo. ¹³ Yasumo someane kepomarekeea nōmo some kasa maiya amo, ano makata takamaka reapo. ¹⁴ Ano makata takamaka rekeno, repo ano asekea reke waforosapo. Wafororakano yia, repo ano asekepayaraka makeferakasufapo. Ano ararerakasupo. Hepene aporomo ararehokosa ayíáka, repo ano ararerakasupo. Yasu Keresomo ararehokosa ayíáka, repo ano ararerakasupo. ¹⁵ Ano makata takamaka reane aseraka, repo ano kamenakarakasupo. Kamenakaraka someraka, “Isiapo hi pokomaka né karása satiki, né arareraka kakafunureapo.” Aíyaka repo ano kára kamenakarakasupo. Asiane yumo repo anoaki hemakapusuane sanasihoareapo. Repo ano arareraka seserakasuane yaiya risikinafapo. ¹⁶ Yumo nōmo reaki kakaro someane some karakano repo anoaki hisiranare?

¹⁷ Aporo metakiramo re kirimarakanapakae. Ipu reaki someraka, “Reane isiapo ararehokosapo,” aíyaka ipu somesane kakaro somesafapo. Repo ano metakarikia, iane patera asekeasimo ipu re kirimarakanapakae. ¹⁸ Arirakano aporoamo reaki someraka, “Reane isiapo ararehokosapo,” aíyaka someraka, reane kakaro makoteraka ararerakanone, ane kotehoasireapo. Ano reyaki rekeno soko metao, ano reyaki rekeanafonorakano soko metao, ipu reaki kakaro somerakano, ane kotehokosapo.

¹⁹ Reo, reane nōmo hokosa asiapo. Reane Keresoa paohoasimo hinamo hokosa takaperaka kau tena ayíáka, nōmo reane kara hemakapuraka himu nekea himu tesapo. Asiane yumo efera hunia nōmo reane kara hemakapuraka himu teraka rekenapo. Himu nekea teraka reke aseane Keresomo ainane repo murikimaka paroaka risikino asekea, himu nekea teraka rerane fahokosapo. ²⁰ Yumo ano reyaki hakāsa rekeanafonosasamo, nōmo re mayíáka maroporaka ararehoanarakapo. Aíyaka nōmo re kára hemakapurakanapo. Asiamo re aseako peraka, reaki kakaro someane tau auaraka some karaka, ayíáka reane ararehokosakipoko nōmo hemakapurakaripo.

Hákapē Sara tetā Poremo yapake somesane oyapo.

²¹ Kaisie. Kotimo Moseseyaki somemanane kasane repo makamafanaraka hemakapuko seserire? Seserakanone somemanane popasa aeyaka reane ereketaeraka hemakapusimo nōmo reaki tarirakanapo. ²² Eparahamemo hinamo tetámo[†] aporo hokosa tetá hokono murisiapo. Hinamo meta yano motosa Hákapo. E raiparaka kake, hokosa meta hokono maresapo. Arirakano hinamo meta yano motosa Sarapo. Eane Eparahamemo namo kakaro arumasa kake, hokosa meta hokono maresapo. ²³ Eparahame hinamo raipa Hákayaki hakāsa waraka, epo aporo hokosa yano motosa Isimaero hokono maresapo. Isimaeroane kaumo hokosapo. Arirakano Eparahamemo ipi namo kakaro hinamo arumasa Sarayaki hakāsa rea maiya amo, Sara ane manokonomosasamo umisafapo. Asiāne kesekeea Kotimo wakapuane karakano, aseane hokosa umirakano asesapo. Aporo hokosa ane yano motosa Aiskeane hokono maresapo. Asiamo Kotimo ayiakakosaposane Aiskeane hokono maresapo.

²⁴ Hinamo tetá takumeaka someane oyapo. Yape tetámo Kotimo aporoyaki someaka masane hinamo tetá asiapo. Kotimo Moseseyaki someaka masane takumeane hinamo raipa Háka ipi ásiapo. Úri Sinae terayia Kotimo someaka masapo. Asiāne somemanane

[†] ^{4:22:} Wate fana Eparahame rea maiya amo aporomo hinamo tetá arumarane yaposafapo. Arirakano aporomo hinamo tetá arumarane Kotimo sawia 1 Timoti 3:2 soko Taetase 1:6 menohoanie.

aporomo kekemarakanone, aporoane somemanemo aporo raipa asíapo. ²⁵ Ūri Sainaé Arépea hauaka á rekenapo. Ūri Sainaé ane Háká yano horaka sikiraka yano horapo. Arirakano hauaka wo Yarusarame sitiáne Háká yano horaka sikiraka somerapo. Hauaka wo Yarusarame sitia Mosesemo somemanane aporo hinamomo kekemaraka, ipu raiparaka risikinapo. Hákamo hokosa raiparaka arisia ayíáka, aporoane somemanemo asekea reane ayíáka, raiparaka risikinapo.

²⁶ Arirakano Kotimo someaka masa metane‡ takumeaka Eparahamemo namo kakaro hinamo Sara asíapo. Asiamo Yarusarame siti hepene yapura reane takumeaka someraka Sara asíapo. Aporo raiparaka arisia ayíáka, hepene yapura aporomo raiparaka risikinafapo. Somemanemo isu asekea rekeanafonoraka isu tonotaesa arisia ayíáka isu risikinapo. Asiamo Sara isiapo ama asíapo. ²⁷ Asiamo hinamo Sara ane Kotimo sawia popasane oyapo.

“Hinamo manokonomosa, né sesehokosapo. Né hokosa takapeanafonoraka kau tehoanafonoraka, nómo seseraka kesahokosapo. Hinamo ne haku kake hokosa hokono mareanafonosa nine, keseke nómo hokosa amo hokosa kára wainakosapo. Aporo hinamomo hokosa hokono murisiane, nómo hokosamo marokehokosapo.” Aíyaka popahoareapo. *(Aisaia 54:1)*

²⁸ Asiamo Keresoa paosa aporo maeo, Kotimo ayiakakosapo, aisasamo Eparahamemo Aisake hokono maresapo. Asia ayíáka Kotimo ayiakakosapo aisane, repo kakimarakano, Kotimo ipi hokosa pariraka risikinapo. ²⁹ Fana Aisakeane Isimaeromo mokoatikisapo. Asiamo Ho Kotesamo Sara aki wakapu karakano hokosa hokono maresa ane, hokosa meta kaumo hokono maresa amo mokoatikisapo. Mokoatikisa ayíáka yumo soko hakásá yine rakirakanapo. Kotimo Ho Kotesa kassá aporo ane, aporomo kaumo hemakapukua rakira somemanane kekemana aporoamo mokoatikirakanapo. ³⁰ Arirakano Kotimo sawia popasane oyapo.

“Hinamo raipa roposane ipi hokosayaki pusiehoanie. Hinamo raipamo hokosa amo Eparahamemo makata kotesane makosafapo. Arirakano hinamo Eparahamemo namo kakaro arumasa kayamo ipi hokosa amo Eparahamemo makata kotesane makosapo.” Aíyaka popahoareapo. *(Stat 21:10)*

³¹ Arirakano isuane hinamo raipamo hokosa asiafapo. Isu hinamo Eparahamemo namo kakaro arumasa kayamo hokosa asiapo. Somemanemo isuane asekea rekenafapo.

5

Somemanemo isu tipura ayíáka kesane Yasu Keresomo isu tonotaesane oyapo.

¹ Yu aporomo somemanemo isu asekea reke, isu tipura ayíáka kesa asiane Yasu Keresomo isu tonotaesapo. Asiasamo mapiraraka paroaka risikianie. Efera hunia aporomo reaki someraka, “Yu aporomo somemanane kekemahoanie,” aisane repo kekemarakanone somemanemo re tipura akera ayíáka keakosasamo, repo waehoanie.

² Kaisie. Ano Poremo reaki somerakanapo. Re ereketaeraka siaraka risikiako kau hahaeraka paterakanone, Yasu Kereso kusuane nenakamaka makata maparirakanapo. Asiamo repoko Yasu Keresomo makata rakisia amo re arareraka makotehokosafapo.

³ Repo hemakapusimo nōmo efera hunia paroaka somerakanapo. Repo somemanekemaraka kau hahaeraka paterakanone, somemanane suane kekemaraka rakinie. Somemanane hakásá meta metakariane siahoasifareapo. ⁴ Arirakano repo someraka, “Koti hikumisia isu ereketae risikiasimo Kotimo somemanane kekemarakanapo,” aíyaka somerakanone, re Yasuaki fasikia risikinapo. Somemanemo re makotehokosafapo. Yasumo ipi yaku ararenane repo metakariasiapo.

⁵ Arirakano isiapo Yasuaki himu hakásaraka hemakapukua risikino, Ho Kotesamo isu ararerakano, keseke Kotimo someraka, “Re siareapo. Re aporo ereketaerareapo,” aihorasimo isu seseraka kau risikinapo. ⁶ Arirakano aporo ipi Keresoa paoraka reke,

‡ 4:26: Kotimo Eparahame hokosa wainepe pesa hakásá yiamo Yasuaki someaka masapo. Aporomo Yasuaki himu hakásaraka hemakapusua risiane raiparaka risikinafapo.

ipi kau hahaeraka patesane soko metao, ipi kau hahaeraka patehoanafonosane soko metao, tetáne nenakamaka makata ayireapo. Arirakano aporomo Keresoaki himu hakásaraka hemakapusua aeyaka, Kotiaki soko, aporo hinamoaki soko, himu tumurumo hemakapukua rerane namo kakaro makata kotesane ayareapo.

⁷ Fana Keresomo someane repo kakimasa maiya amo, repo koteaka rakiraka risiapo. Asiane kakaro someane kakimakohoamo aporo epamo matasorakanare? ⁸ Kotimo matasonafapo. Kotimo ipi hokosa risikiasimo Kotimo reane peaesapo. ⁹ Arirakano isiapo someraka, “Makata pirira wakasemamo farawa suane pirikia makáranapo,” airapo.*

¹⁰ Nōmo hemakapusuane oyapo. Unihae Keresomo re ararerakano, nōmo someane repo kekemaraka, aporo metamo someane repo kekemahokosafapo. Aíyaka nōmo hemakapurakanapo. Re kirimahoko some kará aporoane yano motosane nōmo kairafapo. Epo watikiaka rakisiakipoko ropo watikisane makosapo.

¹¹ Keresoa paosa aporo maeo, aporo metakiramo someraka, “Poremo úyaka somerapakae. Kotimo aporoaki someraka, ‘Né siareapo. Né aporo ereketaerareapo,’ aihoasimo kau hahaeraka patehoanie.” Aíyaka ipu somera ayíáka nōmo somesa satiki, aporo metakiramo ano mokoatikihoafunufapo. Nōmo someraka, “Kau hahaeraka patehoanie,” aíyaka nōmo somesa satiki, Yasu isupoko ira matopesa paremarekeea rusua kusuane nenakamakayia kureapo, aihoafunupo. ¹² Asiamo aporomo someraka, “Kau hahaeraka patehoarie.” Aisa aporoamo repo himumo hemakapurane mahimetesasamo, ipu namina kau su kaiyasane patehoane siahoasireapo.

¹³ Maeo, somemanemo re tipura kesa arisia ayíáka risikiakohoamo, reane Kotimo pasimosapo. Pasimosa aporo oforaka risike repo hemakapuraka, “Isu oforaka risike kaumo hemakapusuane kekemaraka rakiane siahoasireapo,” aíyaka hemakapukupo. Arirakano uyaka hemakapunie. Repo aporo tákane namina himu tumurumo hemakapukua ararehoko hemakapunie. ¹⁴ Asiamo somemané hakásá metamo somemané suane karotapisane oyapo. “Nómo ní himu tumurumo hemaka apura ayíáka, ní aporo tákane soko ayíáka himu tumurumo hemakapunie.” Aíyaka somemané motosapo. Somemanéamo suamo kepoane ayapo. *(Wok Pris 19:18)*

¹⁵ Arirakano repo namina yia himu tumurumo hemakapunafonoraka, saperaka hokomaka someraka, ayíáka risirapaka asekeanie. Arirakano kásamo weako kakararaka mere kirisiraka arisia ayíáka, re namina yia ayíáka risikinone, ane asekeanie. Ayíáka risikinone re namina yia fasikia kikisiraka risikiakosapo. Anapaka asekeanie.

*“Ho Kotesamo hemakapusuane hakureapo. Arirakano kaumo hemakapusuane hakureapo.”
Aíyaka Poremo somesane oyapo.*

¹⁶ Maeo, re ararehokosakipoko nōmo somerakasuane oyapo. Ho Kotesamo re himua somerakano kaikia, koteaka susu rakiraka risikianie. Koteaka susu rakiraka risikino kaumo hemakapusuane kaikia rakiakosafapo. ¹⁷ Ho Kotesamo hemakapusua amo kaumo hemakapusuane hurutapiako hemakapukua, arirakano kaumo hemakapusua amo Ho Kotesamo hemakapusuane hurutapiako hemakapukua ayíáka tati kakanakeraka risikinapo. Asiamo repo koteaka rakiako hemakapuko asiane maiya suamo koteaka rakirafapo. ¹⁸ Ho Kotesamo someane repo kekemarakanone, ane Mosesemo somemanemo re unihaeaka asekea rekenafapo.†

¹⁹ Arirakano kaumo rakirane isiapo hemakapurapo. Kaumo rakirane oyapo. Hinamo hakimarané soko, arirakano hinamomo aporo metayaki mokome enanane soko, arirakano aporomo hinamo asekea hemakapukua hokomaka somerane soko, ²⁰ arirakano yatafu yakasa hoaki kekereraka rerane soko, arirakano aporo meta ira hamí rurane soko, arirakano aporo metaki werane soko, arirakano aporo metaki himumo hisiraka somerane soko, arirakano aporo metaki kakanakeraka rakirane soko, arirakano saperane

* 5:9: Makata pirira (yis) wakasemamo farawa su pirira ayíáka aporo hukusimo hasaka someane repo kakimayane, keseke repo suamo hasaka someane kakimaka risikiakosapo. † 5:18: Ho Kotesamo some akipe Kotimo somemané kaeyakosu Moseseaki kasa, tati kakanakeraka risikinafapo.

soko, arirakano metane aporomo ipi yia makáraraka aporo metane mawakasemaraka rerane soko, arirakano aporo metaki tafatafaraka somerane soko, arirakano aporo metaki hisiraka fasikia risirane soko,²¹ arirakano aporo meta aseraka, "E area ayíáka ano soko ayíáka rekearipi," aíyaka hemakapurane soko, arirakano aporomo he watikisa nekea himu maparitaeraka rerane soko, arirakano aporo yakai sarimaraka he watikisa nenaka koteaka hemakapurafaraka, mokome enaraka koraka risirane soko, arirakano makata metakira hakása yasia rakiraka risikino, makata suane kaumo rakira ayapo. Kaumo rakira aporoane Koti unihaeaka reamo hauaka hiakosafapo.

²² Asiane ira kotesamo wate kotesa apera ayíáka, Ho Kotesamo hemakapusua aeyaka makata kotesa susu rakiraka rerapo. Ho Kotesamo né ararerakano né uyaka rekeakosapo. Aporo metaki himu tumurumo hemakapukua reke, arirakano himu seseraka reke, arirakano aporo metamo néaki mokoatikirakano nómō saperaka someane foakayia paripu-rarafaraka reke, arirakano aporo metane kamenakaraka arareraka reke, arirakano aporo metane makoteraka reke, arirakano aporo metaki kakaro somesane kakaro kekemaraka rakiraka reke,²³ arirakano makapororaka rekeanafonoraka tau auaraka reke, arirakano kaumo hemakapusuane metakarikia, keseke kaumo hemakapurane kirimarakano né ní yiamo waeraka reke, arirakano makata suane aporomo rakiraka rekenone, Ho Kotesamo hemakapusuane kekemaraka rakiraka rekeakosapo. Ayíáka rakiraka rekenone, ane somemanemo né hukurukusafapo.²⁴ Asiamo namo kakaro Keresoa paosa aporomo ipi kaumo hemakapurane soko, watikiaka rakirane soko, ira matopesa paremarerakano makusuapo.²⁵ Asiamo Ho Kotesamo fareanane kasásamo Ho Kotesamo makata ainane kekemaraka rakinie.²⁶ Isiapo isina yano motosane makárahoane siahoasifareapo. Metamo menane makaripi aíyaka hemakapuane siahoasifareapo.

6

Aporo meta ararenane oyapo.

¹ Hameo, repo namina yia Keresoa paosa aporo hakása metamo watikiaka rakirakano asekea, repo namina yia aporo metakira re himua Ho Kotesane komarukua risike, watikiaka rakira aporoane, repo kamenakaraka hemakapukua, tau auaraka eane maropohoanie. Maroporaka asekeanie. Repo watikiaka rakisimo Satanemo kirimarakaka uasekosane meraruhokopo. Asiamo re naminane makáraraka risike ayíáka maropohokopo.² Repo namina yia metamo makata umisa kakeno, e arare, arirakano metamo e arare, ayiakanie. Ayíáka arareraka risikino, repo Yasumo somemanane kakaro kekemaraka rakiraka ayiakakosapo.³ Aporo metamo e ipiane makáraraka someraka, "Ano ní yano motosa kárapo." Aíyaka somerakanone, aporoamo ipi yano motosane kakaro kárahoanafonosasamo epo ipi yiamo kotafe someane kekemaraka ayiakakosapo.

⁴ Arirakano aporomo ipi makata rakirane asekea ipi hemakapuraka, "Makata rakirane kotesa soko metao, watikisa soko metao," Aíyaka hemakapusakipoko epo ipi himu yiamo takekea hemakapuane siahoasireapo. Aporomo ayíáka takekea hemakapuraka, epo ipi makata asiane kotesekeno aseraka, ipi sesehokosapo. Arirakano aporo metamo makata rakirane nómō aseraka takekea hemakapuraka, "Epo makata rakirane, nómō makata rakiramo marokesapo," aíyaka hemakapuraka aporoane mawakasemaraka, nómō níane makáraraka somerapo. Aíyaka hemakapukua takekea somehoane siahoasifareapo.⁵ Asiamo aporo suamo namina makata rakira umisane, kekepo hakása hakásaraka makata umisane mokoa rakiraka risikinapo.⁶ Arirakano repo Kotimo someane koteaka enomakasimo, aporo metamo tisaraka tarirakano, aporoane repo arareraka, repo makata nenane soko metao, repo makata kotesane soko metao, repo moneane soko metao, parakuraka eaki yaku kakanie.

⁷ Repo hasaka hemakapurane kekemahokopo. Aporomo hemakapuraka, "Nómō makata kotafe rakirakanone, Kotimo aseakosafapo." Aíyaka hemakapura aporoamo ipi yiamo kotafe rakirakanapo. Kotafe rakirane Kotimo aserapo. Aporomo makata

mano poterakano, makata potesa hakása yine taneherapo. Tanehekea wate aperamo, wate hakása yine pesane tumorapo. ⁸ Asiamo takume some kepoane oyapo. Ira watikisamo wate watikisa apera ayíáka, aporomo kaumohemakapukua watikiaka rakirakanone, ropo watikisane makosapo. Arirakano aporomo Ho Kotesamo hemakapusuane kekemaraka rakirakano, aporoane Ho Kotesamo mafareahokosapo. Mafarearakano e Kotiyaki yaiya rekeakosapo. ⁹ Asiamo isina makata koteaka rakiakosane kau hisiraka risikiakopo. Arirakano koteaka rakiakosane kau hisihoaanafonoraka koteaka rakikia naorakanone, parakuna maiya amo makata kotesane isiapo mokoakosapo. Ira wate kotesa surakano tuamora ayíáka, keseke parakuna maiya amo isiapo ayíáka makata ropo kotesa mokoakosapo. ¹⁰ Asiamo aporo hinamo makotehokosa ikia kara kakenone, makotehoanie. Arirakano Keresoa paosa aporo hinamoane soko, namo kakaro wakapuaka rakiraka iane makotehoanie.

Poremo ipi hokonomo sawi wakasema popasane oyapo.

¹¹ Sawi wakasema one nōmo nī hokono sakinimo poparakanapo. Popana one popakeraka poparakanapo. Some one nōmo reaki popasane repo asekea hemakapunie. ¹² Arirakano reaki aporo metakiramo paroaka someraka, "Kau hahaeraka patehoanie." Aíyaka somesa amo kepoane oyapo. Aporo metakiramo kotafe some karakanapo. Yu aporo metakiramo hikumisia, ipu namina yano motosa makárahokosakipoko hemakapukua some rakoraka some karaka risikiakosapo. Namina Yu aporo metakirane namoraka risikinapo. Namoraka risike namina hemakapuraka, "Isupoko Yasu ira matopesa paremarekeea kureapo. Asiamo aporo hinamoane Kotimo mafasiasimo Yasuaki himu hakásaraka hemakapuane siahoasireapo." Aíyaka somerakanone, ane Yu aporo metakiramo iane mokoatikihokosapo. Mokoatikihokohoamo ipu Yu aporo hoanafonosa Keresoa paosa aporoaki kau hahaeraka patehoanie, airapo. ¹³ Arirakano aporomo someraka, "Kau hahaeraka patehoanie," aira aporoamo namina Kotimo somemane suane kekemaraka risikianafonosa nine reaki, "Kau hahaeraka patehoanie," airapo. Airane repo kekemarakano asekea someraka, "Isiapo somesane ipu kakimasapo." Aíyaka i namina yia makáraraka hemakapurakanapo.

¹⁴ Arirakano nōmo nī makata metane makáraraka somerakanafapo. Asiane Yasu Kereso yano motosane háksa makáraraka somerakanapo. Asiamo Yasu Kereso anopoko farimaka ira matopesa paremarerakano kureapo. Akipoko Yasu Keresoane nōmo makáraraka somerakanapo. Hauaka wo kaumohemakapusua makata suane aporomo makáraraka somerakano, nōmo hemakapuraka makatane nenakamaka makatareapo. Yasu Kereso ira matopesa kusuasamo, nōmo kaumohemakapusuane rukupateraka metakariasiapo, aíyaka nōmo hemakapurakanapo. ¹⁵ Arirakano aporo kau hahaeraka patenane nenakamaka makatapo. Arirakano aporo kau hahaeraka patehoanafononane soko nenakamaka makatapo. Kotimo hikumisia makata tetáne nenakamaka makata ayireapo. Arirakano Kotimo hikumisia aporomanomo ainane makaweraka rakiante kotehoasireapo. ¹⁶ Some one nōmo some kasane kakimaka kekemana aporo hinamoane auaraka risikiasimo nōmo kurikurirakanapo. Iane Kotimo kamenakahoasimo nōmo kurikurirakanapo. Iane Kotimo kakaro murikimasapo. Kotimo Yu aporoane murikimasa ayíáka Yu aporo hoanafonosane soko Kotimo ayíáka murikimasapo.

¹⁷ Some fahokosakipoko some wakasema meta one somerakanapo. Aporomo anoaki makata umisa meta^{*} kayáne siahoasifareapo. Ano Yasumo aporo raipa rekeno, aporomo ano rusuane umurusapo. Umurusane repo aseraka hemakapuraka, "Poreane Yasumo aporo raipareapo." Aíyaka hemakapunie. ¹⁸ Maeo, isiapo Unihae Yasu Keresomo reane hemakapukua repo ainane makotehoasimo nōmo kurikurirakanapo. Kakaroripo.

* 6:17: Makata umisa metane oyapo. Aporomo someraka, "Pore tarira aporofapo," aisasamo Poremo someraka, "Aíyaka somehoane siahoasifareapo," aisapo.

Efesase Efesase sawi one mahemakapukusa someane oyapo.

Yasu hepene yapura hisiakipoko keremisi 32 faraka, Pore Rome apea tipura makesa reke, sawi one popasapo. Poremo Keresoa paosa aporo hinamo Efesase apea risiaki sawi one poparaka makesapo. Keresoa paosa aporo hinamo i su ape sumu kekepoa risiamonamina kekepo menorape pusimo poparaka makesapo.

Efesase aporoane Yu aporohoanafonoraka i risiapo. Isu soko Yu aporohoanafonoraka risike sawi omo isu soko ararehokosapo. Efesase sawia Poremo someraka isu Keresoa paosa aporo hinamo suane Keresomo kau asiapo. Kaumo unihaeane Kereso ipipo. Efesase sawia some kepo parakuraka popasane oyapo.

1:1-2 Sawi popana one Poremo kepomarekeea popasapo.

1:3-3:21 Kotimo isu suane hemakapuramaso, Yu aporoane soko Yu aporohoanafonosane soko i suane masarimasapo. Masarimaraka isu su aporo ira hakása pariraka risike Keresomo kau asiapo.

4:1-6:9 Fana isu katosa á risiane pipu yumo Keresoaki paosasamo faesa á risikinapo.

6:10-20 Sataneyaki yunu weakosakipoko Keresomo yunu wera makata ane mokoa risikianie, aisapo.

6:21-24 Poremo ayapasapo.

Efesase aporo hinamoaki Poremo sawi poparaka makesane oyapo.

¹ Kotimo ipi hemakapusua aeyaka Yasu Keresomo tarira aporohoasimo ano muriki-masapo. Ano Porepo. Re Kotimo aporo hinamo Efesase apea risiaki nōmo sawi one poparaka makerakanapo. Repo Yasu Keresoaki himu hakásaraka hemakapukua risikino asekea, nōmo reaki sawi one poparaka makerakanapo. ² Isiapo Kotipe Unihae Yasu Kereso tetapō makoteraka ararenane soko auaraka risirane soko reaki kakasimo nōmo hemakapurakaripo.

Yasu Keresomo isu makotesane oyapo.

³ Isiapo Unihae Yasu Keresomo ipi Ata Kotiaki kekerehoanie. Isiapo Keresoaki kataka marekeea risikino, Kereso aeyaka hepene yapura makata kotesa susuane Kotimo isuaki kasapo. Makata kotesa kasá amo isiapo hoane mawakapuraka risikiasimo kasapo.

⁴ Hauaka one Kotimo kepomarekeea rakiasiraka, Keresomo ipi makata rakira aeyaka isiapo Keresoa paoraka risikiasimo Kotimo isu murikimasesupo. Isiapo makata watikisane kikisiraka Kotimo hikumisia koteaka susu risikiasimo epo isu murikimasesupo.

⁵ Epo isuane himu tumurumo hemakapukua, Yasu Keresomo isu mafasiakosasamo, isu ipi hokosa ayíáka karikia nakosakipoko epo isu murikimasesupo. Wate fana ipi hemakapusua aeyaka murikimasesupo. ⁶ Asiamo Kotimo isu yaku araresasamo isiapo eaki hemakapukua kekererakanapo. Kotimo ipi hokosa Yasu Keresoaki himu tumurumo hemakapusuesupo. Asiamo epo ipi hokosamo makata rakira aeyaka isuane yaku araresapo. ⁷⁻⁸ Isu tipura risia asiane Kotimo hokosa ipi yapi pusua amo makata ropo akara ayíáka isu tonotaesapo. Tonotaeraka isiapo makata watikisane mafasapo. Kotimo isuane himu tumurumo hemakapuraka araresane kakaro káraro. Makata su hemakapurane soko, kepo su hemakapurane soko Koti ipipo. Epo ipi isu hemakapuraka makata kára araresapo.

“Keresoane ipi fanapo,” aisane oyapo.

⁹ Kotimo ipi hemakapusua mahamesane yumo hufitaeraka makakamaraka somerakanapo. Wate fana isupoko Keresomo ayíáka kaisakosapo aíyaka Kotimo hemakapukua maresane, yumo aporo hinamomo kaiyisimo hufitaeraka makakamaraka somerakanapo.

¹⁰ Asiamo Kotimo hemakapusuane oyapo. Makata su siaraka ayípe pusimo Kotimo maroporaka, arirakano fa ana maiya amo makata su sarimarakaa Keresomo unihaeaka

asekea rekeakosapo. Hepene yapura makata risiane soko hauaka wo makata risiane soko Keresomo ipi hákasa unihaeaka asekea rekeakosapo.

¹¹ Isiapo Keresoaki kataka marekea risikino Kotimo isuane aseraka someraka, “Reane nōmo nī menapo,” airapo. Aýaka wate fana Kotimo hemakapukua maresane, yumo ayiana oyareapo. ¹² Ipi hemakapusua aeyaka makata su maroporakanapo. Isiapo Yu aporo hinamomo Keresoaki fana himu hakásaraka hemakapukua risiapo. Asiamo Kotimo wakapuane soko faesane soko isiapo hemakapukua Kotiaki kekerehoasimo Kotimo isu murikimasapo.

¹³ Arirakano kakaro someane repo soko kaisiapo. Kairaka Keresomo mafasiakosapo aisa some kotesane repo kakimaka Keresoaki himu hakásaraka hemakapukua risikiako parisapo. Keresoaki re Yu aporohoanafonosamo soko, himu hakásaraka hemakapurarakarakan kaiyakosakipoko Kotimo reaki Ho Kotesa kasapo. Fana kakakosaposane yumo kakaro kasapo. ¹⁴ Ho Kotesane isuaki kasasamo isiapo hemakapusuane makata kotesa susuane Kotimo ipi aporo hinamoaki kakakosaposane, kakaro yaiya kakakosapo. Aýaka hemakapukua, Kotimo isu mafasisiasamo yaiya risirane mokoakosakipoko isu kau risikinapo. Isu Kotiyaki yaiya risike koteaka susu risikiakosapo. Asiasamo isiapo Kotiaki kekererakanapo.

Poremo kurikurisane oyapo.

¹⁵ Repo Unihae Yasuaki himu hakásaraka hemakapukua risike Kotimo aporo hinamo suaki himu tumurumo hemakapukua risikinapakae. ¹⁶ Risikinapakano kaikia, nōmo repoko farimaka maiya suamo Kotiaki suseaka kurikurirakanapo. Asiamo nōmo úyaka kurikurirakanapo. ¹⁷ Isiapo Unihae Yasu Keresomo ipi Kotiane, isiapo Ata Kara ipi faesa yaiya reaki nōmo kurikurirakanapo. Kotimo ipi aina suane repo koteaka hemakapusimo Ho Kotesamo reaki tarikia, koteaka takekea hemakapurane kakasimoripo, aýaka nōmo kurikurirakanapo.

¹⁸ Repo himumo koteaka hemakapusimo nōmo kurikurirakanapo. Himumo koteaka hemakapukua risike, Kotimo ipi aporo hinamo suane makoteraka ayiakakosapo, aýaka someaka masane repo hemakapukusapo. Ayiakakosapo aýaka someaka masane fasere-peasimo isu kau risikinapo. Ayiakakosapo aýaka someaka masane namo kakaro kote-sapo. Repo himumo koteaka hemakapukua risike, Kotimo makata kotesa ayiakakosapo aisane repo hemakapukua risikiasimo nōmo kurikurirakanapo.

¹⁹ Repo himumo koteaka hemakapukua risike aseane Kotimo wakapumo isu kakimara aporo hinamoane ararerakano asekea repo hemakapukusapo. Kotimo wakapuane namo kakaro kára yaiya rekenapo. ²⁰ Kotimo wakapumo isu ararena wakapu hakásamo Kereso kusuane maturikia taesapo. Maturikia taeraka hepene yapura Kotimo hokono tumuru takua rekeasimo maresapo. ²¹ Asiamo hepene yapura Kereso ipi unihaeaka asekea rekenapo. Arirakano hepene aporo risiane soko, aporo fanaraka risiane soko, kamani aporo su risiane soko, somemanek wakapuane soko, suane Keresomo wakapumo hurutapikia marokesapo. Yumo aporo fanaraka arisiane soko, keseke aporo fanaraka risikiakosane soko, Keresomo ipi hakásamo unihaeaka asekea rekenapo. ²² Makata suane hurutapikia Keresomo korakemo finiraka marakoraka rekeasimo Kotimo e maresapo. Arirakano hauaka wo Keresoa paosa aporo hinamo suane Keresomo ipi hákasamo unihaeaka asekea rekeasimo Kotimo e maresapo. ²³ Isiapo unihaeane Kereso ipipo. Ipi kau asiane isu Keresoa paosa aporo hinamo ayapo. Arirakano isuane eyaki risike, arirakano Keresoane soko isuyaki reke, aiyáka isina hakásamo sarimaraka risike, siaraka wakapuraka risikiakosapo.

Re kusua asiane mafareasane oyapo.

¹ Fana re koarentaeraka watikiaka rakiraka risike kusua arisia ayíáka risiapo. ² Fana repo hauaka omo menane kekemasapo. Arirakano yakasa homo unihae Satanemo makata

rakirane soko repo kekemaraka rakiraka risiapo. Yumo soko Satanemo makata rakirane Kotimo some koaretaena aporo hinamomo yaiya rakiraka risikinapo.

³ Yumo koaretaena aporo arisia ayíáka fana isu su ayíáka risiapo. Himo asekea makata nakosa soko pasu soko hinamo soko makatane himu pukua kaumo hemakapusuane rakiakoripo aíyaka hemakapusuapo. Kaumo hemakapusuane rakiraka risike watikiaka rakira aporo hinamo su Kotimo fanasihoko motora ayíáka isu soko fanasihoko motoafunureapo. ⁴ Asiane Kotimo isu fanasihoko motoafunusa nine isuaki Kotimo himu tumurumo hemakapusuasamo isu kára kamenakasapo.

⁵ Isu koaretaeraka risike kusua arisia ayíáka risiane Kotimo isu Keresoyaki risikiasimo mafareasapo. Mafarearaka isuane ipi hemakapukua arareraka isu mafasisiapo. ⁶ Yasu soko isu soko epo maturikia taesapo. Isu Yasu Keresoyaki hepene yapura risikiasimo isu mafareasapo. ⁷ Kotimo isuane himu tumurumo hemakapusuasamo isu makoteraka araresapo. Makata araresane isiapo soko, aporo hinamo keseke risikiakosamo soko hemakapusimo Yasu Kereso aeyaka Kotimo isu mafasisiapo. ⁸ Asiamo Kotimo isu makoteraka yaku ararenasamo isu mafasisiapo. Repo namina yia mafasisifareapo. Mafasirane Keresoaki himu hakásaraka hemakapukua risikino Kotimo yaku mafasisiapo. Repo makata koteaka rakisiakipoko Kotimo mafasisiafapo.

⁹ Epo reane mafasisiakipoko repo namina yano motosane makáraraka rupiaka some-hokopo. Repo namina yia mafasisiafapo. Kotimo ipi hákasamo reane mafasisiapo.

¹⁰ Kotimo isu rakisiapo. Isu Keresoyaki hakásaraka risike isiapo koteaka rakiraka risikiasimo Kotimo isu rakisiapo. Isiapo makata rakirane epo fana maresapo. Maresane koteaka rakisimo Kotimo isu rakisiapo.

Isu su Keresoaki paosasamo aporo ira hakásaraka parisane oyapo.

¹¹ Re takapesa maiya amo Yu aporo ira takapesafapo. Reane Yu aporomo somer-aka, “Aporoane kau hahaeraka patehoanafonona aporopo. Aporoane Kotimo muriki-masafapo. Arirakano isu kau hahaeraka patena aporopo. Isuane Kotimo murikimas-apo,” aisapo. Asiamo re Yu aporohoanafonosa takapesane repo hemakapurakanapo.

¹² Fana repo Keresoaki hemakapusuafapo. Kotimo Yu aporo murikimasa nine, re Yu aporohoanafonosane murikimasafapo. Reane aporo hakupo. Re Yu aporoyaki yunuraka risiapo. Kotimo someaka masane reaki some kasafapo. Epo aporomano makoteraka ayiakakosaposane re Yu aporohoanafonosaki some kasafapo. Re hauaka wo risiamo Kotiaki hemakapusuafapo. Kotiyaki yaiya risikiakosane hemakapunafonoraka Kotimo makata ayiakakosaposane kau risiafapo.

¹³ Fana repo Kotiaki fasikia fesenoraka risiapo. Ayíáka risiane yumo Yasu ipi aporomano supoko kususamo, repo Yasuaki himu hakásaraka hemakapukua kataka marekea risike, Kotiaki makeraka risikinapo.

¹⁴ Fana Yu aporoyaki Yu aporohoanafonosayaki namina himumo mahisiraka risike, yunuraka kikisiraka enonoraka risiane, Yasu kusua maiya amo masarimasapo. Enonosane metakarikia su aporo ira hakásaraka risikiasimo murikimasapo. Aporomano su auaraka risira kepoane Yasu ipipo. ¹⁵ Fana enonoraka Yu aporo hákasaki Kotimo ipi somemanekaka, Yu aporohoanafonosaki Kotimo ipi somemanekasafapo. Asiane Yasu peraka somemanemo enonoraka kakanakeraka risia makatane Yasumo ipi maka ipi kau kususamo somemanemo enonoraka risiane soko mafasapo. Yasu ipi tipia rekeno Yu aporomo soko Yu aporohoanafonosamo soko eaki himu hakásaraka hemakapukua risikinapo. Ayíáka auaraka risike aporo ira hakásaraka pariraka risikinapo. ¹⁶ Aporo ira tetápoko farimaka Yasu ira matopesa paremarerakano kususamo aporo ira tetáne masarimasapo. Sarimaraka risikino aporo ira tetáki Kotimo tákeraka rekenapo. Yasu kususamo namina himumo mahisiraka yunuraka kikisiraka risiane Yasumo mafasapo.

¹⁷ Yasu peraka aporo suaki maeaka himu hakásaraka hemakapukua risikiasimo some kotesane somehoko pesapo. Re Yu aporohoanafonosane Kotiaki yamenoraka risikino asekea reaki somehoko e pesapo. Arirakano Yu aporoane Kotiaki makeraka risikino asekea iaki soko somehoko pesapo. ¹⁸ Keresomo isu su araresasamo, isu su Yu aporo soko

Yu aporohoanafonosa soko Ho Kotesa hakása nine kasapo. Isiapo Kotiaki ereketaeraka somehoasimo Ho Kotesane hakása ninesasamo tipia reke tariraka rekenapo.

¹⁹ Asiamo yumo re Yu aporohoanafonosa aporo ira hakufapo. Re aporo kimisi pesa arisia ayíáka risikinafapo. Kotimo aporo ira murikimasayaki re paoraka risikinapo. Asiasamo Kotimo aporo irane repo. ²⁰ Arirakano isu su Kotimo aporo irane Kotimo ape kisia asiapo. Asiamo tarira aporoane soko porofete aporoane soko ape takuma ira kesa asiapo. Yasu ipiane ira kesa warupi asiapo. ²¹ Ape patakuni* ape kamape ape kia asipa ku su sarimaraka warupia akaya ayíáka isu su sarimaraka Yasu ipiaki hemakapukua risikinapo. Ape kisiane Kotimo ipi ape kotesa susupo. ²² Re Kotiaki kataka marekea risikino, Keresoa paosa aporo metakira akiyaki re soko ape akira ayíáka kiraka rekenapo. Amano ape kakarua area ayíáka Koti reyaki hakasa rekenapo. Ipi Ho Kotesa reyaki hakasa reasasamo ipi soko reyaki hakása rekenapo.

3

Yu aporohoanafonosapoko Poremo some kaka rakiraka reane oyapo.

¹ Re Yu aporohoanafonosaki Kotimo someane nōmo some karakasu akipoko Yasu Keresomo aporo raipa ano Poreane tipura makesapo.

² Nōmo reaki some kakasimo Kotimo hemakapukua ararenane anoaki kasapo. Makata ane repo kaikia hemakapurakanapo. ³ Kotimo ipi hemakapukua Yu aporohoanafonosa mafasiakosakipoko mahamesane anoaki mafekemarakaka tarisiapo. ⁴ Arirakano Kotimo anoaki hufitaeraka somerakano nōmo kairaka, Yasumo makata rakisia kepoane nōmo hemakapurakanapo. Nōmo hemakapusuane wakasema meta reaki popasapo. Popasane repo menoraka, Yasumo makata rakisia kepoane repo soko hemakapukusapo. ⁵ Wate fana Kotimo ipi hemakapusuane aporoaki hufitaeraka somesafapo. Asiamo maiya amo Kotimo ipi hemakapusuane mahamesapo. Asiane yumo ipi Ho Kotesamo tarikia hufitaeraka somerakanapo. Kotimo tarira aporope porofete aporo ipu isuaki makata mahamesane yumo Ho Kotesamo tarikia hufitaeraka somerakanapo.

⁶ Asiamo Kotimo ipi hemakapusua mahamesane oyapo. Kotimo Yu aporoaki makata kakakosaposane, Yu aporohoanafonosaki soko kakakosapo. Aporo ira hakásahoasimo Yu aporo akiyaki Yu aporohoanafonosane soko pasimorakanapo. Kotimo makoteraka ayiakakosaposane Yu aporoaki some kasa hakasa nine, Yu aporohoanafonosaki soko some karakanapo. Yasuane aporo supoko pesasamo, eane hemakapusimo some kotesane Yu aporohoanafonosamo kakimasapo. Kakimarakano asekea Kotimo ipi hemakapukua rekenapo.

⁷ Arirakano Kotimo ano hemakapuraka yaku arareraka Yasu hemakapusimo some kotesane nōmo some kakasimo Kotimo ano murikimaraka supo. Kotimo makata rakiniesane nōmo rakismo Kotimo ipi wakapuane anoaki karakasupo. ⁸ Kotimo some kakimara aporo hinamo suane fanapo. Ano Poreane kesekepo. Ano fanaraka rekeanafonosa nine Kotimo ano hemakapuraka arareraka murikimasapo. Yu aporohoanafonosamo Yasuane hemakapusimo some kotesane nōmo iaki some kakasimo Kotimo ano murikimasapo. Keresomo makata kotesa susuane enonosa kakenafapo. Ane some kakasimo Kotimo ano murikimasapo.

⁹ Kotimo ipi makata su rakisiapo. Rakisia maiya amo Kotimo ipi hemakapukua makata koteaka rakiakosane mahamesapo. Mahamepe pekea, pipu yumo Kotimo ipi hemakapusuane nōmo some kakasimo ano murikimasapo. ¹⁰ Asiamo Kotimo hemakapusuane nōmo some karakano, Keresoa paosa aporo hinamomo hemakapukusapo. Arirakano ira kepo hakásaraka, ira eya kekepohorea ayíáka Kotimo ipi hemakapusuane ayireapo. Asiamo Kotimo hemakapusua kekeposane Keresoa paosa aporomo some kakakosapo.

* ^{2:21:} Patakuni fasiakohoamo ira warupi paroaka rera ayíáka Yasu ipi ayíáka paroaka rekenapo. Asiasamo patakuni ira kesa karoamarera ayíáka isiapo ipiaki himu hakásaraka hemakapukua risikinapo.

Ipu some karakano hepene yapura hepene aporomo soko, aporo fanaraka risiamo soko, ipu suamo kaikia hemakapukusapo.

¹¹ Wate fana makata su kepomareasiraka, Yu aporo soko Yu aporohoanafonosane soko Kotiaki paoraka aporo ira hakásahoasimo, isiaipo Unihae Yasu Kereso kusua aeyaka makata ane Kotimo ipi asiapo. ¹² Asiamo isiaipo Yasuaki himu hakásaraka hemakapukua risiasamo Koti rea makeraka peakosane namonafapo. Kotiaki somehokosane karekekea somerafapo. Mapirarakra risike somerapo. ¹³ Asiamo repoko nōmo rakiane aporo metakiramo ano mokoatikirakano re himu faraka risikiakopo. Nōmo reane ararenasamo re mapirarakra risikiasimo nōmo hemakapurakaripo. Aiyaka hemakapusimo nōmo reaki somerakanapo.

Poremo kurikurisane oyapo.

¹⁴ Kotimo ayiakakosapo aiyaka hemakapukua somesane nōmo kaikia seseraka Koti Ataki suseraka kakuna porokoa kake Ataki kurikurirakanapo. ¹⁵ Hepene yapura soko hauaka wo soko kakimara aporo ira suane Kotimo ipi pasimaka yano motorakano, isiaipo suamo Kotiaki, Atao, airapo. ¹⁶ Koti ipi namo kakaro kárasasamo ipi Ho Kotesamo repo himu hemakapurane mawakapuhoasimo aiyaka nōmo kurikurirakanapo. ¹⁷ Repo eaki himu hakásaraka hemakapukua risikino Keresoane repo himua rekeasimo nōmo kurikurirakanapo. Repo namina yia himu tumurumo hemakapukua ainane ira pikinu paroaka apura ayiáka himu tumurumo hemakapukua paroaka risikiasimo nōmo kurikurirakanapo.

¹⁸ Asiamo sape aka soko, sape ro soko, taku ra soko, taku wo soko, yapura soko, atura soko, ayiáka Keresomo ipi aporo hinamo suaki himu tumurumo hemakapurane enonosa rekenafapo. Asiamo re Efesase aporo hinamo suamo soko, Kotimo aporo hinamo hauaka wo risia suamo soko, Keresomo himu tumurumo hemakapurane hemakapusimo nōmo kurikurirakanapo. ¹⁹ Keresomo himu tumurumo hemakapusuane namo kakaro kárasasamo isiaipo aiyaka hemakapusifareapo. Asiāne Keresomo himu tumurumo hemakapusuane repo asekea hemakapusimo nōmo kurikurirakanapo. Asiamo Keresomo himu tumurumo hemakapusuane reaki fasereperakano Kotimo koteaka ainane reaki komarukusapo.

²⁰ Kotimo wakapuane isiaipo himura reamo makata rakirapo. Isiaipo Kotiaki makata kaikia kurikurirakano, ipi wakapuamo makata kára rakirapo. Isiaipo hemakapusifasa nine epo sia rakisireapo. Ayiaka rakirakano Kotiaki kekererakanapo. ²¹ Asiamo Yasu Keresomo makata rakisia aeyaka Keresoa paosa aporo hinamo suamo Kotiane soko, Keresoane soko makáraraka hemakapukua kekemaraka risikinapo. Yumo soko keseke soko Koti kárupo, ayiáka Yasu Keresoa paosa aporo hinamomo yaiya kekereraka risikiakosapo. Ayiáka rakipe pusimo nōmo kurikurirakanapo.

4

Keresoa paosa aporo hinamo suane Keresomo ipi kau asiapo, aisane oyapo.

¹ Nōmo Kotipoko rakiane aporomo ano tipura makesapo. Tipura makesane reke reaki somerakanapo. Kotimo re pasimosa maiya amo epo someraka, “Koteaka hemakapukua rakiraka risikianie.” Aisa hakásá nine repo kekemaraka risikianie. ² Maiya suamo re hakásá hakásaraka né níane makama fanaraka risikiakopo. Aporo hinamo suaki tau auaraka hemakapukua risikianie. Metamo néaki mahisirane yaiya mahisiraka rekeno, nōmo eaki sapehoanafonoraka himu tumurumo hemakapukua rekeanie. ³ Re namina yia saperaka fasikia risikiakohoamo Ho Kotesamo re su himu hakásaraka risikiasimo ararerakanapo. Himu hakásaraka hemakapuramo isu suane isina hakásá kikinaraka risikinapo. Maiya suamo yaiya ayiáka risikiakosakipoko paroaka wakapuaka rakiraka risikianie.

⁴ Aporomano ipi hokono ipi korake suane oto hakásá yia area ayiáka, kakimara aporo hinamo su sarimaraka Keresomo ipi kau asiapo. Arirakano Ho Kotesa soko hakásapo. Arirakano keseke isu su Kotiyaki yaiya risikiakosa someane soko hakásapo. Asiamo

Kotimo ayiakakosaposane arirakarihoamo isu su kau risikinapo. ⁵ Arirakano Unihaeane soko hakásapo. Arirakano Yasuaki himu hakásaraka hemakapurane soko hakásapo. Arirakano hea tapukumarerane soko hakásapo. ⁶ Arirakano Koti soko hakásapo. Asiamo isiapo aporo hinamo suamo Atane ipipo. Ipi hákasa unihaeaka rekenapo. Ipi hákasa reyaki tipia rerapo. Ipi hákasa re himua rerapo.

⁷ Kotimo ipi yaku ararerane isu suaki kasapo. Kasane Keresomo parakuraka isuaki hakásaraka kasapo. ⁸ Arirakano Kotimo sawia popasane oyapo. “E yapura hisia maiya amo yunu wekea marokena aporo ayíáka* hisiapo. Hinaka aporo hinamoaki makata yaku kekepo kasapo.” Aiyaka somesane Yasuane popahoareapo. (*Buk Song 68:18*)

⁹ E yapura hisiapo, aisa amo kepoane oyapo. Kereso fana hauaka wo pesapo. Pekea nina keseke hepene yapura parihisiapo. ¹⁰ E pesane soko, hisiane soko, Kereso ipi hakásapo. Arirakano ti yapurane marokeraka, namo kakaro hepene yapura hisiapo. Hisia amo makata suane hurutapikia epo ipi kakaro marokesapo. Asiamo hepene yapurane soko, hauaka one soko, makata su koteaka risikiasimo epo ipi asekea rekeakosakipoko hisiapo. ¹¹ Arirakano epo makata rakirane, epo some kakimara aporo hinamomo rakisimo iaki wakapu ararenane yaku kasapo. Kasasamo aporo metakira tarira aporohoasimo murikimasapo. Aporo metakira porofete aporohoasimo murikimasapo. Aporo metakira Yasuaki risikiako pariraka some kape pura aporohoasimo murikimasapo. Aporo metakira paseto aporohoasimo murikimasapo. Aporo metakira tisa aporohoasimo murikimasapo.

¹² Kakimara aporo hinamo suamo Kotimo makata rakirane siaraka rakisimo Yasumo wakapu ararenane yaku kasapo. Karakano Kotimo aporo hinamomo makata kekepo rakiraka yia su sarimaraka rakirakan makata rakira suane mawakapuhokosapo. Asiamo Keresoa paosa aporo hinamoane Kereso ipi kaua sarimaraka risike i suane mawakapuhokosapo. ¹³ Mawakapuraka Yasu Keresoaki hemakapurane isiapo suamo himu hakásaraka hemakapusua hakásaraka nineraka risikiakosapo. Kotimo hokosamo ainane isiapo suamo himu hakásaraka hemakapukusapo. Asiamo himumo hemaka apuramo isuane rorahokosafapo. Sisimaraka hemaka apura ayíáka wakapuraka risikiakosapo. Kereso menane sisimaraka risike Keresomo ainane isiapo himua komarukua risikino, Kereso menane kakaro sisimaraka risikiakosapo.

¹⁴ Sisimaraka arisiamo hokosa arisia ayíáka risikiakosafapo. He kupamo kasu makepariakepariana ayíáka isu ayíáka risikiakosafapo. Aporomo kotafe someane kekemarape sape ro purakano sape aka hinakano ayiakakosafapo. Arirakano hasaka rakisimo aporo metakiramo isuaki mahoperaka kirimaraka somerakano, isiapo kaki-makosafapo. ¹⁵ Arirakano kakaro some hákasané isiapo kakimaka somehokosapo. Aporo metamo metaki himu pukua, metamo metaki himu pukua, ayíáka himu tumurumo hemakapusuane kararaka rakipe pukusapo. Ayíáka risikino Keresomo ainane káraraka risikiakosapo. Kereso ipiane unihaeapo. Ipi kaua isu su sarimaraka risikinapo.

¹⁶ Keresoaki isiapo kataka marekea risike isu hakásaraka risikinapo. Kiki kataka arisia ayíáka isiapo suamo Unihae Yasuaki kataka marekea risikinapo. Kataka marekea risike makata rakirane kekepo hakásaraka hakásaraka epo soko ipi rakirane rakikia, metamo soko epo ipi rakirane rakikia, ayíáka kekepo hakásaraka hakásaraka rakiraka risikinapo. Ayíáka rakiraka risikino, isu suane Keresoa sarimaraka risiasamo isu isina mawakapuraka kárahokosapo. Isiapo aporo hinamo suaki himu tumurumo hemakapukua risikinone ane, isu su Keresomo kaua hakásaraka risiane isu mawakapuhokosapo.

Isu Keresoaki kaweraka risiane oyapo.

¹⁷ Nōmo some one reaki paroaka somerakanapo. Unihae Yasumo yano motosa aeyaka nōmo reaki somerakanapo. Keresoa paohoanafonosa aporo hinamo arisia ayíáka re risikiakopo. Namina mokome hemakapukua arisia ayíáka hemakapukua risikiakopo. ¹⁸ Nena aporomo hemakapurane katosa ane hemakapurakanapo. Ipu Kotimo someane

* ^{4:8:} Yasu kusua maturikia taesa maiya amo Sataneane kakaro hurutapikia marokesapo.

kaiyako hisiraka kakaro himeteraka koaretaeraka risikinapo. Ayíáka risiasamo Kotimo ainane fasikia risikinapo.

¹⁹ Arirakano ipu makata kotesa soko, makata watikisa soko takekea hemakapurane fasapo. Hinamo hakimarane himu matumururaka himu pukua ayíáka makata watikisa susu rakiako seseraka risikinapo. Ayíáka ipu kaumó hemakapusua ane kekemaraka mapiraraka rakiraka risike kaiyanafapo.

²⁰ Re ayíáka risikiasimo Keresomo reaki some kasafapo. ²¹ Keresomo some kasane repo kaisiapo. Kakaro someane Yasumo reaki some karakano repo kakimasapo. ²² Asiasamo pasu paté horomaka mamakatena ayíáka, fana risia maiya amo repo makata watikisa ainane metakarikia mamakatehoanie. Fana makata watikisa aina amo re himuane maseseraka ayíáka rakikia risiamo re himuane mokoatikisapo. ²³ Yumo himumo hemakapurane kakaro makawehoanie. ²⁴ Pasu kawe osona ayíáka makata aina kaweane osohoanie. Makata kaweane Kotimo ipi aina aeyaka kepomaresapo. Makata aina kaweane oyapo. Ereketaeraka risike makata watikisa kikisiraka koteaka susu risikino, kakaro koteaka susu risikiakosapo.

²⁵ Asiamo yaiya kotafe hoakopo. Isu su Keresomo aporo ira hakasasamo ní maeaki kakaro hokoa somehoanie. ²⁶ Nómó saperaka reke sape marekea somehokopo. Pipu yia mituru sapesane saperaka reke maiya tukeakohoamo sapesane mafahoanie. ²⁷ Né himua Satanemo korakemo porokoa finihokosane hasaka koasimo, saperaka arirakano kotafe someraka ayíáka watikiaka rakirane mafahoanie.

²⁸ Hakimora aporo reo, fana repo makata nakosa soko pasu soko hakimosane yumo hakimokoakopo. Repo makata nakosa soko pasu soko mokoako koteaka rakinie. Rakikia makata moraka aporo makata forosane arareraka kakakosakipoko rakinie. ²⁹ Some watikisane akaimo somehokopo. Makotehoko ararena someane somehoanie. Aporo paripuko hemakapuraka risiane mawakapuhoko arareraka somehoanie. Aporo himu nekea umiraka risiane mawakapura someane somehoanie. Maiya suamo ararena someane somehoanie. ³⁰ Kotimo Ho Kotesamo hisihoasimo rakiakopo. Hisihoasimo somehokopo. Keseke Kotimo ipiyaki hakāsa yaiya risikiasimo isu pasimokoakosapo. Pasimokoakosane hemakapusimo Ho Kotesa isuaki kasapo. Ho Kotesane karaka, isu murikimasapo, aýaka isiapo hemakapusireapo.

³¹ Himu mahisinane soko, saperane soko tapare saperane soko metakarinie. Metaki kotafe makata topakamaraka somerane soko, me iriraraka somerane soko mainamarekea somerane soko metakarinie. Né mokoatikirakano nómó ropo mokoatikinane soko metakarinie. ³² Arirakano aporo metane repo kamenakaraka ararehoanie. Repo eane arareraka makotehoanie. Kotimo soko Keresomo soko repo watikisane mafáraka merarusapo. Mafáraka meraruna ayíáka repo soko aporo metamo néane mokoatikirakano nómó ropo mokoatikinafaraka mameraruhoanie.

“Faesa á risikianie.” Aisane oyapo.

¹ Reane Kotimo hokosapo. Asiasamo reane Kotimo himu tumurumo hemakapurakanapo. Reane epo ipi hokosasamo e area ayíáka risikianie. ² Repo aporo hinamo metane himu tumurumo hemakapurakano repo Yasu Keresoane kekemarakapanapo. Keresomo isu himu tumurumo hemakapuraka isupoko farimaka kusuapo. Fana makata watikisapoko apihoko saro sipi rukua pairakano sisápe yamoane yapura hirapo. Hinakano Kotimo sesesapo. Arirakano isiapo watikisapoko apiana ayíáka apihoko Yasumo farimaka kurakano Kotimo sesesapo.

³ Arirakano re Kotimo hokosasamo hinamo hakimako hemakapurane soko, himo asekea himu purane soko, metamo menane ano makaripi aýaka himu topakapurane soko, makata anane su metakarinie. Makata ane kakaro faraka rekeno, aporo hinamo metamo neaki topakamaraka somehokosafapo. Kotimo aporo hinamomo makata watikisane kikisiraka koteaka susu risikianie. ⁴ Hinamo hokomarekea somerane soko, ekene

meaka somerane soko, makata watikisa hokomarekea somerane soko somehokopo. Some ane repo somehoane siahoasifareapo. Arirakano repo Kotiaki suseaka somerane somehoanie.⁵ Arirakano hinamo hakimara aporoane soko, hinamo hokomaka somera aporoane soko, makatane ano makaripi aiyaka himu tumurumo hemakapukua rera aporoane soko, aporo asiane su Koti rea hauaka á hiakosafapo. Aporomo hinamo soko metao, makata metane soko metao mako himu tumurumo hemakapukua reke, Kotiaki himu tumurumo hemakapurakanafapo. Kotiane hemakapunafonoraka makata metane makáraraka rekeno, aporoamo makata ane Koti pariraka kekereraka makárarakanapo. Aporo ayíáka reane namo kakaro Koti rea hauaka á hiakosafapo.

⁶ Asiamo repo namina makata ainane koteaka asekea hemakapukua risikianie. Repo watikiaka rakisimo aporomo mokome me rukua kotafe somerakano, someane kaiyakopo. Kotafe someane aporomo kaikia Kotimo someane koaretaeraka watikiaka rakira, aporoaki Kotimo saperane kakakosapo.⁷ Kotimo someane koaretaeraka kotafe somera aporoane kekemahokopo. Aporoaki himu hakásaraka hemakapukua risikiakopo.⁸ Fana re katosa á risiapo. Asiáne yumo Unihae Kotiaki risikiako pariraka, reane faesa á risikinapo. Asiamo Kotimo aporo hinamoane faesa a risira ayíáka re soko ayíáka maiya suamo faesa á yaiya risikianie.⁹ Kakama faesa á risike ira wate sakepamo perapo. Aina ayíáka isu faesa á risike kakaro koteaka risikiakosapo. Ereketaeraka risike kakaro somerane susu repo somehokosapo.¹⁰ Arirakano repo Kotiane sesehoasimo makata kotesa ainane hemakapukua rakinie.¹¹ Hemo sunumo karotapiraka makata koteaka parunafapo. Aina ayíáka aporo hinamo katosa á risike ipu rakirane watikiaka rakirapo. Asiamo iyaki sarimaraka hakása risikiakopo. Ipu watikiaka rakisiane aporo hinamo suamo kaiyisimo repo makakamaraka somehoanie.

¹² Arirakano aporo hinamo metakira katosa á risike makata kaýasa watikiaka rakisiane isiapo akaimo somerakano kaýaraka hisihokosapo.¹³ Aporo hinamo katosa á risike watikiaka rakisiane repo makakamaraka somerakano, ipu watikiaka rakisiane kakaro hemakapukusapo.¹⁴ Asiamo aporoamo watikiaka rakisiane metakarikia, faesa á risikiako poparipeakosapo. Asiamo fana aporo metamo someraka, "Aporo kusua asiane turisie. Aporo wakakesane turisie. Ayíáka turikia purakano Keresomo faesane reaki kakakosapo," aiyaka somesapo.

¹⁵ Repo namina makata ainane koteaka asekea hemakapukua risikianie. Aporo makata kotesa takekea hemakapunafonoraka arisia ayíáka risikiakopo. Aporo koteaka takekea hemakapukua arisia ayíáka risikianie.¹⁶ Maiya omo aporo hinamo metakira watikiaka risikinapo. Watikiaka arisiamo ikia koro mapirira ayíáka mapirikia risiapo. Asiane maiya omo Kotimo ikia koroane ropakamaka Yasuane hemakapusimo, repo epo ainane rakikia, epo someane soko repo some kakanie.¹⁷ Kotimo hemakapusuane repo meraruraka himetehokopo. Ipi hemakapusuane soko, ipi makata rakirane soko, repo rakisimo maresane soko repo koteaka kokoa takekea hemakapukua risikianie.

¹⁸ He watikisa nenaka masuaraka arisia ayíáka risikiakopo. He watikisamo himu faremarekea kakaro watikiaka mokome koraka risirapo. Arirakano Ho Kotesa re himua komarukua risikiasimo rakinie.¹⁹ Repo namina yia some kakakosakipoko, Kotimo ipi someane Same pukua (Buk Song) á popasa aeyaka somehoanie. Arirakano kurikuri keraka kesarane kesahoanie. Arirakano repo kesa metakira Ho Kotesamo reaki hokokarakano kesahoanie. Himumo hemakapukua Unihae Kotiaki yaiya kekereraka kesanane kesahoanie.²⁰ Maiya suamo makata supoko Ata Kotiaki susehoanie. Unihae Yasu Keresomo yano motosane hemakapukua Kotiaki susehoanie.

Aporo ipi hinamo tati risikiakosane oyapo.

²¹ Repo Keresoane hemakapuraka, Keresoa paosa aporo hinamo metamo somerakano someane soko kaiyinie.²² Hinamo, nómo Unihae Kotiaki hemakapuraka epo someane kakiamara ayíáka ní aporo pusuamo someane soko kakimakanie.²³ Asiamo Keresoa paosa aporoane Keresomo unihaeaka asekea area ayíáka, hinamo né soko, ní aporo pusuamo ayíáka unihaeaka asekea rekenapo. Keresoa paosa aporo hinamoane Keresomo

ipi kau asiapo. Iane Keresomo mafasisiapo. ²⁴ Arirakano Keresoa paosa aporo hinamomo someraka, “Yasuo, né unihaeaka rekenapo. Nómō someane nómō kakimaranakanapo.” Aíyaka somehora ayíáka hinamo repo soko repo aporo pusuaki someraka, “Né unihaeaka rekenapo. Nómō some suane isiapo kakimaranakanapo.” Aíyaka hinamo repo somehoanie.

²⁵ Keresomo ipiaki paosa aporo hinamopoko farimaka kusuapo. Iane himu tumurumo hemakapuraka kusuapo. Asia ayíáka aporo repo soko namina hinamoane himu tumurumo hemakapunie. ²⁶ Keresoa paosa aporo hinamomo makata watikisane kikisiraka koteaka susu risikiasimo Yasu kusuapo. Aporo hinamomo makata watikisane kosoraka mafahoasimo hea tapukumurikia, arirakano Kotimo someamo soko makata watikisa kosoraka mafanapo. ²⁷ Arirakano aporo hinamo kau keré, neketasia arisia ayíáka, isiapo watikiaka hemakapukua rakiane siahoasifareapo. Asiane Keresoa paosa aporo hinamo ereketae koteaka susu risikiasimo Kereso kusuapo. Isu pasimokoakosa maiya amo isu faeraka makata eresa wakasema soko risikianafonoraka, kakaro koteaka susu risiane epo pasimokoakosapo.

²⁸ Asiamo aporo nómō ní kau himu tumurumo hemakapura ayíáka, ní hinamoane soko ayíáka himu tumurumo hemakapunie. Ní hinamo himu tumurumo hemakapuraka ní níane soko himu tumurumo hemakapurakanapo. ²⁹ Aporomo e ipi kauane hisiraka rerafapo. E ipiane makata nakosa kaka, ipi kau koteaka asekea rerapo. Aina ayíáka Keresoa paosa aporo hinamoane soko Keresomo asekea rerapo. ³⁰ Kereso ipi korake ipi hokono ipi kau asiane isupo. Asiasamo epo isu asekea rekenapo.

³¹ Kotimo sawia popasane oyapo. “Aporomo ipi ata ipi ama metakarikia hinamo arumaka tati kau hakásaraka risirapo.” Aíyaka popahoareapo. (Stat 2:24)

³² Popasa amo takume some kepoane kakaro káraro. Someamo kepoane Kereso ipiaki paosa aporo hinamoane kau hakásaraka risikinapo. ³³ Asiamo aporo repo soko hakásaraka nómō níane himu tumurumo hemaka apura ayíáka ní hinamoane soko himu tumurumo hemakapunie. Hinamo né, ní aporomo né unihaeaka asekea rekeno, epo someane nómō kaikia eane makotehoanie.

6

“Hokosaki soko ipi atape ama tetákí soko uyáka risikianie,” aisane oyapo.

¹ Hokosao, nómō Unihae Keresoaki hemakapukua kataka marekea reke ní atape ní ama tetapō someane kakimakanie. Kakimaka ainane ereketaesapo. ²⁻³ Arirakano Kotimo ipi somemané Moseseaki someaka maresane oyapo. “Ní atape ní ama tetáne hemakapukua makotehoanie.” Aíyaka someaka maresapo. Somemané one repo metamo kakimaka kekemarakano, Kotimo eane makotehokosapo aisapo. Makotehokosapo aisa amo kepoane oyapo. Somemané one metamo kakimaka rekeno, e hauaka wo keremisi karamo koteaka susu rekeakosapo. Arirakano Kotimo makotehokosapo, aisapo. Kotimo somemané one aporomano metamo kekemarakano, Kotimo e makotehokosapo, aisapo. Kotimo somemané one mareasiraka somemané metakira murisiane aporomo kekemarakano Kotimo eane makotehokosapo aisafapo. Kotimo somemané akiyaki Kotimo makotehokosapo, aisa akiyaki sarimaraka, somemané one fana someaka maresapo. (Kisim Bek 20:12; Lo 5:16)

⁴ Hokosa wafayao, nómō ní hokosamo sapehoasimo matewa marekea me iriraraka some kakakopo. Ní hokosa sisimaraka koteaka rekeasimo hokosane Unihae Kotimo asekea reke atarira ayíáka, nómō ní hokosane ayíáka asekea reke tarinie. Hokosane Kotimo maropona ayíáka nómō soko ayíáka maropohoanie.

Aporo raipa roposaki soko, aporo raipa roposa amo aporo asekea reaki soko someaka maresane oyapo.

⁵ Aporo raipa roposa repo hauaka wo aporo asekea risiamo someane kakimakanie. Re asekea risia aporo namina kárásasamo, ipu someane kakaro kaikia hemakapukua risikianie. Iaki himu hakásaraka hemakapukua rakinie. Repo Keresopoko arakira ayíáka, repo asekea risira aporopoko ayíáka rakinie. ⁶ Aporo asekea risiamo sesehoasimo ipu

asekea arisia maiya amo wakapuaka rakikia, arirakano asekea risikinafonona maiya amo wakapuaka rakianafonorakanone ane siahoasifareapo. Re Keresomo aporo raipa roposa risiasamo maiya suamo koteaka rakinie. Kotimo hemakapusuane kekemaraka himumo seseaka rakinie.⁷ Repo arakira maiya amo seseaka rakiraka kakaro koteaka rakinie. Repo aporopoko hákasa rakiakopo. Unihae Kotipoko rakinie.⁸ Aporo hinamo suamo makata rakirane aporo raipa roposa soko, aporo raipahoanafonosa soko ipu suamo makata rakirane Unihae Kotimo aseakosapo. Asekea koteaka rakirakan asekea, makata ropo kotesa kakakosapo.

⁹ Aporo asekea risiao, repo soko aporo raipa roposane koteaka asekea risikianie. Manamona someane somehokopo. Ipu Unihaeane soko repo Unihaeane soko hakásáiyapo. Hakásá nine ipi hepene yapura rekenapo. Aporo meta yano motosa kára ane mahimuraka aporo meta yano motosa kárahoanafonosane mahimuhoanafonoraka Kotimo anafapo.

Kotimo yunu weakosa makatane mokoanie, aisane oyapo.

¹⁰ Nōmo some fahokosakipoko some wakasema meta oyapo. Unihae Kotiaki himu hakásaraka hemakapukua risike epo wakapuane mokoa risikianie. Epo wakapuane mokoa kakaro paroaka wakapuaka risikianie.¹¹ Kotimo ipi yunu weakosa makatane karakáno mokoa risikianie. Satanemo re mahoperaka wasere morakanone, epo wakapuane repo rukua mosaka tapiako mokoa risikianie.

¹² Aporomanoyaki weraka risikinafapo. Hauaka wo katosamo unihae Sataneaki soko, ti yapura ho kekepo watikisa risiaki soko, hauaka wo yakasa ho, yatafu risiaki soko, i suaki weraka risikinapo.¹³ Ayiakakosasamo Kotimo yunu wera makatane su mokoa risikianie. Mokoa risiakipoko watikisa maiya ane fasereaperamo, ipu reyaki werakano, re teketariakosafapo. Re fimiti patera sapea pukusafapo. Yunu wekeea faraka paroaka wakapuaka yaiya risikiakosapo.

¹⁴ Weakoana maiya amo ira rokopa mena asi mena tare mena ane mokoa sarimana ayíáka Kotimo yunu weakosa makatane mokoa sarimahoanie. Terakae hira asiane kakaro some ayapo. Kawa karerapaka makata mataina asiane ereketae rera ayapo.

¹⁵ Tamaka osona asiane, Keresomo tau auaraka mapiraraka rerane kakasimo some kotesa some kará ayapo.

¹⁶ Asi asiane Yasuaki himu hakásaraka hemakapura ayapo. Yasuaki himu hakásaraka hemakapukua reke, Satanemo tare ira rufiyaki perakano, asimo rukua topakataeana ayíáka Satanemo kotafe someane repo rukua topakataehokosapo.¹⁷ Hati parosa karotapira asiane Yasumo re mafasisia ayapo. Yasumo re mafasisiane kakimaka risikianie. Ira rokopa asiane Kotimo some ayapo. Someane Ho Kotesamo reaki some karakarakano kaikia, yunu aporoane ira rokopamo akarera ayíáka Kotimo someamo yunu aporoane kareanie.¹⁸ Maiya suamo Kotiaki kurikurihoanie. Kurikuriraka, “Koti nōmo isu ararehoanie,” aíyaka kurikurihoanie. Maiya suamo Ho Kotesamo reaki somerakano, somesa hakásá yine Kotiaki kurikurihoanie. Kotimo aporo hinamo suane epo ararehoasimo maiya suamo farimaka kurikurihoanie. Himu hemakapuramo himu hakásaraka hemakapukua wakapuaka risike kurikurihoanie.

¹⁹ Repo ano soko farimaka kurikurihoanie. Kotimo ipi someane anoaki some karakano, nōmo kakama mapiraraka koteaka somehoasimo kurikurihoanie. Yasumo isu mafasisiapo. Aisa amo kepoane fana mahamesapo. Mahamesane yumo aporomo Yasuane hemakapusimo some kotesane mapiraraka namonafaraka some kakasimo repo anopoko kurikurihoanie.²⁰ Aporo hinamomo Yasuane hemakapusimo some kotesa some kakako Kotimo ano pusiesapo. Yumo ano tipura rekenapo. Some akara maiya amo ano namonafaraka wakapuaka reke some kakasimo repo kurikurihoanie.

Poremo ayapasane oyapo.

²¹ Tíkikase ane nōmo nī mae asiapo. Epo Unihae Kotimo rakirane rakiraka reke metakarirafapo. Anoane epo reaki somehoko peakosapo. Nōmo ainane repo hemakapusimo epo reaki somehoko peakosapo. ²² Isu uyáka risikinapo, aiyaka epo reaki somehoasimo pusierakanapo. Re himu fanapaka paroaka mapiraraka risikiasimo epo somehoko pusierakanapo. ²³ Re auaraka risike himu tumurumo hemakapukua risike, Kotiaki himu hakásaraka hemakapukua risikiasimo Koti Atamo re ararehoasimoripo. Unihae Yasu Keresomo soko re ararehoasimoripo.

²⁴ Unihae Yasu Keresoaki kakaro yaiya himu tumurumo hemakapukua risira aporo hinamoane Kotimo hemakapukua yaku ararehoasimoripo. Kakaroripo. Ayapa, ano Porepo.

Firipai

Firipai sawi one mahemakapukusa someane oyapo.

Pore kimisi puraka Masetónia hauaka á Firipai taonea, aporo hinamomo Yasuane hemakapusimo some karakano aporo hinamo yakaimo kakimasapo. Firipai taonea Keresoa paosa aporo risiamo Poreane himu tumurumo hemakapuraka, Poreane arareraka mone kasapo.

Keseke Pore Rome sitia tipura makekea reamo, Firipai aporomo mone sarimaraka Pore kakasimo Epafarotaétaseaki karaka maka pusiesapo. Poremo Firipai aporo hinamoaki suseaka sawi one popasapo. Poremo poparaka Epafarotaétaseaki karakano epo maka pusuapo.

Firipai sawia some kepo parakuraka popasane oyapo.

1:1-2 Poremo sawi one kepomarekea popasapo.

1:3-11 Poremo iane hemakapukua Kotiaki suseraka, ipoko farimaka kurikurisapo.

1:12-30 Pore tipura reke hemakapuraka, “Ano kurakano Yasuyaki yaiya rekeakosapo.

Ano hitafe reke Yasumo makata rakirane yaiya rakiraka rekeakosapo,” aiyaka hemakapusuapo.

2:1-11 Yasuane hauaka wo reke epo ipiane makararaka rakisiafapo. Repo soko aiyaka hemakapukua risikianie, aisapo.

2:12-18 Re Keresoa paosa aporo hinamo hauaka wo risike, repo faesa kotesane tarinie, aisapo.

2:19-30 Re arisia Timotiane soko Epafarotaétaseane soko pusiehokosapo, aisapo.

3:1-11 Kotafe tisa aporomo somerakano, repo kakimakopo, aisapo.

3:12-21 Keresomo someane kekemaraka kepoa naohokosakipoko yaiya rakiraka risikianie, aisapo.

4:1-9 Makata some metakira repo kaikia hemakapukua risikianie, aisapo.

4:10-20 Firipai aporo hinamomo Poreane mone karakano, Poremo susesapo.

4:21-23 Poremo ayapasapo.

Keresoa paosa aporo hinamo Firipai taonea risiaki Poremo sawi poparaka makesane oyapo.

¹ Firipai taonea Keresoa paosa aporo hinamo re su risiaki ano Poremo sawi one poparaka makerakanapo. Re asekea risira aporoaki^{*} soko, re tikone aporoaki soko, re suki ano Poremo sawi one poparaka makerakanapo. Timoti anoyaki hakāsa reke ano ararerakano sawi one reaki poparaka makerakanapo. Timoti eto Yasu Keresopoko makata rakira aporopo. ² Yasu Keresoane isiapo Unihaepo. Kotiane isiapo Atapo. Tetapō re makoteraka re mapiraraka tau auaraka risikiasimo nōmo kurikurirakanapo.

Keresoa paosa aporo hinamo akipoko Poremo kurikurisane oyapo.

³ Re Firipai aporo hinamoane nōmo hemaka apura maiya amo nōmo Kotiaki suserapo.

⁴ Nōmo reane hemakapukua kurikuriana maiya amo seseaka kurikurinapo. ⁵ Asiamo repo Yasu hemakapusimo nōmo some kotesane kepmarekea some karakano repo kakimasapo. Kakimasa maiya amo repo ano arareraka aporo hinamo metakiraki some karakasupo. Some kotesa ane isina hakāsa some kape pekea pipu wo paurakanapo. Asiasamo nōmo Kotiaki suserakanapo. ⁶ Nōmo hemakapuane, repo himumo koteaka hemakapukua rakismo Kotimo reaki kepmarekea tarisiapo. Asiamo repo rakipe pukua Kereso pariapera maiya amo rakikia makosapo. Aiyaka nōmo hemakapurakanapo.

⁷ Maiya suamo nōmo reane himu tumurumo hemakapurakanapo. Ano tipura makerakano yia soko, ano hukururakano soko, nōmo meaka taeraka someana maiya amo soko, “Kotimo someane kakaro somepo,” aiyaka tarikia somesa maiya amo soko, maiya suamo repo anoyaki kikinarako Kotimo makata rakirane isina hakāsa rakisiapo. Kotimo isu

* 1:1: Asekea risira aporo ane paseto aporopo.

murikimaraka epo ipi makata rakirane wakapuaka rakisimo Kotimo isu yaku araresapo.
⁸ Yasu Keresomo reane himu tumurumo hemaka apura ayíáka nōmo soko reane himu tumurumo hemakapurakanapo. Ano reyaki hakāsa rekeakoripo. Aíyaka hemakapurane Kotimo aserakano nōmo kakaro somerakanapo.

⁹ Asiamo repoko nōmo kurikurirane oyapo. Repo namina yia himu tumurumo hemakapurane káraraka hemakapukua risikiasimo nōmo kurikurinapo. Arirakano repo namina yia himu tumurumo hemakapukua risike, Kotimo makata ainane hemakapurusapo. Kotimo makata ainane hemakapuraka makata ereketaesane soko, makata watikisane soko takekea hemakapurusapo. ¹⁰ Ayíáka hemakapuraka, raraponane metakarikia, kakaro makata kotena susuane takekea hemakapukua kekemahokosapo. Koteaka susu risina Yasu pari apera maiya amo aporomo reaki hukurusuane kakenafapo aihoasimo kurikurirapo. ¹¹ Repo makata ainane Yasumo makoteraka ararerakano, Kotimo hemakapura ayíáka, repo ayíáka hemakapukua, ereketaeraka risikiakosapo. Ayíáka risikino aporo metakiramo asekea Kotiane makáraraka kekerehokosapo. Ayikasimo nōmo kurikurirakanapo.

Pore tipura reamo, aporo hinamo yakaimo Yasumo someane kasiane oyapo.

¹² Keresoa paosa aporo maeo, repo hasaka hemakapukohoamo makata one nōmo reaki somerakanapo. Rome aporomo ano tipura makerakano, aporo hinamomo Yasu Kereso hemakapusimo some kotesane some kayane ipu matasohokosapoko asiāne, kakaro matasosafapo. Yasumo someane yaiya some karakano, aporo hinamo yakaimo kairakanapo. Some kotesa amo kakaro suaka taerakano, ¹³ Rome kamanimo Unihae Sisamo apea ame aporo asekea risiamo soko, aporo metakira Rome sitia risiamo soko, ipu kaiyiáne Yasu Keresoane nōmo some kasasamo ano tipura makesapakano ipu kairakanapo.

¹⁴ Ano tipura makesa area amo, Keresoa paosa aporo maemo himu namoraka fofara faraka, Kotimo someane aporo hinamoaki wakapuaka some karakanapakae. Kotimo some kaiyako hisisa aporoaki ipu karekekea namona faraka, some karakanapakae. Ipu aseane, ano Pore tipura reane Kotimo ararerakano, ipu asekea hemakapuraka, "Kotimo Pore ararena ayíáka isu soko ararehoasireapo," aíyaka ipu Kotiaki himu hakásaraka hemakapurakanapakae.

¹⁵ Arirakano Keresoa paosa aporo metakiramo anoaki kakanakeraka hemakapuraka, "Pore ipi tarira aporo káraraka reane, isiapo e mahurutapikia isu isina káraraka risiki-akosapo," aíyaka hemakapukua, ipu Kotimo someane some karakanapakae. Arirakano Keresoa paosa aporo metakiramo, anoaki koteaka hemakapukua risike, Kotimo someane some karakanapakae. ¹⁶ Ipu aseane, aporo hinamomo Yasu hemakapusimo nōmo some kasakipoko ano tipura makesekeno asekea, ipu anoaki himu tumurumo hemakapukua, Kotimo someane some karakanapakae.

¹⁷ Asiāne aporo metakiramo namina yano motosa makárahokosakipoko, aporo hinamomo Yasu hemakapusimo some kotesane some karakanapakae. Ayíáka some akarane ano tipura rekeno, ipu anoaki makata umisane kakakosakipoko hemakapurakanareapo. ¹⁸ Ane soko siapo. Ayakarie. Ipu namina yano motosane makárahokosakipoko hemakapukua, Yasu hemakapusimo some akarane soko metao, aporo metakiramo namina kakaro Yasuaki himu tumurumo hemakapukua Yasu hemakapusimo some akarane soko metao, ipu suamo Yasu hákasané some karakanapo. Asiamo ano seseaka mapiraraka rekenapo.

Poremo hemakapuraka, "Ano hitafe reke, reane ararehoko hemakapurakaripo," aisane oyapo.

¹⁹ Repo anopoko farimaka Kotiaki kurikurirakanano, Yasu Keresomo Ho Kotesamo ano ararerakano ano tipura makesane Kotimo ano makotehokosapo. Asiamo ano seseraka rekenapo. ²⁰ Asiāne nōmo úyaka hemakapurakanapo. Nōmo nī makata rakira akipoko ano kaiyahoko hisiripo. Ano himu namonafaraka nōmo maiya suamo Keresoane makamafanasa ayíáka, yumo soko ano tipura areamo, Keresoane makamafanaraka rakiraka

rekeakoripo. Yumo soko, keseke soko, yaiya Yasu Keresoane makáraraka rakiraka rekeakoripo. Aíyaka nōmo hemakapurakanapo. Ano akura maiya amo ayiakakosane soko, ano hitafe area amo ayiakakosane soko, Yasu Keresoane nōmo makáraraka makama fanahoko hemakapurakaripo.

²¹ Asiamo nōmo hemakapusuane oyapo. Ano hitafe areamo nōmo Yasu Kereso hákasa makamafanahoko hemakapukua rekenapo. Arirakano ano akuramo soko, Kotimo anoane namo kakaro makotehokosapo. ²² Asiāne ano hauaka wo hitafe area maiya amo, nōmo Keresomo makata rakirane rakiane, ira wate sakepamo apera ayiáka perakano, asekea, ano seserakanapo. Asiamo ano kukusane soko hitafe rekeakosane soko kotehoasireapo, aíyaka nōmo hemakapurakanapo. Asiasamo nōmo mayiaka hemakapunarakapo. ²³ Nōmo hemakapusua meta mane kotesare? Ano akuramo Yasu Keresoyaki hepene yapura yaiya rekeakosane namo kakaro kotesapo. ²⁴ Asiāne ano kau hitafe areamo nōmo reane ararehoko hemakapurakaripo. Nōmo reane ararehoko hemakapusuane kakaro kárapo.

²⁵ Asiamo nōmo hemakapusuane, nōmo re ararehokosakipoko Kotimo ano asekea rekeno, ano yumo kukusafapo. Ano hauaka wo areamo repo Yasuaki himu hakásaraka hemakapurane soko, repo sesenane soko kárahoasimo reane nōmo ararehokosapo.

²⁶ Asiamo keseke ano tipura reane tonotaerakano, ano re arisia aperamo repo anopoko Yasu Keresoaki kekereraka makárahokosapo.

Aporo metakiramo reane mokoatikirakano namonafaraka, himu hakásaraka risikianie, aisane oyapo.

²⁷ Arirakano repo Yasu Keresoane hemakapukua epo some kotesane kakimaka risi-asamo, re kakimara aporo arisia ayiáka risikianie. Re nōmo aseako peraka soko metao, aseako peanafonoraka soko metao, re su himu hakásaraka risike, Kotimo someane yaiya kekemaraka risikinapakano nōmo kaiyako seseripo. Kotimo some kotesane metakarirapaka repo himu hakásaraka some karakanapakano, nōmo kaiyako seseripo. ²⁸ Arirakano re mokoatikina aporoane namohokopo. Aporo metakiramo someraka, “Mokoatikina aporomo reane manamorakanafapo,” airakano nōmo kaiyako seseripo. Re namohoanafonorakano, ipu asekea hemakapuraka, “Kotimo isu marutaeraka fahoasireapo. Kotimo iane mafasirakanapo,” aíyaka Kotiaki yununa aporomo hemakapusapo. Re namohoanafonoraka risikino, Kotimo reane mawakapuraka arareraka mafasiakosapo.

²⁹ Kaisie, repo Yasuaki himu hakásaraka hemakapusimo, Kotimo re murikimaka maresapo. Arirakano Keresopoko re mokoatikirakano himu nakosane soko Kotimo murikimaka maresapo. ³⁰ Fana ano Firipai taonea reamo, Kotiaki yununa aporomo ano mokoatikirakano repo asesapo. Yumo soko Kotiaki yununa aporomo ano mokoatikirakanaporakano, repo kairakanapo. Ano mokoatikina ayiáka reane soko ayiáka mokoatikirakanapo.

2

“Repo namina himu hakásaraka risike, aporo hinamo suane makotehoanie,” aisane oyapo.

¹ Re su Yasu Keresoaki kataka marekea risikino, re paroaka risikiasimo Yasu Keresomo re ararenapo. Arirakano Yasu Keresomo reakti himu tumurumo hemaka apuramo re kamenakaraka ararenapo. Ho Kotesane reyaki hakása reke, re namina kikinaraka risikiasimo ararenapo. Arirakano repo namina yia kamenakaraka hemakapusimo Ho Kotesamo ararenapo. ² Asiamo repo namina yia himu hakásaraka hemakapukua risikianie. Repo himu hakásaraka hemakapukua risike, namina yia himu tumurumo hemakapukua risikianie. Arirakano repo himu hakásaraka hemakapukua rakiraka risikianie. Repo ayiáka rakiraka risikino, nōmo asekea sesehokosapo.

³ Arirakano aporo metamo re asekea kekerehoasimo rakiakopo. Re namina rupiaka makárahoko rakiakopo. Repo úyaka hemakapunie. “Ano kesekepo. Aporo metakirane namina fanapo.” Aíyaka hemakapunie. ⁴ Repo namina menane hákasa hemakapukua rakiakopo. Aporo metakirapoko soko hemakapukua rakinie.

Yasu Keresomo ipi yano motosane makárahoanafonoraka reane oyapo.

⁵ Yasu Keresomo hemakapura ayíáka, repo soko ayíáka hemakapukua risikianie.
⁶ Yasuane kakaro Kotipo. Koti Yasu tati siasapo. Siasi nine Yasumo ipiane makárasafapo.
⁷ Ipi soko Kotiraka reanine ipi fanaraka reafapo. E ipiane aporo raipa pariraka reapo. Aporomanomo kauane maka pekea ipi apororaka reapo. ⁸ E ipiane makáraraka unihae pariraka reafapo. E ipiane makárahoanafonoraka reke, Kotimo someane hákasa kakimaka rakiraka rekeno, aporomo e rusua kusuapo. Yasu Keresoane ira matapesa paremarekea rusua kusuapo. Kukusane epo waesafapo. ⁹ Yasumo anakano asekea, Kotimo eane makárasapo. Yasuane hepene yapura káraraka reke makata su asekea rekenapo, aýaka Kotimo someaka motosapo. Yasu Keresomo yano motosane fanapo, aýaka Kotimo makamafanaraka maresapo. Aporo hinamo suamo yano motosane kesekepo, aýaka Kotimo someaka motosapo.

¹⁰ Asiasamo Yasu yano motosane yano honakano suamo kakuna porokoa toke e kekere-hokosapo. Hepene yapura makata risiamo soko, hauaka wo makata risiamo soko, hauaka tamo atura makata risiamo soko, suamo kakuna porokoa toke eane kekerehokosapo.
¹¹ Ipu kekereraka someraka “Unihae kárane Yasu Kereso ipipo,” aihokosapo. Aýaka Yasuaki kekereraka, Ata Kotimo yano motosane soko makárahokosapo.

“Hauaka wo aporo hinamo katosa á risikino, repo faesane tarinie,” aisane oyapo.

¹² Asiamo re uyáka risikianie. Hameo, ano reyaki hakása rekesuamo, nōmo someane repo kakaro kakimarakasupo. Kakimasa ayíáka, yumo soko, yaiya kakimaka risikianie. Ano reyaki rekeanafonarakano soko, nōmo reaki fana somerakasuane meraruhokopo. Yaiya rakiraka risikianie. Kotimo re fana mafasisiapo. Mafasisiane metakariakopo. Mafasisiane kakaro makosakipoko wakapuaka rakiraka risikianie. Metakarirapaka namoraka risikianie. ¹³ Arirakano Kotimo ipi sesenane repo rakiako hemakapusimo, epo reane mahemakapurakanapo. Repo makata rakirane soko, kakaro rakisimo epo re ararenapo.

¹⁴ Makata rakiniesane mahisiraka me úraka someraka tafatrafanafaraka seseaka rakinie. ¹⁵⁻¹⁶ Repo ayíáka rakiraka risikino, repo ereketaeraka rakiraka risikiacosapo. Re Kotimo hokosa risike watikiaka rakiacosafapo. Arirakano hauaka wo aporo hinamoane ereraka katoraka watikiraka risikinapo. Ipu kotafe horaka risikinapo. Iaki repo Kotiyaki yaiya rekeakosa someane repo iaki some karakanapo. Arirakano ti makata faeana ayíáka, repo faesane aporo ereraka katoraka risiamo asekosapo. Re faeraka yaiya risikino asekea, Yasu pariapera maiya amo ano Poremo someraka, “Re faeraka yaiya risikino, nōmo reyaki fana makata rakisiane, nenakamaka rakifareapo. Nōmo wakapuamo nenakamaka rakifareapo,” aihokosapo.

¹⁷ Pirisiti aporomo* makata yaku Kotiaki akara ayíáka, repo himu hakásaraka hemakapurane Kotiaki ayíáka yaku karakanapo. Arirakano ano rusua kurakano ano yapi pusuan Kotiaki ayíáka kakacosapo. Ano yapi pusua akiyaki, repo makata yaku akará akiyaki, Kotiaki kayane siahoasireapo. Ano rukua yapi purakano ano sesehokosapo. Re soko sesehoasimoripo. ¹⁸ Asiamo ano soko re soko sesehokosapo.

“Poremo Timotiane Firipai taonea pusiehokosapo,” aisane oyapo.

¹⁹ Unihae Yasumo aorakano, maiya wakasema nina, Timotiane re arisia nōmo pusiehokosapo. Timoti pukua, re risiane asekea pariperaka, anoaki somerakano, nōmo kairaka sesehokosapo. ²⁰ Nōmo re koteaka risikiasimo hemaka apura ayíáka, Timotimo soko reane ayíáka kakaro hemakapurakanapo. Reane hemakapukusa aporo metakira wo risikinafapo. ²¹ Aporo metakiramo ipu namina yine hákasa hemakapurakanapo. Yasu Keresopoko makata rakirane ipu hemakapurakanafapo.

* ^{2:17:} Yasu peasiraka pirisiti aporomo Kotiaki makata yaku karaka, saro sipi kaua waene he rekemarekea, Kotiaki yaku karapo. Yasu kusua maiya amo makata ane metakarisapiro.

²² Timotimo koteaka rakirakano repo asesapo. Hokosamo ipi wafaya ararena ayíáka Timotimo ano arareraka iti hakása risike, aporo hinamo metakiramo Yasu hemakapusimo some kotesane some kasapo. ²³ Fana anoaki yakapa fasereperakarihoamo asekonapó. Aseke aseke Timotiane re arisia pusiehokosapo. ²⁴ Ano soko Kotimo ararerakano, reane aseako peakosapo, aíyaka hemakapurakaripo.

Poremo Epafarotaétase ane Firipai taonea pusiehokosaposane oyapo.

²⁵ Yumo Epafarotaétaseane re arisia nōmo pusiehokosapo. Epafarotaétaseane Keresoa paosa samo eane nōmo maepo. Eto iti hakása rakiraka risike, himu hakásaraka Kotimo yunuane werakanapo. Fana eane repo ano rea pusierakano perakasupo. Repoko epo ano ararerakasupo. ²⁶ E pekea o reke, makata takamarakasupo. E makata takamasapakano repo kaisiapo. Repo kairaka, epoko himu nekea risiapakae. Asiamo Epafarotaétasemo kára hemakapurukua rekeno, nōmo eane re arisia pusiehokosapo.

²⁷ Arirakano e makata takamasane namo kakaro kusuahopo. Kotimo ano makata umisa meta kakako hisiraka, e makata takamasane mafasapo. Mafaraka Epafarotaétaseaki soko, anoaki soko Kotimo namo kakaro kára kamenakaraka araresapo.

²⁸ Asiamo yumo Epafarotaétaseane re arisia nōmo pusierakanapo. E perakano aseke aseke repo sesehokosapo. Repo seserakano nōmo soko sesehokosapo. E purakano nōmo hisihokosafapo. ²⁹⁻³⁰ Asiamo repo Keresoa paosa aporo mae Epafarotaétaseane perakano aseke, seseraka pasimakanie. Epo Yasumo makata rakiraka reane e makata takamaraka kusuahopo. Repo ano ararehoko peakosapoko asiāne, re su peane siahosifareapo. Siahosifasekeno repoko epo ano arareraka pesane, kusuahopo. Arirakano aporomo Unihaeane makama fanaraka hemakapurukua, makata rakiraka risiane, i namina kukusane hemakapurafaraka, aíyaka risia aporoane makárahoanie.

3

Aporomo Yasuaki himu hakásaraka hemakapurukua rekeno, Kotimo hikumisia aporoane ereketae rekenapo, aisane oyapo.

¹ Hameo. Nōmo some fahokosakipoko some one poparakanapo. Kotimo re ararerakano repo sesehoanie. Fana nōmo reaki sawi poparaka makesesuane, yumo soko some hakása yine popahoko hisirakanafapo. Aporo metakiramo kotafe someane kakimakopo, aiyaka nōmo efera hunia poparakanapo. Repo efera hunia soko kairakano some omo reane ararehokosapo. ² Arirakano aporo metakiramo someraka, “Kotimo neaki someraka, ‘Ne siareapo,’ aihoasimo kau hahaeraka patehoanie.” Aira aporoamo someane kakimarapaka asekeanie. Aporo aíyaka somerane yao kása asiāpo. Ipu mokome watikiaka rakirapo. Watikiaka rakiramo reane mokoatikirapaka asekeanie. ³ Re kau hahaeraka patehoanafonosa nine, Kotimo hikumisia re siaraka risikinapo. Ho Kotesamo re himua mahemakapurakarano, repo makata aina watikisane rukupatesapo. Asiasamo Kotimo hikumisia re kakaro Isiraya aporopo. Isu Keresoa paosasamo Ho Kotesa isuyaki hakása reke, isu ararerakano isiapo Kotiaki kekererakanapo. Kotimo hikumisia ereketae siaraka risikiako, isiapo isina makata ainane soko makata rakirane soko, makata aki himu hakásaraka hemakapurakanafapo. Yasu kusua akipoko isiapo himu hakásaraka hemakapurakanapo. Arirakano kau hahaeraka patenamo isu ararehokosafapo.

⁴ Aporo metakiramo hemakapuraka, “Kaumo makata rakirane* nōmo rakisiasamo, Kotimo anoaki siareapo, aihokosapo,” aíyaka ipu hasaka hemakapurakanapo. Aporoamo kaumo menaki himu hakásaraka hemakapusua aíyaka, nōmo soko fana aíyaka hemakapusuapo. Nōmo kaumo rakirane namo kakaro kárapo aíyaka nōmo hemakapusuapo. Aporo metakiramo kaumo rakirane nōmo marokeraka rakisiapo. ⁵ Nōmo kaumo rakirane oyapo. Ano hokono maresa maiya amo Isiraya aporo takapesapo. Takapesane menoraka pukua, sere karimo ano kau hahaeraka patesapo. Nōmo nī aporo irane Pénésamene aporo irapo. Nōmo atamo soko, amamo soko, Hipuru meaka somerakano, nōmo soko

* 3:4: Yu aporomo somemane kekemaraka rakirane, kaumo makata rakira ayapo.

Hipuru meane kaikia somerapo. Arirakano Kotimo somemaneane Ferese aporomo kekemana aiyáka, nōmo soko kekemahokosakipoko ano Ferese aporo akiyaki paosapo.

⁶ Arirakano nōmo hemakapuraka, “Nōmo Kotipoko rakirakanapo,” aiyaka nōmo Keresoa paosa aporo hinamoane mokoatikisapo. Asiāne nōmo fana aiyáka sia raki-rakanapakasiki rakisiane, yumo hemakapuane nōmo hasaka rakireapo, aiyaka hemakapurakanapo. Arirakano Kotimo somemane suane nōmo kakimarakano, aporomo anoaki someraka, “Somemaneane wakasema soko nōmo kakipayasafapo. Né siareapo,” aisapo.

⁷ Arirakano fana nōmo kaumo makata rakirane rakiraka, “Ano siareapo,” aiyaka nōmo hemakapusuapo. Aiyáka hemakapusuane yumo nōmo metakarisiapo. Metakarikia koteaka haku hemakapuraka, “Kaumo makata rakisiane nenakamakayia rakireapo. Asiamo Yasuaki himu hakásaraka hemakapukua reke, Yasumo someane kakimaka rerane makata fanareapo.” Aiyaka nōmo hemakapurakanapo. ⁸ Asiamo pipu kaumo makata aki nōmo himu hakásaraka hemakapunafonoraka, kaumo makata ane makama kesekerakanapo. Nōmo Yasu Keresoaki himu hakásaraka hemakapurane makama fanarakanapo. Yasu Keresoane nōmo Unihaepo, aiyaka nōmo hemakapurakanapo. Yasu Keresoane nōmo makama fanaraka hemakapukua, makata metakirane su nōmo metakarisiapo. Makata ane kakaro makata pepeno ayireapo. Asiamo yumo nōmo Yasu Keresoaki hákasa hemakapurakanapo. ⁹ Ano eyaki hákasa rekenapo. Asiamo nōmo kaumo makata rakisiane su metakarisiapo. Nōmo Kotimo somemane Moseseari some kasane kakimaka rakiraka reke, Kotimo anoaki someraka, “Ne aporo ereketaesapo,” aihokosafapo. Arirakano nōmo Yasuaki himu hakásaraka hemakapuraka rekeno, Kotimo anoaki someraka, “Ne aporo ereketaesapo,” aihokosapo.

¹⁰ Asiamo Yasu Keresomo makata ainane nōmo kakaro hemakapurakaripo. Yasu maturikia taesane wakapuaka area aiyáka ano soko aiyáka wakapuaka rekeako hemakapurakaripo. Yasu kau teraka himu nesa aiyáka ano soko kau teraka himu nekea aiyakakoripo. Yasu kusua aiyáka, ano soko kuane siahosireapo. Asiamo nōmo Yasuane kekemaraka Yasuaki makata ásiane nōmo aseako hemakapurakaripo. ¹¹ Ano kurakano soko Kotimo ano maturikia taehokosapo, aiyaka nōmo hemakapurakanapo.

Kepoa naohokosakipoko Pore foaka pusuane oyapo.

¹² Keresomo makata aina kotesa suane nōmo hemakapukua fasapo, aiyaka nōmo somerakanafapo. Arirakano Kereso ipi rea aiyáka ano soko, aiyáka rekeako hemakapurakaripo. Yasumo ano pasimasasamo Yasumo hemakapusua aiyáka nōmo hemakapusakipoko kekemarakanapo. Kekemaraka, aporo foforaka apura aiyáka ano aiyáka yaiya puraka rekenapo.

¹³ Keresoa paosa aporo maeo, nōmo koteaka hemakapukua rakikia rosaka taeraka kepoa naosafapo. Kepoa naoana, aiyáka nōmo rakipe pukua keseke naohokosapo. Nōmo makata hákasa úyaka hemakapurakanapo. Kepoa naohokosakipoko nōmo hemakapurakanapo. Aporo foforaka puraka patera sapea pariaserapao. Aina aiyáka nōmo fana makata rakisiane kakaro metakarikia efera hunia hemakapurakanafapo. Arirakano kepoa naohokosakipoko nōmo makata wakapuaka rakipe purakanapo. ¹⁴ Ano pukusa hikumisi neneme sapea hákasa asekea purakanapo. Aporo foaka pukua kepoa naoraka makata ropo marapo. Makata ropo makosane oyapo. Yasu Keresomo ano mafasisiasamo ano hepene yapura rekeasimo Kotimo ano pasimakosapo. Pasi amara maiya amo Kotimo ano makoterakano, Yasumo makata aina kotesane nōmo hemakapukua fahokosapo.

¹⁵ Asiamo Yasumo makata aina kotesane kekemahoko nōmo hemaka apura aiyáka, repo soko aiyáka hemakapunie. Koteaka hemakapura aporomo hemaka apura aiyáka repo koteaka hemakapunie. Arirakano repo makata meta hemakapusuane Kotimo maropohokosapo. ¹⁶ Repo kakaro someane kakimarakaka kakaro yaiya kakimaka risikianie.

¹⁷ Keresoa paosa aporo maeo, nōmo hemakapukua arakira aiyáka, repo soko hakásá yineraka hemakapukua rakinie. Ano area aiyáka aporo metakira soko aiyáka risikino, repo asekea iane kekemaraka risikianie. ¹⁸ Reaki nōmo wate someaka hisiraka somepe pekea, yumo soko someaka hisiraka namo hiripuhokoripo. Aporo yakaimo Yasu Kereso

ira matopesa kusuane hemakapuko hisiraka yunuraka risikinapo. ¹⁹ Yunuraka risike, ipu kaumō hemakapusuane kára rakikia, makata nakosane soko ipu makárarakano, ipu koti parisane ayapo. Arirakano ipu kaumō makata rakisiane hemakapukua kaiyahoafunusa nine ipu namo kakaro manomaka somerapo. Arirakano hauaka wo makatane hákasa hemakapurapo. Ayíáka hemakapura aporoane Kotimo hukurukua heao atura pusiehokosapo.

²⁰ Arirakano isiapo namo kakaro hauakane, hepene yapurayapo. Isiapo Unihae Yasu Kereso hepene yapunaka pekea, isu pasimokoasimo isu asekeea risikinapo. ²¹ Yasu ipi fanaraka reke, ipi wakapumo makata su unihaeaka asekeea rekeakosapo. Epo wakapu hakása yíamo isu amano kauane sanasiraka, ipi kau faesa ayíáka, faesa kauane isuaki kakakosapo.

4

Poremo makata metakira somesane oyapo.

¹ Keresoa paosa aporo maeo, re Keresopoko paroaka risikiasimo nōmo somerakanapo. Reane nōmo himu tumurumo hemakapukua arirakano reane nōmo kamenakaraka hemakapukua ayíáka rekenapo. Arirakano aporo foaka pukua kepoa naoraka makata ropo masa asíane repo. Nōmo reane hemakapuraka namo kakaro seserakanapo.

² Hinamo, Yuótia soko, hinamo Sinitíki soko tetoaki nōmo kukunameaka somerakanapo. Tetápo titi sape meaka toke siahoasifareapo. Teto Keresoa paosa hinamorasamo sape merane metakarikia titi himu hakásaraka tokoanie.

³ Aporo iti hakása makata rakirao, néaki nōmo makata one somerakanapo. Hinamo tetapō sapesane fahoasimo, nōmo maroporaka ararehoanie. Hinamo tetā anoyaki hakása kikinaraka makata rakiraka aporo hinamomo Yasuane hemakapusimo some kotesane some kakasimo ano araresapo. Tetapō soko, ape Kerémenemo soko, aporo metakiramo soko, ipu suamo anoyaki hakása rakisiapo. Arirakano i namina su yano taesane Kotimo yaiya rera sawia Kotimo popasapo.

⁴ Arirakano maiya suamo repo Unihae Yasuaki katakā marekea risiasamo seseraka risikianie. Nōmo efera hunia somerakanano soko, seseraka risikianie. ⁵ Aporo hinamo suamo asekeasimo aporo hinamo suane kamenakaraka hemakapukua ararehoanie. Kaisie. Unihae Yasuane peakosa maiyane makerakanapo.

⁶ Arirakano makata su akipoko re kára hemakapukua himu fahokopo. Makata umisa fasereperakano Kotiaki kurikurihoanie. Kurikuriraka susehoanie. ⁷ Kurikuriraka fahoane, re himua Kotimo auanane fasereperakarakano kaiyakosapo. Kotimo auanane kakaro kotesa hakupo. Isiapo aporomanomo auana asíafapo. Repo Yasu Keresoaki katakā marekea risikino, Kotimo auanamo repo himumo hemakapurane mafairaka asekeea rekeakosapo.

⁸ Keresoa paosa aporo maeo, makata hakása meta soko nōmo reaki somerakanapo. Repo himumo makata kotesa susuane hemakapukua risike, arirakano aporomo kekerera makatane soko hemakapunie. Asiamo makata kakaro somerane soko, makata kotehoareapo, aiyaka hemakapurane soko, makata aina ereketaeane soko, makata kaiyahoanafononane soko, makata pikirisa pararekeanafononane soko, makata koteaka somerane soko, ayíáka makata kotesa susuane hemakapukua risikianie. ⁹ Nōmo makata somesane repo kaikia, arirakano nōmo makata rakisiane soko repo asesapo. Asiamo nōmo ainane repo kekemaraka rakinie. Kekemaraka rakiraka risikino, Kotimo auanane reaki kaka, eane reyaki hakása rekeakosapo, aiyaka nōmo hemakapurakaripo.

Firipai aporomo Poreaki mone karakano Poremo moraka susesane oyapo.

¹⁰ Repo ano hemakapukua makata yaku efera hunia anoaki karakano asekeea, nōmo seseraka Kotiaki suserakanapo. Wate fana repo anoaki mone kaka amo tipia repo anoaki kakanafonosane, repo ano kakako hemakapusua nine, ikia kara fasokino makata kakakosane metakarirakasupo. ¹¹ Arirakano “Ano makata forokoa rekeasireapo,” aiyaka

nōmo hemakapukua someaka poparakanafapo. Anoaki makata umisa fasereperakano soko, makata ofosa fasereperakano soko, ano yaiya seseraka rekenapo.

¹² Asiamo ano makata faraka fesonorakano soko, makata kemo kara tokeno soko, maiya suamo ano seseraka hemakapukua rekenapo. Maiya suamo hauaka sua ano seseraka rerapo. Meamorakano soko, makata nakosane sia nenaka soko, ano seseraka rerapo. Makata kemo kára tokeno soko, makata kemo faseleno soko, ano seseraka rerapo. ¹³ Yasu Keresomo ano mawakapurakanapo. Asiasamo makata suane ano siaraka rekenapo. ¹⁴ Arirakano makata umisa anoaki fasereperakano repo ano arareraka nōmo makata umisane mafasapo. Repo ano araresane kakaro kotesapo. Asiamo nōmo reaki seserakanapo.

¹⁵ Firipai aporo hinamo reo, aporo hinamomo Yasu hemakapusimo some kote-sane nōmo some karakano repo kaisiapo. Wakasema nina ano Masetónia hauakane metakarikia pusuapo. Ano fana reamo soko ano area yumo soko, repo hákasa ano arareraka mone karakasupo. ¹⁶ Arirakano nōmo reane metakarikia pukua Tesaronaeka apea makata fesenoraka rekeno, repo ano mone yape teta karakasupo. ¹⁷ Repo mone nōmo makosakipoko somerakanafapo. Aíyaka nōmo hemakapurakanafapo. Nōmo reaki, ano mone kasie, aisafapo. Repo ano mone kasasamo, Kotimo reane asekea reke re makotehokosapo, aíyaka nōmo hemakapurakanapo.

¹⁸ Repo anoaki makata kára kasane Epafarotaétasemo mokoa perakasupo. Mokoa perakano nōmo moraka, reaki kára suseaka poparakanapo. Repo makata kasá ane nōmo mosasamo, ano siaraka rekenapo. Arirakano Yu aporomo makata wape yamona paikia Kotiaki karakano Kotimo sesesapo. Asia ayíáka, anoaki soko repo mone karakasuane, Kotiaki akara ayíáka kasapo. Kasane Kotimo aseraka kára seserakanapo.

¹⁹ Arirakano Kotipe Yasu Kereso tetane makata su siaraka rekenapo. Asiamo re Keresoa paoraka risike, re fesonoraka risikino Kotimo ipi makata su siaraka reaki kakakosapo. Repo ano araresasamo, Kotimo reane ararehokosapo, aíyaka nōmo hemakapurakaripo. ²⁰ Kotiane isiapo Atapo. Maiya suamo isiapo epo yano motosane makáraraka kekererakanapo. Kakaroripo.

Poremo ayapasane oyapo.

²¹ Keresoa paosa aporo hinamo re su Firipai taonea risiane nōmo hemakapukua ayaparakanapo. Arirakano Keresoa paosa aporo anoyaki hakāsa risiamo soko, reaki ayaparakanapo. ²² Keresoa paosa aporo hinamo Rome siti wo risiamo soko, Sisamo apea makata rakira aporoamo soko, reaki ayaparakanapo. ²³ Unihae Yasu Keresomo reane yaku arareraka makotehoasimo nōmo hemakapurakaripo.

Korosi

Korosi sawi one mahemakapukusa someane oyapo.

Yasu Kereso hepene yapura hisiakipoko keremisi teti (30) su faraka, Poremo sawi one Keresoa paosa aporo hinamo Korosi taonea risiaki popasapo. Korosi aporo Epáfarase, sese ape aseke rea aporoane Pore aseako pesapo. Peraka Korosi aporomo kotafe someane kekemasane epo Poreaki somesapo.

Asiamo aporo metakiramo kotafe somesane oyapo. Ipu kotafe someraka, “Yu aporomo somememanane kekemahoanie. Arirakano hepene aporoane kekerehoanie. Arirakano aporomo somememanane kekemahoanie.” Airakano aporomo hemakapusuane ipu máfaraka, Yasu Kereso unihaeane mawakasemasapo. Asiaporakano Pore mahisiraka reke, kotafe someane maroporaka sawi one poparaka makesapo. Maiya amo Pore Rome apea tipurareasamo Tíkikasepe Onísimase tetaki sawi one makesapo.

Korosi sawia some kepo parakuraka popasane oyapo.

1:1-2 Sawi one Poremo kepomarekea popasapo.

1:3-14 Poremo Kotiaki suseraka, arirakano Korosi aporo hinamopoko kurikurinapo.

1:15-23 Kereso fanaraka unihaeaka rekenapo.

1:24-2:5 Keresoa paosa aporo hinamo ararehoasimo Poreane Kotimo murikimasapo.

2:6-3:4 Aporomo kotafe some karakano kakimakopo. Arirakano Yasu Keresoaki himu hakásaraka hemakapukua risikianie, aisapo.

3:5-17 Makata aina watikisane rukupateraka metakarikia, makata aina kotesane kekemahoanie, aisapo.

3:18-4:1 Kakimara aporo hinamomo ainane popasapo.

4:2-18 Some metakira someaka ayapasapo.

Poremo Korosi aporoaki sawi poparaka makesane oyapo.

¹ Yasu Keresomo tarira aporo rekeasimo Kotimo ipi hemakapukua murikimasane anopo. Ano Poremo reaki sawi poparaka makerakanapo. Isiapo Keresoa paosa aporo mae Timoti anoyaki reke, reane hemakapuraka, ² etapo sawi one reaki poparaka makerakanapo, Kotimo aporo hinamo Korosi taonea risia reaki sawi one poparaka makerakanapo. Repo Keresoaki himu hakásaraka risikino, isina su Kereso mae papāpo. Etapo hemakapuane, Koti isiapo Atamo re yaku ararerakano, re auaraka risikiasimo hemakapurakaripo.

Some kotesane Korosi aporo hinamomo kakimaka risikinaporakano Poremo sesesane oyapo.

³ Kurikuriana maiya suamo re farimaka Kotiaki wáraka repoko Kotiaki suserakanapo. Kotiane Unihae Yasu Keresomo Atapo. ⁴ Asiamo repo Yasu Keresoaki himu hakásaraka hemakapukua risikinapakae. Keresoa paosa aporo hinamo suaki repo himu tumurumo hemakapurakanapakae. Hemakapurakanapakano kaisiasamo etapo repoko Kotiaki suseaka kurikuriraka risikinapo.

⁵ Hepene yapura Kotiyaki kakaro yaiya seseaka risikiakosaporakano repo kakimasapakae. Kakimaka hiakosakipoko re seseaka kau risikinapakae. Asiamo repo Yasu Keresoaki himu hakásaraka hemakapukua, arirakano aporo hinamo suaki soko himu tumurumo hemakapukua ayíáka risikinapakae. Arirakano kakaro someane some kasa maiya amo hepene yapura makata kotesa repoko Kotimo murikimasane repo kaisiasapakae. Kakaro someane Yasu hemakapukusakipoko some kotesa ayapo.

⁶ Some kotesa repo kaisia hakása yine hauaka sua aporo hinamo suamo kairakanapakae. Some kotesane repo kakimasasamo makata watikisa metakarikia makata aina kotesane kekemarakaa risikinapakae. Repo aina ayíáka hauaka sua soko aporo hinamo metakira Keresoa paoraka ayíáka risikinapakae. Asiamo some kotesa repo kaisia maiya

amo, Kotimo yaku ararenane repo kaikia hemakapuraka, Kotimo aina kotesane repo kekemaraka rakirakanapake.

⁷ Arirakano Yasu hemakapusimo some kotesane, Epáfarase Keresomo aporo raipareasamo reaki some kasapakae. Epo Kotiaki himu hakásaraka hemakapuraka rakiraka reke, maiya suamo yaiya rakiraka rekenapo. Etapo Kotipoko arakira ayíáka, epo soko hakásá yaiya rakirakanapo. Isina hakásá rakirakano eaki kára seserakanapo. ⁸ Epo etoaki someraka, “Ho Kotesamo ararena aeyaka Korosi aporo hinamomo namina yia himu tumurumo hemakapurakanapo,” airakasupo.

Korosi aporo hinamopoko Poremo kurikurisane oyapo.

⁹ Re Keresoa paoraka koteaka risikinaporakano etapo kaisia maiya amo, etapo repoko Kotiaki maiya suamo kurikurirakanapo. Asiamo kurikurinane etapo úyaka kurikurirakanapo. Kotimo takekea hemakapusua ayíáka repo hemakapuraka, arirakano koteaka hemakapurane Ho Kotesamo reaki mahemakapurakarakan kaikia, ayíáka Kotimo hemakapusuane repo kakaro koteaka hemakapusimo etapo kurikurirakanapo.

¹⁰ Asiamo Kotimo reaki uyáka risikianiesane re ayíáka risikiasimo kurikurirakanapo. Repo ayíáka arakiramo Koti masesehoasimo kurikurirakanapo. Ira wate pesa kára ana ayíáka repo aporo hinamo metakira makotenane ayíáka kárahoasimo kurikurirakanapo. Kotimo ainane repo hemakapuraka kárahoasimo repoko kurikurirakanapo.

¹¹ Re wakapuaka risikiasimo kurikurirakanapo. Kotimo wakapu kárane repo mokoasimo kurikurirakanapo. Ayíáka wakapuaka risike, reaki makata umisa fasereperakano, repo Kotiane metakarianafonoraka, eaki himu hakásaraka hemakapusuane rosaka taehoasimo kurikurirakanapo. Aporo metakiramo re mokoatikirakano repo aporoaki ropo mokoatikinapaka kurikurirakanapo. Re aporo metakiramo mokoatikiana maiya amo re seseaka risikiasimo kurikurirakanapo.

¹² Kotimo ipi aporo hinamoaki makata kotesa kakakosaposane repo mokoasimo epo re yaku araresapo. Kotimo faesa hauaka á ipi aporo hinamo akiyaki re soko hakásá hiane siahoasireapo, aisapo. Asiamo Ataki susehoanie. ¹³ Fana katosa amo unihae Satanemo isu asekea reapo. Asiáne yumo Kotimo isu arareraka mafasikia, ipi hokosamo isu asekea rekeasimo pasimosapo. Arirakano Kotimo ipi hokosane himu tumurumo hemakapurapo. ¹⁴ Kotimo hokosamo isupoko farimaka api kaka marekea isu tonotaesapo. Isiapo watikisane epo mafasapo.

“Kepo suane Kereso ipipo,” aisane oyapo.

¹⁵ Kotiane aporomo aserafapo. Koti Kereso tati hakásá yinesasamo Kotiane Yasu Keresomo isuaki tariako pesapo. Kotimo makata su kepomareasiraka Kereso ipi yaiya reapo. Ipi kakaro fanapo. Arirakano makata su rakisiane Kereso ipi fanaraka rekenapo.

¹⁶ Ti yapura makata arisiane soko, hauaka wo makata arisiane soko, Kotimo Yasu aeyaka kepomarekeea faserepepesapo. Makata aserane soko, makata asekeanafononane soko, suane Yasu aeyaka kepomarekeea faserepepesapo. Arirakano hauaka wo aporo fanaraka risirane soko, aporo wakapuaka risirane soko, ti yapura hepene aporo risirane soko, makata ane su Kereso aeyaka kepomarekeea faserepepesapo. Arirakano makata suane Keresopoko kepomarekeea faserepepesapo.

¹⁷ Makata suane kepomareasiraka Kereso ipi fana yaiya reapo. Makata suane epo siaraka maka rekeno, makata suane koteaka risikinapo. ¹⁸ Arirakano Keresoa paosa aporo hinamo su ipi kaupo. Ipu unihaeane Kereso ipipo. Kepomaresa kepoane Kereso ipipo. Arirakano kukua turikia puramo kepoane soko Kereso ipipo. Ipi kakaro fanapo. Makata su fanane Kereso ipipo. ¹⁹ Asiamo Kotimo hemakapuraka, “Nōmo aina suane Keresoaki karakáno ano siaraka area ayíáka, ipi soko siaraka rekeakosapo. Ipi soko ayíáka siaraka rekeno ano seseripo.” Aíyaka Kotimo ipi aina suane Keresoaki karakáno Keresoane Koti ayíáka reapo. ²⁰ Asiamo Kotimo ipi hokosa pusierakano pesapo. Pekea ira matopesa paremarerakano ipi yapi pusuapo. Yapi purakano aporo suamo asekea

Kotiaki himu hakásaraka hemakapusimo e kusuapo. Hepene yapura soko hauaka wo soko Kotiaki yunuraka risiane fahoasimo Kereso kusuapo.

²¹ Arirakano fana repo watikiaka hemakapukua, watikiaka rakikia Kotiaki yunuraka fasikia risiapo. ²² Asiāne yumo Kotimo hokosa Yasu Kereso ira matopesa paremarekeea kusuasamo Kotimo reane pasimosapo. Asiamo Kotimo yaku ararena amo re maereketaesapo. Asiamo keseke Yasu paria peramo e hikumisia re su koteaka ereketaeraka risike, arirakano repo makata watikisane mafasasamo re koteaka risikiakosapo. Repo makata watikisa mafasasamo hukurukusane kakakosafapo.

²³ Arirakano ira kesa paroaka mapoana ayiáka, Yasuane hemakapukusakipoko some kotesane kakimaka paroaka risikianie. Yasu hemakapukusakipoko some kotesane repo kaisia maiya amo, some kotesane repo kakimasapo. Kakimaka Kotiyaki yaiya risikiakosane hemakapunie. Aporo metamo some haku somerakano, someamo reane kirimanapaka paroaka risikikanie. Yasuane hemakapusimo some kotesane repo aporo metakiraki some kaka, arirakano ipu aporo metakiraki some kaka, arirakano aporo metakiramo aporo metakiraki some karakano, ayiáka some kape pusuapo. Hauaka sua aporo hinamo suaki some kape pusuapo. Some kotesane ano Pore Kotimo aporo raipareasamo some kape pusuapo.

Keresoa paosa aporo hinamopoko Poremo rakisiane oyapo.

²⁴ Nōmo Yasuane some kasakipoko aporo metakiramo ano mokoatikirakanapo. Mokoatikirakano nōmo hisiraka rekenafapo. Keresoa paosa aporo hinamoane nōmo ararehoko seserakanapo. Iane Keresomo kau hakásá asiapo. Aporo hinamoane ararehokosakipoko Kereso ipi kau teraka himu nesapo. Asiamo Kereso kau teraka himu nesane yaiya rekenapo. Ano soko Kereso asia ayiáka kau teraka himu nenaka rekenapo.

²⁵ Keresoa paosa aporo hinamo akipoko rakisimo Kotimo ano murikimasapo. Epo someaka maresane, i suaki nōmo some kakasimo epo ano pusiesapo. ²⁶ Wate fana Kotimo ipi hemakapusua suane aporoaki tarikia somesafapo. Aporo wainepe pesaki maiya káramo Kotimo somesafapo. Asiane yumo Kotimo ipi kakimara aporo hinamo suaki tarikia somerakanapo. ²⁷ Makata kakaro kotesane mahamesapo. Aporo su Yu aporo soko, Yu aporohoanafonosa soko, i supoko ipi mahamesane hufitaeraka somerane oyapo. Kereso reyaki rekenapo. Reasasamo ipi faesa kotesane repo mokoakosapo.

²⁸ Arirakano Keresoane hemakapusimo isiapo aporo hinamo suaki some karakanapo. Re Koti rea yapura ahira maiya amo, hokosa manomo hemakapunafonoraka mahimeteraka ahira ayiáka, re ayiáka mahimeteraka hirapaka, nōmo reaki tarikia some karakanapo. Asiamo aporo sisimamo koteaka takekea hemakapukua ahira ayiáka hiasimo, yumo nōmo some karakanapo. Koteaka takekea hemakapurane repo koteaka kaikia takekea hemakapusimo nōmo tarikia some karakanapo. ²⁹ Aporo su siaraka hiasimo nōmo rakirakanapo. Keresomo ipi wakapu kárane ano himura reasasamo ipi wakapu kára aeyaka nōmo wafororaka rakiraka rekenapo.

2

Korosi aporomo Kotiaki himu hakásaraka hemakapurane kárahoasimo Poremo hemakapusuane oyapo.

¹ Repo hemakapusimo nōmo some one somerakanapo. Repoko soko, Keresoa paosa aporo hinamo Reotísia taonea risia akipoko soko, aporo hinamomo ano hikumisi asekeanafonona akipoko soko, re supoko nōmo kára hemakapukua wafororaka raki-rakanapo.

² Asiamo nōmo hemakapusuane repo namina yia suaki himu tumurumo hemakapukua, arirakano repo Keresoaki himu hakásaraka hemakapusuane paroaka wakapuaka risikiasimo nōmo hemakapurakaripo. Koti menane repo koteaka hemakapukua rosaka taehoasimo nōmo hemakapurakaripo. Asiamo repo rosaka taeraka hemakapuraka Kotimo makata kepo mahamesane repo sia hemakapusapo. Kotimo makata fana mahamesane Kereso ipipo. ³ Arirakano makata mahimunane maua á kerapo. Kesane

mokoako kimo ropanapo. Aina ayíáka Kotimo koteaka hemakapuramo kepoane soko, takekea hemakapurane soko, Koti ipiyaki tokenapo. Isiapo mokoacosane Yasu Keresoane ipi ki asiapo.

⁴ Arirakano aporo metakira pekea reane kirimahokosakipoko kotafe somerapo. Asi-amo kotafe someane repo kakimakopo. ⁵ Ano kakaro reyaki rekeasifareapo. Asiāne nōmo reane kakaro kára hemakapurakanapo. Nōmo himu hemakapurane reyaki hakāsa rekenapo. Repo suamo namina yia kikinaraka risike, arirakano Yasu Keresoaki kakaro himu hakásaraka hemakapukua risikinapakano ano seseripo.

“Kotafe someane kakimakopo,” aisane oyapo.

⁶ Repo Yasu Keresoaki himu hakásaraka hemakapukua, Yasu Kereso repo Unihaepo, ayíaka hemakapukua epo someane repo kekemaraka risikinapo. Asiamo re Keresoa paoraka risike maiya suamo Yasu Keresoaki yaiya himu hakásaraka hemakapukua risikianie. ⁷ Arirakano ape kiako ira kesa paroaka mapoana ayíáka repo hemakapusuane ayíáka paroaka hemakapukua risikianie. Keseke ape namo kiki amara ayíáka repo Kotiaki hemakapusuane kárahokosapo. “Kotiaki kakaro himu hakásaraka hemakapunie,” ayíaka reaki some kasane meraruhokopo. Maiya suamo Kotiaki susehoanie.

⁸ Aporo metakiramo kotafe someane somerakano repo kakimarapaka asekeanie. Hauaka omo makata hemakapurane soko, yatafu yakasa ho menane soko, makasa kauamo makata ainane soko, makata ane ipu máfaraka some karápo. Aporoamo Kereso menane some karáfapo. Asiamo someane repo kekemarakanone, re keresoa paosane hurupeakosapo. Anapaka asekeanie. ⁹ Arirakano Yasu Kereso hauaka wo pesane aporomanomo kauane maka pekea reapo. Asiamo Kotimo wakapuane soko, koteaka hemakapurane soko, Kotimo makata aina suane Yasu Keresoyaki hakāsa reapo. Asiamo Kereso kaua Koti menane su komarukua rekenapo. ¹⁰ Asiamo repo eaki kataka marekea risikino epo menane reaki karáka rekenapo. Arirakano hepene aporo soko, ho soko wakapuaka unihaeaka arisiane Yasu ipi hakásamo marokeraka fanaraka unihaeaka asekea rekenapo.

¹¹ Repo eaki himu hakásaraka kataka marekea risikino repo kaumo watikiaka rakirane soko, kaumo hemakapurane soko, Keresomo rukupatesapo. Arirakano Yu aporomo kau hahaeraka patenane, kaumo menane hákasa patenapo. Makata amo aporo himuane ararenafapo. Asiāne aporomo ipi kaumo watikiaka hemakapukua rakirane rukupater-akano aporoane namo kakaro Kereso aporopo.

¹² Re hea tapukuamurira maiya amo re Keresoyaki kusua hauaka amarera ayíáka hea tapukumurisiapo. Hea tapukumurikia ima yapura ahiramo re Keresoyaki kusuane maturikia taena ayíáka maturikia taesapo. Arirakano repo hemakapuraka, “Kotimo wakapumo Keresoane maturikia taesapo.” Aíyaka hemakapuraka repo Kotimo waka-puaki himu hakásaraka hemakapurakano re soko Keresoyaki hakāsa maturikia taeraka re makawesa risikinapo.

¹³ Fana re watikiaka risike Kotimo ipi ainane repo hemakapusufapo. Hemakapuna-fonoraka kaumo hemakapukua watikiaka rakirane repo rukupateraka metakarisiafapo. Asiamo re kusua arisia ayíáka risiapo. Asiāne repo watikisane Kotimo mafasapo. Mafaraka Kereso maturikia taesa ayíáka re soko ayíáka maturikia taesapo. ¹⁴ Kotimo somemanane kekemahoanafonosasamo somemanane motosa amo isu hukurusuapo. Hukurukua api kakanie ayíaka motosapo. Asiane somemanane soko, api kakaniesane soko, Kotimo maka ira matopesa ikokosapo. Ikokosa maiya amo somemanemo hukuru-rukusakipoko asiane kososapo. ¹⁵ Arirakano Yasu Kereso ira matopesa paremarea soko, Kusua maiya amo makata fanaraka risiane soko, yatafu yakasa ho wakapuaka risiane soko, Yasumo rukua mosakaterapiraka fasapo.

“Kereso kusua ayíáka isu ayíáka kusuapo. Kusuasamo somemanemo isu asekea rekenafapo,” aisane oyapo.

¹⁶ Asiamo he soko makata nakosane soko repo sokoaihoanafonorakanone aporo metamo reane hukuruane siahoasifareapo. Arirakano aporo metamo someraka, "Yu aporomo somemaneane kekemahoanie. Maiya metakira yapohoanie. Arirakano oko kawe fasereperakano yapohoanie. Arirakano fenena maiya ane yapohoanie," airapo. Asiamo Yu aporomo somemaneane repo kekemahoanafonorakanone, aporoamo re hukuruane siahoasifareapo. Asiamo Yu aporomo somemaneane repo metakarisiasamo efera hunia kekemahoane siahoasifareapo.

¹⁷ Hiho aseramo aserane namo kakaroane hiho asera á rekenafapo. Namo kakaroane haku reke hiho aseramo aserane nenakamaka murikimasa ayapo. Asiamo somemaneamo Kotimo ainane nenakamaka murikimasa ayapo. Asiáne namo kakaroane Kereso ipipo. Arirakano somemaneane fana pesapo. Yasu Kereso keseke pesapo. Kereso pesa maiya amo somemaneane fasapo. ¹⁸ Arirakano aporo metamo ipi kituamo asesane kára somerapo. Asiamo aporoamo someraka, "Repo suamo hepene aporoaki kekerehoanie." Aihoane repo waerakano epo reane makaiyaraka hukuruane siahoasifareapo. Aporoamo Kotimo hemakapusuane kekemarakanafapo. Ipi kaumohemakapusuane kekemarakaka ipi yia makáraraka rekenapo. Aporoamo reaki someraka, "Re namina Koti hikumisia mawakasemaraka risikianie," airapo. Aisa nine e ipiane mawakasemaraka rekeafunusa nine epo ainafapo. ¹⁹ Aporoane Yasu Keresoaki katakamarekea rekenafapo. Yasu Kereso isiaipo Unihaepo. Asiane aporoamo Unihaeane metakarikia, eaki katakamarekea rekenafapo. Isu Keresoa paosa aporo hinamoane aporomano kau hakása asiapo. Yasu Kereso ipi unihaepo. Aporomano unihaea ipi kiki suane katakamarekea risikinapo. Katakamarekea risikino unihaemo kiki katakamarekea risikino Kotimo isuane mawakapurakanapo. Aina ayíáka isiaipo Unihae Keresoaki katakamarekea risikino Kotimo isuane mawakapurakanapo.

²⁰ Re Keresoyaki kusuasamo hauaka wo makata amo soko yatafumo soko re asekea rekenafapo. Asekea rekeanafonorakano yia, marirakano makata amo rakiniesane repo yaiya rakiraka risikinare?

²¹ Aporomo hauaka omo menane kekemarakaka someraka, "Makatane makopo. Makatane nakopo. Makatane sakaihokopo." Aisane marirakano repo kakimarakakanare?

²² Aporoamo ipi hemakapusua aeyaka somerakanapo. Aporomo somemaneane repo kekemarakakanone, ane makata amo reane ararehokosafapo.

²³ Aporomo makata yaposane soko, somemane motosane soko, epo someanamo kotesa someraka sikiraka somehokosapo. Aporo metakiramo namina yia kaumohemakapusuane hurutapiasimo mawafororaka rakiraka risirapo. Asiane ipu kaumohemakapusuane hurutapirafapo. Aporomo somemaneane kekemarakaka kaumohemakapusuane hurutapiasimo asiane somemaneamo wakapuane rekeanafonosasamo kaumohemakapusuane hurutapirafapo.

3

Yasu kusua maturikia taesa ayíáka, isu soko ayíáka kusua maturikia taesane oyapo.

¹ Re Keresoyaki risikiasimo Kotimo re Keresoyaki maturikia taesapo. Maturikia taesasamo hauaka omo makata ainane su metakarikia hepene yapura makata ainane makama fanaraka hemakapukua risikianie. Arirakano hepene yapura Koti hokono tumuru takua Yasu rekenapo. ² Arirakano hepene hauaka ane hemakapukua, arirakano Yasumo makata ainane su makama fanaraka hemakapukua risikianie. Hauaka wo makatane hemakapukupo. ³ Asiamo Yasu kusua ayíáka, re soko ayíáka kusua. Yasu maturikia taesa ayíáka, re soko ayíáka maturikia taesapo. Yumo re Yasu Keresoyaki paoraka hakása risikinapo. Makata amo kepoane Koti ipipo. ⁴ Asiamo re hitaferaka koteaka arisiamo kepoane soko, arirakano keseke yaiya risikiakosamo kepoane soko Kereso ipipo. Kereso pariapera maiya amo re soko eyaki hakasa faeraka risikiakosapo.

Makata patéane soko makata kaweane soko oyapo.

⁵ Hauaka omo makata rakira kaumo hemakapusuane makukunie. Arirakano kaumo hemakapurane oyapo. Hinamo sakora hakimaranane soko, aporo metamo hinamo hakimaranane soko, hinamo mokotokonane soko, metamo hinamo himu purane soko, metamo makata kemo ano makaripi, aiyaka himu purane soko, aiyaka hemakapura aporoamo ipi himu tumurumo hemaka purane makata ayapo. Ayiáka makaripi, aiyaka hemakapurane koti pariraka hemakapukua rerapo. ⁶ Aina aporo hinamoamo Kotimo someane koaretaenasamo Kotimo saperaka fanasihoko motoakosapo. ⁷ Arirakano aporo hinamomo hauaka omo makata ainane kekemaraka arakira aiyaka repo soko fana aiyaka rakiraka risiapo. Ipu hemakapura aiyaka fana repo soko aiyaka hemakapusuapo. Asiâne pipu yumo makata ane su makukua fasapo.

⁸ Arirakano makata aina metakirane soko metakariniesane oyapo. Sape merane soko, nanaerane soko, aporo metaki himumo mahisinane soko, hokomaka somerane soko, ekene merane soko, makatane su rukupateraka metakarikia kusua aiyaka risikianie.

⁹ Fana repo kotafe somera aiyaka metaki yaiya kotafe hoakopo. Fana risiane metakarikia yumo ¹⁰ kawe hitafe hakuraka risikianie. Arirakano pasu pate osoraka reane horomaka mamakateraka pasu kawe hitafe haku osona aiyaka wate fana makata rakira makata pateane metakarikia, makata aina hitafe haku maka risikianie. Makata aina kaweanie Koti area aiyaka risikiasimo makata ainane Kotimo maiya suamo makaweraka rekenapo. Makaweraka rekeno Kotimo aina kepoane hemakapukusapo.

¹¹ Asiamo Yu aporoyaki Yu aporo hoanafonosa akiyaki enonosapaka hemakapukupo. Aporo kau hahaeraka patesayaki aporo kau hahaeraka patehoanafonosa akiyaki enonosapaka hemakapukupo. Aporoane Kiriki aporofapo. E aporo meta hakupo. Aiyaka risiane pipu yumo metakarinie. Aporo metaki, "Né aporo raipa pariraka rekeasimo aporo metamo né roposapo." Aiyaka aporo metaki, "Né aporo ropohoanafonosa ayapo." Aiyaka aporo raipayaki aporo raipahoanafonosa akiyaki enonosapaka hemakapukupo. Namina enonosane metakarinie. Makata hakásane Kereso ipipo. Ipiane re su himua rekenapo.

¹² Kotimo murikimasa aporo hinamoane repo. Reane epo himu tumurumo hemakapurakanapo. Asiasamo aporo hinamo metakirane repo kamenakahoanie. Arirakano aporo hinamo metakirane makotehoko rakinie. Repo namina yano motosane makárahokopo. Tau auaraka risikianie. Aporo metakiramo reane mokoatikirakano repo foaka ropo mokoatikihokopo. ¹³ Metakiraki foaka sapehokopo. Repo namina aporo metamo neaki saperaka ne mokoatikirakano ne himu umisane mameraruhoanie. Aporomo ne mokoatikirakano ne sapesane soko hisisane soko mameraruhoanie. Asiamo nómo watikisane Unihae Kotimo mamerarusapo. Asia aiyaka nómo soko aporo metamo neaki mokoatikirakano mameraruhoanie.

¹⁴ Repo namina aporo metamo aporo metaki himu tumurumo hemakapunie. Asiamo aporo metaki himu tumurumo hemakapura kakaro makata fanapo. Himu tumurumo hemaka apuramo makata aina kotesa suane mawakapunapo. Asiamo makata aina kotesa suane kepo hakásae ane metaki himu tumurumo hemaka apura ayapo.

¹⁵ Keresomo ipi auaraka reramo re himua asekea rekenapo. Asiamo re namina kau hakasasamo tau auaraka risikianie. Repo maiya suamo eaki susehoanie.

¹⁶ Keresomo somesane koteaka hemakapukua risikianie. Someane káraraka rekerakanano metamo hemakapusimo some kakanie. Keresomo someamo reane mawakapurakanano repo soko metakiramo hemakapusimo some kakanie. Arirakano aporo metakiramo hasakanapaka repo takekea hemakapukua some kakanie. Kotimo some Same* sawia popasane kesahoanie. Arirakano Kotimo kesa ane kesahoanie. Ho Kotesamo reaki mahemakapurakanano ane kesahoanie. Suseaka aiyaka kesahoanie. ¹⁷ Arirakano Unihae Yasuaki himu hakásaraka hemakapukua risike, makata some karáne soko, makata rakirane soko, makata suane Kotimo sesehoasimo rakinie. Kotimo sesehoasimo somehoanie. Kereso aeyaka Ata Kotiaki suseaka kurikurihoanie.

* 3:16: Wate fana tefetemo Kotiaki kesasane Buk Song á popasapo. Buk Song ane Same sawiane ayapo.

“Keresoa paosa aporo hinamo re uyáka risikianie,” aisane oyapo.

¹⁸ Hinamo repo namina aporo pusuamo someane kakimakanie. Kakimarakano Unihae Yasu Keresoa paosa hinamomo anapo. ¹⁹ Arirakano aporo, repo namina hinamoane himu tumurumo hemakapukua koteaka asekea risikianie. Repo namina hinamoyaki tau auaraka risikianie. Matewaraka sapehokopo.

²⁰ Arirakano hokosa, repo namina ata ama tetapō someane maiya suamo kakimakanie. Kakimarakano Kotimo sesehokosapo.

²¹ Arirakano hokosa wafayao, repo hokosamo hisihokohoamo hokosaki sape marekea mate wahokopo. Matewarakan hokosa ane seseaka risikikosafapo.

²² Arirakano aporo raipa roposao, reane aporo metakiramo roposapo. Aporo amo reane roposasamo repo ipoko makata rakikia marerapo. Ipu someane repo kakimakanie. Ipu asekea arisia maiya amo hákasa wakapuaka rakiāne siahoasifareapo. Maiya suamo repo koteaka wakapuaka rakinie. Aporo amo hákasa asekea sesehoasimo rakiakopo. Kotiaki hemakapukua Kotimo sesehoasimo rakinie. ²³ Asiamo makata rakira suane repo himu hakásaraka wakapuaka rakinie. Rakiraka risike úyaka hemakapukua, “Aporomo asekeasimo isiapo makata rakirakanafapo. Unihae Yasu Keresomo sesehoasimo isiapo epoko rakirakanapo.” Aíyaka hemakapukua koteaka rakinie.

²⁴ Repo úyaka hemakapunie. Re kakaro asekea rera aporoane Yasu Keresopo. Asiamo repo Yasu Keresopoko makata rakirakanapo. Arirakano epo reane makata ropo kakakosapo. Asiamo Yasu Keresomo ipi kakimara aporo hinamo suane makata ropo kakakosapo. ²⁵ Asiane aporomo watikiaka rakirakan, epo ropo watikisane makosapo. Makata su Kotimo asekea takekea parakunapo. Aporomo makata rakisia yaiya Kotimo hakásaraka yine kakakosapo. Kotimo makata ropo karáne ereketae karápo.

4

¹ Aporo roposa wafayao repo aporo raipaki koteaka some kakanie. Koteaka asekea risikianie. Aporo raipamo wafayane repo. Repo wafayane hepene yapura rekenapo, aíyaka hemakapunie.

Kakimara aporo hinamoaki Poremo someaka motosane oyapo.

² Repo kurikurinane metakariakopo. Wakakoraka sikiraka kurikurihokopo. Koteaka hemakapukua kurikuriraka Kotiaki suseaka kurikurihoanie. ³ Repo kurikuriana maiya amo isupoko soko farimaka kurikurihoanie. Kurikuriraka úyaka kurikurihoanie. “Kotio, nómo someane, aporo hinamomo kaiyako sesehoasimo Koti, nómo ikia koro ropaka amara ayíáka, kaiyako sesenane aporoaki kakanie. Isiapo nómo someane aporo hinamoaki some kakasimo ikia koro ropakamakanie. Kereso mahamesane isiapo kakama somehoasimo ikia koroane nómo ropakamakanie.” Aíyaka kurikurihoanie. Arirakano aporo hinamomo Keresoane hemakapusimo some ane nómo some karakano, aporo metakiramo ano tipura makesapo. ⁴ Ano tipura makerakano yia, Yasuane nómo some kakakoripo. Some kepoane nómo koteaka some kakasimo, repo anopoko farimaka Kotiaki kurikurihoanie.

⁵ Arirakano Keresoa paohoanafonosa aporo hinamomo mahisihokohoamo re iyaki koteaka tau risikianie. Re arisia maiya amo nenakamaka risikiakopo. Nena aporo hinamomo Kotiane hemakapusimo repo wakapuaka rakinie. Ipu Kotimo someane kaiyako seserakano, repo someraka, “Isiapo keseke somehokosapo.” Aihokopo. Ipu kairakano pipu yiamo somehoanie. ⁶ Aporo metamo reaki kairakano repo aporoaki some parihinaka kifirimo makata nakosa rusua wapeana ayíáka repo aporo suaki koteaka some parihinie. Aporo metamo makata meta kairakano eaki ereketae koteaka some parihinie. Epo kakaro hemakapusimo koteaka some parihinie.

Tíkikase soko Onísimase soko Korosi taonea Poremo pusiesane oyapo.

⁷ Isiapo Keresoa paosa aporo mae Tíkikase re arisia peraka anoane epo reaki somehokosapo. Unihae Keresopoko nómo arakira ayíáka epo soko hakásaraka yineraka

rakirakanapo. Rakirane epo metakarirakanafapo. Eane nōmo himu tumurumo hemakapurakanapo.

⁸ Isu uyáka risiane repo hemakapusimo nōmo eaki somehoko pusie airakanapo. Repo someraka, “Pore mayíáka rekenarakapo,” aíyaka hemakapukohoamo epo somehoko peakosapo. ⁹ Arirakano aporo meta yano motosa Onísimase soko eyaki hakāsa pusierakanapo. E Keresoa paosa aporo mae kotesapo. E repo namina ape sumu hakásapo. Ape wo makata rakirane tetapō reaki somehokosapo.

Poremo ayapasane oyapo.

¹⁰ Arisítákase anoyaki tipura rekenapo. Epo soko reane hemakapurakaripo, aisapo. Pánapasemo ipi makai hokosa Makamo soko reane hemakapurakaripo, aisapo. Asiamo Maka perakano repo eane pasimakanie. Fana nōmo reaki someaka marerakanapo. Keseke e perakano eane repo tereraka pasimakanie.

¹¹ Arirakano aporo meta yano motosa Yasu* Yásatasemo soko reane hemakapurakaripo, aisapo. Aporo isia ane Yu aporopo. Iane Yasu Keresoaki risikiako parisapo. Aporo isia amo anoyaki hakāsa rakirakanapo. Ipu Yasu Kereso unihaeaka reane somekarapo. Arirakano ipu ano soko ararenapo.

¹² Epáfarasemo soko reane hemakapurakaripo, aisapo. E repo namina ape sumu hakásapo. E Yasu Keresomo makata rakira aporo metane épo. Re Yasuaki paroaka risikiasimoripo, aíyaka epo hemakapukua kurikurirakanapo. Repo Kereso menane serekehokohoamo kurikurirakanapo. Kotimo hemakapusua á susu hemakapusimo kurikurirakanapo. Kotimo someane kakaroripo aihoasimo epo kurikurirakanapo. ¹³ Epo repoko kára rakirakano nōmo aserakanapo. Arirakano Reotísia aporo hinamo soko Hiráporisi aporo hinamo soko i supoko epo kára rakirakano nōmo aserakanapo.

¹⁴ Isiapo aporo táke mitikoro Rukimo soko reane hemakapurakaripo aisapo. Témasemo soko reane hemakapurakaripo, aisapo. ¹⁵ Arirakano Reotísia aporo Keresoa paosa aporo maeane nōmo hemakapurakanapo. Repo iaki someraka, “Poremo reane hemakapurakanapo.” Aíyaka somehoanie. Nimifaki soko nōmo hemakapurakanapo. Epo apea kakimara aporo hinamo sarimarakano i suane nōmo hemakapurakanapo. Repo iaki someraka, “Poremo reane hemakapurakanapo,” aíyaka somehoanie.

¹⁶ Repo sawi one menoraka faraka, Reotísia sése apea Keresoa paosa aporomo sawi one menohoasimo iaki makeanie. Arirakano sawi meta Reotísia aporoaki nōmo poparaka makesane repo menohoanie. ¹⁷ Arirakano Akípaseaki úyaka somehoanie. “Kotimo neaki makata rakisimo kasane rakikia makanie,” aihoanie.

¹⁸ Arirakano sawi one popana aporomo penesoroane nōmo maka, makata feteraka popana one, “Ano Poremo reane hemakapurakanapo,” aíyaka nōmo hokonomo poparakanapo. Ano tipura makesane repo hemakapunie. Arirakano Kotimo re ararehoasimo nōmo hemakapurakaripo.

* 4:11: Aporoane Yasu Keresofapo. Ane aporo metapo.

1 Tesaronaeka

1 Tesaronaeka sawi one mahemakapukusa someane oyapo.

Yasu hepene yapura hisiakipoko keremisi 20 su faraka Poremo sawi one poparaka, Keresoa paosa aporo hinamo Tesaronaeka taonea risiaki makesapo. Arirakano Pore Korini taonea reamo sawi one poparaka makesapo. Fana Tesaronaeka taonea Pore kimisi pukua Yasuane some karakano, Yu aporo metakirane soko, Yu aporohoanafonosa metakirane soko, Yasu Keresoa paosapo. Asiamo Yu aporo metakira Yasu Keresoa paohoanafonasa aporomo, Yu aporo metakira Yasu Keresoa paosa aporoaki sapesapo. Saperaka risike, ipu Poreane hauaka meta pusiesapo. Arirakano Keresoaki yunuraka risia aporoamo Keresoa paosa aporoane yaiya mokoatikiriaka risiapo. Mokoatikiraka risikino Kereso aporoane paroaka risikiasimo Poremo sawi one poparaka makesapo. Arirakano Yasu hauaka wo paripeakosane Poremo popasapo.

1 Tesaronaeka sawia some kepo parakuraka popasane oyapo.

1:1 Poremo sawi one kepomarekeea popasapo.

1:2-10 Keresoa paosa aporomo Yasuaki himu hakásaraka hemakapurane paroaka hemakapukua risiasamo Poremo Kotiaki susesapo.

2:13-3:13 Poremo ipi hemakapusua aeyaka iaki somesapo.

4:1-12 Kotimo sesehoasimo Keresoa paosa aporomo makata aina kotesane rakisimo Poremo popasapo.

4:13-5:11 Yasu pariaperamo makata ayiakakosane Poremo popasapo.

5:12-28 Poremo some metakira someaka faraka, ayapasane popasapo.

Tesaronaeka apea Yasu Keresoa paosa aporo hinamoaki Poremo sawi poparaka makesane oyapo.

¹ Tesaronaeka apea Yasu Keresoa paosa aporo hinamo risia reaki ano Poremo sawi one poparaka makerakanapo. Isiapo Ata Koti arirakano isiapo Unihae Yasu Kereso tetāki repo himu hakásaraka hemakapukua kataka marekea risikinapo. Reane Kotimo makoteraka arirakano re tau auaraka risikiasimo nōmo hemakapurakaripo. Saerasepe Timoti tetā soko anoyaki rekeno asekea, isiapo suamo reane hemakapuraka, sawi one poparaka makerakanapo.

Tesaronaeka taonea Keresoa paosa aporo hinamo suamo Kotiaki himu hakásaraka hemakapukua risiane oyapo.

² Kurikurina maiya amo isiapo reane hemakapukua farimaka kurikurinapo. Maiya suamo isiapo reane hemakapuraka Kotiaki susenapo. ³ Suserane kepoane oyapo. Repo Kotimo someane kakimaka Kotiaki himu hakásaraka hemakapukua risiasamo epoko makata rakirakanapo. Arirakano repo aporo hinamo metakiraki himu tumurumo hemakapurane makama fanahokosakipoko repo wafororaka rakirakanapo. Arirakano Unihae Yasu Kereso paripeakosane repo seseraka hemakapukua kau risikanapo. Ayíáka risike repo hemakapuraka, “E paripeakosapo,” aiyaka hemakapusuane metakarirakanafapo. Makata akipoko isiapo Kotiaki suseaka kurikuriraka risikinapo.

⁴ Maeo, reane Kotimo himu tumurumo hemakapurakanapo. Reane Kotimo ipi aporo murikimasa pariraka risikiasimo epo murikimayereapo, aiyaka isiapo hemakapurakaripo. ⁵ Asiamo Yasuane hemakapusimo some kotesane some kasa maiya amo akai susuamo nena makata some ana ayíáka reaki somesafapo. Ho Kotesamo wakapu aeyaka isiapo reaki somesapo. Isiapo some kasane repo “Ao, kakarorakae,” aihoasimo Ho Kotesamo re himura mahemakapusimo tarisiapo. Asiamo repo asekea Yasuane hemakapusimo isu reyaki hakāsa risike koteaka rakikia risiapo. Isu reyaki risikisu maiya amo isiapo ainane repo asesapo.

⁶ Asiamo isiaipo ainane repo asekea enomaka kekemasapo. Arirakano Unihae Yasumō ipi ainane soko repo enomaka hakása yineraka kekemasapo. Some kotesane isiaipo some kasane repo kakimarakano asekea, aporo metakiramo re mokoatikisapo. Mokoatikirakano yia Ho Kotesamo re ararerakano re su seseaka risiapo. ⁷ Re seseaka risikinapakano Masetónia hauaka á, kakimara aporo hinamo risiamo soko, Akaia hauaka a, kakimara aporo hinamo risiamo soko ipu suamo kaisiapo. Kaisia amo repo iaki tarisiapo.

⁸ Unihae Yasuane hemakapusimo some kotesane aporo hinamo suamo hemakapusimo kepomarekea hauaka metakira somerape pusuapo. Asiamo Masetónia hauaka á soko, Akaia hauaka á soko, hauaka metakira á soko some kape pusuapo. Some kape purakano repo Kotiaki himu hakásaraka hemakapusuane aporo suamo kaikia fasapo. Ipu suamo sia kaisiasamo isiaipo efera hunia iaki maíyaka somehoasifareapo. ⁹ Arirakano aporoamo repo asíane isuaki somesane oyapo. Isiapo reaki some kasa maiya amo repo Kotiaki himu hakásaraka hemakapukua risike, aporo metakiraki somesapo. Arirakano repo yatafuaki soko yakasa hoaki soko kekerenane metakarisiapo. Arirakano re Kotiaki risikiako pariraka, Namo Kakaro Yaiya Rera Kotimo makata rakirane repo rakiraka risiapo. ¹⁰ Arirakano Kotimo ipi hokosa hepene aeyaka perakarihoamo re kau risikinapo. Arirakano Kotimo hokosa fana kusuane Kotimo ipi maturikia taesapo. Maturikia taesane Yasu ipipo. Asiamo keseke hukuarura maiya ane fasere aperamo, aporo hinamo watikika risiane Kotimo iaki saperaka kara fanasihokosapo. Asiamo isu fanasihokohoamo Yasumo isu mafasiakosapo.

2

Tesaronaeka taonea Poremo makata rakisiane oyapo.

¹ Maeo, isu perakasuamo isiaipo Kotimo someane some kasane repo kakimasasamo, isiaipo nenakamaka rakisafapo. Ane repo hemakapurakanapo. ² Isu Firipai taonea risia maiya amo, Firipai aporomo isu hokomaka mokoatikisapo. Mokoatikisane repo hemakapurakanapo. Mokoatikirakano yia, isiaipo reane aseako Tesaronaeka taonea pesapo. Peane, aporo metakiramo isuaki hisiraka saperakasupo. Saperakano yia, Kotimo isuaki wakapu kasapo. Kotimo ipi wakapu karakano repo Yasuane hemakapusimo isiaipo Kotimo someane wakapuaka some kasapo. ³ Isiapo Kotimo someane some kasa maiya amo isiaipo hasaka some kasafapo. Arirakano isiaipo some karakano isiaipo hemakapusuane ereketae kakama some kasapo. Reane ikia kara watikisa á pusimo reane isiaipo tau kirimaraka soko metao ayíáka some kasafapo. Kotafe hokoa rukua reaki some kasafapo.

⁴ Asiamo Kotimo ipi some kotesane isiaipo some kakasimo, Kotimo ipi isu aseane isiaipo koteaka rakirakano asekea, epo isu murikimasapo. Murikimasasamo ipi some kotesane isiaipo some karakanapo. Aporomanomo sesehoasimo some karafapo. Kotimo sesehoasimo some karapo. Epo isiaipo himumo hemakapusuane aserapo. Asiamo epo sesehoasimo isiaipo some karapo. ⁵ Isiapo reane kirimaraka re yano motosane makáraraka rupiaka somesafapo. Repo makata kemoane soko moneane soko mokoakosakipoko isiaipo reaki kukunameaka somesafapo. Ane repo hemakapurakanapo. Kotimo soko asekea hemakapurakanapo. Isiapo kotafe somerakanafapo. ⁶ Repo soko metao, aporo metakiramo soko metao, isu yano motosane makama fanahoasimo isiaipo rakisafapo.

⁷ Isuane Yasu Keresomo ipi tarira aporo risiasamo isiaipo reaki someraka, "Repo isu arareracie." Aihoafunusa nine isiaipo ayíáka somesafapo. Isiapo reaki makata umisa kasafapo. Arirakano hinamomo ipi hokosa kiri tau maka asekea akaya ayíáka, isu reyaki risikisuamo tau auaraka asekea risiapo. ⁸ Asiamo isiaipo reane hemakapuraka Kotimo some kotesane isiaipo reaki some kakako sesesapo. Isiapo re arareraka isu rusua kuane soko siahoasireapo. Aíyaka isiaipo hemakapusuapo. Masisamore? Isiapo reane namo kakaro kara himu tumurumo hemakapusuasamoripo.

⁹ Maeo, isiapo wafororaka rakisiane repo hemakapurakanapo. Isu perakasuamo Kotimo some kotesane some kaka, arirakano isiapo hokonomo wafororaka rakisiane soko, repo asesapo. Repo makata umisane marapaka, sere soko ereamo soko, isiapo wafororaka rakisiapo. ¹⁰ Isu reyaki hakasa risikisuamo isiapo ainane repo asesapo. Kotimo soko asesapo. Re kakimara aporo hinamoaki isiapo ereketae susu rakiraka risiapo. Rakiraka risike reane mokoatikisafapo. Arirakano isiapo Kotiane hemakapukua rakisiapo. ¹¹ Asiamo aporomo ipi hokosa asekea area ayíáka, isiapo reane ayíáka hakásaraka asekea risiapo. ¹² Repo hemakapusimo, ereketaeraka ainane isiapo reaki tarikia, arirakano repo himu hemakapurane soko, isiapo mawakapusapo. Ayíáka wakapuaka hemakapusimo isiapo reaki tarisiapo. Arirakano isiapo reaki someraka “Kotimo sesehoasimo repo koteaka rakiraka risikianie. Kotimo re unihaeaka asekea rekeakosakipoko re faesa a risikiasimo epo reane peaeaka someraka rekenapo.” Ayíáka isiapo reaki somesapo.

¹³ Arirakano isiapo Kotimo someane reaki some karakasuamo repo hemakapuraka, “Someane aporomo somefareapo. Kotimo some ane namo kakoreapao,” ayíáka hemakapukua repo Kotimo kakaro someane kakimasapo. Kakimaka risikino, Kotimo some aeyaka kakimara aporo hinamomo Kotimo wakapuane maka risikinapo. Kotimo someamo reane tarirapo. Asiamo maiya suamo isiapo Kotiaki suserakanapo. ¹⁴ Yutía hauaka á Yasu Keresoa paosa aporo hinamo arisia ayíáka, re soko ayíáka risikinapo. Maeo, Yutía hauaka á Yasu Keresoa paosa aporo hinamo risiane Yu aporomo mokoatikisapo. Arirakano Yutía hauaka á mokoatikisa ayíáka Tesaronaeka taone sumu á repo namina hakásaraka aporo yiamo reane mokoatikisapo. ¹⁵ Arirakano Unihae Yasuane Yu aporomo rusua kusuapo. Arirakano Yu aporo fana risiamo porofete aporoane rusua kusuapo. Yumo isu soko rukua mokoatikiraka risikinapo. Arirakano ipu rakirane Kotimo asekea seserakanafapo. Kotimo some kakimara aporoaki ipu yunuraka risikinapo. ¹⁶ Asiamo Kotimo someane Yu aporohoanafonosaki isiapo some kakakohoamo Yu aporomo Yasuaki hisisa aporoamo matasosapo. Yu aporohoanafonosane Yasumo mafasiakohoamo ipu matasosapo. Matasoraka maiya suamo watikiaka rakiraka risike ipu watikisane káraraka takahinakanapo. Asiamo Kotimo mahisiraka saperaka iaki ropo watikisa karáne kakenapo.

Efera hunia Tesaronaeka aporoane Poremo aseako sesesane oyapo.

¹⁷ Maeo, Keresoa paosa aporoane mokoatikisa maiyane fasereperakano, isiapo reane metakarikia purakasu maiya amo, reane himumo hemakapusuapo. Re hikumisiane himo asekeanafonoraka himumo re kára hemakapusuapo. Efera hunia re aseakosakipoko ikia kara pukusa koraka risiapo. ¹⁸ Isiapo re aseako peakosakipoko hemakapukua risiapo. Reane hemakapuraka ano Poreane efera hunia soko, efera hunia soko aseako peakosapoko asiane Satanemo matasosapo. ¹⁹ Unihae Yasu pariapera maiya amo epo hikumisi nenemea isu risikiakosapo. Maiya amo isiapo sesehokosane makata yakapare? Isiapo sesehokosane repo. Isiapo kepo naohokosakipoko makata ropoane yakapare? Makata ropoane repo. Reane isiapo Yasuaki tariraka seseaka tariakosapo. ²⁰ Makata one kakaroripo. Re koteaka risiasamo isu seseraka risike Kotiaki kekererakanapo.

3

Poremo Timoti Tesaronaeka taonea pusiesane oyapo.

¹ Arirakano isiapo re aseako peakosapoko hemakapusuasamo isu kau risike siahoasi-fareapo. Isiapo hemakapusuane isu su peakosafapo. Isu isiasane,* tetá metane Átenese taone wo popariraka, hakasa metamo re aseako peakosapo. Ayíáka isiapo hemakapukua somesapo. ² Asiamo Timotiane repo apea etapo pusiesapo. Timotiane etapo Keresoa paosa aporo maepo. Ipi isuyaki Kotimo makata rakirane hakasa rakirapo. Repo Kotiaki namo kakaro himu hakásaraka hemakapukua paroaka risikiasimo, reane epo

* 3:1: Aporo isiane Pore, Saerase arirakano Timoti iane Átenese taonea risiapo.

ararehokosapo. ³ Arirakano aporo metakiramo re mokoatikirakano aseke, re fofaraka wasuaka rurapaka, Timotimo reane ararehoasimo pusiesapo. Arirakano Keresoa paosa aporo hinamoane Kotiaki hisiraka risia aporoamo mokoatikiraka risiapo. Ayíáka mokoatikinane Kotimo ipi fana murikimasane repo namina yiamo hemakapurakanapo.

⁴ Fana isu reyaki risikisuamo isiapo reaki úyaka some kasapo. "Keseke makata umisa fasere aperamo aporo metakiramo isu mokoatikihokosapo." Aisane yaiya fasereper-akano repo asesapo. ⁵ Arirakano mokoatikina maiyane fasere perakano isiapo re kara hemakapukua, re mayiaka risiarihoamo, nōmo Timotiaki re aseako pusiesapo. Keseke kaiyako punie, aihoane siahoadifareapo. Aíyaka hemakapuraka yumo Timotiaki kaiyako pusiesapo. Arirakano repo Kotiaki himu hakásaraka hemakapusuane metakarisiare? Kakaro yaiya hemakapukua risikinare? Satanemo re kau aseako kirimarakano repo Kotiane metakarisiokinone, ane, isiapo fana makata rakirakasuane nenakamakayia raki-rakanareapo, aihokosapo. Asiamo nenakamakayia rakiane siahoadifareapo. Aíyaka hemakapukua Timotiaki reane aseako pusiesapo.

⁶ Aseako pusiesane Timotimo re aseke pariperaka etoaki úyaka somerakasupo. Repo Kotiaki himu hakásaraka hemakapukua risikisupo. Arirakano repo namina yia aporo metamo metaki himu tumurumo hemakapurane yaiya risiasusupo. Ayíáka risike repo etoaki soko repo himu tumurumo hemakapurane yaiya kayasusupo. Etapo reane aseako seseana ayíáka, repo soko etoane aseako seseraka hemakapususupo. Aíyaka Timotimo etoaki somerakasupo. ⁷ Ayíáka somerakano etapo kairaka reaki kara sesesapo. Maeo, repo Kotiaki himu hakásaraka hemakapusuane paroaka risiasusupo. Asiamo somesa amo isiapo himu hemakapurane mawakapurakanapo. Asiamo isu makata umisa yia hakasa risikino, re soko Yasuaki hakasa paroaka risikinapo, aíyaka somesa amo isuane mawakapurakanapo. ⁸ Repo Unihae Kotiaki himu hakásaraka hemakapukua paroaka risikinapakano fana isu himu umiraka risiane fasapo. Asiasamo isu seseraka risikinapo. ⁹ Isiapo reaki kára seseraka risike, Kotiaki kára suserakanapo. Asiamo Kotimo ipi isiapo sesesane aserakanapo. ¹⁰ Isiapo reane efera hunia aseako kakaro hemakapuraka sere soko, ereamo soko, Kotiaki kurikurirakanapo. Repo Kotiaki himu hakásaraka hemakapusua makata meta fesonosa kakenone, re siaraka risikiasimo isiapo reane mawakapuraka ararehokosapo.

¹¹ Isu re arisia peakosakipoko, isiapo Ata Kotimo soko, isiapo Unihae Yasumo soko, tetapō ikia kara maropohoasimo hemakapurakaripo. ¹² Repo namina yia himu tumurumo hemakapurane, Unihae Yasumo makárahoasimo kurikurirakanapo. Arirakano hauaka sua aporomano suaki himu tumurumo hemakapurane, Unihae Yasumo makárahoasimo kurikurirakanapo. Isiapo reaki himu tumurumo hemaka apura ayíáka re soko ayíáka risikiasimo hemakapurakaripo. ¹³ Arirakano repo metaki himu tumurumo hemakapurane kárarakanone, Kotimo reane mawakapuhokosapo. Unihae Yasu Kereso pariapera maiya amo epo ereketae koteaka susu risira aporo hinamoane eyaki hakásá peakosapo. Yasu pariapera maiya amo re koteaka ereketae susu risiane, isiapo Ata, Koti, ipi híkumisi nenemea makata meta hasakasa kakanafonoraka, re ayíáka risikiasimo isiapo kurikurinapo.

4

Kotimo sesehoasimo úyaka risikianie aisane oyapo.

¹ Keresoa paosa aporo maeo, re su koteaka risike Kotiane masesehoasimo, isiapo aina kotesane soko, some kotesane soko, reaki some kaka tarisiapo. Tarirakano repo kakimaka koteaka risikinapo. Asiamo yumo re namo kakaro koteaka susu risikiasimo hemakapurakaripo. Isiapo Unihae Yasumo yano motosa aeyaka reaki wakapuaka somerakanapo. ² Unihae Yasumo someaka maresane, isiapo reaki some kasapo. Some kasane repo merarusafapo.

³ Asiamo re koteaka risikiasimo Kotimo hemakapusuane oyapo. Makata watikisane kikisiraka metakarikia, koteaka susu rakiraka risikianie. Arirakano hinamo hakimako

hemakapurane fasikia risikianie. ⁴ Re kaum rakirane hemakapukua watikiaka risirapaka, koteaka susu hemakapukua risikiakosakipoko, re kauane sisimoraka makisihoanie. ⁵ Keresoa paohoanafonosa aporoamo hinamo asekea kaum hemakapusuane takahira ayíáka repo ayiakakopo. ⁶ Repo namina Keresoa paosa aporo maeaki watikiaka rakiakopo. Repo namina maemo hinamoane hakimakosakipoko maserapisraka rakiakopo. Maserapi rakira aporoaki Kotimo fanasiraka makata umisane makakosapo. Fana isiapo reaki hufitaeraka someraka, yumo soko efera hunia paroaka somerakanapo. ⁷ Asiamo Kotimo isu pasimosane raraporaka risikiasimo pasimosafapo. Makata watikisa kikisiraka, koteaka susu hemakapukua risikiasimo Kotimo isuane pasimosapo. ⁸ Isiapo some one aporo metamo koaretaerakanone, ane, aporomanomo someane koaretaerakanafapo. Ane, Kotimo someane koaretaerakanapo. Arirakano yia Kotimo Ho Kotesane reaki karápo.

⁹ Re namina Keresoa paosa aporo hinamoaki himu tumurumo hemakapukua risikianie, aíyaka nōmo reaki somehokosafapo. Asiamo Keresoa paosa aporo hinamoaki himu tumurumo hemakapurane Kotimo ipi yiamo reaki tarisiapo. ¹⁰ Tarisiene repo kaikia kekemaraka, Masetónia hauaka á Keresoa paosa aporo hinamo suaki repo himu tumurumo hemakapukua risikinapo. Asiamo aporo suaki himu tumurumo hemakapusuane repo namo kakaro kárahoasimo, isiapo reaki wakapuaka somerakanapo.

¹¹ Re tau auaraka risikiakosakipoko, aíyaka hemakapukua tau risikianie. Repo namina menane asekea risikianie. Kau hisiraka risikiakopo. Repo namina makata rakirane namina hokono sokinimo kekepo rakipe punie. Some hakasa nine isiapo fana reaki some kasapo. ¹² Isiapo some kasane repo kaikia kekemarakanone, ane, Keresoa paohoanafonosa aporomo reane aseraka, repo yanoane mafaraka, arirakano reane makata meta fesenohoanafonoraka, aporo metaki “Ano ararehoanie,” aíyaka somehokosafapo.

Yasu paripeakosane oyapo.

¹³ Maeo, aporo kusuane mayiaka risikinarakapo, aíyaka himeteraka risirapaka, repo koteaka hemakapusimo, nōmo kakaro some one reaki somerakanapo. Asiamo aporo kusuane mafarearaka hitaferaka risikiakosane, Kotiaki himu hakásaraka hemakapunafoonona aporoamo mahimeteraka, himu faraka hihiripuraka risirapo. Ipu himu faraka hihiripura aíyáka, re aíyáka risikiakohoamo, nōmo some one some karakanapo. ¹⁴ Yasu kusua maturikia taesane isiapo kakaro kakimasapo. Asiamo Yasuaki himu hakásaraka hemakapusua aporo hinamo su kukua kesane, Kotimo maturikia taehokosapo. Aporo hinamo maturikia taesane, Yasu pariapera maiya amo, i Yasuyaki hakása Kotimo karikia peakosapo. Aíyaka isiapo hemakapurakanapo.

¹⁵ Unihae Yasumo somesane oyapo. Unihae Yasu pariapera maiya amo, isu metakira hauaka wo hitafe risiamo, aporo hinamo kukua kesane, isiapo marokeraka isu fana-hokosafapo. ¹⁶ Arirakano Kotimo sakepamo wárakano, hepene aporo fanamo soko wáhokosapo. Wa ana yiamo Kotimo pikoro rukusapo. Arura yiamo Yasu hepene yapunaka paripeakosapo. Pariapera maiya amo Keresoa paosa aporo hinamo kukua kesane fana maturikia taehokosapo. ¹⁷ Maturikia taerakano, isu Keresoa paosa aporo hinamo hitafe risiane iyaki paoraka, isu su hakása hikia ti pakae tipia Unihae Yasuane sapenakosapo. Sapenekea maiya suamo Unihaeyaki isu yaiya risikiakosapo. ¹⁸ Asiamo repo namina yia himu mapiraraka risikiasimo some one some kakanie.

Yasu paripeakosane oyapo.

¹ Maeo, Unihae Yasu Kereso paripeakosa sereane soko, yakiane soko, isiapo reaki haku meta somerakanafapo. ² Asiamo Yasu pariaperarepo kaisiane nine ayiakakosapo. Aporo hinamo meraruamo wasákipoko, aporomo makata hakimokoako ereamo tau apera aíyáka, Yasu paripeakosapo. ³ Aporomo someraka, “Pipu maiya yumo koteaka tau auaraka risikinapo.” Aihora maiya amo mokoatikihokosa sereane faserepeakosapo. Hinamo hokosa takapeakosakipoko makeraka mati tuaka apura aíyáka, mokoatikihokosa

sereane soko ayíáka faserepeakosapo. Asiamo mokoatikihokosa sereane fasere aperamo fasikia teketariakosafapo.

⁴ Asiamo maeo, repo hemakapurane katosa á risikinafapo. Asiamo re katosa á risikianafonosasamo hakimora aporo perakano fofana ayíáka, Yasu pariaperamo re ayíáka fofahoane siahoasifareapo. ⁵ Arirakano repo hemakapusuane sere faesa á risikinapo. Ereamo katosa á re soko isu soko risikinafapo. ⁶ Asiamo aporo metakira wakakekewa warisia ayíáka, isu wayane siahoasifareapo. Isu hi fakarikia himumo koteaka hemakapukua risike siahoasireapo.

⁷ Arirakano aporo waráne ereamo warápo. Aporomo he watikisa nekea masuanane ereamo masuanapo. Ane, isiapo hemakapurakanapo. ⁸ Asiamo sere faesa á isu risiasasamo, koteaka hemakapukua risike, isu kauane koteaka asekea risike kakama yia risikiasireapo. Arirakano yunu aporoyaki aporomo weakosakipoko ipi káwa karerapaka mafainapo. Aina ayíáka isiapo Kotiaki himu hakásaraka hemakapukua, arirakano aporo metaki soko himu tumurumo hemakapukua, ayíáka risikino isinane mafairakanapo. Yunu aporomo mokoatikinapaka ipi wamoa hati parosa karotapirapo. Aina ayíáka Kotimo isu mafasiakosa hemakapurane hati parosa karotapira asiapo. ⁹ Arirakano keseke hukuarura maiya amo Kotimo isuaki saperaka fanasihokosakipoko, epo isu murikimasafapo. Asiane isuane Unihae Yasu Keresoa paorakano isu mafasiakosakipoko murikimasapo. ¹⁰ Isu hitaferaka arisiamo soko, metakira akuramo soko, Yasuyaki hakasa risikiasimo epo isupoko farimaka kusuapo. ¹¹ Asiamo yumo repo namina yia metakiramo metakirane arareraka mawakapuraka arisia ayíáka namina maiya suamo yaiya arareraka mawakapuraka risikianie. Asiamo aporo hinamo suane mapiraraka risikiasimo some one some kakanie.

Poremo some meta some kasane oyapo.

¹² Maeo, aporo metakirane Unihaemo murikimasa aporoamo reane asekea risikinapo. Ipu Kotimo makata rakirane rakiraka, reane arareraka, makata tarikia, arirakano repo hasakasane ipu maroponapo. Asiamo ipu someane repo kairaka iane makotehoanie. ¹³ Ipu koteaka rakirasamo, ipu someane kaikia iane arareraka, iaki himu tumurumo hemakapukua risikianie. Repo namina yia tau auaraka himu hakásaraka hemakapukua risikianie.

¹⁴ Maeo, aporomo kau hisiraka makata rakianafonoraka risikinone maropohoanie. Aporo metakira himu faraka, namoraka risiane, mapirahoasimo ararehoanie. Aporo rorarako risiane, ipu Kotiaki himu hakásaraka hemakapusuane paripurapaka, iane soko ararehoanie. Arareraka risike, aporo suaki foaka sapehoanafonoraka, tau auaraka susu risikianie. ¹⁵ Aporo metamo reaki mokoatikirakano repo ropo mokoatikihokopo. Re Keresoa paosa aporo hinamomo namina yia arareraka makoteraka risikianie. Aporo suane soko makoteraka risikianie.

¹⁶ Asiamo maiya suamo seseraka risikianie. ¹⁷ Maiya suamo Kotiaki kurikuriraka risikianie. ¹⁸ Makata su akipoko repo Kotiaki susehoanie. Makata watikisa fasereperakano soko metao, makata kotesa fasereperakano soko metao, maiya suamo Kotiaki suseraka risikianie. Re Keresoa paosa aporo hinamo ayíáka risikinone Kotimo sesehokosapo.

¹⁹ Ira rufiane amanomo kopakataena ayíáka Ho Kotesamo wakapuanne ayíáka kopakataehokopo. ²⁰ Kotimo somerakano kaira aporoamo kaikia reaki some kasane repo koaretaehokopo. ²¹ Asiamo makata suane koteaka takekeha hemakapunie. Takekeha hemakapukua makata kotesa susuane kakimaka rakiraka risikianie. ²² Makata watikisa kekepo susuane metakarikia kikisiraka fasikia risikianie.

²³ Auanamo kepoane Koti ipipo. Asiamo isiapo repoko úyaka kurikurinapo. Repo watikisanne kikisiraka risikiasimo Kotimo reane mafasiraka rekenapo. Repo kaum koteaka susu rakikia, arirakano himumo soko koteaka susu hemakapukua, arirakano hoane soko koteaka susu risikiasimo, Kotimo asekea rekenapo. Re koteaka susu risikino

keseke Unihae Yasu Kereso pariapera maiya amo makata hasakasa metamo reaki hoko-rehokosafapo. Ayíaka re koteaka risikiasimo isiaipo repoko kurikurirakanapo. ²⁴ Asiamo re koteaka risikiasimo reane Kotimo murikimasapo. Murikimasamo re koteaka susu risikiasimo epo ayiakakosapo. Epo ainane kakaro ereketaesapo. ²⁵ Maeo, Kotimo isu ararehoasimo kurikurihoanie. ²⁶ Keresoa paosa aporo hinamo suaki hokono mokoanie. ²⁷ Arirakano Keresoa paosa aporo hinamo suamo kaiyisimo sawi one menohoanie. Re Keresoa paosasamo sawi one menohoasimo nōmo someaka marerakanapo.

²⁸ Arirakano isiaipo Unihae Yasu Keresomo re arareraka makotehoasimo hemakapurakaripo.

2 Tesaronaeka

2 Tesaronaeka sawi one mahemakapukusa someane oyapo.

Keresoa paosa aporo hinamo Tesaronaeka taonea risiaki Poremo sawi poparaka make-sapo. Wakasema nina keseke, Poremo sawi meta one soko, iaki poparaka makesapo. Aporo metakiramo kotafe someraka, Yasu hauaka wo paripesapo, airakano Tesaronaeka aporo metakira mahimeteraka risiapo. Ayiáka risike i namoraka risiapo. Asiamo Poremo kaikia, Tesaronaeka aporoane himu mapiraraka risikiasimo, Yasu paripeakosane Poremo kakama someaka popasapo.

2 Tesaronaeka sawia some kepo parakuraka popasane oyapo.

1:1-2 Poremo sawi one kepomarekea popasapo.

1:3-12 Reane mokoatikirakano, paroaka risikianie. Mokoatikina aporoane keseke fanasihokosapo, aíyaka popasapo.

2:1-17 Yasu haru peasiraka, aporo kakaro watikisane fana peakosapo, aíyaka popasapo.

3:1-15 Repo makata rakirane koteaka susu rakinie, aisane popasapo.

3:16-18 Poremo ayaparaka popasapo.

Tesaronaeka sawi kepomarekea popasane oyapo.

¹ Saerase, Timoti, isiapo Tesaronaeka taonea Keresoa paosa aporo hinamo reaki sawi one poparaka makerakanapo. Arirakano isiapo Ata Kotipe Unihae Yasu Kereso tetáki, repo himu hakásaraka hemakapuraka risikinapo. ² Isiapo Ata, Koti soko, isiapo Unihae, Yasu Kereso soko, tetapō re kamenakaraka makoterakano, re tau auaraka risikiasimo hemakapurakaripo.

Yasu Keresoane pariapera maiya amo Kotimo hukurukusane oyapo.

³ Maeo, maiya suamo reane isiapo hemakapuraka Kotiaki kara suserakanapo. Suseraka, repo Kotiaki himu hakásaraka hemaka apurane soko, repo namina yia himu tumurumo hemakapurane kárasasamo isiapo Kotiaki suseraka risikinapo. ⁴ Arirakano reaki makata umisane soko faserepeke, arirakano aporo metakiramo re mokoatikirakano yia, re Keresoa paosane metakirafaraka, Kotiaki himu hakásaraka yaiya hemakapukua risikinapo. Re paroaka risiasamo isiapo re yanoane makáraraka someraka, Keresoa paosa aporo hinamo suaki somerakanapo.

⁵ Arirakano aporo metakiramo reane mokoatikirakanapo. Mokoatikirakano yia Kotimo isuaki úyaka tarirakanapo. Makata umisa fasereperakano, mokoatikina maiya amo Kotimo re mawakapuraka ararerakanapo. Asiamo re siaraka maroporaka, keseke re Kotiyaki risikino, Unihae Kotimo reane aseke rekeakosapo. ⁶ Arirakano Koti ipi ereketaeraka rerasamo, aporomo reaki mokoatikisa aporoaki Kotimo ipi ropo kakakosapo.

⁷ Aporomo re mokoatikirakano yia, re himu nekea risiane, epo reane arareraka, fenena maiya ane kakakosapo. Yasu pariaperamo reaki soko, isuaki soko, Kotimo arareraka fenena maiya ane kakakosapo. Yasu pariaperamo hepene yapunaka, ipu hepene aporo wakapu karayaki kakama paripeakosapo. Yasu ipi ira rufiyaki paripeakosapo. ⁸ Yasu ira rufiyaki pariapera maiya amo aporo hinamomo Kotiane hemakapunafonosaki soko, isiapo Unihae Yasuane hemakapusimo some kotesane some karakano, kakipayasa aporo hinamoaki soko, ropo watikisane fansiraka kakakosapo. ⁹ Ipu watikiaka rakisia akipoko ropo fanasihokosane oyapo. I Unihae Kotiane fasikia kakaro yaiya risikiakosapo. Eyaki paoraka hakasa risikiakosafapo. Unihae Kotimo faesane soko, wakapuanne soko, marafaraka, forokoa risikiakosapo. Ayiáka risike kakipayasa aporo hinamoamo ropo watikisa yiamo yaiya mokoatikiraka fanasihokosapo. ¹⁰ Yasu pariapera maiya amo Yasumo ereketaeaka koteaka susu risira aporo hinamoamo Yasumo yanoane makárahokosapo. Makáraraka Yasumo ipi faesane aseke, ipu someraka “Yao watikiane. Siarakarifapo.”

Aihokosapo. Aihokosa aporoane kirimara aporopo. Arirakano isiapo some kasane repo kakimasasamo repo soko Yasumo yanoane mafaraka kekererohokosapo.

¹¹ Ayiakakosane hemakapuraka maiya suamo re makotehoasimo isiapo kurikuri-rakanapo. Kurikuriraka, “Kotio, nōmo Tesaronaeka aporo hinamoane peaesapo. Peasasamo ipu neaki siaraka patera asekeasimo, nōmo iane ararehoanie. Iane koteaka risikiako seserakanapo. Asiamo i koteaka susu risikiasimo, nōmo wakapumo iane ararehoanie. Ipu néaki himu hakásaraka hemakapukua rakirane káraraka hemakapukua naohoasimo nōmo wakapumo iane ararehoanie. ¹² Ipu néaki himu hakásaraka hemakapukua rakirane kárarakano, aporo hinamoane nōmo aseraka, Unihae Yasu Keresomo yano motosane makárahokosapo. Arirakano Yasu Kereso aeyaka ipu yano motosane soko makárahokosapo. Kotio, nōmo soko, Unihae Yasu Keresomo soko, tetápo iane hemakapukua makoterakano ipu ayiakakosapo.” Aíyaka isiapo kurikurirakanapo.

2

Yasu paripeasiraka makata ayiakakosane oyapo.

¹ Maeo, isiapo Unihae Yasu Keresoane pariaperamo isu eyaki hakasa sarimahokosane isiapo somerakanapo. ² Aporomo some koaka marekea kotafe someraka, “Unihae Yasu paripeakosa maiyane faserepesapo.” Aíyaka somerakano someane kakimakopo. “Yasu faserepesapo,” aíyaka kotafe porofete aporomo reaki somerakano kakimakopo. Arirakano aporo metakiramo someraka, “Yasu faserepesapo, aíyaka Poremo sawia popasapo.” Aíyaka somerakanone, someane kotafe somesasamo repo kakimakopo. Asiamo “Yasu faserepesapo,” aíyaka somerakanone wate foakayia himu fahokopo. ³ Kotafe somerakano someane kakimakopo. Yasu ipi paripeakosa maiya ane makeanamo makata meta fasereperaka reaki tarirakano, repo hemakapukusapo. Unihae Yasu paripeakosa maiyane faserepeasiraka, aporo yakaimo Kotiaki hisiraka patera tariakosapo. Arirakano aporo hakása metamo ipi himua makata watikisane komarurakano, epo Kotimo somemané koareaeraka Yasuaki fasikia rea aporoane* fana peakosapo. ⁴ Koareaena Aporoane Yasuaki kakaro yunuraka rekeakosapo. E ipi yano motosa makárahokosapo someraka, “Kotiane soko, arirakano makata metakira suane repo mafanaraka, aíyaka kekererape pusua makatane, nōmo marokesapo.” Aíyaka kotafe someaka, ipi pukua Kotimo apea kake someraka, “Kakaro Kotiane anopo,” aíyaka kotafe somehokosapo.

⁵ Ano fana reyaki rekesu maiya amo makata ayiakakosane nōmo reaki somesapo. Somesane repo meraruraka soko metao, hemakapuraka soko metao, masiare? ⁶ Sere murikimasa á paunafonosasamo Koareaena Aporoane peakosapoko asiane Kotimo matasorakanapo. Matasoanane repo hemakapurakanapo.

⁷ Asiamo Kotimo someane koareaena wakapuané, yumo mahamekea tau rakiraka risikinapo. Kotimo someane koareaeraka watikiaka rakirane makárahokohoamo Ararena Aporomo matasoraka koteaka rakiraka rekenapo. Ararena Aporoane fasikia apuramo, ⁸ maiya amo Kotimo someane Koareaena Aporoane kakama faserepeakosapo. Eane fasereapera yiamo Unihae Yasuane soko kakama faserepeakosapo. Yasu fasereperaka ipi akai fofa yiamo Koareaena Aporoane rusua kukusapo. Yasumo faesamo soko eane hurutapikia epo makata ainane su mafahokosapo. ⁹ Mafahoasiraka Kotimo someane Koareaena Aporo fasereapera maiya amo, Satanemo wakapuané maka epo makata rakiakosapo. Kotimo wakapumo hemakapukua arakira ayíáka, epo Satanemo wakapuané maka, epo soko ayíáka hemakapukua rakiakosapo. Aporomo asekeea fofaraka eaki hemakapusimo, epo Satanemo wakapuané maka kotafe rakiakosapo. ¹⁰ Satanemo wakapuané Koareaena Aporomo maka, kotafe rakirane soko, kotafe somerane soko, aporo hinamo metakiramo eane kekemahokosapo. Kekemahokosapo aporo hinamoane fanasina hauaka á pukusapo. Kakaroripo. I fanasina hauaka á pukusane kepoane oyapo. Ipu Kotimo kakaro someane hisiraka koareaehokosapo. Koareaerakano Kotimo somesane epo aporomano mafasiakosapo, aisane ipu hisiraka

* 2:3: Aporo hakása ane Koareaena Aporopo.

kakimakosafapo. Kakimakanafonosamo ipu Satanemo kotafe someane kakimakosapo. ¹¹ Kakimarakano ipu himuane Kotimo makunututuraka mareakosapo. Makunututuraka marerakano, kotafe someane kakimaka, makata namo kakaro watikisa yine aporo hinamoamo kotehoareapo, aihokosapo. ¹² Asiamo aporo hinamoane parakuraka hukurukusakipoko ayiakakosapo. Ipu kakaro someane koareaeraka, kotafe someane kakimasasamo Kotimo iane fanasihoko someaka motoakosapo.

“Kotimo re ararehoasimo hemakapurakaripo.” Aisane oyapo.

¹³ Maeo, Unihae Kotimo reane himu tumurumo hemakapurakanapo. Isiapo reane hemakapuraka maiya suamo Kotiaki suserakanapo. Arirakano wate fana isiapo kepo marekea rakisia maiya amo, re Keresoa paohoasimo Kotimo murikimasapo. Muriki-mayane repo Kotimo kakaro someane kakimaka, arirakano Ho Kotesamo re Kotipoko hakasa rakiraka risikiasimo makoterakano, ayiáka Kotimo re mafasikia pasimosapo. ¹⁴ Ayiáka koteaka risikiasimo Kotimo re peaesapo. Yasu Keresoane repo hemakapusimo isiapo some kasá maiya amo Kotimo re peaesapo. Unihae Yasu Keresomo faesane reaki parakuraka kakakosakipoko Kotimo re peaesapo. ¹⁵ Asiamo maeo, re wakapuaka paroaka risikianie. Isiapo reaki tarirakasuane soko, akaimo somerakasuane soko, hokonomo sawi poparaka makerakasuane soko, repo kakimaka yaiya risikianie.

¹⁶ Isiapo Unihae Yasu Keresomo soko, isiapo Ata Kotimo soko, tetapō isuane himu tumurumo hemakapurua risikinapo. Arirakano isuane kamenakaraka yaku arareraka, isu yaiya koteaka susu risikiasimo, Kotimo ipi mawakapuraka some karapo. Kotimo ayiakakosapo aisane epo kakaro ayiakakosapo. Aiyaka hemakapusimo Kotimo reane ararerakanapo. ¹⁷ Repo himu hemakapurane paroaka risikiasimo Kotipe Unihae Yasu Kereso tetapō reane ararehoasimo isiapo farimaka kurikurirakanapo. Repo makata rakirane soko, makata somerane soko, mapiraraka rakiraka risikiasimo, tetapō reane ararehoasimo isiapo farimaka kurikurirakanapo.

3

“Isupoko kurikurihoanie,” aiyaka Poremo somesane oyapo.

¹ Maeo, isiapo some hakása meta reaki someana oyapo. Repo isupoko farimaka kurikurihoanie. Isiapo Unihae Yasuane some karakano aporo hinamo yakaimo koteaka kaiyisimo repo farimaka kurikurihoanie. Kotimo someane repo kaisia maiya amo, repo kakimaka, Kotimo someane repo makáraraka hemakapusuapo. Repo Kotimo someane kakimaka makárasa ayiáka hauaka sua aporo hinamo suamo Kotimo someane kakimaka makárahoasimo kurikurihoanie. ² Arirakano aporo hinamo metakiramo Kotimo someane kakimarafapo. Asiamo aporo metakira Satanemo ikia kara á puraka ipu watikiaka rakiraka, isuane mokoatikihoko hemakapuraka risikinapo. Isiapo makata rakirane ipu matasonapaka, Kotimo isu ararehoasimo, repo Kotiaki isupoko farimaka kurikurihoanie. ³ Asiamo Unihae Yasumo makata ayiakakosaposane, epo ipi kotafe hokoa rukua somerafapo. Epo ipi reaki wakapu kakakosapo. Satanemo re asekeea risirapaka Unihaemo reane mafaihokosapo. ⁴ Unihae Yasumo isuaki hemakapurane kasane nōmo popana oyapo. Isiapo reaki somesane repo kakimaka risikinapo. Keseke soko repo kakimaka yaiya rakiraka risikiakosapo. Aiyaka isiapo reaki himu hakásaraka hemakapurakanapo.

⁵ Isiapo repoko úyaka kurikurinapo. Kotimo reane himu tumurumo hemakapurapo. Makata ane repo hemakapusimo Unihae Yasumo reaki tarisimo isiapo kurikurirakanapo. Yasu Keresomo ipi Kotimo makata rakirane metakarirafaraka yaiya wakapuaka rakiraka area ayiáka repo soko ayiáka wakapuaka rakikia naohoasimo isiapo farimaka kurikuri-rakanapo.

“Repo suamo rakinie,” aiyaka Poremo someaka maresane oyapo.

⁶ Maeo, Unihae Yasu Keresomo some one isuaki somesapo. Asiamo isiapo some one reaki some karakanapo. Some one isiapo somefapo. Some one Yasu Keresomo

ipi somepo. Hao, kaisie. Keresoa paosa aporo hinamoane soko kau hisiraka risike, makata rakianafonoraka, arirakano isiapo tariraka somesane soko, ipu kakimakanafonorakanone, iyaki hakāsa paoraka risikiakopo. ⁷ Arirakano isiapo ainane repo asesapo. Isiapo rakisia ayiáka, repo soko ayiáka rakinie. Isu reyaki hakasa risikisuamo isiapo kau hisiraka rakisiafapo. ⁸ Arirakano repo makata nakosa isiapo mosane isiapo nenakamaka mosafapo. Isiapo makata ropo reaki kasapo. Re isupoko nenakamakayia yaku rakiraka waforonapaka, isiapo makata ropoane reaki kasapo. Asiamo isiapo mone mokoakosakipoko sere soko, ereamo soko, makata rakisiapo. ⁹ Arirakano isuane tarira aporosasamo repo isuaki makata nakosa yaku kakafunureapo. Asiane isiapo isina rakisia hakasa nine repo asekea, murikimaka, isiapo makata rakisia ayiáka repo ayiáka rakiafunupo. ¹⁰ Asiamo isu reyaki risikisuamo tarikia somesane oyapo. “Aporo hinamo metamo makata rakiako hisiraka nenakamaka rekenone eaki makata nakosa kakakopo.” Aíyaka tariraka somesapo.

¹¹ Arirakano yumo repo metakiramo makata rakiako hisiraka risikinapakae. Asiamo hisiraka risia aporoamo aporo metakiramo koteaka rakiakorakano yia matasorakana-pakae. ¹² Asiamo makata rakiako hisiraka risia aporoaki Unihae Yasu Keresomo someane isiapo wakapuaka some karakanapo. Hao, kaisie. Unihaemo someane oyapo. Repo namina makata nenane nako mokoakosakipoko koteaka rakiraka risikianie.

¹³ Maeo, repo makata koteaka rakiakosane kau hisiraka yofehokopo. ¹⁴ Isiapo sawi popana one aporo metamo koaretaerakano aporo akiyaki hakasa risikiakopo. Ipiyaki hakasa risikianafonorakano, epo koaretaesane hemakapuraka ipi kaýahokosapo. ¹⁵ Re eyaki hakasa risikianafonoraka yia, eaki hisiraka somehokopo. Eane repo namina mae hemakapurukua maropoana ayiáka eane soko arareraka maropohoanie.

Poremo ayapasane oyapo.

¹⁶ Arirakano auanamo kepoane Unihae Koti ipipo. Unihae Kotimo re ararerakano maiya suamo re auaraka risikiasimo isiapo himu hemakapuramo reane kurikurinapo. Makata kotesa fasereperakano soko, makata watikisa fasereperakano soko, maiya suamo re auaraka risikiasimo, hemakapurakaripo. Koti reyaki hakasa rekeasimo hemakapurakaripo.

¹⁷ Ano Porepo. Nōmo nī hokono sokinimo sawi one wakasema reaki poparakanapo. Sawi suane nōmo poparaka makesane nōmo ainane nōmo nī hokono sokinimo sawi wakasema popanapo. Asiamo nōmo nihokono sokinimo popasane repo asekea hemakapuraka, “Sawi one Poremo poparareapo.” Aihoasimo nōmo nī hokono sokinimo popasapo. Nōmo reaki ayaparakanapo. ¹⁸ Re suane Unihae Yasu Keresomo makotehoasimo hemakapurakaripo.

1 Timoti

1 Timoti sawi one mahemakapukusa someane oyapo.

Sawi one Poremo Timotiaki popasapo. Timotimo kaīya Yu aporo hinamopo. Arirakano Timotimo wafayane kiriki aporopo. Aporo hinamomo Yasuane hemakapusimo Pore kimisi puraka, Timotiane keresoa paoraka rea aporosamo, eyaki hakāsa pukusakipoko Timoti karikia pusuapo.

Keseke Poremo Timotiaki someraka “Keresoa paosa aporo hinamo Efesase sesea risiane, nōmo asekea rekeanie,” aisapo. Asiasamo Peremo arare someane some kasapo.

Asiasamo Poremo arare someane Timotiaki some kasapo. Paseto aporo soko tikone aporo soko uyáka risikianie, aisapo. Arirakano kotafe tisamo someane kakimaka kekemahokohoamo asekeanie, aisapo. Arirakano Timotimo ipi koteaka rekeasimo Poremo some kasapo.

1 Timoti sawia some kepo parakuraka popasane oyapo.

1:1-2 Poremo sawi one kepomarekeea popasapo.

1:3-20 Kotafe tisamo someane asekeanie, Timoti, nōmo Kotimo someane kakaro ereketae somehoanie, aisapo.

2:1-8 Isu koteaka risikiasimo kamani aporopoko kurikurihoanie, aisapo.

2:9-15 Hinamo re, makahinamoraka tokoakopo, aisapo.

3:1-16 Pateso aporoane soko, tikone aporoane soko murikimakanie.

4:1-5 Kotafe tisa peraka makata somehokosane Poremo somesapo.

4:6-16 Timoti ne uyáka rekeanie, aisapo.

5:1-6:21 Keresoa paosa aporo hinamo asekea reke ayiakakosane Poremo somesapo.

Poremo Timotiaki sawi fana poparaka makesane oyapo.

¹ Yasu Keresomo tarira aporo rekeasimo Kotimo mafasikia murikimasa aporoane ano Porepo. Arirakano Yasu Keresomo soko ano murikimasapo. E pariperakarihoamo isu kau risikinapo. ² Timoti, néaki nōmo sawi one poparaka makerakanapo. Nōmo néaki Yasu Keresoane some kasane nōmo kakimaka eaki rekeako parisapo. Asiasamo né nōmo hokosa asiapo. Nōmo hemakapusuane Ata Kotipe Unihae Yasu Kereso tetapō auaraka rerane soko, kamenakaraka rerane soko, yaku ararenane soko, néaki kakasimo nōmo hemakapurakaripo.

“Kotafe someane kakimakopo.” Aisane oyapo.

³ Fana ano Masetónia hauaka pusua maiya amo, Timoti néaki nōmo someraka, “Né Efesase ape yia rekeanie.” Áiyaka nōmo neaki somesapo. Aisa ayíaka pipu soko, “Né Efesase ape yia efera hunia rekeanie.” Áiyaka nōmo néaki somerakanapo. Arirakano Efesase apea aporo metakiramo kotafe some karakano nōmo iaki someraka, “Yasuane kotafe some kakakopo.” Áiyaka somehoanie. Áiyaka somehokosakipoko né yia rekeanie.

⁴ Aporo sisimamo wate ásiapakae áiyaka some kepoane rakupe pesane pipu metakarinie, aihoanie. Ipu makasa kamumamo aporo wainepe pesa yano taesa yakai popasane soko makáranapaka metakarinie, aihoanie. Wate fana ipu makasa kamumamo some kepo rakupe pesane soko, aporo wainepe pesa yano taesane soko somerakanano aporomo kaikia someraka, “Kakaro asiarakapo.” Áiyaka himu tetáraka hemakapurapaka someane some kakakopo, aihoanie. Wate fana ipu makasa kamumamo some kepo some kape pesane soko, aporo wainepe pesa yano taesane soko somerakanone, aporomo Kotiane hemakapusimo ipu somerakanafapo. Arirakano aporomo Kotiaki himu hakásaraka hemakapurakano, Kotimo ipi hemakapusuane aporoaki karápo.

⁵ Nōmo néaki some akara one aporo hinamo suamo kakimaka risikino, i namo kakaro koteaka risikiakosapo. Arirakano makata watikisa metakarisiane efera hunia rakiako hemakapurkusafapo. Arirakano Kotiaki kakaro himu hakásaraka hemakapurkusapo.

Asiasamo Kotiane soko aporo metakirane soko ipu himu tumurumo hemakapukusapo. Asiamo ipu namina yia himu tumurumo hemakapusimo some akara one nōmo reaki some karakanapo.

⁶ Arirakano some kotesane aporo metakiramo kakipayaraka ikia kara hasaka apura ayíáka purakanapo. Hasaka apura ayíáka nenakamaka me rukua mokome somerakana-pakae. ⁷ Ipu someraka, “Kotimo somemane motosane some kepo kará aporo tisane isupo.” Aíyaka somesa nine Kotimo some kepoane ipu hemakapurakanafapo. Ipu wakapuaka someraka tiki somerakao asiane ipu namina some kepoane hemakapurakanafapo.

⁸ Arirakano Kotimo somemaneane Kotimo isuaki some karakano isiapo kakimaka rakirakano, somemaneane kotesapo. Ane isiapo hemakapurakanapo. ⁹ Asiamo aporo hinamo ereketaeraka risiakipoko Kotimo somemaneane motosafapo. Arirakano aporo hinamo watikiaka risiakipoko maropohoasimo somemane motosapo. Aporo hinamo úyaka risiakipoko somemaneane motosapo. Somemane mamosona aporo hinamoakipoko soko, somemane koaretaena aporo hinamoakipoko soko, Kotiane hemakapunafonona aporo hinamoakipoko soko, aporo hinamo watikisa akipoko soko, Kotimo ikia kara kekemahoanafonoraka hauaka wo makata rakirane kekemana aporo hinamoakipoko soko, ata ama tetā kukusimo rura aporo hinamoakipoko soko, aporomano rura aporo hinamoakipoko soko, ¹⁰ hinamo hakimara aporoakipoko soko, aporo hokosa takēyaki pura aporoakipoko soko, hokosa haki serafo maka karikia nena aporo hinamoakipoko soko, kotafe somera aporo hinamoakipoko soko, kotafe aumana aporo hinamoakipoko soko, kakaro someane metakarikia kakaro some kotesane mawakasemarakaraka rakira aporo hinamoakipoko soko, ayíáka aporo hinamo watikiaka risiakipoko somemaneane motosapo. ¹¹ Arirakano kakaro someane soko, Yasuane hemakapusimo some kotesane soko, hakāsa yiyyareapo. Arirakano Yasuane some kakasimo Kotimo ano murikimasapo. Koti faeraka reane soko, wakapuaka reane soko, epo someane nōmo some karakanapo. Arirakano sesenamo kepoane Koti ipipo.

Poremo Kotiaki susesane oyapo.

¹² Nōmo koteaka rakisimo Unihae Yasu Keresomo anoaki wakapu karakasupo. Wakapu karaka epo hemakapuraka, “Poremo anopoko siaraka rakiraka rekeakosapo.” Aíyaka hemakapukua nōmo epoko rakisimo epo ano murikimarakanasupo. Murikimasasamo nōmo eaki suserakanapo. ¹³ Fana nōmo eane mainamareraka mawakasemarakaraka some-sapo. Yasu soko arirakano Yasua paosa aporo hinamoane soko nōmo mokoatikirakano yia, Yasumo ano kamenakarakasupo. Nōmo epo someane kakimakasiraka meraruraka rekeno asekea, epo ano kamenakarakasupo. ¹⁴ Kamenakaraka Unihaemo ano yaku arareraka nōmo Yasu Keresoaki kataka marekea rekeno asekea, eaki himu hakásaraka hemakapurane soko, himu tumurumo hemakapurane soko, anoaki karakasupo.

¹⁵ Arirakano repo soko eaki himu hakásaraka hemakapukusakipoko kakaro some one kakimakanie. Aporo watikisane mafasiako Yasu Keresoane hauaka wo pesapo. Arirakano namo kakaro aporo watikisa fana reane anopo. ¹⁶ Asiane Kotimo ano kamenakarakasupo. Ano kakaro aporo watikisa rekeno, Yasu Keresomo anoaki foaka sapehoanafonoraka ano koteaka rekeasimo ano pasimarakanasupo. Asiamo aporo hinamo suamo asekea hemakapusimo Yasumo anoaki foaka sapehoanafonoraka ano koteaka rekeasimo pasimarakanasupo. Asiamo ipu hemakapuraka, “Yasumo Poreaki foaka sapehoanafonoraka e koteaka rekeasimo pasimasasamo anoaki soko ayiakakosapo.” Aíyaka Yasuaki himu hakásaraka hemakapurakanano yaiya rerane makosapo. ¹⁷ Asiamo yaiya rera Unihae Kotiaki nōmo kekererakanapo. E kurafaraka reane soko, e isiapo asekeanafononane soko, Koti hákasa ipipo. Maiya suamo e yano motosane nōmo makáraraka kekererakanapo. Epo faesane soko yaiya faeraka rekeakosasamo eaki kekererakanapo. Kakaroripo.

“Timoti né paroaka rekeanie.” Aíyaka Poremo somesane oyapo.

¹⁸ Timotio, né Keresoa paosa aporosasamo né nōmo hokosa asiapo. Asiasamo somemane one nōmo néaki some karakanapo. Kotimo somerakano kaira aporomo néaki fana some karakasuane kakimaka hemakapukua rekeanie. Nōmo some one hakāsa

yiyapo. Ame aporo paroaka wakapuaka risike yunu awera ayíáka, nōmo soko Kotipoko paroaka wakapuaka reke epo yunuane weanie. ¹⁹ Kotiaki kakaro himu hakásaraka hemakapukua rekeanie. Makata watikisa né himura kakerakano kairaka, ní himumo neaki tau somerakano kakipayahokopo. Kakimaka makata watikisane metakarinie. Metakarikia tau himumo hemakapukua kotesa susu hemakapukua someraka rekeanie. Arirakano aporo metakiramo himura tau makata watikisa kakerakano kaikia kakipayaraka, makata watikisane yia kake Kotiaki himu hakásaraka hemakapurane soko metakarisiapo. ²⁰ Metakarisia ayíáka, aporo tetámo soko Kotiane metakarisiapo. Metakarisiane meta, yano motosa Himeneusepo. Metane yano motosa Arekesátapo. Tetapō himura tau watikisane yia kakerakano kaikia kakipayaraka, tetapō Kotiane mawakasemaraka mainamaresapo. Mainamaresane metakarismo aporo tetāne nōmo Sataneaki kasapo.

2

Kotiaki kurikurinane oyapo.

¹ Re uyáka risikiasimo nōmo hemakapurakaripo. Makata fanane aporo hinamo supoko hemakapukua farimaka kurikurihoanie. Arirakano Kotimo ipi hemakapusuane ayikasimo eaki kurikuriraka wahoanie. Arirakano aporo hinamo suane Kotimo ararehoasimo kurikurihoanie. Makata supoko Kotiaki susehoanie.

² Isiapo Kotiaki himu hakásaraka hemakapukua risike, tau auaraka risikiakosakipoko, kamani aporo unihae fanaraka kaya epoko soko farimaka kurikurihoanie. Arirakano kamaniyaki makata rakira aporo akipoko soko farimaka kurikurihoanie. ³ Ayíáka kurikuriraka risikino kotehokosapo. Koteaka risikino, Kotimo sesehokosapo. Asiamo Kotimo isu mafasikia ararenapo. ⁴ Kotimo aporo hinamo suane hemakapukua mafasiako seserakanapo. Arirakano kakaro someane repo koteaka hemakapusimo ipi hemakapukua rekenapo. ⁵ Asiamo Koti hákasa ipipo. Arirakano aporomo ainane soko Kotiaki some kaka, Kotimo ainane soko aporoaki some kaka, ayikasimo, tipia reane Yasu Kereso ipi hákaso. Yasu Kereso tipia rekeakosakipoko ipi aporomanomo kauane maka hauaka wo pesapo. ⁶ Aporo hinamo suamo makata watikisa mafahoko ipi kauane makata ropo akara ayíáka ipi kauane kaka kusuapo. Asiamo aporo hinamo suane Kotimo mafasiasimo ipi kusuapo. Kotimo murikimasa maiya hakasa yamo Yasu ipi kusuapo. ⁷ Ipi kusuasamo eane soko nōmo some kakasimo epo ano tarira aporo rekeasimo murikimasapo. Murikimarakano Yu aporo hoanafonosaki Kotimo kakaro someane ipu kakimaka, Kotiaki himu hakásaraka hemakapusimo nōmo tisamo atarira ayíáka tarikia some karakanapo. Nōmo kakaro somerakaripo. Kotafe somerakarifapo.

⁸ Asiamo nōmo hemakapusuane ape sumu su aeyaka Keresoa paosa aporo suamo hokono máfaraka* Koti makáraraka eaki kurikurihoanie. Sapesane soko tafatafasane soko metakarikia kurikurihoanie. Aýaka nōmo hemakapurakaripo.

“Hinamo re uyáka tokoanie.” Aisane oyapo.

⁹ Arirakano Keresoa paosa hinamo reaki nōmo some one some karakanapo. Reane aporomo asekeasimo makahinamohokopo. Pasu siaraka koteaka osohoanie. Arirakano pasu siaraka koteaka makafirinie. Arirakano hinamo repo uni itiane makahinamohoko hemakapukua rakiakopo. Arirakano hinamo repo makahinamohoko hemakapukua ikiare mawia taponane soko, seketenaeya fakaterapinane soko, pasu mone káramo roporaka osonane soko, aporo metamo asekeasimo kau rakiane siahoasifareapo. ¹⁰ Kau rakirane makárahokopo. Meta arareraka koteaka rakirane makárahoanie. Meta ararenane koteaka kau arakira ayíáka rakiranapo. Meta ararenane Kotiaki himu hakásaraka hemakapusua hinamo amo anapo.

¹¹ Kotimo some akara maiya amo Kotimo someane kaikia hemakapusakipoko, hinamo re me faraka tau tokoanie. Some akarane koteaka kaikia tokoanie.

* 2:8: Namina kurikurinane hokono máfaraka ayíáka Kotiaki kurikurinapo.

¹² Hinamo repo aporoaki tisaraka some kaka, arirakano hokotakekeea ayiane siahoasifareapo. Aíyaka nōmo hemakapurakaripo. Asiamo hinamo re tau tokoanie.

¹³ Arirakano Kotimo Atame fana rakikia Ifi keseke rakisiapo. ¹⁴ Arirakano Satanemo mahoperaka kotafe somesane Atamemo kakimasafapo. Ifimo kakimaka Kotimo someane koaretaesapo. ¹⁵ Koaretaesasamo hinamomo hokosa taka apera maiya amo kau terapo. Asiane hinamomo Kotiaki kakaro himu hakásaraka hemakapukua kake, arirakano meta ararehoko hemakapukua kake, arirakano makata watikisane kikisiraka metakarikia kake, arirakano koteaka tau kake, maiya suamo ayiáka kakeno, ipi hokosa taka apera maiya amo Kotimo e mafasiakosapo.

3

“Keresoa paosa aporo hinamoane asekea rea (pasedo) aporo re uyáka risikianie.” Aisane oyapo.

¹ Hao, kaisie, kakaro someane nōmo reaki some karakanapo. Aporomo someraka, “Keresoa paosa aporo hinamo asekea rea aporoamo arakirane nōmo rakiakoripo.” Aíyaka aporo metamo somerakanone, aporoamo makata rakira kotesane rakiako seserakanapo. ² Asiamo asekea rea aporo, né uyáka rekeanie. Né koteaka reke nōmo watikiaka rakianafonorakano aporo metakiramo né hokomaka somehokosafapo. Né koteaka ereketaeaka reke, Keresoa paosa aporo hinamoane nōmo asekea rekenone ane, siahokosapo. Nōmo hinamo hakásaraka arumakanie. Né sipiriti he nekea himu mapari-taehokopo. Kaumo hemakapusuane kekemaraka rakiakopo. Koteaka hemakapurane kekemaraka rakinie. Makata ereketae susu rakinie. Aporo kimisi soko perakano nōmo tereraka pasimakanie. Aporo hinamo suaki nōmo koteaka tisaraka tarinie. ³ Sipiriti he masuanane kára nakopo. Tapare saperaka weakopo. Tau auaraka rekeanie. Mone kára mokoakosakipoko hemakapukupo. ⁴ Nōmo apea, nōmo ní hinamomo soko, nōmo ní hokosamo soko, ipu suamo nōmo someane koteaka kakimakasimo iane koteaka asekea rekeanie. Nōmo someane nōmo ní hokosamo koaretaenafaraka, nōmo ní hemakapusuane kekemaraka koteaka kakimaka risikiasimo nōmo ní koteaka asekea rekeanie. ⁵ Arirakano nōmo hinamomo soko, nōmo hokosamo soko, ipu nōmo someane kakimakanafonorakano, iane nōmo koteaka asekea rekenafapo. Nōmo iane koteaka asekea rekeanafonorakano, Keresoa paosa aporo hinamoane soko, nōmo mayiáka koteaka asekea rekeakosare? Nōmo koteaka asekea rekeasifareapo.

⁶ Arirakano né Yasuaki kawe rekeako pariraka he tapukumarerakano, nōmo Keresoa paosa aporo hinamoane asekea rekeane siahosifareapo. Né hea kawe tapukumaresasamo, Keresoa paosa aporo hinamoane asekea reke, né níane makárarako hemakapurapaka, Keresoa paosa aporo hinamoane nōmo asekea rekeakopo. Arirakano né níane makárarakano, Kotimo fana Sataneaki someraka, “Né metakarikia pusie.” Aisa ayiáka, né soko Kotimo metakarikia pusie aihokosapo. ⁷ Arirakano Keresoa paohoanafonosa aporomo soko nōmo ainane asekea néane seserakano, nōmo Keresoa paosa aporo hinamoane asekea rekeane, siahokosapo. Asiane Keresoa paohoanafonosa aporomo né asekea hisiraka, néane hokomaka someraka, “Epo watikiaka arakire,” airakano né kaiyahokosapo. Ne kaiyanamo, kasipumo pokoa amara ayiáka Satanemo kasipu amo né makosapo. Anapaka Keresoa paosa aporo hinamoane asekea rekeakosa aporo murikimakosakipoko, Keresoa Paohoanafonosa aporomo nōmo ainane asekea someraka, “Epo koteaka rakirapo,” aihokosapo.

“Tikone aporo re uyáka risikianie.” Aisane oyapo.

⁸ Tikone aporo re uyáka risikianie. Keresoa paosa aporo hinamoane asekea risia aporo koteaka arisia ayiáka, re soko ayiáka koteaka risikianie. Koteaka ereketae susu hemakapukua rakiraka risikianie. Aporo metaki some meta kaka, aporo metaki some meta kaka, ayiáka some koaka mareakea somehokopo. Sipiriti he soko he watikisa soko nakopo. Makata kemo soko, mone soko, kára mokoako hemakapukupo. ⁹ Arirakano Keresoa paosa aporo hinamoaki Kotimo kakaro someane ipi tarisiapo. Asiamo ipi kakaro some

kotesane kaikia himu hakásaraka hemakapukua paroaka risikianie. Paroaka risike ipu namina himua makata watikisa kakerakano kaiyanafonona aporoane murikimakanie. ¹⁰ Tikone aporoane murikimakosakipoko, haru murikimafaraka, epo makata rakirane fana asekeanie. Epo koteaka rakirakanare? Epo watikiaka rakirakanare? Ayiáka repo asekeanie. Repo aseane epo koteaka rakiraka rekeno asekea, epo sia tikone aporomo rakirane rakisireapo, aiyaka hemakapukua murikimakanie.

¹¹ Tikone aporomo koteaka arakira ayiáka, tikonemo hinamo re soko ayiáka koteaka tokoanie. Metane hokomaka somehokopo. Arirakano he watikisa nekea himu mapari-taeraka aina ayiáka tokoakopo. Maiya suamo koteaka susu rakiraka toke, arirakano kakaro ereketae susu someraka tokoanie.

¹² Arirakano tikone aporo nōmo hinamo hakásaraka arumakanie. Nōmo ní hokusamo soko, nōmo ní hinamomo soko, ipu suamo nōmo someane kakimakasimo iane koteaka asekea rekeanie. ¹³ Nōmo koteaka rakirakan ne yano motosane kotehokosapo. Arirakano Yasu Keresoaki himu hakásaraka hemakapukua reasasamo epo someane nōmo somehoko kaiyanafaraka mapiraraka wakapuaka somehokosapo.

Kakaro some kepoane oyapo.

¹⁴ Yumo nōmo sawi one poparaka reke, nōmo ne foaka aseako peako hemakapurakaripo. ¹⁵ Ano peakosapoko asiane ano foaka peanafonorakano ane, aporomo koteaka ereketae rakiraka risikiakosane ipu hemakapusimo nōmo poparaka ayiakakosapo. Yaiya rera Kotimo ipi kakaro someane Keresoa paosa aporo hinamomo kakimaka makama fananapo. Aina ayiáka ira waripi paroaka area ayiáka Keresoa paosa aporo hinamomo Kotimo kakaro someane kakimarakan ane ayiáka paroaka risirapo. ¹⁶ Kotimo kakaro some kepoane namo kakaro kárupo. Some kepoane aporomo marakoraka hurutapi-akosafapo. Kotimo someane isiapo kakimasa kepoane oyapo. Yasu Keresomo aporomo kau maka perakano isiapo aporo hinamomo asesapo. Arirakano ipiane ereketae susu reane Ho Kotesamo isuaki tarisiapo. Arirakano hepene aporomo soko eane asesapo. Arirakano hauaka su aeyaka aporo suamo eane hemakapusimo aporo metakiramo some kasapo. Some karakano kaisia aporo hinamomo eaki himu hakásaraka hemakapusuapo. E hepene yapunaka pasimarakano faeraka reke e yano motosa káraraka rekenapo.

4

Kotafe tisa aporo peakosane oyapo.

¹ Kotafe tisa aporo peakosapo aiyaka ho Kotesamo hufitaeraka somesane oyapo. Hauaka one fahoko ana maiya amo, aporo metakiramo Yasu Keresoaki hemakapusuane metakarikia, kotafe hora aporoaki patera aseakosapo. Patera asekea, kotafe hora hoamo someane soko kakimaka, Satanemo aporo raipa yakasa hope yatafu tetapō some akarane kakimaka rakiraka risikiakosapo. ² Arirakano kotafe some kepoane oyapo. Aporomo himu tetáraka hemakapukua risiamo kotafe somerapo. Ipu himu tetáraka risirane mokopayarakano, ipu himuane Satanemo murikimaka marerapo. Murikimaka mareraka, "Himuane nōmenapo." Aiyaka Satanemo murikimaka marerapo.*

³ Murikimaka maresa aporoamo someraka, "Hinamo arumakopo. Arirakano makata nakosa metakira soko sokoaihoanie. Asiamo hinamo arumaraka makata sokoaisane nenakanone ane, re watikiaka risikinapo." Aiyaka ipu kotafe some kakakosapo. Asiamo kotafe someane repo kakimakopo. Makata nakosane Kotimo ipi rakisiapo. Asiamo Kotiaki himu hakásaraka hemakapusua aporo hinamomo Kotimo kakaro someane kakimarakan, ipu makata nenane nasimo Kotimo rakisiapo. ⁴ Asiamo makata su Kotimo rakikia maresane namo kakaro kotesapo. Kotesasamo makata nakosa metakira hisiraka sokoaihokopo. Makata nakosa su maka suseaka kurikuriraka neane siahoasireapo.

⁵ Asiamo Kotimo someamo soko kurikurianamo soko makata nakosane makotenapo.

* ^{4:2:} Murikimaka marerane aporomo saro senaki pateraka, saroane nōmenapo. Aihokosakipoko pateana ayiáka murikimaka patenapo.

Yasu Keresomo aporo raipa kotesane oyapo.

⁶ Arirakano nōmo some one neaki tarirakanapo. Keresoa paosa aporo maemo koteaka hemakapusimo nōmo some karakano ane, né Yasu Keresomo aporo raipa kotesane népo. Arirakano né kau kárahokosakipoko, nōmo asipa nenapo. Aina ayíáka nōmo Yasu keresoaki himu hakásaraka hemakapusuane kárahokosakipoko, Kotimo kakaro someane yaiya kakimaka rekeanie. ⁷ Kakimaka reke aporo metakiramo Kotiane metakarikia, aporo sisimamo soko, hinamo sisimamo soko, makata some rakupe pesane kakimakopo. Asiamo someamo Kotiane makáranafapo. Arirakano Kotipoko wakapuaka rakiraka rekeakosakipoko Kotimo ainane koteaka enomaka rekeanie. ⁸ Arirakano aporomo makata rakiako kau hisiraka yofenapaka maiya suamo apea karáfapo. Kau mawakapuhokosakipoko aporomo makata rakirapo. Ane wakasema kotesapo. Arirakano namo kakaro kára kotesane oyapo. Himu soko ho soko tetákara yofenapaka, Kotipoko rakiako seseraka, Kotimo ipi ainane enomaka hemakapurunie. Enomaka hemakapurakano yumo soko koteaka rekeakosapo. Keseke soko yaiya koteaka rekeakosapo.

⁹ Hao, kaisie. Nōmo some akara one kakaro somerakanapo. Some one kaikia, kakaro kakimakanie. ¹⁰ Isiapo Kotiane ipi wate fana reane, yumo soko yaiya rekenapo. Kotimo aporo hinamo suane mafasiakosakipoko hemakapusuane, epo someane kakimara aporo hinamoane hákasa mafasirapo. Asiamo Kotiaki isiapo himu hakásaraka hemakapuraka risikinapo. Isiapo epoko rakiane isu aporo metakiramo mokoatikirakano yia, isiapo wafororaka rakiraka risikinapo.

¹¹ Arirakano some one aporo hinamo suaki some kakanie. Some karaka, “Re uyáka risikianie.” Aiyaka maroporaka some kakanie. ¹² Timoti, nōmo some karakano, né hokosa rauasasamo aporo metakiramo néaki someraka, “Né nenakamaka hokosa reapo.” Aiyaka aporoamo né makefehoane siahosasifareapo. Keresoa paosa aporo hinamomo néane asekea ipu né kekemahoasimo koteaka someraka, arirakano koteaka reke, arirakano aporo hinamo metakirane himu tumurumo hemakapukua reke, arirakano Kotiaki soko himu hakásaraka hemakapukua reke, arirakano himura watikisane metakarikia koteaka susu rekeanie. Asiamo né koteaka rekeno, ipu né asekea kekemahoasimo né koteaka rekeanie.

¹³ Ano peasiraka nōmo uyáka rakinie. Aporo hinamo suamo kaiyisimo Kotimo sawiane kakama menohoanie. Menoraka Kotimo someane some kakanie. Arirakano aporo hinamomo hemakapusimo Kotimo some kepoane tisaraka koteaka some kakanie.

¹⁴ Kotimo ipi wakapu yaku ararenane néaki karakano, nōmo masane metakariakopo. Kotimo somerakano kaira aporomo néaki some kaka, arirakano Keresoa paosa aporo asekea risia aporoamo ipu hokonomo né sakaisa maiya amo, Kotimo ararena wakapuane néaki yaku kasapo. Kasane maka rakinie. ¹⁵ Nōmo someraka one kaikia hemakapurunie. Hemakapukua reke, some one murikimaka rakiraka rekeanie. Arirakano Kotimo ikia kara koteaka rakipe purakano, néane aporo metakiramo asekea someraka, “E Kotimo ikia kara koteaka apure.” Aiyaka néane somehokosapo.

¹⁶ Ipu nōmo makata rakirane asekeasimo nōmo koteaka rakiako hemakapukua rekeanie. Nōmo tisaraka makata some akaramo nōmo hasaka some karápaka asekeanie. Aiyáka koteaka hemakapukua rakiraka rekeno, né níane soko arirakano nōmo someane kakimasa aporo hinamoane soko Kotimo mafasiakosapo.

Kakimara aporo hinamoane maroponane oyapo.

¹ Aporo sisimamo watikiaka rakirakano, nōmo sakepamo iriraraka somehokopo. Ní ataki somera aiyáka eaki maroporaka tau auaraka somehoanie. Aporo rauaki someraka, ní maeaki somera aiyáka somehoanie. ² Arirakano hakama sisimaki someraka, ní amaki somera aiyáka somehoanie. Hinamo rauaki soko, hinamo sakoraki soko, someraka, ní papáki somera aiyáka somehoanie. Hinamoaki maropoana maiya amo nōmo hasaka hemaka purapaka nōmo Kotiaki himu hakásaraka hemakapukua maropohoanie.

"Hinamo yaro asekea rekeanie." Aisane oyapo.

³ Hinamo yaroane aporo metamo ararehoanafonorakano, nōmo ararehoanie. ⁴ Arirakano hinamo yaro ipi hokosamo soko, ipi hokosamo hokosamo soko, eane asekea risikianie. Fana ama, ata, hakamape, makasa kaua, ipu soko hokosa re asekea risiasamo, repo hokosamo soko iane ropo asekea risikianie, aihoanie. Asekea risikino Kotimo sesehokosapo.

⁵ Arirakano hinamo yaro meta, aporo metamo asekea rekeanafonoraka, ipi hokosa soko rekeanafonoraka, ipi haku kake, ipi Kotiaki himu hakásaraka hemakapukua kake, maiya suamo Kotiaki kurikuriraka kakeno asekea, eane repo ararehoanie. Asiamo ereamo soko, maíyamo soko, maiya suamo ipi Kotiaki kurikuriraka kake, hinamo yaroane koteaka kakakosapo. ⁶ Arirakano hinamo yaro metamo kaumo hemakapusuane kekemaraka, aporo metakirayaki mokome purakano, hinamoamo ipi apia kusua ayíáka ipi himuane kurakanapo. ⁷ Nōmo some akarane hinamo yaro suamo hemakapusimo some one some kakanie. Iane Keresoa paohoanafonosa aporomo hokomakohoamo some one, Timoti, nōmo some kakanie. ⁸ Keresoa paosa aporomo ipi ama, ata, hakamape, makasa kaua, i suane asekea rekeanafonorakano, epo Kotimo someane koaretaerakanapo. Epo apea amano hakāsa risiane asekea rekeanafonorakano, epo Kotiaki soko himu hakásaraka hemakapukua rekenafapo. Epo watikisa amo Keresoa paohoanafonosa aporomo watikisane marokenapo.

⁹ Arirakano hinamo yaro sisima meta, keremisi kaeyako namasu (60) amo kayane, e yano motosa popahoane* siahoasireapo. E yano motosa poparaka ararehokosakipoko hinamo yaro uyáka kayane yano motosa popahoanie. Hinamo yaroane aporo hakása pusuane popahoane siahoasireapo. ¹⁰ Arirakano aporo hakása pusua hinamoane hinamo metakiramo asekea someraka "Hinamo amo koteaka rakirapo. Ipi hokosa koteaka asekea kayapo. Arirakano aporo kimisi perakano soko, ipoko ipi apiaki makata nakosa akará ayíáka karápo. Keresoa paosa aporo soko hinamo soko i korake epo kusunapo. Aporo hinamo metakira makata meta tomekesane epo ararenapo. Metapoko epo koteaka kára rakirapo." Airakano hinamo yaro ayíáka koteaka kayane yano motosa popahoane siahoasireapo.

¹¹ Arirakano hinamo yaro raua yano motosa popahokopo. Asiamo hinamo yaro rauamo maiya suamo Keresopoko makata rakirane metakarikia, aporomo e arumakasimo hemakapukua, aporoyaki puko kára hemakapusuane. Hinamo rauamo anapo. ¹² Asiamo fana epo Keresoaki someraka, "Népoko nōmo rakiakosapo." Aisane metakirikia aporo metayaki purakano, aporo metakiramo asekea someraka, "Epo Keresopoko rakiakosapo, aisane metakarirane, hinamoamo kakaro hasakane." Aihokosapo. ¹³ Ayíáka hinamo yaromo Kotimo makata rakira ane soko metakarikia, ipi kau hisiraka, masakariaraka kake, ape meta á purakano, ape meta á purakano, ayíáka tipia kotafe somehaeraka koraka rerapo. Makata somehoanafonosane epo hemakapukua tipia kotafe koaka marekea somerapo. ¹⁴ Anapaka nōmo hemakapusuane oyapo. Hinamo yaro raua aporomo arumayane siahoasireapo. Arumaka hokosa hokono marekea, ipi apia soko, hokosane soko, koteaka asekea tokoanie, aihoanie. Arirakano hinamo yaro rauamo watikiaka rakirakano, Keresoa paohoanafonosa aporomo asekea, isuaki hokomaka someraka, "Re watikirareapo." Airapaka hinamo yaro rauaki nōmo someana one some kakanie. ¹⁵ Arirakano hinamo yaro metakiramo Kereso ane metakarikia Satane ane kekemarakanapakae.

¹⁶ Asiamo hinamo re Keresoa paosasamo hinamo yaro meta repo apea kakeno, hinamo repo namina yiamo hinamo yaroane asekea tokoanie. Arirakano kurikuri apea Keresoa paosa aporo hinamoaki someraka, "Hinamo yaroane repo asekea risikianie." Aihokopo. I waforonapaka nōmo apea hinamo yaro kakeno, nōmo ní yiámó asekea rekeanie.

* 5:9: Hinamo yaroane Keresoa paosa aporo hinamomo asekea risikiasimo yano motosa popanapo.

Hinamo yaro ipi haku tipia kakeno ane, Keresoa paosa aporo hinamo metakiramo asekea risikianie. Nómó ní apea hinamo yaro meta kakeno, nómó ní yiamo asekea rekeanie.

Keresoa paosa aporo hinamo asekea reane oyapo.

¹⁷ Keresoa paosa aporo hinamo asekea rea aporomo ipi namo kakaro koteaka asekea rekeno, eaki makata ropo karáka, hakásá karáka, hakásá meta soko, yaiya yaku ripaka marekea kakanie. Tetá karáka, tetá meta soko, yaiya yaku ripaka marekea kakanie. Epo Kotimo someane koteaka some kaka, arirakano koteaka tisaraka tarikia, asiamo eaki makata ropo meta soko yaku paoraka kakanie. ¹⁸ Kotimo sawia popasane oyapo. “Saro ponomakaumo witi hae kauane haketarisimo finirape apura maiya amo, witi hae namoane nasimo, ponomakau akaia tapohokopo. Neane siahoasireapo.” Aíyaka popahoareapo. ^(Lo 25:4)

Makata meta soko popasane oyapo. “Aporomo makata rakirakano ipi makata rakisakipoko makata ropo makasireapo.” Aíyaka popahoareapo.

¹⁹ Aporo hakásamo Keresoa paosa aporo hinamo asekea rea aporoaki hukururakano kaiyakopo. Aporo tetámo soko metao, aporo isiammo soko metao, ayíáka ipu suamo hakásá yine asekea hukururakano ane, kaiyinie. ²⁰ Asekea rea aporo metamo yaiya watikiaka rakiraka rekeno aporo suamo kaiyisimo aporoaki ayiakakopo, aihoanie. Epo ainane aporo suamo kekemaraka, watikiaka rakirapaka eaki kakama metakarisie, aihoanie.

²¹ Asiamo nómó some akarane ereketaeraka kekemahoanie. Aporo meta makama fanaraka aporo meta makama kessekeraka ayíáka rakiakopo. Asiamo Kotimo soko, Yasu Keresomo soko, Kotimo hepene aporo kotesamo soko, nómó arakirane aserakanapo.

²² Aporo metamo Unihae kotipoko rakisimo, wate foaka nómó hokonomo e sakairaka kurikurinane ayiakakopo. Foaka nómó hokonomo sakairaka kurikurisane, epo watikiaka rakirakano ane, nómó kererepo. Anapaka nómó ní koteaka susu rakiraka reke, watikisane metakarikia rekeanie. ²³ Maiya káramo Timoti né himu nenakaraka makata takamasasamo, namo he hákasa nakopo. Waene he soko wakasema nanie.†

²⁴ Arirakano aporo metakiramo makata watikisane aporo suamo wate foaka aserapo. Arirakano aporo metakiramo makata watikiaka rakikia mahamesane repo asekeanafonosane kesekeea mafekemarakano aserapo. ²⁵ Aina ayíáka aporo metakiramo makata koteaka rakirakano wate foaka repo aserapo. Arirakano aporo metakiramo makata koteaka rakisiane, kakama rakianafonosane repo wate foaka aserafapo. Asekeanafonosane, ipu makata koteaka rakisiane keseke repo asekosapo. Asiamo ipu koteaka rakisiasamo ipu makata rakisiane keseke faserepeakosapo.

6

Aporo hinamo raipa roposaki “Uyáka risikianie.” Aisane oyapo.

¹ Keresoa paosa aporo hinamo raipa roposao, re roposa wafayane hemakapunie. Epo né roposasamo eane hemakapukua, epo someane kakimaka rakinie. Aporo metakiramo Kotiane mawakasemahokohoamo, isiaipo some akarane soko watikirareapo, aíyaka hokomakohoamo, re roposa wafayane hemakapunie. ² Arirakano aporo raipa roposa wafayane soko Keresoa paoraka, arirakano aporo raipa roposane soko Keresoa paoraka, tati Keresoa paosa aporo maeraka risike, aporo raipa roposamo someraka, “Eto tetákara Keresoa paosasamo epo someane nómó kaiyakosafapo.” Aíyaka hemakapukupo. Teto titi Keresoa paoraka mae hakásasamo epoko wakapuaka rakinie. Keresoa paosa aporo ararehokosakipoko epoko wakapuaka rakinie. Timotio, nómó some one ipu kakimaka rakisimo some akarane nómó tisaraka some kakanie.

Kotafe tisa aporomo rakirane oyapo.

³ Kotimo ainane Unihae Yasu Keresomo isuaki tarikia some kasapo. Some kasane aporo metamo aoraka kakimakanafonoraka, arirakano epo ipi some meta haku some

† ^{5:23:} Efesase taonea á namo heane watikisasamo, aporomanomo neane makata takamarapaka, ipu waene heane wakasema nenapo.

karáka, ipi Koti kekemana some hakasa yinesa someane karakánafapo. ⁴ Aporoamo koaretaeraka reke e ipiane makáranapo. Makáraraka reke ipi himeteraka nenakamaka makatane hemakapurapo. Aporoamo tafatafaraka somehoko seseraka, tafatafaraka somerane makáranapo. Nenakamaka tafatafaraka somera aeyaka kakanakeraka rerane fasereperapo. Arirakano saperaka rerane soko, mainamareraka somerane soko, topakamaraka hemakapukua somerane soko fasereperapo. ⁵ Maiya suamo ipu namina saperaka tafatafaraka risike namina himu hemaka apuramo koteaka hemakapunafonoraka, kakaro someane hemakapurafapo. Koteaka hemakapunafonoraka ipu hemakapuraka “Kotimo ikia kara kekemarakanone, makata kemo kára mora ayapo.” Aýaka hasaka hemakapukua risikinapo.

⁶ Arirakano aporo metamo someraka, “Makata su ano mokoaripi,” aýaka hemakapukua rerafaraka epo someraka, “Hauaka wo makata su ano siaraka rekenapo.” Aýaka hemakapura aporoamo Kotiane kekemarakano eane Kotimo makotenapo. ⁷ Arirakano ipi kaíyiamo hokosa kiri taka apera maiya amo, makata kemo maka yia takaperare? Wae. Makata kemo maka yia takaperafapo. Kau huyaraka takaperapo. Akura maiya amo soko, makata kemo maka hiakosare? Wae. Makata kemo maka hiakosafapo. ⁸ Arirakano hauaka wo aporomo fiti tapirane soko, hinamomo nahuri kerane soko, makata nakosane soko, makatane tokeno repo uyáka somehoanie. “Makata su siareapo. Isu seseraka risikinapo.” Aihoanie. ⁹ Arirakano aporo metakiramo makata kemo kára mokoaripi, aýaka hemaka apuramo, aporoane sipinamo makata kakayia maka, hea sokoperaka maka apura ayiáka, aporoane maka sokoperaka maka purapo. Maka purakano aporoamo ipi makata watikisane seseraka rakirakano, makata watikisamo e kirimaraka maka purapo. Puraka koteaka hemakapunafonoraka aporo masuasamo arakira ayiáka rakiraka i arupukusapo. ¹⁰ Asiamo makata watikisa su kepoane mone himu tumurumo hemakapura ayapo. Aporo metakiramo mone kára hemakapuraka, Kotimo ikia kara á kekemahoanafonoraka, mone mokoako hemakapura ikia kara á kekemaraka rakipe puraka, namina himu takunine ferepemo karesa akura ayiáka, himuane kukua risikinapo.

Poremo Timotiaki someraka, “Né paroaka rekeanie,” aisane oyapo.

¹¹ Timoti, né Keresoa paosa aporopo. Né monemo ikia kara á kekemaraka purapaka metakarikia takaripunie. Takaripukua ereketae rera ikia kara á kekemaraka puraka, Kotimo ainane hákasane rakiako hemakapurane soko, eaki himu hakásaraka hemakapurane soko, aporo metane himu tumurumo hemakapurane soko, makata umisa fasereperakano Koti metakarianafononane soko, irirahoanafonoraka tau auaraka rerane soko, ikia kara á kekemarape punie. ¹² Aporomo winiraka makata ropo makosakipoko foaka apura ayiáka, Kotiaki himu hakásaraka hemakapura ikia kara á kekemarape puraka, yaiya rerane makosakipoko foaka apura ayiáka punie. Winiraka makata ropo amara ayiáka yaiya rerane makosapo. Yaiya rekeasimo Kotimo né murikimasapo. Murikimarakano nómo someraka “Nómo Yasuaki himu hakásaraka hemakapukua rekenapo. Epo kakaro someane soko nómo kakimarakanapo.” Aýaka aporo suamo kaiyisimo nómo hufitaeraka somesapo.

¹³ Arirakano makata su hitafe arisia amo kepoane Koti ipipo. Asiamo kotimo ipi kakaro somesane Yasu Keresomo Potiase Pairateaki hufitaeraka somesapo. Asiamo Kotipe Yasu Kereso tetapó kaiyisimo Timoti, néaki nómo someaka marerakanapo. ¹⁴ Fana néaki nómo some kasane kakimaka rakinie. Kakimaka rakiraka Kotimo some kasane makata watikisayaki hakása sarimahokopo. Yumo rakipe pukua, keseke Unihae Yasu Kereso haru paripeasiraka, tipia area maiya amo, epo somemaneane koaretaehokopo.

¹⁵ Arirakano Yasu paripeakosane, Kotimo ipi maiya te motosa á paurakano, Yasuane hauaka wo paripusie, aihokosapo. Asiamo isiapo Unihae kárane Koti ipi hákasapo. E yano motosane isiapo makárarakanapo. Makata su unihaeemo unihaeane Koti ipipo. Makata su hokopukua risiramo hokopusuane Koti ipipo. ¹⁶ E ipi hákasa kurafapo. Faesa

kára rekeno e area aporo purafapo. Fana eane aporomo asesafapo. Yumo soko aserafapo. E káraraka yaiya wakapuaka rekeno eane nōmo kekererakanapo. Kakaroripo.

Hauaka wo makata kemo kára mosa aporoaki Poremo somesane oyapo.

¹⁷ Timotio, aporomo hauaka wo makata kemo kára mokoa risiaki uyáka somehoanie. Né níane makárahokopo. Aporo meta makeferaka rekeakopo. Yokotae moneaki himu hakásaraka hemakapukupo. Maiya metamo mone kakeno soko maiya metamo mone faseneno soko, moneaki himu hakásaraka hemakapukupo. Kotiaki himu hakásaraka hemakapunie. Kotimo makata su ipimenapo. Ipi aeyaka makata kára kasane isiapo seseraka risikiasimo karápo. Eaki himu hakásaraka hemakapunie, aihoanie. ¹⁸ Arirakano koteaka rakinie, aihoanie. Mone káraraka akaya ayíáka koteaka rakirane káraraka rakinie aihoanie. Makata kemoane taeraka umuhokopo, aihoanie. Aporo metakirane soko arareraka, parakuraka kakanie, aihoanie.

¹⁹ Arirakano ape kiakosakipoko ira kesa parosa maponapo. Aina ayíáka né paroaka rekeasimo ira kesa asiane aporo metane arareraka, makata akara ayapo. Hepene apea keseke koteaka rekeakosakipoko, aporo metakirane arareraka, makata kakanie. Ayíáka makata karakanone, né yaiya rerane maka koteaka rekeakosapo, aihoanie. Aiyaka aporo hokopusuaki some kakanie.

Poremo Timotiaki some meta some kasane oyapo.

²⁰ Timotio, Kotimo ipi kakaro someane néaki some kasane asekea rekeanie. Aporo metakiramo Kotiane hemakapurafaraka nenakamaka makatane somerakano, ane kaiyakopo. Aporo metakiramo someraka, “Hemakapura su kepoane oyapo.” Aiyaka kotafe somerakano kaiyakopo. ²¹ Aporo metakiramo someraka “Makata su kepoane nōmo hemakapurakanapo.” Aiyaka someraka rekeno, aporoamo Kotiaki himu hakásaraka hemakapurane epo fasirakanapo. Ayapa. Kotimo re su yaku ararehoasimo nōmo hemakapurakaripo. Timoti, né ayapa. Ano Porepo.

2 Timoti

2 Timoti sawi one mahemakapukusa someane oyapo.

Poremo Timotiaki sawi meta one kesekeea poparaka makesapo. Arirakano Efesase sésea Keresoa paosa aporo hinamoane Timotimo asekeea reasamo, Poremo Timotiaki sawi one poparaka makesapo. Arirakano Pore Rome sitia tipura apea makesa reamo sawi one popasapo. Poremo ipi hemakapuraka, Rome aporomo ano rukusa maiya ane makerakanapo, aiyaka hemakapusuapo. Asiamo Poremo Timoti ararehokosakipoko sawi one popasapo.

2 Timoti sawia some kepo parakuraka popasane oyapo.

1:1-2 Poremo sawi one kepomarekeea popasapo.

1:3-2:26 Makata umisa fasereperakano soko, kotafe hora aporoamo some karakano soko, Timoti ne paroaka reke, kakaro someane some kakanie, aisapo.

3:1-9 Fahokosa maiya ane makeanamo hauaka wo aporo hinamo watikiaka risikiakosapo.

3:10-4:5 Kotimo some popasane kekemaraka himu hakásaraka hemakapukua reke, kakaro koteaka some kakanie.

4:6-22 Poremo ipi hemakapusuane some metakira some kaka faraka, ayaparaka popasapo.

Poremo Timotiaki sawi meta keseke poparaka makesane oyapo.

¹ Ano Poreane Yasu Keresomo tarira aporo rekeasimo Kotimo ipi hemakapukua ano murikimasapo. Kotimo someraka, "Yasu Keresoaki kataka marekea rekeno yaiya rekeakosapo." Aiyaka Kotimo someaka maresane nōmo somehoasimo, ano Poreane murikimasapo. ² Asiamo Timoti, néaki nōmo sawi one poparaka makerakanapo. Né Keresoa paosa aporosasamo, né nōmo hokosa asiapo. Né nōmo kára hemakapurakanapo. Ata Kotimo soko, isiapo Unihae Yasu Keresomo soko, néaki kamenakanane soko, auanane soko, makata yaku ararenane soko kakasimo nōmo hemakapurakaripo.

Kotiaki suseaka kurikurinane oyapo.

³ Nōmo makasa kaua kekemamo Kotipoko rakisia aiyáka, nōmo soko epoko raki-rakanapo. Nōmo himura makata watikisa mahamekea rerafaraka epoko nōmo raki-rakanapo. Rakiraka reke eaki nōmo suserakanapo. Ereamo soko, maíyamo soko, kurikuriraka reke, néane hemakapukua, Kotiaki suseaka kurikurirakanapo. ⁴ Ano purakasu maiya amo, nōmo anopoko hiripurakusuane pipu nōmo hemakapurakanapo. Nōmo né aseako seseripo. Né asera maiya amo ano kára sesehokosapo. ⁵ Nōmo Kotiaki himu hakásaraka hemakapukua rekeno nōmo hemakapurakanapo. Nōmo ní hakamape Roisemo Kotiaki himu hakásaraka hemakapukua, arirakano nōmo ní ama Yunisimo soko, Kotiaki himu hakásaraka hemakapusua aiyáka, nōmo soko Kotiaki kakaro himu hakásaraka hemakapurakanapo. Hemakapurakano nōmo asekeea seseripo.

Ho Kotesamo yaku ararenane Timotiaki kasane oyapo.

⁶ Asiamo nōmo hokonomo né sakaisa maiya amo, Kotimo néaki makata yaku ararena wakapuane kasapo. Wakapu kasane metakariakopo. Yaku ararena wakapuane maka maiya suamo rakiraka rekeanie. ⁷ Asiamo Ho Kotesa Kotimo isuaki kasane, himu karekekeea namona hoane kasafapo. Ho Kotesane karáka isuaki wakapuane soko kaka, metaki himu tumurumo hemakapurane soko kaka, kaumo hemakapusuane rakirapaka koteaka hemakapurane soko kaka, aiyáka kasapo.

⁸ Kasasamo Unihae Yasuane nōmo some akara maiya amo karekekeea namohokopo. Unihae Yasupoko ano tipura makesakipoko karekekeea namohokopo. Nōmo Yasuane some kasakipoko ano mokoatikisa aiyáka, nōmo Yasuane some kayane, né soko mokoatikirakano, né himu mahisihokopo. Kotimo ipi wakapuane nōmo maka rakinie. ⁹ Kotimo

makata rakirane rakisimo epo isu mafasisiapo. Mafasisiasamo makata watikisane kikisir-aka epo ipi aporo ira risikiasimo isu murikimasapo. Asiamo isiapo isina makata rakisia akipoko epo isu murikimaka pasimosafapo. Epo ipi hemakapukua isu yaku arareraka murikimaka pasimosapo. Asiamo aporo hinamoaki yaku ararenane kakakosakipoko, Kotimo Yasu Keresoane kasapo. Wate fana hauaka wo makata su kepomarekeea raki-asiraka rea maiya amo, Kotimo Yasu Keresoane murikimaka kasapo.¹⁰ Kasasamo Yasu Keresoane hauaka wo pesapo. Pesasamo aporo hinamoane mafasirakanapo. Mafasisiane isuaki tarisiapo. Arirakano kura wakapuane epo rukumosaka tapisiapo. Epo rukumosaka tapikia yaiya rerane kasapo. Asiamo epo some kotesamo isuaki tarisiapo.

¹¹ Arirakano Yasuane hemakapusimo some kotesane nōmo some kaka, arirakano tisaraka soko tarikia, tarira apororaka soko rakikia, ayikasimo Kotimo ano muriki-marakasupo. Murikimarakano epoko nōmo rakirakanapo. ¹² Rakiraka reakipoko, aporomo ano kawe yumo mokoatikiraka tipura makerakano, Keresoane nōmo some kakako ano karekekea namorakanafapo. Eaki nōmo himumo kataka marekea reke, eane nōmo kakaro hemakapurakanapo. Epo anoaki someraka, “Nōmo someane nōmo some kakanie.” Aiyaka epo anoaki makata rakira kasane, epo asekea rekeane siahosireapo. Yumo soko, keseke maiya fahokosa sere á pauhokosakipoko tipia apuramo soko, epo anoaki makata rakisimo aisane asekea rekeane siahosireapo. Asiamo ano siaraka rekenapo.

¹³ Yasumo ikia kara ereketaeane nōmo kekemarape pusimo, kakaro some kepoane, nōmo, Timoti, néaki some kasapo. Some kasane kakimaka yaiya rekeanie. Yasu Keresoaki kataka marekea reke, himu hakásaraka hemakapukua, aporo metakirane soko nōmo himu tumurumo hemakapunie. ¹⁴ Arirakano Ho Kotesane isu himua rekerakano, epo ipi yaku ararena wakapu kotesane nōmo maka, Kotimo makata rakisimo néaki kasane, nōmo koteaka asekea reke rakinie.

¹⁵ Esea hauaka aporo suamo ano metakarikia patera tarikia, aporo yano motosa Fisérusepe soko Hemósenese tetapō soko, ano metakarisiapo. Aporo suamo ano metakarisiane nōmo kaisiapo. ¹⁶ Arirakano ano tipura rekeno asekea, aporo meta Onésiforusemo karekekea namonafaraka, maiya káramo epo ano masesehoko pesapo. Asiaسامو eane soko epo ipi ape aporo hakāsa risiane soko, Unihae Kotimo kamenakaraka asekea rekeasimo hemakapurakaripo. ¹⁷ Arirakano Onésiforuse Rome apea kimisi pesa maiya amo, epo ano kope perakasupo. Kope pekea ano aseraka, ano tipura rekeno epo karekerafaraka, ano ararerakasupo. ¹⁸ Araresasamo fa ana maiya amo, Unihae Kotimo e kamenakahoasimo nōmo hemakapurakaripo. Arirakano fana Efesase taonea soko epo ano kára ararerakasupo. Araresane nōmo soko hemakapurakanapo.

2

“Yasu Keresomo ame aporoane népo.” Aisane oyapo.

¹ Timotio, né nōmo hokosa asiapo. Nōmo Yasu Keresoaki kataka marekea reke, Yasu Keresomo né yaku araresasamo, nōmo wakapuaka rakiraka rekeanie. ² Aporo suamo kaiyisimo, nōmo some kára some kasane, nōmo kaisiapo. Some kaisiane, Yasu Keresoaki himu hakásaraka hemakapura aporoaki, nōmo tisaraka some kakanie. Someane ipu kaikia, ipu aporo metakiraki some kakasimo, nōmo iaki some kakanie, aihoanie.

³ Yasu Keresomo ame aporo kotesa asiane népo. Makata umisa fasereperakano, ame aporomo rakiraka rera ayíáka, néaki soko makata umisa fasereperakano, Keresopoko paroaka rakiraka rekeanie. ⁴ Arirakano aporo amea paorakano ame aporomo rakira ayíáka epo rakirapo. Ame aporoamo yunu aporoaki weraka, ape aporomo makata rakira akiyaki hakāsa sarimaraka rakirafapo. Asiamo ame aporo satinimo sesehoasimo ayíáka amea paoraka rakiraka koteaka rakirapo.

⁵ Aina ayíáka aporo fohokosakipoko karoraka risokino someraka, “Enonosa metakarikia fe taku anaka pukupo. Enonosa tipi anaka punie.” Aiyaka somemane

motosane aporomo kakipayaraka ipi hemakapukua mokome purakano makata ropo* marafapo. ⁶ Aina ayíáka aporomo hemo wafororaka tokoraka, hemo makata maposane tanehekeea, parurakano, hemo wafayamo ipi fana mokoa nenapo. ⁷ Asiamo some one nōmo some karakano, Timoti, nōmo kakimaka hemakapunie. Some one kepoane nōmo hemakapusimo, Unihae Kotimo né ararehokosapo.

⁸ Asiamo nōmo Yasu Keresoane hemakapunie. Kini Tefetemo aporo ira wainepe pesa á Yasu takapesapo. Takapekea reke makata rakiraka nina kusuapo. Kusuane Kotimo maturikia taesapo. Maturikia taerakano Yasu turikia pusuane nōmo some karakanapo.

⁹ Arirakano Yasuane nōmo some karakano aporomo ano mokoatikirakasupo. Aporo metamo aporo meta rurakano, anekeapomo hokonoa rukua karona ayíáka, ano rukua karosapo. Ano amano ane rukua karoraka matasosapo. Matasosa ayíáka Kotimo someane ayíáka matasonafapo. ¹⁰ Matasohoanafonosasamo Kotimo aporo hinamo murikimasane mafasiakosakipoko, ano tipura reke ano mokoatikirakano soko hisiranakanafapo. Asiasamo Yasu Keresoaki kataka marekea rea aporo hinamoane Kotimo faesa á yaiya risikiakosapo. Kotimo faesa á yaiya risikiasimo, ano mokoatikirakano soko siapo, airakanapo.

¹¹ Hao, kaisie, kakaro someane oyapo. “Isu Yasuyaki hakāsa kusuasamo eyaki hakāsa yaiya risikiakosapo. ¹² Isu mokoatikirakano soko, e metakarianafonoraka, eyaki hakasa unihaeaka risikiakosapo. Isiapo e aserafapo, airakano, epo soko isuaki, re nōmo aserafapo, aihokosapo. ¹³ Aíyaka epo some kasane, isiapo metakarirakano, epo someane epo metakariakosafapo. Makata ayiakakosaposane kakaro su yanapo. Epo ainane kotafe horafapo. Epo ayiakakosapo, aíyaka somesane metakarikia some meta somerafapo.” Aíyaka popahoareapo. Popasane kakaro somepo.

“Kotafe tisa aporomo someane nōmo kakimarafaraka né uyáka rekeanie,” aisane oyapo.

¹⁴ Nōmo some sawia popana one, aporo suamo hemakapusimo, some kakanie. Kotimo aserakano nenakamaka someane tafatafaraka somehokopo, aihoanie. Nena some tafatafaraka somesane, aporo metamo kairakano, aporoane aporo tafatafaraka somesa amo ararehokosare? Wae. Ararehokosafapo. Aporo metamo kairakano eane tafatafaraka somenamo mokoatikinapo. ¹⁵ Timoti, né, Kotimo makata rakira aporo reasasamo nōmo wakapuaka koteaka rakinie. Koteaka rakirakano Kotimo néaki sesehokosapo. Asiamo nōmo makata rakiakosane karekekeea rerafaraka, Kotimo kakaro some kotesane ereketae susu some karakano ane, Koti hikumisia né kaíyahokosafapo.

¹⁶ Aporo metakiramo Koti metakarikia, namina hemakapusua me rukua someraka risikino, nōmo metakarikia koaraka punie. Koti metakarikia me rukua somerakano, someane aporo metamo kakimarakanone, Kotimo ikia kara purafaraka Kotiane koaraka ikia kara meta pukusapo. ¹⁷ Ipu namina hemakapusua me rukua somerakano, someane aporo metamo kakimarakanano, aporoane siwaomo nekea mokoatikina ayíáka, someamo aporo kaisiane ayíáka, mokoatikirakanapo. Arirakano tafatafaraka nenakamaka somera tisa aporo tetāne, meta yano motosa Himeneuse, meta Firetuse tetāpo. ¹⁸ Tetapō kakaro ereketae somerane metakarikia, kotafe someraka, “Isu maturikia taesa maiya ane fasapo.” Aíyaka somerakano, someane Keresoa paosa aporo hinamo metakiramo kakimaraka, mahimeteraka risike, Kotiaki himu hakásaraka hemakapurakanafapo.

¹⁹ Arirakano Kotimo kakaro someane yaiya rekenapo. Kotimo kakaro someane ira kesa parosa maposane hohohoanafonoraka wakapuaka area ayíáka paroaka rekenapo. Ira kesa á poparaka, “Unihae Koti ipia paosa aporo hinamoane ipi aseraka hemakapurapo.” Aíyaka popasapo. Arirakano makata meta soko popasane oyapo. “Ano Unihae Yasuane patera aserakanapo. Aisa aporo hinamo repo watikisane metakarinie.” Aíyaka popasapo. ²⁰ Ape kára kakarua tisi soko, meraki soko, kapo soko, yakai tokenapo. Metane siufa maka meraki rakikia, meta koróto maka meraki rakikia, meta ira maka ira sorakae rakikia, meta ororo maka meraki rakikia, ayíáka rakikia taenapo. Meraki kapo taenane,

* ^{2:5:} Makata ropoane ira ku hahaeraka hatisan karotapirapo. Karotapirakano aporo metakiramo aseraka someraka, “Aporoane aporo káraro,” airapo.

metakira siufa soko, koróto soko, kakaro kotesane kikisiraka hakua taeraka, aporo kimisi apera maiya amo, meraki kotesane maka makata nakosa taeraka nenapo. Metakira kakaro kotehoanafonosane ira sorakaea soko ororo merakia soko, maiya suamo makata taeraka nenapo. ²¹ Aina ayíáka aporomo ipi watikiaka rakisiane rukupateraka himuane kosoraka rekeno, eaki “Makata kára kotesa rakira rakinie.” Aíyaka Unihae Kotimo mareakosapo. Meraki kotesane kikisiraka hakua taena ayíáka, aporo kotesane Unihae Kotimo kikisiraka hakua murikia “Makata kára kotesane rakinie.” Aíyaka murirapo. Arirakano makata kára kotesa rakiako hemakapura aporoamo ipi watikisane kakaro metakarikia, ipi Unihae Kotimo makata rakirane koteaka rakiako hemakapurapo.

²² Timotio, hokosa rauamo ipi kaumo hemakapusuane kaikia rakira ayíáka nómo rakiakopo. Kaumo hemakapusuane metakarikia, ereketaeraka reke, Kotiaki himu hakásaraka hemakapukua, aporo metane himu tumurumo hemakapukua reke, weako hisiraka, ayíáka rekeako hemakapukua rekeanie. Ayíáka reke aporo himu koteaka hemakapukua Kotiaki wáraka risira aporo akiyaki kikinaraka rekeanie. ²³ Nómo hemakapuraka tafatafaraka risiane, keseke aporoamo saperaka weakosapo. Asiamo aporomo koteaka hemakapurafaraka, nenakamaka tafatafaraka somerakano, aporoane metakarikia koaraka punie.

²⁴ Unihae Kotimo aporo raipamo saperaka tafatafaraka risikiane siahoasifareapo. Kotimo aporo raipamo aporo suaki koteaka hemakapukua ararenapo. Tau koteaka tisaraka tarikia some karápo. ²⁵ Some kayane ipu kaiyako hisiraka waerakano asekea, Kotimo aporo raipamo tau auaraka maroponapo. Maroporaka ipu makata watikisane rakiako hisiraka hemakapurane soko, kakaro someane kakimako hemakapurane soko, Kotimo iaki kakasimoripo, aíyaka nómo hemakapunie. ²⁶ Kakaro someane kakimako hemakapurane Kotimo iaki karakano, i pokoa he fesa kesaka risia tonotaeara aíyaka, i Satanemo pasimosane Kotimo tonotaehoasimoripo, aíyaka hemakapunie. Arirakano fana Satanemo iane pasimokoa epo ipi hemakapusuane iaki kasapo. Kasasamo ipu kakimaka himu mahimeteraka risiapo.

3

Fahoko ana maiya amo makata faserepeakosane oyapo.

¹ Makata one hemakapunie. Fahoko ana maiya amo makata umisa watikisane kára faserepeakosapo. Makata umisa faserepeakosane oyapo. ² Asiamo fahoko ana maiya amo aporo hinamomo soko, hokosamo soko, suamo watikiaka rakiacosapo. Asiamo aporomo makata suane, “Nómo nímenapo,” aíyaka taeraka umuraka, aporo metaki kakosasafapo. Arirakano “Makata su nómo ní mokoaripi,” aíyaka hemakapusapo. Arirakano e ipi yano motosane rupiraka makárahokosapo. Arirakano aporo metane asekea makefehokosapo. Arirakano aporo metaki mainamareakosapo. Arirakano ipi ata ama tetapó someane koaretaehokosapo. Arirakano suseaka somehokosafapo. Arirakano Kotiane soko metakariakosapo. ³ Arirakano aporo metakiraki himu tumurumo hemakapusafapo. Arirakano aporo suaki himu mahisiraka sapesane fahokosakipoko api karakano asekea, makosasafapo, sapesane soko fahokosafapo, yaiya rekeakosapo, aihokosapo. Arirakano aporo metane hokomako hemakapurane soko, weako hemakapurane soko, fahokosafapo. Ayíáka iriraraka rekeakosapo. Arirakano makata kotesane asekea hisihokosapo. ⁴ Arirakano ipu namina aporo táke nine parakehokosapo. Arirakano ipu namina hemakapusua hákasa aeyaka rakiacosapo. Arirakano ipu namina yano motosane makárahokosapo. Arirakano nenakamaka mokome enaraka koraka tokoako seseraka Kotiane hemakapusafapo. ⁵ Kotiane kaumo kekemaraka rakiraka, eaki akai susumo yaiya wáraka reke, Kotimo wakapuaka rakirane ipu asekea yia someraka, “Kotimo wakapu rekenafapo,” aihokosapo. Aíyaka Kotiane kaumo kekerehokosapo. Timotio, aporo ayíáka rakiraka risikino asekea, aporoane koaraka metakarikia punie.

⁶ Arirakano aporo metakira ayíáka risiane kema ape meta á yorokoa pukua, some kaka, ayíáka kema ape meta á soko yorokoa pukua, some kaka, ayíáka some kasane

hinamo mahimeteraka toamo kakimakasimo, some kakako yorokoa purapo. Ipu hemakapusuane hinamoamo kekemahoasimo yorokoa some karápo. Some karakano hinamoamo himu mahimeteraka koteaka takekeea hemakapunafonoraka toke ipu watikisane makata fato ayíáka ripape hiakosakipoko hemakapuraka, aporo metamo somerakano á kekemarakano, aporo metamo somerakano soko á kekemarakano, ayíáka mokome hemakapukua torapo.

⁷ Hinamo ayíáka toamo makata kaweane enomako seserakanapo. Aisa nine kakaro someane ipu takekeea hemakapurafapo. Hemakapunafonorakano ipu kema apea aporo watikisa yorokoa some kakako purapo. ⁸ Ayíáka aporo tetá yano motosa meta Yánese, meta Yámipirisi,* tetapō koaretaeraka Moseseaki yunuraka risia ayíáka, aporo watikisa risiamo kakaro someaki yunuraka risikinapo. Yunuraka risike, ipu himumo makata watikisa susu hemakapuraka risike, Kotiaki himu hakásaraka hemakapurane metakarisapo. ⁹ Arirakano aporoamo kotafe rakirane, aporo suamo aseraka “Masuarareapo.” Aihokosapo. Airakano ipu rakirane rakikia rosaka taehokosafapo. Aina ayíáka wate fana Yánesepé Yámipirisi tetapō makata rakisiane aporo suamo asekea hemakapuraka, “Tetapō ainane kotafehoareapo. Tetapō kotafe rakirane masuarareapo,” airakano makata rakirane kakaro rosaka taesafapo.

Poremo Timotiaki someaka maresane oyapo.

¹⁰ Kotimo someane nōmo tisaraka some kasane, Timoti, nōmo kaisiapo. Nōmo ainane soko, nōmo asesapo. Nōmo Kotiane kekemarakaka rekeako hemakapusuane soko, nōmo hemakapurakanapo. Nōmo Kotiaki himu hakásaraka hemakapurane soko, iriraraka somehoanafonoraka tau auaraka hemakapurane soko, aporo metaki kamenakaraka hemakapurane soko, makata umisa fasereperakano nōmo yaiya rakiraka rerane soko, ¹¹ ano mokoatikirakano soko, ano kau tesane soko, anoaki makata waforona maresane soko, nōmo hemakapurakanapo. Anitioke taonea soko, Aikoniamē taonea soko Risitara taonea soko, ape á aporomo ano kakaro watikiaka mokoatikisane, Timoti, nōmo hemakapurakanapo. Aporomo ano mokoatikirakano yia, Kotimo ano mafasisiane nōmo hemakapurakanapo.

¹² Arirakano Yasu Keresoaki kataka marekea risia aporo hinamoane, aporo metakiramo mokoatikihokosapo. Makata ane hemakapunie. ¹³ Arirakano mokoatikiana aporoamo soko, kotafe somera aporoamo soko, fana wakasema watikiaka rakiakosapo. Amo tipiyia wakasema káraraka watikiaka rakiakosapo. Amo keseke namo kakaro kára watikiaka rakipe pukusapo. Metakiramo mahimeteraka, ikia kara watikisa á pusimo kotafe some karaka, i namina nine soko mahimeteraka, ikia kara watikisa á purakanapo.

¹⁴ Asiamo Timotio, kakaro someane néaki tisaraka some kasane nōmo kakimaka enomasapo. Enomasane yaiya hemakapuraka rekeanie. Nōmo tisamo† ainane nōmo hemakapurakanapo. ¹⁵ Né hokosa rea maiya amo Kotimo sawia popasane néaki some kasapo. Asiamo aporo hinamomo Yasu Keresoaki himu hakásaraka hemakapurakano Kotimo mafasiasimo, Kotimo sawiamo tarirapo. Aporo hinamomo koteaka hemakapusimo Kotimo sawiamo tarirapo.

¹⁶ Kotimo sawi sua popasane Kotimo ipi somerakano kaisia aporomo popasapo. Kotimo sawia popasane aporo hinamo suamo kakaro someane enomakasimo popasapo. Arirakano, “Makatane watikisapo. Ayiakakopo.” Aiyaka tariraka makata watikisane metakarisimo, Kotimo someane sawia popasapo. Arirakano hasakasane maropohoasimo popasapo. Arirakano koteaka ereketae susu rerane Kotimo someamo hokotakeasimo popasapo. ¹⁷ Asiamo Kotipoko rakira aporo hinamomo siaraka wakapuaka hemakapukua, Kotipoko koteaka rakira susuane rakisimo Kotimo sawia popasane menoraka kekemarakaka rakinie.

* 3:8: Wate fana Yu aporo sisimamo uyáka somesapo. Iyipi aporo tetā, meta Yánese, meta Yámipirisi, tetā, ho kamuna aporopo. † 3:14: Timotimo kaíyia soko, ipi hakamape soko, Pore soko, i Timotimo tisane ayapo.

"Timoti né uyáka rekeanie." Aisane oyapo.

¹ Yasu pariperaka unihaearea area maiya amo aporo su kukua kesane soko, aporo hitafe risiane soko, epo takekea parakuhokosapo. Ayiakakosasamo nōmo some akara one kakimakanie. Kotipe Yasu Kereso tetapō isu aserakano, nōmo néaki paroaka someaka marerakanapo. ² Aporo hinamomo Yasuane hemakapusimo Kotimo someane nōmo uyáka some kakanie. Aporo hinamomo kaikia seserakano soko, hisirakano soko, nōmo yaiya some kakanie. Arirakano watikiaka rakira aporoaki, "Ayiakakopo," aihoanie. aporo hinamomo watikiaka rakirakano nōmo maropohoanie. Arirakano aporo hinamomo koteaka risikiasimo, nōmo some kaka ararehoanie. Arirakano aporo hinamomo makata kotesane enomakasimo tau auaraka tisaraka some kakanie.

³ Arirakano keseke kakaro someane tisaraka some karakano, aporo hinamomo kaikia hisihokosapo. Ipu namina hemakapusuane kekemaraka tisa metaki soko, "Isu tariako peanie." Aiyaka tisa metaki soko, "Isu tariako peanie." Airakano tisa aporo yakaimo iane maseseraka some kakakosapo. ⁴ Arirakano aporo hinamomo kakaro someane kaikia kakipayaraka metakarikia, aporo sisimamo wate asiapakae, aiyaka some kepo rakupe pesane* kaikia kekemahokosapo. ⁵ Asiamo Timotio, né maiya suamo ikia kara kotesa á punie. Né mokoatikirakano, himu he kekeia namoraka rekeakopo. Yasuane aporo hinamomo hemakapusimo some kotesane some kakanie. Aporo raipamo arakira ayiáka nōmo soko Kotipoko ayiáka rakikia makanie.

⁶ Maiya omo ano hauaka wo reane metakarikia kukusapo. Ano kukusa maiya ane makepo. Fana pirisiti aporomo saro ponomakau rukua, yapiane masakurikia Kotiaki kasa ayiáka, aporomo ano rurakano ano yapiane nōmo Kotiaki kakakosapo.

⁷ Aporomo marokehoko foaka wafororaka apura ayiáka, nōmo Kotipoko koteaka raki-raka wafororaka rakipe pusuapo. Rakipe pukua enonoa naosapo. Asiamo nōmo Kotiaki fana himu hakásaraka hemakapusuane, yumo soko yaiya hemakapuraka rekenapo. ⁸ Ano ereketae susuraka reasasamo anopoko makata ropo murikimaka motosapo. Moto-sane Unihae Yasu ipi pariapera maiya amo anoaki makakosapo. Kepo hemakapukua maropona aporoane Yasu ipipo. Epo kakaro ereketaeraka susu maroponapo. Anoaki soko aporo hinamomo perakarihoamo seseraka kau risiaki soko isu suaki makata ropo kakakosapo.

Poremo Timotiaki ayapasane oyapo.

⁹ Ano area wo foaka peanie. ¹⁰ Arirakano Témasemo hauaka wo makatane kára hemakapuraka ano metakarisiapo. Metakarikia Tesaronaeka taonea pusuapo. Arirakano aporo meta yano motosa Kerésenese ipi Karésia hauaka á pusuapo. Arirakano aporo meta yano motosa Taetase ipi Taomésia hauaka pusuapo. ¹¹ Arirakano Rukiane anoyaki hákasa rekenapo. Makamo ano arareraka rakisimo pasimaka peanie. ¹² Aporo meta yano motosa Tíkikaseane nōmo Efesase taonea pusiesapo. ¹³ Arirakano nōmo inu pasu Toróase taonea aporo Kapasemo apea motokoa meraruraka pesane, né apera maiya amo nōmo inu pasuane soko, nōmo sawiane soko maka peanie. Arirakano nōmo saro sipi kau sawiane soko maka peanie.

¹⁴ Arirakano Arekesáta ipi makata auri rakira aporo, epo ano kára mokoatikisapo. Epo ipi rakisia yaiya Kotimo soko ipiaki ayiakakosapo. ¹⁵ Asiamo isiapo some kasane, epo rukumosaka tapisiasamo e area pukupo.

¹⁶ Fana hukurusua maiya amo ano tipura makerapaka tafáraka somerakano, aporo suamo ano patera asesafapo. Aporo suamo ano metakarisiapo. Metakarisia akipoko Kotimo hemakapukua rerapaka Kotiaki kurikurirakanapo. ¹⁷ Asiāne hukurusua maiya amo, Unihae Kotimo ano metakarisafapo. Anoaki epo wakapu karakano, Yu aporo-hoanafonosamo kaiyisimo Kotimo some suane nōmo siaraka some kasapo. Saro raeonemo akaimo ano rukunenapaka, Kotimo ano mafasisiapo. ¹⁸ Arirakano makata

* 4:4: Terakaiya matoa kesaka reamo some rakupe pesa asiapo.

watikisa suamo ano marapaka, Kotimo ano yaiya mafasiakosapo. Mafasikia e hepene yapura unihaeaka area á ano pasimaka karikia hiakosapo. Akipoko maiya suamo nōmo eane makáraraka kekereraka someraka, “Né faesa kárapo,” airakanapo. Kakaroripo.

¹⁹ Pirisírape Akuwíra tetāki ayaparakasapo, aihoanie. Onésiforuse soko ipi ape hakasa aporo hinamo hokosa su risiaki ayaparakasapo, aihoanie. ²⁰ Aporo yano motosa Erásataseane Korini apea parisapo. Arirakano Mairítase taonea aporo meta yano motosa Torófimase ipi makata takamasane, nōmo metakarikia pesapo.

²¹ Asiamo né foaka peanie. Yakaru kára apera maiya amo né peane siahoasi-fareapo. Yakaru kára peasiraka maiya yumo né peanie. Yúpuruse anoyaki reke, reaki ayaparakanapo. Pútenesemo soko, Raínasemo soko, Korótiamo soko, kakimara aporo hinamo metakiramo soko, ipu suamo reaki ayaparakanapo. ²² Timoti, ne hoane Unihae Kotimo asekea rekeasimo hemakapurakaripo. Re su Kotimo yaku arareraka makotehoasimo nōmo hemakapurakaripo. Timoti, né, ayapa. Ano Porepo.

Taetase Taetase sawi one mahemakapukusa someane oyapo.

Sawi one Poremo Taetaseaki poparaka makesapo. Taetase ipi Kiriki aporo reke epo Poreane araresapo. Poremo Taetaseaki Kotimo someane somerakano Taetasemo kakimasapo. Arirakano Pore kimisi puraka Yarusarame sitia hisia maiya amo, Taetase soko karikia hisiapo. Arirakano yape tetamo Taetasemo Poreane ararehoko Korini taonea pusuapo. Maiya metamo Porepe Taetase teta Kiríti he tonoa pukua, Kiríti aporo hinamomo Yasuane hemakapusimo some kasapo. Some kaka wakasema nina Poremo he tono ane metakarikia pukusakipoko Taetaseaki someraka, "Keresoa paosa aporo hinamo wo risiane, nōmo asekea rekeanie," aisapo. Asiamo keseke Taetasemo aporo hinamoane koteaka asekea rekeasimo Poremo Taetaseane arareraka sawi one poparaka makesapo.

Yasu kusua turikia puraka hepene yapura hisiakipoko, keremisi teti tu (32) faraka, Poremo sawi one popasapo. Pore Korini taonea reke, sawi one Taetaseaki poparaka makesapo.

Taetase sawi one parakusane kepoane oyapo.

1:1-4 Some kepomarekea popasapo.

1:5-9 Kotimo aporo hinamoane asekea risira aporo murikimokoakosakipoko ipu ainane asekea, koteaka takekea murikimokoanie.

1:10-16 Kotafe tisaraka somera aporoane maropohoanie.

2:1-10 Keresoa paosa aporo sisimamo soko, hinamo sisimamo soko, hokosa rauamo soko enomakasimo Poremo some kasapo.

2:11-15 Kotimo isuane araresasamo isu koteaka risikiasimo Kotimo aina amo tarirapo.

3:1-8 Koteaka risikiakosa someane oyapo.

3:9-11 Repo Kotimo someane metakarisimo aporo metakiramo kirimaraka somerakano repo matasohoanie.

3:12-15 Ayapa aiyaka popasapo.

Poremo Taetaseaki sawi poparaka makesane oyapo.

¹ Ano Poremo sawi one poparaka makerakanapo. Nōmo Kotimo makata rakirane rakisimo ano murikimasapo. Yasumo ainane tarisimo ano tarira aporo murikimasapo. Kotimo murikimasa aporo hinamomo Kotiaki ereketae hemakapusimo ano murikimarakano nōmo reane arareraka tarirakanapo. Kotimo kakaro someane ipu suamo hemakapusimo nōmo some karakanapo. Kakaro someane kaikia Kotimo ainane kekemahoasimo nōmo reane arareraka tarirakanapo. ² Asiamo Kotimo some kasane kakimara aporo hinamomo hemakapuraka, "Isu Kotiyaki yaiya risikiakosapo," aiyaka hemakapurapo. Kotimo ipi kotafe somerafapo. Wate fana hauaka one soko ti yapurane soko rakiasiraka Koti ipiaki paosa aporo hinamoane eyaki yaiya risikiakosapo, aiyaka kakaro somesapo. ³ Someaka marekea ipi hemakapusua anaka epo murikimasa maiya amo, someane Kotimo ipi makata rakira aporoaki kakama tarisiapo. Tarisiene aporo hinamomo kaiyisimo makata rakira aporo repo some kakanie, aisapo. Aiyaka ipi someane aporo hinamoaki somehoasimo ano soko murikimasapo. Ano murikimasa Kotiamo isuane mafasirapo.

⁴ Taetase, néaki nōmo sawi one poparakanapo. Kotimo some kasane nōmo kakimasa aiyáka nōmo soko kakimasasamo né nōmo hokosa asiapo. Kotiane isiapo Atapo. Arirakano Yasu Keresoane isu Mafasira Aporopo. Tetapō né kamenakaraka ararenane soko, né mapiraraka rekeasimo ararenane soko, aiyakasimo nōmo kurikurirakanapo.

Asekea risira aporomo ainane oyapo.

⁵ Taetase, nōmo né Kiríti he tonoa metakarikia ano pukusakipoko nōmo neaki someraka, “Etapo makata rakisiane rakikimasafapo. Asiamo né yia reke rakiki-makanie. Ape sumu sua Yasu Keresoa paosa aporo hinamo asekea risikiakosa aporoane* murikimokoanie.” Aiyaka nōmo neaki someaka marekea ano pesapo. ⁶ Aporo murikimokoakosane uyáka risiane murikimokoanie. Makata suane asekea takekeea ayiáka murikimokoanie. Aporo hinamo hikumisia makata watikiaka rakianafonorakano eane aporo metamo hokomarafapo. Arirakano ipi hinamo hakásá arumaka reke, ipi hinamoane hemakapukua rerapo. Arirakano ipi hokusamo soko Yasumo someane kakimaka risike, arirakano ipi maeyamo soko hinamo hokomarekea somehoanafonona, arirakano ipi farayamo soko aporo mokotokohoanafonona, arirakano ipi hokusane aporo hinamo metamo hokomakanafonona, arirakano hokosa amo koaretaenafaraka koteaka risira, hokosa amo wafayane murikimokoanie.

⁷ Ayiáka asekea risira aporomo Keresopoko Keresoa paosa aporo hinamoane asekea risirapo.[†] Asekea risira aporomo watikiaka rakianafonorakano eane hokomarafapo. Asiasamo asekea risira aporo ayiáka risike aporo murikimayane siahoasireapo. Epo ipiane makama fanahoanafonoraka aporo metakiramo hemakapusuane soko kaikia, arirakano ipi foaka sapehoanafonoraka, arirakano ipi he watikisa nekea rekeanafon-raka, arirakano aporo metane foaka runafonoraka, arirakano mone kára mokoako hemakapunafonoraka ayiáka risira aporoane murikimokoanie. ⁸ Arirakano aporo kimisi perakano tereraka pasimaka, arirakano makata koteaka susu hemakapukua risike, arirakano koteaka hemakapukua rakikia risike, arirakano makata watikisane kikisiraka Kotiaki himu hakásaraka hemakapurane makama fanaraka risike, arirakano kaumo hemakapusuane makama kesekeraka himumo koteaka hemakapurane makama fanaraka risike, ayiáka risira aporoane murikimokoanie. ⁹ Kakaro someane fana eaki some kasane, kakimaka reke, epo aporo hinamo metakiraki some ereketaesane some kaka, arirakano koaretaena aporo hinamoaki soko maroporaka some kaka, ayiáka rakira aporoane murikimayane siahoasireapo.

Kiríti aporomo kotafe some kaka risiane oyapo.

¹⁰ Kiríti aporomo watikiaka risirasamo nōmo asekea risia aporo kotesane murikimokoanie, aisapo. Asiamo Kiríti aporo yakaimo kakaro someane koaretaeraka, ipu namina nena some koaka marekea kotafe somerapo. Some koaka marekea aporo metakiraki kirimaraka somerapo. Ipu Yu aporomo somemaneane “Kau hahaeraka patehoanie,” aiyaka somemaneane kekemaraka aporo metakira kirimaraka somerakano mahimeterapo. ¹¹ Asiamo ipu kotafe someane somehokohoamo re asekea risira aporomo iane matasohoanie. Ipu kotafe someane some kakafunufapo. Asiane kotafe someane some karápo. Kotafe some karakano ape hakásá risia aporo hinamo hokosa suamo kaikia, kakaro someane metakarirapo. Metakarirakano asekea mone kára mokoako hemakapuraka kotafe someane karápo. Mone kára mokoako kotafe someane tisaraka some karaka kaiyahoafunureapo.

¹² Arirakano fana Kiríti aporo yano motosa kára reamo someraka, “Kiríti aporomo namina yia kotafe someraka risirapo. Yasaromo irirana ayiáka iriraraka risike, aporoamo aporo metane ainapo. Ipu makata kára nako sesesa nine makata nenane makosakipoko ipu makata rakirafapo. Yaku mako hemakapurapo.” Aiyaka Kiríti aporomo ainane Kiríti aporo hakásá metamo somehoareapo. ¹³ Hao, kaisie. Aporoamo somesane kakaro yanapo. Asiasamo kotafe somesane Keresoa paosa aporo hinamomo kakimarapaka, iane maroporaka wakapuaka tarinie. Kotimo kakaro someane ipu kakimaka paroaka risikiasimo nōmo koteaka tarinie. ¹⁴ Arirakano Yu aporo sisimamo wate fana ainapakae, aiyaka some rakupe pesane[‡] kakimakopo. Kakaro some koaretaena aporoamo namina hemakapusua somemane motosane kakimakopo.

* 1:5: Asekea risira aporoane paseto aporo ayapo. † 1:7: Asekea risira aporo popasa asiāne tikone aporomo ainane ayapo. ‡ 1:14: Wate fana mano hora asiapo.

¹⁵ Aporo hinamo koteaka risiamo hemakapuraka makata metamo soko metao, makata anenamo soko metao, iane mokoatikinafapo, aíyaka hemakapurapo. Arirakano aporo hinamo watikiaka risiamo ipu Yasu Keresoaki himu hakásaraka hemakapunafonoraka risiamo hemakapuraka makata suamo iane makotenafapo, aíyaka hemakapurapo. Asiamo ipu makata watikisane oyapo, makata kotesane oyapo, aíyaka takekea hemakapurafapo. Ipu watikiaka rakiraka yia, iane kaíyanafapo. ¹⁶ Ipu someraka, "Kotiane isiapo kakaro hemakapurakanapo," aisa nine ipu yaiya watikiaka rakiraka risirapo. Arirakano Kotimo someane ipu koaretaeraka, Kotimo hisisa makatane ipu rakiraka risirapo. Ipu koteaka rakiako hemakapurafapo. Asiamo koaretaena aporo hinamomo makata kotesane hemakapukua rakiasifareapo.

2

"Keresoa paosa aporo hinamoane uyáka risikianie," aisane oyapo.

¹ Kiríti aporomo kotafe somerakano yia nómó kakaro someane some kakanie. Some karaka Keresomo makata ainane soko makata rakirane soko some kakanie. ² Aporo sisimaki úyaka some kakanie. "Himu maparitaenapaka he watikisa nakopo. Né yano motosane kotesapo, aihoasimo koteaka risikianie. Arirakano koteaka hemakapunie. Kaumo hemakapusuane makama kesekeraka, himumo koteaka takekea hemakapurane makama fanaraka ayíáka risikianie. Kakaro someane kakimaka himu hakasaraka hemakapunie. Kotiaki himu tumurumo hemakapunie. Makata umisa fasereperakan paroaka hemakapukua Kotiaki hemakapusuane rosaka taehoko hemakapunie." Aíyaka aporo sisimaki some kakanie.

³ Aporo sisimaki some kasa ayíáka hinamo sisimaki soko úyaka some kakanie. Kotiaki hemakapukua koteaka tokoanie. Ayíáka toke aporo hinamo metane hokomaka some-hokopo. He watikisamo re kirimarakano, nariraka hemakapurapaka paroaka tokoanie. Makata kotesa susu ainane hinamo metakiramo enomakasímo repo koteaka susu tariraka tokoanie. ⁴ Hinamo sisima, repo hinamo aporo aseane maropohoanie. Ipu namina aporo pusuaki soko, hokosaki soko, himu tumurumo hemakapusimo maroporaka some kakanie.

⁵ Kotimo someane aporo hinamo metamo mawakasemahokohoamo hinamo aporo aseaki úyaka some kakanie. Kaumo hemakapusuamo watikiaka rakiako hemakapurakarano kakipayaraka Kotiaki hemakapukua tokoanie. Ní aporoyaki hakásapunie. Aporo metayaki mokome pukupo. Hinamomo makata rakirane masakariaraka tokoakopo. Nómó ní aporo pusuane soko, ní hokosane soko, ní apea hakásapunie soko koteaka hemakapukua ararehoanie. Ní aporo pusuamo someane koaretaehokopo. Aíyaka hinamo sisimamo hinamo aporo aseaki maropohoasimo, Taetase, nómó hinamo sisimaki somehoanie.

⁶ Arirakano hokosa rauaki kaumo hemakapusuane makama kesekeraka, makata suane koteaka takekea hemakapukua risikianie, aihoanie. Aíyaka hokosa rauaki some kakanie.

⁷ Taetase, nómó soko koteaka takekea hemakapukua rakinie. Nómó arakirane asekeea aporo hokosa rauamo soko koteaka rakisimo nómó koteaka rakinie. Aporo hinamo metakiraki tariraka some watikisane some kakakopo. Nómó some karaka, kakaro someane ereketae some kakanie. Some akara yine kekemaraka rakinie. ⁸ Kakaro someane some karakano aporo metamo né hokomakosafapo. Né koteaka reke kakaro someane some karakano, Kotimo some hisisa aporomo isu hokomaka somehokosapoko asiane, ne koteakareasamo, i namina yia hemakapuraka kaiyahokosapo.

⁹ Arirakano aporo raipa roposaki úyaka somehoanie. Re roposa wafayamo sese-hoasimo epo someane kaikia kekemaraka rakinie. Repo wafayamo somerakano kakipayaraka some paripukupo.

¹⁰ Re roposa wafayamo makata kemoane tau hakimakopo. Maiya suamo koteaka risike, makata rakirane himu hakásaraka rakiraka risikianie. Kau hisiraka rakiraka risikiakopo. Koteaka rakiraka risikinone, aporo metakiramo aseraka someraka, "Aporo

raipa roposamo Kotimo someane kakimaka koteaka arakire." Aíyaka somerakano asekea isu Mafasira Kotiane ipu makárahokosapo. Aíyaka aporo raipa roposaki some kakanie.

"Yasu paripeakosane hemakapukua risike koteaka ereketaeraka risikianie," aisane oyapo.

¹¹ Hao, kaisie. Aporo hinamo suamo himu watikisane mafahokosakipoko Kotimo yaku ararenane kakama tarisiapo. Aporo hinamo suane mafasiakosakipoko Kotimo ipi Yasu Keresoane hauaka wo pusiesapo. Pusierakano Yasu peraka Kotimo yaku ararenane tarisiapo. ¹² Kotimo hisisa makatane isiaipo metakarisimo Kotimo yaku ararenamo isu maroponapo. Arirakano hauaka wo kaumo hemakapusuane soko rukupatehoasimo maroponapo. Arirakano koteaka takekea hemakapurane makama fanaraka, arirakano ereketaeraka rakipe pusimo maroponapo. Maiya omo hauaka wo risike makata watiki-aka hemakapurane kikisiraka, Kotimo sesehoasimo makata rakirane makama fanaraka ayíáka risikiasimo maroponapo. ¹³ Asiamo Yasu paripeakosane hemakapukua kau risiakipoko Kotimo yaku ararenamo isu ararerakanapo. Yasu Kereso faesayaki pariapera maiya amo sesenane mokoakosakipoko isu kau risikinapo. Isu mafasira aporo Yasu Keresoane isiaipo Koti kárupo.

¹⁴ Isiaipo makata watikiaka rakisiane soko, efera hunia watikiaka rakirapaka Yasumo isuane mafasisiapo. Mafasiraka Yasu ipiane isupoko farimaka rusua kukusimo ipi kauane kasapo. Epo aporo hinamo suane makoteraka, epo ipi aporo ira pariraka ayíáka risikiasimo isupoko farimaka kusuapo. Isiaipo makata watikisa suane metakarikia, koteaka susu hemakapukua risikiasimo farimaka kusuapo.

¹⁵ Asiamo koteaka ainane nōmo neaki some kasane, maiya suamo aporo hinamoaki nōmo some kakanie. Some one ipu kakimakasimo nōmo wakapuaka some kakanie. Some one kaikia koaretaeraka risia aporo hinamoane maropohoanie. Né makata rakisimo Kotimo maresasamo nōmo someane aporo hinamomo koaretaehoane siahosifareapo. Nōmo some akarane metamo mawakasemaraka koaretaehokopo, aíyaka, Taetase, nōmo wakapuaka some kakanie.

3

"Kotimo reane makotesasamo, repo aporo hinamoane ararehoanie," aisane oyapo.

¹ Keresoa paosa aporo hinamoaki nōmo úyaka somehoanie. Kamani aporomo someane soko, re asekea risia aporomo someane soko, repo kaiyinie. Asiamo kamanimo somemanemo reane asekea rekenapo. Makata rakira kotesane rakiako hemakapukua risikianie. ² Aporo hinamo metane hokomaka somehokopo. Aporo hinamo metamo someane rukumosakatapikia tafatafaraka somehokopo. Aporo hinamo suaki hemakapukua ararehoanie. Aporo hinamo suaki tau auaraka risikianie. Aíyaka aporo hinamo suaki some kakanie. ³ Fana isu Keresoa paohoasiraka risiane repo hemakapurakanapo. Fana makata watikiaka rakirane isu himua fasere perakarakano isiaipo rakikia, arirakano kakaro someane koaretaeraka, arirakano aporo metamo kotafe some karakano isiaipo kakimasapo. Arirakano kaumo hemakapusuamo soko, hauaka wo makata rakiako sesenamo soko isu asekea reke, aporo tipura kesa arisia ayíáka isu risiapo. Maiya suamo isiaipo aporo metakiraki himu hisiraka mokoatikihoko hemakapukua risiapo. Arirakano isiaipo hemakapuraka, "E káraraka area ayíáka ano soko ayíáka rekearipi," aíyaka hemakapusuapo. Aporo hinamo metakiramo isu aseako hisiraka, isiaipo soko iane aseako hisiraka, ayíáka rakumarekeea risiapo.

⁴ Fana isu ayíáka watikiaka risia nine isu Mafasira Kotimo isuane kamenakaraka, hemakapukua arareraka isuane mafasisiapo. ⁵ Isiaipo isina koteaka rakisiapoko mafasisi-afapo. Epo isu kamenakaraka reasasamo mafasisiapo. Isiaipo watikisane ipi makikisiraka marekea, kusuna ayíáka isiaipo watikisane kusuraka, hokosa kiri taka apera ayíáka, isu epo ipi aporo hinamo pariraka makawesapo. Isu koteaka risikiasimo ipi Ho Kotesamo isu makawesapo. ⁶ Isu mafasira aporoane Yasu Kereso ipipo. Yasu Kereso aeyaka Kotimo Ho Kotesa hakásaraaka isuyaki rekeasimo pusiesapo. Pusiesane pekea isiaipo tua wakapuaka rakiraka rekenapo. ⁷ Kotimo isu kamenakaraka ipi hikumisia ereketaeraka

risikiasimo epo maroporaka maresapo. Arirakano atamo ipi hokosapoko makata taesane makoasimo seseaka rekenapo. Seseaka area ayíáka isu Kotiyaki yaiya risikiakosane seseaka kau risikinapo. ⁸ Asiamo some one kakaro somepo. Kotiaki himu hakásaraka hemakapura aporo hinamoaki some one wakapuaka some kakanie. Maiya suamo aporo hinamo metakirane ararehoko hemakapusimo iaki some kakanie. Nōmo some kasane some kotesapo. Asiamo someamo aporo hinamoane ararehokosapo.

⁹ Arirakano aporomo koteaka hemakapunafonoraka tafatafaraka somerakano kaikia rukupatehoanie. Arirakano Yu aporomo makasa kaua kekemamo wainepe pesa aporo yano motsane mokome somerakano kaikia rukupatehoanie. Arirakano Mosesemo somemanemo kepoane Yu aporo sisimamo tafatafaraka me rukua somerakano kaikia maroporaka mafahoanie. Asiamo tafatafaraka sapeaka some anamo isu ararenafapo. Someane kakimaka isu koteaka risikiakosafapo. Asiamo tafatafaraka somerane metakarinie, aíyaka somehoanie. ¹⁰ Arirakano aporo hinamomo kakaro someane metakarisimo some akara aporo ane nōmo maropohoanie. Some meta some kakakopo, aiyaka somehoanie. Epo some meta yaiya some karakano kaikia yape tetámo maropohoanie. Maroporakano yia epo yaiya koaretaeraka rekeno aporoane kakaro metakarinie. ¹¹ Aporoamo kakaro someane patera tarikia yaiya watikiaka some karaka, ipi yia ikia kara watikisa á purakanapo. Ipi watikiaka rakisia yiamo ipi yine mokoatikirakanapo. Ane nōmo ní hemakapurakanapo.

Poremo ayapa aisane oyapo.

¹² Né area Atémase soko metao, Tíkikase soko metao nōmo pusihokosapo. Pusiesane né area perakano asekea ano Nikoporísi taonea reakipoko, Taetase, né foaka peanie. Yāki ikia aperamo, ano Nikoporísi taonea rekeakosapo. Asiamo né peanie. ¹³ Apórose soko, somemané kepo hemakapura aporo Sénase soko, tetā Kiríti he tono metakarikia kimisi purakano, tetane nōmo ararehoanie. Kimisi pukusakipoko makata meta fasekeno nōmo arareraka kakanie.

¹⁴ Arirakano maiya suamo Keresoa paosa aporo hinamomo koteaka rakirane rakinie, aiyaka somehoanie. Aporo hinamo metakira fesenoraka risikino, iane ararehoanie, aiyaka somehoanie. Keresoa paosa aporo hinamo nenakamaka risikiane siahosifareapo.

¹⁵ Aporo su anoyaki hakásä risiamo néane hemakapuraka ayaparakanapo. Keresoa paosa aporo hinamo suamo isuaki himu tumurumo hemakapusua akipoko nōmo iaki ayaparakanapo. Kotimo re su yaku ararehoasimo hemakapurakaripo. Aiyaka Poremo Taetaseaki popasapo.

Fairimone

Fairimone sawi one mahemakapukusa someane oyapo.

Sawi one Poremo Fairimoneaki poparaka makesapo. Fairimoneane Korosi apea aporo fanaraka reke, epo aporo metakira roporaka, ipu epoko rakisimo murikimasapo.

Poreane Rome apea tipura makesa rea maiya amo epo Fairimoneaki sawi one poparaka makesapo.

Yasu kusua turikia puraka hepene yapura hisiakipoko, keremisi tuaneti sekese su (26) faraka, keremisi tuaneti sewene (27) amo, Poremo sawi one popasapo.

Sawi one popasa amo kepoane oyapo. Fairimonemo aporo raipa roposa hakása meta Onísimaseane takaripusuapo. Arirakano aporo raipa takaripusua aporoane kakaro rusua kukunie, aiyaka Rome kamanimo somemané motosapo. Onísimase takaripukua Rome apea pesapo. Pesa maiya amo Poremo Kotimo someane some karakano epo kairaka Yasuaki rekeako parisapo. Maiya amo Pore tati hakása kikinaraka risike, Poremo hokosa pariraka reapo. Asiamo epoko farimaka Onísimasemo makata rakira wafaya, Fairimoneaki sawi poparaka makesapo.

Fairimone sawi popasa amo kepoane oyapo.

1:1-3 Sawi popasane úyaka kepomarekea popasapo.

1:4-10 Fairimonemo Poremo some ane hisinapaka popasapo.

1:11-19 Poremo hemakapusua ayiáka Fairimonemo himu hakásaraka hemakapusimo popasapo.

1:20-21 Fairimonemo kamenakaraka hemakapusimo popasapo.

1:22-25 Ayaparaka popasapo.

Fairimoneaki Poremo sawi poparaka makesane oyapo.

¹ Ano Poremo Yasu Keresopoko rakisiasamo tipura makerakano rekenapo. Tipura reke Fairimone, néaki nōmo sawi one poparaka makerakanapo. Isiapo Keresoa paosa aporo mae Timotimo ano arareraka rekeno, nōmo sawi one poparakanapo. Fairimoneo, neane etapo hemakapurakanapo. Nōmo soko Kotipoko rakiraka, etapo arakira ayiáka rakirakano néaki seserakanapo.

² Yasuaki patera asesa aporo hinamo nōmo ní apea kurikurihoko sarimaraka risiaki soko, nōmo sawi one poparaka makerakanapo. Keresoa paosa hinamo etapo papā Afia aki soko sawi one poparakanapo. Asiamo Akípaseaki soko poparakanapo. Arirakano ame aporomo yunu awera ayiáka Akípase soko isina hakása paoraka Kotimo yunu ane werakanapo. ³ Isiapo Ata Kotimo soko Unihae Yasu Keresomo soko reane hemakapurukua arareraka, arirakano re auaraka risikiasimo nōmo kurikurirakanapo.

⁴⁻⁵ Fairimoneo, nōmo Unihae Yasuaki himu hakásaraka hemakapurukua rekenapakae. Kotimo aporoane nōmo himu tumurumo hemakapurakanapakae. Akipoko népoko farimaka kurikuriana maiya amo nōmo Kotiaki suseaka kurikurirakanapo. ⁶ Nōmo Yasuaki himu hakásaraka hemakapurukua rerasamo, isu kikinaraka risirasamo, isina suamo himu hakásaraka hemakapusua aeyaka Kotimo takekea hemakapurane neaki kakasimo hemakapurakaripo. Makata kotesa Yasu Keresomo isuaki akarane nōmo makasimo nōmo kurikurirakanapo.

⁷ Maeo, Keresoa paosa aporo hinamoaki nōmo himu tumurumo hemakapuraka iane masesesapo. Asiasamo ano soko kara seseraka rekenapo. Nōmo ano mawakapusapo. Maeo, nōmo Kotimo aporo hinamo yofesane nōmo iane arareraka reasasamo nōmo néaki kára seserakanapo.

Fairimone, nōmo ní apea Onísimaseane karikia punie, aisane oyapo.

⁸ Ano Keresomo tarira aporosasamo nōmo neaki makata ayiakanie, aihoane sia-hoasireapo. ⁹ Nōmo ayiakanie, aihoafununine, nōmo neaki himu tumurumo hemakapuraka reke neaki auaraka somerakanapo. Ano Keresomo tarira aporo reasamo neaki somerakanapo. Yumo ano aporo sisimapo. Nōmo Yasu Keresopoko makata rakirane rakisiwasamo ano tipura makesa rekenapo. ¹⁰ Néaki nōmo hokosa parisa Onísimasepoko farimaka somerakanapo. Ano tipura rea maiya amo nōmo eaki Yasu Keresoane some kasasamo e Yasuaki rekeako parisapo. ¹¹ Fana e nenakamaka reke makata koteaka rakirafaraka, ní aporo raipasa yiamo né araresafapo. Asiane yumo e Keresoa paosasamo epo ano soko né soko arareraka koteaka rakiakosapo.* ¹² Asiamo Onísimaseane néyaki hakāsa rekeasimo nōmo eane paripusie, airakanapo. Nōmo himu hemakapusuane soko eyaki hakāsa purakanapo.

¹³ Nōmo ano ararehoko makeraka rekeanafonosakipoko epo ano ararehoasimo yu reae aihoko seserakanapo. Yasu hemakapusimo some kotesane some kasapoko ano tipura makesa rekenapo. Tipura makesa rea maiya omo Onísimasemo ano ararehoasimo yu reae aihoko hemakapurakanapo. ¹⁴ Nōmo hemakapusua nine nōmo néaki kaisiafapo. Nōmo neaki Kaiyanafonosasamo nōmo aosafapo. Asiamo eaki yu reae airakanafapo. Fairimone, nōmo ano ararehoasimo nōmo reae aihoane siahoasifareapo. Nōmo ní seseaka hemakapusua anaka ano ararehoane siahoasireapo.

¹⁵ Nōmo hemakapusuane Onísimase e takaripusua maiya wakasemamo neane metakarisiapo. Epo né metakarikia pukua Yasuaki himu hakásaraka hemakapusuapo. Asiamo né maiya wakasemamo metakarikia yumo e takaripusuane paripekea népoko yaiya rakiraka rekeakosapo, aiyaka nōmo hemakapurakanapo. ¹⁶ E pariperakano asekea hemakapuraka, “Onísimaseane aporo raipa roposa hakāsa yiyapo,” aiyaka hemakapurku. “Onísimaseane isiapo Keresoa paosa aporo maepo,” aiyaka hemakapunie. Eane nōmo hemakapurakanapo. E Keresoa paosasamo nōmo soko eane hemakapukusapo. Onísimaseane nōmo aporo raipa roposa rea nine, e nōmo Keresoa paosa maepo. Asiamo nōmo eaki kakaro hemakapukusapo, aiyaka nōmo hemakapurakanapo.

¹⁷ Nōmo anoaki moresa hemakapurakarakanone ano nōmo apea tereraka karikia apura ayiáka, Onísimaseane soko tereraka karikia punie. ¹⁸ Epo néaki mokoatikisane soko metao, makata hakimasane soko metao, nōmo eane arareraka, epoko makata yānoane neaki kakakosapo, airakanapo. ¹⁹ Aiyaka ano Poremo somerakanapo. Some wakasema one nōmo hokonomo poparakanapo. Epo makata hakimasa akipoko nōmo makata ropo kakaro kakakosapo. Arirakano nōmo some wakasema meta one soko, hemakapunie. Né Keresoa rekeako parisane nōmenapo. Keresomo someane nōmo néaki some kasapo. Asiamo nōmo ano ararehoane siahoasireapo.

²⁰ Maeo, eto iti Keresoa paosa aporo maesasamo nōmo someane kaiyinie. Nōmo Uni-hae Kotiaki hemakapuraka anoaki soko hemakapukua masesehoanie. Masesehoasimo Onísimaseane pasimakanie. ²¹ Yumo sawi one popana maiya omo “Nōmo someana one nōmo kakimakosapo,” aiyaka nōmo hemakapurakanapo. “Nōmo somesane soko nōmo kakimaka nōmo ní hemakapukua makata meta soko koteaka rakiakosapo,” aiyaka nōmo hemakapurakanapo.

²² Ano peakosapoko ape wakakosane makotehoanie. Repo anopoko farimaka kurikurisasamo ano tipura makesane tonotaerakano reyaki rekeako paripeakosapo, aiyaka nōmo hemakapurakaripo. ²³ Epáfarasemo Yasu Keresomo makata rakirane rakisiakipoko anoyaki hakāsa tipura makerakano, epo neane hemakapurakaripo, aisapo. ²⁴ Makamo soko Témasemo soko Arisitákasemo soko Rukimo soko ipu suamo néane hemakapurakaripo, aisapo. Ipu anoyaki hakāsa yineraka rakirapo.

²⁵ Asiamo Unihae Yasu Keresomo yaku ararenane repo hoyaki rekeasimo nōmo kurikurirakanapo.

* ^{1:11:} Onísimase ipi yano motosa namo meaka Koteaka Rakira Aporopo, aiyaka yano motosapo.

Hipuru

Hipuru sawi one mahemakapukusa someane oyapo.

Hipuru sawi one Yu aporo Keresoa paosa aporo hinamoaki poparaka makesa sawi ayapo. Aporomo meane, Hipuru me airapo. Aisamo maiya metakiramo Yu aporoane Hipuru aporo airapo. Asiamo Hipuru sawi one epamo popasarakapo. Popasa aporoane yano motosa sawi wo popasafapo.

Yasu hepene yapura hisiakipoko keremisi teti sewene su (37) faraka, Rome ame aporomo yunu weraka Yarusarame sitiane namo kakaro mokoatikisapo. Kotimo apeane soko mokoatikiraka, ekemo kisia apeane rukurakaritaesapo. Sereane faserepeasiraka, aporoamo Hipuru sawi one poparaka makesapo.

Yu aporo yakaimo namina makata watikisane mafahoasimo makata kakayia rukua paikia Kotiaki yaiya karaka risiapo. Aporomo makata watikisapoko, makata kakayia Kotiaki karane rukupateraka metakarisimo, Yasu kusuane ipu hemakapusuafapo. Asiasamo aporoamo sawi one poparaka makesapo.

Hipuru sawia some kepo parakuraka popasane oyapo.

1:1-2:18 Yasu Kotimo hokosa reane, namo kakaro kárapo. Yasumo hepene aporo yano motosane marokeraka e yano motosa namo kakaro kárapo.

3:1-4:13 Moseseane soko Yasumo yano motosa amo marokesapo.

4:14-7:28 Pirisitti aporoane soko Yasumo marokesapo.

8:1-9:28 Fana Kotimo Moseseyaki someaka masane kawe yumo Kotimo Yasuyaki someaka masa amo marokesapo.

10:1-39 Yasumo yapimo makata kakayiamo yapiane marokesapo. Aporomanomo watikisane Yasumo yapiamo namo kakaro mafaraka, makata watikisamo wakapuanne soko mafanapo.

11:1-40 Aporo hinamomo Kotiaki himu hakásaraka hemakapusuane uyáka risiapo, aíyaka popasapo.

12:1-29 Isiapo soko Kotiaki himu hakásaraka hemakapusimo isuaki tarirakanapo.

13:1-19 Yasu Keresoaki himu hakásaraka hemakapukua Yasumo ainane kekemaoasisimo somerakanapo.

13:20-25 Sawi one popasa aporoamo ayaparakanapo.

Kotimo hokosane namo kakaro kárane oyapo.

¹ Wate fana maiya metamo soko, maiya metamo soko, maiya káramo porofete aporoaki Kotimo some karáka, kekepoaka some kape pusuapo. Some kape pusuane porofete aporomo kaikia, isiapo makasa kaua kekemaki ipu some kasapo. ² Ayíaka some kasane yumo fahoko makeana maiya amo isuaki somehoasimo Kotimo ipi hokosaki some karakano, ipi hokosane hauaka wo pekea, isuaki some kasapo. Asiamo ipi hokosa aeyaka ipi Ata Kotimo hauaka one soko ti yapurane soko makata su kepo marekea faserepepesapo. Arirakano keseke makata su Kotimo ipi menane asekea rekeasimo epo murikimasane ipi hokosa ayapo.

³ Kotimo ipi faesane ipi hokosaki kasasamo e ipiane faeraka ho piakaeraka reapo. Koti ipi kárapo, aíyaka ipi hokosa Yasumo tarikia some kasapo. Kotimo ipi ainane ipi hokosamo soko hakása yineraka rakiraka reapo. Arirakano hauaka one soko ti yapurane soko makata su rakisiane siaraka risikiasimo, Kotimo hokosamo some wakapu amo asekea rekenapo. Aporo hinamo suamo himu watikisane mafaraka Koti hikumisia ereketaeraka risikiasimo e hákasa kusuapo. Kusuane maturikia taerakano hepene yapura hikia ipi fanaraka reasasamo ipi Unihae Koti hokono tumuru takua kakenapo.

Kotimo hokosa Yasumo hepene aporoane marokesane oyapo.

⁴ Yasu ipi Kotimo hokosasamo ipi yano motosane ipi Ata Kotimo makárasapo. Arirakano hepene aporoane Kotimo aporo raipa risiasamo yano motosane. Kotimo makarasarafapo. Asiamo iane Yasumo marokeraka hurutapisiapo. ⁵ Marokesa kepoane oyapo. Kotimo sawia poparaka ipi hokosane unihaeoasimo murikimaka makararaka someraka, “Né nōmo hokosapo. Pipu nōmo ní Ata ane anopo.” *(Buk Song 2:7)*

Aiyaka somesane Kotimo hepene aporoane makararaka somesare? Wae. Hepene aporoaki Kotimo aiyaka somesafapo. Asiamo Kotimo someraka, “Ipi Atane anopo. Nōmo hokosane époo.” *(2 Samuel 7:14)*

Aiyaka hepene aporoane Kotimo makararaka somesafapo. Ipi hokosa Yasuane makararaka somesapo.

⁶ Arirakano Kotimo ipi hokosa hakásá yine hauaka wo pusiesapo. Pusiesa maiya amo Kotimo hepene aporoaki someraka, “Hepene aporo reo, repo nōmo hokosane kekerehoanie.” Aiyaka Kotimo somesapo. *(Lo 32:43)*

⁷ Arirakano hepene aporoane Kotimo ipipoko raiparaka rakisimo someraka, “Ipu anoane somehoko puraka atifo apera ayiáka i perapo. Ipu anopoko rakiraka ira rufiana ayiáka ayiakakosapo.” *(Buk Song 104:4)*

⁸ Aiyaka hepene aporoane Kotimo somesa nine ipi hokosa Yasuaki someraka, “Kotio,* maiya suamo né yaiya unihaeaka rekeakosapo. Nōmo aporomano asekea areane nōmo kakaro ereketaeraka asekea rekenapo.

⁹ Makata kotesa ereketae susuane nōmo seseraka reke, somemane mamosorane soko ereketae some koarellaenane soko makata watikisa aina suane nōmo hisinapo. Kotio, nōmo ní Ata Koti amo né unihaeaka rekeasimo murikimaka he wera né kaua reke-marekea né maseserakanapo. Hepene aporo ane soko, hauaka wo aporo unihaeaka risiane soko, nōmo marokerakano Koti amo néaki kára maseserakanapo.” Aiyaka Kotimo somerakano popahoareapo. *(Buk Song 45:6-7)*

¹⁰ Asiamo Kotimo ipi hokosa Yasuane makata meta soko someraka, “Unihaeo, Kepomaresa maiya amo nōmo hemakapukua somesa aeyaka hauaka one faserepesapo. Ti yapurane soko nōmo hokonomo rakisiapo. ¹¹ Asiamo keseke hauaka one soko ti yapurane soko makata one su fahokosapo. Asiamo makata ane su faraka né kakaro yaiya rekeakosapo. Pasu patéana ayiáka makata one su ayiáka patéhokosapo. ¹² Pasu mawerona ayiáka hauaka one soko ti yapurane soko ayiáka mawerohokosapo. Pasu paté metakarira ayiáka, hauaka one soko ti yapurane soko patéane ayiáka metakariakosapo. Metakarikia pasu kawe amara ayiáka hauaka one kawe meta haku faserepeakea, arirakano ti yapurane soko ti kawe haku meta faserepeakosapo. Asiane yumo né area yaiya keseke soko ne yaiya rekeakosapo. Nōmo maiyane kakaro fahokosafapo.” Aiyaka Kotimo Yasuane somerakano popahoareapo. *(Buk Song 102:25-27)*

¹³ Arirakano Kotimo makata meta Yasuaki someraka, “Né ano hokono tumuru takua kayae. Kakeno nōmo yunuane nōmo hurutapiakosapo.” Aiyaka somerakano Kotimo sawia popahoareapo. *(Buk Song 110:1)*

Aisa ayiáka, hepene aporoane Kotimo makararaka somesare? Wae. Hepene aporoane aiyaka somesafapo. ¹⁴ Arirakano hepene aporoane yakapare? Iane hopo. Ipu Kotipoko rakirapo. Arirakano Kotiyaki yaiya risikiakosa aporo hinamoane ararehoasimo Kotimo iane pusierapo.

2

Kotimo isu mafasisiane oyapo.

¹ Yasu ipiane karasasamo eane hemakapusimo some kasane isiapo kaikia koteaka kakimaka kekemahoasireapo. Kekemahoanafonorakano kasu hea takerehaeraka apura ayiáka, isiapo Kotimo some merarurakanone, kasu ipi haku takerehaeraka apura ayiáka, isu purapaka Kotimo someane paroaka maka risikiasireapo. ² Arirakano Kotimo somemane motosane hepene aporomo Moseseaki some kasane kakaro somepo. Kakaro

* 1:8: Yasu ipi Kotipo.

someane aporomo koaretaesakipoko, koaretaesa ropo nine masapo. Aporomo ipi watikiaka rakisiakipoko, watikisa ropo hakása nine masapo.

³ Asiasamo Kotimo isu mafasiakosaposane isiaipo kakimakanafonorakanone, ropo kakakosaposane metakariakosare? Wae, metakariakosafapo. Kotimo aporomano yaku arareraka mafasirane namo kakaro kotesapo. Mafasirane Unihae Yasumo ipi fana some kasapo. Some karakano aporo metakiramo kaikia isuaki some kasesupo. Ipu úyaka some karaka, "Yasumo mafasiakosapo airakasuane kakaroripo." Aíyaka Yasumo some kaisia aporoamo isuaki somerakasupo.

⁴ Aíyaka somerakano isiaipo kakaroripo, aihoasimo aporoamo Kotimo wakapu aeyaka makata kára rakisiapo. Asia ayiáka Yasumo mafasiakosa somesane Kotimo makama fanaraka tarisiapo. Arirakano Ho Kotesamo wakapumo ararenane soko Kotimo ipi hemakapusua aeyaka isuaki kekepoaka kasá amo tarisiapo.

"Mafasira kepoane Keresopo," aisane oyapo.

⁵ Hauaka kawe haku Kotimo rakiakosane repo hemakapusimo nōmo somerakanapo. Hauaka ane asekea risikiasimo hepene aporoane Kotimo murikimosafapo. ⁶ Arirakano aporo hakásamo Kotimo sawia poparaka,

"Kotio, isu aporomanoane epareare? Isuane marirakano nōmo hemakapurakanare? Isu aporomano wakasemasasamo marirakano nōmo isu asekea rekenare? ⁷ Maiya wakasemamo hepene aporo nōmo makama fanaraka aporomanoane mawakasemaraka ayiáka nōmo maresapo. Maiya wakasemané farakano nōmo aporomanoane makáraraka maresapo.* ⁸ Asiamo aporomanoaki nōmo someraka, 'Makata suane unihaeaka asekea risikianie,' aíyaka nōmo somesapo." Aíyaka Tefetemo somerakano Kotimo sawia popahoareapo. *(Buk Song 8:4-7)*

Aporomanoaki Kotimo someraka, "Makata su unihaeaka asekea risikianie." Aíyaka Kotimo mareraka makata hakása meta unihaeaka asekea risikiakopo aisafapo. Arirakano yumo isiaipo aseane aporomanomo makata suane unihaeaka asekea risikianafonorakanō aserakanapo. ⁹ Aporomanomo makata su asekea risikianafonorakanō yia, isiaipo Yasuane unihaeaka asekea rekeno aserakanapo. Asiane Kotimo hemakapukua ararerakano, Yasuane aporo hinamo supoko farimaka kukusakipoko hauaka wo pesapo. Yasu pesane maiya wakasemamo hepene aporomo yano motosane káraraka risikino, Yasumo ipi yano motosane mawakasemaraka reapo. Mawakasemaraka reke, eane Kotimo ararerakano Yasumo himu nekea, umisa maka kusuasamo Kotimo e makáraraka, eaki faesane soko kasapo.

¹⁰ Kotimo makata su rakisiapo. Asiamo makata su rakisiane epo asekea rekenapo. Asiamo Kotimo hemakapuraka, "Nōmo hokosa parisane hepene apea ano faesa area anoyaki hakása risikiasimoripo," aíyaka Kotimo hemakapusuapo. Asiamo ipi hokosa parisane karikia hiasimo Yasuane murikimasapo. Murikimaraka iane Yasumo mafasikia, Koti rea faesa á karikia hiakosapo. Karikia hiasimo Yasu himu nekea kau tesane Kotimo maresapo. Yasu ipi umisa maka, kau terakano ipi namo kakaro koteaka ereketae susu ainapo. Asiamo mafasira aporoane isiaipo unihae Yasupo.

¹¹ Arirakano isu koteaka risikiasimo makata watikisane metakarikia kikisiraka Kotiyaki risikiasimo Yasumo ararenapo. Ararena aporoamo soko, araresa aporoamo soko isiaipo suamo Atane hakásapo. Hakásasamo Yasumo iaki, "Nōmo maepo, nōmo papāpo," aíyaka someraka epo hisinafapo. ¹² Epo someraka, "Kotio, Neane nōmo maeaki somehokosapo. Néaki kekerehoko sarimarakā risia á, nōmo né kekereaka kesahokosapo." Aíyaka epo somerakano Kotimo sawia popahoareapo. *(Buk Song 22:22)*

¹³ Epo some meta someraka, "Kotio, néaki nōmo kakaro himu hakásaraka hemakapuprakanapo." Aíyaka somesapo. *(Aisia 8:17)*

* 2:7: Maresapo aíyaka popasane makatane haru faserepesafapo. Asiane Kotimo keseke ayiakakosane epo hemakapukua fasapo.

Arirakano some meta soko Yasumo someraka, “Kotio, hokosa[†] nómo anoaki kasane anoyaki hakāsa risikino nómo aserakanapo.” Aiyaka Yasumo somerakano Kotimo sawia popahoareapo. (Aisaia 8:18)

¹⁴ Asiamo Yasumo hokosa aisane, hauaka wo aporo hinamoane somesapo. Aporomano kau soko yapi soko i risikinapo. Aporomano kau yapi ayíáka Yasumo ipi maka hauaka aporo pariraka reapo. Ayíáka nina kusuapo. E kusuasamo ipi wakapumo kura kepo Sataneane marutaesapo. ¹⁵ Marutaesasamo hauaka wo aporo hinamo arisia maiya amo i kukusane kára namoraka risikino, kura namonane Yasumo mafasapo. Maiya suamo aporo hinamo kukusane namoraka risikino asekea Yasumo iane makokorotaesapo.

¹⁶ Arirakano hepene aporoane ararehoko e pesafapo. Eparahamemo aporo ira wainepe pesa aporomanoane ararehoko e pesapo. ¹⁷ Eparahamemo aporo ira wainepe pesa aporoane Yasumo ipi maepo. Ipi mae ararehokosakipoko i namina aporo kau yasia maka pekea reapo. Reke ipi makata rakirane kakaro rakikia makosakipoko pesapo. Aporoane kamenakahoko e aporomano kau yasia maka pesapo. Maka peraka hauaka wo epo Kotimo pirisiti aporo fanaraka reke, aporo hinamomo makata watik-isane mafahokosakipoko epo yapiane kasápo. ¹⁸ E kau asekosakipoko makata umisa fasereperakano epo marokesapo. Asiasamo aporo meta kau asekosakipoko makata umisa fasere apera maiya amo aporoane Yasumo sia ararenapo.

3

Moseseane Yasumo marokesane oyapo.

¹ Keresoa paosa aporo maeo, Kotimo isuane ipi hokosa ayíáka risikiasimo re soko ayíáka murikimasapo. Murikimasasamo repo Yasuane hemakapunie. Kotimo kawe someaka masane Yasumo tarisimo e Kotimo pusiesapo. Pusierakano pekea pirisiti aporo fanaraka rea ane épo. Epo isupoko farimaka rakirakano isiaipo eaki himu hakásaraka hemakapukua, Yasuane isiaipo some karápo.

² Eane Kotimo murikimaka makata rakiako pusierakano pekea, eaki makata rakira kasane, epo kakaro kakimaka rakikia masapo. Arirakano Moseseane Kotimo murikimaka makata rakisimo maresane, Kotimo aporo hinamopoko Mosesemo rakikia masa ayíáka, Yasumo soko ayíáka rakikia masapo. ³ Rakikia marakano Yasu yano motosane Kotimo makárasapo. Arirakano ape kisia wafayane e ipi kárapo. Apeane wakasemapo. Aina ayíáka Kotimo hemakapuraka Yasu ipi ape kira wafaya asia ipi yano motosa kárapo. Moseseane ipi ape áreasasamo eane yano motosa wakasemapo. ⁴ Ape suane aporo manomo kirapo. Arirakano makata su rakisia wafayane Koti ipipo.

⁵ Mosesemo raiparaka rakiraka, Kotimo aporo hinamoane epo koteaka asekea reke ayíáka rakisiapo. Raiparaka rakiraka reke aporo hinamo suamo Kotiane hemakapusimo epo tariraka reapo. Asiamo aporo suaki Kotimo keseke ayiakacosane aporo hinamo suaki Mosesemo maroporaka somesapo. ⁶ Arirakano Keresoane ipi Kotimo hokosasamo, Kotimo aporo hinamoane epo kakaro sia koteaka asekea reapo. Arirakano isuane Unihaemo makotehokosaposane kaikia, seseaka kau risike, Kotiaki himu hakásaraka hemakapusuane rosaka taeraka ayíáka risikinone, isuane kakaro Kotimo aporo hinamopo.

“Kotimo some koaretaesa aporoane eyaki fenakosafapo,” aisane oyapo.

⁷ Kotimo aporo hinamo koteaka risikiakosakipoko Ho Kotesamo someane repo kaki-makanie. Asiamo Ho Kotesamo someraka, “Pipu Kotimo someane kaikia kakimakanie. Kakimako hisihokopo. ⁸ Wate fana ima yaoa repo makasa kaua kekemamo someraka, ‘Kotiane metakarikia epo saperakarihoamo murikimaka koaretaeraka aserakapo.’ Aiyaka ipu Kotiane metakarikia epo someane koaretaesa ayíáka, repo soko ayíáka koaretaehokopo.

[†] 2:13: Yasumo farimaka kusuasamo ipiaki risikiako parisa aporo hinamoane ipi hokosapo, aisapo.

⁹ Kotimo someraka, ‘Ima yaoa repo makasa kaua kekemamo nōmo saperakarihoamo murikimaka ipu hemakapusua rakisiapo. Keremisi foti amo (40) nōmo wakapu raki-rane ipu aseraka asesaneo, asiane nōmo saperakarihoamo ipu koaretaeraka rakisiapo.

¹⁰ Aiyáka rakiraka maiya suamo ipu himumo watikiaka hemakapuraka, nōmo ainane hemakapunafonoraka, nōmo ikia kara a kekemasafapo. Kekemahoanafonorakano i risia sereamo nōmo iaki sapesapo.

¹¹ Kára saperaka nōmo iaki aumaraka someraka, “Re kakaro anoyaki fenako peakosafapo. Nōmo hemakapusuane sanasinafapo.” Aiyaka Kotimo somesane kakaro yasiapo.” (*Buk Song 95:7-11*)

Aiyaka Ho Kotesamo somesapo. Fana aporo ane Koti rea fenako hianafonosasamo, keseke re soko i asia aiyáka, anapaka, re asekeanie, aiyaka Ho Kotesamo somehoareapo.

¹² Keresoa paosa aporo maeo, repo namina yia aporo mae hakásá metamo himu watikiaka reke Kotimo someane koaretaeraka, Yaiya Rera Kotiane metakariane sia-hoasifareapo. Koti metakarirapaka asekeanie. ¹³ Makata watikisamo kirimaraka Kotimo someane kaiyako hisiraka risikiakohoamo pipu maiya yumo repo namina yia ararehoanie. Maiya suamo sere fasere perakano pipupo airapo. Aiyaka pipuane pipu maiya yuyapo. Pipu yumo repo namina yia ararehoanie. ¹⁴ Fana isiapo kakimasane yumo soko yaiya kakimaka risike kakimasane rosaka taeraka yaiya risikinone isu Keresoaki hakasa nineraka risikinapo.

¹⁵ Arirakano Kotimo sawia popasane oyapo,
“Pipu Kotimo someane kaikia kakimakanie. Kakimako hisihokopo. Fana repo makasa kaua kekemamo Kotiane metakarikia, epo someane koaretaeraka risia aiyáka repo aiyáka koaretaeraka risikiakopo.” Aiyaka Kotimo sawia popahoareapo. (*Buk Song 95:7, 8*)

¹⁶ Kotimo someane kaikia koaretaesa aporoane epare? Mosesemo aporo karikia Iyipi hauaka metakarikia karikia pusua aporoane koaretaesa aporopo. ¹⁷ Keremisi foti amo (40) Kotimo aporoaki sapesane aporo epaki sapesare? Aporo watikiaka risike ima yaoa kukua kesa aporoaki sapesapo. ¹⁸ Kotimo aumaraka someraka, “Maiya yumo soko keseke soko re anoyaki fenako peakosafapo.” Aiyaka aporo epaki Kotimo somesare? Koaretaesa aporoaki somesapo. ¹⁹ Kotimo someane ipu kakimakanafonoraka koaretaesasamo, Kotimo murikimasa hauaka á i fenako pusuafapo. Punafonosane isiapo kaikia hemakapusireapo.

4

Koti rea fenakosane oyapo.

¹ Kotimo fana somesane someane yumo soko yaiya rekenapo. Fana Kotimo someraka, “Re ano rea fenako peane siahoasireapo.” Aiyaka somesane pipu yumo soko some ane yaiya rekenapo. Repo aporo hakásá metamo Kotimo someane koaretaerakano, Kotimo aseraka, “Ne anoyaki fenako peane siahoasifareapo,” aihokosapo. Kotimo airapaka namoraka risikianie. ² Kotiane hemakapusimo some kotesane Isiraya aporoaki some kasá aiyáka isuaki soko aiyáka some kasapo. Ipu kairaka kaikia himu hakásaraka hemakapunafonorakano Kotimo someamo iane araresafapo. Anapaka isiapo hemakapusireapo.

³ Arirakano some kotesane isiapo himu hakásaraka hemakapukua kakimarakanone, Koti rea isu fenakosapo. Fana Kotimo iaki saperaka aumaraka someraka, “Maiya yumo soko, keseke soko, re anoyaki fenako peakosafapo,” aiyaka Kotimo somesapo. Hauaka one kepo maresa maiya amo Kotimo ipi rakirane rakikia masapo. Rakikia maraka fenena maiya ane some kasapo. (*Buk Song 95:11*)

⁴ Arirakano yatipinu sereane Kotimo sawia popasane oyapo. “Yatipinu sereamo Koti ipi fenekea kake, makata hakásá meta soko rakisiafapo,” aiyaka popahoareapo. (*Stat 2:2*)

⁵ Arirakano fenena maiyane popasane oyapo. Kotimo some koaretaesa aporoaki epo someraka, “Maiya yumo soko keseke soko re anoyaki fenako peakosafapo.” Aiyaka Kotimo somerakano popahoareapo. (*Buk Song 95:11*)

⁶ Kotimo ipi some kotesane some karakano, fana aporomo kaikia yia koaretaesapo. Koaretaesa akipoko, Koti rea i fenako hisiafapo. Arirakano aporo metakiramo kakimaka risiane Kotiyaki fenako hiane siahosireapo. Koti rea fenako hiakosapo, aíyaka somesane yaiya kakenapo. ⁷ Arirakano fana koaretaesa aporo hinamoane fenako hisiafapo. Asiane aporo metakira fenako pukusane keseke Kotimo sere meta murikimasapo. Sere murikimasane Kotimo someraka, "Sereane pipupo." Aisane ipu koaretaesamo, keseke sere meta murikimasane Kotimo Tefeteaki some kasapo. Some kasane isuaki soko some karakanapo. Someane oyapo. "Pipu Kotimo someane kaikia kakimakanie. Kakimako hisihokopo." Aíyaka someaka popasa one repo fana kaisiapo. *(Buk Song 95:7-8)*

⁸ Arirakano Isiraya aporo hinamoane Yosuamo karikia pukua i kakaro fenekea risia satiki, fenakosa sere metane Kotimo somehoafunufapo. ⁹ Asiane Koti ipiane fenakosa sere meta murikimasapo. Kotimo ipi makata rakikia maka, yatipinu maiya amo ipi fenekea kaya ayíáka, Kotimo aporo hinamoane soko ayíáka fenasireapo. ¹⁰ Asiamo aporo hinamo Koti rea fenako hiakosakipoko, Kotimo ipi makata rakira rakikia maka fenekea kaya ayíáka, aporo hinamomo namina makata rakirane rakikia maka fenakosapo.

¹¹ Arirakano aporomo koaretaesa ayíáka, isiapo aporo hakásá metamo anapaka asekeanie. Asiamo Kotiyaki fenako hiakosakipoko himu hakásaraka hemakapukua paroaka risikianie.

"Kotimo someane wakapuaka rerasasamo aporo metakiramo koaretaesa ayíáka repo soko ayíáka koaretaehokopo," aisane oyapo.

¹² Kotimo someane some hitafeane soko wakapureapo. Ferepe taku tetákara waresa ayíáka Kotimo someane warepo. Ferepe taku tetákara wareane wakasemapo. Asiane Kotimo someane ware kárupo. Kotimo someane ware kárasasamo, someane akairamo ferepemo patena ayíáka someamo himua patenapo. Kikí kawaka areane ferepemo kikia, kikíane kotomaka, ferepemo pateraka, kikíane tairaka waiane takekea kikfane takekea, aina ayíáka, Kotimo someamo himumo hemakapusua akipe homo hemakapusua tati sarimasane, Kotimo someamo kokoa aserapo. Makata ayiakako hemakapurane soko mahamekeha hemakapurane soko Kotimo someamo takekea aserapo.

¹³ Kotimo ipi makata su aserapo. Arirakano aporo hakásá metane soko metao, makata hakásá metane soko metao, Kotimo asekeanafonoraka tau fararea rekenafapo. Kakamasakipoko makata meta mataihoanafonoraka makata su asera ayíáka, Kotimo ipi makata su kakama ayíáka risikino aserakanapo. Asekea hemakapurasamo eaki isiapo makata ainane soko, makata rakisiane soko, su eaki somerakano epo takekea parakuhokosapo.

"Pirisiti aporo fana kárane Yasupo," aisane oyapo.

¹⁴ Kotimo hokosa Yasuane hepene yapura hisiapo. Hikia reasasamo isiapo pirisiti aporo fana kárane Yasu ipipo. Asiasamo eaki himu hakásaraka hemakapurakanapo. Paroaka hemakapurane metakariane siahosifareapo. ¹⁵ Isuaki makata umisa fasereperakano isiapo pirisiti aporo fanamo kamenakaraka hemakapurakanapo. Isu kau aseakosakipoko makata umisa fasere apera ayíáka e soko hauaka wo rea maiya amo kau aseakosakipoko makata umisa faserepepesapo. Faserepeperakano yia epo himumo watikiaka hemakapukua rakisiafapo. ¹⁶ Asiamo Yasumo isuane kamenakaraka fari-maka kurikuriraka rekeno, isuane Koti makeraka hiane siahosireapo. Makaka umisa fasere aperamo isu ararehoasimo Koti rea makeraka peraka, mapiraraka himu paroaka hemakapukua risike kurikurihoanie. Kotimo makata suane wakapuaka asekea rekenapo. Arirakano Kotimo isu kamenakaraka reke yaku arareraka makoteraka rekenapo.

"Yasu ipi pirisiti aporo fanaraka reamo isu ararehokosapo," aisane oyapo.

¹ Pirisiti aporo fanaraka rakisimo murikimasane oyapo. Aporo su aeyaka aporo hakásá pirisiti aporo fanaraka rakisimo murikimasapo. Murikimasa aporoamo Kotipoko

rakiraka, aporo hinamo su ararenapo. Aporo hinamomo watikisapoko epo saro sipi rukua paikia, Kotiaki kaka, makata meta soko yaku kaka, epo ayíáka rakirapo. ² E apororaka reke, e soko wakapuhoanafonoraka wasuaka rusisekeno asekea, aporo hinamo mahimeteraka risike hasaka hemakapurakano asekea, iane epo sapehoanafonoraka tau maroponapo. ³ E wakapuhoanafonoraka reasasamo epo ipi watikisapoko soko, saro ponomakau rukua paikia kaka faraka, aporo hinamomo watikisapoko soko, saro nanikose rukua paikia Kotiaki karápo.

⁴ Pirisiti aporo fanaraka reane yano motosa kárapo. Pirisiti aporo fanaraka reamo rakirane rakiako epo ipiane murikimasafapo. Kotimo Eroneane pirisiti aporo fanaraka reamo rakirane rakismo Erone murikimasa ayíáka, yumo soko pirisiti aporo fanaraka reamo rakirane rakismo Kotimo murikimarapo. ⁵ Arirakano Keresomo ipi yiamo yano motosane makárahoanafonoraka, pirisiti aporo fanaraka reamo rakirane rakiako epo ipiane murikimasafapo. Kotimo eane murikimasapo. Kotimo eaki someraka, “Né nōmo hokosapo. Pipu neane nōmo makárarakanapo. Nōmo kakaro ní Atane anopo.” Aisa Kotiamo e murikimasapo. ^(Buk Song 2:7)

⁶ Arirakano epo some meta soko someraka,

“Maiya suamo né pirisiti aporo rekeakosapo. Mekésere pirisiti* apororaka rea ayíáka, né soko hakása nineraka yaiya rekeakosapo.” Aíyaka somerakano Kotimo sawia popahoareapo. ^(Buk Song 110:4)

⁷ Yasu ipi hauaka wo rea maiya amo, Kotimo e ararehoasimo epo Kotiaki kurikurisapo. “Kotio, ano kurapaka nōmo ano mafasiane siahoasireapo,” aíyaka epo Kotiaki kára wáraka hiripuyaki kurikurisapo. Epo ipiane makárahoanafonoraka Kotiane makárasasamo epo kurikurisane Kotimo kaisiapo.†

⁸ Yasuane Kotimo hokosapo. E Kotimo hokosa rea nine, makata umisane fasereperakan, epo maka himu nekea kau teraka asia aeyaka Kotimo someane kakimaka kekemasapo. Asiamo kakimaka hemakapurane enomasapo. ⁹ Enomaka faraka e kakaro siaraka reapo. Siaraka reasamo epo someane kakimara aporo hinamoane epo mafasirapo. Yaiya mafasira kepoane Yasu ipipo. ¹⁰ Eaki Kotimo someraka, “Né pirisiti aporo fanapo. Mekésere pirisiti apororaka rea ayíáka né hákasa rekenapo,” aisapo.

“Re Keresosane paripurapaka asekeanie,” aisane oyapo.

¹¹ Mekésere menane isiapo makata kára somehoafunupo. Kepoane wakasemafapo. Arirakano repo foaka hemakapunafonorakano, someraka risike wafororipo. ¹² Fana repo Yasuane hemakapusimo somesane kaikia, maiya káramo kaisiasamo, repo aporo metakiraki tisaraka some kakafunupo. Repo tisaraka some kakafunusa nine, repo tisaraka some karakanafapo. Repo sia hemakapunafonorakano aporo metamo Kotimo some kepo fanane, efera hunia reaki somerakanapo. Asipa nafunusa nine, hokosamo hoko pi hákasa anena ayíáka repo nenaka risikinapo. ¹³ Hoko pi nenane hokosa reapo. Hokosasamo ereketaeraka risikiasimo somerane kumukuraka risike takekea hemakapurafapo. ¹⁴ Arirakano asipa ane aporo sisimamo nenapo. Keresoa paosa aporo hinamomo makata kotesane soko makata watikisane soko takekea hemakapura aporo hinamoane aporo sisima hinamo sisima asiapo.

6

“Makata kakimasane merarunapaka kakimaka risikianie,” aisane oyapo.

¹⁻² Repo Keresomo menane some fana somesane hákasa kairaka risike siahoasifareapo. Keresomo kepo suane hemakapuko, Keresoaki himu hakásaraka risira aporo sisimamo kaira ayíáka kaiyinie. Arirakano ape kiakosakipoko ira kesa fana maposane teakamaka efera hunia maponafapo. Keresomo some kepo fana kasane ira kesa asiapo. Keresomo some kepo fana kasane oyapo. Hauaka omo makata watikiaka rakisiane hufitaeraka,

* ^{5:6:} Wate fana Mekésere pirisiti aporo kára reapo. (Stat 14:18-20 á menoohanie.) † ^{5:7:} Yasumo kurikurisane Kotimo kaisiapo. Kairaka Yasu kukusane Kotimo araresapo. Arareraka e kurakano Kotimo e maturikia taesapo.

Kotiaki rekeako pariraka eaki himu hakásaraka hemakapurane soko, arirakano hea tapukumarerane soko, arirakano hokonomo sakairaka kurikurinane soko, arirakano aporo kusua keseke maturikia taehokosane soko, arirakano fa ana maiya amo aporo hinamo takekea parakuhokosane soko, arirakano makata ane su ira kesa asiapo. Ira kesane fana maposane efera hunia maponafapo. Aina ayíáka makata kepoane fana some-sane, maiya suamo someraka risikiakopo. ³ Someane kaikia hemakapuraka Keresomo menane karahoasimo Kotimo ararerakano ipi some metakirane soko enomaka paroaka risikiakosapo.

⁴⁻⁵ Arirakano aporo metakiramo Kotiane metakarikia eaki patera tarikia, ipu Kotiaki efera hunia risikiako parihoasimo isiapo mayíáka maropohokosare? Arirakano aporoane Kotimo faesa á risike, Kotiaki himu hakásaraka hemakapuraka, Kotimo yaku ararenane mokoa, Ho Kotesa soko i himua perakano, Kotimo someane kaikia someane kotehoareapo, aíyaka hemakapuraka, keseke Yasu pariaperamo Kotimo wakapuaka rakiakosane ipu koteaka hemakapukua risiane, ⁶ asiāne aporoamo Kotiane metakarikia hisirakano akipoko, efera hunia makata watikisane hufitaeraka Kotiaki risikiako parihoasimo, isiapo maropohoasifareapo. Asiamo Kotiane ipu metakarikia eaki patera tarikia, Kotimo hokosa Yasuane ira matopesa paremeresa ayíáka, ipu efera hunia Yasuane paremarerakanapo. Aporo metakiramo Yasuane hokomaraka Yasuane mainamarehoasimo e paremeresa ayíáka paremarerakanapo.

⁷ Asiamo maiya suamo yao hauaka sua perapo. Perakano aporomo makata mano hemoa porosane koteaka tanehekeea wate perapo. Perakano hauakane Kotimo aseraka, "Kotehoareapo," airapo.

⁸ Arirakano hauaka meta yao perakano aporomo hemoa makata mano porosane taneheanafonoraka, hemo sunumo aōraka hakapi hinaka makata keta watikisane taneherapo. Taneherakano hauakane Kotimo aseraka, "Watikirareapo," aihokosapo. Hauakane metakarisiane keseke iramo inaka fahokosapo. ⁹ Maeo, isiapo reaki paroaka someraka one keseke reane iramo inarapaka ayíáka somerakanapo. Repo Kotiane metakarisireapo, aíyaka isiapo hemakapurakanafapo. Kotimo re mafasikia, keseke re makotehokosapo, aíyaka hemakapurakanapo.

¹⁰ Kotimo mokome aserafapo. Repo makata rakisiane, Kotipoko Keresoa paosa aporo hinamoane hemakapukua araresane yaiya arareraka risikino, epo asekepayarakanafapo. Aseke fasiakoraka hasaka aserafapo. ¹¹ Aporo meta repo yaiya arareraka risike, akura maiyamo yaiya arareraka rakismo isiapo hemakapurakaripo. Repo ayíáka rakiraka risike, repo hemakapuraka, "Kotimo isu pasimokoakosapo." Aíyaka hemakapukua kau risikino, Kotimo re pasimokoa reaki makata ropo kotesa kakakosaposane, kakakosapo.

¹² Ayiakakosasamo kau hisiraka rakiraka risikiakopo, aíyaka hemakapurakaripo. Kotimo ayiakakosaposane aporo metakiramo kaikia kakimasane metakarianafonoraka risike Kotimo ayiakakosaposane asesapo. Asesa ayíáka re soko ayíáka risikiasimo hemakapurakaripo.

"Kotimo ayiakakosaposane kakaro ayiakakosapo," aisane oyapo.

¹³ Kotimo ayiakakosaposane epo Eparahameaki somesapo. Kakaro ayiakakosapo, aíyaka Eparahamemo hemakapusimo Kotimo aumaraka somesapo. Metamo e maroke-hoanafonoraka, Koti ipi kakaro fanapo. Fanasasamo aumaraka epo ipi yano motosane yano hokoa kakaro someane someaka masapo. ¹⁴ Epo Eparahameaki some karáka, "Né nōmo makotehokosapo. Nómo aporo ira yakaihoasimo nōmo makárahokosapo," aisapo. (Stat 22:17)

¹⁵ Airakano someane Eparahamemo kakimaka, kau reke someane metakarisiafapo. Metakarianafosasamo fana some kasane kakaro yainakano asesapo.

¹⁶ Arirakano aporo tetámo tafatafaraka risike, tafatafasane metakarisimo, aporo hakásamo aumaraka somerakano, tetapo tafatafaraka somesane metakarirapo. Aporoamo epo ipi yano hokoa aumanafapo. Aumahoko aporo meta kára reamo yanoane epo yano hokoa aumarapo. ¹⁷ Isiapo Kotimo kakimara aporo hinamoane

Eparahamemo hokosa pariraka risia amo Kotimo ayiakakosaposane, “Kakaro hoareapo,” aiyaka isiapo kakimaka hemakapusimo, Kotimo aumaraka somehoareapo. Epo aisane metakariakosafapo, aiyaka aporomo hemakapusimo aumaraka somehoareapo. ¹⁸ Aiyaka Kotimo ayiakakosaposane soko, aumaraka somesane soko, some tetane metakarirafapo. Some tetane kotafe somerafapo. Kotafe somehoanafononasamo isu Kotimo farimakasimo Koti rea makeraka hirapo. Ayíáka aporoamo hemakapuraka “Kotimo ayiakakosaposane kakaro ayiakakosapo.” Aiyaka paroaka hemakapukua kau risikinapo.

¹⁹ Paroaka hemakapukua risirane kasu takerehaeraka maka pukohoamo eke humaresa, ekeane he tua atura kenepekea kake kasu yia akaya ayíáka, Kotimo ayiakakosaposane kakimaka rosaka taerako hemakapurane eke asiapo. Asiamo isiapo hemakapusuane rosaka taerako hemakapukua risike Koti rea makeraka pekeakurikurihoasireapo. Asia ayiaka pirisiti aporo fana reamo Kotimo ape, Namo Kakaro Kotesa Susu apea Koti rea apepo, aisa á yorokoa aporo hinamosupoko farimaka rakisiapo.

²⁰ Arirakano hepene apea Yasu isupoko farimaka fana hikia, Koti rea á rekenapo. Mekésere pirisiti aporo fanaraka rea ayíáka, maiya suamo Yasu ipi pirisiti aporo fanaraka rakiraka rerapo.

7

“Fana pirisiti aporo hakása meta kararaka reane Mekéserepo,” aisane oyapo.

¹ Sareme taonea aporo risiane Mekéseremo unihaeaka asekea reareapo. Unihae Koti Kárapoko epo pirisiti apororaka rakiraka reapo. Ayíáka reane Eparahamemo ipi yunu weraka, yunu aporo unihae yakai rukua faraka, Eparahame ipi apea pariperakano, Mekéseremo e sapenekea eaki makotena someane kayereapo. ² Someane karakano eaki Eparahamemo makata yaku kayereapo. Ipi makata su mosane parakuraka kaeyakosu sarimaraka taehoareapo. Taeraka, tokonasu tokonasuaka Eparahamemo ipi mokoa, kaeyako hákasane su rofaka maka Mekésereaki kayereapo. Karakano Mekéseremo moyereapo. Mekésereane yano motosane namo meáka Ereketae Rera Aporo Unihaepo, aiyaka yano motosapo. Sareme taonea aporoane unihaeaka asekea reasasamo ipi yano meta yano motoraka, Tau Rera Aporo Unihaepo, aiyaka yano motosapo. ³ Arirakano ipi ata soko ipi ama soko fapo.* Makasa kaua soko makasa kamuma soko makasa kaua kekema soko fapo. Ipi takapesa maiyane soko ipi kusua maiyane soko fapo. Kotimo hokosa yaiya rera ayíáka, Mekésereane pirisiti apororaka yaiya reareapo.

⁴ Arirakano isiapo makasa kaua kekema fana Eparahamemo yunu wekea yunuane marokehoareapo. Marokeraka yunu aporomo makata kemoane epo moyereapo. Mokoa makata su mosane parakuraka, kaeyakoane Mekésereaki karakano Mekéseremo moyereapo. Mekésere e kára hokopukua reasasamo Eparahamemo eaki makata yaku kayereapo. ⁵ Arirakano Rífafi aporo ira metakira pirisiti apororaka risike Kotimo someraka, “Isiraya aporo hinamomo ipu makata mosane parakuraka, tokona suane ipu menapo. Kaeyakoane repo mokoanie.” Aiyaka Kotimo somemane motorakano, pirisiti aporomo kaeyakoane moyereapo. Makata kasá aporoane soko, makata mosa aporoane soko, i suane Eparahamemo wainepe pusua aporo ayareapo. Asiamo Rífafi aporo iramo pirisiti aporoamo namina aporo tákemo makatane moyereapo. ⁶ Arirakano Mekésere ipi Eparahamemo aporo irafapo. Kotimo makoteraka ayiakakosaposane Eparahameaki Mekéseremo some kayereapo. Some karakano Eparahamemo Mekésereaki makata kaeyakoane kayereapo. Mekésereane Eparahamemo aporo tákemoanafonosa nine, Eparahamemo eaki makata yaku kayereapo. Makata yaku karakano mokoa, Mekéseremo Eparahameaki makotena someane kayereapo. ⁷ Makotena someane kará aporoane

* 7:3: Kotimo sawia Mekésereane ipi ata soko, ipi ama soko, yano motosa popasafapo. Ipi makasa kaua soko, makasa kamuma soko, makasa kaua kekema i suane soko, yano motosa popasafapo.

kárapo. Makotena someane mará aporoane wakasemapo.[†] Makata ainane isiapo hemakapurakanapo.

⁸ Arirakano Rífafi aporo iramo makata kaeyakoane ipu namina morapo. Aporo kura ayiáka Rífafi aporo ira ane i kurapo. Arirakano Mekéseremo makata kaeyakoane moraka e yaiya rekenapo. Arirakano Mekésereane Kotimo sawia poparaka, “E yaiya rerapo,” aiyaka popahoareapo. ⁹⁻¹⁰ Arirakano Rífafi aporo ira pirisiti apororaka risiane Eparahamemo aporo wainesa ayareapo. Rífafi aporo ira wainasiraka Eparahamemo, Mekésereaki makata kaeyakoane kayereapo. Eparahamemo Mekéreseaki makata kaeyako kasane, keseke epo hokosa wainenaka Rífafi faserepesareapo. Eparahamemo makata kaeyako kasa ayiáka, Rífaimo soko ayiáka kayereapo. Arirakano Rífafi aporo ira pirisiti apororaka risiane aporo metakiramo karakano, ipu kaeyakoane morapo. Asiamo pirisiti aporomo makata kaeyakoane mora aporoamo, ayiáka Mekésereaki, makata kaeyakoane kayereapo. Asiamo Mekéseremo Rífaiane marokehoareapo. Marokeraka ipi yano motosane namo kakaro kárapo.[‡]

Pirisiti aporo meta pesane oyapo.

¹¹ Kotimo somemané Moseseaki kasá maiya amo, Rífafi aporo ira hákasamo pirisiti aporomo rakirane rakisiareapo. Rífafi aporomo pirisiti apororaka rakiraka risike, aporomo makata watikiaka rakisiare apo himumo hemakapusuane kakaro kososa satiki, pirisiti aporo meta haku faserepeafunufapo. Kakaro kosohoanafonosekeno, pirisiti aporo meta haku faserepesapo. Aporo meta haku faserepesane Erone[§] aporo ira pirisiti aporoane hakása yiayafapo. Mekésere pirisiti apororaka area ayiáka, pirisiti aporo meta haku faserepesane soko hakása ninesapo.

¹² Arirakano Rífafi aporo ira pirisiti apororaka risiane Kotimo sanasiraka, pirisiti aporo meta haku faserepesa maiya amo, Kotimo pirisiti aporomo rakismo, somemané motosane soko sanasisapo. ¹³⁻¹⁴ Asiamo isiapo Unihae Yasuane somerakanapo. E pirisiti apororaka reane Rífafi aporo irane wainepe pesafapo. E Yuta aporo ira wainepe pesapo. Rífafi aporo ira pirisiti aporomo saro sipi rukua, eke kima taeraka paira ayiáka, Yuta aporomo ayiáka pairafapo. “Yuta aporo iramo pirisiti apororaka rakiakosapo,” aiyaka Mosesemo somehoafareapo.

“Mekésere asia pirisiti aporo metane Yasupo,” aisane oyapo.

¹⁵ Somesamo kepoane oyapo. Mekésere asia pirisiti aporo meta haku faserepesapo. ¹⁶ Arirakano pirisiti apororaka rakismo Mosesemo somemané motoraka, Rífafi aporo ira wainepe pusua aporoane pirisiti apororaka rakirapo. Yasuane Rífafi aporo ira wainepe pusua fapo. Asiane Yasuane pirisiti apororaka rakismo Kotimo Mosesemo somemanéne kekemaraka murikimasafapo. Yasu yaiya rerakipoko e pirisiti apororaka rakismo Kotimo murikimasapo. ¹⁷ Asiamo e pirisiti apororaka rakirane fahokosafapo. Arirakano Yasuane Kotimo sawia poparaka, “Maiya suamo né pirisiti apororaka rekeakosapo. Mekéseremo pirisiti apororaka rakiraka rea ayiáka, né soko ayiáka rakiraka rekeakosapo,” aiyaka popahoareapo.

(Buk Song

110:4)

¹⁸ Arirakano Rífafi aporo ira pirisiti apororaka rakira somemané fana motosane Kotimo metakarisiapo. Fana pirisiti aporomo rakismo somemané motosane wakapufapo. Somemané motosa amo aporomo watikisa kepoane kakaro mafasafapo. ¹⁹ Mosesemo somemanéamo aporoane yaiya makotesafapo. Arirakano yumo Kotimo ikia kara meta tarirakanapo. Ikia kara metane oyapo. Yasumo yapimo isiapo watikisane kakaro mafanapo. Isiapo kaikia amaramo Koti rea makeraka hiasireapo. Asiamo kawe someaka masa amo fana somemané motosane marokerakanapo.

[†] 7:7: Mekésere kárapo. Eparahame wakasemapo. [‡] 7:9-10: Mekéseremo aporo metaki makata kaeyakoane kasafapo. [§] 7:11: Rífafi aporo ira wainepe pusua á Erone faserepesapo. Eronemo aporo ira aeyaka pirisiti aporo fanarakareane murikimasapo.

²⁰ Arirakano Yasuane pirisiti aporohoasimo Kotimo aumaraka murikimasapo. ²¹ Fana Rífafi aporoane pirisiti apororaka rakisimo Kotimo aumaraka murikimasafapo. Asiane Kotimo Yasuaki someraka, “Ano Koti unihaeaka reke, nōmo aumaraka somerakanapō. Maiya suamo ne pirisiti apororaka rekeakosapo. Aíyaka someraka one nōmo metakari-akosafapo.” Aíyaka Yasu pirisiti apororaka rakisimo Kotimo aumaraka murikimasapo. (*Buk Song 110:4*)

²² Asiamo Kotimo Yasuyaki kawe someaka masane isu aporo hinamoaki tariako, Yasu ipi pekea kusuapo. Kusuasamo Kotimo kawe someaka masa amo fana Moseseyaki someaka masa ane marokesapo.

²³ Arirakano fana pirisiti aporo yakai risiapo. I meta kurakano, kusuakipoko pirisiti apororaka makata rakirane yaiya rakisiafapo. ²⁴ Ipu yaiya rakianafonorakano asekea, yumo pirisiti aporo Yasuane ipi yaiya rerasasamo, maiya suamo e yaiya pirisiti apororaka rakirapo. Yasumo pirisiti apororaka rakiraka reke, kurafaraka yaiya rerasasamo, epo rakirane aporo metamo maka rakirafapo. ²⁵ Asiasamo yumo soko keseke soko Yasu aeyaka isu Koti rea hiakosasamo epo aporo hinamoane mafasirapo. Maiya suamo ipi yaiya rerasamo, ipoko farimaka Kotiaki someraka rekenapo.

“*Yasu ipi pirisiti aporo fanaraka reamo isu ararenapo, aisane oyapo.*

²⁶ Yasu ipi pirisiti aporo fanaraka rerasamo, epo isu ararehoane siapo. E namo kakaro koteaka susu rekenapo. Epo watikiaka rakirafapo. Epo makata watikisane hemakapurafapo. Makata watikiaka rakira aporo akiyaki Yasuane hakāsa rea maiya amo epo watikiaka rakisiafapo. Asiamo e hepene yapura reke kakaro fanaraka rekeakosane Kotimo maresapo. ²⁷ Rífafi aporo ira pirisiti aporo fanaraka arisia ayíáka e rerafapo. Maiya suamo hauaka wo pirisiti aporo suamo namina watikisapoko saro ponomakau rukua paikia Kotiaki kaka faraka, aporo hinamomo watikisapoko saro nanikose rukua paikia kasá ayíáka Yasumo ayíáka kasáfapo. Arirakano aporo hinamomo makata watikisane kakaro mafahoasimo yape hakásamo Yasu kuraka ipi kauane soko yapiane soko Kotiaki kasapo. Ayíáka kasasamo efera hunia makata meta kakakosane kakenafapo. ²⁸ Fana Kotimo Moseseyaki someaka masa maiya amo, pirisiti aporo fanaraka rakisimo, aporo kakaro koteaka ereketae risikianafonona aporoane murikimasapo. Arirakano keseke Kotimo Moseseyaki someaka masane farakano, Kotimo ipi hokosaki aumaraka someraka, “Né pirisiti apororaka rekeakosapo.” Aíyaka ipi hokosa Yasuane murikimaka makoterakano maiya suamo Yasuane kakaro siaraka reapo.

8

“*Kotimo isuane Yasuyaki kawe someaka masane fanapo, aisane oyapo.*

¹ Some akara kepoane oyapo. Pirisiti aporo kakaro kotesane Yasupo. Maiya suamo e pirisiti aporo fanaraka reke aporo hinamopoko farimaka rakiraka rekenapo. Hepene yapura Unihae Koti Káramo hokono tumuru takua Unihae Kini Karamo sea kára á, Yasuane isiapo pirisiti aporo fanane kakenapo. ² Hauaka wo Kotimo farae ape* kisia ayíáka hepene hauaka yapura kakaro ape Unihaeane kekerehoko kisia rekenapo. Aporomo kisiafapo. Unihae Kotimo kisiafapo. Apeane kakarua isiapo pirisiti aporo fanaraka rea Yasumo isupoko farimaka makata rakirakanapo.

³ Arirakano hauaka wo pirisiti aporo fanamo saro sipi rukua paikia Kotiaki kaka, makata meta soko yaku kaka ayíáka rakirapo. Arirakano hepene hauaka yapura, isiapo pirisiti aporo fana Yasu reke, epo soko Kotiaki makata yaku kasapo. Aporomanomo makata watikisane mafahoasimo ipi kauane yaku kasapo. ⁴ Asiamo Yasumo pirisiti aporomo makata rakisiane hakureapo. Yasumo makata rakirane, hauaka wo pirisiti aporomo makata rakira aki hakāsa yinesafapo. Yasumo pirisiti aporomo makata rakirane hepene apea makata rakirapo. Arirakano hauaka wo pirisiti aporomo Mosesemo some-mane kekemaraka rakirapo. ⁵ Hauaka wo ipu pirisiti apororaka rakiraka, hepene yapura

* 8:2: Fana hauaka wo Isiraya aporomo Kotiaki makata yaku paikia kakakosakipoko farae ape kisiafapo.

makata ainane ipu murikimaka rakirakanapo. Aina ayiaka, Mosesemo farae ape Kotiaki kekerehokosa apeane, kiakosakipoko Kotimo eaki someraka, “Ne uri Sainae teraya somemané mako hinakasuamo, ape kiakosane nōmo neaki tarisiapo. Tarisia ayiáka murikimaka kinie.” Aíyaka somerakano, Kotimo tarisia ayiáka Mosesemo murikimaka kisiapo.

(Kisim Bek 25:40)

“Kawe someaka masane Keresomo asekea rekenapo.” Aisane oyapo.

⁶ Arirakano Yasumo ipi pirisiti apororaka rakiraka, hauaka wo pirisiti aporomo rakirane, Yasumo marokeraka rakirakanapo. Kotimo ipi aporoaki kawe someaka masane aporomo kakimakasimo, Yasu pekea tipia asekea rekenapo. Kawe someaka masamo fana someaka masane marokesapo. Fana Kotimo makoteraka ayiakakosaposane wakasemapo. Kawe Kotimo makoteraka ayiakakosaposane namo kakaro kárapo.

⁷ Arirakano fana someaka masa amo siasatiki, Kotimo kawe someaka makafunufapo. Siahoanafonosekeno asekea some kawe someaka masapo. Mosesemo somemaneamo aporo hinamomo himu watikisane maereketaenafapo. Asiamo maereketaena wakapuanre rekenafapo. ⁸ Asiamo fana someaka masane fesenorakano aporomanomo watikisane Kotimo asekea someraka,

“Ano unihaeaka reasasamo repo kaiyinie. Keseke maiya metamo nōmo aporo hinamoaki kawe someaka makosápo. Asiamo Isiraya aporo iraki soko, Yuta aporo iraki soko, nōmo kawe someaka makosapo. ⁹ Someaka makosane kawe haku rekeakosapo. Arirakano fana ipu makasa kaua kekemaki homo someaka masa ayiáka, keseke ayiáka someaka makosafapo. Fana namina Iyipi hauaka metakarikia pusimo, nōmo i karikia pusua maiya amo nōmo someaka masapo. Fana someaka masane ipu kakimaka kekemahoanafonorakano, nōmo iane metakarikia asekea reafapo. ¹⁰ Arirakano nōmo fana someaka masane metakarikia, Isiraya aporo hinamoaki kawe someaka makosane oyapo. Nōmo somemane motosane ipu hemakapusimo i himua keakosapo. I himua kekeea, nōmo somemane kekemahokosane namina sesehokosapo. Ipu Kotiane anopo. Nōmo iane asekea rekeno ipu nōmo somemane hemakapukua koteaka risikiakosapo. Ayiáka risikino nōmo aporo hinamoane ípo. ¹¹ Aporo metamo ipi aporo tákeane sukururaka someraka, ‘Unihae Kotiane hemakapunie,’ aihokosafapo. Aihokosapoko asiane aporo suamo anoane hemakapukusapo. Aporo kára risiamo soko aporo wakasema risiamo soko, aporo suamo ano hemakapukusapo. ¹² Asiamo ipu watikiaka rakirakanómo asekea iane kamenakaraka mafahokosapo. Mafaraka ipu watikisane nōmo efera hunia hemakapukusafapo.”

Aíyaka Kotimo kawe someaka makosane porofete aporomo Kotimo sawia popahoareapo. (Jeremaia 31:31-34)

¹³ Kawe someaka masasamo Kotimo hemakapuraka, “Fana someaka masane patéreapo.” Aíyaka Kotimo hemakapurapo. Patéane pasu paté asiapo. Maiya wakasema nina keseke fa ana ayiáka su fahokosapo.

9

Fana pirisiti aporo fanaraka reamo Kotiaki makata kakayia yapiane kasane oyapo.

¹ Fana Kotimo Moseseyaki someaka masa maiya amo, Koti rea makeraka peasimo makata rakiakosakipoko somemane motosapo. Asiamo Kotiaki kekerehokosakipoko hauaka wo ape kiakosane, “Uyáka kinie,” aíyaka somemane motosapo. ² Somemane motorakano Mosesemo farae apeane kisiapo. Apeane tipia pasumo enonosapo. Enonoraka ikia koro sapeane yano motoraka Kotesa Susu apepo. Ape á nafa wiki yatipinusu paikia taeraka, arirakano teboro soko motokoa, teboro kima farawa Kotiaki yaku kakakosane taesapo.

³ Farae ape kakaru tipia pasu waremaresamo mataisane ape taku ra yano motoraka Namo Kakaro Kotesa Susu apepo,* aíyaka yano motosapo. ⁴ Kotesa Susu apea pasumo

* 9:3: Aporo meta purapaka apeane yaposapo. Pirisiti aporo fana ipi hákasa apea purapo.

enonosane makeraka makata wape yamona paitisimo teporo asia rakiraka koroto maka rakikia sekesapo. Arirakano Namo Kakaro Kotesa Susu apea koroto meta maka rakikia, maua kima yapurane soko, fe takua soko, korotomo paikia suakataeraka, ape á motosapo. Koroto metakira mokoa, petoro rakisiapo. Petoro rakisia á Kotimo hepene yapunaka asipa asia[†] kasá ima yaoa hurupepesane, ipu mokoa petoro kakarua kesapo. Petoroane maua kakarua makesapo. Arirakano Eronemo tattia pórassa á ira ku konokosa faserepesane soko, maua kakarua makesapo. Arirakano Kotimo somemane motosane, eke a popasane soko, maua kakarua kesapo. ⁵ Maua kima yapura Kotimo faesane hemakapukusakipoko, hepene aporo asia murikimaka tetá rakikia taesane, maua kima taesapo. Tetá toa á auwa petaua maua kima saro nanikose yapiane pirisiti aporomo mareráraka, aporomanomo makata watikisane mafahoasimo wakirusuapo. Arirakano makatane su nōmo yumo somerakanone, someraka kake maiya fahokosapo. Some metakira somehokosapoko asiane somerakanafapo.

⁶ Arirakano farae ape kikia, ape kakarua makata su taesakipoko maiya suamo pirisiti aporo Kotesa Susu ape takua pekeea, yaoa pukua ayíáka Kotimo makata rakirane rakisiapo. ⁷ Asiane ape kakaru tipia pasumo mataisakipoko Namo Kakaro Kotesa Susu ape taku ra, pirisiti aporo su purafapo. Pirisiti aporo fanaraka reane ipi hákasa purapo. Maiya suamo e purafapo. Keremisi hakásamo yape hakásma purapo. Nenakamaka purafapo. E saro nanikose yapi maka pukua Kotiaki kakako purapo. Epo ipi meraruamo hasaka watikiaka rakisiane Kotimo mafahoasimo yapiane kaka, ayíáka aporo hinamo suakipoko soko, yapi hakásma nine karápo.

⁸ Ayíáka yapi kará kepoane yakapare? Ho Kotesamo kepo tarirane oyapo. Aporomanomo watikisane mafahoasimo, Kotiaki saro sipi rukua paikia Kotiaki yapi kará somemane ane yia rekeno, Namo Kakaro Kotesa Susu ape Koti rea, aporo hinamo suane hiakosane ikia kara kakenafapo.

⁹ Farae apea pirisiti aporomo makata rakisia ayíáka, Yasumo makata rakiakosane isiapo hemakapusimo ayíáka murikimaka tarisiapo. Fana Kotimo Moseseyaki someaka masa maiya amo, ipu farae apea makata yaku kasáne soko, saro ponomakau paikia kasáne soko, makata kasá maiya amo aporo hinamomo himu watikiaka hemakapusuane kakaro mafahoanafonorakano yaiya karáka risiapo. ¹⁰ Asiamo makata nená somemaneamo soko, he nená somemaneamo soko, he tapura somemaneamo soko, aporo hinamo koteaka risikiasimo tarirapo. Asiane aporo hinamomo himu hemakapurane maropohoanafonorakano yia, namina somemaneane kekemaraka risiakipoko Kereso pekeea maropohokosa maiya ane fasereperakano kawe someaka masapo.

¹¹ Asiamo yumo Kereso peraka pirisiti aporo fanaraka reamo makata rakisiapo. Hepene yapura Namo Kakaro Kotesa Susu ape Koti rea apea epo rakisiapo. Epo rakisia apeane hauaka wo aporomo kisiasapo. Ape hepene yapura reane namo kakaro karasasamo, hauaka wo farae ape aporomanomo murikimaka kisiane marokesapo. ¹² Hepene yapura farae ape titipia yano motoraka, Namo Kakaro Kotesa Susu ape á Yasuane yorokoa saro ponomakau mano yapi soko, saro nanikose yapi soko maka pusuafapo. Yape hakásma epo ipi yapiane maka pukua isu Kotiyaki yaiya risikiasimo epo ipi yapimo roporaka maresapo.

¹³ Arirakano fana saro nanikose yapi soko, saro ponomakau apinu yapi soko, saro ponomakau matera mano paikia inaka kosane katema koane soko mosapo. Mokoa aporo hinamomo himu watikisane kusuhoasimo iaki yapi wakiruraka, katema ko soko farurusuapo. Farururakano, Kotimo somemane koaretaeraka risia aporomo kaumo watikiraka rakisiane kususapo. ¹⁴ Arirakano fana pirisiti aporomo makata rakiako somemane kekemasa maiya amo, aporomanomo makata watikisane saro ponomakaumo yapimo kusuraka, mafana ane Yasu Keresomo ipi yapimo marokeraka, aporomanomo himu hemakapurane namo kakaro kusuraka mafasapo. Yaiya Rera Ho Kotesamo wakapu aeyaka Yasumo epo ipi kau soko, yapi soko, Kotiaki kasapo. E ipi namo kakaro

† 9:4: Asipa asiane Hipuru meaka yano motoraka mánapo. Isiapo meaka yakapa airapo.

watikihoanafonosasamo, kotesa susuane Kotiaki yaku kasapo. Asiamo isiapo makata watikisane soko, himu watikisa kepoane soko, epo kusuraka mafasapo. Arirakano somemanemo isu tipura ayíáka kesane Yasumo tonotaesapo. Asiasamo isiapo Yaiya Rera Kotipoko isiapo rakisimo epo arareraka mafasapo.

Kotimo aporomanoyaki kawe someaka masane Yasumo yapimo kakaro aoraka someaka masane oyapo.

¹⁵ Kotimo kawe someaka masane tarikia, Yasu ipi tipia reke aporopoko Kotiaki some kaka, arirakano Kotipoko aporoaki some kaka, ayíáka tipia reapo. Arirakano Kotimo fana someaka masa maiya amo, aporomo watikiaka rakirakano asekea, ipoko Yasu kuraka ipu watikisane Yasumo kakaro mafásapo. Asiamo fana soko, yumo soko, aporo hinamoane Kotimo peaerakano, isiapo suamo Kotiane kekemana aporo hinamoaki Kotimo someraka, “Nōmo reaki makata kotesa susu kakakosapo,” aisapo. Asiamo Yasu kusuasamo isu su yaiya risikiakosapo.

¹⁶ Arirakano aporo ipi kusuakipoko, epo makata kemoane ipi aporo iramo parakuraka mokoasimo, e kukusiraka area maiya amo, someaka marapo. Epo someaka masakipoko, kukunafonorakano, makata kemoane haru morafapo. Kurakano asekea, epo makata kemoane moyane siahoasireapo. ¹⁷ E hitafe area maiya amo, epo makata kemoane mokoasimo someaka masane morafapo. E kusuakipoko makata kemoane mokoasimo someaka masane sia hakása nine rakirapo. ¹⁸ Aina ayíáka fana someaka masane kakaro ayiakakosapo, aíyaka tariakosakipoko saro ponomakau rusua kusuapo. Rusua kuraka yapi purakano aseraka, Kotimo somemane motosane, kakaro hemakapukua hakása yineraka rakirapo.

¹⁹ Ayíáka fana aporo hinamo suaki Kotimo somemane motosane, Mosesemo some kasapo. Some kaka faraka, saro ponomakau mano yapi soko, saro nanikose yapi soko, mokoa heyaki sarimasapo. Sarimaraka ira hisopo eyane maka,[‡] saro sipi īti sūsa rasamo taporaka, hea kokomarekea somemane sawia wakirukua, aporo hinamoane soko su wakirusuapo. ²⁰ Wakirukua Mosesemo someraka, “Someaka maraka ayiakakosaposane kakaro ayiakakosapo. Aíyaka hemakapusimo yapimo tarirakano repo aserakanapo. Someaka masane kakimakanie,” aíyaka Mosesemo somesapo. *(Kisim Bek 24:8)*

²¹ Someraka reke, yapi maka, farae ape soko, meraki soko, ape kakarua makata taesa akiyaki su, yapimo wakirusuapo. ²² Asiamo somemane motosa ikia karane makata su kusuhoko yapimo wakirurapo. Aporomanomo makata watikisane mafahoasimo makata kakayia rukua paikia Kotiaki karápo. Yapi punafonorakano aporomanomo makata watikisane Kotimo mafanafapo.

Isiapo watikisane mafahoko Kereso ipi yapi pusuane oyapo.

²³ Fana Kotimo Moseseyaki someaka masa maiya amo, aporomo ipi makata watikisane kusuhoko, makata kakayia rukua Kotiaki karáka yapiane wakirusuapo. Hepene yapura makata ainane murikimaka hauaka wo rakisiapo. Asiamo hauaka aporomo ipi makata watikisane kusuraka, Kotiaki makeraka hiasimo, Yasumo ipi yapiane kasapo. Makata kakayia kasá maiya amo, yapiamo kau kima hákasané kususa nine, Yasumo yapimo namo kakaro himunane soko kusuraka mafanapo. ²⁴ Hauaka wo farae ape aporomo kisia apeane, Namo Kakaro Kotesa Susu ape takua Yasu pusuafapo. Asiamo hauaka wo farae ape kisiane hepene yapura ape Namo Kakaro Kotesane aporomo murikimaka kisiapo. Hepene yapura Namo Kakaro Kotesa apea Yasu hikia aporomanomo makata watikisane mafahoko rakikia masapo. Rakikia maraka, Koti rea makeraka kake isupoko farimaka somerakanapo. ²⁵ Arirakano hauaka wo pirisiti aporo fanaraka reamo keremisi hakása faraka, saro ponomakau rukua, yapiane maka, farae apea Namo Kakaro Kotesa Susu ape takua maka purapo. Yapi maka purane pirisiti aporoamo kakaro ipi yapifapo. Arirakano keremisi hakása meta farakano, efera hunia saro ponomakau rukua yapiane maka, ape kakarua yorokoa purapo. Asiane Yasumo ayíáka rakisiafapo. Yasuane efera hunia kukua,

[‡] 9:19: Iro hisopo eyane kosa masaria wate asiapo.

efera hunia kukua asiafapo. ²⁶ Asia satiki, hauaka wo kepomarekea rakisia maiya amo, ipi hunia soko umisa maka kukua, hunia soko umisa maka kukua ayiakafunureapo. Asiane fahoko makena maiya amo, aporomanomo makata watikisane kakaro mafahoko Yasu kuraka, ayiáka epo ipi yapiane Kotiaki yape hakásá kasapo. Asiamo makata watikisamo wakapuane Yasumo rukumosakatapikia epo marokesapo. ²⁷ Arirakano makata faserepeakosane Kotimo murikimaka maresane oyapo. Aporomanomo yape hakásá kurapo. Aporomanoane kurakano keseke Kotimo takekeu hukurukua parakuhokosapo.

²⁸ Asiamo aporomanomo yape hakásá kura ayiáka, yape hakásá Yasu kusuapo. E kuraka aporomanomo makata watikisane epo maka kusuapo. Arirakano Yasu efera hunia paripeakosapo. Aporomanomo makata watikisane efera hunia mako paripeakosafapo. Yasu perakarihoamo kau risia aporo hinamoane pasimokoako paripeakosapo.

10

“Fana makata yaku kasamo makata watikisane kakaro mafasafapo,” aisane oyapo.

¹ Hiho aseramo amano hikumisi aserane namo kakaroane hiho asera á rekenafapo. Namo kakaroane haku reke, hiho aserane nenakamaka murikimasa ayapo. Aina ayiáka keseke makata kotesa peakosane namo kakaropo. Fana Kotimo somemane motosane nena murikimasa makata ayapo. Keremisi hakásá farakano saro ponomakau rukua paikia Kotiaki kaka, yaiya rukua paikia karakano asia amo aporoane maereketaesafapo. ² Arirakano makata kakayia kasámo aporo namo kakaro maereketaesa satiki makata karáne metakariafunupo. Aporomanomo makata watikisane kakaro mafarakanone ipu himumo makata watikisa hemakapurane hemakapufunufapo.

³ Arirakano ipu makata kakayia akara maiya amo, ipu makata watikisane efera hunia hemakapurapo. Keremisi suamo saro ponomakau rukua paikia karakano asekeea aporoamo ipu makata watikisane hemakapurapo. ⁴ Asiamo saro ponomakau apinu yapimo soko, saro nanikose yapimo soko, makata watikisane kakaro mafanafapo.

⁵ Makata kakayia yapimo makata watikisane kakaro mafahoanafononasamo, Keresoane hauaka wo apera maiya amo epo Kotiaki someraka, “Kotio, saro ponomakau rukua akaráne soko, makata meta yaku akaráne soko, nómō asekeea sesenafapo. Ano apororaka rekeasimo aporomo kauane anoaki kasapo. ⁶ Saro ponomakau maiya paisiane soko, makata watikisapoko mafahoasimo makata yaku kasane soko, nómō sesenafapo.

⁷ Sesehoanafonorakano, fana nómō sawia anoane popahoareapo. Anoane popasasamo Kotio, nómō hemakapusuane nómō rakiako perakayiapo.” Aíyaka Keresomo somesapo. (*Buk Song 40:6-8*)

⁸ Somemane motosa ikia karane Yasumo someraka, “Saro ponomakau rukua yaku akaráne soko, saro ponomakau maiya paikia akaráne soko, aporomanomo makata watikisapoko yaku akaráne soko, suane nómō sesenafapo.” Aíyaka somerakano yia, somemane motosasamo paikia kasapo. ⁹ Arirakano Yasumo efera hunia someraka, “Nómō hemakapusua rakiako ano perakayiapo,” aisapo. Asiamo fana saro ponomakau rukua paikia kakanie, aíyaka somemane motosane Kotimo firakana, akipoko ropoane Keresoane isupoko kukusimo kasane ayapo. ¹⁰ Karakano Yasu Keresomo Kotimo hemakapusuane kekemaraka rakiraka, ipi kau soko, yapi soko, yape hakásá kaka faraka, isiapo makata watikisane namo kakaro mafasapo. Mafaraka isuane maereketaesapo.

“Kereso ipi kau soko ipi yapi soko kasa amo aporomanomo makata watikisane sia mafasapo,” aisane oyapo.

¹¹ Sere suamo pirisiti aporo suamo rakiraka, pipu saro ponomakau rukua paikia kaka, arirakano rau efera hunia saro ponomakau rukua paikia karapo. Karakano yia makata kakayia amo aporomanomo makata watikisane kakaro mafanafapo. ¹² Arirakano aporomanomo makata watikisapoko Yasuane yape hakásamo kukua, ipi kau soko, yapi soko kasapo. Asiamo ipi makata kaka faraka, ipi hikia Kotimo hokono tumuru takua kakenapo.

¹³ Kake ipi yunuane Kotimo hurutapiasimo ipi kau kakenapo. ¹⁴ Yape hakásamo Yasumo

ipi kauane yaku kasakipoko, aporomanomo makata watikisane mafaraka, yaiya koteaka susu risikiasimo maereketaesapo.

¹⁵ Maereketaesane isiaipo hemakapusimo, Ho Kotesamo soko isuaki kakaro tarikia some kasapo. ¹⁶ Ho Kotesamo fana some kasane oyapo.

Unihae Kotimo someraka, “Nōmo aporo hinamoaki nōmo kawe someaka makosane oyapo. Nōmo somemaneane ipu hemakapusimo i himua keakosapo. Somemaneane i himua kekeia ipu hemakapukua kekemarakka seseraka risikiakosapo.”

Aíyaka Kotimo somerakano Kotimo sawia popahoareapo. *(Jeremaia 31:33)*

¹⁷ Asiamo Unihae Kotimo some meta soko some kasane oyapo.
“Ipu fana makata watikiaka rakisiane nōmo efera hunia hemakapukusafapo.” Aíyaka Kotimo somerakano popahoareapo. *(Jeremaia 31:34)*

¹⁸ Asiamo aporomanomo makata watikisane Kotimo kakaro mafasasamo efera hunia makata kakayia rukua paikia Kotiaki kayane siahoasifareapo.

“Keresomo isu mafasisasamo Koti rea makeraka hiane siahoasireapo,” aisane oyapo.

¹⁹ Keresoa paosa aporo maeo, Yasu kuraka isiaipo makata watikisane mafasasamo, Namo Kakaro Kotesa Susu ape Koti rea á isu namonafaraka mapiraraka hiane siahoasireapo.* ²⁰ Arirakano fana farae ape kisia maiya amo, pasu waremaresamo Namo Kakaro Kotesa Susu ape takua mataisapo. Mataisekeno, Koti rea apea aporomanoane hirafapo. Yasu kusua maiya yiamo pasu waremaresane Kotimo makoaka taesapo. Makoaka taesasamo Koti rea aporomanoane hirapo. Asiamo Yasu kusuasamo Koti rea hiakosakipoko, yaiya rera ikia karane Yasumo tarisiapo. ²¹ Arirakano Yasu kusuane maturikia taerakano, turikia pukua epo Kotimo aporo hinamoane asekea reke, pirisiti aporo fanaraka reke, Koti rea makeraka makata rakirapo.

²² Asiasamo isu Koti rea makeraka pekeia, makata watikisa tipia risikianafonorakano, Koti masesehoasimo koteaka risike, eaki kakaro himu hakásaraka hemakapukua risike Kotiaki somehoko perapo. Isiaipo makata watikiaka rakisia yaiya hemakapuraka risirane Yasumo yapimo kusuraka mafasapo. Arirakano isiaipo kauane he sirisamo kusuna ayíáka, isiaipo ainane soko Yasumo yapimo kususapo. Kusuraka ayíáka risike Kotiaki somehoko perapo. ²³ Arirakano fana isiaipo Kotiaki himu hakásaraka hemakapusua ayíáka yaiya Kotiaki himu hakásaraka hemakapukua risikinapo. Kotimo ayiakakosaposane ayiakakosapo. Asiamo Kotimo isu arareraka makotehokosaposane, isiaipo kaikia himu hakásaraka hemakapukua paroaka risikinapo. ²⁴ Arirakano Kotimo isu araresasamo isiaipo isina yiamo metamo metane arare, metamo metane arare, ayíáka risike, isina su yiamo ayíáka himu tumutumo hemakapukua risike kotehokosapo. ²⁵ Arirakano nōmo kaiyiane repo Kotiaki kekerehoko sarimana amo Keresoa paosa aporo hinamo metakira sarimahoko perakanafapakae. Asiamo peanafonona aporoamo ayianane kekemahokopo. Kotiaki kekerehoko sarimanane metakariakopo. Sarimana maiya amo isiaipo isina meta arareraka, ipi himumo Kotiaki paroaka hemakapusimo, some kaka ararehoanie. Unihae peakosa maiya makeanamo, metamo koteaka rakisimo namo kakaro ararehoanie.

“Kotimo hokosa Yasuane metakarikia patera tariakopo,” aisane oyapo.

²⁶ Kotimo kakaro someane isuaki some karakano, isiaipo kakimaka yia, someane metakarikia mafasira aporo Yasuane metakarikia, eaki patera tarirakano, efera hunia eaki risikiako parihoasimo makata meta kakakosane kakenafapo. ²⁷ Aporo hinamomo kakimaka yia, keseke koaretaeraka Kotiaki yunuraka risikino, kára fanasihokosane kakenapo. Anapaka namohoanie. Kotimo someane koaretaeraka yunuraka risia aporo hinamoane ira rufi káramo paiyakosapo.

²⁸ Kotimo somemaneane Mosesemo some kasane aporo hakásá metamo koaretaeraka watikiaka rakirakano, aporo tetamo soko metao, aporo isiamo soko metao,

* 10:19: Kotimo kakaro apeane hepene yapura rekenapo. Farae ape hákasa nine takuane, Namo Kakaro Kotesa Susu takuane Koti á rekenapo, aíyaka yapake somerapo.

aporoamo watikisane ipu asesasamo hukurukua somerakano watikiaka rakisia aporoane kamenakahoanafonoraka eane rusua kusuapo. ²⁹ Arirakano Mosesemo some kasane koaretaesa aporoane rusua kurakanone, Kotimo hokosa Yasumo some kasane aporomo koaretaeraka eaki patera tarirakano, aporoane Kotimo kamenakahokosare? Wae. Eane kakaro kára fanasihokosapo. Aporoamo hemakapuraka, Yasumo yapiane nenakamaka makata reapo, aýaka hemakapura aporoane kotimo hukurukusapo. Asiamo Yasumo yapimo Kotimo aporoyaki kawe someaka masane maparosapo. Arirakano aporoane Ho Kotesamo e araresane mainamarerakano, aporoane fanasihokosane kárahokosapo.

³⁰ Asiamo Kotimo someraka, “Makata watikisakipoko ropoane nōmo kakakosapo. Makata watikisane nōmo roporaka fanasihoko motoakosapo,” aisapo. Aisasamo isi-apo hemakapuane epo namo kakaro ropo fanasinane kakakosapo, aýaka hemakapu-rakanapo. Kotimo. efera hunia someraka, “Unihae ipia paosa aporo hinamomo someane kaikia hukurukua takekeaa parakuhokosapo,” aisapo. *(Lo 32:35-36; Buk Song 135:14)*

³¹ Asiamo aporomo watikisakipoko Kotimo hukurukua fanasihokosane namo kakaro karahokosapo. Anapaka namoraka risikianie.

“Repo kakimaka paroaka risikianie,” aisane oyapo.

³² Re fana risia maiyane hemakapunie. Maiya amo Kotimo someane repo kakimaka, Kotimo faesane hemakapusuakipoko, reaki makata umisa kára fasereperakano, repo Yasuane metakarisafapo. ³³ Arirakano aporo suamo asekeasimo, reane Keresomo yunu aporomo kakama mainamareraka mokoatikisapo. Arirakano aporo metakira soko mokoatikirakano repo ararehoko hemakapukua re pukua hakāsa risiapo. Hakāsa risikino re suane mokoatikisapo. ³⁴ Arirakano Keresoa paosa aporo metakira tipura kesane, repo kamenakaraka hemakapusuapo. Arirakano repo makata kemoane aporo metakiramo hakimokoa farakano, repo mahisihoanafonoraka seseaka risiapo. Asiamo repo hemakapuraka, “Aporomo hauaka kara wo isiapo makata kemoane mokoatikirakano, Kotimo hepene yapura isupoko makata kemo taesane yaiya tokoakosapo. kotimo makata kakakosaposane fahokosafapo,” aýaka repo paroaka hemakapusuapo. ³⁵ Ayíáka hemakapusuane yumo metakariakopo. Yaiya himu hakásaraka hemakapukua risikino Kotimo makata ropo kotesa kára kakakosapo. ³⁶ Kotimo hemakapusua rakiakosane soko, epo reaki ayiakakosaposa mokoakosane soko, himu hakásaraka hemakapurane hemakapukua rosaka taehoanie. ³⁷ Asiamo Yasu kereso paripeakosane Kotimo sawia popasane oyapo. Kotimo someraka, “Maiya wakasema nina, e paripeakosaposane, yoenaafaraka kakaro foaka paripeakosapo. ³⁸ Asiamo aporo hinamomo anoaki himu hakásaraka hemakapukua risiane i anoyaki yaiya risikiakosapo. Arirakano aporo hinamo anoaki himu hakásaraka hemakapurane metakarikia fimiti paripurakano, iane nōmo sese-hokosafapo,” aisapo. *(Habakuk 2:3-4)*

³⁹ Arirakano fimiti paripura aporo hinamoane isufapo. Fimiti paripura aporoane marutaehokosapo. Arirakano isiapo Kotiaki himu hakásaraka hemakapurakano epo isu mafasiakosapo.

11

Kotiaki himu hakásaraka hemakapura kepoane oyapo.

¹ Kotiaki himu hakásaraka hemakapura kepoane oyapo. Kotimo kakakosaposane mokoakosakipoko kau risike himumo hemakapuraka, “Epo kakakosapo, aisasamo epo namo kakaro kakakosapo.” Aýaka hemakapukua risikinone, Kotiaki himu hakásaraka hemakapukua risikinapo. Makata ayiakakosapo, aisane himo asekeanafonorakano yia, kakaro rekenareapo, aýaka hemakapurakanone, Kotiaki himu hakásaraka hemakapu-rakanapo. ² Arirakano wate fana aporo hinamomo Kotiaki himu hakásaraka risikino, iaki Kotimo someraka, “Anoaki himu hakásaraka hemakapukua arisiane kotehoareapo,” aisapo. ³ Arirakano makata fana kakaro risikianafonosane Kotimo somehoramo

faserepeperaka risiapo. Asiamo wate fana makata su fasane Kotimo somehoramo hauakane soko, tiane soko makata suane faserepepesapo. Makata ane isiapo aseraka hemakapuraka, "Makata su fasane Kotimo ayíáka makata su mafaserepepehoareapo," ayíáka himu hakásaraka hemakapurakanapo.

Aepo reane oyapo.

⁴ Arirakano Aepomo Kotiaki himu hakásaraka hemakapusuasamo Kotimo somesane kakimaka kekemaraka Kotiaki makata yaku kasapo. Arirakano Kenemo Kotimo somesane kairaka kaikia, ipi himumo koteaka hemakapunafonoraka ayíáka Kotiaki makata yaku kasapo. Ayíáka kasane Kotimo sesesafapo. Arirakano Aepomo Kotiaki himu hakásaraka hemakapuraka makata yaku karakano, Kotimo asekea sesesapo. Kotimo seseraka someraka, "Nómo koteaka hemakapukua rakisiasamo ne aporo ereketaesapo." Aíyaka someraka makata yaku kasane Kotimo masapo. Arirakano Aepo ipi kusuapo. Ipi kusuakipoko epo himu hakásaraka hemakapusua ayíáka, isiapo soko ayíáka hemakapusimo, isuaki tarirakanapo.

Inoke reane oyapo.

⁵ Arirakano Inokemo Kotiaki himu hakásaraka hemakapukua reasasamo e kusuafapo. Kotimo e karikia hisiapo. Karikia hisiakipoko aporomo e kope pusuapo. Kope pusuane asesafapo. E karikia hiasiraka reamo, "Kotimo eane sesesapo," aíyaka Kotimo sawia popahoareapo. (Stat 5:24)

⁶ Asiamo repo Kotiaki himu hakásaraka hemakapunafonorakano Kotimo sesenafapo. Re Koti rea makeraka peraka úyaka hemakapunie. "Kotiane kakaro rekenapo. Eaki kurikurirakano, epo kairaka ano makotehokosapo." Aíyaka Kotiaki himu hakásaraka hemakapukua kurikurihoanie.

Noa reane oyapo.

⁷ Arirakano Kotimo Noaki ayiakakosapo aíyaka someraka, yao peakosapo aisane, Noamo asekeanafonosa nine, epo Kotimo someane kakimaka, Kotiaki himu hakásaraka hemakapukua reke, kasu tokohoareapo. Ipi hinamo soko, ipi hokosa soko mafasiakosakipoko, kasu tokohoareapo. Kasu tokorakano hauaka aporo hinamo metakiramo Kotimo someane kakimakanafonoraka risiane, Kotimo fanasinane kayereapo. Noamo himu hakásaraka hemakapusuakipoko Kotimo eaki, "Ne aporo ereketaesapo." Aíyaka Kotimo ipi ereketae ainane eaki kayereapo.

Eparahame reane oyapo.

⁸ Arirakano Eparahamemo Kotiaki himu hakásaraka hemakapukua reke Kotimo eaki someraka, "Hauaka one metakarikia, hauaka meta nōmo neaki tarirakano, ne hauaka á punie. Ne rekeakosa hauaka ane nōmo neaki kakakosapo." Airakano kakimaka e pureapo. Pusuane hauaka kumukua á e pureapo. ⁹ Eparahamemo Kotiaki himu hakásaraka reke, hauaka kakakosaposa á reke, hauaka wafaya area ayíáka reafareapo. Aporo kimisi area ayíáka farae ape kikia reareapo. Aisake soko, Yakope soko, i suane farae apea risiareapo. Kotimo tetáki soko, hauaka ane kakakosapo, aihoareapo.

¹⁰ Kotimo hauaka kakakosapo aisa hauaka á reke, hauaka ane epo kakaro kitimaka reafareapo. Arirakano epo hemakapusuane hepene yapura Kotimo murikimaka, ape kisia á hiakosakipoko hemakapukua reke, hauaka wo farae apea reke himumo hisiraka reafareapo.

Saramo Kotiaki himu hakásaraka hemakapukua kayane oyapo.

¹¹ Arirakano Saramo Kotiaki himu hakásaraka hemakapukua kake, e sakora kaya maiya amo uminafaraka, e sisimaraka kayamo hokosa umisapakae. Ipi hemakapuraka, "Kotimo ayiakakosaposane epo rakiane siahosireapo. Epo ayiakakosapo aisasamo kakaro ayiakakosapo," aíyaka hemakpureapo. ¹² Arirakano Eparahame sisimaraka reke, epo aporo ira suamo makasa kaua kekemapo, aihoasimo kukusa maiya ane makeraka rea maiya amo, hokosa hokono marerakano hokosa amo

wainepe puraka, ti makata mukisa ayíáka mukiraka wainareapo. Hauaka sakipu he tawara fea mukisa ayíáka, aporo hinamo mukiraka wainareapo.

¹³ Ipu Kotiaki himu hakásaraka hemakapusuane metakarisafareapo. Metakarira-faraka kusua maiya amo soko, ipu Kotiaki yaiya himu hakásaraka hemakapureapo. Kotimo ayiakakosapo, aisane ipu haru mokoanafonoraka risike, yameno aeyaka makata asera ayíáka, aseke asekeka risiareapo. Ipu someraka, “Hauaka one isiapo kakaro hauakafapo. Hauaka wo isu kimisi arisia ayíáka risikinapo. Aporo metamo hauaka ayíáka isu fore meta risikinapo.” ¹⁴ Aíyaka aporoamo hauaka meta hepene yapura risikiako hiakosakipoko hemakapukua somehoareapo. ¹⁵ Ipu, “Hauaka metakarisiane isiapo hauakapo,” aisafareapo. Aisa satiki, hauaka á poparipufunureapo. ¹⁶ Asiane hauaka meta haku kakaro kotesa hepene yapura risikiako hiakosakipoko hemakapuraka risiareapo. Ipu Kotiaki himu hakásaraka hemakapuraka someraka, “Isiapo Kotiane nepo.” Aisasamo Kotimo hauaka aporoyaki sarimahoko ipi karekesafareapo. Eyaki i su risikiasimo hepene yapura Kotimo ape kisiapo.

¹⁷ Arirakano Eparahamemo Kotiaki himu hakásaraka hemakapuraka rekeno aseke, kakaro himu hakásaraka hemakapurakanare? Aíyaka Kotimo Eparahameane kau aseakosakipoko, “Aisake rukua paikia anoaki kakanie,” aihoareapo. Airakano aseke Eparahamemo himu hakásaraka hemakapukua reasasamo Aisakeane Kotiaki kayereapo. ¹⁸ Arirakano fana Kotimo someraka, “Aisakemo hokosa amo hokosa, amo hokosa ayíáka, nómó ní aporo ira wainakosapo,” aihoareapo. Airakano yia, Eparahamemo Aisakeane Kotiaki kakako, rukusakipoko eke kima motokoa, ipi hokosa hakása nine kasapo. ¹⁹ Kasa yiamo epo hemakapuraka, “Aporo kusua maturikia taehokosane Kotimo ipi siapo,” aíyaka hemakapureapo. Arirakano isiapo Yu aporomo yapakeraka someraka, “Eparahamemo ipi hokosa rusua kusuane Kotimo maturikia taeraka, Eparahameaki eféra hunia kasapo.” Aíyaka isiapo yapakeraka somerakanapo.

Aisake soko Yakope soko Yosefe soko ipu suamo Kotiaki himu hakásaraka hemakapukua risiane oyapo.

²⁰ Arirakano Aisakemo Kotiaki himu hakásaraka hemakapusua aeyaka ipi hokosa Yakopeaki soko, Isoaki soko, keseke tetā koteaka risikiasimo makotena someane someaka kayereapo. ²¹ Arirakano Yakopemo Kotiaki himu hakásaraka reke, e akura maiya amo, Yosefemo hokosa makotehoasimo makotena someane someaka kayereapo. Ipi tatiā maka hauaka maporaka arupekea aseke reke, ayíáka Kotiaki kekerehoareapo. ²² Arirakano Yosefemo Kotiaki himu hakásaraka hemakapukua reke ipi kukusa maiyane makeraka, amo someraka, “Keseke Isiraya aporomo Iyipi hauaka metakariakosapo. Metakarikia apura maiya amo, ano kikíane maka punie,” aihoareapo.

Mosesemo Kotiaki himu hakásaraka hemakapukua reane oyapo.

²³ Arirakano Moses takapesa maiya amo, Iyipi unihae Feromo somemane motoraka, “Aporo hokosa takaperakano su rukua fahoanie,” aíyaka somerakano, Mosesemo ipi wafayape kaíyia tetapō somemaneane koaretaesa akipoko tetā namohoafareapo. Tetapō Kotiaki himu hakásaraka hemakapusua aeyaka, ere maiya isiamo hokosa ane faremar-ereapo.

²⁴ Arirakano Moses káraraka sisimaraka reke, Kotiaki himu hakásaraka hemakapusua aeyaka someraka, “Ano kakaro Feromo farayamo hokosafapo. Ano Iyipi aporoane metakarikia, Isiraya aporoyaki paohokosapo,” aíyaka hemakapuraka paohoareapo. ²⁵ Asiamo epo hemakapuraka, “Kotimo aporo hinamoane Iyipi aporomo mokoatiki-rakano ano soko, iyaki hakása mokoatikihoane siahoasireapo. Ano Iyipi hauaka reke Kotiane metakarikia watikiaka hemakapukua enanane seseraka, ayíáka rerane maiya wakasema nina keseke fahokosapo. Ayíáka rekeakosane ano hisiripo. ²⁶ Keresopoko* mokoatikihoane soko siahokosapo. Aporo hinamo arareraka rakirane fanāpo. Arirakano

* ^{11:26:} Fana aporomo Mosesane mokoatikisa ayíáka, keseke Keresoane soko ayíáka mokoatikihokosapo, aíyaka Mosesemo hemakpureapo.

Iyipi hauaka mone soko, makata kau rakirane soko, enanane soko, makatane kesekepo. Kotimo rakirane rakirakano, keseke Kotimo makata ropo anoaki kakakosapo,” aíyaka hemakapureapo.

²⁷ Mosesemo Kotiaki himu hakásaraka hemakapukua Iyipi hauaka metakarikia pureapo. Iyipi unihae Feromo saperakano Mosesemo namohoafareapo. Kotiane aporomo himo aserafapo. Asiane Mosesemo Kotiaki himu hakásaraka hemakapukua reasasamo, Kotiane himo asera ayíáka asereapo. Ayíáka asesasamo epo Kotiaki himu hakásaraka hemakapukua paroaka reareapo. ²⁸ Mosesemo Kotiaki himu hakásaraka hemakapusua aeyaka, Isiraya aporoaki someraka, “Repo hokosa hepene aporomo rurapaka, repo Ape Farimareakosakipoko ape tapa saro sipi yapi maka paiyinie. Pairakano Hepene Aporomo Isiraya hokosa fanāne rusua kukusafapo.” Aíyaka Mosesemo somehoareapo.

Isiraya aporo fana risiamo Kotiaki himu hakásaraka hemakapukua risiane oyapo.

²⁹ Arirakano Isiraya aporomo, Kotiaki himu hakásaraka hemakapusua aeyaka, He Retea pauraka, he kikisi akaraka kikisi roraka tipia hauaka parosa faserehenakano yaoraka pureapo. Purakano Iyipi aporo kekemarape pesane he yaohoane he nekea kukua kereapo. ³⁰ Arirakano Isiraya aporomo Kotiaki himu hakásaraka hemakapusua aeyaka, yape yatipinusumo Yariko taonea ekemo rurusa kepoa hahaeraka purakano, ekemo rurusane hurupepehoareapo.

³¹ Arirakano Réhape fana aporo rea pura hinamoamo Kotiaki himu hakásaraka hemakapukua kake, Isiraya aporomo Yariko taoneane suti aseako pesane hinamoamo araresakipoko, Yariko taoneane ekemo rurusa hurupepesa sereamo e ruafareapo. Koarentaena aporo hinamoane kukua kerakano eane kuafareapo.

³² Arirakano aporo meta soko nōmo somehokosare? Kítione soko, Péreke soko, Sámesone soko, Yáfata soko, Téfete soko, Sámio soko, porofete aporo metakira soko, iane nōmo someraka rekeako ayiane maiya fahokosapo. ³³ Aporo metakiramo Kotiaki himu hakásaraka hemakapusua aeyaka i uyáka risiapo. I risike hauaka kára wo aporoaki weraka marokehoareapo. Marokeraka ereketaeraka unihaeaka asekea risiareapo. Kotimo ayiakakosaposane moyereapo. Arirakano aporo meta saro raeoneyaki hakásä rekeno raeone akaiane mapirikia risiareapo. ³⁴ Arirakano aporo metakiramo ira kára paisiane kopakataehoareapo. Arirakano aporo metakiramo yunu weraka rokopamo i kareakohoamo teketarireapo. Arirakano metakira roraraka risiane mawakapuhoareapo. Arirakano metakira yunu weako pukua marokeraka yunu aporoane teketarikia pureapo. ³⁵ Arirakano hinamomo Kotiaki himu hakásaraka hemakapusuasamo ipi hokosa kusuane maturikia taerakano efera hunia mayereapo.

Arirakano aporo metakira tipura risiamo Koti metakirakanone yunu aporomo i tonotaehokosapo aihoareapo. Aisane metakarikia, Kotiaki hemakapusuasamo tonotae-hokosane hisiraka hemakapuraka, “Isu tipura kesa kusuane, maturikia taerakano hepene yapura Kotiyaki koteaka risikiako seseripo.” Aíyaka hemakapukua tipura risiane yunu aporomo iane mokoatikirakano, i kureapo. ³⁶ Arirakano aporo metakiramo Kotiaki himu hakásaraka hemakapusuasamo, yunu aporomo iaki mainamarekea rureapo. Arirakano aporo metakira senemo taporaka tipura kereapo. ³⁷ Arirakano aporo metakira ekemo karesa kureapo. Arirakano aporo metakira ferepemo rukua rakurikiraka kureapo. Arirakano aporo metakira ferepemo mawi pateke taerakano kureapo. Arirakano aporo metakiramo saro sipi kau soko nanikose kau soko mokoa osoraka makata forokoa risikino aporomo i mokoatikiraka rureapo. ³⁸ Rurakano aporo metakira nena yaoa hauaka porasakipoko pukua, ūria soko, hikia kunikia soko, kutua soko, waka risireapo. Ayíáka risike, i kakaro aporo kotesasamo hauaka wo aporo risia akiyaki hakásä risikiane siahoasifareapo.

³⁹ Ayíáka ipu suamo Kotiaki himu hakásaraka hemakapukua risikino, Kotimo iaki, “Re kotehoareapo,” aihoareapo. Aisa nine Kotimo ayiakakosapo aisane i hauaka wo risia maiya amo mosafareapo. ⁴⁰ Marirakano mokoanafonosare? Kotimo iane hemakapuraka,

isuane soko, hemakapukua, isupoko soko Kotimo makata kakaro kotesane maresapo. Fana ipu Kotiaki himu hakásaraka hemakapukua risia nine, iaki makata kakaro kotesane fana kayefareapo. Maiya hakása yiamo Kotimo i soko isu soko isina su sarimaraka makotehokosapo.

12

“Isu fofoana ayíáka isu forakanapo,” aisane oyapo.

¹ Aporo yakai amo Kotiaki himu hakásaraka hemakapura ikia karane isuaki tarirakano isiaipo hemakapurakanapo. Ayíáka hemakapuraka aporo foaka pukusakipoko, aku umisa hatapesane horomaka motokoa, arirakano pasu horopo ososane soko horomaka motokoa, oforaka foaka apura ayíáka, makata umisane soko, makata watikisamo isu masane soko mamakateraka, isu oforaka máka naohoko wakapuraka hemakapukua purakanapo.

² Isu puraka himo Yasuane asekea apura ayíáka purakanapo. Puraka himu hakásaraka hemakapura kepoane Yasu ipipo. Ira tanehekea káraraka wate perapo. Aina ayíáka isiaipo Kotiaki himu hakásaraka hemakapurane káraraka risikiasimo Yasumo ipi makoteraka asekea rekenapo. Arirakano Yasumo ipi hemakapuraka, “Keseke ano seseaka rekeakosapo.” Ipi aíyaka hemakapuraka ira matopesa ipi kukusane namosafapo. Ira matopesa paremarekea kusua maiya amo kaiyanane ipi hemakapusuafapo. Kusua maturikia taerakano, hepene yapura hikia Kotimo hokono tumuru takua kakenapo.

Atamo ipi hokosa maroponane oyapo.

³ Yasuane hemakapunie. Aporo watikisamo yunuraka risike Yasuaki mainamareraka hokomaka mokoatikirakano, Yasumo ipi ikia kara kotesane metakirifaraka, Kotiaki yaiya himu hakásaraka hemakapukua reapo. Asia ayíáka aporomo reane mokoatikirakano repo Yasumo ainane hemakapukua risikino, re wakapuaka risikiakosapo.

⁴ Makata watikisane rukupatehokosakipoko Yasuane kuraka yapi pusuapo. Asiane repo makata watikisane rukupatehokosakipoko, re kuraka yapi pusuafapo. Asiamo re wakapuaka risikiakosakipoko Yasuane hemakapunie. ⁵ Arirakano Kotimo re himu paroaka risikiasimo reaki someraka, “Reane nōmo hokosapo.” Aisane repo merarusare? Kotimo reane maroporaka ipi ereketae ainane tariraka someraka, “Nōmo hokosao, unihaemo ne ereketaeraka rekeasimo maroporakano maroposane nenakamaka maroposapo, aíyaka hemakapukopo. Maroposane asekepayahokopo. Unihaemo né ereketaeraka rekeasimo maroporakano himu hisihokopo.” ⁶ Asiamo Kotimo kára hemakapusua aporo hinamoaki ipu ereketaeraka hemakapusimo Kotimo iane maroponapo. Arirakano aporo hinamo metakiraki epo someraka, ‘Reane nōmo hokosapo.’ Aíyaka maroporaka rurapo,” aíyaka Kotimo somesapo. *(Sindaun 3:11, 12)*

⁷ Asiamo makata umisa fasereperakano asekea repo someraka, “Ano ereketaeraka rekeasimo Kotimo ano maropoane.” Aíyaka someraka Kotiaki himu hakásaraka hemakapurane kakaro rosaka taehoanie. Atamo ipi hokosa ereketaeraka rekeasimo maropona ayíáka, Kotimo re ipi hokosasamo ereketaeraka risikiasimo maroporakanapo. Hokosa meta ipi atamo maropohoanafonona rekenare? Wae. Rekenafapo. Hokosa su maroponapo. ⁸ Hokosaki hokotakekea some karaka kakimakasimo maroponapo. Hokosa su ereketaeraka risikiasimo maroporaka, né hákasa metakarikia maropohoanafonorakano, ane né ipi hokosafapo. Né ikia oto hokosapo. ⁹ Isiaipo hauaka wo atamo isu ereketaeraka risikiasimo maroporakano, ataki hemakapusuane metakirirafapo. Metakarianafonorakano atamo yano motosa makáraraka hemakapurapo. Arirakano isiaipo Ata hepene yapura reamo isu maroporakano, eane makáraraka hemakapunie. Hemakapuraka isu eyaki yaiya risikiakosapo.

¹⁰ Arirakano maiya wakasemamo hauaka wo atamo ipi hemakapusua aeyaka isu maroponapo. Maroporaka hokosamo watikiaka rakirakano maiya metakiramo atamo saperaka maroponapo. Maiya metakiramo asekepayanapo. Aina ayíáka Kotimo anafapo. Watikiaka rakirakano asekea maiya suamo maroponapo. Isu ereketaeraka risikiasimo

Koti ipi watikihoanafonoraka koteaka susu area ayíáka isiapo watikisane kikisiraka koteaka susu risikiasimo epo isu maroponapo. ¹¹ Maropona maiya yiamo makata umisa karakano isiapo hemakapuraka, “Makata umisane kárapo.” Aíyaka mahisiraka hemakapurapo. “Makata umisane kotesapo.” Aíyaka hemakapurafapo. Asiamo keseke maroporaka farakano maroporaka tarisiane enomaka risike isu ereketae auaraka risikiakosapo.

¹² Asiamo Kotiaki himu paroaka hemakapunie. Re foforaka pukua máka nao-hokosakipoko wakapuane faraka roraraka risikinapo. Asiamo re hokino yofesane soko, kakuna hamisisisane soko, mawakapuhoanie. ¹³ Korakemo koteaka puko ikia kara ereketaesa á punie. Re ereketae puraka aporo hinamo metakiramo soko re apurane asekea kekemarape pukusapo. Kekemarape puraka, aporo hinamo metakira korake matipusa nine, re apurane asekea i soko ereketae puraka, wakapuane maka, etehoanafonoraka, ereketae pukusapo.

“Paroaka risikianie,” aisane oyapo.

¹⁴ Aporo hinamo suaki tau auaraka risikianie. Tau auaraka risikiakosakipoko rakinie. Makata watikisane kikisiraka koteaka susu risikiako hemakapukua rakinie. Makata watikisane kikisiraka koteaka susu risikianafonona aporo hinamoamo Unihae Kotiane aseakosafapo. ¹⁵ Repo namina yia aporo hinamo metamo Kotimo yaku ararenane metakariakohoamo e ararehoanie. Arirakano kasoko hakasamo aporo yakai hi fauraka mokoatikinapo. Aina ayíáka aporo hakása meta watikiaka reamo aporo su kirimaraka watikiraka risirapaka asekeanie.

¹⁶ Arirakano hinamo hakimara aporo arisia ayíáka risikiakopo. Kotiane metakarikia aporo watikiaka arisia ayíáka risikiakopo. Arirakano Isomo Kotiane metakarikia reapo. Isoane Aisakemo ipi aporo hokosa fanasasamo, ipi wafaya akura maiya amo wafayamo makata kemoane mokoa, ipi wafayamo finihaoa rekeafunupo. Rekeafunusa nine ipi mamanea keseckemo makata nená pairakano asekea someraka, “Makata nakosane ano makasie. Makata kemoane su nómo mokoa, atamo finihaoa ne rekeanie,” ai-hoareapo. Aíyaka epo nenakamaka makata ane hemakapuraka Kotimo e makote-hokosakipoko somesane epo metakarisareapo. Metakarisia ayíáka, repo makata watikisa hakása meta kekemaraka rakiakosakipoko Kotiane metakariakopo. ¹⁷ Keseke Isomo ipi wafayamo makoteraka ayiakakosapo aíyaka somesane epo metakarisia nine efera hunia fimakosakipoko hemakapusquareapo. Asiane epo fimayafareapo. Kotimo e makotehokosakipoko murikimasane Isomo metakarisasamo efera hunia makosakipoko ipi hiripuyaki reareapo. Asiane epo kakaro himu hakásaraka hemakapunafonosasamo Kotimo makotehokosakipoko somesane eaki kasafareapo.

“Fana Kotimo Moseseyaki someaka masane hakureapo. Kawe yumo Yasuyaki someaka masane hakureapo,” aisane oyapo.

¹⁸ Isiraya aporo fana risiane ūri Sainae Koti rea makeraka peraka makata himo asekea, senakimo soko kaikia, i namoraka risiareapo. Arirakano re Koti rea makeraka hinaka, re namoraka risikiakosafapo. Arirakano fana aporoane ūri Sainae makeraka peraka, ūria ira rufi soko, kakaro katosa soko asereapo. Aseraka risiane kikirirakano soko kaikia, atifo perakano soko asekea, i kakaro namoraka risiareapo.

¹⁹⁻²⁰ Pikoro rurakarakano soko, Kotimo merakano soko, ipu kaiyireapo. Kaiyiáne Kotimo someraka, “Ūria aporo hinakano e kukusimo ekemo kareanie. Saro ponomakau soko, saro sipi soko ūria hinakano kukusimo ekemo kareanie,” aihoareapo. Airakano i namoraka risike Moseseki someraka, “Meane isiapo efera hunia kaiyiáne siahoasifareapo.” ²¹ Aíyaka i namoraka risikino Mosesemo soko someraka, “Ano soko hamisisiraka namoraka rekenapo,” aihoareapo.

²² Arirakano re maiya yumo risike, Kotimo Yasuyaki kawe someaka masasamo, Kotiane re makeraka hiakosane namoraka risikiakosafapo. Asiamo Yasumo makata rakisia

ayaka ūri Saeone* á re hinaka risikinapo. Hepene yapura yaiya rera Kotiane rekenapo. Hepene yapura Kotimo siti Yarusarame sitia hepene aporo hokono u yakai sarimaraka arisia á re hinaka risikinapo. ²³ Re hinaka, fana Kotimo kakimara aporo hinamo sarimaraka i suane Kotimo hokosa fanapo. I yano motosane hepene yapura sawia popasa i sarimaraka risikino, á re soko hinaka risikinapo. Koti rea á re hinaka risikinapo. Kotimo ipi aporo hinamo su takekea parakunapo. Arirakano aporo hinamo fana ereketaeraka risiane kurakano i hoane Kotimo makoteraka maereketaesane i soko risikino, á re hinaka risikinapo. ²⁴ Arirakano Yasu rea a soko re hinaka risikinapo. Kotimo aporo hinamo mafasiakosakipoko kawe someaka masane Yasumo tarirakanapo. Aporo hinamomo makata watikisane mafahoko Yasumo ipi yapi kasapo. Ipi yapiane Aepomo yapi asiafapo. Yasumo yapiamo ikia kara kotesane tarirakanapo.

²⁵ Tarirakano Kotimo some kotesane kakipayaraka koaretaehokopo. Hauaka wo fana Mosesemo some karakano, koaretaesa aporoane Kotimo i mafasisiafareapo. Asiamo hepene yapunaka Yasu pekea some karakano isiapo koaretaerakanu isu mafasiakosare? Wae, mafasiakosafapo. ²⁶ Fana Isiraya aporo uri Sainae makeraka risikino, Kotimo some aeyaka hauaka wo momani pesapo. Arirakano yumo epo someraka, “Keseke maiya hakása yiamo hauaka wo soko, ti yapura soko, momani kára nōmo kakakosapo,” aisapo. ²⁷ Kotimo someamo kepoane oyapo. Keseke momani kára perakano, Kotimo makata su epo rakisiane mahohoraka su hurupeperaka fahokosapo. Arirakano makata metakira yaiya risikiakosa murikimasane hurupepehokosafapo.

²⁸ Kotimo isu unihaeaka asekea rekenapo. Momani kára perakano isu Kotimo aporo hinamoane hurupepehokosafapo. Asiamo isiapo Kotiaki kára suserakanapo. Kotimo isu ararerakanu isiapo suseraka epoko maseseraka rakiraka ayíáka, Koti makáraraka kekereraka risikinapo. Kotimo wakapuanne isiapo hemakapuraka namoraka risikinapo.

²⁹ Asiamo makata su ira rufi káramo inakakoana ayíáka, Koti ipiane ira rufi asiapo.

13

“Kotiane masesehoasimo uyáka risikianie,” aisane oyapo.

¹ Ní Keresoa paosa aporo hinamo namina yiamo namina nine himu tumurumo hemakapukua hakása hakásaraka hemakapukua risikianie. ² Arirakano aporo kimisi perakano pasimaka ararehoanie. Nōmo someamo kepoane oyapo. Fana aporo metakiramo aporo kimisi perakano araresane hepene aporopo. Ipu hepene aporoane meraruamo arareraka ipu apea karikia pusuapo. ³ Arirakano Keresoa paosa aporo hinamo tipura kesane* hemakapukua ararehoanie. Nōmo hemakapuraka, iyaki ano soko hakása tipura rekenapo, aíyaka hemaka apura ayíáka hemakapukua ararehoanie. Arirakano aporo metakira kaua rukua mokoatikirakano asekea, iane soko hemakapukua ararehoanie. Né soko aporosasamo kau hakása nine reke ipu umisane hemakapusireapo.

⁴ Aporomo hinamo arumaka rerane kotesapo. Titi yia metamo metane mawakasema-hoane siahosifareapo. Aporomo hinamo meta hemakapukua hakimakopo. Arirakano hinamomo soko aporo metayaki mokome pukupo. Aporomo hinamo hakimarakano aporoane Kotimo fanasihokosapo. Arirakano hinamo aporo metayaki mokome purakano hinamoane Kotimo fanasihokosapo. ⁵ Arirakano nōmo mone tokeno moneane himu tumurumo hemakapukua ayíáka rekeakopo. Neane monemo kirimanapaka asekeanie. Mone sakepamo mokoakosakipoko, aíyaka hemakapukupo. Ní menane asekea someraka, “Nōmo ní menane sia tokeno ano siaraka rekenapo,” aihoanie. Asiamo Kotimo someraka “Neane nōmo asekea rekeakosapo. Maiya suamo nōmo asekea rekeakosapo. Ne nōmo namo kakaro metakariakosafapo,” airapo. ⁶ Aisasamo isiapo namonafaraka mapiraraka someraka, “Unihae Kotimo ano ararerakanapo. Ararenasamo ano namohokosafapo. Kotimo ano sia asekea rekeno aporomo anoaki mayíáka mokoatikhokosare?” airapo.

* 12:22: Hauaka wo Yarusarame sitiane ūri Saeone á kisiapo. Asiane yapake someraka isu Koti rea makeraka hinaka hepene yapura ūri Saeone á soko Yarusarame siti á soko isu hinakanapo, aíyaka yapake somesapo. * 13:3: Aporo tipura kesa amo watikiaka rakisiafapo. Yasuaki hákasa patera asesasamo i tipura kesapo.

⁷ Arirakano fana aporo metakiramo Kotimo someane reaki some kaka reane asekea risiapo. I risia maiya amo ipu Keresomo ainane kekemarape pukua, i kusua maiya amo rakikia rosaka taesapo. Ipu ainane repo hemakapukua meraruhokopo. Ipu Kotiaki himu hakásaraka hemakapusua ayíáka, repo soko Kotiaki himu hakásaraka hemakapukua kekemahoanie. ⁸ Arirakano fana Yasu Kereso rea ayíáka, pipu soko yaiya hakása yineraka rekenapo. Pipu e area ayíáka keseke soko maiya suamo hakása yineraka ayíáka rekeakosapo. Haku hakuraka rekenafapo.

⁹ Arirakano aporo metakiramo reaki some meta haku kotafe some kakakosapo. Makata hasaka kotafe someane repo kekemahoasimo reaki some kakakosapo. Kotafe someane kaikia kakimakopo. Hasaka someane kaikia kekemarakanone re ikia kara hasaka pukusapo. Aporo metakiramo hasaka someraka úyaka somerapo. Koti masesehoko makata nakosa nanie, makata nakosa sokoaihoanie, aíyaka somerapo. Aporomanomo makata nena somemané motosa amo iane ararenafapo. Asiane Kotimo yaku ararena amo isuane mawakapunapo. ¹⁰ Fana aporo hinamomo makata watikisane mafahoasimo, farae apea pirisiti aporomo saro sipi rukua paikia Kotiaki kasapo. Arirakano isiapo makata watikisane mafahoasimo, Yasu ira matopesa kusuapo. Arirakano eke kima saro sipi paisia ayíáka, Yasu ira matopesa kusua ayapo. Asiane aporo metamo eke kima saro sipi yaiya paikia karakanone, ane Yasu ira matopesa kusua amo ararehokosafapo.

¹¹ Yu aporo pirisiti aporo fanaraka risiamo aporo hinamomo makata watikisakipoko saro ponomakau rukua yapi maka, farae ape Namo Kakaro Kotesa Susu ape kakarua yapiane maka pukua Kotiaki karápo. Saro ponomakau maíyane ape ruru yao takua paisiane iramo inakakonapo. ¹² Asia ayíáka Yarusarame siti ruru yao takua Yasuane aporo hinamomo makata umisane epo maka e rusua kusuapo. Ipi yapimo aporo hinamo makoteraka, watikisane makikisiraka risikiasimo kusuapo. ¹³ Yasuane ape ruru yao takua kusuapo.[†] E mainamareraka mokoatikisa ayíáka isu soko ayíáka mokoatikhokosapo. ¹⁴ Arirakano hauaka wo isiapo kakaro apeane rekenafapo. Arirakano keseke hepene yapura isiapo kakaro ape á risikiakosane isiapo hemakapurakanapo.

¹⁵ Isiapo Yasuaki kataka marekea risiakipoko maiya suamo Kotiaki kekerenapo. Isiapo Kotiaki kekererane makata yaku akara ayíáka karakanapo. Isiapo akaimo e yano motosa makáraraka eaki kekererakanapo. ¹⁶ Arirakano koteaka rakiraka, nómenane parakuraka, aporo meta arareraka karáne meraruhokopo. Yaku karáne Kotimo aseraka ipi sesenapo.

¹⁷ Keresoa paosa asekea risia aporoamo reaki some karakano kakimaka kekemahoanie. Repo koteaka hemakapukua risikiasimo ipu asekea risikinapo. Ipu rakisiane koteaka rakisiarihoamo Kotimo iaki kaiyakosapo. Ipu seseraka rakisimo koteaka kakimaka risikianie. Koteaka risikianafonorakano, umisane ipu moraka i himu mahisiraka risikino, repo soko umisane mokoakosapo.

¹⁸ Arirakano isupoko kurikuriraka risikianie. Isu himura tau someraka, “Re siaraka risikinapo.” Aíyaka isu siaraka risikirakano kairakanapo. Asiamo isiapo makata koteaka rakiako hemakapurakaripo. ¹⁹ Re arisia ano foaka peasimo repo kurikurihoanie. Aíyaka kakaro himu hakásaraka kurikurihoasimo hemakapurakaripo.

Isiapo repoko kurikurisane oyapo.

²⁰ Kotimo kawe someaka masane yaiya rekeakosapo. Aíyaka someaka masane motokoa marekea, Yasumo ipu yapiane kasapo. Yasu kurakano asekea Kotimo e maturikia taesapo. Asiamo saro sipi asekea rekeakosa wafaya kárane Yasu ipipo. Ayíáka rakisimo Kotimo eane maresapo. Asiamo tau rera kepoane soko Koti ipipo.

²¹ Repoko Kotiaki nōmo kurikuriraka, “Kotio, Nōmo hemakapusuane aporoamo siaraka rakisimo nōmo aina kotesane soko makata su kotesane iaki siaraka kakanie. Isiapo Yasu Keresoaki kataka marekea risikino, nōmo sesehoasimo rakirane isu himua

[†] 13:13: Mosesemo somemaneane Yasu kusua amo masiasapo. Yasu ape yao takua pusua ayíáka, isiapo Mosesemo somemaneane metakarikia Yasuaki kekerenapo.

mareanie. Yumo soko, keseke soko, maiya suamo Yasu ipi yano motosa makárarakanapo. Kakaroripo, yiyo," aíyaka nōmo kurikurisapo.

Ayapasane oyapo.

²² Keresoa paosa aporo maeo, repo Kotiaki himu hakásaraka wakapuraka hemakapusimo some one nōmo poparakanapo. Popasane hisiraka kaiyakopo. Seseraka kaiyinie. Nōmo sawi popasa one wakasemasekeno kakimakanie. ²³ Timotiane soko repo hemakapusimo nōmo poparakanapo. Isiapo Keresoa paosa aporo mae Timotiane tipura makesa tonotaesapo. Tonotaerakano ano area wo e foaka perakanone, re risia ano peraka, e soko anoyaki hakāsa peakosapo. ²⁴ Re asekeea risia aporoaki ayaparakanapo. Kotimo aporo hinamo suaki ayaparakanapo. Itari hauaka aeyaka Keresoa paosa aporo pesa amo soko reaki ayaparakanapo. ²⁵ Kotimo re hemakapukua ararehoasimo hemakapurakaripo, kakaroripo.

Yamese

Yamese sawi one mahemakapukusa someane oyapo.

Maria Yosefe tetapō hokosa yakai hokono murisiapo. Hokosa meta yano motosa Yamesepo. Yamese amo sawi one popasapo. Yamese sawi popasa one Yasumo aporo hakāsa purafapo.

Yasu hepene yapura hisiakipoko, Keresoa paosa aporo hinamo Yarusarame sitia risiane Yamesemo asekea reapo. Keresoa paosa aporoane Rome kamanimo mokoatik-isasamo i yakai tekatarikia pusuapo. I tekatarikia puraka, koteaka risikiasimo Yamesemo sawi one popasapo.

Yasu hepene yapura hisiakipoko keremisi 20 su faraka Yamesemo sawi one popasapo. Yamese sawia some kepo parakuraka popasane oyapo.

1:1-18 Makata umisa fasere aperamo Kotiaki hemakapukua paroaka risikianie.

1:19-27 Kotimo someane kairaka hákasa kaiyiane siahoasifareapo. Kaikia hokonomo soko makata rakinie.

2:1-13 Nómó himo asekea aporo meta makama fanaraka, aporo meta makama kesekeraka ayiáka hemakapuane siahoasifareapo.

2:14-26 Nómó Kotiaki hemakapukua, aporomano meta ararehoanie.

3:1-18 Nómó ní akaimo somerane koteaka asekea rekeanie.

4:1-5:6 Hauaka wo kaumo makata rakirane hemakapukua kekemahokopo.

5:7-20 Kereso aporo hinamomo hemakapusimo some metakira one some karakanapo.

Yamesemo sawi poparaka makesane oyapo.

¹ Kotipe Unihae Yasu Kereso tetapō aporo raipane anopo. Ano Yamesemo sawi one poparaka makerakanapo. Re Yu aporo ira kenosua Keresoa paosa aporo hinamo risiaki nómó sawi one poparaka makerakanapo. Ape sumu kekepo aeyaka re rukua koaka taerakano tekatarikia, hauaka kekepoa pukua risikino asekea, reaki nómó sawi one poparaka makerakanapo.

Yasuaki kakaro himu hakásaraka hemakapurane oyapo.

² Keresoa paosa aporo maeo, re kaua makata umisa kekepo fasereperakano seseaka risikianie. ³ Re kau aseakosakipoko makata umisa fasereperapo. Fasereperaka repo Yasuaki himu hakásaraka hemakapusuane tipia metakarirakarihoamo fasereperapo. Fasereperakano metakarirafaraka makata umisamo repo Yasuaki himu hakásaraka hemakapusuane mawakapuhokosapo. Ayiáka Yasuaki himu hakásaraka hemakapukua risike rosaka taehokosapo.

⁴ Hokosa tokopukua, arirakano hase kakipuraka, arirakano sinima kanukuniraka aina ayiáka, ayiakakohoamo re su siaraka risikiakosakipoko Yasuaki himu hakásaraka hemakapusuane tipia patekenakopo. Hemakapusuane rosaka taehoanie.

⁵ Makata umisa fasereperakano, re aporo metamo makata rakiakosane mahimeteraka reke, Kotiaki himu hakásaraka hemakapukua kurikurihoanie. Aporo metamo koteaka takekeea hemakapurane makasimo Kotiaki kurikurirakano, Kotimo kaikia eaki kakakosapo. Kotimo ipi aporo hinamo suaki seseraka makata yaku siaraka karápo.

⁶ Asiamo nómó Kotiaki kurikuriraka, “Anoaki koteaka takekeea hemakapurane makasie.” Aihora maiya amo himu hakásaraka hemakapukua kurikurihoanie. Himu tetáraka hemakapukua kurikurihokopo. ⁷ Himu tetáraka hemakapukua kurikurina aporoane he kupa asiapo. He kupa taku aeyaka soko pekea, arirakano taku aeyaka soko pekea arumaraka mayayaona ayiáka, aporo himu tetáraka risike kurikurinane anapo. ⁸ Ayiáka aporo himu tetáraka kurikuriraka reke hemakapuraka, “Kotimo kakakosapo. Arirakano Kotimo kakakosafapo.” Ayiáka himu tetáraka risike kurikurirakano Kotimo kakakosafapo.

Makata kemo kára kayane soko, makata kemo forosane soko, somesane oyapo.

⁹ Keresoa paosa aporo né makata forokoa reane Kotimo makárarakano seseaka rekeanie. ¹⁰ Arirakano Keresoa paosa aporo né makata kemo kára kayane, Kotimo mawakasemarakano seseaka rekeanie. Ira wate pesane kakripekea fa ana ayíáka, aporomo makata kemoane kara hemakapukua reane kuraka fahokosapo. ¹¹ Ira wateane maíyamo rukua hisiraka sisipuraka yoferaka kakripeperaka torenapo. Aina ayíáka makata kemo kára hemakapukua rea aporoamo ipi pisinisi rakiraka reane e kukusapo.

Kotimo isuane makoteraka rakirapo. Isiapo makata watikiaka rakisimo Kotimo isuane mokopipinafapo, aisane oyapo.

¹² Makata umisa fasereaperā maiya amo, Kotiane metakarianafonoraka, paroaka rea aporoane seseaka rekeakosapo. Epo Kotiaki himu hakásaraka hemakapukua rekeno, aporoane kau aseakosakipoko makata rakirane siarakano, yaiya rera makata ropoane Kotimo eaki kakakosapo. Asiamo Kotimo someraka, “Aporomo anoaki himu tumurumo hemakapukua rekeno, yaiya rera kakakosaposane nōmo kakaro kakakosapo,” aisapo.

¹³ Arirakano aporomo watikiaka rakiakosakipoko epo ipi yiamo kirimaraka hemakapurapo. Kirimaraka watikiaka hemakapukua rakikia faraka, epo someraka, “Watikiaka hemakapukua rakisimo Kotimo anoaki mokopipisapo.” Aihokopo. Asiamo Kotimo watikiaka rakisimo metamo kirimahoasifareapo. Arirakano aporomo watikiaka rakisimo Kotimo mokopipiraka kirimanafapo. Kotimo ipi anafapo.

¹⁴ Asiane aporomo ipi yiamo watikiaka rakiakosakipoko seseaka hemakapusua yiamo kirimanapo. ¹⁵ Kirimaraka makata watikisa seseaka hemakapusua aeyaka epo watikiaka rakirapo. Watikiaka rakiraka, watikisane káranapo. Watikisa kárarakano aporoane kuraka Kotiyaki yaiya rekeakosafapo.

¹⁶ Maeo, aporomo watikiaka rakisimo kirimana kepoane Kotifapo. Repo ayíáka hemakapukupo. Metamo someraka, “Aporomo watikiaka rakisimo Kotimo kirimanapo.” Aíyaka kotafe somerakano, repo kakimakopo. ¹⁷ Kotimo ipi makata kotesa susu karápo. Makata kotesa susu kasane soko, makata yaku siaraka kasane soko, hepene yapunaka Kotimo karápo. Arirakano sere maiya soko, ere maiya soko, ti makata soko, rakisia wafayamo ipi yiamo makata kotesa susuane karápo. Asiamo faesamo kepoane Koti ipipo. Mituru maiya aperamo hoane horoponapo. Maiya tipiamo ho kinakenapo. Kinakeraka nina, maiya tuakeramo efera hunia hoane horoponapo. Ho horoporakano, efera hunia kinakerakano, aina ayíáka Koti ipi anafapo. Maiya suamo Kotimo ipi ainane sanasinafapo.

¹⁸ Kotimo ipi hemakapusua aeyaka, isuaki someraka, “Nōmo kakaro someane repo kakimasasamo, reane nōmo nī hokosapo,” aisapo. Asiamo Kotimo kakaro someamo isiapo hoane makawenapo. Asiamo hauaka wo Kotimo makata su rakisiane, epo some kakimara aporo hinamo fanaraka risiane isupo.

“Kotimo some kaisia hakása nine kekemarakaka rakinie,” aisane oyapo.

¹⁹ Hameo, makata one hemakapunie. Aporo metamo somerakano, repo suamo koteaka kaiyinie. Arirakano wate foaka somerafaraka, koteaka hemakapukua somehoanie. Foaka sapehokopo. ²⁰ Aporo metamo saperaka rekeno Kotimo ereketae susu ainane rakiraka rekenafapo. ²¹ Asiamo makata watikisa aina suane metakarinie. Kotimo ipi someane repo himua makata mano ayíáka poterakanapo. Re mafasiakosakipoko makata mano poterakanano hauaka kotesa ayíáka, repo himumo koteaka hemakapukua Kotimo someane kakimakanie. Kakimarakanano Kotimo reane mafasiakosapo.

²² Kotimo someane kairaka kaikia hokonomo soko hakása yineraka kekemarakaka rakinie. Kairaka hákasa kaikia rekeakopo. Repo someraka, “Isiapo Kotimo someane kairapo.” Aíyaka somesa nine, Kotimo someane kekemarakaka rakianafonorakanone, repo namina yia kotafe hokoa rukua somerakanapo. ²³⁻²⁴ Aporomo hihoa ipi hikumisi asekeea, hihoane metakarikia puraka, ipi hikumisi asesane merarunapo. Meraruna ayíáka aporomo Kotimo someane kaisia fasikiraka meraruraka rakirafapo.

²⁵ Arirakano Keresoa paosa aporo himua Kotimo somemane ane Ho Kotesamo karápo. Somemane amo aporoane maumimarerafapo. Asiamo somemaneane aporomo keke-maraka hemakapukua reke merarunafaraka, kakaro kakimaka rakirakano, aporoane Kotimo makotehokosapo. Makoterakano aporoane seseaka rekeakosapo.

²⁶ Arirakano aporo metamo someraka, “Ano Kereso aporopo.” Aíyaka somesa nine epo ipi akaiane koteaka asekea rerafapo. Koteaka asekea rerafaraka, ipi akaimo iriraraka someraka soko metao, saperaka someraka soko metao, kotafe someraka soko metao, meta hokomaka someraka soko metao, ayíáka reke, “Ano Kereso aporopo.” Airakanone aporoamo ipi yia kotafe hokoa rukua somerakanapo. Ipi Koti kekemaraka rakirapo, aisa nine, akai susuamo somesasamo, Kotiaki hemakapurane kusua area ayíáka rekenapo.

²⁷ Arirakano Kotimo ipi hemakapukua someraka, “Aporomo ano kakaro kekemaraka reke, ipi uyáka rakiraka rekeakosapo. Karaiya hokosa soko metao, hinamo yaro makata meta forokoa tokeno soko metao, epo arareraka rakiakosapo. Arirakano hauaka wo makata watikisamo kirimaraka paripukuhoamo makata watikisane koaraka pukusapo. Aporomo ayíáka reke rakirakanone, Kotimo ereketae ainane kekemarakanapo.” Aíyaka isiapo Ata Kotimo hemakapukua somesapo.

2

“Aporo makata kemo kára toane makama fanaraka, arirakano aporo meta makata kemo forokoa reane makama kesekeraka ayiane siahoasifareapo.” Aisane oyapo.

¹ Keresoa paosa aporo maeo, Unihae Yasu Keresoane ipi wakapu kára faesayaki hepene yapura rekenapo. Asiamo repo eaki himu hakásaraka hemakapukua risike, aporo meta makata kemo kára toane makama fanaraka, aporo meta makata forosane patera tarikia, ayiakakopo.

² Repo Kotiaki kekerehokosakipoko kurikuri apea sarimarakano, aporo tetá peraka, meta kau rakikia pasu kakaro kotesa osoraka pekea, arirakano aporo meta pasu pitikini osoraka perapo. ³ Perakano aporo pasu kotesa ososaki seseaka someraka, “Né sea kakaro kotesa á kayae,” airapo. Arirakano aporo pasu pitikini ososaki someraka, “Né á reae.” Airaka soko metao, “Nōmo sea makeraka né asukurua kayae.” ⁴ Aíyaka somerakanone, re namina sarimasa yia aporo meta makama fanaraka, aporo meta makama kesekeraka, ayíáka hemakapurakanapo. Re makata hukurura kepo kaira aporo pariraka, repo aporoane parakurakanapo. Asiane repo koteaka parakurakanafapo. Mokome watikiaka parakurakanapo.

⁵ Maeo, kaisie. Aporo makata forokoa risiamo Kotiaki himu hakásaraka hemakapusuane paroaka risikiasimo, Kotimo murikimarapo. Murikimaka someraka, “Re nōmo hokosasamo, repo himu tumurumo anoaki hemakapurakano, reane nōmo unihaeaka asekea rekeakosapo.” Aíyaka Kotimo aporo makata forokoa risiaki somerapo.

⁶ Kotimo aíyaka somerakanano repo kaikia yia repo koaretaeraka, aporo makata forokoa risiane mawakasemarakanaapo. Aporo makata forokoa risiane repo mawakasemasa nine, aporo makata kemo kara toamo reane mawakasemanapo. Ipu reaki makata umisa karaka, reane hukurusimo hukurura kepo kaira aporo rea á karikia purapo. ⁷ Re Kereso yano motosa yakosane, makata kemo kara toa aporomo reane mainamarerakanapo. Aina aporoane repo makama fanarakanaapo.

⁸ Arirakano Unihae Kotimo somemane motosane Kotimo sawia poparaka, “Né níane himu tumurumo hemaka apura ayíáka, nōmo ní aporo tákeane ayíáka himu tumurumo hemakapunie.” Aíyaka popasane kakimaka rakiraka risikinone, re koteaka risikiakosapo. (Wok Pris 19:18)

⁹ Asiane repo himu asekea takekea hemakapuraka, aporo meta makama fanaraka, aporo meta makama kesekeraka, repo ainakanone, repo Kotimo somemane motosane koaretaerakanapo. Koaretaeraka risike, re watikiaka risikiakosapo.

¹⁰ Kotimo somemane motosa suane aporomo kakimara tiki kakimasa nineo, Kotimo somemane hakása meta koaretaerakanone, ane Kotimo somemane suane koaretaerakanapo. ¹¹ Arirakano Kotimo somemane motoraka someraka, "Hinamo hakimakopo." Aíyaka someaka yia Koti hákasa yiamo someraka, "Aporo kukusimo rukupo." Aíyaka somemane motosapo. *(Kisim Bek 20:13-14; Lo 5:17-18)*

Somemane motosane koaretaeraka repo aporo meta kukusimo rurakanone, repo Kotimo somemane motosane koaretaerakanapo. Hinamo hakimakanafonosa nine aporo kukusimo rurakanone, repo Kotimo somemane suane koaretaerakanapo.

¹² Makata watikisamo reane tipura kesa arisia ayíáka risiapo. Asiane Yasumo wakapumo reane tipura kesa arisia ayíáka risiane, tonotaesapo. Tonotaerakano Ho Kotesamo Kotimo somemaneane re himua murisia risikinapo. Asiamo somemane ane repo kaikia kekemahoanie. Keseke hukuarura maiya amo Ho Kotesamo somemaneane repo kaikia kekemasarihoamo Kotimo kaiyakosapo.

¹³ Asiamo repo aporo metane kamenakahoanafonarakano Kotimo fanasihoko ayianamo reane kamenakahokosafapo. Arirakano aporo metane repo kamenakaraka ararerakano reane soko Kotimo kamenakahokosapo. Ayiakakosasamo hukuarura maiya amo re namohokosafapo.

Kotiaki himu hakásaraka hemakapupe pukusakipoko rakirane oyapo.

¹⁴ Keresoa paosa aporo maeo. Aporo metamo someraka, "Nómo Kotiaki himu hakásaraka hemakapurakanapo." Aíyaka hemakapuraka tiki hemakapurakao, asiane aporoamo aporo metane koteaka arareraka rakianafonoranone, e siaraka rekenare? Wae. E siaraka rekenafapo. Epo hemakapurane Kotimo aseraka eane mafasiakosafapo.

¹⁵ Arirakano Keresoa paosa aporo mae soko metao, Keresoa paosa papā soko metao, pasu faraka inuraka reke, makata nakosa soko faraka meamoraka rekeno, nómo asekea ¹⁶ eaki someraka, "Né koteaka rekeasimo hemakapurakaripo. Né inuraka reane soko meamoraka reane soko fahoasimo hemakapurakaripo." Aíyaka someraka yia aporo metane arareraka pasu soko makata nakosa soko kakanafonora, nenakamaka akai susumo somerakanone, siahosifareapo. ¹⁷ Kotiaki himu hakásaraka hemakapukua reke, aporo meta ararehoanafonoranone, nómo Kotiaki himu hakásaraka hemakapurane akura ayíáka kurakayiapo.

¹⁸ Arirakano arareraka rakianafonona aporoamo someraka, "Nómo Kotiaki himu hakásaraka hemakapukua rekenapo. Arirakano aporo metamo makata koteaka arareraka arakire." Airakano aporoaki úyaka somehoanie. Aporo metamo Kotiaki himu hakásaraka hemakapurane nómo asekeasimo, epo koteaka arareraka rakirane asesie. Arirakano nómo koteaka rakirane fasekenone nómo Kotiaki himu hakásaraka hemakapurane aporo metamo mayíáka aseakosare?

¹⁹ Nómo ní hemakapukua someraka, "Koti hákasa ipipo. Koti meta rekenafapo." Airakane kakarorakae. Satanemo soko yatafumo soko someraka, "Koti hákasa ipipo. Koti meta rekenafapo." Aíyaka someraka ane ipu kakaroripo, airapo. Asiane ipu Kotiaki namoraka hamisisiraka risikinapo. ²⁰ Asiamo nómo akai susuamo somerakanone aporo masuasa area ayíáka rekenapo. Nómo Kotiaki himu hakásaraka hemakapurane hákasa reke, arirakano makata koteaka rakianafonoranone, nómo himu hakásaraka hemakapurane nenakamaka makata asiapo.

²¹ Arirakano nómo Kotiaki himu hakásaraka hemakapurane soko, hokonomo arareraka rakirane soko, hakása yineraka rakiakosakipoko hemakapuraka, Eparahame ane hemakapunie. Isiapo makasa kaua kekema Eparahamemo ipi hokosa Kotiaki rukukakakosakipoko, eke rakisia eke kima yapura hokosane motorakano, Kotimo asekea Eparahameaki someraka, "Né aporo ereketaerareapo," aihoareapo.

²² Asiamo Eparahamemo Kotiaki himu hakásaraka hemakapurane soko, hokonomo makata rakirane soko hakása yineraka rakiraka reareapo. Ayíáka rakiraka reasasamo Kotiaki himu hakásaraka hemakapusuane rosaka taerareapo. Tipia metakarisafareapo.

²³ Arirakano Kotimo sawia popasane oyapo. "Kotimo someane Eparahamemo kakimaka,

Kotiaki himu hakásaraka hemakapusuasamo Kotimo someraka, ‘Aporo ereketaesane nepo,’ aihoareapo.” Aisane Kotimo sawia popahoareapo. Arirakano Kotimo Epara-hameaki someraka, “Nōmo tākeane nepo.” Aíyaka somesane Kotimo sawia popahoareapo.

(Stat)

15:6)

²⁴ Kotipoko rakianafonoraka himu hakásaraka hemakapura hákasane Kotimo asekea someraka, “Ne aporo ereketaerareapo,” airafapo. Arirakano Kotiaki himu hakásaraka hemakapurane soko, hokonomo rakirane soko sarimaraka rakirakano, ane Kotimo asekea someraka, “Ne aporo ereketaerareapo,” airapo. ²⁵ Arirakano hinamo Réhape soko hemakapunie. Réhape ipi aporoyaki mokome pura hinamopo. Asiane Yu aporo tetá suti pesane Réhapemo faremarekea teta tati apea poparipusimo ikia kara meta tarisiapo. Tariraka epo Kotimo aporo suti pesane arareraka, ikia kara tarisiasamo makata araresane Kotimo asekea someraka, “Né hinamo ereketaerareapo,” aihoareapo.

²⁶ Asiamo aporo kusuane soko hemakapunie. Amano kaua hoyaki sarimaraka reke hitafe rerapo. Hoane puraka kauane kurapo. Aina ayíáka aporomo Kotiaki himu hakásaraka hemakapurane hákasa hemakapukua reke, arirakano aporo meta arareraka makata rakirane rakianafonorakanone ane, aporoamo ipi Kotiaki himu hakásaraka hemakapurane akura ayíáka kurakayiapo.

3

“Nōmo ní akaiane koteaka asekea rekeanie,” aisane oyapo.

¹ Keresoa paosa aporo maeo, aporo metamo someraka, “Tisamo rakirane nōmo rakiako seseripo.” Aíyaka repo aporo yakaimo somehokopo. Isu tisa aporoane Kotimo aseraka hukuarura maiya amo isiaipo makata hasaka tarisiane aseraka isuaki kára hukurukusapo.

² Isiaipo suamo efera hunia soko, efera hunia soko, hasaka rakirapo. Arirakano aporomo hasaka somehoanafonorakano, aporoane ipi namo kakaro koteaka rekenapo. Ipi akaimo hasaka somehoanafonoraka rekeno, e kaua makata meta hasaka-hokosafapo. ³ Isiaipo hemakapusuane saro hosemo kekemahoasimo, saro hosemo akaia waya wakasema motorapo. Waya hokono tumuru takua kirakano, saro hoseane hokono tumuru takua purapo. Isiaipo hemakapusua takua saro hose á purapo. Saro hosemo ipi hemakapusua takua purafapo.

⁴ Arirakano kasu sipi soko hemakapunie. Kasu sipiane kárapo. Arirakano atifo ane soko kárapo. Asiane maropona ira waeane wakasemapo. Ira wae wakasema ane, aporomo maka kasu sipiane táriraka maroporakano, aporomo hemakapusua aeyaka kasu sipiane purapo. ⁵ Aina ayíáka isiaipo akaimo makata somera ayapo. Akai wakasema yiamo makata someraka kára rupiaka somerapo. Arirakano tāmo hákasa tonomaka karekea ape kára tosokohoane, ape kára suane inaka fanapo.

⁶ Tāmo hákasa asiane isiaipo akai ayapo. Makata watikisa suane isu akaia rekenapo. Akaimo isu hokono soko isu korake soko isu himu soko mokoatikinapo. Sapa pakimaka pekeira ira meta tosokohoane inaka amara ayíáka heao hauaka anaka ira rufiamo akaia tosokohoane inakamarapo. Amano ipi hokosa rea maiya amo soko, hokosa raua rea maiya amo soko, hinamo apia rea maiya amo soko, aporo sisima rea maiya amo soko, ira inaka amara ayíáka akaimo watikiaka someraka rerapo.

⁷ Arirakano makata kakaya yaoa risiane, saro soko, mena soko, kuyare soko, pokoa soko, makata suane su mauahoane sianapo. Mauaraka aporomo karirapo. ⁸ Kariraka yia ipi akaiane karirakanafapo. Akai ane watikiaka yia rerapo. Saro rúrua makesa mapiriane forosaka aka, forosaka roraka potoro koraka area ayíáka, amanomo akaiane ayíáka rekenapo. Hesekemo amano kaua nenaka, hesekemo yapiane amano kaua karápo. Aina ayíáka hesekemo yapi asiane amanomo akai ayapo.

⁹ Arirakano akaimo Ata Kotiaki kekereraka somerapo. Akai hakása yiamo, aporo tākeaki soko yakasa ho marekea ekeneraka somerapo. Kotimo e ipi ayíáka rakisia aporoaki yakasa ho marekea ekeneraka somerapo. ¹⁰ Akai hakása yiamo Kotiane

kekereraka, arirakano aporo metaki yakasa ho marekea ekeneraka somerapo. Keresoa paosa aporo maeo, repo aíyaka somerane kakaro watikisapo. Aíyaka somehokopo.

¹¹ Arirakano he kafa he sirisa kotesa yaki he kukurupisayaki suasuaraka kerafapo.
¹² Arirakano ira fokemo ira kapaku wate perafapo. Sako karepemo ira foke wate perafapo. He tawara numua kifiri nenakahoanafonona he pekea rekenafapo. Asiamo akaimo Kotiane kekereraka someraka yia, akai hakásá yiamo aporo metaki yakasa ho marekea ekeneraka somehoane siahoasifareapo.

Himumo koteaka hemakapurane Kotimo karáne oyapo.

¹³ Repo namina yia aporo hakásá metamo makata kotesa soko, makata watikisa soko, takekea hemakapuraka rekenare? Ayíáka takekea hemakapuraka rekenone, aporoane ipi koteaka rekeakosapo. Epo ipiane makarahoanafonorakano, aporo metakiramo asekea someraka, “Epo makata kotesane takekea hemaka apure.” Aíyaka somehokosapo.
¹⁴ Arirakano nómo himo aporo meta aseraka, epo makata kemo káraserkeno asekea, eaki kakanakeraka hemakapukua arirakano né níane hákasa makama fanaraka hemakapukua, ayíáka hemaka apura maiya amo, nómo someraka, “Nómo koteaka takekea hemakapurakanapo.” Aíyaka nómo kotafe someamo nómo ní himumo hemakapusuane marakoraka somehokopo. ¹⁵ Kakanakeraka hemakapurane soko, né ní makama fanaraka hemakapurane soko, Kotimo hepene yapunaka karáfapo. Asiamo watikiaka hemakapura amo kepoane oyapo. Hauaka wo makata amo soko, kaum hemakapusua makata amo soko, Satanemo ipi soko, aporomanomo watikiaka hemakapukua rakisimo kirimanapo.

¹⁶ Asiamo aporomo ipi kakanakehoko hemakapukua, arirakano e ipiane makama fanahoko hemakapukua, ayíáka rekenone, aporoamo someamo fana aporo hinamo himu hakásaraka koteaka risiane, parakuraka mokokekohokosapo. Asiamo aporoamo watikiaka somerakano, makata watikisa suane faserepehokosapo.

¹⁷ Arirakano Kotimo koteaka takekea hemakapurane hepene yapunaka Kotimo karáne oyapo. Fanane koteaka ereketae susu hemakapura ayapo. Arirakano metane, aporo metakiraki himu hakásaraka hemakapura ayapo. Arirakano metane, aporo metakiraki tau auaraka rera ayapo. Arirakano metane, aporo metamo somerakano epo someane kaira ayapo. Arirakano metane, aporo meta kamenakana ayapo. Arirakano metane, aporo metakira koteaka risikiasimo ararena ayapo. Arirakano metane, aporo meta makama fanaraka aporo meta makama kesekeraka ayíáka hemakapunafonona ayapo. Arirakano metane, himu tetáraka hemakapunafonoraka rakira ayapo.

¹⁸ Arirakano aporo hinamo tau auaraka himu hakásaraka hemakapukua risirane, makata mano potesa asiapo. Makata mano potesane keseke káraraka, wate kotesa apera ayíáka, aporo hinamoane koteaka susu ayíáka risikiakosapo.

“Aporomo hauaka wo makataki tákeraka reke, Kotiaki yunuraka rekenapo.” Aisane oyapo.

¹ Repo saperaka tafatafanane soko, werane soko, kepoane manaka fasereperare? Aporomo soko metao, hinamomo soko metao, himo asekea mokoaripi, aíyaka hemakapukua, arirakano makata kemo kára mokoaripi aíyaka hemakapukua, arirakano makata nakosa soko kára naripi, aíyaka nómo ní yiamo himu hemakapuramo, néane kirimaraka sapena amo tafatafaraka werane fasereperapo.

² Hinamo soko metao, mone soko metao, aporo metamo makatane nómo asekea seseraka makatane makosakipoko wafayane rusua kurapo. Metamo makatane aseraka mokoaripi aíyaka hemakapukua reke, mayane siahoasifasekeno saperaka tafatafaraka werapo. Asiane repo makata fesenosane mokoakosakipoko kurikurirakanafapo. ³ Asiane

maiya metakiramo repo makata mokoako kurikurisa nine morakanafapo. Mokoanafonosane mariraka mokoanafonosare? Né niane makárahokosakipoko hemakapukua kurikurisasamo mokoanafonorakayiapo. Nómó ní ereketae hemakapunafonoraka, makata mokoakosane hasaka hemakapukua, nómó ní kaumó hemakapusuane makáraraka kurikurirakano mokoanafonorakayiapo.

⁴ Repo Kotiane makama fanaraka hemakapunafonoraka risiane, re aporo rea pura hinamō asiapo. “Hauaka wo makataki tákeraka reke, Kotiaki yunuraka rekenapo.” Aisane repo hemakapurakanafare? Nómó ní yiamo hauaka wo makataki tákeraka reke, nómó ní yiamo Kotiaki yunuraka rekenapo. ⁵ Kotimo sawia popasane nenakamaka popasafapo. Isiapo hemakapusimo popasapo. Popasane oyapo. “Kotimo Ho Kotesa pusierakano pekea isiapo himua rekenapo. Isiapo Kotiane metakarikia makata metaki himu tumurumo hemakapurakanone, Ho Kotesane mahisi marekea isiapo rakirakanapo,” aíyaka popasapo.

⁶ Asiamo isiapo Kotiaki himu hakásaraka hemakapukua risikiasimo Kotimo isu ararenapo. Kotimo ararenane kakaro kárupo. Kotimo sawia popasane oyapo. “Aporomo ipi yano motosa makáraraka rea aporoaki Kotimo someraka, ‘Né koteaka rekenafapo. Néane nómó ararehokosafapo,’ airapo. Arirakano aporomo ipi yano motosa mawakasemaraka rea aporoaki Kotimo someraka, ‘Néane nómó ararehokosapo,’ airapo.” Aíyaka Kotimo sawia popahoareapo. *(Sindaun 3:34)*

⁷ Asiasamo Kotiane hemakapukua epo ipi someane kaiyinie. Kotimo someane kakimaka risike, Satanemo reaki mokopipiraka hokokarakano, repo Sataneaki someraka, “Nómó isuaki mokopipiraka hokoakarane, isiapo kaiyakosafapo. Ne metakarikia pusie.” Airakano Satanemo reane metakarikia tekatarikia pukusapo. ⁸ Asiamo repo himu hemakapusuane Koti rea hinakano, Kotiane soko re arisia peakosapo. Aporo watikiaka risia aporo reo, repo hokono pikirisekeno kusuana ayíáka, repo watikiaka rakirane metakarinie. Aporo himu tetáraka risia aporo reo, repo himu tetáraka hemakapurane kakaro metakarinie.

⁹ Repo watikiaka rakisisamo uyáka hemakapukua risikianie. “Isiapo watikiaka rakisiapo,” aíyaka hemakapuraka, himu nekea hihiripuraka risikianie. Kakaro kára hihiripuhoanie. Takuraka sesenane metakarikia hihiripuhoanie. Sesenane metakarikia himu nekea risikianie. ¹⁰ Repo hakásá hakásaraka Unihae Kotiaki hufitaeraka someraka, “Kotio, nómó hasakasapo. Nómó watikiaka hemakapukua rakisiane, hunia nómó rakiakosafapo.” Aíyaka nómó níane mawakasemaraka rekeno, Kotimo neane arareraka makárahokosapo.

Repo namina maeane hokomaka mainamarekea somehokopo, aisane oyapo.

¹¹ Keresoa paosa aporo maeo, nómó ní Keresoa paosa aporo maeane namina yia hokomaka kotafe topakamaraka mainamarekea somehokopo. Nómó ní maeane mainamarerakanone, ane Kotimo somemanane soko mainamarerakanapo. Mainamareraka reke Kotimo somemanane* (Wok Pris 19:18; Yamese 2:8) koaretaeraka mawakasemarakanapo. Ayíáka nómó ní mae mawakasemaraka rekenone, né hukurura kepo kaira aporo pariraka rekenapo.

¹² Arirakano hukurura kepo kaira aporo hakásá ane, Koti ipipo. Kotimo ipi hákasamo somemané motosapo. Epo hákasamo amano parakuraka hepene hauaka yapura karikia hiakosane soko, heao hauaka atura pukusane soko, Kotimo ipi hákasamo motoakosapo. Asiamo ne aporo epare? Nómó aporo tákéaki fanasina motoakosane soko, fanasina metakariakosane soko, nómó ayiakakopo. Ane nóménafapo.

“Repo namina makaraho rupiaka somehokopo,” aisane oyapo.

¹³ Hao, kaisie. Repo metakiramo Kotiane hemakapurafaraka, repo namina menane makama fanahoko hemaka apure. Asiamo nómó reane maroporaka somerakanapo.

* ^{4:11:} Kotimo somemané motoraka, “Nómó ní hemaka apura ayíáka, nómó ní aporo takeane soko ayíáka hemakapunie,” aíyaka somemané motosapo. Asiamo nómó ní maeane mainamarekea somerakano, Kotimo somemanane koaretaerakanapo. ‘R

Repo aporo metakiramo someraka, "Pipu soko metao, rau soko metao, ano ape meta pukua keremisi hakásamo á reke, pisinisi rakiraka mone kára mokoakosapo." ¹⁴ Aiyaka repo somerapo. Aisa nine rau ayiakakosane repo asekea hemakapurafapo. Arirakano mituru ako pekea nina maiya tipiamo akoane hinaka fanapo. Ako fa ana ayíáka yumo re hitaferaka arisiamo, kukusa maiyane mahimeteraka risikinapo.

¹⁵ Arirakano repo úyaka somehoanie. "Unihae Kotimo aorakano, isu hauaka wo risike makata metakira rakiakosapo." Aiyaka hemakapunie. ¹⁶ Aiyaka repo hemakapufunusa nine, repo ayíáka hemakapurakarifapo. Repo Kotiane hemakapunafonoraka repo namina yia makáraraka rupiaka somerakanapo. Repo namina yia makáraraka rupiaka somerane kakaro watikisapo.

¹⁷ Asiamo nómo makata koteaka rakiako hemakapusua nine nómo rakianafonoraka metakarirakano, ane nómo watikiaka rakirakayiapo.

5

Aporo makata kemo kára toaki some karáne oyapo.

¹ Aporo makata kemo kára toa reo, nómo some one kakimakanie.* Reaki makata umisa soko, mokoatikihokosa maiya ane soko faserepeakosapo. Makata ane faserepeakosasamo kara hihiripuhoanie. ² Repo makata kemoane toreraka fahokosapo. Arirakano repo pasu soko surisurimo nakosapo. ³ Repo sekete soko, yokotae soko toreraka fahokosapo. Arirakano repo moneane soko patéraka kemóraka watikihokosapo. Mone mokoatikina ayíáka repo kauane soko, ayíáka mokoatikihokosapo. Iramo apaira ayíáka mone kára mokoako seseaka hemakapura amo repo kauane mokoatikiraka paiyakosapo. Repo mone soko, makata kemo soko, kára taerape apurane mayiakasimo taerakanare? Fahora maiya amo keseke makata suane fahokosapo.

⁴ Mone fahokosa nine repo taerakanapo. Taerakanano yia repo aporo raipamo, repo hauaka hemo tokorakano asekea, ipu makata ropoane repo hakimokoa iaki kasafapo. Makata ropo kakanafonoraka hakimosane Kotimo aserapo. Aporo raipamo Kotiaki wárakano Kotimo kaisiapo. Makata suamo Unihaeane soko aporo suamo Unihaeane soko Koti ipipo. Kotimo makata su kairapo.

⁵ Kairakanano yia hauaka wo repo makata kára taeraka seseraka enana ayíáka enaraka risikinapo. Saro rukusakipoko saroane makata nakosa kára karaka, saro kaniamoana ayíáka re himuane maseseraka karakanapo. Saro rukusa maiya á pauna ayíáka re hukurukusa maiya ane pauhoko makerakanapo. ⁶ Arirakano watikiaka rakianafonosa aporoane repo fanasina motoraka, iane rusua kusuapo. Rusua kurakano ipu reyaki wekea roposafapo.

"Makata umisane fasereperakano Unihae Kotimo ararehoasimo kau risikianie," aisane oyapo.

⁷ Keresoa paosa aporo maeo, Unihae Yasu pariperakarihoamo asekea risike, himumo wakapuaka hemakapukua kau risikianie. Aporomo hemo tokoraka makata mano porokoa, hemoane metakarirafaraka, makata koteaka paruhoasimo kau risirapo. Kau risike aseane yao soko pekea, maiyamo soko ruraka, makata mano koteaka tanehekeea kararakaka parusekeno asekea morapo. ⁸ Aina ayíáka repo soko, Yasuane metakarirafaraka ayíáka kau risikianie. Makata umisa fasereperakano soko, himu hakásaraka hemakapukua yaiya wakapuaka risikianie. Unihae Yasu peakosa maiyane makerakanapo.

⁹ Keresoa paosa aporo maeo. Yasumo re fanasina motoakohoamo repo namina yia Keresoa paosa aporo maeane saperaka hokomaka somehokopo. Hukurura kepo kaira aporo kára Yasuane ipi peako ikia koroa kau rekenapo.

¹⁰ Keresoa paosa aporo maeo, repo Kotiane metakarirafaraka kau risikiakosane hemakapukosakipoko, porofete aporo fana risiamo ásiáne hemakapunie. Unihae Kotimo some karakano, porofete aporomo kaikia aporo hinamo suaki some kasapo. Some kayane iane aporo metakiramo mokoatikirakano, ipu Kotiane metakarirafaraka, Kotiaki himu

* 5:1: Aporoamo moneane makama fanaraka hemakapurafapo. Ipu Kotiane makama fanaraka ayíáka hemakapurakanafapo.

hakásaraka hemakapukua risiapo. ¹¹ Ipu wakapuaka hemakapukua risiakipoko, iane isiapo someraka, "Ipu Kotiaki yaiya himu hakásaraka hemakapukua risikino, Kotimo iane makotesapo," airapo. Yopa soko hemakapunie. E mokoatikirakano Yopamo Kotiane metakarirafaraka, makata takamasane haru fahoanafonosa nine, Kotiaki yaiya himu hakásaraka hemakapukua reareapo. Aipe pukua keseke Kotimo e kakaro makote-hoareapo. Asiamo isiapo hemakapusuane kakaro kára hemakapukua kamenakana amo kepoane Unihae Koti ipipo. Ane repo hemakapurakanapo.

¹² Maeo, repo kakaro someraka soko, kotafe someraka soko, aumaraka somerane somehokopo. Hepene yano hokoa soko, hauaka one yano hokoa soko, makata meta yano hokoa ayíáka aumarane aumahokopo. Kotimo re fanasina motoakohoamo repo aohoko hemakapuraka aohoanie. Waehoko hemakapuraka waehoanie. Repo somera amo kakaro ereketaeraka somehoanie.

¹³ Arirakano repo namina yia, aporo metamo makata umisa maka himu nekea rekenare? Rekenone ipi yiamo Kotiaki kurikurirasie, aihoanie. Arirakano aporo meta seseraka rekenare? Rekenone, aporoamo ipi yiamo Kotiaki kekereraka kesarasie, aihoanie. ¹⁴ Arirakano aporo meta makata takamasa rekenare? Rekenone, ipi yiamo Keresoa paosa aporo asekeea risia aporoane peaerasie, aihoanie. Peaerakano i peraka, ipu aporo makata takamasa kaua wera rekemarekea, Unihaemo wakapumo e mafahoasimo kurikurirasie, aihoanie. ¹⁵ Ipu kakaro Kotiaki himu hakásaraka kurikurirakano, aporo makata takamasane Unihaemo mafahokosapo. Arirakano aporo makata takamasamo watikiaka rakisiane soko, Unihae Kotimo mafahokosapo.

¹⁶ Asiamo repo watikiaka rakisiane repo namina yia hufitaeraka somehoanie. Repo namina yia metamo metane farimaka kurikuriraka metamo metane farimaka kurikuriraka, ayikanie. Arirakano re makata tasane fahokosapo. Arirakano ereketaeraka rea aporomo wakapuaka kurikurinapo. Epo kurikurina aeyaka Kotimo wakapuaka rakirakano, aporoane ararenapo. ¹⁷ Wakapuaka kurikurinane hemakapusakipoko, porofete aporo Iraiymo kurikurisane hemakapunie. Isu hauaka aporomano arisia ayíáka, Iraiya soko ipi hauaka aporo reareapo. Epo wakapuaka kurikuriraka, "Yao peakopo." Aýaka kurikurirakano keremisi isia faraka, keremisi kitafa kekemarape pukua titipiamo yao pesafapo. ¹⁸ Maiya amo Iraiymo efera hunia kurikuriraka, "Yao peanie." Aýaka kurikurirakano yao pesapo. Yao perakano makata mano koteaka tanehekea wate pesapo.

¹⁹ Keresoa paosa aporo maeo, repo aporo hakásá metamo Kotimo someane metakarikia paripurakano, epo efera hunia kakimakasimo, nómo aporoane pasimaka maroporaka somerakanone, aporoane nómo ararerakanapo. ²⁰ Aporo watikiaka reamo ikia kara watikisa kekemaraka puraka reane, nómo pasimarakanano, e kuraka fanasina hauaka á purapaka eane nómo mafasirakanapo. Epo watikisa kárane soko Kotimo mafahokosapo. Mafahoasimo nómo eane ararerakanapo.

1 Pita

1 Pita sawi one mahemakapukusa someane oyapo.

Yasu hauaka wo koraka reamo Pitane soko Yasuyaki hakāsa koraka reapo. Yasu hepene yapura hisiakipoko, Pitane tarira apororaka rakisiapo.

Yasu hepene yapura hisiakipoko, keremisi 34 su faraka, Pitamo sawi one popasapo. Maiya amo Keresoa paosa aporo hinamoane aporo metakiramo mokoatikirakano, namina tekatarikia pukua hauaka kekepoa risiapo. Asiasamo Pitamo sawi one popasapo. Keresoa paosa aporo hinamoane paripurapaka, namina Keresoaki himu hakásaraka paroaka risikiasimo Pitamo sawi one popasapo. Yasuane himu nekea kau tesane hemakapurakano, re paroaka risikiakosapo, aisapo.

Arirakano Pitane Rome sitia reke, Rome aporo metakiramo eane soko mokoatikisapo. "Keseke hepene yapura isu Yasuyaki hakāsa risikiakosapo, aíyaka hemakapunie," aíyaka Pitamo somesapo.

1 Pita sawia some kepo parakuraka popasane oyapo.

1:1-2 Pitamo sawi one kepomarekeo popasapo.

1:3-12 Kotimo reane yaku arareraka mafasisiasamo Kotiane makáraraka kekeresapo.

1:13-2:10 Keresoa paosa aporo hinamomo makata watikisane kikisiraka koteaka susu risikianie, aisapo.

2:11-3:12 Aporo hinamomo makata aina kotesane kekemahoanie, aisapo.

3:13-4:19 Reane aporo metakiramo mokoatikirakano paroaka risikianie, aisapo.

5:1-11 Keresoa paosa aporo hinamo asekea risira aporoaki soko, Keresoa paosa aporo hinamo suaki soko, Pitamo tarira someane some kasapo.

5:12-14 Pitamo ayapasapo.

Pitamo sawi fana poparaka makesane oyapo.

¹ Ano Pitane Yasu Keresomo tarira aporopo. Re Keresoa paosa aporo hinamo re Kotimo murikimasaki nōmo sawi one poparaka makerakanapo. Re Keresoa paosakipoko reane aporo metakiramo rukua koaka taerakano, repo namina ape sumuane metakarikia tekatarikia pukua, hauaka metakira risikinaporakano nōmo kaikia, nōmo reaki sawi one poparaka makerakanapo. Re metakira Pónetase hauaka á pukua risiaki soko, metakira Karésia hauaka á pukua risiaki soko, metakira Kapatósia hauaka á pukua risiaki soko, metakira Ésea hauaka á pukua risiaki soko, metakira Pitínia hauaka á pukua risiaki soko, re suaki nōmo sawi one poparaka makerakanapo.

² Wate fana Koti Atamo ipi hemakapusua aeyaka reane murikimasapo. Re kakaro koteaka susu risikiasimo Ho Kotesamo repo makata watikisane makikisisapo. Arirakano Yasu Keresomo someane repo kakimaka, arirakano Yasumo yapi pusuamo repo makata watikisane kosohokosakipoko Kotimo re murikimasapo. Asiamo Kotimo ipi yaku ararenane soko, ipi auaraka rerane soko, reaki kára kakasimo nōmo hemakapurakaripo.

Hepene yapura yaiya risikiakosane oyapo.

³ Unihae Yasu Keresomo ipi Ata Kotiaki isiapo kekereraka suserakanapo. Kotimo isu kára hemakapurakanapo. Asiamo epo Yasuane maturikia taesasamo epo isuane mafasikia makawesapo. Asiasamo isu eyaki hakāsa yaiya risikiakosapo. Arirakano Kotimo isu makotehokosaposane isiapo paroaka hemakapukua kau risikinapo. ⁴ Isu Kotimo hokosa pariraka risiasamo epo hokosaki kakakosapo aisane isiapo mokoakosapo. Asiamo keseke isu Kotiyaki yaiya risikiakosapo. Hepene yapura yaiya risikiakosane metamo mokoatikinafapo. Arirakano Kotiyaki yaiya risikiakosane namo kakaro kotesapo. Kotesane fahokosafapo. Makata ane Kotimo asekea rekeno isiapo mokoakosapo. ⁵ Repo Yasu keresoaki himu hakásaraka hemakapurakano, Kotimo wakapumo re mafairaka asekea rekenapo. Asekea reke isu hepene yapura hiasimo mafasirane yumo Kotimo maresapo.

Mafasirane maresasamo, keseke fa ana maiya amo Kotimo isu pasimokoa mafasiakosane isiapo aseakosapo.

⁶ Ayiakakosasamo seseraka risikianie. Seseraka risike yumo maiya wakasemamo aporomo soko metao, makata metamo soko metao, re mokoatikirakanapo. Reane mokoatikirakanano yia, seseaka risikianie.

⁷ Re mokoatikirakanano asekea, repo Kotiaki kakaro himu hakásaraka hemakapukua yaiya risikiakosare? O repo Kotiane metakariakosare? Asiamo Kotimo re kau aseakosapo. Repo Kotiaki himu hakásaraka hemakapurane koróto asíapo. Koróto namo susu mokoakosakipoko aporomo korótoane paikia, makata pepeno pará risiane iramo inarapo. Inaka fasokino koróto namo susuane morapo. Arirakanano koróto namoane aporomo mokoa sesenapo. Arirakanano korótoane hauaka omo menasamo fahokosapo. Korótoane wakasemapo. Repo Kotiaki himu hakásaraka hemakapurane namo kakaro kárabo. Koróto namo mokoako aporomo korótoane pairapo. Aina ayiáka makata umisa fasere aperamo Kotimo reane kau aserapo. Repo Kotiaki kakaro himu hakásaraka hemakapusuarihoamo kau aseako makata umisa fasereperapo. Repo kakaro himu hakásaraka hemakapurakanano Kotimo asekea, ipi reaki sesenane kárahokosapo. Aporomo koróto maraka sesenane wakasemapo. Arirakanano Yasu Kereso pariapera maiya amo, Kotimo reaki seseraka kekereraka makárahokosapo.

⁸ Arirakanano Yasuane hauaka wo koraka reamo repo eane asesafapo. Asiāne repo eaki himu tumurumo hemakapurakanapo. Yumo soko e asekeanafonorakano yia, repo eaki himu hakásaraka hemakapurakanapo. Eaki himu hakásaraka hemakapukua risike, seseaka risikinapo. Hepene yapura sesenane hauaka wo makata meta murikimaka somehoane siahoasifareapo. ⁹ Repo Keresoaki himu hakásaraka hemakapukua risikino, Kotimo reane mafasirakanapo. Asiamo re seseaka risikinapo.

¹⁰ Arirakanano mafasira kepoane repo hemakapurakanapo. Wate fana porofete aporomo Kotimo mafasira kepoane hemakapusakipoko ipu kosapo. Ipu kokoa hisiraka asekea, Kotimo re yaku ararehokosane ipu wate fana somesapo. ¹¹ Keresomo Ho Kotesa i himua reamo someraka, “Kereso ipi himu nekea kau teraka makata umisane epo maka rekeakosapo. Maka nina faraka Keresoane faesa kára rekeakosapo.” Airakanano porofete aporomo akai kairaka, “Maiya mamo faserepeakosare? Fasereaperma maiya amo makata umisa maka rekeakosane epare?” Aiyaka porofete aporomo akai kaisiapo.

¹² Aiyaka akai kairakanano ipu hemakapusimo Kotimo someraka, “Re arisia maiya yumo ayiakakosafapo. Keseke aporo metakira wainekea arisia maiya amo ayiakakosapo.” Aiyaka somesane keseke maiya amo ayiakakosaposane, pipu maiya yuyapo. Keseke aporo metakira wainekea risikiakosaposane repo. Arirakanano wate fana porofete aporomo Kereso peakosane some kasapo. Some kasane yumo Kotimo some kará porofete aporomo reaki some karakasupo. Arirakanano Kotimo Ho Kotesa pusierakanano hepene yapunaka Ho Kotesa hauaka wo pesapo. Pekea somerakanano kakimara aporomo kaikia aporo hinamo metakiramo Keresoane hemakapusimo ipu some kotesane reaki some karakasupo. Arirakanano mafasiakosa kepoane hepene aporomo soko hemakapuko sesenapo.

“Makata watikisane makikisiraka koteaka susu risikianie,” aisane oyapo.

¹³ Kotimo reane araresasamo ereketae susu hemakapukua risikianie. Makata watikisamo repo himu hemakapurane kirimarapaka asekeanie. Maiya suamo koteaka hemakapukua risikianie. Watikiaka hemakapurapaka asekea risikianie. Yasu Kereso pariapera maiya amo, Kotimo reane ararehokosasamo, repo himu hakásaraka hemakapukua risikianie. ¹⁴ Hokosamo ipi atamo someane akaira ayiáka, repo Kotimo someane kaikia koteaka risikianie. Fana Kotimo someane repo kaiyasiraka himeteraka risike, kaumo hemakapusuane kekemasa ayiáka yumo kekemahokopo.

¹⁵ Arirakanano Kotimo ainane watikinafapo. Namo kakaro kotesa susupo. Kotimo reane pasimosasamo repo makata watikisane makikisiraka, koteaka susu rakiraka risikianie. ¹⁶ Arirakanano Kotimo sawia popasane oyapo. Kotimo someraka, “Repo Kotiane

anopo. Nōmo ainane koteaka ereketae susupo. Asiasamo re soko kotesa ereketae susu risikianie." Aýaka Kotimo somerakano popahoareapo. (Wok Pris 19:2; 11:44-45)

Yasumo yapimo isu roporaka Kotimo isu pasimasane oyapo.

¹⁷ Aporo hinamo suamo makata rakisiane Kotimo asekea ereketae takekea parakuhokosapo. Asiasamo Kotimo nenakamaka takekea parakunafapo. Aporo hinamo metane epo nenakamaka seseraka makama fanaraka, arirakano aporo hinamo metane nenakamaka hisiraka makama kesekeraka ayíáka takekea parakunafapo. Arirakano aporo hinamomo makata watikiaka rakisiane Kotimo aseraka takekea fansasinane motoakosapo. Asiamo takekea fansasinane motora kepoane Koti ipipo. Arirakano repo Kotiaki kurikurina maiya amo repo someraka, "Atao," airapo. Arirakano hauaka wo re fore arisia maiya amo, koteaka risike Kotiaki namoraka eane makárahoanie.

¹⁸ Repo fana hauaka wo makasa kamumamo arupusimo rakirane enomaka rakiraka risiapo. Arirakano aporo tipura kekeia arisia ayíáka re ayíáka risiapo. Re tipura risiane tonotaehoasimo Yasu Keresomo repoko farimaka api Kotiaki kasapo. Hauaka wo aporomo api karane, koróto soko, siufa soko, mone soko karápo. Hauaka wo makata ane fanapo. ¹⁹ Arirakano Yasu Keresomo ipi yapi kasane namo kakaro kárupo. Arirakano saro sipi mano makata takamakanafonosa, kau kere karianafonosa ásiáne Yasupo. Saroane rukua makata watikisapoko Kotiaki api akara ayíáka, isiapo watikisapoko Yasu Keresomo farimaka api kasane Yasumo yapi ayapo.

²⁰ Arirakano hauaka one Kotimo kepomareasiraka, Yasumo ipi yapiane isupoko farimaka api kakakosane, Kotimo ipi fana hemakapukua maroposapo. Maroposane fahokosa maiyane makeanamo Yasuane isupoko hauaka wo pesapo. ²¹ Pesasamo eaki repo kataka marekea risikino Kotiaki himu hakásaraka hemakapurakanapo. Kotimo Yasu kusuane maturikia taeraka eane makáraraka mafaeraka maresapo. Maresane hemakapukua repo someraka, "Isu eyaki yaiya risikiasimo isu soko maturikia taehokosapo." Aýaka repo Kotiaki himu hakásaraka hemakapurakanapo.

Isiapo isina mae metane himu tumurumo hemakapunie, aisane oyapo.

²² Kotimo kakaro someane repo kaikia kekemaraka risike, makata watikisane metakarikia, Keresoa paosa mae papa ane repo kakaro himu tumurumo hemakapurakanapo. Arirakano repo namina yia soko namo kakaro himu tumurumo hemakapukua risikianie. ²³ Kotimo someane repo kakimasasamo, Kotimo reane makawesapo. Asiamo Kotiane repo Atapo. Koti yaiya rekenapo. Arirakano hauaka wo isiapo atane kurapo. Kotiane ayíáka kurafapo. Arirakano Kotimo someane kakaro somepo. Some ane yaiya rekeakosapo. Fahokosafapo. ²⁴ Arirakano Kotimo sawia popasane oyapo.

"Aporo hinamo suane hauaka wo yaiya risikiakosafapo. Asane hauaka wo tanehekeia wakasema nina kurapo. Aina ayíáka aporo hinamo suane anapo. Arirakano farafara poraraka yoferaka huruapera ayíáka, aporo yano motosa kárane soko ayíáka fánapo.

²⁵ Arirakano Unihae Kotimo someane fahokosafapo. Yaiya rekeakosapo." Aýaka popahoareapo. (Aisaia 40:6-8)

Asiamo aporo hinamomo Yasuane hemakapusimo some kotesa some kasane fahokosafapo.

"Ira warupi ásiáne Yasu Kereso ipipo," aisane oyapo.

¹ Reane Keresoa paoraka makawésasamo repo aporo metakiraki mokoatikinane su metakarinie. Kotafe somerane soko, himu tetáraka hemakapukua rakirane soko metakarinie. Arirakano kakanakenane soko, aporo meta hokomaka somerane soko metakarinie. ² Arirakano hokosa kirimo hoko pi hákasa nako sesena ayíáka, repo Kotimo kakaro someane hákasa ayíáka kakimako sesehoanie. Hokosamo hoko pi kotesa susu nenapo. Aina ayíáka Kotimo kakaro some kotesa susuane hákasa kakimakanie. Kotafe someane kakimakopo. Hokosa kárana ayíáka, repo some kotesa susuane kakimarakanano,

re Keresoa paosane ayiáka káraraka risikiakosapo. Ayiáka risikino keseke re Kotiyaki hakāsa yaiya risikiakosapo.³ Fana repo Yasu Keresoane hemakapusuafapo. Asiāne yumo re keresoa paoraka Yasu Keresomo re yaku araresane repo hemakapurakanapo. Asiamo Unihae Yasuane namo kakaro kotesapo, aíyaka repo hemakapurakanapo.

⁴ Eaki katakamarekea risikianie. Ira warupi asíane epo. Ira warupiane aporomo asekeakamaka makata hemakapura ayiáka mamakatesapo. Arirakano ira warupiane Kotimo aseraka someraka, “Irane kotesapo,” aíyaka ira warupiane Kotimo murikimasapo. Murikimaka ira warupiane maposapo.

⁵ Arirakano reane Keresoa paosasamo ape kira ira asíapo. Ira hakásaraaka maka ape kirapo. Aina ayiáka isu suane Kotimo ipi ape ayiáka kisia á isu risikinapo. Asiamo repo suamo pirisiti aporomo makata rakirane rakisimo kotimo reane murikimasapo. Arirakano Yasu Keresomo re mafasisiasamo repo kauane Kotiaki makata yaku akará ayiáka kakanie. Ayiáka karakano Kotimo reaki sesehokosapo.

⁶ Arirakano Kotimo sawia popasane oyapo.
“Úri Saeonea ira warupi Kotimo maporakanapo. Ira warupi murikimaka irane kotesapo. Ira warupi kotesaki himu hakásaraaka hemakapura aporo hinamoane kaiyahokosafapo.”
Aíyaka Aesayamo popahoareapo.

(Aisaia 28:16)

Ira warupiane takumeaka popasane Yasu ipipo.⁷⁻⁸ “E kakaro kotesapo,” aíyaka kakimara aporo hinamomo hemakapurapo. Asiāne Kotimo someane koaretaena aporo hinamoane ira warupia terafakaruraka etenapo. Arirakano Kotimo sawia meta popasane oyapo.

“Aporomo ape kiraka, ira warupi mamakatesane Kotimo máfaraka makama fanaraka mapohoareapo. Ira warupia aporo terafaka rurapo. Ira warupia finihoane pariruraka etenapo.” Aíyaka popahoareapo.

(Buk Song 118:22; Aisaia 8:14)

Aíyaka popasane aporo hinamomo Kotimo someane koaretaesakipoko terafakarurapo. Terafakarukusane Kotimo maresapo.

⁹ Arirakano kakimara aporo hinamoane Keresomo aporo ira risikiasimo Kotimo murikimasapo. Arirakano Unihae Kotimo pirisiti aporo hinamo parisane repo. Arirakano re Kotimo pasimosa aporo hinamo su risiane Kotimo murikimasapo. Murikimasane namo kakaro koteaka susu risikiasimo Kotimo murikimasapo. Arirakano Kotimo someraka, “Aporo hinamo reane nōmo táképo,” aihokosakipoko epo reane makikisiraka murikimasapo. Asiamo Kotimo reane kára araresane repo kekereraka somehoasimo epo reane murikimasapo. Fana re katosa á risiane metakarikia, epo faesa kára á risikiasimo Kotimo reane murikimaka peaesapo.¹⁰ Fana re nena aporo hinamo risiapo. Yumo re Kotimo aporo hinamo risikinapo. Fana repo Kotimo kamenakanane himetesapo. Yumo epo kamenakanane repo hemakapurakanapo.

“Kamani aporomo somemanekkekemahoanie,” aisane oyapo.

¹¹ Hameo, hepenea hiakosasamo hauaka one kakaro repo hauakafapo. Hauaka wo fore risike, kimisi pariraka risikinapo. Arirakano kaumohemakapusua amo himumo koteaka hemakapusua tati werakano, kaumohemakapusuane kakimakopo.¹² Keresoa paohoanafonosa aporo hinamoamo asekeasimo re koteaka risikianie. Ipu reaki kotafe topakamaraka someraka, “Re watikiaka arises.” Aíyaka kotafe topakamaraka somehoko asiāne, re koteaka risikino asekeakamakane, Yasuane pariapera maiya amo ipu Kotiane kekerekohokosapo.

¹³ Arirakano Unihae Kotiane hemakapukua risike, hauaka wo kamani aporomo somemanemotosane kakimakanie. Kamani aporo unihae e fanaraka reasasamo, epo somemanemotosane kakimakanie.¹⁴ Arirakano kamani aporo metakiramo makata rakisimo kamani aporo unihaemo murikimasapo. Aporoane pukua makata rakiraka risike, somemanekoteaka aporoane ipu fanasiraka, arirakano koteaka risia aporoane ipu makotenapo. Ayiáka rakisimo kamani aporo unihaemo aporo metakirane murikimasapo. Asiamo kamani aporo metakira murikimasa aporoamo ipu somemanemotosane soko repo kakimakanie.

¹⁵ Asiamo kamani aporomo somemane ane repo kakimaka koteaka risikino Kotimo sesenapo. Re koteaka risikino aseke, aporo metakiramo reaki kotafe topakamaraka somehokosapoko asiāne somehokosafapo. Re watikiaka risikianafonosasamo ipu kotafe topakamaraka somerane metakariakosapo. Aporomo himeteraka mokome somehoko hemakapusuane metakariakosapo. ¹⁶ Fana re makata watikisamo tipura ayiáka make-sane, Kotimo re tonotaesapo. Tonotaesasamo koteaka risikianie. Repo hemakapuraka, "Isiapo efera hunia makata watikiaka rakirakano, Kotimo efera hunia isu ararehokos-apo," aiyaka hemakapukua risikiakopo. Arirakano repo úyaka hemakapunie. "Kotimo aporo raipa ane isupo. Asiamo isiapo Kotimo someane kaikia kekemahokosapo," aiyaka hemakapukua risikianie. ¹⁷ Aporo hinamo suane koteaka hemakapunie. Kakimara aporo hinamoane soko himu tumurumo hemakapunie. Kotiane namoraka makárahoanie. Kamani aporo unihae fanane soko koteaka hemakapunie.

"Yasu Keresoane himu nekea kau teraka umisa masa ayiáka, repo soko ayiakasimo tarisiapo," aisane oyapo.

¹⁸ Aporo raipa roposao, re roposa wafayamo someane kakimakanie. Kakimaka iane koteaka hemakapunie. Re roposa wafaya metakiramo koteaka auaraka somerakano soko, wafaya metakiramo matewaraka somerakano soko, ipu suamo someane kaikia i suaki koteaka hemakapunie. Ipu suamo someane kakimakanie. ¹⁹ Repo koteaka rakikia risikinone, repo namina roposa wafayamo re nenakamakaya rukua kau terakano, himu mahisihoanafonoraka someraka, "Kotimo isu hemakapukua aseke rekenapo." Aiyaka someraka risikino, Kotimo reane makotehokosapo. ²⁰ Repo watikiaka rakikia risiakipoko, re roposa wafayamo rurakano, repo sapehoanafonoraka risikino, Kotimo reaki somer-aka, "Re aporo kotesapo," aihokosare? Wae. "Repo namina yiamo watikiaka rakisiapo," aihokosapo. Arirakano repo koteaka rakikia risiakipoko, ipu reane mokoatikirakano aseke, repo sapehoanafonoraka risikino, Kotimo reaki someraka, "Re aporo kotesapo," aihokosapo.

²¹ Aporo metakiramo re rukua mokoatikirakano, repo sapehoanafonoraka risikiasimo Kotimo re murikimasapo. Asiamo repoko Yasu Keresoane himu nekea kau teraka umisa maka reapo. Yasu rea ayiáka re soko ayiáka risikiasimo epo tarisiapo. ²² Asiamo Yasu Keresomo makata watikiaka rakiraka reafapo. Makata watikiaka rakirane wakasema meta soko epo rakisiafapo. Kotafe somerane soko somesafapo. ²³ Aporomo e mainamarerakano epo some parihisiafapo. Aporomo e rukua mokoatikirakano epo someraka, "Keseke nōmo reane rukusapo," aiyaka somesafapo. "Kotiane ipi makata hukurura kaira aporo káraro. Epo makata su aseke ereketaeraka maropohokosapo." Aiyaka Kotiaki hákasa epo hemakapusuapo.

²⁴ Arirakano isiapo makata watikisane rukupateraka koteaka ereketaeraka risikiasimo, isiapo makata watikisane Yasumo maka, epo ipi kauane ira matopesa paremaresapo. Paremarekea e kaua kareke, hokonoa ikokoraka ayiáka kusuasamo, isiapo umisane epo masapo. Maka mafasapo. ²⁵ Arirakano saro sipi ikia kara hasaka apura ayiáka, fana re soko ayiáka ikia kara hasaka puraka risiapo. Asiāne yumo Saro Sipi Wafaya rea re pariperakano, repo himuane epo mafairaka aseke rekenapo.

3

"Aporo hinamo tati arumaka uyáka risikianie," aisane oyapo.

¹⁻² Hinamo repo kaisie. Nōmo ní aporo pusuamo someane kakimakanie. Arirakano nōmo aporomo Kotimo someane kakimakanafonoraka rekeno nōmo eaki himu mahisi-hoasimo somehokopo. Aiyaka somerafaraka nōmo Kotiane makáraraka koteaka susu kakeno, ni aporo pusuamo nōmo arakirane aseke, e soko Kotiaki rekeako parihokosapo.

³ Arirakano hinamo re makahinamoraka ayiáka tokoakopo. Repo namina kaua kau rakirakosane makama fanaraka kára hemakapukopo. Ikiare soko, senaki kera soko, uni iti faturane soko, pasu kotesa kau rakirane soko, makata ane su kaum menapo.

⁴ Arirakano re makahinamohoanafonoraka toke repo himuane makotehoanie. Re tau

uaraka nanaehoanafonoraka tokeno ane kotehokosapo. Ayíáka tokeno Kotimo asekea sesehokosapo. Himu koteaka ereketae hemakapuramo kaumo rakirane marokenapo. ⁵ Arirakano repo kau rakira asíane himumo koteaka hemaka apura ayapo. Wate fana hinamomo Kotiaki hemakapukua toamo ipu namina aporo pusuaki tau uuaraka toke, namina aporomo someane kakimasapo. ⁶ Arirakano Saramo soko Eparahamemo someane kakimaka Eparahameaki someraka, “Ne nōmo unihaemanopo,” aisapo. Arirakano Sara koteaka kaya ayíáka re namonafaraka koteaka tokenone, re Saramo hokosa asía ayíáka tokenapo.

⁷ Arirakano aporo repo soko kaisie. Nōmo ní hinamoane hemakapukua rekeanie. Hinamomo wakapuane wakasema reasasamo, nōmo ní hinamoane koteaka asekea rekeanie. Teto tetákara Kotimo hokosasamo nōmo hemakapuraka, “Hinamo eto Kotimo yaku ararerakano eto Kotiyaki yaiya risikiakosapo.” Aíyaka hemakapukua rekeanie. Nōmo kurikurinane patekenakohoamo ní hinamoyaki koteaka rekeanie.

“Keresoa paosa aporo hinamo re uyáka risikianie,” aisane oyapo.

⁸ Repo suamo namina yia himu hakásaraka hemakapunie. Metamo metaki himu pukua, metamo metaki himu pukua, ayíáka himu purane maka seseaka risikianie. Repo Keresoa paosa mae papa suane kamenakaraka hemakapunie. Aporo hinamo metane mawakasemaraka, né níane makarahokopo. Arirakano repo namina yia metamo metane arare, metamo metane arareraka risikianie. ⁹ Aporo metamo re mokoatikirakano, repo ropo mokoatikihokopo. Re mainamarerakano repo ropo mainamarehokopo. Ropo mainamarenane metakarikia, repo iane makotehoanie. Arirakano iane makotehoasimo Kotimo re murikimasapo. Repo iane makoterakano, Kotimo reane makotehokosapo. ¹⁰ Arirakano Kotimo sawia popasane oyapo.

“Ne koteaka rekeako seseraka, akaimo watikiaka somerane soko, kotafe somerane soko somehokopo. ¹¹ Makata watikisane metakarikia koteaka rekeanie. Maiya suamo tau auaraka rekeako hemakapunie. Tau rera ikia karane kekemahoanie. ¹² Arirakano aporo hinamo ereketae risiane Kotimo seseraka asekea rekenapo. Ereketae risia aporo hinamomo kurikurirakano, Kotimo kaikia rekenapo. Arirakano watikiaka rakiraka risia aporo hinamoane Kotimo asekea, hisiraka rekenapo.” Aíyaka popahoareapo. (*Buk Song 34:12-16*)

¹³ Repo koteaka ereketaeraka rakiako seserakano, aporo metakiramo soko re mokoatikihokosafapo. ¹⁴ Arirakano re koteaka risikino, aporo metakiramo re kau mokoatikirakano, Kotimo reane makotehokosapo, aíyaka hemakapunie. Arirakano re mokoatikina aporoaki namoraka himu fahokopo. ¹⁵ Repo himumo hemakapuraka, “Kereso ipi unihaepo,” aíyaka e makáraraka hemakapunie. Arirakano aporo metamo someraka, “Ne Keresoyaki yaiya rekeakosaposane kepoane anoaki somesie.” Airakano nōmo Keresoaki himu hakásaraka hemakapusua kepoane aporoaki kakama somehoanie.

¹⁶ Some ana maiya amo tau auaraka reke Kotiane makáraraka somehoanie. Nōmo himua makata watikisane mafáraka reke somehoanie. Ne Keresoa paoraka koteaka susu rekeno, ne mahokoparisaporoane kaíyahokosapo. ¹⁷ Ne watikiaka reakipoko aporo metamo né mokoatikirakano, nōmo ní yia hasakaranapopo. Ne watikiaka reakipoko, aporo metamo ne mokoatikirakano, makata umisa ane nōmo Kotipoko marakanafapo. Arirakano Kotimo hemakapusua aeyaka ne koteaka reakipoko, aporo metamo ne mokoatikirakano siapo. Mokoatikina umisa ane Kotipoko maka reke siahoasireapo.

¹⁸ Arirakano aporo hinamomo makata watikisa umisane Yasu Keresomo maka kusuapo. Yape hakásamo makata watikisa suane mafahokosakipoko ipi hákasa kusuapo. E ipi ereketae susu reane, isu ereketae risikianafonasakipoko eane kusuapo. Isu Koti rea karikia hiakosakipoko ipi kauane kusuapo. Arirakano ipi hoane yaiya reapo. ¹⁹ Arirakano Yasu ipi hoane pukua aporo kusua ho risia hauaka á iane tipura kesa ayíáka risiakipoko Yasumo some kakako pusuapo. ²⁰ Aporo hinamo i kusua ho kesane wate fana ipu Kotimo someane koaretaesapo. Arirakano Noa rea maiya amo Kotimo ipi foaka sapehoanafonoraka ipi foaka fanasinane motoanafonoraka kau reapo. Kau rekeno Noamo kasu

kára tokoraka aporo hinamo karisuane kasua riparakano, he aeyaka Kotimo mafasisiapo. ²¹ He aeyaka mafasisia asíane hea tapukuamarera ayapo. Hea tapukuamarera maiya amo kau pikirisane kusuhoko hea tapukumarerafapo. Isiapo Kotiaki someraka, “Nōmo himura makata watikisane mafahoanie,” aíyaka hea tapukumarerapo. Yasu Kereso kusuane epo maturikia taesasamo, eaki isiapo someraka, “Isu mafasinie,” airakanapo.

²² Arirakano Yasu hepene yapura hikia, Kotimo hokono tumuru takua rekenapo. Arirakano hepene aporoane soko, hauaka wo makata wakapuaka risiane soko, i suane Yasu Keresomo unihaeaka asekea rekenapo.

4

“Repo makata aina watikisane metakarikia, Yasumo makata aina kotesane rakinie,” aisane oyapo.

¹ Yasu Keresomo makata umisa masa maiya amo ipi kau soko tesapo. Yasu ipi kau tesasamo repo soko úyaka hemakapunie, “Isu soko makata umisa maraka, kau tehoane siahoasireapo.” Aíyaka repo himumo paroaka hemakapukua risikianie. Yasu kau tesa ayiáka, re soko kau teraka risikino, repo makata watikiaka rakirane metakarirakanapo. ² Yumo kepomarekea keseke soko hauaka wo arisia maiya amo repo kaumo hemakapusuane kekemaraka risikiakopo. Kotimo hemakapusuane hákasa kekemaraka risikianie.

³ Keresoa paohoanafonosa aporo hinamomo makata rakiraka risira ayiáka, re fana ayiáka rakiraka risiapo. Repo fana ayiáka watikiaka rakiraka risiane, pipu yumo makata aina watikisane rukupateraka metakarinie. Nena aporo hinamomo makata rakirane oyapo. Hinamo hokomarekea somerane soko, kaumo makata watikiaka rakiako seseraka hemakapurane soko, he watikisa nekea masuarane soko, aporo yakai sarimaraka makata kára pakinekea he watikisa nekea himu koteaka hemakapurane faraka mokome enaraka koraka risirane soko, kakaro Kotiane hemakupurafaraka makata meta koti mapariraka makáraraka kekererane soko, makata ayiáka rakirane nena aporo hinamomo ayiáka rakiraka risirapo.

⁴ Ipu watikiaka rakira ayiáka, repo ayiáka watikiaka rakirakanafapo. Repo iyaki hakása watikiaka rakianafonorakano, ipu reane hokomaka mainamarerakanapo. ⁵ Asiamo hukuarura maiya amo, ipu makata watikiaka rakisiane hukurura kepo kaira aporo káraki kakama somehokosapo. Arirakano hukurura kepo kaira aporo káramo aporo hinamo kusuane soko, hitafe risiane soko, ipu suamo makata rakisiane asekea parakuhokosapo. Parakuhokosa maiyane makerakanapo.

⁶ Arirakano aporo hinamo kusuane soko, epo hukurukua fansinane kakakosapo. Arirakano Kotimo some kotesane aporo hinamo kukua kesa hoaki Yasumo some kakako pusuapo. Hauaka wo aporo hinamo suamo kaumo rakirane hukuarura ayiáka, aporo hinamo kukua kesane hukurusuapo. Ipu hoane Koti area ayiáka kaweraka risikiasimo, Yasumo ipi Kotimo some kotesane somehoko pusuapo.

“Kotimo reaki wakapu ararena kasane repo mokoa aporo hinamo metakirane arareraka rakinie,” aisane oyapo.

⁷ Makata su fahokosa maiyane makepo. Koteaka kurikurihokosakipoko himumo koteaka hemakapukua risikianie. Repo makata ainane koteaka asekea risikianie.

⁸ Asiamo makata aina fanane oyapo. Repo aporo hinamo suane himu tumurumo hemakapunie. Asiamo aporo metamo watikiaka rakirakano, repo eaki himu tumurumo hemakapukua risiasamo, aporoamo makata watikisane repo hemakupurafaraka mameraruhokosapo. ⁹ Arirakano Keresoa paosa aporo hinamo meta repo apea kimisi perakano mahisihokopo. Repo eane seseaka pasimaka asekea risikiane. ¹⁰ Kotimo re su hakása hakásaraka epo makata wakapu yaku ararenane kasapo. Asiamo re metaki makata wakapu ararena meta kaka, arirakano metaki makata wakapu ararena meta kaka, ayiáka kekepo karakano, neaki kasane nómó koteaka asekea rekeanie. Wakapu ararena kasane maka repo namina yia aporo hinamo metapoko arareraka rakinie. ¹¹ Asiamo

Kotimo neaki ararena karakano maka, Kotipoko uyáka rakinie. Kotimo someane nōmo some kakasimo Kotimo neaki wakapu karakano, nōmo Kotimo someane some kakanie. Arirakano nōmo aporo metapoko ararehoko rakirakane Kotimo wakapu karakano, nōmo aporo metapoko arareraka rakinie. Yasu Keresope Koti tetā makáraraka kekerehoasimo, tetapō wakapu yaku ararenane neaki kasane, nōmo maka rakinie. Arakira maiya amo aporo hinamo suamo Kotiane hemakapusimo rakinie. Ayíáka rakirakano Yasu Keresomo yano motosa aeyaka Kotiane kekerehokosapo. Kotimo ipi wakapuanne soko faesane soko yaiya rekeakosasamo eaki kekerehoanie. Kakaroripo.

Keresoa paosa aporo hinamomo makata umisa makosane oyapo.

¹² Hameo, repo Kotiaki kakaro himu hakásaraka hemakapurakanare? Re kau aseakosakipoko, iramo inaka mokoatikiana ayíáka, repo kauane aporo metakiramo mokoatikiraka risikinapo. Re mokoatikirakano asekea, fofaraka namohokopo. Re Keresoa risikiako pariraka risikino asekea, aporo metakiramo re mokoatikihokosapo.

¹³ Keresomo ipi umisa masa ayíáka, re soko eaki paosasamo, umisane maka seseraka risikianie. Kereso ipi kára faesayaki pariapera maiya amo, re kára sesenane komarukua risikiakosapo. ¹⁴ Re Keresoaki risikiako parisa akipoko, aporomo reane mainamarerakanapo. Re mainamarerakanano Kotimo reane makoterakanapo. Kotimo Ho Kotesamo wakapuanne re risia á pesapo. Pesasamo seseaka risikianie. ¹⁵ Arirakano nōmo aporo meta kukusimo ruraka soko metao, makata hakimarakaka soko metao, aporo metamo watikiaka rakisimo nōmo kirimaraka soko metao, aporo metamo makata rakirane nōmo mokoatikiraka soko metao, ayíáka nōmo watikiaka rakiraka reakipoko, aporo metamo ne mokoatikirakano nōmo ní yiamo hasakarakanapo. Asiamo repo ayíáka watikiaka rakiraka risikiakopo.

¹⁶ Arirakano re Keresoa paosa aporo hinamosasamo aporo metakiramo re mokoatikirakano Kotiaki kekerehoanie. Re namohokopo. Re Keresoa paosasamo Kotiaki mapiraraka kekerehoanie. ¹⁷ Arirakano reane mokoatikirakano Kotimo takekea parakuhokosa maiya ane faserepeakosaposane yumo fasereperaka sikirakano aserakanapo. Kotimo ipi aporo hinamoane fana takekea hukurukua parakurakanapo. Isu kakimara aporo hinamoane yumo kepomarekea hukururakanapo. Keseke namo kakaro kára hukurukusane Yasu pariapera maiya amo, koretaena aporo hinamoane hukurukua kára fanasihokosapo.

¹⁸ Kotimo sawia popasane oyapo.

“Aporo hinamo hauaka wo koteaka risiane, makata umisa marakano, keseke Kotimo mafasiakosapo. Arirakano Kotiaki patera tarikia watikiaka risia aporo hinamoane Kotimo mayíáka mafasiakosare? Keseke Kotimo iane kára fanasihokosapo.” Aíyaka popahoareapo.

(Sindaun 11:31)

¹⁹ Asiamo Kotimo ipi hemakapusua aeyaka reane aporo metakiramo mokoatikirakano, yaiya koteaka rakiraka risike, Kotiaki himu hakásaraka hemakapukua paroaka risikianie. Asiamo aporo hinamoane soko, makata suane soko, Kotimo rakisiasamo, epo ipi makata suane koteaka asekea rekenapo. Arirakano Kotimo ipi ayiakakosaposane ayiakakosapo.

“Keresoa paosa aporo hinamoane asekea risira aporo, re uyáka risikianie,” aisane oyapo.

¹ Yasu Keresomo umisa maka kau tesane soko, himu nesane soko, ano Pitamo asesapo. Keseke ipi faesane atarira maiya amo, ipi faesayaki káraraka rea ayíáka, ano soko ayíáka faesayaki rekeakosapo. Yumo nōmo soko Keresoa paosa aporo hinamoane asekea rekenapo. Repo soko Keresoa paosa aporo hinamoane asekea risiasamo nōmo reaki someraka, “Re uyáka risikianie,” airakaripo.

² Saro sipi wafayamo ipi saro sipi koteaka asekea rera ayíáka, Keresoa paosa aporo hinamoane Kotimo reaki kasane, koteaka asekea risikianie. Aporo hinamoane nōmo seseaka asekea rekeakoripo, aíyaka hemakapukua rakirakano Kotimo sesenapo. Repo Kotiane sesehoasimo iane seseraka hemakapukua koteaka asekea risikianie.

Wakasema hisiraka ayíáka asekea risikiakopo. Makata ropo mokoakosa hákasa akipoko hemakapukua rakiakopo. Kotipoko raiparaka rakiako hemakapukua aporo hinamoane ararehoko rakinie.

³ Repo aporo hinamoane asekea risike, iaki matewaraka rakiakopo. Ipu neane kekemahoasimo nómo koteaka fana tarikia rakinie. ⁴ Ayíáka rakiraka risikino saro sipi wafaya fanaraka reane* ipi pariapera maiya amo, reaki makata ropo namo kakaro kotesa fahoanafononane kakakosapo.

“Kotimo someane kaikia, Kotiaki himu hakásaraka hemakapukua risikianie,” aisane oyapo.

⁵ Arirakano Keresoa paosa aporo hinamo asekea risira aporoamo some karakano, aporo sisimahoanafonosa aporo repo kakimakanie. Repo suamo repo namina yia someraka, “Ano ní aporo kárupo.” Aíyaka someraka risikiakopo. “Ano aporo kárafapo.” Aíyaka hemakapukua aporo raipamo aporo metapoko arareraka rakira ayíáka rakinie. Arirakano Kotimo sawia popasane oyapo. “Aporomo someraka, ‘Ano aporo kárupo,’ aira aporoaki Kotimo sesenafapo. Arirakano aporo metamo someraka, ‘Ano aporo kárafapo,’ aira aporoane Kotimo arareraka makotenapo.” Aíyaka Kotimo sawia popahoareapo. (*Sindaun 3:34*)

⁶ Kotiane ipi wakapuaka unihaeaka rekenapo. Kotiane wakapuaka unihaeaka reasasamo, nómo eaki someraka, “Ano aporo kárafapo. Né unihaeaka reasasamo nómo some kotesane nōmo kakimarakanapo.” Aíyaka somerakano, Kotimo ipi hemakapukua sere murikimasa amo, epo né makárahokosapo. ⁷ Kotimo reane hemakapukua asekea reasasamo re himu nekea, himu tomekeraka risiane epo ararehoasimo, eaki kurikurihoanie. Kurikurirakano epo ararehokosapo.

⁸ Re wakako nekeraka arisia ayíáka risikiakopo. Maiya suamo koteaka hemakapukua asekea risikianie. Asiamo saro raeonemo aporo meta rukunakosakipoko, kára meaka koraka rera ayíáka, repo yunu Satanemo re kirimaraka mokoakosakipoko wáraka koraka rekenapo. ⁹ Koraka rekeno repo Keresoaki himu hakásaraka paroaka hemakapukua risike Sataneane pusiehoanie. Asiamo re mokoatikirakano uyáka hemakapunie. “Isu mokoatikina ayíáka, hauaka sua isiapo Keresoa paosa mae papa soko ayíáka mokoatikirakanapo.” Aíyaka hemakapukua risikianie.

¹⁰ Maiya wakasemamo reane mokoatikirakanapo. Mokoatikisa maiyane faraka, repo Yasu Keresoaki kataka marekea risiasamo, Kotimo ipi faesane reaki kakakosapo. Asiamo faesane fahokosafapo. Yaku ararena kepoane Koti ipipo. Arirakano aku potaka pusekeno petokoraka makotena ayíáka, reaki aporomo mokoatikisane Kotimo arareraka makotehokosapo. Repo eaki himu hakásaraka hemakapusuane, himu he kekeha hemakapurapaka, paroaka hemakapusimo epo ararehokosapo. Wakapuane soko reaki kakakosapo.

¹¹ Kotimo faesane soko wakapuane soko yaiya rekeakosasamo eaki kekereraka risikianie. Kakaroripo.

Pitamo ayapasane oyapo.

¹² Saerase ipi Kotiaki yaiya himu hakásaraka hemakapukua rekeno asekea isiapo Keresoa paosa aporo maeane ipipo. Saerase anoyaki hakásaraka reke, ano arareraka, nómo somerakano epo kaikia sawi one poparakanapo. Re Kotipoko paroaka risikianie, aíyaka nómo reaki somerakano epo poparakanapo. Kotimo kakaro yaku ararenane repo maka paroaka risikianie.

¹³ Arirakano Keresoa paosa aporo hinamo Pápirone† sese apea risia amo reaki ayaparakanapo. Kotimo reane murikimasa ayíáka iane soko ayíáka murikimasapo. Ipu soko reaki ayaparakanapo. Nōmo Keresoa paosa hokosa Makamo soko reaki ayaparakanapo.

* 5:4: Saro sipi wafaya fanaraka reane Yasu ipipo. † 5:13: Rome sitiane takumeaka Pápirone sitiane somesapo. Asiamo some kepoane Pápirone aporo hinamomo watikiaka rakiraka risia ayíáka, Rome aporo hinamomo soko ayíáka watikiaka rakiraka risiapo.

¹⁴ Repo namina yia himu tumurumo hemakapukua hokono mokoanie. Keresoaki patera asesa aporo re suane tau auaraka risikiasimo nōmo hemakapurakaripo.

2 Pita

2 Pita sawi one mahemakapukusa someane oyapo.

Pitamo ipi kukusa maiya ane makerakano hemakapuraka, sawi one Keresoa paosa aporo hinamo hauaka kekepoa risiaki popasapo. Maiya amo kotafe tisa fasere pekea some karakano, Pitamo kaikia, Keresoa paosa aporo hinamomo kakimakohoamo sawi one popasapo. Hukuarura maiya amo kotafe tisane hukurukua kára fanasihokosapo, aisapo.

Re Keresoa paosa aporo hinamoane aporo metakiramo mokoatikirakano, repo Yasuane himu nekea kau tesane hemakapunie. Repo ayíáka hemakapurakano re paroaka risikiakosapo.

Arirakano Yasu paripeakosaposane, kakaro paripeakosapo aisapo.
2 Pita sawia some kepo parakuraka popasane oyapo.

1:1-2 Pitamo sawi one kepomarekea popasapo.

1:3-15 Isu Keresoa paoraka risikiasimo Kotimo isu pasimosapo. Pasimosasamo isiapo Kotimo makata aina kotesane kekemahoanie, aisapo.

1:16-21 Porofete aporomo Kotimo somerakano kaikia some karapo, aisapo.

2:1-22 Kotafe tisamo someane kakimakopo, aisapo.

3:1-18 Yasu pariaperamo makata ayiakakosane popasapo.

Pitamo sawi meta keseke poparaka makesane oyapo.

¹ Yasu Keresomo tarira aporo soko ipi aporo raipane soko anopo. Ano Saemone Pitamo reaki sawi one poparaka makerakanapo. Arirakano kakaro ereketaesa susuane Yasu ipipo. Yasu Keresoane isiapo Kotipo. Arirakano isu Mafasira Aporoane Yasu ipipo. Yasumo makata aina ereketae rakisia aeyaka isu mafasisiapo. Eane ereketae reasasamo, isiapo tarira aporomo Kotiaki himu hakásaraka hemaka apura ayíáka, repo soko Kotiaki himu hakásaraka ayíáka hemakapurakanapo. Himu hakásaraka hemakapurane makata kotesapo. Re himu hakásaraka hemakapura aporo hinamoaki nōmo sawi one poparaka makerakanapo.

² Repo Kotiane soko Unihae Yasu Keresoane soko hemakapuraka risikino, tetapō yaku ararenane soko auaraka risirane soko reaki kára kakasimo nōmo hemakapurakaripo.

Kotimo murikimasa aporo hinamoaki someraka, “Re uyáka risikianie,” aisane oyapo.

³ Yasumo isuaki someraka, “Ano faesa koteaka area ayíáka, re soko koteaka faeraka risikiako peae.” Aíyaka isu koteaka susu risikiasimo, epo wakapuamo isuane siaraka ararerakanapo. Kotimo ipi aina ayíáka isiapo ayiakasimo, Yasumo isuaki arareraka tarirakanapo. Isiapo Kotiane hemakapusimo tarirakanapo. ⁴ Tariraka reke, epo isuaki koteaka kára ararehokosaposane, yumo koteaka kára arareraka rekenapo. Arirakano isiapo watikiaka rakisimo makata watikiaka hemaka apuramo isuane kirimanapo. Asiāne Kotimo ararenamo isuane ararerakano isu mawakapuraka risikinapo. Asiamo isiapo makata watikisane metakarirakanapo. Koti ipi koteaka susu area ayíáka, isu soko koteaka susu risikiasireapo.

⁵ Koti area ayíáka isu risikiakosakipoko, uyáka rakinie. Fana Kotiaki himu hakásaraka hemakapukua risikianie. Ayíáka risike, aporo hinamo suane arareraka makotehoanie. Makoteraka risike, Kotimo ainane hemakapukusakipoko rakinie. ⁶ Ayíáka risike, hasaka hemakapukua rakirapaka, repo namina kauane koteaka asekea risikianie. Ayíáka risike, makata umisa fasereperakano Yasu Keresoane metakarirafaraka paroaka risikianie. Paroaka risike, Kotiaki hemakapukua ereketae risikianie. ⁷ Ayíáka risike, Keresoa paosa aporo hinamo suane repo ararehoanie. Arareraka, aporo hinamo suane himu tumurumo hemakapukua risikianie. ⁸⁻⁹ Repo makata aina kotesane káraraka ayíáka rakiraka risikino, Unihae Yasu Keresoane repo kakaro koteaka hemakapusapo. Arirakano

aporomo makata aina kotesane rakiraka rekeanafonoraka rea, aporoane hi katosa area ayíáka rekenapo. Aporoamo koteaka asekeanafonoraka epo himu watikisane fana Yasumo kosoraka mafasane, epo meraruraka reke nenakamaka makata hemaka apura ayíáka himeteraka hemakapurakanapo.

¹⁰ Asiamo Keresoa paosa mae papao, Kotimo re murikimaka pasimosapo. Pasimosane metakarirapaka paroaka risikianie. Re paroaka risikino, re paripukusafapo. ¹¹ Re paripunafonorakano keseke re hepene yapura hiasimo Yasumo pasimokoakosapo. Asiamo re Yasuyaki hakása yaiya risikiakosapo. Isiapo unihaeane Yasu Kereso ipipo. Epo isuane mafasirapo.

¹² Arirakano some one fana repo kaikia, kakaro kekemasane merarunapaka, nōmo efera hunia someaka poparakanapo. ¹³ Ano hauaka wo area maiya amo, some one repo hemakapusuane merarunapaka nōmo reaki, "Someaka popana one hemakapunie," airakanapo. ¹⁴ Arirakano ano kukusa maiyane makerakanapo, aíyaka Unihae Yasu Keresomo anoaki kakama somesapo. ¹⁵ Ano kusuakipoko nōmo someane maiya suamo repo hemakapusimo nōmo poparaka taerakanapo.

"Keresomo faesane ano Pitamo asesapo," aisane oyapo.

¹⁶ Unihae Yasu Keresoane ipi wakapuyaki paripeakosapo, aisapo. Arirakano aporo sisimamo wate fana ásiapakae, aíyaka some kepo rakupe pesane kaikia, isiapo reaki ayíáka some kasafapo. Wae. Isiapo himo Yasu Keresoane unihaeaka rekeno asesapo. ¹⁷ Isu ūri teraya hikia risiakipoko Yasuane ipi Ata Kotimo makama fanaraka faesane kaka, Kotimo hepene yapunaka someraka, "Eane nōmo nī hokosapo. E nōmo himu tumurumo kára hemakapukua seserakanapo." ¹⁸ Aíyaka hepene yapunaka somerakano, isiapo kaikia ūri teraya isu Yasuyaki hikia, eyaki hakása risike kaisiapo.

¹⁹ Asiasamo porofete aporomo some kasane isiapo menoraka hemakapukua risiane, "Some ane kakaro yanakanapo," aíyaka hemakapurakanapo. Porofete aporomo someane kakimakanie. Arirakano katosakipoko nafa faeraka ikia kara tarira ayíáka, porofete aporomo someamo ikia kára koteaka pusimo isuaki tarirakanapo. Arirakano ti makata meta kara^{*} faeraka nina fiarakano, sere maiya apera ayíáka, repo himumo hemakapusimo Yasu pesapo. Pesane porofete aporomo makata ayiakakosapo, aisane yasiapo.

²⁰ Nōmo makata su popasane repo hemakapukua risike, makata hakása meta one soko repo hemakapusimo popana oyapo. Kotimo sawia poparaka keseke makata ayiakakosapo, aíyaka popasane aporomo ipi hemakapusua aeyaka some kepoane koteaka hemakapurafapo. Arirakano aporomo ipi hemakapusua aeyaka some kayane siahoasi-fareapo. ²¹ Wate fana porofete aporomo someraka, "Keseke ayiakakosane oyapo," aíyaka porofete aporoamo ipu namina hemakapusua aeyaka somesafapo. Kotimo ayiakakosapo, aíyaka someaka maresane, Ho Kotesamo porofete aporoaki mahemakapurakarakano ipu kaikia, some hakása nine some kasapo.

2

"Kotafe tisa aporomo kotafe someane some kakakosapo," aisane oyapo.

¹ Wate fana Isiraya hauaka á kotafe porofete aporo pariraka risiapo. Risike kotafe someane some kasapo. Wate fana ipu kotafe someane some kasa ayíáka, maiya omo soko kotafe tisa aporo pekea reaki kotafe someane somehokosapo. Kotafe someane kakarorakae, aihoasimo kotafe tisa aporoamo yapakeraka some kaka ayíáka, kotafe some akaramo amano mokoatikihokosapo. Ipu Unihae Kotiane hemakapurafaraka, arirakano Yasumo iane farimaka ipoko api kasá aporoane metakarirakanapo. Asiasamo ipu namina yia foaka marutaehokosapo. ² Kotafe tisa aporomo makata aina watikisane aporo hinamo yakaimo kekemahokosapo. Kekemaraka watikiaka rakiraka risikino, aporo metakiramo iane asekea someraka, "Aporo hinamoane Keresoa paosapo, airapo. Ipu makata koteaka

* ^{1:19:} Ti makata meta kara fiahokoana maiya amo area ásiáne Yasu ipipo, aíyaka taku meaka somesapo.

rakiafununine, ipu makata watikiaka rakirakanapo. Ipu aiyaka someraka, Kotimo ikia karane watikirareapo,” aiyaka aporo metakiramo mahokopariaraka somehokosapo.

³ Arirakano kotafe tisa aporomo mone kára mokoako seseraka, namina tipia hemakapukua somesane repo kaiyisimo somerapo. Ayíaka someraka, repo moneane mokoakosapo. Asiamo ipu makata aina watikisane hukurura kepo kaira aporo káramo hemakapukua rekenapo. I marutaehokosakipoko kotimo fanasinane motoakosakipoko kau rekenapo.

⁴ Wate fana hepene aporomo watikiaka rakirakanano Kotimo asekepayasafapo. Kotimo i heao hauaka kutu katosa á mokoasusa risikinapo. Kotimo hukurukusa maiyane faserepeasimo i tipura á kau risikianapo. ⁵ Arirakano wate fana hauaka wo soko aporomo watikiaka rakiraka risike, Kotiane metakarirakanano, Kotimo asekepayasafapo. Noamo aporo hinamoaki some karaka, “Repo makata watikisane metakarikia, ereketae koteaka risikianie.” Airakano aporo hinamoamo kakipayasapo. Kakipayaraka Kotiaki patera tarikia risikino, Kotimo he kára karaka, i suane he nekea kukua kesapo. Asiāne maiya amo Noayaki aporo hinamo yatipinusu hákasa Kotimo mafasisiapo.

⁶ Arirakano Sotome taoneane soko, Komora taoneane soko, Kotimo ira rufi karaka, taone tetane iramo inasapo. Asiamo aporo hinamo taone teta á risiamon Kotimo someane koaretaeraka Kotiaki patera tarikia risiasamo Kotimo iane kakaro marutaesapo. Asiamo keseke aporo hinamomo Kotimo someane koaretaeraka Kotiaki patera tarikia risikino Sotomepe Komora taone teta iramo inasane, repo hemakapunie. I inasa ayíaka, isu soko watikiaka ayíaka rakiraka risikino inakasireapo. Aiyaka hemakapusimo isuaki tarisiapo.

⁷ Arirakano Sotome taonea Rote koteaka reke, aporo metakiramo raraporaka risikino, Rotemo asekea mahisisapo. Roteane koteaka reasasamo Kotimo eane mafasisiapo.

⁸ Arirakano Roteane ereketaeraka, aporo watikisayaki reke, epo aseane ipu raraporakanano asekea, arirakano epo kaiyiáne ipu some watikisa somerakano kaisiapo. Maiya suamo ipu makata watikiaka rakirakanano, Rote ipi koteaka reasasamo mahisiraka reapo. Epo iaki mahisiraka rekeno Kotimo eane mafasisiapo.

⁹ Asia ayíaka aporo ereketae risiane aporo metakiramo mokoatikirakanano, Kotimo asekea hemakapuraka mafasiakosapo. Arirakano aporo watikiaka risiane hukuarura maiya amo Kotimo iane kakaro fanasihokosapo. ¹⁰ Arirakano Kotimo someane koaretaena aporo hinamoane soko, rarapona aporo hinamoane soko, Kotimo iane namo kakaro kára fanasihokosapo.

Arirakano kotafe tisa aporoane re arisia perakano, aporoane koaretaena aporopo. Ipu namina yano motosane makáraraka risike, namonafaraka, hepene aporo fanaraka risiane mainamarerapo. Hepene aporoaki mainamarerakanano yia, ¹¹ hepene aporoane Unihae Kotiyaki hakása risia amo Kotimo kaiyisimo hepene aporo metakirane hukururafapo. Kotimo somemane koaretaena aporoane wakasemapo. Iane hepene aporomo marokesapo. Hepene aporoane kakaro wakapuraka risia nineo, ipu iane hukururafapo. ¹² Arirakano kotafe tisa aporomo makata mahimedesane mainamareraka someraka risikinapo. Yasaro mahimeteraka koraka risira ayíaka, i ayíaka risikinapo. Yasaro mano káraraka rekeako pusuane kakinumo rurapo. Kakinumo arura ayíaka kotafe tisa aporoane mahimeteraka risiane kukua kekea fahokosapo.

¹³ Ipu aporo metakira mokoatikina ayíaka, Kotimo iane fanasiraka mokoatikhokosapo. Sere maíyamo i seseraka risikiakosakipoko kaumo hemakapusuane kekemaraka, raraporaka, watikiaka rakikia risike, makata hakimorane seseripo, aiyaka risirapo. Kotafe tisa aporoane reyaki hakása sarimaraka toke, makata hakása nekea airakanapo. Aporoamo kaiyanafaraka kakama watikiaka rakirapo. Ipu makata watikiaka rakira arakaru tipia re risikinapo. Asiamo repo yano motosane ipu mawakasemanapo. ¹⁴ Maiya suamo hinamo hakimako ipu himo asekehaeraka himumo kára watikiaka hemakapurane rukupatenafapo. Arirakano aporo himu paroaka hemakapunafonosa aporoamo makata watikiaka rakisimo ipu kirimanapo. Aporo metamo makatane mokoako karekerafaraka

mokoakosa susunapo. Asiamo makata su akipoko Kotimo iane fanasina hauaka á pusiehokosapo.

¹⁵ Arirakano i ikia kara kotesane metakarikia, ikia kara watikisa hasaka puraka, aporo yano motosa Péaomo ipi maeya Péramemo mone mokoako watikiaka rakiako hemakapusua ayíáka, kotafe tisa aporoamo soko, ayíaka watikiaka hemakapurakanapo. ¹⁶ Arirakano Pérameaki saro tokimo someraka, “Nómo watikiaka rakiane siahoasi-fareapo.” Aíyaka epo watikisane tariako, saro tokimo mehoanafonona amo eaki somesapo. Aporomo some akará ayíáka, saro tokimo eaki someraka, “Ayiakakopo,” aisapo. Péramemo watikisane rukupatehoasimo saro tokimo somesapo.

¹⁷ Arirakano he kafane serana ayíáka kotafe tisa aporomo hemakupurafaraka ne-nakamaka somerane asiapo. Arirakano atifomo ako mokoa purakano yao perafapo. Yaoane peanafonorakano hemoane makotenafapo. Aina ayíáka ipu someamo aporo ararenafapo. Asiasamo aporoane hauaka watikisa katosa á fanasiraka risikiako pusimo Kotimo maroporaka fasapo.

¹⁸ Arirakano ipu rupiraka nena some karáka, aporo hinamo Yasuaki kawe risikiako parisane kirimahoko someraka, “Hinamo hakimayane siahoasireapo. Makata kára nekea he watikisa kára neane siahoasireapo.” Aíyaka aporo hinamo Yasuaki kawe risikiako parisamo watikiaka hemakapusimo ipu kirimanapo. ¹⁹ Ipu someraka, “Isiapo someane repo kaikia kekemarakano, makata metamo reane asekea rekeakosafapo. Repo namina hemakapusuane kekemahoane siahoasireapo,” airapo. Asiāne aporoamo makata aina watisane kekemarapo. Makata watikisamo iane asekea rekeno iane makata watikisamo aporo raipa risikinapo. Asiamo makata metamo re asekea rekeno repo makata akipoko raiparaka rakirakanapo.

²⁰ Asiamo aporomo hauaka omo makata watikisane metakarikia, Unihae Yasu Kere-soaki hemakapukua reke, Yasumo mafasisiane hemakapukua, eaki rekeako pariraka, nina, eféra hunia hauaka omo makata watikisane kekemaraka rakirakanone, ane aporoamo watikisane namo kakaro kárahokosapo. Aporoane Yasuaki rekeako pari-hoasiraka rea maiya amo, ipi makata watikiaka rakisiane, hákasa wakasemapo.

²¹ Arirakano aporomo ikia kara ereketaesane hemakapunafonora watikiaka rakisiane hákasa wakasema watikirareapo. Arirakano aporoane ikia kara ereketaea pukua, Kotimo somemaneane kakimaka nina, keseke metakarirane namo kakaro kára watiki-rareapo. ²² Fana aporo metamo yapake someraka, “Kásamo ipi mome pusuane eféra hunia nenapo,” aisapo. Aíyaka some meta soko yapake someraka, “Saro ororoa yokesane hea tapukua, eféra hunia ororoa yokerako paripurapo,” aisapo. Aina ayíáka aporomo soko makata watikisa metakrisiane eféra hunia rakiako paripurapo.

3

“Yasu paripeakosapo,” aisane oyapo.

¹ Hameo, yape tetamo nōmo reaki sawi amakera oyapo. Repo koteaka hemakapusimo makata fana kaisiane merarunapaka nōmo eféra hunia poparakanapo. ² Wate fana Kotimo porofete aporo kotesamo someraka, “Makata ayiakakosane oyapo.” Aisane repo merarunapaka nōmo poparakanapo. Mafasira aporo Unihae Yasumo somemaneane tarira aporomo reaki some karakano, repo kaisiapo. Kaisiane repo merarunapaka nōmo poparakanapo. ³ Makata one hemakapunie. Fahoko makeana maiya amo, aporo metakira peraka, ipu namina himumo watikiaka hemakapusua aeyaka some karaka, reaki mahokopariraka someraka, ⁴ “Yasumo reaki someraka, ‘Ano paripeakosapo,’ aisane pariapera mayare? Yasu paripeakosaposane, someraka risike yia, isiapo makasa kauamo soko eane asekeanafonoraka kukua kesapo. Aíyaka somepe pekea, pipu o paurakanapo. Wate fana Kotimo hauaka one kepomaresa maiya amo makata su risiane pipu yumo soko arisia yuyapo. Makata meta faserepesafapo,” aíyaka aporoamo mahokopariraka somehokosapo.

⁵ Aporoamo someraka, “Makata suane fana arisia ayíáka yaiya risikiakosapo,” airapo. Asiáne Kotimo makata ayiakakosaposane ipu kakipayarakanapo. Asiamo ipu some kakipayasane oyapo. Wate fana Kotimo some aeyaka ti yapurane faserepesapo. Heane makikisihoane hauaka parosa faserehesapo. Asiamo hauaka kára one he numu tipia rekenapo. ⁶ Wakasema nina keseke Kotimo some aeyaka hauaka kára one he keraka, hemo makasokoperaka makata su he nekea kukua kekea fasapo.

⁷ Asiamo Kotimo ipi akaimo somesa hakása yinaka, ti yapurane soko, hauaka kára one soko, inaka fahokosapo. Kotimo aisasamo iramo inakakosa maiyane faserepeasimo ti yapuramo soko, hauaka kára omo soko kau risikinapo. Haru inakanafonoraka, hukuarura maiya amo, Kotiaki patera tarisia aporo hinamoane fanasiraka marutaeraka fahokosapo. Maiya amo kotimo ti yapurane soko hauaka kára one soko inakakosapo.

⁸ Hameo, makata hakása one meraruhokopo. Yáki ane soko, ere maiya ane soko, sereane soko, isiapo menona ayíáka, Kotimo ayíáka menonafapo. Unihae Kotimo hemakapusuane sere hakásane keremisi kára wane taosene (1000) asíapo. Arirakano keremisi wane taosene ane sere hakása asíapo. ⁹ Repo hemakapuraka, “Unihae Kotimo keseke ayiakakosaposane wate foaka anakarifapo. Epo masekeame ayiane.” Aíyaka hemakapukupo. Re aporo hinamo hakása meta fanasihokohoamo, aporo hinamo suamo ipu namina makata watikisane rukupateraka risikiako parihoasimo, Kotimo iane kau rekenapo. Ti yapurane soko, hauaka kára one soko, inakakakosaposane Kotimo wate foaka anakanafapo.

¹⁰ Arirakano aporo ape wafayane meraruamo reakipoko, hakimora aporo apera ayíáka re meraruamo risiakipoko, Unihae Yasuane paripeakosapo. Maiya amo kára urakano ti yapurane fahokosapo. Sere maiya soko, ere maiya soko, ti makata soko, suane iramo inaka fahokosapo. Hauaka kára one soko, makata su hauaka wo risiane soko, su inaka fahokosapo.

¹¹ Makata su fahokosapo aisasamo, reane mayíáka risikiakosare? Repo makata watikisane kikisiraka, koteaka susu risike, Kotimo ipi makata ainane susu kekemaraka rakinie. ¹² Asiamo Yasu paripeakosa maiyane repo hemakapukua Yasu foaka paripeasimo seseaka rakiraka risikanie. Yasu pariapera maiya amo ti yapura makata risiane sere maiya soko, ere maiya soko, ti makata soko suane inaka fahokosapo. Arirakano makata su hauaka tamo atura kayane soko, hauaka kima kayane soko suane wariwariraka inaka fahokosapo. ¹³ Arirakano Kotimo someraka, “Ti kaweane soko, hauaka kaweane soko, haku kepomarekea faserepeakosapo. Kawe fasereaperá makata kawe kotesa ereketaesane susu risikiakosapo.” Aíyaka Kotimo someaka motosane isiapo kaikia someraka, “Makata su kaweane isiapo asekeariripo.” Aíyaka aseakosakipoko kau risikinapo.

¹⁴ Hameo, Yasu paripeakosa maiyane hemakapukua koteaka asekea risikianie. Kotimo aseane repo makata watikisane metakarikia, koteaka susu risikino Kotimo asekeasimo, eaki yunusane metakarikia, tákeraka risikino epo asekeasimo koteaka susu risikianie.

¹⁵ Yasu haru peanafonorakano repo hemakapuraka, “Isu aporo hinamoane eaki risikiako parihoasimo e haru perakanafapo.” Aíyaka hemakapunie. Asiamo Kotimo Poreaki takekea hemakapurane karakano, Poremo soko some hakása yine reaki popasapo. Poreane isu Keresoa paosa aporomo maepo. Eane isiapo kára hemakapurakanapo.

¹⁶ Makata keseke ayiakakosane soko Yasuaki risikiako parisane soko, Poremo sawi sua popasapo. Poremo sawi popasa amo kepoane parosasamo aporo metakiramo wafororaka menoraka, kepoane hemakuprafapo. Arirakano aporo metakiramo Kotiaki himu hakásaraka hemakapusuane roraraka risiamo, Poremo sawi popasane himeteraka some akara maiya amo hasaka someraka, ipu namina hemakapusua tipia some karápo. Aporoamo Kotimo sawi suane himeteraka kepo mokome some karápo. Aporoamo kotafe some karakano i fanasina hauaka á pukusapo.

¹⁷ Hameo, Kotimo someraka, “Nōmo somemané koaretaena aporomo mokome hasaka some kakakosapo.” Aisane mahimeteraka risikiakopo. Koaretaena aporomo hasaka

some karakano someane repo kakimakopo. Ira maposa horohororaka ruaka apura ayíáka, anapaka paroaka risikianie. Ipu kotafe somerakano repo kakimakopo.

¹⁸ Repo someraka, “Isu Mafasira Aporoane isiaapo Unihae Yasu Kereso ipipo. Repo eane kára hemakapusimo ano seseripo. Epo yaku ararenane repo kára hemakapusimo ano seseripo.” Aíyaka repo Yasu Keresoaki hemakapusuane káraraka risikianie. Yasuane ipi wakapu kárayaki rekenapo. Asiasamo yumo soko, keseke soko, maiya suamo eane kekerehoasimoripo. Kakaroripo.

1 Yone

1 Yone sawi one mahemakapukusa someane oyapo.

Sawi one popasane Yasumo aporo hakāsa pura Yonemo popasapo. Yasu hepene yapura hisiakipoko keremisi 60 faraka, Yone sisimaraka reke sawi one popasapo. Arirakano Yone Efesase ape sumua reke, Keresoa paosa aporo hinamoane asekea reapo.

Maiya amo aporo yakai koraka toke, kotafe someane some karaka risiapo. Kotafe someane Keresoa paosa aporo hinamomo kaikia hemakapurapaka Yonemo sawi one popasapo.

1 Yone sawia some kepo parakuraka popasane oyapo.

1:1-4 Sawi popana one Yonemo kepomarekeea popasapo.

1:5-2:29 Faesamo kepoane Kotipo. Aporomano faesa á puraka risike Yasumo ipi makata kotesa aina susuane kekemahokosapo. Arirakano makata watikisane kikisiraka hemakapukua risikiakosafapo. Faesane soko katosane soko tati hakāsa nineraka siasafapo.

3:1-24 Kotimo hokosamo namina yia himu tumurumo hemakapukua risike, koteaka siaka rakirapo. Arirakano Sataneane kekemara aporo hinamomo watikiaka raki-rapo.

4:1-6 Aporomo somerakano koteaka kaikia takekea hemakapuraka, "Somerakane, Kotimo some kasare? Satanemo some kasare?" Aiyaka kepoane takekea hemakapunie.

4:7-5:4 Metaki himu tumurumo hemakapuramo kepoane Kotipo. Asiamo Kotimo hokosamo namina yia himu tumurumo hemakapupe puane siahoasireapo.

5:5-21 Yasu hauaka wo pesane aporomanomo kau maka pesapo. Arirakano wakinisimo asesasamo someane mawakapusapo. Arirakano yaiya risikiakosane Yonemo some-sapo.

"Yasu ipi yano motosa meta Somepo," aisane oyapo.

¹ Kepomaresa maiya amo e yaiya reapo. Yaiya reramo somesane isiapo kaisiapo. Eane isiapo himo asesapo. Epo ainane soko isiapo asesapo. Eane isiapo hokonomo soko sakaisapo. Yaiya Rera Some amo kepoane e ipipo. Eane nōmo reaki poparaka makerakanapo.

² Yaiya Rerane isu risia wo fasereperakasupo. Fasereperakano isiapo asesapo. Isiapo e asesane reaki someaka poparakanapo. Yaiya Rera kepoane soko reaki someaka poparakanapo. Fana ipi Atayaki hakāsa reane, hauaka wo kawe fasereperakasupo. Fasereperakano isiapo asesapo. ³ Isiapo asesane soko, epo somerakano isiapo kaisiane soko, nōmo reaki someaka poparakanapo. Atape ipi hokosa Yasu Kereso tetāki isiapo kataka marekea risikinapo. Isu isina yia himu hakásaraka kikinaraka arisia ayíáka, re soko isuyaki himu hakásaraka kikinaraka risikiasimo nōmo reaki somerakanapo.

⁴ Isu himu seseraka hemakapuramo rosaka taeana ayíáka, re soko himu seseraka hemakapuramo rosaka taehoasimo nōmo sawi one poparakanapo.

"Faesa á risikianie," aisane oyapo.

⁵ Yasumo isuaki some karakano isiapo kaisiane reaki poparaka amakera oyapo. "Koti ipi namo kakaro faesa susu rekenapo. Ea katosa wakasema soko rekenafapo," aisapo.

⁶ Asiamo isiapo isina aporo meta himu watikiaka reke yia someraka, "Ano Kotiyaki hakāsa kikinaraka rekenapo." Aisa nine epo himumo watikiaka hemakapukua reasasamo epo kotafe somerapo. Epo kotafe someraka, arirakano epo makata rakirane soko kotafe rakikia anapo. Aporo ásiáne ipi katosa yia rekenapo.

⁷ Ásiáne Koti faesa area ayíáka, isu soko faesa á risikino, ane Kotiaki kakaro kataka marekea risikinapo. Kataka marekea risikino, isiapo makata watikisa suane Kotimo hokosa Yasumo yapimo kosoraka mafasapo. Mafarakano asekea isu Kotiyaki hakāsa kikinaraka risike, arirakano isu isina yia soko hakāsa kikinaraka risikinapo.

“Faesa ikia kara á pukusakipoko makata watikisane rukupateraka metakarinie,” aisane oyapo.

⁸ Isiapo aporo metamo someraka, “Ano himu watikisa rekenafapo,” aíyaka somerakanone ane, epo ipi yia kotafe somerakanapo. Epo kakaro somerakanafapo. ⁹ Asiāne isiapo makata watikiaka rakisiane Kotiaki hufitaerakano Kotimo mafanapo. Makata watikisa suane kosonapo. Kotimo ainane oyapo. Epo someraka, “Makata watikisane nōmo mafanapo.” Aira Koti amo makata watikisane kakaro mafanapo. Epo aíyaka somesane metakarirafapo. Epo ipi ayiáka ereketaeraka susu rakirapo.

¹⁰ Kotimo someraka, “Re aporo hinamo suamo watikiaka rakirapo,” airapo. Arirakano isiapo aporo metamo someraka, “Nōmo watikiaka rakianafonasamo Kotimo someane kotafe somerakae.” Aisa aporoamo Kotimo someane kaikia hemakapurafapo.

2

¹ Hameo, reane nōmo hokosa asiapo. Repo makata watikisane rakiakohoamo nōmo reaki sawi one poparaka makerakanapo. Arirakano repo metamo watikiaka rakirakano, Yasu Keresomo epoko farimaka ipi Ataki someraka rekenapo. Yasu ipi namo kakaro ereketae kotesa susupo. ² Isiapo makata watikisa supoko epo farimaka Kotiaki api kakako Yasu kusuapo. Isiapo watikisane soko, aporo hinamo hauaka sua risia amo watikisane soko suane mafahoko Yasumo farimaka kusuapo.

“Faesa ikia kara á pukusakipoko Kotimo ayiakanie, aíyaka someaka maresane kakimakanie,” aisane oyapo.

³ Isiapo aporo metamo someraka, “Kotiane eparakapo. Eane ano himeteripo.” Aíyaka himetenapaka Kotimo makata ayiakanie, aíyaka someaka maresane isiapo kakaro kakimarakano, ane Kotiane isiapo namo kakaro hemakapurakanapo. ⁴ Arirakano aporo metamo someraka, “Kotiane nōmo hemakapurakanapo.” Aisa nine Kotimo makata ayiakanie, aíyaka someaka maresane, kakipayaraka rea aporoamo kotafe somerakanapo. Makata kakaroane hemakapurafaraka, epo kotafe somerapo.

⁵⁻⁶ Arirakano aporo metamo Kotimo makata ayiakanie, aíyaka someaka maresane hemakapupe pukua kakimarakano, Kotimo ipi himu tumurumo hemakapurane e himua siaraka rekerakano kaiyakosapo. Aporo metamo someraka, “Nōmo Kotiaki katak marekea rekenapo,” aisa aporoane Yasu Kereso area ayiáka rekeafunupo. Ayiáka reke ipi Kotiyaki hakása rekerakano kaiyakosapo.

⁷ Hameo, Keresomo makata ayiakanie, aíyaka someaka maresane nōmo poparaka amakera one some kawefapo. Fana re Keresoa risikiako parisa maiya amo, Keresomo makata ayiakanie aíyaka someaka maresane, reaki some kasapo. Fana Keresomo makata ayiakanie, aíyaka someaka maresane repo kaikia fasapo. ⁸ Yumo nōmo popana one Keresomo fana ayiakanie aíyaka someaka maresa hakása yiyapo. Asiāne fana ayiakanie aíyaka someaka maresane, some kawe aseraka sikirakanapo. Some kaweane oyapo. Yasu Keresomo aporo metane himu tumurumo hemakapukua rekenapo. Yasu ipi area ayiáka re soko ayiáka risikinapo. Asiamo yumo katosane faraka kakaro faeraka risikinapo.

⁹ Arirakano aporo metamo someraka, “Faesa á ano rekenapo.” Aisa nine epo Keresoa paosa aporo mae metaki hisiraka rekeno ane, e katosa yia rekenapo. Faesa á rekenafapo.

¹⁰ Arirakano epo Keresoa paosa aporo metakiraki himu tumurumo hemakapukua rekeno ane, e faesa á rekenapo. Faesa á reke, e terafaka rukusafapo. ¹¹ Arirakano epo Keresoa paosa aporo mae metaki hisiraka hemakapukua rekenone, e katosa yia rekenapo. Aporoane hi mesa area ayiáka rekenapo. Hi katosasamo ikia kara pukusane aserafapo. “Ano ma purakanarakapo.” Aíyaka mahimeteaka mokome purapo.

“Faesa ikia kara á pukusakipoko, hauaka wo makatane kára hemakapukua rakiraka risikiakopo,” aisane oyapo.

¹² Hameo, reane nōmo hokosa asiapo. Yasumo yano motosa aeyaka repo makata watikisane mafasasamo, nōmo reaki sawi one poparakanapo. ¹³ Aporo sisima reo, ke-pomaresa maiya amo Kereso yaiya reane repo hemakapusuasamo nōmo reaki poparaka

makerakanapo. Hokosa rauao, makata watikisamo kepoane Satane ipipo. Repo e marokesasamo nōmo reaki sawi one poparaka makerakanapo. ¹⁴ Hame, hokosa reo,* Atane repo hemakapukua risiasamo nōmo reaki sawi one poparaka makerakanapo. Aporo sisima reo, kepomaresa maiya amo, Kereso yaiya reane repo hemakapusuasamo, nōmo reaki sawi one poparaka makerakanapo. Hokosa rauao, re wakapuaka risike, Kotimo someane repo kakimaka hemakapukua risike, makata watikisamo kepo Sataneane repo marokesasamo, nōmo reaki sawi one poparaka makerakanapo.

¹⁵ Arirakano hauaka wo makata watikisamo ainane soko, hauaka wo makata kemoane soko, repo kára seseraka hemakapukupo. Asiamo hauaka omo menane repo kára seseraka hemakapukua risike, Atamo hemakapusuane repo kekemarakanafapo. ¹⁶ Asiamo hauaka omo makatane oyapo. Hinamo himu pukua kaumō hemakapurane soko, makata makosakipoko himo asekehaeraka hemakapurane soko, makata kemo kára wafayaraka rekeako hemakapurane soko, ayiáka makata hemakapura suane hauaka omo menapo. Makata ayiáka hemakapusuane Atamo tarirafapo. ¹⁷ Hauaka omo menane soko, hauaka omo sesenane soko, arupukua fahokosapo. Arirakano Kotimo hemakapusua kekemana aporo hinamoane yaiya risikiakosapo.

“Faesa ikia kara á pukusakipoko Keresomo yununa makatane mokoanie,” aisane oyapo.

¹⁸ Hameo, re nōmo hokosa asiapo. Hauaka omo makatane fahokosa maiyane makerakanapo. Fahokosa maiyane makeanamo aporo hakásá meta ipi káraraka reke, Keresoaki Yunuraka Rera Aporo peakosaposane repo kaisiapo. Kaisia nine, pipu yumo Keresoaki yunu aporo yakai perakano asekeea fahokosa maiyane makerakanapo. Aíyaka isiapo hemakapurakanapo. ¹⁹ Keresoaki yununa aporoane isuyaki hakásá sarimaraka risiapo. Risia nine isiapo Keresoaki himu hakásaraka hemakapusua ayiáka, ipu himu hakásaraka hemakapunafonoraka isu metakariapo. Ipu himu hakásaraka hemakapusua satiki, isuyaki yaiya risikiafunureapo. Aporoamo isu metakarirakano isiapo hemakapuraka, “Aporoane kakaro Keresoa paosafapo,” aíyaka hemakapurakanapo.

²⁰ Arirakano Keresomo re murikimarka Ho Kotesane reaki kasapo. Kasasamo Keresomo kakaro someane repo hemakapurakanapo. ²¹ Kakaro someane repo hemakapukua risikinapo. Ayiáka risike, kakaro somerane soko, kotafe somerane soko, repo takekea sia hemakapusireapo. Asiamo repo hemakapuraka, kakaro someyaki kotafe someyaki tatí hakásá sarimanafapo. Asiamo repo koteaka takekea hemakapusimo nōmo reaki sawi one poparaka makerakanapo. ²² Kotafe hora aporoane epare? Aporomo someraka, “Yasuane Kotimo unihaeaka rekeasimo murikimasa aporofapo. Eane Keresofapo.” Aira aporoane kotafe hora aporopo. Kotafe hora aporoane Keresoaki yununa aporo ayapo. Aporoamo Atape ipi Hokosa Yasu Kereso tetáki patera tarirakanapo.

²³ Aporomo Kotimo Hokosaki himu hakásaraka hemakapunafonorakano, Ataki soko himu hakásaraka hemakapurakanafapo. Asiamo aporomo Kotimo Hokosane keke-marakanano Atane soko kekemarakanafapo. ²⁴ Re Keresoa paosa maiya amo some karakano kaisiane yaiya hemakapunie. Ane meraruhokopo. Some kaka maresane hemakapukua risike, Ataki kataka marekea risikinapo. Ataki kataka marekea risike, ipi hokosa Yasuaki soko kataka marekea risikinapo.

²⁵ Kataka marekea risikino Yasumo someraka, “Maiya suamo re Ata etoyaki hakásá yaiya risikiakosapo.” Aíyaka Yasumo someaka motosapo. ²⁶ Motorakano yia aporo metakiramo kotafe someane repo kekemahoasimo reane kirimaraka risikinapo. Kirimaraka kotafe hokoa some kakakosane, repo kakimarapaka nōmo reaki sawi one poparaka makerakanapo. ²⁷ Arirakano Ho Kotesane Keresomo reaki kasapo. Ho Kotesane reyaki hakásá yaiya reke, makata suane epo reaki tariraka rekenapo. Tariraka rekeno yia, aporo metakiramo reaki makata meta tariako, re peae, aihogosafapo. Makata su kepo suane repo hemakapusimo Ho Kotesamo tarikia some karaka rekenapo. Epo tarikia someraka reke ipi kotafe horafapo. Epo kakaro susu horapo. Epo kakaro

* 2:14: Aporo sisima, hokosa raua, hokosa, iaki susu somesane, Yasumo some hakásá nine aporo hinamo suaki someaka maresapo.

horamo someane repo kakimakanie. Kakimaka yaiya Yasuaki katakamarekearisiyanie.
²⁸ Hameo, reane nōmo hokosa asiapo. Yasu pariaperamo re kaýyaraka pesa sapea fimiti purapaka, eaki mapiraraka risikiakosakipoko, yumo eaki katakamarekearisiyanie.
²⁹ Arirakano Kotimo ipi ainane kakaro ereketae susupo. Ereketae susu area ayiáka, aporomomo meta ereketaeaka rekeno eane Kotimo hokosapo. Ane repo hemakapukua risikinapo.

3

"Isuane Kotimo hokosapo," aisane oyapo.

¹ Isuaki Kotimo himu tumurumo hemakapurakanapo. Kotimo himu tumurumo hemakapurane kakaro kárabo. Epo himu tumurumo kára hemakapuraka isuaki someraka, "Reane nōmo hokosapo," airakanapo. Aisasamo isuane kakaro ipi hokosapo. Arirakano nena aporomo Kotimo ainane hemakapurafapo. Hemakapunafononasamo isu Keresoa paosa aporomo ainane soko ipu hemakapurakanafapo.

² Hameo, Yumo isu Kotimo hokosapo. Asiane keseke isu mayiáka risikanarakapo. Ane yumo kakama hemakapurakanafapo. Makata hakásu uyáka hemakapurakanapo. "Keseke Kereso pariapera maiya amo epo ainane kakaro aseakosapo. Asekeea e area ayiáka, isu soko ayiáka risikiakosapo." Aiyaka isiaipo yumo hemakapurakanapo. ³ Hemakapuraka ayiakakoripo, aiyaka hemakapuraka yumo makata watikisane metakarirakanapo. Kereso ipi watikihoanafonoraka koteaka susu area ayiáka, isu soko watikihoanafonoraka koteaka susu risikiako hemakapurakanapo.

"Kotimo ipi hokosa pariraka risiamo makata watikisane metakarirapo," aisane oyapo.

⁴ Aporo hinamo metamo watikiaka rakiraka reke, Kotimo somemaneane koaretaerakanapo. ⁵ Aporo hinamomo makata watikisane mafahoko Yasu Kereso hauaka wo pesapo. E pesane watikiaka rakira aporo pesafapo. ⁶ Asiamo Kereso patera asesa aporo hinamomo makata watikisane yaiya rakiraka risirafapo. Arirakano makata watikisane yaiya rakiraka rea aporo hinamoamo Yasuane kakaro hemakapurakanafapo. Keresomo ipi ainane soko ipu kakaro hemakapurakanafapo.

⁷ Hameo, reane nōmo hokosa asiapo. Repo watikiaka rakisimo aporo metamo reane kirimarakanoeane kekemahokopo. Aporo metamo ereketaeraka rakirakanoeane aporoane ereketaesa aporopo. Kereso ereketaeraka area ayiáka, aporoane soko ereketaeraka rekenapo. ⁸ Asiāne aporo hinamomo yaiya watikiaka rakiraka risikino, iane Satanemo ipi menapo. Asiamo kepomaresa maiya amo, Satane watikiaka rea ayiáka, yumo soko e yaiya watikiaka rekenapo. Satanemo makata watikiaka rakirane marutaeraka fahokosakipoko Kotimo hokosa Yasu hauaka wo pesapo. ⁹ Asiamo isuane Kotimo hokosa pariraka risikiasimo isu murikimasapo. Asiasamo isiaipo watikiaka yaiya rakiraka risirafapo. Kotimo ipi ainane soko epo hemakapurane soko, ipi hokosa isuaki kasapo. Kasane isu himua rekerakano kaikia, makata watikisane metakarirapo. Isu Kotimo hokosasamo isiaipo makata watikisane rakiako hemakapuanesiahoasifareapo.

"Kotimo ipi hokosa pariraka risiamo Kotimo someane kakimarapo." Aisane oyapo.

¹⁰ Kotimo hokosane epore? Satanemo hokosane epore? Tati kekeposane isiaipo isina yia mayiáka asekeea hemakapukusare? Ereketaeraka risikianafonoraka, arirakano Keresoa paosa aporo hinamoaki himu tumurumo hemakapunafonoraka ayiáka risia aporo hinamoane Kotimo hokosafapo. ¹¹ Wate fana Kotimo someane some karakasuane repo kaisiapo. Keresoa paosa maiya amo kaisiapo. Kaisiane oyapo. Repo namina yia aporo metane himu tumurumo hemakapunie. Aiyaka some karakano repo kaisiapo. ¹² Kaisiasamo Atamemo maeya Kene area ayiáka re risikiakopo. Sataneyaki Keneane paoraka reke, epo ipi mamanea rusua kusuapo. Marirakano ipi mamaneane rusua kusuare? Epo ipi watikiaka rakiraka reke, ipi mamaneamo koteaka rakirakanoeakea, ipi mamaneane rusua kusuapo.

¹³ Asiasamo Keresoa paosa aporo maeo, Keresoa paohoanafonosa aporomo reaki hisirakano re fofahokopo. ¹⁴ Isu kukusa ikia karane metakarikia, yaiya rera ikia kara a purakanapo. Puraka isiapo Keresoa paosa aporo maeane kakaro himu tumurumo hemakapurakanapo. Himu tumurumo hemakapurakarakan kaikia isiapo someraka, “Yaiya rera ikia kara á ano kakaro purakanapo.” Aiyaka hemakapurakanapo. Arirakano Keresoa paosa aporo maeane ararehoko himu tumurumo hemakapunafonorakan apo oane kura ikia kara á yaiya purakanapo. ¹⁵ Keresoa paosa aporo mae metaki hisiraka rea aporoane soko, aporo meta kukusimo rura aporoane soko, tati makata ainane hakása yiyo. Aporo meta kukusimo rura aporoane Kotiyaki yaiya rekeakosafapo. Kotiyaki yaiya rekeakosafapo aisane, repo kaikia fasapo.

¹⁶ Aporo metaki himu tumurumo hemakapura amo kepoane Yasumo isuaki tarisiapo. Isiapo watikiaka rakisiapoko isu rusua kukufunusa nine epo isupoko farimaka kusuapo. “E kusua ayíáka isiapo Keresoa paosa aporo maepoko farimaka kuane siahoasireapo.” Aiyaka hemakapunie. ¹⁷ Arirakano aporo metamo ipi hauaka wo makata kára taesane makata kemo soko metao, mone soko metao makata nakosa soko metao, makata ane kára taesa aporoamo aseane, ipi Keresoa paosa aporo mae makata forokoa rekeno aseke aareraka makata kakanafonorakan, aporoane himua Kotimo ipi makata ainane rekenafapo. ¹⁸ Hameo, aporo metaki himu tumurumo hemakapurane akai susumo somehokopo. Aporo metaki himu tumurumo hemakapuraka namo kakaro aareraka rakinie.

Re Kotimo hikumisia kaiyanafaraka mapiraraka risikiakosane oyapo.

¹⁹ Nómo Kotiaki kakaro himu hakásaraka hemakapukua rekenare? Himu hakásaraka hemakapukua reane nómo ní mayíáka hemakapukusare? Nómo ni Keresoa paosa aporo maeaki himu tumurumo hemakapukua rekerakano kairaka, ane nómo Kotiaki kakaro himu hakásaraka hemakapukua rekenapo. Ayíáka himu hakásaraka hemakapurane sia hemakapukusapo. Kakaro himetehokosafapo. Asiamo Kotiaki kurikurinamo kaiyarak namoraka kurikurinafapo.

²⁰ Arirakano ne Keresoa paosa aporo reke, nómo ní himu yamo neaki someraka, “Nómo watikiaka rakisiapo.” Airakano kaikia, nómo kara hemakapukupo. Koti ipi kárasasamo ipi makata su aseke aseke fasasamo neane aseke kamenakahokosapo. ²¹ Hameo, nómo ní himumo né níyia hukuruuanafonorakan ane, “Ne siareapo,” airakano Kotiaki kurikurinamo kaiyanafaraka mapiraraka kurikurihokosapo.

²² Kotimo somemaneane nómo kakimaka rakikia, arirakano epo hemakapusuane kekemaraka rakikia, ayíáka rakiraka reke, eaki kurikuriraka, “Ayiakanie,” airakano epo ayiakakosapo. “Makanie,” airakano, epo sia makakosapo. ²³ Arirakano Kotimo somemaneane oyapo. “Repo Kotimo hokosa Yasu Keresoaki himu hakásaraka hemakapunie. Arirakano repo namina Keresoa paosa aporo maeaki soko, papáki soko himu tumurumo hemakapunie.” Aiyaka Kotimo somemane motosapo. Asiamo repo kakimaka rakinie. ²⁴ Kotimo somemane kakimara aporoane Koti himua reke, arirakano Koti soko e himua rekenapo. Koti isu himua reane, isiapo mayíáka kairakanare? Epo Ho Kotesane kasasamo isu himua rekerakano kairakanapo.

4

Kakaro Somera Hoane soko, kotafe somera hoane soko takekea hemakapukusane oyapo.

¹ Hameo, maiya omo hauaka wo kotafe some kará porofete aporo yakai some kaka koraka tokenapo. Asiamo aporoamo reaki someraka, “Kotimo Ho Kotesamo anoaki some karakan, nōmo kaikia reaki some karakanapo.” Airakano someane foaka kaikia hemakapukupo. Fana uyáka hemakapunie. “Aporoaki Ho Kotesamo some kasare? Aporoaki kotafe somera homo some kasare?” Aiyaka hemakapukua reke, aporoamo somerakan repo koteaka takekea hemakapunie.

² Apromo some karakan, Kotimo Ho Kotesamo eaki some kasarihoamo repo uyáka takekea hemakapukusapo. Aporoamo someraka, “Yasu Kereso hauaka wo aporomanomo

kauane maka pesapo." Aíyaka somera aporoaki Kotimo Ho Kotesane reasasamo epo sia some karakanapo.

³ Arirakano aporo metamo someraka, "Yasu Kereso ipi aporomanomo kauane maka pesafapo." Aíyaka somera aporoaki kotafe somera homo eaki some karaka rekenapo. Hoane Koti aeyaka pesafapo. Kotafe somera ho hauaka wo Keresoaki yunuhoko Satanemo pusierakano, i hauaka wo pekea risikinapo. Risiane repo hemakapusimo Keresoaki yunu aporo peakosaposane, repo fana kaisiapo. Kaisiane yumo hauaka wo peraka risikino, repo aserakanapo.

⁴ Hameo, repo Atane Kotipo. Kotimo Ho Kotesane re himua rekenapo. Asiamo hauaka wo kotafe somera ho reane, Ho Kotesamo marokesapo. Marokesasamo kotafe some kará porofete aporoane repo marokesapo. ⁵ Kotafe some kará porofete aporomo hauaka omo makata hemakapusuane some karápo. Asiamo ipu hauaka omo menane some karakano, nena aporomo hauaka wo makataki hemakapukua risia aporoamo some ane kairapo.

⁶ Arirakano isuane Kotimo hokosapo. Isiapo some karakano, some ane, Kotimo some kakimara aporomo kairapo. Asiane Kotimo some kakimakanafonona aporomo isiapo somerakano kairafapo. Kaiyanafonorakano asekeea isiapo takekea hemakapuraka, "Aporoaki kotafe somera hoane rekenareapo." Aíyaka hemakapurakanapo. Arirakano isiapo someane aporomo kairakano asekeea, "Aporoaki Kakaro Somera Hoane rekenareapo." Aíyaka isiapo takekea hemakapurakanapo.

Aporo metaki himu tumurumo hemakapurane oyapo.

⁷ Hameo, aporo hinamo metaki himu tumurumo hemakapurane Kotimo isuaki karápo. Karakano isiapo Keresoa paosa aporo hinamo metaki kakaro himu tumurumo hemakapusireapo. Metaki himu tumurumo hemakapura aporo hinamoane Kotimo hokosapo. I Kotimo hokosasamo ipu Kotiane hemakapurapo. ⁸ Aporo hinamo metaki himu tumurumo hemakapunañonakano, Kotiane soko ipu hemakapurakanafapo. Himu tumurumo hemakapuramo kepoane Koti ipipo. ⁹ Kotimo himu tumurumo hemakapurane isiapo asekeasimo, ipi hokosa hakása nine hauaka wo isupoko pusierakano pesapo. Perakano eaki isiapo kataka marekea risike, e aeyaka yaiya rerane isiapo masapo. ¹⁰ Himu tumurumo hemakapura kepoane isiapo Kotiaki himu tumurumo hemakapura ayafapo. Kepoane Kotimo isuaki himu tumurumo hemakapura ayapo. Hemakapura amo isiapo makata watikiaka rakisiane mafahoko ipi hokosane isupoko farimaka kukuko pusiesapo. Kotimo isuane himu tumurumo hemakapuraka ipi hokosane isupoko hauaka wo pusiesapo.

¹¹ Hameo, Kotimo isuane himu tumurumo kára hemakapusuasamo isiapo isina yia himu tumurumo hemakapusireapo. ¹² Kotiane aporomanomo himo aserafapo. Asekeanafonosa nine isiapo isina yia himu tumurumo hemakapukua risikino, isu himua Koti rekenapo. Arirakano Kotimo himu tumurumo hemakapurane isuyaki rekeno, isiapo Keresoa paosa aporo maeaki soko, papáki soko, himu tumurumo hemakapurane kakaro siaraka hemakapukua risikakosapo.

¹³ Kotimo ipi Ho Kotesa isuaki kasasamo, isiapo himua e rekenapo. Asiasamo isu soko Kotiyaki hakása risikinapo. Ayíáka risiane isiapo hemakapurakanapo. ¹⁴ Asiamo hauaka wo aporo hinamo mafasiakosakipoko Atamo ipi hokosa pusierakano pesapo. E pesane isiapo aporo hakása puramo* asesapo. Asesane nōmo aporo hinamo suaki some karakanapo. ¹⁵ Some karakano aporo metamo someraka, "Yasuane Kotimo hokosapo." Aira aporoane himua Koti rekenapo. Arirakano Koti himua soko aporoane rekenapo.

¹⁶ Asiamo isiapo úyaka hemakapurakanapo. Kotimo isuaki himu tumurumo hemakapurakanapo, aíyaka isiapo hemakapurakanapo. Himu tumurumo hemakapura kepoane Koti ipipo. Aporo metamo metaki himu tumurumo hemakapurakano, aporoane himua Koti rekenapo. Arirakano Koti himua aporoane rekenapo.

* 4:14: Yasumo aporo hakása pura metane Yonepo.

¹⁷ Kotimo himu tumurumo hemakapura ayiáka isiaipo Keresoa paosa aporo maeaki ayiáka himu tumurumo hemakapukua rosaka taerakano, Kotimo isu hukuarura maiya amo isu himu karekekeea namoraka risikiakosafapo. Keresomo himu tumurumo hemakapukua area ayiáka isu soko hauaka wo risike himu tumurumo hemakapukua risikino, hukuarura maiya amo isu mapiraraka risikiakosapo.

¹⁸ Aporomo ipi aporo metaki himu tumurumo hemakapukua rekeno, aporo metamo eaki namorakanapo. Asiamo aporo metaki himu tumurumo hemakapurane kararaka wakapuaka hemakapukua reamo namonane mafarakanapo. Aporo namoraka reke, “Ano fanasihokosapo.” Aiyaka hemakapukua namoraka rekenapo. Namoraka reke aporoamo aporo metaki himu tumurumo hemakapurane rosaka taesafapo.

¹⁹ Asiamo Kotimo isuane fana himu tumurumo hemakapusuasamo soko ayiáka himu tumurumo hemakapurakanapo. ²⁰ Arirakano Keresoa paosa aporo maeaki hisiraka rea aporoamo someraka, “Nōmo Kotiaki himu tumurumo hemakapurakanapo.” Aira aporoamo kotafe somerakanapo. Aporo hauaka wo isina himo aseraki himu tumurumo hemakapunafonoraka, Kotiane isiaipo himo asekeanafononaki himu tumurumo hemakapurakanafapo. ²¹ Asiamo somemane Keresomo someaka maresane oyapo. “Kotiaki himu tumurumo hemakapuraka ni Keresoa paosa aporo mae papāki soko himu tumurumo hemakapunie.” Aiyaka Keresomo someaka maresapo.

5

“Hauaka omo menane rukutopakatapiakosakipoko Kotiaki himu hakásaraka hemakapukua risikianie,” aisane oyapo.

¹ “Yasuane isiaipo Unihae Kotimo murikimasane ipi Keresopo.” Aira aporo hinamoane Kotimo hokosapo. Arirakano Koti Atamo hokosa risike, isiaipo Ataki himu tumurumo hemakapura ayiáka, isiaipo Atamo hokosa metakirane, isiaipo mae papa parisa ayiáka, iaki himu tumurumo hemakapurakanapo. ² Isiaipo Kotiaki himu tumurumo hemakapukua, arirakano Kotimo somemane motosane soko kakimaka ayiáka risikino Kotimo hokosa suane isiaipo himu tumurumo hemakapurakanapo, aiyaka isiaipo hemakapurakanapo.

³ Asiamo Kotiaki himu tumurumo hemakapurane oyapo. Kotiaki himu tumurumo hemakapuraka, Kotimo somemaneane soko kakimaka rakiraka rerapo. Asiamo Kotimo somemane amo isuane maumimarerafapo. ⁴ Isu Kotimo hokosasamo hauaka omo menane rukutopakatapiro. Asiamo isiaipo Kotiaki himu hakásaraka hemakapura amo hauaka omo menane rukutopakatapiro.

Kotimo ipi hokosa Yasuane kakama pesane oyapo.

⁵ Hauaka omo menane rukutopakatapiakosa aporoane epare? “Yasu ipi Kotimo hokosapo.” Aira aporoamo hauaka omo menane rukutopakatapiro.

⁶ Rukutopakatapiakosakipoko Yasu Kereso hauaka wo pesapo. Wate fana Kereso peakosaposane Yasu pesane ipi Keresopo. Aiyaka aporomo asekeasimo hemo soko yapimo soko* tarisiapo. Yasu hea tapukumaresane soko, ira matopesa paremareraka yapi pusuapo. Aporomo eane asekeasimo he hákasamo tarisifapo. Hemo soko yapimo soko tetákara tarisiapo. Arirakano Ho Kotesamo soko someraka, “Yasu ipi Keresopo.” Aiyaka isiaipo hemakapusimo Ho Kotesamo somesapo. Kakaro somera kepoane Ho Kotesa ipipo. ⁷ Yasu ipi Kotimo hokosapo, aiyaka isiaipo hemakapusimo makata isíamo tarisiapo. ⁸ Ho Kotesa soko, he soko, yapi soko, makata isia tarisia amo kepoane hakásayiapo.

⁹ Kepoane Yasu pesane ipi Kotimo hokosapo. Eane Kotimo murikimaka pusierakano e pesapo. Pesane makata isía amo isuaki tarirakanapo. Tarirakano asekeea kakimaka hemakapunie. Asesa aporo wikinisimo somerakano isiaipo kakimarapo. Asesa aporo wikinisimo Kotimo hokosa Yasuane tarira ayiáka, isiaipo kakimakasimo Kotimo makata isía amo isuaki tarisiapo. Arirakano hauaka wo asesa aporomo makata tarisiane Kotimo

* 5:6: Yasu ipi ira matopesa paremarea maiya amo e ketaya ferepemo kareane he yapiyaki hakásapusuapo. (Yone 19:34)

makata isía tarisia amo marokesapo. Ipi hokusane Keresopo. Aíyaka Kotimo makata isia amo isuaki tarisiapo.¹⁰ Tarirakano Yasu ipi Kotimo hokusapo. Aira aporoamo makata isia ane hemakapuraka, himo asekea hemaka apura ayiáka hemakapurakanapo. Arirakano kakimakanafonona aporoamo Kotiaki someraka, "Nómo isuaki kotafe someaka atarire." Aíyaka Kotimo ipi hokusane Keresopo aíyaka hemakapusimo makata tarisiane asekeparaka hemakapurafapo.

¹¹ Arirakano Kotimo makata tarisiane oyapo. Kotimo ipi yaiya rerane isuaki kasapo. Isiapo Kotimo hokosaki kataka marekea risikino yaiya risikiakosapo.¹² Kotimo hokosa Yasuaki kataka marekea risia aporo hinamoane yaiya risikiakosapo. Arirakano Kotimo hokosa Yasuaki kataka marekea risikianafonona aporo hinamoane i yaiya risikiakosafapo.¹³ Kotimo hokosa Yasu Keresoaki repo himu hakásaraka hemakapukua risikino, re yaiya risikiakosapo. Ane repo hemakapusimo ano Yonemo sawi one reaki poparaka makerakarapo.

Watikiaka rakisia aporopoko kurikurinane oyapo.

¹⁴ Isiapo kurikurinamo Kotimo hemakapusua aki, isiapo hemakapusua aki, tati siasekeno ane Kotimo sia kaiyakosapo. Aíyaka isiapo namonafaraka mapiraraka kurikurihokosapo.¹⁵ Kotimo ipi hemakapusua aeyaka isiapo kurikurirakano, Kotimo kaikia aohokosapo. Aíyaka isiapo hemakapurapo.

¹⁶ Isiapo Keresoa paosa aporo mae metamo makata watikiaka rakisia nine, makata watikisa amo eane kura ikia kara á karikia punafonorakano epoko kurikurihoanie. Kurikurihoane, aporoamo watikiaka rakisiane hufitaerakano koteaka rerane Kotimo eaki kakakosapo. Arirakano aporo metamo makata watikisa meta rakiraka reke, ipi kura ikia kara á purapo. Kura ikia kara á pusua aporo akipoko kurikurihoanie, aíyaka nōmo somerakanafapo.¹⁷ Makata watikiaka rakira kekepo suane kakaro watikisapo. Makata watikisa meta aporomo rakiraka rekeno, kura ikia kara á pukusapo. Arirakano makata watikisa metakira aporomo rakisiane hufitaerakano Kotimo mafanapo. Mafarakano, aporoane kura ikia kara á pukusafapo.

¹⁸ Aporo hinamo i Kotimo hokusasamo ipu watikiaka rakiraka risirafapo. Aporo hinamoane Kotimo hokusasamo Yasumo mafairaka asekea rekenapo. Asekea rekeno aporo hinamoane Satanemo sakainaafapo.¹⁹ Kotimo hokusane isupo. Asiane hauaka kara wo aporo hinamo Kotimo hokosa risikianafonosane Satanemo unihaeaka asekea rekenapo.²⁰ Asekea reanine Kotimo hokosa Yasu hauaka wo pesapo. Pekea isiapo Kotiane hemakapusimo, hemakapura ane epo isuaki kasapo. Kasasamo Yasu Keresoaki kataka marekea risike Kotiaki soko kataka marekea risikinapo. Kotiane ipi namo kakaro Kotipo. Yaiya rera kepoane ipipo.²¹ Hameo, yatafu soko, yakasa ho soko, kotafe hora hoane soko, kotafe koti pariraka risia, i suaki patera tarikia risikianie.

2 Yone

2 Yone sawi one mahemakapukusa someane oyapo.

Yone rea maiya amo, aporo metakira fana Keresoraka risia amo, Keresomo kakaro someane metakarikia, ipu namina kotafe someane some karaka risiapo. Yonemo paroaka someraka aporoane ararehokopo, aisapo.

Arirakano sawi wo Yonemo ipi yanoane popasafapo. Yonemo ipi yanoane faremarekea úyaka popasapo. Ano aporo sisima Keresoa paosa aporo hinamo asekeea rea aporopo, aíyaka ipiane popasapo.

2 Yone sawia some kepo parakuraka popasane oyapo.

1:1-3 Sawi popana one Yonemo kepomarekea popasapo.

1:4-6 Kakaro someakea soko himu tumurumo hemakapurane soko Yonemo someaka popasapo.

1:7-11 Kotafe somera aporoane pasimaka ararehokopo, aíyaka Yonemo somesapo.

1:12-13 Yonemo makata someaka popahokosane o farakanapo.

Kakaro somerane soko, himu tumurumo hemakapurane soko Yonemo somesane oyapo.

¹ Hinamo* né Kotimo murikimasapo. Néaki soko nōmo hokusaki soko nōmo sawi one poparaka makerakanapo. Pipu ano sisimaraka reke Keresoa paosa aporo hinamo asekeea reane anosasamo, reaki sawi one poparaka makerakanapo. Reane nōmo himu tumurumo hemakapurakanapo. Arirakano kakaro someane kaikia hemakapura aporo hinamo i suane soko nōmo himu tumurumo hemakapurakanapo.

² Maiya suamo Kotimo kakaro someane isiapo kakimaka yaiya hemakapukua risikinapo. Kakaro someane soko, aporo hinamo meta himu tumurumo hemakapurane soko, isiapo kekemaraka risikinapo. ³ Kekemaraka risike Kotipe ipi hokosa Yasu Kereso tetapō yaku hemakapukua ararenane soko kamenakanane soko auaraka risirane soko isuaki kakasimo hemakapurakaripo.

Kakaro somerane soko, kakaro himu tumurumo hemakapurane soko amo kepoane oyapo.

⁴ “Kakaro someane kakimaka risikianie.” Aíyaka Atamo somesapo. Somesasamo nōmo hokosa metakiramo kakaro someane kakimaka risikinapakano nōmo kaikia seserakanapo. ⁵ Asiamo hinamo, neaki somemane kawe haku somehoko nōmo poparakanafapo. Kepomarekea Keresoa paosa maiya amo somemane some kasa hakása nine reaki poparakanapo. Yumo somemaneane nōmo efera hunia poparaka, “Repo namina yia Keresoa paosa aporo hinamoane himu tumurumo hemakapukua risikianie.” Aíyaka nōmo poparakanapo.

⁶ Popasa amo kepoane oyapo. Repo namina yia Keresoa paosa aporo hinamoane himu tumurumo hemakapukua risikino, Kotimo somemane maresane kakaro kakiamara ayapo. Repo namina yia Keresoa paosa aporo hinamoane himu tumurumo hemakapukua risikianie. Aíyaka somesane re Keresoa paosa sereamo kaisiapo.

“Keresoaki yununa aporomo some kakako koraka risikinapo,” aisane oyapo.

⁷ Kotafe some kará aporo hauaka sua koraka risike kotafe someane some karápo. Ipu someraka, “Yasu Kereso hauaka wo aporomano kau maka pesafapo.” Aíyaka ipu kotafe some karapo. Namina kotafe some karaka risike ipu Keresoaki yunuraka risira aporoane ayapo. ⁸ Asiamo Keresoaki yununa aporoane repo kekemanapaka asekeanie. Repo Keresopoko rakisiakipoko epo makata ropo reaki kakakosaposane metakarirapaka asekeanie. Makata ropo su mokoakosakipoko kotafe someane repo kakimakopo.

⁹ Arirakano aporo metamo Keresomo some kasane metakarikia ipu hemakapusua aeyaka some meta paoraka some karakano aporoane Kotiyaki rekenafapo. Arirakano

* 1:1: Hinamoane takume someamo kepoane Yasu Keresoa paosa aporo hinamo sose hakása sarimarka risikinapo. Hokosa ásiáne Keresoa paosa aporo hinamo ayapo.

Keresomo some kasane metakarirafaraka someane kakimara aporoaki Ata Kotiane soko ipi hokosa Yasu Keresoane soko hakāsa rekenapo.

¹⁰ Arirakano aporo metamo Keresomo someane metakarikia some haku kakako perakano aporoaki repo “Maeo,” aihokopo. Eane tereraka pasimaka repo apea karikia pukupo. ¹¹ Asiamo kotafe some kará aporoane repo maeaka pasimaka repo apea karikia purakanone, aporoamo watikiaka rakirane repo soko hakāsa nineraka hemakapukua watikiaka rakirakanapo. Watikiaka rakirapaka kotafe some kará aporoane pasimaka repo apea karikia pukupo.

Yonemo ayapa aisane oyapo.

¹² Nōmo some metakira soko reaki somehokosane kakenapo. Kaya nine someane nōmo hokonomo poparaka makeakosafapo. Arirakano ano re arisia kimisi peraka isu isina hakāsa sarimaraka toke, reaki somehokosapo. Isina hakāsa sarimaraka toke sesehokosapo. ¹³ Nōmo apumo† hokosa Kotimo murikimasa amo reaki ayaparakanapo.

† 1:13: Apu airakane takume someamo kepoane Keresoa paosa aporo hinamo sose meta á sarimaraka risikinapo.

3 Yone

3 Yone sawi one mahemakapukusa someane oyapo.

Sawi one Yonemo aporo hakásá meta yano motosa Kaíase, eaki poparaka makesapo. Sése ape hakásá meta á Keresoa paosa aporo hinamo risiane Kaíasemo asekea reapo. Kaíasemo ipi koteaka rakisia nine, Keresoa paosa aporo hinamo asekea rea aporo meta yano motosa Tiótefesemo ipi watikiaka rakisiapo. Asiamo Kaíaseaki Yonemo, “Asekeanie,” aiyaka popasapo.

Arirakano sawi wo Yonemo ipi yanoane popasafapo. Yonemo ipi yanoane faremarekea úyaka popasapo. Ano aporo sisima reke, Keresoa paosa aporo hinamo asekea rekenapo, aiyaka ipiane popasapo.

3 Yone sawia some kepo parakuraka popasane oyapo.

1:1-4 Sawi popana one Yonemo kepomarekea popasapo.

1:5-8 Yonemo Kaíaseane kekereraka somesapo.

1:9-11 Tiótefesomo makata watikisa ainane Yonemo somesapo.

1:12 Timítirasemo makata kotesa ainane Yonemo somesapo.

1:13-15 Yonemo makata someaka popahokosane o farakanapo.

¹ Kaíase, pipu ano sisimaraka reke, nōmo Keresoa paosa aporo asekea reamo sawi one néaki poparaka makerakanapo. Né nōmo mae asiapo. Nōmo néane kakaro himu tumurumo hemakapurakanapo. ² Hameo, né seseraka reke, nōmo Kotiaki himu hakásaraka hemakapukua reke, aiyáka rekeno, ne kau soko makata takamakanafonoraka koteaka siaraka rekeasimo nōmo repoko kurikurirakanapo.

³ Keresoa paosa aporo metakira ano rea kimisi peraka, nōmo makata ainane anoaki somerakasupo. Nōmo Kotimo kakaro someane himu hakásaraka hemakapukua, kakaro somera ikia kara á kekemarape puraka rekenapakano nōmo kaikia seseraka rekenapo.

⁴ Arirakano kakaro someane nōmo some kayane aporo hinamomo kakimarakano ano seserakanapo. Asiamo kakimasa aporo hinamoane nōmo hokosa asiapo. Kakaro someane ipu kakimaka risikinapakano nōmo kaikia ano kára seserakanapo.

Kaíase koteaka rekenapakano kaisiane oyapo.

⁵ Hameo, Keresoa paosa aporo metakira nōmo apea kumuku perakano, iane fana nōmo asekeanafonosa nine nōmo apea karikia pukua iaki makata nakosa kaka, koteaka asekea rekenapakae. ⁶ Nōmo aporo kimisi pesaki himu tumurumo hemakapusuane, Keresoa paosa aporo hinamo wo risiamo kaisiapo. Asiamo nōmo apea aporo kimisi pekea risina, i ape sumu meta Kotimo someane some kakako purakano, iane koteaka ararehoanie. Kotiane sesehoasimo i makata forokoa risiane ararehoanie. Kotimo sesehoasimo i ararehoanie. ⁷ Asiamo aporoamo Keresopoko makata rakiakosakipoko kimisi purakano, ipu Keresoa paohoanafonosa aporomo moneane morafapo. ⁸ Mokoanafononasamo isu Keresoa paosa aporomo iane ararehoasireapo. Kakaro someane ipu some kakasimo isiapo iane ararerakano, ane iyaki hakásá Unihaemo makata rakirane rakiakosapo.

Tiótefesemo makata watikiaka rakisiane oyapo.

⁹ Fana Keresoa paosa aporo hinamoaki nōmo sawi meta poparaka makesapo. Sawi popasane Tiótefesemo ipi unihaeaka rekeako hemakapuraka reke, nōmo sawi poparaka makesane epo menoraka, kakipayaraka rekenapakae. ¹⁰ Ano repo sese apea apera maiya amo, Tiótefesemo ipi makata rakisiane aporo suaki nōmo somehokosapo. Isuane epo watikiaka hokomaka somesapakae. Hokomaka someaka arirakano Keresoa paosa aporo kimisi pesane ipi apea makata nasimo karikia peaesafapakae. Arirakano Keresoa paosa aporo metakiramo aporo kimisi pesane pasimorapaka epo matasoraka rekenapakae. I kurikuri apea perakano epo pusierakanapakae. Ape hakásá yia risia aporoane pusierakanapakae.

¹¹ Arirakano Kaíaseo, watikiaka ainane kekemaraka rakiakopo. Makata koteaka rakirakano asekea kekemahoanie. Ereketaeraka rakiraka rera aporoane ipi Kotimo hokosapo. Arirakano watikiaka rakiraka rera aporoamo Kotiane hemakapurafapo.

Timítirase ipi koteaka reane oyapo.

¹² Aporo suamo someraka, “Timítiraseane ipi aporo kotesapo.” Airakanapakae. Timítirase ipi kakaro koteaka rekeno asekea nōmo soko “E aporo kotesapo,” airakanapo. Kaíase nōmo someraka one kakaroripo. Some one nōmo soko hemakapurakanapo.

Yonemo ayapa aisane oyapo.

¹³ Nōmo some kára metakira soko somehokosakipoko asiane hokonomo popahokusane hisiripo. ¹⁴ Nōmo né aseako peakoripo. Ano peraka né hikumisi asekea iti somehokosapo.

¹⁵ Né koteaka auaraka rekeasimo hemakapurakaripo. Nōmo aporo táke wo risi-amo néaki ayapa airakanapo. Isiapo aporo táke néyaki hakāsa risiaki, “Nōmo reane hemakapurakanapo,” aihoanie. Nōmo iaki hakāsa hakásaraka someraka, “Yonemo reane hemakapurakanapo,” aihoanie.

Yuti

Yuti sawi one mahemakapukusa someane oyapo.

Yasu hepene yapura hisiakipoko keremisi fifiti su (50) faraka, Yutimo sawi one popasapo. Mariape Yosefe tetapo hokosa tipiane Yuti ipipo.

Kotafe tisamo someane Keresoa paosa aporo hinamomo kekemanapaka Yutimo sawi one popasapo.

Yuti sawia some kepo parakuraka popasane oyapo.

1:1-2 Some kepomarekea popasapo.

1:3-16 Kotafe tisane Kotimo fanasihokosapo.

1:17-23 Keresoa paosa aporo hinamo paroaka risikianie, aisapo.

1:24-25 Kotipe Yasu Kereso tetane makáraraka kekerehoanie, aisapo.

Yutimo sawi poparaka makesane oyapo.

¹ Ano Yutimo sawi poparaka makerakanapo. Yasu Keresomo aporo raipane anopo. Yamesemo maéane anopo. Kotimo murikimasa aporo reaki nōmo sawi one poparaka makerakanapo. Reane Ata Kotimo kára hemakapurakanapo. Yasu Keresomo soko reane aseke rekenapo. ² Kotimo re kamenakaraka repo aporo hinamo meta kirane himu tumurumo hemakapurane soko, auaraka risirane soko, Kotimo reaki kára kakasimo nōmo hemakapurakaripo.

Kotiaki hemakapunafonona aporo pesane oyapo.

³ Hameo, Kotimo re soko ano soko isu su mafasisiane nōmo kára hemakapuraka popahokosapok asiane, nōmo metakarikia nōmo reaki some meta one some kakakosakipoko poparakanapo. Popana one Kotiaki hemakapunafonona aporoaki paroaka somehoanie. Ipu hemakapusimo, repo Yasuaki himu hakásaraka hemakapukua epo someane repo hakimasane makama fanaraka hemakapukua risikianie. Repo Yasuaki himu hakásaraka hemakapura someane Kotimo ipi aporo hinamoaki some kasapo. Some kasane makama fanaraka hemakapukua, Kotiaki yununa aporoamo someane kakimakopo, aíyaka nōmo reaki paroaka someaka poparakanapo.

⁴ Re Keresoa paosa aporo hinamo sarimaraka risiakipoko, Kotiaki hemakapunafonona aporo* reyaki hakásaraka risikinapo. I risike ipu hasaka somerakanapo. Ipu hasaka someraka, “Repo someane hasaka somereapo.” Aíyaka ipu kotafe someane repo takekeea hemakapurakanafapo. Hemakapunafonorakano ipu Kotimo yaku ararena some kasane, ipu kaikia risikiyya, kakaro someane mapariraka kotafe someane some karakanapo. Asiamo ipu some karaka, “Hinamo yaiya hakimaraka risikino soko siapo. Makata watikisa ane Kotimo sia kosohokosapo,” aíyaka ipu hasaka somerakanapo. Aíyaka someraka risike, Yasu Keresoane ipu hisiraka metakarisiapo. Isu aseke rera Unihae Yasu Keresoane ipu metakarisiapo. Metakarisiasamo Kotimo sawia poparaka, “Iane fanasihokosapo,” aíyaka popasapo. Popasa hakásaraka nine ayiakakosapo. Popasa ane repo menosapo.

⁵ Menoraka kakaro hemakapusua nine, repo koteaka hemakapusimo nōmo someaka poparakanapo. “Wate fana Isiraya aporo hinamomo Iyipi hauakane metakarisimo Kotimo iane pasimoyereapo. Pasimosa nine, keseke ipu aporo hinamo metakiramo koaretaeraka risiakipoko, pasimosa aporo hinamoane Kotimo marutaehoareapo,” aisapo.

⁶ Arirakano hepene aporoane Kotimo fanasisane hemakapunie. Asiamo fana Kotimo hepene aporoaki someraka, “Makata rakira one rakinie.” Aíyaka ipu makata rakisimo Kotimo murikimayereapo. Murikimasane ipu koaretaeraka metakarikia, arirakano hepene yapurane soko metakarikia pusuareapo. Metakarikia purakano, Kotimo i

* 1:4: Kotiaki hemakapunafonona aporoane, Yutimo kotafe tisa aporo ayíka risiane popasapo.

senemo taporaka taesa warisiareapo. Keseke i hukurukusakipoko, katosa hauaka á i taporaka taesa yaiya warisikisapo.

⁷ Arirakano Sotome taone aporo hinamoane soko, Komora taone aporo hinamoane soko, taone makeraka risia aporo hinamoane soko i fanasisane hemakapunie. I watikiaka risia ayíáka, Koti hemakapunafonona aporoane ayíáka risikinapo. Arirakano Sotome aporomo soko, Komora aporomo soko ipu namina hinamo arumosane metakarikia, hinamo metakira hakimokoa, aporo hokosa takéyaki enaraka ayíáka risiareapo. Ayíáka risikino Kotimo asekea, fansiraka iramo i paisiane ira ane kopakapurafapo. Kopakapunafononane kepoane ipu makata watikiaka rakisiasamo makata ropoane ayapo. Iane iramo paisiane isiapo kaikia fofaraka namohoasimo popahoareapo. Ipu watikiaka rakisiane isiapo kekemanapaka popahoareapo.

⁸ Asiâne Kotiaki hemakapunafonona aporomo kaisia nine, aporo fana risiamo watikiaka rakisia ayíáka, yumo soko ipu watikiaka rakirakanapo. Ipu hasaka hemakapusuane kekemaraka rakiraka risikinapo. Hinamo hakimaka, arirakano Unihae Kotimo someaka maresane koaretaeraka, arirakano hepene aporoane soko ipu mainamareraka ayíáka risikinapo. ⁹ Kotiaki hemakapunafonona aporo kotafe tisa aporo risiramo hepene aporo mawakasemaraka ayíáka, hepene aporo hakásá meta káraraka reane epo yano motosa Maeko, ayíáka reafareapo. Maekomo Moses kusua kau narisane makosakipoko Sataneaki tafatafasareapo. Tafatafasa maiya amo, Maekomo Sataneane hukurukua mainamaresafareapo. Maekomo someraka, "Unihae Kotimo ne hukurukusapo," aíyaka Maekomo someraka, Sataneane mainamaresafareapo. ¹⁰ Arirakano Kotiaki hemakapunafonona aporoamo hauaka wo makatane hákasa hemakapurapo. Kotimo makatane ipu himeteraka hokomaka somerapo. Saromo himu hemakapurafaraka himu mahimeteraka arisia ayíáka, ipu soko himu hemakapurafaraka himu mahimeteraka risikinapo. Mahimeteraka risike iane arupukusapo.

¹¹ Uao, ipoko enahoasifareapo. Kenemo Kotimo someane koaretaena ikia kara kekemasa ayíáka, i soko koaretaena ikia karane ayíáka kekemarakanapo. Arirakano Péramemo makata ropo mokoako kotafe some kará ikia kara kekemasa ayíáka, i soko makata ropo mokoako, kotafe some kará ikia kara ayíáka kekemarakanapo. Arirakano Mosesemo someane Kóramo koaretaesa ayíáka, ipu Kotimo someane ayíáka koaretaerakanapo. Koaretaeraka i soko kukua keakosapo.

¹² Kotiaki hemakapunafonona aporoane watikiaka risike, iane makata pikirisa asíapo. Repo Keresoa paosa aporo maeane hemakapukua sarimaraka makata anena maiya amo, i soko pekea reyaki hakásá sarimaraka toke makata nenaka, atoamo ipu watikisane re karáka, re himunane mawatikirakanapo. I naminane hákasa fanaraka hemakapuraka, aporo metakirane hemakapurafapo. Hemakapunafonoraka risike, i kaíyanafapo. Iane nenakamaka risike, reane arareraka makotenafapo. Arirakano ti pakae atifomo foaka mokoa puraka yao perafapo. Yao peanafonona ti pakae nenakamaka arisia ayíáka, Kotiaki hemakapunafonona aporo nenakamaka ayíáka risikinapo. Arirakano ira wate peanafonona nenakamaka ira arisia ayíáka, i nenakamaka ayíáka risikinapo. Yakimo ira wate apera ikia amo, ira wate peafunusa nine perafapo. Wate peanafonorakano pikinuyaki fimayane akura ayíáka, i kakaro kukua kerapo.

¹³ Arirakano he tawara kupa yaiya peraka reke, he fea he torofae watikisane he kupamo kakaperemokoa pekea taena ayíáka, ipu makaíyasa makata watikiaka rakirane mokoa pekea taerakanapo. Arirakano ti makata metakira mokome koraka arisia ayíáka, Kotiaki hemakapunafonona aporoane ayíáka mokome koraka risikinapo. Ti makata mokome koraka risina katosa a apura ayíáka, mokome koraka risira aporoane ayíáka, katosa á pukusapo.

¹⁴ Arirakano Kotiaki hemakapunafonona aporoaki Kotimo makata ayiakakosane, i faserepeasiraka, wate fana Inokemo somehoareapo. Atamemo hokosa amo hokosa amo hokosa ayíáka wainepe pukua yatipinuane Inokepo. Epo someraka, "Unihae, hepene aporo tene taoseneyaki (10,000) ¹⁵ aporo hinamo suane hukuruko peakosapo. Peakosa

ane Koti metakarikia fasikia risia aporoamo watikiaka rakisiane tarikia someraka, ‘Repo Kotiane metakarikia watikiaka rakikia, arirakano repo akaimo Kotiaki mokoatikiraka watikiaka someraka risia akipoko, re fanasinane motoakosapo,’ aiyaka hukurukua somehokosapo.” Aiyaka Inokemo popahoareapo.

¹⁶ Kotimo fanasinane motoakosapo, airakano yia, ipu kakipayaraka watikiaka rakiraka risikinapo. Unihae Kotiaki ipu me uaka someraka, arirakano nanaeraka risike, arirakano ipu kaumō watikiaka hemakapusuane kekemaraka rakikia, arirakano i naminane makárahoko rupiaka someraka, arirakano makata ropo mokoakosakipoko aporo metane kotafe kekereraka aiyaka risikinapo.

Repo Yasuaki himu hakásaraka hemakapusuua paroaka risikianie, aisane oyapo.

¹⁷ Hameo, keseke makata aiyakacosane wate fana Unihae Yasu Keresomo tarira aporomo kakama somesapo. Ipu somesane repo hemakapunie. ¹⁸ Ipu somesane oyapo. “Fahokosa maiyane makeanamo, aporo metakiramo Keresoa paosa aporo hinamoane asekea hokomareakosapo. Kotiane soko ipu metakarikia ipu namina watikiaka hemakapusuane kekemaraka rakiakosapo,” aiyaka tarira aporomo reaki some kasapo.

¹⁹ Arirakano Kotiaki hemakapunafonona aporoamo Keresoa paosa aporo metakiramo Keresoa paosa aporo metakiraki fasikia risikiasimo ipu kirimarakanapo. Kirimaraka hauaka wo kaumō hemakapusuane ipu kekemarakanapo. Ho Kotesamo i asekea rekenafapo.

²⁰ Hameo, aporoane arisia aiyaka re aiyaka risikiakopo. Kotiaki kakaro himu hakásaraka hemakapurane paroaka hemakapunie. Ho Kotesamo hemakapusuane reaki mahemakapurakarakano, repo hakása nine hemakapukua kurikurihoanie.

²¹ Kotimo reaki himu tumurumo hemakapusuasamo eyaki hakása risiane metakarikia pukupo. Arirakano isiapo Unihae Yasu Keresomo re kamenakaraka ararehokosa anaka, re eyaki yaiya risikiakosapo, aiyaka hemakapusuane paroaka rekeanafonorakano, aporoane arareraka some kakanie. ²² Arirakano aporomo Yasuaki himu hakásaraka hemakapusuane paroaka rekeanafonorakano, aporoane arareraka some kakanie. ²³ Arirakano aporo metakira hukuarura maiya amo iramo inakako-hoamo, yumo pasimaka arareraka some kakanie. Aporoane ararena maiya amo makata watikisa amo re soko kirimanapaka fasikia risikianie. Pasu paté pitikinisa watikisekeno hisina aiyaka, ipu makata watikisane repo hisihoanie. Makata watikisane hisiraka risikianie. Asiāne aporoane kamenakaraka ararehoanie.

Kotiaki kekeraka kurikurisane oyapo.

²⁴ Re terafaka rurapaka Kotimo wakapuaka asekea rekenapo. Reane epo faesa hauaka á eyaki risikiako karikia hiakosane, epo wakapumo siahokosapo. Epo hauaka á re karikia hinaka, repo watikisane mafaraka, re ereketae susu risikiasimo epo wakapuamo reane makotehokosapo. Makoterakano re eyaki risike seseraka risikiakosapo. ²⁵ Koti hákasa ipipo. Ipi hokosa Unihae Yasu Keresoane ira matopesa paremarekea kusuasamo, Kotimo isu yaku mafasisiapo. Asiamo ipi yano motosane makáraraka kekerehoanie. Kerereraka Koti ipi faesane káraro. Ipi fanaraka rekenapo. Ipi unihaeaka rekenapo. Ipi wakapumo aporo su asekea rekenapo. Wate fana hauaka one kepomareasiraka e reapo. Reane yumo soko yaiya rekenapo. Keseke soko yaiya rekeakosapo. Kakaroripo.

Kotimo Some Faremaresane Yasumo Yoneaki Tarisiane Oyapo.

Some Faremaresa Tarisia sawi one mahemakapukusa someane oyapo.

Yasu hepene yapura hisiakipoko keremisi 65 su faraka, Yone Yasumo tarira aporo amo sawi one popasapo. Yonemo sawi one popasa maiya amo, Pátamose he tonoa tipura makesa reapo. Sawi omo kepoane Kotimo hepene aporomo Yoneaki tarisiapo.

Sawi one Yonemo popasa maiya amo, Rome kamani aporomo Keresoa paosa aporo hinamoane mokoatikisapo. Asiamo isu maiya omo arisiamo mokoatikihokosa maiya ane haru fasereperakanafapo. Keseke mokoatikihokosa maiya ane fasereperakano aseraka, isiaapo sawi omo kepoane koteaka hemakapukusapo.

Keseke maiya wakasemamo Satanemo arakiramo epo winihokosakipoko rakiraka sikhokosapo. Asiāne keseke Kotimo Satane soko, Satanemo aporo raipane soko, mokoatikiraka fanasihokosapo.

Sawi popasa one some akárane taku meaka popasapo. Asiamo isiaapo kepo suane koteaka hemakapukusafapo. Keseke mokoatikiana maiya amo isiaapo hemakapukusapo.

Yarusarame siti kawe kisiane Yonemo asesane hauaka wo rekenafapo. Keseke hauaka one fa ana maiya amo, Kotiaki kekemasa aporo hinamoane su Yarusarame siti kawea risikiakosapo.

Keseke Kotimo Satane ane soko, Satane patera asesa aporoane soko fanasihokosane motoakosapo. Satanemo Kotiane marokehokosafapo.

Kotimo marokerakano, Koti patera asesa aporo ane eyaki yaiya koteaka risikiakosapo. Some Faremaresa Tarisia sawia some kepo parakuraka popasane oyapo.

1:1-8 Sawi one kepomarekea popasapo.

1:9-20 Yonemo Unihae Yasu Keresoane asesapo.

2:1-3:22 Sese yatipinusua sawi popahoanie, aisapo.

4:1-11 Hepene yapura unihae sea kayane Yonemo asesapo.

5:1-8:1 Sawi mawerosa ira pimo manakamosa Unihaemo takomorakano, hauaka wo mokoatikihokosa metakirane faserepesapo.

8:2-11:19 Hepene aporo yatipinusumo pikoro yatipinusuane hakasa hakasaraka rusuapo.

12:1-18 Hinamo soko siapora asía soko Yonemo asesapo.

13:1-18 Yasaro asía fana pesane soko, Yasaro asía keseke pesane soko Yonemo asesapo.

14:1-20 Yonemo makata metakira soko asesapo.

15:1-16:21 Hepene aporo yatipinusumo tisi yatipinusu sakomokoasurakano Yonemo asesapo.

17:1-19:5 Pápirone sitiane Kotimo fanasiraka kakaro marutaesapo.

19:6-20:10 Yasaro asíane soko, kotafe porofete aporoane soko, Sataneane soko Kotimo hukurukua fanasisapo.

20:11-15 Hukurusua maiya ane Yonemo asesapo.

21:1-22:5 Hepene kaweanne soko, hauaka kaweanne soko, Yarusarame siti kaweanne soko, Yonemo asesapo.

22:6-17 Yasu peakosane makepo, aisapo.

22:17-21 Some one repo sanasinapaka asekeanie, aisapo.

Yonemo sawi popasane oyapo.

¹ Kotimo keseke makata ayiakakosane faremaresapo. Some faremaresane Yasuaki tarisiapo. Makeana maiya amo makata ayiakakosane, Yasumo ipi aporo raipaki tarisimo, Kotimo Yasuaki tarisiapo. Tarirakano Yasumo ipi aporo raipa Yoneaki tariako hepene

aporopusiesapo. ² Asiamo ano Yonemo makata asesane soko, makata kaisiane soko, Kotimo someane soko Yasu Keresomo someane soko suane sawi wo nōmo poparakanapo.

³ Kotimo makata ayiakakosaposane sawi wo popasane aporo hinamomo kaiyisimo aporo metamo paroaka sakepamo menoraka Kotimo eane makoterakano, e seseaka rekeakosapo. Arirakano sawi wo popasane epo menorakano kaisia aporo hinamoane Kotimo makoterakano i seseaka risikiakosapo. Arirakano sawi wo popasane kakimara aporo hinamoane Kotimo makoterakano i seseaka risikiakosapo. Kotimo makata ayiakakosaposane tarisiane faserepeakosa maiyane makerakanapo.

Sése ape yatipinusua Keresoa paosa aporo hinamo risiaki Yonemo sawi poparaka makesane oyapo.

⁴ Esea hauaka á Yasu Keresoa paosa aporo hinamo sése ape yatipinusua risia, reaki ano Yonemo sawi one poparaka makerakanapo. Kotiane fana reane soko, yumo soko yaiya rekenapo. Keseke soko Koti yaiya rekeakosapo. Kotiamo yaku ararenane soko, tau auaraka rerane soko, reaki kakasimo nōmo hemakapurakaripo. Koti ipi unihaeaka reasasamo hokopusuamo sea kakenapo. Koti hikumisi neneme takua ho yatipinusu risiamo Kotimo makata rakirane rakiraka risia amo re makotehoasimo nōmo hemakapurakaripo. ⁵ Yasu Keresomo soko reane makotehoasimo nōmo hemakapurakaripo. Aporo hinamomo Kotiane hemakapusimo Yasu Keresomo kakaro someane some kasapo. Aporo kusua fana maturikia taesa fanane Yasu Kereso ipipo. Yaiya reane soko Yasu Kereso ipipo. Hauaka sua unihae suane Yasumo ipi hákasa unihaeaka asekea rekenapo. Yasu Keresomo isuane himu tumurumo hemakapuraka isupoko farimaka kusuapo. Isiapo makata watikisa amo isu asekea Risiane Yasumo yapi pusua amo isuane makokorotaesapo.

⁶ Arirakano pirisiti aporomo rakisia ayíáka, ipi Ata Kotipoko isiapo soko ayíáka rakisimo murikimasapo. Murikimaraka isuane ipi aporo irapo, aíyaka epo ipi unihaeaka asekea rekenapo. Maiya suamo Yasumo ipi faesane soko ipi wakapuanne soko yaiya rekeakosapo. Maiya suamo Yasumo unihaeaka asekea rekeakosapo. Asiamo Yasumo yanoane máfaraka kekereraka risikianie. Kakaroripo.

⁷ Hao, kaisie. Yasu akoyaki perakano aporo suamo eane aseakosapo. E ketaya karesa aporoamo soko eane aseakosapo. Yasu perakano, aporo hinamo hauaka sua risiamo aseraka kara hemakapuraka hihiripuhokosapo. Keseke ayiakakosapo. Kakaroripo.

⁸ Arirakano Unihae Kotimo someraka, “Fanane anopo. Kesekeane soko anopo.” Aíyaka kakaro wakapu Koti amo somesapo. Kotiane fana reane yumo soko rekenapo. Keseke soko yaiya rekeakosapo.

Yonemo Yasu Kereso asesane oyapo.

⁹ Ano Yonepo. Ano soko re soko Keresoa paosasamo isina maepo. Isu suane Yasumo unihaeaka asekea rekenapo. Isu Yasu Keresoa paosasamo, reane soko anoane soko isu su nine aporo metakiramo mokoatikirakanapo. Mokoatikirakano isu Keresoa paosane metakarirapaka paroaka risikiasimo Yasumo wakapuanne isuaki karakanapo. Arirakano aporo hinamomo yasuane hemakapusimo Kotimo someane nōmo some kaka, arirakano nōmo Yasu asekea eaki himu hakásaraka hemakapukua reke some karakano, Pátamose he tonoa ano tipura makesapo.

¹⁰ Yatipinu sere metamo Ho Kotesa anoa káraraka reke, pikoro rurarakarano akaira ayíáka, ano patera sapea sakepamo merakano nōmo kaisiapo. ¹¹ Nōmo kaiyíane someraka, “Néaki nōmo makata tariakosapo. Tarirakano nōmo aseraka sawia popahoanie. Yasu Keresoa paosa aporo hinamo sése apea risiaki, taone yatipinusua sawi poparaka makeanie. Taone yatipinusuane oyapo. Meta Efesase taone, arirakano meta Seména taone, arirakano meta Pékamame taone, arirakano meta Taiataíra taone, arirakano meta Sátisi taone, arirakano meta Firatéfia taone, arirakano meta Reotisia taone ayapo. Á popahoanie.”

¹² Aíyaka aporoamo somerakano, meane kairaka, nōmo aseako rekeako parisapo. Rekeako pariraka aseane, korótomo rakisia nafa yatipinusu risiakipoko ¹³ tipia nōmo

aseane Aporomanomo Táke ásia rekeno nōmo asesapo. Epo pasu horopokara korake yatipinua faisa osoraka, saro kau terakae korótomo rakisia ane otoa hikia,¹⁴ ipi uni itiane kakaro pakaesekeno nōmo asesapo. Pakaesane namo kakaro pakaesa ti pakae asisapo. Arirakano e hiane ira rufi faena ayíáka faeraka rekesapo.

¹⁵ E korakeane aine iramo paisia makata pepeno fasokeno, ho piakaesa ásia rekeno asesapo. Ipi meane kaiyíane, he si perakarakano akaira ayíáka nōmo kaisiapo. ¹⁶ Ipi hokonoa aseane hokono tumurumo ti makata yatipinusu mokoa rekeno nōmo asesapo. Ipi akaia aseane ferepe taku tetakara waresa horopokara akai aeyaka yaoa pekerekene nōmo asesapo. Ipi hikumisiane sere maiya tipiamo kára faena ayíáka faerakasapo.

¹⁷ Asiamo eane asekea, e korakea ano huruperaka kuraka sikisapo. Hurupekea warekeno ano kaua epo hokono tumurumo sakairaka epo someraka, “Ne namohokopo. Fanane anopo. Kesekeane soko anopo. ¹⁸ Yaiya rerane soko anopo. Ano kusuane maturikia taesasamo yaiya rekeakosapo. Aporo kuramo ikia karane soko, hétisi hauakane soko ikia koro kiane nōmo maka rekenapo. ¹⁹ Yumo makata aserane soko, keseke makata ayiakakosane soko, makata su nōmo asesane popahoanie.

²⁰ Korótomo rakisia nafa yatipinusuane kepoane oyapo. Sése ape yatipinusua anoa paosa aporo hinamo arisia ayapo. Arirakano nōmo hokono tumurumo ti makata yatipinusu mokoa rea kepoane oyapo. Ti makata yatipinusuane hepene aporo yatipinusu ayapo. Hepene aporoamo sése ape yatipinusua anoa paosa aporo hinamoane asekea risikinapo.” Aiyaka epo anoaki somerakasapo.

2

Keresoa paosa aporo hinamo Efesase sése apea risiaki Yonemo sawi popasane oyapo.

¹ Yasumo someraka, “Anoa paosa aporo hinamo Efesase sése apea risiane hepene aporomo asekea reaki úyaka popahoanie. Nōmo hokono tumurumo ti makata yatipinusu mokoa rekenapo. Korótomo rakisia nafa yatipinusu risiakipoko tipia ano rekenapo. Reke nōmo reaki somerakanapo.

² Repo makata rakisia suane nōmo aserakanapo. Makata rakira metakarirafaraka yaiya rakiraka risikino, nōmo aserakanapo. Aporo watikiaka risiane repo hisiraka arisie. Kotafe tarira aporo peraka someraka, ‘Isu tarira aporopo. Isiapo someane kakimakanie,’ aiyaka somerakano, repo kaikia ipu someane repo takekea hemakapuraka, ‘Ipu kotafe somerakano, iane tarira aporofareapo,’ aiyaka hemakapuraka, ipu someane repo kakimarakanifapo.

³ Re anoaki paosakipoko reane aporo metakiramo mokoatikirakano soko, makata umisa fasereperakano soko, re anoaki paosane metakarirakanafapo. Metakarianafonraka yaiya koteaka rakiraka arisie. Rakiako hisirakano soko metakarirakarifapo. Maiya suamo repo makata koteaka rakiraka arisie.

⁴ Re koteaka risikiyia, repo makata hakásá meta hasaka watikiaka rakirakano nōmo somerakanapo. Fana repo kepomarekea anoaki himu hakásaraka hemakapusua maiya amo, repo anoaki himu tumurumo hemakapurukua kára seserakasupo. Asiāne repo himu tumurumo hemakapurukua sesesane yumo metakarireapo.

⁵ Arirakano aporo huturia hisia eteraka huruapera ayíáka, re ayíáka hurupepehoareapo. Asiamo repo hasakasane rukupateraka metakarinie. Metakarikia repo fana anoaki himu tumurumo hemakapusua ayíáka efera hunia ayíáka himu tumurumo hemakapurunie. Repo hasakasane metakarikia risikiako parihoanafonorakano repo nafane nōmo makama fearaka nōmo kopakataehokosapo.

⁶ Asiāne makata hakásá meta kotesane nōmo asekea seserakanapo. Nikorase aporomo makata raraporaka rakirane repo rakiako hisiraka arisie. Nikorase aporomo watikiaka rakisia nōmo soko hisirakanapo. ⁷ Re senaki risiamo Ho Kotesamo anoa paosa aporo hinamoaki somerakano koteaka kaiyinie. Kotimo hemoa ira hakásá meta rea

amo wateane aporomo nenakano yaiya risikiakosapo. Arirakano nōmo yunuane rukumosakatapira aporo hinamoaki ira wateane nasimo kakakosapo. Aíyaka anoa paosa aporo hinamo Efesase apea risiaki popahoanie.” Aíyaka Yasumo somesapo.

Keresoa paosa aporo hinamo Seména sése apea risiaki Yonemo sawi popasane oyapo.

⁸ Yasumo someraka, “Anoa paosa aporo hinamo Seména sése apea risiane hepene aporomo asekea reaki úyaka popahoanie. Fanane anopo. Kesekeane soko anopo. Ano kusua maturikia taesane hitaferaka rekenapo. Hitaferaka reke nōmo reaki somerakanapo.

⁹ Reane makata umisa fasereperakano nōmo aserakanapo. Re yumo makata forokoa risikinapo. Asiāne hepene yapura repo makata ropo kára tokenapo. Aporo metakiramo kotafe someraka, ‘Isu Yu aporo pariraka risikinapo. Isu Kotimo aporo ira pariraka risikinapo,’ aíyaka somerakano yia, ipu reane mainamarerakanapo. Mainamarera aporoane Sataneaki paoraka reyaki yunuraka risikino nōmo aserakanapo.

¹⁰ Re mokoatikhokosa makatane faserepeako makerakanapo. Fasereperaka kau tehokosane namohokopo. Kaisie. Re anoaki paosane metakarirakarihoamo kau aseakosakipoko Satanemo re metakira tipura keakosapo. Tipura kekeia sere kaeyako sumo mokoatikhokosapo. Mokoatirkakano anoaki hemakapusuane paroaka yaiya hemakapukua risikianie. Ayíáka risina, kurakano repo yaiya risira makata ropo nōmo kakakosapo. ¹¹ Re senaki risiamo Ho Kotesamo anoa paosa aporo hinamoaki somerakano koteaka kaiyinie. Nōmo yunuane rukumosakatapira aporo hinamoane kurakano, keseke hukuarura maiya amo yape tetá kukusane aseakosafapo. Asiamo iaki fanasina hauaka á pusie, aihokosafapo. Aíyaka anoa paosa aporo hinamo Seména sése apea risiaki popahoanie.” Aíyaka Yasumo somesapo.

Keresoa paosa aporo hinamo Pékamame sése apea risiaki Yonemo sawi popasane oyapo.

¹² Yasumo someraka, “Anoa paosa aporo hinamo Pékamame sése apea risiane hepene aporomo asekea reaki úyaka popahoanie. Nōmo ferepe taku teta waresa maka reke, reaki somerakanapo. ¹³ Repo taonea aporo hinamo yakaimo Satane yano motosane makáraraka risikinapo. Repo taone ane Satanemo asekea rekeno nōmo aserakanapo. Asiāne repo ano metakarirafaraka ano yano motosane makáraraka risikinapo. Arirakano Keresoa paosa aporo meta Anitipasemo anoane wakapuaka some karakano, Satanea paosa aporo repo taonea risiamo eane rusua kusuapo. Rusua kurakano asekea, reane anoaki paosane metakarisafapo. Metakarirafaraka yaiya paroaka risikinapo.

¹⁴ Ayíáka risikiyia, repo makata meta hasaka watikiaka arakirane reaki nōmo somerakanapo. Péramemo fana kotafe some karaka rea ayíáka, repo aporo metakiramo ayíáka some karaka risikinapo. Arirakano Péramemo some kasane oyapo. Péramemo Péraseki someraka, ‘Isiraya aporomo Kotiane metakarisimo úyaka somehoanie. Yatafuane máfahoasimo aporomo makata nakosa karápo. Kasáne repo neane siahoasireapo. Kotimo yaposane metakarikia neane siahoasireapo. Arirakano Kotimo yaposane metakarikia hinamoyaki mokome enaraka koraka risike soko siahoasireapo. Aíyaka somehoanie.’ Aíyaka Péramemo some kasane repo metakiramo kakimaka Kotimo yaposane repo metakarikia watikiaka rakiraka risikinapo. ¹⁵ Arirakano repo metakiramo Nikorasemo hasaka some karakano kaikia kakimaka raraporaka rakiraka risikinapo. ¹⁶ Asiamo repo watikisane rukupateraka metakarinie. Metakarianafonorakano re arisia ano peraka, ferepe taku tetakara waresa ano akaia reamo reane rukusapo. Ano peakosa maiyane makerakanapo.

¹⁷ Re senaki risiamo Ho Kotesamo anoa paosa aporo hinamoaki somerakano koteaka kaiyinie. Nōmo yunuane rukumosakatapira aporo hinamoaki makata nakosa aporomo asekeanafona mahamesane hepene yapunaka kakakosapo.* Aporo hinamo aki eke

* 2:17: Fana Isiraya aporo yao kauanea risiamo makata nakosa fasokino, Kotimo iane ti asipa kasapo. Ti asipa kakaro makata nenapo. Asiāne Kotimo Pékamame aporo makata nakosa kakakosane hakupo. Makata amo namina himu hemakapurane ararehokosapo.

pakaesa soko kakakosapo. Ekea yano motosa kawe popasane aporo hinamo suamo aserafapo. Ekeane masa aporo hinamo amo ipi hákasa amo aserapo. Aíyaka anoa paosa aporo hinamo Pékamame sése apea risiaki popahoanie." Aíyaka Yasumo somesapo.

Keresoa paosa aporo hinamo Taiataíra sése apea risiaki Yonemo sawi popasane oyapo.

¹⁸ Yasumo someraka, "Anoa paosa aporo hinamo Taiataíra sése apea risiane hepene aporomo asekea reaki úyaka popahoanie. Ano Kotimo hokosamo reaki somerakanapo. Ano hiane faesa ira rufi asíapo. Ano korakeane aine ira paisia ho piakaesa asíapo.

¹⁹ Asiamo repo makata arakirane nōmo aserakanapo. Repo aporo hinamo suaki himu tumurumo hemakapukua risike, anoaki himu hakásaraka risike, makata koteaka arakire. Rea makata umisa fasereperakano repo makata rakisiane metakarirafaraka yaiya rakiraka risikinapo. Fana repo koteaka rakisiane hákasa wakasemapo. Yumo repo koteaka rakisiane káraro.

²⁰ Re koteaka ayíáka risikiyyia, repo makata meta hasaka watikiaka arakirane nōmo reaki somerakanapo. Hinamo Yesepéaomo someane repo kakimaranapo. Yesepéaomo someraka, 'Ano porofete hinamopo.' Aíyaka hinamoamo nōmo aporo raipaki kotafe someane some karakanapo. Aporomo hinamoyaki mokome enaraka koraka risikiasimo epo some karakanapo. Ipu makata nakosa yatafuaki kasane nasimo some karakanapo.

²¹ Some kará hinamoamo makata watikisane rukupateraka metakarisimo nōmo kau rekenapo. Kau rekeno hinamoamo makata watikisane metakarirafaraka aporoyaki yaiya mokome enaraka seseraka kayapo. ²² Asiasamo hinamoaki makata takamasa kára kau tenane soko nōmo eaki kakakosapo. Arirakano hinamo akiyaki aporomo mokome enaraka koraka risirasamo makata watikisane metakarianafonorakano, ane iaki nōmo makata tasá kára kaka mokoatikihokosapo.

²³ Asiamo hinamoamo hokosane kukusimo nōmo rukusapo. Rurakano anoa paosa aporo hinamo sese sua risiamo asekea someraka, 'Aporomo himumo hemakapurane soko, makata rakirane soko Yasumo aserapo,' aihokosapo. Ayíáka nōmo takekeea rakirakano ipu asekosapo. Asiamo repo makata rakisiane nōmo aseraka, koteaka rakisiakipoko makata ropo kotesa nōmo kakakosapo. Arirakano repo makata watikiaka rakisiakipoko makata ropo watikisa nōmo kakakosapo. Repo makata rakisia hakásia nine nōmo asekea takekeea reaki hakásaraka makata ropo kakakosapo.

²⁴ Arirakano Taiataíra sése apea repo aporo hinamo metakiramo hinamoamo some watikisane kakimasafapo. Arirakano Satanemo some mahamesane repo hemakapuna-fonoraka kakimasafapo. Asiamo some umisa meta reaki somerakanafapo. ²⁵ Asiamo some kotesa repo kakimasane metakariakopo. Kakimasane paroaka hemakapukua risikianie. Ano pariperakarihoamo yaiya paroaka kakimaka risikianie.

²⁶⁻²⁷ Nōmo Atamo anoaki wakapu karáka, ano unihaeaka rekeasimo maresa ayíáka, nōmo yunuane rukumosakatapira aporo hinamoane unihaeaka risikiasimo nōmo murikimakosapo. Asiamo ipu nōmo someane metakarianafonoraka yaiya kakimaka risikino, iaki wakapu kaka unihaeaka risikiasimo nōmo muriakosapo. Murirakano hauaka sua aporo hinamo risiane ipu unihaeaka asekea risikiakosapo. Arirakano aporo waremo ira rokopa mokoa risira ayíáka iane ayíáka wakapuaka risikiakosapo. Arirakano hauakamo orotipi rakisiane aporomo makasuhoane aroraka fete feteana ayíáka unihaeaka asekea risia aporo hinamomo aporo hinamo metakirane wakapuaka asekea risikiakosapo. Asiamo orotipi hauakamo rakisia aroraka fete fetesa asíane aporo hinamo metakirane unihaecko asekea risikiakosa aporo hinamo ayapo.

²⁸ Arirakano yao fiarakano ti makata hakásia káramo faeraka rerane, aporo hinamo unihaeaka risiaki nōmo kakakosapo. ²⁹ Re senaki risiamo Ho Kotesamo anoa paosa aporo hinamoaki somerakano, koteaka kaiyinie. Aíyaka anoa paosa aporo hinamo Taiataíra sése apea risiaki popahoanie," aíyaka Yasumo somesapo.

¹ Yasumo someraka, “Anoa paosa aporo hinamo Sátisi sése apea risiane hepene aporomo asekea reaki úyaka popahoanie. Anoyaki Kotimo ho yatipinusu risikinapo. Ti makata yatipinusu nōmo hokono tumurumo mokoa rekenapo. Nōmo mokoa reke reaki somerakanapo. Repo makata rakirane nōmo aseraka somerakanapo. Aporo metakiramo someraka, ‘Keresoa paosa aporo Sátisi sése apea risiamo koteaka rakiraka risikinapo.’ Aisa nine Sátisi aporo hinamo, repo kakaro koteaka rakianafonoraka re ho kusua ayireapo.

² Re awara ayiáka wasáne turikia tarikia wakapuaka risikianie. Repo makata aina kotesa metakira metakarisiapo. Asiāne makata aina metakira wakasema kotesa tokenapo. Asiamo makata aina ane fanapaka mawakapuraka rakinie. Repo makata rakira suane nōmo aseane ereketaesa meta rekerifapo. Kotimo soko aseane repo makata ainane ereketaeraka rekerifapo, airakanapo.

³ Asiamo repo fana Kotimo someane kakimaka koteaka rakipe pekea tipia watikiaka rakisiane yumo metakarinie. Metakarikia risikiako pariraka fana koteaka rakisnia ayiáka, efera hunia koteaka rakiraka risikianie. Arirakano re meraruamo wakakesakipoko makata hakimora aporo apura ayiáka re meraruamo risiakipoko nōmo reane hukuruko peakosapo.

⁴ Arirakano Sátisi sése apea re metakira koteaka risikinapo. Arirakano makata pikirisamo pasu kotesane mapikirinapo. Mapikirina ayiáka makata watikisamo repo himuane mapikirinapo. Asiāne re namina yia metakira koteaka risiasamo repo pasuane mapikirisafapo. Re metakira koteaka risiasamo reaki pasu pakae kotesane nōmo kakakosapo. Kaka re anoyaki hakāsa risikiakosapo. ⁵ Arirakano nōmo yunuane rukumosakatapira aporo hinamoaki pasu pakae kotesane osohoasimo nōmo kakakosapo. Arirakano aporo hinamo yaiya risikiakosa yano taesane Kotimo sawia popasapo. Asiamo nōmo yunuane rukumosakatapira aporo hinamo yano taesa popasane nōmo kosohokosafapo. Aporo hinamoane nōmo Ataki soko, Atamo hepene aporoaki soko, nōmo tarikia someraka, ‘Aporoane anoa paosapo,’ aihokosapo.

⁶ Re senaki risiamo Ho Kotesamo anoa paosa aporo hinamoaki somerakanano koteaka kaiyinie. Aiyaka anoa paosa aporo hinamo Sátisi sése apea risiaki popahoanie,” aiyaka Yasumo somesapo.

Keresoa paosa aporo hinamo Firatéfia sése apea risiaki Yonemo sawi popasane oyapo.

⁷ Yasumo someraka, “Anoa paosa aporo hinamo Firatéfia sése apea risiane hepene aporomo asekea reaki úyaka popahoanie. Nōmo ainane kakaro kotesa ereketae susureasamo, nōmo reaki somerakanapo. Kakaro someamo kepoane anopo. Tefetemo kiane* nōmo maka rekenapo. Ikia koro nōmo ropakamarakano, aporo metamo mapiriakosafapo. Ikia koro nōmo mapirirakano, aporo metamo ropakamakosafapo. ⁸ Repo makata rakirane nōmo aserakanapo. Repo kaisie. Nōmo repoko ikia koro ropakamarakano, aporo metamo mapiriakosafapo. Repo wakapu wakasema yiamo, nōmo someane repo kakimaka risike, ano yano motosane mawakasemasafapo. ⁹ Repo kaisie. Sataneaki paosa aporo metakiramo kotafe someraka, ‘Isu Yu aporo pariraka risikinapo. Isu Kotimo aporo ira pariraka risikinapo,’ airapo. Asiāne i Yu aporo hoanafonosa yiamo kotafe somerakanapo. Hao, kaisie. Nōmo rakiakosane oyapo. Re korake finisa kepoyia kotafe somera aporoane hurupepehoasimo motorakanapo. I hurupeperaka warisike someraka, ‘Reane Yasumo himu tumurumo hemakapurakanapo,’ aihokosapo.

¹⁰ Mokoatikisa maiya amo nōmo someane repo metakarirafaraka, yaiya rakiraka risiapo. Arirakano aporo hinamo hauaka sua risiane nōmo someane metakarirakar-ihiamo kau asekosakipoko makata watikisa faserepeakosapo. Fasereperakano repo nōmo someane yaiya kakimaka risikino reane nōmo asekea rekeakosapo.

¹¹ Ano peakosa maiyane makerakanapo. Ano aperamo nōmo reane makata ropo kakakosapo. Maiya omo nōmo someane repo kakimaka rakiraka risikinapo. Aporo

* 3:7: Kiamo Yarusarame siti kawe ikia koroane Yasumo ropakamakosapo.

metamo reane kirimarakano, some ane repo kakimaka nōmo someane metakarirakano, keseke re nōmo makata ropo kakakosafapo. Anapaka re kirimarakano someane kaki-makopo. Nōmo someane yaiya kakimaka rakiraka risikianie.

¹² Nōmo yunuane rukumosakatapira aporo hinamoane Kotimo apea ira kesa paroaka arisia ayíáka paroaka risikiakosapo. Ayíáka risike Kotimo iane yaiya unihaeaka asekea rekeakosapo. Kotimo murikimasa aporo hinamoane kaua Kotimo yano motosane soko, nōmo Kotimo siti yanoane soko nōmo popahokosapo. Kotimo siti yano popahokosane Yarusarame siti kawe ayapo. Yarusarame siti kaweane Koti rea hepene yapunaka faserepeakosapo. Arirakano nōmo nī yano motosa kaweane soko popahokosapo.

¹³ Re senaki risiamo Ho Kotesamo anoa paosa aporo hinamoaki somerakanano koteaka kaiyinie. Aíyaka anoa paosa aporo hinamo Firatéfia sése apea risiaki popahoanie,” aíyaka Yasumo somesapo.

Keresoa paosa aporo hinamo Reotísia sése apea risiaki Yonemo sawi popasane oyapo.

¹⁴ Yasumo someraka, “Anoa paosa aporo hinamo Reotísia sése apea risiane, hepene aporomo asekea reaki úyaka popahoanie. Ano Yasumo reaki somerakanapo. Kotimo ayiakakosaposane kakaro ayiakasimo nōmo rakirapo. Kotimo someane nōmo kakaro somerapo. Nōmo ereketae susu some karápo. Makata su Kotimo rakisiane ano aeyaka kepomarekea rakisiapo. Nōmo reaki somerakanapo.

¹⁵ Repo makata rakirane nōmo aserakanapo. Re he inusa asiafapo. He sisipusa asia soko fapo. He sisipuyaki he inusayaki suasuasa asiane repo. Re he inusa susu ayíáka risikiasimoripo. Re he sisipusa susu ayíáka risikiasimoripo. Asiane re he inusa he sisipuyaki suasuasa ayireapo. ¹⁶ Arirakano aporomo he sisipu he inusayaki suasuaraka nesane wapehoanafonorakano yokotaenapo. Aina ayíáka nōmo reane metakariakosapo.

¹⁷ Arirakano repo someraka, ‘Isiapo makata kemoane kárupo. Asiamo isuane aporo hinamo yano motosa kárupo. Isu makata meta fasa rekenafapo. Siaraka risikinapo,’ airapo. Asiāne Kotimo makata aina kotesane repo asekeanafonoraka re fesonoraka risikinapo. Re watikiaka risikino aporo metakiramo re aseraka kamenakahoasireapo. Re aporo hinamo makata forokoa arisia asíapo. Re aporo hinamo hi fausa asíapo. Re aporo hinamo pasu faraka, patera yase arisia asíapo.

¹⁸ Asiamo repo koteaka hemakapusimo nōmo hemakapusuane reaki somerakanapo. Repo makata kemo kárahokosakipoko nōmo korótoane ropohoanie. Nōmo korótoane iramo paikia wariwariraka, makata pepeno toane mokoa mokoateraka, koróto namo susu mosane ayapo. Re patera yase risike kaiyanapaka pasu osohokosakipoko, nōmo pasu pakaesa kotesane ropohoanie. Repo himo koteaka aseakosakipoko hi munamunane ropohoanie.

¹⁹ Arirakano nōmo himu tumurumo hemakapura aporo hinamoane koteaka risiki-asimo nōmo maroponapo. Asiamo repo makata watikisane metakarikia, risikiako parihoanie. ²⁰ Repo kaisie. Ikia koroa ano reke paroparorakanapo. Paroparoraka wárakano, aporo metamo nōmo meane kaikia, ikia koro ropakamarakano, e rea ano yorokoa eto hakásä toke makata nakosapo. ²¹ Fana Kotimo yunuane nōmo rukumosakatapisiasamo nōmo Ata Unihaemo sea ipiyaki ano hakásä kakenapo. Asia ayíáka nōmo yunuane rukumosakatapira aporo hinamoane anoyaki hakásä unihaemo sea tokoakosapo.

²² Re senaki risiamo Ho Kotesamo anoa paosa aporo hinamoaki somerakanano koteaka kaiyinie. Aíyaka anoa paosa aporo hinamo Reotísia sése apea risiaki popahoanie,” aíyaka Yasumo somesapo.

Hepene yapura Kotiaki kekeresane oyapo.

¹ Yasumo someaka farakano, nōmo aseane hepene ape ikia koro ropakamarakano asesapo. Fana pikoro ruraka sikirakano me kaisia hakásä yiamo anoaki someraka, “Né wo peae. Né wo perakano makata su ayiakakosane nōmo néaki tariakosapo.”

² Airakano Ho Kotesa anoa káraraka reke ano hepene yapura pauraka rekeno asesapo. Pauraka reke nōmo makata asesane oyapo. Aporo unihae sea á unihae kakeno nōmo asesapo. ³ Aseane eke pakaesa yano motosa yásepa faesa ásia soko, eke susa yano motosa koníriane faeraka ho piakaesa ayíáka aporoane kaua faeraka, ho piakaerakano asesapo. Epo ipi sea hahaha á sawi inimane eke hisukusane yano motosa émarao ásia rekesapo. ⁴ Unihaemo seane tipia kayakipoko sea metakira karoraka hahahaéne menoraka tuaneti fosesapo (24). Sea á aporo kára tuaneti foane (24) tokesapo. I toane pasu pakaesa osoraka, korótomo rakisia hatiane karoterapiraka tokesapo. ⁵ Unihaemo sea aeyaka yamakereraka kikirirakasapo. Unihaemo sea hikumisi neneme takua oro kama yatipinusu pakimokoa faeraka risikisapo. Oro kama yatipinusuane Kotimo ho yatipinusu ayapo. ⁶ Unihaemo sea hikumisi neneme takua he sirisa namo kakaro kotesa hiho ásia kesesapo.

Unihaemo sea hahaha e kayane makeraka, makata kakayia hitafe kitafasu risikisapo. Makata kakayia kitafasuane hi yakai hikumisi takua soko metakira patera takua soko risikisapo. ⁷ Makata kakayia hitafeane menoane saro raeone asisapo. Tetane saro ponomakau apinu asisapo. Isiane aporo hikumisi asisapo. Kitafane mena ariawe aua fakaripukua rekesapo.

⁸ Makata kakayia kitafasuane hakásaraka auane namasu namasuraka risikisapo. Makata kakayiane hi yakai amo namina kauane mokosekesesapo. Kauane soko aua patawiane soko mokosekesesapo. Maiya suamo, sere soko, ereamo soko, makata kakayia kitafasuamo kesarakasapo. Kesanane oyapo.

“Unihae Koti namo kakaro wakapu kára rekenapo. Kotiane namo kakaro koteaka ereketae susu rekenapo. Koti fana reane soko, yumo soko rekenapo. Keseke soko rekeakosapo.” Áyaka ipu kesarakasapo.

⁹ Arirakano Unihae Koti sea kayane yaiya rekeakosapo. Makata kakayia kitafasuamo Unihae Kotiaki kekereraka, Unihae Koti yano motosa makáraraka Unihae Kotiaki suseaka kekereraka kesasa maiya hakasa yiamo, ¹⁰ aporo kára tuaneti foamo (24) soko Unihae Kotiaki kekerehoko uakapeperaka, hauaka atura wariske Unihae Kotiaki kekererakasapo. Kekereraka ipu korótó uni hati karotapisane horomokoa, Unihae Kotiaki karáka e kaya seane makeraka mokoasuraka kesaraka,

¹¹ “Né isiapo Unihae. Né isiapo Kotipo. Nómó makata su kepomaresapo. Nómó hemakapusua aeyaka makata su rakisiapo. Asiasamo isiapo néaki kekereraka makárarakanapo. Nómó wakapuane kárasasamo né hákasa kekereraka makárarakanapo,” áyaka kesarakasapo.

5

Sawi popasa mawerosa Yonemo asesane oyapo.

¹ Unihae Koti sea kake sawi taku tetákara poparaka mawerosane ira pi asiamo sawi manakamasimo ira pi yatipinusu sawia paisiane epo hokono tumurumo maka rekesapo. ² Maka rekeno hepene aporo wakapu hakásaraka metamo sakepamo wáraka, “Sawi poparaka mawerosa ira pimo paisia manakamasane, epa koteaka reamo takomokoa fisihoeane siahoasireare?” airakasapo.

³ Arirakano hepene yapura soko, hauaka wo soko, hauaka tamo atura soko, sawi poparaka mawerosane fisiraka asekosa aporo meta rekerifapo. ⁴ Asiamo sawi poparaka mawerosane fisiraka asekosa aporo meta koteaka rekeanafonosekeno, ano kára hiripusapo. ⁵ Hiripurakano aporo kára hakásaraka metamo anoaki someraka, “Hiripuhokopo. Hao, kaisie. Yuta aporo ira aporo meta Yasu wareraka rekenapo. Saro raeone wareana ayíáka, eane ayíáka wareraka rekenapo. Tefetemo wainepe pesa aporoane Yasu ipipo. Epo yunu aporoane Sataneyaki wareraka wekea rukumosakatapisiasamo, ira pi yatipinusu sawia paisiane epo takomokoa sawi popasa mawerosane fisihoeane siahokosapo,” airakasapo.

Yonemo Saro Sipi Mano asesane oyapo.

⁶ Tipia Unihae sea kayakipoko makeraka makata kakayia kitafasu risikisapo. Unihae sea kaya hikumisi neneme takua aporo kára toakipoko tipia Saro Sipi Mano rekesapo. Saro Sipi Manoane aporomo rusua kusua aseraka sikiraka, asiāne turikia pukua rekesapo. Saro Sipi Mano hakásá, mere isi yatipinusu, hi yaiya yatipinusu ayíáka risikisapo. Yatipinusu risia asíane Kotimo ho yatipinusu hauaka sua pusiesa ayapo. ⁷ Saro Sipi Manoane pukua, Unihae sea kayakipoko, Unihae hokono tumurumo sawi mawerosa maka reane, epo marakasapo.

⁸ Masa yiamo makata kakayia kitafasu soko, aporo kára tuaneti foane (24) soko, Saro Sipi Mano reakipoko eaki kekerehoko uakapeperaka warisikisapo. Aporo káramo hakásá hakásaraka kesahoko kita asía mokoa, korótomo rakisia tisi soko morakasapo. Korótomo rakisia tisia pauta wape yamona kesa paisisapo. Paisia musu ahirane Kotimo aporo hinamomo kurikurinane asisapo. ⁹ Ipu kesá kawe kesásane oyapo.

“Aporo hinamopoko farimaka api kakakosakipoko, né rusua kuraka yapi pusuapo. Yapi pusua amo aporo hinamo Kotipoko risikiasimo roposapo. Asiamo sawi popasa mawerosane nómomo maka, ira pi sawia paisiane nómomo hákasa takomoane siahoasireapo. Aporo ira kekeposane soko, aporo me kekeposane soko, aporo kau kekeposane soko, aporo hauaka kekepoa risiane soko, aporo hinamo suane nómomo roposapo. ¹⁰ Roporaka nómomo iane asekea reke ipu Kotipoko rakisimo nómomo murikimasapo. Arirakano pirisiti aporomo aporo hinamopoko Kotiaki farimaka kurikuriana ayíáka, ipu ayíáka farimaka kurikurihoasimo nómomo rakisimo murikimasapo. Arirakano ipu hauaka atura aporo hinamo suane unihaeaka asekea risikiakosapo.” Aíyaka kesarakasapo.

Saro Sipi Manoaki kekeresane oyapo.

¹¹ Nómomo efera hunia aseane, hepene aporo yakai mukisa meno昊asifa risike merakano nómomo kaisiapo. Merakano nómomo kairaka aseane, Unihae sea kayakipoko makata kakayia kitafa suane soko, aporo kára ane soko, hepene aporo soko su sarimaraka risikisapo. Risike sakepamo kesárakasapo.

¹² Kesáraka úyaka kesárakasapo.

“Saro Sipi Mano né rusua kusuasamo néaki hákasa kekerehoane siahoasireapo. Nómomo wakapuane kárapo. Nómomo makata kemo kárapo. Nómomo hemakapurane kotesa ereketae-sapo. Nómomo wakapuaka rakirapo. Né yano motosane kárapo. Né faesane kárapo. Isiapo néaki suseraka kekererakanapo.” Aíyaka kesárakasapo.

¹³ Arirakano hepene yapura makata risiamo soko, hauaka wo makata risiamo soko, hauaka tamо atura makata risiamo soko, he tawara numua makata risiamo soko, makata amo suamo kesá meta kesárakasapo. Ipu úyaka kesárakasapo.

“Unihae Koti né sea kayaki soko, Saro Sipi Mano néaki soko isiapo makáraraka kekererakanapo. Tetápo faesane soko wakapuane soko kárapo. Asiasamo tetoaki maiya suamo isiapo kekereraka risikiakosapo.”

¹⁴ Aíyaka kesarakano, makata kakayia kitafasuamo someraka, “Kakaroripo.” Airakano aporo kára amo Unihaeaki kekerehoko uakapeperaka kekererakasapo.

6

Sawi poparaka mawerosa ira pi yatipinusumo paisiane namasu takomosane oyapo.

¹ Saro Sipi Manomo ira pimo paisia menoane takomarakasapo. Takomarakano nómomo kaiyíane, makata kakayia kitafasuane menomo meraka, kikiriraka sikirakano kaisiapo. Epo someraka, “Peae.” ² Airakano nómomo aseane saro hose hakesa matia aporo hakásá meta terakaiya maka ripaka perakasapo. Epo yunu aporoane rukumosakatapikia marokerakano aporoaki uni hati akara ayíáka, eaki ayíáka uni hati karakasapo. Karakano, Kotimo yunu aporo metakirane hauaka wo risiane soko, rukumosakatapiako pusuapo.

³ Arirakano Saro Sipi Manomo ira pimo paisia teta ane takomarakasapo. Tako-marakano nómomo kaiyíane, makata kakayia kitafasuane tetá amo* someraka, “Peae.”

* 6:3: Makata kakayia tetá ane napa tu (2) ayapo.

⁴ Airakano nōmo aseane, saro hose honesa matia aporo hakása meta ripaka perakasapo. Arirakano hauaka wo aporo hinamo su tau auaraka risirane epo fimaka, aporomo aporo metakiraki werane mareasimo, wakapuane eaki karakasapo. Werane mareasimo ferepe waresa soko eaki karakasapo.

⁵ Arirakano Saro Sipi Manomo ira pimo paisia isía ane takomarakasapo. Tako-marakan no nōmo kaiyíane, makata kakayia kitafasuane isia amo someraka, "Peae." Airakano nōmo aseane, aporo hakasa makata sikerinane maka, saro hose eresa matia ripaka perakasapo.

⁶ Perakano nōmo kaiyíane, makata kakayia kitafasu risia arakaru tipia aeyaka somer-akano, me hákasa kaisiapo. Memo someraka, "Ne pukua aporo hinamomo makata nakosa mokoatikiraka mearanie. Asiamo makata nakosa wakasema aporomo mone karamo roporaka nakosapo. Mone hae tanariase hakásamo orotipi wakasema witi hae kesa ropohokosapo. O, mone hae tanariase hakásamo orotipi wakasema isia raesi ásia kesa ropohokosapo. Asiāne ira orofe heane soko, waene heane soko mokoatikihokopo," aiyaka somerakasapo.

⁷ Arirakano Saro Sipi Manomo ira pimo paisia kitafa ane takomarakasapo. Tako-marakan no nōmo kaiyáne, makata kakayia kitafasuane kitafa amo someraka, "Peae."

⁸ Airakano nōmo aseane, saro hose keamesa aporo hakása matia ripaka perakasapo. Aporo ripasa ane Kura aiyaka yano motosesapo. E patera anaka aporo meta peraka, e ipi yano motosane Hétisi Hauakapo, aiyaka yano motosesapo. Arirakano hauaka wo aporo hinamo risiane, tetapō paraku kitafasurakasapo. Parakusane isia metakarikia, kitafane makukusimo wakapuane tetáki karakasapo. Karakano aporo hinamo metakira kukusimo ferepemo rukua, arirakano meta, makata nakosa fahoasimo marekea, arirakano meta makata tará kaka kukua keasimo marekea, arirakano meta yasaro asíamo rusua kukusimo marekea, ayiáka tetapō rakisimo tetáki wakapu karakasapo.

⁹ Arirakano Saro Sipi Manomo ira pimo paisia kakorea ane takomarakasapo. Tako-marakan aseane, Kotiaki makata yaku kakakosakipoko eke taesa asesapo. Eke karoraka taesa tepla asía nōmo asesapo. Teporo asíane tamo atura Kotiaki patera asesa aporo hinamomo epo someane some kasasamo, aporo metakiramo rusua kurakano, ipu hoane risikisapo. ¹⁰ Risike ipu sakepamo wáraka, "Unihaeo, hepene wo soko hauaka atura soko né unihaeaka rekenapo. Né kotesa susu rekenapo. Nōmo someane kakaro somepo. Nōmo someane isiaipo some karakano, aporomo isu rusua kusuapo. Hauaka atura aporomo isu rusua kusuane, maiya yakapasu faraka, nōmo aporoane hukurukua ropo mokoatikihokosare?" ¹¹ Airakano aporo hinamo hakása hakásaraka pasu pakae kotesa karakasapo. Karáka someraka, "Re maiya wakasemamo kau risikianie. Repo nōmo someane some kasasamo, re rusua kusua ayiáka, repo Keresoa paosa aporo mae papāne soko ayiáka rusua kukusapo. Rusua kurakano i hoane soko o risikiako peakosapo. Pekea sarimarakano re rusua aporoane Kotimo ropo mokoatikihokosapo," airakasapo.

¹² Arirakano Saro Sipi Manomo ira pimo paisia nama ane takomarakasapo. Tako-mayane momani kára perakasapo. Sere maiyane pikirisa inakasokesa asía rekesapo. Ere maiyane susa yapi asía rekesapo. ¹³ Arirakano atifo kára peraka ira foke mahohohoane foke wate kakaripepena ayiáka, ti makata ti aeyaka hauaka atura hurupeperakasapo.

¹⁴ Arirakano sawi popasa mawerosa ayiáka, ti yapurane ayiáka maweroraka farakasapo. Úri suane soko, he tonoane soko su kikisiraka purakasapo.

¹⁵ Hauaka wo aporo unihaeane soko, aporo yano motosa kárane soko, ame aporo satiniane soko, aporo makata kemo kárasane soko, aporo wareane soko, aporo raipane soko, aporo raipahoanafonosane soko, aporo su tekatarikia úria hikia, kunikia soko, eke kakarua soko, fara risikisapo.

¹⁶⁻¹⁷ Fararisikiakosakipoko ipu úriaki soko, ekeaki soko wáraka, "Isu mokosekerasie. Unihae sea akaya amo soko, Saro Sipi Manomo soko, saperaka fanasihokosa maiyane faserepesapo. Tetapō saperakano epamo isu matasohokosare? Asiamo tetapō isu asekohoamo isu matairaka mokosekerasie," airakasapo.

Isiraya aporo hinamo yakai Kotimo murikimaka hikumisia popasane oyapo.

¹⁻² Saro Sipi Manomo ira pimo paisia namasu takomokoa faraka, nōmo makata asesane oyapo. Hepene aporo kitafasu amo hauaka one soko, he tawara soko mokoatikihoasimo, Kotimo iaki wakapu karakasapo. Wakapu karakano hauaka wo atifo perapaka, hepene aporo kitafasu amo mafairaka asekea risikisapo. Risike meta fari sape ro, meta fari sape aka, meta fari taku ra, meta fari taku atura, ayíáka mafairaka asekea risikisapo. I mafairaka asekea risiane tapikia tipia atifo perakasafapo. Peanafonoraka irane soko hohorakasafapo. He tawarane soko he kupa perakasafapo. Arirakano maiya apera taku aeyaka hepene aporo meta perakasapo. Pekea Yaiya Rera Koti amo kakimara aporo hinamo hikumisia popahoko makata popana maka perakasapo. Maka peraka epo hepene aporo kitafasuaki wáraka,³ “Hauakane soko, he tawarane soko, irane soko haru mokoatikihoko. Fana isiapo hepene aporo suamo Kotimo kakimara aporo hinamoane ipu hikumisia, Kotimo máka motosa ane poparaka farakano, maiya amo hauaka kara one mokoatikihoane siahoasireapo.”

⁴ Airakano nōmo kaiyíane, “Isiraya aporo irane aporo hinamo wane harote foti fo taosene ane (144,000)* murikimaka hikumisia popahokosapo,” airakasapo. ⁵ Poparaka Yúta aporo irane aporo hinamo tuaro taosene (12,000) poparakasapo. Arirakano Rúpene aporo irane soko, aporo hinamo tuaro taosene (12,000) poparakasapo. Arirakano Káta aporo irane soko, aporo hinamo tuaro taosene (12,000) poparakasapo.

⁶ Arirakano Ása aporo irane soko, aporo hinamo tuaro taosene (12,000) poparakasapo. Arirakano Náfatari aporo irane soko, aporo hinamo tuaro taosene (12,000) poparakasapo. Arirakano Manásá aporo irane soko, aporo hinamo tuaro taosene (12,000) poparakasapo. ⁷ Arirakano Símione aporo irane soko, aporo hinamo tuaro taosene (12,000) poparakasapo. Arirakano Rífai aporo irane soko, aporo hinamo tuaro taosene (12,000) poparakasapo. Arirakano Ísaka aporo irane soko, aporo hinamo tuaro taosene (12,000) poparakasapo.

⁸ Arirakano Sépuru aporo irane soko, aporo hinamo tuaro taosene (12,000) poparakasapo. Arirakano Yósefe aporo irane soko, aporo hinamo tuaro taosene (12,000) poparakasapo. Arirakano Pénesamene aporo irane soko, aporo hinamo tuaro taosene (12,000) poparakasapo.

Aporo hinamo yakai mukisa meno豪asifa sarimasane oyapo.

⁹ Nōmo efera hunia keseke asesane oyapo. Aporo hinamo yakai mukisa sarimaraka-sapo. Aporo hinamo yakai mukisa sarimasane meno豪ane siahoasisesa-fapo. Iane hauaka su aeyaka pesane, aporo ira kekeposane soko, aporo kau kekeposane soko, aporo me kekeposane soko, i sú pekea Unihae Koti sea kaya á Saro Sipi Mano soko reakipoko, hikumisia sarimaraka-sapo. Aporo hinamo sarimasamo pasu pakae horopokara osoraka, hokonomo asipa hu asia mokoa risike mapurupururaka seseraka risikisapo. Ayíáka risike Kotipe Saro Sipi Mano tetâne kekererakanapo sakepamo wáraka,

¹⁰ “Koti sea kayamo soko, Saro Sipi Manoamo soko isu mafasikia pasimosasamo isiapo tetâne kekererakanapo.” airakasapo.

¹¹ Airakano hepene aporo soko, aporo kara suane soko, makata kakayia kitafasuane soko, i suane Unihaemo sea makeraka hahaeraka risikisapo. Ayíáka risike Koti hikumisia uakapeperaka Kotiaki kekereraka someraka,

¹² “Some one kakaroripo. Kotio, isiapo néaki kekererakanapo. Nōmo faesane kárupo. Nōmo hemakapurane kotesa ereketae susupo. Isiapo néaki suserakanapo. Né yano motosa kakaro kárupo. Nōmo wakapuaka rakirapo. Né maiya suamo yaiya rekeakosapo. Kakaroripo,” aýaka Kotiaki kekererakanapo.

¹³ Arirakano aporo kára hakása metamo anoaki someraka, “Aporo hinamo pasu pakae horopokara ososane epare? I manaka pesare? Nōmo hemakapurakarire?” ¹⁴ Airakano

* 7:4: Napa su popasa one taku meaka popasapo.

nōmo someraka, “Ape neo, ano himeteripo. Nōmo hemaka apure. Nōmo anoaki somesie.” Airakano epo someraka, “Aporo hinamo pasu pakae horopokara ososane, aporo metakiramo kára mokoatikirakano, ipu Kotiaki hemakapusuane metakarisiafapo. Ipu pasuane Saro Sipi Mano yapimo kusuraka pakaesesapo.

¹⁵ Asiamo Kotimo apea Koti Unihae sea kaya aki kekereraka, sere soko ereamo soko, epoko kekereraka risikisapo. Ayíáka risikino Koti Unihae sea kaya epo iane asekea rekesapo. ¹⁶ Asekea reke i efera hunia meamohokosafapo. I he nariripo, aihokosafapo. Sere maíyamo kaua ruraka kau konokohokosafapo. Makata metamo soko i kaua inakakosafapo.

¹⁷ Arirakano saro sipi wafayamo ipi saro sipi asekea area ayíáka, Saro Sipi Mano Kotimo sea makeraka rea amo iane ayíáka asekea rekeakosapo. Asekea reke i he nasimo karikia pekea, he fuaka taenane nasimo karikia peakosapo. Pekea ipu nenakano, i yaiya risikiakosapo. Arirakano ipu hiripusane Kotimo hokehokosapo.” Aíyaka aporo kára hakása metamo anoaki somerakasapo.

8

Sawi mawerosa ira pimo paisiane namasu takomosakipoko, yatipinu ane takomasane oyapo.

¹ Saro Sipi Manomo ira pimo paisiane yatipinu ane takomarakano, maiya hi hafo awamo hepene yapura me faraka risikisapo. ² Maiya hi hafo awa ane faraka, nōmo makata asesane oyapo. Hepene aporo yatipinusu Koti hikumisi neneme takua risiaki pikoro yatipinusu karakano mokoa risikisapo.

³ Hepene aporo metamo korótomo rakisia tisiane maka pekea, Kotiaki pauta wape yamona paikia Kotiaki kakakosakipoko teboro eke taesa ásiáne makeraka pekea rekesapo. Rekeno eaki pauta wape yamonane kára karakasapo. Aporo hinamomo Kotiaki kurikurisane pauta wape yamona paisia musu hisiane hakása sarimaraka Kotiaki karakasapo. Korótomo rakisia teboro eke taesa ásiáne Koti kaya hikumisi neneme takua taerakasapo.

⁴ Taesa kima á hepene aporomo pauta wape yamona paisia musu hisiane, aporo manomo kurikurisa akiyaki sarimaraka Koti kaya hikumisi nenemea hinakasapo.

⁵ Hinakano eke kima pauta paisia ira rufiane hepene aporomo maka tisia taeraka komarurakano, hauaka atura sakomakasurakasapo. Sakomakasuhoane yamakere kikiriane soko, hauaka atura rukusane momani soko sarimaraka perakasapo.

Hepene aporo kitafa sumo pikoro rurakano nōmo asesane oyapo.

⁶ Hepene aporo yatipinusumo pikoro rukusakipoko mokoa asekea risikisapo. ⁷ Asekea risike, hepene aporo hakásamo pikoro ruane, yaoane eke ásiá soko, ira rufi soko yapiyaki hakása hauaka atura hurupeperakasapo. Hauaka parakuraka isíasane tetáne risike, isía hákasane iramo inarakasapo. Arirakano ira parakuraka isía parakusane meno tetáne risike, isía hákasane iramo inarakasapo. Arirakano asane soko su inaka farakasapo.

⁸ Arirakano hepene aporo hakása meta tetá amo pikoro rurakano, makata meta ūri kára ásiáne iramo inaraka rufiraka, he tawara numua huruperakasapo. Huruperakano he tawara ane soko yaiya parakuraka isíasane tetáne yaiya risike, isía hákasane yapi parirakasapo. ⁹ Arirakano he tawara makata risiane soko yaiya parakuraka isíasane tetáne risike, isía hákasane kurakasapo. Arirakano kasu sipi suane soko, yaiya parakuraka isíasane tetáne risike, isía hákasane rukua arorakasapo.

¹⁰ Hepene aporo hakása meta isía amo pikoro rurakano, oro kama pakimaka rufina ayíáka, ti makata hakása kára rufiyaki ti yapunaka fauraka fetefeteraka hauaka pekea hea hurupeperakasapo. He pekereane soko, he fuaka taenane soko, parakuraka isíasane meno tetáne risike, isía hákasane ti makata hurupeperakasapo. ¹¹ Ti makatane yano motosa Kísane yano motosapo. Kísane hea hurupeperaka heane soko kísesapo. He kísane aporo hinamomo nesane yakai kukua kerakasapo.

¹² Arirakano hepene aporo hakása meta kitafa amo pikoro rurakano, sere maiya soko yaiya parakuraka isíasane tetáne faeraka, isía hákasané faerakasafapo. Oko soko yaiya parakuraka isíasane meno tetáne faeraka, isía hákasané faerakasafapo. Ti makata soko yaiya parakuraka isíasane tetáne faeraka, isía hákasané faerakasafapo. Arirakano sere maiya faesa awa ane soko yaiya parakuraka isíasane, tetáne faeraka, isía hákasané katorakasapo. Ere maiya faesa awa ane soko yaiya parakuraka isíasane, tetáne faeraka risike, isía hákasané katorakasapo.

¹³ Arirakano nōmo aseane mena ariawe ti yapura koraka reke sakepamo meraka, “Uao, itifiasifareapo. Hepene aporo isíamo pikoro rukurakano, aporo hinamo hauaka risiane mokoatikihokosapo. Mokoatikirakano i himu nekea mayakaepi aihokosapo.” Airakano nōmo kaisiapo.

9

Hepene aporo hakása meta kakorea amo pikoro rusuane oyapo.

¹ Hepene aporo hakása meta kakorea amo pikoro ruane ti makata hakása meta hepene yapunaka hauaka atura hurupekea, ti makataki ki karakasapo. Hauaka watikisa kutu mato kunututu kakanafonosa kutuane, ikia koro ropakamakasimo kiane ti makataki karakasapo.

² Karakano ikia koroane ropakamaka, kutu mato kunututu kakanafonosa aeyaka ira musu kára perakasapo. Kára peraka ira musumo yao sua karotapiraka sere maiyane matairaka, faerakasafapo. Ererakasapo. ³ Ira musu arakaru aeyaka fonai yakai mukisa hauaka sua perakasapo. Hanutanomo amano rukuanena ayíáka, fonaimo ayíáka rukunasimo pusierakasapo.

⁴ Fonai mukisa aki someraka, “Asane soko, ira ku soko, hemo makata soko, makata suane nakopo. Aporomano hákasa rukunanie. Koti yano motosa hikumisia popahaona-fonosa aporo hinamoane rukunanie. ⁵ Asiāne aporo hinamoane kakaro kukusimo rukunakopo. Kauane hákasa tehoasimo ere maiya kakorea sumo rukunanie.” Airakano fonai mukisamo aporomano rukunenaka, hanutanomo rukuanena, ayíáka rukunenakano kau kára terakasapo. ⁶ Ere maiya kakorea suamo fonai mukisamo aporo hinamo rukunenakano, aporo hinamoamo someraka, “Isu kau teraka risike namo kakaro hisiripo. Isu wate foaka kukuripo.” Aisa nine kurakasafapo.

⁷ Arirakano fonai otoane saro hose yunu weako pura oto asisapo. I wamoa korótomo rakisia hatiane karotapisisapo. I hikumisiane aporo hikumisi asisapo.

⁸ I uni iti horopokarane hinamo uni iti asisapo. I mereane saro raeone mere asisapo. ⁹ I káwa nenepoane funu asisapo. Arirakano weako puraka saro hosemo wakone kita kiraka, weako fofoka puraka kikiriraka sikina ayíáka, fonai mukisamo auamo hapehaperaka airakasapo. ¹⁰ Fonai keno hanutano keno asisapo. Ere maiya kakorea sumo aporomano rukunenane i kenomo rukunenakasapo.

¹¹ Arirakano fonaimo mukisamo unihaeane kutu mato kunututu kakanafonosa asekea rea hepene aporo watikisa ayapo.* Hepene aporo watikisane yano motosa Hipuru meaka Apátonepo. E yano motosa Kiriki meaka Apórionepo. E yano motosa namo meaka Makata Su Mokoatikina Aporopo. Aíyaka yano motorakasapo. ¹² Asiamo makata watikisa faserepeakosaposane menoane ayapo. Arirakano makata watikisa tetáne soko isíane soko keseke faserepeakosapo, airakasapo.

Hepene aporo hakása meta nama amo pikoro rusuane oyapo.

¹³ Hepene aporo hakása meta nama amo pikoro rurakano, nōmo kaiyíane Koti kaya hikumisi neneme takua korótomo rakisia teporo eke taesa asia, sapea ke tetá, arirakano sapea ke tetá, á mere isi kitafasu reakipoko anaká merakano, nōmo kaisiapo. ¹⁴ Hepene aporo namamo pikoro maka reaki memo someraka, “He kára he yano motosa he Yuferétisia hepene aporo kitafasu senemo taposane fisihoanie.”

* 9:11: Wate fana hepene aporo watikisamo Kotimo soneane koaretaesasamo, Kotimo iane fanasiraka kutu matoa pusiesapo.

¹⁵ Airakano hepene aporo kitafasu senemo taposane fisirakasapo. Aporo parakuraka isia parakusane meno tetáne metakarikia, isía hákasane rusua kukusimo, hepene aporo kitafasuane fisiraka pusie, airakasapo. Arirakano wate fana hepene aporo kitafasuamo ayíáka rakisimo murikimasapo. Murikimaka keremisiane soko, oko soko, maiya teane soko, maiya awane soko pauhoasimo hepene aporo kitafasuane kau risikisapo. Aporo-mano rusua kukusimo kau risikisapo.

¹⁶ Arirakano nōmo kaiyiane, “Ame aporo weako puraka saro hosea ripasane menoraka, tu harote mirione.”[†] Airakano nōmo kaisiapo. ¹⁷ Airakano nōmo kituamo aseane, aporo saro hosea riparakano asesapo. Aporo kāwa karerapaka funumo kāwa mafaisane susa soko hekenosa soko keamesa soko asisapo. Saro hose wamoane saro raeone wamo asisapo. Saro hose akai aeyaka ira rufi soko, ira musu soko ira musu keamesa watiki yamosa soko perakasapo. ¹⁸ Aporo hinamo risiane parakuraka isia parakusane meno tetáne metakarikia, isía hákasane ira rufi soko, ira musu soko, ira musu keamesa watiki yamosa soko, saro hose akai aeyaka pesamo isia hákasane rusua kurakasapo.

¹⁹ Saro hose akaimo soko kenomo soko amano rukunenakasapo. I kenoane kuyare asisapo. Keno turuane kuyare namo asisapo. Kuyare wamoamo amano rukunenakasapo.

²⁰ Saro hosemo amano mokoatikiraka rusua kurakasapo. Rusua kurakano asekea, aporo hinamo metakira rusua kukunafonosamo namina watikiaka rakisiane rukupateraka metakarirakasafapo. Ipu yatafu yakasa hoaki hemakapuraka, makata watiki-sane rukupateraka metakarirakasafapo. Metakarianafonoraka ipu kotafe koti kekepo hokonomo rakirakasapo. Metakira korótomo rakikia, metakira siufamo rakikia, metakira aine parosa mopesamo rakikia, metakira ekemo rakikia, metakira iramo rakikia, ayíáka ipu rakirakasapo. Hokonomo rakisiasamo kotafe kotiamo himo aserafapo. Senakimo kairafapo. Korakemo purafapo. Kotafe kotiaki ipu kekererakasapo.

²¹ Ipu aporo kukusimo rurane soko, ira hamí rurane soko, ho kamunane soko, hi-namo hakimarane soko, makata kemo hakimarane soko, suane rukupateraka metakari-rakasafapo. Ipu makata kotesane rakiakosakipoko risikiako parirakasafapo.

10

Sawi meta popasa mawerosa wakasemané hepene aporomo Yoneaki kasane oyapo.

¹ Hepene aporo wakapu meta hepene aeyaka perakasapo. Peraka ako e kaua karotapikia e wamo sawi inima hahaeraka rekesapo. E hikumisiane sere maiya faesa asisapo. Ira paisia inaraka rufiana ayíáka ipi korakeane asisapo. ² Sawi meta popasa mawerosa wakasemané fisiraka, ipi hokonomo maka rekesapo. Ipi korake tumuruane he tawara kima finiraka reke, korake kasakaiane hauaka á finiraka reke, ayíáka rekesapo.

³ Epo sakepamo wáraka saro raeonemo sakepamo merakano akaira ayíáka kaisiapo. Ti yapura yape yatipinusu kikirirakasapo. ⁴ Kikiriraka kikrimo somesane nōmo popahoko ayiane, hepene aeyaka memo someraka, “Kikrimo somesane popahokopo. Mahameanie,” airakasapo.

⁵ Airakano nōmo aseane, hepene aporo korake tumuruane he tawara kima finiraka reke, korake kasakaiane hauaka á finiraka reke, hokono tumuruane máfarakasapo.

⁶ Máfaraka epo someraka, “Kotio, né maiya suamo yaiya rekeakosapo. Hepene yapurane soko, hepene yapura makata risiane soko, hauakane soko, hauaka wo makata risiane soko, he tawarane soko, he tawara makata risiane soko, su nōmo kepomarekea rakisiapo. Nōmo someane nōmo some karakanapo. Fahokosa maiyane makerakanapo. Makesasamo yumo Kotimo kau rekeakosafapo. ⁷ Koti Karao, hepene aporo hakásá meta, yatipinu hakásamo pikoro kepomarekea ruane makata faserepeakosane foaka fasere-peakosapo. Asiamo wate fana Kotimo aporo raipa porofete aporoaki mafekemaraka ayiakakosapo aisane, kakaro ayiakakosapo,” airakasapo.

[†] 9:16: Tu harote mirione ane hokono uane menoane mahimetespao. Napa ane namo kakaro kárapo.

⁸ Fana hepene aeyaka somerakano me kaisia me hakása yiamo anoaki efera hunia someraka, “Hepene aporo korake tumuru he tawara kima finiraka reke, korake kasakai hauaka finiraka rea, epo hokonomo sawi meta popasa mawerosa fisiraka maka reane makopusie.”

⁹ Airakano ano pukua hepene aporoaki someraka, “Sawi wakasemane anoaki makasie.” Airakano epo someraka, “Ao, masie. Maka nesie. Akaimo neane sao nenaka sikhokosapo. Neketuane mome pukuhokosapo.” ¹⁰ Airakano nōmo maka, akaimo neane sao nenaka sikisapo. Nōmo neketuane mome pukuhohoapo.

¹¹ Arirakano anoaki someraka, “Aporo kau kekepo risiaki soko, aporo hauaka kekepo risiaki soko, aporo me kekepo risiaki soko, aporo unihae kekepo risiaki soko, Kotimo ayiakakosaposane efera hunia some kakanie,” airakasapo.

11

Kotimo some kará aporo tetámo somesane oyapo.

¹ Anoaki ira rura tadia asía, Kotimo karáka someraka, “Né takahikia, hauaka atura pukua nōmo apeane soko, eke kima taesane soko, ruramo murikimakanie. Nōmo apea aporomo anoaki kekereraka risiane menohoanie. ² Asiāne nōmo ape hauaka moroane nōmo ruramo murikimakopo. Arirakano nōmo ape hauaka moroa Yu aporo hoanafonosa anoaki kekerehokosakipoko perapo. Arirakano ere maiya foti tu amo (42) hauaka wo nōmo ape Yarusarame apeane Yu aporo hoanafonosamo mokoatikiraka rakaritaehokosapo. ³ Arirakano nōmo some kará aporo tetá pusierakano peraka, aporo tetá amo himu kára nekea pasu pitikini osoraka, sere wane taosene tu harote sekesete amo (1,260)* nōmo someane some kakakosapo,” airakasapo.

⁴ Arirakano hauaka wo unihae hikumisi neneme takua ira orofe tetá risiane soko, nafa tetá risiane soko, some kará aporoane asíapo. ⁵ Arirakano aporo metamo tetāne mokoatikihokosapoko asiāne, tetā akai aeyaka ira rufimo aporoane inaka kurapo. Mokoatikina aporo ayiáka kukusapo.

⁶ Arirakano tetapō Kotimo someane some akara maiyamo yao perapaka tetapō hemakapukua, ti yapura yaoane matasohokosapo. Arirakano he fuaka taenane yapi parihoasimo, tetapō hemakapukua rakiakosapo. Aporomano hauaka wo risiane makata tarane kakasimo, tetapō hemakapukua ayiáka rakiakosapo. Efera hunia soko efera hunia soko tetapō ayiáka wakapuaka rakiakosapo.

⁷ Tetapō some kaka faraka, hauaka kutu mato kunututu kakanafonosa aeyaka, aporo yasaro asía peraka, aporo tetāyaki yunu weraka tetā rusua kukusapo. ⁸ Tetā rusua kusuane siti kárat[†] ikia kara á warisikiakosapo. Arirakano siti kárane takumeaka Sotome taone ane soko, Iyipi hauaka ane soko asiápo, aihokosapo. Asiamo siti kára á tetapō unihaeane soko, ira matopesa paremarekea rusua kusuapo.

⁹ Sere isia faraka, sere kitafane haforaka maiyamo amo, aporo tetā rusua kusua warisikino, aporo hinamo yakai pekea, himo aseraka risikiakosapo. Aporo kau kekepomo soko, aporo hauaka kekepo aeyaka pesamo soko, aporo me kekepomo soko, aporo ira kekepomo soko, ipu suamo himo aseraka risikiakosapo. Ayiáka risike ipu someraka, “Aporo tetāne hauaka mareakopo,” aihokosapo.

¹⁰ Aporo tetāne kusikino, hauaka sua aporo risiamo asekea sesehokosapo. Seseraka sirá ayakarie, ayiáka mainamareraka risike, ipu kesahokosapo. I su seseraka, aporo metamo aporo metaki makata yaku kaka, aporo metamo aporo metaki makata yaku kaka, ayiakakosapo. Kotimo some kará porofete aporo tetámo makata umisane aporo hinamo watikisaki kasasamo, tetā rusua kusuakipoko aporo hinamo suamo sesehokosapo.

¹¹ Arirakano sere isia faraka sere kitafa hafoamo tetā rusua kusuane himuha ane Kotimo fórraka makerakasapo. Makerakano tetā turikia tarirakasapo. Turikia tarirakano aporo hinamo suamo asekea namorakasapo. ¹² Namoraka risikino, hepene aeyaka

* 11:3: Ere maiya 42 amo soko, sere maiya 1260 soko hakása yiypao. Maiya ane keremisi isia faraka, keremisi kitafane hafo pauraka asiapo. † 11:8: Siti kárane Yarusarame sitipo.

wáraka, “Teto wo peae,” Airakano kaikia, tetáne turikia tarikia risikino, ako pekea maka hinakasapo. Hinakano aporo hinamo suamo aserakasapo.

¹³ Teta maka ahira maiya amo, momani kára peraka, Yarusarame siti parakuraka kaeyakosu parakusane, tokonasu risike, kaeyakoane rakaripurakasapo. Rakaripuraka aporomano sewene taosene (7,000) sitia risiane rusua kurakasapo. Aporo hinamo rusua kukunafonosamo fofaraka namoraka Koti hepene yapura reaki someraka, “Né kárapo,” airakasapo.

¹⁴ Asiamo makata watikisa faserepeakosapo aisane, tetáne faserepesane ayapo. Arirakano makata watikisa isía ane faserepeako makerakanapo, airakasapo.

Hepene aporo hakása meta yatipinu amo pikoro rurakano kaisiane oyapo.

¹⁵ Hepene aporo yatipinumo pikoro rurakano, me yakaimo sakepamo someraka, “Isiapo Unihae Kotipe Mafasira aporo Yasu Kereso tetapō hauaka kára one unihaeaka risikiakosa maiyane faserepesapo. Tetā maiya suamo unihaeaka risikiakosapo.”

¹⁶ Airakano aporo kára tuaneti foane (24) Koti hikumisi neneme takua arupeperaka wamomo hauaka atura kataka risike Kotiaki kekereraka someraka,

¹⁷ “Unihae Kotio, nómō wakapuane kakaro kárapo. Né fana reane yumo soko rekenapo. Nómō wakapuane tarikia, unihaeaka reke kepomarerakano, isiapo néaki suserakanapo.

¹⁸ Neaki paohoanafonosa aporo hinamomo néaki saperakano, nómō soko, iaki saperaka hukurukua fanasihokosa maiyane maiya yuyapo. Aporo hinamo kusuane soko, hukurukusa maiyane maiya yuyapo. Arirakano nómō aporo hinamo raipaki soko, nómō some kará porofete aporoaki soko, né patera asesa aporo hinamoaki soko, né yano motosa makáraraka somera aporo hinamoaki soko, nómō aporo hinamo yano motosa káraki soko, nómō aporo hinamo yano motosa wakasemaki soko, makata ropo kakakosa maiyane maiya yuyapo. Hauaka wo watikiaka rakira aporo hinamoane fanasihokosa maiyane soko maiya yuyapo,” airakasapo.

¹⁹ Airakano hepene yapura Kotimo ape ikia koro ropakamarakano aseane, Kotimo maua kakeno nómō asesapo. Arirakano Kotimo maua kakarua Kotimo fana someaka masa popasane makesapo. Kotimo ape ikia koro ropaka amara maiya amo yamakere kikiri soko, momani soko yao eke ásíane soko, hakása perakasapo.

12

Hinamope tarékone tetā Yonemo asesane oyapo.

¹ Hepene yapura makata tarisiane oyapo. Tariraka hinamomo pasu osona ayíáka sere maiyane osoraka kakesapo. E korakemo oko kima finiraka kakesapo. E wamo uni hati ti makata kenosu risiane karotapikia kakesapo. ² Hinamoane hokosa umisa kayane hokosa takapeakosakipoko, pūraka sakepamo wáraka kakesapo.

³ Arirakano hepene yapura makata tarisia metane oyapo. Tariraka tarékone siapora ásia* kau susa wamo yatipinusu rekesapo. Wamo yatipinusua unihaemo hati yatipinusu karoterapiraka reke, mere isi kaeyakosu risia rekesapo. ⁴ Tarekonemo kenomo ti makata hepene yapura risiane isia parakusane tetáne risike, isia hákasané rukua, kakapere mokoa hauaka atura mokoasurakasapo. Hinamoane hokosa takaperakano, tarékonomo hokosane nakosakipoko hinamoane hikumisi neneme takua kau rekesapo.

⁵ Kau rekeno, hinamoane aporo hokosa takaperakasapo. Keseke aporo hokosa amo aporo hinamo hauaka sua risiane, paroaka unihaeaka aseke rekeakosapo. Asiamo hokosane takaperakano, wate foaka Koti sea kaya á hokosane maka hinakasapo. ⁶ Maka hinakano, hinamoane ima yaoa e kakakosane Kotimo maroporakano, á takaripukua sere wane taosene tu harote sekeseti amo (1,260) Kotimo e aseke rekesapo.

⁷ Arirakano maiya amo hepene yapura yunu kára werakasapo. Hepene aporo yano motosa Maeko ipi hepene aporo kotesayaki sarimaraka pekea, tarékoneyaki werakasapo.

* 12:3: Isiapo hauaka wo tarékone rekenafapo. Pisini meaka kuyare popasa ane, kuyarefapo. Siapora asia tarékone ane popasapo.

Werakano tarékone ane ipi hepene aporo watikisayaki sarimaraka Maekoyaki werakasapo.

⁸ Weraka Maekoane wareraka tarékone ane rukukoakataerakasapo. Rukukoakataeraka tarékone ane ipi hepene aporo watikisayaki waseremokoa hepene yapunaka mokoasurakasapo. ⁹ Asiamo tarékone ane kuyare fana mokopipiraka hkokakako pesa hakásáya. Aporo hinamo hauaka sua risiamo watikiaka rakisimo kirimanane e hákasapo. E yano motosane Satanepo. Kotafe someraka mokopipiraka reane e hákasapo. Asiamo Satane soko ipi hepene aporo watikisane soko hepene yapunaka waseremokoa hauaka wo mokoasurakasapo.

¹⁰ Arirakano nōmo kaiyíane hepene yapura memo sakepamo someraka, “Sere soko, ereamo soko, maiya suamo isiapo Keresoa paosa aporo maeane Satanemo Kotiaki kotafe topakamaraka hukururaka reapo. Kotafe hukurura aporoane hauaka atura makasusapo. Makasusasamo yumo isiapo Kotiaki kekererakanapo. Kotiane soko, ipi hokosa Yasu Keresoane soko, tetapō aporo hinamoane mafasikia wakapuaka unihaeaka asekea risikinapo.

¹¹ Saro Sipi Manomo isiapo Keresoa paosa mae papāpoko farimaka kukua ipi yapi pususamo, ipu himu hakásaraka hemakapukua, Saro Sipi Manoane some karaka, Satane makama kesekesapo. Asiamo i hitafe hauaka wo risikiakosane hemakapurafaraka, Yasuaki himu hakásaraka hemakapukua someraka, ‘Isu kuane soko siahoasireapo. Isu aporo watikisamo rurakano soko siahoasireapo,’ aýaka hemakapukua somerakasapo.

¹² Satane hauaka atura makasusasamo, re hepene yapura risia repo suamo Kotiaki suseaka sesehoanie. Asiāne hauaka atura aporo hinamo risia re soko, he tawara makata risia re soko namohoanie. Re risia makata umisa fasereperakanapo. Sataneane re arisia a makasusasamo, ipi reaki kára saperaka rekenapo. Fahokosa maiyane makesasamo, ipi reaki saperaka kára mokoatikihokosapo.” Aýaka memo somerakasapo.

¹³ Arirakano hepene aeyaka tarékone makasurakano hauaka wo pauraka reke, aporo hokosa takapesamo kaiyíane pūrakano mokoatikihokosakipoko kekemarakasapo.

¹⁴ Kekemarakano hinamoane takaripukua, ima yaoa pusimo mena ariawe ásia aua ane hinamoaki karakasapo. Karakano hinamoane mena anaka aua amo hapehaperaka takariapura ayiáka, takaripurakasapo. Takaripukua ima yaoa pauraka kakesapo. Kakeno keremisi isia faraka keremisi kitafa haforaka amo metamo e asekea rekesapo.

¹⁵ Arirakano tarékonemo hinamoane kekemarakana, hinamoane he nesa kukusimo, tarékonemo akai aeyaka he kára perakasapo. ¹⁶ He kára peraka, hinamoane maka pukusakipoko kekemarakano, hauakamo hinamoane arareraka, kutu koparua mapirisiane ropakamayane he su kutu matoa purakasapo. ¹⁷ Asiamo tarékonemo hinamoaki kára saperaka, hinamoamo hokosa metakiraki weako purakasapo. Arirakano Kotimo someane kakimaka Yasuaki himu hakásaraka hemakapura aporo hinamoane hinamoamo hokosane ayapo. ¹⁸ Arirakano he tawara fea tarékone pauraka rekesapo.

13

Yasaro ásia tetá pesane oyapo.

¹ Nōmo aseane he tawara aeyaka yasaro ásia perakasapo. Yasaro ásia wamo yatipinusu risikisapo. Risiakipoko mere isi kaeyakosu risikisapo. Mere isi kaeyakosua hakásáya hakásaraka unihae hati kaeyakosu karoterapisesapo. Wamo yatipinusua yano motosa watikisa popasesapo. Yano popasane Kotiane mawakasemaraka popasesapo.

² Yasaroane saro répate aseraka sikisapo. E korakeane saro pea korake asisapo. E akaiane saro raeone akai asisapo. Yasaroamo unihaeaka asekea rekeasimo siapora ásiamo someraka, “Nōmo unihaemo sea á né kayae,” aýaka epo unihae wakapuane eaki karakasapo.

³ Yasaroamo wamo namasuane risike, wamo yatipinuane kára rusisapo. Kára rusua kukufunusa nine umurusesapo. Umuruane aporo hinamo hauaka sua risiamo

asekea someraka, “Eane kukufunusa nine, kukunafonosasamo itifiasifareapo.” Aíyaka yasaroane patera asekea somerakasapo.

⁴ Yasaromo unihaeaka asekea rekeasimo tarékonemo maresasamo aporo hinamoamo tarékoneaki kekererakasapo. Kekereraka yasaro ásiaki soko kekereraka someraka, “Yasaro ásiáne ipi fanapo. E area ayíáka meta rekenafapo. Eyaki weraka epamo wareraka rukukoakataehokosare? Metamo wareraka rukukoakataehoane siahoasifareapo,” airakasapo.

⁵ Ere maiya foti tu amo (42) yasaro ásiá amo epo ipi yano motosane makáraraka reke, Kotiane hokomaka mawakasemaraka somerakano, Kotimo matasorakasafapo.

⁶ Arirakano yasaro ásiá amo Koti yano motosane soko, hepene yapura Koti rea hauakane soko, hepene yapura makata su risiane soko, mawakasemaraka ekeneraka, ho mareraka somerakasapo.

⁷ Yasaro ásiá amo Keresoa paosa aporo hinamo akiyaki weraka, iane rukukoakataerakasapo. Ane Kotimo matasorakasafapo. Aporo ira kekepoane soko, aporo kau kekeposane soko, aporo me kekeposane soko, aporo hauaka kekepoa risiane soko, yasaro ásiá amo unihaeaka wakapuaka asekea rekeno Kotimo matasorakasafapo.

⁸ Matasohoanafonorakano aporo hinamo hauaka sua risiamo yasaro ásiaki kekererakasapo. Ásiáne yasaro ásiaki kekerehoanafonosa aporo hinamoane oyapo. Aporo hinamo metakiramo hemakapukua Saro Sipi Manomo ipoko farimaka kusuapo, ayíáka hemakapusua aporo hinamoamo yano motosane Kotimo sawia popasesapo. Arirakano hauaka one kepomareasiraka maiya amo, yaiya risikiakosa aporo hinamoamo yano taesane Kotimo sawia popasesapo.

⁹ Re senaki risiamo koteaka kaiyinie. ¹⁰ Aporo meta tipura makeakosapo aisane aporoane tipura makerakasapo. Aporo metane ferepemo rukusapo aisane aporoane ferepemo rurakasapo. Ayiakakosapo aisasamo kakimara aporo hinamo repo Kotiaki himu hakásaraka hemakapusuane metakarirapaka, yaiya paroaka risikianie.

¹¹ Arirakano yasaro ásiá meta hauaka aeyaka perakasapo. Pesane Saro Sipi Mano mere isi tetá arisia ayíáka, yasaro ásiá keseke pesane mere isi tetá ayíáka risikisapo. Meane kotafe meraka, sipora asiomo meraka sikirakasapo. ¹² Yasaro ásiá keseke pesane, yasaro ásiá fana pesa akiyaki hakása reke, fana pesamo wakapuaka someaka maresa ayíáka, keseke pesamo ayíáka wakapuaka someaka marerakasapo. Someaka marerakano yasaro ásiá fana pesane wamo rusua umurusa, eaki aporo hinamo hauaka sua risiamo kekerehoasimo, yasaro ásiá keseke pesamo someraka, “Yasaro ásiá fana pesaki kekerehoanie,” airakasapo.

¹³ Aíyaka yasaro ásiá keseke pesamo ipi wakapumo hemakapukua rakirane rakisiapo. Aporo hinamomo asekeasimo ira rufi hepene aeyaka hauaka wo peasimo rakirakasapo.

¹⁴ Yasaro ásiá keseke pesamo yasaro ásiá fana pesa akiyaki reke, Kotimo matasohoanafonorakano, ipi wakapumo hemakapukua rakirane rakirakasapo. Yasaro ásiá keseke pesamo kotafe rakirakano, aporo hinamo hauaka sua risiamo kotafe rakisiante keke-marakasapo. Kekemasa aporo hinamoaki yasaro ásiá keseke pesamo someraka, “Yasaro ásiá fana pesane ferepemo rusua fareasane amo yano motosane makárahokosakipoko, e kauane murikimaka hakása yineraka hokonomo kotafe koti pariraka yasaro ásiáne rakinie.” Aíyaka somerakano ipu murikimaka hokonomo yasaro ásiáne kotafe koti pariraka rakirakasapo.

¹⁵ Yasaro ásiá hokonomo kotafe koti pariraka rakisiaki yasaro ásiá keseke pesamo himuha karakano, Kotimo matasosafapo. Matasohoanafonorakano, hokonomo kotafe koti pariraka rakisia yasaro ásiá amo akaimo somesapo. Akaimo someraka, “Anoaki kekerehoanafonona aporoane rusua kukunie,” airakasapo.

¹⁶ Yasaro ásiá keseke pesamo someraka, “Aporo hinamo yano motosa kára soko, aporo hinamo yano motosa wakasema soko, aporo hinamo raipa soko, aporo hinamo raipahoanafonosa soko, i su hikumisia soko metao, hokono tumurua soko metao, yasaro ásiá fana pesamo yano motosane popahoanie.

¹⁷ Arirakano epo yano motosa popahoanafonosa, epo napa ane popahoanie. Epo yano motosa soko metao, napa soko metao popahoanafonosa aporo hinamoamo makata ropohoane siahoadifareapo,” aiyaka yasaro asia keseke pesamo yapo motorakasapo.

¹⁸ Arirakano aporo hinamomo koteaka hemakapurakano, kepoane hemakapukusapo. Yasaro asia fana pesamo napa sekese harote sekeseti sekesepo (666). Napa ane takumeaka aporo yano motosa popasesapo. Napa ane aseraka aporoamo yano motosane hemakapukusapo.*

14

Aporo hinamo yakaimo kesasane oyapo.

¹ Nōmo aseane, Saro Sipi Mano ūri Saeone teraya rekesapo. Saro Sipi Manoyaki aporo hinamo wane harote foti fo taosene (144,000) sarimaraka risike, i hikumisia Saro Sipi Mano yano motosane soko ipi Ata yano motosane soko popasesapo.

² Nōmo kaiyíane hepene aeyaka meraka he kára peraka sikiraka, kikiriraka sikiraka aporo yakaimo kita ruraka sikirakano kaiyiapo.

³⁻⁴ Koti unihaeaka sea kaya soko, makata kakayia kitafasu risia soko, aporo kára risia soko, i hikumisi neneme takua aporo hinamo wane harote foti fo taosene amo (144,000) kesarakasapo. Ipu kesasane hauaka su aeyaka Kotimo pasimosa aporo hinamo amo kesa kawe kesarakasapo. Kesasane ipu hákasamo enomasesapo. Aporo hinamo metakiramo enomakasisafapo. Asiamo aporo kesasamo hinamoyaki mokome purasesafapo. Hinamo hakimarasesafapo. Saro Sipi Mano purakano i soko hakāsa eyaki sarimaraka purasesapo. Kotimo aporo ira fanāne ipo. Ipu Kotiane soko, Saro Sipi Manoane soko, makáraraka kekerehoasimo Kotimo iane fana pasimosesapo.

⁵ Pasimosa aporo hinamoamo makata kotafe somerafapo. Hasaka hemakapurafapo. I namo kakaro kotesa susupo.

Hepene aporo isia pesane oyapo.

⁶ Hepene yapura hepene aporo hakása meta koraka rekesapo. Koraka reke aporo hauaka kekepo risiaki soko, aporo ira kekepoaki soko, aporo me kekeposaki soko, aporo kau kekeposaki soko, Yaiya Rera Kotimo someane some kakakosakipoko koraka rekesapo. ⁷ Koraka reke epo sakepamo someraka, “Koti ipi kárasasamo eaki kekereraka makárahoanie. Kotimo aporo hinamo su takekea parakuraka hukurukusa maiyane fasereapere. Hepene yapurane soko, hauaka one soko, he tawarane soko, he fuaka taenane soko, su Kotimo kepomaresapo. Asiamo eaki kekerehoanie,” airakasapo.

⁸ Asiakipoko hepene aporo hakása meta, tetá ane kekemaraka pekea someraka, “Pápirone taone kárane rakaripureapo. Pápirone taone fareapo. Aporo hinamomo himu maparitaehoasimo epo iaki waene he nasimo kaka kirimaraka kayereapo. Aporo hinamo Pápirone taonea risiamonamо kakaro watikiaka rakireapo. Ipu kaumо hemakapusuane kara raraporaka risike, arirakano ipu kotafe Koti parisane makararaka risiapo. Ayíáka risike aporo hinamo hauaka sua risiamonamо watikiaka rakisimo kirimasapo. Kirimasasamo Pápirone taone kárane rakaripusuapo,” airakasapo.

⁹⁻¹⁰ Asiakipoko hepene aporo hakása meta, isia ane kekemaraka pekea sakepamo someraka, “Yasaro asia fana pesane soko, yasaro asia murikimaka kotafe koti pariraka hokonomo rakisiane soko, aporo hinamomo kekereraka risike, yasaro yano motosa i hikumisia soko metao, hokona soko metao, popasa aporo hinamoaki Kotimo sapehokosapo. Namо kakaro kára saperaka rekeakosapo. Aporomo aporo metaki waene he nasimo kapoa komarukua akara ayíáka, Kotimo sapenane káraraka komarukua ayíáka aporo hinamoaki kakakosapo. Waene he namо heyaki sarimahoanafonoraka waene he susu akara ayíáka Kotimo sapenane ayíáka kakakosapo. Asiamo Kotimo sapenane mauahokosafapo. Saro Sipi Mano soko, hepene aporo kotesa soko i risia, hikumisi

* ^{13:18:} Wate fana Rome unihae Sisa yano motosa Nero reapo. E yano motosane menoraka napa 666 ayapo. Aporoamo Keresoa paosa aporoane kara mokoatikisapo. E watikiaka area ayiaka, aporo keseke peakosa amo watikiaka rakiakosapo.

nenemea aporo hinamoane Kotimo fanasihokosapo. Fanasina hauaka á eke yano motosa saofa ane rufiraka, musuane yamohoane, mena hae kapuasa yamohora ayiáka yamohoapo. Eke saofa rufimo soko, ira rufimo soko iane inakakosapo.

¹¹ Inaraka ira musuane yaiya hinaka rekeakosapo. Ira rufiane fahokosafapo. Yasaro asía fana pesane soko, yasaro asía murikimaka kotafe koti pariraka hokonomo rakisiene soko aporo hinamomo makáraraka risike, yasaro asía yano motosa popasa aporo hinamoane Kotimo fanasirakano ira rufimo inakakosapo. Inaraka risike maiya metamo yapa mareakosafapo. Maiya suamo sere soko ereamo soko inaraka risikiakosapo,” airakasapo.

¹² Asiamo Kotimo someane kakimaka risia aporo hinamo re soko anapaka Kotimo someane kakimaka, Yasuaki himu hakásaraka hemakapukua paroaka risikianie. Paripukupo Yasuaki himu hakásaraka hemakapusuane rosaka taehokosakipoko hemakapunie.

¹³ Arirakano hepene aeyaka memo someraka, “Úyaka popahoanie. Maiya yumo soko, keseke soko Unihae Yasu Keresoaki himu hakásaraka hemakapusua aporo hinamo kusuane Kotimo makoterakano sesehokosapo.” Airakano Ho Kotesamo soko someraka, “Kakarorakae. I wafororaka rakiraka risiane metakarikia fenenakanapo. I nena hinakanafapo. Ipu makata koteaka rakisiene iyaki hakāsa hinakanapo,” airakasapo.

“Hauaka wo makata mano porosa namo nakosa susekeno ferepemo pateke mokoanie,” aisane oyapo.

¹⁴ Nōmo aseane, ako pakaesa kima yapura Aporomanomo Táke kakesapo. Kake korótomo rakisia hati ane karotapikia, hokonomo ferepe maka kakesapo. ¹⁵ Kakeno, hepene aporo meta Kotimo ape aeyaka pekea, aporo ako kima yapura kayaki someraka, “Hauaka atura makata mano tanehesane surakanapo. Susane ferepemo popateraka mokoanie. Susasamo makata nako mokoakosa maiyane faserepesapo,” airakasapo.

¹⁶ Airakano aporo ako kima yapura kayamo ferepemo hauaka atura makata nakosa susane popateraka morakasapo.

¹⁷ Arirakano hepene yapura Kotimo ape aeyaka hepene aporo meta peraka, epo soko ferepe waresa maka perakasapo. ¹⁸ Maka perakano, hepene aporo meta ira rufi aseke reane, Kotiaki kakako pauta wape yamona paikia teboro eke taesa asíane metakarikia perakasapo. Peraka hepene aporo ferepe waresa maka reaki sakepamo someraka, “Hauaka atura sako karepe wate surakano, ferepemo popateraka karepe wateane mokoanie,” airakasapo.

¹⁹⁻²⁰ Airakano hepene aporomo ferepe maka rea amo, hauaka atura sako karepe wateane popateraka, karepe wateane morakasapo. Mosane ape yao takua reakipoko maua asía á motosakipoko, á mokoasurakasapo. Mokoasusane finiraka tairakasapo. Tairaka he pekearea ayiáka perakasapo. Peraka, maua motosa a komarukua yaoa sakopeperaka hauaka sua komarurakasapo. Komaruraka saro hose akai humaresa huturua paurakasapo. He namo pesane hauaka yamenoa komarukua purakasapo. Asiamo maua sako karepe wate taisamo kepoane Kotimo saperaka fanasihokosane murikimarakasapo. Sako watē he pusuane amano yapi pukusane murikimaka purakasapo.

15

Hepene aporo yatipinusu pesane oyapo.

¹ Hepene yapura makata meta haku asekeanafona tarisiane oyapo. Hepene aporo yatipinusumo makata meta amano mokoatikina makatane, yaiya yatipinusu mokoa risikisapo. Mokoatikiraka faraka, efera hunia amano mokoatikihokosafapo. Mokoatikiraka faraka Kotimo sapenane soko fahokosapo.

² Asiamo he tawara hiho asía akiyaki ira rufiyaki sarimasa asisapo. Yasaro asía fana pesaki soko, yasaro murikimaka kotafe koti pariraka hokonomo rakisiaki soko, yasaro yano motosa napa popasaki soko, yunu wekea wareraka rukumosakatapisia aporo

hinamoane he tawara hihó asíane he fea risikisapo. Risike kita asía Kotimo kasane hokonomo mokoa risikisapo.

³ Mokoa risike Kotimo aporo raipa Mosesemo kesasane soko, Saro Sipi Manomo kesasane soko ipu murikimaka kesaraka,

“Unihae Koti, nómó wakapuane namo kakaro kárapo. Nómó makata rakirane namo kakaro kárapo. Uao, ya watikihoareapo. Aporo hinamo hauaka sua risiane nómó unihaeaka asekea rekenapo. Nómó ainane ereketae kotesa susupo. Nómó kakaro somerapo.

⁴ Né hákasa namo kakaro kotesa susu rekenapo. Asiasamo aporo epamo né yano motosane makáraraka kekerehoko hisihokosare? Wae, aporo metamo néaki kekerehoko hisihokosafapo. Aporo hinamo hauaka sua risiamo néaki kekerehokosapo. Nómó makata rakirane ereketae kotesa susuane aporoaki tarisiapo,” aiyaka kesarakasapo.

⁵ Kesaraka faraka hepene yapura Kotimo ape kakarua Namó Kakaro Kotesa Susu ape ikia koroane ropakamarakano, ape kakarua nómó asesapo. ⁶ Kotimo ape kakarua aeyaka hepene aporo yatipinusuamo makata meta amano mokoatikina makatane mokoa perakasapo. Hepene aporoamo pasu pakae faesa kotesa osoraka, korótomo rakisia saro kau terakae asía hikia perakasapo.

⁷ Perakano makata kakayia kitafusuamo hakásamo hepene aporo yatipinusuaki korótomo rakisia tisi hakásaraka karakasapo. Yaiya Rera Kotimo kára saperaka fanasihokosane tisia kekeá komarupe pusuane, hepene aporo yatipinusuaki hakásaraka karakasapo.

⁸ Hepene yapura Kotimo ape kakarua Kotimo faesane soko wakapuane soko ira musu asía ape kakarua komarukua rekesapo. Komarukua rekeno, aporo meta soko Kotimo ape kakarua yoroane siahoasisafapo. Ape kakarua yorokoa pukusakipoko fana hepene aporomo amano mokoatikinane kaka fahoasimo aporo meta soko asekea rekesapo.

16

Hepene aporomo amano mokoatikina makatane tisia kekeá komarusua masakurisiane oyapo.

¹ Nómó kaiyíane, hepene yapura Kotimo ape aeyaka hepene aporo yatipinusuaki memo someraka, “Kotimo kára saperaka fanasihokosa tisia komarusuane hauaka atura masakurisie,” airakano nómó kaisiapo. ² Asiamo hepene aporo hakásamo tisia makata kekeá komarusuane hauaka atura masakurirakasapo. Masakuriane yasaro asía yano motosa amano kaua popasa aporo hinamoamo yasaro asía murikimaka hokonomo kotafe kota pariraka rakisiaki kekerehoane, i kaua neketasi susurakasapo. Neketasiraka ikiki yamohoapo.

³ Arirakano hepene aporo hakásamo meta tetá amo tisia makata kekeá komarusuane he tawara á masakurirakasapo. Masakuriane he tawarane aporo kusua yapi asía parirakasapo. Yapi pariraka makata su hea risiane kukua kerakasapo.

⁴ Arirakano hepene aporo hakásamo meta isia amo tisia makata kekeá komarusuane he pekerea á soko, he fuaka taena á soko masakuriane heane yapi parirakasapo. ⁵ Yapi parirakano nómó kaiyíane, he asekea rea hepene aporoamo someraka, “Kotio, né fana reane, yumo soko yaiya rekenapo. Né kotesa ereketaesa susu rekenapo. Aporo watikisane nómó aseraka, iane takekeá fanasina ropoane siareapo. ⁶ Asiamo né patera asesa aporo hinamoane soko, porofete aporoane soko ipu rusua kusuapo. Rusua kuraka, yapi pusuapo. Asiamo yumo aporo watikisamo he yapi parisane nasimo karakanapo. Karaka, “Sirá,” airakasapo.

⁷ Arirakano Kotiaki kakako pauta wape yamona teboro eke taesa aeyaka memo wáraka, “Ao, kakarorakae. Unihae Kotio, né kárapo. Nómó kakaro susu anapo. Nómó ereketae takekeá fanasinapo,” airakasapo.

⁸ Arirakano hepene aporo hakásamo meta kitafa amo tisia makata kekeá komarusuane sere maiya á masakuriane, sere maiyamo iramo inara ayíáka, amano inarakasapo.

⁹ Inarakano Kotimo ayiakarie, airakasapo. Aisane takekeá fanasina Kotiane aporomo

mawakasemaraka ekeneraka mokoatikirakasapo. Mokoatikiraka Kotiane kekerehoana-fonoraka Kotiaki risikiako parirakasafapo.

¹⁰ Arirakano hepene aporo hakásá meta kakorea amo tisia makata kekeá komarusuane yasaro asía unihaeaka asekea kará sea á masakurirakasapo. Á masakurirakano yasaro asíamo ipi asekea rea aporo hinamoane su makatorakasapo. Makatoraka risike aporo hinamo kau teraka risiasamo, namina arúane nenakasapo. ¹¹ Kau teraka neketasi susuraka risiasamo, yakasa ho marera ayiáka, Koti hepene yapura reaki airakasapo. Aýaka ipu watikiaka rakisiane soko, rukupateraka metakarirakasafapo.

¹² Arirakano hepene aporo hakásá meta nama amo tisia makata kekeá komarusuane he Yuferétisi á masakuriane, heane serarakasapo. Asiamo sere maiya apera taku aeyaka aporo unihae yakai peasimo heane serarakasapo.

¹³ Arirakano siaporamo akai mato aeyaka soko, yasaro asíamo akai mato aeyaka soko, kotafe porofete aporomo* akai mato aeyaka soko, yatafu isia kuti asía perakasapo. ¹⁴ Yatafuane pekea hauaka sua pukua aporo unihae risiaki ipu wakapumo hemakapukua rakirane tarirakasapo. Tarirakano aporo unihae suane sarimaraka, Koti Namo Kakaro Wakapu Karaki yunuraka weako sarimarakasapo. Weakosa maiya sereane Koti Káramo murikimasesapo.

¹⁵ Arirakano kesekea peakosa aporo Keresomo ipi someraka, “Kaisie, ape wafaya meraruamo wasakipoko, hakimora aporo apera ayiáka, ano ayiáka peakosapo. Ano perakarihoamo asekea risikianie. Aporo wakanafonoraka hitafe kayane, kenare pasu makeraka kayane, ano apera maiya amo aporoane patera yase kaiyaraká pukusafapo. Ipi seseraka mapiraraka pukusapo,” airakasapo.

¹⁶ Arirakano Hipuru meaka hauaka yano motosa Amakétone hauaka á aporo unihae yakaiaki yatafu kuti asíamo someraka, “Sarimahoko peae.” Airakano pekea sarimarakasapo.

¹⁷ Arirakano hepene aporo hakásá meta yatipunu amo tisia makata kekeá komarusuane atifoá masakurirakasapo. Masakuriane, Kotimo apea unihae kará sea aeyaka memo sakepamo someraka, “Fapo. Yiyapo.” ¹⁸ Airakano yamakereraka kikiriraka soko, hauaka rukusane momani namo kakaro kára perakasapo. Hauaka wo fana amano kepomarekea wainepe pesa maiya amo momani kára ayiáka pesafapo.

¹⁹ Momani kára peraka, Pápirone siti kára ane koaraka isíarakasapo. Arirakano hauaka sua taone kekepoa ape kisiane rakaritaerape purakasapo. Pápirone sitia aporo hinamo risiane fanasinane Kotimo metakarirakasafapo. Waene he kapoa takamasane ipu nasimo karakasapo. Waene heane taku meaka Kotimo sapenane ayapo. ²⁰ Momani peraka he tono suane soko, hemo karekeraromaka purakasapo. Úriane soko risiane farakasapo. ²¹ Eke yao asía ti yapunaka peraka, aporomano kaua hurupeperakasapo. Eke hurupepesane eke popake kakaro umisa asía hurupeperakasapo. Eke hurupeperaka aporo hinamoane kára mokoatikisamo ipu Kotiane yakasa ho marera ayiáka, Kotiaki airakasapo.

17

Aporo rea pura hinamoamo makata ropo watikisa masane oyapo.

¹ Hepene aporo yatipinusumo tisi yatipinusu mokoa risike hakásá meta ano rea pekea, anoaki someraka, “Né peae. Néaki nōmo makata tariako peae. Aporo rea pura hinamo he tawara kima yapura kakenapo. Kake epo makata watikiaka rakisiasamo fanasihokosane nōmo néaki tariakosapo.

² Arirakano hauaka wo aporo unihaeaka risiamo aporo rea pura hinamoane hakimarakasapo. Aporomo waene he nenaka himu maparitaena ayiáka, hauaka wo aporomo hinamo hakimaraká* ayiáka, himuane mawatikinapo,” airakasapo.

* ^{16:13:} Kotafe porofete aporoane yasaro asía kesekea pesa ayapo. * ^{17:2:} Aporomo ipi asea metakarikia aporo rea pura hinamoane hakimako apura ayiáka, aporomo Kotiane metakarikia, yatafu yakasa hoaki soko kotafe koti parisaki soko kekerehoko purapo. Aýaka takume kepoane ayapo.

³ Arirakano Ho Kotesamo ano maka yao kauanea maka hinakasapo. Maka hinaka hepene aporo soko hakāsa hisiapo. Hikia aseane, yasaro ásia kau honesa matia hinamo ripaka rekesapo. Yasaro ásiane kau sua Kotiane mainamarekeea mokoatikiraka popasesapo. Yasaro ásiane wamo yatipinusu mere isi kaeyakosu ayíáka risikisapo.

⁴ Hinamoane kau rakikia pasu susa soko hekenosa soko osoraka, sekete mawia motokoa, korótomo rakisia ikia reane mawia taporaka, korótomo rakisia wayane hokono sakinia hikia, korótomo rakisia senaki kera senakia kekeia, eke mone káramo roponane soko hatiraka mawia karotapikia, ayíáka kau rakisisapo. Ayíáka kau rakikia, korótomo rakisia kapo he komarukua maka kakesapo. He komarusuane takumeane Koti hikumisia epo makata watikiaka rakisiante soko, epo aporo rea purane soko kapoa kekeia komarusisapo.

⁵ Hinamoamo hikumisia yano motosa popasane yapake someaka popasesapo. Popasane oyapo. “Pápirone siti kára ásiane anopo. Aporo rea pura hinamo suamo amá ane anopo. Yatafu yakasa hoaki kekerena aporo amo amá ane anopo,” aíyaka popasesapo.

⁶ Arirakano Koti patera asesa aporo hinamo rusua kusuane soko, Yasumo some kará aporo hinamo rusua kusuane soko, amano rusua kuramo kepoane hinamo ayapo. Waene he nenaka himu maparitaena ayíáka, hinamoamo aporo rusua kusua yapi nenaka himu maparitaesapo. Hinamoane nōmo aseraka ano fofasapo.

⁷ Fofarakano hepene aporomo anoaki someraka, “Marirakano ne fofarkanare? Yasaro ásiamo wamo yatipinusu, mere isi kaeyakosuane matia hinamoane ripaka rekesapo. Hinamoamo kepoane soko, yasaroa siamo kepoane soko, yumo nōmo néaki somerakanapo. Kepoane oyapo.

⁸ Yasaro ásia nōmo asesane fana reane, yumo kusua rekenapo. Keseke hauaka kutu mato kunututu kakanafonosa aeyaka e pekea, yaiya fanasiraka rekeasimo fanasina hauaka á pusierakano pukusapo. Asiamo yasaro ásia fana reane, yumo e kusua rekenapo. Keseke e peakosapo. Arirakano wate fana Kotimo hauaka one kepomareasiraka, aporo hinamo yaiya risikiakosane Kotimo sawia yano taesa popahoanafonosa aporo hinamoamo yasaro ásia keseke perakano asekeia fofahokosapo.

⁹ Asiamo aporo hinamomo koteaka hemakapukua risike, makata kepoane suane hemakapukusapo. Yasaro ásia wamo yatipinusuane, ūri yatipinusu ayapo. Ūri yatipinusua hinamoane kayapo. ¹⁰ Asiamo yasaro ásia wamo yatipinusuane, aporo unihae yatipinusu ayapo. Aporo unihae kakoreasu fana unihaeaka risiane rukufasapo. Rukufarakano asekeia, nama ane pekea unihaeaka rekenapo. Nama patera yatipinuane pekea unihaeaka rekeakosapo. Maiya wakasemamo e unihaeaka rekeakosapo. ¹¹ Yasaro ásia fana reane, yumo kusua rekenapo. Kusua reane, keseke peakosane unihae kari ayapo. Kariamo yasaro ásia yatipinusu fana unihaeaka risiane ipi tékeane hakāsa yiyapo. E soko fanasina hauaka á pukusapo.

¹² Mere isi kaeyakosuane aporo unihae kaeyakosu ayapo. I yumo unihaeaka risiki-asimo murikimasafapo. Keseke murikimarakaa, yasaro ásia unihaeaka reakipoko, iane soko maiya hi wane awa hakásamo unihaeaka risikiakosapo. ¹³ Asiamo aporo unihae kaeyakosuamo himu hakásaraka hemakapukua yasaro ásia aki someraka, ‘Isiapo hauakane, nōmo unihaeaka asekeia rekeasimo, né murikimarakapanapo.’

¹⁴ Aíyaka i su sarimaraka, Saro Sipi Mano akiyaki yunuraka weakosapo. Weraka Saro Sipi Manomo iane rukukoakataehokosapo. Asiamo aporo kára suamo kárane, Saro Sipi Mano ayapo. Aporo unihae suamo unihaeane, Saro Sipi Mano ayapo. Arirakano Saro Sipi Manomo pasimokoa murikimosa aporo amo Saro Sipi Manoane patera asekeia eyaki hakāsa weakosapo. Saro Sipi Manomo pasimosa aporo amo Saro Sipi Manomo kakaro someane kekemarakaa eaki himu hakásaraka hemakapukua risikiakosapo.” Aíyaka hepene aporomo somerakasapo.

¹⁵ Arirakano hepene aporomo anoaki eféra hunia someraka, “He tawara kima yapura aporo rea pura hinamo kakeno, nōmo fana asesapo. Asesa he tawara kepoane oyapo. Aporo kau kekeposane soko, aporo ira kekepoane soko, aporo hauaka kekepoane soko, aporo me kekeposane soko, amano sú sarimaraka he tawara asiapo.

¹⁶ Arirakano mere isi kaeyakosu nómo asesane aporo unihae kaeyakosu ayapo. Aporo unihae kaeyakosuamo soko, yasaro ásimo soko, aporo rea pura hinamoane hisihokosapo. Hisiraka hinamoane rukua mokoatikiraka, epo pasu ososane horomarakano, e patera yase rekeakosapo. Patera yase rekeno kauane soko maiya ane soko nakosapo. Nekea siaraka, metakira yia tokeno ira paikosapo. ¹⁷ Asiamo aporo unihae kaeyakosuamo namina himu hakásaraka hemakapukua, ipu hauaka yasaro ásimo unihaeaka asekea rekeasimo hemakapurane, Kotimo mahemakapukua marerapo. Kotimo ayiakakosaposane ayiakasiraka aporo unihae kaeyako suamo yasaro ásimo makama fanahokosapo.

¹⁸ Arirakano hinamo nómo asesane kepoane siti kára ane ayapo. Siti kára a aporo unihaeaka reamo hauaka sua aporo unihaeane epo asekea rekeakosapo.” Aíyaka hepene aporomo somerakasapo.

18

Pápirone sitia aporo hinamo fanasisane oyapo.

¹ Hepene aporomo someaka farakano, hepene aeyaka hepene aporo meta perakasapo. Peraka e wakapu káravaki peraka, epo faesamo hauaka wo mafaerakasapo.

² Epo sakepamo wáraka, “Pápirone siti kárane rukukoakataerakasapo.* Sitiane kakaro rukukoakataeraka farakasapo. Rukukoakataeraka farakano, sitia yatafu soko, yakasa ho soko, kurakaya hinamo soko, wafe soko, ira wafe soko risikinapo.

³ Asiamo sitiane rukukoakataehoasiraka makata watikisane aporo hinamo hauaka sua risiamo rakísimo Pápirone siti aeyaka tarisiapo. Aporomo waene he nenaka himu maparitaeraka hemaka apura ayíáka, aporo hinamo hauaka sua risiamo makata watikisane rakiraka watikiaka susu hemakapusuapo. Hinamo aporo Pápirone sitia risiane takumeaka someraka hinamo asiapo. Hinamoane aporo unihae hauaka sua risiamo hakimaraka risiapo. Pápirone sitia aporo suamo pisinisi watikisa rakiraka, yokotae mone kára mosapo. Asia ayíáka aporo hauaka sua risiamo pisinisi watikisane murikimaka rakikia mone kára mosapo.” Aíyaka hepene aporomo somerakasapo.

⁴ Arirakano nómo kaiyíane, hepene aeyaka me metamo someraka, “Ano patera asesa aporo reo. Hinamoamo makata watikiaka arakira ayíáka, repo rakirakanone hinamoane fanasiraka, re soko fanasihokosapo. Fanasinapaka kikisiraka risikianie.

⁵ Hinamoamo makata watikisane namo kakaro kárupo. Kárasasamo Kotimo e fanasihokosapo. Fanasihokosane kakaro metakariakosafapo. ⁶ Hinamoamo re mokoatikisa ayíáka, repo ropo mokoatikihoanie. Hinamoamo re yape hakásá mokoatikisakipoko, repo eane yape tetá mokoatikihoanie. Hinamoamo aporo yakaimo watikiaka rakísimo tarisiasamo, repo eane namo kakaro kára mokoatikihoanie.

⁷ Hinamoamo kára watikiaka rakisiaamo eane kára fanasiraka mokoatikihoanie. Hinamoamo fana watikiaka rakiraka epo yano motosane makáraraka seseraka kayapo. Asiáne epo watikiaka rakisia ayíáka eane ropo ayíáka kakanie. Asiamo hinamoamo himumo hemakapuraka, ‘Ano hinamo kára kuinipo. Hinamo yaroane ipi apia kurakano hiripuraka akaya ayíáka, ano ayíáka kakenafapo. Ano akaya makata umisa faserepeakosapo. Hiripuna kepoane anoa kakenafapo,’ aíyaka hemakapusuasamo ⁸ sere hakásamo e mokoatikhoko makata watikisane su faserepeakosapo. Fasereperaka, makata takamarane soko, himu nenane soko, makata nakosa fahokosane soko, makata suane faserepeakosapo. Ira rufimo soko eane inakakosapo. Aíyaka Unihae Kotimo hinamoane takekea fanasihokosane motosesapo. Koti ipi wakapuanie namo kakaro kárupo.” Aíyaka memo somerakasapo.

⁹ Asiamo aporomo hinamo hakiamara ayíáka, aporo unihae hauaka sua risiamo, aporo hinamo Pápirone sitia risiamo makata watikiaka rakisiaane enomaka, ipu soko watikiaka

* 18:2: Tanio rea maiya amo Pápirone siti yaiya reapo. Pápirone sitia aporo hinamomo namo kakaro watikiaka rakisiaamo, Kotimo iane fanasiraka, sitiane rakaritiaeapo. Asiamo Pápirone siti takumeaka siti meta namo kakaro watikisane Kotimo kára fanasihokosapo.

rakirakasapo. Rakisia akipoko Pápirone sitiane iramo inaraka, ira musu hinakano aserakasapo. Aseraka i kára hihiripuraka risikisapo.

¹⁰ Hihiripuraka yamenoa risike mokoatikisane aseraka fofaraka namoraka someraka, “Pápirone siti káraro. Kárane iramo inaka fane asekea kamenakaripo. Maiya hi awa hakásamo Pápirone siti kárane inaka fane,” airakasapo.

¹¹ Asiamo sitiane fanasiraka, iramo inaka fasékeno, hauaka sua pisinisi rakira aporoamo aseraka hihiripurakasapo. Hihiripuraka ipu makata ropona apeane iramo inaka fasékeno asekea someraka, “Isiapo menane epamo ropohoanapi. Pápirone sitia ropohoasifareapo,” airakasapo. ¹² Arirakano ipu fana makata roponane oyapo. Korótó soko, siufa soko, eke kotesa mone káramo roponane soko, sekete ásia soko, pasu kotesa soko, pasu hekenosa soko, pasu susa soko, ira wape yamona soko, saro érefane mere isi pakaesane mokoa makata metakira hokonomo rakisiane soko, ira hokonomo rakisiane soko, eke keamesa makata rakisiane soko, funu soko, eke kotesa soko, ¹³ samanu ásia soko, káre ásia soko, pauta wape yamona soko, pauta meta yano motosa mua soko, pauta meta yano motosa ferékesese soko, waene he soko, wera soko, farawa soko, witi hae soko, saro ponomakau soko, saro sipi soko, saro hose soko, wakone soko, aporo raipa roposa soko, makata suane ayíáka roporakasapo. Roporaka aporo raipa kakaro aporomanopo, ayíáka hemakapurakasafapo. Makata fato ropona ayíáka, aporomanoane soko ayíáka roporakasapo.

¹⁴ Arirakano Pápirone sitiane takumeaka yano motoraka hinamopo. Hinamoaki pisinisi rakira aporomo someraka, “Nómo makata kotesa ropohoko seseaka hemakapusuane yumo fareapo. Fasasamo efera hunia né káraraka unihaeaka kakakosafapo,” airakasapo.

¹⁵ Asiamo pisinisi rakira aporomo Pápirone sitia makata kotesa roporaka mone kára mosapo. Asiāne Pápirone sitiane iramo inaka fasékeno aseraka, namoraka yamenoa risike hihiripurakasapo.

¹⁶ Hihiripuraka someraka, “Pápirone siti kárane fane. Kamenakaripo. Pápirone sitia hinamo aporo risiane, takumeaka someraka hinamo ásiapo. Hinamoane kau rakiraka, pasu hekenosa soko, pasu susa soko ososapo. Osoraka mawia sekete motokoa, korótomo rakisia senaki kera senakia kekea, eke mone káramo roponane hatiraka mawia koakat-apikia, ayíáka kau rakisiapo. Mone káramo roporaka ayíáka kau rakisiane, ¹⁷ maiya hi wane awa hakásá yiamo makatane su fane,” aíyaka hihiripurakasapo. Arirakano kasu sipi wafayamo soko, kasu sipi maropona aporomo soko, aporomo pisinisi makata rakiraka kasu sipia makata fato ripaka koraka risira aporoamo soko, he tawara aeyaka aseane, ¹⁸ sitiane inaraka ira musu hinakano aseraka risikisapo. Aseraka risike ipu someraka, “Sitiane káraro. Siti ásia meta rekerifapo.”

¹⁹ Aíyaka siti inasane aseraka, mahisiraka hauaka kokotonomoane mokoa wamoa paikia, hihiripuraka someraka, “Pápirone siti kárane fane. Kamenakaripo. Aporomo pisinisi makata rakiraka kasu sipia makata fato ripaka koraka risira aporoamo pisinisiante káraraka mafasapo. Mafasane maiya hi wane awa hakásá yiamo pisinisiante fane,” airakasapo.

²⁰ Arirakano Pápirone sitiane iramo inarakano aseraka hepene yapura risíamo soko, Keresoa paosa aporo hinamomo soko, tarira aporomo soko, porofete aporomo soko, repo suamo sesehoanie. Hinamoamo re mokoatikirakano Kotimo aseraka, repoko hinamoane ropo mokoatikisapo.

²¹ Arirakano hepene aporo wakapumo eke kára maka, he tawara numua makasuraka someraka, “Nómo eke he tawara makasuraka, he numua kenepesa asekeanafonona ayíáka, Pápirone siti iramo inasane aporomo efera hunia asekosafapo.

²² Pápirone sitia aporomo kita rurakarakano soko, wiroko takirakarakano soko, pikoro rurakarakano soko, efera hunia kaiyakosafapo. Pápirone sitia efera hunia aporomo makata rakirakarakano kaiyakosafapo. Aporomo farawa rakiakosakipoko ekemo witi hae tainane efera hunia tairakarakano kaiyakosafapo.

²³ Nafa pakimaraka faenane efera hunia nafa pakimaraka faerakano aseakosafapo. Aporomo hinamo fitu parakuraka kesanane efera hunia kesarakarakano kaiyakosafapo. Asiamo fana Pápirone sitia pisinisi rakira aporo risiane aporo kárapo. Hauaka kára wo i hokopusuapo. Pápirone sitia aporomo kamurakano, aporo hauaka sua risiamo kaikia, makata kotafe hasakasane ipu kakimarakasapo,” aíyaka hepene aporomo somerakasapo.

²⁴ Arirakano porofete aporo rusua kusuane soko, Keresoa paosa aporo hinamo rusua kusuane soko, hauaka sua aporo rusua kusuane soko kepoane Pápirone sitia aporo hinamo risia ayapo. Asiasamo makata watikisa su akiyaki Pápirone sitia aporo hinamo risiane soko su sarimaraka fanasirakasapo.

19

Hepene yapura Kotiaki kekeresane oyapo.

¹ Pápirone siti fanasisane someaka farakano, nōmo kaiyíane hepene yapura aporo hinamo yakai mukisamo sakepamo somerakano kaisiapo. Ipu someraka, “Harerúyia.* Kotimo yano motosane kárapo. Kotimo isu pasimosapo. Kotimo faesane kárapo. Kotimo wakapuane kárapo.

² Kotimo kakaro somerapo. Kotimo takekea ereketae susu hemakapurapo. Hauaka sua aporo hinamo risiamo watikiaka rakisimo, aporo rea pura hinamoamo kirimarakano ipu watikiaka rakiraka, Kotimo makata rakira aporo hinamoane rusua kusuapo. Rusua kusuasamo hinamoane Kotimo takekea fanasiraka ropo mokoatikiane,” airakasapo.

³ Arirakano ipu efera hunia someraka, “Harerúyia. Kotimo yano motosane kárapo. Pápirone sitiane iramo inaraka ira musu maiya suamo hinaka rekeakosapo,” airakasapo.

⁴ Airakano aporo kára tuaneti foane (24) soko, makata kakayia kitafasuane soko, Koti unihaeaka kaya sea á wamomo hauaka atura kataka risike kekereraka someraka, “Kakaroripo. Kakaroripo. Harerúyia. Kotimo yano motosane kárapo,” airakasapo.

⁵ Airakano Koti kaya sea aeyaka memo someraka, “Re Kotimo makata rakira aporo hinamo su risiane, re metakira wakasemamo soko, metakira káramo soko Kotiane hemakapuraka kekerehoanie,” airakasapo.

Saro Sipi Manomo hinamo arumarakano asesane oyapo.

⁶ Nōmo kaiyíane aporo hinamo yakaimo meraka siki, he kára peraka siki, kikiriraka siki, airakano nōmo kaisiapo. Kaiyíane ipu someraka, “Harerúyia. Kotimo yano motosane kárapo. Isiapo Unihae Kotimo isu unihaeaka asekea rekenapo. Kotiane namo kakaro wakapu kárapo.

⁷ Asiamo isiapo seseraka e yano motosane makárarakanapo. Arirakano Saro Sipi Manomo[†] hinamo arumakosa maiyane maiya yuyapo. Hinamoane aporo puko makeraka kakenapo. ⁸ Kakeno hinamoane pasu osohoasimo pasu pakae kotesa faesa Kotimo kasapo,” airakasapo. Arirakano pasu pakae kotesa kasa kepoane Keresoa paosa aporo hinamomo makata koteaka rakisia ayapo.

⁹ Arirakano hepene aporomo anoaki someraka, “Úyaka popahoanie. Saro Sipi Manomo hinamo arumarakana makata paikia nenaka, aporo hinamo su sarimahoko peae airakano, pesa aporo hinamoamo kára sesehokosapo. Aíyaka popahoanie. Someane Kotimo kakaro somepo,” airakasapo.

¹⁰ Airakano nōmo hepene aporoaki kekerehoko e korakea ano kakopesapo. Kakopekea kakeno, epo anoaki someraka, “Anoaki kekerehokopo. Né soko, nōmo ní Keresoa paosa aporo mae soko, re Kotimo aporo raipa arisia ayíáka, ano soko Kotimo aporo raipa rekenapo. Repo Yasumo someane kakimaka aporo metakiraki some akara ayíáka, nōmo soko ayíáka some karakanapo. Asiamo nōmo Kotiaki hákasa kekerehoanie,” aíyaka

* 19:1: Harerúyia airane namo meaka Kotiane makárarakana kekerena ayapo. † 19:7: Saro Sipi Mano aisane Yasu Keresoa ipipo. Hinamo aisane Yasu Keresoa paosa aporo hinamo ayapo.

hepene aporomo anoaki somerakasapo. Ho Kotesamo porofete aporoaki himura ma-hemakapurakarakano, ipu kaikia some akara ayíáka, Yasuane aporomo some kakasimo Ho Kotesamo i ararerakano ayíáka some karápo.

Saro hose hakesa matia aporo ripaka pesane oyapo.

¹¹ Hepene aporomo someaka farakano, nōmo aseane hepene yapura tiane kikisi aka hikia, kikisi ro pukua, asiakipoko tipia saro hose hakesa matia aporo ripaka rekesapo. Ripaka reane e yano motosa tetá yano motosesapo. E yano motosa metane Himu Hakásaraka Koteaka Rakira Aporopo. Arirakano e yano motosa metane Kakaro Somera Aporopo. Aíyaka yano motosesapo. Arirakano hukurura maiya amo aporoamo koteaka takekea ereketae susu hukururapo. Asiamo e yunu aporo yaki awera maiya amo, aporo watikisamo kakaro someane koaretaesa aporo akiyaki epo werapo. ¹² E hiane ira rufi asisapo. Epo aporo hinamo yakaiane unihaeaka asekeea reasasamo napa rea hati yakai karotapisisapo. E kaua ipi yano motosa meta popasane ipi hákasamo aserasesapo. Aporo metamo aserasesafapo.

¹³ Ipi pasu ososane yapi sususesapo. E yano motosane Kotimo Somepo, aíyaka yano motosesapo. ¹⁴ Asiamo saro hose hakesa matia ripasa aporoane purakano, hepene yapura ame aporo yakai pasu pakae kotesa susu osoraka risiamo, e patera asekeea purakasapo.

¹⁵ Arirakano aporo unihae saro hosea ripaka fana pusuane, e akaia ferepe taku teta waresa horopokara akaia rekesapo. Hauaka sua aporo risia akiyaki epo weraka, ferepe taku teta waresamo rurakasapo. Rukua faraka, epo unihaeaka wakapuaka paroaka asekeea rekesapo. Asekeea reke aporomo sako karepe wate he pusimo finiraka taiana ayíáka, aporo unihaeamo aporo hinamo hauaka wo risiane ayíáka finiraka tairakasapo. Koti Namo Kakaro Wakapu Karamo saperakano aporo unihaeamo finiraka tairakasapo. ¹⁶ Aporoamo pasu ososa á soko, e korakea soko, e yano motosa úyaka popasesapo. “Aporo unihae suamo unihaeane anopo. Aporo yano motosa kára suamo yano motosa kárane anopo,” aíyaka popasesapo.

¹⁷ Arirakano nōmo aseane hepene aporo meta sere maiya á rekesapo. Reke mena koraka toraki sakepamo wáraka, “Kotimo reaki makata nakosa kára kakakosapo. Nako peae. ¹⁸ Pekea amano rusua kusua maíyane nanie. Amano rusua kusuane oyapo. Aporo unihae soko, ame aporo satini soko, ame aporo soko, saro hose soko, saro hose matia aporo ripasane soko, aporo raipane soko, aporo raipahoanafonosane soko, aporo kára soko, aporo wakasema soko, aporo su rusua kusua maíyane nanie,” aíyaka hepene aporomo mená koraka toraki wárakasapo.

¹⁹ Hepene aporomo someaka farakano, nōmo aseane yasaro asíane soko, aporo unihae hauaka sua risiane soko, ipu ame aporo yakaiane soko, su sarimarakasapo. Sarimaraka aporo saro hosea ripasaki soko, epo ame aporoaki soko weakosakipoko sarimarakasapo. ²⁰ Sarimaraka werakano, yasaro asía soko, kotafe porofete aporoane soko, waseremorakasapo. Fana kotafe porofete aporo yasaro asíayaki hakāsa rea maiya amo, epo hemakapurua wakapuaka rakisisupo. Ayíáka rakiraka epo kotafe rakirane aporo hinamo yakaimo kakimaka yasaro asíaki himu hakásaraka kekemasapo. Aporo hinamoamo yasaro asíamo yano motasane i kaua popasa riskisapo. Ipu yasaro asía murikimaka hokonomo kotafe koti pariraka rakisiaki kekeresesupo. Kekereraka ayíáka kotafe porofete aporomo wakapuaka rakisiane soko kekemasesupo. Arirakano yasaro asíane soko, kotafe porofete aporoane soko, tetá hitafe risiane fanasiraka, ira rufi he kekeia kaya asía, ira rufiyaki, saofa rufiyaki, wariwarisa tuiya asía arakarua mokoasurakasapo.

²¹ Mokoasuraka aporo saro hose matia ripaka pesane akaia ferepe taku tetakara waresa e akaia reamo yasaro asíamo ame aporoane rukufarakasapo. I rusuane maíyane menamo nekea katukunu kaporakasapo.

Keremisi wane taosene amo (1,000) Satane taporaka tipura makerakano asesane oyapo.

¹ Arirakano hepene aporo hepene yapunaka pekea hokonomo ki maka rekesapo. Kiane hauaka kutu mato kunututu kakanafonosa kutuane ikia koro ki maka rekesapo. Sene kára soko epo maka rekesapo. ²⁻³ Maka reke siapora asíane waseremaka, seneamo taporaka keremisi wane taosene amo (1,000) rekeasimo, hauaka kutu mato kunututu kakanafonosa a makasuraka, kutuane ikia koro mapirikia roko motorakasapo. Roko motokoa keremisi wane taosene amo reke, aporo hinamo hauaka sua risiamo watikiaka rakisimo kirimaraka somehokohoamo tipura makerakasapo. Makekea keremisi wane taosene ane faraka, siapora asíane tonotaerakasapo. Tonotaerakano maiya wakasse-mamo e koraka rekesapo. Wate fana kuyaremo aporoaki kirimaraka kotafe someane kakimakasimo hkokakako pesane eane hákasa yiyapo. E Satanepo.

⁴ Arirakano nōmo aseane, unihaemo sea asía risiá aporo tokesapo. Aporo toaki Kotimo someraka, "Aporo suane takekeea parakuhoanie." Aíyaka Kotimo someaka marerakasapo. Someaka marerakano nōmo aseane, aporo hinamomo Kotimo someane kakimaka Yasuaki himu hakásaraka hemakapukua risiasamo i mawi pateketaesa kusuane ho risikino nōmo asesapo. Aporo hinamoamo fana yasaro asía aki soko, yasaro murikimaka hokonomo kotafe koti pariraka rakisiasi soko, kekeresesufapo. Kekere-hoanafonoraka yasaro asíamo yano motosane i hikumisia soko metao, hokonoa soko metao popasesafapo. Popahoanafonosa aporo hinamoane maturikia taeraka, keremisi wane taosene amo Yasu Keresoyaki hakása unihaeaka risikisapo.

⁵⁻⁶ Arirakano aporo hinamo kusuane fana maturikia taesane oyapo. Aporo hinamo fana rusua kusua maturikia taesane Kotimo makikisiraka makoterakasapo. Asiamo aporo hinamo fana maturikia taesane, efera hunia kukusafapo. Pirisiti aporomo Kotimo makata rakirane arakira ayíáka, ipu ayíáka Kotimo makata rakirane soko, Yasu Keresomo makata rakirane rakirakasapo. Rakiraka keremisi wane taosene amo, Yasu Keresoyaki hakása unihaeaka risikisapo. Arirakano keremisi wane taosene ane faraka, aporo hinamo fana maturikia taehoanafonosane i su maturikia taerakasapo.

Satane fanasisane oyapo.

⁷ Keremisi wane taosene ane faraka, Satane tipura makesa reane tonotaerakano aporo hinamo hauaka sua risiamo watikiaka rakisimo kirimarakasapo. ⁸ Kirimaraka aporo ira yano motosa Koke soko, aporo ira yano motosa Makoke soko, ipu weakosakipoko sari-marakasapo. Sarimasane hauaka sakipu menohoanafonona ayíáka i aporo sarimasane asisapo.

⁹ Ipu weakosakipoko hauaka sua pukua, Keresoa paosa aporo hinamo arisiane soko, Kotimo sesena siti Yarusarame sitiane soko ipu kauraka hahaeraka toperemotosesapo. Toperemotosekeno Kotimo saperaka hepene yapunaka ira rufi makasurakano, ira rufiamo i suane inarakasapo. ¹⁰ Satanemo i kirimasakipoko he kekeea kaya asia saofa rufi wariwarisa tuiya asía arakarua Sataneane makasurakasapo. Yasaro asíane soko, kotafe porofete aporoane soko, fana mokoasusa risia á, Sataneane soko makasurakasapo. Makasusane maiya suamo sere soko ereamo soko yaiya i kau terakasapo. Kau tenane farakasafapo.

Aporo hinamo hukurukua fanashokosakipoko takekeea parakurakano nōmo asesane oyapo.

¹¹ Nōmo aseane unihaemo sea pakaesa kotesa á Unihae kakesapo. Kakeno nōmo aseane, tiane soko hauaka ane soko pukua farakasapo. Purakano asesane hunia asesafapo. ¹² Arirakano unihae sea kaya hikumisi neneme takua aporo hinamo kára soko, aporo hinamo wakasema soko, kusua maturikia taesane risikisapo. Risikino sawi yakai Unihaemo tetaorakasapo. Aporo hinamo kusua maturikia taesane, kukusiraka risia maiya amo, ipu makata rakisiane sawia popasane, Unihaemo tetaorakasapo. Arirakano sawi meta á aporo hinamo yaiya risikiakosane yano motosa popasa sawiane taorakasapo. Taoraka menoraka faraka, fanasina motoakosakipoko takekeea parakurakasapo.

¹³ Maiya amo he tawara aporo he nekea kukua kesane maturikia taerakasapo. Arirakano aporo hinamo kusua hoane kuramo asekea rea hétisi hauaka aeyaka Kotimo poparipeae, aíyaka maturikia taerakasapo. Maturikia taeraka, Kotimo sawia popasane tetaoraka menoraka, fana i kukusiraka hauaka wo risia maiya amo, ipu makata rakisiane menoraka hakásá hakasaraka takekea parakurakasapo.

¹⁴⁻¹⁵ Asiamo aporo hinamomo yano motosane Kotimo sawia aporo hinamo Kotiyaki yaiya risikiakosane popahoanafonosekeno aporo hinamoane parakuraka, he kekeea kaya asía saofa rufi wariwarisa tuiya asiakipoko arakarua mokoasurakasapo. Kurane soko Hétisi hauakane soko mokoa, he kekeea kaya asía saofa rufi wariwarisa tuiya asia arakarua mokoasurakasapo. Yape teta akura ayíáka kurakasapo.

21

Ti kawe soko hauaka kawe soko nōmo asesane oyapo.

¹ Ti fana reane soko, hauaka fana reane soko fasakipoko, ti kawe soko hauaka kawe ane soko nōmo asesapo. Nōmo aseane he tawarane fasesapo. ² Asiamo siti kotesane Yarusarame siti kawe metane, hepene yapunaka Koti rea hauaka aeyaka perakasapo. Pesane hinamo aporo motoako apura ayíáka, kau rakisia kotesa ayíáka Yarusarame sitiane kakaro kotesesapo.

³ Asiamo nōmo kaiyíane unihae sea anaka memo sakepamo someraka, “Kotimo apeane aporo hinamoyaki hakásá are. Aporo hinamoyaki Kotiane soko hakásá are. Aporo hinamo suane Kotimo aporo hinamopo. Aporo hinamoamo unihaeane Koti ipipo. Koti iyaki hakásá are.

⁴ Aporo hinamo suamo hiripu heane Kotimo ipi hokeane. Hokeraka faraka amano kurakano hiripunane kakaro fane. Efera hunia i hiripuhokosafapo. Amano kurane soko kakaro fane. Faraka efera hunia kukusafapo. Kau teraka himu nenakarane soko fane. Faraka efera hunia kau tehokosafapo. Himu nakosafapo. Makata fana ainane su fane,” airakasapo.

⁵ Airakano unihae sea á kayamo someraka, “Kaisie, makata suane nōmo makawenapo. Úyaka popahoanie. Nōmo someane kakaro somepo. Nōmo someraka ayiakakosaposane kakaro ayiakakosapo. Asiamo repo kakimakanie,” airakasapo.

⁶ Epo efera hunia someraka, “Fanane soko anopo. Arirakano kesekeane soko anopo. Makata su kepomarerane soko anopo. Arirakano rakikia marane soko anopo. Asiamo aporo metamo someraka, ‘Ano he nariripo,’ airakano he fuaka taena ane nasimo yaku kakakosapo. Karakano heane nenaka e yaiya rekeakosapo.

⁷ Yaiya rekeakosane yunu rukumosakatapisia aporoamo makosapo. Aporoane nōmo hokosapo. Ipi Kotiane anopo. ⁸ Arirakano aporomo Kotimo yunu aporoyaki weraka namoraka fimiti pura aporoane soko, aporo anoaki himu hakásaraka hemakapuna-fonona aporoane soko, watikiaka rakira aporoane soko, aporo kukusimo rura aporoane soko, hinamo hakimara aporoane soko, ira hamí rura aporoane soko, kamuna aporoane soko, ho kamuna aporoane soko, yatafu yakasa hoaki kekereaka somera aporoane soko, fofo mora aporoane soko, kotafe somera aporoane soko, i suane he kekeea kaya asía saofa rufi wariwarisa tuiya asía arakarua mokoasurakasapo. Mokoasusane yape tetá akura ayíáka kurakanapo,” aíyaka unihae sea á kayamo somerakasapo.

Yarusarame siti kaweane oyapo.

⁹ Arirakano hepene aporo yatipinu sumo tisi yatipinusu mokoa risia amo, hepene aporo hakásá metamo anoaki someraka, “Ne anoyaki peae. Saro Sipi Manomo hinamo arumakosane néaki tariakosapo.” ¹⁰ Airakano Ho Kotesa ano himua káraraka reke, hepene aporomo ano ūri terayia karikia hinakasapo. Hikia pauraka risike, hepene aporomo anoaki tariraka someraka, “Kotimo siti kotesa Yarusarame sitiane Kotimo hauaka hepene yapunaka aperane asesie,” aíyaka tarirakasapo.

¹¹ Tarirakano nōmo aseane, Kotimo faesamo apeane kakaro faesesapo. Faesane eke yano motosa yásepa ho piakaesa asia, arirakano he sirisa kotesa asera asia, sitiane faesa ho piakaesepo.

¹² Arirakano Yarusarame sitiane rurusesapo. Rurusane huturusakipoko ikia koro kenosua hepene aporo keno sumo asekea risikisapo. Ikia koro kenosua Isiraya aporo ira yano motosa kenosu popasesapo. ¹³ Sere maiya apera takua anaka, ikia koro isia risikisapo. Arirakano sere maiya apura takua anaka, ikia koro yaiya isia risikisapo. Arirakano ketayia takua soko, ikia koro yaiya isia risikisapo. Arirakano ketayia takua soko, ikia koro yaiya isia risikisapo. ¹⁴ Arirakano ruruane parohoasimo ruru kepoa eke kenosu taesesapo. Eke kenosua Saro Sipi Manomo tarira aporo kenosu yano taesane popasesapo.

¹⁵ Arirakano hepene aporoamo anoaki fana somesa hakásá yiamo korótomo rakisia rura hokonomo maka rekesapo. Sitiane soko, siti ikia koroane soko, sitiane ruruane soko, murikimakosakipoko, rura ane maka rekesapo. ¹⁶ Rura amo siti murikimaraka, siti horopokarane soko, siti parauane soko, siti huturuane soko, murikimasane hakásá yinesesapo. Horopokarane soko kakaro yameno tu taosene tu harote kiromita (2,200), arirakano parauane soko kakaro yameno, tu taosene tu harote kiromita (2,200), arirakano huturuane soko kakaro huturu, tu taosene tu harote kiromita (2,200), ayíáka murikimarakasapo. ¹⁷ Arirakano siti ruru parauane murikimaraka, wane harote foti fo (144) ayíáka murikimarakasapo. Murikimaraka aporomo ape kiako murikiamara ayíáka hepene aporomo murikimarakasapo.

¹⁸ Ape rurusane eke yano motosa yásepa faesa kotesamo ape rurusesapo. Siti kisiane korótomo kisisapo. Korótomo kisiane karási faesa asisapo.

¹⁹ Ruruane parohoasimo eke taesa risikisapo. Eke risiane siti ruruane makotehoasimo eke mone káramo roponane ekea paremurisisapo. Paremurisiane menoane eke faesa yano motosa yásepa, tetáne eke hekenosa yano motosa sáfaea, isíane eke pakaesa yano motosa ákete, kitafane eke hisukusa yano motosa émarao, kakoreane eke pakaesa susayaki yano motosa satónikisa, ²⁰ namane eke susa yano motosa koníriane, yatipinuane eke keamesa yano motosa kirísoraete, kariane eke hisukusa yano motosa péreo, tokonane eke keamesa yano motosa topase, kaeyakoane eke hisukusa soko keamesa soko yano motosa kirisoperése, kinuane eke hekenosa yano motosa háyasine, kenoane eke susa yano motosa ametíse, ayíáka eke yano taesane paremurisisapo.

²¹ Arirakano ikia koro keno suane sekete asia keno sumo rakisisapo. Ikia koro keno suane sekete asiomo hakásá hakásaraka ayíáka rakipe pusisapo. Asiomo siti ikia karane korótomo rakisisapo. Korótomo rakisiane karasi faesa asisapo.

²² Arirakano Yarusarame siti kawea Kotiaki kekererokosa apeane fasesapo. Koti Namo Kakaro Unihae Kara ane soko, Saro Sipi Manoane soko, á risiasamo maiya suamo tetáki kekererakasapo. ²³ Yarusarame siti kawea sere maiyamo soko, ere maiyamo soko, faerakasafapo. Kotimo ipi faesa hákasamo faerakasapo. Asiomo nafa faena ayíáka Saro Sipi Manoane ayíáka faerakasapo. ²⁴ Arirakano Yarusarame sitia faesa amo aporo hinamo su hauaka kekepoa risiane faehokosapo. Hauaka sua aporo unihaemo Yarusarame siti kawea makata kotesa mahimuraka taesane mokoa hiakosapo.

²⁵ Arirakano Yarusarame siti kaweane erehokosafapo. Ayíakakosasamo ikia koroane mapiriakosafapo. Mapirianafonoraka, maiya suamo ikia koroane ropakataeraka risikiakosapo. ²⁶ Asiomo hauaka kekepo aeyaka aporomo makata kotesa mahimuraka taesane, Yarusarame siti kawea mokoa hiakosapo.

²⁷ Arirakano makata watikisane Yarusarame siti kawea mokoa hiakosafapo. Yatafu yakasa hoaki kekerena aporoane soko, kotafe somera aporoane soko, Yarusarame siti kawea hiakosafapo. Arirakano Saro Sipi Manomo sawia aporo hinamo yaiya risikiakosane, yano motosa popasa aporo hinamoane hákasa Yarusarame siti kawea hiakosapo.

22

Yarusarame siti kawea nōmo makata asesane oyapo.

¹ Hepene aporomo anoaki makata tarisiane oyapo. Kotimo sea aeyaka soko, Saro Sipi Manomo sea aeyaka soko he pekerekesapo. He Pekereane ho piakaerakasapo. Aporo hinamo yaiya risikiakosakipoko he nenane he ayapo.

² Heane Yarusarame siti ikia kara tipia pekerekesapo. Pekerekipoko ira tetá meta he fe taku ra, arirakano meta he fe taku wo, ayíáka risikisapo. Ayíáka risiane ira wateane aporo hinamo yaiya risikiakosakipoko ira wate nenane ayapo. Keremisi hakásamo ira wateane yape keno sumo perakasapo. Ere maiya hakásamo irane wate yape hakásá peke, yaiya ere maiya metamo irane wate yape hakásá peke, ayíáka ere maiya keno suane murikimaka, ira wateane yaiya yape kenosu perakasapo. Arirakano hauaka sua aporo hinamo fana risia maiya amo makata umisa masane, ira kuamo mafaraka iane makotehokosapo.

³ Arirakano Yarusarame siti kawea makata watikisane rekeakosafapo. Sitia Kotipe Saro Sipi Mano tetá unihae mo sea á tokoakosapo. Tokeno Kotimo aporo hinamo raipamo eaki kekererekosapo. ⁴ Kekereraka Koti hikumisi ipu aseakosapo. Aserakano i hikumisia Koti yano motosane popahokosapo.

⁵ Arirakano efera hunia erehokosafapo. Kotimo ipi faesane kárasasamo, nafamo soko sere maiyamo soko faehokosafapo. Kotimo ipi faesa hákasamo faehokosapo. Faerakano Kotimo aporo hinamo raipa ane maiya suamo unihaeaka risikiakosapo.

Yasu paripeakosane oyapo.

⁶ Hepene aporomo anoaki someraka, “Nōmo someane kakaro somepo. Kakaro somesasamo kakimakanie. Unihae Kotimo makata ayiakakosane ipi porofete aporoaki mahemakapurakarakano, ipu some kasesupo. Yumo makata ayiakako makesane, Kotimo aporo hinamo raipamo hemakapusimo Kotimo ipi hepene aporomo tariako pusiesapo. Pusierakano nōmo somehoko pesapo,” airakasapo.

⁷ Airakano Yasumo someraka, “Hao, kaisie. Ano paripeakosa maiyane makepo.” Aíyaka Yasumo somerakasapo. Arirakano Kotimo someane sawi wo popasane kakimara aporo hinamoane Kotimo makoterakano iane seseaka risikiakosapo.

⁸ Arirakano ano Yonemo makata su sawi wo popasane nōmo asekea nōmo kaikia asiapo. Asiamo hepene aporomo anoaki makata tarikia somerakano, nōmo kaikia asekea asiasamo, hepene aporoaki kekererekoko e korakea ano kakopesapo. ⁹ Kakopekeea kakeno epo someraka, “Nōmo ayiakakopo. Né Kotimo aporo raipa ayíáka, ano soko Kotimo aporo raipapo. Né soko, nōmo Keresoa paosa aporo mae porofete aporoane soko, sawi wo popasane kakimara aporoane soko, isiaipo suamo makata rakirane hakásá yiyapo. Asiasamo nōmo anoaki kekererekoko. Koti ipiaki hákasa kekererekosapo,” aíyaka hepene aporomo somerakasapo.

¹⁰ Hepene aporoamo anoaki efera hunia someraka, “Sawi wo ayiakakosapo, aíyaka popasane nōmo mahameakopo. Makata ayiakakosa maiyane makesasamo mahameakopo. ¹¹ Asiamo aporo watikiaka risiane yaiya watikiaka risikiakosapo. Aporo yatafu yakasa hoaki kekereraka aporoamo yaiya kekereraka risikiakosapo. Aporo ereketaeraka risiane yaiya ereketaeraka risikiakosapo. Aporo Kotiaki kekerenamo yaiya Kotiaki kekereraka risikiakosapo,” airakasapo.

¹² Airakano Yasumo someraka, “Hao, kaisie. Ano paripeakosa maiyane makepo. Aporo hinamomo makata rakisiane nōmo asekea makata ropo hakásá nineraka takekeea kakakosapo. Asiamo aporo hinamomo watikiaka rakisiaki, makata ropo watikisane kakakosapo. Arirakano aporo hinamomo koteaka rakisiaki, makata ropo kotesane kakakosapo.

¹³ Kakaro fanane anopo. Arirakano kesekeane soko anopo. Fana reane anopo. Arirakano keseke rekeakosane soko anopo. Makata su kepomarerane soko anopo. Arirakano rakikia marane soko anopo.

¹⁴ Arirakano aporo hinamomo namina pasu pikirisane kusuraka makotena ayiaka, aporo hinamomo namina himu pikirisa watikisane metakarikia mafaraka risiane seseraka risikiakosapo. Seseraka risike, yaiya risikiakosakipoko ira wateane nakosapo. Aporo hinamoane Yarusarame siti kawea ikia koroa yorokoa siti kakarua hiakosapo.

¹⁵ Asiāne kásamo rakira ayiáka rakira aporoane soko, aporo ira hamí rurane soko, aporo ho kamunane soko, aporo makata kamunane soko, aporo ho pairane soko, aporomo fofo morane soko aporomo hinamo hakimarane soko, aporo kukusimo rura aporoane soko, yatafu yakasa hoaki kekerena aporo hinamoane soko, kotafe koti parisaki kekerena aporo hinamoane soko, kotafe somehoko sesena aporo hinamoane soko, kotafe hokoa rura aporo hinamoane soko, aporoane su Yarusarame siti kawe ape kakarua yorokoa hiakosafapo.

¹⁶ Ano Yasupo. Nōmo hepene aporo re arisia pusiesapo. Re Keresoa paosa aporo hinamo sése apea risiamo makata ayiakakosane hemakapusimo, hepene aporoamo reaki tarirakanapo. Ano Tefetemo aporo irapo. Tefetemo aporo ira aeyaka wainepe pesane anopo. Mituru fiahoko makeanamo ti makata kára faena ayiáka faenane anopo,” aiyaka Yasumo somerakasapo.

¹⁷ Arirakano Ho Kotesamo soko, Saro Sipi Manomo hinamo arumakosamo soko tetapō someraka, “Né peae,” airakano kaisia aporo hinamoamo hakásara someraka, “Né peae,” aihokosapo. Arirakano aporo meta he narirakano he nako peae. Heane nenaka yaiya risikiakosapo. Heane Kotimo yaku karápo. Karakano heane narirakano nanie.

¹⁸ Arirakano sawi wo Kotimo ayiakakosapo aiyaka popasane kaisia aporo hinamo reaki ano Yonemo paroaka somerakanapo. “Hao, kaisie. Kotimo sawi wo makata ayiakakosane popasapo. Popasa akiyaki nōmo ní hemakapuraka ayiakasireapo, aiyaka hemakapusua akiyaki sarimaraka some kakakopo. Sarimaraka some karakano, Kotimo né fanasinane motoakosapo. Kotimo saperaka mokoatikina makata sawi wo popasane su néaki kakakosapo.

¹⁹ Arirakano Kotimo ipi ayiakakosapo, aiyaka sawi wo popasane repo aporo metamo aseke, sape metane some kaka, sape metane mahamekea kakaro metakarirakano, aporoane Kotimo fanasinane motoakosapo. Arirakano sawi wo popasa some kará aporoane Yarusarame siti kawea hinaka, yaiya risikiakosakipoko ira wate nakosapo. Arirakano Kotimo aporoane fanasina motoraka someraka, ‘Yarusarame siti kawea hiakopo. Ira wateane soko tumaka nakopo,’ aihokosapo. Asiamo re ayiakakohoamo ano Yonemo reaki somerakanapo,” aiyaka Yonemo somesapo.

²⁰ Arirakano Yasumo someraka, “Sawi wo popasane kakaro someane popasapo. Ano paripeakosa maiyane makepo. Nōmo kakaro somerakaripo,” airakano nōmo someraka, “Kakarorakae. Unihae Yasu né peae,” aisapo.

²¹ Keresoa paosa aporo hinamo re suane Unihae Yasumo hemakapuraka ararehoasi-moripo. Kakaroripo.

Read the New Testament daily

January

date	Scripture
1	Matiu 1:1–2:12
2	Matiu 2:13–3:6
3	Matiu 3:7–4:11
4	Matiu 4:12–25
5	Matiu 5:1–26
6	Matiu 5:27–48
7	Matiu 6:1–24
8	Matiu 6:25–7:14
9	Matiu 7:15–29
10	Matiu 8:1–17
11	Matiu 8:18–34
12	Matiu 9:1–17
13	Matiu 9:18–38
14	Matiu 10:1–23
15	Matiu 10:24–11:6
16	Matiu 11:7–30
17	Matiu 12:1–21
18	Matiu 12:22–45
19	Matiu 12:46–13:23
20	Matiu 13:24–46
21	Matiu 13:47–14:12
22	Matiu 14:13–36
23	Matiu 15:1–28
24	Matiu 15:29–16:12
25	Matiu 16:13–17:9
26	Matiu 17:10–27
27	Matiu 18:1–22
28	Matiu 18:23–19:12
29	Matiu 19:13–30
30	Matiu 20:1–28
31	Matiu 20:29–21:22

February

date	Scripture
1	Matiu 21:23-46
2	Matiu 22:1-33
3	Matiu 22:34-23:12
4	Matiu 23:13-39
5	Matiu 24:1-28
6	Matiu 24:29-51
7	Matiu 25:1-30
8	Matiu 25:31-26:13
9	Matiu 26:14-46
10	Matiu 26:47-68
11	Matiu 26:69-27:14
12	Matiu 27:15-31
13	Matiu 27:32-66
14	Matiu 28:1-20
15	Maka 1:1-28
16	Maka 1:29-2:12
17	Maka 2:13-3:6
18	Maka 3:7-30
19	Maka 3:31-4:25
20	Maka 4:26-5:20
21	Maka 5:21-43
22	Maka 6:1-29
23	Maka 6:30-56
24	Maka 7:1-23
25	Maka 7:24-8:10
26	Maka 8:11-9:1
27	Maka 9:2-29
28	Maka 9:30-10:12

date	Scripture
1	Maka 10:13-31
2	Maka 10:32-52
3	Maka 11:1-26
4	Maka 11:27-12:17
5	Maka 12:18-37
6	Maka 12:38-13:13
7	Maka 13:14-37
8	Maka 14:1-21
9	Maka 14:22-52
10	Maka 14:53-72
11	Maka 15:1-47
12	Maka 16:1-20
13	Ruki 1:1-25
14	Ruki 1:26-56
15	Ruki 1:57-80
16	Ruki 2:1-35
17	Ruki 2:36-52
18	Ruki 3:1-22
19	Ruki 3:23-38
20	Ruki 4:1-30
21	Ruki 4:31-5:11
22	Ruki 5:12-28
23	Ruki 5:29-6:11
24	Ruki 6:12-38
25	Ruki 6:39-7:10
26	Ruki 7:11-35
27	Ruki 7:36-8:3
28	Ruki 8:4-21
29	Ruki 8:22-39
30	Ruki 8:40-9:6
31	Ruki 9:7-27

date	Scripture
1	Ruki 9:28-50
2	Ruki 9:51-10:12
3	Ruki 10:13-37
4	Ruki 10:38-11:13
5	Ruki 11:14-36
6	Ruki 11:37-12:7
7	Ruki 12:8-34
8	Ruki 12:35-59
9	Ruki 13:1-21
10	Ruki 13:22-14:6
11	Ruki 14:7-35
12	Ruki 15:1-32
13	Ruki 16:1-18
14	Ruki 16:19-17:10
15	Ruki 17:11-37
16	Ruki 18:1-17
17	Ruki 18:18-43
18	Ruki 19:1-27
19	Ruki 19:28-48
20	Ruki 20:1-26
21	Ruki 20:27-47
22	Ruki 21:1-28
23	Ruki 21:29-22:13
24	Ruki 22:14-34
25	Ruki 22:35-53
26	Ruki 22:54-23:12
27	Ruki 23:13-43
28	Ruki 23:44-24:12
29	Ruki 24:13-53
30	Yone 1:1-28

date	Scripture
1	Yone 1:29-51
2	Yone 2:1-25
3	Yone 3:1-21
4	Yone 3:22-4:3
5	Yone 4:4-42
6	Yone 4:43-54
7	Yone 5:1-23
8	Yone 5:24-47
9	Yone 6:1-21
10	Yone 6:22-40
11	Yone 6:41-71
12	Yone 7:1-29
13	Yone 7:30-52
14	Yone 7:53-8:20
15	Yone 8:21-30
16	Yone 8:31-59
17	Yone 9:1-41
18	Yone 10:1-21
19	Yone 10:22-42
20	Yone 11:1-53
21	Yone 11:54-12:19
22	Yone 12:20-50
23	Yone 13:1-30
24	Yone 13:31-14:14
25	Yone 14:15-31
26	Yone 15:1-27
27	Yone 16:1-33
28	Yone 17:1-26
29	Yone 18:1-24
30	Yone 18:25-19:22
31	Yone 19:23-42

date	Scripture
1	Yone 20:1-31
2	Yone 21:1-25
3	Tarira Aporo 1:1-26
4	Tarira Aporo 2:1-47
5	Tarira Aporo 3:1-26
6	Tarira Aporo 4:1-37
7	Tarira Aporo 5:1-42
8	Tarira Aporo 6:1-15
9	Tarira Aporo 7:1-29
10	Tarira Aporo 7:30-50
11	Tarira Aporo 7:51-8:13
12	Tarira Aporo 8:14-40
13	Tarira Aporo 9:1-25
14	Tarira Aporo 9:26-43
15	Tarira Aporo 10:1-33
16	Tarira Aporo 10:34-48
17	Tarira Aporo 11:1-30
18	Tarira Aporo 12:1-23
19	Tarira Aporo 12:24-13:12
20	Tarira Aporo 13:13-41
21	Tarira Aporo 13:42-14:7
22	Tarira Aporo 14:8-28
23	Tarira Aporo 15:1-35
24	Tarira Aporo 15:36-16:15
25	Tarira Aporo 16:16-40
26	Tarira Aporo 17:1-34
27	Tarira Aporo 18:1-21
28	Tarira Aporo 18:22-19:12
29	Tarira Aporo 19:13-41
30	Tarira Aporo 20:1-38

date	Scripture
1	Tarira Aporo 21:1-16
2	Tarira Aporo 21:17-36
3	Tarira Aporo 21:37-22:16
4	Tarira Aporo 22:17-23:10
5	Tarira Aporo 23:11-35
6	Tarira Aporo 24:1-27
7	Tarira Aporo 25:1-27
8	Tarira Aporo 26:1-32
9	Tarira Aporo 27:1-20
10	Tarira Aporo 27:21-44
11	Tarira Aporo 28:1-31
12	Rome 1:1-17
13	Rome 1:18-32
14	Rome 2:1-24
15	Rome 2:25-3:8
16	Rome 3:9-31
17	Rome 4:1-12
18	Rome 4:13-5:5
19	Rome 5:6-21
20	Rome 6:1-23
21	Rome 7:1-14
22	Rome 7:15-8:6
23	Rome 8:7-21
24	Rome 8:22-39
25	Rome 9:1-21
26	Rome 9:22-10:13
27	Rome 10:14-11:12
28	Rome 11:13-36
29	Rome 12:1-21
30	Rome 13:1-14
31	Rome 14:1-23

date	Scripture
1	Rome 15:1-21
2	Rome 15:22-16:7
3	Rome 16:8-27
4	1 Korini 1:1-17
5	1 Korini 1:18-2:5
6	1 Korini 2:6-3:4
7	1 Korini 3:5-23
8	1 Korini 4:1-21
9	1 Korini 5:1-13
10	1 Korini 6:1-20
11	1 Korini 7:1-24
12	1 Korini 7:25-40
13	1 Korini 8:1-13
14	1 Korini 9:1-18
15	1 Korini 9:19-10:13
16	1 Korini 10:14-11:1
17	1 Korini 11:2-16
18	1 Korini 11:17-34
19	1 Korini 12:1-26
20	1 Korini 12:27-13:13
21	1 Korini 14:1-17
22	1 Korini 14:18-40
23	1 Korini 15:1-28
24	1 Korini 15:29-58
25	1 Korini 16:1-24
26	2 Korini 1:1-11
27	2 Korini 1:12-2:11
28	2 Korini 2:12-17
29	2 Korini 3:1-18
30	2 Korini 4:1-12
31	2 Korini 4:13-5:10

date	Scripture
1	2 Korini 5:11-21
2	2 Korini 6:1-13
3	2 Korini 6:14-7:7
4	2 Korini 7:8-16
5	2 Korini 8:1-15
6	2 Korini 8:16-24
7	2 Korini 9:1-15
8	2 Korini 10:1-18
9	2 Korini 11:1-15
10	2 Korini 11:16-33
11	2 Korini 12:1-10
12	2 Korini 12:11-21
13	2 Korini 13:1-14
14	Karesia 1:1-24
15	Karesia 2:1-16
16	Karesia 2:17-3:9
17	Karesia 3:10-22
18	Karesia 3:23-4:20
19	Karesia 4:21-5:12
20	Karesia 5:13-26
21	Karesia 6:1-18
22	Efesase 1:1-23
23	Efesase 2:1-22
24	Efesase 3:1-21
25	Efesase 4:1-16
26	Efesase 4:17-5:2
27	Efesase 5:3-33
28	Efesase 6:1-24
29	Firipai 1:1-26
30	Firipai 1:27-2:18

date	Scripture
1	Firipai 2:19-3:6
2	Firipai 3:7-4:1
3	Firipai 4:2-23
4	Korosi 1:1-20
5	Korosi 1:21-2:7
6	Korosi 2:8-23
7	Korosi 3:1-17
8	Korosi 3:18-4:18
9	1 Tesaronaeka 1:1-2:9
10	1 Tesaronaeka 2:10-3:13
11	1 Tesaronaeka 4:1-5:3
12	1 Tesaronaeka 5:4-28
13	2 Tesaronaeka 1:1-12
14	2 Tesaronaeka 2:1-17
15	2 Tesaronaeka 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taetase 1:1-16
27	Taetase 2:1-14
28	Taetase 2:15-3:15
29	Fairimone 1:1-25
30	Hipuru 1:1-14
31	Hipuru 2:1-18

date	Scripture
1	Hipuru 3:1-19
2	Hipuru 4:1-13
3	Hipuru 4:14-5:14
4	Hipuru 6:1-20
5	Hipuru 7:1-19
6	Hipuru 7:20-28
7	Hipuru 8:1-13
8	Hipuru 9:1-10
9	Hipuru 9:11-28
10	Hipuru 10:1-18
11	Hipuru 10:19-39
12	Hipuru 11:1-16
13	Hipuru 11:17-31
14	Hipuru 11:32-12:13
15	Hipuru 12:14-29
16	Hipuru 13:1-25
17	Yamese 1:1-18
18	Yamese 1:19-2:17
19	Yamese 2:18-3:18
20	Yamese 4:1-17
21	Yamese 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Yone 1:1-10

date	Scripture
1	1 Yone 2:1-17
2	1 Yone 2:18-3:2
3	1 Yone 3:3-24
4	1 Yone 4:1-21
5	1 Yone 5:1-21
6	2 Yone 1:1-13
7	3 Yone 1:1-14
8	Yuti 1:1-25
9	Some Faremarea Tarisia 1:1-20
10	Some Faremarea Tarisia 2:1-17
11	Some Faremarea Tarisia 2:18-3:6
12	Some Faremarea Tarisia 3:7-22
13	Some Faremarea Tarisia 4:1-11
14	Some Faremarea Tarisia 5:1-14
15	Some Faremarea Tarisia 6:1-17
16	Some Faremarea Tarisia 7:1-17
17	Some Faremarea Tarisia 8:1-13
18	Some Faremarea Tarisia 9:1-21
19	Some Faremarea Tarisia 10:1-11
20	Some Faremarea Tarisia 11:1-19
21	Some Faremarea Tarisia 12:1-18
22	Some Faremarea Tarisia 13:1-18
23	Some Faremarea Tarisia 14:1-20
24	Some Faremarea Tarisia 15:1-8
25	Some Faremarea Tarisia 16:1-21
26	Some Faremarea Tarisia 17:1-18
27	Some Faremarea Tarisia 18:1-24
28	Some Faremarea Tarisia 19:1-21
29	Some Faremarea Tarisia 20:1-15
30	Some Faremarea Tarisia 21:1-27
31	Some Faremarea Tarisia 22:1-21

Some Kepo Tariakosane Oyapo.

Aporo Hinamo Yakosane Oyapo.

Yu aporomo aporo hinamo yakoraka yano motorapo. Asiamo sawi wo aporo hinamo metakira yakosane popasapo. Aporo hinamo yakosa amo yanoane oyapo. Maria, Yone, Yamese, Yosefe, Saemone, arirakano metakira soko yakosane risikinapo.

Yasu

Yasu hauaka wo rea maiya amo, aporo metakira Yasu yano taesa risiapo. Yasu yano yakaisa risiasamo Yasu Keresoaki Nasare aporo, airapo. Sawi wo popasane Yasu Parápase tipura makesa reapo. Asiāne Nasare aporo Yasuane rusua kurakano, Yasu Parápaseane tonotaesapo. (Matiu 27:15-26)

Herote

Yu aporomo hauaka ane Rome kamani aporomo asekea reapo. Herotemo Yu aporoane unihaeaka asekea rekeasimo Rome kamanimo murikimasapo. Ipu someraka, Heroteane unihae kárapo, airapo. Yu aporoane sesehoasimo, Kotimo ape rakaritaesane Herotemo efera hunia kisiapo. Asiane Herotemo Yu aporo yakai rusua kusuasamo, ipu eane hisisapo. Arirakano Yasu takapesa maiya amo, Herotemo Yu aporomo aporo hokosa fete suane rukua fasapo. (Matiu 2:1-22)

Herote ane kusuakipoko, epo hokosa kitafusuane e finihaoa risiapo. Arirakano epo hokosa meta yano motosa Herote Atipasemo Kariri hauaka asekea reapo. Herote ipi ata yakosa amo Yone he tapukumarerane mawi patesapo. (Maka 6:14-29) Arirakano Herote hakása yiamo Yasu hukurusuapo. (Ruki 23:6-12) Arirakano Herote meta ipi makasa kaua yakosa ane Yutia hauaka á reke, Keresoa paosa aporoane mokoatikisapo. Mokoatikiraka Yonemo mamanea Yamese ane rusua kukua, Pitane soko tipura makesapo. (Tarira Aporo 12:1-23)

Aporo Kekepo Risia amo Yanoane Oyapo.

Aporo Raipa Roposa

Isiapo hauaka wo aporo raipamo aporo posepoko makata rakisiapoko makata ropo marapo. Arirakano hauaka metakira aporo metakiramo ipoko makata rakisimo, aporo makata forosane soko, aporo tákehoanafonosane soko, roponapo. Aporo roposa amo roposa wafaya akipoko wafororaka rakirapo. Wafororaka rakisiane makata ropo marafapo. Aporoane aporo posemo roposasamo, kamenakanafaraka matewanapo. Aporo raipa roposa amo ipi hemakapusua anaka ainafapo. Aporo posemo ipi hemakapusua hákasane kekemanapo.

Aporo Urihae

Isiapo aporo fanane Unihaepo, airapo. Iyipi hauaka á aporo hinamomo unihaeane Feropo, airapo. Arirakano Rome aporomo unihaeane Sisapo, airapo. Ikirisi meaka Kinipo, airapo. Asiamo Fero soko, Sisa soko, Kini ayiáka yano horane namo kakaro ipu yanoane ayafapo. Ipu makata rakisimo ayiáka yano kasapo.

Fereze Aporo

Yu aporo metakira namina susu parakuraka kikisiraka risiapo. Kotimo somemane Moseseaki kasane aporoamo koteaka kekemahoasimo somemane metakira ripaka marekea someraka risiapo. Asiamo aporomo somemaneane ipu makárasapo. Ipu somemaneane Yasumo kekemahoanafonorakano ipu Yasuaki rakumarekea risiapo.

Pirisiti Aporo

Mosesemo ipi mae Erone reapo. Maiya amo Kotiane kekerehoasimo Kotimo Farae ape kiniesapo. Kinierakano Yu aporomo Farae Apeane kisiapo. Arirakano Kotimo Farae Apea rakisimo Eronemo pirisiti aporo fanaraka rakisimo murikimasapo. Asiamo Eronemo wainepe pusua aporoane su pirisiti aporo risiapo.

Fana pirisiti aporomo Kotimo Farae Apea makata rakiraka risiapo. Arirakano Yasu hauaka wo rea maiya amo, pirisiti aporo yakaimo Kotimo ape Yarusarame sitia makata rakiraka risiapo.

Pirisiti aporomo aporo hinamo supoko farimaka kurikuriraka risiapo. Arirakano aporo hinamomo makata watikisane Kotimo mafahoasimo, makata kakayia mokoa pesane, pirisiti aporomo rukua paikia Kotiaki karaka risiapo.

Rífafi Aporo

Wate fana Yakopemo aporo hokosa kenosu hokono murisiapo. Aporo hokosa kenosu á hokosa metane Rífafi yano motosapo. Rífaimo wainepe pesane Rífafi aporo ira yano motosapo. Rífafi aporo ira amo Kotimo apea raiparaka rakisiapo. Arirakano ipu pirisiti aporomo rakirane rakisiafapo.

Satusi Aporo

Satusi aporo airakane, namo kakaro aporo ira yanofapo. Satusi aporo airakane, namina kikisiraka haku kepomarekea rakiraka risiapo. Satusi aporo metakira piristi aporo rakisiapo. Satusi aporo airakane metakira mone kára toa aporopo. Metakira yano káraraka risike, Yu aporomo kanisororaka rakiraka risiapo. Satusi aporomo hemakapuraka, aporo kusuane turikia pukusafapo, aíyaka hemakapusuapo.

Porofete Aporo

Wate fana Ho Kotesa hauaka wo peasiraka, Kotimo ipi hemakapusuane aporo hinamo suaki some kakasimo, ipi some kará porofete aporoaki somesapo. Porofete aporoamo kaikia, aporo hinamoaki kakama some kasapo. Porofete aporo metakira risiane Aesaya, Iraiya, Tanio, arirakano Yona ayapo. Arirakano aporo metakira soko porofete apororaka risiapo. Maiya omo soko Kotimo aporo hinamoaki ipi hemakapusuane somehoasimo, porofete aporoaki somerapo.

Hauaka Yano Motosa Amo Kepoane Soko, Aporo Yano Taesa Amo Kepoane Soko Oyapo.

Isiraya

Aporo hinamo su hauaka kara wo Kotimo ainane hemakapusimo, Eparahamemo soko epo wainepe pesa aporoamo soko iaki tarisimo murikimasapo. Arirakano Eparahamemo maeya Aisakepo. Aisakemo maeya Yakopepo. Yakopemo aporo hokosa kenosupo. Aporo kenosu amo aporo ira kenosu faserepesapo. Yakope sisimaraka rea maiya amo, Kotimo e yanoane sanasiraka, Isiraya yano motosapo. Asiamo Yakopemo wainepe pesa aporo hinamoane Isiraya aporo hinamopo, airapo.

Yasu hepene yapura hisiakipoko, Rome ame aporomo Yu aporo hinamoane rukua mokoatikisapo. Rukua mokoatikirakano Yu aporo hinamomo ipu namina hauaka ane metakarikia tekatarikia pusuapo. Amo patera Yu aporomo hauaka ane yunu aporo metakiramo asekeea risiapo. Ayipe pukua, keremisi 1948 amo kepomarekea, hauaka ane Isiraya hauakapo, aíyaka hauaka kara wo kamani yakaimo aoraka someaka masapo. Asiamo Isiraya aporo hinamo hauaka kekepo arisiane metakarikia, Isiraya hauaka á pukua risikinapo. Asiamo Isiraya ane yano motosane hauaka soko, aporo hinamo soko, Isiraya aíyaka yano motosapo.

Yu Aporo

Wate fana Yosuamo aporo hinamo karikia peraka, iane Kenane hauaka á pauraka risiapo. Hauaka ane parakuraka, sape meta yano motosa Yuta hauakapo. Asiamo aporo Yuta hauaka á risiane, aporo metakiramo someraka, iane Yu aporopo. Keseke aporo ira keno suane aporomo someraka, iane Yu aporopo, airapo. Maiya omo soko isiapo someraka, iane Yu aporopo, airapo.

Hipuru

Hipuru aporoane Yu aporopo, airapo. Wate fana Eparahame rea maiya amo, ipu someraka Eparahame Hipuru aporopo, aisapo. Epo makasa kaua wainepe pusua maiya amo, i Iyipi hauaka risia maiya amo iane Hipuru aporopo, aisapo. Maiya omo Yu aporoane isiapo Hipuru aporopo, airafapo. Asiāne Isiraya hauaka á Isiraya aporo risikino ipu Hipuru meane somerapo.

Hauaka Soko Taone Soko Yano Taesane Oyapo.

Sameria

Sameria taoneane soko, Sameria hauaka ane soko, Yarusarame sitiane makama ra, he Kariri ane makama roraka, titipia rekenapo.

Wate fana Yu aporoane Sameria hauaka á risiapo. Aporo yakaimo Kotimo some-maneane metakarisiasamo Kotimo iane fanasisapo. Asiria aporo unihae, ipi ame aporoyaki peraka, Sameria aporoyaki yunu wekea, Sameria aporoane marokesapo. Marokeraka, Sameria aporo hinamo yakai Asiria hauaka á karikia pukua, i risikiasimo murisiapo. Arirakano Asiria aporo unihaeamo Asiria aporo hinamo metakira karikia pukua, Sameria hauaka á risikiasimo murisiapo.

Asiasamo Asiria aporo hinamoane Sameria aporo hinamoyaki sarimaraka sua-suara ka risiapo. Asiasamo Sameria aporomo Kotimo somemaneane koteaka keke-masafapo. Arirakano Kotiaki kekerehoasimo Kotimo ape Yarusarame sitia kisiiane ipu metakarisiapo. Ipu Kotiaki kekerehoko ape meta Sameria taoneane makeraka kisiapo. Yu aporomo hemakapuraka, "Sameria aporoamo Kotimo somemaneane kekemarakarifapo," aíyaka hemakapuraka rakumarekea risiapo.

Yarusarame

Wate fana Tefete unihaeaka reamo, epo ape soko Kotimo ape soko kiakosakipoko Yarusarame sitiane murikimasapo. Asiasamo Yarusarame sitiane Tefetemo sitipo, airapo. Arirakano Yasu hepene yapura hisiakipoko, Rome aporomo Yarusarame sitiane rakanitaesapo. Rakaritaesa amo patera, aporo metakiramo Yarusarame sitiane efera hunia kisiapo. Arirakano maiya metakiramo yunu aporomo pekea, Yarusarame sitiane mokoatikisapo. Maiya omo Isiraya aporomo Yarusarame sitiane asekea risikinapo.

Yarusarame siti tipia ape yakai kisiiane, ekemo rururaka toperemotosapo. Top-eremotosasamo tapesekeno, yao takua ape yakai kisiapo. Aporomo someraka Yarusarame siti Pate soko, Yarusarame siti Kawe soko kisiapo, airapo. Yarusarame siti Kawe kisiiane hauaka wo aporomo kisiapo. Arirakano Yarusarame siti Kaweane Kotimo hepene yapura maroposane hakupo. Kotimo sitiane aporo hauaka wo risiamo aserafapo. Yonemo hákasa asekea, Some Faremarea Tarisia sawia popasapo. Yarusarame siti Kawe Kotimo kisiiane hepene yapunaka peakosapo.

Rome

Rome aporo unihae Sisamo hauaka sua yunu wekea winiraka, aporo hinamoane epo unihaeaka asekea reapo. Asiamo hauaka suane epo asekea rekeasimo, kamani aporo yakai murikimasapo. Murikimaka, Pairatemo Yutia hauaka ane asekea rekeasimo murikimasapo. Hauaka wafayamo Rome kamaniyaki werapaka, epo Rome ame aporo yakai amo asekea risikiasimo pusiesapo. Epo Herotemo unihaeaka asekea rekeasimo murikimasapo. Asiasamo Yu aporomo saperaka Rome kamaniane metakarikia pusimo ipu hemakapusuapo. Arirakano Yu aporomo hemakapuraka, "Yasumo isu unihaeaka asekea reke, Rome kamaniane metakarikia pusiehokosapo," aíyaka hemakapusuapo.

Yutía

Wate fana Tefete unihaeaka rea maiya amo, epo Yu aporo hinamo suane asekea reapo. Maiya amo, Yarusarame siti makeraka hauaka ane yano motosa Yúta hauakapo. Arirakano hauaka sape metane Isiraya hauakapo. Arirakano Yasu hauaka wo pekea rea maiya amo, Yu aporomo hauaka ane parakusapo. Parakuraka Yarusarame siti makeraka reane Yutía hauakapo, airapo. He Kariri makeraka reane Kariri hauakapo, airapo. Tipiane Sameria hauakapo, airapo.

Hauaka Watikisane

Fana Kiriki meaka Nu Tesetamane popasa aporoamo Hétisi hauaka ane soko, Kehéna hauaka ane soko popasapo. Arirakano aporomo Kiriki meane maparitaeraka Ikirisí meaka maroporaka popasapo. Maroporaka popasane Hétisi hauaka yano motosane soko, Kehéna hauaka yano motosane soko, popasafapo. Hauaka tetáne watikisasamo ipu Heao hauaka yano motosane popasapo. Arirakano maiya omo aporomo Heao

hauaka popasane koteaka takekeea hemakapuraka, fana Hétisi hauaka popasane efera hunia Hétisi hauaka poparakanapo. Asiāne Kehéna hauaka ane Heao hauakapo, aíyaka poparakanapo.

Hétisi Hauaka

Hétisi hauaka ane aporomano kusua hoane i hukurukusa maiya ane fasere peasisimo hauaka á kau risikinapo. Yu aporo metakiramo someraka, Hétisi hauaka ane sapea aporomano watikiaka risia kusua hoane kau risikinapo. Arirakano enonoraka sapea aporomano koteaka risia kusua hoane sape meta kotesa á kau risikinapo, airapo.

Heao Hauaka

Heao hauaka ane Kiriki meaka Kehéna airapo. Kehéna kepoane oyapo. Yarusarame ruru yao takua Kehéna hauaka reapo. Wate fana Kehéna hauaka á, Yu aporo unihae metakiramo namina hokosa rukua, eke kima á paikia, kotafe kotaiki kasapo. Keseke makata aina watikisane Yu aporo unihae metamo rukupatesapo. Asiamo hauaka ane watikisasamo ipu makata pepeno soko makata kusuane soko mokoateraka, iramo pairapo. Kehéna hauaka á ira paisia ane kopakapurafapo.

Kaisie. Kehéna hauaka Yarusarame siti makeraka reane namo kakaro Heao hauaka ayafapo. Kehéna hauaka ane watikisasamo aporomo someraka, Kotimo fanasina hauaka ane Kehéna asíapo, airapo. Keseke hukuarura maiya amo, Kotimo aporo hinamo takekeea parakuraka, aporo hinamo watikisane Heao hauaka á fanasihoko pusiehokosapo. Heao hauaka á ira rufi kopakapurafaraka yaiya inaraka rekeakosapo.

Kotiaki Kekerena Apeane Oyapo.

Farae Ape

Wate fana yao kauanea Mosesemo Yu aporo hinamo su karikia pusua maiyamo, Kotimo Moseseaki someraka, “Anoaki kekerehoko repo Farae Ape kinie,” aisapo. Asiamo repo Farae Apeane hemakapuko Hipuru sawia sapota 9 á menohoanie. Arirakano Farae Apeane Pisini meaka, “Haus sel,” aíyaka popasapo.

Kotimo Ape

Yarusarame sitia Kotimo apea pirisiti aporomo rakisiapo. Aporo hinamomo ipu makata watikisane mafahoasimo, saro ponomakau soko metao, saro sipi soko metao maka perakano, pirisiti aporomo rukua paikia Kotiaki kasapo. Ayíáka Kotiaki rukua kará ape meta kisiafapo. Yarusarame sitia hákasa pirisiti aporomo paikia Kotiaki kasápo. Arirakano Yasu hepene yapura hisiakipoko, keremisi 37 su faraka, Rome ame aporomo Yarusarame sitiane rakaritaesapo. Rakaritaeraka Kotimo apeane soko rakaritaesapo. Rakaritaerakan Yu aporomo Kotimo apeane efera hunia kisiafapo. Arirakano Kotimo apeane Pisini meaka, “Tempel,” aíyaka popasapo.

Sése Ape

Yasu Kereso hepene yapura hisiakipoko, Keresoa paosa aporo hinamo sarimarka, toa apeane sése apepo, airapo. Asiamo sése apea Kotiane soko, Yasu Keresoane soko, makáraraka kekerenapo. Arirakano sése ape yano metane kurikuri apepo, airapo.

Yu Aporomo Sarimana Ape

Yu aporomo hauaka sua, apea soko, taonea soko, Yu aporomo Kotiaki kekerehoko Yu aporomo sarimana apea perapo. Ape á Yu aporo sisimamo soko, Somemané Tisa aporomo soko rakirapo. Fenena maiya amo ipu Kotimo sawi popasane menoraka, Kotiaki kekereraka kesaraka, ayíáka Kotiaki kurikurinapo. Apea sere metakiramo Somemané Tisa aporomo Yu aporomo hokosane sukurunapo. Arirakano makata meta fasereperakano soko, apea i sarimarka me rurapo. I su auaraka risikiasimo, apea makata hukururaka soko hukururapo. Arirakano Yu aporomo sarimana apeane Pisini meaka, “Haus lotu,” aíyaka popasapo. Asiāne Yu aporomo sarimana apea ipu Yasu Keresoane makáraraka kekerahoanafononasamo, isiapo kurikuri apepo, aíyaka popasafapo.

Kotimo Aporo Hinamoyaki Someaka Masane Oyapo.

Kotimo Fana Someaka Masane

Fana Kotimo Yu aporo hinamoaki someaka masapo. Kotimo ipi somemane Mosesaki somerakano, Mosesemo aporo hinamo suaki somesapo. Yu aporomo Kotimo somemane ane kaikia kekemarakanone, ane Kotimo iane asekea rekeakosapo, aisapo. Airakano Yu aporomo someraka, "Isiapo Kotimo somemaneane kekemahokosapo," aisapo. Airakano Mosesemo makata kakayia yapimo aporo hinamoane wakirusuapo. (Kisim Bek 24:6-8) Asiamo Kotimo Fana Someaka Maraka ayiakakosapo aisane yapimo murikimaka tarisiapo.

Kotimo Kawe Someaka Masane

Kotimo aporo hinamo su ararehokosane Kawe Someaka Masapo. Aporo hinamomo Yasu Keresoaki himu hakásaraka hemakapukua risikinone, Kotimo iane mafasiakosapo. Asiamo aporo hinamomo hemakapusimo Yasu ira matopesa paremarekeea kusua maiya amo, Yasumo yapimo tarisiapo. (Hipuru 7:22, 8:6, 10:16, 12:24)

Yasumo Yano Motosa Metakirane Oyapo.

Aporomanomo Tákeane

Yasu hauaka wo pekea reke, aporo hinamo suaki Yasumo kakama someraka, "Ano Kotimo hokosapo," aiyaka somesafapo. Epo some akara sereamo, epo ipiane someraka, "Ano Aporomanomo Tákepo," aisapo. Yasuane ipi kakaro Kotipo, arirakano eane kakaro aporopo.

Kereso

Isiapo Yasu yano horaka Yasu Kereso airapo. Epo yano motosa kakaroane Yasupo. Keresoane epo makata rakira yano motosapo. Arirakano aporo metakiramo makata rakira aporo ayíka somerapo. Paseto, Tikone, Kanisoro aihora aiyaka airapo. Kereso kepoane aporo unihaeaka rekeasimo Kotimo murikimasa aporoane Keresopo. Wate fana Kotimo Yu aporo ararehoasimo epo murikimasa aporoane pusiehokosapo, aisapo. Asiamo e perakarihoamo Yu aporomo kau risiapo. Aporo ane, Yu aporomo namina meaka "Mesaya," airapo. Arirakano aporo ane Kiriki meaka, "Keresopo," airapo.

Yu Aporomo Hokono Kesane Oyapo.

Ape Farimaresane Hemakapuko Hokono Kesane Oyapo.

Fana Mosese rea maiya amo, Yu aporo hinamo Iyipi hauaka risia maiya amo, Iyipi aporomo Yu aporo hinamoane rukua mokoatikisapo. Iyipi hauakane metakarikia pusimo, Kotimo Yu aporo hinamoane araresapo. Yu aporomo saro sipi yapi ane ipu ape ikia koroa paisiapo. Paisikino, ipu hokosane Kotimo hepene aporomo rusuafapo. Arirakano ipu apeane hepene aporomo farimaresapo. Asiāne Iyipi aporomo apea saro sipi yapi paianafonosekeno, ipu hokosa fana hákasane Kotimo hepene aporomo rupe pusuapo. Asiamo Kotimo Yu aporo hinamo mafasisiane hemakapukua namina yáki suamo hokono kerapo.

Farawa Pirianafonosane Hemakapuko Hokono Kesane Oyapo.

Yu aporo hinamo Iyipi hauaka aeyaka foaka teketarikia pukusasamo, maiya hi fasekeno, farawa pirianafonosane paikia nesapo. Asiamo yáki suamo Yu aporomo Ape Farimaresane Hemakapuko hokono keraka, Farawa Pirianafonosane soko, hemakapuko hokono kerapo.

Penekose Hokono Kesane Oyapo.

Yu aporomo Ape Farimaresane hokono keraka, sere fifiti su (50) menoraka Penekose hokono kerapo. Penekose hokono akera maiya amo, Yu aporomo makata nakosa súrakano Kotiaki súseaka karapo. Arirakano Yu aporomo Penekose Hokono keraka risia maiya amo, Kotimo ipi Ho Kotesane hauaka wo pusierakano pesapo.

Ape Mano Kisiane Hemakapuko Hokono Kesane Oyapo.

Yu aporo hinamo Iyipi hauaka metakarikia, yao kauanea koraka risia maiya amo, ipu ape mano kikia waka risiapo. Keseke i Kenane hauaka á pauraka namo kakaro apeane kisiapo. Kotimo araresane ipu hemakapuko hokono kesapo. Asiamo yáki

suamo ipu apea makeraka ape mano kikia, sokō hakásamo Kotiaki súseraka risike, hokono kerapo.

Yu Aporomo Makata Ainane Oyapo.

Aporo Kau Hahaeraka Patenane Oyapo.

Wate fana Eparahameaki Kotimo someraka, ‘Ne soko nōmo aporo ira wainepe pukusane soko nōmo murikimaka, aporo hinamo suane hauaka wo risiamo nōmo ainane hemakapusimo, neane nōmo murikimaranap. Asiamo repo hemakapusimo, aporomo tumuru makata ane kau hahaeraka patehoanie. Keseke Kotimo somemaneane Moseseaki kasa maiya amo, epo someraka, “Aporo hokosa fete takapesa maiya ane menorape hikia sere karia paurakano, epo tumuru makata ane kau hahaeraka patehoanie,” aisapo.

Asiamo Kotimo somemane ane Yu aporomo kekemaraka, ipu hemakapuraka, “Isuane Kotimo murikimasa aporopo,” aíyaka hemakapuraka, ipu namina yia makáranapo. Arirakano keseke aporomo Yasuane hemakapusimo, Poremo some karakano, Yu aporohoanafonosane Keresoa paosapo. Asiamo Yu aporo Keresoa paosa aporomo someraka, “Yu aporohoanafonosane Keresoa paosane ipu tumuru makata ane kau hahaeraka patehoanie,” aisapo. Airakano Poremo someraka, “Yu aporohoanafonosane Yu aporo parihoasimo, epo tumuru makata ane kau hahaeraka patehoafunupo. Asiāne Yu aporohoanafonosane Keresoa paohoasimo, epo tumuru makata ane kau hahaeraka patehoane siahoasifareapo. Keresoa paohoasimo, Yasu Keresoaki himu hakásaraka hemakapurane káraro,” aisapo. Some one repo hemakapusimo Tarira Aporo 15:1-35 á soko, arirakano Karesia 2:1-6 á soko, arirakano Karesia 5:1-15 á soko menohoanie.

Fenena Maiya

Kotimo hauaka kara one rakisia maiya amo, epo sere namasumo rakikia, sere yatip-inumo e fenesapo. Asiamo Yu aporomo sere yatipinuane hemakapuraka fenenapo.

Arirakano Yasu kukua turikia pusuane menomo e turikia pusuapo. Asiamo Keresoa paosa aporomo sere ane hemakapukua fenenapo.

Arirakano Yu aporomo sere menonane soko, isiaipo Namo aporomo sere menonane soko, hakupo. Maiya omo Yu aporomo fenena maiya sere yatipinuane isiaipo namapo, airapo. Arirakano Yu aporomo sere meno airakano, isiaipo yatipinupo, airapo.

Yu aporomo fenena maiya ane kakoreamo sere maiya tuakeramo kepomarekea, namamo sere maiya tuakeramo fanapo.

Aporomo Someraka, “Ne Ano Hokono Tumuru Takua Kayae,” Aira Amo Kepoane Oyapo.

Aporo unihaeemo aporo metaki someraka, “Ne ano hokono tumuru takua kayae,” airakanone, aporoane epo makáraraka marerakanapo.

Yu Aporomo Kanisoro

Yu aporomo kanisoro airakane, kamani aporomo kanisoro ayafapo. Pirisiti aporo fanane soko, pirisiti aporo kára yakai ane soko, Yu aporo sisima ane soko namina sarimaraka, Yu aporomo kanisoropo, airapo. Kanisoro aporo sarimasane, aporo yakai ane Satusi aporopo. Makata maroponane soko, makata hukururane soko kanisoro aporoamo somerapo. Asiamo Yasu wasere masa maiya amo kanisoro aporo suane sarimaraka, Yasuane hukurusuapo.

Some Metakirane Oyapo.

Koróto

Koróto hauaka tamо atura hauakayaki hakásа suasuaraka torapo. Aporomo kokoa, hauaka rakea aseraka morapo. Koróto namoane makosakipoko aporomo ira pairapo. Ira paikia makata pepeno ane paikia fanapo. Koróto namoane aporomo mokoa yokotae hae soko, ikiare menane soko rakirapo. Korótomo makata rakisiante mone káramo roponapo. Arirakano koróto ane keamerakayia ho piakaenapo. (1 Pita 1:7)

Koróto mokoako aina ayíáka, siufa soko mokoakosakipoko yainapo. Arirakano siufa ane pakaerakaya ho piakaenapo.

Kiriki

Hauaka meta yano motosa Kiriki hauakapo. Kiriki aporo hinamomo Kiriki meaka somerapo. Kotimo Kawe Someaka Masa sawi ane wate fana aporo metakiramo Kiriki meaka popasapo. Popasane sanasiraka Ikirisi meane soko, Pisini meane soko, Namo Meane soko popasapo. Popasa amo kepoane Kiriki me ayapo. Arirakano Kiriki aporo airane Yu aporo hoanafanosaki airapo.

Hauaka

Pisini meaka “kantri,” soko, “provins” soko aíyaka popasane, isiapo Namo meaka maparitaeraka popahoasifasekeno “hauaka” aíyaka popasapo. Repo hemakapuraka, hauaka aíyaka popasane hauaka wakasemarakanareapo, aíyaka hemakapukupo. Hauaka aíyaka popasane, “kantri” soko, “provins” soko isiapo hauaka popasapo.

Taone, Siti

Isiapo “taone” aiyaka popasekenone, ane tesene hákasa popasapo. Arirakano “siti” aíyaka popasekenone, namo kakaro tesene kára ane popasapo.

Kingdom Bilong God

Pisini meaka “Kingdom bilong God” aíyaka popasapo. Popasa amo kepoane oyapo. Kini aporoane Namo meaka aporo unihaepono, airapo. Aporo unihaeemo ipi aporo hinamo unihaeaka asekea reane soko, ipi hauaka asekea reane soko, Pisini meaka “kingdom” airapo. Asiamo “kingdom bilong God” airakane, Kotimo aporo hinamo unihaeaka asekea reane soko, epo hauaka asekea reane soko, kepoane ayapo. Arirakano Matiumo Kotimo yano motosane mawakasemanapaka, epo “kingdom bilong God” aíyaka popasafapo. Matiumo “kingdom bilong heven” aíyaka popasapo. Makata tetane hasása yiayapo.

Pikinini Bilong Man

Pisini sawia Yasumo somesane úyaka popasapo, “Mi Pikinini bilong man.” Aíyaka popasane repo hemakapuraka, “Ano aporomo hokosareapo,” aíyaka hemakapukupo. Repo Yu aporomo ainane hemakapusua satiki, repo Yasumo some kepoane hemakapuraka, “Eane kakaro aporopo, aíyaka hemakapufunureapo.

Arirakano Yasuane Pisini meaka, “Mi Pikinini bilong Man,” aíyaka popasane, Yu aporomo kaikia hemakapuraka, “Yasuane Kotimo murikimasa apororeapo,” aíyaka hemakapusuapo. Asia ayíáka wate fana Kotimo ipi porofete aporoaki someraka, “yu, pikinini bilong man” aiyaka somerakano Kotimo Fana Someaka Masa Sawia popahoareapo.

Yis

Makata pirira Pisini meaka yano motosa “yis” airapo. Yisimo ainane oyapo. Yisimo makata torenapo. Toreraka makáranapo. Hinamo farawa paikinako yisi wakasema farawayaki kekeroraka, motokoa asekea nina, yisimo rakiraka reke farawa suane makáranapo. Arirakano yisimo makata torenasamo Kotimo sawia taku meaka makata watikisane yisipo. Asiâne Matiu 13:33 á Yasumo yisiane someraka, yisiane makata kotesa asíapo.

Glori

Pisini meaka “glori” aíyaka popasa kepoane oyapo. Kepo meta, faesa kotesane, airapo. Asiamo Koti hepene yapura reke faesayaki rekenapo. (Ru 2:9, 9:32; TA 22:11, SFT 21:23)

Arirakano kepo meta, wakapu kara ane, airapo. (Yo 1:14, 2:11, 11:40; 2 Te 1:7; SFT 18:1) Asiamo Yasu pariaperamo ipi wakapu kára faesayaki peakosapo. (Mt 24:30; Ru 21:27; Mk 13:26)

Arirakano kepo metane oyapo. Koti ipi kárasasamo isiapo e yano motosane makáraraka kekereraka somerapo. (Mt 25:31; Ru 2:14; Yo 11:4; SFT 1:6, 4:11)

Pisini meaka “holi” aiyaka popasa kepoane oyapo. Kotimo ipi ainane namo kakaro ereketae kotesa susupo. Makata meta watikisa rekenafapo. Asiasamo Kotimo ipi ainane “holi” airapo. Asiasamo Kotimo ipi ainane “holi” airapo. (Yo 17:11; SFT 3:7, 4:8, 15:4)

Arirakano makata watikisane kikisiraka, Kotipoko koteaka susu rakira ane “holi” airapo. Arirakano Ho Kotesane ipi “holi” airapo. Ho Kotesayaki makata watikisane rekenafapo. Ho Kotesane kakaro kotesa susupo. (Ru 1:35; TA 4:27; 2 Ti 3:15; 2 Pi 1:21)

Arirakano Kotimo makata ane rakisimo Ho Kotesane murikimasasamo eane “holi” airapo. Arirakano makata meta yakapa “holi” airare? Aporomano soko, ape soko, makata metakira makata watikisane kikisiraka, Kotipoko murikimaka kotesa susu ane “holi” airapo. (Mk 6:20; TA 6:13; Ro 12:1, Ta 1:8, 2 Pi 3:11; SFT21:10, 22:11)